

Eyacuiñajjija Esohui

El Nuevo Testamento

Ese Ejja



Eyacuiñajjija Esohui

El Nuevo Testamento en Ese Ejja de Bolivia

Primera edición

© 1984, Liga Bíblica Internacional

Segunda edición

© 2012, Liga Bíblica Internacional

www.ScriptureEarth.org



Este obra está bajo una licencia Creative Commons Reconocimiento-NoComercial-SinObraDerivada 3.0 Unported.
<http://creativecommons.org/licenses/by-nc-nd/3.0>

ÍNDICE

	página
MATEO	San Mateo (Mt) 1
MACOSO	San Marcos (Mr) 94
NOCA	San Lucas (Lc) 154
HUANI.....	San Juan (Jn) 252
HECHO	Hechos (Hch)..... 328
SHOMANO	Romanos (Rom) 422
1 CONITIO	1 Corintios (1 Co)..... 469
2 CONITIO	2 Corintios (2 Co)..... 515
JANATA	Gálatas (Gá)..... 544
EPESIO	Efesios (Ef)..... 564
PINIPESE	Filipenses (Flp)..... 580
CONOSENSESE.....	Colosenses (Col) 590
1 TESANONISESE	1 Tesalonicenses (1 Te) 599
2 TESANONISESE	2 Tesalonicenses (2 Te) 608
1 TIMOTEO.....	1 Timoteo (1 Ti)..... 614
2 TIMOTEO.....	2 Timoteo (2 Ti)..... 626
TITO	Tito (Tit) 634
PINEMO	Filemón (Flm) 640
EMEO	Hebreos (Heb) 643
SANTIACO	Santiago (Stg)..... 682
1 PENO	1 Pedro (1 Pe)..... 695
2 PENO	2 Pedro (2 Pe)..... 707
1 HUANI.....	1 Juan (1 Jn) 714
2 HUANI.....	2 Juan (2 Jn) 725
3 HUANI.....	3 Juan (3 Jn) 727
JODE	Judas (Jud)..... 729
APOCANISI	Apocalipsis (Ap) 733
Mapas	779

MATEOHUA ESOHUI QUEA PAME NEE TEHUE CANAJE JESOSA QUITOJA

MATEO

Jesosa Quitoja etiiquiana
(Noca 3.23-38)

1 ¹Jiquio esohui etehue'yo Jesosa Quitoja etiiquiana. Yahuajo jama poa ba'a: Dabi Jesosaja etiiquiana poa, Amajama pealai. ²E'e, jamaya poa: Amajamaja bacua ejja Isaaca bajjani poa. Isaacaja bacua ejja Jacobo bajjani poa. Jacoboja bacua Joda bajjani poa; echahua mese cuana enequia poa pealai. ³Jodaja bacua cuana Panesi bajjani, pea Sana bajjani poa, Tamaja mejo poa. Panesija bacua Esomo bajjani poa. Esomoja bacua Anami bajjani poa. ⁴Anamija bacua Aminanami bajjani poa. Aminanamija bacua Nasoni bajjani poa. Nasonija bacua Sanamo bajjani poa. ⁵Sanamoja bacua Bosi bajjani poa, Shajamija mejo poa. Bosija bacua Obeda bajjani poa, Shotija mejo poa. Obedaja bacua Isai' bajjani poa. ⁶Isaija bacua emeshi mese Dabi poa. Dabija bacua Sanomoni bajjani poa. Sanomonija enaese e'ahuemano poa, Onija quijjojea, Dabija huana'yo poa. ⁷Sanomonija bacua Shobihami bajjani poa. Shobihamija bacua Abiase bajjani poa. Abiaseja bacua Asa bajjani poa. ⁸Asaja bacua Josapati bajjani poa. Josapatija bacua Jonami bajjani poa. Jonamija bacua Osia bajjani poa. ⁹Oisiaja bacua Jotami bajjani poa. Jotamija bacua Acasi bajjani poa. Acasija bacua Esequia bajjani poa. ¹⁰Esequiaja bacua Manase bajjani poa. Manaseja bacua Amoni bajjani poa. Amonija bacua Josia bajjani poa. ¹¹Josiaja bacua Jeconia bajjani poa; echahua mese cuana enequia poa pealai. Jeconia nequinajejo, Babinonia dejja cuaa Isaeni cuana iña majje dojo ca poa oja meshi yasijje sosema' chaco meeya.

¹²Majoya Babinonia meshi yasijje dojo majje Jeconiaja bacua Sanati cuaya poa. Sanatija bacua Sonomame bajjani poa. ¹³Sonomameja bacua Amioni bajjani poa. Amionija bacua Eniaqui bajjani poa. Eniaquija bacua Asoni bajjani poa. ¹⁴Asonija

bacua Sanoco bajjani poa. Sanocoja bacua Aquimi bajjani poa. Aquimija bacua Eniodi bajjani poa. ¹⁵Eniodija bacua Eneasa bajjani poa. Eneasaja bacua Matani bajjani poa. Matanija bacua Jacobo bajjani poa. ¹⁶Jacobojá bacua Jose bajjani poa. Oya Maniaja yahue poa. Maniaja bacua Jesosa bajjani aca poa, Quito bajjani pea'ai poa, Eyacuiñajji huoojea'yo ojjaña cuana jaahuanajji.

¹⁷Jamajjeya Amajamaja bacua ejja tii majje jea ca poa pea. Majoya tii majje ohuaya pea jea ca poa. Jamaya aca poquiapoquia poa. Quijje nei etiiquiana Dabi cuaya poa. Etiiquiana Amajamaja jeaja osecua cuana 14 poa Dabi cuaya jjimahuajo. Majoya oya jayojja Dabija bacua ejja tii majje jea ca poa pea. Tii majje ohuaya pea jea ca poa. Quijje nei Dabija osecuaja Jeaja osecua cuana 14 po majje, dejja mase cuaa etiiquiana cuana Babinonia meshi yasijje dojo ca poa. Majoya Babinonia meshi yasijje poqui majje oya jayojja aca poquiapoquia poa. Majoya quijje nei Jesosa Quito cuaya poa Joseja tii mee. Ma etiiquinaja jeaja osecua cuana 14 poa Jesosa Quito cuaya jjimahuajo. E'e, jamaya poa.

Ebacua Jesosa Quito cuaya poa (Noca 2.1-7)

¹⁸Jesosa Quitoja ecuaya'yo jama poa ba'a: Joseja Mania emese na poa. Mania bii ania poa; dejja cuana ba jjima poa. Jamatii o'ejji poa. Eyacuiñajji Edojjoshahua Pameya ebacua ba'e mee ca poa, Maniaja ebacua. ¹⁹Jose quea pame nee poa. Jamajjeya Mania o'ejji poajo jjahuanaqui sa po ajja poa. Jjashahuabaquia poa jama ba'a: —E'e pojja'a Mania pea cojjoji poanaje. Jamajjeya oya jjamejoquinaje. Eyaya oya cajaa aje. Quehuajje cajaa aje Mania, pea cuanaja ba jjima. Jamajjeya pea cuana Maniajo maimai ajja poaje.

²⁰Jamaya jjashahuubaquianijo Joseya cahuiba ca poa. Oe Eyacuiñajji esohuidojoji miminaje onijke. Jama poanaje ba'a: —Jose, ja'a Mania cajaa ajji! ¡Oya huanacue! Oja bacua Eyacuiñajji Edojjoshahua Pameja ba'e mee. ²¹Ojaya ebacua cuayaje. Jamajjeya jiquio ebacua tii majje ojaya epeeiji cuanaja mimishi cuijeal'yojji poaje. Jamajjeya ojaya ebajjani poaje Jesosa.

²²E'e, Eyacuiñajji esohui huohuijija esohui yahuajo nei nei jayojjaya jjeya nei jamaya poani. Jamaya yahuajo poa ba'a:

²³“Epona sho'i bii ani jamatii o'ejji poanaje. Cuayajo oja bacua bajjani acaje Emanuel. Ese Ejjaja esohuijo ca jama ba'a: Eyacuiñajji ecuana nijje nequi”. Jamaya Joseya cahuiba ca poa.

²⁴Majoya shequi'yo majje Eyacuiñajji esohuidojoji esohuijo Mania huana canaje, Joseya. ²⁵Jamatii ebacua cuaya jjimajo, Joseja Mania napa jjima poa. Ebacua cuayajo Jesosa bajjani acanaje.

Dejja cuana majametajo jjashahuuba neineiquiani poeyanaje Jesosa baa

2 ¹Jesosa cuayanaje Jodea meshijo, Benena cuiñajijo. Cuayanajejo dejja Enode bajjani emeshi mese poa. Jamajjeya Jesosa Quito cuayanajejo, pea dejja cuana majametajo jjashahuuba neineiquiani, eshequi poeje

mijijje meshijo ba'e quea huesha nee poeyanaje Jenosanena cuiñajji yasijje.

²Majoya oya cuanaa Enode huohui'ajja canaje jama ba'a: —Emeshi mese, ¿achejo jaa ebacua esho'i nei, ma Jodio cuanaja Emeshi Mese poaje'yo? Pea meshijo eshequi poeje mijijjejo nequi ojaya majameta ai quea jiji nee nee ecuaa banaje. Majoya ecuana poeyanaje o bihuiaa —poanaje.

³Jama huohui'ajjame acajje emeshi mese quea ajjajja nee nee poanaje. Ojjaña dejja cuana Jenosanenajo ba'e pea'ai quea ajjajja poanaje. ⁴Jamajjeya Enodeya ojjaña Eyacuiñajji nijje emimijji etii cuana, ojjaña Moisesija esohui etehue'yo huohuijji cuana pea'ai iyaa canaje o que. Jama huohui'ajjame acanaje ba'a: —¿Achejo shai cuayaje ebacua Quito? Oya Eyacuiñajjiha huoojea'yo ese jaahuanajji poaje'yo —acanaje Enodeya.

⁵Oya cuanaa huohui canaje jama ba'a: —Quito Benenajo cuayaje, Jodea meshijo. Yahuajo nei nei huohui canaje Eyacuiñajjiha esohui huohuijjiya jama ba'a:

⁶“Cuiñajji sisi Benena bajjani Jodea meshijo yani. Pea cuiñajji cuana quea quemo Jodea meshijo yani pea'ai. Benena cuiñajji quea biso. Jamatii jomajo cuayaje Isaeni dejja cuanaja Emeshi Mese quea pame nee. Ohuaya Eyacuiñajjiha epeejji cuana jaahuanajji caje'yo”. Jamaya aca poa esohui huohuijjiha yahuajo nei nei —oya cuana poanaje.

⁷Emeshi mese Enodeya dejja cuana eshequi poeje mijijje ba'e iyaa ca o'oyanaje o que. Quehuajje huohui'ajja canaje ebacuajo. Ma dejja cuaa huohui canaje ache mecajje majameta ai quea jiji nee nee ba coo canaje, ebacua cuayajo pojja'a. ⁸Ebacuajo huohui mee majje Enodeya oya cuana huoojea canaje Benena huasijje ebacua baa. Jama huohui canaje Enodeya: —¡Poquicue miya! ¡Ebacua sa'ajja neineiquicue! ¡Ba'yo majje poecue! !Eya huohuihuacueachejo ebacua jaa! Jamajjeya eya poquije pea'ai ebacua bihuiaa —Enode siajje poanaje.

⁹Emeshi mese Enodeya huoojea cajje ma dejja cuana poquinaje ejiojjije. Ejiojji poquianijo majameta ai quea jiji nee eyajo ba ca o'oyanaje ehui dojoojji, yahuajo jama. Majameta ai nequi cojja nei poqui'yonaje ebacua huasijje. Majameta jijinequinaje tii ebacua jaa cojja nei. ¹⁰Majameta jijiqui ba majje quea bihu nee nee poanaje oya cuana.

¹¹Equi yasijje dobiquinaje. Ebacua Jesosa ba canaje enaese nijje, Mania nijje. Ba majje ebacua bihuia canaje ecui'oshajjajo nequiya. Bashosoco pichojea majje aquiana quea nahue quia canaje ebacuaja. Mei huo'o quia canaje, shiyeshiye quea nahue quia canaje, esei quea shiye nee quia canaje pea'ai. ¹²Majoya ma dejja cuana jjacahuibaquianijo, Eyacuiñajji onijje miminaje jama ba'a: —¡A'a poqui o'oyajji emeshe mese Enode yasijje!

Jamajjeya oya cuana poqui o'oyanaje oja meshi yasijje pea ejiojjije. Enode bana'yo jjima aca poa.

Ebacua Jesosa quehua dojo canaje Ejito meshi yasijje

¹³Majameta eba neinei'yojji dejja cuana poqui'yo majje Eyacuiñajjija esohuidojiji poeyanaje Jose que, Jose cahuijaajo. Miminaje Jose nijje jama ba'a: —¡Shequicue oe! ¡Nequisohuacue oe! ¡Ebacua, enaese pea'ai dojocuajicue jjeyahua nei Ejito meshi yasijje! ¡Jomajo nequicue! Quije eyaya miya huohujje miquea meshi yasijje epoe o'oyajji. Jjeya emeshi mese quea maseya Enode bajjaniya ebacua sa'ajja neinei cani equecuajea'yojji.

¹⁴Jose nequisohua majje ebacua, enaese pea'ai dojocuaji canaje ejiojjije Ejito meshi yasijje, mecashono. ¹⁵Ejito meshijo nequi'yonaje emeshi mese Enode eshe nequijo. Enode mano'yajo Isaenija meshi yasijje poe o'yanaje, Jose. Jamajjeya Eyacuiñajjija esohui huohuijija esohui yahuajo nei nei jayojja jama poa. Eyacuiñajjija esohui tehue ca poa yahuajo nei nei jama ba'a: “Ecfea ebacua Ejito meshijo ba'e eyaya iya'yonaje”.

¹⁶Emeshi mese Enodeya ba canaje dejja majameta eba neinei'yojji cuanaa oya dasia ca poa. Jamajjeya oya quea quene nee nee poa. Oja sohuinano cuana huoojea ca'ya poa: —¡Ojjaña ebacua joya tonatona ai'ai quecuajeaquicue! ¡Benenajo ba'eja ebacua dejja sho'i cuana, Benena pejjejo ba'eja pea'ai oe quecuajeaquicue!

Jamajjeya mano'yonaje ojjaña ebacua dejja sho'i daqui she becamejjiji pea'ai epo tonatona ai'ai, esho'i nei pea'ai.

E'e, majameta eba neinei'yojji dejja cuanaja ehuohui'yojo, majameta ai quea jiji nee poanaje, ojjaña ebacua quecua sa poa Enode. ¹⁷Eyacuiñajjija esohui huohuijija Jenemiaja esohui yahuajo nei nei jayojja jama aca poa Enodeya. Ebacua cuana quecua ca'ya poa jamaya. Jenemaa aca poa jama ba'a:

¹⁸“Shama cuiñajjijo eyiyo ao'ao cuiñajjijo quea shajjaquijjo. Ojjaña janobajjima nei nei pa tiitii'yani. Jodio enaese cuana pa'añani oja bacua cuana mano'yajo. Quea yeno nee nee. Papajea'yo ajja”. Jamaya etehue'yo yahuajo nei nei poa.

Ebacua Jesosa Ejito meshijo ani poe o'yanaje

¹⁹Emeshi mese Enode mano'yajo Eyacuiñajjija esohuidojiji poeyanaje Jose que, Jose cahuijaajo, Ejito meshijo ba'ejo. ²⁰Huohui canaje jama ba'a: —¡Nequisohuacue, oe! ¡Ebacua, ojaya enaese pea'ai doj'o yocue Jodio meshi yasijje! Emeshi mese Enode mano'yonaje, ma ebacua Jesosa quecua'yojji nisho poanaje.

²¹Jamajjeya Joseya nequisohua majje ebacua Jesosa, enaese pea'ai dojo ca o'yanaje oja meshi yasijje, Jodioja meshi yasijje. ²²Enodeya bacua ejja Aquenao bajjani Jodea meshi mese eyacua poanaje. Jose jama shajja'ajja majje quea mete poanaje ma meshijo eba'ejji. Eyacuiñajjija huohui canaje Jose jjacahuibaquianijo: —¡Janinea meshi yasijje poquicue, Jose!

Jamajjeya Jose poquinaje Janinea meshi yasijje ba'e'yohua. ²³Nasanena cuiñajjijo Jose ba'enaje. Jamajjeya Eyacuiñajjija esohui huohuijija esohui

yahuajo nei nei jayojja jama poa ba'a: "Quijje pishana oya Nasanenajo ba'e dejja bajjani acaje".

Huaniya esohui huohui canaje quima huasijje
(Macoso 1.1-8; Noca 3.1-9,15-17; Huani 1.19-28)

3 ¹Jesosa Nasanenajo ba'yanijo, Huani, ona besameejji poani poeyanaje Jodea meshi yasijje. Dejja cuana meshi jabojo anica huasijje sohuihuohui huicha'a huicha'a canaje Huaniya. Jama acanaje ba'a: ²—¡Miquea mimishi cuanajo quea yeno pocue; miquea mimishi cuana pajea'yocue! Jjeya nei Eyacuiñajji poeje ojjañaja Emeshi Mese nei nei —acanaje.

³Isaiaa Eyacuiñajji esohui huohuijjiya jama huohui ca poa yahuajo nei nei Huanijo ba'a:

“Oe dejja meshi jabojo nequi taaanequije. Jama poaje ba'a: —Jiquio ecua Emeshi Cuiñajji nei neija ejiojji shabo jea cani jama, quea pojje nee nee acani jayojja jamaya ¡miquea ejjashahuubaquijji tai quea boejea nee nee a'yocue! Emeshi Mese nei nei poeje”.

Jamaya Isaiaa yahuajo nei nei tehue ca poa.

⁴Huaniya huo ña, cameno ña oja sipi huosho canaje. Ejjayica'aquijji ejee iya canaje. Shacui ijjiia canaje, huini pea'ai ishi canaje Huaniya. ⁵Quea huiso dejja cuana Jodea meshijo ba'e, pea cuana Jenosanenajo ba'e pea'ai, pea cuana cuei Jodana sahuajo ba'e pea'ai Huani que poeyanaje o shajja'ajja. ⁶Oya cuana quea mimishi poanijo quea yeno poani. Jamajjeya oja mimishi cuana huohui ca'yonaje. Mimishi cuana pajea sa poanijo, Huaniya oya cuana Eyacuiñajji nijje epo'yojji besa mee canaje Jodana cueijo.

⁷Jodioja esohui huohuijji Paniseo bajjani cuana, Sanoseo dejja cuana pea'ai poeyanaje Huani que; Eyacuiñajji nijje ejjapeequi'yojji nisho besa'yo sa poani pea'ai. Huaniya oya cuana ba majje tecuea canaje. Jama acanaje ba'a: —Miya peyo jama, jjadasiaquiani. ¿Aya acuae mi huohui canaje? Jama ba'a: “¡Eyacuiñajji besa meecue! Jamajjeya ojaya miquianaya enapa'yojji pojjeama”. ⁸Chojja. ¡Quea pame tii oe ba'e'yocue! ¡Mimishi cuana oe pajea'yocue; a'a quea jjashahuubaqui tai po o'oyajji! Jamajjeya miya Eyacuiñajji enapajji pojjeama. ⁹A'a jjashahuubaquijji jama ba'a: “Amajama ecuanaja etiiquiana. Oya quea pame nee poanaje. Ecuana Amajamaja bacua poanijojo, Eyacuiñajji enapajji pojjeama”. Chojja de. Miquiana Amajamaja bacua quea mimishi poanijo, Eyacuiñajjiya cajaa mi acaje'yo. E'e de, ohuaya pea Amajamaja bacua jayojja epojji pana caje'yo pojja'a mei, meshi pojja'a —Huaniya acanaje.

¹⁰—Jama ba'a: Acui tai sajja jajacajja caje'yo cuaqui cabojjiya. Ejjajja chamajo acui cajaa acaje'yo. Jajajeal'yo majje dahuajea caje'yo. Dejja mimishi acui tai jayojja jama acaje'yo Eyacuiñajjiya; cuaqui yasijje jea caje'yo. ¹¹Eyaya miquianaya Eyacuiñajjiyo besa meeje'yo enajo, ca mique mimishi cuana epajea'yojo. Quijje

pishana poeje Quito. Ohuaya mi que Eyacuiñajija Edojoshahua Pame dobiqui mee caje'yo. Jamajjeya miya quea pame poaje'yo. Mimishi cuana pajea sa po'yo ajjajo ca ca jeajea caje'yo cuaqui yasijje. Jamaya pe'a'i ba'a: Quito oe nei quea ca'a nee nee nequi. Eya ca iña quea ca'a pishana nequi. Jamajjeya eya ca iña onijje nequi sa po ajja miquiana que cojja. Quea bicho. ¹²Dejjaa oja tepeya shaa dojo mee majje anoso iya ca'yani equijo; eshaa dahuajea cani. Jiquio ecua anoso shaa dojo mee cani jama eseya acaje'yo Eyacuiñajija. Joya quea pame nee ba'yani jaahuana caje'yo tii. Mimishi cuana ca ca quiyojea canequije'yo tii tii.

Huaniya Jesosa Eyacuiñajijo besa mee canaje

(Macoso 1.9-11; Noca 3.21-22)

¹³Majoya Jesosa Janinea meshi yobijo ani macua huasijke po'oquequinaje Jodana cuei yasijje Huani que. Jesosaa Huani ba majje jama acanaje ba'a: —Huani, ¡jeya besa meecue Eyacuiñajijo, miyaya!

¹⁴—Chojja, Emeshi Mese —Huani poanaje—. ¡Miyaya eya besa meecue Eyacuiñajijo, miya quea pame nee neejo! ¿Yajjajje miya e que poe'yonaje? Eya ca ca iña quea pame pishana, de.

¹⁵—¡Eyaya huohuaña jama miyaya a'yocue! ¡Jamajjeya Eyacuiñajija ehuohui'yo ejo acue! —Jesosa poanaje.

Jamajjeya Huaniya Jesosa besa mee canaje Eyacuiñajijo. ¹⁶Huaniya Jesosa besa mee majje jjequicuaya ca'yajje, ba canaje eyatahuatahua ca'apejo canaje. Eyacuiñajija Edojoshahua Pame huia' jama o sapa biajje cuabesa ba'enaje. Ecapashinei ba'eoquenaje. ¹⁷Eyacuiñajija oja Bacua Ejja jama acanaje ba'a: —Miya ecue Bacua Ejja quea jea nee nee. Eya mijo queabihui nee nee poani.

Jesosa quea mimishi po mee sa acanaje Edosiquiaa

(Macoso 1.12-13; Noca 4.1-13)

4 ¹Jjeyahua nei Edojoshahua Pameya Jesosa quima huasijke meshi jabo huasijke huoojea canaje. Majoya Edosiquiaa Jesosa quea mimishi po mee sa acanaje. ²Jesosa jomajo nequinaje peaja ejiojji cahui huisome, 40 cahuime. Mahuiso epojja, meccajje pe'a'i nequinaje quimajo bobima' nei nei. Majoya quea shoe poanaje. ³Majoya aje Edosiquiana poeyanaje Jesosa que; miminequinaje jama ba'a: —Miya Eyacuiñajija Bacua Ejja jjabaqui majje ¡miyaya jiquio mei cuana pahui jayojja acue, miquea e'lijjajji!

⁴—Chojja de. ¡Bacue Eyacuiñajija esohui etehue'yo! Jama poani ba'a: “Dejja cuana bobijo ca'a po majje pojjeama ba'e tiitije'yo. Ojjaña Eyacuiñajija esohui jayojja jama añajo ca se ca quea pame nee ba'e tiitije'yo”.

Jamaya aca poa —jamaya Jesosa poanaje.

⁵Majoya Edosiquiaa Jesosa dojo canaje Jenosanena huasijke. Jomajo Eyacuiñajija equi quea ao nee nee yasijje nequisohuaqui mee canaje; equi jamacoo biajje nequi mee canaje. Jama acanaje ba'a: ⁶—Miya

Eyacuiñajjija Bacua Ejja jjabaqui majje ¡tohuaacue meshi yasijke!

Jamajjeya Eyacuiñajjija esohui jama etehue'yo jaa ba'a:

“Eyacuiñajjija esohuidojiji cuana huoojea caje mi yasijke, mi jaahuanaaa. Oquequiajo ojaya emeya miya iñajjequisohua caje'yo, ohuaya. Jamajjeya miya ejjajiojji quecuasajaqui jjima poaje meijo”.

⁷ Jesosa onijje miminaje jama ba'a: —Chojja. Yahuajo jama

Eyacuiñajjija esohui etehue'yo pea'ai ba'a:

“A'a jama aiji ba'a: —¿A'a e'e jojo nei Eyacuiñajjija oja sohui acaje'yo pojja'a?

¿A'a eya Eyacuiñajjija jaahuana nei caje'yo? ¡Caba'ajjasahua! —a'a pojji”.

Jamaya yahuajo nei Moisesiya tehue ca poa —Jesosaa acanaje.

⁸ Majoya Edosiquiaa Jesosa dojosohuaqui canaje eyiyo ao huasijke. O shajja'ajjajji nisho jamaya Edosiquiaa Jesosa huohui canaje: —¡Bacue ojjaña meshi cuana, emeshi mese cuana pea'ai, cuiñajji cuana, aquiana quea nahue cuana pea'ai! Ojjaña quea pame nee nee. ⁹Ojjaña jiquio aquiana cuana, dejja cuana pea'ai miquea poaje'yo; miya Emeshi Mese nei nei eyaya po meeje'yo jjeya nei ca miyaya eya bihuia'yajo ecui'oshajjajo nequi majje —jama siajje ameya acanaje Edosiquiaa Jesosa.

¹⁰ Jamajjeya Jesosaa jama huoojeajeame acanaje ba'a: —Chojja Edosiquiana! Eyaya miya bihuia ajja, de. ¡Poquicue miya! Jamaya Eyacuiñajjija esohui etehue'yo yahuajo pea'ai ba'a:

“¡Eyacuiñajji oe nei bihuiaque! Oya oe nei ojjaña Emeshi Mese nei nequi. ¡Ojaya esohui jama oe acue!”

¹¹ Jamajjeya Jesosaa huoojea cajje Edosiquiana, Satanasa poqui'yonaje. Majoya Eyacuiñajjija esohuidojiji cuana quea huiso poeyanaje Jesosa jaahuanaaa, bobiaa pea'ai.

Jesosaa esohui huohui canaje Janinea meshijo

(Macoso 1.14-15; Noca 4.14-15)

¹² Quijje pea cuaa Huani, ma ona besameejji poa jeanobiajea canaje. Shajja'ajja majje Jesosa posohuaqui o'oyanaje oja meshi yasijke, Janinea meshi yasijke. ¹³Oya nequiñaqui jjima Nasanenajo. Pea cuiñajji yasijke, Capenaoma huasijke poquinaje ba'eya. Janinea bae sahuajo, Samononi meshi, Netani meshi pea'ai pejjejo ba'enaje. ¹⁴Yahuajo nei nei Eyacuiñajjija esohui huohuijjiya Isaiaa huohui ca poa jama ba'a:

¹⁵⁻¹⁶ “Ojjaña cuana quea mimishijo, esohui ba jjimajo quea apo ba'yani.

Eyacuiñajji ba majje oya cuana quea ja'a nee ba'e mee caje'yo.

Eyacuiñajji ojaya ba jjimajo quea yeno nee ba'yani. Jjeya ca ca quea jaji nee ba'e mee caje'yo. E'e, Samononi meshijo, Netani meshi pea'ajjo, Janinea bae sahuajo ba'eca cuana, Cueji Pashi ma Jodana cuei bajjani sahuajo, ojje ba'eca cuana, Janinea meshijo, pea bajjani Ese Ejja sohuijo ba'a: Eyacuiñajji ba po jjimaja meshijo ba'eca cuana pea'ai quea mimishi poanaje. Jjeya ca ca quea ja'a nee ba'e mee caje'yo”.

Jamaya Isaiaa huohui ca poa yahuajo nei nei Jesosaja epoejjijo.

¹⁷ Majoya Jesosaa esohui huohui canaje jama ba'a: —Jjeyahua nei
Eyacuiñaji miquea Emeshi Mese nei poeje. Jamajjeya ¡miquea mimishijo
quea yeno pocue! ¡Mimishi cuana pajea'yocue miquiaaya! —acanaje.

Jesosaa nahuoo cuiashajaggi iyaa canaje onijje epo'yojji
(*Noca 1.16-20; Noca 5.1-11*)

¹⁸ Majoya Jesosa poquinaje Janinea bae sahua huasijke. Jomajo ohuaya Anesi,
Anesija o'l Peno bajjani, ma Simohui pea'ai bajjani ba canaje. Oya cuana nahuoo
cuiashajaggi nei nei bajio. Nahuoo cuiashaja cani. ¹⁹ Jesosaa oya cuana iyaa canaje:
—¡Enije po'yocue! Eyaya miya dejja cuana jjequi meesahua'yojji aje'yo e que.

²⁰ Jjeyahua nei nei oya cuana ojaya eshajajji cuana jeana'yo majje
onijje poqui'yonaje.

²¹ Majoya Jesosaa poqui pishana majje pea cuana ba canaje. Semeneoja
bacua ejja Jacobo ba canaje ojaya echahua mese nijje, Huani nijje. Bishe
aijo eshajajji je'e'yo po'ani ba canaje. Jjeyahua nei Jesosaa oya cuana
iyaa canaje. ²² Jamajjeya Jesosaa iyaa cajje oja chii Semeneo bishejo ani
tii jiña ca'ya poa cuaa Jesosa nijje epoqui'yojji.

Jesosaa pea esohui huohui canaje emanojaa cuana huaquia mee ca'yonaje
(*Noca 6.17-19*)

²³ Jesosa poquinaje ojjaña cuiñajji cuana huasijke Janinea meshijo.
Jodio dejja cuanaja equi ojee ejjachichaquijji yasijke dobiquinaje esohui
huohuiya. Jama poanaje ba'a: —Eya ojjaña Emeshi Mese poaje'yo.

Ohuaya quea huiso emanoja cuana jjaajaqui mee ca'yonaje, huaquia
mee ca'yonaje pea'ai. ²⁴ Quea huiso Sinia meshijo ba'eca cuaa Jesosaa
huaquia mee ca'yoqui shajja'ajja canaje pea'ai. Jamajjeya o que jjequi canaje
quea huiso emanoja cuana. E'e, ojjaña cuana quea nee poani, pea cuana
niñepoqui cuana, jjequi'ihuicajaa cuana pea'ai, jiojjijajja cuana pea'ai
o que jjequi canaje. Ojjaña cuana huaquia mee ca'yonaje, jjaaja meequi
ca'yonaje, Jesosaa. ²⁵ Jamajjeya Jesosa poquianijo, quea huiso nee nee cuana
ojee poquinaje onijje. E'e, dejja cuana quea huiso nee, ponaponaña pea'ai
Janinea meshijo ba'e cuana, Jenosanenajo ba'e cuana, Jodea meshijo ba'e
cuana, pea Ome miji pea'ai Cuiñajjijo ba'e cuana, Cuei Cueji Pashijo Jodana
cuei ojje mijijje ba'e cuana pea'ai; quea huiso nee nee Jesosa nijje poquinaje.

Jesosa eyiyojo aniya esohui huohui canaje
(*Noca 6.20-23*)

5 ¹ Dejja quea huiso cuana ba majje Jesosa eyiyo huasijke jaasohua
pishanaquinaje. ² Jomajo anioque majje ojjaña cuana sohuihuohui
canaje jama ba'a: ³ —¡Bacue! Beca cuana jjashahuabaquiani jama ba'a: “E'e,
de, eya quea mimishi nee. ¡Eyacuiñajjiya ecuea mimishi cacuiea ca'yahua!”

Jamaya jjashahuabaquianijo Eyacuiñajjiya oya ba'e tiitii mee caje'yo onijje eyajo. ¡Oya cuana quea bihui nee capo'yahua! ⁴Oja epeejji cuana mimishijo quea yeno poanijo, Eyacuiñajjiya quea bihui nee po mee caje'yo mimishi cuijea ca'yajje. ⁵Ojaya epeejji cuana quea bei poani Eyacuiñajjiya quea jea nee; onijje ba'e tiitii mee caje'yo. ¡Quea bihui nee capo'yahua oya cuana!

⁶—Ojaya epeejji cuana Eyacuiñajjiya esohui jayojja jama a sa neinei poanijo, Eyacuiñajjiya oya cuana quea jaji nee nee ba'e meesahua caje'yo. ¡Quea bihui nee capo'yahua oya cuana!

⁷—Ojaya epeejji cuana pea cuanajo jjashahuabaquiani pea jaahuanajji. Jamaya poanijo pea cuaa, Eyacuiñajjiya pea'ai oya cuana jaahuanajji. Tecue'ama poaje'yo ona nijje. ¡E'e jojo nei quea bihui nee capo'yahua ojaya epeejji cuana! ⁸Ojaya epeejji cuana mimishi cuana a'ajjajo Eyacuiñajji nijje ba'e tiitije'yo. ¡Quea bihui nee capo'yahua oya cuana! ⁹Ojaya epeejji cuaa pea cuana quea bei po meesahua canijo, ojjañaja eba oya cuana Eyacuiñajjiya bacua cuana e'e jojo nei; quea pame nee. ¹⁰Ojaya epeejji cuana quea ja'a nee ba'yanijo, onaaya oya cuana cuia caje'yo. ¡Jamatii oya cuana quea bihui nee capo'yahua! E'e, quijje eyajo oya cuana ojjaña huojea'yojji enijke poaje'yo —Jesosaa huohui canaje.

¹¹Majoya Jesosa Quitohua ojaya epeejji cuana huohui canaje jama ba'a: —Miquianaya ecuea epeejji poanijo, pea cuana minijje mimijajije; miya napa caje pea'ai, sijje poaje mijo pea'ai. Jamatii Eyacuiñajjiya miquianaya quea bihui nee po mee caje'yo. Eyajo onijje ba'e tiitii mee caje'yo. ¹²E'e, Eyacuiñajjiya esohui huohuijji yahuajo nei nei ba'ya poa cuana jamaya aca poa mimishi cuaa; napa ca poa pea'ai. Jamajjeya ¡ona jayojja jama pocue, quea bei! Eyacuiñajjiya miquianaya ojee ba'e mee caje'yo tiitii eyajo quea bihui nee nee —Jesosaa huohui canaje.

Ae jayojja Eyacuiñajjiya epeejji (Macoso 9.50; Noca 14.34-35)

¹³—Ecuea esohui jayojja jama añajo, pea cuana mi jayojja jama ba'eje quea pame nee pea'ai. Jamajjeya miya sane jama, mei sese jama. Mei seseya shicui cajje bobí ihui'yo ajja poani. Jamatii mei sese sese'ama poa jojjemo ¿a'a quea sese po meeje o'oya? Chojja. Sese'amajo quea huesha jeajea'aña seya. Jiquio ecua sane sese'ama jeajea'aña seya jama miya ecuea esohui jama po ajjajo, cajaa achana' eyaya.

¹⁴—Enijke jjapeequianijo miquianaya cuaquijiji jama. Cuiñajji emaco ao'aojo nequi ba caje cuaa quea huesha nee mecjaje pea'ai. Jiquio ecua emacojo nequia jama ecuea epeejjiya pea cuana Eyacuiñajji ba meesahua caje'yo enijke jjapeequianija jjejojo. ¹⁵Cuaquijiji sisi capaca ajja. Chojja. Cuaquijiji sisi nequia cajji acui biajje, ojjaña equijo ani cuana jeaja'ajji. ¹⁶¡Jiquio ecua cuaquijijiya ojjaña equijo ani jeaja'a cani jayojja jama quea pame nee ba'ecue! Jamajjeya miquianaya quea pame ba majje pea cuanaa Eyacuiñajji, esejaya Chii eyajo bihuia caje'yo —Jesosa poanaje.

Moisesija esohui etehue'yo quea pame nee

17 Jesosaa pea esohui huohui canaje jama ba'a: —Eyaya Moisesija esohui yahuajo etehue'yo cajaa a'tajja. Eyacuiñajji esohui huohuijji cuanaja esohui yahuajo nei eyaya cajaa a'lajja pe'a'i. Cho. Eya poeyanaje onajaya esohui jama a'tyohua. E'e, oya cuaa yahuajo nei nei ejo huohui ca poa. Jjeya eyaya onajaya esohui jayojja jama aje'yo. 18 E'e jojo nei ojjaña Moisesija esohui cuana cajaa pojjeama poaje'yo. Ojaya esohui biso nei pe'a'i cajaa pojjeama poaje'yo. Quea pame nee ani tiitije'yo. Jamajjeya ojjaña ojaya esohui yahuajo nei nei etehue'yo jama aje'yo. Ojjaña apoa ajeyo'yo majje ecuea echacoji jiquio meshijo apoa poaje'yo. 19 Jamajjeya joya Moisesija esohui etehue'yo jama ba'e sa po ajjajo, oja sohui jama pojjeama huohui cajo, enijje ba'e meemee aija quijje eya ojjañaja Emeshi Mese nei poajo. Joya Moisesija etehue'yo jama acani, oja sohui jama huohui cani pe'a'i ca ca enijje ba'eje'yo quijje eya ojjañaja Emeshi Mese oe nei poajo. 20 ¡Bacue! Moisesija etehue'yo huohuijji poani, Jodioja esohui huohuijji Paniseo bajjani cuana pe'a'iya quea pame nee huohui aija; quea pame ba'e aija pe'a'i. Jamajjeya miquiana ona jama ba'yajo, ona jama huohuijjo pe'a'i miquianaya ba'e aija enijje quijje eya ojjañaja Emeshi Mese nei poajo —Jesosa poanaje.

Moisesija etehue'yo yahuajo nei quea pame pishana Jesosaja ehuohui'yo quea pame nee nee (Noca 12.57-59)

21 —Miquea eba Moisesija etehue'yo yahuajo jama ba'a: “¡A'a pea quecuajji!” Jamajjeya pea quecuajji epo dojo caje'yo cuaa emeshi meseja dejja huoojeajji yasijke. 22 ¡Jjeya ecuea esohui eyacua shajja'ajjacie oe! Ojjaña joya pea nijje quea quene nee nee poani aje oe emeshi mese yasijke poquije. Quea tecue poaje emeshi mese onijke. Joya pea nijje mimijajiao, “miya cajaa” acajo, cadojo cahua emeshi meseja esohui huohuijji cuana huasijke jjabahuejjaqui meeya. Joya pea nijje panajaji neineiyajo, cajaa nei nei acajo pea'a'i cu aqui yasijke huoojea ca chana' pea'ai —Jesosa poanaje.

23 —E'e pojja'a miya Eyacuiñajji equi yasijke poquiani aquiana quia'yohua Eyacuiñajji bihuiajji. Ma aquiana quia'yoo jjimahuajo ijashahuabaquicue miquea epeejjijo! ¿A'a miquea epeejji quea yeno poani minijje miya quea tai añajo? 24 ¡Jamajjeya miquea epeejji yasijke poquicue! ¡Onijke mimiquicue! ¡Quea bei minijje po mee o'oyacue! ¡Majoya miquea aquiana quiaquicue Eyacuiñajji bihuiajji! —Jesosa poanaje.

25 —¡Pea cuana quea quene minijje poajo o que poquicuajicue! ¡Quea bei po mee o'oyacue jjeya nei! Ohuaya miya dojo ca chana' emeshi mese yasijke, napa meeya. Emeshi meseya miya huoojea ca chana' sohuinano huasijke. Sohuinanohua miya equi ejjajeanobiaquijji yasijke jeanobia ca chana'. 26 Jomajo nequi tiitii mee caje. Ma minijje quea quene nee poanaje sosequijeyo'yo majje miya ejeanobianequi jeacuaya caje'yo, de

—Jesosa poanaje—. ¡Jiquio jayojjaya oe pocue! ¡Jamajjeya Eyacuiñajji nijje jjapeequicuajicue mano'yo jjimahua, cuaqui yasijje jeajea jjimahua!

¡A'a jjashahuabaquijji pea eponajo!

²⁷—Cuanaya miquea eba Moisesija etehue'yo jama ba'a: “¡A'a pea cojjojji pojji!” ²⁸Jjeya ecuea esohui eyacua shajja'ajjacue jama ba'a: Dejja pea eponajo jjashahuabaquianijo oya pea cojjojji epojji jayojja jama poani, ojaya ejjashahuabaqu'i'yojjijo; quea mimishi poani. ²⁹Jamajjeya ¡a'a quea mimishi pojji! Miya quea mimishi poani epona, aquiana pojja'a baqui majje jmaya bapajea'yocue! Jea ba majje mimishi po majamajañajo cuaqui yasijje dobiquije'yo tii. Jamajjeya ¡a'a jea bajji! ³⁰Pea'ai miya quea mimishi poani aquiana emeya napañajo ¡a'a aquiana napajji! Quea mimishi po chana'; cuaqui yasijje dobiqui'yo chana!. Jamajjeya ¡a'a onaja aquiana napajji! Sii chanaya —Jesosa poanaje.

Esuohui ehuanase huei canijo

(Mateo 19.9; Macoso 10.11-12; Noca 16.18)

³¹—Moisesija etehue'yo jama poa pea'ai ba'a: “Dejja ojaya ehuanase cajaa acajo, huei canijo ¡esohui catehue cahua ehueiji!” ³²¡Ecuea esohui eyacua shajja'ajjacue! ¡A'a miquea ehuanase pea dejjaja sii jjima hueiji! Epona quea pame ba'e huei'yo majje pea dejja nijje jjahueaquiajo, yahue ebionei eshe nequijo, quea mimishi po mee cani ebionei yahueya. Oya eshe enequijojo oja yahue eyacua quea mimishi poani pea'ai —Jesosa poanaje.

³³—Moisesija etehue'yo jama poa pea'ai ba'a:

“Miyaya huohuiaña jama ba'a: —Eyacuiñajjiya eya shajja'ajja canijo, e'e jojo nei eyaya ecuea esohui jama aje'yo. ¡Jamaya mimi majje miquea esohui jama acue; a'a pajeal'yojjji!” ³⁴¡Jjeya ecuea esohui eyacua shajja'ajjacue! Jama ba'a: ¡A'a oe siajje pojji! ¡Pea nijje mimi majje miquea esohui jayojja jama acue! Jamajjeya pea nijje mimianijo a'a huohuellijji jama ba'a: “Eyacuiñajji eshe eyajo yanijo, ecuea esohui jama eyaya aje'yo. Ecuea esohui e'e nei pojjeama jojjemo eya quea nee po mee ca'yome”. Cho. Eyajo Eyacuiñajji ejjahuojeaquijji tii tii. ³⁵Jamaya a'a mimijji pea'ai ba'a: “Meshi yanijo, oe po jjimajo ecuea esohui jama eyaya aje'yo. Ecuea esohui e'e nei pojjeama jojjemo meshi jjani yasijje eya mojea ca'yome”. Cho. Meshi cuana miquea pojjeama; Eyacuiñajji Emeshi Mese oe nei poani. Jamaya a'a mimijji pea'ai ba'a: “Jenosanena yanijo, oe po jjimajo ecuea esohui jama eyaya aje'yo. Ecuea esohui e'e nei pojjeama jojjemo Jenosanena cuiñajji esecue yasijje mo huoojeacuaya ca'yome”. Cho, Jenosanena miquea pojjeama; Eyacuiñajji Jenosanena Meshi Mese poani. ³⁶Jamajjeya a'a huohuellijji miyaya: “Ecuea esohui e'e nei pojjeama jojjemo camano mee ca'yome”. Chojja. ³⁷Jamajjeya huohuicue jama ba'a: “E'e, eyaya jama aje'yo”. “Chojja eyaya jama a'lajja” acue —Jesosa poanaje.

Esohui dejja quea quenejo
(Noca 6.29-30)

38—Miquea eba Moisesija etehue'yo jama pea'ai ba'a: “¡Peaa cojja cuiasejjajea cajje jjasosequiaquicue; cojja cuiasejjajea pea'aicue! ¡Peaa se' cuiasajajea cajo se' cuiasajajea pea'aicue!” 39 Ecuea esohui eyacua ca ca jama ba'a: Onaaya miya napa cajje ja'a jjashahuabiquijji onijje ejjasoseaquijji! ¡Mique shemo ebianei mijijje cuia cajje shemo shani mijijje cuia mee o'oyacue! 40 Peaa miquea daqui sa poanijo miya dojo cani dejja etii bajjani yasijje huohuiya; miquea daqui dojo cajo, jamatii ¡miquea daqui moo quiacue pea'ai! 41 Dejja maseya miya iña cajje ojaya aquiana quea huesha pishana dojo mee cajo, ¡quea huesha nee dojocue, jamatii! 42 Pea Ese Ejja miquea aquiana sa neinei poanijo ja'a quea dejja tai pojji! ¡A'a quea nishehui pojji! ¡Oya quiacue! Pea cuana miquea aquiana dojo sa poanijo joe pojji cahuime dojo meecue! Minijje mimiajo: “¡Che iña jiquio dojo meecue; quijje aje jje jeahuaje'yo!” acajje; “¡E'e, dojocue!” saja'ame acue. Jamajjeya ojjaña cuana nijje quea bei ba'ecue! ¡A'a o jayojjaya quea mimishi, quea tai pojji! —Jesosa poanaje.

Joya minijje quea quene nee poani quea jea acue
(Noca 6.27-28, 32-36)

43—Miquea eba etehue'yo yahuajo nei jama ba'a: “¡Miquea epeejji quea jea nee acue! Miquea epeejji pojjeama, cho. ¡Onijje quea quene pocue epeejji pojjeama jjejojo!” 44 Ecuea esohui eyacua ca ca jama ba'a —Jesosa poanaje—: ¡Miquea epeejji pojjeama quea jea nee acue pea'ai! Miya Eyacuiñajji epeejji poanijo, miya napa cajje ¡Eyacuiñajji nijje mimicue maa mi napajji poanijo! Jamajjeya e'e pojja'a oya cuana Eyacuiñajji nijje jjapeequije'yo pea'ai. 45 Jamaya poanijo miquianaya Eyacuiñajji eseja Chii eyajo anija bacua cuana poani. E'e, Eyacuiñajjiya eshequi quea ja'a nee jiji mee cani dejja quea pamejo, dejja quea mimishiyo pea'ai. Ohuaya ena huoojea cani dejja quea pame neeja que shepajji, dejja quea mimishija que shepajji pea'ai —Jesosa poanaje.

46—Joya mi quea jea nee aiji poani miquea quea jea nee pea'ai; minijje quea mase ca ca miquea boti'ama. Eyacuiñajji epeejji pojjeama cuana aje oe jamaya poani pea'ai, de. Jamajjeya miya jamaya poanijo ja'a Eyacuiñajjiya miya bihuia caje? Cho. 47 Miquianaya aje jja oe miquea epeejji cuana nijje quea bei nee mimiani, pea cuana nijje mimi aija. ¿A'a jamaya poani ojjaña dejja cuana? E'e. Eyacuiñajjiya epeejji pojjeama cuana aje oe jamaya poani pea'ai, de. 48 Jamajjeya esejaya Chii eyajo quea pame nee ani. Ojjaña cuana Eyacuiñajjiya quea jea nee nee. ¡Eyacuiñajji jayojjaya jama pocue quea bei nee nee! —Jesosa poanaje.

¡Quea ja'a nee jjapeequicue Eyacuiñajji nijje!

6 ¹Jesosa poanaje pea'ai: —¿Apiojji miya Eyacuiñajji chocochacoani pea cuaa ba canijo? E'e pojja'a jjashahuabaquiani miya bihuia caje cuaa ba majje. Onaja ebajji chocochacoanijo, quijke eyajo miquea echaco ojo Eyacuiñajjiya miya bihuia ajja, esosequiajji pojjeama —Jesosa poanaje.

²—Aquiiana aema huasijke quia'yo majje a'a mimiji jama ba'a: “¡Bacue, eya quea pame nee poani!” Chojo. Jamaya poani Eyacuiñajji epeejji nisho cuana Eyacuiñajji equijo, ejiojji cuanajo pea'ai. Onaaya Eyacuiñajji chaco cani pea cuanaja ebajji. Jamajjeya quijke eyajo Eyacuiñajji oya ebihuiajji pojjeama; ojaya echaco esosequiajji pojjeama pea'ai. ³¡Miyaya aema huasijke aquiana cuana quehuajje quiacue! Jamajjeya ¡miquea epeejji neineija ba jjima quiacue! ⁴Miquea Chiiya eyajo aniya ca ca oe ba caje; ohuaya miya quijke sosequia caje'yo —Jesosa poanaje.

**Eyacuiñajji nijje jama mimime pocue ba'a
(Noca 11:2-4)**

⁵Jesosaa o shajja'ajjajji cuana huohui canaje pea jama ba'a: —Eyacuiñajji nijje mimianijo ¡a'a joya ecua Eyacuiñajji nijje jjapee nishoquiani jayojja jama mimiji! Oya cuana aje oe Jodioja ojee ejjachichaquijji equijo nequiani, ojjañaja ebajji miminequiani. Esecuejo ojjaña anica cojja nei pea'ai miminequiani. Eyaya miya e'le jojo nei huohuaña oya cuana miminishonequiani —Jesosa poanaje—. Jamajjeya Eyacuiñajji epeejji nei poso ojjañaa oya ba cani. Jamajjeya onaaya bihuia canaje sosejje Eyacuiñajji nijje miminisho'aninajejo quijke eyajo oya cuana enijje enequi'yojji pojjeama, Eyacuiñajji epeejji nisho jjejojo. ⁶¡Miquianaya ca ca miquea equi quecuayijji oye mee nei mimi'anicue Eyacuiñajji nijje, pea cuaa eba ca poani jjejojo! ¡Eseja Chii nijje jomajo mimicue! Ohuaya miya ba cani, shajja'ajja cani; mi pejjejo nequiani oya. Esejaya emimi bame bame jayojja jama acaje'yo, eseja Chiiya —Jesosa poanaje.

⁷—Pea cuana Eyacuiñajji ba jjimajo eyacuiñajji nisho nijje mimiani. Oya esohui majamaja acani. Mimi majamajani eyacuiñajji nishohua eshajja'ajja caje poso. ⁸¡A'a o jayojja jama pojji! Eyacuiñajji nijje mimi sa po jjimahuajo, ojaya esejaya ejjashahuabaquijji eba, de, eseja Chiiya eyajo anija —Jesosa poanaje.

⁹—Jamajjeya Eyacuiñajji nijje mimianijo mimicue jama ba'a:

Eyacuiñajji, miya ecuanaja Chii quea bame nee.

Miya eyajo quea ca'a nee ani.

¡Ojjaña cuaa miya cabihuia cahua, oe nei quea ja'a nee!

¹⁰ Miya ojjaña cuanaja Emeshi Mese poani tii tii.

Eyajo miquea ejjashahuabaqui'yojji jayojja jama poani ojjaña.

¡Jamaya oe pocue ojjaña meshijo pea'ai!

¹¹ ¡Jjeya eya ba'e meesahuacue!

¹² Eya quene'ama pea cuana nijje, joya enijje quea mimishi poani nijje.

Jamajjeya ¡ecuea mimishi cuanajo a'a quea quene pojji pe'a'i!

¹³ ¡A'a eya quea mimishi po meeji!

¡Nahue neineicue mo, Eyacuiñajji!

¡Edosiquianaja epjeejijo eya jaahuanacue!

E'e Eyacuiñajji, miya ojjañaja Emeshi Mese poani tii tii.

Miya oe nei quea ca'a nee enequi tii tii, quea pame nee.

¡Ojjañaa miya cabihuia cahua tii tii!

E'e, jamaya apoa ecuea emimi.

¡Jamaya Eyacuiñajji nijje mimicue! —Jesosa poanaje.

¹⁴—E'e, ¡jiquio ecua eya jama jjashahuabuquime oe pocue! Pea cuana nijje mimicue jama ba'a: “Miya enije mimijajinaje quea tai. Jamatii eya miquea mimishijo quene'ama” jamaya pocue. Jamaya pea nijje mimianijo Eyacuiñajji miquea mimishijo quene'ama poaje'yo pe'a'i. ¹⁵Pea nijje quea quene tii tii poanijo ca ca Eyacuiñajji eseja Chii miquea mimishijo quea quene tii tii poaje'yo pe'a'i; miquea mimishi ecuijea'yojji pojjeama —Jesosa poanaje.

Eyacuiñajji nijje eseya bobima' mimi cajji ijja'ijjia jjima ani majje

¹⁶—Eyacuiñajji epeeji nisho ijja'ijjia jjima mimianijo quea yeno jayojja poani, ecojja topo jjima ojjaña cuanaja ebajji. Jamajjeya ojo jama poani ba'a: “E'e, oya Eyacuiñajji epeeji nei nei; ijja'ijjia jjima mimiani Eyacuiñajji nijje, de” poani —Jesosa poanaje—. Chojja, edasia'yojji poani. Eyacuiñajji epeeji nei poso pea cuaa acani. Jamajjeya ojjañaja ebajji oya mimiani. Quijje oya cuana enije enequi'yojji pojjeama eyajo Eyacuiñajji epeeji nisho jjejojo —Jesosa poanaje—. ¹⁷Miquianaya ca ca ecuea epeeji nei. Ijja'ijjia jjima Eyacuiñajji nijje mimianijo ja'a quea yeno jayojja pojji! ¡A'a jjadasiaquijji jayojja jama pojji! Chojja —Jesosa poanaje—. Ijja'ijjia jjima Eyacuiñajji nijje mimi huicha'a huicha'anijo ijamatii eme', ecojja pea'ai shacuacue; ehuojjaña shiyeshiyejo shacue! ¹⁸¡Jamajjeya onaja ba jjima Eyacuiñajji nijje mimicue ijja'ijjia jjima ani! Jamajjeya eseja Chiiya ohuaya nei miya ba caje, mi pejjejo nequiya. Miquea emimi bame bame jayojja jama acaje, ohuaya —Jesosa poanaje.

Jesosaa eseya quijje eyajo quea huiso sosequia caje'yo, ojo

chacochacoani sosejje

(Noca 12.32-34)

¹⁹—Jiquio meshijo ba'yanijo jaquiana echicha'yo quea huisojo a'a quea nahue bajji! —Jesosa poanaje—. Siippojjya miquea aquiana sii ca chana!. Mojo ca chana!. See'yo chana' pea'ai. ²⁰Cho. ¡Jjeya Eyacuiñajji chacochaco neineicue! E'e jojo nei ohuaya quijje miya sosequia caje'yo quea huiso nee nee eyajo. Esii'yojji pojjeama; miquianajaya poaje'yo tii, miquea eba'e'yojji eyajo. ²¹E'e, jamaya jjashahuabuquiajo miquianaya quea ja'a ba'eje'yo, ecuea

ehuohui'yo jayojja jjashahuabaquije eyajo eba'e'yojjijo; aquiana quea huiso yanijo ca ca miquianaya jjashahuabaquije meshijo eba'ejjijo —Jesosa poanaje.

¡Quea ja'a nee ba'ecue!

(Noca 11.34-36)

22-23—Miquea ecojja quea pame nee neejo miya quea ja'a nee baje'yo echacojji; quea ja'a nee ba'eje'yo pea'ai. Cojja jamajama ca ca quea ja'a eba'ejjijo pojjeama. Quea apo nee nee, de, cojjama' —Jesosa poanaje—. Jiquio ecua quea cojja pame nee jayojja jama miya quea jjashahuabaqui pame nee neejo quea ja'a nee ba'eje'yo Eyacuiñajjiya ejjashahuabaqui'yojjijo jayojja. Quea jjashahuabaqui tai poanijo onaja aquiana cuana quea jea ba majje ca ca quea dejja tai ba'eje'yo, quea nisrehui. Jamajjeya Eyacuiñajjiya miya tecuea caje'yo jama ba'a: “Miya ca mi ca oe quea tai nee ba'yani, ejo jjashahuabaqui ajja” acaje'yo Eyacuiñajjiya —Jesosa poanaje.

¡A'a quea nahue, quea nisrehui ba'ejji!

(Noca 16.13)

24—Cuanaya ¿a'a acuae chacochaco cajji beca dejja mee'ajja cajje? Chojja. Oe echacomeejji shajja'ajja caje, quea boti acaje pea'ai. Pea echacomeejji shajja'ajja jjima acaje, boti'ama acaje pea'ai. Jamaya miquianaya aquiana cuanajo jjashahuuba tiitiiquianijo Eyacuiñajjiyo echacojji pojjeama —Jesosa poanaje.

Eyacuiñajjiya oja epeeiji cuana jaahuana cani

(Noca 12.22-31)

25 Jamajjeya Jesosaa huohui canaje pea jama ba'a:

—E'e jojo nei eyaya miya huohuiaña: ¡A'a quea yeno jjashahuuba tiitiiquijji miquea eba'ejjijo! “E'e pojja'a eya bobimajo manoje'yo, bobo yasijje poaje'yo; e'ishijji pojja'a chama' poaje'yo, quea naba taja; ecuea daqui huiñaje pojja'a, daquima' nei nei eya poaje'yo”. ¡A'a jamaya jjashahuabaquijji! Eyacuiñajjiya miya eshe pana canaje, yamiji. Jamajjeya ohuaya miya bobo quia meesahua caje, daqui quia meesahua caje pea'ai. 26 E'e de, ¡bacue cuichoiji cuana! Quea jaji ba'yani. Oya cuanaa que chaco ajja, bobo chicha ajja, equi yasijje iya ajja quiije e'ijjia'yojjijo. Eseja Chiyya oya cuana jaahuana cani. Cuichoiji ojaya nahue'ama; miya ca ca oe ojaya quea nahue nee nee. 27 ¡Jjashahuabaquicue! ¿A'a miya quea ao nee epoaje poso jjashahuuba neineiquianijo miya tii aoje'yo? Chojja. Jamatii. Jamajjeya oya jayojja aquiana chama' epoaje poso ja'a quea mete pojji! —Jesosa poanaje.

28—¿Apiojji miya jjashahuabaquiani quea yeno daquijo? ¡Bacue eshasha ebiojo tiiian! Shasha cuana chaco ajja, oja daqui cuana soco ajja. 29 Jamatii quea bame nee nee nequiani. Jodioja emeshi mese yahuajo nei nequiya Sanomo bajjaniya daqui quea nahue nee nee huosho ca poa; jamatii oja daqui quea bame pishana. Shasha ca ca quea bame nee nee. 30 E'e —Jesosa poanaje—,

Eyacuiñajjiya shasha cuana tii mee cani quea bame nee. Jjeya shasha cuana enequi; mecahuajje yaa'yani, joca'yani; dahuajea cani cuaa pojja'a, chama'yo tii poani. Jiquio ecua Eyacuiñajjiya shasha quea bame nee pohua mee cani jamaya ohuaya e'e jojo nei miya ba'e meesahua caje'yo. Miya ojaya quea boti nee nee. Miquianaya jjashahuuba taitiquiani jama ba'a: "E'e pojja'a Eyacuiñajjiya eseya jaahuana jjima" jamaya miquianaya poani —Jesosa poanaje.

³¹—A'a jjashahuuba taitiquiji jama ba'a: "¿A'ya cuee che ijijaje, de? ¿A'ya cuee ishije, de, chama' ena? ¿A'ya cuee che huoshaje?" ³²Eyacuiñajjiya epreejji pojjeama cuana ojjaña aquianajo jjashahuabaquiani tii tii. Eyacuiñajjiyo jjashahuubaquiji ajja. E'e jojo nei esejaya Chii eyajo ani miquea aquiana eba'e meejjijo jjashahuabaquiani. Ohuaya miya jaahuana caje'yo —Jesosa poanaje—. ³³Jamajjeya jjashahuabaquicue tii tii jama ba'a: "Quijje Eyacuiñajji ojjaña Emeshi Mese po majje onijjeya eyaya pea cuana huoojeaje'yo eyajo. ¡Ojaya esohui quea ja'a jayojja jama ca'a'yahua!" acue —Jesosa poanaje—. Jamaya jjashahuabaquianijo ohuaya miquiana huasijje aquiana eba'e meeji quia meesahua caje'yo pea'ai —Jesosa poanaje.

³⁴—Jamajjeya a'a quea yeno jjashahuabaquiji jama ba'a: "¿Aya shai ecuana jaahuana caje mecahuajje?" Miya Eyacuiñajjiya jaahuana caje'yo. Quijje quea camaja eba'ejji poaje pojja'a. Jamatiiya ohuaya miya ba'e meesahua caje'yo —Jesosa poanaje.

¡A'a pea cuana niñebajji!
(Noca 6.37-38, 41-42)

7 ¹—¡A'a pea niñebajji! —Jesosa poanaje pea'ai—. Jamaya Eyacuiñajjiya boti'ama. ²Miya pea cuana niñebajji poanijo Eyacuiñajjiya miya tecuea caje'yo pea'ai. Miquiana pea nijje jjabeiqui'yajo Eyacuiñajjiya miquianajaya mimishi cuijea caje'yo. Ma ecua miyaya onaya aña, jamaya miya acaje'yo Eyacuiñajjiya.

³—¿Apiojji acuae jja oe miquea epreejji tecueaña so'o ca mimijajijiya? ¿A'a miquianaya mimishi pajealyonaje pea tecuea jjimahuajo ojaya mimishijo? Chojja, miya ca mi ca oe mimijajipajea'yo jjima pea'ai. Jamaya miya poani ba'a: Miyaya baña huenihueni shabo biso nei nei miquea epreejjiya ecojjajo nequi. ¿A'a cuae jja oe miyaya miquea ecojjajo dojjojo nequi huenihueni shabo quea quembaña so'o? ¡Miquea ecojjajo nequi huenihueni shabo quea quembaña oe huijjeajea meecue! ⁴⁻⁵A'a jiquio jama mimiji ba'a: "Epreejji, huenihueni shabo biso neiya mi cojja dobi canaje. Ache ba'laja cahuijjealaja'yo sahua, de shabo biso nei". Chojja. Shabo quea quembaña miquea ecojjajo nequi, miya quea cojja shojo poanijo ca jje ca ebajji pojjeama. Miya ca mi ca oe ma shabo miquea ecojjajo nequi ¡ebionei huijjeajea mee'yo socue! ¡Majoya shabo biso nei nei miquea epreejjiya ecojjajo nequi huijjeajea'yocue! —Jesosa poanaje.

⁶—Miquea aquiana quea nahue nee nee ¿a'a quiaña iñahuehua huasijje, cuichi yasijke pea'ai? Aquiana nahue quishipasha caje'yo, de. Oya cuana

quea mase; ijja ca chana' mi. Jamaya poani dejja jjashajja'ajjaqui ajja nei nei; quea mase iñahuehua jama, cuichi jama. Jamajjeya ɔona huasijje Eyacuiñajji esohui quea pame nee a'a huohui tiitijiil! —Jesosaa acanaje.

**¡Eyacuiñajji nijje mimi neineicue! Ohuaya miya shajja'ajja caje
(Noca 11.9-13; 6.31)**

⁷Jesosa jama poanaje pea'ai ba'a: —Jama acue ba'a: ¡Mimi neineicue Eyacuiñajji nijje! Onijje mimianijo ohuaya miya jaahuana caje'yo. Cuanaya aquiana chama' ba majje sa'ajja neineiaña ijama mimi neineimaya pocue Eyacuiñajji nijje! Ohuaya miya shajja'ajja caje'yo. Cuanaya esecuejo nequiya miyaya taaaña miquea epeejji nijje emimiji. Esecuejo nequi taaa tiitii nequiani jayojjaya ¡Eyacuiñajji nijje mimi majamajacue! Ohuaya miquea esohui jayojja jama acaje'yo. ⁸E'e jojo nei onijje mimianijo Eyacuiñajji jaahuana caje'yo; o sa neinei poanijo ohuaya miya saja'a caje'yo. Esecuejo taaa nequi jayojja jama pocue; ohuaya miya saja'a caje'yo —Jesosa poanaje.

⁹—Ebacua ejja oja chii nijje jama mimime poajo ba'a: “Ecue chii, ¡che mo oe pahui quiacue e'iji'ajji!” acajo, ¿a'a oja chiiya mei quia caje? Chojja. ¹⁰“Ecue chii, ¡che mo oe jai quiacue e'iji'ajji!” acajo, ¿a'a oja chiiya peyo quia caje'yo? Chojja. ¹¹Jamajjeya miquianaaya, jamatii quea mimishi jjashahuabauquianaya miquianajaya bacua cuana jaahuanaña. Jamajjeya esejaya Chii eyajo aniya miya jaahuana caje'yo e'e jojo nei onijje mimianijo. Oya ca ca oe quea pame nee nee enequi tii tii —Jesosa poanaje.

¹²—Miya mimiani pea nijje jama ba'a: “¡Enijje quea pame nee po tiitii'yocue!” Jamajjeya ¡pea cuana nijje quea pame nee po tiitii'yocue! E'e, jamaya yahuajo Moisesija esohui etehue'yo poa. Jamaya Eyacuiñajji esohui huohuijji yahuajo nei ba'ya poa pea'ai —Jesosa poanaje.

**Beca ejiooji
(Noca 13.24)**

¹³⁻¹⁴Jesosaa huohui canaje pea jama ba'a: —¡Esecue biso neijje dobicue! ¡Ejiooji biso neijje poquicue, ma eyahuasijje epoquijji ejioojiji! Jomajo ba'e tiitije'yo eseya. Eyacuiñajji esohui ejiooji pame jayojja. Eya ejiooji esecue jayojja pea'ai poani —Jesosa poanaje—. Oe pojji cuana Eyacuiñajji ejioojiji poquiani, de. Pea esecue ejiooji ai'ajje epoquijji. Ma ejiooji ai'ajje poqui majje cuaqui yasijje poquije'yo. Jamajje quea huiso poquiani ejiooji ai'ajje, de —Jesosa poanaje.

**Esohui huohuijji nisho, siajjepoiji
(Noca 6.43-44)**

¹⁵Jesosa jama poanaje pea'ai ba'a: —¡Esohui huohuijji nishoja esohui a'a shajja'ajjajji! Dasia ca chana' mi. Mi que poeje jjapee nishoquiya. Oya cuana quea bei jayojja poe'ani. Cho, quea bei pojjeama. Aquiana quea mase jama poani oya

cuana. ¹⁶¡Quea mimishi poanijo bahuejjacue oya cuana esohui huohuijji nisho! ¿A'a acuae acuisha jjonojo acuijjajja quea pame ba'yani? Cho. ¿A'a shaponajo acuijjajja quea pame chicha cani? Cho. ¹⁷Jamaya esejaya eba ba'a: Acui quea pamejo acuijjajja quea bame. Acui quea taijo ejjajja quea tai poaje. ¹⁸Acui quea pamejo acuijjajja quea tai pojjeama ba'yani. Acui quea taijo ejjajja quea bame pojjeama ba'yani. ¹⁹Acui taijo ejjajja quea tai poani. Jamajjeya jajajeaña seya, dahuajea'yaña seya. ²⁰Acui eseaya baje ejjajja ba majje. Acui quea tai ba majje eseaya eba acui quea tai. Jama jayojja esohui huohuijji quea mimishi ba majje eseaya oya esohui huohuijji nisho bahuejjaje —Jesosa poanaje.

Jesosa shajja'ajjajji e'e jojo nei
(Noca 13.25-27)

²¹—Quea huiso dejja cuana huohui cani jama ba'a: “Jesosa Quito, miya ecuanaja Emeshi Mese e'e jojo nei”. Chojja, beca cuana siajje poani. Ecue Chii eyajo anija ejjashahuabaqui'yojji jayojja jama po ajja. Jamajjeya oya cuana ecue Chii eyajo ani yasijje poqui'yo ajja. Pea cuana e'e jojo nei ecue Chijja ejjashahuabaqui'yojji jama poani. Oya cuana poquije'yo ecue Chii eyajo ani yasijje, ojaya Emeshi Mese nei yasijje. ²²Quijje e poe o'oyajo quea huiso cuana siajje poaje enijje jama ba'a: “Ecuea Emeshi Mese, Eyacuiñajjiya eya huoojea canaje miquea esohui huohuiya. Ohuaya eya eshahua huoojeacuayajea meesahua ca'yonaje. Ohuaya eya ameesahua canaje ma dejja aijima acani”. Quijje jiquio jayojja jama acaje'yo siajjepojiya. ²³Majoya eyaya oya cuana tecuea neineije'yo jama ba'a: “Chojja. Miquianaya enijje jjapeequi'yo jjima. ¡Miña ca oe poquicue quea huesha nee! Quea mimishi, quea mimijjequijea ca miña” aje'yo —Jesosa poanaje.

Equi iyajji jama Jesosaja epeejji cuana quea jjashahuabaqui ja'a nee
(Macoso 1.22; Noca 6.47-49)

²⁴—Joya beca cuaa ecuea esohui shajja'ajja majje jamaya acaje'yo. Ojaya ejjashahuabaqui'yojji quea pame nee. Jamajjeya jiquio ecua equi quea ca'a emacojo iyaña jayojja jama jjashahuabaquime oya poani. ²⁵Ena quea quemodo poajo, jjayehuequijajo beni quea quemohua equi jeaquena cani. Jamatii equi quea ca'a emacojo ani; jaabicha jjima acani. ²⁶Pea cuaa ecuea esohui shajja'ajja ajja. Ecuea esohui jayojja jama a'ajja pe'a'i. Oya cuana quea jjashahuabaqui quehua jayojja jama poani, equi quea quemodo iya cani meshijajijo jama. ²⁷Ena quea quemodo poajo ohua caje. Beni quea quemohua po majje equi janobajjima nei jeabichajea caje'yo —Jesosa poanaje.

²⁸Jesosaa eyiyo quibojo esohui huohui ca poa. Apoa po majje dejja quea huiso cuana shajja'ajja majje jama poanaje ba'a: —E'e de, Jesosaa esohui quea ja'a nee nee huohui cani. ²⁹Ohuaya huohui cani emeshi mese jayojja jamaa, Moisesija esohui etehue'yo huohuijji jayojja jama pojjeama, de —poanaje ojjaña cuana.

**Dejja batata epo'yo, ma dejja shicui jjima acani jjajea meequi
ca'yonaje Jesosaa**
(Macoso 1.40-45; Noca 5.12-16)

8 ¹Majoya Jesosa eyiyo biajje ani esohui huohuipajea majje jaaoque'yonaje. Quea huiso dejja cuana poquinaje onijje. ²Oe dejja quea mano nee, batata epo'yo poeyanaje Jesosa que. Ecui'oshajjajo nequinaje o bihuajji. Jama poanaje ba'a: —Jesosa, ecuea eba miya ona jjajeaqui mee'yoji nei nei poani. Jamajjeya miyaya eya jjajeaqui mee'yo sa amajje ¡mo che jjajeaqui mee'yocue!

³Jesosaa ma dejja napa'ajja canaje emeya. Jama miminaje onijje ba'a: —E'e, eyaya miya jjajeaqui mee'yo sa aña. ¡JJajeaqui'yocue miya!

Jjajequinana'yonaje jjeya nei. ⁴Jamajjeya Jesosaa oya huohui canaje: —¡Shajja'ajjacue mo! Eyaya miya jjajeaqui mee'yonaje. Jamatii ¡a'a jjeya pea cuana huohuipaji! ¡Poquicuajcua Jenosanena huasijje, Eyacuiñajjija equi yasijje, Eyacuiñajjija nijje mimiani yasijje! Oya huohuicue miyaya: “Eya huaquia'yonaje, jjajeaqui'yonaje mo” acue. ¡Moisesija esohui jayojja jama oe pocue pea'ai! Miya ehuaquia'yohua jjejojoya ¡Eyacuiñajjija nijje mimiani yasijje beca huia' quiaquicue Eyacuiñajjija bihuajji! Jamajjeya ojjaña ba caje miya e'e jojo nei ejjajeaqui'yo —oya acanaje Jesosaa.

Jesosaa sohuinano huoojeajji poanija echacojjii huaquia mee ca'yonaje
(Noca 7.1-10)

⁵Quijke Jesosa Capenaoma huasijje poqui'yonaje. Jomajo oe dejja sohuinano quea huiso nee, 100 huoojeajji poani Jesosa que poeyanaje. Oya pea, Jodio dejja pojjeama. ⁶Ohuaya Jesosa huohui neinei canaje jama ba'a: —Jesosa, ecuea epeejji, ¡shajja'ajjacue mo che! Ecuea echacojjii poani quea mano nee nee ecuea equijo jaa. Jeo'yo ajja poanaje. Quea yami nee nee jaa —poanaje.

⁷Jesosaa oya saja'a canaje jama ba'a: —E'e, eya poquije miquea equi yasijje miquea echacojjii poani huaquia mee'yohua.

⁸—Chojja, Jesosa —sohuinano huoojeajji poanaje—. Miya Jodio dejja quea pame nee nee poanijo ¡apiojji ecuea equi yasijje dobiquije? Eya Jodio pojjeama; quea pame pojjeama. Miya jjahuaquiameequi'yoji nei nei. Jamajjeya ecuea echacojjii quea huesha jaa. ¡Miyaya jiquiojo tii nequuya huohuicue! ¡Huaquia mee'yocue! ⁹E'e, jamaya poani ba'a: Pea emeshi mese cuaa eya huoojea cani. Ojaya esohui jama eyaya aña. Pea'ai eyaya sohuinano cuana huoojeaña. Eya huoojeajje poquije. Eya iyaajje pea sohuinano poeje. Eya huohuajje ecuea echacojjii chacochacoje ejo. Jamajjeya miya huohuajje ecuea echacojjii jjaajaquije'yo, de.

¹⁰Shajja'ajja majje Jesosa quea bihui nee nee poanaje. Ojjaña cuana huohui canaje: —¡Shajja'ajjacue! Jiquio dejja Jodio pojjeama. Jamatii Eyacuiñajjija nijje jjapeequiani e'e jojo nei. Miya ca mi ca oe, oe pojji jjashahuubaquiani Eyacuiñajjijo. ¹¹E'e de, quea huiso dejja cuana Jodio

pojjeama ojjaña meshijo ba'e enijje jjapeequije'yo. Eyajo eya Emeshi Mese oe nei poaje, oya cuana ojee ijjia'ijjiaje Jodio etiiquiana cuana nijje, Amajama nijje, Isaaca nijje, Jacobo peal'ai nijje. ¹²Beca Jodio cuana ca ca jjashajja'ajjaqui ajja jjejojo enijje eba'ejji pojjeama. Eyacuiñajjiya oya cuana jeacuayajea caje'yo quea misi nee yasijje. Jomajo pa neineije'yo. Quea yenohua jjejojo ese! ijjiayajjea caje'yo —Jesosa poanaje.

¹³Jamajjeya sohuinano huoojeajji acanaje: —¡Poquicue miya miquea equi yasijje! Miquea eba eya ejjaajaquimee'yojji nei nei. Jamajjeya eyaya miquea echacojji jjaajaqui meeje'yo.

Jesosa mimianijo tii sohuinanoja echacojji jjaajacuajiqui'yonaje.

Quea huiso cuana huaquia mee ca'yonaje Jesosaa
(*Macoso 1.29-34; Noca 4.38-41*)

¹⁴Majoya Jesosa poquinaje Penoja equi yasijje. Penoja ano ba canaje quea quiyo nee nee jaa. ¹⁵Emanojaa me' napa cajje jjaajaqui'yonaje. Boe canana'yonaje. Jamajjeya anisohua'yo majje Jesosa, pea cuana pea'ai bobia canaje, Penoja anohua.

¹⁶Majoya aje oe sinecua dejja cuaa quea huiso niñepoqui cuana Jesosa que ye canaje. Jesosaa eshahua cuana huoojeacuayajea ca'yonaje: —¡Cuayaqui'yocue, oe! —poanaje.

Jesosa mimi jeahuajo, o niñepoqui po meeiji poani cuayaquinananaje. Ojjaña emanojaa cuana jjaajaqui mee ca'yonaje, huaquia mee ca'yonaje pea'ai, Jesosaa.

¹⁷Jamaya poanijo Jesosa Isaiaja esohui yahuajo nei jayojja jama acal'yonaje. Isaia Eyacuiñajjiya esohui huohuijji yahuajo nei nei Jesosa Quitojo jama poa ba'a:

“Ohuaya ecuana quea mano poanijo, quea nee pea'ai poanijo, quea jaji nee po mee ca'yonaje; huaquia mee ca'yonaje”.

Isaiaa jamaya aca poa yahuajo nei nei Jesosa Quitojo.

Beca cuana Jesosa nijje poqui sa poani
(*Noca 9.57-62*)

¹⁸Pea pojjafo quea huiso dejja cuana Jesosa que jjachichaquinaje. Poqui sa poanijo Jesosaa ojaya epjeeji cuana huohui canaje: —Cua'a ¡bae ojje mijji yasijje besapoquicue!

¹⁹Poqui jjimahuajo oe dejja Jesosa que poeyanaje, Moisesija etehue'yo huohuijji poani. Ohuaya Jesosa huohui neinei canaje: —Miya esohui huohuijji quea pame nee. Eya miquea epjeeji nei poaje'yo. Minijke tii eya po'ayequi sa poani —poanaje.

²⁰Jesosaa oya saja'a canaje jama ba'a: —E'e pojja'a, de. Eya ojjaña cuanaja Edoe Mese poani. Jamatii ecuea equi chama' ejomishocajji, de. Samao ca ca oja jjanijo cahuijaa. Cuichojji cuana pea'ai oja ejajo cahuijaa. Jiquiojo ecuea equi chama'!

²¹Majoya Jesosaja pea epjeeji poeyanaje o que. Ohuaya Jesosa huohui canaje: —Ecuea esohui huohuijji, eya ecue chii cuiña poaje so'o. Oya etii nei nei. Quijje oya mano'yajo ohuajeaje'yo. Majoya aje mo oe minijke poquije'yo chacochacohua.

²²—Chojja —Jesosaa oya saja'a canaje—. Pea cuaa, Eyacuiñajija epeejji pojjeama cuaa mique chii cacuiña cahua; ohuaya camojea cahua mano'yajo. ¡Jjeyahua nei enijje po'yocue!

Beni pajiji

(Macoso 4.35-41; Noca 8.22-25)

²³Majoya Jesosa bishe ai yasijje nequisohuaqui majje ojje besapoquinaje. O shajja'ajjajji cuana nijje besapoquinaje. ²⁴O besapoquianijo beni quea quemo nee nee poeyanaje. Enashajohua bishe nanejea canaje. Jeasohuajea canaje. Bishe ai iyedojjojo Jesosa cahuijaanaje. ²⁵O shajja'ajjajji cuaa Jesosa ishe acanaje. Jama poanaje ba'a: —Emeshi Mese Jesosa, ¡shequicue oe! ¡Coya aje se hui'il'ya! —taaanaje.

²⁶Shequil'yo majje Jesosaa oya cuana saja'a canaje: —¿Apiojji acuae nequiana quea mete nee nee poani? ¿A'a mi ejo e'e nei pojjeama poani?

Jamaya mimi majje Jesosa nequisohuanaje. Beni tecuea canaje: —¡Beni, jamaya, nequioquequequicue oe!

Majoya bae ena nijje jama poanaje ba'a: —¡A'a enashajo pojji! ¡Enashajo popajea'yocue!

O jama mimime poajo, enashajo popajea'yonaje. Beni popajea'yonaje. ²⁷Jamajjeya bishe aijo anica Jesosajo quea bihui nee nee poanaje. Ojee mimimiminaje jama ba'a: —¡Ache dejja shai jiquio quea sohui poja nee nee! Beniya, enashajo cuaa pea'ai oja sohui shajja'ajja cani, de.

Eshahua ojo nequiajo, dejja quea mase nee Jesosaa niñe poquipajea

mee ca'yonaje

(Macoso 5.1-20; Noca 8.26-39)

²⁸Jesosa bae ojje miji yasijje ba'enquinaje, Jjanana meshi yasijje. Majoya beca dejja Jesosa que poeyanaje. Oya cuana ba'enaje mei jjanijo, ma emano'yo cuana sajaajo. Eshahuaa oja eyami yasijje dobiquinajejo, quea mase nee nee, niñepoqui poanaje. O ani chipi nei jjayejjequi ca ajja pea cuana.

²⁹Niñepoqui cuana Jesosa ba majje taaaanaje jama ba'a: —Miya Eyacuiñajija Bacua Ejja. ¿Apiojji miya ecuana que poeyanaje? ¿A'a jjeyahua nei ecuana cuaqui yasijje jeajeaje'yo? Eyacuiñajija eshahua cuana cuaqui yasijje huoojea caje'yo quijje, jjeya nei pojjeama, de —taaame poanaje niñepoqui.

³⁰Quea chipi nee cuichi cuana quea huiso ijjia'ijjia nequi. ³¹Eshahua cuaa Jesosa jama huohuime acanaje ba'a: —Miyaya ecuana dejjajo nequi cuayaqui mee'yo majje ¡cuichi cuana huasijje ecuana huoojea'yocue!

³²—E'e, ¡poquicue cuichi cuana huasijje! ¡Dobiquicue! —Jesosa poanaje.

Jamajjeya dejja cuana jeanana'yo majje eshahua cuana cuichi cuana huasijje dobiquinaje, ojjaña. Dobiqui majje cuichi cuana cuajicuaji jaaoquequequinanananaje. Bae quea sahua doe nee nee yasijje cuichi cuana hui'il'yonaje, ojjaña.

33 Ba majje cuichi jaahuanajji cuana jjajjasoquinaje. Cuajicuajipoquinaje cuiñajji yasijje. Ojjaña cuana ma cuiñajjijo ba'e huohui capoquinaje. Eshahua cuanajo, cuichi cuanajo, dejja cuana niñepoqui jjima' po mee canaje pe'a'i huohui canaje. 34 Jamajjeya ojjaña cuana ma cuiñajjijo ba'e quea mete poeyanaje Jesosa que. Jesosa quea sohui poja nee nee jojoya ojjaña onijke quea mete miminaje jama ba'a: —¡Poquicue miya pea meshi yasijje!

Ojjaña ojo quea mete poanijo Jesosa ojje besapoqui o'oyanaje.

Jesosaa pea emanojaa jjaajaqui mee ca'yonaje, quibojjisha

(Macoso 2.1-12; Noca 5.17-26)

9 1 Jamajjeya Jesosa bishejje besapoqui o'oyanaje ojje miji yasijje, Capenaoma huasijje. 2 Jomajo pea dejja cuaa quibojjisha quea mano nee jaa ye canaje Jesosa que, equipajaajjijo. Ma ba majje Jesosa jjashahuabaquinaje jama ba'a: —E'e, jiquio dejja cuana jjashahuabaquianai eya ejjaajaqui mee'yoji nei nei.

Jamajjeya Jesosaa emanojaa huohui canaje: —E'e ecuea epeejji, ¡quea bihui nee pocue! Eyaya miquea mimishi cuana cuijea'yonaje.

3 Jesosaja esohui shajja'ajja majje Moisesija etehue'yo huohuijji poani cuana quenequenenaje. Jjashahuaba taiquinaje jama ba'a: —¡De! Jiquio oya Eyacuiñajji pojjeama. ¿Apiojji Eyacuiñajji jayojja jama nei nei mimiani, de? Jamaya quea mimishi.

4 Jamajjeya Jesosa ojaya ejjashahuaba taiquijji ba majje jama poanaje: —¿Yajjajje acuae quiana quea quene enije poani so'o? 5 ¿Ache shai quibojjishajo quea camaja eyaya anaje? ¿A'a ojaya mimishi cuijea'yoji quea camaja? ¿A'a jja oya nequisohua meeje'yo eyaya? Ba'ajja —Jesosa poanaje. 6 Jamajjeya eyaya ojjaña Edoe Meseya miquianaya ba meeaña eya ca ca iña Emeshi Cuiñacoojji quea ca'a nee nee nequi. Jamajjeya eyaya mimishi cuijeaje'yo nequianaja.

Majoya Jesosaa quibojjisha acanaje: —¡Nequisohuacue! ¡Miquea equipajaajji bebo majje miquea equi yasijje poquicue!

7 Jjeya nei quibojjisha nequisohua majje jeo'yonaje. Jeojeopoquinaje ojaya equi yasijje. 8 Ba majje ojjaña cuana quea bihui nee nee poanaje: —¡E'e nei, joya quibojjisha jeo'yonaje jjeya nei! ¡E'e e, Eyacuiñajji nijjeya Jesosaa emanojaa cuana huaquia mee ca'yani! ¡Mimishi cuijea mee ca'yani pe'a'i! —poanaje ojjaña.

Jesosaa dejja Mateo bajjani iyaa canaje

(Macoso 2.13-17; Noca 5.27-32)

9 Majoya Jesosa poquinaje pea cuiñajji cuana huasijje. Poquijeya Mateo ba canaje equi ejjeshejji jaahuanajjijo ani. Mateo ona sose jjeshejji poani, eba'ejji sosejje. Ojjañaja emeshi meseja esohuijo jjeshe mee cani, dejja cuana eba'ejji sosejje. Ba majje Jesosaa Mateo iyaa canaje: —Mateo, ¡enijke po'yocue!

Jamajjeya Mateo nequisohua majje Jesosa nijje poqui'yonaje.

¹⁰ Majoya Mateohua ojaya epeejji cuana iyaa canaje ojaya equi yasijje e'ijjia'ijjiajji Jesosa nijje. Jamajjeya Jesosa o shajja'ajjajji cuana nijje Mateoja equi yasijje poquinaje ijjia'ijjiaa. Quea huiso dejja cuana Mateo jama ona sose jjeshejji poani, dejja mimishi cuana pe'a'i poquinaje. Ojee ijjia'ijjia'aninaje Jesosa nijje, Jesosa shajja'ajjajji cuana nijje pe'a'i. ¹¹ Ba majje Jodio esohui huohuijji Paniseo cuana Jesosa shajja'ajjajji cuana nijje mimijajinaje jama ba'a: —¿Apiojji miquea esohui huohuijji ijjia'ijjiani dejja mimishi nijje, ejjeshejji chichajji cuana nijje pe'a'i? ¿Apiojji, de?

¹² Jesosaa oya cuana shajja'ajja canaje. Huohui canaje: —¿A'a dejja cuana quea mano pojjeama eshicuijji quiajji sa poani? Quea mano poanijo ca ca eshicuijji quia cajji. Jamaya miquianaya joya mimishi'ama poso jjabaquianai ecuea esohui shajja'ajja sa po ajja. Mimishi cuaa ca ca shajja'ajja cani. Jamajjeya eya dejja quea mimishi nijje jjapeequianai quea ja'a nee epo meeiji. ¹³ ¡Bacue oe! Siajjepojji jama poani ba'a: “Eya ca ca iña quea pame nee, mimishi'ama nei nei”. Jamajjeya joya quea pame poso jjabaquianai ecuea e'iyaa'yojji pojjeama enijje ejjapeequijji. Chojja. Eya poeyanaje dejja joya quea mimishi nee nee iyaaa, mimishi pajea mee'yojji. Jamajjeya esohui etehue'yojo jjabahuejjaquicue jama ba'a: Yahuajo nei nei Eyacuiñajjiya Osea tehue mee ca poa jama ba'a:

“Huo cuana cuia cani. Cuia majje na sho cani e bihuajji. Jamaya ecuea quea boti pishana. ¡Pea cuana oe ba'e meecue tii quea bei! Jamaya ecuea quea boti nee nee”.

Jamaya tehue mee ca poa yahuajo —jamaya Jesosaa Paniseo cuana acanaje.

Bobi ijjia jjima yajjijo huohui'ajja canaje cuaa

(Macoso 2.18-22; Noca 5.33-39)

¹⁴ Majoya Huani, ma ona besameejji poa ejeanobiajea jaa. Ojaya eshajja'ajjajji cuana poeyanaje Jesosa que. Jama huohui'ajjame acanaje ba'a: —Ecuana, Paniseo cuana pe'a'i Jodio etiiquianaja esohui jama poanijo bobi ijjia'ijjia jjima ani Eyacuiñajjiyo jjashahuaba neineiquianijo, onijje mimi neineianijo. Jesosa, ¿apiojji acuae mi mi shajja'ajjajji cuana jama po ajja? —oya cuana poanaje beshahua nei quea tecue.

¹⁵ Jesosaa oya cuana saja'a canaje: —Chojja, eya ecuea epeejji cuana nijje yanijo ca'ijjia cahua. Ejjahuanaquijjiyo yahueja epeejji cuana onijje yanijo ca'ijjia'ijjiaquiahua. ¿A'a yahueja epeejji cuana onijje yanijo quea yeno? Chojja. Quea bihui nee. Yahue poqui'yajo ca ca oe ojaya epeejji cuana ijjia'ijjia sa po ajja poaje, quea yeno jjeojo jjashahuaba neineiquianijo. Eya jiquio ecua yahue poquianijo yajoyjaya jama poaje: Quijje eya poqui'yo majje ecuea epeejji cuana Eyacuiñajjiyo jjashahuaba neineiquianijo ijjia'ijjia ajja poaje.

¹⁶ Majoya Jesosaa huohui canaje pea esohui ejjashahuabaqui meeiji: —Eseyaya baacojja esee'yohua caca ajja bishe eyacuajo. Cho. Baacojja etii

enajo nequi see'yani, ca'a'ama. Jjasajajeaquije'yo. Bishe ihuicuajicuajije. Bishe eyacuajo ca ca baacojja eyacuaa cacaña.

¹⁷—Pea'ai ena sese cuatatanijo iya ajja meshimisi etijjo. Ena sese cuatata neineianijo, meshimisi ca'a'ama jjaajajeaquique majje ena sese jjashojeajeaquije'yo. Cho, ena sese cuatatanijo meshimisi eyacua quea ca'ajo iya cajji.

Jamaya Jesosaa huohui canaje o jjabahuejjaquijji ba'a: Ojaya esohui eyacua quea ja'a jama ca'a cahua. Jamajjeya Eyacuiñajjiya oya cuana quea boejea nee ba caje'yo.

Epona sho'i eman'o'yojaa Pea epona naggi poani tii tii

(*Macoso 5.21-43; Noca 8.40-56*)

¹⁸ Jesosa jamaya dejja cuana nijje mimianijo, pea Jodio dejja o que poeyanaje, ma Jodioja ojee ejjachichaquijji equi jaahuanajji poani. Ecui'oshajjajo nequinaje o bihuiajji. Jama poanaje ba'a: —Esohui huohuijji, ecuea ebacua piona mano'yonaje jjeya nei. ¡Poecuajicue o napa'ajja emeya! Jamajjeya oya shequije o'oya, de.

¹⁹ Nequisohua majje Jesosa epona sho'ija chii nijje poquinaje. Jesosa shajja'ajjjajji cuana onijje poquinaje pea'ai. ²⁰ Jesosa poquije oe eponaa ba canaje. Oya quea mano, naggi popajea'yo ajja. Ome miji pea beca, 12 eshequiajame na cuayapajeaquil'yo ajja poa. Jesosa que quehuajje poeyanaje. Ohuaya oja daqui cuema iña canaje, emeya. ²¹ Jjashahuabaquinaje jama ba'a: —Eya Jesosaja daqui cuema iña majje naggi popajea'yo.

Ohua daqui cuema iña cajje Jesosa jjabajequinaje. ²² Epona nama'yo ba canaje. Jama poanaje onijje ba'a: —She, ¡quea bihui nee pocue! Miya quea ja'a jjashahuabaquinaje ejo jama ba'a: "E'e jojo nei Jesosaa eya naggi popajea mee caje'yo". Jamajjeya eyaya miya naggi popajea mee'yonaje.

Jamajjeya ma epona naggi popajea'yonaje.

²³ Majoya Jesosa equi jaahuanajjija equi yasijje poquinaje. Dobiquinaje. Ba cañaquinaje quea huiso dejja cuana, ponaa pe'a'i equijo nequi. Epona sho'i eman'o'yojo ojee pa'ani. Ojjaña quea shajjaquijjo poani. Dehue mia cani emojea'yojjijo pea'ai. ²⁴ Jesosaa ojjaña cuana huoojeacuayajea canaje: —¡Cuayaquicue nequiana esecue yasijje! Jiquio epona sho'i cahuijaa; epoquijeyo'yo pojjeama —poanaje.

—Chojja de. Oya mano'yonaje, de; shequi'yo ajja —poanaje cuana.

²⁵ Ojjaña cuana esecue yasijje cuayaquij'yo, Jesosa epona sho'i jaa huasijje dobiquinaje, pea equecuayijji yasijje. Me' iña majje epona sho'i shequi mee ca'yonaje. ²⁶ Jamajjeya ojjaña ma meshijo ba'e yasijje huohuiqui canaje cuaa: —¡Jesosa jjashequi meequei'yojji, de! ¡Jiquio epona sho'i ma emano'yo poanaje shequi'yonaje! —poanaje.

Jesosaa beca dejja cojjama' quea cojja ja'a po mee ca'yonaje

²⁷ Quijje pishana Jesosa ma equijo ani cuayaquij'yonaje. Ejiojjijje poquianijo beca dejja o quiquishijji poquinaje, cojjama' cuana. Taaanaje

jama ba'a: —Jesosa, miya emeshi mese Dabija bacua. ¡Ecuanajo jjashahuabaquicue! ¡Cojjajji mo po mee'yocue!

²⁸ Jesosa pea equi yasijje dobiquiajo cojjama' cuana o que poeyanaje. Jesosaa oya cuana huohui'ajja canaje: —Miquianaya ejo jjashahuabaquiani jama ba'a: “E'e, Jesosa ca ca quea cojja ja'a jjapo meequi'yojji, de”.

—E'e, Jesosa, miya quea cojja ja'a jjapo meequi'yojji —poanaje cojjama'.

²⁹ Jamajjeya Jesosaa ojaya ecojja napa'ajja canaje emeya. Huohui canaje jama ba'a: —E'e, miquianajaya ejjashahuabaquijji ejo quea ja'a nee nee. Jamajjeya eyaya cojjajji po meeje'yoo nequiana.

³⁰ Jjeya nei quea cojja ja'a nee nee po'yonaje. Jesosaa huohui neinei canaje pea'ai: —E'e, eyaya miquianaya quea cojja ja'a po mee'yonaje. Jamatii ¡a'a jihuohuijji so'o! —acanaje.

³¹ Jamatii poqui majje huohui poanaje ojjaña huasijke: —¡Jesosaa ecuana quea cojja ja'a nee nee po mee ca'yonaje, de! —jamaya poanaje.

Dejja mimi'ajja mimi mee ca'yonaje Jesosaa

³² Majoya ma cojjama' poanaje cuana poqui'yajo, pea cuaa dejja mimi'ajja jjequi canaje Jesosa que. Eshahuaa oja yami yasijje dobiqui majje mimi'ajja po mee canaje. ³³ Jesosaa eshahua huoojeacuayajea'yo majje dejja mimi'ajja quea ja'a nee mimi o'yanaje. Ba majje ojjaña cuana quea bihui nee nee poanaje. Miminaje jama ba'a: —¡Chama' beca dejja Jesosa jama, de! Ohuaye nei eshahua huoojeacuayajea ca'yani, mimi'ajja mimi mee ca'yonaje, de —poanaje.

³⁴ Jamatii Paniseo cuanaa Jesosa quehua niñeba canaje. Jama acanaje ba'a: —Chojja de, Jesosa eyamiquecua pojja'a. Pea eshahua huoojeacuayajea mee cani Edosiquiana nijjeya —siajje pome poanaje.

Jesosa Quito ojjaña cuanajo jjashahuabaquinaje quea yeno

³⁵ Jamajojoya Jesosa poquinaje ojjaña cuiñajji quea quemó huasijke, ojjaña cuiñajji sisi cuana huasijke pea'ai. Jodioja equi ojee ejjachichaquijji cuana huasijke dobiquinaje esohui huohuiya.

—Eya quijje eyajo ojjañaja Emeshi Mese oe nei poaje'yo —Jesosaa acanaje.

Ojjaña quea mano jaa jjaajaqui mee ca'yonaje, huaquia mee ca'yonaje pea'ai. ³⁶ Dejja cuana quea huiso nee nee jjachichaquinaje o que. Jesosaa oya cuana ba canaje ñajjajja jama. Ejaahuanajji quea pame chamajo ñajjajja nequi mee ajja quea pame nee. Jamaya ojjaña cuana quea yeno poani; eba'ejji quea camaja ba'yani, ejaahuanajji quea pame chama' pea'ai, de. Jamajjeya Jesosa ojjañajo quea yeno poanaje. ³⁷ O shajja'ajjajji cuana nijje miminaje dejja cuanajo. Jama poanaje Jesosa ba'a: —Anoso quejo jahua majje echacojjii cuanaa cachicha cahua. Dejja cuana anoso jahuajahua jayojja jama, quea huiso nee nee. E'e de, jjeya ojjaña cuana jjashahuabaquiani e'e jojo nei epoji; shajja'ajja caje eya Emeshi Mese nei poeyanaje o jaahuanaa. Jamatii oe

pojji Eyacuiñajijo chaco sa poani. ¿Aya acuae oya cuana jjabahuejjaqui mee caje'yo Eyacuiñajijo? ³⁸Jamajjeya ¡Eyacuiñajji nijje mimicue! Jama acue ba'a: "Eyacuiñajji, ¡huoojeacue oe miquea echacojji cuana esohui huohuiya, pea cuana minijje ejjapeequi mee'yojji!" —Jesosa poanaje.

Jesosaa iyaa canaje o shajja'ajjajji cuana 12 huisome
(Macoso 3.13-19; Noca 6.12-16)

10 ¹Jamajjeya Jesosaa o que iyaa canaje o shajja'ajjajji cuana. Oya cuana quea ca'a po mee canaje eshahua cuana huoojeacuayajea mee'yojji, ojjaña emanojaa cuana huaquia mee'yojji, ejjaajaqui mee'yojji pe'a'i.

²Jesosa shajja'ajjajji nei 12 poa, yohua bajjani ba'a: Simohui ojaya pea bajjani Peno, oja chahua Anesi; Semeneoja bacua ejja Jacobo, oja chahua Huani; ³Penipe, Matonome, Tomasi, Mateo ma beijo chichajji emeshi mesejo poa; Apeoja bacua ejja Satiaco; ⁴Simoni Senote; Nemeo ojaya pea bajjani Taneo; Jodasa Isicanio, ma Jesosa iña meesahuajji poanaje dejja mimishija quecua'yojji. Mahuiso Jesosaa babaca ca'yonaje ojaya esohui huohuiji epoji.

Jesosaa o shajja'ajjajji huoojea canaje esohui huohuiya
(Macoso 6.7-13; Noca 9.1-6)

⁵Jamajjeya Jesosaa jiquio 12 huoojea canaje onijke chacohua. Jamaya huohui canaje: —¡A'a poquiji Jodio dejja pojjeama cuanaja meshi yasijje! ¡Dejja cuana Samania meshijo ba'e cuana huasijje pea'ai a'a poquiji jjeya! ⁶Chojja, ijjeya poquicue Jodio cuana huasijje! Oya cuana poquiquehuana; Eyacuiñajji nijje jjapeepajequinaje ñajjajja epoquiquehua jayojja jama, de. ⁷Ojjaña cuana huohuicue jama ba'a: "Jjeya Jesosa ojjaña huoojeajji poani" acue. ⁸¡Emanojaa cuana jjaajaqui mee'yocue! ¡Emano'yo cuana shequi mee o'oyacue! ¡Dejja batata epo'yo cuana jjajeaquí mee'yocue pea'ai! ¡Eshahua cuana dejja cuana huasijje dobiqiajoo huoojeacuayajea'yocue pea'ai! Eyaya miquianaya huaquia meesahuaña pea dejja cuana sosema!. Jamajjeya ¡pea cuana queabihui nee oe huaquia mee'yocue sosema! ⁹Jjeya ¡ejjeshejji, mei huo'o pea'ai, beijo pea'ai a'a dojooji! ¹⁰¡Bashosoco bobo dojooji a'a dojooji! ¡A'a beca daqui dojooji! Miquea ejiojji nequi ejiojji shejee dojocue! ¡Oe acui ejjaquecuaca'aquijji dojocue, beca pojjeama! Miquea esohui shajja'ajja majje pea cuaa miya cabobia cahua. E'le, miyaya esohui huohuañajo, bobo caquia cahua. ¹¹Miquianaaya pea cuiñajji yasijje poqui majje ¡sa'ajjacue oe dejja miquea epeejjii epoji, joya bei bei! ¡Ojaya equijo anicue ma cuiñajji amo majje! ¹²Ojaya equi yasijje dobiqui majje huohuicue jama ba'a: "Eyacuiñajjiya miquianaya cajaahuana cahua!" ¹³Ojjaña ma equijo ba'leya miya quea pame nee acajo, Eyacuiñajjiya miquea esohui jayojja jama oya cuana jaahuana caje. Miya quea pame nee mi ba'e mee cajo, cho; Eyacuiñajjiya oya cuana ejahuanajji pojjeama. ¹⁴E'le pojja'a beca equijo, beca cuiñajjiyo miquea esohui shajja'ajja sa po'yo ajjajo, niñeba cami pea'ijo, ¡oya cuana jeajeanal'yocue!

Poquije'yohua jama acue ba'a: "Eyaya miquianaya cajaa aje'yo, ¡quea mimishi mi coma. Eyacuiñajjiya miya ba cani quea mimishi nee nee. Ohuaya miya quea nee nee po mee caje'yo" acue —Jesosa poanaje—. ¹⁵Eyaya miya e'e jojo nei huohuaña jama ba'a: Quijje Emeshi Mese nei poeje o'oya, ojjaña quea mimishi poani quea nee nee po meeje'yo. Yahuajo nei nei dejja cuana Sonomajo ba'e, Jomoshajo ba'e pea'ai quea mimishi nee ba'yanijo, Eyacuiñajjiya quea nee po mee ca'yá poa, yahuajo. Ma dejja shajjama' cuana ca ca Eyacuiñajjiya quea nee nee po tiitii mee caje'yo, de. Sonomajo ba'e cuana ca ca quea nee pishana po tiitii mee caje'yo.

Quijje dejja cuana quea mase nee poaje

¹⁶Jesosaa o shajja'ajjajji cuana huohui canaje pea'ai: —Eyaya miya huoojeaña dejja quea mase ibia jama huasijje. Miquianaya quea beijo ohuaya mi napa ca chana!. Jamajjeya ¡quea jjashahuabaqui ja'a pocue! ¡Quea bei pocue; mimishi'ama pea'ai! ¹⁷¡A'a pajea'yojji dejja cuana quea mase poaje'yo minijje! Miya iña majje dojo caje Jodio etii ani yasijje jeanobiaa. Janobajjima nei cuia caje Jodioja equi ojee ejjachichaquijji. ¹⁸Miya cuana enijje jjapeequianijo dojo caje cuaa pea emeshi mese cuana huasijje, ona huoojeajji nei nei yasijje pea'ai. ¡Jamajjeya miquianaaya esohui quea pame nee ejo huohuicue ona huasijje, Jodio pojjeama cuanaja ejjahuuoequaquijji nei nei yasijje pea'ai! ¹⁹Dojo majje huohui'ajja caje jama ba'a: "¿Ae poani miquianaya?" Jamaya acajje ja'a quea mete pojji! A'a jjashahuabaquijji jama ba'a: "¿Ae shai eyaya huohuige?" ²⁰E'e nei Eyacuiñajjiya miya mimi meesahua caje. Ohuaya huoojea caje Edojjoshahua Pame mi que. Edojjoshahua Pameya miquianaya huohui meesahua caje —Jesosa poanaje.

²¹—E'e, quijje pishana dejja cuana, ponáña pea'ai quea mase nee poaje ecuea epjeeji cuana nijje. Jamajjeya e'o'i mese oja chahua iña meesahua caje'yo onajaya equecua'yojji. Ejeajji cuaa jamaya acaje'yo oja bacua. Ebacua cuana shajjama' poaje. Dejja mase oja chii, oja enaese pojja'a iña mee caje'yo equecua'yojji. ²²Miquiana enijje jjapeequianijo, quea huiso cuana quea quene nee nee poaje'yo minijje. Jamatii enijje jjapeequi pajea'yo ajjajo nequi tiitii meeje'yo enijje eyajo, eya ojjañaja Emeshi Mese oe nei, ejjahuuoequaquijji nei nei poaje. ²³Dejja cuaa oe cuiñajji ba'eya miquianaya janobajjima napa cajo, ¡poquicue pea cuiñajji yasijje! Eyaya miya e'e jojo nei huohuaña: Ojjaña Jodio dejja cuanaja cuiñajji cuana huasijje poqui jjimahuajo, ojjaña cuana huasijje ecue sohui huohui jjimahuajo pea'ai eya, ojjañaja Edoe Mese poeje o'oya —Jesosa poanaje.

²⁴—Ojjaña cuana enijje quea mase poani. Jamajjeya minijje quea mase poaje pea'ai e shajja'ajjajji poani jojoya. ²⁵Echacojji poani o chacomeejji nijje chacochacoanijo, pea cuaa echacomeejji napa cajo, echacojji poani pea'ai napa caje cuaa. ¿A'a e'e? Dejja mimishi cuana ejo siajje poanaje jama ba'a: "Miya Edosiquiana Meesemo bajjani". Jamaya enijje quea tai mimijajianijo quijje quea tai nee nee mimijajje minijje ecuea epjeeji poani jojoya. Jamajjeya miya e jayojjaya acaje'yo; ¡jamatii quea bihui nee pocue! —Jesosa poanaje.

¡A'a quea mete pojji dejja cuanajo!
(Noca 12.2-7)

²⁶—Jamajjeya dejja mimishi cuanajo ja'a quea mete pojji! Ojjaña esohui quehuajje acani, pea cuanaja shajja'ajja jjima, quijje shajja'ajja caje. Ojjaña quehuajje amajje quijje ojjaña ba mee caje'yo.

²⁷—Jjeya eyaya esohui huohuiaña miquiana huasijke, ma pea cuanaja shajja'ajja jjima. Quije pishana miquianaaya ojjaña huasijke huohuiquije ecuea esohui. ¡Quea ja'a nee huohuicue! ²⁸Ojjaña cuanajo, eshahua cuanajo pea'ai ja'a quea mete pojji! Oya cuanaa miya quecua caje'yo pojja'a. Jamatii, miquea edojjoshahua mano meemee ajja. ¡Eyacuiñajji oe neijo jjashahuabaquicue! Shajjama' poajo ohuaya miya mano mee'yo majje cuaquí yasijje jea caje'yo miquea edojjoshahua —Jesosa poanaje.

²⁹—E'e —Jesosa poanaje—, beca anohuui jjeshe cajji beshahua nei sosema!. Nahue'ama nei cuichojji cuana. Jamatii Eyacuiñajjiya, esejaya Chiiya cuichojji cuana ba cani, bobo ijija mee cani. ³⁰Pea'ai ;ache huiso ehuojaña miquea esapajo ba'e? Eyacuiñajjiya eba. Ojjaña ojaya ehuojaña esico, de. ³¹Jamajjeya ja'a quea mete pojji! Cuichojji cuana Eyacuiñajjiya nahue'ama; miya ca ca ojaya quea nahue nee nee —Jesosa poanaje.

¡A'a quea bicho pojji Jesosa nijje jjapeequiani!
(Noca 12.8-9)

³²—Beca cuaa bicho'ama huohui cani: “E'e, eya ca iña bicho'ama Jesosaja epeejji e'e jojo nei”. Jamajjeya eyaya ecue Chii eyajo ani huohuije bicho'ama jama ba'a: “E'e, oya cuana ecuea epeejji e'e jojo nei”. ³³Pea cuana quea bicho poani: “Cho, eya Jesosa Quitoja epeejji pojjeama”. Jamajjeya eyaya ecue Chii eyajo ani huohuije jama ba'a: “Cho, oya cuana ecuea epeejji pojjeama. Cajaa” eyaya aje —Jesosa poanaje.

Ojjaña dejja Jesosajo ojee ba'e meemee ajja quea bei
(Noca 12.51-53; 14.26-27)

³⁴—¡A'a jjashahuabaquijji eya poeyanaje ojjaña cuana ojjaña meshijo ojee quea bei ba'e meeya! Chojja, de. Pea cuana quea mase poaje ecuea epeejji cuana nijje. ³⁵E'e, ecuea esohui ohua shajja'ajja canijo, oja chii nijje oja bacua ejja cuana quea quene poaje. Ecuea esohui jayojja jama ohua acanijo, oja enaese nijje ojaya ebacua piona quea quene poaje pealai. Enijje jjapeequianijo, oja ano nijje oja bacua ejjaja huanase quea quene poaje pealai. ³⁶Jamajjeya ecuea epeejjiya huapa pojjeama cuana quea quene poaje onijje ecuea epeejji pojjeama jjekojo; pea cuana quea quene pishana poaje onijje —Jesosa poanaje.

³⁷—Ojjaña joya oja chii, ojaya enaese pojja'a quea jea nee nee acanijo eya quea jea pishana acani ecuea epeejji pojjeama, de. Pealai ojjaña joya oja bacua ejja, oja bacua piona pojja'a quea jea nee nee acanijo eya quea jea

pishana acani enijje jjapeequi meemee ajja. Cajaa. ³⁸Eyaya Eyacuiñajjija esohui huohuañajo, pea cuana enijje quea quene poaje'yo. Dejja mimishiya enapa ca poani jjejojo enijje mi jjapeequiani. Ojjaña joya e jayojjaya ba'e sa po ajja ecuea epjeeji poijeama. E'e, jiquio ecua acui ecueata'apee quea camaja e'abojji jama jayojja enijje jjapeequiyajo quea camaja poaje. ³⁹Dejja mimishi cuaa ecuea epjeeji quecua ca chana!. Jamajjeya quea mete nee neejo enijje jjapeequi sa po ajja. Cuaqui yasijje dobiquije'yo tiitii. Joya enijje jjapeequiani ca ca dejja mimishi cuaa quecua caje'yo pojja'a. Jamatii. Mano'yo majje enijje ba'e tiitiji'e'yo quea pame nee eyajo —Jesosa poanaje.

**Ojjaña joya quea pame poani sosequia caje'yo quijje Eyacuiñajjija
(Macoso 9.41)**

⁴⁰—E'e —Jesosa poanaje pea'ai—, beca cuana minijje jjapeequije'yo miya ecue sohui huohuañajo. Jamajjeya oya ecuea epjeeji poani pea'ai. Eyacuiñajjija e huoojeajji poani; ojjaña joya enijje jjapeequiani Eyacuiñajjija epjeeji poani pea'ai. ⁴¹Quijje Eyacuiñajjija ojaya esohui huohujji sosequia caje'yo ojaya esohui huohui cani sosejje. Pea cuana ojaya esohui huohujji nijje jjapee neineiquianijo, sosequia caje'yo esohui huohujji jayojja jama. Ojjaña joya Eyacuiñajjija epjeeji nijje e'e jojo nei jjapeequiani Eyacuiñajjija sosequia caje'yo quea pame nee oya quea pame nee poanijo. ⁴²E'e jojo nei ojjaña joya ecuea shajja'ajjajji poani ba'e meesahua cani, ena e'ishijji quia cani pojja'a eya ojaya quea boti neejo, Eyacuiñajjija oya quijje sosequia caje'yo oya quea pame nee poanijo —Jesosaa o shajja'ajjajji cuana huohui canaje mahuiso huoojea jjimahuajo.

**Huaniya Jesosa que huoojea canaje o shajja'ajjajji cuana
(Noca 7.18-35)**

11 ¹Majoya Jesosaa ojaya ome miji becanejjiji pea'ai, 12
eshajja'ajjajji cuana huasijje esohui huohui majje pea cuiñajji quea chipi nee yasijje poquinaje esohui huohuya.

²Yahuajo pea dejja cuaa Huani iña ca poa, ma ona besameejji poa. Dejja maseja equi ejjajeanobiaquijji yasijje jeanobiajea ca poa, eme' jeyo'yo. Ejeanobiajaaa Huaniya shajja'ajja canaje onaja ehuohui'yo Jesosajo. Jamajjeya o shajja'ajjajji cuana huoojea canaje Jesosa que. ³Oya cuana Jesosa huohui'ajjañña meeque canaje jama ba'a: —Jesosa, yahuajo Huaniya huohui canaje jama ba'a: "Eyacuiñajjija Emeshi Mese nei ojjaña jaahuanajji huoojea caje'yo ecuana huasijje". ¿A'a miya ma Emeshi Mese nei? E'e pojja'a ecuaa pea ishoaje. ¡Jamajjeya huohuicue miyaya! ¿Yajja shai ecuaa Huani aje'yo so'o? —Huaniya shajja'ajjajji cuana poanaje.

⁴Jesosaa oya cuana saja'a canaje: —¡Poqui o'oyacue Huani que! ¡Ecuea esohui miquianaaya shajja'ajjaña, jiquio miya eya banajeya pea'ai oe Huani huohuicue! Jama acue ba'a: ⁵"Huani, Jesosaa cojjama' cuana quea cojja ja'a po mee ca'yani. Jiojjijjajja jeo mee ca'yani. Dejja batata epo'yo

cuana jjajeaqui mee ca'yani. Shajjaqueba pea'ai quea shajja ja'a po mee ca'yani. Emano'yo cuana shequi mee ca'yani pea'ai. Esohui quea pame nee huohui ca'yani ojjaña dejja quea yeno huasijje". ⁶E'e, eya Eyacuiñajjiha huoojea'yo ojjaña jaahuanajji. Quea bihui nee capo'yahua ojjaña joya ejo jjashahuabaquiani jama ba'a: "E'e jojo nei Jesosa Eyacuiñajjiha huoojea'yo ojjaña jaahuanajji". ⁷A'a jjashahuaba quehuaquijji! —Jesosa poanaje.

⁷Jamajjeya Huanija epeejji cuana poqui o'oyanaje Huani que. Majoya poqui'yajo Jesosa miminaje pea cuana nijje: —Yahuajo Huani meshi jabojo, quimajo aninaje. Miquianaya o que poquinaje. ¿Ae shai banaje miyaya? ¿Ae jjashahuabaquinaje Huanijo? ⁸A'a jjashahuabaquinaje Huani esohui huohujji quea ja'a pojjeama? Chojja. ⁹Miquianaya Huani que poquinaje ¿ae baa? ¹⁰A'a dejjaja daqui quea nahue nee ehuoshlo ba'e banaje? Chojja. Dejjaa daqui quea nahue nee huoshlo cani equi quea quemojo ba'eya. ¹¹¿Achajja Huani ba'y poa? ¹²A'a miya jjashahuabaquinaje Huani Eyacuiñajjiha esohui huohujji nei nei? E'e, de. Jamatii Eyacuiñajjiha esohui huohujjiya ba cani oe pojji. Huanija eba quea huiso nee. ¹³Yahuajo nei Eyacuiñajjiha esohui etehue'yo Huanijo jama poa ba'a:

"Jiquio dejja ecuea esohui huohujji nei poani. Jamaya eya sa poani.

Eyaya oya huoojeaje ebionei, mi hui dojodzi. Ohuaya dejja cuana huasijje huohui caje miquea epoejjijo".

Jamaya yahuajo nei nei Eyacuiñajjiha ojjaña ba mee ca poa Huaniya poe majje ejo jjabahuejaqui mee caje cuana. ¹⁴Ecuea pea esohui a'a pajea'yojji jama ba'a: Ojjaña pea cuana quea pame. Huani ma ona besameejji poa quea pame nee nee. Jjeya pea chama! Huani jayojja jama. Jamatii quijje eya Emeshi Mese nei poaje, ojjaña ecuea epeejji cuana Huani jayojja jama poaje'yo, quea pame nee nee. ¹⁵Eya poeyanajejo Huaniya ojjaña pojjajo ejo huohui canaje jama ba'a: "Jjeya nei Emeshi Mese nei Quito poeje". Jamatii dejja mase cuaa Huani napa cani ojjaña pojjajo. Eya, Emeshi Mese nei jeabichajea sa acani cuaa pea'ai. Oya cuana emeshi mese jayojja jama huohui sa poani —Jesosa poanaje.

¹⁶—Yahuajo nei Eyacuiñajjiha esohui huohujji cuaa huohui ca poa, Moisesija esohui etehue'yojo jama poa pea'ai ba'a: "Quijje Eyacuiñajjiha huoojea'yo ojjaña jaahuanajji Emeshi Mese oe nei poeje". Jamaya Huani miminaje. Jamaya pea cuana miminaje Huani poe jjimahuajo pea'ai. ¹⁷E'e, yahuajo nei Eyacuiñajjiha esohui huohujjiya tehue ca poa jama ba'a:

"Ecuea ehuoojea'yo ojjaña jaahuanajji poe jjimahuajo, eyaya Enia huoojeaje ebionei, ehui dojodzi".

—Huaniya Enia jayojja jama huohui canaje, ma Eyacuiñajjiha esohui huohujji yahuajo nei nequia poa jama. ¹⁸Jamajjeya ¡bacie; a'a shajjama! pojji, ca miquiana ba sa poanijo! ¹⁹Ojjaña cuana jjeya nei ba'e ecuea eba. Oya cuana esho'iquiana quebanei poani jayojja jama. Quebanei poanijo jama poani: Esho'i cuaa pea esho'i taaa cani. ²⁰Jjamimihue'equiani jama ba'a: "Ecuaa dehue miaña epona ejjahueaquijjiha jama. Jamatii miquianaya majamaja ajja. Pea'ai e pa nishoanijo, emanoy'yojo pa'ani jayojjayajo, miquianaya pa nisho

ajja. Jamajjeya miquianaya quebanei po ajja ecuana nijje” poani esho'iquiana —Jesosa poanaje—. Jamaya miquianaya jjeya poani, de. ¹⁸E'e, yahuajo pishana Huani poeyanaje. Eyacuiñajji nijje mimi tiitiianijo bobi ijija'lijjia ajja. Ecahuishi ishi jjima pea'ai. Jamajjeya ojjaña cuaa huohui canaje ojo jama ba'a: “Huani jja ca niñepoqui jama”. ¹⁹Eya ojjaña cuanaja Edoe Mese poeyanaje. Eya ca jja ca ijija'lijjiani; ojjaña nijje mimimimiani. Jamajjeya miquianaya ejo siajje poani jama ba'a: “¡Bacue jiquio dejja Jesosa! Oya jeffe ajja tii. Dejja mimishi nijje jjapeequiani, bejjo chichajji cuana nijje pea'ai, de”. Jiquio ecua esho'iquiana pea nijje jjapeequi sa po ajja jama jayojja miquianaya ecuana nijje jjapeequi sa po ajja. Miquianaya jjashahuaba quehuaquiani Huanijo, ejo pea'ai. Jamatii ecuanaa Eyacuiñajji ejjashahuabaquijji quea ja'a nee jayojja jama añajo ecuanaa quea pame nee año —Jesosa poanaje.

Beca cuiñajjijo ba'e cuana shajjama' poanaje
(Noca 10.13-15)

²⁰Quea huiso cuiñajjijo Jesosaa ma dejja cuaa ajjima acani ahuicha'a huicha'a canaje. Jamatii quea huiso cuana mimishi pajea sa po'yo ajja. Jamajjeya Jesosaa oya cuana tecuea canaje. ²¹Jama poanaje ba'a: —Miquianaya quea mimishi nee nee. ¡Quea yeno nee nee miquianaya poaje Conasijo ba'e, Betesainajo ba'e pea'ai! Ma dejjaajjima acani eyaya ahuicha'a huicha'anaje miquianaja cuiñajji cuanajo miquea ebajji nisho. Yahuajo nei nei pea dejja cuana Tinojo, Sinonojo pea'ai ba'eja ojaya ba jjima eyaya ma dejja cuaa ajjima aña. Eba jojjemo oya cuanaa mimishi cuana pajea ca'yo queaye mimishijo quea yeno po majje. ²²¡Bacue oe! Quijje Eyacuiñajjiya ojjaña cuana sosequia caje'yo ojaya eba'e'yojji sosejji. Ohuaya yahuajo nei nei Tinojo ba'e cuana, Sinonojo ba'e cuana pea'ai quea nee po mee caje'yo mimishijo. Miquianaya Conasijo ba'e, Betesainajo ba'e pea'ai ca ca quea nee nee po mee caje'yo ecuea esohui miquiaaya mi shajja'ajjajo. ²³Miquianaya Capenaomajo ba'e quea pame poso jjabaquiani, jjashahuabaquiani jama ba'a: “Ecuana quea pame nee nee; pea meshijo ba'e cuana quea pame pishana”. Chojja, de. Siajje miya poani. Quijje Eyacuiñajjiya janobajjima nei napa cajje miquianaya quea yeno poaje. Eyaya ma dejjaajjima acani aña miquianajaya cuiñajjijo quea huiso. Jamatii miquea mimishi cuana pajea sa po'yo ajja. Yahuajo nei nei pea cuiñajji Sodoma bajjani yania poa. Eyacuiñajjiya ma dejjaja ba jjima acani eba jojjemo oya cuana quiyo jeyojeyo'yo jjima poqueaye. Jamatii jjeya Sodoma chama'yo tii. ²⁴¡Bacue oe! Quijje aje Eyacuiñajjiya ojjaña cuana sosequia caje'yo ma ecua oya po nequia poa jama. Ma pojxajo ohuaya dejja cuana yahuajo nei Sodomajo ba'e quea nee po mee caje'yo quea mimishijo. Miquianaya Capenaomajo ba'e ca ca quea nee nee po mee caje'yo ecuea esohui miquiaaya mi shajja'ajjajo —Jesosa poanaje.

Jesosa Quitohua eseya jomishoca mee caje
(Noca 10.21-22)

25 Jamaya dejja cuana tecuea majje Jesosa eseja Chii ai nijje miminaje jama ba'a: —Ecuea Chii, miya eyajo Emeshi Mese nei poani. Ojjaña meshi cuana miquea poani pea'ai. Eyaya miya bihuiaña. E'e, beca cuana jjashahuabiquiani jama ba'a: “Ecuea eba quea huioso esohui, quea huioso aquiana pea'ai”. Jamajjeya miyaya oya cuana ba meesahua ajja. Jamajjeya oya cuanaja ba jjima eya Emeshi Mese oe nei poani. Pea cuana esho'i cuana jama ca ca miyaya jjashahuabiqui meesahuaña quea ja'a nee eya Emeshi Mese nei poani. Jamajjeya eyaya miya bihuiaña. 26 E'e ecue Chii, jamaya miyaya aña miquea ejjashahuabiquiji. Apoa —jamaya Jesosa miminaje eseja Chii ai nijje.

27 Majoya Jesosa jama poanaje ba'a: —Eyacuiñaji ecue Chii e huoojeajji epo. Eya ojaya esohui huohuijji poani. Ecue Chijja eyajo anija ecuea ejjashahuabiquiji ojaya eba nei nei, ojaye nei. Ecue Chijja ejjashahuabiquiji ecuea eba nei nei pea'ai, ecuee nei. Eyaya ecuea epeeji ba meesahuaña quea ja'a nee ecue Chijja ejjashahuabiquiji —Jesosa poanaje.

28 —¡Enije jjapeequicue quea bei! Mique mimishi cuanajo miya quea yeno. Miquea echaco quea camajajo miya quea yeno poani pea'ai. ¡Enije jjapeequicue! Eyaya miya jomishoca meeje'yo camaja'ama eba'e'yojji. 29 Eyaya quiana ca ca oe miquianaya jama pojjeamaa jjejojo quea jea aña; tecue'ama; quea bei pea'ai. Ecuea epeeji po majje miquianaya quea bei poaje'yo. Ba'e tiitii meeje'yo enije eyajo pea'ai. Jamajjeya jecuea esohui jayojja jama acue! ¡Jjashajja'ajjaquicue quea ja'a nee ecuea esohuijjo! 30 Camaja'ama ecuea esohui jama eba'e'yojji. Ecuea esohui aquiana pejapeja e'abojji jayojja poani —Jesosa poanaje.

Esohui epojja ejomishocajjijo
(Macoso 2.23-28; Noca 6.1-5)

12 1 Majoya epojja ejomishocajjijo Jesosa o shajja'ajjajji cuana nijje ejiojjije poquinaje. Que yiyejje poquije quea shoe poanaje; quejo nequi anoso ai sejja cananananje eshe tii el'ijjajji, o shajja'ajjajjiya. 2 Maya Paniseo cuaa ba canaje. Jamajjeya Jesosa nijje mimijajinaje jama ba'a: —¡Bacue oe! Mi shajja'ajjajji poani cuaa chaco cani. Anoso ai sejja cani epojja ejomishocajjijo. Moisesija etehue'yo jama poani ba'a: “¡A'a chacojji epojja ejomishocajjijo!”

3 Jesosaa oya cuana saja'a canaje jama ba'a: —¿A'a miquea ba jjima esohui etehue'yo emeshi mese Dabija? 4 Yahuajo nei nei ojaya epeeji cuana quea shoe po majje ojee Eyacuiñajjiya equi yasijje dobiquinananje. Ijjia ca poa ejji ecabeje, maya Eyacuiñajji yasijje quia ca poa cuaa ojaya ebajji. Jiquio ca oe Eyacuiñajji nijje mimianiya cal'ijja cahua; pea cuanaja el'ijjajji pojjeama. 5 ¿A'a miquea ba jjima Moisesija esohui etehue'yo? Jama poa ba'a: Ojjaña epojja ejomishocajjijo Eyacuiñajji nijje mimiani cuaa ca oe Eyacuiñajjiya equijo cachaco cahua. Jamatii mimishi'ama, mimijaji ajja, de; ojaya yajjijo cachaco cahua.

6—E'l e, eyaya miya e'e jojo nei huohuaña jama ba'a: Moisesija esohui Eyacuiñajjija equijo quea ja'a pishana yahuajo nei poa. Ecuea esohui ca ca quea ja'a nee nee —Jesosaa acanaje—. 7E'l e, miquianajaya Eyacuiñajjija esohui etehue'yo eba neinei'yo jojjemo dejja cuana mimishi'ama jjaniñebeaqui aija pome. Jamaya quea tai. Yahuajo Eyacuiñajjija esohui etehue'yo jama poa ba'a:

“Huo cuana cuia cani. Cuia majje na sho cani e bihuajji. Jamaya ecuea quea boti pishana. ¡Pea cuana oe ba'e meecue tii quea bei! Jamaya ecuea quea boti nee nee”.

Jamaya tehue ca poa yahuajo.

8—Jamajjeya eya ojjaña Edoe Mese Emeshi Mese nei poani. Eyaye nei huohuije epojja ejomishocajjijo; ¡quea pame nee nee acue! ¡Pea cuana quea jea nee acue! —Jesosa poanaje.

Meshahuama'yo epo jjameshahuanequi mee ca'yonaje

(Macoso 3.1-6; Noca 6.6-11)

9 Majoya Jesosa poquinaje pea huasijje. Equi ojee ejjachichaquijji yasijje dobiquinaje. 10 Jomajo dejja meshahuama'yo epo aninaje. Jamajjeya Jesosa ba majje Paniseo cuana jama jjashahuabaquinaje ba'a: —E'e pojja'a Jesosaa chaco caje epojja ejomishocajjijo; e'e pojja'a eme' jeapisa mee caje'yo epojja ejomishocajjijo. Caba'ajja sahua —poanaje Paniseo.

Jesosa nijje mimijaji sa poanaje. Jamajjeya oya huohui'ajja canaje Paniseo cuaa: —Jesosa, ¿a'a dejja quea mano jaa miyaya huaquia mee'yome epojja ejomishocajjijo?

11—Epjeeji cuana, e'e pojja'a miquea ñajjajja jjani quea doe yasijje oquequije epojja ejomishocajjijo. ¿A'a miyaya ñajjajja iña majje ma pojxajo jjequisohuaje'yo? E'l e, de. 12 ¡Bacue oe! —Jesosa poanaje—, dejja Eyacuiñajjija quea boti nee; ñajjajja ca ca quea boti pishana. Jamajjeya e'e, pea cuana ca'a meesahua'yahua epojja ejomishocajjijo. Jamaya Moisesija esohui etehue'yojo poani pea'ai —Jesosa poanaje.

13 Ma mimi majje Jesosaa meshahuama'yo epo jama acanaje ba'a: —Epjeeji, ¡miquea eme' jeapisa'ajja'yo socue!

Jamajjeya eme' jeapiihui majje eme' jeapisa ca'yonaje; pea mijijje jayojjaya po'yonaje. 14 Majoya Paniseo cuana esecue yasijje cuayaqui majje ojee miminaje: —¿Yajja amajje Jesosa quecua ca'yojji so'o, de? —jamaya poanaje Paniseo cuana.

Jesosa Eyacuiñajjija echacoji ojaya yajjijo

15 E'l e, Paniseo cuaa oya quecuapana canaje. Ma shajjalajja majje Jesosa poquinaje pea meshi yasijje. Quea huiso dejja cuana onijje poquinaje. Ojjaña cuana huaquia mee calyonaje, jjaajaqui mee calyonaje, Jesosaa. 16 Jama poanaje ba'a: —E'l e, eyaya miya huaquia mee'yonaje. ¡Jamatii a'a jihuohuijji so'o!

17 E'e, Jesosaa ojjaña cuana huaquia mee ca'yonaje, sohuihuohui canaje pe'a'i. Jamaya Isaiaja esohui etehue'yo ojo yahuajo nei nei jayojja jama poa. Eyacuiñajjiya Isaia yahuajo nei nei tehue mee ca poa Jesosajo jama ba'a:

18 “¡Bacue! Jiquio dejja ecuea echacojji ecuea yajjijo. Eyaya oya huoojeaje'yo. Oya ecuea quea jea nee nee. Ojo eya quea bihui nee nee. Ecuea Edojjoshahua Pame o que eyaya huoojeaje'yo; ohuaya ojjaña Jodio pojjeama cuana huasijje huohui caje jama ba'a:
—¡Ojjaña cuana ecuea esohui e'e jojo neijo jjabahuejjaqui'yajo Eyacuiñajjiya quea bojeja po mee caje'yo! 19 Oya ecuea echacojji jjamimicuajea nobiajeaqui ajja. Quea bei nee mimije'yo. Ejiojjije poquiani quea shajjaquijjo po'yo ajja. 20 Joya quea mimishi nee nee aje jja oe ohua mimishi cuana cuijea ca'yajje quea bojeja poaje'yo. Cuanaya jiquio ecua cuaquijiji quijjo'yo jjimahuajo esei sho o'oyaña jama jayojja ecuea epjeejji quea mimishi po o'oya chanajo ohuaya quea ja'a nee nee po mee caje o'oya, de. E'e, ohuaya ejo chaco tiitii caje'yo; quea huiso nee nee ba'e mee caje'yo quea ja'a nee nee. 21 Jodio pojjeama quea huiso nee nee ojjaña meshijo ba'e cuanaya e'e jojo nei onijje jjapeequije'yo pe'a'i”.

Jamaya Eyacuiñajjiya Isaia tehue mee ca poa yahuajo nei nei Jesosa Quitojo.

Jesosa niñeba canaje cuaa

(Macoso 3.20-30; Noca 11.14-23; 12.10)

22 Majoya Jesosa que jjequi canaje cuaa dejja niñepoqui. Oya cojjama', mimi'ajja pea'a'i. Jesosaa eshahua huoojeacuayajea ca'yonaje. Jamajjeya oya quea cojja ja'a poanaje, emimijji pea'a'i. 23 Ba majje ojjaña cuana quea bihui nee poanaje. Jama acanaje ba'a: —E'e de, a'ya shai de, ¿a'a pojja'a Jesosa Eyacuiñajjiya huoojea'yo Quito

24 Ma shajja'ajja majje Paniseo cuaa Jesosa niñeba canaje. Jama poanaje ba'a: —Chojja, de. Jesosa aje oe eyamiquecua pojja'a. Ohuaya aje jja oe eshahua cuana huoojeacuayajea canaje Edosiquiana etii nijjeya, Satanasa bajjani, pea bajjani Meesemo nijjeya —poso acanaje Paniseo cuaa.

25 Paniseo cuanaja ejjashahuabiqui'yojji quea tai Jesosaja eba poanaje. Jamajjeya oya cuana tecuea canaje jama ba'a: —¡Shajja'ajjacie oe! Joya emeshi mese shajja'ajja sa po ajjajo ojee jjaquecuaqui majje jjaquecua iyaiyaquije'yo; dejja cuana ma meshijo ba'e chama'yo tii poaje'yo. Cuiñajjijo ba'e cuana jamaya po pealije, chama'yo tii poaje emeshi meseje echacojji cuana. Huapa pojjeama cuana jjacuiaquiaj chama' epjeejji cuana poaje'yo pea'a'i. 26 Jamaya pea'ai Edosiquiana, Satanasa pea eshahua ehoojeacuaya'yo jojjemo dejja huoojea'yojji pojjeama po'yoqueaye —Jesosa poanaje. 27 —¿A'a ya eya Edosiquiana nijjeya niñe, pea eshahua cuana pea'ai huoojeacuayajeaña poso aña? Jamajjeya miquea epjeejji cuanaa ¿ae nijje eshahua huoojeacuayajea cani? Eyacuiñajjiya asahua canijo. Jamajjeya ojaya eba miquianaya ejo siajje poani. 28 E'e, Eyacuiñajji nijjeya eyaya

eshhua huoojeacuayajea'yaña. Jamajjeya bacue eya e'e jojo nei Eyacuiñajji, Emeshi Mese oe nei jjeya poani tii. ²⁹Cuanaya ¡bacue! ¿A'a dejja quea ca'a neeja equi yasijje dobiquiani oja aquiana siiya o jeyo jjima nequijo? Chojja. O jeyo majje ojaya aquiana cuana sii caje cuaa. Jiquio ecua e'aquiana mese ebionei jeyo cani jama amajje eyaya eshhua cuana jeacuayajeaña —Jesosa poanaje pealai.

³⁰—Cuanaya ojjaña joya enijje jjapeequi ajja aje oe e quecuapanajji poani, ojjaña enijje chaco ajja ecuea epjeejji pojjeama aje oe e ejeabichajeajji nisho poani —poanaje.

³¹—Jamajjeya eyaya miya e'e jojo nei huohuiaña: Eyacuiñajjiya ojjaña mimishi cuana, siajjeponji cuana pea'ai cuijea caje'yo. Jamatii joya Edojjoshahua Pame niñebea cani tii ca ca Eyacuiñajjiya maya emimishi cuijea'yoji pojjeama tii tii. ³²E'e —Jesosa poanaje—, eya niñebea cajo Eyacuiñajjiya ma mimishi cuijea caje'yo. Joya Edojjoshahua Pame niñebea cani tii ca ca Eyacuiñajjiya maya emimishi cuijea'yoji pojjeama tii tii. Jjeya ecuijea'yoji pojjeama; quijje ecuijea'yoji pojjeama tii tii poaje'yo, eya ecue Chii nijje eyajo ojjaña huoojea'yoji poaje —Jesosa poanaje.

Dejja mimishi acui tai jjajja ajja jayojja
(Noca 6.43-45)

³³Jesosaa Paniseo tecuea canaje pea'ai jama ba'a: —Acui quea pame jjajjani. Acui quea tai jjajja ajja, quea jjajja biso. Jamajjeya miyaya baña dejja mimishi acui tai jayojjaya; ohuaya quea tai acani. ¿A'a miyaya eya baña quea pame nee? Jamajjeya eya quea pame acui quea pame jayojja. ³⁴Miquianaya aje oe peyo quea se nee nee jama, quea mase. Miquianaya quea tai poanijo quea pame mimi ajja. E'e, quea jjashahuabaqui tai po tiitianijo quea tai mimiani —Paniseo cuana acanaje Jesosaa—. ³⁵E'e, joya quea jjashahuabaqui ja'a nee poanijo quea ja'a nee ba'yani. Quea jjashahuabaqui taijo ca ca quea tai ba'yani. ³⁶Jamajjeya eyaya miya huohujje e epoe o'oyajjijo ojjaña mimishi tecueaa, ojjaña joya jjaniñebaquiani, mimijajjani, siajje poani pea'ai quea nee nee po titii meeje'yo. ³⁷E'e, miquea esohui quea ja'a nee poanijo, Eyacuiñajjiya miya etecueajji pojjeama. Quea sho'i taijo ca mi ca Eyacuiñajjiya quea nee nee po titii mee caje'yo —Jesosa poanaje.

Paniseo cuana Jesosaa acani ba o'oya sa poanaje
(Macoso 8.12; Noca 11.29-32)

³⁸Majoya beca Paniseo cuaa, Moisesija tehue huohujjiya pea'ai Jesosa huohui canaje jama ba'a: —Esohui huohujji Jesosa, ¡quea pame acue! ¡Ma dejjaajjima acani a'o'o'oyacue so'o, Eyacuiñajjiya miya huoojea canaje ecuanaja ebajji! —poanaje.

³⁹—Chojja. Miquianaaya Eyacuiñajjiya esohui cajaa anaje. Jamajjeya miya peapea ba sa poani. Jamatii Eyacuiñajjiya yahuajo nei Jjonajo aca poa jayojja jama ohuaya jjeya acaje o'oya miquianaja ebajji. ⁴⁰Ma ecua yahuajo Eyacuiñajjiya esohui huohujji Jjona jai ai'ajja seejo ba'ya poa pea beca peejjima

cahuime jama jayojjaya aje eya ojjañaja Edoe Mese bajjani quijje pishana mano'yo majje mei jjanijo ehuananobia jaa shequije o'oya —Jesosa poanaje.

⁴¹—Yahuajo nei nei dejja cuana Ninebejo ba'eya Jjonaja esohui shajja'ajja majje mimishi cuana pajea ca'ya poa. Jjona quea ca'a pishana poa; eya ca iña quea ca'a nee nee. Jamatii miquianaya ecuea esohui shajja'ajja sa po ajja. Jamajjeya quijje eya poe o'oya majje mimishi cuana tecueajeaje. Ninebe dejja cuaa miya tecuea caje jama ba'a: “Miquianaya ca ca oe quea mimishi nee nee poanaje”. ⁴²Jama pea'ai poaje ba'a: Yahuajo nei nei Sama mese epona quea huesha nee poeya poa Jodioja emeshi mese Sanomoja esohui shajja'ajja. Sanomo quea jjashahuubaqui ja'a pishana poa; eya ca quea jjashahuubaqui ja'a nee nee. Jamatii miquianaya ecuea esohui shajja'ajja sa po'yo ajja. Jamajjeya quijje eya poe o'oyaje mimishi cuana tecuejeaa, eeno poejijije emeshi mese ponaa, Sama meseya jama miquianaya tecueame acaje pea'ai ba'a: “Miquianaya ca ca oe quea mimishi nee nee poanaje” acaje nequiana —Jesosa poanaje.

Eshahua dejjaja yami yasijje poe o'oyanaje
(Noca 11.24-26)

⁴³Jesosaa esohui ejjabahuejaqui meeiji huohui canaje pea'ai jama ba'a: —Eshahua dejjaja yamijo nequi cuayaquil'yo majje quea huesha poquinaje. Sa'ajja canaje pea huasijje enequijji. Jamatii ba'yo jjima. Oya po'ayequei equi tii. ⁴⁴Jamajjeya oya jjashahuabaquiani jama ba'a: “Eya poquije o'oya huacuaya oya' dejja huasijjeya, ma e cuayaquinaje yasijjeya, ma ecuea equi jayojja huasijjeya”. Jamajjeya oya' dejja huasijje poe o'oya majje ba cañaqui'yani chama' enahuejji Eyacuiñajjija epeejji nei pojjeama jjejojo. Ojaya eyami equi ecuiashaba jayojja jama, ehuana bame bame jayojja, equi se ejjama' jayojja. ⁴⁵Jamajjeya oya poquije pea eshahua cuana sal'ajja. Ba caje quea huiso, me mijijje beca onijje enequijji. Oya cuana quea mase nee nee; pea quea mase pishana. Majoya ojjaña dobiquiajo ma dejja quea yeno nee nee poani. Yahuajo oe eshahua nequia huajo quea yeno pishana poanaje.

—Jamaya poanaje Jesosa shajjama' cuana nijje, oya cuana onijje jjapeequi sa po ajjajo.

—Ma dejja jayojjaya miya poaje, quea mimishi nee nee tii tii poaje —Jesosa poanaje.

Jesosaja huapa pojjeama poeyanaje
(Macoso 3.31-35; Noca 8.19-21)

⁴⁶Jesosa mimianijo ojaya enaese, oja chahua cuana pea'ai o que poeyanaje. Esecuejo nequinaje. ⁴⁷Majoya Jesosa huohui canaje cuaa: —Miquea enaese, mique chahua cuana esecuejo nequi. Minijje mimi sa poani.

⁴⁸⁻⁴⁹Jesosaa saja'a canaje: —¿Ache shai ecuea huapa pojjeama cuana? ¡Bacue! Jiquio ecuea shajja'ajjajji cuana ecuea huapa pojjeama cuana,

ecuea quea jea nee nee ecuea ecue nae quea jea aña jayojja jama. ⁵⁰E'e,
ecue Chii eyajo ani; ojjaña jjashajja'ajjaquiani ojaya esohuijo ecuea huapa
pojjeama, ecue chahua, ecue jjo'i, ecuea enaese pea'ai —Jesosaa acanaje.

Eso' jeaajajji
(*Macoso 4.1-9; Noca 8.4-8*)

13 ¹Majoya Jesosa equijo ani cuayaquinaje. Bae sahua huasijje poqui
majje anioquenaje. ²Majoya o que jjachichaquinaje dejja cuana
quea huiso nee nee. Jamajje bishe yasijje nequisohuaqui majje anioquenaje
esohui huohuiya. Dejja cuana meshijajijo aninaje. ³Bishe quecuayiyejea
cajo, Jesosaa oya sohuihuohui canaje quea huiso nee nee. Pea esohui
ona jjashahuubaquijji huohui canaje o ba meesahuajji. Jama acanaje
ba'a: ⁴—Ebanajji cuana poquinaje banaa. Eso' jeaaja canijo, oe pojji eso'
o quequinaje ejiojji yasijje. Poeyanaje cuichojji cuana; ijja ca'yonaje eso'.
⁵Pea eso' o quequinaje mei biajje. Meshi chamajo eso' pohua'ajja'yonaje.
⁶Quijje cuayanaje eshequi. Quiyo'yonaje, esajja joca'yonaje, mano'yonaje.
⁷Pea eso' o quequinaje acuisha huasijje. Pohua'yo majje jjonohua bebo
ca'yonaje. Tatajo nequi jjajja ajja poanaje. Mano'yonaje. ⁸Pea eso'
o quequinaje meshi quea tame yasijje. Pohua'yonaje eso' cuana. Ejjajja quea
tame nee nee poanaje. Oe esajo ejjajja iye huiso aninaje; pea esajo ejjajja
quea huiso, pea esajo quea huiso nee nee aninaje. Sejja canaje quea huiso
nee. ⁹¡Miya jjashajja'ajjaquicue! ¡A'a shajjama' pojji! —Jesosa poanaje.

**Esohui eba meesahuajji Jesosaa sohuihuohui canaje ona
jjashahabaqui meeiji**
(*Macoso 4.10-12; Noca 8.9-10*)

¹⁰Quijje o shajja'ajjajji cuana poeyanaje Jesosa que. Huohui'ajja canaje:
—Jesosa, ¿apiojji miyaya esohui eba meesahuajji quea quehua huohuiña
jiquio dejja cuana huasijje?

¹¹Oya cuana saja'a canaje Jesosaa: —Miya ca ca oe Eyacuiñajjiya ba
meesahua cani eya ojjañaja Emeshi Mese nei poaje'yo. Yahuajo ba mee
jjima poa. Pea cuana ca ca eba meesahuajji pojjeama. ¹²Jamajjeya joya
Eyacuiñajjiya esohui ba cani quea huiso pishana quijje quea huiso ba mee
caje'yo. Joya ojaya esohui ba sa po ajja ca ca pajea caje'yo. ¹³Jamajjeya
eyaya peapea esohui eba meesahuajji huohuinaje o ba meesahuajji.
Jamatii ecuea esohui shajja'ajja majje oya cuana jjashahuubaqui ajja, de,
shajja'ajja jjima jama acani, de. ¹⁴E'e, oya cuana quea sapa ca'a nee poani.
Jamatii Eyacuiñajjiya Isaia tehue mee ca poa yahuajo nei nei jama ba'a:

“Shajja'ajja huicha'a huicha'a majje matatii jjashajja'ajjaqui ajja
poaje. Eyacuiñajjiya acani ba huicha'a huicha'a majje matatii
jjashahuubaqui ajja poaje. ¹⁵Quea sapa ca'a nee nee poani, shajja
dojjoma' jama, cojjama' jama pea'ai. Ecuea esohui eba jojjemo,

eshajja'ajja jojjemo jjabahuejjaqui'yome. Pea'ai enijje ejjapeequi'yo jjemo eyaya mimishi cuijea'yome".

Jamaya yahuajo nei nei tehue ca poa etiiquiana Isaiaa —Jesosaa acanaje.

¹⁶ Jamajjeya Jesosaa o shajja'ajjiji cuana jama acanaje pea'ai ba'a: —Miquianaya ca ca quea cojja ja'a, quea shajja ja'a pea'ai. ¡Jamajjeya quea bihui nee pocue! ¹⁷E'e jojo nei eyaya miya huohuaña jama ba'a: Quea huiso Eyacuiñajji esohui huohujji yahuajo, ojaya epeejji nei yahuajo ba'e pea'ai e ba sa neinei poa. Ecue huohui shajja'ajja sa neinei poa pea'ai. Jamatii ojaya eya ba jjima poa. Ecue huohui shajja'ajja jjima pea'ai poa. E'e jojo nei eya Eyacuiñajji huoojea'yo ojjaña jaahuanajji. Ma ba sa poa Eyacuiñajji esohui huohujji yahuajo nei nei.

Jesosaa esohui ebanajjijo ba mee canaje

(*Macoso 4.13-20; Noca 8.11-15*)

¹⁸Majoya ojjaña cuana acanaje Jesosaa: —Jamajjeya eyaya miquianaya ba meesahuaje ecuea esohui ebanajjijo. ¹⁹Maya: Beca cuana ejiojji yasijje oquequi eso' cuana cuichojjiya ijijajyeo cal'yonaje. Jamaya beca cuana ecuea esohui eya ojjaña Emeshi Mese oe nei poaje shajja'ajja majje jamatii jjashahuabaqui ajja. Jamajjeya Edosiquiaa o que poe majje ecuea esohui pajea mee cani. ²⁰Beca cuana eso' mei biajje oquequinaje jayojja jama ecuea esohui shajja'ajja majje quea bihui nee enijje jjapeecuaji'ajjaquiani. Jamatii ecuea esohui jayojja jama ba'e tiitii ajja. ²¹Eso' mei biajje pohua esajja joca'yajo mano'yani jayojja jama poani; pea cuaa oya napa cajje Eyacuiñajji nijje jjapeequijapajeani. ²²Beca cuana eso' acuisha nijje pohuani jama poani. Acuishaa bebo cajje jjajja ajja jayojja jamaya ecuea esohui shajja'ajja majje jjapee nishoquiani. Jamatii oya cuana quea bejjo nahue poanijo, aquianajo quea huiso jjashahuabaquianijo, quea mete pea'ai poanijo Eyacuiñajjijo chaco ajja. ²³Eso' meshi quea pame neejo pohua majje quea jjajja huiso poanaje jayojja jama beca cuana; ecuea esohui shajja'ajja majje jjabahuejjaquiani; ecuea epeejji quea ja'a nee nee poani, pea cuana ejo jjabahuejjaqui meesahua cani iye huiso pojja'a, quea huiso pojja'a, quea huiso nee nee pojja'a —Jesosaa mahuisoya oya cuana acanaje.

Eshohui acuisha cuanajo

²⁴Majoya Jesosaa oya cuana huohui canaje pea esohui eba meesahuajji. Jama poanaje ba'a: —Eyacuiñajji esohui ejo ebanajjija eso' bana canaje jama. Eso'ache bame nei quecua canaje quejo, anoso. ²⁵Majoya ojjaña echacojji cuana ecahuuijaajo, dejja quea mimishi, o jeabichajeajji epo poeyanaje. Sipone so' quea huiso quehuajje nei jeaajaqui canaje quejo. ²⁶Anoso pohua'yo majje jjajjanaje. Sipone pohuanaje anoso tejjee, jjajjanaje pea'ai. ²⁷Quijje pishana eque meseja echacojji cuana o que poeyanaje. Jama poanaje ba'a: "Emeshi mese, ¿a'a miquea anoso sipone tejjee quecua pojjeama poanaje?" huohui'ajja canaje.

²⁸—Echacojji meseja saja'a canaje: "E'e, quea pame poanaje. Dejja quea mimishiya quehuajje jeaajaqui canaje sipone so' ecuea quejo, de" poanaje.

—Echacojji cuaa huohui'ajja canaje: “¿A'a sipone chiyojeaje'yo?”

29—“Chojja” poanaje eque mese. “Anosoya miyaya chiyojea chana!.

Jamatii. 30 Ojee sipone nijje catiiquiahua. E'e, majoya anoso jahuaajo eyaya huoojeaje anoso sejja'yoji cuana anoso sejjaa. Sejjajeyo majje anoso chichaje. Ecuea equi yasijke iyanobiaje anoso, ecuea ejaaahuanajji. Sipone ca oe caquijojeaqu'i'yahua pasi'yo majje” poanaje eque mese.

—E'e, jiquio eque meseya sipone dahuajea cani jama dejja mimishi Eyacuiñajjiya acaje'yo. Anoso sejjajeyo majje equijo huana cani jamaya ecuea epeejji aje'yo —Jesosa poanaje.

Esohui acui so' che biso nei neijo motasa bajjanijo

(*Macoso 4.30-32; Noca 13.18-19*)

31 Majoya Jesosaa pea esohui eba meesahuajji huohui canaje jama ba'a:

—Eyacuiñajjiya ehuohui ojaya epeejji cuanajo jama pea'ai ba'a: Pea eso' motasa che biso nei eso' bana cani equi quibojo. 32 Jiquio eso' che biso nei nei; tii majjeya quea cui quemó nee poaje apo'le cui quemajja. Jamajjeya cuichojji cuana poeyani motasa acui biajje cahuiya —jamaya Jesosaa huohui canaje ojjaña ba meeiji quijje Eyacuiñajjiya epeejji cuana quea huiso nee, quea ca'a nee poaje'yo.

Esohui eba meesahuajji eshejjee meejiyo

(*Noca 13.20-21*)

33 Pea esohui eba meesahuajji huohui canaje Jesosaa jama ba'a: —Eponaa pahui dahuajjiya quea huiso nee pohuipohui tejjee oe pojji nei nei eshejjee meeji iñahuahuo neinei cani, ojjaña eshejjee meeji. Jiquio eshejjee meejiya ojjaña pohuipohui shejjee mee cani jamaya poaje ecuea epeejji cuana. Jama ba'a: Jjeya beca cuana jjashajja'ajjaquiani. Majoya aje quea huiso nee ojjaña pojja'a jjashajja'ajjaqui mee caje'yo Eyacuiñajjiyo —Jesosa poanaje.

Esohui eba mee'yojji

(*Macoso 4.33-34*)

34 E'e, jiquio esohui ehuohui'yo cuana Jesosaa ma bishejo nequiya huohui canaje. Esohui eba meesahuajjiyo ca ca oe huohui canaje.

35 Jamaya poanijo ohuaya Eyacuiñajjiya esohui huohuijjiya esohui yahuajo nei nei jama acanaje. Jamaya aje yahuajo nei nei Eyacuiñajjiya ojaya esohui huohuijji huohui mee ca poa Jesosajo ba'a:

“Eyaya aje jja esohui huohuije esohui eba meeji. Yahuajo jiquio meshi panajeyo majje ecuea dejja cuana ba meesahua jjima poanaje ecuea ejjashahuabaqui'yojji. Jjeyahua ca ca ecuea ejjashahuabaqui'yojji ba meeje'yo, eyaya”.

Ehuohui'yo siponejo ba mee canaje Jesosaa

³⁶Majoya Jesosaa —Poquia iña —acanaje dejja cuana. Bishejo ani cuayaquii'yo majje poquinaje equi yasijke. Dobiqui majje o shajja'ajjajji cuana o que poeyanaje. Huohui'ajja canaje: —Jesosa, ¡ba meesahuacue ehuohui'yo siponejo! Maya ecuanaja quea quehua.

³⁷Jamajjeya Jesosaa oya cuana huohui canaje: —E'e, eya ojjañaja Edoe Mese anoso banajji nei nei jama. ³⁸Que quea pame jayojja ojjaña dejja ojjaña meshijo ba'e cuana. Eso' quea pame nee Eyacuiñajjija epeejji nei jayojja jama. Sipone so' quea tai jayojja eshahuaja epeejji cuana. ³⁹Joya dejja sipone so' jeaajajji epo jayojja jama dejja mimishi, e cuiajji nisho epo, Edosiquiana, de, Satanasa. Jiquio ecua epoja anoso jahuajo sejjajeyo ca'yonaje jama meshi oe poaje. Joya anoso sejja'yojji ca ca Eyacuiñajjija esohuidojiji cuana jama. ⁴⁰Jamajjeya jiquio ecua sipone pasi'yo majje dahuajea canaje jayojja jamaya poaje dejja mimishi meshi oe poajo.

⁴¹—E'e, eyaya ojjañaja Edoe Meseya esohuidojiji cuana huoojeaje dejja mimishi cuana iñaa, ona mimishi po meejjii poani pea'ai iñaa.

⁴²Iña majje jeajea caje'yo cuaqui quea quiyo nee nee yasijke. Jomajo pa neineije'yo; ese' ijjiyaijje caje'yo cuaqui quea quiyo nee neejo. ⁴³Ecuea epeejji ca ca ecuea esohui jama acanijo ba'e tiitije'yo eyajo eseja Chii nijje quea ja'a nee nee, eshequi ja'ajja, de —Jesosa poanaje.

Aquiana quea nahue ehuanaquehua'yo

⁴⁴Majoya Jesosaa huohui canaje pea esohui eba meesahuajji jama ba'a: —Eyacuiñajjija esohui cuana ojaya epeejji cuanajo jama pea'ai ba'a: Quejo aquiana pame quea nahue nee nee ba majje dejja jjataqui canaje jomajo tii. Majoya oya quea bihui nee poquinaje. Ojjaña ojaya aquiana cuana dojo canaje; quia canaje que sosejje. Jiquio ecua aquiana quea nahue nee nee jjeshe canaje jama jayojja dejja Eyacuiñajji nijje jjapeequiani —Jesosa poanaje.

Pea esohui aquiana quea nahue nee neejo

⁴⁵—Eyacuiñajjija esohui ojaya epeejji cuanajo jama pea'ai ba'a: Dejja aquiana nahuejjiya sa'ajja tiitii canaje mei sisi siyosiyo copocopo quea nahue nee. ⁴⁶Oe mei sisi siyosiyo copocopo quea nahue nee nee ba majje ojjaña ojaya aquiana quiaa dojo canaje mei siyosiyo quea pame nee nee jjeshejji. Eya ca ca iña mei quea nahue nee nee quea pame nee nee jama, ojjaña jaahuanajji —Jesosa poanaje.

Esohui nahuoo cuiashajajjijo

⁴⁷—E'e jojo nei pea ba'eme epoji jamaya pea'ai ba'a: Nahuoo cuiashajajji jea cani cuaa bae yasijke. Nahuoo cuiashaja cajje dobiquiani. Peapea nahuoo cuiashaja cani. ⁴⁸Quea huiso yanijo nahuoo cuiashajajji cuaa meshijaji sahua

huasijje jjequisohua cani. Majoya pejo majje nahuoo cuana ba cani. Ojjaña nahuoo quea pame nee bio cani jjepai yasijje; peajja ijjia ca ajja jojoya ca ca jeajea cani. ⁴⁹Jamaya poaje e poe o'oyajo. Esohuidojiji cuana poeje; Eyacuiñajiji epeejji cuana ojjaña quea pame ba'le chicha caje'yo. Dejja mimishi cuana ca ca jeajea caje'yo cajaajojo. ⁵⁰Cuaqui quea quiyo nee nee yasijje dobiquije'yo tii tii. Jomajo siasia'yoquejje tii; ese' ijjiyajjea caje'yo quea nee poanijo —Jesosa poanaje.

Esohui eyacula

51 Majoya Jesosaa oya cuana huohui'ajja canaje: —¿A'a ecuea esohui quea ja'a nee? ¿A'a jjabahuejjaquinaje?

—E'e, quea ja'a nee.

52 Jamajjeya Jesosaa o shajja'ajjajji cuana acanaje: —E'aquiana meseya ojaya aquiana cuana etii, aquiana eyacula pea'ai ojjaña cuana huohui'ajja cani. Jiquio ecua pea huohui'ajja pea huohui'ajja acani jayojja jama esohui huohuijji poani, jjabahuejjaqui majje, Jodio esohui huohuijjiya Eyacuiñajiji esohui yahuajo etehue'yo, ecuea esohui eyacula pea'ai pea cuana ba meesahua cani —poanaje.

Jesosa Nasanena meshi yasijje poquinaje

(Macoso 6.1-6; Noca 4.16-30)

53 Majoya esohui huohuijapea majje Jesosa jomajo ani poqui o'oyanaje ojaya cuiñajji yasijje, Nasanena huasijje. **54** Jodioja equi ojee ejjachichaquijji yasijje dobiquinaje. Esohui huohui canaje. Ojaya esohui shajja'ajja majje Nasanenajo ba'eca cuana quea tecue poanaje. Oya Jesosa Joseja jea poso acanaje cuaa: —¿Yajjajje shai jiquio dejja Jesosaa esohui quea ja'a nee nee huohui cani, de? ¿Eyacuiñajji jayojjaya jjaajaqui mee cani emanoja quea huiso nee, de? **55** Oya aje oe acui cacajji nei neija bacua ejja pojja'a, oja nae Mania bajjani, oja chahua cuana Jacobo, Jose, Simohui, Jonas pe'aai bajjani. **56** Oja jjo'i cuana pea'ai jiquiojo ba'e, de. Jamajje ¿achejo joya Jesosaa ojjaña jiquio esohui ba canaje so'o? —jamajjeya quea quene poanaje Jesosa nijje. Joseja jea poso cajaa acanaje.

57 Jamajjeya Jesosaa oya cuana jama acanaje ba'a: —E'e de, pea cuaa Eyacuiñajiji esohui huohuijji shajja'ajja cani. Jamatii oja meshijo ba'e cuana ojaya huapa pojjeama cuana ca ca oe jjashajja'ajjaqui sa po'yo ajja.

58 Jamajjeya oya cuana jjashajja'ajjaqui sa po ajja. Jesosa Eyacuiñajiji bacua pojjeama posojo, ohuaya emanoja cuana oe pojji jjaajaqui mee ca'yonaje, ma dejja ajjima acani oe pojji nei acanaje Nasanenajo, Jesosaa.

Enodeya Huani sapa jajasejjajea mee canaje

(Macoso 6.14-29; Noca 9.7-9)

14 ¹⁻²Jesosa Janinea meshijo anijo, Janinea meshi mese Enode bajjaniya shajja'ajja canaje onaja ehuohui'yo Jesosajo. Ma Enode pea emeshi mese, Enode pea'ai bajjani. Oya emeshi mese Enodeja bacua ejja; oya Enode

Antipa bajjani pea'ai poanaje. Shajja'ajja majje ma Enodeya Huani shequi o'oya posoya acanaje: —E'e de, jiquio dejja aje oe Huani, ma ona besameejji poa. E'e pojja'a oya mano'yo majje shequi o'yanaje. Jamajjeya ohuaya Eyacuiñajjiya jayojjaya acani —jamaya ohuaya ojo chacockacoani acanaje.

Yahuajo nei Jesosajo shajja'ajja jjimahuajo ma Enodeya Huani sapa jajasejjajea mee canaje. ³E'e, yahuajo ma emeshi mese Enodeja edoe mese Penipeja ehuanase Enodiasi bajjani Huani nijje quea quene poa. Jamajjeya ma Enodeya Huani iña mee canaje; jeanobiajea mee canaje. ⁴E'e, Huaniya yahuajo ma Enode jama tecueame aca poa ba'a: —¡Miyaya aje oe mique doeja Penipeja ehuanase Enodiasi a'a huana'yoji! Jamaya pojjeama Jodioja etehue'yo; quea mimishi.

⁵Jamajjeya ohua tecuea cajje quenequenenaje Huani nijje. Quecuia sa aca poa. Jamatii quecuia jjima; quea mete poanaje pea Jodio cuanajo. E'e, quea huiso Jodio cuana jjashahuabaquinaje Huani Eyacuiñajjiya esohui huohuijji nei nei poanaje. ⁶Jamatii ma Enodeya o cuaya poa pojja ojjaña ojaya epeejji cuana iyaa canaje ojee ijja'iijja, majamajaqui baa pea'ai. Enodiasi bacuase pea'ai oe nei majamaja nequinaje ojjaña ebajji, queabihui nee epo meeiji. Enode Antipa queabihui nee nee poanaje epona sho'ijo. ⁷Jamajjeya onijje miminaje jama ba'a: —¿Ae shai sa poani miya? ¡Huohuicue mo! Eyaya miya quiaje. E'e jojo nei nei she, coya miya sañaya aje mi quiaje —acanaje Enodeya.

⁸Jamajjeya epona sho'i poquinaje ojaya enaese Enodiasi huohuiya.

—E'e —oja nae poanaje—, e'e ¡Huani sapa jajasejjajea meequivue, she!

Epona sho'i poe o'yanaje Enode que. Huohui canaje jama ba'a:

—Huani, ma ona besameejji poani ejeanobia jaa. ¡Ojaya esapa jajasejjajea'y majje piatojo jjequivue jjeyahua nei! Maya eya sa poani.

⁹Shajja'ajja majje emeshi mese Enode quea ajjajja nee nee poanaje. Jamatii ojaya esohui epona sho'i nijje ojjaña ojaya epeejji cuanaa shajja'ajja canaje. Jamajjeya ojaya esohui pajea ajja, Enodeja. Jamajjeya ohuaya sohuinano cuana huoojea canaje: —¡Epona sho'ija esohui jayojja jama acue! ¹⁰¡Huani ma ejeanobia jaa oe sapa jajasejjajaequicue! —poanaje.

¹¹Jjeya nei sohuinano cuana poquinaje Huani que. Huani sapa jajasejjajea ca'yonaje. Esapa jjequi canaje piatojo. Epona sho'i quia canaje. Majoya ohuaya Huanija esapa oja nae yasijje quia cañaqui'yonaje, epona sho'iya.

¹²Majoya Huani shajja'ajjajji cuana poe'yonaje o dojo'yohua emojea'yoji. Mojea'yo majje papoqui'yonaje Jesosa huohuiya.

Jesosaa 5.000 dejja cuana bobia canaje (Macoso 6.30-44; Noca 9.10-17; Huani 6.1-14)

¹³Jesosa Huani emano'yo shajja'ajja majje o shajja'ajjajji cuana nijje sohuaquinaje bishe aijo quima huasijje.

Jamatii ma ba majje quea huiso dejja cuana cuiñajji cuanajo ba'e ejiojjije poquinaje Jesosa baa. Poquicuajinaje ma Jesosa besapoquije yasijje. Onaya jjaja ebionei aniñaquinaje Jesosa hui que añaquiya. ¹⁴Quijje pishana Jesosa

o shajja'ajjajji cuana nijje ba'eñaquinaje. Bishe aijo ani nequisohuaquinaje etaja huasijke. Quea huiso nee nee dejja cuana ba cañaquinaje. Onajo quea yeno jjashahuabaquinaje, quea huiso emanojaajo, quea nee jaajo pe'a'i. Jamajjeya ojjaña huaquia mee ca'yonaje, jjaajaqui mee ca'yonaje, Jesosaa.

15 Siniajo Jesosa que poe majje o shajja'ajjajji cuaa huohui canaje jama ba'a: —Jesosa, sinia coma, de. Jiquiojo chama' equi, chama' bobi pe'a'i. ¡Dejja cuana huoojeacue cuiñajji sisi cuana huasijke oja bobi jjesheya!

16 —Chojja. Ca'aniahua cuana. ¡Bobiacue oe miquiaaya! —Jesosaa acanaje.

17 —¿Yajja yajji? Oya cuana quea huiso nee nee aña ebobiajji. Ecuanaja bobi oe pojji yani. Me oeje pahui, beca nahuoo sisi pe'a'i yani —poanaje cuana.

18 —¡Comaya jjajja oe yacua yecue! —Jesosa poanaje—. 19 Ojjaña cuana jama acue pe'a'i ba'a: “¡Ojjaña anioquecue sipone biajje!” acue.

Anioque mee canaje sipone biajje. Majoya pahui me oeje huiso, nahuoo sisi becanejjiji pe'a'i jjeshe majje Jesosaa eyahuasijke jjabajeasohuaquinaje. Eyacuiñajji bihuia canaje. Eyacuiñajji nijje bobijo mimi majje pahui miji canaje, nahuoo sisi pe'a'i. O shajja'ajjajji que quia canaje, Jesosaa. Majoya ohuaya bobi quia canaje dejja cuana huasijke. Quia ca poquije quea huiso nee nee jjapanaqui poquipoquinaje bobi, de. 20 Ojjaña jeFFE majje eshajja'ajjajji cuaa chicha ca'yonaje bobi ojjaña ijjiasejja. Jjepai ai yasijke iya ca'yonaje. Quea huiso nee poanaje; 12 jjepai huisome bobi e'ijjiasejjaja ecuatajea poanaje. 21 Quea huiso nee nee bobi ijzia mee canaje, de, 5.000 dejja. Epona cuana, esho'i cuana pe'a'iya quea huiso nee nee ijzia canaje.

Jesosa bae ena biajje poquinaje

(Macoso 6.45-52; Huani 6.16-21)

22 Majoya siniajo Jesosaa o shajja'ajjajji cuana huoojea canaje. Jama acanaje ba'a: —¡Bishe ai yasijke nequisohuaquicue! ¡Bae ojje miji yasijke besapoquicue! Quijje eya poquije mi que pea dejja cuana quea huiso nee nee cuana huoojea'yo majje —poanaje.

23 Majoya dejja cuana quea huiso cuana huoojea'yo majje eyiyo huasijke jaasohuaquinaje oe nei oja Chii nijje mimiya. Mecajje Jesosa oe nei aninaje eyiyojo. 24 Jesosa eyiyojo anijo o shajja'ajjajji cuaa bishe ai quea huesha nee dojo canaje. Bae yiyesamajo o epojo beni quea quem poeyanaje. Enashajohua bishe ai janobajjima nei nane canaje, cuio canaje enaa. 25 Mecashono Jesosa eyiyojo ani o que poquinaje ena biajje. 26 O shajja'ajjajji cuaa Jesosa quea huesha pishana ena biajje jeojeojebeje ba majje quea ajjajja nee nee poanaje. Quea metejo taaanaje; jama poanaje ba'a: —¡Coya ae shai poeje ba'a! —siasianaje—. ¡Coya eshahua, de!

27 Jamajjeya Jesosa onijje miminaje. Jama poanaje ba'a: —¡A'a quea mete pojji! Eya jja iña iquo, eshahua pojjeama. ¡Quea jaji nee pocue!

28 Jamajjeya Penohua jama huohuime acanaje ba'a: —Ecuea Emeshi mese, miya enequiya jjejojoya, ¡eya mi que poqui meecue ena biajje!

29 —E'e Peno, ¡poecue! —oya acanaje Jesosaa.

Jamajjeya Peno bishe aijo ani nequioquequinaje. Ena biajje Jesosa que poquinaje. ³⁰Jamatii poqui pishana majje beni tii tii, enashajo quea quemo nee nee ba majje metenaje, de. Mete majje jaadobi'ajjaquinaje Peno. Taaanaje: —Jesosa, ¡eya hui'ije'yō! ¡Inacue mo, oe! —poanaje.

³¹Jesosaa me' inacuaji canaje. Peno jama acanaje ba'a: —¿Apiojji acuae mi meteani so'o? ¿A'a eya quea ca'a nee nee miquea ba jjima?

³²Majoya Jesosa Peno nijje bishe ai yasijje anisohuaqui'yajo beni nequioquequinaje. ³³Jamajjeya ojjaña cuana bishe aijo aniya Jesosa bihuiua canaje. Jama poanaje ba'a: —¡E'e jojo nei miya Eyacuiñajjija Bacua Ejja oe nei!

**Cuichi cuana hui'i ca ya poa meshi yasijje Jenesane' meshi
yasijje besapoqui o'oyanaje**
(Macoso 6.53-56)

³⁴Majoya bae ai ojje miji yasijje Jenesane' meshi yasijje besapoqui o'oyanaje Jesosa. Ba'eñaquinaje. ³⁵Dejja cuanaja jomajo ba'eja Jesosa eba poanaje yahuajo. Jamajjeya oya ba o'oya majje ojjaña cuana iyaa meequi canaje Jesosa que. Jamajjeya ojjaña emanojaaca cuana Jesosa que ye canaje. ³⁶Jama huohui'ajjame acanaje cuaa ba'a: —Jesosa, ¡ojjaña emanojaaca cuana che mique daqui iña'ajja meecue ehuaquia'yojji! —acanaje.

Ojjaña oja daqui cuema iña'ajja majje jjaajacuajiqui'yonaje, huaquia'yonaje pea'ai, de.

Dejja quea jjashahuubaqui tai po majje quea tai poani
(Macoso 7.1-23)

15 ¹Majoya Paniseo cuana Jodio esohui huohuijji cuana pea'ai Jenosanenajo ba'e Jesosa que poeyanaje. Oya huohui'ajja canaje: —Esohui huohuijji, ¿apiojji acuae mi mi shajja'ajjajji cuana etiiquianaja ehuohui'yo jama po ajja? ²E'e, ijjia'ijjia jjimahuajo eme' topo neinei ajja, de.

³Jesosaa saja'a canaje jama ba'a: —Miquianaya acuae ¿ae poani pea'ai? ¿Apiojji acuae miquianaaya Eyacuiñajjija esohui pajea'yaña etiiquianaja ehuohui'yo yajji nisho? ⁴E'e, Eyacuiñajjija esohui jama poani ba'a: “¡Mique chii, miquea enaese etii pea'ai jaahuanacue! ¡Joya oja chii, oja nae pea'ai cajaa acajo cajajahuejjajea ca'yahua cuaa, meiya!” ⁵Miyaya ca ca jama huohui taime yaña ba'a: “Dejja oja chii etii nijje, oja nae etii nijje pojja'a mimije jama ba'a: “Eyaya miya eba'e meesahuajji pojjeama. Chojja, eyaya ecuea aquiana Eyacuiñajjija yasijje quiaña o bihuiajji”.

⁶Jamajjeya oja chii etii, ojaya enaese etii pea'ai pajea meeña. Pea'ai Eyacuiñajjija esohui pajea mee'yo sa aña etiiquianaja ehuohui'yo yajji nisho. ⁷¡Miya ca mi ca oe jjadasiaquijji nei nei! Eyacuiñajjija esohui huohuijji Isaiaja esohui mijo e'e jojo nei yahuajo nei poa. E'e, yahuajo nei Eyacuiñajjija Isaiaja tehue mee ca poa jama ba'a:

⁸ “Jiquio dejja cuanaa eya bihuiua nisho cani. Jamatii jjashajja'ajjaqui ajja.

⁹ Jamajjeya ecuea equi yasijje jjachichaquiani ejjachichajeaquijji. Ohuaya ojaya ejjashahuubaqui'yojji huohui cani, ecuea esohui pojjeama”.

Jamaya Isaiaa yahuajo nei tehue ca poa miquianajo —Jesosa poanaje.

¹⁰ Jamajjeya Jesosaa pea cuana huasijje jama huohuime acanaje ba'a: —¡Shajja'ajjacue, jjabahuejja neineiquicue oe! ¹¹ Bobi cuana, ojjaña aquiana enabajje dobiquianijo pojjeama miquianaya quea mimishi poani. Chojja. Quea jjashahuabaqui tai po majje esohui quea tai enabajje cuayaquianijo ca ca quea mimishi poani. Eyacuiñajjiya miquianaya ba cani quea mimishi —Jesosaa acanaje.

¹² Quijje o shajja'ajjajji cuaa Jesosa huohui canaje jama ba'a: —Jesosa, miquea esohuijo Paniseo cuana quea quene poani minijje —poanaje.

¹³ Jesosaa oya cuana saja'a canaje jama ba'a: —Ojjaña acui ecue Chijja eyajo anija bana pojjeama ohuaya chiyojea caje'yo jiquio ecua ohuaya ojaya epeejji nisho acaje'yo jama. ¹⁴ Jamajjeya ja'a Paniseo cuanajo quea mete pojji! Oya cuaa aje oe esohui huohui cani quea tai, quea ja'a pojjeama. Cojjama' jayojja jama poani, de. Cojjamaa pea cojjama' mepejjiejea cani jayojja o pea'ai oquejeaquije'yo jjani yasijje. Cojjama' jayojja dejja mimishi pea dejja mimishiya dojo cajje cuaqui yasijje poquije'yo onijje tii —jamaya Jesosaa acanaje.

¹⁵ Penohua Jesosa huohui'ajja canaje: —Jesosa, ecuanajaya ca ca esohui quea quehua miquea. ¡Ba meesahuacue mo!

¹⁶ —¿A'a ecuea esohui miquianajaya ba jjima pea'ai? —Jesosa poanaje—. ¿A'a miquea eba pojjeama? ¹⁷ Ojjaña bobí, pea aquiana pea'ai enabajje ijjiagea see ai yasijje dobiquiani. Quijje jamatii seejea caje'yo. ¹⁸ Joya quea tai jjashahuabaquianiya ca ca esohui tai jeacuaya cani. Maaya oya quea tai po mee ca'yani; quea mimishi Eyacuiñajjiya oya ba cani. ¹⁹ E'e, jjashahuaba taiqui majje pea quecuá cani, onaja eponajo ba'e sa poani, peaja yahuejo ba'e sa poani, quehuajje cojjo cani, sii cani, siajje poani, mimijajiani pea'ai. ²⁰ E'e, joya jama acanijo Eyacuiñajjiya ba cani quea mimishi; bobí ijjiá cani eme' shacula neinei jjimajo pojjeama quea mimishi poani.

Cananea epona Jesosa que poeyanaje (Macoso 7.24-30)

²¹ Majoya Jesosa Jenesane' meshijo ani poquinaje Sinono meshi yasijje, Tino meshi yasijje pea'ai. ²² Jomajo poquiani oe Cananea epona ma meshijo ba'e o que poeyanaje. Oya Jodio pojjeama. Jamatii ejiojjije poquije taaa majamaja poquinaje: —Emeshi Mese nei, Dabija osecua, ¡ejo jjashahuabaquicue! Ecue bacua piona quea sapa niñe jaa. Quea nee nee poani, quea mano.

²³ Jamatii Jesosaja oya saja'a jjima. Jamajjeya ojaya eshajja'ajjajji cuana Jesosa nijje miminaje: —Jesosa, ¡epona huoojeacue! Joya ese nijje taaajebeje.

²⁴ Jamajjeya oya cuana saja'a canaje Jesosaa: —Oya Jodio pojjeama. Eyacuiñajjiya eya huoojea canaje Jodio cuana sa'ajja'yohua. Oya cuana ñajjajja ecuaquisho'yo jayojja jama poquiquehuani Eyacuiñajjiyo.

²⁵ Jamatii epona Jesosa que poe majje ecui'oshajjajo nequiñanaje; jama poanaje ba'a: —Emeshi Mese nei, jecuea ebacua piona jjaajaqui mee'yocue, quea mano nee nee jaa!

²⁶ Ma epona Jodio pojjeamajo huapa jayojja saja'ame acanaje Jesosaa: —¿A'a acuae ecue bacuaja bobo jeaje iñahuehua que? ¿A'a cuae jamaya quea pame? —poanaje.

²⁷ Epona quea shoe jama jjejojo jama poanaje ba'a: —E'e, Emeshi Mese. Jamatii o huonejjiya ijija canijo, iñahuehuaa ehuonejjiya ijjiasejja ca'ijjia cahua —poanaje.

²⁸ —Epona, miya ca mi ca oe quea ja'a nee, quea pame nee ejoojashahuabiquiani. Jamajjeya eyaya miquea esohui jayojja jama aje'yo. Jjeya nei miquea ebacua piona jjaajaqui meeje'yo —Jesosaa acanaje.

Jamajjeya jjeya nei oja bacua piona jjaajaqui'yonaje; quea aja nee po'yonaje.

Jesosaa quea huiso emanojaaca huaquia mee ca'yonaje

²⁹ Majoya Jesosa jomajo ani ejiojjije poqui o'oyanaje Janinea bae sahuajje. Eyiyo huasijje jaasohuaqui majje anioquenaje. ³⁰ Quea huiso nee nee poeyanaje; o que jjachichaquinaje. Jjequi canaje emanojaaca cuana: quibojjisha cuana, cojjama' cuana, jiojjijajja cuana, mimi'ajja cuana pea'ai, peapea epo'yo cuana pea'ai huanaoquea canaje cuaa Jesosa pejjejo ejjaajaqui'yojji. Ojjaña cuana jjaajaqui mee ca'yonaje, huaquia mee ca'yonaje, de, Jesosaa. ³¹ Ba majje ojjaña cuana quea bihui nee nee poanaje. Eyacuiñajji bihuiia neinei canaje: —E'e, e, mimi'ajja cuana quea ja'a mimi mee ca'yonaje; jiojjijajja jeo mee ca'yonaje; quibojjisha jjaquibopiqui mee ca'yonaje; cojjama' quea cojja ja'a po mee ca'yonaje, jjabaqui mee ca'yonaje pea'ai. Ma ecua ohuaya jjaja'aqui jjimahua Isaeni cuana nijje acaninaje, jamaya aje jja oe jjeya acani, Jesosaa —acanaje cuaa.

Jesosaa quea huiso cuana bobia canaje, 4.000

(Macoso 8.1-10)

³² Majoya Jesosaa o shajja'ajjajji iyaa canaje. O que poeyajo huohui canaje jama ba'a: —Jiquio dejja cuana enijje poani beca cahuime. Ojaya bobo oe poanaje. Jamajjeya ojo eya quea yeno jjashahuabiquiani bobimajo. Oja equi yasijje huoojea sa po'yo ajja. Quea shoe nee nee; ejiojjijo bobo yasijje po chana'!

³³ O shajja'ajjajji cuaa Jesosa saja'a canaje: —Jiquiojo chama' bobo, dejjama'. ¿Yajja yajji? Oya cuana quea huiso nee nee ebobiajji. ¿Achacua pahui ejjeshejji ojjaña bobiajji?

³⁴ —¿Ache huiso pahui miquea yani? —Jesosaa huohui'ajja canaje.

—Me oeje beca pea'ai, 7 pahui yani. Nahuoo sisi oe pojji yani pea'ai —acanaje cuaa.

³⁵ Jamajjeya Jesosaa ojjaña ejjachichaquiani cuana jama acanaje ba'a: —¡Meshijo anioquecue! —acanaje.

³⁶Majoya ma 7 pahui, nahuoo sisi pe'a'i jjeshe majje Eyacuiñajji nijje, oja Chii nijje miminaje bobijo. Pahui, nahuoo pe'a'i miji canaje, Jesosaa. O shajja'ajjajji que quia canaje. Majoya ohuiya dejja cuana huasijje quia canaje. Quia ca poquije quea huiso nee nee jjapanaqui poquipoquinaje, bobo. ³⁷Jamajjeya ojjaña cuaa ijija canaje, quea jejje poanaje, de. Ijjia majje o shajja'ajjajji cuaa bobo e'ijjiasejja jjepai aijo chicha ca'yonaje. Quea huiso poanaje, 7 jjepaime. ³⁸E'e, dejja quea huiso nee neeya bobo ijija canaje, 4.000 dejja. Quea huiso nee epona cuana, esho'i cuana pe'a'iya ijija canaje. ³⁹Majoya Jesosaa ojjaña cuana huoojea canaje ojaya equi yasijje. Majoya Jesosa o shajja'ajjajji cuana nijje bishe ai yasijje nequisohuaquinaje. Besapoquinaje ojje, pea meshi yasijje, Majadana meshi yasijje.

Jodio etiiya Jesosaa acani quea pame ba sa acanaje
(Macoso 8.11-13; Noca 12. 54-56)

16 ¹Majoya Paniseo cuana, Sanoseo cuana pe'a'i poeyanaje Jesosa que. Oya cuaa Jesosa Eyacuiñajjiha huoojea'yo pojjeama poso acanaje. Jamajjeya jama anisho canaje ba'a: —Esohui huohuijji Jesosa, ¿a'miya Eyacuiñajjiha huoojea'yo nei ojjaña jaahuanajji pojja'a? ¡Ejjaba'ajjaqui so'o! ¡Eyacuiñajjiha jayojja jama acue ecuanaja ebajji! ¡Eyajo oe panacue! —acanaje Paniseo cuaa.

Jamatii Paniseo cuaa Jesosa Eyacuiñajjiha huoojea'yo pojjeama poso acanaje. Jamajjeya pea Paniseo cuana nijje jama poanaje ba'a: —Chojja, Jesosa Eyacuiñajjiha huoojea pojjeama. Jamajjeya Eyacuiñajjiha jama pojjeama mi pana cajo, capajea ca'yahua.

²Jesosaa oya cuana saja'a canaje: —Eshequi oquequiajo bo huo'ohuo'o poanijo miquianaaya huohuaña: "E'e, de, mecahuajje quea jea poaje eshequi, ena epoji pojjeama". ³Mecajjeahua ca ca quea apo nee nee poanijo miquianaya jama poani ba'a: "E'e de, quea apo; jjeya ena poaje". E'e —Jesosa poanaje—, eyahuasijje bo ba majje miquianaaya huohuaña ena chama' pojja'a, ena poaje pojja'a. Jamatii Eyacuiñajjiha esohuijjo miquianajaya ba jjima ache shono ojjaña jaahuanajji poeje. ¿Apiojji miquea ba jjima? ⁴Miquianaaya Eyacuiñajjiha esohui pajea yaña. Jamajjeya Eyacuiñajjiha pana cani ba majamaja sa poani. Jamatii Eyacuiñajjiha Jjona yahuajo nei nei aca poa jayojja jama ohuaya jjeyahua acaje miquea ebajji.

Jamajjeya Jesosaa oya cuana jea cana'yonaje jjabahuejjaqui ajjajojo.

Paniseoja esohui tai pahui shejjee meeiji jayojja
(Macoso 8.14-21)

⁵Majoya bae ojje miji yasijje besapoquianijo Jesosa shajja'ajjajji cuana jjashahuubaquinaje. Jama poanaje ba'a: —E'e de, ecuanaa bobo pajea'yonaje.

⁶Jamajjeya Jesosaa oya cuana huohui canaje: —¡Quea ja'a nee jjashahuubaquicue! Paniseo cuana, Sanoseo cuana pe'a'ija pahui shejjee meeijiyo miya quea tai poaje.

⁷ Jamajjeya o shajja'ajjaggi cuana ojee mimimiminaje: —E'e pojja'a oya jama poanaje ecuanaja pahui ye jjimajo.

⁸ Ojaya ejashahuabaqui'yojjii Jesosaja eba poanaje. Jamajjeya oya cuana acanaje: —¿Apiojji acuae jja nequiana ojee mimimimiani pahuijo? ¿A'a jja nequianajaya eya ba jjima quea ca'a nee nee? ⁹ ¿A'a jja quiana ejo jjashahuabaqui jjima tii? Eyaya me oeje pahui miji majje quea huiso dejja bobianaje, 5.000 dejja. ¿A'a jja miyaya maya pajea'yonaje? Ijjia'ijjiajeyo majje acuae jjaya ¿ache jjepai huiso chicha'yonaje pahui? ¹⁰ Oya jayojjaya me oeje beca pahui, 7 pahui miji majje quea huiso dejja bobianaje, 4.000 dejja. Majoya miyaya pahui ¿ache jjepai huiso chicha'yonaje so'o? ¿A'a ya pajea'yonaje? ¹¹ Eyaya miquianaya huohuinaje jama ba'a: "Paniseo, Sanoseo peal'ajja pahui shejjee meejjijo quea tai miya poaje" —Jesosa poanaje.

¹² Jamajjeya o shajja'ajjaggi cuana jjabahuejjaquinaje Jesosaa huohui cajje: —E'e, Paniseo, Sanoseo peal'ajja ehuohui taijo se quea tai poaje; pahui shejjee meejjijo pojjeama Jesosaa huohui canaje —poanaje.

Penoja esohui quea pame Jesosajo
(Macoso 8.27-30; Noca 9.18-21)

¹³ Majoya Jesosa Pinipo meshi yasijje poquinaje. Sesanea huasijke poquijeya o shajja'ajjaggi huohui'ajja canaje Jesosaa: —Dejja cuana acuae jja ¿yajja poani ejo, ojjaña Edoe Mesejo? ¿A'ya cuae eya?

¹⁴ Oya cuaa saja'a canaje: —Beca cuana jja jama poani ba'a: Miya Huani, ma ona besameejji poa shequi o'oyanaje poso ca jja mi ca acani. Pea cuana aje jja oe jama poani: Miya Enia, Eyacuiñajjija esohui huohuijji yahuajo nei nequia poa. Pea poani jama ba'a: Miya Jenemia pojja'a pea esohui huohuijji yahuajo nei nequia poa pojja'a. Oya cuana yahuajo nei mano'ya poa shequi o'oyanaje poso ca jja mi ca acani cuaa —poanaje o shajja'ajjaggi.

¹⁵ Jamajjeya Jesosaa oya cuana huohui'ajja canaje: —¿Miya acuae yajja poani ejo? ¿A'ya cuae eya?

¹⁶ —¡Miya ca ca Eyacuiñajjija Bacua Ejja oe nei, oja huoojea'yo ojjaña jaahuanajji! —Simohuiya Jesosa saja'a canaje.

¹⁷ Jamajjeya Jesosaa oya jama acanaje ba'a: —Simohui, Jjonaja bacua, ¡quea bihui nee pocue! Ecue Chii eyajo aniya miya ba meesahua cani eya oja huoojea'yo ojjaña jaahuanajji. Dejja pojjeama miya ba meesahua cani, de.

¹⁸ Jamajjeya eyaya miya huohuaña miya bajjani aje Peno, esejaya esohuijo Mei bajjani. Eyacuiñajjija esohui e'e jojo nei ejo eyaya miya huohui meesahua'yo ecuea epjeeji cuana quea ca'a nee epo'yojjii. Equi mei jiyo nei jayojja jama quea ca'a nee nequi tii jayojja jama ecuea epjeeji cuana quea ca'a nee nequi tiitije'yo; ejeabichajea'yojjii pojjeama Edosiquianaja, eshahua cuanaja pea'ai.

¹⁹ —Eya Emeshi Mese nei jiquio meshijo poaje'yo. Jamajjeya aje miya huoojeaña ecue sohui huohuiya. Ecuea esohui esecue ca'apejojji jayojja jama eyahuasijke edobiqui mee'yojjii. Jamajjeya ecuea esohui ba majje miyaya

huohuijeacheeba'ejji queamimishi Eyacuiñajjiba boti'ama. Miyaya huohuijepea'aiacheeba'ejji queapame nee Eyacuiñajjija eyajoanija queaboti nee.

²⁰Majoya Jesosaa o shajja'ajjajji cuana huohui neineicanaje jama ba'a: —E'e, eya Eyacuiñajjija huoojea'yo ojjaña jaahuanajji. Jamatii ja'a oe jihuohuijji so'o! —poanaje.

Ojaya emano'yojjijo Jesosa miminaje
(*Macoso 8.31-9.1; Noca 9.22-27*)

²¹Majoya Jesosaa o shajja'ajjajji cuana huohui coocanajeojaya emano'yojjijo: —Eya quijje Jenosanena huasijje poquije. Jomajo Moisesijietehue'yo huohuijji cuaa, Jodio etii bajjani cuaapea'ai, Eyacuiñajjinijjemimijji etii cuaapea'ai eya queahuisocuia caje'yo. Queanee nee poaje'yo eya. Quijje ya mo manoje'yo ohua me caca mee cajje. Jamatii beca cahuime po majje mo shequi mee caje o'oya ecue Chiiya —acanaje.

²²Jamajjeya Peno queayeno nee poanaje Jesosajo. Oya oe nei iyaa canaje, Penohua. Jama poanaje ba'a: —Chojja, ecuea Emeshi Mese, miya Eyacuiñajjija jaahuanacaje'yo. Peaa aje oe miya enapajji pojjeama, equecua'yojjipojjeama jja mi, de.

²³Jamajjeya aje jja oe Jesosaa oya Peno cojja ba neineicani jama tecueame acanaje ba'a: —Peno, ja'a jamaya mimijji! Miya edasijji nisho epojayojjamimiani. Miya Edosiquiana Satanasa jama mimiani. Jjashahuabaquianiqueatai, dejja jama; Eyacuiñajjija ejjashahuabaquiyoyjiji jama pojjeama —poanaje.

²⁴Jamajjeya Jesosaa ojjaña oshajja'ajjajjinijjejama miminaje ba'a: —Ojjaña joyaenijje e'lejooneijjejjapeequi'yo sa poani Eyacuiñajjija esohui jayojja jama ba'ecue! E'e, e jayojjaya jjaenijje capoquiahua, jamatii onaa napa cajje aje jja oe queanee poaje'yo pojja'a. ²⁵E'e, ojjaña joya Eyacuiñajjija esohui jayojja jama ba'e sa poajja aje oe ba'etitii ajjaenijje. Joyaecueaesohui jayojja jama ba'e sa poani ca ca ba'etitije'yo enijje eyajo. ²⁶E'e pojja'a dejja queahuisonee neeaquianaojaya yajjichicha caje. Jamatii oya cuana cuaquiyasijjejeajea cajo, ojjaña ojaya aquianacuanaedojojji pojjeama. ¿A'aojjaña ojaya aquianacuana Eyacuiñajjijiyasijjequia cajo, oya cuana cuaquijoani cuayaqui mее caje'yo? ¿A'aojjaña ojaya cuana onijje eyajo ba'e mее caje'yo ma aquianaqueahuisonee neesosejje? Chojja. ²⁷E'e jojonei eyaojjañaja Edoe Mese poeje o'oya. Queajeahua nee nee, queaca'anee nee poeje'yo. Eya esohuidojjiqueahuisoneenijje poeje'yo. Poe majje eyaya ojjaña cuanasosequiaje'yo. Ojjaña ba'enaje jayojja eyaya sosequiaje'yo. ²⁸E'e jojonei eyaojjañaja Edoe Mese ojjaña huoojea'yojji queaca'anee nee poaje'yo. Beca cuaajiquiojonequiyajjamo jamaya bacaje manoyojjimahuua —Jesosaa oshajja'ajjajji cuana acanaje.

Jesosa quea cojja jiji poanaje oja Chii nijje mimianijo
(Macoso 9.2-13; Noca 9.28-36)

17 ¹Quijje pishana me oejjje pea emejje oe cahuime po majje Jesosa poquinaje o shajja'ajjajji nijje pea beca peejjima dejja nijje, Peno nijje, Satiaco, oja doe Huani nijje pe'a'i. Mahuiso dejja nijje poquinaje eyiyo huasijke quea huesha nee. ²Jocuama nequi oya Jesosa jjahuapaqui'yonaje; quea cojja jiji nee poanaje, eshequi jayojja poanaje, quea jeajahua nee nee. Oja daqui quea oshe nee nee, bo oshe jayojja poanaje. ³Moisesi, Enia pe'a'i ma yahuajo nei ba'ya poa Jesosa nijje mimimiminequi ba canaje o shajja'ajjajji cuaa. Moisesi, Enia pe'a'i Jesosa nijje mimimiminequinaje Jesosa onaja mimishijo emanoyojji jjejojoya. ⁴Jamajjeya Peno Jesosa nijje jama poanaje ba'a: —E'e Emeshi Mese, jiquiojo ecuana canequiquiahua, quea pame nee. Pea beca peejjima equi sisi ecuaaya ca'iyahua miquea, Moisesija, Eniaja pe'a'i eba'ejji.

⁵Peno mimianijo tii bo quea oshe nee nee nequioquenaje. Queya canaje huojaa. Shajja'ajja canaje Eyacuiñajji jama poani ba'a: ⁶—Jiquio ecuea ecue Bacua Ejja quea jea nee nee. Eya ojo quea bihui nee nee. ¡Oya oe shajja'ajjacue!

O shajja'ajja majje quea mete nee nee poanaje Peno, Satiaco, Huani pea'a'i. Meshi yasijje hui oquequinaje. Ecui'oshajjajo nequinaje.

⁷Jamajjeya o que poeyanaje Jesosa. Napa canaje emeya.

—¡Nequisohuacue! ¡A'a quea mete pojji! —Jesosa poanaje.

⁸Jamajjeya oya cuana nequisohuanaje. Jesosa oe nei nequi bajea canaje.

⁹Eyiyojo jaaoquequije'yo mimimimi jaaoque'yonaje. Jesosaa ma ojjañaja Edoe Meseya acanaje jama ba'a: —¡Ma miya eyiyojo banaje a'a jihuohuijji! ¡Quijje eya emanoyojaa shequi o'oyajo mo oe pea cuana huohuicue! —Jesosaa acanaje.

¹⁰Jamajjeya oya cuaa huohui'ajja canaje: —Jesosa, Moisesija etehue'yo huohuijji poaniya jama acani ba'a: “Enia oe ebionei capoe'yahua Eyacuiñajji huoojea'yo ojjaña jaahuanajji poe jjimahuajo”. ¿Yajjajje acuae Moisesija esohui huohuijji cuaa jama acani? —poanaje Peno, Satiaco, Huani pea'a'i.

¹¹Jesosaa saja'a canaje jama ba'a: —E'e jojo nei Enia jayojja jama oe dejja ebionei epoejji, ojjaña cuana ejo e'e jojo nei ejjashahuabaqui meesahuajji. ¹²E'e, Enia jama ca ca oe yahuajo pishana poeyanaje. Jamatii Jodio cuanaja oya ba jjima poa. Pea poso acanaje. Jamajjeya cuia ca'ya poa. Jamaya pea'a'i eya acaje'yo cuaa. Eya ojjañaja Edoe Mese quea nee nee po mee caje'yo cuaa —poanaje Jesosa.

¹³Jamajjeya o shajja'ajjajji cuana jjashahuabaqui nequinaje. Jama poanaje: —E'e de, oya Huanijo mimiani, ma ona besameejji poajo. Eniaa jama sohui huohuime acanaje Huaniya, de —poanaje Peno Satiaco nijje Huani pea'a'i nijje.

Esho'i niñepoquipajea mee ca'yonaje Jesosaa
(Macoso 9.14-29; Noca 9.37-43)

¹⁴Eyiyojo nequi jaaoque'y majje Jesosaa, o shajja'ajjajjiya pea'ai ba cañaquinaje quea huiso cuana ejjachichaqui nequica. Oe dejja Jesosa que poeyanaje. Ecui'oshajjajo nequiya huohui'ajja canaje: ¹⁵—Emeshi Mese Jesosa, jecuea ebacua ejjajo quea yeno jjashahuabaquicue! Oya quea mano nee nee, niñepoqui poani. Niñepoqui majje ena huasijje jea cani, cuaquí yasijje pea'ai jea cani. ¹⁶Eyaya oya yenaje mi shajja'ajjajji cuana huasijje. Jamatii niñepoquipajea ajja.

¹⁷Jesosaa ojjaña cuana acanaje: —¡De! ¿Ache shono acuae jja nequiana ejo jjashahuabaquije e'e jojo nei? Quea sapa ca'a mi coma. ¿Ache cahui huiso minijje nequi majje miyaya eya baje'y Eyacuiñajjiya huoojea'y ojjaña jaahuanajji quea ca'a nee nee? ¡Miquea ebacua ejja e que jjequicue!

¹⁸Jjequi canaje Jesosa que. Jesosaa o niñepoquimeejji poani huoojeacuayajea ca'yonaje: —Eshahua, ¡cuayaqui'yocue, esho'i niñepoquimeejji poani! —Jesosa poanaje.

Cuayaqui'yonaje. Jamajjeya oja bacua ejja niñepoquipajea'yonaje, quea aja nee po'yonaje.

¹⁹Quijje ojjaña cuana poqui majje Jesosa que poeyanaje o shajja'ajjajji cuana. Huohui'ajja canaje: —¿Yajjajo acuae ecuaaya eshahua mi huoojeacuayajea mee'ajja'yonaje?

²⁰Jesosaa saja'a canaje: —Miquianaya jja ejo jjashahuabaqui ja'a jjima. Jjashahuabaquiani jama ba'a: “E'e pojja'a Jesosaa ecuanaja eshahua huoojeacuayajea mee ajja”. Jamajjeya mi huoojeacuayajeaña. ¡Bacue oe! Ejo jjashahuabaquicue jama ba'a: “Jesosaa e'e nei ohuaya jayojja jama ecuana ameesahua caje'yo”. Miya jama jjashahuabaquiajo, Eyacuiñajjiya miya amee caje'yo ojjaña eyaya aña jayojja jama, ma dejja ajjima acani amee caje'yo pea'ai. ²¹E'e, jamatii jiquio eshahua jayojja quea huoojeacuayajea camaja. Eyacuiñajji nijje mimi huicha'a huicha'a majje, ojo jjashahuabaquianijo ijija'lijja jjima po majje pea'ai huoojeacuayajeje'y miyaya —Jesosa poanaje.

—Quijje eya manoje'y —Jesosa poanaje
(Macoso 9.30-32; Noca 9.43-45)

²²⁻²³Majoya Janinea meshijo ojee poquijeya Jesosaa o shajja'ajjajji cuana huohui canaje: —E'e, quijje eya iña meesahuaje onaja equecua'yoyji. Quecua caje'yo cuaa. Jamatii beca cahuime po majje mo shequi mee caje'yo Eyacuiñajjiya.

O shajja'ajja majje o shajja'ajjajji cuana quea yeno nee nee poanaje. Quea mete pea'ai poanaje.

Eyacuiñajjiya equi iya bame'yojji bejjo chicha canaje bejjo chichajji poaniya

²⁴Majoya Capenaoma huasijje poeyajo, bejjo chichajji poani Peno que poeyanaje; huohui'ajja canaje jama ba'a: —¿A'a acuae mi mi sohui huohuijjiya bejjo quia cani, ma Eyacuiñajjiya equi iya bame'yojji?

²⁵—E'e de, quia cani —Peno poanaje.

Majoya Simohui Peno equi yasijje dobiquiajo, Jesosaa oya huohui'ajja canaje: —Simohui, ¿yajjajje acuae mi jjashahuabaquiani? ¿Emeshi mese neiya ajea bejjo sosequia mee cani? ¿A'a quea huesha ba'eja? ¿A'a oja meshijo ba'eja pojja'a?

—Quea huesha ba'eja poe majje sosequia caje'yo —poanaje Peno.

²⁶—E'e —Jesosa poanaje—. Jamajjeya emeshi mese neija echacojji cuana esosequia'yojji pojjeama. ²⁷Jamatii oya quene'ama epoji ejjasosequiaquiji. ¡Poquicue miya bae yasijje! ¡Joya ebionei ijja caje oe jjequiquiayacue! ¡Oja nabajo ba'e oe bacue ejjeshejji quea sose huiso nee nee, ejo, mijo pea'ai esosequia'yojji! ¡Dojocue! ¡Bejjo chichajji poani yasijje quiacue! “Ma'laje esohui huohuijjiya, ecuea pea'ai” acue —Jesosa poanaje.

¿A'ya ona huoojeajji jayojja nequije eyajo?

(Macoso 9.33-37; Noca 9.46-48)

18 ¹Majoya ojjaña o shajja'ajjajji cuua Jesosa que poe majje huohui'ajja canaje: —Jesosa, quijje miya ojjaña huoojeajji poaje. ¿A'ya cuae mi jayojja jama poaje minijje ona huoojeajji? ¿A'a ecuanaya pojja'a?

²Jamajjeya Jesosaa oe esho'i nei o que iyaa canaje. O cojja nei nequinaje. ³O shajja'ajjajji cuana huohui canaje Jesosaa: —¡Bacue oe! ¡Jiquio esho'i nei jama pocue! ¡Jjashajja'ajjaquicue oe! Esho'i nei pojji mi po'yajo ca ca enijje eba'e'yojji pojjeama quijje eya ojjaña huoojea'yojji poaje. ⁴Jamajjeya joya esho'i jama quea bei jjashajja'ajjaquiani e que poquije'yo, e jayojja ona huoojea'yojji eyajo poaje. ⁵E'e, ecuea epeejji esho'i quea pame jama jjashajja'ajjaquiani. Ojjañaaa joya ecuea epeejji quea jea acani eya pea'ai quea jea acani —Jesosa poanaje.

Quea mimishi mi po o'oya chana'

(Macoso 9.42-48; Noca 17.1-2)

⁶—Ecuea epeejji jjeya nei jjapeequi ca'a'ama ¡a'a quea mimishi po meeji cuana! Joya o mimishi pomeejji poani Eyacuiñajjiya quea nee nee po mee caje'yo, de. Jamajjeya ¡quea mimishi epo mee cuahuajje oe mano'yocue! ¡Jjanaayiipecaqui majje mei quea quemo nee jeyocue; bae quea doe yasijje oe tohuaacue! ⁷Mimishi pomeejji cuanajo quea yeno nee nee ojjaña poani. Jamatii mimishi pomeejji yani, de. Quea yeno ca ca oe mimishi pomeejji poaje, quea nee nee po mee caje'yo tii Eyacuiñajjiya —Jesosa poanaje.

⁸—Jamajjeya miya quea mimishi po mee cani emeya, ejiojjiya pojja'a. ¡Ejiojji, eme' pojja'a ejajasejjajea jayojja jama acue mimishi'ama epoji! Eme', ejiojji pea'ai

chamajo eyahuasijje poqui'yo Eyacuiñajji nijje eba'e tiiti'yojji quea pame nee nee. Mi quea beca eme', ejiojji pea'ai yanijo pojja'a quea mimishi tii poani ca ca cuaqui yasijje poquije'yo. Quea tai nee nee, quea nee nee; cuaqui jijipaje'yo ajja, de. ⁹Ecojjajo jjashahuubaqui majje miya quea mimishi poani pojja'a. Jamajjeya jecojja ecajjajea jayojja jama acue! Cojjama!, mimishi'ama miya eyahuasijje poquije'yo quea pame nee nee poaje'yo. Cojjajji, quea mimishi tii poani miya cuaqui yasijje poquije'yo ca ca quea tai nee nee, quea nee nee poaje'yo tii tii. E'e, jquea jjashahuubaqui ja'a oe pocue! ¡Mimishi cuana oe pajea'yocue! —Jesosa poanaje.

¹⁰—Jamajjeya jecuea epeejji eyacua a'a boti'ama ajji! E'e jojo nei eyaya miya huohuiaña eyajo esohuidojijiya, o jaahuanajiya ecue Chii yasijje huohuiqui cani. ¹¹Eya ca iña ojjañaja Edoe Mese poeyanaje mimishi cuana cuijea'yohua cuaqui yasijje miquianaya epoqui poani jjejojo —Jesosaa o shajja'ajjajji huohui canaje.

Esohui eba meesahuajji ñajjajja epoquiquehuajo
(Noca 15.3-7)

¹²—Jamajjeya eyaya miquianaya huohuije esohui ejjashahuubaquijji —Jesosa poanaje—. Oe dejjaja quea huiso ñajjajja yaninaje, 100 huisome. Oe nei poquiquehua'ya poa, ¿ae poanaje oya? ¿A'a sa'ajja canaje? E'e. Pea cuana, 99 huisome ñajjajja ojee ijji'ijjiacu jeanana canaje epoquiquehua sa'ajja'yohua. ¹³Ba'yo majje quea bihui nee po'yonaje. Pea ñajjajja poquiquehua jjimajo quea bihui pishana poanaje: “¡Jiquioya ecuea ñajjajjaja bacua, de!” poanaje eñajjajja mese. ¹⁴Ñajjajja jaahuanajji ñajjajja ba'yo majje quea bihui nee nee poa. Jamaya poaje ecue Chii: Ecuea epeejji eyacua quea mimishi jjejojo epoquiquehua'yo jayojja jama ojo jjashahuubaqui o'oyajo, Eyacuiñajji quea bihui nee poaje'yo —Jesosa poanaje.

**¡Mi quea epeejji minijje quea mimishi poajo oja mimishi pajea'yocue,
quea bei po o'oyacue onijje!**
(Noca 17.3)

¹⁵—Ecuea epeejji minijje quea mimishi poanijo, ¡onijje mimiquicue! ¡Ojaya mimishijo jjashahuubaqui meesahuacue! Jjashahuubaqui majje mimishi capajea ca'yahua. Jamajjeya minijje jjapeequije o'oya. ¹⁶O mi jjashajja'ajjaquiao jpea iyaacue, beca pojja'a, ecuea epeejji pea'ai! ¡Ojee poquicue onijje mimiya! Jamajjeya oya cuaa miya ba caje e'e jojo nei mi quea epeejji nijje jjapeequije o'oya sa poani. ¹⁷Ohuaya oya cuana mi jjashajja'ajjaquiao ¡ojjaña Eyacuiñajji epeejji cuana huasijje iyaacue emimiji, ojaya mimishi epajea'yojji! Ojjaña niñeshe'ajja cajo mi jjashajja'ajjaquiao, Eyacuiñajji epeejji jama pojjeama oya. Jamatii jjadasiaquijji jama, de —Jesosa poanaje.

¹⁸—Jamajjeya ojjaña ecuea epeejji cuana miquianaaya huohui meejeache eba'ejji quea mimishi, ma Eyacuiñajji egypto anija boti'ama pea'ai.

Huohui meeje pea'ai ache eba'ejji quea pame nee, ma Eyacuiñajjija eyajo anija quea boti nee pea'ai —Jesosa poanaje.

¹⁹—E'e jojo nei miquianaya meshijo ba'e ojee mimiaijo, Eyacuiñajjija, ecue Chiiya eyajo aniya miquianajaya esohui saja'a cani. ²⁰Beca cuana enijke jjapeequiani ejjachichaquianijo, eya o pejjejo nequiani —Jesosa poanaje.

**Esohui ejjashahuabaqui meeiji oe dejja onaja
mimishijo quea quene tii tii poani**

²¹Majoya Penohua Jesosa huohui'ajja canaje: —Emeshi Mese Jesosa, ecuea epeejjiya quea mimishi ahuicha'a huicha'a cajo, ¿a'a eyaya oja mimishi capajea huicha'a huicha'a'yahua? ¿Ache huiso huohui'yome amajje jjabeiqui ca'yojji? ¿A'a quea huiso pojja'a, me oejje pea beca, 7 pojja'a?

²²Jesosaa saja'a canaje: —Chojja, Peno, me oejje pea beca, 7 pojjeama. Quea huiso nee nee huohui'yome amajje jjabeい neineiqui ca'yojji, jama tii tii epo'yojji —Jesosaa acanaje.

²³Jamajjeya Jesosaa pea esohui ejjashahuabaqui meeiji huohui canaje jama poani ba'a: —Eyacuiñajji ojjaña huoojea'yojji poaje. Jamaya poaje ba'a: Emeshi meseya aquiana oja quia sosequia mee ca'yani echacojji cuana. ²⁴Sosequia mee canijo o que jjequi canaje oe echacojji poani. Aquiana quea huiso nee oja jjeshe poanaje. Jamajjeya sosequia ajja'ajja jjima, ojaya. ²⁵Ma echacojji sosequiaquia ajja; yajja sosequia'yome yajji jojoya mi sosequajeyo ca'yonaje. Jamajjeya emeshi meseya quea quene huohui canaje: “¡Oya oe quiacue ejjeshejji sosejje! Sosema' cachaco cahua. ¡Ojaya ehuanase, oja bacua cuanaya quiacue pea'ai, ojaya aquiana cuana pea'ai quia'yocue e sosequia'yojji!”

²⁶—O shajja'ajja majje echacojji o que poquinaje. Ecui'oshajjajo nequi oya mimi nequinaje: “Ecuea emeshi mese, ¡a'a ecuana dojoojji equia'yojji beijo sosejje! ¡Ishoa'ajjacue! Eyaya ojjaña sosequia jeyojeyoje'yo miya”.

²⁷—Emeshi mese ojo jjashahuabaquinaje. Quea aquiana huiso nee nee nee sosequia jjima. Jamatii oja bajjani cuijea ca'yonaje, sosequia jjima tii. Poqui mee ca'yonaje, de.

²⁸—Majoya echacojji poquinaje quea bilihui nee nee. Jamatii poqui majje ma echacojjiya pea echacojji onijke nequi sa'ajja canaje. Ba majje iñasibijea canaje. Jama poanaje ba'a: “¡Jjeya nei mo sosequiacue mique jjeshe cuana!” oya poanaje. Ojaya oe pojji nei sosequia jjima poanaje.

²⁹Ecui'oshajjajo nequi mimi nequinaje jiquio pea echacojji: “Epeejji, ¡ejo jjashahuabaquinicue! ¡Ishoa'ajja socue! Ojjaña aje mi sosequia jeyojeyoje'yo de”.

³⁰—“¡Chojja! ¡Ishoa sa po ajja iñal!” poanaje. Jeanobiaa dojo canaje; ohua sosequajeyo ca'yajje huoojea ca'yonaje.

³¹—Pea echacojji cuaa ba canaje. O dojo cajo quea yeno jjashahuabaquinaje. Poquinaje emeshi mese huohui'yo hua. ³²Ma shajja'ajja majje emeshi meseya huoojea canaje ojaya echacojji jjequi'yo hua. Poeyajo tecuea canaje emeshi meseya: “Miya ca mi ca oe quea mimishi nee. Miquea aquiana quea huiso nee nee sosequia jjima. Jamatii enijje mimi'yajo eyaya miquea bajjani cuijea'yonaje, sosequia jjima tii. ³³Jamajjeya ¿yajjajo miquea epeejijo mi jjashahuabaquinaje miya? ¡E jayojja oe miya mi poanaje!” emeshi mese poanaje. ³⁴Quenequene neinei'yonaje emeshi mese. Ejeanobiajji huoojea ca'yonaje quea nee nee po meeya ohua sosequiajeyo ca'yajje —jamaya Jesosa poanaje.

³⁵—Jamajjeya jiquio ecua emeshi meseya acani jayojjaya jamaya miquianaya acaje'yo ecue Chiiya, ca onaja mimishi miya mi pajea neinei'yajo. Miquea mimishi cuana pajea'yo ajja, cuijea'yo ajja pealai —Jesosaa acanaje.

Esohui huohui canaje ehueijijo, Jesosaa
(Macoso 10.1-12; Noca 16.18)

19 ¹Majoya esohui huohui majje Jesosa Janinea meshijo ani po'o quequinaje Jodea meshi yasijke, Jodana cuei ojje miji yasijke. ²Jomajo quea huiso dejja cuana onijke poquinaje. Ohuaya ojjaña jjaajaqui mee ca'yonaje, huaquia mee ca'yonaje. ³Paniseo cuana ca ca o que poeyanaje jjadasiaquia nisho. Jamaya jjashahuabaquinaje ba'a: —E'e pojja'a Jesosa Moisesija etehue'yo jayojja jama pojjeama mimije. Jamajjeya ecuaaya oya tecueaje.

Jamajjeya Jesosa huohui'ajja canaje cuaa jama ba'a: —Esohui huohuijji, ¿a'a acuae ehuanase huei cajji? ¿Yajjajo acuae ehuanase hueijea cajji so'o? ¿Achajja tehuemeya acuae oe Moisesiya aca poa?

⁴Saja'a canaje Jesosaa: —¿A'a miquea Moisesija etehue'yo ba jjima esohui? Yahuajo nei nei tehue ca poa Moisesiya jama ba'a:

“Yahuajo Eyacuiñajjiya pana coo ca poa yahue, epona pealai.

⁵Huohui ca poa ohuaya: —Jamajjeya yahueya oja chii, ojaya enaese pealai cajinayiya ca'yahua oja huanase nijje eba'ejji”.

⁶Oya cuana beca. Jamatii oe nei jayojja Eyacuiñajjiya oya ba cani, becanejjiji pealai pojjeama, oe nei jayojjaya. Cuanaya Eyacuiñajjiya oe jayojja aca poa. Jamajjeya ¡a'a oe jea meeji! ¡Jama tii tii oe nei oe acue! —Jesosaa acanaje.

⁷Huohui'ajja o'oya canaje Paniseo cuaa: —Jamajjeya ¿yajjajo acuae Moisesiya tehueme aca poa? Jama ba'a:

“Huei'yo majje yahueya ehueijeajji papeni etehue'yo caquia cahua oja huanase. Majoya cahuojea cahua”.

⁸Saja'a canaje Jesosaa: —Miquea etiiquiana quea mimishi nei jjejojoya Moisesiya huei mee'ajja canaje. Quijje nei Moisesiya jamaya tehue ca poa;

jamatii Eyacuiñajjiya jamaya pojjeama pana coo ca poa. ⁹Jamajjeya eyaya miya huohuaña e'e jojo nei ehuanase pea dejaja sii jjima huei ca ajja. Joya ehuanase hueiji epo pea epona ehuana'yociji quea mimishi nee, epona sijiji epo jama. Eyacuiñajjiya oya ba cani quea mimishi. Joya ma eponajo jjahuanaquia quea mimishi pea'ai poani; onaja ehuanase nijje poani —Jesosa poanaje.

¹⁰—¡De! Jamajojoya eseya jjahuanaqui ca ajja. Jamatii shacuima' nequi cajji ojjaña eseya cuana. —o shajja'ajjajji poanaje.

¹¹—Cho, ojjaña pojjeama shacuima' nequi cajji —Jesosa poanaje—. Beca cuana Eyacuiñajjiya huoojea caje'yo shacuima' tii enequiji. ¹²Beca cuana jjahuanaqui ajja, jamatii ejjhuanajuquiji pojjeama. (Jamaya joya quibojjisha nei, biñajjajjama' cuana pea'ai.) Beca cuana jjahuanaqui ajja jamatii yajjajje shai jjahuanaqui sa po'yo ajjajo. Beca cuana Eyacuiñajjiya esohui ehuohui aiquijji, ojo echaco neinei cajji Eyacuiñajjiya huoojea canaje jjahuanaqui jjima tii tii enequiji. Jamatii Eyacuiñajjiya ojjaña huoojea'yo ajja shacuima' tii enequiji. Jamajjeya jojaya ejjashahuubaqui'yojji mijo jamaya acue, miyaya! —Jesosa poanaje.

Esho'i quianajo Eyacuiñajji nijje miminaje Jesosa
(Macoso 10.13-16; Noca 18.15-17)

¹³Majoya Jesosa que esho'i nei cuana jjequi canaje cuaa. Huohui canaje: —Jesosa, qiquio esho'i nei sapa napa'ajja majje ¡Eyacuiñajji nijje mimicue ojaya ejaahuanajji! —poanaje.

Jesosa shajja'ajjajji cuaa oya cuana tecuea canaje: —¡A'a jja oe Jesosa que jjequi majajji esho'i quianao! ¡Esohui oe cahuohui cahua!

¹⁴Ma ba majje Jesosa poanaje: —¡Esho'i quianao e que capoe'yahua! ¡A'a quea huesha nequi meeji! E'e, esho'i quianao jjashahuabacuajiquiani; enije jjapeecuajiquiani. Jamaya ecuea epeejji esho'i jayojja eyaya jaahuanamee sa aña pea'ai. Jamajjeya e que poquije'yo, eya eyajo ojjaña huoojea'yojji poaje —poanaje.

¹⁵Jamajjeya esho'i cuana biajje eme' huana majje Jesosa poquinaje.

Edejja etii pishana quea aquiana huiso Jesosa nijje miminaje
(Macoso 10.17-31; Noca 18.18-30)

¹⁶Majoya oe dejja Jesosa que poeyanaje. Huohui'ajja canaje jama ba'a: —Emeshi Mese, ¿achajja po majje acuae mo eyahuasijje poqui ca'yojji Eyacuiñajji nijje eba'e tiitii'yojji? ¿Achajja acuae ba'e cajji quea pame nee epoji?

¹⁷—¿Apiojji miyaya eya huohui'ajjaña: “¿Ae quea pame nee epo'yojji?” Eyacuiñajji ca oe nei quea pame nee. Jamajjeya onijje ba'e tiitii'yo sa po majje ca oe jojaya shajja'ajjacue! ¡Ojaya esohui etehue'yo jayojja jama oe ba'ecue! —Jesosa poanaje.

¹⁸—¿Ache esohui etehue'yo? —huohui'ajja canaje.

¹⁹Jesosaa saja'a canaje: —Eyacuiñajjiya esohui etehue'yo jama poani ba'a:

“¡A'a pea quecuajji!

¡A'a sii pojji!

¡A'a siajje pojji!

¡A'a pea sijji!

¡Mique chii, mique nae pea'ai oe shajja'ajjacue!

¡Pea cuana mi pejjejo ba'e mique huapa pojjeama jayojja quea jea oe acue!”

20—E'e, eyaya jamaya aña, esho'yahuua jama tii tii sohuaqui eya.

¿Pea acuae yajja po cajji eyajo eba'e tiitii'yojji? —jiquio dejja Jesosa huohui'ajja canaje.

21—E'e, miya quea pame nee nee Eyacuiñajji jayojjaya po sa po majje ¡poquicue, miquea aquiana cuana quiaquicue ejjeshejji sosejje! ¡Ejjeshejji quia'yocue aema' cuana huasijje! ¡Majoya poecue, enijje epo'yojji! Jamajjeya eyajo Eyacuiñajjiya miya aquiana quea pame nee quea huiso quia caje'yo quijke.

22Jesosaja esohui shajja'ajja majje dejja etii pishana quea dejja tai jjejojo quea yeno poquinaje; ojaya aquiana quea huiso nee nee yani jojoya quia sa po'yo ajja.

23 Jamajjeya Jesosaa o shajja'ajjajji cuana huohui canaje: —E'e, dejja quea mimishiya jjejojoya aquiana quea huiso, meshi quea quemó pojja'a nahue canijo beshahua nei e que poqui ajja, eya eyajo ojjaña huoojea'yojji poaje'yo.

24—E'e, eyaya huohuaña pea'ai jama ba'a: Ahuoja quii huejjajje ino jeanobiaña jamaya, ¿a'a mapichi jeanobia cajji ahuoja quii huejjajje? Quea camaja coma. Jiquio ecua mapichi ahuoja quii huejjajje jeanobia cajji pome jamaya dejja quea aquiana huiso nee nee nahue cani eyahuasijje edobiquijji pojjeama.

25 O shajja'ajja majje jjashahuuba neinequinaje o shajja'ajjajji. Ojee mimimiminaje: —Jamajjeya ¿a'ya shai eyahuasijje dobiqui mee caje'yo?

26 Cojja ba neinei canaje Jesosaa. Huohui canaje: —Dejja jamaya amee ajja tii. Eyacuiñajjiya oe neiya ojjaña acani. (Eyahuasijje dobiqui mee cani pea'ai joya quea aquiana huiso nee) —Jesosa poanaje.

27 Jamajjeya Peno jjashahuabaquinaje ma dejja aquiana quea huiso nee nee jeana'yo sa po ajjajo. Huohui'ajja canaje: —Jesosa, ecuaaya ojjaña aquiana jeana'yonaje minijje epoqui'yojji. Jamajjeya ¿ae acuae ecuana quiaje so'o, de?

28 Jesosaa saja'a canaje: —E'e jojo nei quijke Eyacuiñajjiya ojjaña eyacua pana ca'yajo eya eyajo nequije'yo ojjaña huoojea'yojji nei. Miquianaya, 12, e shajja'ajjajji poani enijje nequije'yo, enijje ona huoojea'yojji poaje'yo. E'e, miquianaaya Jodio cuana, ecuea pea epeeiji cuana pea'ai huoojeaje'yo tii. 29 E'e nei beca cuana ecuea esohui jama a sa poanijo aquiana cuana jeana ca'yani: Ojaya equi, oja huapa pojjeama, oja chii, oja nae pojja'a, oja bacua cuana pojja'a, oja huanase pojja'a jeana ca'yani. Jamajjeya e'e jojo nei quijke Eyacuiñajjiya oya cuana quea huiso nee nee o jayojja quia caje'yo; quea bihui nee nee ba'e tiitii mee caje'yo pea'ai

eyajo onijje. ³⁰Jamatii beca cuana jjeya ona huoojeajji poani eyajo ona huoojea'yojji pojjeama poaje'yo. Joya jjeya ona huoojea'yojji pojjeama ca ca eyajo ona huoojea'yojji nei nei poaje'yo e jayojja —Jesosa poanaje.

Esohui ese jjashahuubaqui meeiji huohui canaje Jesosaa e'acuijjajja mesejo

20 ¹—E'e —Jesosa poanaje—, quijke eya oijaña huoojea'yojji poaje, oijaña sosequiaje'yo jjeya enijje chaco canaje sosejje. Jamaya poaje ba'a: Oe dejja, e'acuijjajja mese mecajjeahua poquinaje. Echacoji cuana iyaa canaje. Huohui'ajja canaje: ²“¿A'ya cuae jjeya poquije acuijjajja huojohua? Oijaña miya eyaya sosequiaje oe esodojjo quea sose huiso nee nee sosejje”. “E'e” poanaje, “chacoje ecuaaya oe esodojjo quea nahue nee sosejje”. Majoya huoojea canaje chacohua.

³—Quijke pishana eshequi jaasohua pishana majje ona ijjal'ijjal'ani yasijje poquinaje e'acuijjajja yiye mese. Beca dejja chacochaco jjima ani ba canaje. ⁴Huohui'ajja canaje: “¿A'a miyaya acuijjajja yiyejo chacoje pea'ai? Miya eyaya sosequiaje quea sose huiso pea'ai”. “E'e, chacoje” poanaje. Poquinaje chacohua.

⁵—Quijke eshequi biacojjajja nequijo, sinecua nei pea'ai oya poqui majamajanaje pea cuana iyaa echacoji. ⁶Eshequi ejjajeapaaquijo pea'ai poqui o'yanaje. Dejja cuana chacochaco jjima ani ba canaje. “¿Apiojji acuae mi chacochaco jjima ani?” acanaje e'acuijjajja meseya. ⁷“Chama oya ecuea echacomeejji aña, de; ajea esosequia'yojji” saja'aame acanaje cuua. “E'e. ¡Ecuea acuijjajja yiyejo chacoquicue pea'ai!” poanaje.

⁸—Meca nei e'acuijjajja meseya ona chacomjeeji huohui canaje: “¡Echacoji cuana iyaacue! ¡Sosequiacue! ¡Joya quijjeyejje nei dobiquinaje ebionei sosequiacue! ¡Joya ebionei dobiquinaje quijke yejje nei sosequiacue!”

⁹—Majoya echacomeejjiya joya eshequi ejjajeapaaquijo dobiqui cuana sosequia canaje oe esodojjo quea nahue. ¹⁰⁻¹¹Jamatii quijke joya mecajjeahua dobiqui cuana poeyanaje. Sosequia canaje oe esodojjo quea nahue pea'ai. Ba majje quea yeno poanaje, quea huiso nee nee esosequia caje poso. Jamatii oya sose huiosoajja pea'ai sosequia canaje. E'acuijjajja mese nijje quenequenenaje. ¹²Mimijajinaje jama ba'a: “Joya eshequi ejjajeapaaquijo poeyanajeya aje oe oe pojji chaco canaje. Ecuanaaya ca chaco neineinaje eshequi quea quiyojo. Jamatii miyaya oya sose huiosoajja pea'ai sosequianaje. ¿Apiojji acuae jja ecuana jayojja pea'ai sosequianaje so'o?” poanaje. ¹³“E'e epeeji cuana, eyaya miya sosequianaje quea pame nee” poanaje. “Mi poeyajo jama poanaje ba'a: —E'e, chacoje oe esodojjo quea nahue sosejje —poanaje. ¿A'a e'e? Jamajjeya eyaya jamaya miya quia meenaje. Jamajjeya ja'a quea quene pojji! ¹⁴Eyaya jiquio dejja quijjeyejje nei cuana oe esodojjo quea nahue nee quia sa poani mi jayojjaya. Jamaya quea pame. ¹⁵Mi jayojjaya quea huioso sosequianaje. ¡A'a jja oe miya quea quene pojji! Beijo ecuea jojoya eyaya quia sa amajje eyaya quiaña” e'acuijjajja mese poanaje —Jesosa poanaje.

¹⁶—E'e, e'acuijjajja meseya oijaña sosequia canaje ojaya ejjashahuubaqui'yojji jayojja jama. Jamaya Eyacuiñajjiya acaje'yo. Joya

quijje nei jjapeequijke'yo quea bihui nee ba'e tiitii mee caje'yo eyajo onijje pe'a'i. Ojjaña ojaya ejjashahuabaquijji jayojjaya jama sosequia caje'yo pe'a'i. Eyacuiñajjiya quea huiso iyaa caje onijje eba'e tiitii'yojji. Jamatii oe pojji babaca caje'yo oja epeejji huoojea'yojji epojji —Jesosa poanaje.

—Quijje eya manoje'yo —Jesosa po o'oyanaje
(Macoso 10.32-34; Noca 18.31-34)

¹⁷Majoya Jenosanena huasijke poquinaje. Jesosaa o shajja'ajjajji cuana dojo canaje ejiojji sahua huasijke esohui huohujji: ¹⁸—¡Bacue oe! Eya jiquio ojjaña Edoe Mese. Eseya Jenosanena huasijke poquije. Jomajo mo iña meesahuaje eya Jodio cuanaja equecua mee'yojji. E'e, Moisesija etehue'yo huohujjiya, Eyacuiñajji nijje emimijji etii cuaa pealai eya iña mee caje. Taaa neineije cuana: “¡Oya quecuajeacue!” poaje. ¹⁹Jodio pojjeama cuana huasijke mo huoojea caje. Ejo soa neineije cuana; cuia caje'yo mo cuaa huaca jee ejeapashajjajaa; acui ecueata'apeejo me cacajea majje mo ba'ehuanasohuajea caje cuaa emanoyojji. Jamatii mo beca cahuime po majje Eyacuiñajjiya shequi mee caje'yo —Jesosaa huohui canaje.

Semeneoja ehuanase Jesosa nijje miminaje oja bacua ejjajo
(Macoso 10.35-45)

²⁰Majoya Jacobo, Huani pea'ai enaese nijje Jesosa que poeyanaje. Ecui'oshajjajo nequiñanaje onijje emimijji.

²¹—She, ¿ajeo ami poeyanaje? —Jesosa poanaje.

—Jesosa, ecuea ebacua ejja cuana mi pejjejo canequi'yahua quijje miya ojjaña huoojea'yojji poaje. Oe shani mijijje, pea ebianei mijijje canequi'yahua minijje, ona huoojea'yojji. ¡Jamaya oe acue! —poanaje enaese.

²²—Chojja. Miquianajaya ba jjima —Jesosaa oya cuana acanaje—. Eya quea nee nee po mee caje'yo cuaa. ¿A'a miquianaya e jayojja quea nee nee poajo quea ca'a poaje? Eya quecuia caje'yo pealai cuaa. Enijje jjapeequianijo miquiana quecuia caje'yo pealai pojja'a cuaa. ¿A'a jamatii miquianaya quea ca'a poaje?

—E'e —saja'a canaje Jacobohua, Huaniya pea'ai—. Quea ca'a poaje mi jayojja onaa quea nee nee po mee ca'yajje. ¡Jamaya capoahua, jamatii caquecua cahua cuaa mo!

²³—E'e —poanaje Jesosa—, jamajjeya e'e jojo nei miquiana e jayojja quea nee nee po mee caje'yo cuaa; e jayojja quea ca'a nee nee poaje, onaa mano mee ca'yajje. Jamatii, e pejjejo eyajo eyaya miya enequi mee'yojji pojjeama enijje ona huoojea'yojji. Chojja, ecue Chiiya eyajo aniya yahuajo nei pea cuana babaca ca'yonaje. Ohuaye nei nequi mee caje'yo e pejjejo quijje, eya ojjaña huoojea'yojji poajo —Jesosa poanaje.

²⁴Jesosa pejjejo nequi sa pea'ai poanijo onijje ona huoojea'yojji epojji, Jacobo, Huani nijje pea'ai quea quene poanaje pea shajja'ajjajji cuana, ome mijijje pea'ai.

25 Jamajoya aje oe Jesosaa oya cuana iyaa canaje. Jama huohuime acanaje ba'a:
 —¡A'a onijje quea quene pojji! Miquea eba dejja cuana, Eyacuiñajjija epeejji
 pojjeama. Onajaya emeshi mese cuaa, ona huoojeajji cuanaa pealaiya pea cuana
 huoojea neinei cani; quea quene nee nee poani, quea mase. 26 Jamaya pojjeama
 miquianaya poaje, ecuea epeejji cuana. ¡E jayojjaya po sa poanijo pea cuana
 ba'e meesahuacue! 27 Joya ona huoojea'yojji po sa poani ca ca echacojji sosema'
 jayojja capoahua. 28 E'e, je jayojja jama pocue! Eya ca ca iña ojjañaja Edoe
 Mese poeyanaje ojjaña cuana ba'e meesahuua; ojjañaja eya eba'e meesahuajji
 pojjeama. Ojjañaja mimishi sosequia'yojji mo manoje'yo, ojjaña cuaquí yasijje
 epoqui'yo poani jjejojoya —Jesosa poanaje.

Cojjama' cuana quea cojja ja'a po mee ca'yonaje Jesosaa

(*Macoso 10.46-52; Noca 18.35-43*)

29 Jenosanena huasijje poquije Jesosa dobiquinananae Jenico huasijje.
 Majoya dobinana majje poquinaje Jenosanena huasijje. Quea huiso nee nee
 cuana onijje poquinaje. 30 Becanejjiji pealai cojjama' ejiojji sahuajo e'anioque
 ani. Jesosa shajja'ajja canaje poeje. Taaa neineinaje cuana: —Jesosa, miya
 emeshi mese Dabija osecua. ¡Ejo jjashahuabaquicue quea yeno! —taaanaje.

31 —¡A'a oe taaa majaji! ¡Esohui oe ca'acue! —acanaje cuaa.

Jamatii taaa neineinaje cojjama' cuana: —Jesosa, Dabija osecua, jeo
 jjashahuabaquicue!

32 Jamajjeya o shajja'ajja majje Jesosa nequiñaquinaje. Cojjama' cuana
 iyaa canaje: —E'e, ipoecue! ¿A'ya so'o? —poanaje.

33 —Emeshi Mese, ¡miyaya iña jjacojjapojaqui mee'yocue! —poanaje.

34 Jamajjeya Jesosa cojjama' cuanajo jjashahuabaquinaje. Cojja napa
 canaje. Cojja napa cajje ecojja jjabapojaqui'yonaje. Quea bihui nee nee
 po'yonaje jjacojjaja'aqui mee ca'yajje. Jamajjeya Jesosa nijje poquinaje.

Jenosanenajo Jesosa nequiñaquinaje

(*Macoso 11.1-11; Noca 19.28-40; Huani 12.12-19*)

21

¹ Majoya Jesosa Mepajejo nequiñaquinananae Jenosanena
 pejjejo, acui tiil'ajja yiyejo, Onimo bajjani eyiyo pejjejo pealai.

Nequiñaquinana majje o shajja'ajjaji becanejjiji pealai huoojea canaje Jesosaa.
² Jama poanaje ba'a: —¡Poquicue Mepaje yasijje! ¡Dobiqui majje mapichi sisi,
 ebacua sho'i ai nijje ejeyo nequia nequi bañaquicue! ¡Ba majje, picho majje
 yecue e que! ³ Onaa: “¿Apiojji acuaeya ecua mapichi sisi pichojeaña so'o?”
 acajje, “Ecuea Emeshi Mese sa poani” sajalame acue. Jamajjeya: “Ee, ocue
 dojo'ajja joya mapichi” acaje dejja Mepajejo ba'eya —Jesosa poanaje.

⁴ E'e, jamaya acanaje Jesosaa, Eyacuiñajjija esohui huohuijji yahuajo
 nei nei ojo tehue ca poa jama ba'a:

⁵ “Ojjaña Jenosanenajo ba'e huohuicue jama ba'a: —¡Bacue oe! Mi huoojea'yojji nei poeyani; oya quea bei nee. Jamajjeya mapichi sisija daasa biajje poeyani, mapichi sisija ebacuaja daasa biajje”.

Jamaya yahuajo nei nei Jesosajo tehue ca poa Eyacuiñajjija esohui huohuijjiya.

⁶ Jamajjeya Jesosaa huoojea cajje o shajja'ajjajji poquinaje. ⁷ Mapichi sisi bacuajji dojo canaje. Daqui ao cuana mapichi sisija bacuaja daasa' biajje iya canaje. Jesosa anisohuaquinaje mapichija bacua sho'i aija daasa' biajje.

⁸ Ojjaña cuana ejjachichaqui nequi canaje, quea huiso nee nee. Ojaya daqui ao cuana ejiojjijo jeapiihui canaje Jesosa ja'ajjequijji. Pea cuaa acui iña jajasejja canaje. Huana yiyoysi canaje ejiojjijo. Jama yahuajo nei Jodio cuaa emeshi mese cuana ja'ajjequi caninaje cuiñajji yasijje, jama ja'ajjequimeya acaninaje ohua ba cahuajje. ⁹ Ojjaña ehui dojoriji poquije, Jesosa quishishijji poquije pea'ai taaaaca poquinaje quea bihui nee nee: —E'e Jesosa, emeshi mese Dabi yahuajo ba'e miquea etiiquiana. Mi poeyajo ecuana quea bihui nee nee. Quea pame nee nee miya, Jesosa. ¡Eyacuiñajjija eyajo aniya miya cajaahuana cahua! ¡Eyacuiñajjija cabihuia cahua, ojjaña!

¹⁰ Jamajjeya Jesosa Jenosanena huasijje dobiquianijo, ojjaña cuana jomajo ba'e cuajicuajijebenaje jjachichaquiya, ojjaña. Huohui'ajja canaje: —¿A'ya shai poeje? —poanaje.

¹¹ —Jesosa poeje, Eyacuiñajjija esohui huohuijji nei, ma Nasanenajo ba'enaje —saja'ame acanaje cuaa.

**Aquiana quiajji poani Eyacuiñajjija equijo nequi cuana
huoojeacuayajea canaje Jesosaa**

(Macoso 11.15-19; Noca 19.45-48; Huani 2.13-22)

¹² Quijje pishana Jesosa ojjaña cuana nijje Eyacuiñajjija equi yasijje poqui o'yanaje. Dobiquinaje. Aquiana quiajji poani Eyacuiñajjija equijo nequi cuana huoojeacuayajea canaje Jesosaa, aquiana jjeshe poequi pea'ai. Aquiana cuana jjahuojjojeajeaqui canaje; beijo, pea beijo sosejje quia cani cuanaja beijo nequijji cuana jeapajjajea canaje; huia' quiajji pea'aija huia' nequijji cuana jeabichajea canaje: ¹³—¡A'a jja oe Eyacuiñajjija equijo aquiana quiajji! —tecueame acanaje Jesosaa—. Eyacuiñajjija esohui jama poani ba'a: “Ecuea equi ojjaña cuana enijje emimijji”. Miquianaaya ca ca siipojji nequijji jayojja amee aña Eyacuiñajjija equi.

¹⁴ Majo tii aniya cojjama' cuana, jeo'ajja cuana pea'ai Jesosa que poeyanaje. Ojjaña cuana Jesosaa quea pame nee po mee ca'yonaje.

¹⁵ Jesosaja jjaajaqui mee'yo cuana quea pame nee ba canaje; esho'iquiana majo tii ani sohuicuayanaje shajja'ajja canaje pea'ai. Jamatii Jodio etii cuana aje oe Jesosa nijje quea quene poanaje. Jesosa Eyacuiñajjija Bacua Ejja pojjeama poso tecuea canaje Moisesija etehue'yo huohuijji poaniya, Eyacuiñajji nijje emimijji etii cuaa. Jama poanaje ba'a: ¹⁶—¿Apiojji acuae jiquio esho'iquiana sohuicuaya meeña mi bihuijji? ¿A'a shajja'ajja jjima?

—E'e, shajja'ajjaña —Jesosa poanaje—. ¿A'a miquea ba jjima Eyacuiñajjiya esohui etehue'yo ejo? Jama poani ba'a:

“Joya esho'i ai'ai, esho'i jjonajjona ai pea'ai quea pame nee esohui cuaya mee'yoji mi bihuia'yoji”.

Jamaya Eyacuiñajjiya esohui yahuajo nei ejo etehue'yo poani —Jesosa poanaje.

¹⁷ Mimi majje Jesosa poquinaje. Jea cana'yonaje. Jenosanenajo ani poquinaje Betania huasijje cahuiya.

Acui etona jjajja jayojja, iquena bajjani sajjai mee ca'yonaje Jesosaa
(Macoso 11.12-14, 20-26)

¹⁸ Mecajjeahua Jenosanena huasijje poe o'oyanaje; quea shoe poanaje Jesosa. ¹⁹ Ba canaje ejiojji sahuajo nequi acui etona jjajja jayojja.

Acuijjajja ba'ajjaqui canaje. Chama' poanaje ejjajja. Eña oo pana nequi'yo. Jamajjeya oya Jesosaa huohui canaje: —¡Jamajjeya jjajjama' tii capo'yahua acui! —Jesosaa jama acajje jjeya nei sajjainana'yonaje acui.

²⁰ Quijje pishana acui esajjai'yo ba majje o shajja'ajjaggi cuana jjajjaso aquinaje: —¡De! ¡Jjeya nei ca ca sajjai'yonaje! —poanaje.

²¹⁻²² —E'e —Jesosa poanaje—. ¡Miya Eyacuiñajjiyo quea ja'a nee jjashahuabaquicue! A'a jjashahuabaquijji jama ba'a: “E'e pojja'a Eyacuiñajjiya eya shajja'ajja'yo jjima”. Cho, jama jjashahuabaquicue ba'a: “Eyacuiñajjiya e'e jojo nei nei eya saja'a caje'yo”. Jamaya miya jjashahuabaquiajo, Eyacuiñajjiya miquea esohui saja'a caje. E'e, Eyacuiñajjiya e jayojja jama ameesahua caje'yo pea'ai, ma dejja ajjima acani.

¿Aya acuae Jesosa huoojea canaje esohui huohuiya?
(Macoso 11.27-33; Noca 20.1-8)

²³ Majoya Jesosa Eyacuiñajjiya equi yasijje dobiqui o'oyanaje. Esohui huohui canijo, Jodio etii cuana, Eyacuiñajji nijje emimiji etii cuana pea'ai o que poeyanaje. Jesosa ojaya ba jjimajo huohui'ajja canaje: —¿Aya acuae mi huoojea canaje? ¿Apiojji acuaeaya esohui huohuaña so'o? ¿Apiojji acuaeaya aquiana quiajji poani huoojeacuayajeanaje oma mecajje? —acanaje Jodio etii cuaa.

²⁴⁻²⁵ Jesosaa oya cuana saja'a canaje: —E'e, eyaya miya ebionei huohui'ajjaje. ¿Aya Huani huoojea canaje ona besa meeya? ¿A'a Eyacuiñajjiya? ¿A'a dejja cuaa pojja'a? ¡Huohuicue mo! Eyaya majoya huohujie e huoojea'yojji epo.

²⁶ Shajja'ajja majje Jodio cuana ojee mimimiminaje: —¿Yajja saja'ame shai eseya aje so'o, de? Quea mete ojjaña dejja cuanajo. Ojjaña ba cani Huani Eyacuiñajjiya huoojea canaje esohui huohuiya. Jamajjeya: “Dejja Huani huoojea canaje” eseya aje se jajahuejjajea ca chana' meiya. “Eyacuiñajjiya Huani huoojea canaje” eseya aje se oe jama acaje ba'a: “Jamajje, ¿apiojji miyaya Huani shajja'ajja jjima aña?” Jesosaa acaje.

²⁷ Jamajjeya jjashahuabaqui majje Jesosa huohui canaje Jodio cuaa: —Cua'a, de. Ecuanaja ba jjima —anisho canaje.

—Jamajjeya ecuea miya ehuohuijji pojjeama e huoojea'yoiji epo
—Jesosaa acanaje Jodio esohui huohuijji cuana, etii cuana pea'ai.

Esohui ejjashahuabaqui meeiji beca ebacua ejjajo

28 Jesosaa oya Jodio cuana huohui canaje pea'ai jama ba'a:

—Shajja'ajjacie oe ecue sohui ejjashahuabaqui meeiji jama ba'a: Oe dejaja becanejjiji pe'a'i ebacua ejja yaninaje, shacuima' nequi cuana. Ejeajjiya oja bacua ejja etii huohui canaje: “Cha, ¡che oe ejjeya que chacoquicue!”

29 “Cho, cajaa. Mijo chaco sa po'yo ajja ca iña” poanaje. Jamatii, jjashahuabaqui majje “Cachacoquiahua” poanaje. Poquinaje que yasijje.

30 —Ejeajjiya oja pea ebacua ejja, echahua mese huohui canaje pea'ai: “Cha, ¡che oe que chacoquicue ejjeya!” poanaje. “E'e ecue Chii, jaaya chacoquije aje ca eya” poanaje. Jamatii poqui jjima poanaje, de.

31 —Jamajjeya ¿ache esho'i oja chiija ehuohui jama poanaje? ¿Achajja acuae miña jjashahuabaquian?

—E'o'i mese —acanaje cuaa.

—E'e —Jesosa poanaje—. Eyaya miya e'e nei huohuiaña jama ba'a: Jiquio ecua e'o'i mese jjashahuabaqui majje oja chiija huohui canaje jayojja jama acanaje jama jayojja dejja mimishi cuana, epona pea cojcojji poani pea'ai. Eyacuiñajji nijje jjapeecuajquiani oja ejaaahuanajji. Miquiana ca mi ca oe, cho. Eyacuiñajji nijje jjapeequi jjima. 32 E'e, Huani, ma ona besameejji poa yahuajo nei poeysa poa miquiana ba meesahuaa. Huohui ca poa jama ba'a: “¡Miquea mimishijo quea yeno pocue! ¡Mimishi cuana pajeayocue Eyacuiñajji esohui jama eba'ejji, onijje ejjapeequijji!” Huani poa. Miquianaya aje oe Huani shajja'ajja sa po ajja poanaje. Dejja mimishi cuana, epona quea mimishi cuanaya ca ca shajja'ajja majje: “E'e, ¡Eyacuiñajji nijje ejjapeequi, mimishi cuana ejjapajeaki'yo!” poanaje. Ma ba majje jamatii miquianaya jjashahuabaqui jjima, Eyacuiñajji esohui jama a sa po ajja tii poanaje —Jesosaa acanaje Jodio etii cuana.

Pea esohui ejjashahuabaqui meeiji jjonojjajja yiyejo

(Macoso 12.1-12; Noca 20.9-19)

33 —¡Jiquio shajja'ajjacie pea esohui ejjashahuabaqui meeiji! —Jesosa poanaje—. Oe dejja emeshi meseya que quea quemó nee neejo bana canaje jjonojjajja oo pana, uva. Que peeyi canaje meija peeyi. Majoya que yiyesamajo equishipashajji iya canaje, mei cueehue iñaca canaje jjonojjajja na quishipashajjeajji. Majoya mei iyasohua ao'ao majje peehuana canaje que jaahuanajji quea huesha nee ojaya ebajji. Pea echacojji cuana iyaa canaje. Huohui canaje emeshi meseya: “¡Ecuea que jaahuanacue! Jaahuanacue sosejje quiaje'yo oya jjonojjajja quea huiro nee” poanaje. Majoya emeshi mese quea huesha poquinaje. 34 Quijje jjonojjajja jahuajo emeshi meseya pea o chacosahuajji poani beca huoojea canaje que jaahuanajji que, jjonojjajja

jjequiya. Que jaahuanajji bañaqui majje huohui canaje jama ba'a: "¡Che mo jjonojjajja joya ecuea emeshi meseya pa cadojo'yahua, de!" poanaje.

³⁵—Que jaahuanajji cuana quea mimishi poanaje. Jjonojjajja quia sa po aija, joya emeshi meseja iya tepe mee. Jamajjeya o chacosahuajji cuana iña canaje, cuiajea canaje, pea quecuia canaje, pea jajahuejjajea canaje meiya.

³⁶Emeshi meseya pea huoojea ca o'oyanaje huacuaya o chacosahuajji poani quea huiso pishana. Jamatii yahuajo jama acanaje que jaahuanajji cuaa. Cuiajea ca o'oyanaje pea'ai. ³⁷Quijje yejje nei oja bacua ejja oe nei huoojea canaje que jaahuanajji baa: "E'e, ohuaya ecuea ebacua ejja shajja'ajja caje" poanaje emeshi mese. ³⁸Cho, oja bacua ejja poeje ba majje jama poanaje ba'a: "Joya emeshi meseja bacua ejja poeje. Jiquio meshi quijje ojaya poaje, ejeajji mano'yajo. ¡Cua'a, ejjaquecuajequi oya eque mesena'yojji! Jamajjeya meshi esejaya tii poaje'yo, de" poanaje que jaahuanajji quea mimishi cuana.

³⁹—Jamajjeya aje oe ebacua ejja iña canaje, quecuajea canaje, jeaqui canaje quea huesha nee, que jaahuanajji cuaa. Mahuiso esohui.

⁴⁰—Jamajjeya emeshi meseya poe o'oya majje ¿yajja acuae acaje'yo jiquio que jaahuanajji quea mimishi cuana? —Jesosaa huohui'ajja canaje Jodio cuana.

⁴¹—Oya quea quene nee nee poaje'yo. Ma que jaahuanajji quea mimishi cuana quecuajea caje'yo, de. Que cuiña meequi caje'yo pea cuana, joya ojjaña jjonojjajja shejo jjasosequiaquijji cuana —acanaje Jodio cuaa.

⁴²—E'e —Jesosa poanaje—. ¿A'a miquea eba Eyacuiñajjiya esohui etehue'yo yahuajo nei? jama ba'a:

"Oe equi yamajjana equi iyajji cajaa aca poa cuaa. Jamatii

Eyacuiñajjiya ma eyamajjana equi yamajjana quea ca'a nee nequi mee ca poa. Jamajoya ojjaña ojaya epeejji cuanaa Eyacuiñajji bihuia cani".

Jamaya yahuajo nei tehue ca poa ejo; eya ma eyamajjana equi iyajji jayojja jama quea ca'a nee nequi —Jesosaa acanaje.

⁴³—E'e, jiquio esohui eba meesahuajji jayojja jama Eyacuiñajjiya acaje'yo —Jesosa poanaje—. Ohuaya yahuajo nei miquianaya babaca ca'ya poa ojo echaco'yoji, onijje eba'e tiitii'yoji. Jjeya ca ca Eyacuiñajjiya miquianaya, Jodio cuana, cajaa acaje'yo shajjama' jojoya. Pea cuana babaca caje'yo ojo echacoji, onijje eba'e tiitii'yoji pealai, joya e'e jojo nei ojo jjashahuabauquiani.

⁴⁴—Jiquio ecua eyamajjana cajaa aca poa cuua jjeya quea ca'a nee nequi jama eya miquianaaya cajaaya anaje; jjeya ca ca iña quea ca'a nee eya nequi'yo. Ojjaña joya e ba jjima e cajaa amajje quea yeno poaje, de. E cajaa tiitii amajje ca ca quea nee nee po tiitije'yo —Jesosa poanaje.

⁴⁵Jesosaja esohui shajja'ajja majje Moisesija etehue'yo huohuijji cuana, Eyacuiñajji nijje emimiji etii cuana pea'ai quea quene nee poanaje: —¡De! Ecuanajo oya mimiani, equi yamajjanajo pojjeama. Eseya que jaahuanajji quea mimishi jayojja pea'ai ohuaya acani —poanaje Jodio cuana.

⁴⁶ Jamajjeya Jesosa iña sa acanaje ejeanobiajeajji. Jamatii iña jjima; quea mete poanaje. Ojjaña dejja echicha'yo nequica'yo cuaa Jesosa Eyacuiñajjija esohui huohuijjii nei nei ba cani. Onajaya quea nahue nee nee Jesosa e'iñajji.

**Ebacua ejjaja ejjahuanaquijjijo ojjaña ijjia mee'ajja ca poa ejejjiya
(Noca 14.15-24)**

22 ¹Jamajjeya Jesosaa o poe o'oyajjijo pea esohui ejjashahuabaquijji

huohui canaje Jodio cuana huasijke jama ba'a: ²—Eyacuiñajjija ojjaña cuana huoojea'yojji poajo jamaya poaje: Oe emeshi meseya oja bacua ejjaja ejjahuanaquijjijo bobi quea huiso dahuia mee canaje ojaya epeejjiya e'ijjiajji nisho. ³Ojjaña apoa poajo, o chacosahuajji huoojea canaje epeejji cuana iyaaa, bobi ijjiajji. Cho, poe sa po ajja poanaje.

⁴Jamajjeya emeshi meseya pea chacosahuajji cuana huoojea canaje.

“¡Jamaya acue!” poanaje: “Epeejji, ¡poecuajicue oe! Ojjaña apoa. Ana'ai quea sei quecua meenaje. Bobi cuana apoa, ojjaña. ¡Poecue ecue ebacua ejjaja ejjahuanaquijjijo queabihui nee epojji! acue” emeshi mese poanaje.

⁵—Jamatii jjashajja'ajjaqui ajja poanaje cuana. Poe ajja. Beca cuana que yasijke poquinaje; peaa aquiana quiaa poquinaje; ⁶pea cuaa emeshi meseja echacosahuajji iña majje cuia canaje, quecua ca'yonaje. ⁷Ma shajja'ajja majje emeshi mese quea quene poanaje. Sohuinano cuana huoojea canaje dejja shajjama' iñaa. Quecuajeyo ca'yonaje; equi cuana dahuajea canaje, sohuinano cuaa. ⁸Majoya emeshi meseya o chacosahuajji iyaa canaje pea cuana: “Ojjaña apoa e'ijjiajji ejjahuanaquijjijo. Pea cuana epeejji nisho poanaje, jamajjeya epoejji pojjeama. Cajaa. ⁹¡Poquicue! Quea huesha ba'e cuana iyaaquicue: —¡Poecue emeshi meseja bacua ejjaja ejjahuanaquijji yasijke! ¡Bobi quea huiso ijjiahuate! —acue” emeshi mese poanaje.

¹⁰—Jamajjeya poquinaje. Ojjaña cuana iyaa canaje; dejja quea pame, dejja quea mimishi cuanaya. Quea huiso poeyanaje. Dobiquinaje. Equi cuio canaje. Chama' pea e'anijji poanaje. ¹¹Majoya emeshi meseya ojjaña cuana baa poeyanaje, ojjaña cuana nijje mimiya. Ba canaje oe dejja daqui jehuejji.

¹²“Epeejji, ¡apiojji acuae miya poeyanaje daqui quea jehuejji? ¡Jamaya pojjeama ecue bacua ejjaja ejjahuanaquijji yasijke epoejji!” poanaje. Saja'a jjima ma dejjaja.

¹³Jamajjeya emeshi mese quea tecue poanaje. Iyaa canaje o chacosahuajji: “¡Oyajeyo majje jeaquicue quea misi nee yasijke! Jomajo pa neineije'yo, ese! ijjiayajiea caje'yo quea nee neejo” poanaje. Mahuiso ecuea esohui —Jesosa poanaje.

¹⁴—E'e, ojjaña cuana iyaal'ajja caje Eyacuiñajjija. Jamatii oe pojji dobiquije'yo onijje eba'e tiitii'yojji —Jesosaa ojjaña cuana acanaje. (E'e, Eyacuiñajjija Jodio cuana iyaa coo canaje onijje eba'e'yojji quea bihui nee. Jamatii shajjama' poanaje. Ojaya huoojea'yo quecuajea canaje. Jamajjeya Eyacuiñajjija Jodio pojjeama iyaa canaje. Quea huiso poeyanaje. Ma dejja daqui jehue jayojja jama beca cuanaja mimishi cuijea'yo jjima. Jamajoya jeacuayajea caje'yo quea nee nee epo'yojji.)

Bejjo oe pojji quia cajji ba'e sosejje emeshi meseja yajji
(Macoso 12.13-17; Noca 20.20-26)

15 Jesosa mimije shajja'ajja majje Paniseo cuana quea quene poanaje:
 —Oya Jesosa jjashahuabaquiani eseya epeejji nisho jayojja jama, de
 —poanaje.

Poqui majje ojee mimimiminaje: —Cua'a, Jesosa ejjadasiaquiqui; esohui
 quea camaja nee ejjahuohui'ajjaquiqui, ojaya yajja saja'ame ya'yoji. Jamajjeya
 Moisesija etehue'yo jayojja jama mi saja'a cajo, cacuajea meequi'yahua.

16 Jamajjeya Paniseo cuaa o shajja'ajjaji cuana, joya Enodeja esohui quea
 boti nee poani pea'ai huoojea canaje Jesosa que. Huohui'ajja mee canaje
 jama ba'a: —Esohui huohuijji, miyaya e'e jojo nei huohuiaña Eyacuiñajji
 ejjashahuubaqui'yoji jama. Miya etii cuanajo jjashahuabaqui ajja; emeshi
 mese cuanajo pea'ai mete'ama. Jamajjeya quea ja'a nee huohuiaña. **17** E'e.
 Jamajjeya mo oe che huohuicue: ¿A'a bejjo quia cajji Shomano meshi mese
 Sesa bajjanija yajji? ¿A'a equiajji pojjeama esejaya pojja'a? ¿A'a cuae jja ma
 Sesaja meshijo ba'e sosejje quia cajji so'o? —acanaje cuaa.

18 Ma Jodio cuanaja ejjashahuabaquijji Jesosaja eba poanaje. Jamajjeya:
 —¡Miquianaya ca mi ca oe e dasiajji nisho cuana, epeejji nisho quea tai
 nee nee! ¿Apiojji nequiaa eya dasia sa aña? **19** ¡Bejjo mo huohui'ajjacue
 esodojjo! —poanaje.

20 Jjequi canaje cuaa. Esodojjo ba majje huohui'ajja canaje Jesosaa:
 —¿Ae ecajja'yo jiquio? ¿Ae bajjani tehueme'ya?

21 Emeshi mese ecajja'yo, Sesa bajjani —acanaje Jodio cuaa.

—E'e —poanaje Jesosa—. Jamajjeya ¡Sesaja bejjo quiaquicue ohua sa
 cajo! ¡Eyacuiñajji a'a pajeal'yojji; oya bihuiacue, shajja'ajjacue pea'ai!

22 Jesosa shajja'ajja majje ojjaña cuana quea mete nee poanaje: —¡Quea
 jjashahuabaqui ja'a nee nee oya Jesosa! ¡Jjadasia meequi ajja!
 Jamajjeya poquinaje, jeana ca'yonaje Paniseo cuaa.

**¿A'a e'e jojo nei mano'yo majje shequiye o'oya quijje? —huohui'ajja
 canaje cuaa Jesosa**
(Macoso 12.18-27; Noca 20.27-40)

23 Ma pojjo tii beca Sanoseo cuana poeyanaje Jesosa huohui'ajja. Sanoseo cuana aje oe jama poani ba'a: —Mano'yo majje jama tii tii;
 eshequi o'oyajji pojjeama quijje.

Jesosaja ca ca jama sohuihuohuime ajjima. Jamajjeya Jesosa huohui'ajja
 canaje Sanoseo cuaa; edasiajji nisho jama acanaje ba'a: **24** —Esohui huohuijji,
 Moisesiya jama tehue ca poa yahuajo nei nei ba'a: “Dejja ejjahuanaqui, bacuama'
 mano'yajo, oja chahuua ehuanase equijjojea ani cahuana ca'yahua, oja o'ija
 bacua jea jayojja jama epoji”. ¿A'a e'e? **25** Jamajjeya jama poso ba'a: Quea huiso
 edoe mese, me oeje pea beca nequiaa poa. E'o'i mese ebionei jjahuanaquia

poa eponajo. Mano'yonaje bacuama' tii. Oja chahuua epona equijjojea ani huana ca o'oyanaje, bacuama' tii ani. ²⁶Oya jayojja mano'yonaje bacuama' tii. Jamajjeya peaa echahua meseya huana ca o'oyanaje. Mano'yonaje bacuama' pea'ai. Jamaya ojjaña manojeyo'yonaje. ²⁷Quijje ehuanase pea'ai mano'yonaje. ²⁸Jamajjeya shequi o'oya majje eyajo, ¿ajea ehuanase epona poaje,ache edoe meseja? Ojjaña echahua cuana hueal'ajja'yo epo —Sanoseo cuaa acanaje.

²⁹Jesosaa saja'a canaje jama ba'a: —Chojja. Jamaya pojjeama. Miquea ba jjima Eyacuiñajjiya esohui; oya quea ca'a nee nee miquea ba jjima pea'ai. ³⁰E'e, shequi o'oya majje ejjahuanaqui'yojji pojjeama. Esohuidojiji eyajo ani jama poaje. ³¹Cuanaya ¿a'a miquea ba jjima dejja cuana ojjaña mano'yo majje shequije o'oya? Jamajjeya Eyacuiñajjiya yahuajo nei esohui tehue mee ca poa miquiana jjabahuejjaquijji. Jamaya poa ba'a: ³²“Eya ca ca iña Amajama jaahuanajji, Isaaca, Jacobo pea'ai jaahuanajji”. ¿A'a Eyacuiñajjiya emano'yo cuana meshijo e'ohuajea jaa jaahuanana cani? Cho. Ojaya epeejji cuana eshe nequi, mano'yo majje shequi'yo pea'ai jaahuanana cani Eyacuiñajjiya —Jesosaa acanaje.

³³Jesosaja esohuijo ojjaña cuana quea bihuui nee poanaje: —¡Quea pame nee ohuaya Jesosaa huohui cani! —poanaje cuana.

¡Eyacuiñajji quea jea nee acue, mi pejjejo nequi cuana pea'ai!
(Macoso 12.28-34)

³⁴Majoya Paniseo cuaa shajja'ajja canaje Jesosa quea jjashahuubaqui ja'a nee; Sanoseo cuana jjadasia meequi ajja. Jamajjeya jjachichaqui majje ojee jjashahuubaqui o'oyanaje Jesosa dasiaquijji, esohui quea camaja nee ehuohui'ajjaquijji. ³⁵Majoya Jesosa que poe o'oyanaje Paniseo cuana. Dasia'yohua nisho Moisesija etehue'yo huohuijjiya huohui'ajja canaje jama ba'a: ³⁶—Esohui huohuijji, yahuajo Moisesiya tehue ca poa Eyacuiñajjiya esohui. ¿Ache esohui quea pame nee nee e'ajji?

³⁷Jesosaa acanaje: —E'e, jamaya quea pame nee acue ba'a:
“¡Eyacuiñajji miquea Emeshi Mese nei quea jea nee nee acue! Miquea huapa pojjeama cuana miquea quea jea; ¡quea jea nee neyya oe acue Eyacuiñajji! Jamajjeya jojo jjashahuaba titiiquicue!”
³⁸⁻³⁹Jiquio ehuohui'yo quea pame nee. Pea oya jayojja quea pame nee jama ba'a:
“¡Ojjaña pea cuana quea jea nee acue, miquea huapa pojjeama jama quea jea neyya oe acuel!”
⁴⁰Jamaya miya poajo miya Moisesija etehue'yo jama ba'e; Eyacuiñajjiya esohui huohuijji yahuajo nei ba'eja esohui jama ba'e pea'ai —Jesosa poanaje.

Eyacuiñajjiya huoojea'yo dejja jaahuanajji Quito
(Macoso 12.35-37; Noca 20.41-44)

⁴¹Jamajjeya ojjaña Paniseo cuana jjachichaquiajo oya cuana huohui'ajja canaje Jesosaa: ⁴²—¿Yajja huohuime acuae nequiaa aña Eyacuiñajjiya huoojea'yo dejja jaahuanajjiyo Quitojo? ¿Ache etiiquianaja osecua oya?

—Quito emeshi mese Dabija osecua, ma yahuajo ba'ya poaja —acanaje Paniseo cuaa.

⁴³—Jamajjeya ¿yajjajje acuae Eyacuiñajjija Edojjoshahua Pameya emeshi mese Dabi jama amee ca poa yahuajo ba'a: “Eyacuiñajjija huoojea'yo ojjaña jaahuanajji Quito ecuea Emeshi Mese nei”? Yahuajo nei Dabiya jama huohui ca poa pea'ai ba'a:

⁴⁴ “Eyacuiñajjija ecuea Emeshi Mese Quito jama aca poa: —¡Enije anioquecue ebianei mijijje ojjaña cuana huoojea'yojji! Eyaya mi quecuajji nisho epo jeabichajea jeyojeyoje'yo”.

Jamaya huohui ca poa yahuajo Dabiya ejo. ⁴⁵E'e, Dabiya Eyacuiñajjija huoojea'yo Quito aca poa “Ecuea Emeshi Mese”. Jamajjeya Quito Dabija Emeshi Mese nei poani. Jamatii oya Dabija osecua pea'ai, de —Jesosaa acanaje—. Eya, Eyacuiñajjija huoojea'yo, dejjaja jea pojjeama; Eyacuiñajjija Bacua Ejja. Jamajjeya eya ojjañaja Emeshi Mese nei.

⁴⁶ Jesosa mimije shajja'ajja majje Paniseo cuana quea mete poanaje. Jeca poanaje, mimima'yo aninaje; huohui'ajja beca'yo jjima tii acanaje.

—¡A'a Jodio esohui huohuijji jama ba'ejji! —Jesosa poanaje
(Macoso 12.38-40; Noca 11.37-54, 20.45-47)

23 ¹Majoya Jesosaa ojjaña cuana, o shajja'ajjajji cuana pea'ai huohui canaje jama ba'a: ²—Moisesija etehue'yo huohuijji, Paniseo cuana pea'ai miquea esohui huohuijji. ³Jamajjeya joya cuana shajja'ajjacue! ¡Ojaya esohui jayojja jama acue ojjaña! Jamatii oya cuana aje oe esohui jama ba'e ajja; quea mimishi. Jamajjeya ja'a o jayojja ba'ejji! —poanaje—. ⁴E'e, jamaya poani ba'a: Dejjaa aquiana quea biquie abo mee cani pea dejja. Jamatii huanasohua sahua ajja, de, quea mimishiya jjejojo. O jayojja Jodio esohui huohuijjiya pea cuana ba'e meesahua ajja Eyacuiñajjija etehue'yo jama —Jesosa poanaje.

⁵—Quea pame poso oya jjabaquiani onaja ebihuiajji: “E'e de, oya esohui huohuijji quea pame nee” epo meeji acani. Jamajjeya esohui etehue'yo quea quemo jjasapahuahuo ilyaquiani, aa huahuo pea'ai ojjañaja ebajji. Daqui quea pame nee nee, quea ao nee huosho cani ojjañaja ebajji pea'ai. ⁶Ojee ijja'ljjianijo, emeshi mese pejjejo anioqueanei ebionei ijja sa poanijo. Jodioja equi ojee ejjachichaquijjijo pea'ai ebionei anioque sa poani Eyacuiñajjija esohui huohuijji pejjejo, ojjaña nijje emimimimiji. “E'e, oya cuana Eyacuiñajjija esohui huohuijji nei quea pame nee” epo meeji acani. ⁷Ejiojjije poquiani ojjañaa aquiana quia cani yasijke anicuua, pea cuaa jama bihuia cani ba'a: “Esohui huohuijji, miya quea pame nee nee.” Jamaya aje oe ojaya quea boti nee, jiquio Jodio etii cuanaja, esohui huohuijji quea pame nee poso jjabaquiani —Jesosa poanaje.

⁸Jamajjeya o shajja'ajjajji cuana Jesosaa acanaje pea'ai jama ba'a: —¡A'a miquianaya o jayojja jama pojji! Pea cuana a'a jjabiluia meequiviji: “¡Miya esohui huohuijji quea pame nee nee!” a'a jjapo meequiviji cuana. Cho. Miquea Esohui Huohuijji quea pame nee oe nei yani, miquea Emeshi Mese nei. Miquianaya ecuea

epeeiji cuana ca ca Eyacuiñajjiya ba cani pea epeeiji jayojjaya. ⁹Oe nei eyajo ani eseja Chii. Jamajjeya jesohui huohuijji oya jayojja “Esejaya Chii” a'a ajji! ¹⁰Cuanaya Eyacuiñajjiya huoojea'yo ojjaña jaahuanajji, Quito miquiana huoojea'yoffi nei nei. Jamajjeya pea cuana “ese huoojea'yoffi nei” a'a jjapo meequiviji. ¹¹E'e, jemeshi mese jayojja jama nequi sa poani ca ca pea cuana chacosahuacue! ¹²Jamajjeya joya emeshi mese poso jjabaquiani Eyacuiñajjiya emeshi mese pojjeama acaje'yo. Echacosahuajji jjabaquiani ca ca Eyacuiñajjiya emeshi mese jayojja po mee caje'yo —jamaya acanaje Jesosaa o shajja'ajjajji cuana.

Jesosaa Jodio etii cuana tecuea canaje

¹³Majoya Jesosaa Paniseo cuana, Moisesija etehue'yo huohuijji poani pea'ai jama tecueame acanaje ba'a: —Miquianaaya aje oe Moisesija etehue'yo huohuaña, Jodioja esohui huohuijji poaniya pea'ai. Jamatii miya ca mi ca oe esohui huohuijji nisho, siajjepoji. E'e, miquianaya Eyacuiñajji nijje jjapeequi ajja. Pea cuana Eyacuiñajji nijje jjapeequi sa poani miyaya jjapeequipajea meeyaña, de. E'e, jiquio ecua esecue ca'a cani cuaa ona edobiqui poani jjejojo jama jayojja miquiaaya pea cuana dobiqui mee aija eyahuasijje Eyacuiñajji nijje eba'e tiitii'yoffi. Jamajoya miquianaya quea nee nee po mee caje'yo quijje, quea nee nee tii tii, de —Jesosa poanaje.

¹⁴—E'e, miquianaya ca ca oe e'ahuemanoja equi cuana jjesheaña sosema'. Majoya Eyacuiñajji nijje mimi nishoani quea huiso nee. Jamajoya Eyacuiñajjiya miquianaya cajaa acaje'yo. Quea nee nee po mee caje'yo tii tii —Jesosa poanaje.

¹⁵—Jodioja esohui huohuijji cuana, Moisesija etehue'yo huohuijji cuana pea'ai, miquianaya aje oe esohui huohuijji nisho, peajja. Miquianaaya chaco neineiaña; quea huesha poquiani pea'ai pea cuana Moisesija etehue'yo shajja'ajja meeya. Jamatii mi shajja'ajjajji cuana mi jayojja quea mimishi nee nee. Jamajoya oya cuana e'e jojo nei quea nee nee po mee caje'yo, mi jayojjaya —Jesosa poanaje.

¹⁶—E'e, miquianajaya ehuohui quea quehuajo cojjama' jama poani. Cojjama' cuana pea cojjama' cuaa me iña majje mepejjejea cani jayojja. Ojjaña poquiquehuaje'yo —Jesosa poanaje—. Miquea ehuohui jama ba'a: “Eyacuiñajjiya equi nequianijo, ecuea ehuohui jama eyaya e'e jojo nei aje”. Pea cuana jama poani ba'a: “Chojja, jamaya mimi majje miquea ehuohui jama e'ajji pojjeama”. Jamaya huohui cani cuaa pea'ai ba'a: “Ma mei huo'o Eyacuiñajjiya equijo anijo, ecuea ehuohui'yo jayojja jama eyaya aje”. “E'e, ijamaya mimi majje miquea ehuohui jayojja jama e'e jojo nei acue!” pea cuana poani. Jamaya mimi quehuani miquianaya —Jesosa poanaje.

¹⁷Oya cuana tecuea canaje jama pea'ai ba'a: —Chojja, de. Miquianaya jjashahuuba quehuaquiani. Mei huo'o Eyacuiñajjiya equijo quea pame ani; Eyacuiñajjiya equi quea pame nee pea'ai. ¹⁸Miquianajaya pea ehuohui quea quehu pea'ai jama ba'a: “Mei ehuana huicha'a huicha'a pea mei biajje yani Eyacuiñajjiya

equijo aquiana dahuajji, Eyacuiñajji bihuajji. Ma mei e'ya cuana nequianijo, eyaya ecuea ehuohui jayojja jama e'e jojo nei aje" amajje, dejia ojaya ehuohui jama e'ajji pojjeama, miquianaya poani. Jiquio jama poani ba'a: Aquiana mei e'ya biajje huana cani cuaa. Majoya jama mimiani ba'a: "Ma aquiana mei e'ya biajje yanijo, ecuea ehuohui jayojja jama eyaya aje". "E'e, ijamaya mimi majje ca ca miquea ehuohui jayojja jama e'e jojo nei acue!" ¡Miquianaya jamaya mimi quehua'aní cuana! ¹⁹ ¡Ma ehuohui'yo cajaa! —Jesosa poanaje—. Mei e'ya quea pame nee; aquiana mei e'ya biajje ani quea pame pe'a'i. Pea jayojjaya. ²⁰ Jamajjeya dejia mei e'iyajo mimianijo oya ojjaña aquiana mei e'ya biajjejo mimiani pe'a'i. Pea jayojjaya poani. ¡Jamaya a'lá mimijji ma aquiana cuanajo! —Jesosa poanaje.

²¹ —Miquianaya Eyacuiñajji equi yasijje mimiani cuana jama ba'a: "Eyaya ecuea ehuohui'yo jayojja jama e'e jojo nei aje Eyacuiñajji equi yanijo". Jamaya aje oe miya mimiani Eyacuiñajji, ma equijo ba'yanijo pe'a'i. Jamajjeya ¡Eyacuiñajji equi yasijje a'lá jama mimijji! ²² Pea cuana mimianijo eyahuasijje jama poani ba'a: "Eyajo Eyacuiñajji eba'ejji yanijo eyaya ecuea ehuohui'yo jayojja jama e'e jojo nei aje. Ecuea esohui e'e nei pojjeama jojjemo eya quea nee capoahua". Jamaya amajje miya Eyacuiñajji eba'ejji mimiani; "Eyacuiñajji eyajo aniya eya ba canijo, eyaya ecuea ehuohui'yo jayojja jama e'e jojo nei aje". "Ecuea ehuohui'yo jayojja jama ajjima jojjemo eya quea nee po mee ca'yome" beshahua nei aña; oya jayojjaya. Jamajjeya ja'a jamaya mimijji Eyacuiñajji; quea tai! —Jesosa poanaje.

²³ Majoya Jesosaa Moisesija etehue'yo huohuijji cuana, Paniseo cuana pe'a'i jama tecueame acanaje ba'a: —Miquea aquiana bobí quea johua e'ajji equi pejjejo pohuani. Tiiyajo quiaña iye huiso Eyacuiñajji epoji, ojaya ehuohui'yo jayojja jama poani:

"Miquianajaya aquiana ipiacue; ome miji pe'a'i, 10 oya jayojjaya, oe
Eyacuiñajji epoji, pea me oeje ebeka pee pe'a'i, 9 miquea epoji".
Eyacuiñajji yahuajo nei jamaya poa. Jamaya miya poani. Quea pame. Jamatii de, Moisesija etehue'yo quea ja'a jjashahuuba tiitiqui ajja. Jamaya quea tai aña ba'a: Miya e'e jojo nei jjashahuubaqui jjima, siajje poani, jjashahuubaqui ajja aema' cuana ba'e meesahuajji. Eyacuiñajji esohui jayojja jama po tiitii ajja. Jamajjeya ¡Eyacuiñajji etehue'yo jama ba'ecue! ¡Majoya Eyacuiñajji yasijje iye huiso quiacue ojjaña miquea aquiana pe'a'i! —Jesosa poanaje.

²⁴ —Miquianaya cojjama' jama; jjashahuubaqui ajja pe'a'i. ¿A'a huashapa bobijo anidobiquiajje jeajea'aña, jamatii aquiana quea quemó anidobiquiajje ijjiajeaña? Jamaya miya poani; ojjaña miquea aquiana quea biso pe'a'i ipia'ajja majje iye huiso quiaña Eyacuiñajji epoji. Jamatii pea cuana ba'e meesahua ajja, de. Jamajoya Eyacuiñajji miquianaya cajaa acaje'yo; quea nee nee po mee caje'yo —Jesosa poanaje.

²⁵ —E'e Paniseo cuana, miquianaya Moisesija etehue'yo huohuijji pe'a'i. Jamatii miquianaya ca ca oe esohui huohuijji nisho de, quea tai. ¿A'a caneco cueehue topo cani cuaa ena ishi jjimahuajo, jamatii eyiyedojojje quea ihui shacua jjima? Jamaya miya. Jjabaquiani quea pame jayojja. Jamatii quea

jjashahuabaqui tai nee; sii poani; epona, onaja aquiana jea baña pea'ai.

²⁶Paniseo cuana, miquianaya aje oe quea jjashahuabaqui quehua. Jamajjeya Eyacuiñajjiya miquianaya cajaa acaje'yo; quea nee nee po mee caje'yo, de. ¿A'a caneco iyedojjoje ebionei topo cani cuaa? Jamajjeya e'e jojo nei quea pame nee. ;Caneco topo cani jayojja jama acue miquiaaya; ebionei jjashahuabaqui tai pajea'yocue e'e jojo nei quea pame epoji! —Jesosa poanaje.

²⁷—Paniseo cuana, Moisesija etehue'yo huohuijji pe'a'i, miquianaya esohui huohuijji nisho de, quea mimishi. Emano mojea'yojji cuia'asha cani cuaa quea pame jayojja. Jamatii eyiyedojjoje quea ihui, emano'yo sajaajji. ²⁸Emano'yo mojea'yojji jayojja jama miquianaya cuana; quea pame jayojja ojjañaa ba cani; jamatii quea jjashahuabaqui tai. Shajjama', quea pame po nishoani pea'ai. Jamajoya Eyacuiñajjiya miquianaya cajaa acaje'yo; quea nee nee po mee caje'yo —Jesosa poanaje.

²⁹—Moisesija etehue'yo huohuijji, Paniseo cuana pea'ai, miquianaya aje oe esohui huohuijji nisho, quea mase. Jamajjeya Eyacuiñajjiya miquianaya quea nee nee po mee caje'yo. E'e, miquianaya emano sajaajji mo'yaña, quea pame a'yaña ma Eyacuiñajjiya esohui huohuijji yahuajo mojea jaa. Esajaajji cuia'asha'aña quea pame nee Eyacuiñajjiya epjeeji nei yahuajo emano'yo bihuia'yojji —Jesosa poanaje—. ³⁰Sijaje miya poani jama ba'a: "Yahuajo ecuanaja etiiquiana cuana nijje eba'e'yo jojximo ecuanaja ca ca oe Eyacuiñajjiya esohui huohuijji cuana ecuajea'yojji pojjeama poqueaye. Chama' ecuanaja ejjashahuabaquijji etiiquiana jama; ecuanaja ca ca pea" miquianaya poani —Jesosa poanaje—. ³¹Chojja. Jamaya miquianaya po nishoani. Jamatii miquianajaya etiiquiana jama Eyacuiñajjiya esohui huohuijji quecuajji nei nei pea'ai. ³²Jamajjeya o jayojja jama poani quiana; Eyacuiñajjiya huoojea'yo cuana cuiajea jeyojeyoje'yo, de —Jesosa poanaje—. ³³Miquianaya peyo quea se nee nee jama de, quea mase nee nee, esohui huohuijji quecuajji, miquea etiiquiana cuana jama. Jamajjeya ;a'a acuae nequiana Eyacuiñajjiyo jjanequiquehuaquijji? Chojja. E'e jojo nei ohuaya miya huohui caje'yo: "¡Poquicue nequiana! ¡Cuaqui yasijje dobiquicue! ¡Quea mase nee nee aje oe nequiana!" —Jesosa poanaje.

³⁴—Jamajjeya eyaya miquiana huasijje huoojeaña Eyacuiñajjiya esohui huohuijji, esohui bameesahuajji, dejja quea jjashahuabaqui ja'a nee pea'ai. Jamatii beca cuana cuiajea'e'yo; pea cuana acui ecueatal'apeejo me cacajeaje'yo; pea cuana cuiasejjajeaje'yo miquea equi ojee ejjachichaquijji yasijje; pea cuana ocuenaje'yo ojjaña cuiñajji yasijje equecua'yojji, miquianaaya —Jesosa poanaje—. ³⁵E'e Jodio cuana, miquea etiiquiana cuaa dejja mimishi'ama quecuajea ca'yonaje quea huiso. Eyacuiñajjiya etehue'yo ebionei tehue ca poa jama ba'a: Abeni cuiahuejjajea ca poa miquea etiiquiana Cainiya. Oya jayojja quea huiso cuiajea ca poa cuaa. Quijje nei Eyacuiñajjiya etehue'yo quijje yejje nei tehue ca poa oja sohui huohuijji Sacania, Benequija bacua ejja cuiahuejjajea ca poa cuaa Eyacuiñajjiya equijo, aquiana dahuajeajji pejjejo —Jesosa poanaje—. ³⁶Jamajjeya eyaya miya e'e jojo nei huohuaña: Jjeya nei

apoa poaje; Eyacuiñajjiya miquiana cuana quea nee po mee caje'yo ojjaña miquea etiiquianaja mimishi cuanajo, o jayojja jama miquianaya poani jojoya. Jamaya Jesosaa Jodio cuana tecuea canaje quea mimishi nee jojoya.

**Jesosa quea yeno poanaje ojjaña Jenosanenajo ba'e cuanajo
(Noca 13.34-35)**

³⁷Majoya Jesosa quea yeno nee nee ojjaña cuana Jenosanenajo ba'e cuanajo jama poanaje ba'a: —Jodio cuana Jenosanenajo ba'e, miquiana cuana ecuea quea jea nee nee. Jamajjeya eya miquianajo quea yeno poani. E'e, miquianaaya aje oe Eyacuiñajjiya esohui huohuijji quecuajea'ya poa; ojaya huoojea'yo jajahuejjajea'ya poa meiya pea'ai. ¡Bacue oe! Cachina enaeseya ebacua huojje cani ejaaahuanaajji jama jayojja eyaya miquiana iyaa sa neineiaña e que, ejaaahuanaajji. Jamatii enijje jjapeequi sa po ajja. Cajaa aña jama ba'a: “Chojja, Eyacuiñajjiya miya huoojea jjima ojjaña jaahuanajji”. ³⁸Jamajjeya ¡bacue! —Jesosa poanaje—, Eyacuiñajjiya miquianaya cajaa acaje'yo. Jeajea caje'yo ejaaahuana majajji pojjeama. ³⁹E'e, eya jiquiojo tii nequi tii ajja. Jamajjeya eya miquianajaya ba o'oya jjima poaje e poe o'oya jjimahuajo. Quijje e poe o'oyajo ca nequiana ca oe jama poaje ba'a: “Jesosa miya Eyacuiñajjiya huoojea'yo ojjaña jaahuanajji. ¡Eyacuiñajjiya miya cajaahuana cahua quea pame!” poaje miquianaya quijje —Jesosa poanaje Jenosanenajo ba'e cuana nijje.

—Eyacuiñajjiya equi cajjajeajea caje'yo cuaa mei cuana —Jesosa poanaje
(Macoso 13.1-2; Noca 21.5-6)

24 ¹Jesosa Eyacuiñajjiya equijo ani poquinaje. Poquijeya o shajja'ajjajji cuaa oya huohui canaje: —¡Bacue Eyacuiñajjiya equi! Quea quemo, quea pame mei cuana.

²—E'e. ¿A'a jiquio equi quea pame nee baña? E'e jojo nei quijje mei cuana cajjajeajea caje'yo cuaa. Chama'yo tii acaje'yo —Jesosa poanaje.

**Dejja cuana quea mase nee poaje quijje
(Macoso 13.3-13; Noca 21.7-19)**

³Quijje Jesosa eyiyo huasijje Onimo acui yiye yasijje jaasohuaquinaje o shajja'ajjajji cuana nijje. Anioquenaje. Pea dejja poqui jjima. Jamajjeya o shajja'ajjajji cuaa huohui'ajja canaje: —Jesosa, ¿ache shono acuae mei cuana cajjajeajea caje'yo cuaa so'o? ¿Ae acuae poaje mi epoe o'oya cuahuajje? ¿A'y ba majje ecuanaja eba poaje miya poeje o'oya, meshi chama'yo tii epojijo?

⁴Jesosaa saja'a canaje: —¡Jjashahuaba neineiquicue onajaya miya edasiajjji pojjeama! ⁵Quea huiso siajjepoiji poeje, ecuea ehuoojea'yo pojjeama: “Eyacuiñajjiya eya huoojea canaje, eya ca ca iña ojjaña jaahuanajji” siajje poaje. Quea huiso dasia caje'yo. ⁶“Ojjaña jjaquecuaquiani ojjaña meshi yasijje” huohui caje peaaya pea'ai. Jamatii ¡a'la quea mete pojji! Jamaya poaje.

Jamatii apoa pojjeama, oe po ajja jjima poaje so'o —Jesosa poanaje—. ⁷E'e, jjaquecuaqui caje'yo cuana ojjaña meshi yasijje, ojjaña cuiñajji yasijje pe'aai. Quea huiso emanomeejjiya mano mee caje'yo; bobi yasijje po majje manoje'yo quea huiso; meshi huehuahuehuaje ojjaña meshi yasijje pe'aai —Jesosa poanaje—. ⁸E'e, jiquio ecua epona bacua cuayaje ebionei jjapashineijje nee'ani; quijje quea nee nee. Jamaya poaje e poe o'oya jjimahuajo. Quea nee pishana po majje quea nee nee poaje ojjaña cuana —Jesosa poanaje.

⁹—Majoya pea cuaa miquianaya iña majje jeanobiajea caje'yo ecuiasejjajeajji, equecua'yojji pe'aai. Enijje jjapeequianijo miquianaya boti'ama nei poaje ojjaña meshijo ba'e cuanaja. ¹⁰Jamajoya quea huiso enijje jjapeepajeaquí'yo majje mimishi aje o'oya. Peaja epeejiji boti'ama poaje'yo —Jesosa poanaje—. Jamajoya dejja mase iña mee caje'yo equecua'yojji.

¹¹Quea huiso pea cuana poeje: “Eya Eyacuiñajji esohui huohuijji” siajje poaje. Cho, Eyacuiñajji pojjeama. Jamatii, ecuea epeejji dasia caje'yo quea huiso. Poquiquehua mee caje'yo eshahua nijje. ¹²Dejja cuana shajjama! jayojja po majje emeshi mese cuana shajja'ajja sa po ajja poaje'yo. Jamajjeya pea cuana boti'ama poaje'yo. ¹³Jamatii e poe o'oya jjimahuajo, enijje jjapeequí pajea'yo ajja tii ca ca Eyacuiñajji nijje ba'e tiitije'yo, enijje pe'aai —Jesosa poanaje.

¹⁴—Eya poeje o'oya. Eyacuiñajji nijje ojjaña cuanaja Emeshi Mese nei poaje'yo. Ma ehuohui'yo quea pame nee ojjaña meshi cuana huasijje huohui caje, ojjaña dejja cuana huasijje pea'ai ojjañaja eshajja'ajjajji. Majoya e poe o'oyajo ojjaña oe poaje —Jesosa poanaje.

**Aquiana quea tai nee ojjaña quea mete nee epo meeiji
(Macoso 13.14-23; Noca 21.20-24, 17.22-24)**

¹⁵—Eyacuiñajji esohui huohuijji Dañeniya yahuajo nei huohui ca poa jama ba'a:

“Quijje Eyacuiñajji equijo nequije aquiana quea tai nee nee, ojjaña quea mete nee epo meeiji”.

¹⁶Jamajjeya ma ba majje ca ca, ma pojja tii ojjaña Jodio meshijo ba'e capoquicuajiahua eyiyo cuana huasijje. (Jiquio ehuohui'yojo cajjashahuabquiahua quea ja'a epoji.) ¹⁷¡Joya equi huisa biajje chacochacoani a'a equi yasijje dobiquinanajji aquiana cuana biohua edojoji! ¹⁸¡Joya quejo chocochacoqui pea'ai a'a equi yasijje poquinanajji daqui moojo! Eyiyo huasijje poquicuaji ajja aje oe mano'yo chana!. ¹⁹Epona cuana o'eiji, bacua sho'ijji pea'ai quea yeno poaje; quea camaja equehua poquicuajiji poaje. ²⁰Jamajjeya Eyacuiñajji nijje mimicue jama ba'a: “Eyacuiñajji, jeenojo pojjeama capoahua, epojja ejomishocajjiyo pojjeama pea'ai ecuanaja epoquijji eyiyo cuana huasijje!” acue —Jesosa poanaje—. ²¹E'e, ma pojja cuanajo ojjaña quea mete nee nee, quea yeno nee nee poaje. Jamaya pojjeama yahuajo, meshi pana majje, jjeya nei pea'ai, quijje pea'ai; quea mete pishana, quea yeno pishana. Ma pojja cuanajo ca ca quea nee nee poaje dejja cuana —Jesosa poanaje.

22—Eyacuiñajjiya oe pojji cahuime quea camaja po mee caje'yo; oe pojji cahuime epo'yo jojjemo ojjaña cuana mano'yome. Ojaya epeejji jaahuanan canijo, ojaya quea nahue nee emano jeyojeyo'yojji, Eyacuiñajjiya oe pojji cahuijo quea camaja po mee caje'yo, quea cahui huiso pojjeama —Jesosa poanaje.

23—Ma pojja cuanajo a'lajjashajja'ajjaquijji ona siajje poajo jama ba'a: “¡Bacue oe, Eyacuiñajjiya huoojea'yo Quito jiquiacua poe'yonaje!” jama poso, ja'a shajja'ajjajji! “¡Bacue oe, Quito jocuama pa poe'yonaje!” Jama onaa acajje ja'a jjashajja'ajjaquijji, a'a poquijji! 24 E'e, Eyacuiñajjiya huoojea'yo ojjaña jaahuanajji e jayojja nisho, Eyacuiñajjiya esohui huohuijji nisho pealai poeje quea huiso nee nee. Ohuaya ma pea dejja ajjima acani acaje'yo Eyacuiñajjiya epeejji cuana dasia'yojji nisho. Dasia caje'yo quea huiso nee; ecuea epeejji nei pea'ai beshahua nei eya pajea mee caje'yo o jayojja epoiji; chojja, jjadasia meequi ajja. 25 E shajja'ajjajji cuana, eyaya miya huohuinaje quijje oya poeje ejjadasiaqu'yojji. ¡A'a oya cuana shajja'ajjajji! —Jesosa poanaje.

26—Jamajjeya a'a jjashajja'ajjaquijji onaa miya siajje acajje jama ba'a: “¡Baqicue oe, Quito jocuama huenihueni aijo nequi!” Jama acajje ja'a baquijji! “¡Bacue oe, Quito equi equecuayijji dojjojo ejja'aniquehuaqui ani!” acajje ja'a jjashajja'ajjaquijji; a'a o que dobiquijji! 27-28 Cho, shajja'ajjacue ecue sohui: ¿A'a joya e'iuhuijaa huasijje be'o cuana cuabesajebeje? E'e jojo nei miquianaaya eya baje joya ecua be'o e'iuhui yasijje oqueani jama. Cuanaya pojjeje nei nei poajo jeaja'a cani eyajo; ojjañaa ba caje quea huesha nee. Jamaya eya ojjañaja Edoe Mese poeje o'oya, pojjeje jama. Jeaja'ajeabebeje. Eya ojjañaa ba caje'yo. Quehuajje pojjeama eya poeje'yo —Jesosa poanaje.

Jesosa ojjañaja Edoe Mese poeje o'oya
(*Macoso 13.24-37; Noca 21.25-28*)

29—E'e, quea camaja nee nee po majje majoya eshequi quea apo poaje'yo. Ba'i jiji'yo ajja poaje'yo. Majameta cuana jjacajjaqui'yo majje jijijijioqueje'yo ojjaña pealai. Majameta nequijji cuana huehuahuehuaje'yo janobajjima nei pea'ai.

30—Majoya miquianaaya baje aquiana eyajo. Ma ba majje huohuije jama ba'a: “¡E'e jojo nei Jesosa Quito ojjañaja Edoe Mese jjeyahua nei poeje o'oya, de!” poaje.

—Jamajjeya ojjaña cuana ojjaña meshijo ba'e quea mete nee nee poaje'yo. Ecuea epeejji pojjeama siasiaje jama ba'a: “Coya aje oe ¿ae shai poeje ba'a? ¡Bacue, ojjañaja Edoe Mese Jesosa Quito poeje o'oya bo biajje! Oya oe nei quea ca'a nee nee, quea sohui poja nee nee. Quea jeajahua nee nee pea'ai. Esohuidojorjji quea ca'a nee onijje poeje quea huiso nee nee” poaje cuana —Jesosa poanaje—. 31 Esohuidojorjji quea ca'aa aquiana eshe'ana ai jayojja mia cajo, eyaya esohuidojorjji cuana huoojeaje'yo biacua, macua huasijje pea'ai ojjaña ecuea epeejji cuana jjequiya —Jesosa poanaje.

Esohui acuijo, iquenajo, huohui canaje Jesosaa
(Macoso 13.18; Noca 21.29-33)

32 Jesosaa huohui canaje pea esohui jama ba'a: —E'e, eyaya miquianaya esohui ejjashahuubaqui meeji huohuije iquena acuijo. Esejaya meshijo acui iña'yani ba majje eseya jama poani ba'a: "E'e nei, nayaja po'yonaje. Jjeya eshequiaja po pajea'yonaje". 33—Jamaya eshequi, ba'i quea misi, majameta eyajo jjijijioque'ani ba majje pea'ai quea bihui jjashahuubaquicue jama ba'a: "E'e, jjeya nei apoa poaje. ¡Jjeyahua nei esejaya Emeshi Mese nei Jesosa Quito poeje o'oya!"

34—E'e jojo nei ojjaña ma pojja cuanajo ba'e cuana mano jeyojeyo'yo jjimahuajo ojjaña apoa poaje'yo; eya ojjañaja Emeshi Mese oe nequije'yo. 35 E'e, aquiana eyajo nequi chama' poaje'yo; ojjaña meshi chama'yo tii poaje'yo pea'ai. Jamatii ecuea esohui oe epo'yojjii pojjeama; shajja'ajja tiitii caje'yo cuaa —Jesosa poanaje—.

36 ¿Ache shono shai jamaya poaje, ojjaña apoa poaje'yo? Dejja cuanaja ba jjima; esohuidoojji cuanaja ba jjima pea'ai; ecuea ehuohuijji pojjeama. Ecue Chijja eba ojaye nei. Ohuaye nei huohui caje'yo ojjaña apoa epo'yojjii —Jesosa poanaje.

;Jesosa poe o'oyajjijo jja'ishoa'ajjaqui anicue!
(Noca 17.26-30, 34-36)

37—Yahuajo nei nei dejja Noe bajjani nequia poa. Noe enequiahuajo ojjaña cuana quea mimishi poa. Quijje eya ojjañaja Edoe Mese poe o'oyajo, ojjaña cuana quea mimishi poaje o'oya, yahuajo nei nei jayojjaya poaje o'oya. 38 Yahuajo ojjaña meshi ohua jjimahuajo jamatii dejja cuana jjija'ljjija ania poa. Ishilishi nequia poa pea'ai. Jjahuanaqui nequia poa. Jamaya poanaje Noe bishe ai yasijje dobiqui jjimahuajo. 39 Ona ojjaña jjashahuubaqui jjima anijo ena quea quempoa. Jjayahuequia poa; johui oquea poa; hui'i ca'ya poa. Jamaya poaje o'oya eya ojjañaja Edoe Mese epoe o'oya cuahuajo: jjashahuubaquije cuana jama ba'a: "Jamatii ecuana quea pame nequi". Ojjañaja ba jjima meshi ojjaña tii chama'yo tii poaje'yo. 40 E'e, e poe o'oyajo beca dejja nequije quejo. Oe dojosohuaqui caje'yo; pea jea canaje'yo. 41 Beca epona quecuapasha pashaqui, oe dojosohuaqui caje'yo; pea jea canaje'yo, Eyacuiñajjiya —Jesosa poanaje—. 42 ¡Jamajjeya jjashahuubaqui tiitii anicue! Ache pojjaño Emeshi Meseja epoe o'oyajji miquea ebajji pojjeama. 43 Jiquio jama poaje ba'a: Equi mese siipojjiache shono poeje poso jjabaquiani. Ojaya eba jojximo ohuaya ishoa ca'anime, equi jaahuanajjiya. 44 Eya miquianajaya Edoe Mese ache pojjaño miquiana que poeje o'oya ebajo ese. Jamajjeya jjja'ishoa'ajjaqui anicue! —Jesosa poanaje.

Pea echacomeejji quea pame nee poanaje
(Noca 12.41-48)

45—Ecuea esohui shajja'ajjacue echacomeejji cuanajo jama ba'a: Equi ai meseya poqui jjimahuua echacomeejji iyaa canaje. Huoojea canaje: "¡Ecuea equi cuiñacue, miyaya! ¡Ecuea pea echacojji cuana oe bobiacue pea'ai! Quijje eya poeje o'oya".

46—Equi mese poe'yo majje ojjaña quea pame nee ba caña'ya poa; quea bihui nee poña'ya poa. Jamajjeya echacomeejji quea bihui nee poanaje.
47 Jamajjoya equi meseya echacomeejji quea pame huoojea caje'yo ojjaña ojaya aquiana cuiñaa. **48** Pea echacomeejji siipojji ca ca jjashahuuba taiquiani jama ba'a: “Equi mese poquinaje quea huesha nee. Quijje nei nei poeje'yo”. **49** Quea tecueya jjejojo ohuaya echacojji cuana cuia cani. Pea cuana nijje ishi'ishiani, huooani. Apoa pojjeama nequi. **50** Equi mese ache pojjajo epoje'yo poso acani. Jamajjeya equi mese quehua poeje'yo. **51** Ojaya equi cuiñajji poani ehuoo jaa baña'yo majje tecuea cañaje'yo. Jeacuayajea cañaje'yo ojjaña quea mimishi poani nijje. Jomajo quea nee nee poaje'yo tii tii; ese' ijjiayajea caje'yo quea neejo —Jesosa poanaje—. Jiquio ecua equi meseya ojaya equi cuiñajji shajjama' tecueajea majje jeacuayajea caña'yonaje jayojja jamaya eyaya aje'yo ojjaña ejo ishoa'ajja, poe o'oya majje —Jesosa poanaje.

Epona sho'i cuana poquinaje pea epona sho'i jjahueaquequi baa

25 ¹—¡Pea esohui shajja'ajjacue Eyacuiñajji ojjañaja Emeshi Mese oe nei poajejo! Jiquio jayojja jama poaje ba'a: Epona sho'i ahuema'ani ome miji pe'a'i huisome, 10 poa. Ma jjahueaquequi baa cuaquijiji dojo canaje. ²Me oeje epona jjashahuabaquinaje. Pea me oeje jjashahuabaqui jjima. ³Joya jjashahuabaqui jjimaa cuaquijiji dojo canaje; jamatii esei dojo jjima ejijiji, de. ⁴Peaa jjashahuabaqui majje cuaquijiji dojo canaje eseijiji. Tahuoojo dojo canaje pe'a'i ejijiji.

⁵—Epona sho'i cuana quea cojja jee mano po majje cahuinaje. Shacuima' nequi mecashono poeyanaje. ⁶Jamajjeya mecashono pea equi yasijke poe'yo majje taaaanje; “Shacuima' nequi aje poe'yonaje. ¡Cua'a, baquicue!”

⁷—Taaaje shajja'ajja majje ojjaña epona sho'i cuana shequinaje. Ejijiji hui jeacuaya canaje. ⁸Epona sho'i jjashahuabaqui jjima cuaa ma ejjashahuabaqui cuana huohui'ajja canaje jama ba'a: “¡Esei mo quiacue! Esei ecuanaja oe poanaje. Cuaquijiji ecuanaja jiji'yo ajja”.

⁹—Epona sho'i ojaya ejjashahuabaqui'yo cuaa saja'a canaje: “Miquea ese chama' eshojji. Ecuea ca ca jiquio che oe pojji. ¡Poquicue miya ma esei quia caqui yasijke; jocuama jjequicue!”

¹⁰—Jocuama o poquiahauajo, shacuima' nequi poeyanaje. Ojjaña dobiqui'yonaje, joya apoa epo, o jjahueaquejiji equi yasijke. Dobiqui majje esecue ca'a canaje. ¹¹Joya esei jjequiya poquiya cuana poe'yo majje esecue eca'a nequi ba caña'yonaje. Taaa aninaje: “¡Che esecue ca'apejocue!”

¹²—Shacuimaa eyiye dojjojo nequiya saja'a canaje: “Chojja, ecuea miya ba jjima” acanaje. Jamaya poanaje —Jesosa poanaje.

¹³—E'e —Jesosa poanaje oja epjeeji cuana nijje—, ¡jamajjeya jja'ishoa'ajjaqui ani titiicue pealai! Ecuea epoe o'oyajji miquea ebajji pojjeama.

Esohui ejjeshejjijo
(Noca 19.11-27)

¹⁴Jesosaa pea esohui eba meesahuajji huohui canaje: —Jjeya eyaya pea esohui huohuije, eye ojjañaja Emeshi Mese poe o'oyajo —Jesosa poanaje—. Jama poaje ba'a: Oe dejja, emeshi meseya quea huesha poqui jjimahuajo iyaa canaje ojaya echacoji cuana, ojjaña ojaya aquiana jaahuanameejji. ¹⁵Majoya ohuaya oe echacoji quea jjashahuabaqui ja'a huasijje esodojo me oejje, 5 huisome quea nahue nee nee quia canaje aquiana jjeshejjijo, quea huiso bejjo chichajji. Pea echacoji quea jjashahuabaqui ja'a pishana huasijje beca esodojo quea nahue nee nee quia canaje aquiana jjeshejjijo, quea huiso bejjo chichajji. Pea echacoji beshahua nei jjashahuabaqui ajja huasijje oe esodojo quea nahue nee nee quia canaje bejjo chichajji nisho. Esodojo quia majje emeshi mese poquinaje.

¹⁶—Echacoji quea jjashahuabaqui ja'aa ojaya esodojo me oejje huisome quea nahue quia canaje aquiana jjeshejjijo. Majoya chicha canaje ome pea'ai huisome. ¹⁷Oya jayojjaya pea echacojiya ojaya beca esodojo quea nahue quia canaje aquiana jjeshejjijo. Majoya ohuaya chicha canaje ebeca pea pe'a'i huisome esodojo. ¹⁸Pea echacoji aje oe jjashahuabaqui ajja poanaje. Ojaya emeshi meseja esodojo oe nei quehuajje nei ohua canaje.

¹⁹—Quijke nei emeshi mese poe o'oyanaje ojaya echacoji cuana huasijje. Jjashahuabaquinaje jama ba'a: “¿Ae shai poani so'o echacoji cuana ecuea esodojo?” Jamajjeya echacoji cuana iyaa majje huohui'ajja canaje: “¿Ache huiso esodojo yani so'o jjeya?”

²⁰—Echacoji esodojo me oejje huisome jaahuanajji ojaya emeshi mese nijje jama poanaje ba'a: “Yahuajo nei miyaya me oejje esodojo quia'yonaje eye. Ma'aje miquea. Pea me oejje huisomeya miquea poanaje. Ma'aje pea me oejje ecue chicha” poanaje echacoji.

²¹—Ojaya emeshi mese onijje quea bihui nee poanaje jama ba'a: “E'e de, miya echacoji quea pame nee. Yahuajo eyaya miya quianaje me oejje esodojo. Miyaya maya quea pame nee chichanaje. Jamajjeya jjeya eyaya miya ecuea aquiana quea huiso jaahuanameejeyo. Cua'a, ¡enijje anicue quea bihui nee!” emeshi mese poanaje quea bei nee.

²²—Majoya pea echacoji poeyanaje, ma beca esodojo yahuajo quia canaje. Ma echacoji jama poanaje ba'a: “Emeshi mese, yahuajo nei miquea esodojo becanejjiji pe'a'i quia'yonaje eye. Ma'aje miquea beca esodojo. Pea esodojo becanejjiji pe'a'i ecue chicha yenaje. Ma'aje ecue chicha esodojo pe'a'i” echacoji poanaje.

²³—Emeshi mese onijje quea bei miminaje jama ba'a: “E'e, de, miya echacoji quea pame nee. Yahuajo eyaya miya quianaje esodojo becanejjiji pe'a'i. Miyaya pea chichanaje quea pame nee. Jamajjeya jjeya eyaya miya ecuea aquiana quea huiso jaahuanameejeyo. Cua'a, ¡enijje anicue quea bihui nee!” emeshi mese poanaje.

²⁴—Majoya pea echacoji poeyanaje, ma esodojo oe nei quia canaje. Emeshi mese huohui canaje ohuaya jama ba'a: "Emeshi mese, ecuea eba miya quenequene cuajiani. Miyaya miquea echacoji chaco meeña sosema! Quea dejja taija jjejojo miquea aquiana quea huiso yani" jama posoya acanaje echacojiyi. ²⁵"Jamajjeya eya quea mete poanaje. Miquea esodojo emoquehua aninaje onaa esii ca poani jjejojo. Ma'aje miquea beijo, ma miyaya quianaje huisome tiiya" echacoji poanaje.

²⁶—Ojaya emeshi meseya oya acanaje: "Miya echacoji quea mimishi, quea huea. Miya quea jjashahuabaqui tai poanaje jama ba'a: —Ecuea echaco sosema' poanaje. Ecuea emeshi mese quea dejja tai. Jamajjeya quea huiso ojaya aquiana yani —miya poanaje. Siajje miya poani. Miquea ejjashahuaba taiquiji jayojja jama eyaya miya aje. ²⁷ ¿Apiojji acuae miyaya ecuea ejjeshejji mi quianaje beijo jaajji yasijje? Quijje pishana ohuaya eya quea huiso quia ca'yo queaye".

²⁸—Emeshi mese ma echacoji nijje quea tecue poanijo pea cuana huoojea canaje jama ba'a: "Echacoji quea hueaa jjejojo ecuea esodojo mi chicha canaje. ¡Maya esodojo oe nei jjeshe majje quia'yocue pea echacoji huea'ama huasijke, maya ecuea esodojo me oejje ecue quia poanaje yasijke quiacue! ²⁹E'e, joya huea'ama poani aquiana cuana quia caje cuaa. Dejja aema' quea hueaja aquiana ojjaña jjeshe'yo majje dojo caje'yo cuaa. ³⁰Jiquio echacoji cajaa ajeaje'yo; quea huea coma. Enijje oya enequijji poanjeama. Huoojeacuayajeaje'yo. Oya quea yeno nee nee poaje'yo. Quea nee nee pea'ai poaje'yo" emeshi mese poanaje —jamaya Jesosaa acanaje.

E'e, jiquio Jesosaja ejjashahuabaqui'yojji jama ba'a: Poe o'oya majje Jesosaa ojaya epeejji quea jjashahuabaqui ja'a quea pame ba'e mee caje'yo onijje eyajo. Onijje ona huoojea'yojji po mee caje'yo. Pea echacoji quea huea ba majje ca ca cajaa acaje'yo. Quea nee nee poaje'yo oya cuana.

Esohui Jesosa Quitoja ojjañaja Edoe Meseja epoe o'oyajjijo

³¹Jesosaa huohui canaje pea'ai: —Eya poe o'oya majje quea ca'a poaje'yo. Ojjaña huoojea'yojji poaje'yo. Ojjaña esohuidojji cuana enijje poje'yo. Majoya eya ba'esohuaqui'yo majje eyahuasijke, jocuama eya nequije'yo, Emeshi Mese nei. ³²Ojjaña cuana e que jjachichaqui meeje'yo. Majoya eyaya ñajjajja cuiñajji jayojja jama aje jama ba'a: Ñajjajja cuiñajji ñajjajja cuana, chivo cuana nequiashiña cani. ³³Ñajjajja oo pana nequiashiña cani ebianeijje. Chivo ca ca huapa nequia acani, shanijje. ³⁴Ñajjajja cuiñajji jayojja jama eyaya, ojjañaja Emeshi Meseja ojjaña dejja cuana nequishiñaje'yo. Ecuea epeejji quea pame nee ebianeijje nequiae'yo. Oya cuana aje'yo jama ba'a: "Miquianaya ecue Chijja bacua cuana e'le jojo nei poanaje, ojaya huapa pojjeama. Jamajjeya onijje nequi tiitiije'yo. Eyacuiñajji jamaya jjashahuabaqui'ya poa yahuajo nei nei, meshi pana jjimahuajo. ³⁵Jamaya poaje'yo jjeya miquianajo, miya quea pame nee nee poanaje. E'e, yahuajo eya quea shoe poajo, eya bobi quianaje miyaya. Eya quea naba taja poajo, ena quianaje miyaya. Eya miquianajaya ba jjima poanaje. Jamatii miquea equi yasijke dobiqui meenaje. ³⁶Eya daquima'

poajo, miquianaaya daqui huosho meenaje. E emanojaajo, ejeanobiajaajo pe'a'i, miquianaya poeyanaje enijje jjapeequiya" jamaya eyaya aje'yo —Jesosa poanaje.

³⁷—Majoya dejja pame cuaa eya huohui'ajja caje jama ba'a: "¿Ache shono acuae ecuaaya miya bobianaje, miya quea shoe poanajejo? ¿Ache shono ena quianaje miya quea naba taja poanajejo? ³⁸ ¿A'a miya ecuanaja equi yasijje dobi meenaje? ¿A'a daqui huosho meenaje miya daquimajo? ¿Ache shono shai ecuaaya jamaya anaje? ³⁹ Mi emanojaajo, ejeanobiajaajo pe'a'i, ¿a'a ecuana mi que poeyanaje? ¿Ache shono acuae jja jama ecuaaya mi anaje so'o?" Jamaya dejja pame cuaa quijje huohui'ajja caje eya eyajo.

⁴⁰—Jamajjeya eyaya, Emeshi Mese neiya saja'aje'yo quijje eyajo jama ba'a: "Miyaya ecuea huapa pojjeama aema' yahuajo jaahuananajejo, eya jaahuananaje. Jamajjeya ecuea eba miquianaya ecuea epeejji e'e jojo nei poanaje. Ecuea ejjashahuabaqui'yojji jayojja jama ca ca miyaya a'yonaje".

⁴¹—Mayoja eyaya, Emeshi Mese neiya dejja tai cuana shanijke nequi tecueaje'yo jama ba'a: "¡Poquicue miya! Cajaa'yo ca mi ca ecua. Edosiquiana etii Satanasa, eshahua cuana pe'a'i cuaqui yasijje poquije'yo. Miya cuana pe'a'i anije'yo cuaquijo tii. ⁴² Yahuajo eya quea shoe, bobia jjima poanaje miquea. Eya quea naba taja, ena quia jjima poanaje. ⁴³ Eya miquea eba pojjeama, miquea equi yasijje dobi mee jjima poanaje. Eya daquima', daqui huosho mee jjima poanaje miquea. E emanojaajo, ejeanobiajaajo pe'a'i miya poe jjima poanaje e jaahuanaa" jamaya eyaya aje dejja mimishi cuana —Jesosa poanaje.

⁴⁴—Majoya dejja mimishi cuaa eya huohui'ajja caje jama ba'a: "¿Ache shono acuae miya bobia jjima apoa? ¿Ena cuana quia jjima apoa? ¿A'a ecuanaya miya ecuanaja equi yasijje dobi mee jjima apoa? ¿A'a daquimajo, ecuanaya daqui huosho mee jjima apoa? ¿A'a mi emanojaajo, ejeanobiajaajo pe'a'i, a'a miya ecuanaja jaahuanaa jjima apoa? ¿Ache shono shai, de?" dejja mimishi cuaa huohui'ajja caje —Jesosa poanaje—. ⁴⁵ Majoya eyaya, Emeshi Mese neiya saja'aje'yo jama ba'a: "Ecuea huapa pojjeama cuanajje jaahuanaa jjima. Jamajjeya miquianaaya eya cajaa a'yonaje pe'a'i".

⁴⁶—Majoya eyaya, Emeshi Mese neiya dejja quea mimishi cuana quea huesha nee huoojeaje'yo cuaqui yasijje edobiqui'yojji. Quea nee nee po tiitije'yo. Dejja pame cuana ebianeijje nequi ca ca ba'e tiitii meeje'yo Eyacuiñajji nijje —jamaya huohui canaje Jesosaa.

Jodio etii cuana jjashahuabaquinaje Jesosa quecua'yojji
(Macoso 14.1-2; Noca 22.1-2; Huani 11.45-53)

26 ¹Majoya Jesosaa o shajja'ajjajji cuana jjabahuejjaqui mee canaje. Pea esohui huohui canaje jama ba'a: ²—Quijje pishana, becanejjiji pe'a'i cahuime po majje, Jodio cuana jjashahuabaquije o'oya etiiquianaja bacua cuana yahuajo Ejitojo manoy'yo jjima poajo. Jamajjeya ojee ijjiatijjiaje o'oya quea bei nee. E'e, yahuajo nei nei Ejito meshijo ani Jodioja ebacua

ejja cuia'yo jjima aca poa esohuidojijiya. Ma shejo ijija jjimahuajo Jodio cuaa eya iña majje dejja quea mase yasijje quia caje'yo equecua'yojji. Acui ecueata'apeejo me caca majje ba'ehuanasohuajea caje'yo —Jesosa poanaje.

³Majoya Eyacuiñaggi nijje emimijji etii cuana, Jodio dejja jaahuanajji cuana pe'a'i ojee jjachichaquinaje Eyacuiñaggi nijje emimijji etiija equi aijo, Caipa bajjanija equijo. ⁴Caipa jjashahuuba taiquinaje pea cuana huoojeajji Jesosa iñajji, quijje equecua'yojji. ⁵Jodio etii cuana ojee miminaje jama ba'a: —Jesosa quehua neijke iñacue ojjaña Jodio cuana jjachichaqui jjimahuajo, ojee ijija'ijija jjimahuajo! ¡Oya iñacue jjeyahua nei, de! Quijje pishana ojjaña ojee ijija'ijija anijo, ecuanajaya Jesosa e'iñaggi pojjeama. Chojja. Ojjaña Jodio cuana quea quene nee nee ecuana nijje po chana', Jesosa onajaya quea nahue nee equecua mee'yojji. Quea shajjaquijjo po chana' pe'a'i —jamaya acanaje Jodio etii cuaa.

Jesosa Betaniajo ani sapa sha canaje shiyeshiyeya eponaa

(Macoso 14.3-9; Huani 12.1-8)

⁶Jesosa Betaniajo aninaje dejja Simoni bajjanija equijo. Yahuajo nei Simoni quea mano nee nee batata epo'yo poa, ma dejja cuaa jjajeaqui mee'yo jjima acani. Jesosaa oya yahuajo huaquia mee ca'yonaje, jjajeaqui mee ca'yonaje. Simonija equijo Jesosa e'anioque aninaje. Ijjia'ijija aninaje bobi ijijajji pejjejo. ⁷Jesosa ijija'ijija anijo, oe epona poe'yonaje o que. Ohuaya tahuoo quea nahue neejo shiyeshiyeye ye canaje Jesosa huojja shajji. Huojja sha canaje. ⁸Ba majje Jesosa shajja'ajjajji cuaa epona tecuea canaje: —¿Apiojji acuae miyaya shiyeshiyeya shaña so'o? ⁹¿Sha jjima yajjijo poso ca mi ca oe shiyeshiyeye dojo meenaje esodojjo quea huiso sosejje? E'e, aema' cuana huasijje esodojjo equiajji poso —Jesosa shajja'ajjajji cuana poanaje.

¹⁰Jesosaa oya cuana shajja'ajja majje huohui canaje: —¿Apiojji acuae epona tecueaña so'o? E'e, eya ohuaya huojja sha canaje. Jamaya quea pame nee. ¹¹Aema' cuana minijje po tiitije'yo. ¡Oya cuana jaahuanayocue quijje pe'a'i! Eya ca ca nequi tiitii ajja minijje. ¹²Eya huojja sha cajo epona jjashahuubaquinaje jama ba'a: “Jesosa mano'yo jjimahuajo eyaya oya huojja shaña shiyeshiyeya, onaja mojea jjimahua shaña” poanaje epona —Jesosaa acanaje—. ¹³Jamajjeya quijje ojjaña meshijo ecuea esohui huohui caje. Jiquio eponajeo huohui caje pe'a'i jama ba'a: “Oe eponaa Jesosa huojja sha ca poa shiyeshiyeya, quea jeajojo”. Jiquio epona pajea'yo ajja tii tii, e'e jojo nei —jamaya Jesosaa acanaje.

Jodasaa onaya iña meesahua canaje Jesosa

(Macoso 14.10-11; Noca 22.3-6)

¹⁴Yaninaje quea huiso Jesosa shajja'ajjajji cuana, 12. Oe nei Jodasa Isicanio te bajjani poquinaje Eyacuiñaggi nijje emimijji etii cuana huasijje. ¹⁵Miminaje jama ba'a: —Eyaya miya Jesosa iña mee sahuaje. ¿Ache sose huiso acuae mo ya oe sosequiae'yo so'o?

¹⁶Onaaya saja'a canaje jama ba'a: —Quea huiso, 30 esodojjo quea nahue nee sosequiaje'yo miya.

Jamajjeya Jodasa jjashahuaba neineiqui aninaje achajja iña meeme aje so'o cuana: —Caba'ajjaquisahua —poanaje.

Jesosaa o shajja'ajjajji cuana bobí ijja mee canaje

(Macoso 14.12-25; Noca 22.7-23; Huani 13.21-30; 1 Conitio 11.23-36)

¹⁷Jodio cuana quea bihui ojee ijja'ijjianaje yohua shejo ba'a esohuidojoojjija yahuajo nei etiiquianaja bacua cuana cui'a'yo jjima ñajjaja na' esecuejo ecuiapepa ba majje shejo. Pahui quea ca'a eshejje meejjii chama' ijja ca poa. Ebionei epoja e'ijja'ijjiajjijo, Jesosa que poe majje o shajja'ajjajji cuua huohui'ajja canaje jama ba'a: —Jesosa, ¿ache equijo acuae seya pahui ca'a ijjaiae so'o? ¡Ecuana huoojeacue aquiana iyajea, miquiana ishoajji!

¹⁸Jesosaa huohui canaje jama ba'a: —¡Poquicue miya cuiñajji yasijje! ¡Jomajo ecuea epeejjji baquicue! Onijje mimicue jama ba'a: "Ecuana sohui huohuijjii jama poanaje ba'a: —E mano'yajo aje apoa poaje. Miquea equijo eyaya e shajja'ajjajji cuana nijjeya pahui ca'a ijjaiae'yo, esohuidojoojjija etiiquianaja bacua ejja cuana cui'a'yo jjima poa shejo" acue —Jesosaa huohui canaje.

¹⁹Jamajjeya o shajja'ajjajji cuana ojaya ehoojea'yo jayojjaya jama poanaje. Bobi iyajea canaje pahui ca'a ijjaajji.

²⁰Majoya sinecua neijo Jesosa o shajja'ajjajji cuana nijje anioquenaje bobí ijjaajji pejjejo ijja'ijjiaa. ²¹Ojee ijja'ijjia'anijo Jesosa jama poanaje ba'a: —E'e jojo nei jiquiojo ani oe dejja poquije ona jjequiya e iña'yoyji. Ohuaya eya huohui caje cuana.

²²Eshajja'ajjajji cuana quea yeno nee nee poanaje. Pea mimiajopea poanaje jama ba'a: —Ecuea Emeshi Mese, eya ca ca o jayojja pojjeama, e'e jojo nei.

Jamaya ojjaña miminaje. ²³Majoya Jesosa onijje miminaje jama ba'a: —Oe dejja e shajja'ajjajjiya joya enijje pahui shapeshi po'aniya eya onaya cuana iña mee caje'yo. ²⁴E'e, yahuajo nei Eyacuiñajji esohui tehuejji cuua esohui tehue ca poa jama ba'a: "Quijje oe dejja eyacuiñajjiya huoojea'yo ojjaña jaahuanajji onaya cuana iña meesahua caje'yo equecua'yoyji". Jamajjeya ma dejja quijje quea yeno poaje.

Jjashahuabaquije jama ba'a: "¿Apiojji shai eya ecue naeya mejo ca poa? Eya ca ca nequi sa po ajja. Ecuea ejjashahuaba taiquijjijo mano'yo sa poani" oya poaje. Quijje oya quea nee nee po tiitiije'yo —Jesosa poanaje.

²⁵Majoya Jodasa Jesosa nijje miminaje jama ba'a: —Emeshi Mese, eya ca ca o jayojja pojjeama. Eyaya miya onaya e'iña meesahuanajji pojjeama —poanaje.

Jesosa onijje miminaje: —E'e, Jodasa, miya jama quea tai poaje, e'e jojo nei —Jesosa poanaje.

²⁶Majoya ojee ijja'ijjia'anijo tii Jesosaa pahui ca'a jjeshe canaje. Eyacuiñajji bihuia majje, pahui mijisisi majje quia canaje o shajja'ajjajji cuana. Jama huohuime acanaje Jesosaa ba'a: —Ijjiacue! Jiquio ecuea eyami —poanaje.

²⁷Pahui ij{jia majje caneco jjeshe canaje, Jesosaa. Eyacuiñajji bihuia majje quia canaje ojjaña o shajja'ajjajji cuana. —¡Ishicue! Jiquio ecuea ena!. ²⁸Ecuea ena' cuayaquiaojo eya manoje'yo. Jamajoya eyaya Eyacuiñajji esohui eyacua jayojjaya aje. E'e, ojjaña ecuea epeejji mimishi cuana cuijeaje'yo. ²⁹Jjeya eyaya jiquio jjonojjajja na, uva na e'ishi o'oyajji pojjeama miquiana nijje; eya manoje'yo. Quijje nei poe o'oya majje eyaya jiquio ishije o'oya miquiana nijje. E'e, eya poe o'oyajo ecue Chiiya eya ojjaña huoojea'yojji po mee caje'yo. Ojjañaa eya shajja'ajja caje'yo —jamaya Jesosaa acanaje.

Jesosa miminaje Peno nijje

(*Macoso 14.26-31; Noca 22.31-34; Huani 13.36-38*)

³⁰Majoya ojee sohuicuaya majje poquinaje eyiyo huasijje Omimo yiye yasijje.

³¹Majoya Jesosa o shajja'ajjajji cuana nijje miminaje jama ba'a: —Jiquio mecajje ojjaña miquianaya enijke jjapeequi pajeaje'yo. E'e, yahuajo Eyacuiñajji esohui tehuejji cuaa tehue ca poa ejo: Eya ñajjajja cuiñajji jayojja jama poaje. E mano'yajo ecuea epeejji cuana ñajjajja cuana jayojja jama poaje; jjajeaaajaquinanaje'yo. Etehue'yo yahuajo nei nei jama poa ba'a:

“Quijje eyaya ñajjajja cuiñajji jaahuana neinei ajja. Jamajjeya onaaya oya cuia caje'yo. Ñajjajja cuiñajji chamajo, ñajjajja cuana jjajeaaajaquinanaje'yo”. Jamaya aca poa yahuajo nei nei —Jesosa poanaje—. ³²Jamatii, shequi o'oya majje eya poquije Janinea meshi yasijje. Jomajo aje mi poeyajo ishoañaquije —Jesosa poanaje.

³³Penohua Jesosa jama acanaje ba'a: —E'e pojja'a pea cuana minijje jjapee tiitiiqui'yo ajja. Eya ca ca pea jayojja jama pojjeama. Eya jjapee tiitiiquije'yo minijje —Peno poanaje.

³⁴Jesosaa Peno jama acanaje ba'a: —Eyaya e'e jojo nei miya huohuaña Peno, jiquio mecajje tii cachina yahue pea beca peejjima taaame po jjimahuajo, pea beca peejjima huohui'ajjame amajje miya ejo poaje jama ba'a: “Chojja, ¡ecuea Jesosa ba jjima nei nei!” miyaya saja'ame aje quea meteya jjeojo —Jesosaa Peno acanaje.

³⁵—Chojja, Jesosa —Peno poanaje—. E'e pojja'a eya minijje jjapeequianijo, pea cuaa eya cuiajea caje'yo. Matii ¡ecuea ca mi ca epajea'yojji pojjeama!

Oya jayojja pea cuaa jama acanaje pea'ai ba'a: —E'e Jesosa, ¡ecuanajaya ca mi ca epajea'yojji pojjeama tii!

Jetesemani quejo Jesosa miminaje oja Chii nijje

(*Macoso 14.32-42; Noca 22.39-46*)

³⁶Majoya Jesosa o shajja'ajjajji cuana nijje Jetesemani que yasijje poquinaje. Jesosa jama poanaje ba'a: —¡Anioquecue jiquiojo tii! Jocuama eya poquije ecue Chii nijje mimiya.

³⁷Jesosaa Peno, Huani, Satiaco pea'ai dojo canaje jocuama, ma Semeneoja bacua ejja cuana bajjani Huani, Satiaco pea'ai. Jesosa

jjashahuabaquinaje quea yeno nee nee. ³⁸Jamajjeya onijje jama poanaje ba'a: —Eya quea yeno nee nee, emano ca'yojji jayojja. ¡Anioquecue enijje; a'a cahuijji! —Jesosa poanaje.

³⁹Jesosa cuama pishana ani poqui majje ecui'oshajjajo nequinaje. Oja Chii nijje miminaje jama ba'a: —Ecue Chii, miquea ejjashahuabaqui'yojji jayojja jama aje'yo eyaya. Miyaya eya huoojeanaje dejaja mimishi cuanajo mano'yohua. Quea camaja nee nee ejo. ¿A'a miyaya che onaaya eya quecua mee'yo jjima aje so'o? ¿A'a onaaya eya iña mee'yo jjima aje'yo? Jamatii jmiquea ejjashahuabaqui'yojji jayojja jama acue! ¡Ecuea ejjashahuabaqui'yojji jayojja jama a'a ajji! —Jesosa jamaya poanaje.

⁴⁰Majoya oya poqui o'oyanaje o shajja'ajjajji cuana que. Ba cañaqui'yonaje cahuijaa. Tecue'ama Peno nijje miminaje jama ba'a: —¿A'a mi cahuijaa? ¿A'a che enijje cahui jjima nequi jjima so'o? ⁴¹¡A'a cahuijji! ¡Eyacuiñajji nijje mimi majamajacue! Jamajoya pea cuaa miya quea mimishi epo mee'yojji pojjeama. E'e, miquianaya enijje jjapeequi sa poani e'e jojo nei. Jamatii miya ca'a'ama; quea mimishi poaje o'oya pojja'a —Jesosa poanaje.

⁴²Majoya Jesosa poqui o'oyanaje jocuama pishana oja Chii nijje mimi o'oyaa. Mimi o'oyanaje jama ba'a: —Ecue Chii, eya ojjañaja mimishijo mano'yo ajjajo, ¿a'a onajaya mimishi ecuijea'yojji pojjeama poaje'yo? Jamajjeya jmiquea ejjashahuabaqui'yojji jayojja jama acue! —Jesosa poanaje.

⁴³Oja Chii nijje mimi'yo majje Jesosa poqui o'oyanaje o shajja'ajjajji cuana que. Oya cuana quea cojja jee mano poanaje; cahui o'oyanaje. Jamatii Jesosaa onijje mimi jjima; shequi mee'yo jjima acanaje. ⁴⁴Ona jeana o'oya majje jocuama pishana poqui o'oyanaje Jesosa, oja Chii nijje mimi o'oyaa. Oya jayojja mimi o'oyame poanaje. ⁴⁵Mimi o'oya majje poe o'oyanaje o shajja'ajjajji cuana que. Onijje mimi o'oyanaje: —¿A'a mi cahuijaa tii? ¿Jomishocajaa pojja'a ca mi ca oe? Jjeyahua nei dejja eya onaya iña meesahua caje'yo. ⁴⁶¡Cua'a, jjeya nei ecuea epeejji nisho poeje'yo! Joya aje poeje ba'a.

Jesosa iña canaje

(Macoso 14.43-50; Noca 22.47-53; Huani 18.2-11)

⁴⁷Jesosa mimianijo tii, Jodasa o que poeyanaje, ma eshajja'ajjajji cuana sohuihuohui poequi yasijje. Oya aje oe Jesosaja epeejji pealai poanaje; pea 11 nijje nequinaje tii. Quea huiso nee nee dejja nijje Jodasa poeyanaje; yohuajji poeyanaje acuijji, baajji, mejejji pealai poeyanaje. Jodio etii cuaa, Eyacuiñajji nijje emimijji etiyya pealai ojjaña huoojea canaje Jesosa iñaa. ⁴⁸Jodasaa, Jesosa e'iña meejiyi yahuajo jama huohuime aca poa ba'a: —¡Bacue oe! Eyaya oe dejja ba majje cuiapashi nishoje. ¡Majoya oe miquianaaya iñacue!

⁴⁹Jamajjeya Jodasa Jesosa que jjanequichipiquinaje: —¡A'a mi ecuea Emeshi Mese nei jiquio! —amajje cuiapashi nisho canaje.

⁵⁰Jesosaa acanaje: —Ecuea epeejji Jodasa, ¿ajeo ami poeyanaje? —Jesosa poanaje.

Pea dejja cuaa ba majje, Jesosa que poe majje iña canaje edojoji. ⁵¹ Jesosa iña cajo, oja epeejjiya onijje nequiya baa iña canaje. Onaja sapa jajapojojeajji nisho shajja jajasejja canaje, Eyacuiñajji nijje emimijji etiija echacojjii poanija eshajja.

⁵²—Chojja. ¡A'a jja oe jajajji! —Jesosaa oya huohui canaje—. ¡Baa oe ejee yasijje nequianobia'yocue! Ojjaña jjajajaquiani manoje'yo yacua ca'yajje. ⁵³ ¿A'a miquea eba pojjeama eyaya ecue Chii ehuohui jojjemo ohuaya esohuidojoji ache huiso nei nei huoojea came jjeyahua nei, e jaahuanaa? ⁵⁴ Jamatii eya jama po ajja. E'e, yahuajo nei Eyacuiñajji esohui etehue'yo jama tehueme ejo aca poa ba'a: “Onaaya iña mee majje dojo caje emano mee'yojji”. Jamaya ejo yahuajo nei tehue ca poa. Jamaya eya acaje'yo cuaa jjeya —Jesosa poanaje.

⁵⁵ Jamajjeya Jesosaa ojjaña dejja ejjachichaqui'yo nequi yasijje huohui canaje: —¿Apiojji miya poeyanaje baajji, acuijji, mejejji pe'a'i e iñaa? ¿A'a cuae jja iña siipojji so'o? Ojjaña pojjajo eya ojjaña nijje esohui huohuijji po nequinaje Eyacuiñajji equijo. Jamatii eya miquianajaya iña jjima poanaje. ¿Apiojji miquianaya mecalle poeyanaje e iñaa? ⁵⁶ Jamatii jamaya nequiana poani. Miquianaaya ca mi ca oe Eyacuiñajji esohui huohuijji etehue'yo yahuajo nei nei miquianajo jayojja jama quea tai aña.

Majoya o shajja'ajjajji cuana cuajicuajinanana; Jesosa jeajea canananaje.

Jodio etiiya Jesosa cuia mee canaje

(*Macoso 14.53-65; Noca 22.54-55, 63-71; Huani 18.12-14, 19-24*)

⁵⁷ Jamajjeya joya Jesosa iñajji cuaa oya dojo canaje Eyacuiñajji nijje emimijji etiija equi yasijje, Caipaja equi yasijje. Jocuama Jodio cuana jjachichaquinaje, Jodio etii cuana, Moisesija etehue'yo huohuijji poani pe'a'i. ⁵⁸ Penohua ca ca equijje aca poquinaje Jesosa onaa dojo caje. Caipaja equi yasijje Peno nequiñaquinaje. Dobiquinaje epeeyi nequi yasijje, sohuinana cuana nijje anioquenaje ae onaa Jesosa acaje ebajji.

⁵⁹ Eyacuiñajji nijje emimijji etii, ojjaña Jodio etii cuana, Jodio esohui huohuijji poani pea'aiya ojee mimimiminaje Jesosajo, ojjaña ejjachichaqui nequiya o quecu'a'yo sa acani. Jamajjeya sa'ajja canaje dejja cuana Jesosa huohuijji nisho, Shomano emeshi mese Pinato bajjani yasijje dojo majje Jesosa huohuijji nisho: —Jesosa ca ca jama acanaje ba'a —siajje yajji.

⁶⁰ Quea huiso dejja Jesosa siajje acanaje. Jamatii peaa siajje'a, peaa siajje'a acanaje Jesosajo. Chama' beca oya jayojja mimime epoiji Jesosa mano mee'yojji. ⁶¹ Quijje yejje nei beca dejja poeyanaje e'e jojo nei jayojja emimijji. Jama poanaje ba'a: —Eyaya oya shajja'ajjanaje. Jama poanaje Jesosa ba'a: “Eyaya Eyacuiñajji equi jeabichajeje'yo. Jeabichaje'a'yo majje pea equi iyaje'yo pea beca peejjima cahuime”.

⁶² Ma shajja'ajja majje Eyacuiñajji nijje emimijji etiiya nequisohua majje Jesosa huohui'ajja canaje: —¿A'a pa miya jama poanaje? ¿Jesosa, a'a acuaeya dejja cuana miyaya saja'aje'yo so'o?

Jamatii Jesosa jjamimisaja'aqui ajja poanaje.

63 Jamajjeya Eyacuiñajji nijje emimiji etiiya huohui neinei canaje: —¡Eyacuiñajji eshe nequi tiiya eseya ba canijo, ecuana huohuicue e'e nei! ¿A'a acuae miya Eyacuiñajjija Bacua Ejja nei, oja huoje'a'yo ojjaña jaahuanajji? ¡Huohuicue mo oe!

64 Jamajjeya Jesosaa huohui canaje: —E'e, joya ecua miya mimiani jayojjaya eya. Cuanaya eyaya miya e'e nei huohuiaña: Quijje miyaya eya baje'yo ecue Chii nijje ebianeijje ani. Oya quea ca'a nee nee enequi tii tii. Eya miquianaaya baje pea'ai poeje o'oya; bo biajje poeje'ylo —Jesosa poanaje.

65 Shajja'ajja majje Jodio etii quea quene nee nee poanaje. Quea quene nee nee po majje ojaya daqui, oja huosho ba'e daqui isajea canaje. Jodio dejja jamaya oja daqui isajea cani quea quene po majje. Ojjaña cuana huohui canaje jama ba'a: —De, ¡pea dejja a'a iyaajji Jesosa huohuijj! Jamatii. ¡Oya Jesosa mimiqui Eyacuiñajjija Bacua Ejja miame! ¿A'a acuae miquiaaya shajja'ajjanaje oja sohui? Jamajjeya ¿yajja acuae seya aje so'o, de, Jesosa?

66 —¡Oya oe manojea mee'yocue; quea tai ca esohui acanaje! —jamaya acanaje Jodio dejja cuaa, Jesosa Eyacuiñajjija Bacua Ejja pojjeama posojo.

67 Majoya aje oe Jodio dejja Jesosa cojja cuichojea canaje. Ejjachichaqui nequiya cuia canaje pea'ai emeya. 68 Cuia majje huohui'ajja canaje: —¡Miya Eyacuiñajjija huojea nei jjabaqui majje jja ca oe huohui pocue! ¿Aya acuae mi cuia canaje so'o? —acanaje cuaa.

Penohua siajje acanaje Jesosa oja ba jjima nisho acanaje (Macoso 14.66-72; Noca 22.56-62; Huani 18.15-18, 25-27)

69 Ojjaña cuaa napa caqui Penohua ba canaje Jesosa; esecuejo sohuinano pejejo e'lanioque aniya ba ca'aninaje. Oe echacojjija ahuema'aniya Peno ba majje huohui'ajja canaje: —¡Miya ca jja mi ca oe Jesosa nijje aninaje Janinea meshijo!

Eponaa huohui cajje ojjaña cuaa Peno bajea canaje. Jamajje Peno metenaje. Jama saja'amie acanaje ba'a: 70 —¡Chojja, ecuea oya ba jjima! ¿Ajeo acuae mi mimiani? —Peno siajje poanaje. 71 Majoya Peno epeeyijo nequi cuayaquinaje quea mete jjejojo. Pea epona echacojjija Peno ba canaje esecuejo nequi. Ohuaya ojjaña dejja cuana huohui canaje: —E'e jojo nei oya Jesosa nijje aninaje, ma Nasanenajo ba'e nijje —poanaje.

72 —Chojja, ecuea oya ba jjima nei nei. Eyacuiñajjija eba eya e'e jojo nei mimiani —Penohua saja'a canaje.

73 Quijje pishana beca cuana Peno que ojee nequi jjanequichipiquinaje. Jama poanaje ba'a: —E'e nei miya Jesosaja epeejjii pea'ai pea cuana nijje. Jamaya miquea emimi, pea Janinea meshijo ba'e jayojja jama miya mimiani, de —poanaje.

74 Ojaya esohui shajja'ajja majje Peno quea mete nee nee poanaje; ona nijje mimijainaje: —¡Siajje miya poani! Jiquio dejja ecuea ba jjima. Eya e'e jojo nei pojjeama poani jojjemo Eyacuiñajjija eya mano mee ca'yome —Peno poanaje. Jamatii Peno siajje poanaje.

Peno jamaya poajo, cachina yahue taaaanje. 75 Cachina taaaajo Penohua shahuaba ca'yonaje ma Jesosaa oma mecajje o jama acanaje jama ba'a:

—Peno, cachina yahue taaa jjimahuajo miyaya eya ba jjima nei nei nisho aje'yo, ebeca pee peejjima huohuime aje'yo —jamaya Jesosaa Peno acanaje.

Jamajjeya jjashahuabaqui majje Peno quea yeno nee nee poanaje; pa neinei poqui'yonaje Jesosa ba jjima nisho epo jjejojo.

Jesosa emeshi mese Pinato huasijje dojo canaje
(*Macoso 15.1; Noca 23.1-2; Huani 18.28-32*)

27 ¹Mecajjeahua ojjaña Jodio etii cuana, Eyacuiñajji nijje emimiji etii cuana ojee miminaje Jesosajo: —¿Achajja amajje acuae seya Jesosa quecua meeje'yo so'o? Cua'a, ¡ejjaquecua meequivi! —poanaje.

²Jamajjeya Jesosa me jeyo majje dojo canaje Shomano emeshi mese Pinato bajjani yasijke.

Jodasa jjanaayisibijeaquei'yonaje Jesosa quecua mee'yo majje quea yeno jjejojo
(*Hechos 1.18-29*)

³Jamajjeya Jodasa, ma Jesosa iña meesahuajji epo Jesosa quecua caje'yo ba majje quea yeno nee nee poanaje. Poquicuajinaje Jodio etii yasijke, Eyacuiñajji nijje emimiji etii yasijke pealai. ⁴Huohui cañaquinaje: —Eya Jesosa iña mee majje quea mimishi poanaje; oya ca ca Jesosa mase'ama nei nei poanaje, mimishi'ama nei. ¡Ma'aje miquea esodojo, 30, ma miyaya eya quianaje Jesosa iña meesahua sosejje!

—E'e pojala, de. E'e jamatii, Jesosa caquecuaje cahua —Jodio etiiya saja'a canaje—. Miquea mimishijo ca jja mi ca jjashahuabaquiani, de —poanaje.

⁵Jamajjeya Jodasaa esodojo meshi yasijke huojojeajea canaje. Pa poquinaje ebio huasijje jjanaayisibijeaquei'yohua. Mano'yonaje. Chama'yo tii Jodasa po'yonaje.

⁶Jodio cuaa aje oe esodojo meshijo ani chicha canaje: —¿Yajja acuae jja seya jiquio esodojo aje so'o? Jesosa sosequia'yojji ya ca coma, de. Eyacuiñajji equi yasijke iya sa po ajja. Jamaya pojjeama eseyaya aña —poanaje.

⁷Jamajjeya mimimimi majje meshimisi iñabajiji meshi, Apaneno meshi jjeshe canaje emano ohuajeajji, Jodio pojjeama ohuajeajji, ma 30 esodojo sosejje jjeshe canaje. ⁸Jjeya ca ca yohua bajjani ba'a ma ena' cuayaquinaje meshi bajjani'yo, Jesosaja ena' cuayaquinajejo.

⁹⁻¹⁰E'e, yahuajo nei nei Eyacuiñajji esohui huohujji Jenemiaa tehue ca poa jama ba'a:

“Ecuea Emeshi Meseya eya huohui canaje: —¡Ma 30 esodojo sosejje meshi jjeshequicue! —aca poa—, ma bajjanija ba'a meshimisi iñabajiji poanija meshi. Mahuiso esodojo quia canaje Jodio cuaa Eyacuiñajji huoojealyo Quito iña meesahuajji, equecua'yojji”.

Jamaya Jenemia poa yahuajo nei nei.

Emeshi mese Pinatohua Jesosa ba canaje
(Macoso 15.2-5; Noca 23.3-5; Huani 18.33-38)

¹¹ Jamajjeya Jesosa emeshi mese Pinato huasijke dojo canaje,eme jeyo. Pinatohua ba majje huohui'ajja canaje: —¿A'ya acuae mi so'o? ¿A'a miya Jodioja Emeshi Mese poaje'yo?

—E'e, joya ecua miyaya huohuaña jamaya epo'yoji eya —Jesosaa saja'a canaje.

¹² Jodio etii cuaa, Eyacuiñaggi nijje emimiji etiiya pea'ai siajje acanaje Pinato Jesosajo. Jamatii Jesosaa saja'a jjima acanaje. ¹³ Jamajjeya Pinatohua huohui'ajja canaje: —¿Yajjajje acuae mi mi jjasaja'aquiani so'o? ¿A'a jje shajja'ajja jjima?

¹⁴ Chojja, Jesosa jjasaja'aqui ajja nei nei. Ba majje Pinato jjashahuuba neineiquinaje: —¿Yajjajje shai Jesosa jjasaja'aqui ajja, de?

¹⁵⁻¹⁶ Jamajjeya Pinatohua niñeba ca'yonaje jama ba'a: —Ojjaña eshequiaja eyaya oe Jodio dejja jeacuaya'yaña Jodio quea bihui nee poanijo. E'e, ojjaña Jodio cuana jjashahuubaquiani jama ba'a: Yahuajo Ejito meshijo Jodio etiiquianaja bacua ejja cui'a'yo jjima aca poa esohuidojoxjiya, ena' ecuiapepa jojoya —Pinato poanaje.

Jiquio shejoya Pinatohua oe Jodio dejja ejeanobia nequi huoojeacuayajea mee ca'yaninajje. Jamajjeya oya Pinato jjashahuubaquinaje: —E'e, eyaya oe Jodio huoojeacuayajea meeje'yo jjeyahua nei. Jesosa pojja'a pichojea meeje'yo. Pea yani Mashama bajjani, ojjañaja eba nei. Oya ejeanobia nequi quea masejojo. ¿Ache dejja shai Jodio cuaa sa cani so'o? Caba'ajja sahua —jamaya Pinato jjashahuubaquinaje.

¹⁷ Jamajjeya Pinatohua ojjaña Jodio cuana ehuohui'ajjajji iyaa canaje. Jjachichaquiajo huohui'ajja canaje: —Jjeyahua nei eyaya jeacuayajeaje'yo oe Jodio dejja. ¿Ache acuae jja oe jeacuayajeaje'yo so'o? ¿A'a Mashama? ¿A'a Jesosa Quito pichojeaje'yo? —poanaje.

¹⁸ Pinatoja eba poanaje Jodio etiiya quea quene nee poani ojjaña cuana Jesosa nijje jjapeequianijo. Jamajjeya Jesosa iña mee canaje equecuaje'yojji, Jodio etiiquiaa.

¹⁹ Emeshi mese chacochacoañani yasijke Pinato Jesosa nijje mimimiminequianijo, oja huanaseya pea echacojji huoojea canaje Pinato huohuiya. Jama huohuime acanaje ba'a: —Huee, mecajje eyaya cahuibanaje Jesosa mimishi'ama nei nei. ¡A'a oya quecua mee'yojji! Eya quea mete ani ojo. E'e, jjacahuibaqui majje piopionaje quea mete jjejojo —Pinatoja huanaseya echacojji huohui mee canaje.

²⁰ Oja huanase quea mete poanijo, Pinatohua Jesosa pichojea'yo sa acanaje. Jamatii Jodio etii cuaa, Eyacuiñaggi nijje emimiji etiiya pea'ai ojjaña ejjachichaqui nequi taaa mee canaje: —¡Mashama oe huoojeacuayajea'yoce! ¡Jesosa a'a pichojeajji! ¡Quecuajea'yoce ca oma oe!

²¹ Jamajjeya Pinatohua: —¿Ache acuae jja oe pichojeaje'yo?

Jamaya acajje, taaa neinei canaje cuana: —Mashama, ¡Mashama jeacuayajea'yocue! —poanaje cuana.

²²—Jamajje ¿yajja acuae oe eyaya Jesosa Quito aje so'o? Eyacuiñajjiya huoojea'yo ojjaña jaahuanajji ca pa coma —Pinatohua huohui'ajja canaje.

—¡Me cacajeacue oe acui ecueata'apeejo! —acanaje cuaa.

²³—¿Yajja acuae jja so'o? ¿Yajjajo acuae jjaya quecua'yo sa aña Jesosa? —Pinatohua huohui'ajja canaje.

Jamatii taaa majamajanaje Jodio cuana: —¡Me cacajeacue oe; me cacajeacue oe Jesosa! —jama taaameya Jodio cuana poanaje.

²⁴E'e, Jesosa pichojea mee jjima acanaje cuaa; quea quene nee neejo janobajjima nei siasianaje; taaa nequinaje Jodio. Taaa majamajajo Pinatohua huoojea canaje ena eme shacuajji jjequiya. Majoya ojjaña cuanaja ebajji Pinatohua eme topo canaje: —¡Eyaya pojjeama me cacaje Jesosa emanoyojji! ¡Jamaya pojjeama ecuea esohui! ¡Miyaya ca jja ca oe jamaya aña! —Pinatohua acanaje.

²⁵Taaajebenaje ojjaña Jodio etii cuana: —E'e, ¡ecuaaya oya mano meeje'yo Jesosa; quea tai coma! ¡Oya mimishi'ama jojoya, ecuanajaya ebacua, osecua cuana pealai cacuia ca'yahua, Eyacuiñajjiya! —Jesosa quea mimishi poso acanaje cuaa.

²⁶Jamajjeya Pinatohua ohua sa canijo Mashama jeacuayajea mee ca'yonaje; Jesosa ca ca huoojea canaje cuiasejjajea majje me cacajeaa, emanoyojji.

Sohuinano soa neineinaje Jesusajo

(Macoso 15.16-20; Huani 19.2-3)

²⁷Majoya emeshi meseja sohuinano cuaa Jesosa dojo canaje emeshi mese chacochacoñañi equi doijo huasijke. Ojjaña sohuinano o que jjachichaquinaje.

²⁸Oja daqui huijjajea mee majje daqui huo'o nei huoshoo mee canaje emeshi mese nishoyajji. ²⁹Acuisha sipi majje sapahuahuo iya canaje emeshi mese jayojja nisho epojji. Emeshi meseja acui ejehuijjajja iñanequia mee canaje ebianei mejje. Majoya ecui'oshajjajo nequianaje ojjaña, Jesosa bihuijjaji nisho. Jama bihuija nishome acanaje cuaa ba'a: —¡Miya Jodioja Emeshi Mese quea ca'a nee! ¡Ba'e tiitii'yocue! —jama sajeameya anisho canaje cuaa Jesosa.

³⁰Majoya cuichojea canaje oja yami yasijje; acui ejehuijjajja jjequisejjajea ca'yonaje oja emejo nequi. Jjequisejjajea'yo majje sapa cuiape'ejea canaje. ³¹Ojo soa neinei'yo majje daqui huo'o nei huijjeajea canaje ca'yonaje; ojaya daqui quia ca o'yanaje. Majoya Jesosa dojo canaje me cacajeaa, ba'ehuanasohuajeaa pea'ai, sohuinano cuaa.

Jesosa acui ecueata'apeejo me cacajea canaje sohuinano cuaa

(Macoso 15.21-32; Noca 23.26-43; Huani 19.17-27)

³²Jenosanenajo aniya Jesosa dojo caje, ba cajjequinaje pea dejja Simoni bajjani, Sinene meshijo ba'e poe'yo. Sohuinano cuaa Simoni acui ecueata'apee

dojo mee canaje Jesosa quishishiji, Jesosa ba'ehuanasohuajeajji. ³³Jamaya oya poquinaje Jonijota eyiyo huasijke, Ese Ejaja esohuijo Esapa Jiji aniji bajjani yasijke. ³⁴Nequiñajuaqo Jesosa ishi mee'ajja canaje cuaa acuujajja na quea sese, quea pase. Ishi mee'ajja canaje quecua ca'yajje nee'ama epojji. Sio majje ishi jjima acanaje Jesosaa. Majoya me cacajea ca'yonaje. Me caca majje nequiasohuajea canaje. Majoya oja daqui cuana chicha ca'yonaje, sohuinano cuaa. Iyachicha'yo majje, hue'e nisho majje daqui majjo ca'yonaje, ojaya pojji epo'yojji. ³⁵⁻³⁸Etehue'yo o ba'e sapa biajje oja bajjani caca canaje, Jesosa bajjani, oya apiojji me cacajea ca'yonaje huohui epo'yojji. Etehue'yo jama poa ba'a:

OYA JESOSA JODIOJA EMESHI MESE EPO'YOJJI

Jesosa ba'e pejjejo beca siipojji pea acui ecueata'apee cuanajo ba'ehuanasohuajea pea'ai ca'yonaje, Jesosaja ebianei mijijije, pea shani mijijije. Majoya e'anioque aniya ojjaña cuaa ba neinei ca aninaje oja epeejjiya eba'ehuanaoquea ca'yo poajejje.

Jeijojjije poquije Jesosa nijje mimijajinaje cuana (Salmos 22.7; 109.25; Mateo 26.61)

³⁹Pea dejja cuaa ejiojjije poquianiya Jesosa que poe majje esapa jeacajjacajja canaje, soa huisahuisa nequinaje. Jama mimijajime poanaje ba'a: ⁴⁰—¿A'a acuae oe miyaya Eyacuiñajija mei equi iñajeabichajea'yo majje pea equi iyaje o'oya so'o pea beca peejiima cahuime? ¡Ba'ajja socue! Ache ba'ajja; miya Eyacuiñajija Bacua Ejja nei jjabaqui majje ca oe ;acui ecueata'apeejo ba'e nequioque'ajja'yo socue emano'yojji pojjeama! —poanaje cuana.

⁴¹Jamaya pea'ai Jodio etii bajjani cuaa, Moisesija etehue'yo huohuijji cuaa, Eyacuiñajji nijje emimijji etii cuaa pea'aiya Jesosa niñeba canaje: ⁴²—¿A'a Jesosa ojjaña jaahuanajji epo'yojji? Oya ona nahuejji pojjeama. Oya ca ca oma nequioque'yo jjima poani, de. ¿A'a acuae jja oe oya Jodioja Emeshi Mese poaje'yo? ¡Jjaba'ajjaqui socue! Jodioja Emeshi Mese nei epo'yojji jjabaqui majje ;acui ecueata'apeejo ba'e jja ca oe canequioqueahua jjeyahua neiya ecuanaja ebajji! Ba majje ecuaaya: "Jesosa e'e jojo nei Eyacuiñajija Bacua Ejja poanaje" aje'yo. ⁴³Ohuaya: "E'e, eya ca ca iña Eyacuiñajija Bacua Ejja; ohuaya eya jaahuanana cani" acanaje yahuajo. Jamajjeya oya Jesosa Eyacuiñajija quea boti nee neejo, ¡Eyacuiñajjiya oya canahue cahua jjeyahua nei! —Jodio cuana poanaje.

⁴⁴Siipojji cuaa ma o pejjejo eba'ehuanasohuajea ba'eya pea'ai Jesosa jamaya niñebame acanaje, quea huiso nee.

Jesosa mano'yonaje (Macoso 15.33-41; Noca 23.44-49; Huani 19.28-30)

⁴⁵Majoya eshequi biacojjajja nequijo shequima' jayojja poanaje; quea misi nee poanaje ojjaña meshi yasijke. Quijje eshequi jjajeapaaqi'yo majje jiji o'yananje. ⁴⁶Sinecua, quea misi poajo Jesosa quea yeno nee neejo taaa

neineinaje: —¡Eli, Eli, lama sabactani? —taaaame poanaje—; ecue Chii, ecue Chii, ¿yajjajo acuae moyojeana'yonaje so'o? —Jesosa poanaje Jodioja esohuijo.

⁴⁷Shajja'lajja majje joya quea chipi nee nee nequi jama poanaje ba'a:
—¡Bacue oe! ¡Ohuaya etiiquiana Enia iyaa cani pojja'a!

⁴⁸Jamatjeya oe dejja poquicuajinaje acuijjajja na sese jjequiya. Jjequi majje shashashaja iyanobia canaje ena ejjequi yasijje. Majoya bequiobo sajo quecuahuosho majje Jesosaja enaba huasijje huoo canaje ojaya e'ishijji nisho.

⁴⁹—Chojja, ¡ishoa socue! ¡Enia pojja'a poeje o nahueya! ¡Ba'lajja socue!
—Jodio cuana poanaje.

⁵⁰Jamatii taaa neinei o'oya majje Jesosa mano'yonaje. Chama'yo tii poanaje.
⁵¹Jesosa mano'yajo tii, Eyacuiñajjija equijo daqui quea moo eba'ehuana ba'e
Eyacuiñajjija eyajje jja'isajea meequi canaje; biacuajje ebionei jja'isajequinaje.
Meshi janobajjima nei huehuahuehuanae pealai. Mei quea quemmo cuana

jjayajjejequinaje pealai. ⁵²Mei jjani, esajajji cuana pealai jjayajjejequinaje.
⁵³Quijje Jesosa eshe o'oya poajo, Eyacuiñajjija epjeeji yahuajo emano'yo ma
jjani cuanajo jaa cuayaqui'yonaje, quea huiso Jenosanena huasijje poquinaje
cuana; quea huiso dejja ba canaje ma emano'yo cuana.

⁵⁴Ojjaña ba majje, meshi huehuahuehuani ba majje pealai sohuinano
quea huiro nee, 100, huoojeajji poaniya pea sohuinano cuana nijjeya, ma
Jesosa nahuejji poani, quea mete nee nee poanaje.

—¡E'e jojo nei, de, oya Jesosa Eyacuiñajjija Bacua Ejja nei poanaje!
—sohuinano poanaje.

⁵⁵Quea huesha nequiya epona cuaa pealai Jesosa eba'ehuanasohuajea
ba'e ba canaje. Oya cuana yahuajo Jesosa nijje Janinea meshijo ania poa.
Onijje Jenosanena huasijje poeyanaje oja bobi cuacua meesahuaa. ⁵⁶Oya
cuana ma bajjani ba'a: Mania Madanena; Satiaco, oja chahua Jose pealajja
enaese Mania bajjani; Semeneoja ehuanase pealai; Jesosaja enaese pealai.

Jesosa mei jjani yasijje huananobia ca'yonaje (Macoso 15.42-47; Noca 23.50-56; Huani 19.38-42)

⁵⁷Jamatjeya sinecua nei Jesosa mano'yajo, dejja quea aquiana huiro nee
Jose bajjani poeyanaje, pea Jose, Amatea meshijo ba'e. Oya Jesosa nijje jjapee
tiitiiquia poa yahuajo nei. ⁵⁸Jamatjeya poe majje oya Pinato baa poquinaje.
Huohui cañaquinaje: —Emeshi mese Pinato, Jesosa mano'yonaje. Eyaya oya
cadojo'yahua ecuea mei jjani yasijje ehuananobiaqui'yojji —poanaje.

Pinatohua huoojea canaje: —E'e, ¡dojocue! Eyaya sohuinano cuana
jamaya huohuime aje —poanaje.

⁵⁹Jamatjeya Joseya Jesosa acui ecueatalapeejo emano'yo ba'e
jjequioquea'yo majje dojo ca'yonaje. ⁶⁰Daqui oshe eyacua neijo bebo
majje huananobia ca'yonaje ojaya mei jjani yasijje, ma oja jjeya nei
tio huasijje. Majoya mei quea quemmo jeacajjajja canaje mei jjani
naba capa'yojji. Jesosa mei jjani dojjojo jaa capajea canaje. Capa'yo

majje poquinaje Jose pea cuana nijje. ⁶¹ Mania Madanena, pea epona Mania bajjani pea'ai mei jjani yasijke poeyanaje pea'ai Jesosa jjanijo ehuananobia jaa baa. Jomajo e'anioque aniya ba canaje, epona cuaa.

Sohuinano cuaa mei jjani nahue canaje

⁶² Jamajjeya mecahuajje epojja ejomishocajji jjayejjequiajo Paniseo cuana, Eyacuiñajji nijje emimijji etii pea'ai poqui o'yanaje Pinato que. ⁶³ Huohui caña'yonaje: —Emeshi mese, ecuana jjashahuabaquiani yahuajo Jesosa mano'yo jjimahua siajje poanaje jama ba'a: “Beca cahuime po majje eya emano'yojaa shequije'yo” —Jodio poanaje, Jesosa siajje poanajejo poso—. ⁶⁴ Jamajjeya jjeyahua nei sohuinano huoojeacue jjani baa, beca cahuime pohua, Jesosaja epeejjiya oe equehua dojo'yo bacue! Jamaya po majje ojjaña cuana dasia ca chana' jama ba'a: “¡Bacue oe! ¡Jesosa ca jja ca emano'yojaa shequi o'yanaje!” huohui ca chana' oja epeejjiya. Ojjaña cuana siajje nei nei aca'yo chana' —Jodio cuana jamaya poanaje, Jesosa eshequi o'oyajji pojjeamajo poso.

⁶⁵ Jamajjeya Pinatohua huoojea canaje: —¡Ma'aje sohuinano cuana! ¡Dojo'yocue mei jjani yasijke, ma Jesosa ehuananobia jaa huasijke! ¡A'a acuae jjani ca'aje'yo ba'ajja socue! —poanaje Pinato.

⁶⁶ Jamajjeya poquinaje Jodio cuana sohuinano cuana nijje mei jjani yasijke. Jjani capajji ijija ca'a meequi ca'yonaje baacuiya. Majoya esecue jjanijo emeshi mese nisho iya canaje ona edobiqui poaje jjejojo. Etehue iya canaje, emeshi mese nisho. Majoya Jodio cuana poquinaje. Sohuinano ca ca enequinaje tii, esecue jaahuanajjiya.

Jesosa shequi'yonaje

(Macoso 16.1-10; Noca 24,1-12; Huani 20.1-10)

28 ¹ Jamajjeya epojja ejomishocajji jjayejjequiajo mecajjeahua nei nei, ebionei jjapojjaquiajo, nomico pojajo, Mania Madanena, pea Mania nijje poquinaje mei jjani yasijke. ² Epona cuana jjani pejje yasijke poeyajo, meshi huehuahuehanaje janobajjima nei. Eyacuiñajjiya esohuidojiji eyajo ani nequioquenaje. Mei jeacajjajjajea canaje. Majoya esohuidojiji mei biajje anioquenaje. ³ Oya quea jiji nee nee poanaje pojjejje jayojja; ojaya daqui quea oshe nee nee, bo oshe nee nee jayojja ani ba canaje epona cuaa. ⁴ Sohuinano cuana quea mete nee nee poanaje. Piopio neineinaje; meshi yasijke jaabichajequinaje, emano'yo jayojja jama jaanaje esohuidojiji yajjajo. ⁵ Majoya esohuidojijiya epona cuana jama huohuime acanaje ba'a: —¡A'a quea mete pojji! Ecuea miya eba. ¿A'a Jesosa, ma acui ecueata'apeejo mano'yonaje sa'ajja'yo poequi? ⁶ Chama' oya jjeya jiquiojo. Shequi'yonaje ca jja coma; ma ecua ohuaya huohui canaje jamaya e'e jojo nei po'yonaje; oya shequi'yonaje jjeya. E'e, ¡quia'o jiquio ba'ajjahua'yo! Jiquiojo jaanaje. ⁷ ¡Jjeyahua nei poquicuajicue oja epeejjiya cuana huohuimaa! ¡Jama huohuime

acue ba'a: "Jesosa pa shequi'yonaje" acue! "Oya jjeya nei Janinea meshi yasijje poquije miquiana poqui jjimahuajo. ¡Oya oe jocuama baquicue!" jamaya o shajja'ajjajji cuana huohuiquicue! ¡Ecue sohui ma eya huohuinaje oe a'a pajea'yojji; pea huasijke huohui neiquicue! —esohuidojojji jamaya poanaje.

⁸ Jamajjeya epona cuana poqui cuajicuajinaje. Quea mete, quea bei nee nee poanaje. Cuajicuajinananaje Jesosa shajja'ajjajji cuana esohuidojojji esohui huohuiya.

⁹ Ejiojjije poquijeo Jesosa jjanequipanaquinaje. Ehui dojodzi nequinaje. Huohui canaje: —Jjo'i, jejo quea bei pocue! Eya poeyanaje —Jesosa poanaje.

O que poe majje o que jjanequichipiquinaje. Ecui'oshajjajo nequinaje; jiojji napa canaje. Quea bihui nee nee yajji epona cuaa oya bihuia canaje.

¹⁰ Jamajjeya Jesosaa oya cuana huohui canaje: —¡A'a quea mete pojji! ¡Poquicue; ecuea epjeeji cuana huohuiquicue, miyaya! ¡Jama oe acue ba'a: "¡Jjeyahua nei oe Janinea meshi yasijke poquicue! ¡Jocuama oe Jesosa baquicue, Janinea meshi yasijke!" acue! —Jesosa poanaje.

Sohuinano cuana Jesosajo siajje poanaje

¹¹ Epona cuana poqui'yajo sohuinano cuana meshijo jaa nequisohua'yonaje. Jenosanena huasijke poquinaje Jodio etii baa. Eycuiñajji nijje emimiji etii huohui caña'yonaje ojjaña ohua jama acanaje, sohuinano cuaa. ¹² Huohui poña'yonaje. Sohuinanoja esohui shajja'ajja majje Jodio etii cuana jjachichaquinaje emimimimijji. Majoya sohuinano cuana quea huiso bejjo quia canaje o siajje poani sosejje.

¹³ Jama huohuime acanaje ba'a: —¡Miyaya ojjaña cuana jama huohuime acue ba'a: "Mecajje ecuana ecahuijaajo Jesosa sii ca'yonaje jjanijo jaa, o shajja'ajjajjiya" acue! ¹⁴ Emeshi mese Pinato miquea ehuohui shajja'ajja cajo ecuana onijje mimije, e'e jojo nei, miya ojaya enapa'yojji pojjeama. Pinato quea bei po meeje'yo ecuanaa —Jodio cuana poanaje.

¹⁵ Jamajjeya Jodio etii cuaa sohuinano bejjo quia canaje. Bejjo jjeshe majje sohuinano cuana poquinaje ojjaña huasijke huohui pohua. Jodio etija esohui jayojja jama acanaje. Jamajjeya quea huiso Jodio cuana sohuinanoja esohui shajja'ajja majje e'e jojo nei poani posojo jjashajja'ajjaquinaje. Jjeya jiquio pojajo cuanaya jamaya Jodio cuaa huohui cani tii: —¡Jesosa ca jja ca ojaya epjeejiya quehuadojo ca'yonaje; shequi o'oya ajja! —sohuinano siajje poanaje jayojja jama poani tii, Jodio cuana.

Jesosa ba canaje o shajja'ajjajji cuaa

(Macoso 16.14-18; Noca 24.36-49; Huani 20.19-23; Hecho 1.6-8)

¹⁶ Jamajjeya Jesosa shajja'ajjajji cuana ¹¹ huisome poquinaje Janinea meshi yasijke Jesosa baa. Poquinaje eyiyo huasijke ma Jesosa huohui poequi baa. ¹⁷ Poqui majje, Jesosa ba majje bihuia canaje cuaa. Jamatii

beca cuana ca ca jama poanaje ba'a: —E'e pojja'a. Edojoshahua pojja'a coma, Jesosa pojjeama —jjashahuabaquinaje.

¹⁸ Jamajjeya Jesosa o que jjanequichipichi qui majje jama huohuime acanaje ba'a: —Eyacuiñajjiya eya Emeshi Mese nei epoiji aca'yonaje! eyajo, meshijo pea'ai. ¹⁹ Jamajjeya ¡poquicue ojjaña dejja cuana huasijje! ¡Ojjaña pea esohui mimiani yasijje ecuea esohui ba meequivicue pea'ai! ¡Enijke jjapeequi meequivicue! Enijke jjapeequiyajo, ¡ena huasijje besa meecue, eseja Chii nijje epoiji, enijke epoiji, Edojoshahua Pame nijje pea'ai epoiji! ²⁰ ¡Ojjaña cuana ecue sohui ba meesahuacue oe! ¡Ojjaña oe jjashajja'ajja meequivicue quea bame nee nee eba'ejji, mimishi'ama eba'ejji! ¡Bacue oe! Eya e'e jojo nei minijje nequi tiitije'yo ojjaña pojjajo, jiquio meshi oe epoiji jiquio epoija huisome tii —Jesosa poanaje.

Mahuiso ecuea esohui etehue'yo. Eyaya Mateo bajjaniya tehuejeyonaje. Apoa.

MACOSOHUA ESOHUI QUEA PAME NEE TEHUE CANAJE JESOSA QUITOJA

MARCOS

Huaniya, ma ona besameejji poaniya esohui huohui canaje Jesosa Quitoja
(Mateo 3.1-12; Noca 3.1-9,15-17; Huani 1.19-28)

1 ¹Eyaya, Macoso bajjaniya esohui quea pame nee tehueaña Jesosa Quitoja, Eyacuiñajjija Bacua Ejaja, ojjañaja ebajji. Jamaya poanaje ba'a:

²Yahuajo nei nei ecuanaja etiiquiana Isaia bajjani Eyacuiñajjija esohui huohuijji poa. Eyacuiñajjija Bacua Ejja Jesosa Quitojo Isaiaa tehue ca poa Eyacuiñajjija esohui. E'e, Eyacuiñajjiya oja Bacua Ejja jama aca poa ba'a:

“¡Shajja'ajjacue! Eyaya ecuea esohui huohuijji huoojeaje mi huoojea jjimahuajo. Ohuaya miquea ejiojji shabojea caje. ³E'e, oya quimajo, meshi jabojo nequi taaanequije. Jama poaje ba'a: —¡Jiquio ecua emeshi cuiñajji nei neija ejiojji shabojea cani jama, quea pojje nee nee acani jayojja jamaya miquea ejjashahuabauquijji tai quea boejea nee nee a'yocue! Emeshi Mese nei poeje. ¡Jamajjeya oe apoa pocuajicue!” Jamaya Isaiaa yahuajo nei nei tehue ca poa Jesosajo.

⁴Jamajjeya Isaiaja esohui jayojjaya Huaniya, ma ona besameejji poaniya, meshi quimajo aniya esohui quea bihui nee Jesosajo huohui canaje. Jama acanaje ba'a: —¡Miquea mimishijo quea yeno pocue! ¡Mimishi jja oe pajea'yocue! E'e, jamaya poajo, Eyacuiñajjija miquea mimishi cuana cuijea caje'yo. Jamajjeya eyaya miya besa meeje ojjañaja ebajji miya Eyacuiñajjija epeejji po'yonaje —acanaje Huaniya.

⁵Quea huiso nee nee cuana Jenosanena cuiñajjijo ba'eca, ojjaña Jodea meshijo ba'eca pea'ai poquinaje Jodana cuei yasijje Huani baa. Huani shajja'ajja majje oya cuana quea yeno nee poanaje ojaya mimishijo.

Miminaje Eyacuiñajji nijje. Ojaya mimishi huohui canaje. Majoya Huaniya oya cuana besa mee canaje Jodana enajo, Eyacuiñajji epeejji epojji.

⁶Huaniya huo ña, cameno ña oja sipi huosho canaje. Ejjayiica'aquijji ejee iya canaje. Shacui ijija canaje, huini pea'ai ishi canaje, Huaniya.

⁷Ohuaya huohui canaje jama ba'a: —Quijje pishana poeje Jesosa Quito. Oya oe nei quea ca'a nee nee nequi. Eya ca iña quea ca'a pishana nequi. Jamajjeya eya ca iña onijke nequi sa po ajja miquiana que cojja. Quea bicho. ⁸Eyaya miquianaya Eyacuiñajji besa meeña enajo. Poe majje ohuaya, Jesosa Quito hua miquiana que Eyacuiñajji Edojjoshahua Pame dobiqui mee caje'yo. Jamajjeya miquianaya quea pame nee poaje'yo —acanaje Huaniya ojjaña.

**Huaniya Jesosa besa mee canaje Eyacuiñajji esohui jayojja jama
epo'yoji**

(Mateo 3.13-4.11; Noca 3.21-22)

⁹Majoya Huaniya Jodana cuei sahuajo sohuihuohui canijo tii, Jesosa Janinea meshijo ba'enaje, Nasanena cuiñajji. Macua huasijje po'oquenaje Huani que. Huani jama acanaje ba'a: —Huani, ¡eya besa meecue Eyacuiñajji, miyaya! Jamajjeya Huaniya Jesosa besa mee canaje Eyacuiñajji Jodana enajo. ¹⁰Huaniya Jesosa besa mee majje, jjequicuaya ca'yajje ba canaje eyatahuatahua ca'apejo caje. Eyacuiñajji Edojjoshahua Pame huia' jama Jesosa sapa biajje cuabesa ba'enaje. Ecapashi nei ba'eoquenaje. ¹¹Eyacuiñajji eyajo aniya oja Bacua Ejja jama acanaje ba'a: —Miya ecue Bacua Ejja quea jea nee nee. Eya mijo quea bihui nee nee poani.

Jesosa mimishi po mee sa acanaje Edosiquiaa

(Mateo 4.1-11; Noca 4.1-13)

¹²Jeyahua nei Edojjoshahua Pameya Jesosa quima huasijje, meshi jabo huasijje huoojea canaje. ¹³Jesosa jomajo nequinaje peaja ejiojji huiso cahuime, 40 cahuime. Mahuiso epojja cuana, mecajje cuana pea'ai aninaje. Oe nei nei aninaje. Ijjiacajji quea mase cuana jomajo nequinaje pea'ai. Edosiquiana aje Jesosa que poeyanaje. Quea mimishi epo meeji nisho acanaje. Majoya Eyacuiñajji esohuidojiji cuana quea huiso poeyanaje Jesosa bobiaa.

Jesosaa sohuihuohui canaje Janinea meshijo, Eyacuiñajji

ba po jjimaja meshijo

(Mateo 4.12-17; Noca 4.14-15)

¹⁴Majoya pea cuaa Huani, ma ona besameejji poani iña canaje; equi ejjajeanobiaquijji yasijje jeanobiajea canaje. Jamajjeya Jesosa posohuaquinaje Janinea meshi yasijje. Eyacuiñajji esohui quea pame nee huohui canaje.

¹⁵Jama poanaje ba'a: —Jeyahua nei Eyacuiñajji miquea Emeshi Mese nei poaje. ¡Jamajjeya miquea mimishijo quea yeno pocue! ¡Mimishi cuana

pajea'yocue miquiaaya! ¡Ecuea esohui quea pame shajja'ajjacue! E'e, enijje jjapeequiajo, eyaya miya ba'e tiitii meeje'yo enijje —Jesosaa huohui tiitii canaje.

Jesosaa nahuoo cuiashajajji iyaa canaje onijje epo'yojji
(Mateo 4.18-22; Noca 5.1-11)

¹⁶ Majoya Jesosa poquinaje Janinea bae ai sahua huasijke. Jomajo ohuaya Anesi, Anesija o'i Peno bajjani, Simohui pea'ai bajjani ba canaje. Oya cuana nahuoo cuiashajajji nei nei bajio. Nahuoo cuiashaja poequi.

¹⁷ Jesosaa oya cuana iyaa canaje: —¡Enijje po'yocue! Eyaya miya dejja cuana jjequi meesahua'yojji aje'yo e que.

¹⁸ Jjeyahua nei nei oya cuana ojaya eshajajji cuana jeana'yo majje onijje poqui'yonaje.

¹⁹ Majoya Jesosaa poqui pishana majje pea cuana ba canaje. Semeneoja bacua ejja Jacobo ba canaje oja chahua mese nijje, Huani nijje bishe aijo eshajajji je'e'yo po'ani oja chii nijje. ²⁰ Jjeyahua nei Jesosaa oya cuana iyaa canaje. Jamajjeya Jesosaa iyaa cajje oja chii Semeneo bajjani echacojjii cuana nijje bishejo ani tii jiña ca'yonaje cuaa, Jesosa nijje epoqui'yojji.

Dejja niñepoqui
(Noca 4.31-37)

²¹ Majoya quijje pishana Jesosa o shajja'ajjajji nijje posohuaquinaje Capenaoma cuiñajji yasijke. Epojja ejomishocajjijo oya cuana poquinaje Jodio cuanaja equi ojee ejjachichaquijji yasijke. Dobiqui majje Jesosaa ojjaña jomajo ani sohuihuohui canaje. ²² O shajja'ajja majje ojjaña cuana jama poanaje ba'a: —¡De! Ohuaya Jesosaa esohui huohui cani quea ja'a nee. Huohui cani emeshi mese jayojja jamaa quea ja'a nee nee. Moisesija esohui etehue'yo huohuijjiya quea ja'a pishana esohui huohui cani, de. ¡Cashajja'ajja'yahua Jesosa! —poanaje ojjaña cuana.

²³ Jjeyahua nei dejja niñepoqui dobinaje ma equi yasijke. ²⁴ Jesosa ba majje eshahua o niñepoqui meeiji poani siasianaje jama ba'a: —Jesosa, Nasanenajo ba'e, ¿apiojji miya poeyanaje ecuana que ecuana quea nee nee po meeya? Ecuana eba miya Eyacuiñajji Bacua Ejja quea pame nee. ¡A'a jjeyahua nei ecuana cuaqui yasijke jeajeajji! Eyacuiñajjiya eshahua cuana cuaqui yasijke huoojeajea caje'yo quijje, jjeya nei pojjeama, de —taaame poanaje eshahua.

²⁵ Jamajjeya Jesosaa eshahua, o niñepoqui meeiji poani huoojeacuajyea ca'yonaje: —Eshahua, ja'a mimijji! ¡Cuayaqui'yocue oe, jiquio dejjajo nequi! —Jesosaa acanaje.

²⁶ Jesosa mimi jeahuajo, eshahuaa o niñepoqui meeiji poaniya dejja jjequi'ihui mee majje, siasia mee majje cuayaquinananaje. Dejja jea cana'yonaje. ²⁷ Ba majje ojjaña cuana quea mete nee nee poanaje. Ojee miminaje jama ba'a: —¡De! ¿Yajja shai poani? Jamaya yahuajo ecuanaja ba jjima, de. Jesosaa quea ja'a nee huohui cani emeshi mese jamaa, oya

quea sohui poja nee nee. Ojaya esohui shajja'ajja cani eshahuaa. Oja sohui jayojja jama acani, de —poanaje ojjaña.

²⁸Jjeyahua nei ojjañaa Janinea meshijo ba'ecaa shajja'ajja canaje Jesosajo. Jama poanaje ba'a: —Jesosaa quea ja'a nee ojjaña acani. Oya Eyacuiñajjiha huoojea'yo ojjaña jaahuanajji e'e jojo nei —ojjaña poanaje.

Jesosaa Simohuija yano mese huaquia mee ca'yonaje

(Mateo 8.14-15; Noca 4.38-41)

²⁹Jesosa Jodio cuanaja equi ojee ejjachichaquijjiho nequi cuayaqui'yo majje poquinaje Simohuija equi yasijje, Anesija pea'ai equi yasijje. Dobiquinaje Jacobo nijje, Huani pea'ai nijje. ³⁰Simohuija ano quea quiyo nee jaa.

Jamajjeya Jesosa huohui canaje jama ba'a: —Jesosa, ecue ano, ecue huanaseja enaese quea quiyo nee nee jaa, quea mano, de —Simohui Peno poanaje.

³¹Jamajjeya Jesosa o que poquinaje. Emanojaa ba canaje. Napa'ajja canaje emeya. Me napa'ajja cajje, boe canana'yonaje. Jamajjeya me iña majje jjequisohua canaje Jesosaa. Majoya ohuaya, Simohuija anohua, bobi ojjaña huasijje jjequi canaje.

Jesosaa quea huiso emanojaaca cuana jjaajaqui mee ca'yonaje

(Mateo 8.16-17; Noca 4.40-41)

³²Majoya sinecua neijo, eshequi e'oquequiajo, dejja cuaa quea huiso emanojaa cuana, niñepoqui cuana pea'ai Jesosa que jjequi canaje ejjaajaqui mee'yojji. ³³Ojjaña jiquio cuiñajjiho ba'eca Jesosa que jjachichaquinaje Simohuija equi yasijje. ³⁴Jesosaa ojjaña emanojaa jjaajaqui mee ca'yonaje, huaquia mee ca'yonaje pea'ai. Eshahua cuana huoojeacuayajea ca'yonaje pea'ai. Eshahua cuana, o ebajo, jama acanaje Jesosaa ba'a: —Eya miquianajaya ebajo ja'a mimijji! Eya Eyacuiñajjiha huoojea'yo ojjaña jaahuanajji, oja Bacua Ejja ja'a pea cuana huohuijji! —poanaje Jesosa.

Jesosaa esohui huohui ca o'oyanaje Janinea meshijo

(Noca 4.42-44)

³⁵Mecajjeahua nei, eshequi jjaja'a'ajjaqui jjimahuajo, Jesosa shequi majje cuiñajji esecue yasijje poquinaje dejjama huasijje. Jocuama oya miminaje Eyacuiñajji nijje, oja chii nijje. ³⁶Jamajjeya shequi majje pea cuaa Simohui nijjeya oya sa'ajjaqui canaje. ³⁷O ba majje jama poanaje ba'a: —Jesosa, ojjaña miya sa'ajja caqui —poanaje.

³⁸Jamajjeya Jesosaa oya cuana jama acanaje ba'a: —Cua'a, enijke poquicue pea cuiñajji cuana huasijje! Eyacuiñajjiya eya huoojea canaje pea cuiñajji yasijje ojaya esohui jocuama huohuiya pea'ai.

³⁹Jamajjojoya Jesosa Janinea meshijo ojjea poquinaje ojjaña cuiñajji cuana huasijje. Ojjaña Jodioja equi ejjachichaquijji yasijje dobiquinaje; esohui huohui canaje. Eshahua cuana huoojeacuayajea ca'yonaje pea'ai.

**Dejja batata epo'yo, ma dejja shicui jjima acani jjajea meequi
ca'yonaje Jesosaa**
(Mateo 8.1-4; Noca 5.12-16)

⁴⁰Majoya oe dejja quea mano nee batata epo'yo poeyanaje Jesosa que. Ecui'oshajjajo nequinaje o bihuijiji. Onijje miminaje jama ba'a: —Jesosa, ecuea eba miya jjajea meequi'yojji nei nei poani. Jamajjeya miyaya jjajeaqui mee'yo sa amajje ;mo che jjajeaqui mee'yocue! —poanaje.

⁴¹Jesosa ma dejja quea mano ba majje quea yeno poanaje. Oya napa'ajja canaje emeya. Jama poanaje ba'a: —E'e, eyaya miya jjajeaqui meeje'yo. ¡Jjajeaqui'yojue, miya! —Jesosaa acanaje.

⁴²Jjajequinana'yonaje jjeya nei. Quea pame nee po'yonaje. ⁴³⁻⁴⁴Jamajjeya Jesosaa oya huohui canaje jama ba'a: —¡Shajja'ajjacue mo! Eyaya miya jjajeaqui mee'yonaje. ¡Jamatii a'a oe jjeya huohuipojji ecue jjajeaqui mee'yo! ¡Poquicuajicue Jenosanena huasijje, Eyacuiñajjija equi yasijje, ma onajo Eyacuiñajji nijje mimiani yasijje! Oya huohuicue jama ba'a: "Eya jjajeaqui'yonaje" acue. ¡Moisesija sohui jayojja jama oe pocue pealai! Miya ehuaquia'yohua jjejoojya ¡Eyacuiñajji nijje mimiani yasijje beca hui'a! quiaquicue Eyacuiñajji bihuijiji! Jamajjeya ojaa ba caje miya e'e jojo nei ejjajeaqui'yo —oya acanaje Jesosaa. ⁴⁵Jamatii poqui majje huohui canaje ojjaña huasijje jama ba'a: —¡Jesosaa eya jjajeaqui mee ca'yonaje de, huaquia mee ca'yonaje jjeya nei!

Jamajjoya dejja quea huiso nee nee o ba sa poanaje, ejjaajaqui'yojji. Quea huiso nee nee jjachichaqui majje Jesosa cuiñajji cuana huasijje dobiqui mee jjima acanaje. Oya quimajo nequinaje. Quea huiso nee nee o que poeyanaje, ojjaña huapajje aequiana poeyanaje o baa.

Quibojjisha quea mano nee nee jaa jeo mee ca'yonaje
(Mateo 9.1-8; Noca 5.17-26)

2 ¹Majoya quijje pishana Jesosa Capenaoma huasijje poe o'oyanaje. ²Jamajjeya pea cuaa jomajo nequiya huohui canaje jama ba'a: —Jesosa poe'yonaje ojaya equi yasijje. ¡Cua'a, ejjabaquiqui! ³Jamajjeya quea huiso nee nee jjachichaquinaje ojaya equi yasijje. Dobiqui mee ajja quea dejja huisojojo. Esecuejo nequinaje; equi shajjaquibojo aequiana nequi canaje pealai. Jesosaa oya cuana Eyacuiñajjija esohui huohui canaje. ⁴O que poe meemee ajja, quea huiso equijo ejjachichaqui nequijojo. Jamajjeya oya cuanaa equi bijjeje quibojjisha dojosohuaqui canaje. Equi huejja ca'yonaje. Huejjajje equipajaajjijo ecapashinei jeaoquea ca'yonaje jjonojo. ⁵Ma ba majje Jesosa jjashahuabaquinaje jama ba'a: —E'e, jiquio dejja cuana jjashahuabaquiani eya ejjajaquimee'yojji nei nei poani.

Jamajjeya quibojjisha nijje jama poanaje ba'a: —Cha, ¡quea bihui nee pocue! Eyaya miquea mimishi cuana cuijea'yonaje.

⁶Jesosaja esohui shajjaajja majje Moisesija etehue'yo huohuijji poani jomajo ani quenequenenaje. Jesosa Eyacuiñajji Bacua pojjeama posojo jjashahuaba taiquinaje jama ba'a: ⁷—¡De! Jiquio oya Eyacuiñajji pojjeama. ¿Apiojji Eyacuiñajji jayojja jama nei nei mimiani, de? Jamaya quea mimishi. ¿A'a acuae ohuaya mimishi cuijea mee caje'yo jjabauian? Chojja, Eyacuiñajji oe nei mimishi cuijea'yoji poani —poanaje Jodio etii cuana, Jesosa Eyacuiñajji Bacua Ejja pojjeama poso acanaje.

⁸Jamajjeya Jesosa Jodio etiija ejjashahuaba taiquijji ba majje jama poanaje ba'a: —¿Yajjajje acuae nequiana enijje quea quene poani so'o? ⁹¿Ache shai quibojjishajo quea camaja eyaya aje'yo? ¿A'a ojaya mimishi cuijea'yoji quea camaja? ¿A'a jja eyaya oya nequisohua meeje'yo? Ba'ajja —Jesosa poanaje—. ¹⁰Jamajjeya eyaya ojjañaja Edoe Meseya miquianaya ba meeña eya ca ca iña Emeshi Mese nei quea ca'a nee nee nequi. Jamajjeya eyaya mimishi cuijeaje'yo nequianaja.

¹¹Majoya Jesosaa quibojjisha acanaje: —¡Nequisohuacue! ¡Miquea equipajajji bebo majje miquea equi yasijje poquicue!

¹²Jjeya nei quibojjisha nequisohua majje jeo'yonaje. Equipajajji bebo canaje. Jeojeopoqui'yonaje oja equi yasijje. Jamajjeya ba majje ojjaña cuana quea bihu nee nee poanaje. Eyacuiñajji bihuia canaje jama ba'a: —¡E'e nei, joya quibojjisha jeo'yonaje jjeya nei! ¡E'e, e, Eyacuiñajjiya Jesosa quea ca'a nee po mee cani; emanojaa cuana huaquia mee ca'yani! ¡Mimishi cuijea mee ca'yani peal'ai!

Jesosaa Mateo pea bajjani Nemi iyaa canaje onijje epo'yoji (Mateo 9.9-13; Noca 5.27-32)

¹³Majoya Jesosa poqui o'oyanaje meshijaji yasijje, bae sahua huasijke. Quea huiso nee nee o que poeyajo, oya cuana Eyacuiñajji esohui huohui canaje. ¹⁴Majoya Jesosaa poquijeya Apeoja bacua ejja Mateo ba canaje, ma Nemi pea'ai bajjani. Oya yaninaje equi ejjeshejji jaahuanajji, ojjañaja emeshi meseja esohuijjo jjeshe mee cani dejja cuana eba'ejji sosejje. Oya bejjo jjeshejji poani. Ba majje Jesosaa oya iyaa canaje: —Nemi, ¡enijje po'yocue!

Jamajje Nemi nequisohua majje Jesosa nijje poqui'yonaje. ¹⁵Majoya Nemiya Jesosa iyaa canaje ojaya equi yasijje ijja'ijjiaa. Jamajjeya Jesosa o shajja'ajjajji cuana nijje Nemija equi yasijje poquinaje ijja'ijjiaa. Quea huiso dejja cuana Nemi jama bejjo jjeshejji poani, dejja mimishi cuana pea'ai poquinaje. Ojee ijja'ijjia aninaje Jesosa nijje, Jesosa shajja'ajjajji cuana nijje pea'ai. ¹⁶Jesosa ma dejja mimishi cuana nijje ijja'ijjia ani ba majje Jodio esohui huohuijji Paniseo cuana bajjani, Moisesija esohui etehue'yo huohuijji cuana pea'ai quea quene poanaje. Jesosa shajja'ajjajji cuana nijje mimijajinaje jama ba'a: —¿Apiojji miquea esohui huohuijji ijja'ijjiani bejjo jjeshejji cuana nijje, dejja mimishi nijje pea'ai? ¿Apiojji, de?

¹⁷ Jesosaa oya cuana shajja'ajja canaje. Huohui canaje jama ba'a: —¿A'a dejja cuana quea mano pojjeama eshicuijji quia sa poani? Quea mano poanijo ca ca eshicuijji quia cajji. Oya jayojja eya dejja quea mimishi nijje jjapeequiani quea ja'a nee epo mee'yojji. ¡Bacue! Beca cuana jama poani ba'a: "Eya ca ca iña quea pame nee, mimishi'ama nei nei" poso jjabaquiani. Jamajjeya ma dejja cuana ecuea e'iyajiji pojjeama enijje ejjapeequi'yojji. Chojja, eya poeyanaje dejja quea mimishi iyaaa, mimishi pajea mee'yojji.

Bobi ijija ajjajo huohui'ajja canaje cuaa

(Mateo 9.14-17; Noca 5.33-39)

¹⁸ Majoya Huani, ma ona besameejji poani, jeanobiajea canaje cuaa. Jamajjeya Jodio etiiquianaja esohui jama poanijo o shajja'ajjajji cuanaa bobi ijija jjima aninaje Eyacuiñajjiyo ejjashahuabauquijji, onijje emimijji pea'ai. Jamaya Paniseo shajja'ajjajji cuana poa pea'ai. Jamajjeya beca cuana Jesosa que poeyanaje. Jama huohui'ajjame acanaje ba'a: —Jesosa, ecuana, Paniseo cuana pea'ai, Jodio etiiquianaja esohui jama poanijo bobi ijija ajja Eyacuiñajjiyo ejjashahuuba neineiquijji. ¿Apiojji acuae mi shajja'ajjajji poani jama po aija? —poanaje; beshahua nei tecuea canaje.

¹⁹ Jesosaa oya cuana acanaje jama ba'a: —Chojja, jeya ecuea epeejji cuana nijje yanijo, ca'ljjia cahua! Ma jayojja jama ba'a: Ejjhuanaquijjiyo yahueja epeejji cuana onijje yanijo ca'ljjia cahua quea bihui nee. ¿A'a yahueja epeejji cuana onijje yanijo quea yeno? Chojja, quea bihui nee. ²⁰ Yahue poqui'yajo ca ca oe ojaya epeejji cuana ijija'ljjia sa po aija poaje. Quea yeno jjejojo jjashahuuba neineiquiani. Eya jiquio ecua yahue jama poani: Quijje eya poqui'yajo, ecuea epeejji cuana ijija'ljjia ajja poaje, Eyacuiñajjiyo ejjashahuuba neineiquijji, onijje emimi neineijji pea'ai.

²¹ Majoya Jesosaa huohui canaje pea ejjashahuabauquimeejji: —Eseyaya baacojja esee'yohua bishe eyacuajo caca ajja. Cho. Baacojja etii enajo nequi see'yani, ca'a'ama po'yani. Jjasajajeaquije'yo. Bishe ihuije'yo. Bishe eyacuajo ca ca baacojja eyacuaa cacaña.

²² Pea esohui huohui canaje jama ba'a: —Ena sese cuatatanijo iya ajja meshimisi etiijo. Ena sese cuatata neineianijo, meshimisi ca'a'ama jjaajajeaquijje majje ena sese jjashojeajeaquije'yo. Cho, ena sese cuatatanijo meshimisi eyacua quea ca'ajo iya cani cuaa —jamaya Jesosaa huohui canaje ejjashahuuba meequiviji onijje jjapeequi majje eyacua caba'yahua, yahuaajo jama pojjeama, etiiquianaja esohui jama pojjeama.

Esohui epojja ejomishocajjijo

(Mateo 12.1-8; Noca 6.1-6)

²³ Majoya Jodioja epojja ejomishocajjijo Jesosa o shajja'ajjajji cuana nijje ejiojiji poquinaje. Que yiyejje poquije quea shoe poanaje. Quejo nequi anoso ai sejja canana majje oe pojji ijija canaje, o shajja'ajjajjiya.

²⁴ Maya Paniseo cuaa ba canaje. Jamajjeya Jesosa nijje mimijajinaje jama

ba'a: —¡Bacue oe! Mi shajja'ajjajji poani cuaa chaco cani. Anoso ai sejja cani esejaya epoja ejomishocajjijo. Esejaya etiiquiana Moisesija etehue'yo jama poani ba'a: “¡A'a chacojjii epoja ejomishocajjijo!”

²⁵ Jesosaa oya cuana acanaje jama ba'a: —¿A'a miquea ba jjima esohui etehue'yo emeshi mese Dabija, ojaya epeeiji cuanaja pealai? ²⁶ Yahaujo nei nei Abiata Eyacuiñajji nijje emimijji etii poanijo, Dabija epeeiji cuana quea shoe nee po majje Dabi Eyacuiñajjija equi yasijje dobiquia poa. Ijjia ca poa pahui, maya Eyacuiñajji yasijje quia ca poa cuaa o bihuiajji. Ojaya epeeiji cuana ijzia mee ca poa pealai. Jiquio ca oe Eyacuiñajji nijje mimianiya calijzia cahua; pea cuanaja e'lijjiajji pojjeama.

²⁷ Majoya Jesosa ojjaña nijje jama poanaje ba'a: —Dejja, epona pealai pana majje Eyacuiñajjija oe epoja ejomishocajji aca'yonaje dejja cuana jomishocajji. A'a jjashahuubaquijji jama ba'a: “Epoja ejomishocajjijo eya jamatii anije”. ¡Cho, quea pame nee acue ma pojxajo! —Jesosa poanaje—. ²⁸Eya, ma ojjaña Edoe Mese Emeshi Mese nei poani. Jamajjeya eyaya eyaye nei huohuije epoja ejomishocajjijo: ¡Quea pame nee acue! ¡Pea cuana quea jea nee acue! —Jesosa poanaje.

Meshahuama'yo epo jjameshahuanequi mee ca'yonaje
(Mateo 12.9-14; Noca 6.6-11)

3 ¹Majoya Jesosa Jodioja equi ejjachichaquijji yasijje poqui o'oya majje dobiquinaje. Jomajo dejja meshahuama'yo epo aninaje. ²Jamajjeya Jesosa ba majje Paniseo cuana jama jjashahuubaquinaje ba'a: —Esejaya etiiquiana jama poani ba'a: “¡A'a chacojjii epoja ejomishocajjijo!” poani. E'e pojja'a Jesosa esejaya etiiquianaja esohui jama poaje, chaco aija pojja'a jjeya. E'e pojja'a oya chaco caje jjeya, epoja ejomishocajjijo; meshahuama'yo epo pojja'a jjameshahuanequi mee caje'yo. ¡Caba'ajja sahua! —poanaje.

Jesosa nijje mimijaji sa poanaje. Jamajjeya oya ba neinei canaje Paniseo cuaa.

³Jamajjeya Jesosaa meshahuama'yo epo iyaa canaje jama ba'a:
—¡Poecue e que! ¡Ojjaña cojja nei nequicue, eyiyesama neijo!

⁴Majoya oya nequisohuajo, Jesosa esohui jaahuanajji nijje, Paniseo cuana nijje jama poanaje ba'a: —¿Yajja poani etiiquiana Moisesija esohui etehue'yo? ¿A'a epoja ejomishocajjijo pea cuana quea pame acajji pojja'a? ¿A'a quea tai acajji pojja'a? Jamajjeya ¿a'a emanojaa huaquia mee ca'yojji epoja ejomishocajjijo? ¿A'a mano mee cajji pojja'a? —poanaje Jesosa.

Jamatii Jesosa Paniseo cuanaja saja'a jjima quea mimishi neija jjejojo.

⁵Jamajjeya Jesosa ojjaña bajea majje quea quene nee nee poanaje. Ojjaña shajjama' poanijo oya quea yeno poanaje. Jamajjeya ohuaya meshahuama'yo epo jama acanaje ba'a: —¡Epeejji, miquea eme jeapisa'ajja'yo socue! —acanaje Jesosaa.

Jamajjeya mejjajjaa eme' jeapisa ca'yonaje; pea mijijje jayojjaya po'yonaje.

⁶Jjeya nei Paniseo cuana esecue yasijje cuayaqui majje pea Jodio etii cuana nijje miminaje, emeshi mese Enodeja epeeiji cuana nijje pealai. Jama poanaje ba'a: —¿Yajja amajje Jesosa quecuca ca'yojji so'o, de? —poanaje Paniseo cuana.

Dejja quea huiso bae sahuajo sohuihuohui canaje Jesosaa
(Mateo 4.24; 12.15-16; Noca 6.17)

⁷Majoya Jesosa o shajja'ajjajji cuana nijje poquinaje. Janinea bae sahua huasijje poe o'oyanaje. Quea huioso nee nee omijje poquinaje Janinea meshijo ba'eca cuana, Jodio meshijo ba'eca cuana, ⁸Jenosanenajo ba'eca cuana, Idomea meshijo ba'eca cuana, Jodana cuei ojje mijijje ba'eca cuana, Tinojo ba'eca, Sinonojo ba'eca cuana pea'ai. Jesosaa jjaajaqui mee ca'yoqui shajja'ajja majje o que poeyanaje quea huioso nee nee, de. ⁹Jamajjeya Jesosaa o shajja'ajjajji cuana huoojea canaje bishe jjequiya. Jama poanaje ba'a: —¡Bishe jjequicue! Quea huioso nee nee nequicaa quishi ca chana' cuaa mo. Jamajjeya eyaya bishejo nequi majje ojjaña cuana sohuihuohuije.

¹⁰E'e, yahuajo pishana Jesosaa quea huioso jjaajaqui mee ca'yonaje. Jamajjeya quea huioso emano cuana Jesosa que jjachichaquinaje; mojoiya ca'yonaje oja daqui napajji. Jama poanaje ba'a: —E'e, Jesosa daqui cuema napa majje jjaajaquije'yo.

¹¹Jesosa ba majje eshahua cuana siasianaje. Niñepoqui cuana Jesosa cojja nei ecui'oshajajo nequinaje o bihuiajji. Jama poanaje ba'a: —Jesosa Quito, miya Eyacuiñajjija huoojea'yo ojjaña jaahuanajji, oja Bacua Ejja quea pame nee —poanaje eshahua cuana.

¹²Jamajjeya Jesosaa eshahua cuana tecueahuoojeacuayajea ca'yonaje jama ba'a: —¡Eshahua cuana, esohui oe ca'acue! ¡A'a ona huohuijji eya Eyacuiñajjija huoojea'yo ojjaña jaahuanajji! —Jesosaa acanaje.

Jesosaa o shajja'ajjajji cuana iyaa canaje 12 huisome
(Mateo 10.1-4; Noca 6.12-16)

¹³Majoya Jesosa jaasohuaquinaje eyiyo huasijje. Ojjaña ohua sa cani ohuaya iyaa canaje onijje epoqui'yojji. Jiquio dejja cuana o que poeyanaje. ¹⁴Majoya ohuaya ome miji pea beca huisome, ¹² huisome dejja babaca ca'yonaje ojaya esohui huohuijji nei epojji. Oya cuana huohui canaje jama ba'a: —Eyaya miquianaya babacanaje enijje e'anijji. Miquianaya huoojeaje ojjaña meshi yasijje ecuea esohui huohuiya.

¹⁵Jesosaa oya cuana quea ca'a po mee canaje eshahua cuana huoojeacuayajea mee'yojji, ojjaña emanoja cuana huaquia mee'yojji, ejjaajaqui mee'yojji pe'aai.

¹⁶Jesosaja huoojea'yo esohui huohuijji ma bajjani ba'a: Simohui, ma pea bajjani Peno; oja chahua Anesi; ¹⁷Semeneoja bacua ejja Jacobo, oja chahua Huani pealai Jesosaa pea bajjani aca'yonaje Cueji bajjani, oja sohuijo ca ca Boaneje bajjani; ¹⁸Penipe; Matonome; Tomasi; Mateo, ma bejjo jjeshejji poani; Apeoja bacua ejja Satiaco; Simoni Senote; Taneo; ¹⁹Jodasa Isicanio, ma Jesosa iña meesahuajji poanaje dejja mimishija quecua'yojji. Mahuiso Jesosaa babaca canaje ojaya esohui huohuijji epojji.

Jesosa niñeba canaje cuaa

(Mateo 12.22-32; Noca 11.14-23; 12.10)

²⁰Majoya Jesosa eyiyojo ani equi yasijje jaaoque o'oyanaje o shajja'ajjajji nei cuana nijje. Quea huiso nee nee o que jjachichaqui o'oyanaje. Quea huiso nee neejo Jesosa, o shajja'ajjajji cuana pea'ai, ijjal'ijjia mee jjima acanaje. ²¹Ma shajja'ajja majje ojaya enaese poeyanaje oja chahua cuana nijje Jesosa nahueya, Jesosa dojohua pea'ai. E'e, onaaya Jesosa niñeba canaje jama ba'a: —Oya Jesosa niñe poquinaje —siajje poanaje cuana.

²²Paniseo cuaa pea'ai Jesosa niñeba canaje: —E'e, Jesosa aje oe eyamiquecua pojja'a. Ohuaya aje jja oe eshahua cuana huoojeacuayajea canaje Edosiquiana etii nijjeya, Satanasa bajjani, pea bajjani Meesemo nijjeya —poso acanaje Paniseo cuaa.

²³Paniseo cuanaja ejjashahuabauqui'yojji quea tai Jesosaja eba poanaje. Jamajjeya oya cuana tecuea canaje jama ba'a: —¡Shajja'ajjacue oe! ¿A'a acuae jja Edosiquiaa, Satanasa pe aeshahua huoojeacuayajea came? ²⁴Chojja. Joya emeshi mese shajjal'ajja sa po ajjajo, jjacuiaquianijo, dejja cuana ma meshijo ba'e chama'yo tii poaje'yo. Cuiñajjijo ba'e cuana jamaya po pea'ajje, chama'yo tii poaje'yo pea'ai. ²⁵Huapa pojjeama cuana jjacuiaquianijo chama'yo tii poaje'yo pea'ai. ²⁶Jamaya pea'ai Edosiquianaa, Satanasa pe aeshahua ehoojeacuaya'yo jojjemo, chama'yo tii pol'yoqueaye —Jesosa poanaje—. ²⁷Cuanaya bacue ba'a: ¿A'a dejja quea ca'a nee jeyo jjima nequijo oja aquiana sii cajji? Chojja, o jeyo majje ojaya aquiana cuana sii caje cuaa. Jiquio ecua e' aquiana mese ebionei jeyo cani jama amajje eyaya eshahua cuana jeacuayajeña —Jesosa poanaje pea'ai—. ²⁸Jamajjeya eyaya miya e'e jojo nei huohuiaña: Eyacuiñajjiya ojjaña mimishi cuana, siajjepoiji cuana pea'ai cuijea caje'yo. E'e, eya ojjaña Edoe Mese niñeba cajo cuaa, Eyacuiñajjiya ma mimishi cuijea caje'yo pea'ai, ojjaña mimishi cuana ohuaya cuijea caje'yo. ²⁹Jamatii Edojoshahua Pamejo siajje poajo ca ca, Edojoshahua Pame niñeba cajo ca ca, Eyacuiñajjiya ma mimishi ecuijea'yojji pojjeama tii tii. Jjeya ecuijea'yojji pojjeama; quijke eya ecue Chii nijje eyajo ojjaña huoojea'yojji poaje ecuijea'yojji pojjeama tii tii poaje pea'ai —Jesosa poanaje.

³⁰Yahuajo Paniseo cuana Edojoshahua Pamejo siajje poanaje jama ba'a: —Jesosaa Edosiquiana nijjeya aje oe eshahua cuana dejjajo ani huoojeacuayajea cani —jamaya siajje poanijo, Jesosaa oya cuana tecuea canaje.

Jesosaja enaese, echahua mese cuana pea'ai poeyanaje

(Mateo 12.46-50; Noca 8.19-21)

³¹Majoya Jesosa mimianijo tii, ojaya enaese, oja chahua cuana pea'ai poeyanaje. Esecuejo nequinaje. Onaaya Jesosa huohui canaje jama ba'a:

³²—Mique nae poeyanaje; esecuejo nequi, minijje emimijji —o pejjejo e'anioque'aniya huohui canaje.

³³Jesosaa ojjaña ejjachichaqui'yo bajea majje jama acanaje ba'a:
—¿Ache acuae ecuea huapa pojjeama cuana so'o? ³⁴¡Bacue! Jiquio ecuea
epeeji cuana ecuea huapa pojjeama cuana jama ecuea quea jea nee
nee, ecuea ecue nae quea jea aña jayojja jama. ³⁵E'e, ecue Chii eyajo
ani; ojjaña joya ojaya ejjashahuabaqui'yojji jayojja jama ba'yani, ojaya
esohuijo jjashajja'ajjaquiani pea'ai ecuea huapa pojjeama, ecue chahua,
ecue jjo'i, ecuea enaease pea'ai —Jesosaa acanaje.

Eso' jeaadajji

(Mateo 13.1-9; Noca 8.4-8)

4 ¹Majoya Jesosa equijo ani cuayaquinaje. Bae sahua huasijje poqui majje
anioquenaje. Majoya o que jjachichaquinaje dejja cuana quea huiso nee
nee. Jamajjeya bishe yasijje nequisohuaqui majje anioquenaje esohui huohuiya.
Dejja cuana ca ca meshijajjo aninaje. ²Jesosaa oya cuana sohuihuohui
canaje quea huiso nee nee. Pea esohui ebameesahuajji huohui canaje ona
jjashahuabaquijji. Jama acanaje ba'a: ³—¡Bacue! Ebanajji poquinaje banaa.
⁴Eso' jeaadajji canijo, oe pojji eso' oquequinaje ejiojji yasijje. Poeyanaje cuichojji
cuana; ijija canaje eso'. ⁵Pea eso' oquequinaje mei biajje. Meshi chamajo
eso' pohua cuaji'ajja'yonaje. ⁶Quijje cuayanaje eshequi. Eshequi quea quiyo
nee poajo, eso' quiyomano'yonaje. Esajja joca'yajo mano'yonaje. ⁷Pea eso'
oquequinaje acuisha huasijje. Pohua'yo majje jjonohua bebo ca'yonaje. Tatajo
nequi jjajja ajja poanaje; mano'yonaje. ⁸Pea eso' ca ca oquequinaje meshi quea
pame yasijje. Pohua'yonaje eso' cuana. Ejjajja quea pame nee nee poanaje. Oe
esajo ejjajja iye huiso aninaje; pea esajo ejjajja quea huiso aninaje, pea esajo
quea huiso nee nee aninaje. Sejja ca'yonaje quea huiso nee. ⁹¡Jamajjeya ecuea
esohui shajja'ajjacue! ¡Jjashahuabaquicue! —Jesosaa acanaje.

Esohui ebameesahuajji Jesosaa sohuihuohui canaje ona jjashahuabaquijji

(Mateo 13.10-17; Noca 8.9-10)

¹⁰Quijje pea cuana o shajja'ajjadji cuana nijje poeyanaje Jesosa que.
Huohui'ajja canaje jama ba'a: —Jesosa, ¿apiojji acuae miyaya esohui
ebameesahuajji huohuiyaña? Maya ecuanaja quea quehua pishana. ¡Ba
meesahua socue! —poanaje.

¹¹Oya cuana saja'a canaje Jesosaa: —Miquianaya ca ca oe Eyacuiñajjiya
ba meesahua cani eya ojjaña Emeshi Mese nei poaje'yo. Yahuajo ba mee
jjima poa. Pea cuana ca ca ba meesahua ajja. Jamajjeya eyaya esohui
ebameesahuajji huohuinaje ona jjashahuabaquijji. ¹²Jamatii ecuea esohui
shajja'ajja majje oya cuana jjashahuabaqui ajja, jjashajja'ajjaqui ajja, de.
E'e, Eyacuiñajjiya esohui huohuijji Isaia yahuajo nei nei jama poa ba'a:

“Shajja'ajja huicha'a huicha'a majje jamatii jjashajja'ajjaqui ajja
poaje. Eyacuiñajjiya acani ba huicha'a huicha'a majje jamatii
jjashahuabaqui ajja poaje. Ecuea esohui eba jojjemo, eshajja'ajja

jojjemo jjabahuejjaqui'yome. Pea'ai enijje ejjapeequi'yo jojjemo, eyaya mimishi cuijea'yome".

Jamaya yahuajo nei nei tehue ca poa etiiquiana Isaiaa shajjama' cuanajo —Jesosa poanaje.

Jesosaa esohui ebanajjijo ba mee canaje
(Mateo 13.18-23; Noca 8.11-15)

¹³Majoya Jesosaa oya cuana jama acanaje ba'a: —¡A'la ma esohui ebameesahuajji miquianajaya quea quehua? ¿Jamajjeya achajja acuae oe miquianajaya eba poaje pea esohui ebameesahuajji? ¡Shajja'ajjacue! Eyaya miquianaya ba meesahuaje ecuea ehuohui'yo ebanajjijo: ¹⁴Jiquio ecua ebanajjija eso' jeaaja cani jayojja jama Eyacuiñajjiya esohui huohuijjiya esohui huohui canaje ojjaña huasijje. Beca cuana ejiojji yasijje oquequi eso' cuana cuichojjiya ijijajjeyo ca'yonaje. ¹⁵Jamaya pea'ai beca cuana ecuea esohui eya ojjaña Emeshi Mese oe nei poaje shajja'ajja majje jamatii jjashahuabaqui ajja. Jamajjeya Edosiquiaa o que poe majje ecuea esohui pajea mee cani. ¹⁶Beca cuana eso' mei biajje oquequinaje jayojja jama ecuea esohui shajja'ajja majje quea bihui nee enijje jjapeecuajj'i'ajquiani. ¹⁷Jamatii ecuea esohui jayojja jama ba'e tiitii ajja. Eso' mei biajje pohua esajja joca'yajo mano'yani jayojja jama poani; pea cuua oya napa cajje, Eyacuiñajji nijje jjapeepajequa'yani. ¹⁸Beca cuana eso' acuisha nijje pohuani jama poani. Acuishaa bebo cajje jjajja ajja jayojja jamaya ecuea esohui shajja'ajja majje jjapee nishoquiani. ¹⁹Jamatii oya cuana quea bejjo nahue poanijo aquianajo quea huiso jjashahuabaquianijo, quea mete pea'ai poanijo Eyacuiñajjijo chaco ajja. Esohui pajea cani. ²⁰Eso' meshi quea pame neejo pohua majje quea jjajja huiso poanaje jayojja jama ca ca beca cuana; ecuee esohui shajja'ajja majje jjabahuejjaquiani; ecuea epjeejji quea ja'a nee nee poani, pea cuana ejo jjabahuejjaqui mesahua cani; iye huiso pojja'a, quea huiso pojja'a, quea huiso nee nee pojja'a —Jesosaa oya cuana acanaje. Mahuiso.

Esohui ebameesahuajji cuaquijjijo
(Noca 8.16-18)

²¹Majoya Jesosaa pea esohui ebameesahuajji huohui canaje cuaquijjijo jama ba'a: —¡Bacue! Cuaquijiji dedo majje eseyaya nequia ajja tepe quimejje. Ejajji quimejje peajj'i nequia ajja. Chojja, de. Acui ecaca biajje nequia'aña equi jeaja'ajji. ²²Jiquio ecua dedo majje cuaquijjijiya eyajo nequiya ojjaña jeaja'a cani jama jayojja Eyacuiñajjiya ojjaña ecuea esohui onaya ba mee caje'yo quijje. E'e, ojjaña ecuea esohui miquianajaya eba jjeya, Eyacuiñajjiya quijje pea cuana ba mee caje'yo. Quea ja'a nee poaje'yo. ²³¡Jamajjeya miquianaaya quea shajja ja'aa shajja'ajjacue! ¡Ecuea esohuijo jjashahuabaquicue!

²⁴Majoya Jesosa ojjaña nijje jama poanaje pea'ai ba'a: —¡Ecuea esohui shajja'ajja majje ecuea esohui shahuaba neineicue; jama acue!

E'e jjashahuaba neineiquianijo, Eyacuiñajjiya miquianaya quea huiso
nee nee ba meesahua caje. Oe pojji jjashahuabaquianijo ca ca oe pojji ba
meesahua caje. ²⁵Jamajjeya joya Eyacuiñajjiya esohui ba cani quea huiso
pishana, quijje quea huiso nee ba mee caje'yo. Joya ojaya esohui ba sa po
ajja ca ca pajea caje'yo. Mahuiso —Jesosa poanaje.

Esohui ebameesahuajji eso' pohuanijo

²⁶Majoya Jesosaa oya cuana huohui canaje pea esohui ebameesahuajji. Jama
poanaje ba'a: —Eyacuiñajjiya esohui ejo ebanajjiya eso' bana canaje jama. Eso'
ache bame nee quecuia canaje quejo, anoso pojja'a. ²⁷Majoya ojjaña echacojji
cuana ecahuijaajo, epojjajo po'ayequiequijo pealai eso' pohuan, tiani pealai.
Jamatii ojaya ba jjima achajja shai eso' tiani. ²⁸E'e, meshi quea pame neejo bana
eso' jamatii pohuan, tiani. Tii majje jjajjami. Majoya jamatii jahuan. ²⁹Jahuajo,
eque meseya echacojji cuana huoojea cani anoso sejja'yohua. Jiquio ecua eso'
tii majje quea jjajja huiso poani jayojja jama ecuea epeejji cuana jjeya oe pojji
yani; jamatii quijje quea huiso nee nee poaje'yo. Majoya ojjaña jjachichaqui mee
caje'yo Eyacuiñajji cojja nei enequijji —jamaya Jesosaa huohui canaje.

Esohui acui so' che biso nee neejo, motasa bajjanijo

(Mateo 13.31-32; Noca 13.18-19)

³⁰Majoya Jesosaa pea esohui eba meesahuajji huohui canaje jama ba'a:
³¹—Eyacuiñajjiya esohui ojaya epeejji cuanajo jama pealai ba'a: Motasa bajjani
eso' bana cani equi quiboo. Jiquio eso' che biso nee nee. ³²Tii majjeya ca ca quea
cui quemó nee poaje, apo'e cui quemajja. Jamajjeya cuichojji cuana poeyani
motasa acui biajje cahuiya —jamaya Jesosaa huohui canaje ojjaña ba meeji quijje
Eyacuiñajjiya epeejji cuana quea huiso nee, quea cala nee nee po mee caje'yo.

³³Quea huiso nee pea esohui ebameejji Jesosaa huohui canaje Eyacuiñajjiya
esohui eba meesahuajji. Onaya quea jjashahuabaqui ja'a pishanajo mi huohui
tiitii canaje. ³⁴Esohui ebameesahuajjiyo ca ca oe ojjaña sohuihuohui canaje
Jesosaa. Majoya ona poquil'yajo ohuaya o shajja'ajjajji nei ba meesahua canaje.

**Beni quea quemó nee nee
(Mateo 8.23-27; Noca 8.22-25)**

³⁵Ma pojajjoya siniajo Jesosaa o shajja'ajjajji cuana iyaa canaje; jama
acanaje ba'a: —Cua'a, Janinea bae ojje miji yasijje ebepapoqui —poanaje.

³⁶Jamajjeya ojjaña cuana bae sahuajo ani equi yasijje huoojea majje o
shajja'ajjajji cuana bishe ai yasijje nequisohuaquinaje Jesosa ani yasijje, ojje
besapoquinaje. Pea cuana ca ca bishe sisi cuanajo besapoquinaje Jesosa
quishishi. ³⁷O besapoquinajijo beni quea quemó nee nee poeyanaje. Ena
shajohua bishe nane canaje. Jeasohuajea canaje. Cuio canaje enaa. ³⁸Bishe ai
iyedojjojo Jesosa cahuijanaje, ehuojjajaajji biajje jaa. O shajja'ajjajji cuaa

quea mete po majje Jesosa ishe acanaje. Jama poanaje ba'a: —Emeshi Mese Jesosa, ¡shequicue oe! ¡Coya aje se hui'l'ya! —taaanaje.

³⁹ Shequi'y o majje Jesosa nequisohuanaje. Beni tecuea canaje jama ba'a: —Beni, jamaya, ¡nequioquequicue oe! —majoya bae ena nijje jama poanaje—; ¡a'a enashajo pojji!

O jama mimime poajo, enashajo popajea'yonaje. Ena shajoma'y poanaje. Beni popajea'yonaje. ⁴⁰ Majoya Jesosaa o shajja'ajjajji cuana jama acanaje ba'a: —¿Apiojji acuae nequiana quea mete nee poani? ¿A'a mi ejo e'e nei pojjeama poani? Jamajjeya meteani.

⁴¹ Jamajjeya oya cuana bishe aijo ani Jesosajo quea bihui nee poanaje. Ojee miminaje jama ba'a: —¡Ache dejja shai jiquio quea sohui poja nee nee! Beniya, enashajo cuaa pea'aiya oja sohui shajja'ajja cani —ojjaña poanaje.

Dejja quea mase nee nee Jesosaa niñe poquipajea mee ca'yonaje
(Mateo 8.28-34; Noca 8.26-39)

5 ¹Jesosa o shajja'ajjajji cuana nijje besapoquinaje Janinea bae oje mijj yasijje, Jjanana meshi yasijje, Jenesane dejja cuanaja meshi yasijje. Jesosa bishe aijo ani ba'eñaqui majje etaja huasijje nequisohuaquinaje. ²Ma meshijo dejja niñepoqui quea mase nee nequi. Eshahua quea huisohua oja eyami nequijji aca'yajje, ma dejja jjanijo emano'y sa' jaajo nequinaje. ³Majo tii oya ba'e'yonaje jjanijo, ma emano'y huananobia cajjijo tii. Oya quea mase nee nee jjejojo jeyo'ajja canaje cuaa cadenaa. Jjajeyo meequi ajja, quea ca'a nee nee poanaje. ⁴Yahuajo onaaya ojaya eme!, ejiojji pea'ai jeyo'ajja huicha'a huicha'a canaje cadenaa, jjonohua pea'ai. Jamatii ohuaya cadena cuana jjequisejjajea canaje, sejjaquipiquipijea canaje. Onaaya oya jjabahuone meequi ajja, quea mase, quea ca'a, de. ⁵Mecajje, epojjajo pea'ai oya eyiyo cuanajo, jjani cuanajo pea'ai siasia'anil'yonaje. Jjajehuijeaqu'i'aninaje meiya. ⁶Jamajjeya oya niñepoqui Jesosa quea huesha nee ba majje o que jaaoquecuajinaje. Quea ajjajja jjejojo ecu'il'oshajjajo nequinaje Jesosa bihuijiji. ⁷⁻⁸Jamajjeya Jesosaa eshahua huoojeacuayajea ca'yonaje; jama poanaje ba'a: —¡Eshahua dejjajo nequi, cuayaquí'yocue! —Jesosaa acanaje.

Eshahua taaa neineinaje jama ba'a: —Jesosa, miya Eyacuiñajji quea ca'a neeja Bacua Ejja. ¡A'a jjeya eya quea nee nee po meeji! Eyacuiñajji huohuicue jama ba'a: “Jjeya eshahua ecuea enapajji pojjeama” acue —eshahua poanaje.

⁹⁻¹⁰ —¡Ae bajjani miya? —Jesosaa oya acanaje.

—Ecuna quea huiiso neejo Quea Shahua Huiso bajjani —saja'a canaje niñepoquiya—. Che mo miyaya ecuana dejjajo nequi cuayaqui mee'yo majje ¡a'a quea huesha nee huoojeajji! —poanaje eshahua cuana.

¹¹ Quea chipi nee cuichi cuana quea huiiso ijjal'ijjia nequi. ¹² Jamajjeya eshahua cuaa Jesosa jama huohuime acanaje ba'a: —Che ecuana dejjajo nequi huoojeacuayajea majje ¡cuichi cuana huasijje ecuana huoojea'yocue!

¹³ —E'e, ¡poquicue cuichi cuana huasijje! ¡Dobiquicue! —Jesosa poanaje.

Jamajjeya dejja niñepoqui jeanana'yo majje eshahua cuana cuichi cuana huasijje dobiquinaje, ojjaña. Dobiqui majje cuichi cuana cuajicuaji jaaoquequinananaje. Bae quea sahua doe nee nee yasijje cuichi cuana hui'l'yonaje, ojjaña, beca mil huisome.¹⁴ Ba majje cuichi jaahuanajji cuana jjajjasoquinaje. Cuajicuajipoquinaje cuiñajji yasijje huohui pohua. Ojjaña equi yasijje huohui capoquinaje eshahua cuanajo. Cuichi cuanajo, dejja niñepoqui'yo jjima po mee canajeo pea'ai huohui canaje. Jamajjeya ojjaña cuana ma cuiñajjijo ba'e poeyanaje Jesosa baa; dejja niñepoqui'yo jjima baa pea'ai: —¿Ae shai poanaje, de? —poanaje cuana.

¹⁵ Jesosa que poe majje ojjaña dejja niñepoqui'yo jjima ba canaje. Jjeya oya quea bei nequi, daquiji, quea pame nee jjashahuabiquiani. Eshahua cuana chama'yo. Jamajjeya ojjaña cuana quea mete poanaje Jesosajo,¹⁶ eshahua huoojeacuayajea mee ca'yonajejo, cuichi cuana ehui'l'yojojo pea'ai. Jamajjeya cuichi jaahuanajji cuaa pea cuana huohui majamaja canaje niñepoquijo, Jesosaa eshahua huoojeacuayajea canajejo, cuichi ehui'l'yojojo pea'ai.¹⁷ Ojjaña quea mete nee poanaje. Huohui canaje jama ba'a: —¡Jesosa, pea meshi yasijje poqui socue oe! Quea mete ca iña mijo mi quea sohui poja nee nee jojoya —poanaje ojjaña.

¹⁸ Jamajjeya Jesosa bishe ai yasijje nequisohuaquinaje ojje ebesarpoqui'yojji. Dejja ma niñepoqui poanaje onijje poqui sa poanaje, onijje e'anijji.¹⁹ Jamatii Jesosaa oya jama acanaje ba'a: —Chojja, ¡miquea equi yasijje poquicue! ¡Miquea huapa pojjeama cuana huohuicue ejo, Emeshi Mese neijo, ma miya ecuea quea boti neejo quea pame nee anaje huohuicue! —Jesosa poanaje.

²⁰ Jamajjeya ojaya equi yasijje poqui majje ohuaya Jesosajo huohui canaje. Ome Miji pea'ai Cuiñajji yasijje huohui canaje pea'ai. Ojaya esohui shajja'ajja majje ojjaña quea bihui nee poanaje: —¡Ache dejja quea ca'a nee nee Jesosa! ¡Eshahua cuana huoojeacuayajea ca'yonaje, de. E'e e, dejja niñepoqui quea pame nee jjeya, de! —poanaje ojjaña.

Jainoja ebacua piona emano'yojaa; pea epona najji poani tii tii
(Mateo 9.18-26; Noca 8.40-56)

²¹ Majoya Jesosa o shajja'ajjajji cuana nijje bae ojje miji yasijje poqui o'yanaje bishejje. Quea huiso cuana jjachichaqui o'yanaje o que, Janinea bae sahuajo.²² Jesosa ojjaña cuana nijje mimianijo, pea Jodio dejja o que poeyanaje Jaino bajjani, ma Jodioja ejjachichaquiji equi jaahuanajji poani. Ecui'oshajjajo nequiya oya bihuia canaje.²³ Jama poanaje ba'a: —Esohui huohuicji, ecuea ebacua piona quea mano nee nee jaa, beshahua nee poquijeyonaje. ¡Ecuea equi yasijje poecuajicue o napa'ajja emeya! Jamajjeya oya huaquiaje'yo. Quea aja nee poaje'yo.

²⁴ Nequisohua majje Jesosa o shajja'ajjajji cuana nijje poquinaje Jaino nijje. Quea huiso cuana poquinaje onijje pea'ai, ojjaña Jesosa nijje nequi canaje cuana.²⁵ Poquije, oe eponaa Jesosa ba canaje. Oya quea mano, najji popajea'yo ajja. Ome miji pea beca, 12 shequijame na cuayapajequi'yo ajja

poa. ²⁶Quea huiso eshicuijji quiajji cuaa oya na cuayapajeaqui mee'yo jjima acanaje. Jamajjeya eshicuijji sosejje ojjaña ojaya ejjeshejji oe poanaje. Jamatii na' huosa jjima tii, quea nee tii. Yahuajo quea mano pishana poanaje; jjeya ca ca quea mano nee nee. ²⁷Jesosajo shajja'ajja majje, ma Jesosaa ojjaña huaquia mee cani shajja'ajja majje oya poeyanaje o que. Quea huiso nequi dejja tejjee poeyanaje epona. ²⁸Jamaya oya jjashahuabaquinaje ba'a: —Eya Jesosa daqui napa majje na huosaje'yo —jama jjashahuabaquimeya poanaje epona.

²⁹Jamajjeya Jesosaja daqui quehuajje napa canaje. Jjeyahua nei najji po pajea'yonaje. Ma epona quea bihui nee jjashahuabaquinaje: —E'e e jjeya nei eya na cuayapajeaqui'yonaje, apoa po'yonaje.

³⁰Jesosa epona nahuosa mee'yo jeahuajo jjashahuabaquinaje jama ba'a: —E'e nei, jjeyahua nei Eyacuiñajjiya a'ya shai huaquia mee ca'yonaje e daqui napa'ajja cajo.

Jjeyahua nei Jesosa jjabajequinaje. Ojjaña cuana ejjachichaqui nequi huohui'ajja canaje jama ba'a: —¿Aya acuae ecuea daqui napa'ajja canaje so'o?

³¹O shajja'ajjajji cuana onijje jama poanaje ba'a: —Jesosa, quea huiso nee nee ejjachichaqui nequi minijje. Jamajjeya ¿yajjajje shai miyaya huohui'ajjaña jama ba'a: “¿Aya shai ecue daqui napa'ajja canaje?”

³²Jesosaa ca ca bajea neinei canaje epona ena huosa'yo ebajji.

³³Jamajjeya ma epona ojaya emanomeejji chama'yo ba majje Jesosa que poqui'yonaje; Jesosa yajjajo piopionaje. Ecui'oshajjajo nequiya Jesosa huohui canaje ohua na' huosa mee ca'yajje. Ojjaña huohui canaje eponaa.

³⁴Majoya Jesosaa oya acanaje jama ba'a: —¡She, quea bihui nee pocue! Miya quea ja'a jjashahuabaquinaje jama ba'a: “E'e jojo nei Jesosaa eya huaquia mee caje'yo”. Jamajjeya eyaya miya huaquia mee'yonaje. ¡Quea quijiji jaji oe po'yocue! ¡A'a manoshishi o'oyajji! —Jesosaa acanaje.

Epona sho'i eshe po mee ca o'oyanaje

(Mateo 9.23-26; Noca 8.49-56)

³⁵Majoya Jesosa epona nijje mimianijo tii, Jainoja epeejji poeyanaje. Jama poanaje ba'a: —Jaino, miquea ebacuase mano'yonaje. Chama'yo tii po'yonaje. ¡Jamajjeya esohui huohuijji a'la iyaajji equi yasijje o baa! —poanaje.

³⁶Jiquio esohui shajja'ajja majje Jesosaa Jaino jama acanaje ba'a: —¡A'a quea yeno pojji! Jamaya jjashahuabaquicue ba'a: “Jesosa quea ca'a nee nee. Ohuaya ecuea ebacuase shequi mee caje'yo e'e jojo nei” acue.

³⁷Majoya Jesosaa pea cuana huoojea canaje jama ba'a: —¡A'a enije poquijji! —poanaje.

Jamajjeya Jesosa, Peno, Satiaco, oja chahua Huani ca ca oe Jaino nijje poquinaje oja equi yasijje, oja bacua baa. ³⁸Jainoja equi yasijje poqui majje ba cañaquinaje quea huiso dejja cuana, ponaa pea'ai equijo nequi. Epona sho'i emano'yojo ojee pa'ani. Ojjaña quea shajjaquijjo poani. Dehue mia cani emojea'yojjijo pea'ai. ³⁹Equi yasijje dobiqui majje Jesosa jama

poanaje ba'a: —¿Yajjajje acuae pa neineiani, quea shajjaquijjo nee poani nequiana? Jiquio epona sho'i epoquijeyo'yo pojjeama. Oya cahuijaa.

⁴⁰—Chojja de, oya mano'yonaje, de; shequi'yo ajja —poanaje cuana.

Ojjaña cuana esecue yasijje huoojeacuayajea majje Jesosa o shajja'ajjajji cuana nijje, ejeajji nijje, enaese nijje cuanaya epona sho'i jaa huasijje dobiquinaje pea equecuayiji yasijje. ⁴¹Me' iña majje epona sho'i oja sohuijo huohui canaje: —¡Tanitacom!

Ese Ejja esohuijo ca jama poanijje ba'a: —¡Epona sho'i, nequisohuacue! —Jesosaa acanaje.

⁴²Me' iña majje epona sho'i shequi mee ca'yonaje. Jjeyahua nei oya nequisohua majje jeo'yonaje. E'e, oya etii pishana, ahuema' ani, 12 shequijame.

Jamajjeya epona sho'i shequi mee ca'yonaje ba majje ojjaña cuana jjajjasoquinaje; jama poanaje ba'a: —¡E'e jojo nei Jesosa jjashequimeequ'yojji, de! Jiquio epona sho'i emano'yojaa jjeya nei shequi mee ca'yonaje, de —poanaje.

⁴³Jesosaa ojjaña huohui canaje jama ba'a: —E'e, ¡jamatii a'a jjeya pea cuana huohuiji jiquio eya mique bacua shequi mee'yonajejo!

Majoya Jesosa jama poanaje enaese nijje, ejeajji pealai nijje ba'a: —¡Miquea ebacua piona bobiacue! —poanaje.

Jesosa Nasanena meshi yasijje poqui'yonaje

(Mateo 13.53-58; Noca 4.16-30)

6 ¹Majoya Jesosa jomajo ani poqui o'yanaje ojaya cuiñajji yasijje, Nasanena huasijje. O shajja'ajjajji cuana nijje poquinaje. ²Epoja ejomishocajjijo Jodioja equi ejjachichaquijji yasijje poqui majje dobiquinaje. Esohui huohui canaje. Ojaya esohui shajja'ajja majje ojjaña cuana quea tecue nee poanaje, Nasanenajo ba'eca cuana. Oya Jesosa Joseja jea poso acanaje cuaa.

—¡De! ¿Yajjajje shai jiquio dejja Jesosaa esohui quea ja'a nee nee huohui cani? ¿Eyacuiñajji jayojjaya jjaajaqui mee ca'yani emanojaa quea huiso nee, de? ³Oya aje oe acui cacajiji bacua ejja pojja'a. Oja nae Mania bajjani, oja chahua cuana Jacobo, Jose, Simohui, Jonas pealai bajjani. Oja jjo'i cuana pealai jiquiojo ba'le.

Jamajjeya quea quene poanaje Jesosa nijje; Joseja jea poso cajaa acanaje cuaa. ⁴Jamajjeya Jesosaa oya cuana jama acanaje ba'a: —E'e de, pea cuaa Eyacuiñajji esohui huohuiji shajja'ajja cani. Jamatii ojaya cuiñajjijo ojaya huapa pojjeama cuana ca ca oe o shajja'ajja sa po'yo ajja. Oya jayojjaya miquianaya e shajja'ajja sa po'yo ajja.

⁵Jamajjeya oya cuana shajja'ajja sa po'yo ajjajo, oya Eyacuiñajji Bacua pojjeama posojo, Jesosaa oe pojji napa'ajja cajje jjaajaqui mee ca'yonaje. Ma dejja ajjima acani oe pojji nei acanaje Nasanenajo. ⁶Jamajjeya Jesosa jjashahuabaquinaje jama ba'a: —¿Yajjajje shai Nasanenajo ba'eca cuana quea sapa ca'a poani? Ejo e'e nei jjashahuabaqui ajja —poanaje.

Jamajoya Jesosa o shajja'ajjajji cuana nijje poquinaje quea huiso cuiñajji sisi cuana huasijje esohui huohuiya.

Jesosaa o shajja'ajjajji huoojea canaje esohui huohuiya
(Mateo 10.5-15; Noca 9.1-6)

⁷Majoya Jesosaa o shajja'ajjajji 12 huisome iyaa canaje o que. Oya cuana quea ca'a po mee canaje eshahua cuana huoojeacuayajeal'yojji, ojjaña emanojaa cuana huaquia mee'yojji, ejjaajaqui mee'yojji pea'ai. Oya cuana becamejjiji peajai huoojea canaje ojaya esohui shajja'ajjajji cuana pea cuiñajji cuana huasijje ojaya esohui huohuiya. ⁸Huohui canaje jama ba'a: —¡Jjeya a'a aquiana dojorji! ¡Oe acui ejjaquecuaca'aquijji dojocue, beca pojjeama! ¡Bashosoco bobi dojorji a'a dojorji! ¡Ejjeshejji, bobi pea'ai a'a dojorji! ⁹¡Ejiojji shejee oe huoshoyocue! ¡Daqui oe nei, ma miquea eyamijo ba'e nei oe dojocue, beca pojjeama! ¹⁰¡Pea cuiñajji yasijje poqui majje sa'ajjacue oe dejja miquea epjeejji epoiji, joya bei bei! ¡Ojaya equijo anicue ma cuiñajji nequi majje! ¹¹E'e pojja'a beca equijo, beca cuiñajji miquea esohui shajja'ajja sa po'yo ajjajo, niñeba canijo pea'ai, joya cuana jeajeanayocue! Poquije'yohua jama acue ba'a: "Eyaya miquianaya cajaa aje'yo, quea mimishi mi coma. Eyacuiñajjiya miya ba cani quea mimishi nee nee. Ohuaya miya quea nee po mee caje'yo" acue —Jesosa poanaje.

¹²Jamajjeya Jesosa shajja'ajjajji cuana poquinaje. Ojjaña cuiñajji cuana huasijje esohui huohui canaje. Jama poanaje ba'a: —¡Miquea mimishi cuanajo quea yeno pocue! ¡Mimishi pajea'yocue Eyacuiñajjiya epjeejji epo'yojji! —acanaje cuaa.

¹³Quea huiso eshahua cuana dejja cuanajo nequi huoojeacuayajea ca'yonaje. Quea huiso emanojaa cuana acuijjajja seiyiya shicui majje jjaajaqui mee ca'yonaje, huaquia mee ca'yonaje pea'ai, Jesosa shajja'ajjajji cuaa.

Enode Antipaa Huani sapa jajasejjajea mee canaje
(Mateo 14.1-12; Noca 9.7-9)

¹⁴Jesosa Janinea meshijo anijo, Janinea meshi meseya Enode Antipa bajjaniya shajja'ajja canaje onaja ehuohui'yo ojo. Beca cuana Jesosa Huani shequi o'yanaje poso acanaje jama ba'a: —E'e nei jiquio dejja aje oe Huani, ma ona besamejji poa. E'e pojja'a oya mano'yo majje shequi o'yanaje. Jamajjeya ohuaya Eyacuiñajjiya jayojjaya acani, ma dejja ajjima acani —poanaje beca cuana.

¹⁵Pea cuana ca ca jama poanaje ba'a: —Chojja, oya etiiquiana Enia, ma yahuajo nei Eyacuiñajjiya esohui huohuijji poanaje poe o'yanaje.

Pea cuana ca ca jama poanaje ba'a: —Oya ca ca oe Eyacuiñajjiya esohui huohuijji eyacua, yahuajo nei nei ba'e Eyacuiñajjiya esohui huohuijji jayojja jama.

¹⁶Enode Antipa ca ca onajaya ehuohui'yo Jesosajo shajja'ajja majje quea mete nee jama poanaje ba'a: —E'e de, yahuajo ecuea esohuijo Huani sapa jajasejja ca poa. Oya shequi o'yanaje e'e jojo nei. Jamajjeya Eyacuiñajjiya jayojjaya acani ma dejja ajjima acani; quea huiso huaquia mee cani —poanaje Enode.

¹⁷E'e, yahuajo emeshi mese Enode Antipaja edoe mese Penipeja ehuanase Enodiasi bajjani Huani nijje quea quene nee nee poa. Jamajjeya Enode Antipaya Huani iña mee ca poa; jeanobiajaa mee ca poa. Enodiasi aje oe oja yahue huei ca poa Enode nijje eba'ejji, ojaya esha mese nijje eba'ejji. ¹⁸Jamajjeya Huaniya yahuajo Enode Antipa jama tecueame aca poa ba'a: —¡Miyaya aje oe mique doeja, Penipeja ehuanase Enodiasi a'a huana'yojji! Jamaya quea mimishi —Huaniya aca poa.

¹⁹Jamajjeya ohua tecuea cajje quenequenea poa Enodiasi Huani nijje. Quecua sa aca poa. Jamatii quecua jjima; ²⁰oya Enode quea mete poanaje. Oya jjashahuabaquinaje Huani Eyacuiñajjija esohui huohuijji nei neijojo, ojaya epeejji nei poanaje. Jamajjeya nahue canaje Enodiasi equecua ca poaje ijjejojo. Huaniya esohui shajja'ajja sa poa Enode Antipa, jamatii ojaya quea quehua. Huani equi ejjajeanobiaquijjijo jaa iyaa huicha'a huicha'a canaje esohui huohuiya. ²¹Jamatii quijje Enodiasi Huani sapa jajasejja mee canaje. Jiquio jama poanaje ba'a: Enodeya o cuaya poa pojajao ojjaña ojaya epeejji cuana iyaa canaje ojee ijjal'ijjia, majamajaqui baa pea'ai. Ojaya echaco meesahuajji, dejja etii cuana, sohuinano huoojeajji poani cuana pea'ai, Janinea meshijo ba'e dejja etii cuana pea'ai quea huiso nee nee iyaa canaje. ²²Ojjaña ijjal'ijjia'anijo, Enodiasi bacuase pea'ai oe nei majamaja nequinaje ojjaña ebajji, quea bihui nee epo meeji. Enode Antipa quea bihui nee nee poa epona sho'ijo. Jamajje onijke miminaje jama ba'a: —¿Ae shai sa miya poani? ¡Huohuicue mo! Eyaya joya miya sañaya quiaje e'l' jojo nei, she —acanaje Enodeya—. ²³E'e jojo nei she coya miya saje aje mi quiaje; miya huohuiñaaya ca mi ca quiaje, ecue meshi sejja aje mi quiaje miquea epoji —huohui neinei canaje Enodeya.

²⁴Jamajjeya epona sho'i poquinaje ojaya enaese Enodiasi huohui'ajja. —E'e —oja nae poanaje—, e'e, ¡Huani sapa jajasejjajea meequivue she! ²⁵Epona sho'i poe o'oyanaje Enode que. Huohui canaje jama ba'a: —Huani, ma ona besameiji poani ejeanobiajaa. ¡Ojaya esapa jajasejjajea'y majje piatojo jjequivue jjeyahua nei! Maya eya sa poani.

²⁶Ma shajja'ajja majje emeshi mese Enode quea ajjaja nee nee poanaje. Jamatii ojaya esohui epona sho'i nijje ojjaña ojaya epeejji cuanaa shajja'ajja canaje. Jamajjeya ojaya esohui pajea ajja, Enodeja. ²⁷Jamajjeya ohuaya sohuinano cuana huoojea canaje: —¡Epona sho'ija esohui jayojja jama acue! ¡Huani ma ejeanobiajaa oe sapa jajasejjajeaquicue! ¡Jjequivue jjeyahua nei! —poanaje.

²⁸Jjeyahua nei sohuinano cuana poquinaje Huani que. Huani sapajajasejjajea ca'yonaje. Esapa jjequi canaje piatojo. Epona sho'i quia canaje. Majoya ohuaya Huaniya esapa oja nae yasijje quia cañaqui'yonaje, epona sho'iya. ²⁹Majoya aje oe Huani shajja'ajjajji poani huohui canaje cuaa. Jamajjeya oya cuana poeyanaje o dojo'yohua, emojeal'yojji. Mojeal'yo majje papoqui'yonaje Jesosa huohuiya.

Jesosaa 5.000 dejja cuana bobia canaje
(Mateo 14.13-21; Noca 9.10-17; Huani 6.1-14)

³⁰ Majoya quijje pishana Jesosaja huoojea'yo cuana ojñañia cuiñajji yasijke esohui huohuiya poqui huacuaya poe o'oyanaje o que. Oya cuana huohui poñaquinaje ojñañia ohua acanaje, ojñañia ojaya esohui ma ohua huohui canaje pea'ai huohui canaje Jesosa huasijke. ³¹ Quea huiso nee nee dejja poe majamajanijo ijija'ljjia meemee ajja. Jamajjeya Jesosaa oya cuana acanaje: —¡Cua'a, dejjama huasijke ejomishocaqui! Quea huiso nee nee ejjachichaqui nequi cuaa se ijija'ljjia mee jjima acaje —Jesosaa acanaje.

³² Jamajjeya Jesosa o shajja'ajjajji nijje nequisohuaquinaje bishe ai yasijke. Besapoquinaje quima huasijke. ³³ Jamatii Jesosa besapoquije ba majje quea huiso dejja cuana cuiñajji cuanajo ba'e ejiojjije poqui canaje Jesosa baa. Poquicuajinaje ma Jesosa besapoquije yasijke. Ebionei jjaja onaya aniñaquinaje, Jesosa hui que anaquiya. ³⁴ Quijje pishana Jesosa o shajja'ajjajji cuana nijje ba'eñaquinaje. Bishe aijo ani nequisohuaquinaje etaja huasijke. Quea huiso nee nee cuana ba cañaquinaje. Onajo Jesosa quea yeno jjashahuabaquinaje. E'e, oya cuana quea yeno, quea mano nee ñajjajja jaahuana jjima jayojjaya. Jamajjeya oya cuana sohuihuohui canaje quea huiso nee nee Jesosaa. ³⁵ Siniago Jesosa que poe majje o shajja'ajjajji cuaa huohui canaje jama ba'a: —Jesosa, sinia coma, de. Chama' jiquiojo bobo, equi pe'a'i. ³⁶ ¡Dejja cuana huoojeacue cuiñajji sisi cuana huasijke oja bobo jjeshey!

³⁷ —Chojja. Ca'aniahua cuana. ¡Bobiacue oe miquiaaya! —Jesosaa acanaje. —¿Yajja yajji? Ecuanaa bobo quea huiso nee nee jjeshe ajja. Quea nahue nee nee, de, 200 epojja echacojji sosejje. E'e, quea huiso pojajao chaco majje sosejje, pahui jjeshe cajji, ca ojñaña bobiajji.

³⁸ Jamajjeya Jesosaa jama acanaje ba'a: —¿Ache huiso pahui yani esejaya? ¡Pahui baquicue!

Ba majje oya cuana jama poanaje ba'a: —Jesosa, esejaya bobo oe pojji yani. Me oeje pahui, beca nahuoo sisi yani pe'a'i —poanaje o shajja'ajjajji cuana.

³⁹ Jesosa jama poanaje ba'a: —Ojñaña cuana jama acue ba'a: “¡Ojñaña anioquecue sipone biajje!” acue —Jesosaa acanaje—. ¡Ojee jja'anichicha meequivie! ¡Aniji becabeca anioque meeme acue!

⁴⁰ Jamajjeya quea huiso sipone yanijo, ojñaña cuana anioque mee canaje sipone biajje. Jomajo iye huiso anioquenaje, 50; quea huesha pishana iye huiso anioquenaje, 100. Jamaya anioque bamebamajue cuana ojñaña, de.

⁴¹ Majoya Jesosaa me oeje huiso pahui, nahuoo sisi becanejjiji pe'a'i jjeshe majje eyahuasijke jjabajeasohuaquinaje Eyacuiñajji nijje emimiji. Bobijo mimi majje pahui miji canaje. O shajja'ajjajji cuana quia mee canaje dejja cuana e'anioqueani yasijke. Nahuoo sisi pe'a'i miji majje quia mee canaje ojñaña huasijke. Quia capoquijeya quea huiso nee nee jjapanaque poquipoquinaje bobo, de. ⁴² Jamajjeya ojñaña ijija neinei canaje. Quea jejje poanaje. ⁴³ Ojñaña jejje

majje eshajja'ajjajji cuaa chicha ca'yonaje bobo ojjañaja ijjiasejja. Jjepai ai yasijje iya ca'yonaje. Quea huiso nee poanaje, 12 jjepai huisome quea cuata poanaje bobo e'ijjiasejja. ⁴⁴E'e, Jesosaa quea huiso nee nee bobia canaje, de, 5.000 dejja.

Jesosa bae ena biajje poquinaje
(Mateo 14.22-27; Huani 6.16-21)

⁴⁵Jjeyahua nei siniajo Jesosaa o shajja'ajjajji cuana huoojea canaje. Jama acanaje ba'a: —¡Bishe ai yasijje nequisohuaquicue! ¡Bae ojje miji yasijje besapoquicue Betesaida cuiñajji yasijje! Quijje eya poquije mi que, pea cuana huoojea'yo majje —poanaje.

⁴⁶Majoya dejja cuana quea huiso cuana huoojea'yo majje Jesosa eyiyo huasijje jaasohuaquinaje oe nei oja Chii nijje mimiya. ⁴⁷Mecajje Jesosa oe nei jomajo aninaje, eyiyojo. O shajja'ajjajji cuaa ca ca bishe ai quea huesha nee yo canaje, bae yiyesama huasijje. ⁴⁸Jomajo ani Jesosaa oya cuana ba canaje, janobajjima nei yoyo'ajja ba'e. E'e, beni quea quemo nee poeyanaje. Bishe cuiajea ca'yonaje huacuaya. Enashajohua bishe janobajjima nei nane canaje, cuio canaje enaa. Mecashono quea apo nee nee poanaje. Jamatii Jesosa eyiyojo ani o que poquinaje ena biajje. ⁴⁹Jesosa ena biajje jeojeojebeje ba majje o shajja'ajjajji cuana quea mete nee nee poanaje. Quea metejo taaaanje jama ba'a: —¡Coya ae shai poeje ba'a! —siasianaje—. ¡Coya eshahua, de!

⁵⁰Jamajjeya Jesosaa oya cuana huohui canaje jama ba'a: —¡A'a quea mete pojji! Eya jja iña jiquio, eshahua pojjeama. ¡Quea jaji nee pocue!

⁵¹Majoya Jesosa bishe ai yasijje aniajo, beni nequioquequi'yonaje. Jamajjeya ojjaña cuana bishe aijo aniya jjajjasoquinaje. Quea jaji nee po'yonaje: —E'e pojja'a, e'e jojo nei, de —poanaje.

⁵²E'e, Jesosaa ma dejjaja ba jjima acanaje; 5.000 dejja cuana bobia canaje me oeje pahujo. Jamatii oya cuanaja eba pojjeama Jesosa quea ca'a nee nee, ojjaña acani. Oya cuana ca ca quea jjashahuubaqui ja'a po jjima.

**Cuichi cuana hui'i'ya poa meshi yasijje Jenesane' meshi yasijje
 besapoqui o'yanaje**
(Mateo 14.34-36)

⁵³Quijje pishana bae ojje miji yasijje, Jenesane' meshi yasijje besapoqui o'yanaje Jesosa. Ba'eñaquinaje o shajja'ajjajji cuana nijje. ⁵⁴Bishejo ani nequisohuaquinaje etaja huasijje. Dejja cuaa jomajo ba'eya Jesosa ba canaje yahuajo. ⁵⁵Jamajjeya o ba o'oya majje ojjaña iyaaqui canaje Jesosa que epoecuajjiji. Ojjaña emanujaaca cuana equipajaajjijo jaa Jesosa que ye canaje. ⁵⁶Jamajjeya Jesosa cuiñajji quea quemo huasijje, pea cuiñajji sisi cuana huasijje pea'ai, equi cuana huasijje pea'ai dobiqui yajo, dejja cuaa emanujaaca cuana jjequi canaje o que, jjaajaqui mee'yohua. Huohui canaje cuaa jama ba'a: —Jesosa, ojjaña emanujaaca cuana mique daqui che napa'ajja meecue ehuaquia'yojji, ejjaajaqui'yojji —acanaje.

Ojjaña Jesosaja daqui napa'ajja majje jjaajjananaqui'yonaje,
huaquia'yonaje pea'ai, de.

Quea jjashahuabaqui tai poanijo quea tai poani
(Mateo 15.1-9)

7 ¹Majoya Paniseo cuana, Jodio esohui huohuijji cuana pea'ai Jenosanenajo ba'e Jesosa que poeyanaje. ²Poe majje o shajja'ajjajji cuana ba canaje ijja'iijja'aní eme' shacula neinei jjimajo. Jamajjeya Jesosa tecuea canaje Jodio etii cuua. Jama poanaje ba'a: —Esohui huohuijji, ¿apiojji acuae mi mi shajja'ajjajji cuana eme' shacula neinei jjimajo ijja'iijjani? —acanaje Jodio etii cuua.

³E'e, ojjaña Jodio cuua aje oe ijja jjimahuajo eme' shacula neinei cani; quea huiso shacuame acani, ⁷huisome, ojaya etiiquiana cuanaja esohui jama. ⁴Equi aquiana jjeshejji yasijje bobi jjeshe majje eme' shacula neinei cani ijja jjimahuajo pea'ai Jodio cuanaja etiiquianaja esohui jayojja jama. Quea huiso etiiquianaja esohui jayojja jama acani pea'ai: piato cuana, oña cuana, caneco cuana jamaya topo neinei cani pea'ai; meshimisi ca'a quea quemo cuana, e'anioquejji cuana jamaya topo neinei cani pea'ai. ⁵Jamajjeya Paniseo cuana, Jodio etii cuana Jesosa nijje mimijajinaje: —Jesosa, ¿apiojji acuae mi mi shajja'ajjajji poanija esejaya etiiquianaja esohui jama po ajja? ¿Apiojji acuae ijja'iijja jjimahuajo eme' shacula neinei ajja, de? —poanaje.

⁶Jesosaa oya cuana quea tecue saja'a canaje jama ba'a: —¡Miquianaya ca mi ca oe jjadasiaquijji nei nei! Eyacuiñajji esohui huohuijji Isaiaja esohui miquianajo e'e jojo nei poa. E'e, yahuajo nei Eyacuiñajjiya Isaia tehue mee ca poa jama ba'a:

“Jiquio dejja cuua eya bihuia nisho cani. Jamatii jjashajja'ajjaqui ajja.

7Jamajjeya ecuea equi yasijje jjachichaquiani ejjachichchajeaquijji. Ohuaya ojaya ejjashahuabaqui'yojji huohui cani, ecuea esohui pojjeama”.

Jamaya Isaiaa yahuajo tehue ca poa miquianajo —Jesosa poanaje—. ⁸De, ijyajja acuae nequiana poani so'o? ¿Apiojji acuaeeya Eyacuiñajji esohui pajea'yaña etiiquianaja esohuijjo? ⁹E'e, miquianaya jama poani ba'a: ¹⁰Yahuajo nei Eyacuiñajjiya Moisesi tehue mee ca poa oja sohui jama ba'a: “¡Mique chii, miquea enaese etii pea'ai jaahuanacue! Joya oja chii, oja nae pea'ai cajaa acajo ¡cajajahuejjajea ca'yahua cuua, meiya!” Jamaya tehue mee ca'yaa poa yahuajo nei. ¹¹Miquianaaya ca ca huohui tai yaña jama ba'a: “Dejja oja chii etii nijje, oja nae etii nijje pojja'a camimiyahua jama ba'a: “Eyaya miya eba'e meesahuajji pojjeama. Chojja, eyaya ecuea aquiana Eyacuiñajji yasijje quiaña o bihuajji”. Jamaya huohui taiyaña miquianaaya. ¹²Jamajjeya oja chii etii, oja nae etii pea'ai pajea meeyaa, miquianaaya. ¹³Eyacuiñajji pe a esohui quea huiso nee pajea mee'yo sa'aña etiiquianaja esohui yajji nisho —Jesosaa Jodio etii acanaje.

¹⁴Jamajjeya Jesosaa ojjaña cuana iyya majje huohui canaje jama ba'a:
—Shajja'ajjacue mo, jjabahuejja neineiquicue oe! ¹⁵Bobi cuanajo, ojjaña aquiana

enabajje dobiquianijo pojjeama miquianaya quea mimishi poani. Chojja. Quea jjashahuabaqui taijo, esohui quea tai miquea enabajje cuayaquianijo ca ca quea mimishi poani. Eyacuīñajjiya maya ba cani quea mimishi —Jesosaa acanaje.

¹⁶—E'e, ¡miquianaaya quea shajja ja'aa ecuea esohui shajja'ajja majje jama acue! ¡Jjashahuabaquicue oe!

¹⁷ Majoya Jesosaa ojjaña cuana jeanana majje equi yasijje dobiquinaje o shajja'ajjajji cuana nijje. Dobiqui majje o shajja'ajjajji cuaa huohuiajja canaje: —Jesosa, ecuanajaya ca ca esohui quea quehua miquea. ¡Che mo oe ba meesahuacue! —poanaje.

¹⁸—¿A'a ecuea esohui miquianajaya ba jjima pealai? —Jesosa poanaje—. ¿A'a miquea eba pojjeama? Eme' shacula neinei jjimajo pojjeama miquianaya. Eyacuīñajjiya quea mimishi ba cani. ¹⁹ ¡Bacue! Ojjaña bobi, pea aquiana pea'ai enabajje ijjiajea majje see ai yasijje dobiquiani. Quijje jamatii seejeaje'yo. ²⁰ Joya quea tai jjashahuabaquianiya ca ca esohui tai jeacuaya cani. Maaya oya quea tai po mee cani: Quea mimishi Eyacuīñajjiya oya ba cani. ²¹ E'e, ejjashahuabaqui'yojji quea taijo pea eponajo ba'e sa poani, peaja yahuejo ba'e sa poani, sii cani, siajje poani, pea quecua cani pea'ai, ²² quehuajje cojjo cani, quea dejja tai poani, quea nishehui poani, ojjaña mimishi acani, ona dasiajji poani, quea mimishi pea nijje ba'yani, pea jayojja ba'e sa poani, mimijajiani pea'ai. Jama poani ba'a: “Eya oe nee quea pame nee” poani, esho'i jayojja mimi naanaani, Eyacuīñajji niñebla cani pea'ai. ²³ E'e jojo nei ojjaña joya jama acani Eyacuīñajjiya ba cani quea mimishi, quea mimijequijea; bobi ijji cani eme' topo neinei jjimajo pojjeama quea mimishi poani —jamaya Jesosaa o shajja'ajjajji cuana saja'ame acanaje.

Cananea epona Jesosa que poeyanaje (Mateo 15.21-28)

²⁴ Majoya Jesosa ma equijo ani poquinaje pea meshi yasijje. Tino pejjejo, Sinono pea'ai pejjejo aninaje. Jjeya Jesosa mimi sa po ajja ojjaña cuana nijje. Jamajoya equi yasijje quehua dobiquinaje o shajja'ajjajji cuana nijje. Jamatii oya quehuajje ani meemee ajja; jjanequiquehuacu meemee ajja. ²⁵⁻²⁶ E'e, jjeyahua nei oe eponaa shajja'ajja canaje Jesosa jomajo ani. Jamajjeya o que poeyanaje. Oya pea, Jodio epona pojjeama, Jieno pona pea meshijo ba'e, Sinia meshijo, Penisiamo ba'e. Ojaya ebacua piona huasijje eshahua yahuajo dobiquia poa. Jamajjeya enaese Jesosa que poe majje ecui'oshajjajo nequinaje o bihuijji, onije emimi neineiji. Jama poanaje ba'a: —Emeshi Mese nei, ¡ecuea ebacua piona jjaajaqui mee'yocue, quea mano nee nee jaa, quea niñe nee nee jaa! —enaese poanaje.

²⁷ Ma enaese Jodio pojjeamajo, huapa jayojja. Jesosaa oya saja'a canaje jama ba'a: —¿A'a cuae ecue bacuaja bobi jeajeaje iñahuehuaja el'ijjajji? ¿A'a cuae jamaya quea pame? —Jesosa poanaje.

²⁸ Epona quea shoe jama jjejojo jama poanaje ba'a: —E'e, Emeshi Mese nei. ¡Jamatii o huonejjiya bobi ijji canijo, eshaa oquequianijo ijji cani iñahuehuua! —acanaje enaeseya.

²⁹ Jamajjeya Jesosa quea bihui nee poanaje: —Epona, miya ca ca oe quea ja'a nee, quea pame nee ejo jjashahuabaquiani. Jamajjeya eyaya miquea esohui jayojja jama jjeya nei aje'yo. Miquea ebacua piona jjaajaqui mee'yonaje. Eyaya eshahua ojo nequi huoojeacuayajea'yonaje. ¡Quea bihui poquicue miquea equi yasijje! —Jesosa poanaje.

³⁰ Jamajjeya jjeya nei ma epona poquicuajil'yonaje oja equi yasijje. Ba cañaquij'yonaje oja bacua piona quea pame nee, eshahuama'yo, ejaaaji biajje quea bei ani'yo.

Jesosaa shajjaqueba jjashajjaja'aqui mee ca'yonaje mimi mee ca'yonaje pea'ai

³¹ Jjeyahua nei Jesosa Tino pejjejo ani poquinaje. Sinono yejjenana majje Ome Miji pea'ai Cuiñajji cuana yejjenana majje, Janinea bae yasijje poe o'oyanaje, ma Dejjaja Eyacuiñajji ba po jjimaja bae bajjani yasijje.

³² Majoya pea cuaa dejja shajjaqueba, mimi'ajja pea'ai ye canaje o que. Jama poanaje ba'a: —Jesosa, jiquio dejja shajjaqueba, mimi'ajja pea'ai. ¡Oya che napa'ajjacue emeya quea ja'a nee epoji!

³³ —E'e, —Jesosa poanaje. Jamajjeya ma dejja oe nei dojo canaje huesha'ama onijje mimiya, o huaquia mee'yohua. Ojaya eme sisi shajjaquebaja eshajja huejja huasijje jeanobia canaje. Majoya jjamecuichoqui majje ana napa canaje emeya. ³⁴ Eyahuasijje jjabajeasohuaquinajje Eyacuiñajji nijje emimijji. Jjajjeanajequinaje jama ba'a: —¡Quea ja'a pocue! —poanaje shajjaqueba nijje. Jesosaja mimijo: —¡Epata! —poanaje.

³⁵ Jesosa mimi jeahuajo, ma dejja quea ja'a nee nee shajja'ajja ca'yonaje. Miminaje quea ja'a nee. ³⁶ Majoya Jesosaa ojjaña cuana huohui canaje jama ba'a: —E'e, eyaya shajjaqueba jjashajjaja'aqui mee'yonaje, mimi mee'yonaje. ¡Jamatii pea cuana a'a jihuohuijji so'o! —Jesosaa jamaya ojjaña cuana huohui canaje.

Jamatii oya cuaa huohui majamaja canaje ojjaña huasijje. ³⁷ Shajja'ajja majje ojjaña quea bihui nee jama poanaje ba'a: —E'e e, Jesosaa ojjaña acani quea pame nee nee. E'e e, shajjaqueba jjashajjaja'aqui mee ca'yonaje jjeya nei. Mimi'ajja pea'ai quea ja'a nee mimi mee ca'yonaje —jamaya ojjaña Jesosa bihuia canaje.

Jesosaa quea huiso cuana bobia canaje, 4.000 dejja (Mateo 15.32-39)

8 ¹Majoya quijje pishana quea huiso nee nee cuana poeyanaje. Jesosa que jjachichaqui o'oyanaje. Onijje ani tiitii canaje esohui shajja'ajja. Bobima' poanaje. Jamajjeya Jesosaa o shajja'ajjajji cuana iyaa canaje. ²O que poeyajo, huohui canaje jama ba'a: —Jiquio dejja cuana enijje nequi pea beca peejiima cahuime. Ojaya bobi oe poanaje. Jamajjeya eya ojo quea yeno jjashahuabaquiani, bobimajo. ³Oja equi yasijje huoojea sa po'yo ajja, quea shoe nee nee; ejiojjije poquianijo bobi yasijje po chana!.

⁴O shajja'ajjaggi cuanaa Jesosa saja'a canaje: —E'e. Jiquiojo chama'bobi, dejjama! ¿Yajja yajji? Oya cuana quea huiso nee nee ebobiajji. ¿Achacua pahui ejjeshejji ojjaña bobiajji? —acanaje cuaa.

⁵—¿Ache huiso pahui miquea yani? —Jesosaa huohui'ajja canaje.

—Me oeje becanejjiji pe'a'i, 7 pahui yani —poanaje.

⁶Jamajjeya Jesosaa ojjaña ejja'anichichaqui'yо ani cuana jama acanaje ba'a: —¡Meshijo anioquecue! —acanaje.

Majoya Jesosa ma 7 pahui jjeshe majje Eyacuiñajji oja Chii bihuia canaje bobijo. Majoya pahui miji canaje. O shajja'ajjaggi cuana quia canaje. Majoya oya cuanaa dejja cuana huasijje quia canaje. Quia capoquije quea huiso nee nee jjapanaqueipoquinaje, bobi. ⁷Ojaya oe pojji nahuo sisi yaninaje pea'ai. Oya jayojja Jesosaa nahuo sisi miji majje quia canaje o shajja'ajjaggi cuana que ojjaña cuana huasijje equiajji. ⁸Jamajjeya ojjaña cuaa ijja canaje; quea jejje poanaje. ⁹Ijjia majje, mi ijjiayedo majje bio ca'yonaje jjepai ai yasijje, o shajja'ajjaggi cuaa. Mepe ca'yо majje quea huiso poanaje, 7 jjepaime. Jamatii quea huiso nee nee dejja cuana bobia canaje, 4.000 dejja. ¹⁰Majoya Jesosaa ojjaña cuana huoojea canaje oja equi cuana huasijje. Jesosa ca ca bishe ai yasijje nequisohuaquinaje o shajja'ajjaggi cuana nijje. Besapoquinaje ojje, pea meshi yasijje Majadana meshi yasijje, pea bajjani Namanota meshi yasijje, ma Ena Ta'a Huoi bajjani yasijje.

Jodio etiiya Jesosaa pana canijo huohui'ajja canaje

(Mateo 16.1-4; Noca 12.54-56)

¹¹Majoya Paniseo cuana poeyanaje Jesosa que. Onijje mimicuijebajjea sa poanijo jama anisho canaje ba'a: —Esohui huohuijji Jesosa, ¿A'a miya Eyacuiñajji huoojea'yо nei ojjaña jaahuanajji pojja'a? ¡Ejjaba'ajjaqui so'o! ¡Eyacuiñajjiya jayojja jama paname a'ajja' eyajo ecuanaja ebajji! —huohui nisho canaje.

Jamatii oya cuaa Jesosa Eyacuiñajjiya huoojea'yо pojjeama poso acanaje pea Paniseo cuana: —Chojja, Jesosa Eyacuiñajjiya huoojea'yо pojjeama. Jamajjeya Eyacuiñajjiya jayojja jama mi pana cajo, pajea caje'yo cuaa.

¹²Paniseoja ejjashahuuba taiquijji Jesosaja eba poanaje. Jamajjeya quea yeno poanaje jama ba'a: —Chojja. ¿Apiojji miquianaya Eyacuiñajjiya pana cani ba majamaja sa poani? Miquianaaya Eyacuiñajjiya esohui cajaa aña. Jamajjeya miquea ba jjima ache shono ojaya ehuoojea'yо ojjaña jaahuanajji poeyanaje. Jamajjeya Eyacuiñajjiya eya pea epana mee'yojji pojjeama miquea ebajji eya ojaya ehuoojea'yо —Jesosaa acanaje.

¹³Paniseo cuana shajjama' poanijo, Jesosaa oya cuana jea cana'yonaje, jjabahuejjaqui ajjajojo. Besapoqui o'yananje ojje miji yasijje bishejje o shajja'ajjaggi cuana nijje.

**Paniseoja esohuitai pahui shejjee meeiji jayojja
(Mateo 16.5-12)**

14 Majoya bae ojje miji yasijje besapoquije Jesosa shajja'ajjajji poani cuana jjashahuubaquinaje. Jama poanaje ba'a: —E'e de, ecuanaa bobo pajea'yonaje.

15 Majoya Jesosaa, Paniseoja ehuohui taijo jjashahuubaquinijo oya cuana huohui canaje: —¡Quea ja'a nee jjashahuabaquicue! Paniseoja, Enodeja epeejjija esohui pahui shejjee meeiji jayojjajo miya quea tai po chana!

16 Oya cuana bobijo jjashahuubaquinijo Jesosaja esohui ejjashahuabaquimeejji onajaya quea quehua poanaje. Jamajjeya ojee mimimiminaje jama ba'a: —E'e pojja'a Jesosa jama poanaje ecuanaja bobo ye jjimajo.

17 Ojaya esohui Jesosaja eba poanaje. Jamajjeya oya cuana jama acanaje ba'a: —¿Apiojji acuae jja nequiana ojee mimimimiani bobijo? ¿A'a jja eya miquianajaya ba jjima quea ca'a nee nee? **18** ¿A'a jja nequiana ejo jjashahuabaqui jjima tii? ¿A'a jja nequiaa pajea'yonaje so'o? **19** Eyaya me oeje pahui miji majje quea huiso dejja bobianaje, 5.000 dejja. Ijjia'ijjajeyo majje acuae jjaya ¿ache jjepai huiso chicha'yonaje pahui? ¿A'a ya pajea'yonaje? —Jesosaa acanaje.

—Quea huiso nee, 12 jjepaime —poanaje.

20 —E'e. Oya jayojjaya me oeje beca pahui, 7 pahui, miji majje quea huiso dejja bobianaje, 4.000 dejja. ¿Majoya ojjañaa ijja'ijjajeyo majje miquianaaya ache jjepai huiso pahui chicha'yonaje so'o?

—Quea huiso nee pea'ai, 7 jjepaime quea cuio chicha'yonaje ecuaaya —saja'aime acanaje.

21 —E'e —Jesosa poanaje—. ¿A'a jamatii miquianajaya ba jjima eya quea ca'a nee nee mi bobiajji? ¿A'a mi jjabahuejjaqui jjima? —Jesosa poanaje.

Betesaidajo nequi Jesosaa cojjama' jjacojjapojjaqui mee ca'yonaje

22 Majoya Jesosa o shajja'ajjajji cuana nijje Betesaida huasijke ba'eñaqui o'oyanaje, Jai Jaajji cuiñajji yasijje. Jomajo pea cuanaa cojjama' ye canaje Jesosa que. Jesosa huohui neinei canaje jama ba'a: —Jesosa, jiquio dejja cojjama'. ¡Che jja oma quea cojja ja'a po mee'yocue!

23 Jesosaa cojjama' me iña majje me pejjejea canaje cuiñajji esecue yasijje. Jomajo Jesosaa eme' cuicho majje cojja iñapepa canaje cuichohua. Oya napa'ajja canaje emeya pea'ai. Jama poanaje ba'a: —¿Achajja acuaeya miyaya baña so'o, cha? —Jesosa poanaje.

24 Bajea majje cojjama' jama poanaje ba'a: —Eyaya dejja cuana jeojeoqui baña, acui jayojja de, quea jama pishana, de —acanaje.

25 Majoya Jesosaa ma dejja cojja napa'ajja ca o'oyanaje emeya. Jesosaa cojja napa'ajja ca o'oyajje, cojjamaa jjeyahua nei ba neinei canaje. Quea cojja ja'a nee nee po'yonaje. **26** Majoya Jesosaa oya huoojea canaje oja

equi yasijje. Jama poanaje ba'a: —¡Epeejji, quea jaji nee poqui'yocue miquea equi yasijje! ¡A'a jjeya cuiñajji yasijje poqui o'oyajji! ¡Eyaya miya quea cojja ja'a po mee'yonaje a'a jocuama huohuijji! —Jesosaa acanaje.

Penoja esohui quea pame Jesosajo

(Mateo 16.13-20; Noca 9.18-21)

²⁷Majoya Jesosa o shajja'ajjajji cuana nijje Pinipo meshi yasijje poqui canaje. Sesanea huasijje poquijeya o shajja'ajjajji huohui'ajja canaje Jesosaa: —¿Dejja cuana acuae jja yajja poani ejo? —Jesosaa acanaje.

²⁸—Miya Huani, ma ona besamejjii poa, shequi o'oyanaje poso ca jja mi ca acani beca cuaa. Pea cuana aje jja poani miya Enia, Eyacuiñajji esohui huohuijji yahuajo nei nequia poa. Pea poani ba'a miya pojja'a pea esohui huohuijji yahuajo nei nequia poa pojja'a. Oya cuana yahuajo nei mano'ya poa shequi o'oyanaje poso ca jja mi ca acani cuaa —poanaje o shajja'ajjajji.

²⁹—¿Miya acuae yajja poani ejo? ¿A'ya cuae iña? —Jesosa poanaje.

—Miya ca ca Eyacuiñajji huoojea'yo ojjaña jaahuanajji Quito bajjani —Simohuiya Jesosa saja'a canaje.

³⁰Jamajjeya Jesosaa oya cuana jama acanaje ba'a: —E'e, eya Eyacuiñajji huoojea'yo ojjaña jaahuanajji. Jamatii ¡a'a jja oe jjeya huohuijji cuana! —Jesosa poanaje.

O mano'yojjijo Jesosa miminaje

(Mateo 16.21-28; Noca 9.22-27)

³¹Majoya Jesosaa o shajja'ajjajji cuana huohui coo canaje ojaya emano'yojjijo: —Eya ojjañaja Edoe Mese quijje Jenosanena huasijje poquije. Jomajo Moisesija etehue'yo huohuijji cuaa, Jodio etii cuaa pea'ai, Eyacuiñajji nijje emimijji etii cuaa pea'ai eya quea huiso cuia caje'yo. Quea nee nee poaje'yo eya. Quijje ya mo manoje'yo ohua me' caca mee cajje. Jamatii pea beca peejjima cahuime po majje mo shequi mee caje o'oya ecue Chiiya —acanaje.

³²Jamajjeya Jesosaa jama huohui neineime acajje Peno quea yeno nee poanaje. Oya oe nei iyaa canaje, Penohua. Jama poanaje ba'a: —Chojja, ecuea Emeshi Mese Jesosa, miya Eyacuiñajji jaahuanajji caje'yo. Peaja aje mi oe ecuiajji pojjeama, peaja equecua'yojjijo pojjeama jja mi, de.

³³Jamajjeya aje jja oe Jesosaa ojjaña o shajja'ajjajji cuana cojja ba neinei majje jama Peno tecueame acanaje ba'a: —Peno, ¡a'a jamaya mimijji! Miya e dasiajji nisho epo jama mimiani. Miya Edosiquiana Satanasa jama mimiani. Jjashahuabaquiani quea tai, dejja jama; Eyacuiñajji ejjashahuabaquijji jama pojjeama —Jesosa poanaje.

³⁴Jamajjeya Jesosaa ojjaña o shajja'ajjajji, ojjaña pea cuana jomajo nequi pea'ai iyaa canaje. Jama poanaje ba'a: —¡Ojjaña joya enijje e'e jojo nei jjapeequil'yo sa poani Eyacuiñajji ejjashahuabaquijji jayojja jama ba'ecue! E jayojjaya jja enijje capoquiahua, jamatii onaa napa cajje aje jja oe quea nee poaje'yo pojja'a. ³⁵E'e,

ojjaña joya Eyacuiñajiji ejashahuabaquijji jayojja jama ba'e'yo sa po aija ba'e tiitii aija enije eyajo. Joya ecuea ejashahuabaquijji jayojja jama ba'e'yo sa poani ca ca ba'e tiitije'yo enije eyajo. ³⁶E'e pojja'a dejja cuaa quea huiso nee aquiana ojaya yajji chicha caje. Jamatii oya cuana cuaquí yasijje jeajea cajo ojjaña ojaya aquiana cuana edojojji pojjeama. ¿A'a ojjaña ojaya aquiana cuana Eyacuiñajiji yasijje quia cajo o cuaquijo ani cuayaqui mee caje'yo? ¿A'a Eyacuiñajiji oya cuana onijje eyajo ba'e mee caje'yo ma aquiana quea huiso nee sosejje? Chojja. ³⁷Eyacuiñajiji cajaa amajje eyajo eba'ejji pojjeama. Chojja, ejjeshejji pojjeama nequianajaya, aquiana quea huiso sosejje pojjeama, beijo sosejje pojjeama eba'e tiitii'yojji. ³⁸E'e jojo nei jjeya ojjaña cuana Eyacuiñajiji nijje jjapeequí aija, ojjaña quea mimishi poani pealai. Ecuea esohuijo quea bicho poanijo jama acani cuaa ba'a: "Cho, eya Jesosa Quitoja epeejji pojjeama". Jamajjeya eya ojjaña Edoe Mese esohuidojojji pame cuana nijje poe o'oya majje ecue Chii jayojja quea pame nee ojjaña huoojea'yojji poaje'yo. Jamajjeya eyaya ecue Chii eyajo ani huohuije jama ba'a: "Cho, oya cuana ecuea epeejji pojjeama. Cajaa" eyaya aje —Jesosa poanaje—. E'e, jjeya ej oquea bicho poanijo quijje eya quea bicho poaje'yo ojo, de.

9 ¹Majoya Jesosaa o shajja'ajjajji cuana jama acanaje ba'a: —E'e jojo nei beca cuaa jiquiojo nequiya jjaa mo ecojjaa ba caje ojjaña huoojeajji quea ca'a nee nee. Jamaya mo ba caje mano'yo jjimahuaa. Beca cuanaja jjaja mo ba jjima poaje ojjaña huoojeajji; manoje'yo —Jesosaa acanaje.

Jesosa quea cojja jiji poanaje oja Chii nijje mimianijo (Mateo 17.1-13; Noca 9.28-36)

²Quijje pishana me oeje pea emejje oe cahuime po majje Jesosa poquinaje o shajja'ajjajji nijje, pea beca peejjima dejja nijje, Peno nijje, Satiaco, oja chahua Huani nijje pealai. Mahuiso dejja nijje poquinaje eyiyo huasijje quea huesha nee. Jocuama nequi oya Jesosa jjahuapaqui'yonaje. Jjhahuapaqui majje quea cojja jiji nee poanaje eshequi jayojja poanaje, quea jeajahua nee nee. ³Oja daqui quea oshe nee nee poanaje, quea jeajahua nee bo oshe jayojja. Daqui tajjajji jiquio meshijo aniya daqui tajja oshe'yo aija ojaya daqui jayojja. ⁴Jamaya ojaya epeejjiya Jesosa ba canaje. Moisesi, Enia pealai ma yahuajo nei ba'ya poa Jesosa nijje mimimimi nequi ba canaje pealai. Miminequinaje Jesosa onaja mimishijo emanoyojji jjeojo. ⁵Jamajjeya Peno jjashahuabaquijji mimojao Jesosa nijje jama poanaje: —E'e, Emeshi Mese Jesosa, jiquiojo ecuana canequiahua, quea pame nee. Pea beca peejjima equi sisi ecuaaya ca'iyahua miquea, Moisesija, Enia pealai eba'ejji.

⁶Peno quea ajjajja jjeojo jama poanaje, jjashahuaba bamequi jjima jjeojo. E'e, ojjaña quea ajjajja jjeojo yajja mimime epoiji. ⁷Peno mimianijo tii bo quea oshe nee nee nequioquenaje. Queya canaje huoja. Shajja'ajja canaje Eyacuiñajiji jama poani ba'a: —Jiquio ecuea ecue Bacua Ejja quea jea nee nee. ¡Oya oe shajja'ajjacue!

⁸O shajja'ajja majje quea mete nee nee poanaje Peno, Satiaco, Huani pealai. Majoya bajea canaje Jesosa oe nei nequi; Enia, Moisesi pealai chama!.

⁹Eyiyodo nequi jaaoquequije'yo mimimimi jaaoque'yonaje. Jesosaa ma ojjañaja Edoe Meseaya jama acanaje ba'a: —¡Ma miyaya eyiyodo banaje pea cuana a'a huohuijji jjeya! ¡Quijje eya emano'yo jaa shequi o'oyajo oe pea cuana huohuicue!

¹⁰Oya cuanaa Jesosa shajja'ajja canaje. Huohui jjima nei nei poanaje. Jamatii ojee mimimiminaje jama ba'a: —¿Yajjajje shai oya Jesosa jama poanaje ba'a: "Eya emano'yo jaa shequije o'oya"? Maya ecuanaja quea quehua —poanaje o shajja'ajjajji cuana.

¹¹Jamatjeya Jesosa huohui'ajja canaje: —Jesosa, Moisesija etehue'yo huohuijji poaniya jama acani ba'a: "Enia oe ebionei meshi yasijje capoe'yahua Eyacuiñajjija huoojea'yo ojjaña jaahuanajji poe jjimahuajo". ¿Yajjajje acuae jamaya acani oya cuaa? —poanaje Huani, Satiaco, Peno pea'ai.

¹²Jesosaa jama acanaje ba'a: —E'e jojo nei Enia jayojja jama oe dejja ebionei epoejjii ojjaña cuana ejo e'e jojo nei ejjashahuabaqui meesahuajji. E'e, Eyacuiñajjija esohui huohuijji yahuajo nei ba'eya jama ejo tehue ca poa pea'ai ba'a: "Ojjañaja Edoe Mese quea nee nee po mee caje'yo cuaa. Jodio cuanaja oya ba jjima poaje. Pea poso acaje. Jamatjeya cuia caje'yo. Cajaa acaje'yo" jamaya yahuajo nei tehue ca poa ejo —Jesosa poanaje—. ¹³E'e, Enia jama ca ca oe yahuajo pishana poeyanaje. Jamatii Jodio cuanaja oya ba jjima poanaje. Jamatjeya cuia ca'yonaje. Jamaya yahuajo nei Eyacuiñajjija esohui huohuijji cuaa ojo tehue ca poa. Ma jayojja jama acanaje cuaa —jamaya Jesosaa Peno, Satiaco, Huani pea'ai acanaje eyiyodo nequi jaaoqueje'yohua.

Esho'i niñepoquima'yo po mee ca'yonaje Jesosaa

(Mateo 17.14-21; Noca 9.37-43)

¹⁴Eyiyodo nequi jaaoque'yo majje Jesosa shajja'ajjajji yasijje poe'yonaje. Ba cañaquinaje quea huiso cuana ejjachichaqui nequica. Moisesija etehue'yo huohuijji cuaa Jesosa shajja'ajjajji cuana mimicuiajeanobiajea cani. ¹⁵Ojjaña ejjachichaquinequi Jesosa ba majje quea quijiji jaji nee poanaje. Cuajicuajinaje Jesosa bihuiaa jama ba'a: —Jesosa, miya Eyacuiñajjija huoojea'yo ojjaña jaahuanajji.

¹⁶Majoya Jesosaa huohui'ajja canaje: —¿Ajeo acuae quiana jjamimicuajiea nobiajeaquianii? ¿Yajja poani so'o?

¹⁷Oe dejja Jesosa que poeyanaje. Huohui canaje jama ba'a: —Emeshi Mese Jesosa, eyaya ecue bacua ejja yenaje mi que. Oya quea mano nee nee, quea niñe jjejojo mimi ajja pea'ai. ¹⁸Eshahuaa ojo nequiya oya naba huapa mee cani, jjaami yayequi mee cani pea'ai. Niñepoqui jaabichajeaquianii meshi yasijje ese' ijjiayai cani pea'ai. Eyaya mi shajja'ajjajji cuana huasijje yenaje mi chamajo. Jamatii niñe poquipajea ajja —ejeajji poanaje.

¹⁹Jesosaa ojjaña cuana jama acanaje ba'a: —¡De! ¿Ache shono acuae jja nequiana ejo jjashahuabiye e'e jojo nei? ¡Quea sapa ca'a mi coma! ¿Ache cahui huiso minijje nequi majje miyaya eya bajel'yo Eyacuiñajjija huoojea'yo ojjaña jaahuanajji quea ca'a nee nee? ¡Esho'i e que jjequicue! —Jesosa poanaje.

²⁰Jamajjeya esho'i jjequi canaje Jesosa que. Jesosa ba majje eshahuaa esho'i janobajjima nei cacacaca mee canaje. Meshi yasijje jea majje oya jeacapoquipoquinaje. Naba huapanaje. ²¹Jesosaa ejeajji huohui'ajja canaje: —¿Ache shequiaja huisome jama poanaje oya?

²²—Jesosa, oya esho'yahua jama po —poanaje ejeajji—. Eshahuaa oya dahuajea majamaja'ajja canaje cu aqui yasijje, ena huasijje hui'l mee'ajja ca'yonaje cuanaya, o mano mee'yojji nisho. Jamatii jecuanajo jjashahuubaquicue quea pame; ecuana jaahuanacue! ²³A'a miyaya ecue bacua jjaajaqui meeje'yo pojja'a?

²³Jesosaa ejeajji saja'a canaje: —A'a huohuijji jama ba'a: “²⁴A'a pojja'a miyaya oya jjaajaqui meeje'yo?” E'e jojo nei jjashahuubaquicue jama ba'a: “E'e jojo nei Jesosa quea ca'a nee nee; ojjaña acani. Ohuaya ecue bacua ejja jjaajaqui meeje'yo pealai”. Jamaya jjashahuubaquianijo e'e jojo nei eyaya miquea ejjashahuabauquil'yojji jayojja jama aje'yo. Miquea ebacua ejja jjaajaqui meeje'yo pealai —Jesosa poanaje.

²⁴Jamajjeya jjeyahua nei ejeajji jama poanaje ba'a: —Esohui huohuijji Jesosa, eya mijo e'e jojo nei jjashahuubaquiani miya ejja aquimjee'yojji. ²⁵Miyaya eya jjabahuejja neineiqui meesahuacue!

²⁵Ojjaña cuana o que jjachicha cuajicuajiquiani ba majje Jesosaa o niñepoquimeejji poani huoojeacuayajea canaje: —¡Eshahua, o queba po meeiji poani, mimi'ajja po mee'yojji poani pea'ai, cuayaqui'youc quea oja yamijo nequi! ²⁶A'a dobiqui o'oyajji! —Jesosa poanaje.

²⁶Jesosaa huoojeajea cajeahua, eshahua siasia nananaje; esho'i jjequi'ihui mee majje cuayaqui'yonaje. Esho'i emanoy'o jayojja jaa ba majje ojjaña jama poanaje ba'a: —Oya mano'yonaje, poquijeyonaje, de.

²⁷Jesosaa me' iña cajje esho'i nequisohua'yonaje. Nequisohua majje quea aja nee po'yonaje.

²⁸Quijje ojjaña cuana poqui majje Jesosa equi yasijje dobiquinaje o shajja'ajjajji cuana nijje. Oeya Jesosa huohui'ajja canaje: —Jesosa, ²⁹¿yajjajo acuae ecuaaya eshahua mi huoojeacuajaja'ajjaña?

²⁹—E'e —Jesosa poanaje—, jiquio eshahua quea huoojeacuayajea camaja. Eyacuiñajji nijje mimi huicha'a huicha'a majje ojo jjashahuubaquiani ijija'ijija jjima po majje pea'ai ca ca oe huoojeacuajaja'ajjaña meeje'yo miyaya —Jesosa poanaje.

**—Quijje eya manoje'yo —Jesosa poanaje
(Mateo 17.22-23; Noca 9.43-45)**

³⁰Oya cuana ma meshijo ani ojee poquinaje ojjaña Janinea meshi yasijje. Poquijeya Jesosaa o shajja'ajjajji ca ca oe sohuihuohui capoquinaje. Pea cuana sohuihuohui pajea canaje. ³¹Jamajjeya Jesosaa o shajja'ajjajji cuana huohui canaje jama ba'a: —E'e, quijje eya iña meesahuaje onaja equecua'yojji. Quecua caje'yo cuaa. Jamatii beca cahuime po majje mo shequi mee caje'yo Eyacuiñajjiya.

³²O shajja'ajja majje quea yeno nee nee poanaje. Jamatii oya cuana quea mete poanaje ehuohui'ajjajji: —¿Yajjajo shai Jesosa mano'yome ca oya Eyacuiñajjiha huoojea'yō ojjaña jaahuanaji? —oya cuana poanaje.

¿A'ya ona huoojeajji jayojja nequije eyajo?
(Mateo 18.1-5; Noca 9.46-48)

³³Majoya oya cuana Capenaoma huasijje poe'yonaje. Equi yasijje dobiqui'yo majje Jesosaa o shajja'ajjajji huohui'ajja canaje jama ba'a: —Eseya ejiojjije poeje'yo ¿ajeo acuae nequiana jjamimicuajea nobiajeaquijsenaje so'o?

³⁴Jamatii oya cuanaja Jesosa saja'a jjima. Quea bicho. Oya cuana poeje jjamimicuajea nobiajeaquijsenaje jama ba'a: —Jesosa quijje ona huoojea'yojji poaje, eseya o jayojjaya poaje onijje ona huoojea'yojji. ¡A'ya o pejjejo nequije, joya oja quea jea nee neeya?

³⁵Jamajjeya Jesosaa anioque majje o shajja'ajjajji 12 huisome iyaa canaje o que. Jama acanaje ba'a: —¡Bacue! Miya e jayojja ona huoojea'yojji po sa poanijo jama jjashahuabaquicue ba'a: “Ojjaña ecuea quea boti nee. Cajaahuana'yahua”. Jamaya poaje Eyacuiñajjiha miya ba caje quea pame nee ona huoojea'yojji epojji.

³⁶Majoya Jesosaa oe esho'i nei iyaa majje ojjaña cojja nei nequia canaje. ³⁷Bishami majje jama poanaje ba'a: —¡Bacue! Ojjañaa joya enijje jjapeequianiya jiquio esho'i quea jea ajji poaniya, eya pea'ai quea jea acani. Oya jayojja ojjaña cuaa ecuea epjeejji quea jea acani, ohuaya eya pea'ai quea jea acani. Jamajje ecue Chii, e huoojea'yojji quea jea acani pea'ai.

¿A'ya Jesosaja epjeejji poani?
(Mateo 10.42; Noca 9.49-50)

³⁸Jamajjeya Huaniya Jesosa huohui canaje jama ba'a: —Esohui huohuijji Jesosa, ecuaaya pea dejja banaje eshahua cuana huoojeacuayajea cani. Ma dejja poanaje jama ba'a: “Eyaya eshahua huoojeacuayajeaña Jesosa nijjeya, ojaya epjeejji poaniya”. Ma dejja ese nijje poqui ajjajo, oya tecueanaje jama ba'a: “¿Apiojji? Chojja, miya ecuana nijje poqui ajja; ja'a eshahua huoojeacuayajeeajji!” ecuaaya oya anaje —Huani poanaje.

³⁹Jamajjeya Jesosa jama poanaje ba'a: —¡A'la oya tecueajji! Ohuaya enijjeya acani ma dejja ajjima acani. Jamajjeya, ohuaya eya niñeba jjima acaje. ⁴⁰Ojjaña joya ese niñeba ajja esejaya epjeejji nei poani. ⁴¹E'e jojo nei ojjañaa joya e shajja'ajjajji poani ba'e meesahua cani, ena quia cani pojja'a eya ojaya quea boti neejo, Eyacuiñajjiha quijje oya sosequia caje'yo oya quea pame nee poanijo —Jesosaa o shajja'ajjajji cuana huohui canaje—. ⁴²Ecuea epjeejji eyacua esho'i nei jama. Joya o mimishi po meeji poani ca ca Eyacuiñajjiha quea nee nee po mee caje'yo, de, quea nee tii tii. ¡Jamajjeya quea mimishi epo mee ca cuahuajje oe mano'yocue! E'e, onaya mei enaajo yiipeca mee majje ¡bae quea doe yasijje

jjajea'o queajea meequi'yocue! ⁴³ ¡Jamajjeya a'a quea mimishi po meeji cuana! Jamajjeya miya emejo quea mimishi po sa po majje jeme' ejajasejjajea jayojja jama acue mimishi'ama epoji! Eme' chamajo eyahuasijje poquiyajo Eyacuiñajji nijje eba'e tiitii'yojji quea pame nee nee poaje'yo. Miquea beca eme' yanijo pojja'a quea mimishi tii poani ca ca cuaqui yasijje poquije'yo. ⁴⁴ Quea tai nee nee, quea nee nee poaje'yo. Jomajo cuaqui jiji tiitiije'yo; quijjo'yo ajja tii tii, de. Jamajjeya ¡mimishi pajea'yocue! ⁴⁵ Oya jayojjaya miya ejiojjiya quea mimishi po mee canijo, ejiojji ejajasejjajea jayojja jama acue! Ejiojji chamajo eyahuasijje poquiyajo Eyacuiñajji nijje eba'e tiitii'yojji quea pame nee nee poaje'yo. Miquea beca ejiojji yanijo pojja'a quea mimishi tii poani ca ca cuaqui yasijje poquiyajo quea tai nee nee, quea nee nee poaje'yo. ⁴⁶ Cuaqui jiji tiitiije'yo; quijjo'yo ajja tii tii. Jama tii tii poaje'yo. ⁴⁷ Cuanaya ecojjajo jjabaqui majje miya quea mimishi poani pojja'a. ¡Jamajjeya ecojja ecajjajea jayojja jama acue! Cojjama', mimishi'ama miya eyahuasijje poquiyajo Eyacuiñajji nijje eba'e tiitii'yojji quea pame nee nee poaje'yo. Cojjaggi quea mimishi tii poani miya cuaqui yasijje poquije'yo ca ca quea tai nee nee, quea nee nee poaje'yo tii tii. ¡Jamajjeya mimishi pajea'yocue! ⁴⁸ Cuaqui quijjo'yo ajja tii tii, de —Jesosa poanaje.

⁴⁹—Ojjaña ecuea epeejji poanija eba'ejji quea camaja poaje onaa tecuea cajje. Jamaya ecuea epeejji quea pame, quea ca'a pocue jama ba'a: ⁵⁰ Jiquio ecua mei seseya, sane quea pame nee'ya bobo shicuiajo ihui'yo ajja jayojja jama ecuea epeejji quea pame nee ba'e'yanijo, pea cuana o jayojja jama ba'eje quea pame nee pea'ai. Jamatii sane sese'ama poajo, ¿a'a quea sese po meeje o'oya? Chojja, sese'amajo jeajea'aña seya. ¡Jamajjeya mei sese quea pame jama pocue, sane jama! ¡Pea cuana quea pame nee ba'e meesahuacue, ecue sohui jama! ¡Pea cuana nijje quea pame nee jjapeequicue! ¡Quea bei pocue pea'ai! —jamaya Jesosaa o shajja'ajjajji cuana huohui canaje.

Jesosaa esohui huohui canaje ehueijjijo

(Mateo 19.1-12; Noca 16.18)

10

¹ Majoya esohui huohui majje Jesosa Capenaomajo ani po'o queequinaje Jodea meshi yasijje, Jodana cuei ojje miji yasijje. Jomajo quea huiso nee nee o que jjachichaqui o'yanaje. Jesosaa ojjaña cuana sohuihuohui canaje, ohuaya ojjaña meshi yasijje esohui huohui majamaja canaje jayojjaya. ² Paniseo cuana ca ca o que poeyanaje jjadasiaquiya nisho. Jjashahuubaquinaje jama ba'a: —E'e pojja'a Jesosa Moisesija etehue'yo jayojja jama pojjeama mimije. Jamajjeya ecuaaya oya tecueaje —poanaje.

Poe majje Jesosa huohui'ajja canaje cuaa jama ba'a: —Esohui huohuijji, ¿a'a cuae ehuanase huei cajji? ¿Yajjajo acuae ehuanase huei cajji so'o? ¿Achajja tehuemeya acuae oe Jodioja etiiquianaa aca poa?

³ Saja'a canaje Jesosaa: —¿Yajja acuae Moisesija esohui etehue'yo poani so'o?

⁴—Moisesiya jama tehueme aca poa ba'a: “Huei'yo majje yahueya ehueijeajji papeni etehue'yo caquia cahua oja huanase que. Majoya cahuoojea cahua” —poanaje Paniseo cuana.

⁵—E'e —Jesosa poanaje—, etiiquiana quea mimishi nee neeya jjejoyoya Moisesiya huei mee'ajja canaje. Quijje nei Moisesiya jamaya tehue ca poa; jamatii Eyacuiñajjiya jama pojjeama pana coo ca poa. ⁶Yahuajo nei nei Eyacuiñajjiya pana coo ca poa yahue, epona pea'ai. ⁷Huohui ca poa ohuaya: “Jamajjeya yahue cajjaba'eshiñaquiahua ojaya ehuanase nijje eba'ejji”. ⁸Oya cuana beca; jamatii oe nei jayojja Eyacuiñajjiya oya ba cani; becamejjiji pea'ai pojjeama; oe nei jayojjaya. Cuanaya Eyacuiñajjiya oe jayojja aca poa. ⁹¡Jamajjeya a'a oe jea meeji! ¡A'a hueiji nequiaa! ¡Jama tii tii oe nei oe acue! Jamaya Moisesiya yahuajo nei tehue ca poa pea'ai —Jesosaa acanaje.

¹⁰Majoya o shajja'ajjajji cuanaa Jesosa nijje equi yasijke dobiqui majje ojaya esohuijo huohui'ajja canaje. ¹¹Jamajjeya Jesosaa oya cuana jama acanaje ba'a: —Eyaya miya huohuaña e'e jojo nei ehuanase pea dejjaja sii jjima huei ca ajja. Dejja ehuanase hueiji epo pea epona ehuana'yoji quea mimishi nee, epona sijiji epo jama. Eyacuiñajjiya oya ba cani quea mimishi, pea cojjojji. ¹²Oya jayojja epona ojaya yahue ¡a'a huei meeji! Yahue huei'yo majje pea dejjajo ejjahueaquijji quea mimishi nee poani, yahue sijiji epo jama. Eyacuiñajjiya oya ba cani quea mimishi, pea cojjojji —Jesosaa acanaje.

Esho'iiquianajo Eyacuiñajji nijje miminaje Jesosa

(Mateo 19.13-15; Noca 18.15-17)

¹³Majoya Jesosa que esho'i nei cuana jjequi canaje cuaa. Huohui canaje: —Jesosa, ijiquio esho'i nei sapa napa'ajja majje Eyacuiñajji nijje mimicue ojaya ejaahuanajji! —poanaje.

Jesosa shajja'ajjajji cuaa ca ca oya cuana tecuea canaje: —¡A'a jja oe Jesosa que jjequi majajji esho'iiquiana! ¡Esohui oe cahuohui cahua! —acanaje.

¹⁴Ma ba majje Jesosa quea yeno nee poanaje. Etii cuana tecuea canaje jama ba'a: —¡Esho'iiquiana e que capoe'yahua! ¡A'a quea huesha nequi meeji! E'e, ojjaña esho'iiquiana Eyacuiñajji nijje jjapeequi sa poani. Jamaya ecuea epeejji esho'i jayojja eyaya jaahuanan sa aña pea'ai. Jamajjeya e que poquije'yo; eya eyajo ojjaña huoojea'yoji poaje. ¹⁵Jamajjeya e'e jojo nei esho'i nei jayojja mi po'yajo ca ca enijke eba'e'yoji pojjeama quijje eya ojjaña huoojea'yoji poaje —Jesosa poanaje.

¹⁶Majoya esho'i nei cuana bishami majje, sapa biajje eme' huana majje Jesosa Eyacuiñajji nijje miminaje jiquio esho'iiquiana jaahuanajji.

Edejja sho'i pishana quea aquiana huioso
(Mateo 19.16-30; Noca 18.18-30)

17 Majoya Jesosa o shajja'ajjajji cuana nijje poqui o'oyanaje Jodea meshi yasijje. Oe dejja o que cuajicuajijebenaje. Ecui'oshajjajo nequi oya Jesosa nijje jama poanaje ba'a: —Esohui huohuijji, miya ca ca oe quea pame nee nee. Eya huohuicue ¿achajja a mo eya poquije'yo eyahuasijje eba'e tiitii'yojji Eyacuiñajji nijje? ¿Ae quea pame amajje eyahuasijje poqui ca'yojji? —poanaje.

18 O jjabahuejjaquijji Jesosaa huohui canaje: —E'e, miyaya eya anaje jama ba'a: “Miya ca ca oe quea pame nee”. Eyacuiñajji ca oe nei quea pame nee. Pea chama' o jayojja quea pame nee nee. ¡Jamajjeya eya shajja'ajja neineicue! **19** ¡Eyacuiñajji nijje ba'e tiitii'yo sa po majje ojaya etehue'yo jayojjaya jama oe ba'ecue tii tii! Ojaya esohui ma Moisesiya tehue ca poa miquea eba jama ba'a:

“¡A'a pea quecuajji!

¡A'a pea siiji!

¡A'a sii pojji!

¡A'a siajje pojji!

¡A'a onaya dasiajji!

¡Mique chii, miquea enaese pea'ai oe shajja'ajjacue!”

—Jesosa poanaje.

20 —E'e, eyaya jamaya aña, jama tii tii esho'yahuua. ¿Pea acuae yajja po cajji eyajo eba'e tiitii'yojji? —jiquio dejja Jesosa huohui'ajja canaje.

21 Jesosaa oya ba neinei canaje, oya quea boti nei nee poanaje. Jamajjeya jama acanaje ba'a: —E'e, epeejji, miya quea pame nee nee Eyacuiñajji jayojja po sa po majje ipoquicue; miquea aquiana cuana quiaquicue ejjeshejji sosejje! ¡Majoya ejjeshejji quia'yocue aema' cuana huasijje! ¡Majoya poecue enijje epo'yojji! Jamajjeya eyajo Eyacuiñajjiya miya aquiana quea pame nee nee quea huioso nee quia caje'yo quijje.

22 Jesosaja esohui shajja'ajja majje ma dejja esho'i pishana quea yeno poanaje; ojaya aquiana quea huioso nee nee yani jojoya quia sa po'yo ajja. Jamajjeya poqui'yonaje quea aquiana yeno jjejojo.

23 Jamajjeya Jesosaa ojjaña bajea majje o shajja'ajjajji cuana huohui canaje jama ba'a: —E'e, quea mimishiya jjejojoya aquiana quea huioso, meshi quea quemo pojja'a nahue canijo beca cuana beshahua nei e que poqui ajja quijje, eya eyajo ojjaña huoojea'yojji poaje'yo.

24 O shajja'ajja majje jjashahuuba neinequinaje oya cuana. Ojee miminaje.

Jamajjeya Jesosaa jama acanaje ba'a: —Ecuea epeejji cuana, eyaya e'e jojo nei huohuaña jama pea'ai ba'a: **25** Ahuoja quii huejjajje ino jeanobiaña jama ¿a'a mapichi jeanobia cajji ahuoja quii huejjajje? Cho.

Quea camaja coma. Jiquio ecua mapichi ahuoja quii huejjajje jeanobia cajji jojjemo dejja quea aquiana huiso nee nee dobiqui'yome eyahuasijje.

²⁶—¡De! Jamajjeya ¿a'ya shai eyahuasijje dobiqui mee caje'yo
Eyacuiñajjiya? —oya cuana ojee mimimiminaje.

²⁷Cojja ba neinei canaje Jesosaa. Huohui ca o'oyanaje: —Dejja jama amee aija tii. Eyacuiñajjiya oe nei ojjaña acani. (Eyahuasijje dobi mee qui cani joya quea aquiana huiso nee pea'ai) —Jesosaa acanaje.

²⁸Jamajjeya Peno jjashahuabaquinaje ma dejja quea aquiana huiso nee nee jeana'yo sa po ajjajo. Huohui'ajja canaje: —Jesosa, ecuaaya ojjaña aquiana jeana'yonaje minijje epoquij'yojji. Jamajjeya ¿a'a cuee ecuana eyahuasijje poquije'yo? ¿Ae acuae ecuana quiaje so'o, de? —acanaje Penohua.

²⁹—E'e jojo nei beca cuaa ecuea esohui jama asa poanijo aquiana cuana jiña cani. Ojaya equi, oja huapa pojjeama, oja chii, oja nae pojja'a, oja bacua cuana pojja'a jiña cani enijje jjapee neineiqui'yohua, ecuea esohui quea pame nee quea huesha huohuiya pea'ai. ³⁰Jamajjeya e'e jojo nei Eyacuiñajjiya oya cuana quea huiso nee nee o jayojja quia caje'yo equi, huapa pojjeama jayojja, echii mese jayojja cuana, enaese jayojja cuana, ebacua cuana jayojja jama pea'ai. Mimishi cuaa ca ca oya cuana napa caje pea'ai. Jamatii quijje oya cuana quea bihui nee nee ba'e tiitii mee caje'yo pea'ai eyajo onijje. ³¹Jamatii beca cuana jjeya ona huoojeajji poani eyajo ona huoojea'yojji pojjeama poaje'yo. Joya jjeya ona huoojeajji pojjeama ca ca eyajo ona huoojeajji nei nei poaje'yo e jayojja —Jesosaa Peno acanaje.

—Quijje eya manoje'yo —Jesosa po o'oyanaje
(Mateo 20.17-19; Noca 18.31-34)

³²Majoya Jenosanena huasijje poqui o'oyanaje. Jesosa ehui dojoriji poquinaje. O shajja'ajjajji cuana, pea cuana o quishishijji poquiani pea'ai quea mete jjashahuabaquinaje jama ba'a: —Jenosanena huasijje poquiyajo, ¿yajja Jesosa acaje Jodio etii cuaa? ¡Quecua ca chana!, de!

Jamajjeya Jesosaa o shajja'ajjajji cuana dojo canaje ejiojji sahua huasijje esohui huohuijji. Jama poanaje ba'a: ³³—¡Shajja'ajja neineicue mo! Eya jiquio ojjañaja Edoe Mese. Eseya Jenosanena huasijje poquije. Jomajo mo Jodio etii cuana iña meesahuaje equecua mee'yojji. E'e, Moisesija etehue'yo huohuijji, Eyacuiñajji nijje emimijji etii cuana pea'aiya eya iña mee caje. Taaa neineije cuana: “¡Oya quecua jeacue!” poaje. Jodio pojjeama cuana huasijje mo huoojea caje equecua mee'yojji. ³⁴Ejo soa neineije cuana; cuia caje'yo mo cuaa huaca jee ejeapashajjajaa; acui ecueata'apeejo me cacajea majje mo ba'ehuanasohuajea caje'yo cuaa emano'yojji. Jamatii mo beca cahuime po majje Eyacuiñajjiya shequi mee caje'yo —Jesosaa huohui canaje.

Semeneoja bacua ejja Jesosa nijje miminaje o pejjejo

enequi mee'yojjii eyajo

(Mateo 20.20-28)

35 Majoya Semeneoja bacua ejja Jacobo, Huani pea'ai Jesosa que poeyanaje. Jama poanaje ba'a: —Esohui huohuijji Jesosa, ¡che ecuanaja esohui mi nijje jama acue ecuanajo! —poanaje.

36 Jesosa onijje jama poanaje ba'a: —Ecuea epeejji cuana, ¿ae sa poani miquianaya?

37 —Jesosa, ecuana mi pejjejo canequi'yahua quijje miya ojjaña huoojea'yojjii quea ca'a nee nee poaje. Oe shani mijijje, pea ebianei mijijje canequi'yahua minijje ona huoojea'yojjii epojji. ¡Jamaya oe acue! —poanaje Jacobo.

38 —Chojja, miquianajaya ba jjima eya quea nee nee po mee caje'yo cuaa. ¿A'a miquiana e jayojja quea nee nee po majje quea ca'a poaje'yo? Eya quecua caje'yo pea'ai cuaa. Enije jjapee neineiquianijo miquianaya quecua caje'yo pea'ai pojja'a cuaa. ¿A'a jamatii miquianaya quea ca'a poaje'yo? —Jesosa poanaje.

39 —E'e —saja'a canaje Jacobo, Huani pea'aiya—. Quea ca'a poaje mi jayojja, jamatii quea nee nee po mee caje'yo, jamatii quecua caje'yo cuaa.

—E'e —Jesosa poanaje—, jamajjeya e'e jojo nei miquiana e jayojja quea nee nee po mee caje'yo cuaa; e jayojja quea ca'a nee nee poaje'yo onaa mano mee ca'yajje. **40** Jamatii e ebianei mijijje, e shani mijijje pea'ai eyajo eyaya miquianaya enequi mee'yojjii pojjeama, enijje ona huoojea'yojjii poaje. Chojja, ecue Chii eyajo aniya yahuajo nei pea cuana babaca ca poa. Ohuaye nei nequia mee caje'yo e ebianei mijijje, e shani mijijje pea'ai eyajo quijje, eya ojjaña huoojea'yojjii poaje —Jesosa poanaje.

41 Jesosa pejjejo nequi sa pea'ai poanijo onijje ona huoojea'yojjii epojji, Jacobo, Huani nijje pea'ai quea quene poanaje pea shajja'ajjajji cuana, ome mijijje pea'ai. **42** Jamajoya aje oe Jesosaa oya cuana iyaa canaje. Huohui canaje: —¡A'a onijje quea quene pojji! Miquianajaya eba dejja cuana, Eyacuiñajjija epeejji pojjeama. Onajaya emeshi mese cuana, ona huoojeajji cuana pea'aiya pea cuana huoojea neinei cani; quea tecue nee nee poani, quea mase. **43** ¡A'a jamaya pojji miquianaya, ecuea epeejji cuana! ¡E jayojjaya po sa poanijo pea cuana ba'e meesahuacue! ¡Jaahuanacue pea'ai! **44** Joya ona huoojea'yojjii po sa poani ca ca echacojji sosema' jayojja capoahua. **45** E'e, ¡e jayojja jama pocue! Eya ojjañaja Emeshi Mese nei. Jamatii eya ca ca iña ojjañaja Edoe Mese eyajo ani poeyanaje ojjaña ba'e meesahuaa; ojjañaja eya eba'e meesahuajji pojjeama. Ojjañaja mimishi sosequia'yojjii mo manoje'yo, ojjaña cuaqui yasijje epoquij'yo poaje jjejojoya —Jesosa poanaje.

Batimeo, Timoteoja bacua quea cojja ja'a po mee ca'yonaje
(Mateo 20.29-34; Noca 18.35-43)

⁴⁶ Jenosanena huasijje poquije Jesosa o shajja'ajjajji cuana nijje dobiquinanajje Jenico huasijje. Majoya quijje pishana poqui o'oyanaje ejiojjije. Quea huiso nee nee poquinaje onijje cuana. Batimeohua, Timoteoja bacua ejja ejiojji sahuajje e'anioqueaniya shajja'ajja canaje Jesosa poeje. Oya cojjama! ⁴⁷ Jamajjeya taaa neineinaje jama ba'a: —Jesosa, miya emeshi mese Dabija osecua, jejo jjashahuabaquicue quea yeno! —taaanaje.

⁴⁸ —¡A'a oe taaa majajji! ¡Eshoui oe ca'acue! —acanaje cuaa.
 Jamatii taaa neineinaje cojjama': —Jesosa, miya Eyacuiñajjija esohui jayojja jama poeyanaje, emeshi mese Dabija osecua. ¡Ejo jjashahuabaquicue!
⁴⁹ Jamajjeya o shajja'ajja majje Jesosa nequiñaquinaje. Cojjama' iyaa mee canaje: —¡Oya cojjama' iyaacue! —poanaje.

Jamajjeya cojjama' iyaa canaje cuaa: —¡Cojjama', poecuajicue oe!
 Jesosaa miya iyaa cani. ¡Quea bihui nee oe pocue! —poanaje.

⁵⁰ Jamajjeya Batimeo nequisohua majje daqui nei jea canananajje, Jesosa que poquicuajinaje. ⁵¹ Poeyajo Jesosaa oya huohui'ajja canaje:
 —¿A'ya so'o, Batimeo? ¿Ae sa poani miya?

—Eshoui huohuijji, ¡miyaya iña jjacojjabapojaqui mee'yocue, ecuea ecojja quea ja'a epo'yojji! —poanaje Batimeo.

⁵² —E'e, Batimeo —Jesosa poanaje—, miyaya e'e jojo nei ejo jjashahuabaquinaje eyaya miya jjacojjaja'aqui meeje'yo. Jamajjeya ¡quea bihui nee pocue! Jjeyahua nei Eyacuiñajjija miya quea cojja ja'a po mee caje'yo —Jesosa poanaje.

Jjeyahua nei oya jjacojjabapojaqui'yonaje. Jesosajo quea bihui nee nee poanaje jjacojjaja'aqui mee ca'yajje. Jamajjeya Jesosa nijje poqui'yonaje, Batimeo.

Jesosa Jenosanena huasijje poquinaje
(Mateo 21.1-11; Huani 12.12-19)

11 ¹ Majoya Jesosa Jenosanena huasijje poquije pea cuiñajjijo nequiñaquinaje Mepajejo, ma Betania pejjejo, acui yiyejo, Onimo eyiyo pejjejo. Nequiñaqui majje o shajja'ajjajji becanejjiji pea'ai huoojjea canaje Jesosaa jama ba'a: ² —¡Poquicue miya Mepaje yasijje!
 ¡Dobiqui majje miyaya mapichi sisija bacua esho'i ai ejeyo nequia nequi bañaquinacie! Dejjaja o daasa biajje yahuajo e'anijji ajjima poa. ¡Ba majje pichocue; yecue e que! ³ Onaa: “¿Apiojji miyaya mapichi sisija bacua pichoña so'o?” acaje: “Ecuana ja Emeshi Mese sa poani. Ohuaya huacuaya huoojjea caje o'oya jiquiacua” saja'ame acue. Jamajje: “E'e, ocuae dojo'ajja joya mapichija bacua” acaje dejja Mepajejo ba'eya —Jesosa poanaje.

⁴ Jamajjeya oya cuana Jesosa shajja'ajjajji poquinaje Mepaje yasijje. Mapichi sisija bacua ejeyo nequia nequi ba cañaquinaje equi secue

pejjejo. Ohuaya picho canaje. ⁵Pea cuana jomajo nequi jama poanaje ba'a: —¿Ae poani miya? ¿Apiojji mapichija bacua pichoña so'o?

⁶Jamajje Jesosa shajja'ajjajji cuaa saja'a canaje: —Ecuea Emeshi Mese sa poani.

—E'e, ocuae dojo'ajja joya mapichija bacua —acanaje Mepajejo ba'e dejja.

⁷Jamajjeya mapichi sisija bacua dojo canaje Jesosa que. Onajaya daqui ao cuana mapichi sisija edaasa biajje iya canaje Jesosa anisohuaquijji. Jesosa anisohuaquinaje ma mapichi esho'i aija daasa biaje. Anioquenaje. Ejiojjije poquinaje. ⁸Ojjaña cuana ejjachichaqui nequica cuaa ojaya daqui ao cuana ejiojji joepa hui canaje Jesosa jjayejjequijji. Pea cuaa acui iña jajasejja canaje. Huana yiyoysi canaje ejiojji pealai quea huiso nee neeya. Jamaya yahuajo Jodio cuaa emeshi mese ja'ajjequi canaje, cuiñajji yasijje poeyajo. ⁹Ojjaña ehui dojodzi poquiani, Jesosa quiquishiji pea'ai taaa capoquinaje queabihui nee nee: —¡Mi poeyajo ecuana queabihui nee! Quea pame nee nee miya, Jesosa. ¡Eyacuiñajji eyajo amiya miya cajaahuana cahua! ¹⁰E'e Jesosa, emeshi mese Dabi yahuajo ba'e miquea etiiquiana. Miya ojjañaja Emeshi Mese nei poeyanaje. ¡Eyacuiñajji mi jaahuanajji cabihuia cahua ojjaña! —taaame poa queabihui nee nee jiejojo.

¹¹Majoya Jesosa Jenosanena huasijje dobiquinaje ojjaña cuana nijje. Eyacuiñajji equi yasijje poquinaje. Dobiqui majje ohuaya bajea canaje ojjaña. Majoya siniajo oya Betania huasijje poquinaje cahuiya; ome miji peabeca, 12 huisome o shajja'ajjajji poani nijje poquinaje.

**Acui etona jjajja jayojja iquena bajjani sajjai mee ca'yonaje Jesosaa
(Mateo 21.18-19)**

¹²Mecajjeahua oya cuana Betaniajo ani Jenosanena huasijje poe o'oyaje quea shoe poanaje Jesosa. ¹³Ba canaje ejiojji sahuajo nequi acui etona jjajja jayojja. Acuijjajja ba'ajjaqui canaje. Chama' poanaje ejjajja. Eña oo pana nequi'y, acuijjajja she pojjeama jiquio ba'ijo. ¹⁴Jamajjeya Jesosaa huohui canaje: —¡Jamajje jamatii jjajjama' tii capo'yahua acui! Jamajjeya onajaya ejjajja e'ijjajji pojjeama tii.

Jesosa shajja'ajjajji cuaa Jesosaja emimi shajja'ajja canaje pealai. Jesosaa jama acanaje ojjaña jjabahuejjaqui meeji jama ba'a: Jiquio acui jjajjama' jojoya Jesosaa tecuea canaje jayojja jama Eyacuiñajji Jodio cuana tecuea caje'yo jjashajja'ajjaqui ajja jojoya.

**Aquiana quiajji poani Eyacuiñajji equijo nequi cuana
huojojeacuayajea canaje Jesosaa
(Mateo 21.12-17; Noca 19.45-48; Huani 2.13-22)**

¹⁵Majoya Jenosanena huasijje poe o'oya majje Jesosa ojaya epeejji cuana nijje Eyacuiñajji equi yasijje poqui o'oyanaje. Dobiquinaje. Ba cañaquinaje quea huiso enequi, Eyacuiñajji nijje mimiani pojjeama. Chojja. Aquiana quia cani cuaa. Jamajjeya Jesosaa aquiana quiajji poani Eyacuiñajji

equijo nequi cuana huoojeacuayaje canaje; aquiana jjeshe poequi pea'ai huoojeacuayaje canaje. Aquiana cuana huoojeacuayaje canaje; bejjo, pea bejjo sosejje quia cani cuanaja bejjo nequijji cuana jeapajjajea canaje; huia' quiajji pea'ajja huia' nequijji cuana jeabichajea canaje. ¹⁶Ojjaña joya aquiana aboiji huohui canaje: —¡A'a jja oe aquiana yedobiajji jiquiacua! Eyacuiñajjija equi pejejo ojjaña jjachichaquiani esohui shajja'ajja —tecueame acanaje.

¹⁷Jomajo Jesosaa jama acanaje pea'ai ba'a: —¡A'a Eyacuiñajjija equijo aquiana quiajji! Eyacuiñajjija esohui jama poani ba'a: "Ecuea equi ojjaña cuana ojjaña meshijo ba'e Eyacuiñajji nijje emimijji equi". Miquianaaaya ca ca siropiji nequijji jayojja amee aña Eyacuiñajjija equi.

¹⁸Ma shajja'ajja majje Eyacuiñajji nijje emimijji etii cuana, Moisesija etehue'yo huohuijji poani pea'ai Jesosa nijje quea quene poanaje; oya Eyacuiñajjija huoojea'yo pojjeama posojo o quecu sa acanaje. Jamatii Jesosa iña jjima poa, quea meteya jjejojo. Quea huiso cuana Jesosaja esohujo quea bihui nee nee poanaje. Jamajjeya Jesosa ojjañaja quea nahue nee nee poanaje equecua'yoji.

¹⁹Quijje siniajo Jesosa o shajja'ajjajji cuana nijje Jenosanenajo ani poqui o'oyanaje Betania huasijke cahuiya.

Acui etona jjajja jayojja esajjai'yo ba canaje
(Mateo 21.20-22)

²⁰Mecajjeahua nei Jenosanena huasijke poe o'oyanaje. Jesosa shajja'ajjajji poani cuua ba canaje acui esajjai'yo, ma Jesosaa tecuea canaje acui. ²¹Ba majje Penohua niñeba ca'yonaje. Jama poanaje ba'a: —¡Esohui huohuijji Jesosa, bacute! ¡Miya tecueajje jjeya nei sajjai'yonaje acui!

²²—E'e —Jesosa poanaje—. ¡Miya Eyacuiñajjijo quea ja'a nee jjashahuubaquicue! A'a jjashahuubaquijji jama ba'a: "E'e pojja'a Eyacuiñajjija eya shajja'ajja jjima". ²³⁻²⁴Chojja, jjashahuubaquicue jama ba'a: "Eyacuiñajjiya e'e jojo nei nei ecuea ehuhui onijje jama acaje'yo". Jamaya miya jjashahuubaquiao Eyacuiñajjiya miya saja'a caje'yo. E'e, Eyacuiñajjiya miya e jayojja jama ameesahua caje'yo pea'ai ma dejaa ajjima acani —Jesosa poanaje—. ²⁵Cuanaya miya Eyacuiñajji nijje mimianijo jiquiajja jjashahuubaquime pocue ba'a: "Onaya enijje mimijainaje quea tai. Jamatii eya ojaya mimishijo quene'ama" jamaya pocue —Jesosa poanaje—. Jamaya jjashahuubaquianijo Eyacuiñajji miquea mimishijo quene'ama poaje pea'ai. ²⁶Pea nijje quea quene tii tii poanijo ca ca Eyacuiñajjija eseja Chijja miquea mimishi ecuijea'yoji pojjeama —Jesosa poanaje.

Eyacuiñajji Jesosa huoojea'yoji poa
(Mateo 21.23-27; Noca 20.1-8)

²⁷Majoya oya cuana Jenosanena huasijke poe o'oya majje Eyacuiñajjija equi yasijke dobiqui o'oyanaje. Jesosaa esohui huohui canijo Jodio etii cuana, Eyacuiñajji nijje emimijji etii cuana, Moisesija etehue'yo huohuijji cuana pea'ai o que poeyanaje. ²⁸Jesosa ojaya ba jjimajo

huohui'ajja canaje: —¿Aya miya huoojea canaje jiquiacua? ¿Apiojji acuaeaya esohui huohuiaña so'o? ¿Apiojji acuaeaya aquiana quiajji poani huoojeacuayajeanaje oma mecajje? —onijje mimijajinaje.

²⁹ Jesosaa oya cuana acanaje: —E'l'e, eyaya miya ebionei huohui'ajjaje. ³⁰ ¿Aya Huani huoojea canaje enajje ona besa meeya? ¿A'a Eyacuiñajjiya? ¿A'a dejja cuaa poj'a'a? ¡Huohuicue mo! Eyaya majoya huohuije e huoojea'yoji epo.

³¹⁻³² Shajja'ajja majje Jodio cuana ojee mimimiminaje: —¿Yajja saja'ame yajji esejaya? Quea mete oijaña dejja cuanajo. Ojjaña ba cani Huani Eyacuiñajjiya huoojea canaje esohui huohuuya. Jamajjeya: “Dejja cuaa Huani huoojea canaje” eseya aje se cuia ca chana!. “Eyacuiñajjiya Huani huoojea canaje” eseya aje se oe jama acaje ba'a: “Jamajjeya ¿apiojji miyaya Huani shajja'ajja jjima aña?” Jesosaa acaje —jamaya Jodio cuana miminage.

³³ Jamajjeya jjashahuabaqui majje Jesosa huohui canaje Jodio cuaa: —Cua'a, de. Ecuanaja ba jjima Huani huoojea'yoji epo —anisho canaje. —Jamajjeya ecuea miya ehuohujji pojjeama e huoojea'yoji epo —Jesosaa acanaje ma Jodio etii cuana.

Esohui ejjashahuubaquijji echacojji taijo
(Mateo 21.33-46; Noca 20.9-19)

12 ¹ Jesosaa ma Jodio etii cuana jama acanaje pea'ai ba'a: —¡Jiquio shajja'ajjacue esohui ejjashahuubaquijji! Jama poanaje ba'a: Oe dejja emeshi meseya que quea quemó nee neejo bana canaje jjonojjajja oo pana, uva. Que peeyi canaje meija peeyi. Majoya que yiyesamajo mei cueehue iñaca canaje jjonojjajja na quishipashajji. Majoya mei iyasohua ao'ao majje puehuana canaje. Iya canaje que jaahuanajji, quea huesha nee ojaya ebajji. Pea echacojji cuana iyaa canaje. Huohui canaje eque meseya: “¡Ecuea que jaahuanacue! Jaahuanas sosejje quiaje'yo oya jjonojjajja quea huiro nee” poanaje. Majoya eque mese quea huesha poquinaje. ² Quijke jjonojjajja jahuajo, eque meseya o chacojji huoojea canaje que jaahuanajji que jjonojjajja jjequiya. Que jaahuanajji bañaqui majje huohui canaje jama ba'a: “¡Che mo jjonojjajja joya eque meseja pa cadojo'yahua, del!” poanaje.

³ —Que jaahuanajji cuaa quea mimishi jjejojo, jjonojjajja, uva quia'yoy jjiima acanaje, joya eque meseja iyatepe mee. Jamajjeya o chacosahuajji poani iña canaje, cuias canaje. Huoojea ca'yonaje jamatii, emejjee tii. ⁴ Eque meseya pea huoojea ca'o'yanaje o chacosahuajji. Jamatii yahuajo jama acanaje que jaahuanajji cuaa. Sapa cuiahuejjajea'ajja canaje, quea mimishi acanaje pea'ai. ⁵ Quijke eque meseya pea huoojea, pea huoojea a'ajja canaje. Jamatii que jaahuanajjiya jjonojjajja quia sa po'yo ajja jjejojo oya cuana iña canaje, cuiajea canaje, pea quecua canaje, pea sapa jajahuejjajea canaje meiya. ⁶ Quijke yejje nei oja bacua ejja oe nei huoojea canaje que jaahuanajji baa: “¡E'l'e, oya cuanaa ecue bacua ejja shajja'ajja caje!” poanaje eque mese.

⁷—Cho, oja bacua ejja poeje ba majje jama poanaje ba'a: "Joya eque meseja bacua ejja poeje. Jjonojjajja yiye quijje ojaya poaje, ejeajji mano'yajo. ¡Cua'a, ejjaquecuajeaqui oel! Jamajjeya que esejaya poaje'yo, de" poanaje que jaahuanajji cuana.

⁸—Jamajjeya aje oe ebacua ejja iña canaje, quecuajea'yo majje jeajeaqui canaje quea huesha nee ma que jaahuanajji mimishi cuaa; eque mese boti'ama acanaje cuaa. Mahuiso esohui —Jesosa poanaje—. ⁹Jamajjeya joya eque meseya poe o'oya majje ¿yajja acaje'yo acuae jiquio que jaahuanajji quea mimishi cuana? Oya quea quene nee poaje'yo. Ma que jaahuanajji cuana quecuajea caje'yo, de. Que quia caje'yo pea cuana —Jesosaa acanaje.

¹⁰—E'e —Jesosa poanaje pea'ai—, ¿a'a miquea eba Eyacuiñajjija esohui etehue'yo yahuajo nei? Jama ejo poa ba'a:

"Oe equi yamajjana equi iyajji cajaa aca poa cuaa. Jamatii

Eyacuiñajjija ma eyamajjana equi yamajjana quea ca'a nee nequi mee ca poa.

¹¹ Jamajoya ojjaña ojaya epeejji cuanaa Eyacuiñajji bihuia cani". Jamaya yahuajo nei aca poa ejo; eya ma eyamajjana equi iyajji jayojja jama quea ca'a nee nequi —Jesosaa acanaje.

¹²Jesosaja esohui shajja'ajja majje Jodio cuana quea quene nee poanaje: —¡De! Ecuanajo oya mimiani, equi yamajjanajo pojjeama. Eseyaa que jaahuanajji quea mimishi jama pea'ai ohuaya acani —poanaje Jodio cuana.

Jamajjeya Jesosa iña sa acanaje ejeanobiajeajji. Jamatii iña jjima; quea mete poanaje. Ojjaña dejja echicha'yo nequica'yo cuaa Jesosa Eyacuiñajjija esohui huohuijji nei nei ba cani. Ojjaña cuanaja quea nahue nee nee Jesosa e'iñajji. Jamajjeya Jodio etii cuanaja Jesosa iña jjima, poquinaje.

Bejjo oe pojji quia cajji ba'e sosejje emeshi mese yasijke
(Mateo 2.15-22; Noca 20.20-26)

¹³E'e, Jesosa mimije shajja'ajja majje Jodio edejja tii cuana quea quene nee poanaje. Jamajjeya Paniseo cuana, pea cuana Enodeja ehuohui'yo quea boti nee poanaje pea'ai huoojea canaje Jesosa que. Jama huohuime acanaje ba'a: —¡Poquicue Jesosa dasiaa! ¡Esohui quea camaja nee huohui'ajjaquicue, ojaya yajja saja'ame ya'yojji! Jamajje Moisesija etehue'yo jayojja jama mi saja' a cajo jeanobiajeaje'yo ecuaaya —poanaje Jodio etii cuana.

¹⁴Jamajjeya Paniseo cuana poquinaje Enodeja epeejji cuana nijje Jesosa baa. Ba majje huohui'ajja nisho canaje jama ba'a: —Esohui huohuijji, miyaya e'e jojo nei huohuiaña Eyacuiñajjija ejjashahuabaquijji. Miya edejja tii cuanajo jjashahuabaqui ajja, emeshi mese cuanajo pea'ai mete'ama. Jamajjeya quea ja'a nee huohuiaña. Jamajje mo che huohuicue: ¿A'la bejjo quia cajji Shomano meshi mese Sesa bajjani yasijke? ¿A'la cuaeya seya sosequiaje so'o Sesaja meshijo ba'e sosejje; equiajji pojjeama pojja'a esejaya? —acanaje cuaa.

¹⁵ Ma Jodio cuanaja ejjashahuabaquijji quea ja'a pojjeama Jesosaja eba poanaje. Jamajjeya: —¡Miquiana ca mi ca oe e dasiajji nisho cuana, epeejji nisho quea tai nee nee! ¿Apiojji eya dasia sa aña? ¡Jamatii oe beijo esodojo jjequicue ecuea ebajji! —Jesosa poanaje.

¹⁶ Jjequi canaje cuaa. Esodojo ba majje Jesosaa huohui'ajja canaje: —¿Ae ecajja'yo jiquio? ¿Ae bajjani etehue'yo?

—Emeshi mese ecajja'yo, Sesa —poanaje—. Ojaya bajjani etehue'yo yani pea'ai.

¹⁷ —E'e —poanaje Jesosa—. ¡Jamajjeya Sesaja beijo quiaquicue ohua sa cajo! ¡Eyacuiñajji a'a pajea'yojji; oya bihuiacue, shajja'ajjacue pea'ai!

Jesosa shajja'ajja majje ojjaña cuana quea mete nee poanaje: —Quea jjashahuubaqui ja'a nee nee oya Jesosa. Jjadasia meequi ajja —poanaje.

Jamajjeya Jodio etii cuana poquinaje, Jesosa jea cana'yonaje.

¿A'a e'e jojo nei mano'yo majje eshe o'oya quijke poaje'yo?

(Mateo 22.23-33; Noca 20.27-40)

¹⁸ Ma pojjafo tii beca Sanoseo cuana poeyanaje Jesosa baa. Sanoseo cuana aje oe jama poani ba'a: —Mano'yo majje jama tii tii eshequi o'oyajji pojjeama quijke.

Jesosa ca ca jama po ajja. Jamajjeya Jesosa dasia sa acanajejo jama anisho canaje ba'a: ¹⁹—Esohui huohuijji, Moisesiya jama tehue ca poa yahuajo nei nei ba'a: “Dejja ejjahuanaqui bacuama' mano'yajo, oja chahuaa ehuanase equijjojea ani cahuana ca'yahua oja o'lja bacua jea jayojja jama epoji”. ¿A'a e'e? ²⁰Jamajjeya jama poso ba'a: Quea huiso edoe mese, me oejje pea beca, nequinaje. Edoe mese ebionei jjahuanaquinaje eponajo. Mano'yonaje bacuama' tii. ²¹Oja chahuaa ehuanase equijjojea ani huana ca'yonaje, bacuama' tii ani. Oya jayojja mano'yonaje bacuama' tii. Jamajjeya peaa echahua meseaya huana ca o'yanaje. Mano'yonaje bacuama' pea'ai. ²²Jamaya ojjaña edoe mese cuana manojeyo'yonaje bacuama' tii. Quijke ehuanase pea'ai mano'yonaje. ²³Jamajjeya eshe o'oya po majje eyajo, ¿ajea ehuanase epona poaje, ache edoe meseja? Ojjaña echahua mese jjahueal'ajja'yo epo —Sanoseo cuaa acanaje Jesosa dasiajji nisho.

²⁴ Jesosaa jama acanaje ba'a: —Chojja. Jamaya pojjeama. Miquea ba jjima Eyacuiñajjiya esohui; oya quea ca'a nee nee miquea ba jjima pea'ai.

²⁵ E'e, shequi o'oya majje jjahuanaqui'yo ajja. Esohuidojiji eyajo ani jama poaje. ²⁶E'e, yahuajo nei nei Eyacuiñajjiya Moisesi tehue mee ca poa miquea ebajji e'e jojo nei emano'yo cuana eshe nequije o'oya eyajo. E'e, Moisesi acui quepe jijiqui pejjejo nequi, Eyacuiñajjiya oya huohui ca poa jama ba'a: “Eya ca ca iña Amajama jaahuanajji, Isaaca, Jacobo pea'ai jaahuanajji”. Jamaya yahuajo nei nei Eyacuiñajjiya aca poa. ²⁷¿A'a Eyacuiñajjiya emano'yo cuana meshijo emojea'yojaa jaahuanana cani? Cho. Ojaya epeejji cuana eshe nequi, mano'yo majje poqui'yo cuana pea'ai jaahuanana cani Eyacuiñajjiya, eshe

o'oya epo'yo edojoshahua jiquio ese mimianinaje. Jamajjeya e'e jojo nei emano'yo cuana shequije o'oya, de. Miquianaya ca mi ca oe quea quehua jjashahuabaquiani —Jesosaa Sanoseo cuana acanaje.

¡Eyacuiñajji quea jea nee acue mi pejjejo nequi cuana pea'ai!

(Mateo 22.34-40; Noca 10.25-28)

²⁸ Moisesija etehue'yo huohuijji jomajo nequi Jesosa shajja'ajja canaje quea jjashahuabaqui ja'a nee; Sanoseo cuana jjadasia meequi ajja. Jamajjeya Jesosa huohui'ajja canaje jama ba'a: —Esohui huohuijji, yahuajo Moisesiya tehue ca poa Eyacuiñajji esohui. ¿Ache esohui quea pame nee e'ajji?

²⁹ Jesosaa oya acanaje: —E'e, jiquio esohui quea pame nee jayojja jama acue ba'a:

“¡Isaeni cuana shajja'ajjacie! Eyacuiñajji ca ca oe Emeshi Mese nei. Oya oe nei enequi tii. Pea chama' Eyacuiñajji. ³⁰ Jamajjeya ¡Eyacuiñajji miquianajaya Emeshi Mese quea jea nee nee acue! ¡E'e, miquea huapa pojjeama cuana quea jea nee acue! ¡Quea jea nee neyya oe acue Eyacuiñajji! ¡Jamajje ojo jjashahuuba tiitiiquicue! ¡Oya shajja'ajja tiitiicue! ¡Ojaya epeejji quea ja'a nee nee acue pea'ai!”

³¹ Jiquio esohui quea pame nee. Pea oya jayojja quea pame nee jama ba'a: “¡Miquea huapa pojjeama jama quea jea neyya oe acue! ¡Ojjaña pea cuana quea jea nee nee acue pea'ai!”

Jamaya quea pame nee nee e'ajji —Jesosa poanaje—. Pea chama' esohui jiquio jayojja quea pame nee nee.

³² Jesosaja esohui shajja'ajja majjeya Moisesija etehue'yo huohuijji onijke jama poanaje ba'a: —Esohui huohuijji Jesosa, miquea esohui e'e jojo nei. E'e jojo nei Eyacuiñajji Emeshi Mese nei. Oya oe nei enequi tii, pea chama' Eyacuiñajji. ³³ Jamajjeya Eyacuiñajji Emeshi Mese nei quea jea nee nee ca'a cahua, ojo cajjashahuuba tiitiiquiahua, cashajja'ajja tiiti cahua, ojaya epeejji quea ja'a nee nee capoahua pea'ai ojjaña. Oya jayojja pea cuana quea jea nee nee ca'a cahua. Jamaya poanijo quea pame nee nee poani. Jodio etiiquiana cuana jayojja jama po majje ca ca quea pame pishana poani. E'e, etiiquiana cuaa ca ca huo cuana, pea aquiana pea'ai mei e'iya'yo biajje dahua caninaje Eyacuiñajji quea bei po meeiji mimishijo —poanaje Moisesija etehue'yo huohuijji.

³⁴ Ojaya esohui quea ja'a nee shajja'ajja majje Jesosaa oya huohui canaje jama ba'a: —E'e, miya beshahua nei Eyacuiñajji sa neinei poani miquea Emeshi Mese nei epoji —acanaje.

Jesosa quea jjashahuabaqui ja'a nee neejo jjadasia meequi ajja ba majje ojjaña Jodio etii cuana quea mete poanaje. Esohui quea camaja, yajja sohui esaja'ame yajjijojo huohui'ajja pajea canaje o dasiajji nisho.

Jesosa Eyacuiñajjija huoojea'yo ojjaña jaahuanajji Quito
(Mateo 22.41-46; Noca 20.41-44)

³⁵ Jamajjeya ojjaña cuana ejjachichaqui nequi huohui'ajja canaje Jesosaa: —¿Yajja poani miquianaya Eyacuiñajjija huoojea'yo ojjaña jaahuanajji Quitojo? ¿Ache etiiquianaja osecua oya, ajea bacua? ¿Yajjajje acuae Moisesija etehue'yo huohuijji cuaa huohui cani? Jama ba'a: “Quito emeshi mese Dabija osecua, ma yahuajo ba'ya poaja” acani cuaa —Jesosa poanaje—. ³⁶ Yahuajo nei Edojjoshahua Pameya emeshi mese Dabi tehue mee ca poa jama ba'a:

“Eyacuiñajjija ecuea Emeshi Mese Quito jama aca poa: —¡Enijje anioquecue ebianeい mijijje, ojjaña cuana huoojea'yojji! Eyaya mi quecuajji nisho epo cuana jeabichajea jeyojoye'yo”.

Jamaya huohui ca poa yahuajo Dabiya ejo. ³⁷ E'e, Dabiya Eyacuiñajjija huoojea'yo Quito aca poa: “Ecuea Emeshi Mese nei”. Jamajjeya Quito Dabija Emeshi Mese nei poani. Jamatii oya Dabija osecua pea'ai —Jesosaa acanaje.

Ojjaña cuaa ejjachichaqui nequiya Jesosaja esohui shajja'ajja canaje. Quea bihui nee poanaje.

—¡A'a Jodioja esohui huohuijji jama ba'ejji! —Jesosa poanaje
(Mateo 23.1-36; Noca 11.37-54, 20.45-47)

³⁸ Majoya Jesosaa ojjaña cuana huohui canaje jama ba'a: —¡Jodio esohui huohuijji cuana jayojja jama a'a ba'ejji! Oya cuanaa daqui quea pame nee nee, quea ao nee huosho cani onajaya ebajji. Ejiojjije poquiani ojjañaa aquiana quia cani yasijje anicuua; pea cuaa jama bihuia cani ba'a: “¡Eshui huohuijji, miya quea pame nee nee!” Jamaya aje oe ojaya quea boti nee, jiquio Jodio etii cuanaja, esohui huohuijji quea pame nee poso jjabaquiani —Jesosa poanaje—. ³⁹ Jodioja equi ejjachichaquijjijo ebionei anioque sa poani, Eyacuiñajjija esohui huohuijji pejjejo, ojjaña nijje emimijji. “E'e, oya cuana Eyacuiñajjija esohui huohuijji nei jayojja quea pame nee” epo meeiji acani. Ojee ijja'iijjanijo emeshi mese pejjejo anioqueani, ebionei e'iijja'iijjajji. ⁴⁰ Jamatii oya cuana aje oe siipojji; e'ahuemanoja equi cuana sii cani. Majoya Eyacuiñajji nijje mimi nishoani quea huiso nee. Jamajoya Eyacuiñajjija oya cuana cajaa acaje'yo. Quijje quea nee nee po mee caje'yo, quea nee tii tii poaje'yo. Pea cuana ca ca quea nee po mee caje'yo. Jamajjeya ¡a'a oya cuana jayojja jama aiji! —Jesosaa ojjaña cuana huohui canaje.

E'ahuemanohua ejjeshejji quia canaje
(Noca 21.1-4)

⁴¹ Majoya Jesosa Eyacuiñajjija equijo ejjeshejji iyajji pejjejo anioquenaje. Ba canaje dejja quea huiso poe majje ejjeshejji iyanobia cani ma acui ecaca huasijje Eyacuiñajji yasijje equia'yojji. Joya quea

aquiana huiso neeya iyanobia canaje quea huiso nee ejjeshejji. ⁴²Majoya e'ahuemano aema' poeyanaje. Ojaya ca ca esodojo beca iyanobia canaje, sosema' pishana. ⁴³Jamatii oya ba majje Jesosaa o shajja'ajjajji cuana iyaa canaje. Jama poanaje ba'a: —¡Bacue! E'e jojo nei jiquio e'ahuemanohua quea huiso nee nee jayojja quia ca'yonaje. Pea cuaa oe pojji jayojja quia ca'yonaje. Jamaya Eyacuiñajjiya oya ba cani. ⁴⁴E'e, pea cuana quea aquiana huiso nee nee. Oe pojji ojaya aquiana cuana quia canaje. E'ahuemano ca ca aema' nei nei. Ohuaya ojjaña ojaya ejjeshejji quia canaje; bobí jjeshejji yajji nisho quia canaje pea'ai —Jesosa poanaje.

Eyacuiñajjiya mei equi cajjajeajea caje'yo cuaa
(Mateo 24.1-2; Noca 21.5-6)

13 ¹Majoya Jesosa Eyacuiñajjiya equijo ani poquinaje. Poquianijo, o shajja'ajjajji cuaa oya huohui canaje jama ba'a: —¡Bacue! Eyacuiñajjiya equi! Quea quemo, quea pame mei cuana —poanaje.
—E'e, ¿a'a jiquio equi quea pame nee baña? E'e jojo nei quijje mei cuana cajjajeajea caje'yo cuaa. Chama'yo tii acaje'yo —Jesosa poanaje.

Jiquio ojjaña aquiana oe poaje'yo
(Mateo 24.3-28; Noca 21.7-19)

³Majoya Jesosa poquinaje quea huesha pishana, enata'a ojje mijii yasijje. Eyiyo Onimo acui yiye yasijje jaasohuaquinaje. Anioquenaje. Jamajje o shajja'ajjajji cuaa, Penohua, Anesiya, Huaniya, Jacobohua pe'a'i oya huohui'ajja canaje jama ba'a: ⁴—Jesosa, ¿ache shono acuae mei cuana cajjajeajea caje'yo cuaa so'o? ¿A'ya ba majje acuae ecuana jjabahuejjaquije so'o ojjaña jiquio meshi chama'yo tii epojjijo?

⁵Jesosaa saja'a canaje: —¡Jashahuuba neineiquicue onajaya miya edasiajji pojjeama! ⁶Quea huiso siajjepoji cuana poeje, ecuea ehuoojea'yo pojjeama: “Eyacuiñajjiya eya huoojea canaje, eya ca ca iña ojjaña jaahuanajji” jamaya siajje poaje. Quea huiso dasia caje'yo. ⁷“Ojjaña jjaquecuaquiani, ojjaña meshi yasijje pea'ai” huohui caje peaaya pe'a'i. ¡Jamatii a'a quea mete pojji! Jamaya poaje. Jamatii apoa pojjeama, oe po ajja jjima poaje so'o —Jesosa poanaje—. ⁸E'e, jjaquecuaqui caje'yo cuana ojjaña meshi yasijje, ojjaña cuiñajji yasijje pea'ai. Quea huiso emanomeejjiya mano mee caje'yo; bobí yasijje po majje manoje'yo quea huiso; meshi huehuahuehuaje ojjaña meshi yasijje pea'ai —Jesosa poanaje—. E'e, jiquio ecua epona bacua neeani jama ebionei japashineijje neeani; quijje quea nee nee. Jamaya poaje e poe o'oya jjimahuajo. Quea nee pishana po majje quea nee nee poaje ojjaña cuana —Jesosa poanaje.

⁹—Majoya esohui huohuijji nisho cuaa miquianaya iña majje jeanobiajea caje'yo. Cuiasejjajea caje equi ojee ejjachichaquijjijo pea'ai. Enijje jjapeequianijo, pea cuaa miquianaya iña majje emeshi mese cuana huasijje dojo caje, ona

huoojeajji cuana huasijke pea'ai. Jamaya poajo, jecuea esohui huohuicue ojaya eshajja'ajjajji, emeshi mese cuanaja eshajja'ajjajji! ¹⁰E'e jojo nei e poe o'oya jjimahuajo, ojjaña meshi cuana huasijke ecuea esohui quea pame nee cahuohuiqui cahua, ojjañaja eshajja'ajjajji. Majoya e poe o'oyajo, ojjaña oe poaje —Jesosa poanaje. ¹¹Jamajjeya miquianaya iña cajo emeshi mese yasijje edojoji, ja'a quea mete pojji! A'a jjashahuabaquijji jama ba'a: “¿Ae shai eyaya emeshi mese huohuije?” Edojoshahua Pameya miquianaya sohuihuohui meesahua caje. Jamajjeya Edojoshahua Pame mijo yaniya ohuaya esohui huohui caje ecuea ejjashahuabaquijji. ¹²Majoya pea cuana boti'ama acaje'yo cuanaja. Jamajjeya e'o'i meseya oja chahua iña meesahua caje onaja equecua'yojji; ejejijiya oja bacua iña meesahua caje onajaya equecua'yojji pea'ai. Esho'lquiviana shajjama' po majje oja chii, ojaya enaese pea'ai iña meesahua caje onajaya equecua'yojji pea'ai. ¹³Enije jjapeequianijo miquianaya boti'ama nei acaje ojjaña meshijo ba'eca cuaa. Jamatii e poe o'oya jjimahuajo, enije jjapeequipaje'yo ajja tii ca ca Eyacuiñajji nijje ba'e tiitii meeje'yo, enije pea'ai —Jesosa poanaje.

**Aquiana quea tai nee ojjaña quea mete nee epo meeiji
(Mateo 24.15-28; Noca 21.20-24, 17.22-24)**

¹⁴—Eyacuiñajjiya esohui huohuijji yahuajo nei nei jama aca poa ba'a:
“Quije Eyacuiñajjiya equijo nequije aquiana quea tai nee nee, ojjaña quea mete nee nee epo meeiji”.

Jamajjeya ma ba majje ma pojajo tii ojjaña Jodio meshijo ba'eca capoquicuajiahua eyiyo cuana huasijke. (Jiquio esohuijjo jjashahuabaquicue quea ja'a epoji!) ¹⁵Joya equi huisa biajje chacochacoani ja'a equi yasijje dobiquinanajji aquiana cuana biohua edojoji! ¹⁶Joya quejo chacochacoqui pea'ai ja'a equi yasijje poquinanajji daqui moojo! Eyiyo huasijke poquicuaji ajjajo mano'yo chana!. ¹⁷Epona cuana o'ejji, bacua sho'iji pea'ai quea yeno poaje; quea camaja equehua poquicuajiji poaje. ¹⁸Jamajjeya Eyacuiñajji nijje mimicue jama ba'a: “Eyacuiñajji, jenojo pojjeama capoahua ecuanaja epoquijji eyiyo cuana huasijke!” acue —Jesosa poanaje—. ¹⁹E'e, ma pojja cuanajo ojjaña quea mete nee nee, quea yeno nee nee poaje. Jamaya pojjeama yahuajo, meshi pana majje, jjeya nei pea'ai, quijje pea'ai; quea mete pishana, quea yeno pishana. Ma pojja quea camaja cuanajo ca ca quea yeno nee poaje ojjaña cuana —Jesosa poanaje—. ²⁰Eyacuiñajjiya oe pojji cahuijo quea camaja po mee caje'yo; quea cahui huiso epo'yo jojjemo, ojjaña cuana mano'yome. Ojaya epeejji jaahuanana canijo, ojaya quea nahue nee emano jeyojeyo'yojji, Eyacuiñajjiya oe pojji cahuijo quea camaja amee caje'yo, quea cahui huiso pojjeama —Jesosa poanaje.

²¹—Ma pojja cuanajo a'a shajja'ajjajji ona siajje poajo jama ba'a: “¡Bacue oe, Eyacuiñajjiya huoojea'yo Quito jiquiacua poe'yonaje!” Jama poso, ja'a shajja'ajjajji! “¡Bacue oe, Quito jocuama pa poeyanaje!” jama onaa acajje ja'a shajja'ajjajji; a'a poquijji! ²²E'e, Eyacuiñajjiya huoojea'yo ojjaña jaahuanajji

e jayojja nisho, Eyacuiñajjija esohui huohuijji nisho pe'a'i poeje quea huiso nee nee. Oya cuanaa ma pea dejjaajjima acani acaje'yo Eyacuiñajjija epeejji cuana dasia'yojji nisho. Dasia caje'yo quea huiso nee; ecuea epeejji nei pe'a'i beshahua nei eya pajea mee caje'yo o jayojja epojji; cho, jjadasia meequi ajja. ²³Ecuea epeejji cuana, eyaya miya huohuinaje, quijje oya poeje ejjadasiaquijji. Jamajjeya ja'a oya cuana shajja'ajjaji! —Jesosa poanaje.

Jesosa ojjañaja Edoe Mese poeje o'oya
(Mateo 24.29-31; Noca 21.25-28)

²⁴—E'e—Jesosa poanaje—, quijje quea camaja nee nee po majje majoya eshequi quea apo poaje'yo. Ba'i jiji'yo ajja poaje'yo. ²⁵Majameta cuana jjacacquaqui'yo majje jijioqueje'yo ojjaña pea'ai. Majameta nequijji cuana huehuahuehuaje'yo janobajjima nei pe'a'i; yahuajo jayojja pojjeama poaje. ²⁶Majoya ojjañaa eya ba caje eyajo. Ba majje huohui caje jama ba'a: “¡Bacue! E'e jojo nei Jesosa ojjañaja Edoe Mese poeje'yo bo cuana biajje. Oya oe nei quea ca'a nee nee, quea jeajahua nee nee pe'a'i” acaje cuaa —Jesosa poanaje—. ²⁷Majoya eyaya esohuidojiji cuana huoojeaje'yo biacula, macua huasijje pea'ai ojjaña meshi yasijje pea'ai ecuea epeejji cuana jjequiya —Jesosa poanaje.

Esohui acuijo, iquena bajjanijo, huohui canaje Jesosaa
(Mateo 24.32-35; Noca 21.29-33)

²⁸Jesosaa huohui canaje pea jama ba'a: —E'e, eyaya miquianaya esohui ejjashahuabaquimeejji huohuije iquena acuijo. Eseja meshijo acui iñá'yani ba majje eseya poani: “E'e nei, nayaja po'yonaje. Jjeya eshequiaja popajeal'yonaje”.

²⁹—Ma jayojja jama eshequi, ba'i quea misi, majameta eyajo jjijijioqueani ba majje jjashahuabaquicue jama ba'a: “E'e, jjeya nei apoa poaje. Jjeyahua nei esejaya Emeshi Mese nei Jesosa Quito poeje o'oya”.

³⁰—E'e jojo nei ojjaña ma pojja cuanajo ba'eca cuana mano jeyojeyo'yo jjimahuajo ojjaña apoa poaje'yo; eya ojjañaja Emeshi Mese nequije'yo.

³¹E'e, aquiana eyajo nequi chama' poaje'yo; ojjaña meshi chama'yo tii poaje'yo pea'ai. Jamatii ecuea esohui oe epo'yojji pojjeama; e'e jojo nei eyaya jamaya aje'yo tii tii —Jesosa poanaje—. ³²¿Ache shono shai jamaya poaje, ojjaña apoa poaje'yo? Dejja cuanaja ba jjima; esohuidojiji cuanaja ba jjima pea'ai; ecuea ehuohuijji pojjeama. Ecue Chiija eba ojaye nei. Ohuaye nei huohui caje'yo ojjaña apoa epo'yojji —Jesosa poanaje.

³³—Jamajjeya ijjashahuabaqui tiitii anicue! Ache pojabajo eya ojjañaja Emeshi Mese nei poeje o'oya miquea eba pojjeama. ³⁴Jiquio jama poaje ba'a: E'equi mese poqui jjimahuajo echacociji cuana iyaa canaje. Huoojea canaje jama ba'a: “¡Ecuea equi cuiñacue, miquianaya! ¡Ecuea ehuohui mi yasijje jama chacocue pea'ai! Quijje eya poeje o'oya” e'equi mese poanaje —Jesosa poanaje—. ³⁵Jamajjeya ijja'ishoal'ajjaqui ani tiitiicue! Eya miquianajaya e'equi mese

jayojja;ache nei eshequi nequijo poeje o'oya miquianajaya ebajo ese. ¡Sinecua, mecashono, mecajjeahua cuana jja'ishoa'ajjaqui anicue! ³⁶Apoa pojjeama, ecahuijaa ba majje tecueañaje poe majje —Jesosa poanaje—. ³⁷Jamaya eyaya ojjaña ecuea epeejji cuana huohuiaña pealai: ¡Apoa epo anicue quiana! —jamaya Jesosaa sohuihuohui canaje Jenosanenajo, Onimo yiyejo.

Jodio etii cuana jjashahuuba taiquinaje Jesosa quecua'yojjijo
(Mateo 26.1-5; Noca 22.1-2; Huani 11.45-53)

14 ¹E'e, ojjaña Jodio cuana ojee jjachichaqui o'oyanaje Jenosanena huasijje ojee ijija'ijjiaa, quea bihui nee epojji, yahuajo nei esohuidojojiya Ejito meshijo Jodioja bacua cuana cui'a'yo jjima aca poa niñeba'yojji. Beca cahuime ojee ijija jjimahuajo, noe, pahui eshejjeemeejjima' ijija jjimahuajo, Eyacuñajji nijje emimijji etii cuana, Moisesija etehue'yo huohuujji cuana pealai jjashahuubaquinaje Jesosa quecua'yojji. ²Ojee mimimiminaje jama ba'a: —¡Jesosa quehua neijje iñacue, ojjaña Jodio cuana jjachichaqui jjimahuajo! ¡Oya iñacue jjeyahua nei, de! Quijke pishana ojjaña ojee ijija'ijjianijo, ecuanajaya Jesosa e'iñajji pojjeama. Chojja, ojjaña Jodio cuana quea quene nee nee ecuana nijje po chana! —poanaje Jodio edejja tii cuana.

Eponaa Jesosa sapa sha canaje shiyeshiyeya
(Mateo 26.6-13; Huani 12.1-8)

³Jesosa Betaniajo ani poquinaje Simonija equi yasijje. Poquinaje ijija'ijjiaa. Yahuajo nei Simoni quea mano nee nee batata epo'yo quea tai poa, ma dejja cuaa jjajea meequiv'yo jjima acani. Jesosaa oya yahuajo jjajeaquie mee ca'yonaje batata epo'yo. Simonija equijo ojee ijija'ijjianijo, oe epona Jesosa que poeyanaje. Tahuoo quea nahue nee neejo shiyeshiyeye ye canaje. Tahuoo naba capa majje Jesosa huojja sha canaje shiyeshiyeya, nardo bajjaniya. ⁴Ma ba majje beca cuana quea quene poanaje; epona tecuea canaje jama ba'a: —¿Apiojji acuae miyaya jiquio shiyeshiyeya Jesosa sapa quehua shaña so'o? ⁵¡Quea nahue nee nee eshojeajejjii, oe shequiaja echacome jama sosejeme, de! ¿Sha jjima yajjijo poso ca mi ca oe shiyeshiyeye dojo meenaje esodojjo quea huioso sosejje? E'e, aema' cuana huasijje esodojjo equiajji poso —epona acanaje cuaa.

⁶Jesosaa ca ca oya shajja'ajja majje jama acanaje ba'a: —¿Apiojji acuaeeya epona tecueaña so'o? ¡A'a oya tecueajji! E'e, eya ohuaya huojja sha canaje. Jamaya quea tame nee. ⁷E'e, aema' cuana minijje po tiitije'yo. ¡Oya cuana jaahuana'yocue quijke pealai! Eya ca ca enequi tiitiiji pojjeama minijje. ⁸Epona e huojja sha jjimahuajo jjashahuubaquinaje jama ba'a: "E'e e, Jesosa manoje'yo. Mano jjimahuajo, eyaya oya huojja shaña shiyeshiyeya; onaja mojea jjimahusha shaña poanaje epona" —Jesosaa acanaje.

⁹—Jamajjeya quijke ojjaña meshijo ecuea esohui huohui majje jiquio eponajeo huohui capoquipoquije pealai jama ba'a: "Oe eponaa Jesosa

huoju sha canaje shiyeshiyeya, quea jea nee neejojo". Jiquio eponajo huohui tiitii caje, e'e jojo nei —jamaya Jesosaa acanaje.

Jodasaa onaya iña meesahua canaje Jesosa
(Mateo 26.14-16; Noca 22.3-6)

¹⁰Yaninaje quea huiso Jesosa shajja'ajjajji cuana, 12. Oe nei Jodasa Isicanioote bajjani poquinaje Eyacuiñajji nijje emimijji etii cuana huasijke. Jama poanaje ba'a: —Eyaya miya Jesosa iña meesahuaje. ¿Ache sose huiso acuae mo ya oe sosequiaje so'o Jesosa iña meesahua soseje? —poanaje Jodasa.

¹¹Oya cuanaa Jodasa saja'a canaje quea bihui nee jama ba'a: —E'e, Jesosa iña meesahua soseje miya sosequiaje'yo quea huiso —poanaje Jodio etii.

Jamajjeya Jodasa jjashahuuba neineiqui aninaje: —¿Achajja iña meeme aje so'o? Caba'ajjaquisahua —poanaje.

Jesosaa o shajja'ajjajji cuana bobo ijija mee canaje
(Mateo 26.17-29; Noca 22.7-23; Huani 13.21-30; 1 Conitio 11.23-26)

¹²Jodio cuana quea bihui ojee ijija'ijjianinaje yohua shejo ba'a esohuidojojjija yahuajo nei etiiquianaja bacua cuana cui'a'yo jjima ñajjajja na' esecuejo e'lñapepa ba majje. Jamajjeya ebionei epojjajo e'ijjia'ijjajjijo, pahui quea ca'a ijija canijo, ñajjajja cui'a cajjijo, Jesosa que poe majje o shajja'ajjajji cuua huohui'ajja canaje jama ba'a: —Jesosa, ¿ache equijo acuae seja pahui eshejjeet meejjijo hua jjima ijija je so'o? ¡Ecuana huoojeacue aquiana iyajeara, mi ishoajji!

¹³Jamajjeya Jesosaa beca shajja'ajjajji huoojea canaje: —¡Poquicue Jenosanena huasijke! ¡Jomajo ecuea epjeeji baquicue ena abo cani! ¡Onije poquicue! ¹⁴Oya equi yasijje dobiquiyajo, ma equi mese nijje mimicue jama ba'a: "Ecuana sohui huohuijji jama poanaje ba'a: "Miquea equijo eyaya e shajja'ajjajji cuana nijjeya pahui ca'a ijija je esohuidojojjija etiiquianaja bacua ejja cuana cui'a'yo jjima poa shejo. ¿Ache equi quecuayijjijo ijija je so'o?" jamaya acue —Jesosaa acanaje—. ¹⁵Majoya equi meseya miya dojo caje eyahuasijke equi quecuayijjijo ai yasijje. Jomajo ojjaña aquiana apoa, ehuana bamebame'yo. ¡Jomajo bobo iyacue esejaya ojee e'ijjajji! —Jesosa poanaje.

¹⁶O shajja'ajjajji beca poquinaje Jenosanena huasijke. Jomajo Jesosaja esohui jayojja jama ojjaña ba cañaquinaje. Bobo iyajeara canaje pahui ca'a ijija'ijjiji.

¹⁷Majoya sinecua neijo Jesosa o shajja'ajjajji cuana nijje, 12 huisome nijje ma equi yasijje poquinaje. Dobiqui majje jaasohuaquinaje equi quecuayijjijo ai yasijje, equi jamacoo huasijke. Majoya ojjaña cuana anioquenaje bobo ijija'ijjiji pejjejo ijija'ijjia. ¹⁸Ojee ijija'ijjia anijo Jesosa jama poanaje ba'a: —E'e jojo nei jiquiojo aniya oe epjeeji nisho enije ijija'ijjia ani. Ohuaya onaya cuana eya iña meesahua caje'yo equecua'yojji.

¹⁹Ma shajja'ajja majje ojjaña cuana quea yeno nee nee poanaje. Pea mimiajjo, pea poanaje jama ba'a: —Ecuea Emeshi Mese, eya ca ca o jayojja pojjeama, e'e jojo nei —jamaya ojjaña miminaje.

²⁰Majoya Jesosa onijje jama poanaje ba'a: —E'e, miquianaya e shajja'ajjajiya 12 huisome enijje yani; oe aje epeejji nisho, de. E'e, maaya pahui shapeshipeshiani enijje; ohuaya eya onaya cuana iña meesahua caje'yo onajaya equecua'yojji. ²¹E'e, yahuajo nei Eyacuiñajjija esohui tehuejji cuaa esohui tehue ca poa jama ba'a:

“Quijje oe dejja Eyacuiñajjija huoojea'yo ojjaña jaahuanajji onaya cuana iña meesahua caje'yo equecua'yojji”.

Ma etehue'yo jama capoahua. Jamatii ma dejja, e iña meesahua jji epo quijje quea yeno nee poaje'yo. Jjashahuabaquije jama ba'a: “¿Apiojji shai eya ecue naeya mejo ca poa? Eya ca ca nequi sa po aija. Ecuea ejjashahuaba taiquijjijo mano'yo sa poani” oya poaje. Quijje oya quea nee nee po tiitiijel'yo —Jesosa poanaje.

²²Majoya ojee ijjiia'ijjia anijo tii Jesosaa pahui ca'a jjeshe canaje. Eyacuiñajji bihuia majje, pahui mijisisi majje quia canaje o shajja'ajjajji cuana. Jama poanaje ba'a: —¡Ijjiacue! Jiquio ecuea eyami —poanaje.

²³Pahui ijjiia majje caneco jjeshe canaje Jesosaa. Eyacuiñajji bihuia majje quia canaje ojjaña o shajja'ajjajji cuana. ²⁴—¡Ishicue! Jiquio ecuea ena!. Ecuea ena' cuayaquiajo, eya manoje'yo. Jamajoya eyaya ojjañaja mimishi cuana cuijeaje'yo enijje jjapeequiajo, Eyacuiñajjija esohui eyacua jayojja jama aje'yo. ²⁵Jjeya eyaya jiquio jjonojjajja na, uva na, e'ishi o'oyajji pojjeama miquiana nijje; eya manoje'yo. Quijje nei poe o'oya majje eyaya jiquio ishije o'oya miquiana nijje. E'e, eya poe o'oyajo, ecue Chiiya eya ojjaña huoojeal'yojji pomee caje'yo, ojjaña shajja'ajja caje —jamaya Jesosaa acanaje.

Penohua Jesosa ba jjima nisho acaje'yo pa (Mateo 26.30-35; Noca 22.31-34; Huani 13.36-38)

²⁶Majoya ojee sohuicuaya majje poquinaje eyiyo huasijje, Onimo jjajja meshi yasijje.

²⁷Ejiojjije poquije Jesosaa o shajja'ajjajji cuana acanaje jama ba'a: —Jiquio mecajje ojjaña miquianaya enijje jjapeequipajeaje'yo. E'e, yahuajo Eyacuiñajjija esohui tehuejji cuaa ejo tehue ca poa jayojja jama poaje jama ba'a:

“Quijje eyaya ñajjajja cuiñajji jaahuanne neinei aija. Jamajjeya onaaya oya cuia caje'yo. Najjajja cuiñajji chamajo, ñajjajja cuana jjajeaaajaquinanajje'yo”.

Jamaya yahuajo nei nei tehue ca poa ejo —Jesosaa acanaje—. E'e, eya ñajjajja cuiñajji jayojja jama poaje. Eya mano'yo majje ecuea epeejji cuana ñajjajja cuana jayojja jama poaje; jjajeaaajaquinanajje'yo.

²⁸—Jamatii Eyacuiñajjija eya shequi mee ca o'oyajje eya poquije Janinea meshi yasijje. Jomajo aje mi poeyajo ishoañaquije —Jesosa poanaje.

²⁹Penohua Jesosa jama acanaje ba'a: —E'e pojja'a pea cuana minijje jjapee tiitiiqui'yo ajja. Eya ca ca pea jayojja jama pojjeama. Eya jjapee tiitiiquije'yo minijje —poanaje Peno.

³⁰Jesosaa Peno jama acanaje ba'a: —Eyaya miya e'e jojo nei huohuiaña, Peno, jiquio mecajje tii cachina yahue beca taaaame po jjimahuajo, pea beca peejjima huohui'ajjame acajje, miya ej o po huicha'a huicha'aje jama ba'a: "Chojja de, ecuea Jesosa ba jjima nei nei" miyaya saja'ame aje quea meteya jjejojo —Jesosaa acanaje.

³¹Jamatii Penohua Jesosa acanaje: —Chojja, Jesosa. E'e pojja'a eya minijje jjapeequianijo, pea cuaa eya cuiajea caje'yo. ¡Jamatii ecuea ca mi ca epajeal'yojji pojjeama!

Oya jayojja pea cuaa acanaje pea'ai: —E'e, Jesosa, ecuanajaya ca mi ca epajeal'yojji pojjeama tii, jamatii onaa cuiajea caje'yo pojja'a.

Quea yeno nee nee Jesosa oja Chii nijje miminaje Jetesemani quejo
(Mateo 26.36-46; Noca 22.39-46)

³²Majoya Jesosa o shajja'ajjajji cuana nijje Jetesemani que yasijje poquinaje. Jesosa onijje miminaje jama ba'a: —¡Anioquecue jiquiojo tii! Jocuama eya poquije ecue Chii nijje mimiya.

³³Jamajjeya Jesosaa Peno, Huani, Satiaco pea'ai dojo canaje jocuama. Oya Jesosa jjashahuabaquinaje quea yeno nee nee. ³⁴Jamajjeya ojaya epeejji nijje jama poanaje ba'a: —Quea yeno nee nee iña; manoje'yo iña, de. ¡Anioquecue enijje; a'a cahuijji! —Jesosa poanaje.

³⁵Majoya Jesosa cuama pishana poqui majje ecui'oshajjajo nequinaje. Oja Chii nijje miminaje quea yeno nee jama ba'a: ³⁶—Ecue Chii, miquea ejjashahuubaqui'yojji jayojja jama eyaya aje'yo. Miyaya eya huoojeanaje ojjañaja mimishijo mano'yohua. Quea camaja nee nee ej. ¿A'a ya iña miyaya che onaaya quecua mee'yo jjima aje'yo? ¿A'a ya iña che iña mee'yo jjima aje'yo? ¡Jamatii miquea ejjashahuubaqui'yojji jayojjaya jama acue! ¡Ecuea ejjashahuubaqui'yojji jayojja jama a'a ajji! —Jesosa jamaya miminaje oja Chii nijje.

³⁷Majoya oya poqui o'oyanaje o shajja'ajjajji cuana huasijje. Ba cañaqui'yonaje ecahuijaa. Tecue'ama Peno nijje jama poanaje ba'a: —¿A'a mi cahuijaa? ¿A'a mi enijje cahui jjima che nequi jjima?

³⁸Majoya Jesosaa ojjaña cuana acanaje: —¡A'a cahuijji! ¡Eyacuiñajji nijje mimi majamajacue! Jamajoya pea cuaa miya quea mimishi epo mee'yojji pojjeama. E'e, miquianaya enijje jjapeequi sa poani e'e jojo nei. Jamatii miya ca'a'ama; quea mimishi poaje o'oya pojja'a —Jesosa poanaje.

³⁹Majoya Jesosa poqui o'oyanaje jocuama pishana oja Chii nijje mimi o'oyaa. Yahuajo jayojja mimi o'oyame poanaje.

⁴⁰Oja Chii nijje mimi o'oya majje Jesosa poqui o'oyanaje o shajja'ajjajji cuana huasijje. Ba caña o'oyanaje quea cojja jee mano poanajejojo cahui o'oyanaje. Jesosa ba majje oya cuana quea bicho poanaje onijje emimijji. ⁴¹Jamajjeya oya cuana jea canana o'oyanaje, Jesosaa. Cuama pishana poqui o'oyanaje. Oja Chii nijje mimi o'oyanaje. Mimi o'oya

majje poe o'oyanaje o shajja'ajjajji cuana que. Ishe'acanaje: —¿A'a miquianaya cahuijaa tii? ¿A'a mi jomishocajaa? Apoa aje, de. Jjeyahua nei eya, ojjañaja Edoe Mese, mimishi cua iña meesahua caje'yo cuaa.
 42 ¡Nequisohuacue! ¡Cua'a, jjeya nei ecuea epeejji nisho poeje! ¡Joya aje Jodasa poeje ba'a! —Jesosa poanaje.

Jesosa iña canaje cuaa (Mateo 26.47-56; Noca 22.47-53; Huani 18.2-11)

43 Jesosa mimianijo tii, Jodasa o que poeyanaje. Oya aje oe Jesosaja epeejji pea'ai poanaje; pea 11 nijje nequinaje tii. Quea huiso nee nee dejja nijje Jodasa poeyanaje; yohuajji poeyanaje acuijji, baajji, mejejji pea'ai poeyanaje. Jodio etii cuaa, Jodioja esohui huohuijjiya, Eyacuiñajji nijje emimijji etiiya pea'ai ojjaña huoojea canaje Jesosa iñaa. 44 Jodasaa, Jesosa e'iña meejjiya, yahuajo jama huohuime acanaje ba'a: —¡Bacue oe! Eyaya oe dejja ba majje cuiapashi nishoje. ¡Majoya oe miquianaaya iñacue; dojo'yocue! —Jodasaa yahuajo acanaje dejja cuana.

45 Jamajjeya Jodasa Jesosa que jjanequichipiquinaje: —Jesosa, ¡a'a mi ecuea Emeshi Mese nei jiquio! —amajje cuiapashi nisho canaje.

46 Ma ba majje pea dejja cuaa Jesosa que poe majje iña canaje edojoji.
 47 Jesosa iña cajo oja epeejjiya onijje nequiya, Penohua, baa iña canaje. Onaja sapa jajapojojeajji nisho shajja jajasejjajea ca'yonaje, Eyacuiñajji nijje emimijji etiiya echacojjji poanija eshajja.

48 Jesosaa ojjaña dejja ejjachichaqui'yo nequi huohui canaje: —¿Apiojji miya poeyanaje baajji, acuijji, mejejji e iñaa? ¿A'a cuae jja iña siipojji so'o? 49 Ojjaña pojjajo eya ojjaña cuana nijje nequinaje esohui huohuijji Eyacuiñajjiya equijo. Jamatii eya miquianajaya iña jjima poanaje. ¿Apiojji mecajje poeyanaje e iñaa? Jamatii jamaya nequiana poani. Miquianaaya ca mi ca oe Eyacuiñajjiya esohui huohuijjiya etehue'yo yahuajo nei nei mijlo jayojja jama quea tai aña.

50 Majoya o shajja'ajjajji cuana mete majje cuajicuajinananae; Jesosa jea cananananae.

51 Eya ca ca iña Macoso bajjani. Jesosa ocuenaje o pajea sa po'yo ajjaa jjejojo. Eya daquima' poanaje; oe daqui ao ejjacueabeboquijji poanaje. Majoya dejja mase cuaa eya iña'ajja canaje. 52 Ohua iña cajje eyaya daqui ao jeajeananananae, cuajicuajipoquinaje daquima' quea mete jjejojo.

Jodio etiiya Jesosa niñebe canaje (Mateo 26.57-68; Noca 22.54-55, 63-71; Huani 18.12-14, 19-24)

53 Jamajjeya joya Jesosa iñajji cuaa oya dojo canaje Eyacuiñajji nijje emimijji etiiya equi yasijje, Caipaja equi yasijje. Jocuama ojjaña Jodio cuana jjachichaquinaje, Jodio etii cuana, Moisesija etehue'yo huohuijji poani pea'ai. 54 Penohua ca ca equijje aca poquinaje Jesosa. Caipaja equi

yasijje nequiñaquinaje. Dobiquinaje epeeyi dojjo huasijke. Jomajo Peno equi cuiñajji nijje cu aqui pejjejo jjayoqui nequinaje yajja Jesosa acaje cuaa ebajji.

⁵⁵ Eyacuiñajji nijje emimiji etii, ojjaña Jodio etii cuana, Jodio esohui huohuijji poani pea'aiya ojee mimimiminaje Jesosajo, ojjaña ejjachichaqui nequiya, o quecuajea'yo sa acani. Jamajjeya sa'ajja canaje dejja cuana Jesosa huohuijji nisho epo; Shomano meshi mese Pinato bajjani yasijje dojo majje Jesosa huohuijji nisho. Jamatii Jesosa huohuijji epo chama' poanaje. ⁵⁶ Quea huiso dejja siajje acanaje. Jamatii oe siajjepojjiya esohui pea siajjepojjiya esohui jama pojjeama Jesosa mano mee'yojjii. Chama' beca oya jayojja mimime epoiji. ⁵⁷ Quije yejje nei beca cuana poe majje Jesosa niñeba canaje jama ba'a: ⁵⁸—Eyaya oya shajja'ajjanaje. Jama poanaje Jesosa ba'a: “Jiquio Eyacuiñajjiya equi jeabichajea cajo, eyaya pea equi iyaje'yo pea beca peejjima cahuime. Jiquio equi dejjaja iya poanaje; pea ca ca dejja pojjeama iya caje'yo” Jesosa poanaje —acanaje beca cuaa.

⁵⁹ Jamatii oya cuanaja esohui pea jayojja jama pojjeama poanaje.

⁶⁰ Majoya Eyacuiñajji nijje emimiji etii ojjaña cojja nei nequisohua majje Jesosa huohui'ajja canaje: —¿A'a pa miya jama poanaje ba'a? ¿Jesosa, a'a cuae miyaya saja'aje'yo so'o?

⁶¹ Jamatii Jesosa mimishi'ama jjejojo mimipanajaji jjima poanaje. Jamajjeya Eyacuiñajji nijje emimiji etiiya oya huohui neinei canaje: —Jesosa, ¿a'a cuae mi Eyacuiñajjiya Bacua Ejja nei, oja huoojea'yo ojjaña jaahuanajji? ¡Huohuicue mo!

⁶² Jamajjeya Jesosaa acanaje: —E'e, joya ecua miyaya aña jayojjaya eya, Eyacuiñajjiya huoojea'yo ojjaña jaahuanajji. Cuanaya eyaya miya e'e nei huohuiaña: Quije miyaya eya baje ecue Chii nijje ebianeijje ani. Oya quea ca'a nee nee enequi tii. Eya miquianaaya baje bo biajje poeje o'oya —Jesosa poanaje.

⁶³ Ma shajjajja majje Jodioja Eyacuiñajji nijje emimiji etii quea quene nee nee poanaje. Quea quene nee po majje ma dejja tiiya ojaya daqui, oja huoshu ba'e isajea canaje. Jodio dejja jamaya oja daqui isajea cani quea quene po majje. Ojjaña cuana huohui canaje: —¡De! ¡A'a pea dejja iyaajji Jesosa huohuijji! Jamatii. ⁶⁴ Oya Jesosa miminaje jama ba'a: “Eya Eyacuiñajjiya Bacua Ejja”. Chojja. Sajjepojji. ¿A'a cuae nequiaa shajja'ajjanaje oja sohui? ¿Jamajje yajja acuae seya aje so'o, Jesosa, de? —acanaje Jodio etiiya.

—¡Oya oe manojea mee'yocue; quea tai ca esohui acani! —acanaje Jodio edejja tii cuaa, Jesosa Eyacuiñajjiya Bacua Ejja pojjeama posojo.

⁶⁵ Majoya aje oe Jodio etiiya Jesosa cojja cuichojea ca poa. Cojja dodo majje ejjachichaquinequiya cuia canaje peal'i emeya. Cuia majje huohui'ajja canaje: —¡Miya Eyacuiñajjiya huoojea nei jjabaqui majje jja ca oe huohui pocue! ¿Aya acue mi cuia cani so'o? ¡Jashahuaba'ajjaqui! —acanaje equi cuiñajji cuaa.

Penohua siajje acanaje Jesosa oja ba jjima nisho
(Mateo 26.69-75; Noca 22.56-62; Huani 18.15-18, 25-27)

“⁶⁶Ojjaña cuaa Jesosa napa caqui Penohua ba canaje esecuejo nequiya. Oe epona echacoiji ahuema’ ani poeyanaje. ⁶⁷Peno cuaqui pejjejo jjayoqui nequi ba canaje. Ba neinei majje huohui canaje jama ba'a: —E'e jojo nei miya Jesosa nijje aninaje, ma Nasanenajo ba'e nijje —poanaje epona.

—⁶⁸—¡Chojja, ecuea oya ba jjima! ¿Ajeo acuae mi mimiani? —Peno siajje poanaje.

Majoya Peno epeeyijo nequi cuayaqui'yonaje, quea mete jjejojo. Jjeyahua nei cachina yahua taaaanje. ⁶⁹Peno esecuejo enequi'yojo, epona sho'iya echacoijiya oya ba ca o'o yanaje. Ojjaña cuana huohui canaje: —Oya ca ca oma Jesosa nijje aninaje e'e jojo nei —acanaje.

—⁷⁰—Chojja, ecuea oya ba jjima nei nei. Eya ojaya epeejji pojjeama —nisho po o'o yanaje quea mete jjejojo.

Quije pishana beca cuana Peno que ojee nequi jjanequichipiqui majje jama poanaje ba'a: —E'e jojo nei miya Jesosaja epeejji pea'ai; pea cuana nijje nequinaje. Jamaya miquea emimi, Janinea meshijo ba'e jayojja jama miya mimiani, de —poanaje.

—⁷¹Ojaya esohui shajja'ajja majje Peno quea mete nee poanaje; onije mimipanajajinaje: —¡Siajje miya poani! Jiquio dejja ecuea ba jjima. Eya e'e jojo nei pojjeama poani jojjemo, Eyacuiñajjiya eya mano mee ca'yome —Peno poanaje. Jamatii oya siajje poanaje.

—⁷²Peno jamaya poajo chachina yahue taaa o'o yanaje. Cachina taaaajo Peno jjashahuubaqui'yonaje ma Jesosaa yahuajo huohui canaje jama ba'a: —Peno, cachina yahue beca taaaame poajo miyaya eya ba jjima nisho aje; pea beca peejjima huohuime aje'yo —yahuajo jamaya Jesosaa Peno acanaje. Ma shahuaba'yo majje Peno quea yeno nee nee poanaje. Pa neinei poqui'yonaje.

Emeshi mese Pinato huasijke Jesosa dojo canaje
(Mateo 27.1-2, 11-14; Noca 23.1-2; Huani 18.28-32)

15 ¹Majoya mecajjeahua nei Eyacuiñajji nijje emimiji etii cuana, Jodioja edejja tii cuana, Moisesija etehue'yo huohuiji poani, pea Jodio etii ejjachichaqui nequi cuana pea'ai, ⁷¹ huisome jjachichaquinaje. Ojee jjachichaqui majje miminaje Jesosa quecua'yojji: —¿Achajja amajje acuae seja Jesosa quecua meeje'yo so'o? —acanaje oya cuaa.

Jamajjeya Jesosa me jeyo majje dojo canaje Shomano meshi mese Pinato bajjani yasijke. ²Jesosa ba majje Pinatohua huohui'ajja canaje jama ba'a: —¿A'ya cuae mi so'o? ¿A'a miya Jodioja Emeshi Mese nei poaje'yo?

—E'e, joya ecua miyaya aña jamaya epo'yojji eya —Jesosaa saja'a canaje.

³Eyacuiñajji nijje emimiji etii cuaa quea huiso siajje acanaje Pinato Jesosajo. Jamatii Jesosaa saja'a jjima acanaje. ⁴Jamajjeya Pinatohua oya

huohui'ajja canaje: —¿Yajjajje acuae mi mi jjasaja'aquiani so'o? ¿A'a jje shajja'ajja jjima ojaya esohui mijo? Quea hioso nee miya niñeba cani Jodio etii cuaa.

⁵ Jesosa mimishi'ama. Jamajjeya siajjepojji cuana o niñebajji saja'a jjima acanaje. Jjasaja'aqui ajja nei nei ba majje Pinatohua niñeba ca'yonaje: —¿Yajjajje acuae Jesosa mi jjasaja'aquiani so'o, de? —poanaje Pinato.

⁶ Majoya Pinatohua niñeba ca'yonaje jama ba'a: —Jjeya nei Jodio cuana ojee ijja'iijjani esohuidojojiya yahuajo nei ojaya etiiquianaja bacua cuana cui'a'yo jjima shejo. Ojjaña shequiaja jiquio shejo eyaya oe Jodio dejja ejeanobiajaa huoojeacuayaje'yo, ma Jodio cuaa sa cani, Jodio quea bihui epojji. Jamajjeya jiquio shejo e'e pojja'a eyaya Jesosa pichojea meeje'yo, jjeyahua nei. ⁷ Pea yani, Mashama' bajjani, Shomano meshi mese quecua panajji epo. Oya dejja tai, ejeanobiajaa ona quecua'yojji cuana nijje. E'e pojja'a eyaya Mashama' huoojeacuayajea meeje'yo —jamaya Pinato jjashahuabaquinaje.

⁸ Jjeyahua nei Jodio dejja cuana Pinato que poeyanaje. Huohui canaje jama ba'a: —Emeshi mese Pinato, ijjeyahua nei huoojeacuayajea'yocue oe Jodio dejja, ecuana quea bihui nee epojji! —poanaje.

⁹ Pinato jama poanaje ba'a: —E'e, jjeyahua nei eyaya pichojeaje'yo oe Jodio dejja. ¿Ache acuae jja oe pichojeaje'yo so'o? E'e pojja'a eyaya Jodio cuanaja Emeshi Mese nei Jesosa bajjani pichojeaje'yo. ¿A'a e'e? —poanaje Pinato.

¹⁰ Pinato eba poanaje Jodio etii quea quene nee poani pea cuaa Jesosa nijje jjapeequi majje Jodio etiiquianaja esohui pajea cani. Jamajjeya Jesosa iña mee canaje equecuaje'yojji, Jodio etiiquiaa. Jamajjeya Pinatohua Jesosa pichojea mee sa acanaje. ¹¹ Jamatii Eyacuñajji nijje emimijji etiyya ojjaña Jodio ejjachichaqui nequi taaa mee canaje: —¡Mashama' oe huoojeacuayajea'yocue! ¡Jesosa a'a pichojea'yojji! —taaame poanaje.

¹² —Jamajjeya ¿yajja acuae oe eyaya Jesosa Quito aje so'o, Jodio cuanaja Emeshi Mese nei ca pa coma? —Pinatohua huohui'ajja canaje.

¹³ Jama taaame poanaje ba'a: —¡Oya me cacajea meecue oe, acui ecueata'apeejo! ¡Acui cueata'apeejo ba'ehuanasohuajea meecue oe emanoy'yojji! —taaa neineinaje cuana.

¹⁴ —¿Yajjajo acuae oya quecuaje'yo so'o? Oya mimishi'ama. ¿Apiojji acuaeaya jjaya quecua'yo sa aña Jesosa? —Pinatohua huohui'ajja canaje.

Jamatii taaa majamaja canaje Jodio cuana: —¡Jesosa oe me cacajea meecue oe; acui ecueata'apeejo ba'ehuanasohuajea meecue Jesosa, de! —jama taaameya poa Jodio etii cuana.

¹⁵ Jamajjeya Pinatohua ohua sa cajo Mashama' huoojeacuayajea mee ca'yonaje. Jesosa ca ca huoojea canaje cuiasejjajea majje me cacajear emano'yojji.

Sohuinano cuana soa neineinaje Jesosajo
(Mateo 27.27-31; Huani 19.2-3)

¹⁶ Jamajoya emeshi meseja sohuinano cuaa Jesosa dojo canaje emeshi mese chacochacoañani equi dojjo huasijje. Ojjaña sohuinano Jesosa que jjachichaquinaje. ¹⁷ Jesosaja daqui oshe huijjiajea mee majje daqui huo'o nei huosho mee canaje emeshi mese nisho epojji. Acuisha sipi majje sapahuahuo iya canaje, emeshi mese jayojja nisho epojji. ¹⁸ Majoya ecui'oshajjajo nequinaje ojjaña, Jesosa bihuajji nisho. Jama bihuia nishome acanaje ba'a: —; Miya Jodioja emeshi mese quea ca'a nee! ¡Ba'e tiitii'yocue! —sajea nisho canaje cuaa Jesosa. ¹⁹ Majoya oya sapa cuiape'ejea canaje acuiya. Cuia huicha'a huicha'a canaje. Jesosa cuichojea huicha'a huicha'a canaje oja yami yasijje. Ecui'oshajjajo nequiya bihuia nisho canaje cuaa. ²⁰ Ojo soa neinei'yо majje daqui huo'o nei huijjiajea canaje; ojaya daqui quia ca o'oyanaje. Majoya Jesosa quea huesha dojo canaje me cacajearaa, ba'ehuanasohuajea pealai, sohuinano cuaa.

Jesosa acui ecueata'apeejo ba'ehuanasohuajea canaje
(Mateo 27.32-38; Noca 23.26-43; Huani 19.17-27)

²¹ Jenosanenajo aniya sohuinanohua Jesosa dojo caje, ba cajjequinaje pea dejja Simoni bajjani, Simoni Sinene meshijo ba'e poe'yo; oya Anejanoja ejejiji, oja chahua Shopoja ejejiji. Jamajjeya sohuinano cuaa Simoni acui ecueata'apee quea biquie dojo mee canaje Jesosa ba'ehuanasohuajeiji. ²² Jamaya oya poquinaje eyiyo bajjani Jonijota eyiyo huasijje, Ese Ejjaja esohuijo Esapa Jjii anijji bajjani yasijje. ²³ Esapa Jjii anijji eyiyo huasijje jaasohuaquinaje cuana. Bañaqui majje Jesosa ishi mee'ajja canaje cuaa acuijjajja na quea sese, pasejo 'ia jayojja. Ishi mee'ajja canaje quecua ca'yajje nee'ama epojji. Sio majje ishi jjima acanaje Jesosaa. ²⁴ Majoya me cacajea ca'yonaje; ba'ehuanasohuajea ca'yonaje daquima! Ba'ehuanasohuajeyo majje oja daqui cuana chicha ca'yonaje sohuinano cuaa. Iyachicha'yо majje, onaaya hue'e nisho majje daqui majjo ca'yonaje ojaya pojji epo'yojji.

²⁵ Eshequi poe pishanajo, onaaya Jesosa acui ecueata'apeejo ba'ehuanasohuajea canaje. ²⁶ Etehue'yo o ba'e sapa biajje oja bajjani caca canaje, Jesosa bajjani, oya apiojji me cacajea ca'yonaje huohui epo'yojji. Etehue'yo jama poa ba'a:

OYA JESOSA JODIOJA EMESHI MESE EPO'YOJJI

²⁷ Jesosa ba'e pejjejo beca siipojji pea acui ecueata'apee cuanajo ba'e huanasohuajea pealai ca'yonaje, Jesosaja ebianei mijijje, pea shani mijijje. ²⁸ E'e, Eyacuiñajjija esohui huohuijija etehue'yo yahuajo nei nei jayojja jama, jamaya acanaje ba'a: "Ojjaña cuana jjashahuabaquije jamaya: —Oya dejja mimishi nijje nequinaje". Yahuajo nei nei jamaya poa.

²⁹ Pea dejja cuana ejlojjije poquianiya Jesosa ba majje esapa jeacajjacajja canaje, soa huisahuisa nequinaje. Jama mimijajime poanaje ba'a: —; A'a cuae oe miyaya Eyacuiñajjija mei equi iñajeabichajea'yо majje pea equi

iyaje o'oya so'o, pea beca peejjima cahuime? ¡Ba'ajja socue! ³⁰Ache ba'ajja; miya Eyacuiñajjija Bacua Ejja nei jjabaqui majje ca oe jacui ecueata'apeejo ba'e nequioque'ajja'yo socue, emano'yiji pojjeama! —poanaje cuana.

³¹Moisesija etehue'yo huohuijji, Eyacuiñajji nijje emimiji etii pea'ai ojo soa neineinaje. Ojee mimimiminaje jama ba'a: —¿A'a Jesosa ojjaña jaahuanajji epo'yoji? Chojja, ona nahuejji pojjeama. Oya ca ca oma nequioque'yo ajja, de —poanaje.

³²Jesosa niñeba canaje pea'ai: —¿A'a cuae jja oe miya Jodioja Emeshi Mese nei poaje'yo? ¡Jjaba'ajjaqui socue! Miya Eyacuiñajjija huoojea'yo ojjaña jaahuanajji jjabaqui majje jacui ecueata'apeejo ba'e ca oe nequioque'ajja'yo socue jjeyahua nei, ecuanaja ebajji! Ba majje ecuaaya: "Miya e'e jojo nei Eyacuiñajjija Bacua Ejja poanaje" aje'yo.

Siropiji cuaa ma o pejjejo eba'ehuanasohuajea ba'eya pea'ai Jesosa jamaya niñebame acanaje quea huiso nee.

Jesosa mano'yonaje

(Mateo 27.45-56; Noca 23.44-49; Huani 19.28-30)

³³Majoya eshequi biacojjajja nequijo shequima' jayojja poanaje; quea misi nee poanaje ojjaña meshi yasijje. Quijje sinecua eshequi jjajeapaaqui'yo majje jiji o'yananje. ³⁴Sinecua, quea misi poajo, Jesosa quea yeno neineijo taaa neineinaje: —¿Eli, eli, lama sabactani? —taaame poanaje—; ecue Chii, ecue Chii, ¿yajjajo acuae mo ya jeana'yonaje so'o? —Jesosa poanaje Jodioja esohuijo.

³⁵Shajjal'ajja majje joya quea chipi nee nee nequi jama poanaje ba'a: —¡Bacue oe! ¡Ohuaya etiiquiana Enia iyaa cani pojja'a, ma yahuajo nei ba'ya poa Enia iyaa cani chi, de! —jama posoya acanaje cuaa.

³⁶Jamatjeya oe dejja poquicuajinaje acuujjajja na sese jjequiya. Jjequi majje shajashaja iyanobia canaje ena ejjequi yasijje. Majoya bequiobo sajo quecuahuoshlo majje Jesosaja enaba huasijje huoo canaje, ojaya e'ishijji nisho: —¡Ishoa socue! ¡Enia pojja'a poeje o nahueya, o jjequioquea'yohua! —poanaje.

³⁷Jamatii, taaa neinei o'oya majje Jesosa mano'yonaje. Chama'yo tii poanaje. ³⁸Jesosa mano'yajo tii, Eyacuiñajjija equijo daqui quea moo eba'ehuana ba'e Eyacuiñajjiya eyajje jjaisajea meequi ca'yonaje; biacuajje ebionei jjaisaje aqui meecoo canaje.

³⁹Ojjaña ba majje, Jesosa taaa neinei majje, mano'yonaje ba majje pea'ai sohuinano huoojeajji poani, ma Jesosa nahuejji poani quea mete nee poanaje: —¡E'e jojo nei de, oya Jesosa Eyacuiñajjija Bacua Ejja poanaje! —sohuinano poanaje.

⁴⁰⁻⁴¹Quea huesha nequia epona cuaa pea'ai Jesosa eba'ehuanasohuajea ba'e ba cani. Oya cuana yahuajo Jesosa nijje Janinea meshijo ania poa. Onijje Jenosanena huasijje poeyanaje,

oja bobi cuacua meesahuaa. Oya cuana ma bajjani ba'a: Mania Madanena; Satiaco, oja chahua Jose pea'ajia enaese Mania bajjani; Semeneoja ehuanase Sanome bajjani pea'ai; pea epona cuana quea huiso pea'ajia ba canaje.

Jesosa mei jjani yasijje huananobia ca'yonaje
(Mateo 27.57-61; Noca 23.50-56; Huani 19.38-42)

⁴² Majoya sinenaje. Mecahuajje epojja ejomishocajji, quea bihui nee ojee e'ijjia'ijjiajji pea'ai. Jamajjeya acui ecueata'apeejo eba'ehuanasohua ba'e meemee ajja.

⁴³ Jamajjeya sinecua nei dejja Jose bajjani poeyanaje, pea Jose, Amatea meshijo ba'e. Oya Jodio etii ejjachichaqui nequi cuana nijje nequi. Oya ojjañaja quea boti nee. Ohuaya Eyacuïñajji ojjaña huoojea'yojji poaje ishoa'ajja cani. Oya Jesosaja epeejji pea'ai yahuajo. Jamajjeya oya mete'ama po majje Pinato huasijje poquinaje Jesosajo huohuiya. Poe'yo majje ohuaya Pinato huohui caña'yonaje: —Emeshi mese Pinato, Jesosa mano'yonaje. Eyaya oya jjequioqueaje'yo jjani yasijje ehuananobiaqui'yojji —poanaje Jose.

⁴⁴ Joseja esohui shajja'ajja majje Pinato jama poanaje ba'a: —¡De! ¿A'a oya Jesosa manocuaji'yonaje?

Jamajjeya Pinatohua sohuinano huoojeajji poani, ma Jesosa me cacajeajji epo iyaa canaje. O poeyajo huohui'ajja canaje jama ba'a: —¿A'a e'e jojo nei Jesosa manocuaji'yonaje? —poanaje.

⁴⁵ —E'e, oya mano'yonaje —poanaje.

Jamajjoya Pinatohua Jose huoojea canaje jama ba'a: —E'e, ¡Jesosa dojocue! ¡Mei jjani yasijje huananobiaquicue!

⁴⁶ Jamajjeya daqui oshe quea ao nee jjeshe majje Jose poquinaje Jesosa acui ecueata'apeejo emanoy'o ba'e yasijje. Jesosa emanoy'o ba'e jjequioquea ca'yonaje. Daqui oshe eyacua neijo bebo canaje. Dojo canaje mei jjani yasijje, ma oja jjeya nei tio huasijje. Huananobia ca'yonaje. Majoya mei quea quemó nee jeacajjajjajea canaje mei jjani naba capa'yojji. Jesosa mei jjani dojooja jaa capa'yo majje poquinaje Jose pea cuana nijje. ⁴⁷ Mania Madanena, Joseja enaese Mania bajjani pea'ai mei jjani yasijje poeyanaje pea'ai. Jomajo Jesosa jjani yasijje ehuananobiajaa ba canaje, epona cuaa.

Jesosa shequi o'oyanaje
(Mateo 28.1-10; Noca 24.1-12; Huani 20.1-10)

16 ¹Jodioja epojja ejomishocajji jjayejjequiajo, sinecua Mania Madanena, Jacoboja enaese Mania bajjaniya, Sanomeya pea'ai shiyeshiye iña jjeshe canaje Jesosa shicujji nisho. ²Jamajjeya mecajjeahua nei jjaja'l'ajjaqui jjimahuajo ebionei epojjajo, nomico pojajjo, oya cuana poquinaje jjani yasijje. ³Bañaaqui jjimahuajo mimimiminaje jama ba'a: —¿Aya shai mei quea quemó jeacajjajjajea caje'yo ese dobiquiji? Quea quemó nee nee mei.

⁴Epona cuana jjani yasijje poe majje ba cañaquinaje jjani huejja ecapajea'yo nequi. ⁵Jamajjeya jjani ai yasijje dobiquinaje. Dobiqui majje epona cuaa esho'i ai ba canaje. Oja daqui quea oshe nee nee, quea ao nee. Jesosaja equipajaajji biajje ani ba canaje esohuidojojji ebianei mijijje ani. Jjeya ca ca Jesosa chama!. Ba majje epona cuana quea mete poanaje.

⁶Jamaya oya epona cuana nijje poanaje ba'a: —¡A'a quea mete pojji! Miya ecuea eba. E'e, miyaya Jesosa ma Nasanenajo ba'ya poa sa'ajja'yo poequi, ma acui ecueata'apeejo mano'yonaje. Chama' oya jjeya jiquiojo. Shequi o'yananje ca jja coma. ¡E'e, quia'o jiquio ba'ajjahua'yo socue! Jiquiojo jaanaje. ⁷Jamajjeya ijjeyahua nei poquicuajcuse oja epeejji huohuiya! ¡Jama huohuime acue ba'a: "Jesosa pa shequi'yonaje" acue! "Oya jjeya nei Janinea meshi yasijje poquije miquiana poqui jjimahuajo" o shajja'ajjajji cuana huohuiquicue. ¡Peno oe huohuiñaquicue Jesosaja esohui ma ohuaya huohui canaje oe a'a pajea'yojji! ¡Oya oe jocuama baquicue! —esohuidojojjiya epona cuana acanaje.

⁸Jamajjeya epona cuana jjani esecue yasijje cuayaquii'yo majje poquicuajcujinaje. Quea mete neejo oya cuana piopionaje. Pea nijje mimi jjima Jesosajo. Cuajicuajinaje Jesosa shajja'ajjajji cuana esohuidojojjiya esohui huohuiya.

⁹E'e, ebionei epojjajo, nomico pojajjo, Jesosa shequi o'oya majje, jjanequija'aqui'yo majje pea'ai, Mania Madanenaa ebionei oya ba ca'yonaje. Oya Maniaja yahuajo eshahua quea huiso dobiqiyajo, Jesosaa eshahua cuana huoojeacuayajea ca'yonaje me oejjje pea beca huisome. ¹⁰Majoya Jesosa ba majje Maniaa o shajja'ajjajji cuana huasijje poquicuajinaje huohuiya. Jesosa emano'yo tii jaa posojo, oya cuana pa neinei aninaje quea yeno. ¹¹Jamajjeya Maniyyaa oya cuana huohui cañaquinaje Jesosa eshe o'oya: —Eyaya oya banaje e'e jojo nei —acanaje Maniaa.

Jamatii Maniaja esohui shajja'ajja majje oya cuana jama poanaje ba'a: —E'e pojja'a. Chojja, siajje miya poani, Mania —acanaje cuaa, Jesosa shequi o'oya ajja poso acanaje.

¹²Majoya Jesosaja epeejji becanejjiji pea'ai ejiojjije poquijejo, Jesosa pea jayojjaya jjanequija'aquinaje onijje. Jesosa ba jjima poanaje cuanaja. ¹³Quijje yejje nei oya e'e jojo nei Jesosa ba majje oya cuana poquinaje pea eshajja'ajjajji cuana huohuiya. Matatii ojjaña jama poanaje ba'a: —E'e pojja'a, de. Chojja de, oya mano'yo tii —ojjaña cuana poanaje, Jesosa shequi o'oya ajja poso acanaje.

Jesosa ba canaje o shajja'ajjajji cuaa

(Mateo 28.16-20; Noca 24.36-49; Huani 20.19-23; Hecho 1.6-8)

¹⁴Quijje Jesosa shajja'ajjajji cuana 11 huisome oe equijo ojee ijji'a'ijji anijo Jesosa onijje jjanequija'aqui'yonaje. Oya cuana tecuea canaje jama ba'a: —¿Apiojji acuae quiana quea sapa ca'a poani? ¿Apiojji shajja'ajja jjima onajaya ehuohui'yo eya eshe o'oya ba majje? ¡Bacue eya e'e jojo nei eshequi'yo, jjabahuejjaquicue! —Jesosaa acanaje.

¹⁵Majoya Jesosaa oya cuana jama acanaje ba'a: —¡Poquicue ojjaña cuana huasijje, ma ojjaña meshijo ba'e yasijje! ¡Ecuea esohui quea pame nee eba'e tiitii'yojjijo ba meequivie! ¡Enijje jjapeequi meequivie! ¡Enijje jjapeequiyajo enajo besa meecue! ¹⁶Ojjaña joya enijje jjapeequiani Eyacuiñajjiya ba'e tiitii mee caje'yo. Enijje jjapeequiyajo, ¡ojjaña ebajji onaaya oya cuana besa meequivie! Ojjaña joya enijje jjapeequi'yo aija ca ca Eyacuiñajjiya quea nee nee po mee caje'yo, quea mimishi poanajejojo. Jamajjeya Eyacuiñajjiya oya cuanaja mimishi cuanajo quea yeno po mee caje'yo.

¹⁷—Ecuea epeejji cuana eyaya ameeje'yo ma dejjaajjima acani. Oya cuana eyaya quea ca'a nee po meeje'yo, eshahua cuana dejjajo nequi huoojeacuayajea meeje'yo. Pea esohui ojaya cuanaja ba jjima mimi meeje pealai. ¹⁸Peyo se najji ba jjima iña majje mano'yo jjima po meeje'yo eyaya. Ena pase nei nei pase'ama poso ishijea majje, mano'yo jjima po meeje eyaya. Ecuea epeejji neiya emano biajje eme huana majje jiquio quea aja poaje; eyaya jjaajaqui meeje'yo, huaquia meeje'yo pea'ai —Jesosaa o shajja'ajjajji cuana huohui canaje.

Jesosa jjequisohua ca'yonaje eyahuasijke (Noca 24.50-53)

¹⁹Majoya Emeshi Mese nei Jesosa pea cuana nijje mimiajo, oja Chiiya, Eyacuiñajjiya jjequisohua ca'yonaje eyahuasijke. Jomajo oya Jesosa anioquenaje oja Chii ebianei mijijje onijje ojjaña huoojea'yojjijo epojji.

²⁰Majoya o shajja'ajjajji cuaa Jesosaja esohui huohuiqui canaje ojjaña cuana huasijje. Ojaya esohui jayojja jama Emeshi Mese nei Jesosaa oya cuana ameesahua canaje ma dejjaajjima acani ojjañaebajji ojaya esohui cuana e'e nei nei. Jamaya ojjaña ba mee canaje Jesosaa oya cuana huoojea canaje ojaya esohui huohuiya.

Jesosaa eya Macoso bajjani jiquio esohui tehue mee canaje. Mahuiso. Apoa.

NOCAA TEHUE CANAJE ESOHUI QUEA BAME NEE JESOSA QUITOJA

LUCAS

1 ¹Eyaya mi que tehuename Teopino achajja Jesosa ebajji. Quea dejja huisohua Jesosaja ehuohui'yo cuanajo tehue sa aca cua, huohui mee sa aca cua pe'a'i.
²Ojaya epeejji cuaa, ojaya esohui huohuijji cuaa, Jesosa ba neinei ca cua. Ohuaya ecuanaya huohui neinei ca cua. ³Jamajjeya eyaya catehue'yahua onaa huohui ca'yoqui Jesosajo. Jjeya eyaya mi que tehuename, Teopino. Jiquio esohui e'e jojo nei Jesosajo. Eyaya shajja'ajja neineinaje onaa huohui ca'yoqui Jesosajo. Majoya jjashahuaba neineiquinaje jiquio etehuejji, jamajjeya e'e jojo nei jiquio esohui.
⁴Tehuenaje eyaya miquea Jesosa eba neineiji. Mi jjashahuaba neineiquijji eyaya tehuename, de. Jamajjeya ¡ba neineicue jiquio esohui ecue tehue'yo!

**Oe esohuidojoriji Sacania huohui ca cua bacuajji
cuajo, Huani ona besameejji epoiji cuaje**

⁵Yahuajo pishana Jodioja emeshi mese nequia cua. Yohua bajjani cua ba'a: Enode. Ma eshequiajajo tiiya aje ba'ya cua Eyacuiñajji nijje mimiani yohua bajjani ba'a: Sacania. Oya chacochacoania cua Eyacuiñajji nijje emimijji cuana nijje, ma dejja yohua bajjani nijje ba'a: Abiase dejja cuana nijje. Oya cuana Eyacuiñajji nijje mimiania cua. Sacaniaja ehuanase yohua bajjani cua ba'a: Isameni. Isamenija etiiquiana cuana Eyacuiñajji nijje mimiani pe'a'i cua. Anoni dejja bajjani cua. ⁶Sacania Eyacuiñajji epeejji nei nei cua, oja huanase o jayojja nei neiya cua. Oya cuaa shajja'ajja neinei ca cua Eyacuiñajji esohui. ⁷Jamatii bacuama' cua; ojaya ehuanase jjamejoqui ajja neinei cua. Ehuanase epona tii cua; oya edejja tii pe'a'i cua.

⁸⁻⁹Pea pojajao Sacania jjachichaquia cua Eyacuiñajji nijje emimijji cuana nijje. Pea cuaa oya jama aca cua ba'a: —Sacania, ¡jjeya jiquio pojajao Eyacuiñajji nijje mimicue! ¡Jjeyahua nei mee nei dobiqusicue Eyacuiñajji

equi yasijke, equi quecuayiji sisi yasijke! ¡Dobiqui majje acui shaa dahua huichachajeacue huichacha shiye epoji! ¡Ma ojjaña aca cua jayojjaya oe acue!

Dobiqui majje Sacaniam jamaya aca cua Eyacuiñajji equijo nequia.

¹⁰Beca cuana aje oe esecuejo nequia cua Eyacuiñajji nijje emimijji pe'a'iya.

¹¹Sacaniam aje oe acui shaa quea shiye dahua huichachajea canequia cua acui shaa edahuajeajji biajje iya ani. Majoya aje oe Eyacuiñajji esohuidojiji jjanequija'aquia cua, edahuajeajji ebañe miijije nequia cua. ¹²Sacaniam esohuidojiji ba majje piropio neinei'ya cua esohuidojiji ba po jjima jjejojoya.

¹³Majoya aje oe esohuidojijiya jama aca cua ba'a: —Sacaniam, ja'a piopiojji! Miya Eyacuiñajji nijje mimi majamajanaje ebacua yajjijo. Jamajjeya miya Eyacuiñajjiya shajja'ajja canaje miquea esohui ebacua yajjijo. Miquea ehuanase aje oe jjamejoojije. Majoya jebacua cuayajo Huani bajjani acue! ¹⁴Miya o cuayajo quea bihui nee nee cuaje. Pea dejja cuanaya quea bihui nee nee cuaje ebacua cuayajo. ¹⁵Oya Eyacuiñajji epeejji nei nei cuaje, jamajjeya miquianaya quea bihui nee cuaje. Oya acuijjajja na sese ishi ajja cuaje, ecahuishi ishi ajja pea'ai cuaje. Edojoshahua Bameya jaahuana caje'yo oya cuayajo. ¹⁶Ohuaya Eyacuiñajjiya esohui huohui bame bame caje. Jamajjeya quea huiso Jodio cuaa shajja'ajja caje Eyacuiñajjiya esohui. Ohuaya jjapeequi mee caje'yo quea huiso Jodio dejja cuana Eyacuiñajji nijje. ¹⁷Huaniya ebionei esohui huohui caje, majoya aje Quitohua, Eyacuiñajjiya huoojea'yohua esohui huohui caje. Huani Enia jayojja cuaje. Enia ma etiiquiana cua; Eyacuiñajjiya esohui huohuijji nei nei cua. Huani Eyacuiñajjiya esohui huohui po nequije. Shajjama' cuana ohuaya sohuihuohui caje. Majoya shajjama' cuaa ojaya esohui shajja'ajja caje; jjapeequije Eyacuiñajji nijje. Ojaya esohui shajja'ajja majje Quitoja esohui shajja'ajja sa acace.

¹⁸Sacaniam huohui'ajja ca cua esohuidojiji jama ba'a: —De, ¿achajja acuae po cajji so'o? Oya ca iña edejja tii nojinoji aña, ecuea ehuanase epona tii pea'ai.

¹⁹Esohuidojijiya jama tecueame aca cua ba'a: —Eya bajjani Jamieni, eya Eyacuiñajjiya esohuidojiji nei nei cueyanaje. Ohuaya eya huoojea canaje minijje mimiya. Ecuea esohui quea bame miyaya shajja'ajjanaje.

²⁰Miya jjashajja'ajjaqui ajja cuanaje, jamajjeya miya mimi ajja cuaje. Huani cuayajo ca mi ca oe mimije'yo. Ma ecua miya eyaya huohuinaje jayojjaya cuaje miya —jamaya cua esohuidojiji.

Majoya aje Sacaniam mimi ajja po mee ca'ya cua.

²¹Pea cuaa esecuejo nequia ishoa'ajja ca nequia cua Sacaniam. Jams huohui'ajjame aca cua ba'a: —¿Yajjajje shai Sacaniam eyiyedojjo tii nequi?

²²Majoya Sacaniam esecue yasijke cuaya'yo majje mimi'yo ajja cua. Eme nei ca ca oe huo canequia cua Sacaniam. Sohuimajojo jama aca cuaa cua ba'a: —Ohuaya pojja'a ba canaje esohuidojiji nei eyiyedojjo nequi, de.

²³Sacaniam Eyacuiñajjiya equijo chacojeyo majje poquia cua oja equi yasijke.

²⁴Quijje pishana Sacaniam ehuanase bacua jea ca cua, o'eiji po majje. Isameni me oeje ba'ime cuayaqui'yo jjima; ania cua oja equijo tii. Oya jjashahuabaquia

cua jama ba'a: ²⁵—Eyacuiñajjiya eya jjamejoqui meesahua canaje quea bihui epoiji. Jjeya pea cuana mimijaji'yo ajja e bacuajjiyo —jamaya Isameni cua.

Esohuidojijiya Mania huohui ca cua quijje ojaya ebacua ecuayajjiyo

²⁶⁻²⁷ Janinea meshijo oe epona ahuema'anis cua, Mania bajjani. Oya Nasanena cuiñajjiyo ania cua. Isameni Maniaja enene mese cua. Isameni me oejje oe ba'ime o'ejji anijo Eyacuiñajjiya ma esohuidojiji huoojea ca o'oya cua Mania que. Mania jjahuiaqui jjima cua; dejja ba po jjima ania cua. Oya ca jjahuiaqui sa cua dejja yohua bajjaniyo ba'a: Josejo. Joseja baba etiiquiana yohua bajjani cua ba'a: Dabi. Dabi Jodio dejjaja emeshi mese yahuajo nei nei cua. ²⁸ Esohuidojiji dobiquia cua Maniaja equi yasijje. Jama mimime cua onijje ba'a: —Mania, yani eya. Eya Eyacuiñajjiya huoojea canaje mi que mimiya. Miya ca ca oe ohuaya bacaca canaje ejjamejoquijji. Eyacuiñajji miquea Emeshi Mese nei, miya ohuaya jaahuana cani —jamaya cua esohuidojiji.

²⁹ Mania quea mete cuanaje esohuidojijiya esohuijo. Majoya oya jama jjashahuabaquime cua ba'a: —¿Apiojji shai oya jama mimime cuani enijje?

³⁰ Esohuidojijiya jama aca cua ba'a: —Mania, ¡a'a quea mete pojji! Eyacuiñajjiya miya quea jea nee acani. ³¹ Jjeyahua nei miya o'ejji anije, ebacuaje dejja cuaje. ¡Yohua bajjani acue ba'a: Jesosa! ³²⁻³³ Oya quea bame nee nee ba'leje. Pea cuua bajjani caje Eyacuiñajjiya Bacua Ejja nei oya. Eyacuiñajjiya oya po mee caje'yo ojjañaja Emeshi Mese nei epoiji; Dabi emeshi mese jayojja oya cuaje. Jodio dejjaja Emeshi Mese po tiitije'yo —jamaya cua esohuidojiji. ³⁴ Maniaa esohuidojiji huohui'ajja ca cua jama ba'a: —¿Achajja jjamejoquime acuae po cajji so'o, ca dejja ba po jjima?

³⁵ Esohuidojijiya jama aca cua ba'a: —Edojjosahua Bame nei mi que cueje. Bo jayojja mi que anioqueje. Eyacuiñajjiya miquea ebacua ba'le mee caje. Jamajjeya miquea ebacua quea bame nee nee cuayaje oya Eyacuiñajjiya Bacua jjejojo. ³⁶ Ecuea esohui e'e jojo nei, mique nene Isameni esho'yahua bacuama' tii cua. Jjeya ca ca oe jjamejoquinaje. Me oejje oe ba'ime ejjamejoqui ani. Jamajjeya ecuea esohui e'e jojo cuanaje. ³⁷ E'e, Eyacuiñajjiya camaja'ama po mee caje'yo ojjaña —jamaya esohuidojiji cua.

³⁸ Jamajjeya Mania jama cua ba'a: —Eya Eyacuiñajji nijje jjapee neineiqui sa cuani. Miquea esohui jayojja jama ca'a cahua Eyacuiñajjiya —jamaya cuanaje Mania.

Majoya esohuidojiji poqui'yonaje.

Mania poquia cua e'a'i meseja equi yasijje anicuua

³⁹ Quijje pishana Mania poquia cua e'a'i meseja equi yasijje, Isamenija equi yasijje. Jodea meshi bajjani yasijje poquicuinaje, eyiyojo ba'eca huasijje. ⁴⁰ Isamenija equi yasijje dobiqui majje Mania jama cua ba'a: —Eya mi que cueyanaje anicuua.

⁴¹O mimiajo Isamenija bacua teejo ba'e moquiquia cua. Isameni quea bihui cua; Edojjoshahua Bameya mimi mee ca cua. ⁴²Jamajjeya Isameni jjanobajjima nei mimia cua Mania nijje jama ba'a: —Mania, miya Eyacuiñajjija quea jea nee nee pea epona jayojja jama pojjeama. Jamajjeya miquea ebacua teejo ba'e ojaya quea jea nee nee pea'aiya. ⁴³E'e, miya cueyanaje e que anicuua, jamajjeya eya quea bihui nee cuani miya Eyacuiñajjija Bacua ba'e meejojo. ⁴⁴Mi ecue equi yasijke dobiajo ecuea ebacua moququinaje teejo ba'e. ⁴⁵E'e, miyaya Eyacuiñajjija esohui shajja'ajja neineinaje, jamajjeya jamaya acaje'yo —jama mimimeya Isameni cua.

⁴⁶Majoya aje Mania jama mimime cua ba'a: —Jjeya eya quea bihui nee nee Eyacuiñajji nijje. ⁴⁷Eyacuiñajji ecuea Emeshi Mese nei cuani. Ohuaya ecuea mimishi cuijea ca'yonaje. ⁴⁸Jamatii eya epona, ahuema'ani. Eya ba'e sa cuani Eyacuiñajjija yajjijo. ¿Yajjajo shai Eyacuiñajjija eya bacaca canaje? Matatii ojjaña cuana aje oe mimi tiitije'yo ejo jama ba'a: "Mania quea bihui nee nee. Eyacuiñajji oya bacaca canaje". ⁴⁹Eyacuiñajji quea ca'a nee nee. Jamajjeya eya ohuaya quea bame acanaje. Oya mimishi'ama nei nei, quea bame nee nee ba'e. ⁵⁰Eyacuiñajjija ojaya epeejji cuana jaahuana cani. E'e, ojjaña joya onijje jjapeequiani Eyacuiñajjija jaahuana cani etiiquiana yahuajo nei ba'yia cua, esho'lquiana jjeya nei ba'yani pea'ai. ⁵¹⁻⁵²Beca cuana onijje jjapeequi jjima ohuaya ca'a'ama po mee ca'yani. Dejja mimishi cuana ca'a'ama po mee ca'yani, emeshi mese mimishi cuana ohuaya ca'a'ama po mee ca'yani. Ojaya epeejji ca ca oe ohuaya quea ca'a po mee ca'yani. ⁵³Ojjaña cuana oja esohuijo jjashajja'ajjaqui sa cuanijo ohuaya jjashajja'ajjaqui mee caje'yo. Beca cuana ca ca oja esohuijo jjashajja'ajjaqui sa po ajjajo ohuaya jjashajja'ajjaqui mee jjima acaje'yo; jeajea caje'yo cuaqui yasijke jjashajja'ajjaqui sa po ajjajojo. ⁵⁴Eyacuiñajjija Jodio dejja cuana jaahuana caje. Jamajjeya ohuaya oja Bacua Ejja huoojea caje Jodio dejja jaahuanaajji epoji. Ohuaya pajea'yo jjima acaje'yo. ⁵⁵Jamaya ohuaya esejaya etiiquiana Amajama jaahuana ca cua. Oja bacua cuana pea'ai jaahuana ca cua. Oja osecua cuana jaahuana tiitii ca cua. Jjeya nei ohuaya eseaya jaahuana cani pea'ai —jama bihuiameya Maniaa Eyacuiñajji aca cua.

⁵⁶Majoya Mania pea beca peejjima ba'ime ania cua oja nene nijje. Majoya aje Mania poqui'ya cua oja equi yasijke.

Huani cuaya cua ona besameejji epoji

⁵⁷Quijje Isamenija bacua cuaya cua; yahue cua. ⁵⁸Ojaya huapa pojjeama cuana cueya cua oja bacua baa. Ojjaña Eyacuiñajji nijje quea bihui cua Isamenija ebacua cuayajo. ⁵⁹Me oeje pea beca peejjima cahuime po majje ojjaña cue o'oya cua ebacua bajjani; oja cuiishasha jehuisejjajeeaa pea'ai. Ojjaña bajjani sa aca cua ejeeajjija bajjani. ⁶⁰Isameniya ca jama aca cua ba'a: —Chojja, ¡yohua bajjani oe acue ba'a: Huani!

⁶¹Pea cuaa jama aca cua ba'a: —¿Apiojji acuaeaya ma bajjani aje? Chama' aje jja che pea bajjani Huani.

⁶²Jamajjeya aje jja oe ojjañaa Sacania huohui'ajja ca cua: —¿Ae bajjani acuae jja cuaje so'o?

⁶³Majoya Sacaniasa mimi ajja jjejojo jama tehueme aca cua ba'a: —¡Huani bajjani oe acue!

Ojjaña jama cua ba'a: —E'e, ¿apiojji shai?

⁶⁴Majoya aje Sacania mimi mee ca o'oya cua Eyacuiñajjiya. Jamajjeya ohuaya Eyacuiñajji bihui ca o'oya cua. ⁶⁵Ojjaña cuana ca jja ca jama cua ba'a: —De, Sacania mimil'ya, de.

Majoya ojjaña cuana poquia cua huohui pohua, ojjaña eyiyojo ba'eca cuana huohuiya. ⁶⁶Ojjaña shajja'ajja majje huohui'ajja ca cua jama ba'a: —Eyacuiñajjiya jaahuana cani Sacaniaja bacua, Huani. Oya quea ca'a nee cuaje; Eyacuiñajjiya quea bame nee ba'e meesahua caje Huani.

Sacania sohuicuaya cua

⁶⁷Sacania Edojjoshahua Bameya sohuicuaya mee ca cua. Jama sohuicuayame po mee ca cua ba'a: ⁶⁸—Eseyaya oe Eyacuiñajji ejjabihuaqui, ojjañaa. Oya esejaya Emeshi Mese nei, Jodio dejjaja Emeshi Mese nei, de. Ohuaya esejaya mimishi cuana cuijea ca'yani. ⁶⁹Ohuaya Quito huoojea caje ese que. Ma ehuoojea'yo Quito quea sohui poja nee nee cuaje'yo. Quitohua eseya quea ca'a po mee caje'yo. Ojaya etiiquiana Dabi emeshi mese cua yahuajo nei iye ca'a ca'a cua, Quito ca ca oe ojjañaja Emeshi Mese cuaje ese jaahuanajji. ⁷⁰Jamaya yahuajo tehue ca cua Eyacuiñajjiya esohui huohuijji cuua. Tehue majamaja ca cua Quitojo. ⁷¹Jama tehueme aca cua ba'a:

“Yani dejja cuana ecuana nijje mimijaji neineiani. Ecuana boti'ama cuani, cuijajea sa acani. Jamajjeya aje oe ecuanaya Eyacuiñajjiya jaahuana cani”. Jamaya esohui etehue'yo cuana cua.

⁷²⁻⁷³—Eyacuiñajji yahuajo mimia cua ecuanaja etiiquiana nijje, Amajama nijje jama ba'a: “Eyaya Quito huoojeaje'yo miquiana ojjaña jaahuanajji”. Jamaya aca cua ohuaya ojaya epajea'yojji pojjeamajojo.

⁷⁴⁻⁷⁵—Jamajjeya eseyaya Eyacuiñajji ejjabihuaqui; Quitohua dejja mimishi cuanajo mete'ama po mee cani. Eseyaya jaahuana caje'yo. Quea bame ba'e mee caje'yo mimishi'ama epo'yojji —jama sohuicuayameya Sacania cua.

⁷⁶Majoya Sacaniasa oja bacua jama aca cua ba'a: —Miya ecue bacua oe nei. Miya Eyacuiñajjiya esohui huohuijji cuaje'yo. Ohuaya miya huoojea caje ebionei. Huohuicue jama ba'a: “¡Oya shajja'ajjacue! Oya Quito, Eyacuiñajjiya huoojea'yo ojjaña jaahuanajji cueje”. ⁷⁷Huani, miyaya ojjaña cuana huohuicue jiquio esohui jama ba'a: “Eyacuiñajjiya ojjaña cuanaja mimishi cuijea caje'yo onijje jjapeequianija”. ⁷⁸Jamaya eseyaya Eyacuiñajjiya quea jea nee nee acaje'yo. ⁷⁹Jamajjeya ecuana mete'ama cuaje onijje jjapeequi majje. Poquije eyahuasijje onijje eba'e tiitiil'yojji. Ohuaya eseyaya quea bihui po mee caje'yo —jamaya Sacania cua.

⁸⁰Majoya ebacua tii majje quea ca'a nee nee cua; Eyacuiñajiji epeejji nei nei cua. Oya oe nei ba'ya cua quimajo. Majo tiiya aje Huaniya esohui huohui ca cua Jodio dejja cuana huasijje.

Jesosa cuayanaje
(Mateo 1.18-25)

2 ¹Huani cuaya cua shejo emeshi mese yohua bajjani cua ba'a: Agosto Sesa. Emeshi meseya echacojji cuana huohui ca cua jama ba'a:
—¡Sicoquicue ecue meshijo ba'e cuana! ¿Ache huiso ba'ajja'yo socue?
¡Huohuicue ojjaña dejja cuana jama ba'a: “¡Poquicue mi cuayacula meshi yasijke mique bajjani tehueya; jamaya emeshi mese cuanaje!” acue!
—jamaya Sesaa aca cua.

²Emeshi meseya Sesaa jama sico coome aca cua. Ma shejo tiiya pea emeshi mese Sineño bajjani cua; ojaya meshi Sania bajjani cua.

³Jamajjeya aje oe ojjaña poquia cua o cuaya cua meshi yasijke.

⁴⁻⁵Jose, Maniaja ejajiba cua. Jose Nasanenajo ba'eja jajiba cua, Janinea meshijo. Oja etiiquiana Dabi cua, yahuajo Dabi ba'ya cua Benenajo, Jodea meshijo. Jamajjeya Jose poquia cua Benena huasijje emeshi meseja esohuijo oja bajjani tehue meeya. Jose, oja shiye nijje poquia cua. Quea huesha poquia cua. Mania ebacua cuayaje'yo pana nei poquia cua.

⁶Majoya aje Benena bañaqui majje Maniaja bacua cuayañaquinaje. ⁷Quea dejja huiso ania cua Benenajo jjababajani tehue meequiya poqui. Jamajjeya chama' equi ejaachichajji cua. Jamajjeya aje oja bacua cuaya cua ana'ai jaajji equijo. Ojaya ebacua cojjasobo cuaya cua jomajo. Cuayajo ohuaya bebo ca cua daqui oshejo.

Ñajjajja jaahuanajji cuaa esohuidojiji ba ca cua

⁸Ma mecajje aje Benenajo chipi nei pishana ñajjajja jaahuanajji cuana ñajjajja cuiña po aña cua. ⁹Majoya aje esohuidojiji jjaja'aquia cua. Majoya aje oe o chipi nei jeajahuajahua ca cua esohuidojijiya. Mete neinei'ya cua ñajjajja jaahuanajji cuana. ¹⁰Esohuidojiji jama cua ba'a: —¡A'a quea mete pojji! Eyaya esohui quea bame nee huohuiaña ojjaña dejja cuana quea bihui nee po meeji. ¹¹Jjeya nei cuayanaje oe ebacua Dabija meshijo. Ma ebacua Eyacuiñajiji huooje'yo. Ohuaya miquianajaya mimishi cuijea caje'yo; yohua bajjani cuaje ba'a: Quito. ¹²¡Miquianaya poquicue ebacua baa Benena huasijje! Jomajo aje ana'ai jaajji equijo ebebo jaa oja nae nijjeya, oja chii Jose nijjeya pea'ai —jamaya cua esohuidojiji.

¹³Majoya aje quea huiso esohuidojiji cuana jjaja'aquia cua. Sohuicuayanaje ojjaña esohuidojiji cuana Eyacuiñajji bihuiajji. Jama sohuicuayame cua ba'a:

¹⁴“Eyacuiñajji quea ca'a nee nee. Eyajo ba'e, quea ao nee nee.

Eyacuiñajjiya ojjaña ojaya epeejji cuana ojjaña meshijo ba'e quea bihui po mee caje”.

¹⁵Majoya esohuidojojji ba'esohuaqui'ya cua eyahuasijje. Ñajjajja jaahuanajji cuana jama mimime cua ba'a: —De, cue'ajja Benena huasijje. Ma esohuidojojjiya huohui canaje jayojjaya aje seya aje.

¹⁶Majoya poqui cuajicuajia cua ebacua sa'ajja. Majoya ana'ai jaajji equijo jaa ba cañaquia cua ebacua, Mania, Jose pea'ai. ¹⁷Majoya ba majje huohui'ajja cañaquia cua esohuidojojjiya esohuijo ebacuajo. Pea cuana huasijje huohui ca cua pea'ai. ¹⁸Beca cuana shajjal'ajja majje jjashahuabaquia cua ñajjajja jaahuanajji cuanaja esohuijo. Quea bame cua. ¹⁹Mania jjashahuabaquia cua pea'ai. Pajeal'yo jjima aca cua ñajjajja jaahuanajji cuaa huohui canaje esohui. ²⁰Majoya ñajjajja jaahuanajji cuana poqui'ya cua ñajjajja jaahuana'yohua. Poquije'yohua Eyacuiñajji bihuia nei nei ca poqui'ya cua. Esohui quea huiso sohuicuaya cua: —Esohuidojojjiya esohui e'e jojo nei —cuanaje.

Ebacua Jesosa dojodobia cooqui ca cua Eyacuiñajjiya equi yasijje

²¹Me oeje pea beca peejjima cahuime cuajo Jesosaja naeya oja chiiya pea'ai bajjani canaje Jesosa. Ma esohuidojojjiya esohui jayojja Mania jjamejoqui jjimahuajo bajjani ca cua. Jesosaja cuiishasha jehuisejjajea ca cua pea'ai, ojjaña Jodioja ebacua jayojjaya jama aca cua.

²²Ba'i oe cuajo Maniaa Joseya pea'ai Jesosa dojo ca cua Eyacuiñajjiya equi yasijje Jenosanena huasijje. Maniaa Eyacuiñajjiya equi yasijje dobiqui jjimahuua Moisesija etehue'yo jayojja aca cua. Majoya Jesosa dojodobiaqui canaje Eyacuiñajjiya equi yasijje huohuiya. ²³Jamaya aca cua Moisesija etehue'yo ba'a:

“¡Ebacua cojjasobo dejja huohuicue Eyacuiñajji yasijje! ²⁴¡Becanejjiji pe'a'i huia' quiacue Eyacuiñajji nijje mimiani yasijje equiyo jeyojeyo'yojji cuaque pohui pojji epo'yojji! Jamaya miya ajo Eyacuiñajjiya mimishi cuijea caje'yo. ¡Jamaya Eyacuiñajji sosequiajji acue!”

Jamaya Moisesija etehue'yo cua.

²⁵Oe Jodio etii Simeoni bajjani Jenosanenajo ba'ya cua. Oya Eyacuiñajjiya epeejji nei quea bame nee nee cua. Ohuaya Quito ishoa'ajja ca ania cua Eyacuiñajjiya huoojea'yo ojjaña jaahuanajji. Jamatii jjashahuabaquiani Eyacuiñajjiyo, jamajjeya Edojjoshahua Bame ojo nequia cua. ²⁶Jamaya Edojjoshahua Bame onijke cua ba'a: —Miya emano'yojji pojjeama Eyacuiñajjiya huoojea'yo cue jjimahuajo.

²⁷Jamajjeya Edojjoshahua Bameya Simeoni poqui mee ca cua Eyacuiñajjiya equi yasijje. Simeoniya Jose, Mania Jesosa bishamijji nequi ba ca cua Eyacuiñajjiya equijo. ²⁸Simeoniya ebacua Jesosa aña majje ba ca cua. Eyacuiñajji bihuia ca cua Jesosa ohua ba mee cajje. Jama cua ba'a: ²⁹⁻³⁰—E'e de, jjeya nei Eyacuiñajjiya huoojea canaje ma ohua huoojeapana ca cua; jamajjeya ohuaya eya ba mee canaje. Jjeya eya poquije'yo Eyacuiñajji yasijje quea jaji nee eba'e titii'yojji. ³¹Ojjaña meshijo ba'e cuaa Jesosa ba caje, Eyacuiñajjiya huoojea'yo ojjaña mimishi cuijea'yojji. ³²Jesosaa ojjaña dejja cuana quea jjashahuabaqu

ja'a nee po mee caje'yo Eyacuiñajjija esohuijo. Jesosa Emeshi Mese nei epojjijojo, Jodio dejja cuana queabihui cuaje'yo —jamaya Simeoni cuanaje.

³³Majoya Jesosaja chii, enaese pea'ai jjashahuabaquia cua Simeonija esohuijo jama ba'a: —E'e de, Simeonija esohui quea bame nee nee Jesosajo.

³⁴Majoya aje Simeoniya Mania, Jose pea'ai jama aca cua ba'a:
—Miquianaya aje Eyacuiñajjija quea bame acaje'yo. Mique bacua quea ca'a po mee caje. Jaahuana caje'yo. Mania, miya Jesosaja enaese. Mique bacuua Jodio cuana jjashahuubaqui mee caje'yo Eyacuiñajjijo quea huiso nee. Beca dejja cuana jjapeequije'yo Eyacuiñajji nijje. Beca cuaa cajaa acaje, jjapeequi sa po ajja Eyacuiñajji nijje. ³⁵Mimijajje Jesosa nijje cuana. Oya quecuu caje'yo cuaa. Majoya aje oe miquianaya quea yeno cuaje ma cuanajoya —jamaya Simeoni cuanaje.

³⁶Jomajo oe epona tii ania cua; Ana bajjani. Eyacuiñajjija epeejji nei nei cua; Panoaneja bacua piona. Ojaya huapa pojjeama Asene bajjani cua. Yahuajo oya jjahuiquia cua. Oja yahue nijje ba'ya cua me oejje beca, 7 shequajame. Majoya aje ojaya yahue mano'ya cua. ³⁷Jamajjeya quea huiso nee nee shequajame, 84 shequajame ania cua. Etii nojinoji nei e'ahuemano'yo ania cua. Eyacuiñajjija equipo jjeuya ani, cuayaqui ajja neinei ania cua. Jamatii mimiania cua Eyacuiñajji nijje, bihuiabihuia tiitiiania cua ojjaña pojajo.

³⁸Anaa ba ca cua Jesosa. Quea bihui nee cua. Jamajje dejja cuana nijje mimia cua joya Eyacuiñajjija huoojea'yo ishoa'ajja po ani nijje jama ba'a: —¡E'e ee bacue jiquio ebacua, Jesosa Quito cuayanaje! Ohuaya quea bei ba'e mee caje'yo Jodio cuana. Ojjaña cuanaja Emeshi Mese nei cuaje'yo —jamaya Anaa aca cua cuana.

Jose poqui o'oya cua oja meshi yasijke Nasanena huasijke

³⁹Ojjaña Moisesija etehue'yo acua ajeyo'yo majje Jose oja huanase nijje, Jesosa pea'ai nijje poquia cua. Ma o ebionei ba'ya cua meshi yasijke poqui o'oya cua, Nasanena huasijke. ⁴⁰Jomajo Jesosa tiia cua; quea ca'a nee nee, quea jjashahuubaqui ja'a nee cuanaje. Eyacuiñajjija oya jaahuana ca cua; quea bei nee nee ojo cua.

Jesosa etii shacuima' nequi epo oja naeya oja chiiya pea'ai dojo ca cua Eyacuiñajjija equi yasijke

⁴¹Jesosaja chii oja nae nijje poqui nequia cua Jenosanena huasijke peo Jodio cuana nijje ojjaña shequajajo. Pascua pohua poquia cua Eyacuiñajji bihuiaa. Yahuajo nei Jodio etiiquinanaja bacua cuana esohuidojijiya cui'a'yo jjima aca cua shejo poquia cua ojjaña nijje ijja'lijjia. ⁴²Jesosa etii shacuima' nequi po majje, 12 shequajame po majje poqui pea'ayi cua. ⁴³Oe semana Jenosanenajo aniya ojjaña cuaa Eyacuiñajji bihuiia ca ania cua. Majoya Pascua jjayejequiajo ojjaña cuana poqui calya cua. Jesosa ca ca poqui'yo jjima cua. Jamatii ojaya enaeseja ba'yo jjima

cua, oja chija pea'ai. Jesosa pea cuana nijje pojebeyani poso aca cua. ⁴⁴Majoya aje oe cahuime cuajo Jesosaja enaeseya niñeba ca'ya cua: —¿Aecue jiquio Jesosa so'o?

⁴⁵—Chama' ca ca Jesosa. ¿Achacua shai poquinaje? —jamaya pea cuana cua.

Majoya aje huacuaya poqui o'oya cua Jenosanena huasijke Jesosa sa'ajja'yohua. ⁴⁶Majoya pea beca peejjima cahuime epo ba ca'ya cua Jesosa Eyacuiñajjija equijo nequi. Jesosaa Eyacuiñajjija esohui huohujji cuequi tii cuana huohui'ajja ca ania cua; Jesosa jjashajja'ajjaqui ania cua pea'ai. ⁴⁷Ojjaña jjashahuaba neinequinaje Jesosaja esohuijo: —E'e de, Jesosa quea ja'a nee nee jjashahuabaquiani, de —pea cuana cua.

⁴⁸Joseya Maniaa pea'ai Jesosa ba majje mimia ca cua jama ba'a: —¿A'a mi quioya Jesosa? ¿A'ya acuae mi po nequinaje so'o? Ecuanajaya miya ba'yo jjima nei nei cuanaje. Jamajjeya eya mijo quea yeno nee nee cuanaje, Jesosa. Jamajjeya ecuanaya sa'ajjasa'ajja'yoquinaje.

⁴⁹Jesosaa jama aca cua ba'a: —¿Apiojji acuae iña sa'ajja'yaña so'o? ¿A'a miquea ba jjima eya ecue Chija equijo enequijji, Eyacuiñajjija equijo?

⁵⁰Jose Mania pea'ai oja esohuijo jjabahuejjaqui jjima cua yajja cuani poso aca cua.

⁵¹Majoya aje Jesosa oja chii nijje oja nae nijje Nasanena huasijke poqui o'oya cua, ma o ba'e yasijke. Jamatii Jesosaa shajja'ajja ca cua Jose, Mania pea'ai. Quea bihui ba'ya cua. Mania jjashahuabaquia cua Jesosaja esohuijo; pajea'yo jjima aca cua. ⁵²Jesosa tiiya cua quea ca'a nee nee; quea ja'a nee nee cua. Eyacuiñajji quea bihui nee cua Jesosajo; dejja cuana quea bihui cua pea'ai.

Huaniya Eyacuiñajjija esohui huohui ca cua (Mateo 3.1-12; Macoso 1.1-8; Huani 1.19-28)

3 ¹Quijje nei mahuiso emeshi mese cuana cua ba'a: Shomano dejja cuanaja emeshi mese Timeneo bajjani. Quea huiso shequijame, 15 shequijame nequijo Jodea meshija emeshi mese Ponisio Pinato bajjani nequinaje. Janinea meshija emeshi mese Enode bajjani cua. Oja doe etii Penipe bajjani cua. Oya Itoneaja emeshi mese cua, Taconiteja emeshi mese pea'ai cua. Amininaja emeshi mese Nisania bajjani cua. ²Eyacuiñajji nijje mimiani etii Anasi bajjani cua. Pea ca Caipa bajjani cua.

Jiquio emeshi mese cuana nequijo tiiya aje Huani Sacaniaja bacua ejja nequia cua meshi quimajo. Onijje mimi majje Eyacuiñajjiya Huani huoojea ca cua esohui huohujji epojji. ³Jamajjeya Huani po'ayequie nequia cua Eyacuiñajjija esohui huohuiya Jodana cueijje. Ohuaya pea cuana jama huohuime aca cua ba'a: —¡Jjashahuabaquicue Eyacuiñajjiyo; miquea mimishi pajea'yoque! ¡Miquea mimishijo quea yeno pocue! ¡A'a mimishi maja sa po'yojji! Miya mimishi pajea'yajo, aje Eyacuiñajjiya miquea mimishi cuijea caje'yo. Eyaya miya besa meeje enajje pea cuanaja ebajji miya Eyacuiñajjija epeejji nei nei cuanijo.

⁴Jamaya Isaiaa yahuajo nei Huanijo tehue ca cua. Isaia Eyacuiñajjija epeejji, esohui huohuijji cua. Oya etiiquiana nei nei cua. Jama tehuemeya aje yahuajo aca cua ba'a:

“Oe dejja quimajo nequi taaani jama ba'a: ¡Acua pocue!

¡Jashajja'ajjaquicue Eyacuiñajjija huoojea'yo ojjaña jaahuanajjijo!

⁵ Eyacuiñajjija dejja quea mimishi cuana jeajea caje cuaqi yasijje jjashajja'ajjaqui ajjajojo. Ojjaña joya Eyacuiñajjija esohui ojaya ehuoojea'yo ojjaña jaahuanajjijo shajja'ajja cani ca ca quea bame nee cuaje'yo. Joya ecua ejiojji quea bame aca yani jama jayojja dejja cuana quea bame acaje'yo. ⁶Ojjaña meshijo nequica dejja shajja'ajja caje Eyacuiñajjija esohui. Joya onijje jjapeequije Eyacuiñajjija mimishi cuijea caje'yo”.

Jamaya cua Isaiaja etehue'yo Huanijo.

⁷Majoya dejja quea huiso cueya cua Huani que mimishi pajea'yohua nisho, oja besa mee yohua nisho pe'a yi. Jamajjeya aje Huaniya jama tecueame aca cua ba'a: —Miquianaya quea tai cuani. Peyo jayojja cuani. Miquianaaya ca jja ca mimishi pajea nisho'yaña. Miquianaya jjashahuaba taiquian jama ba'a: “Eyacuiñajjija eya jeajea jjima acaje cuaqi yasijje Huanija enajje ebesa meejojo”. Jamatii miquianajaya ca jja ca oe mimishi pajea'yo jjima nei nei. ¡Ebionei oe shajja'ajjacue Eyacuiñajjija esohui; majoya miquianajaya mimishi pajea neinei'yocue! Majoya oe enajje eyaya besa meeje'yo Eyacuiñajjija epeejji nei epoji. ⁸Miquianaya Eyacuiñajjija epeejji nei ba'yanijo, mimishi epo beca'yoyiji pojjeama. ¡Jama jjashahuabaquimeya oe pocue enajje ebesaqui cuahuajje! A'a mimijji jama ba'a: “Ecua etiiquiana Amajama cua. Oya Eyacuiñajjija epeejji nei cua, jamajjeya aje oe ecuanaya Eyacuiñajjija epeejji pealai cuani”. Cho, miquianaya ca ca jjapeequi jjima Eyacuiñajji nijje. Miquianaya quea mimishi, de. Eyacuiñajji ojaya epeejji quea huiso sa cuani jojjemo Amajama jayojja epoji, ohuaya mei pana came. ⁹Miquianaya joya acui jjajjama' jayojja cuani. Jiquio ecua acui jjajja'yo ajja jajajea ca'yoyiji jayojja jama Eyacuiñajjija dejja mimishi acaje'yo, jeajea caje'yo cuaqi yasijje. Jamaya aje miquianaya acaje'yo mimishi pajea'yo ajjajojo, onijje jjapeequi sa po ajjajojo. Beca cuana ca ca joya acui quea jjajja huiso jayojja cuani. Quea bame nee nee ba'yanji, Eyacuiñajji nijje jjapeequiani jjejojo. Quea bei ba'yanji pea cuana nijje, oya Eyacuiñajjija quea jea nee nee acani jjejojo.

¹⁰ Majoya aje dejja cuaa jama huohui'ajjame aca cua ba'a: —¿Yajja acuae oe po cajji so'o?

¹¹ Huani jama cua ba'a: —¡Joya miquea beca yanijo daqui quiacue daquima' cuana huasijje! ¡Miquea bobo yanijo ca bobima' cuana huasijje quiacue!

¹² Emeshi meseja bejjo chichajji cuani cuaa jama huohui'ajjame aca cua ba'a: —Esohui huohuijji, ¿yajja acuae pajjaja po cajji so'o?

¹³ Huani jama cua ba'a: —A'a quea mimishi pojji! ¡A'a quea sose huiso aiji! ¡Joya emeshi meseja sosehuiso tiiya jjeshecue! —jamaya cua Huani.

¹⁴ Majoya aje sohuinanohua jama huohui'ajjame aca cua ba'a: —¿Yajja acuae ecuanaya cuaje'yo so'o?

Huani jama cua ba'a: —¡A'a miquiaaya dejja cuana iñajji bejjo esijiji! ¡A'a pea cuana nijje siajje pojji bejjo esijiji! ¡Miquianajaya bejjojo nei jjaja oe quea bhui pocue! —jamaya Huaniya sohuinano aca cua.

¹⁵ Dejja cuaa Huani Eyacuiñajija huoojea'yo ojjaña jaahuanajji poso aca cua oja esohui quea bame nee cua jojoya. ¹⁶ Huani ca ca Eyacuiñajija huoojea'yo ojjaña jaahuanajji pojjeama cua. Oya jama cua ba'a: —Eyaya miquianaya enajje besa meeje'yo Eyacuiñajija epeejji jojoya. Eya ca ca Eyacuiñajija huoojea'yo ojjaña jaahuanajji pojjeama. Oya ca ca Quito bajjani quijje pishana cueje. Ohuaya miquiana que Eyacuiñajija Edojjoshahua Bame dobiqui mee caje'yo. Jamajjeya miya quea bame cuaje'yo. Mimishi cuana pajea sa po'yo ajjajo ca ca, jeajea caje'yo cuaquí yasijje. Jamaya Quito oe nei quea ca'a nequi. Eya ca ca iña quea ca'a pishana nequi. Jamajjeya eya ca iña onijje nequi sa po ajja miquiana ani cojja nei. Quea bicho eya, de. ¹⁷ Quito cueje ojaya epeejji nei chicha'yohua. Pea cuana ca ca cajaa ajea caje'yo. E'e, jiquio ecua seya anoso shaa jea majje equi yasijje iya'yaña jama ojaya epeejji cuana acaje'yo Quitohua. Jiquio ecua seya anoso cuiahujo majje shaa jeajeaña jayojja jama Quitohua ojaya epeejji pojjeama cuana jeajea caje'yo cuaquí quijjo'yo ajja huasijje —jamaya Huaniya aca cua.

¹⁸ Huanija pea esohui jama cua ba'a ojjaña cuanajo: —Eyacuiñajiji ojjaña nijje jjapeequi sa cuani, jjeya nei.

¹⁹ Ojaya pea esohui jama cua ba'a: —Esejaya emeshi mese, Enode bajjani quea mimishi nee nee cuanaje. Oja chahuaja, Penipeja huanase sii canaje oja huanase epo'yoji. Ma epona Enodiasi bajjani cuanaje —jamaya cua Huani.

²⁰ Jamajjeya Enode ma esohui shajja'ajja majje quea quene nee nee cua. Iña mee ca cua Huani ejeanobiajeajji, Enodeya quea mimishi nee neeya jjiejojo.

Huaniya Jesosa enajje besa mee ca cua

(Mateo 3.13-17; Macoso 1.9-11)

²¹ Huani jeanobiajea jjimahua poquia cua dejja ojjaña cuana nijje Jodana cuei yasijje enajje besa meeya. Jesosa pea'ai poquia cua o que. Huaniya Jesosa besa mee ca'ya cua. Majoya Jesosa Eyacuiñajiji nijje mimianijo, eyatahuatahua capajea ca cua. Edojjoshahua Bame huia' jama o sapa biajje cuabesa ba'ya cua. Japashineijje ba'equea cua. ²² Majoya esohui shajja'ajja ca cua ojjaña eyahuasijje. Eyacuiñajiji Jesosa nijje jama mimime cua ba'a: —Miya ecue Bacua Ejja nei, Jesosa. Eyaya miya quea jea nee aña. Eya mijo quea bhui nee nee —jamaya cua Eyacuiñajiji.

Jesosaja etiiquiana
(Mateo 1.1-17)

²³ Jesosa Jodio dejja nei cua. Jesosaa 30 shequijame tii majje esohui huohui coo ca cua. ²⁴ Ojaya etiiquiana cuana yohua bajjani cua ba'a: Ebionei Jose nequia cua. Oya Jesosa tii meeiji cua; Jesosaja chii jayojja cua. Jose ca Enija bacua ejja cua. Eni ca Mata'aja bacua ejja cua. Mata'a ca Nemija bacua ejja cua. Nemi ca Mequija bacua ejja cua. Mequi ca Janaja bacua ejja cua. Jana ca Joseja bacua ejja cua. Jose ca Matatija bacua ejja cua. ²⁵ Matati ca Amosoja bacua ejja cua. Amoso ca Nahuomaja bacua ejja cua. Nahuoma ca Esinija bacua ejja cua. Esini ca Naquiaja bacua ejja cua. ²⁶ Naquia ca Maataja bacua ejja cua. Maata ca Matatija bacua ejja cua. Matati ca Semeja bacua ejja cua. Seme ca Josequija bacua ejja cua. Josequi ca Jonaja bacua ejja cua. Jona ca Joanaja bacua ejja cua. ²⁷ Joana ca Shesaja bacua ejja cua. Shesa ca Sonobabeja bacua ejja cua. Sonobabe ca Sanatija bacua ejja cua. Sanati ca Nenija bacua ejja cua. ²⁸ Neni ca Mequija bacua ejja cua. Mequi ca Adija bacua ejja cua. Adi ca Cosamaja bacua ejja cua. Cosama ca Emanamaja bacua ejja cua. Emanama ca Esheja bacua ejja cua. Eshe ca Jesosaja bacua ejja cua. ²⁹ Jesosa ca Enieseja bacua ejja cua. Eniese ca Jonimija bacua ejja cua. Jonimi ca Mata'aja bacua ejja cua. Mata'a ca Nemija bacua ejja cua. ³⁰ Nemi ca Simeonija bacua ejja cua. Simeoni ca Jodaja bacua ejja cua. Joda ca Joseja bacua ejja cua. Jose ca Jonamija bacua ejja cua. Jonami ca Eniaquimija bacua ejja cua. Eniaquimi ca Meneaja bacua ejja cua. ³¹ Menea ca Menaja bacua ejja cua. Mena ca Matataja bacua ejja cua. Matata ca Nataja bacua ejja cua. Nata ca Dabija bacua ejja cua. ³² Dabi ca Isaija bacua ejja cua. Isai' ca Obedaja bacua ejja cua. Obeda ca Boosija bacua ejja cua. Boosi ca Sanaja bacua ejja cua. Sana ca Naasonija bacua ejja cua. Naasoni ca Aminidabija bacua ejja cua. ³³ Aminidabi ca Adimija bacua ejja cua. Adimi ca Ashinija bacua ejja cua. Ashini ca Eshaomija bacua ejja cua. Eshaomi ca Panesija bacua ejja cua. Panesi ca Jonaja bacua ejja cua. ³⁴ Jona ca Jacoboja bacua ejja cua. Jacobo ca Isaacaja bacua ejja cua. Isaaca ca Amajamaja bacua ejja cua. Amajama ca Taneja bacua ejja cua. Tane ca Naconija bacua ejja cua. ³⁵ Naconi ca Senocaja bacua ejja cua. Senoca Shacaoja bacua ejja cua. Shacao ca Penecaja bacua ejja cua. Peneca ca Emeneja bacua ejja cua. Emene ca Sanaja bacua ejja cua. ³⁶ Sana ca Cainanija bacua ejja cua. Cainani ca Anajjadaja bacua ejja cua. Anajjada ca Semija bacua ejja cua. Semi ca Noeja bacua ejja cua. Noe ca Nemequeja bacua ejja cua. ³⁷ Nemeque ca Matosaneja bacua ejja cua. Matosane ca Enoqueja bacua ejja cua. Enoque ca Janedija bacua ejja cua. Janedi ca Majananeenija bacua ejja cua. Majananeeni ca Cainanija bacua ejja cua. ³⁸ Cainani ca Enosija bacua ejja cua. Enosi ca Setija bacua ejja cua. Seti ca Adanaja bacua ejja cua. Adana ca Eyacuiñajjija pana cua. Oya ebionei dejja cua.

Edosiquiana etiiya Jesosa quea mimishi po mee sa aca cua
(Mateo 4.1-11; Macoso 1.12-13)

4 ¹Jesosa cueyanaje Jodana cuei yasijje Huanija besa meeya. Jomajo Edojjoshahua Bameya Jesosa dojo canaje quima huasijje. Majoya Edosiquiana etii Jesosa nijje miminaje oja emeshi mese nei epo'yojji nisho. ²Jomajo nequia cua quea huiso nee cahuime, 40 cahuime ijja'iijja jjima cua. Majoya quea shoe nee jjabaquia cua. ³Edosiquiana etiiya Jesosa jama huohuime aca cua ba'a: —Miya Eyacuiñajjiya Bacua jjabaqui majje ca oe jjiquio mei pahui pojji acue! ¡Pahui pojji amajje ijjiacue!

⁴Jesosa jama cua ba'a: —Chojja de, eya miquea esohui shajja'ajja sa po ajja. Bacute, Eyacuiñajjiya etehue'yo jama cuani ba'a: “Dejja cuana bobijo ca'a po majje pojjeama ba'e tiitije'yo. Ojjaña Eyacuiñajjiya esohui jayojja jama añajo ca se ca oe quea bame nee ba'e tiitije'yo” —jamaya Jesosa cua.

⁵Majoya aje Edosiquiana ettiya Jesosa dojo ca cua eyiyo ao'ao huasijje. Majoya aje ba mee ca cua ojjaña meshi cuana; Jesosa cahuijo jayojja ba mee ca cua. ⁶Edosiquiaa huohui ca o'oya cua jama ba'a: —Eyaya miya quiaje jiquio meshi cuana, miya emeshi mese po meeje'yo. Eyaya ojjaña aquiana quiaje'yo. Ojjaña meshi cuana ecuea, jamajjeya eyaya quia sa cuanijo eyaya aje miquea yajji quiaje'yo. ⁷¡Miyaya eya bihuiacue, shajja'ajjaciecue ecuea esohui! Majoya miya emeshi mese po meeje'yo eyaya —jama siajje ameya aca cua Edosiquiaa Jesosa.

⁸Jesosa jama cua ba'a: —Chojja, ¡poquicue quea huesha, Edosiquiana! Eyacuiñajjiya etehue'yo jama cuani ba'a:

“¡Eyacuiñajji oe nei bihuiacue; oya oe nei ojjaña Emeshi Mese nei nequi! ¡Ojaya ehuohui'yo jama oe acue!” —Jesosaa aca cua.

⁹Majoya aje Edosiquiaa Jesosa dojo ca cua Jenosanena huasijje. Nequia cañaquia cua Eyacuiñajjiya equi biajje. Majoya Edosiquiaa Jesosa jama aca cua ba'a: —Miya Eyacuiñajjiya Bacua Ejja nei jjabaqui majje jjiquiojo nequi tohuaal'ajja'yo socue meshi yasijje! ¹⁰Eyacuiñajjiya etehue'yo jama cuani ba'a: “Eyacuiñajjiya huoojea caje esohuidojji cuana mi jaahuanaa.

¹¹Oquequiajo ohuaya emeya miya iñajjequi caje'yo. Jamajjeya miya ejjajiojji quecuasajaquijji pojjeama meijo”.

Jamaya cuani, de —Edosiquiana cuanaje.

¹²Jesosaa jama aca cua ba'a: —Chojja, miya jjashahuaba taiquiani, de. Eyacuiñajjiya pea etehue'yo jama cuani ba'a:

“A'a jamaya mimijji ba'a: ¿A'a Eyacuiñajjiya oja esohui e'e jojo nei acaje'yo? ¿A'a eya jaahuana nei caje'yo? Caba'ajjasahua. ¡A'a pojji!”

Jamaya yahuajo nei Moisesiya tehue ca cua —jamaya Jesosa cua.

¹³Edosiquiana jjashahuabaqui jjima cua; pea esohui chama' cua Jesosa quea mimishi po meeji nisho. Jamajjeya Edosiquiana poquia cua. Majoya aje quijje cue o'oya cua o quea mimishi po mee'yohua nisho.

Jesosaa huohui coo ca cua Janinea meshi yasijje
(Mateo 4.12-17; Macoso 1.14-15)

¹⁴ Majoya Jesosa posohuaqui o'oya cua oja meshi yasijje, Janinea meshi yasijje. Edojjoshahua Bameya Jesosa quea ca'a po mee ca cua. Jomajo dejja cuana mimia cua Jesosajo, ojjaña meshi yasijje mimia cua. ¹⁵ Jamatii Jesosa po'ayequie nequia cua pea cuiñajji cuana huasijje Eyacuiñajjiya esohui huohuiya Jodioja equi ejjachichaquijji cuana huasijje. Ojjaña dejja quea bihui cua onijke. Jama cuana cua ba'a: —E'e, ojaya esohui quea ja'a nee, quea bame nee nee.

Jesosa poquia cua Nasanena huasijje
(Mateo 13.53-58; Macoso 6.1-6)

¹⁶ Jesosa poquia cua Nasanena huasijje, oya tii'ya cua jomajo tii. Ojjaña epojja ejomishocajjiyo Jesosa dobiqui majamajanaje Jodioja equi ejjachichaquijji yasijje esohui huohuiya. Jamajjeya dobiqui majje oya nequisohua cua Eyacuiñajjiya etehue'yo ajji. ¹⁷ Oe dejja, etehue'yo jaahuanajjiya Jesosa quia ca cua etehue'yo. Yahuajo Isaiaja etehue'yo cua. Isaia Eyacuiñajjiya epeejji nei, etiiquiana cua; Eyacuiñajjiya esohui huohuijji cua. Jamajjeya ojaya etehue'yo e'e jojo nei cua. E'e de, Jesosaa she'a ca cua ma etehue'yo, jama ame aca cua jiquio esohui ba'a:

¹⁸ “Edojjoshahua Bameya eya jjashahuabaqui mee cani. Ohuaya eya huoojea canaje jama ba'a: —¡Huohuicue ecuea esohui bame dejja aema' cuana huasijje! ¡Huohuicue dejja ejeanobiajaa cuana huasijje ecuayaqui mee'yojji! ¡Huohuicue cojjama' cuana huasijje ejjacojja ja'a mee'yojji!

¹⁹ ¡Huohuicue pea dejja quea yeno ba'e yasijje quea bihui eba'e mee'ji!

Jamaya Isaiaa tehue ca cua yahuajo nei.

²⁰ Majoya Jesosaa etehue'yo cami ca'yonaje; quia ca o'oya cua ma dejja huasijje. Jesosa anioquea cua huohui epoji. Ojjañaa oya ba ca'ya cua; ishoa'ajja ca cua ojaya esohui ehuohuijji. ²¹ Ohuaya esohui huohui ca cua jama ba'a: —E'e, ma etehue'yo huohui cani ejo. Eya cue'yonaje ma dejja cuana huasijje esohui huohuiya. Eyaya miquianaya huohui'ajjaña jama ba'a: Eyacuiñajjiya quea bihui ba'e mee caje'yo miquianaya —Jesosaa aca cua.

²² Ojjaña Jesosajo quea bame mimia cua. Jjashahuabaquia cua ojjaña ojaya esohuijo. Pea cuana ca ca Jesosajo jama cua ba'a: —Jesosaja esohui quea ja'a de, oya ca ca Joseja bacua nei, Eyacuiñajjiya Bacua pojjeama —jamaya pea cuana cua Jesosa Eyacuiñajjiya Bacua pojjeamajo poso.

²³ Jesosaa oya cuana tecuea ca cua jama ba'a: —Miquianaya jamaya cuaje miquianajaya ejjashahuabaquijjiyo ba'a: “Fjjashicuquijji, ¿yajjajje acuae jja miyaya mi jjashicu'ajjaquiani so'o?” ¿A'a nequiana jamaya pea'ai

jjashahuabaquiani? Jama cuani ba'a: "Ecuanaaya miya shajja'ajjanaje, Jesosa. Miyaya jjaajaqui mee'yonaje Capenaomajo ba'e cuana. ¿Yajjajo acuaeya oe miquea meshijo ba'e cuana jjaajaqui mee'yo jjima aña so'o?" ¿A'a nequiana jamaya jjashahuabaquime cuani? —Jesosa cua—. ²⁴E'e jojo nei ecuea esohui, jamatii miquianaya Eyacuiñajji esohui huohuijji mimianijo oja meshijo ojaya huapa pojjeama cuana ca ca jjashajja'ajjaqui sa po ajja.

²⁵—Miquianajaya eba ma etiiquiana Enia bajjani. Yahuajo nei ohuaya huohui ca cua Eyacuiñajji esohui. Beshahua nei pea beca peejjima shequiajame ena po'yo jjima cua. Bobi tii jjima cua ena chamajojo. Ojjaña quea shoe nee nee cua. ²⁶Yahuajo quea huiso Jodio e'ahuemano ania cua. Jamatii oya cuana ca ca jjashajja'ajjaqui sa po ajja Eniaja esohuijo, Eyacuiñajji ehuohui'yojo. Jamajjeya Eyacuiñajji Enia huoojea ca cua pea meshi yasijje Sinono meshi yasijje, Saneta cuiñajji yasijje, Sinono e'ahuemano que. Jomajo e'ahuemanohua shajja'ajja ca cua Eyacuiñajji esohui. Jamajjeya Enia bobia ca cua.

²⁷—Miquianajaya eba pea etiiquiana Eyacuiñajji esohui huohuijji Eniseo bajjani ba'y a cua Enia nijje. Quea huiso Jodio dejja batata epo'yo jomajo ba'y a cua. Jamatii Eniseoja esohui shajja'ajja sa po ajja. Jamajjeya jjaajaqui mee'yo jjima aca cua Eyacuiñajji. Pea meshijo ba'e Sinia meshijo oe dejja Naamani bajjani batata epo'yo nequia cua; oya shajja'ajja sa cua Eyacuiñajji esohui. Jamajjeya oya poquia cua Eniseo que, Eniseoja jjaajaqui mee'yo yohua. Ohuaya shajja'ajja ca cua ojaya esohui. Jamajjeya jjaajaqui mee ca'y a cua Eyacuiñajji. Jamaya miquianaya shajjama' cuani miquianajaya etiiquiana jayojja. Jjeya nei shajja'ajja sa po ajja Eyacuiñajji esohui, jamajjeya jjaajaqui mee'yo jjima acaje Eyacuiñajji —Jesosa cuanaje.

²⁸Ojjaña cuana Jodioja equi ejjachichaquijji anica Jesosaja esohui shajja'ajja majje quenequene neinei'ya cua Jesosa nijje. ²⁹Jesosa iña majje jeacuayajea ca cua esecue yasijje. Majoya poqui mee ca'y a cua eyiyo hui yasijje e'iñajeatohuaajea'yoji nisho. ³⁰Jamatii Jesosa poquia cua, jjayejjequinana cua ona nequi yiyesamajjeya.

Oe dejja eshahua nequia cua (Macoso 1.21-28)

³¹Pea pojjafo Jesosa poquia cua Capenaoma huasijje, Janinea meshi yasijje. Ejomishocajji pojjafo oya dobiquia cua Jodioja equi ejjachichaquijji yasijje esohui huohuiya. ³²Ojjaña cuaa jama aca cua ba'a: —De, Jesosaja esohui quea ja'a nee. E'e jojo nei pojja'a Eyacuiñajji oya huoojea canaje, de.

Jamajjeya ojaya esohui shajja'ajja sa aca cua. ³³Oe dejja eshahua nijje tii ania cua Eyacuiñajji equijo. Eshahuaa oya taaa sajasaja mee ca cua Jesosa que jama ba'a: ³⁴—E'e de, ¿apiojji shai miya ecuana que cueyanaje, Jesosa? Miya cueyanaje pojja'a ecuana cuayaqui mee'yo yohua. Ecuanajaya miya eba, Jesosa. Miya Nasanenajo ba'e, miya Eyacuiñajji Bacua, miya mimishi'ama, de —jamaya eshahua cua.

³⁵ Jesosaa eshahua tecueajea ca cua jama ba'a: —¡A'a mimijji; cuayaqui'yocue jiquio dejjajo nequi! —Jesosa cua.

Majoya eshahuua ma dejja jeabichajea mee ca cua pea cuana pejjejo. Eshahua nee'ama nei nei cuayaqui'yome cua ma dejjaja eyamijo nequi.

³⁶ Ojjaña jjajjasohuaquia cua; mimia cua pea cuana nijje jama ba'a: —E'e de, Jesosa quea sohui poja nee nee; ojaya esohuijo eshahua cuayaqui'yonaje, de. ¿Yajjajje shai quea sohui poja nee nee? —jamaya cua ojjaña Jesosajo.

³⁷ Jamaya pea cuaa huohui ca cua ojjaña cuiñajjijo ba'e yasijje.

Jesosaa boeca mee ca'yá cua Simohuija ano

(Mateo 8.14-15; Macoso 1.29-31)

³⁸ Majoya Jesosa cuayaquia cua Jodioja equi ejjachichaquijjijo ani. Cuayaqui majje poquia cua Simohuija equi yasijje. Dobiqui majje ba ca cua Simohuija ano. Simohuija ano quea mano jaa, quea quiyo nee nee jaa ba ca cua. Simohuiya Jesosa jama huohui'ajjame aca cua ba'a: —Jesosa, ¿a'a miyaya boeca meeje'yo ecue ano, ecue huanaseja enaese?

³⁹ Jesosaa Simohuija ano jama aca cua ba'a: —E'e, jjeyahua nei mi quiyoquiyo pajeaqe'yo —Jesosaa aca cua.

Majoya aje epona tii quiyoquiyo pajea'yá cua. Boecanana'yá cua. Majoya boeca'yó majje anisohua'yá cua. Anisohua'yó majje bobi cuacua meesahua ca cua epona tiiya.

Jesosaa quea huiso emanoja cuana jjaajaqui mee ca'yá cua

(Mateo 8.16-17; Macoso 1.32-34)

⁴⁰ Quijje pishana eshequi oquequiajo ojjaña emanojaa dojo ca cua Jesosa que jjaajaqui mee'yohua. Jesosaa emanoja cuana emeya napa cajje jjaajaqui'yá cua. ⁴¹ Eshahua cuana pea'ai cuayaqui mee ca'yá cua. Cuayaqui'yo majje eshahua cuana taaa cua jama ba'a: —Jesosa, miya e'e jojo nei Eyacuiñajjija Bacua Ejja.

Jesosa jama cua ba'a: —¡A'a enijje jama mimiji! Miquea eba eya, Eyacuiñajjija huoojea'yo ojjaña jaahuanajji. Pea cuanaja eya ba jjima, de —jamaya Jesosa cua.

Jesosa po'ayeque nequia cua Eyacuiñajjija esohui huohuiya

(Macoso 1.35-39)

⁴² Jjapojaqui jeahuajo Jesosa oe nei poquia cua dejjama huasijje. Pea cuanaa sa'ajja ca nequia cua: —¿Aecue Jesosa?

Quijje pishana ca ca ba ca'yá cuaa cua Jesosa. Mimia cua onijje jama ba'a: —Jesosa, ¡nequicue ecuanaja cuiñajjijo! ¡A'a poquijji pea cuiñajji yasijje!

⁴³ Jesosaa jama huohuime aca cua ba'a: —Chojja, jiquio cuiñajjijo eya nequi aija. Eyaya Eyacuiñajjija esohui cahuohuiquiahua pea cuiñajjijo ba'e cuana huasijje. Jamajoya aje oe eya ecue Chiiya huoojea canaje ojaya esohui

bame bame huohuijji pea cuana huasijje. Eyaya iyaaje dejja cuana jama ba'a: "¡Jjashajja'ajja quicue oe! Eyacuiñajjiya miya quea jea nee nee acani, oya miquea Emeshi Mese nei po sa cuani; mi jaahuanajji nei nei po sa cuani. Ohuaya miya ba'e bame mee sa acani. ¡Jamajjeya onije jjapeequicue!" —jamaya Jesosa cua. ⁴⁴Jamaya ohuaya esohui huohui ca ayequi nequia cua Jodioja equi ejjachichaquijji cuana huasijje, ojjaña meshi cuana huasijje.

Jesosaja epjeejjiya nahuoo cuiashaja ca cua quea huiso nee nee
(Mateo 4.18-22; Macoso 1.16-20)

5 ¹Oe pojajo Jesosa Jenesane bae sahua meshijajjo ania cua. Pea cuana huasijje Eyacuiñajjiya esohui huohui po ania cua. Quea huiso dejja ojaya esohui shajja'ajja sa aca cua. ²Quea dejja huisojojo shajja'ajja jjima aca cua pea dejja cuaa. Jamajjeya Jesosaa pea e'aniji salajja ca cua ojjañaja eshajja'ajjajji. Majoya becamejjiji bishe ai ba ca cua bae sahuajo ba'e. Ma bishe mese cuana nahuoo cuiashajajji shacula'y po nequia cua. ³Oe bishe mese Simohui bajjani cua. Jesosa nequisohuaquia cua oja bishe yasijje. Jesosaa Simohui huohui'ajja ca cua jama ba'a: —¡Quecuayiyejeacue ena bae pishana huasijje ojjañaja ecuea esohui eshajja'ajjajji!

—E'e —Simohui cua.

Majoya bishe quecuayiyejea majje Jesosaa bishejo e'anioque aniya tii esohui huohui ca aña cua. ⁴Jesosaa esohui huohuijeyo majje Simohui jama aca cua ba'a: —Simohui, ¡bishe yocue ena bae yiyesama huasijje! ¡Majoya jeacue nahuoo cuiashajajji!

⁵Simohuiya jama aca cua ba'a: —Esohui huohuijji, ecuana mecajje poquinaje nahuoo cuiashajaa nisho. Chama' de, chama' nahuoo cuanaje. Eyaya ca ca shajja'ajja sa aña miquea esohui, jamajjeya eyaya jeaje ena huasijje nahuoo cuiashajajji —jamaya Simohui cua.

⁶Majoya yo ca cua ena bae yiyesama huasijje nahuoo cuiashajajji. Jea ca cua nahuoo cuiashajajji; quea huiso nee nee nahuoo dobiquia cua. Quecuaisaja'ajja ca cua. ⁷Majoya Simohuiya ojaya epjeejji cuana iyaa ca cua: —¡De, yacua oe yecue bishe pea, che nahuoo jjequijeasohuaahuacue!

Majoya pea bishe ye ca cua; cuio ca cua beca bishe nahuooohua. Beshahua nei bishe jaadobiquia cua. ⁸Ma ba majjeya aje Simohui ecui'oshajjajo nequia cua Jesosa pejjejo; jama cua ba'a: —De, ecuea Emeshi Mese, e'e jojo nei miquea esohui, eya miquea esohuijjo jjashahuaba taiquinaje, de. ¡Quea huesha nequicue Jesosa, eya quea mimishi cuanaje! —jamaya Simohui cuanaje.

⁹Simohuiya epjeejji cuana jjajjasohuaquia cua nahuoo quea huiso ohua cuiashaja cajo. O jayojja jjajjasoaquime peal'aiya cua, de. ¹⁰Semeneoja bacua cuana Satiacó, Huani, Simohuiya echacosahuajji cuani pea'aiya jjajjasohuaquia cua.

Majoya Jesosaa Simohui jama aca cua ba'a: —¡A'a jjajjasoaquijji! Miquianaaya banaje ecuea esohui e'e jojo nei nahuoo cuiashajajji.

Jjeyahua nei miquianaaya dejja quea huiso jjequije ecuea esohuijo ejjashajja'ajjaquijji, ecuea epeejji epoji —jamaya Jesosa cua.

¹¹ Majoya cuaa bishe yo ca'y'a cua etaja huasijke. Aquiana cuana jeana'yo majje poquia cua Jesosa nijje.

**Jesosaa dejja jjajea meequi ca'y'a cua batata epo'yo ma dejja shicui
jjima acani**
(Mateo 8.1-4; Macoso 1.40-45)

¹² Oe pojjajo Jesosa ania cua pea cuiñajjijo. Cue'ya cua oe dejja batata epo'yo. Ojjañaja oya boti'ama cua, o jayojja epo cuani jjejojo. Oya Jesosa ba majje ecui'oshajjajo nequia cua o bihuiajji. Jama huohui'ajjame aca cua ba'a: —Emeshi Mese nei, miya sa cuanijo, ¿a'a mo che miyaya jjajeaqui mee'yome so'o? —aca cua ohuaya.

¹³ Majoya Jesosaa napa'ajja ca cua emeya, quea jeajojo huohui ca cua: —E'e, eyaya miya jjajeaqui meeje'yo batata epo'yo. Quea boejea po meeje'yo. Jjajeaqui mee'yo majje chama'yo cua ojaya batata epo'yo. Quea boejea ojaya ejee po'yonaje.

¹⁴ Majoya Jesosaa jama huohuime aca cua ba'a: —¡A'a oe pea cuana huohuijji! ¡Eyacuiñajjija equi yasijke oe poquicue! ¡Jomajo huohuicue Eyacuiñajjija esohui huohuijji: "Jjajeaqui'yonaje mo" acue! ¡Moisesija etehue'yo jama oe acue! ¡Quiaquicue beca huia', beca ijjiacajji pea'ai, equiajji Eyacuiñajjija bihuiajji, miya ojaya ejjajeaqui mee'yohua jjejojo! Majoya esohui huohuijji cuana jjabahuejjaquije miquea batata epo'yo chama'yo cuanajejo. Majoya ojjaña jjabahuejjaquije miya quea bojea po'yonajejo —Jesosaa aca cua.

¹⁵ Jamatii quea huiso dejja shajja'ajja ca cua Jesosaa jjajeaqui mee ca'yani batata epo'yo. Ohuaya jjaajaqui mee ca'yani emanooja cuana. Jamajjeya quea dejja huiso nee cueyanaje shajja'ajja, jjaajaqui'yohua pea'ai.
¹⁶ Jamatii Jesosa poqui nequia cua dejjama huasijke Eyacuiñajji nijje mimiya.

Jesosaa jjaajaqui mee ca'yonaje oe dejja jeo'ajjajaa
(Mateo 9.1-8; Macoso 2.1-12)

¹⁷ Oe pojjajo Jesosa poquinaje onaja equi yasijke esohui huohuiya. Paniseo dejja cuana, Moisesija etehue'yo huohuijji cuana pea'ai cueyanaje Eyacuiñajjija esohui shajja'ajja. Quea dejja huiso pea meshijo ba'e cuana cueyanaje, Janinea meshijo ba'e cuana. Jodea meshijo ba'e cuana, Jenosanenajo ba'e cuana pea'ai cueyanaje. Jesosaa Eyacuiñajji nijjeya quea huiso emanooja jjaajaqui mee ca'yonaje. ¹⁸ Jamajjeya pea dejja oe dejja jeo'ajjajaa ye ca cua equi yasijke. Dojodobiaqui sa aca cua Jesosa que. ¹⁹ Dobiqui meemee ajja cuana cua quea dejja huisojojo. Jamajjeya aje dojosohua ca'y'a cua equi jamacoo huasijke. Huejja ca cua eyiyesama neijje. Jesosa nequi cojja nei jea'oquea ca cua. ²⁰ Jesosaa ba ca cua dejja

jeo'ajjajaa ojaya epeeiji pea'ai. Jjashahuubaquia cua jama ba'a: —E'e de, jiquio dejja cuanaja eba eyaya jjaajaqui meeje'yo emanojaa cuana.

Jamajjeya jeo'ajjajaa huohui canaje jama ba'a: —E'e ecuea epeeiji, jjeya miquea mimishi eyaya cuijeaje'yo.

²¹ Majoya Paniseo cuana, Moisesija etehue'yo huohuijji cuana pea'ai jjashahuuba taiquia cua; Jesosa Eyacuiñajji Bacua pojjeama poso aca cua. Jama cua ba'a: —Jesosa quea tai cuani, de. Oya Eyacuiñajji jama cuani. Oe nei Eyacuiñajjiya mimishi cuijea caje'yo. Jesosaja ca ecuijea'yojji pojjeama —poso aca cua.

²² Jesosaja eba ojaya jjashahuubaquijji cuana. Jamajjeya huohui ca cua jama ba'a: —Miquianaya jjashahuuba taiquiani, de. ²³ ¿Ache esohui camaja'ama so'o? Jiquio pojja'a ba'a: “¡Eyaya miquea mimishi cuijeaje'yo!” Pea esohui pojja'a: “¡Nequisohuacue, poqui'ajja socue!” ²⁴ E'e de, eyaya huohuije jiquio dejja jeo'ajjajaa huasijke jama ba'a: “¡Nequisohuacue; miquea equipajaajji bebo majje poqui'yocue miquea equi yasijke!”

Pea cuana huasijke Jesosa jama cua ba'a: —¡Pea cuana shajja'ajjacue, ejjabahuejjaquijji! Eyaya ojjaña Emeshi Mese nei cuani. Eyaya miquianajaya mimishi cuijea mee yaña ojjaña meshijo ba'eja —jamaya Jesosa cua.

²⁵ Majoya aje dejja ejjachichaqui nequijo jeo'ajjajaa nequisohua'ya cua, poqui'ya cua oja equi yasijke. Oya quea bihui cua Eyacuiñajji nijje, Jesosa nijje pea'ai. ²⁶ Pea cuaa Eyacuiñajji bihuia ca cua jama ba'a: —E'e, eseyaya banaje jiquio dejja jeo'ajjajaa jjeya jeojeo'yoqui, mimishi cuijea ca'yonaje pea'ai, de.

Ojjaña cuana Jesosa nijje quea bihui nee nee cuanaje jeo'ajjajaa jjaajaqui mee ca'yajo.

Jesosaa Nemi iyaa ca cua ojaya epeeiji epoji
(Mateo 9.9-13; Macoso 2.13-17)

²⁷ Majoya Jesosa equijo ani cuayaquia cua. Poquijeya ohuaya ba canaje Nemi ona emeshi meseja esohuijo sosejjeshejji cuani eba'eiji sosejje. Oya equi sisi e'iyajo ani ejiojji cojja sahuajo. Oya siipojji, de, jamajjeya oya ojjaña Emeshi Mese nei cuani. Jesosaa oya ba majje jama aca cua ba'a: —Nemi, ¡cue'ajja; ecuea epeeiji po'yocue!

²⁸ Jamajjeya Nemi nequisohua cua; ojaya aquiana jeajeanana majje poquia cua Jesosa nijje. ²⁹ Quijje pishana Nemiya iyaa ca cua ojaya epeeiji cuana e'ijjia'l'ijjiajji Jesosa nijje. Iyaa ca cua ona sosejjeshejji cuana, pea dejja cuana pea'ai. ³⁰ Paniseo dejja cuana Moisesija etehue'yo huohuijji cuana pea'aija boti'ama cua ona sosejjeshejji cuana. Jjashahuuba taiquia cua jama ba'a: —Quea mimishi Jesosa, o shajja'ajjajji cuana pea'ai. ¿Yajjajje acuae dejja mimishi cuana nijje ijjia'l'ijjiani? Quea mimishi epoji pojja'a.

³¹ Jesosaja eba ojaya ejjashahuubaquijji. Jamajjeya huohui ca cua jama ba'a: —¿A'a miquianajaya shajja'ajja jjima jiquio esohui pojja'a? Jama ba'a: “Dejja quea aja eshicuijji bajji yasijke poqui sa po ajja. Emanojaa ca

eshicuijji bajji yasijje poquiani". Jamaya miquianaya joya mimishi'ama poso jjabaquiani. Jamajjeya miquianaya shajja'ajja sa po ajja ecuea esohui. Pea cuana ca quea mimishi nee neeya shajja'ajja cani ecuea esohui. Jamajjeya eya ijija'ijjiani mimishi cuana nijje. ³²Eya cue'yonaje dejja mimishi iyaaa. Dejja mimishi'ama cuani poso iyaa sa po ajja iña. Dejja joya quea mimishi nee nee iyaa je mimishi pajea mee'yojji.

Bobi ijija jjima yajjiho huohui'ajja canaje cuaa
(Mateo 9.14-17; Macoso 2.18-22)

³³Paniseo cuaa Moisesija etehue'yo huohuijji cuaa Jesosa huohui'ajja ca cua jama ba'a: —Esejaya etiiquiana jamaya huohui cani ba'a: "¡A'a ijija'ijjiani jiquio pojxajo! ¡A'a jjashahuubaquijji bobijo; jjashahuubaquicue Eyacuiñajjijo nei! ¡Mimicue onijje, quea yeno pocue!" jamaya esejaya etiiquiaa huohui cani. Huani shajja'ajjajji cuaa jamaya acani pealai. Jesosa, mi shajja'ajjajji cuana ca ca ijija'ijjiani tii. ¿Yajjajje shai? Quea mimishi cuani pojxa'a.

³⁴Jesosaa jama aca cua ba'a: —E shajja'ajjajji cuana enijke ijija'ijjiani. Ecuea eba nei nei Eyacuiñajjijo esohui e'e jojo nei. Ma esohui huohuijji cuanaja esohui ecuanajaya jjeyahua e'ajji pojjeama. Ejjhahuanaquijji pojxajo ojjaña quea bihui cuani, ijija'ijjiani, quea yeno pojjeama cuani. ³⁵O huanajji epo mano'yajo ojjaña quea yeno cuaje. Ma pojxajo ijija'ijjija sa po ajja cuaje. Jjashahuubaquije'yo emano'yojo. Eya jiquio ecua yahue mano'yani jayojja cuaje. Jjeya ecuanaya quea bihui cuani ijija'ijjiani. Eya quijje pishana manoje'yo. Majoya ecuea epeejji cuana quea yeno cuaje; ma pojxajoya bobi ijija jjima acaje —jamaya Jesosa cua.

³⁶Majoya ohuaya ojaya esohui huohui ca cua ejjashahuubaquijji jama ba'a: —Daqui eyacua isajea ca ajja daqui chii jaca'yojji. Chojja. Miquea daqui eyacua isajea'yo majje daqui chii jaca'yojji'yajo, daqui eyacua ehuoshoo'yojji pojjeama. Daqui chii ejaca'yojji poqui ajja cuiñajji yasijje daqui chijji jjejojo.

³⁷—Ecuea pea esohui jama cuani: Ijjiacajji jee eyacua monsa pojji acajji ena sese nequiajji. Ma ena seseya ejee eyacua shejjee mee cani. Majoya oe huana cani cuaa pea ena sese ejee chijjo cuiapojojea caje'yo shejjee majje.

³⁸Jamajjeya huana cani cuaa ena sese monsa eyacuajo cuiapojojea jjima yajji.

³⁹—Jamaya ecue sohui eyacua cuani. ¡Miquianaya ecuea epeejji nei po sa cuanijo shajja'ajjacue ojjaña ecue sohui! Beca cuana shajja'ajja sa po ajja ecue sohui eyacuajojo. Jjashahuuba taiquiani, de. Etiiquianaja esohui ejee echii jayojja. ¡Jamajjeya ecue sohui oe shajja'ajjacue! —jamaya Jesosa cua.

Jesosa shajja'ajjajji cuaa anoso sejja ca cua ejomishocajji pojxajo
(Mateo 12.1-8; Macoso 2.23-28)

6 ¹Oe ejomishocajji pojxajo Jesosa o shajja'ajjajji cuana nijje poquia cua anoso ai nequi yiyesamajje. O shajja'ajjajji cuaa emeya sejja ca cua anoso eshe tii e'ijjiajji quea shoeya jjejojo. ²Majoya Paniseo cuaa Jesosa o

shajja'a'jjajji cuana ba ca cua. Jesosa nijje mimijajinaje jama ba'a: —¿Yajjajo acuaeaya epojja ejomishocajji oano sejja mee yaña so'o? Moisesija etehue'yo jamaya cuani ba'a: “¡A'a chacojjii ejomishocajji pojjajo!”

³Jesosaa jama aca cua ba'a: —Miya quea sohui tai cuanaje; Eyacuiñajjija esohui nei pojjeama aña miquianaaya. Miquianaya jjashahuaba taiquiani, de. ¡A'a miquea ba jjima pojja'a ma etiiquiana, emeshi mese Dabi bajjani? Jama etehue'yo yani Dabijo ba'a: Oya Eyacuiñajjija epeeiji nei. Oe pojjajo oya oja epeeiji cuana nijje poquije, ⁴dobiquinana cua Eyacuiñajjija equi yasijje bobi sa'ajja quea shoe neejojo. Ma equijo ani pahui ijija ca'yonaje; quia ca'yonaje ojaya epeeiji cuana huasijje pea'ai. Eyacuiñajjija etehue'yo jama cuani ba'a: “Jiquio pahui Eyacuiñajjija nijje mimianija e'lijijajjime”. Jamatii Dabi ca mimishi'ama cuanaje. Oya poquianinaje Eyacuiñajjijo chacochaco neineiya. Jamaya aca cua Dabiya. ⁵Ecuana Dabi jayojja cuani. Eya Eyacuiñajjijo chacochaco neineiani. Jamajjeya ecuaaya jiquio anoso ai sejjaña ejomishocajji pojjajo —Jesosa cua.

Oe dejja meshahuama'yo epo Jesosaa jjameshahuanequi mee ca'ya cua
(Mateo 12.9-14; Macoso 3.1-6)

⁶Pea ejomishocajji pojjajo Jesosa poquia cua Jodioja equi ejjachichaquiji yasijje esohui huohuiya. Oe dejja meshahuama'yo epo ania cua jomajo. ⁷Paniseo dejja cuana, Moisesija etehue'yo huohuiji cuana jjashahuuba taiquia cua Jesosajo jama ba'a: —Jesosa shajjama' jayojja ecuanaja esohuijo cuani. Ohuaya chaco caje ejomishicajji pojjajo pojja'a; jjameshahuanequi mee caje'yo dejja meshahuama'yo epo. Jesosa jamaya shajjama' cuajo ecuaaya oya iñaje'yo edojojji ejeadobiajeajji.

⁸Jesosaja onajaya ejjashahuuba taiquiji eba cua. Jamajjeya ohuaya ma dejja meshahuama'yo epo ani huohui ca cua jama ba'a: —Meshahuama'yo epo, ¡nequisohuacue ojjañaja ebajji! —Jesosaa aca cua. Jamajjeya oya nequisohua cua. ⁹Jesosaa huohui ca cua pea cuana jama ba'a: —Eyaya miquianaya huohui'ajjaje: ¿Ache quea bame epoji ejomishocajji pojjajo? Quea bame mi ba'e mee cajji chi. Quea tai mi ba'e mee cajji chi. Ba'e mee cajji mi chi. Quecua ca'yogji mi chi.

¹⁰Jamajjeya ohuaya pea cuana huasijje ba majje ma dejja huohui ca cua jama ba'a: —¡Eme jeapisa'ajja'yosocue!

Majoya eme jeapisa ca'ya cua. ¹¹Beca cuana quea quene nee nee cua. Jama mimimimia cua ba'a: —Jesosa shajjama' nei nei cuani ecue esohuijo. Ohuaya jjameshahuanequi mee ca'yonaje ejomishocajji pojjajo. ¿Yajja acuae seya Jesosa aje jjeyahua nei e'iñajji? —jamaya cua Jodio dejja cuana Jesosa iñajji nisho.

Jesosaa chicha ca cua o shajja'a'jjajji cuana 12 huisome
(Mateo 10.1-4; Macoso 3.13-19)

¹²Oe pojjajo Jesosa poquia cua eyiyo quibo huasijje mimiya Eyacuiñajji nijje. Ojjaña mecajje mimia cua onijje. ¹³Eshequi jaasohuanijo, jjachichaquia cua o shajja'a'jjajji cuana nijje. ¹⁴Oya cuana yohua bajjani cua

ba'a: Simohui, quijje Jesosaa oya pea bajjani Peno aca'ya cua; Simohuija chahua yohua bajjani ba'a: Anesi; pea o shajja'ajjajji ca yohua bajjani cua ba'a: Jacobo, Huani, Penipe, Manotonome,¹⁵ Mateo, Tomasi, Apojoa bacua bajjani Satiaco; Simoni, ojaya meshi quea boti nee nee cua,¹⁶ Jacoboja bacua Jode bajjani. Pea dejja yohua bajjani cua ba'a: Jodasa Isicanio, oya Jesosaja epeejji nisho cua. Mahuiso o shajja'ajjajji cuana e'e jojo nei cua.

**Jesosaa quea dejja huiso huasijke Eyacuiñajjiya esohui huohui ca cua
(Mateo 4.23-25)**

¹⁷ Majoya Jesosa o shajja'ajjajji cuana nijje eyiyojo ani jaaoque o'oya cua. Jaaoque majje nequi'ya cua meshi bame bamejo esohui huohuiya. Quea huiso Jesosaja pea e shajja'ajjajji cuana jomajo ania cua. Quea dejja huiso cueya cua, Jodea meshijo ba'e cuana, Jenosanenajo ba'e cuana, Tinojo ba'e cuana, Sinonojo ba'e cuana pea'ai. Quea huesha ba'e cuana cueya cua Jesosa shajja'ajjaa. ¹⁸ Ojjañaa shajja'ajja'yo sa aca cua, jjaajaqui'yo sa cua pea'ai. Pea cuanajo nequi eshahua cuayaqui mee ca'ya cua Jesosaa. ¹⁹ Ojjañaa Jesosa napa sa aca cua pea jjaajaqui mee'yojjijojo. Jesosaa emeya napa cajje jjaajaqui ca'yonaje cuana.

**Jesosaja esohuiya dejja cuana quea bihui po mee caje beca cuana ca
quea yeno po mee caje
(Mateo 5.1-12)**

²⁰ Majoya Jesosaa ba majje o shajja'ajjajji cuana huohui ca cua jama ba'a: —Beca cuana jjashahuabauquiani jama ba'a: “E'e de, eya quea mimishi nee. Eyacuiñajjiya ecuea mimishi cacujecta ca'yahua”. Jamaya jjashahuabauquianijo Eyacuiñajjiya oya ba'e tiitii mee caje'yo onijje eyajo. ¡Oya cuana quea bihui nee capo'yahua!

²¹ —Ojaya epeejji cuana Eyacuiñajjiya esohui jayojja jama a sa neinei cuanijo Eyacuiñajjiya oya cuana quea jaji nee nee ba'e meesahua caje'yo. ¡Quea bihui nee capo'yahua oya cuana!

—Oja epeejji cuanaja mimishijo pa neineianijo Eyacuiñajjiya quea bihui nee po mee caje'yo mimishi cuijea ca'yajje.

²² —E'e, ¡miquianaya ecuea epeejji cuana, quea bihui nee nee pocue! Dejja cuana miquiana nijje mimijajje, miquianaya dejja cuaa cuia caje pea'ai, siajje minijje cuaje pea'ai. Jamatii, miquianaya ecuea epeejji cuanijo, dejja cuaa mimishi po mee'yo sa acani. Eyacuiñajjiya ca ca miquianaya quea bihui nee po mee caje'yo. ²³ Jamajjeya ¡jjeyahua nei quea bihui nee nee pocue! Eyacuiñajjiya miquianaya eyajo quia caje'yo miquianajaya aquiana quea bame nee nee, quea huiso nee nee. E'e, Eyacuiñajjiya esohui huohuijji yahuajo nei nei ba'ya cua jamaya aca cua mimishi cuaa; napa ca cua pea'ai. Jamajjeya ¡ona jayojja jama pocue, quea bei!

²⁴ —Joyaya nequiana oe quea aquiana huiso jjejojo, Eyacuiñajjiyo jjashahuabauqui jjima. ¡Bacue! ¡Jjeya miquianaya quea bihui nee nee

jjabaquicue! Majoya aje mi oe quijje quea yeno nee cuaje'yo cu aqui yasijje poqui majje mano'yo majje.

25—E'e de, ¡joyaya nequiana oe bobijo jjashahuabaquiani jjejojo Eyacuiñajijo jjashahuabaqui ajja bacute! ¡Jjeya miquianaya quea jejjje jjejojo quea bei jjabaquicue! Majoya aje mi oe quijje quea shoe nee nee, quea yeno nee nee cuaje'yo. Bobima' nei cuaje cu aqui yasijje poqui'yo majje.

—¡Joyaya mi oe quea bihui jjejojo soa ani jjabaquicue! Eyacuiñajijo jjashahuabaqui ajja, quijje pa neineije'yo; quea yeno nee nee cuaje'yo cu aqui yasijje poqui'yo majje.

26—¡A'a oe esohui huohuijji nisho pojji, dejja quea bihui epo meeji nisho pojji! Ma ecua esohui huohuijji nisho etiiquiaa quea bihui po mee ca cua jama. Jama po majjeya aje mi oe quijje cu aqui yasijje poqui'yo majje quea yeno nee cuaje'yo.

**Quea boti nee a'yocue dejja cuana minijje quea quene cuani
(Mateo 5.38-48; 7.12)**

27 Jesosaa jama aca cua ba'a: —¡Jjashajja'ajjaquicue oe! ¡A'a oe ona boti'ama pojji! 28 ¡Quea boti a'yocue dejja minijje quea quene cuani! ¡Joya miquiana nijje mimijajianijo mimicue Eyacuiñajji nijje ojo! 29 ¡Onaa shemo cuia cajje shemo mijipeajje cuia mee o'oyacue! ¡Onaa miquianajaya daqui jjequisejjajea cajo dojo mee'yocue miquianajaya pea daqui pea'ai! 30 Onaa: “¡Aquiana che mo quiacue!” acajje, ¡quiacueya oe! Onaa miquianajaya aquiana sii cajo ¡a'a huohui'ajja'yojji! 31 Miquianaya mimiani pea cuana nijje jama ba'a: “¡Enijje quea bame nee po tiitii'yocue!” ¡Jamajjeya miquianaya pea cuana nijje quea bame nee po tiitii'yocue!

32—Joya miquiana quea jea aiji cuani miquiaaya quea jea nee aña pea'ai; miquiana nijje quea quene cuani ca ca miquianajaya boti'ama. Dejja mimishi cuana aje oe jamaya cuani pea'ai. ¡A'a dejja mimishi jayojjaya pojji! ¡Ojjaña quea jea nee nee acue! 33 Miquianaaya miquianajaya epeejji quea bame aña, pea cuana caya ca oe boti'ama aña. Dejja mimishi cuaa aje oe jamaya acani pea'ai, de. ¡A'a dejja mimishi jayojjaya pojji; ojjaña quea bame acue! 34 Miquianaaya joya jjaquiaqui'yojji yasijje quiaña. Joya jjaquiaqui'yo ajja huasijje quia jjima aña. Dejja mimishi cuana aje oe jamaya cuani pea'ai. ¡A'a dejja mimishi jayojjaya pojji! ¡A'a quea dejja tai pojji! ¡A'a quea nishehui pojji! 35 ¡Miquianaaya miquianajaya epeejji pojjeama cuana quea jea nee a'yocue! Jamajjeya quea bame ba'eje'yo. ¡Pea cuana miquianajaya aquiana dojo sa cuanijo oe pojji cahuime dojo meecue! ¡Miquianaya a'a jjashahuabaquijji miquianajaya aquianajo, miquianajaya bejjojo! ¡Eyacuiñajijo oe jjashahuabaquicue! Majoya miquianaya ojaya epeejji nei cuaje'yo. Eyacuiñajji ojjaña cuanaya quea jea nee nee acani. Ojjaña dejja cuana, ojaya epeejji cuana, ojaya epeejji pojjeama cuanaya quea jea nee acani, de. ¡Jamaya oe pocue! 36 E'e de, esejaya Chii eyajo quea bame nee ani, ojjaña cuana Eyacuiñajji yasijje quea jea nee nee acani. ¡Eyacuiñajji jayojjaya jama po tiitiicue!

¡A'a pea cuana niñebajji!
(Mateo 7.1-5)

³⁷ Jesosaa jama aca cua ba'a: —¡A'a pea niñebajji! Jamaya Eyacuiñajjiya boti'ama. Miquianaya pea cuana niñebajji cuanijo, Eyacuiñajjiya miquianaya tecuea caje'yo pea'ai. Miquianaya pea nijje jjabeiqui'yajo Eyacuiñajjiya miquianajaya mimishi cuijea caje'yo. ³⁸ Miquianaaya pea cuana huasijje quea huiso nee quiajo, jamaya quea huiso nee nee miquianaya Eyacuiñajjiya oya huisoajjaya quia caje'yo pea'ai. Quea huiso nee nee cuaje, de. Oe pojji quiajo ca ca miquianaya Eyacuiñajjiya oya huisoajjaya quia caje'yo —jamaya Jesosa cua.

³⁹ Jesosaa pea esohui ejjashahuubaqui meeiji jama aca cua ba'a: —E'e de, ¿a'a acuae oe cojjamaa pea cojjama' me pejjejea majje dojo caje so'o? Cho, eme pejjejeajji pojjeama, o pea'ai oquejeaquije mei jjani yasijje, de. Cojjama' jayojja dejja mimishi pea dejja mimishiya dojo cajje cuaqi yasijje poquije'yo onije tii. ¡A'a cojama' jayojja pojji! ⁴⁰ Oe esohui huohuijji quea ja'a nee nee cuani. Ohua esohui huohui coo canijo, o shajja'ajjajji cuana quea ja'a pishana cuani. Jamatii ma eshajja'ajjajji quea ja'a cuaje ojaya esohui huohuijji shajja'ajja neinei majje. Jamajjeya jecuea esohui shajja'ajja neineicue quea ja'a epoji! Jamajjeya miquianaaya quea ja'a nee huohuijji pea cuana huasijje.

⁴¹ —Jamajjeya jjashahuaba bamebamequicue; a'a pea niñebajji! Jamatii miquianajaya epeeiji cuana quea mimishi cuajo, niñebaña. ¡A'a jamaya pojji! ¡Miyaya ebionei miquea mimishi cuana pajea'yocue! ¡Majoya miyaya pea cuana mimishi pajea meesahua'yocue! ⁴² Oya jayojja yani miquea epeeiji ecojjajo shabo mimishi jayojja. Jamajjeya miya jjashahuabaquiani miquea epeeiji ecojjajo nequi shabojo cuaya mee'yo sa aña jama ba'a: “Epeeiji, shabo biso neiya mi cojja dobi canaje. Ache ba'ajja; cahuijja'ajja'yosahua”. ¿A'a acuae jja oe miya jjabaquiani acui cojjajji so'o? ¡Ebionei miquea cojjajo nequi acui huijjia'yo socue! ¡Majoya miquea epeeiji shabo huijjia'yocue! —jamaya Jesosa cua.

¡Acui quea bame nee jayojja jama pocue!
(Mateo 7.17-20; 12.34-35)

⁴³ Jesosaa jama aca cua ba'a: —Oe acui quea bame, ojaya ejjajja quea bame pea'ai. Pea acui quea tai, jamajjeya ojaya ejjajja quea tai cuani pea'ai. ⁴⁴ Oe acui ejjajja nei cuani, pea jjajjame pojjeama cuani. ⁴⁵ ¡Miquianaya oe jjashahuabaquicue, acui quea bame nee jayojja jama pocue! ¡Quea bame nee jjashahuabaquicue Eyacuiñajjiyo! Majoya miquianaya quea bame ba'eje'yo. ¡A'a jjashahuuba taiquijji oe acui quea tai jayojja! Miquianaya jjashahuuba taiquiajo miquianajaya esohui quea tai cuaje'yo ma acuijjajja quea tai jayojjaya. ¡Jamatii jjashahuabaquicue Eyacuiñajjiyo, ojaya esohuiyo! ¡Quea bame ba'e tiitiicue pea dejja cuana nijje! —jamaya Jesosa cua.

**Oe dejja jjashajja'ajja neinei quia cua pea jjashajja'ajjaqui ajja cua
(Mateo 7.24-27)**

⁴⁶ Jesosaa pea esohui huohui ca cua jama ba'a: —Miquianaaya eya huohui nishoaña jama ba'a: "Emeshi Mese, eya shajja'ajja sa cuani miquea esohui". Cho, ecuea esohuijo jjashajja'ajjaqui sa po ajja miquianaya

—Jesosa cua—. ⁴⁷ Eyaya miquianaya huohuije beca dejjajo jama ba'a: Oe dejja equi iya bamebame canaje jayojja jama miquianaya jjashajja'ajja neineiquiani ecue esohuijo. Dejjaa equi iya canaje quea bame nee nee.

⁴⁸ Ohuaya tio canaje jjani emaco huasijje. Quea doe nee tio canaje. Majoya quea ca'a nee nee nequinaje equi yamajjana. Jama acanaje ojaya equi. Equi iya majje ena quea quemo cueyanaje, beni quea quemo cueyanaje pea'ai. Cuei jjayehuequi'yajo jaabichaqui'yo jjima equi cuanaje. Quea ca'a iyame jojoya mi jaabichaqui'yonaje —Jesosa cua—. Jamaya ecuea esohui shajja'ajja majje miquianaya quea ca'a cuaje ma equi jayojjaya.

⁴⁹ —Beca cuana jjashajja'ajjaqui ajja ecuea esohuijo jiquio ecua oe dejja iya tai canaje ojaya equi. Cuei sahuajo ba'e'yonaje. Ohuaya tio canaje jjani sisi; doe'ama. Ena quea quemo cuajo, beni quea quemo cuajo, cuei jjayehuequi'yajo ojaya equi jaabichaqui'yonaje; ca'a'ama equi cuanaje, de. Jamaya miquianaya ca'a'ama cuaje, ecuea esohuijo jjashajja'ajjaqui ajjajo —jamaya Jesosa cua.

**Jesosaa jjaajaqui mee ca ya'cua esohuinano meseja echacoji
(Mateo 8.5-13)**

7 ¹ Jesosa dejja cuana nijje mimijeyo majje poquia cua Capenaoma cuiñaggi yasijke. Oe Shomano esohuinano mese jomajo ba'ya cua. ² Ojo chacochacoani emanojaa cua. Beshahua nei poquijeyoa cua, de. Ma ojo chacochacoani quea bame chacochaco ania cua. Jamajjeya esohuinano meseya huaquia mee'yo sa aca cua. ³ Ohuaya shajja'ajja ca cua Jesosa yani, Jesosaa pea cuana jjaajaqui mee ca'yani. Jamajjeya esohuinano mese jama jjashahuabaquime cua ba'a: —¿A'a Jesosaa ejo chacochacoani jjaajaqui mee caje'yo? Caba'ajja.

Jamajjeya ohuaya huoojea ca cua Jodio etii cuana Jesosa huohui'ajja. Oya jama cua ba'a: —¡Poquicue; Jesosa huohui'ajjaquicue jiquiacua ecuejji! "¡Jjaajaqui meehua'yocue ejo chacochacoani!" acue —jamaya cua esohuinano mese.

⁴ Majoya aje Jodio etii cuana poquia cua Jesosa huohui'ajja. Huohui'ajja cañaquia cua esohuinano meseja esohui jama ba'a: —Jesosa, esohuinano meseya ecuana mi que huoojea canaje, ¡ojo chacochacoani jjaajaqui meequi'yocue pa! Esohuinano meseya aje oe quea bame nee nee nequi. ⁵ Jodio dejja cuana ohuaya quea bame nee ba'e meesahua cani. Ojaya ecuanaya quea boti nee nee, de. Ohuaya iya mee canaje equi ejjachichaquijji ecuanaja meshijo, de —jamaya cua Jodio etii cuana.

⁶Majoya aje Jesosa jama cua ba'a: —E'e, cua'a.

Majoya aje poquia cua esohuinano meseja equi yasijje. Equi chipi nei cuajo esohuinano meseya huoojea ca cua ojaya epeejji cuana Jesosa huohuiya. Jama aca cua ba'a: —Jesosa, ja'a miya cuejji! Miquea esohui quea poja nee nee. Jamajjeya jeo chacochacoani miya miquea esohuijo jjaajaqui mee'yocue! Eya esohuinano mese, jamajjeya miya pojja'a dobiqui sa po ajja ecuea equi yasijje. Eya jjashahuabaquiani miya pojja'a enijke mimi sa po ajja. ⁷Jamajjeya eyaya ecuea epeejji huoojeanaje minijke mimiya. Jomajo mimicue miquea esohui nei jama ba'a: “¡Ojo chacochacoani jjaajaqui'l yocue!” Majoya jiquiojo ejo chacochacoani jjaajaquije'yo. ⁸Jamaya ecuea emeshi meseya huohui cajje eya poquije'yo. Ecuea sohuinano cuana eya huoojeajje poquije. Pea sohuinano eyaya iyaajje cueje. Ecuea echacojji eyaya chaco meeajje chaco caje, de. Jamaya miya huohuiajje ecuea echacojji jjaajaquije'yo —jamaya esohuinano mese huoojeameya aca cua Jesosa que.

Jamajjeya ma ohua huoojea ca cua poquia cua, huohui cañaquia cua Jesosa esohuinano meseja esohuijo.

⁹Jesosaa shajja'ajja ca cua. Quea bihui cua esohuinano meseja esohuijo. Jesosaa huohui ca cua pea cuana onijke nequi, jama ba'a: —De, ma esohuinano meseja eba eyaya jiquiojo tii ojo chacochacoani jjaajaqui meeje'yo ecuea esohuijo tiiya. Jodio dejja cuana jjashahuabaqui neinei jjima oya jayojja. Oya ca ca oe jjapee neineiquinaje Eyacuiñajji nijje —jamaya Jesosa cua.

¹⁰Majoya esohuinano meseja epeejji cuana poquia cua oja equi yasijje. Majoya aje dobiqui majje ejjaajaqui'yo ani ba cañaqui'ya cua, Jesosaa esohuijo jjaajaqui'yo ani: —¡E'e de, e'e jojo nei ojaya esohui quea poja nee nee, de! —jamaya cuana cua.

Jesosaa shequi mee ca'ya cua e'ahuemano'yoja ebacua ejja eman'o'yojaa

¹¹Quijje pishana Jesosa poquia cua Naini yasijje. O shajja'ajjajji cuana, pea cuana pea'ai poquia cua onijke. Quea huiso poquia cua, de. ¹²Jesosaa Naini yasijje poquijeya ba ca cua pea dejja cuaa ebacua ejja eman'o'yo dojo caje ohuajeeaa. Enaese pa neinei poquia cua. Oya quea yeno nee nee cua oe nei nei oja bacuajojo, e'ahuemano'yo jjejojoya. Quea dejja huiso nee onijke cueya cua ebacua ohuajea sahuua. ¹³E'ahuemano'yoohua Jesosa quea yeno po mee ca cua, de.

Jesosaa majoya oya jama aca cua ba'a: —¡A'a pajji!

Ohuaya shequi mee'yo sa aca cua oja bacua ejja. ¹⁴Majoya aje Jesosa poquia cua ebacua ejja eman'o'yojaa huasijje. Majoya aje ma dejja cuana nequiñaquia cua Jesosa cueje ba majje. Jesosaa eman'o'yo dojiji napa ca cua. Majoya Jesosaa eman'o'yojaa jama mimiamc aca cua ba'a: —Esho'i, ¡shequi'yo jjeyahua nei!

¹⁵Majoya aje ma eman'o'yojaa anisohua'ya cua. Mimi'ya cua, de.

Jesosaa oya jama huohuime aca cua ba'a: —¡Poqui'yo jjeyahua nei!

¹⁶Ojjaña aje majoya jama cua ba'a: —¡De, esho'i emano neinei'yojaa shequi'yonaje yaña, de! Eyacuiñajjiya oya shequi mee ca'yonaje, de. Ohuaya Jesosa huoojea canaje ecuana huasijke. E'e, oya quea sohui poja nee nee, quea bihui nee nee po mee ca'yonaje ecuanaya. E'e de, e'e jojo nei Jesosa, oya cue'yonaje ecuana ba'e meesahuaa —jamaya ojjaña cuana cua.

¹⁷Jodea meshijo ba'e cuana, quea huesha ba'e cuana, pea meshijo ba'e cuana pea'ai Jesosajo huohui cañaquia cuaa cua.

Huaniya o shajja'ajjajji cuana Jesosa que huoojea ca cua

(Mateo 11.2-19)

¹⁸Huani Eyacuiñajjiya esohui huohuijijojo ejeanobiajaa cua. Jamatii Huani ejeanobiajajo o shajja'ajjajji cuaa Jesosaja esohui huohuiqui ca cua Huani que. ¹⁹Huaniya ma esohui shajja'ajja majje beca o shajja'ajjajji cuana huoojea ca cua Jesosa huohui'ajja. Jama huohuime aca cua ba'a: —Huohui'ajjacue Jesosa jama ba'a: “Jesosa, Eyacuiñajjiya ojjaña jaahuanajji huoojea caje'yo ecuana huasijke. ¿A'a miya ma ecuana jaahuanajji cuaniya? E'e pojja'a, pea pojja'a ecuaaya ishoa'ajjaje” jamaya acue —Huaniya aca cua.

²⁰⁻²¹Jamajjeya Huani shajja'ajjajji cuana poquia cua Jesosa huohui'ajja. Jesosa ba cañaquia cua emanojaa cuana jjaaqua mee'yo cuequi. Eshahua cuana cuaya mee'yo cuequi. Cojjama' cuana jjacojjaja'aqui mee'yo cuequi. Majoya oya cuaa huohui'ajja ca cua Huanija esohuijo.

²²Jesosaa jama saja'a ca cua ba'a: —E'e, ¡Huani oe huohuiquicue joya miquiaaya shajja'ajjanaje, joya miquiaaya banaje pea'ai! E'e, cojjama' cuana jjacojjaja'aqui mee'yonaje; jio'ajja cuana jeo mee'yonaje; dejja batata epo'yo cuana jjajeaqui mee'yonaje; shajjaqueba jjashajjaja'aqui mee'yonaje; emano'yo cuana shequi mee'yonaje. Esohui quea bame nee huohuinaje ojjaña dejja quea yeno huasijke Eyacuiñajjiya epeejji epo'yojji. ²³Jamajjeya ¡huohuiquicue Huani que! Jama huohuiquime acue ba'a: ¡Jjapee tiitiiquicue Eyacuiñajji nijje, enijje pea'ai; quea ja'a nee ba'ecue! Jama miya ajje quea bihui po tiitijje'yo —jamaya Jesosa cua.

²⁴Majoya aje Huani shajja'ajjajji cuana poqui o'oyanaje Huani que. Majoya o poqui'yajo, Jesosa pea cuana nijje Huanijo mimia cua: —E'e de, yahuajo Huani quimajo animaje. Miquianaya aje majoya o que poquinaje. ¿A'ya acuae jomajo banaje? ¿A'ya acuae miquianaya jjashahuabaquinaje Huanijo? ¿A'a jjashahuabaquinaje Huani esohui huohuijji quea ja'a pojjeama? Chojja. ²⁵Miquianaaya ¿ae banaje Huani que poqui majje? ¿A'a dejjaja daqui quea nahue nee ehuosho ba'e banaje? Chojja, dejja daqui quea nahue nee huosho cani equi quea quemojo ba'eya. ²⁶¿Achajja acuae Huani ba'enaje? ¿A'a miya jjashahuabaquinaje Huani Eyacuiñajjiya esohui huohuijji nei nei? E'e, de. Jamatii Eyacuiñajjiya pea esohui huohuijjiya quea ja'a pishana huohui ca cua. Huaniya ca ca quea ja'a nee nee huohui canaje. ²⁷Yahuajo nei Eyacuiñajjiya esohui etehue'yo Huanijo jama cua ba'a:

“Jiquio dejja ecuea esohui huohuijji nei cuani. Jamaya eya sa cuani. Eyaya oya huoojeaje ebionei mi hui dojodzi. Ohuaya dejja cuana huasijje huohui caje miquea ecuejjijo”.

Jamaya yahuajo nei nei Eyacuiñajjiya ojjaña ba mee canaje Huaniya e cue jjimahuajo, ejo jjabahuejjaqui mee ca'yonaje cuana. ²⁸Ecuea pea ehuohui a'a pajea'yojji jama ba'a: Huani ma ona besameejji cua oe dejjaya quea bame nee nee pea cuana jayojja jama pojjeama. Jamatii quijje eya Emeshi Mese nei cuaje, ojjaña ecuea epeejji Huani jayojja jama cuaje'yo quea bame nee nee —jamaya Jesosa cua.

²⁹Ojjaña dejja Huanija besamee Jesosaja esohui shajja'ajja majje quea bhui nee nee cua Eyacuiñajji nijje. Ojjaña dejja quea mimishi nee nee cuani cuaaya Eyacuiñajjiya esohui shajja'ajja majje mimishi pajea ca'ya cua. Jamajjeya oya cuana Huanija ebесamee cua. ³⁰Paniseo dejja cuaa Moisesija etehue'yo huohuijji cuaa pea'ai ca ca Huanija esohui shajja'ajja jjima aca cua. Eyacuiñajjiyo quea bhui pojjeama cua, Eyacuiñajjiya epeejji nei po sa po ajja jjejojo. Jamajjeya Huani que enajje pohua poqui jjima cua, mimishi pajea'yo sa po ajja jjejojo.

³¹Majoya aje Jesosa jama cua ba'a: —Dejja cuana mimishi pajea'yo sa po ajja ¿a'ya jayojja cuani? ³²Joya ecua esho'lquiana quebanei jayojja jama cuani. Esho'i cuana quebanei po majje joya pea que taaani jama cuaje pea nijje jjapeequi sa po ajja jjejojo. Jama jjamimihue'equime cuani ba'a: “Eyaya dehue miaña mi quea bhui epoji nisho. Jamatii miya quea bhui po sa po ajja. Majoya eya pa nishoani, emano'yojo pa ani jayojjaya mi quea bhui epoji nisho. Jamatii miya pa nisho ajja. Jamajjeya ecuea ba jjima eyaya miya achajja quea bhui po meeme aje. Miya niñepoqui jayojja cuani, jamajjeya quebanei po ajja” jamaya esho'lquiana quebanei cuani —Jesosa cua—. E'e de, jamaya dejja mimishi cuana jjeya cuani ma esho'lquiana jayojjaya. ³³Yahuajo pishana Huani cue'yonaje. Eyacuiñajji nijje mimi tiitiianjo bobo ijjia ajja cuanaje. Acuijjajja na sese ishi jjima aca cua. Ojjaña cuaa ca ca huohui canaje Huanijo jama ba'a: “Huani ca jja ca niñepoqui nei”. ³⁴Eya ca jja ca ijjia'ijjiani dejja mimishi cuana nijje. Oya cuana nijje mimimimiani. Jamatii beca cuana ejo siajje cuani jama ba'a: “¡Bacue jiquio dejja Jesosa! Dejja mimishi cuana nijje jjapeequiani; bejjo chichajji cuana nijje pea'ai jjapeequiani, de”.

Jamajjeya beca cuana ca ca jjapeequi sa po ajja enijje, Huani nijje pea'ai. Ecuea ba jjima achajja oya cuana eyaya quea bhui po meeme aje. Oya cuana esho'lquiana quebanei po ani jayojja cuani, de. Niñepoqui jayojja cuani. Oya cuana mimijajjani Huani nijje, enijje pea'ai. ³⁵Eyacuiñajjiya esohui e'e jojo nei. Jamaya ojjaña cuana oja esohuijjo jjashajja'ajjaqui majje quea ja'a po mee caje —jamaya Jesosa cua.

Oe Paniseo dejjaja equi yasijje Jesosa anicuaa poquia cua

³⁶Oe Paniseo dejja yohua bajjani cua ba'a: Simoni. Ohuaya Jesosa e'ijjia'ijjiajji iyaa ca cua. Jamajjeya oja equi yasijje poquia cua ijjia'ijjiaa. ³⁷Jesosa ijjia'ijjia anijo oe epona dobiquia cua equi yasijjeya Jesosa baa.

Ma epona quea mimishi ba'ya cua. Tahuoojo shiyeshiye ye ca cua, Jesosa ba majje.³⁸ Ojaya mimishijo quea yeno nee nee cua. Pa neinei ania cua. Ecojja naa shacula ca aña cua Jesosaja ejiojji. Ojaya esao ao'aohua cui ca aña cua. Jesosa quea jeajojo jiojji tojjo ca cua. Jesosaja ejiojji tojjo majje shiyeshiyeya jiojji sha ca cua.

³⁹ Ma Simoniya epona ba ca cua; jjashahuaba taiquia cua jama ba'a: —Jesosa Eyacuiñajjija esohui huohuijji nei pojjeama pojja'a. Jamajjeya jiquio epona quea mimishi nee nee ohuaya mi huoojea cani. Eyacuiñajjija esohui huohuijji nei nijje mimishi cuana jjanequichipiqui ajja —jamaya e'acaje'yo poso Simoniya aca cua.

⁴⁰ Jesosaja eba Simonija ejjashahuaba taiquijji. Majoya jama huohuime Jesosaa aca cua ba'a: —Simoni, ecuea esohui mi que ehuohuijji yani.

—¡Ocue mo huohui'ajja socue! —Simoni cua.

⁴¹ Jamajjeya Jesosaa jama huohuime aca cua ba'a: —Oe dejja quea bejjo huiso nee ba'enaje. Majoya aje becamejjiji pea'ai dejja poquinaje o que bejjo sosema' jjesheya, quijje esosequia'yojji nisho. Oe dejja iye huiso jjeshe canaje 500. Pea dejja ca jjeshe canaje ba'a oe pojji nei 50. ⁴² Ma dejja cuanaja oya sosequia'yojji jjima tii cuanaje. Jamajjeya ma dejja quea bejjo huiso jjapeequi sa cuanaje bejjo jjeshejji cuanaje cuana nijje. Jamajjeya ejjeshejji epo cuanaja ebajjani cuijea ca'yonaje jamatii bejjo sosequia'yojji jjimajo tiiya. Majoya oya cuana quea bihui po'yonaje bajjani cuijea ca'yajje. E'e, ¿ache dejja quea bihui nee nee cuanaje oja bejjo sosema'yo tiijojo? Ma dejja quea huiso, 500 sosequia jjima pojja'a. Pea dejja iye huiso, 50 sosequia jjima pojja'a —jamaya huohui'ajja ca cua Jesosaa.

⁴³ Simoni jama cua ba'a: —Ma dejja quea huiso bejjo quia canaje, 500.

Jesosaa jama aca cua ba'a: —E'e de, e'e jojo nei. ⁴⁴ Jamaya jiquio epona eya mimishi cuijea'yajje quea bihui nee cuani. Eya dobiquinaje miquea equi yasijje. Miya ca mi ca oe ecuea epeejji pojjeama cuanaje, Simoni. Jamatii beca cuana cueanijo equi meseya ojaya epeejji cuana jiojji topo cani. Jamaya miquea ajiima. Ma eponaa ca ca ecuea ejiojji topo canaje oja ecojja naa. Oja sao ao'aohua cui ca'yonaje. ⁴⁵ E'e, miyaya ecuea epeejji pojjeama jjejojo mi shemo tojjonaje. Jiquio eponaa ca mo ca ejiojji tojjo tiitii canaje ojaya quea jea nee neejojo. ⁴⁶ Miyaya eya sha jjima anaje shiyeshiyejo ejjapeequijji. Jiquio eponaa ca ca ecuea ejiojji sha canaje shiyeshiyeya ecuea epeejji nei sa cuaniya jjejojo. ⁴⁷ E'e, jamajjeya eyaya miya huohuaña jama ba'a: Ma epona jjapeequi sa cuanaje Eyacuiñajjija nijje. Jamajjeya aje oe ohuaya ecuea ejiojji topo canaje, quea shiye po mee canaje pea'ai. Ma epona quea mimishi nee nee cuanaje. Jamajjeya eyaya, Eyacuiñajjija pea'ai oya mimishi cuijea'yonaje quea jea nee neejojo —jamaya Jesosa cua.

⁴⁸ Majoya Jesosaa epona jama huohuime aca cua ba'a: —Miquea mimishi cuana eyaya cuijea'yonaje jjeyea nei.

⁴⁹ Pea dejja cuua equijo ijjal'ijja aniya Jesosajo jama huohuime aca cua ba'a: De, ¿a'ya acuae jja che mimishi cuijea'yojji pome so'o?

⁵⁰Jesosaja eba cuanaje ma dejja cuana mimi ca'ani. Jamajjeya ohuaya epona huohui ca cua jama ba'a: —¡Miquea mimishi cuijea'yonaje, jamajjeya quea bame ba'e'yocue mimishi'ama! —jamaya Jesosa cua.

Epona cuaa Jesosa yohua sahua ca cua

8 ¹Majoya aje Jesosa pea cuiñajji yasijje poquia cua Eyacuiñajji esohui huohuiya. O shajja'ajjajji nei cuana, 12 poquia cua onijje. ²⁻³Quea huiso epona cuana poquia cua Jesosa nijje, ma ohuaya yahuajo jjaajaqui mee ca'yonaje, edosiquiana cuaya meequei ca'yonaje pea'ai. Oe epona Sosana bajjani; pea epona Mania Madanena bajjani cua. Maniaja 7 edosiquiana cuana Jesosaa cuaya meequei ca'ya cua. Pea epona Huana bajjani cua. Oya Cosaja ehuanase cua. Cosa emeshi meseja, Enode Antipaja echacojjii cuana jaahuanajji cua. Quea huiso epona cuaa bobo jjeshe ca cua oja beijojo Jesosa bobiajji, o shajja'ajjajji cuani cuana bobiajji pea'ai.

Eso' jeaajajji

(Mateo 13.1-23; Macoso 4.1-20)

⁴Quea dejja huiso nee nee poquia cua Jesosa shajja'ajja. Jjachichaquia cua Jesosa pejjejo. Jesosaa huohui ca cua jiquio esohui. Jama huohuime aca cua ba'a: ⁵—Oe dejja poquinaje que yasijje eso' jeaajaa. Oe pojji eso' jeaaja canaje ejiojji yasijje. Cuichojji cuaa ma eso' ijzia ca'yonaje. ⁶Pea eso' jeaaja canaje meshi mei biajje ani yasijje. Majoya aje jeaaja cajje pohua'ajja'yonaje. Majoya aje pohua'ajja'yo majje shocana'yonaje. ⁷Pea eso jeaaja cajje oquequinaje acuisha yiye yasijje. Majoya aje jeaaja cajje pohua'yonaje. Majoya aje pohua'yo majje acuishaa mano mee ca'yonaje. ⁸Pea eso' ca ca meshi bame bame yasijje jeaaja canaje. Majoya aje jeaaja cajje tii'yonaje. Majoya aje tii'yo majje quea jjajja huiso nee nee cuanaje, de. E'e, mahuiso. ¡Shajja'ajjacue jiquio esohui; a'a shajjama' jayojja pojji! —jamaya Jesosa cua.

⁹Quijje o shajja'ajjajji cuana poquia cua Jesosa huohua'ajja. Jama huohua'ajjame aca cua ba'a: —¿Yajjajje ma esohui quea quehua cuanaje ecuanaja? —jamaya cua.

¹⁰Jesosaa jama huohuime aca cua ba'a: —Miquianaya Eyacuiñajjiya ba meesahua caje ojaya esohui eyacua. Beca cuana shajjama' cuani ca ca chuaya eba meesahujji pojjeama. Esohui eba meesahujjiho huohuiaña beca cuana shajjama' cuanijo. ¹¹Jamajjeya eyaya miquianaya huohuije quea ja'a epojji. Ma eso' Eyacuiñajjiya esohui jama cuani; meshi dejja jayojja cuani. ¹²Meshi ejiojji quea ca'a huasijje eso' oquequinaje, dejja shajjama' Eyacuiñajjiya esohui shajja'ajja sa po ajja jayojja. Eyacuiñajjiya esohui jjaja'aqui ajja quea sapa ca'a jjejojo. Cuichojjiya eso' ijzia cani jayojja jama Edosiquiana etiyya Eyacuiñajjiya esohui pajea mee ca'yani, jjaja'aqui mee jjima acani. Jamajjeya ohuaya dejja jjapeequi mee jjima acani Eyacuiñajji nijje. ¹³Meshi mei biajje anijo eso' pohua'ajja'yani jama jayojjaya dejja cuaa Eyacuiñajjiya esohui shajja'ajja cani. Ebioneiya aje ca Eyacuiñajji nijje jjapee

nishoquianiya. Majoya aje pea cuana onijje mimijajijo Eyacuiñajjiya esohui pajea ca'yani. Jjapeequi pajea'yani Eyacuiñajji nijje.¹⁴ Pea dejja meshi acuisha yiyejji jayojja jama. Eyacuiñajjiya esohui shajja'ajja cani. Ebioneiya aje ca oe shajja'ajja caniya Eyacuiñajji nijje jjapee nishoquiani. Majoya aje jjashahuabaqui'yani pea aquianajo quea mimishi epo'yojji. Jama jjashahuabaqui'yomeya cuani Eyacuiñajji epajea'yojji. Eyacuiñajjiya esohui ebajji nisho cuani. Ma eso' acuishaa mano mee ca'yani jayojjaya ejjashahuuba taiquijjiya aca'yani Eyacuiñajji nijje epo pajea'yojji.¹⁵ Pea dejja meshi quea bame nee nee jayojja cuani. Eyacuiñajjiya esohui shajja'ajja neinei cani. Shajja'ajja neinei majje Eyacuiñajjiya epeejji tii tii cuani. Ohuaya ojaya esohui ba neinei cani. Jjashahuuba bamebamequiani. Ma dejja cuana ecuea esohui ba neineiji epojji —jamaya Jesosa cua.

Esohui ehuohui'yojji cuaquijijiyo
(*Macoso 4.21-25*)

¹⁶ Jesosaa jiquio esohui jama huohuime aca cua ba'a: —¿A'a eseya eseja cuaquijijiya jeaja'a came eshajajo capa nequiya? Chojja. ¿A'a eseya ejaaaji quimejjejje nequiya jeaja'a came? Chojja, de. ¡Eseya quea ja'a po mee sa añajo ca eyajo nequiasohuacue ojjaña quea ja'a epojji! ¹⁷ Jama jayojjaya Eyacuiñajjiya ojjaña ecuea esohui onaaya ba mee caje'yo quijje. Quea ja'a nee cuaje'yo. ¹⁸ Miya ecuea esohui shajja'ajja sa cuanijo Eyacuiñajjiya miya quea ja'a nee nee po mee caje. Beca cuana ecuea esohui shajja'ajja sa po ajjajo ohuaya quea ja'a po mee jjima acaje —jamaya Jesosa cua.

Jesosaja nae, oja chahua pea'ai
(*Mateo 12.46-50; Macoso 3.31-35*)

¹⁹ Majoya Jesosaja enaese cue'ya cua equi yasijje Jesosa ba'yo huela. Ba'yo jjima cua ojaya, quea dejja huisojojo. ²⁰ Oe dejja Jesosa jama huohuime aca cua ba'a: —Mique naeya mi sa'ajja ca'yoqui mique chahuaa pea'ai.

²¹ Jamaya Jesosa cua ba'a: —E'e de, ojjaña nei neiya Eyacuiñajjiya esohui shajja'ajja neineiji cuani ecue nae nei nei cuani, ecue chahua nei nei cuani, Eyacuiñajjiya epeejji nei nei cuanijojo —jamaya Jesosa cua.

Jesosaa beni nequioque meequi ca cua
(*Mateo 8.23-27; Macoso 4.35-41*)

²² Oe pojajjo Jesosaa o shajja'ajjajji cuana jama aca cua ba'a: —¡Cua'a; bae ojje miji yasijje besa poquicue!

²³ Jamajjeya bishe ai yasijje ojjaña ania cua. Jesosa onaa dojobesa cajje cahuia cua. Majoya aje quea ichi po majje beni quea quemo nee nee cueya cua. Enashajohuela bishe nanejea ca cua. ²⁴ Oe dejja majoya Jesosa jama ishe'ame aca cua ba'a: —Eshui huohujji, ¡shequicue oe! Coya aje se hui'il'ya.

Majoya aje Jesosa shequijeanana cua onaa ishe'a cajje. Majoya aje shequi majje mimia cua beni nijje, ena nijje pea'ai. Majoya aje o mimiajo beni

nequioquequia cua enashajo pea'ai. Majoya aje enashajo po jjima jayojja po'ya cua. ²⁵O shajja'ajjajji jama mimimeya cua ba'a: —De, Jesosa quea sohui poja nee nee, de. Miminaje beni nijje; beni po jjima jayojja po mee ca'yonaje, de.

Majoya aje Jesosaa jama aca cua ba'a: —¿Yajjajje acuae jja nequiana metenaje so'o, de? Jjashahuabauqui jjima pojja'a jja nequiana Eyacuiñajijo, de —Jesosa cua.

Dejjaja eyamijo nequi eshahua cuana Jesosaa cuaya meequi ca'ya cua
(Mateo 8.28-34; Macoso 5.1-20)

²⁶Majoya oya cuana ba'eñaquia cua Jjanana meshi yasijje. Ba'eñaquia cua pea ojje miji yasijje, Janinea ba'e cojja nei besa poquia cua. ²⁷Jesosa bishejo ani etaja huasijje nequisohuaquiajo, oe dejja cueya cua. Ma dejja quea shahua huiso jjejojo niñepoqui cua. Daquima' nei nei cua; quima' pea'ai. Oya emojajaaca huasijje ba'yaa cua. ²⁸⁻²⁹Jamatii oya quea tai po mee canaje eshahuaa. Jamajjeya oya dejja cuaa jeyo ca cua cadenaa, poqui ajja epoji. Jamatii ca ca cadena jjasejjajeaqui mee ca cua eshahuaa. Poqui mee ca'ya cua ma quima huasijje, de. Ma dejja Jesosa ba neinei ca cua. Majoya aje Jesosaa jama aca cua ba'a: —¡Eshahua cuana, cuayaqui'yocue!

Majoya ma dejja jama cua ba'a: —De, miya Jesosa, Eyacuiñajijo Bacua Ejja e'e jojo nei. ¡A'mo miyaya jinapajji so'o! —jamaya cua.

³⁰Majoya Jesosa jama cua ba'a: —¿Ae bajjani acuae miya?

—Eya Quea Shahua Huiso bajjani —jamaya cua ma dejja quea shahua huiso jjejojo.

³¹Eshahua cuaa Jesosa jama huohuime aca cua ba'a: —¡A'ecuana huoojeajji cu aqui yasijje! ³²¡Ecuana oe cuichi cuanaja yami yasijje dobiqui mee'yocue!

—¡E'e ocuae dobi'ajjaqui socue! —jamaya aca cua Jesosaa.

³³Majoya aje cuayaqui'ya cua dejja eshahua cuana, dobiqui'ya cua cuichi cuana huasijje. Majoya aje cuichi cuana emacojo nequi cuajicuaji jaaoquequinana cua bae yasijje; hui'i'ya cua ojjaña. ³⁴Cuichi hui'i'je'yo ba majje cuichi jaahuanajji cuana poquia cua cuiñajji yasijje ojjaña huohuiya. Jama aca cua ba'a: —De, Jesosaa eshahua cuana cuaya mee canaje dejja niñepoqui meeji po nequinaje. Dobiqui mee canaje ecuanaja cuichi yasijje, hui'i'yonaje ojjaña cuichi, de. Cuajicuajinanana je bae yasijje, hui'i'yonaje. ¡Chama'yo tii, de!

³⁵Majoya ojjaña dejja cueya cua ae Jesosa po ani baa. Onaaya cue majje ba ca cua ma dejja niñepoqui cuanaje Jesosa pejjejo ani. Ma daquima' cuanaje daquijji ani'yo ba ca'ya cua dejja cuaa; quea bei ani'yo ba ca'ya cua. Jesosa quea sohui poja nee neejo ojjaña quea mete po'ya cua. ³⁶Ma niñepoqui bajji cuanajeya Jesosajo huohui ca nequi'ya cua pea meshijo ba'e yasijje jama ba'a: —Jesosaa eshahua cuana cuaya meequi ca'yonaje.

³⁷⁻³⁹Ojjaña cuana ma meshijo ba'e quea mete nee nee cua. Quea meteya jjejojo Jesosa huoojeajea ca'ya cua. Ma niñepoqui cuanajeya ca ca Jesosa jama huohua'ajjame aca cua ba'a: —Jesosa, eya minijje poqui sa cuani.

Jesosa jama cua ba'a: —Chojja, ¡miya poquicue miquea huapa pojjeama cuana huasijje! ¡Huohuiquicue ojjaña ma mi Eyacuiñajjiya jama acanaje! —jamaya Jesosa cua.

Majoya aje ma dejja poquia cua o ba'e yasijje huohuiya. Huohui ca'ya cua Jesosaa eshahua cuayaqui mee ca'ya cua.

Jainoja bacua piona emano'yojaa pea epona najji poani tii tii
(Mateo 9.18-26; Macoso 5.21-43)

⁴⁰Majoya aje Jesosa besajebe'ya cua. Ba'leña'ya cua ojaya meshi yasijje. Ojjaña cuanaja Jesosa quea boti nee cua. Ishoa'ajja ca nequia cuaa cua. ⁴¹Oe dejja Jaino bajjani Jodioja ejjachichaquijji equi jaahuanajji cua Cesanenajo. Oya cueya cua Jesosa que. O cojja nei ecui'oshajjajo nequioqueña cua. Ohuaya Jesosa huohua'ajja ca cua ojaya equi yasijje epoquijji oja bacua piona jjaajaqui mee'yojji. Ojaya ebacua piona ahuema'ani quea mano nee nee cua. ⁴²Oja bacua piona oe nei cua, de. Majoya aje Jesosa onijje poquia cua. Beshahua nei poqui jjima cua quea dejja huisojojo. ⁴³Oe pea epona quea mano dejja quea huiso yiyesamajo nequi. Oya quea mano nee nee, ojaya ena' cuayaqui nequia cua 12 shequijame, de. Oya eshicuijji jjeshejjii jjejojo bejjoma'y cua. Eshicuijji quiajjija epona na' cuaya pajea meequivi'y jjima cua. ⁴⁴Jesosa poquianijo ohuaya Jesosaja daqui cuesha iña ca cua. Ma daqui cuesha iña cajje aje najji popajea mee ca'ya cua. ⁴⁵Majoya aje Jesosaa jama aca cua ba'a: —¿Aya acuae mo iña canaje so'o?

O shajja'ajjajjiya, Penohua jama aca cua ba'a: —Cua'a, de. Quea dejja huisohua jjejojo mi, ¿aya shai mi iña canaje Jesosa? Napa jjima ca mi ca ecuanaja —jamaya Jesosa aca cua Penohua.

⁴⁶Jesosa jama cua ba'a: —Cho, ecuea eba Eyacuiñajjiya a'ya shai huaquia mee ca'yonaje e daqui iña cajo.

⁴⁷Ma epona Jesosaja esohui shajja'ajja majje piopio cua. Ojjaña nequijo piopiojea cua. Ecui'oshajjajo nequioqueña cua Jesosa nequi yasijje. Ohuaya Jesosa jama huohuime aca cua ba'a: —E'e ee, Jesosa, eyaya nei miquea daqui cuesha iñanaje. Jjashahuubaqui majje che mi daqui iña majje ena' huosa mee'yojji. Jamajjeya che eyaya jamaya miya anaje —jamaya ma epona cua.

⁴⁸Majoya Jesosa jama cua ba'a: —¡A'a quea mete pojji, she! Eyaya miya na' huosa mee'yonaje, miya jjashahuaba neineiquinajejojo. ¡Poquicue, quea bihui po'yocue!

⁴⁹Jesosa epona nijje mimianijo tii Jainoja epeejji cueya cua Jaino que. Jama cua ba'a: —Jaino, miquea ebacua piona mano'yonaje. Chama'y o tii, de. ¡A'a poqui meeiji ma esohui huohujji nei!

⁵⁰Jesosaa ma esohui shajja'ajja majje jama huohuime aca cua ba'a: —¡A'a miya quea mete pojji! ¡Jjashahuaba neineiquicue oe Eyacuiñajjiyo! Miquea bacua jjeya shequije'yo.

⁵¹Majoya Jainoja equi yasijje poquiña cua. Jesosaa beca cuana dobiqui mee jjima aca cua equi yasijje. Peno, Satiaco, Huani ca ca oe dobiqui

mee ca cua. Ma ebacuaja chii enaese pea'ai dobiqui mee ca cua. Mahuiso dobiquia cua emano'yojaa baa.

⁵²Dobiqui majje oya cuaa ba ca cua ojjaña pa'ani quea yeno nee nee jjejojo, ebacua emano'yojaa. Jesosaa jama huohuime aca cua ba'a:

—¡A'a pajji! Ma epona sho'i mano'yo jjima, ecahuijaa.

⁵³Majoya ojjaña soa'ya cua. Ojjaña jama aca cua ba'a: —Chojja, mano neinei'yonaje jja coma, de —cuana cua.

⁵⁴Majoya aje Jesosaa epona sho'ija eme iña majje janobajjima nei mimia cua jama ba'a: —¡Esho'i, nequisohuacue!

⁵⁵Majoya aje shequi'ya cua, nequisohua'ya cua: —¡Quiacue oya bob! —Jesosa cua.

⁵⁶Ma esho'ija chii quea bihui po'ya cua oja nae pea'ai. Jesosa jama cua ba'a: —¡A'a huohuijji cuana jiquio eya mique bacua shequi mee'yonajejo! —jamaya Jesosaa aca cua.

**Jesosaa o shajja'ajjajji cuana 12 huoojea ca cua esohui huohuiya
(Mateo 10.5-15; Macoso 6.7-13)**

9 ¹⁻²Jesosa jjachichaquia cua o shajja'ajjajji cuana nijje, 12 huisome nijje. Ohuaya jama huohuime aca cua ba'a: —Eyaya miquianaya huoojeaña pea cuana huasijje esohui huohuiya, pea cuana jjaajaqui mee'yohua, eshahua cuayaqui mee'yohua pea'ai. ¡Huohuicue jama pea cuana huasijje ba'a: “Eyacuiñajji ojjaña huoojeajji cuaje'yo” acue! ³¡Aema' oe poquicue! ¡A'a acui ejjaquecuaca'aquijji dojiji; bashosoco pea'ai a'a dojiji! ¡A'a bob, beijo pea'ai dojiji! ¡Ma miquea eyamijo ba'e nei oe dojocue! ⁴¡Po'ayequi nequicue oe pea cuiñajji yasijje! ¡Miquianaya oe pea cuiñajji yasijje poqui majje miquianajaya epjeejjii epoji sa'ajjacue; ojaya equijo anicue! ⁵Dejja cuaa pea cuiñajji ba'eya miquianajaya esohui cajaa acaje'yo pojja'a. ¡Huohuicue jja oe ma dejja cuana jama ba'a: “Quea mimishi mi coma” acue! “Eyacuiñajjiya jja miya ba cani. Ohuaya jja miya quea nee nee po mee caje'yo” acue. ¡Ma esohui jama huohui majjeya oe cuayaqui'yocue cuiñajjiyo anil! ¡Majoya cuayaqui'yo majje miquianajaya ejiojjijo ani meshi pohui cuiayajajeana'yocue oya cuana jjashajja'ajjaqui ajja cuanajejojo! ¡Jamajjeya oe pea cuiñajji yasijje poquicue! —jamaya Jesosaa aca cua.

⁶Jamajje o shajja'ajjajji cuana po'ayequi nequia cua Jesosaja esohui huohuiya. Onaaya huohui ca cua Eyacuiñajjiya esohui; jjaajaqui mee ca'ya cua emanojaa cuana.

**Jesosa emeshi meseya Enode Antipaa Huani poso aca cua
(Mateo 14.1-12; Macoso 6.14-29)**

⁷Emeshi meseya Enode Antipaa shajja'ajja ca cua peaja esohui Jesosajo. Pea cuaa Enode siajje aca cua jama ba'a: —Huani ca jja ca Jesosaya cuanaje. Huani ca jja ca shequi'yonaje —pea cuana cua. Enode quea ajjajja nee nee cua

Jesosa Huani poso jojoya. ⁸Pea cuaa Enode siajje aca cua jama ba'a: —Chojja, Jesosa ca jja ca Eniaya, ma etiiquiana shequi o'oyanajeya —posoya aca cua.

Pea cuana jama siajje pomeya cua: —Jesosa pojja'a pea etiiquiana shequi o'oyanaje.

⁹Enode majoya jama cua ba'a: —Eyaya nei ca jjaja ca Huani sapasejjajea meenaje, Huani mano neinei'yonaje, ecuea jjaja eba, de. ¿Ajeo shai jjaja ojjaña mimiani? Ache jja eyaya caba'ajja sahua Jesosa —jamaya Enode cua.

Jesosaa 5.000 dejja cuana bobia ca cua

(*Mateo 14.13-21; Macoso 6.30-44; Huani 6.1-14*)

¹⁰Quijje o shajja'ajjajji cuana esohui huohuiya poqui cue o'oya cua; Jesosa que huohui poña'ya cua. Majoya Jesosa shajja'ajja majje oya cuana poquia cua Betesaina huasijje. ¹¹Jornajo o ba majje ojjaña jjachichaquia cua Jesosa que. Ojjaña queabihui cua Jesosaa Eyacuiñajjiya esohui huohui caquijo. Jesosaa jama aca cua ba'a: "Ojjaña joya mimishi pajea'yoji cuani, onijje e'e nei jjapeequiani Eyacuiñajjiya jaahuana caje'y'o". Ohuaya emanojaa cuana jjaajaqui mee ca'ya cua pealai. ¹²Jjasinecuaquiajoojjaña quea shoe nee cua; ye jjima ojaya bobo cua. O shajja'ajjajji cuaa Jesosa jama huohuime aca cua ba'a: —¡Huoojeacue ojjaña, bobo sal'ajja, ecahuijji sal'ajja pealai! Beshahua nei esejaya bobo jiquiojo chama'ba'a, de.

¹³Jesosa jamaya cua: —Chojja, ¡miquianaaya oe bobo quiacue e'lijjajji!

Jamaya oya cuana cua: —De, oe pojji bobo yani. Beca nahuoo sisi yani, me oejje pahui yani. ¿A'a ecuanaya capoquiahua cuiñajji yasijje bobo jjequiyapoija'a, ojjaña dejjaja bobo jjequiyaj; quea bobo huiso epojji?

¹⁴Yani quea dejja huiso nee nee, 5.000 yani, de.

Jesosaa jamaya aca cua ba'a: —Chojja, ja'a poquijji, ojjaña cuana anioque meecue, jjaanichichaqui meecue pea jjocojo, 50 anioque meecue!

¹⁵Majoya aje o shajja'ajjajji cuaa dejja cuana jama aca cua ba'a: —¡Anioquecue oe nequiana!

¹⁶Majoya acua po majje Jesosaa ma pahui nahuoo pea'ai jjeshe ca cua oja emeya. Jjeshe majje eyahuasijje jjabajeasohuaquia cua Eyacuiñajji nijje emimiji. Ohuaya Eyacuiñajji bihuia ca cua bobo e'lijjajji. Majoya Jesosaa miji sisisisi ca cua pahui, nahuoo pea'ai. Majoya ohuaya bobo quia ca cua o shajja'ajjajji cuana huasijje. Pea cuana huasijje quia ca cua o shajja'ajjajjiya. ¹⁷Ijjia'lijjia majje ojjaña dejja cuana quea jejje cua, de. Ojjaña dejja cuana jejjeajo iya ca'ya cua pea eshajajao tiiya iya ca poqui'ya cua; 12 shajame bobo e'lijjisejjaja ecuatajea cua.

Penohua Jesosa shahuaba ca'ya cua oya Quito

(*Mateo 16.13-28; Macoso 8.27-9.1*)

¹⁸Oe pojajao Jesosa oe nei mimia cua Eyacuiñajji nijje. O shajja'ajjajji cuana onijje nequia cua quea huesha pishana. Jesosaa oya cuana huohui'ajja ca cua: —¿Yajja mimime dejja cuana ejo cuani?

¹⁹ Jamajjeya o shajja'ajjajji cuana jama cua ba'a: —De, pea cuana ca jja ca mijo jama mimime cuani ba'a: Miya ca pajja mi ca pea dejja cuaa Huani poso acani. Pea dejja ca pajja mi ca Enia poso acani, ma etiiquiana, de. Pea dejja ca pajja mi ca pea etiiquiana shequi o'yowanaje poso acani, de.

²⁰ —De, ¿miquianaya yajja cuani so'o? —cua Jesosa.

Peno ca ca jama cua ba'a: —Miya ca ca Eyacuiñajjija Bacua Ejja oe nei, oja huoojea'yo ojjaña jaahuanajji epojji. Ecuea Emeshi Mese nei nei, de. Miya Quito bajjani ecuea Emeshi Mese nei nei jjejojo.

²¹ Majoya Jesosaa Peno jama huohuime aca cua ba'a: —E'e de, e'e jojo nei. ¡A'a huohujji pea cuana, ecuea bajjani Quito, miquea Emeshi Mese nei! ²²Eya Eyacuiñajjija huoojea'yo. Eya quea nee nee acaje'yo cuaa. Beca cuaa eya cajaa acaje'yo, Jodio etii cuaa, Eyacuiñajji nijje mimiani etii cuaa, Moisesija etehue'yo huohujjiya pea'ai. Mano mee caje'yo eya, de. Eya mano'yo majje pea beca peejjima cahuime po majje shequije o'oya —jamaya Jesosa cua.

²³ Majoya aje o shajja'ajjajji cuana Jesosaa huohui ca cua jama ba'a: —Ojjaña ca jja ca enijje e'e jojo nei jjapeequi'yo sa cuani, oya Eyacuiñajjija esohui jayojja caba'yahua. E'e, je jayojjaya pocue; enijje poqui'yocue! Jamatii onaa napa cajje aje jja mi oe quea nee nee cuaje'yo. ²⁴E'e, ojjaña cuana ecuea esohui shajja'ajjajji cuani ca ca ba'e tiitije'yo enijje eyajo. Joya ecuea esohui shajja'ajjajji cuani ca ba'e tiitije'yo enijje eyajo. ²⁵E'e pojja'a dejja quea huiso nee nee aquiana ojaya yajji chicha cani. Jamatii oya cuana cuaqui yasijke jea cajo ojjaña ojaya aquiana cuana edojoji pojjeama. ¿A'a ojjaña ojaya aquiana cuana quea bame cuaje oya cuaqui yasijke poqui majje? Chojja, de. ¿A'a aquiana sosejje cuayaqui mee caje'yo cuaquijo ani? Chojja, de. ²⁶Oe dejja pojja'a: "Cajaa" cuani ejo, ecuea esohuijo pea'ai. Jamajjeya eyaya cue o'oya majje oya cajaa aje'yo pea'ai. E'e jojo nei eya ojjañaja Edoe Mese cueje o'oya. Quea jeajahua nee nee, quea ca'a nee nee cueje'yo. Eya esohuidojoji quea huiso nee nijje cueje o'oya, de. ²⁷E'e jojo nei miquianaaya jiquiojo nequiya mano'yo jjimahuua Eyacuiñajjija epeejji nei quea huiso nee nee baje —jamaya aca cua Jesosaa.

Jesosa quea cojja jiji cua
(Mateo 17.1-8; Macoso 9.2-8)

²⁸Quijje, jiquio esohui huohui majje oe nomico ani'yo Jesosa poquia cua eyiyo huasijke. Peno, Satiaco, Huani pea'ai poquia cua onijje. Poquia cua Eyacuiñajji nijje mimiya. ²⁹Eyacuiñajji nijje mimi majje Jesosaja ecojja quea jiji nee nee cua eshequi jayojja. Ojaya daqui pea'ai quea oshe nee nee, quea siyo nee nee cua. ³⁰Beca dejja ermano'yo eyajje jjanequija'aqui'ya cua Jesosa nijje. Oya cuana mimia cua Jesosa nijje. Oe dejja Moisesi etiiquianaya cua. Pea ca Enia etiiquiana cua, ma yahuajo nei nei ba'ya cua. ³¹Quea bame nee nee quea jiji nee nee miminequia cua Jesosa, Enia, Moisesi pea'ai. Jesosa miminequia

cua onaja mimishijo emano'yojji jjejojo Jenosanenajo. Jama mimimea cua Jesosa. ³²Peno, Satiaco, Huani pea'ai quea cojja mano cua. Majoya aje shequi neil'ya cua, ba ca cua Jesosa, Enia, Moisesi pea'ai; quea jiji nee nee nequi, de. ³³Moisesi Enia mimijeyo majje poqui o'oya cua eyahuasijje. Poquije'yo ba majje Penohua Jesosa jama aca cua ba'a: —De, Esohui huohuijji, quea bame nee nee ecuanaya jiquiojo ani. Pea beca peejiima equi ejja'iyaqui, oe miquea, oe Moisesija, oe Eniaja —jamaya cua Peno jjashahuaba bamequi jjima jjejojo.

³⁴Peno mimianijo tii bo oshe nee neyya oya cuana quehua ca cua. Bo ba majje quea mete nee nee po'ya cua. ³⁵Majoya Eyacuiñajjiya bo tejjeeya esohui huohui ca cua jama ba'a: —Jiquio Jesosa ecue Bacua Ejja, ecuea quea jea nee nee, eya ojo queabihui nee nee. ¡Oya oe oe neiya shajja'ajjacie! —jamaya aca cua bo tejjee Eyacuiñajjiya.

³⁶Ohuaya cuana ma esohui shajja'ajja majje ba ca'ya cua Jesosa oe nei nequi; pea cuana chama!. Peno, Huani, Satiaco pea'ai mimi'yo jjima nequia cua. Pea o shajja'ajjajji cuana huohui jjima aca cua. Quijje nei nei ca huohui ca cua, de.

**Esho'i niñepoqui Jesosaa eshahua huoojea ca'yajo niñepoqui pajea mee
ca'ya cua**

(Mateo 17.14-21; Macoso 9.14-29)

³⁷Mecahuajje jjapojjaquiajo Jesosa eyiyojo nequi jaaoque'ya cua. Quea dejja huiso nee neyya Jesosa ishoa'ajja ca nequia cua. ³⁸Oe dejja janobajjima nei jama huohuime aca cua ba'a: —¡Esohui huohuijji, bahuacue ecue bacua! Ecuea ebacua oe nei, de. ³⁹Eshahuaa napa cajje, taaani jeabichajea canaje meshi yasijje; huapani pea'ai. Eshahuaa manojea mee'yo sa acani. Jamatii oya cuani, de. ⁴⁰Eyaya huohui'ajjanaje miquea eshajja'ajjajji cuana eshahua cuayaqui mee'yojji. Eshahua cuaya meequi'yo jjima acanaje mi shajja'ajjajji cuaa —jamaya aca cua niñepoquija ejeajjiya.

⁴¹Jesosaa ojjaña cuana jama aca cua ba'a: —De; ¿ache shono acuae jja nequiana ejo jjashahuabaquije e'lé jojo nei? ¡Quea sapa ca'a mi coma! ¿Ache cahui huiso minijje nequi majje miyaya eya baje'yo Eyacuiñajjiya huoojea'yo ojjaña jaahuanajji quea ca'a nee nee? —jama tecueameya Jesosaa aca cua.

Majoya ma dejja Jesosaa huohui ca cua jama ba'a: —¡Miquea ebacua jjequicue!

⁴²Majoya esho'i jjequi ca cua Jesosa que. Ye cajo eshahuaa esho'i jeabichajea ca cua; niñepoquia cua. Jesosaa eshahua esho'ijo nequi cuaya meequi ca'ya cua. Esho'i niñepoqui pajea'ya cua. Majoya aje Jesosaa ejeajji nijje esho'i poqui mee ca'ya cua. ⁴³Ojjaña ba majje jama aca cua ba'a: —De, quea sohui poja nee Jesosa cuanaje. Eyacuiñajjiya Jesosa quea sohui poja nee po mee canaje.

Jesosaa huohui ca o'oya cua o manoje'yojo
(Mateo 17.22-23; Macoso 9.30-32)

Ma esho'i niñepoqui pajea mee'yo majje oijañaa bihuia ca cua Jesosa, Eyacuiñajji pe'a'i. Ohua bihuia cajje Jesosaa o shajja'ajjajji cuana jama aca cua ba'a: ⁴⁴—¡Shajja'ajjacie jiquio esohui! ¡A'a pajea'yojji! Quijje dejja cuua eya iña caje emano mee'yojji —jamaya cua Jesosa.

⁴⁵ O shajja'ajjajji cuanaja ca quea quehua cua Jesosaja esohui. Eyacuiñajjiya quea quehua po mee ca'ya cua. Jamatii oya cuana quea mete cua ehuohui'ajjajji.

¿Ache dejja quea bame eyajo cuaje'yo?
(Mateo 18.1-5; Macoso 9.33-37)

⁴⁶ Jesosa shajja'ajjajji cuana jjaniñeabaqui ania cua. Jama cua ba'a: —¿Ache oja eshajja'ajjajji acuae eyajo quea bame nee nee nequije so'o? Eya nei emeshi mese cuaje eyajo, pojja'a, miya pojjeama.

Pea aje oe jama cua ba'a: —Choja, eya, de.

⁴⁷ Jesosaa jama tecueame aca cua ba'a: —Miquianaya jjashahuaba taiquiani. ¡Shajja'ajjacie oe! ⁴⁸ ¡Bacue jiquio esho'i cuana, emeshi mese po sa po ajja! ¡A'a emeshi mese po sa pojji! ¡Jamaya miquianaya pocue esho'i jayojjaya! ¡Jjapeequicue jiquio ecua esho'i cuana jayojja oe pocue, dejja quea bame nee nee epoji! Miquianaya ecuea epeejji nijje jjapeequi majje miya ecuea epeejji cuani, Eyacuiñajjiya epeejji pe'a'i. Jamajjeya miquianaya esho'i quea bame jayojja cuani, majoya miquianaya quea bame nee nee nequije'yo eyajo —Jesosa cua.

Oe dejja Edosiquianaja epeejji pojjeama cuani jamajjeya oya Jesosaja epeejji nei cuani
(Macoso 9.38-40)

⁴⁹ Majoya Huaniya Jesosa jama aca cua ba'a: —Esohui huohuijji, ecuaa banaje oe dejja; ohuaya pea cuanaja eshahua cuana cuaya meequi ca'yonaje miyaya jayojjaya. Miquea epeejji cuani pojja'a, oya ca ca cue ajja tii ecuana nijje. Jamajjeya ecuaa oya jama huohuinaje ba'a: “¡A'a cuayaqui mee'yojji eshahua; miya ecuana nijje poqui ajja!”

⁵⁰ Jesosa jama cua ba'a: —Cho, ¡a'a jama pojji! Oya ecuea epeejji nei cuani. Oya Edosiquianaja epeejji pojjeama cuani, jamajjeya oya ecuea epeejji cuani. E'e, ma dejja quea bame cuani, oya quea tai pojjeama. Jamajjeya oya ecuanajaya epeejji cuani pe'a'i —jamaya cua Jesosa.

Jesosaa Satiaco Huani pea'ai tecuea ca cua

⁵¹ Beshahua nei acua cua Jesosa emano'yojji, eyahuasijje epoqui'yojji pea'ai Eyacuiñajjiya esohui jayojja yajji. Jamajjeya jjashahuabaqui majje oya poquia

cua Jenosanena huasijje o shajja'ajjajji cuana nijje. ⁵²Poquijeya Jesosaa beca o shajja'ajjajji cuana huoojea ca cua Samania meshi yasijje ecahuijji sa'ajja. ⁵³Jomajo Samania dejja jama cua ba'a: —Chojja, ja'l a miquianaya jiquiacua cuejji! Cajaa, miquianaya Jodio dejja jojoya, ecuanaja ca mi ca bot'iama Jodio dejja cuana Jenosanena huasijje poqui majamajajjijojo Eyacuiñajji bihuiaa.

⁵⁴Majoya ma esohui shajja'ajja majje Satiaco, Huani pea'ai poquia cua Jesosa que huohui pohua. Oya cuana jama cua ba'a: —Jesosa, Emeshi Mese nei, ecuaaya cuaqui oque mee sa aña ma esohui quea tai miminaje yasijje. ¿A'a acuae quea bame jama epoji so'o, Jesosa?

⁵⁵Jesosaa jama tecueame aca cua ba'a: —Chojja, ja'l a miquianaya jama jjashahuabaquime pojji!

⁵⁶Majoya aje poquia cua pea cuiñajji yasijje cahuiya.

Jesosa nijje jjapeequi majje quea camaja cuaje
(Mateo 8.19-22)

⁵⁷Ejiojjije poquijeya, dejja Jesosa jama huohuime aca cua ba'a: —Jesosa, Emeshi Mese nei, eya minijje jjapeequi sa cuani. Jamajjeya eya minijje e'e jojo nei po'ayequi sa cuani.

⁵⁸Majoya aje Jesosa jama cua ba'a: —E'e pojja'a de, quea camaja cuaje. Eya ojjañaja Edoe Mese cuani. Jamatii ecuea equi chama' ejomishocajji. Samao ca ca jjanijo cahuijaa, cuichojji cuana ejajo cahuiani. Eya ca ca iña quima' ecahuijji. Jamatii beca cuanaja equi quea nahue cuani e bot'i'amajojo —jamaya Jesosa cua.

⁵⁹Pea pojjafo pea dejja Jesosaa jama huohuime aca cua ba'a:
—¡Jjeyahua nei enijke cuecue ecuea epeeiji epoji!

Ma dejja jama cua ba'a: —Emeshi Mese, quijje pishana poquije minijje. Jjeyahua ecue chii etii nojinoji, manoje'yo pojja'a. Eyaya camojea sahua mano'yajo.

⁶⁰Jesosa jama cua ba'a: —Chojja, pea cuaa Eyacuiñajji epeeiji pojjeama cuaa oe cacuiña cahua. Ohuaya cuaa camojea cahua mano'yajo. ¡Cuecue jjeyahua nei; enijke ejjahuohuiquipi Eyacuiñajji esohui pea cuana huasijje!

⁶¹Pea dejjaaa Jesosa jama huohuime aca cua ba'a: —Emeshi Mese, eya po'ayequi sa cuani minijje. Ebionei oe ecuea huapa pojjeama cuana cahuhuohuiqui'yo sahua jama ba'a: "Poquia iña Jesosa nijje".

⁶²Jesosa jama cua ba'a: —Chojja, ijjeya nei cuecue enijke! ¡Miya enijke jjapeequi sa cuanijo cuecue jjeyahua nei enijke! Miya cue sa po ajjajje miya bame'ama cuaje Eyacuiñajji epeeiji epoji.

Jesosaa dejja quea huiso huoojea ca cua 72 huisome

10 ¹Majoya Jesosaa dejja quea huiso jjequi tepe ca cua, 72 huisome. Ohuaya becamejiji pe'aai huoojea ca cua ojjaña meshi cuana huasijje joya o poqui sa cuani yasijjeya. ²Ohuaya jama huohuime aca cua ba'a: —Dejja

cuana anoso quejo jahua jayojja jama, quea huiso nee nee. Ojjaña cuana ecuea esohui shajja'ajja sa cuani, oe pojji ca ca Eyacuiñajjiya esohui huohuijji yani. Jamajjeya ¡mimicue Eyacuiñajjiya nijje quea huiso esohui huohuijji epojji, quea huiso anoso sejja'yojji cuana jayojja epojji! ³ ¡Poquicue miquianaya ma dejja cuana quea mimishi nee nee nequi yasijje esohui huohuiya! Ma dejja cuanaya pojja'a mimijajije minijje; ba'ajja. ⁴ ¡A'a bashosoco dojooji; bejjo, ejiojji shejee pea'ai a'a dojooji! ¡A'a pea nijje mimipoquijji; quea cuejji pashi nee oe poquicue! Quea huiso Eyaciñajjiya esohui shajja'ajja sa cuani. ⁵ Equi yasijje dobiqui majje jja ca oe equi mese huohuicue jama ba'a: "Eyacuiñajjiya miya quea bei po mee caje". ⁶ Ma equi mese quea bei po sa cuanijo, Eyacuiñajjiya oya quea bei po mee caje. Pea equi meseya miya cajaa acanijo, Eyacuiñajjiya oya quea bei pojjeama acaje. ⁷ ¡Miquianaja epeejji epojji sa'lajjacue; ojaya equijo tiiya anicue! ¡Ojaya bobo ijia anicue ma cuiñajjiyo ani majje! Equi meseya miya cabobia cahua Eyacuiñajjiya esohui huohuiaña sosejje, ojaya echacojjii jayojja cuani jojoya. ⁸ Pea cuiñajji yasijje poquiajo dejja cuaa miquianajaya esohui shajja'ajja sa cuanijo ohuaya miya bobia caje. ¡Jamajjeya ijjal'ijjiacue omijje! ⁹ ¡Jjaajaqui mee'yocue emanojaa cuana! ¡Huohuicue oe oya Eyacuiñajjiya esohui jama ba'a: "Jjeya nei Eyacuiñajjiya miya oja epeejji po mee sa acani" acue! ¹⁰ Pea cuiñajji yasijje poquiajo dejja cuana ca ca miquea esohui shajja'ajja sa po aja pojja'a cuaje. ¡Ma dejjaya jja oe jama huohuime acue ba'a: ¹¹ "Miquianaaya cajaa aña Eyacuiñajjiya esohui, jamajjeya ecuanaya pea dejja cuana huasijje poquije esohui huohuiya miquianaya shajjama' jojoya. Ecuana quea yeno cuani miquianaaya Eyacuiñajjiya esohui cajaa anaje jojoya. E'e de, ohuaya miquianaya huoojea caje'yo cuaqui yasijje. ¹² Yahuajo Eyacuiñajjiya Sonoma cuiñajjiyo ba'e cuana aca cua jayojjaya miquianaya acaje'yo, quea nee nee po mee caje'yo" jama huohuimaya acue! —jamaya Jesosa cua.

Beca cuiñajjiyo ba'e cuana shajjama' cua
(Mateo 11.20-24)

¹³ Majoya aje Jesosa tecuetecuea cua dejja shajjama' cuana nijje. Jama huohuime aca cua ba'a: —Coya nequianaya quiyo'yo chana', Conasijo ba'e cuana, Betesainajo ba'e cuana pea'ai. Miquianaaya eya banaje, ecuea esohui shajja'ajjanaje pea'ai. Jamatii miquianaya ca mi ca oe shajjama' nei nei cuani, de. Yahuajo Eyacuiñajjiya Tinojo ba'e cuana Sinonojo ba'e cuana pea'ai quiyojea mee ca'ya cua quea mimishi nee neejojo. Ojaya cuanaja ca ca eya shahuaba jjima nei nei cua, de. Ohuaya eya eshahuaba jojjemo ecuea esohui eshajja'ajja jojjemo quea yeno nee nee poqui'aye ojaya mimishijo. Conasijo ba'eja ca jjaja ca iña oe eshahuaba cuanaje, jamatii jjejojoya ca nequiana ca oe shajjama' nei nei cuanaje ecuea esohuijo, de. Betesainajo ba'e jayojja ca mi ca oe cuanaje. ¹⁴ Jamajjeya Eyacuiñajjiya miquianaya huoojea caje'yo cuaqui yasijje, quea nee nee cuaje'yo miquianaya. ¹⁵ Capenaomajo ba'e cuana, miquianaya shajjama' neiya cuani pea'ai. Jamajjeya aje jja miquianaya quiyojea pea'aije'yoya. Miquianaya jama jjashahuabauquiani ba'a: "Ecuana

ca ca eyahuasijje poquije'yo". Cho, miquianaya poquije cu aqui yasijje ecue sohuijo shajjama! cuanijojo —jamaya Jesosa cua.

¹⁶Majoya aje Jesosaa o shajja'ajjajji cuana jama huohuime aca cua ba'a: —E'e de, miquianaya ecuea esohui huohuijji cuani. Miquianaaya ecuea esohui nei huohuiaña. Jamajjeya dejja cuaa miquianajaya esohui shajja'ajja canijo ecuea epeejji cuaje. Pea dejja cuana ca ca oe shajja'ajja sa po ajjajo ecuea epeejji pojjeama cuaje, Eyacuiñajji epeejji pojjeama peal'ai cuaje. E'e de, mahuiso ecuea esohui —jamaya aca cua Jesosaa.

Majoya aje ma dejja cuana iye huiso huoojea ca cua esohui huohuiya.

Ma dejja cuana, 72 huisome cue o'oya cua Jesosa que

¹⁷Majoya ma dejja cuana 72 huisome esohui huohui majje Jesosa que cue o'oya cua; quea bihui nee cua. Oya cuana jama cua ba'a: —Jesosa, ecuea Emeshi Mese nei, ecuanaya quea sohui poja nee cuanaje; mi jayojja cuanaje. Ecuaaya miquea bajjanijo eshahua huoojeacuaya'yonaje.

¹⁸Jesosa jama cua ba'a: —E'e de, ecuea eba. Eyaya Edosiquiana banaje oquequinaje eyajo nequi pojjeje jayojja, de. ¹⁹Eyaya miquianaya quea ca'a po meenaje epoquijji. Peyohua, ajiya pea'ai ijija cajje miquianaya mano'yo jjima po meeje'yo eyaya. Edosiquiana miya quecua jjima ameeje'yo eyaya. ²⁰Miquiaaya eshahua cuayaqui mee'yaña. ¡A'a quea bihui nee pojji miquianaya quea sohui poja nee cuani! ¡Miquianaya ca oe quea bihui pocue miquianajaya bajjani tehue canaje Eyacuiñajji eyajo edobiqui meeji! Miquianaya poquije eyahuasijje Eyacuiñajji nijje ba'e'yohua. ¡Jamajjeya ma esohuijoya quea bihui pocue! —jamaya Jesosa cua.

Jesosa quea bihui cua (Mateo 11.25-27; 13.16-17)

²¹Majoya aje Edojoshahua Bameya Jesosa quea bihui po mee ca cua. Jesosaa Eyacuiñajji jama huohuime aca cua ba'a: —De, eya quea bihui nee cuani minijje. Eyacuiñajji, miya ecue Chii nei, miya Emeshi Mese nei cuani, ojjaña meshi cuanajo eyajo pea'ai, de. E'e, beca cuana jjashahuaba taiquiani jama ba'a: "Ecuea quea ja'a nee esohui, jamajjeya eya Eyacuiñajji esohui shajja'ajja sa po ajja". Miyaya, Eyacuiñajji, oya cuana ba meesahua ajja oya cuana jjashahuaba taiquianijojo. Pea cuana ca ca miquea esohuijo esho'iquiana jayojja jjabahuejjaqui sa cuani. Jamajjeya miyaya oya cuana quea ja'a po meeje'yo. E'e ecue Chii, miyaya jamaya aña miquea ejjashahuabaquijji jama —Jesosa cua.

²²Majoya Jesosaa pea cuana jama huohuime aca cua ba'a: —Eyacuiñajji ecue Chii e huoojea'yojji epo. Eya ojaya esohui huohuijji cuani. Ecue Chijja eyajo anija ecuea ejjashahuabaquijji ojaya eba nei nei, ojaye nei. Ecue Chijja ejjashahuabaquijji ecuea eba nei nei pea'ai, ecuea nei. Eyaya ecuea epeejji ba meesahuaña quea ja'a nee ecue Chijja ejjashahuabaquijji —jamaya Jesosa cua.

²³Majoya aje o shajja'ajjajji cuana Jesosaa jama huohuime aca cua ba'a: —¡Quea bihui pocue, miquianaaya Eyacuiñajji ejjashahuabaqui'yojji bañajo! ²⁴E'e jojo nei eyaya miquianaya huohuiaña jama ba'a: Yahuajo quea huiso Eyacuiñajji esohui huohuijji cuana, emeshi mese cuana pea'ai Eyacuiñajji ejjashahuabaqui'yojji ba nei nei sa cua. Ecuea esohui shajja'ajja nei nei sa cua pea'ai. Jamatii onajaya eya ba jjima cua, shajja'ajja jjima cua ecuea esohui. E'e, oya cuana shajja'ajja sa cua jiquio miquianaaya jjeya shajja'ajjaña —jamaya Jesosa cua.

Esohui oe Samania dejja quea bame cuajo

²⁵Oe Jodio dejja Moisesija etehue'yo huohuijji poquia cua Jesosa dasiaa nisho. Huohui'ajja ca cua jama ba'a: —Jesosa, miya esohui huohuijji cuani, ¿yajja acuae po cajji Eyacuiñajji nijje eba'e tiitii'yojji so'o?

²⁶Jesosa jama cua ba'a: —¿A'ya acuae Moisesiya tehue ca cua? ¿A'a pojja'a miquea ma esohui ba jjima?

²⁷—De, ecuea eba, eya Moisesija etehue'yo huohuijji nei nei cuani. Ojaya esohui jama cuani ba'a: “¡Miyaya Eyacuiañajji quea jea nee nee acue! ¡Ojo nei oe jjashahuabaquicue; oya oe bihuiacue ojjaña pojabajo!” Pea etehue'yo jamaya cua ba'a: “Eseyaa jjajaahuaniquiani. ¡Jama jaahuanameya oe acue mique doe cuana!” jama cua Moisesija etehue'yo yahuajo —jamaya cua ma esohui huohuijji.

²⁸Jesosa jama cua ba'a: —E'e de, quea bame nee miquea esohui. ¡Ma esohui jayojjaya oe miyaya acue! Majoya aje miya Eyacuiñajji nijje eyajo ba'e tiitiiye'yo.

²⁹Ma esohui huohuijji Eyacuiñajji nijje, pea cuana nijje pea'ai quea bihui nisho cua. Ojaya pea cuana boti'ama cua. Jamajjeya ohuaya Jesosa edasia'yojji nisho jama huohui'ajjame aca cua ba'a: —¿A'ya acuae ecue doe cuana? —ojaya ba jjima nisho cua.

³⁰Jamajjeya Jesosaa esohui jama huohuime aca cua ba'a: —Oe Jodio dejja ba'enaje Jenosanenajo, poquinaje ejiojjiji Jenico huasijje. Ejiojjiji poquianijo siipojji cuana nequinaje ejiojji sii epoji. Siipojji cuaa dejja eshema' nei cuiahuejajeame acanaje e'aquiana jjeshe'yojji. Ojaya daqui sii ca'yonaje, de. Siipojji cuaa ma dejja jea canal'yonaje, beshahua nei emanoyyo. ³¹Majoya oe Jodio dejja, Eyacuiñajji nijje mimiani dejja ma dejja ecuiajejaajje yejje canananaje. Bajea canananajeya aje jja ca oe. Jjequi sohuasohua'yo ajja jjaja cua. Poquia jjaja oe cua. ³²Quijje pea Jodio dejja yejje canananajye bajea canajeya aje jja ca oe pea'ai. Oya Eyacuiñajji equi jaahuanajji cua. Jjequi sohuasohua'yo ajja jjaja cuanajye. Poquia jjaja oe cua. ³³Quijje aje jjaja oe Samania dejja cueyanajye. Samania cuanajye Jodio cuana boti'ama. Jamatii jiquio Samania dejja Jodio dejja ecuiajejaajje ba canaje. ³⁴Ohuaya ba majje shicui canajye. Majoya aje iyasohua ca'yonaje mona baijje, dojo canaje ejaaachichajji equi yasijje. Majoya aje jaahuanajye sosema' tii. ³⁵Pea cahuijje Samania dejja bejjo quia canajye equi mese yasijje, o cahuinajye sosejje.

Jama huohuime aca cua ba'a: "Eya poquije chacohua. Ma ecuiaeajaa dejja ca anije, ¡miyaya oya jaahuanacue! Ma'aje bejjo o jaahuana sosejje. Quijje eya cueje o'oya mi sosequia o'oya" jamaya cuanaje Samania dejja —Jesosa cua.

³⁶Majoya Jesosaa Moisesija etehue'yo huohuijji jama huohuime aca cua ba'a: —Pea beca peejjima dejja ecuiaeajaa dejja ba canananaje. ¿Ache dejja acuae oja doe jayojja cuanaje?

³⁷—Ma o jjequisohua'yojji cuanaje, Samania dejja ojaya doe jayojja cuanaje —jamaya oya cua.

—E'e de, e'e jojo nei. ¡Miyaya jamaya acue, pea cuana jama jaahuanameeya acue, mique doe jayojja acue! —jamaya Jesosa cua.

Jesosa, Manta, Mania nijje pea'ai anicuanana cua

³⁸Jesosa o shajja'ajjajji cuana nijje Jenosanena huasijke poquije Mantaja equi yasijke dobiquinana cua ijjiailjjiaa. ³⁹Mantaja shehue, Mania Jesosaja esohui shajja'ajja sa cua. Jamajjeya Jesosa chipi nei ania cua oja esohui shajja'ajja neineiji. ⁴⁰Mantaja cuacuacuacuaquija jjejojo Jesosaja esohui shajja'ajja jjima cua. Oya quea quene cua oja shehue nijje. Mantaa Jesosa jama huohuime aca cua ba'a: —Jesosa, eya ecue shehueja cuacuasahua jjima. ¡Huoojeacue oya e cuacuasahua!

⁴¹Jesosa ca oe jama cua ba'a: —Chojja, Manta, miquea ecuacuajjijo ca ca miña jjashahuabaquiani. Jamajjeya miya ecue esohuijo jjashahuabaqui jjima cuani. ⁴²Mania ca ca oe quea bame cuani, ohuaya ecuea esohui shajja'ajja neinei cani. ¡Mique shehue jayojja jama pocue! —jamaya Jesosa cua.

¡Eyacuiñajji nijje jama mimime pocue!

(Mateo 6.9-15; 7.7-11)

11 ¹Jesosa pea pojajo mimia cua Eyacuiñajji nijje. Majoya aje cojjacahuijeyo majje o shajja'ajjajjiya Jesosa jama huohui'ajjame aca cua ba'a: —Emeshi Mese nei, ¡huohuicue iña miyaya achajja mimime acuae po cajji solo! Yahuajo Huaniya ona besameeji cuanajeya o shajja'ajjajji cuana huohui ca cua achajja mimime epoji Eyacuiñajji nijje. ¡Jamaya huohuicue ecuanaya!

²Majoya aje Jesosaa jama aca cua ba'a: —Jama mimimaya oe pocue Eyacuiñajji nijje ba'a: Eyacuiñajji, miya ecue Chii nei nei. Miya oe nei nei ani, pea mi jayojja chama!. Ecuea eba nei nei miya mimishi'ama nei nei. Miya ojjaña cuanaja Emeshi Mese nei cuani; ojjaña jaahuanajji cuani. Jamajjeya ojjaña cajjapeequiahua minijje.

³ ¡Quiacue mo ecuea bobo eba'eiji!

⁴ ¡Ecuanajaya mimishi cuana cuijeal'yocue!

Eya quene'ama pea cuana nijje; joya enijje quea mimishi cuani nijje. Jamajjeya ecuea mimishi cuanajo ¡a'a quene pojji pea'ai!

¡A'a ecuana quea mimishi po meeji! Acua. ¡Jamaya mimicue

Eyacuiñajji nijje! —jamaya Jesosa cua.

⁵Majoya Jesosaa o shajja'ajjajji cuana pea esohui ejjashahuabaqui meeiji jama huohuime aca cua ba'a: —Miquianaya pojja'a mee nei poquije miquea epeejiji equi yasijje mecashono nei. Miyaya huohuiñaquije jama ba'a: "Jjeya nei ecuea epeejji cue'yonaje. ⁶Chama' bobi ecuea equijo, oya ca ca quea shoe, de. ¡Che mo bobi quiacue ecuea epeejji nijje ebobiajji!" jamaya cuaje miya pojja'a. ⁷Majoya oya jamaya cuaje ba'a: "Chojja, de. Equiajji pojjeama mi, cahuijaa so'o ca ca iña, de. Ca'a'yonaje oya aña ecuea esecuejjani ca mi quiajji". ⁸Miyaya huohui'ajja majamajajje ca mi ca oe quia caje. Ojaya epeejijojo pojjeama ca mi ca oe quia cani miya mi cahuime yajje —jamaya Jesosa cua—. ⁹E'e de, eyaya huohuinaje maya esohui miquea ebajji achajja mimime Eyacuiñajji nijje epoji. ¡Miquianaaya huohui majamajacue esecuejo nequia jayojja! Majoya Eyacuiñajji miquianaya quia caje. ¡A'a Eyacuiñajji nijje mimi pajea'yojji ohuaya miya saja'a caje'yo! ¹⁰E'e, ojjaña cuua Eyacuiñajji huohui'ajja canijo, Eyacuiñajjiya oya cuana quia caje'yo. Jamaya ma esohui epeejijo, de. Oya poquinaje bobi sa'ajjaa, huohui'ajja majamaja canequinaje. Majoya aje bobi quia canaje. Jamaya aje Eyacuiñajjiya acaje miquianaa huohui'ajja majamajajje. ¹¹Miquianaja bacuaa nahuojo huohui'ajja cajje, ¿ae quiaje? Peyo pojja'a. Chojja, miquianajaya equiajji pojjeama peyo, de. ¹²Miquianaja bacuaa cachinajjajo huohui'ajja cajje, ¿ae quiaje? Aji pojja'a. Chojja, miquianajaya equiajji pojjeama, de. ¹³Miquianaya quea mimishi ba'yani. Jamatii miquianaja bacua nijje quea bame cuani, Eyacuiñajji ca ca mimishi'ama nei nei cuani. Ohuaya quea bame nee nee quia cani miquiaa huohui'ajjajje. Ohuaya miquiana huasijje Edojjoshahua Bame nei huoojea caje miquiaa huohui'ajjajje —jamaya Jesosa cua.

Jesosa Edosiquiana etiiya quea sohui poja po mee cani poso —aca cuaa cua
(Mateo 12.22-30; Macoso 3.20-27)

¹⁴Oe dejja mimi'ajja nequia cua eshahua oja yamijo nequi jojo. Oya poquia cua Jesosa que. Jesosaa eshahua cuayaqui mee ca'ya cua. Ma dejja eshahua cuayaqui'yajo mimicoo'ya cua, de. Majoya aje ojjaña cuana jama cua ba'a: —De, Jesosa quea sohui poja nee nee yaña.

¹⁵Pea dejja cuanaya jama siajje pomeya cua ba'a: —Edosiquiana etii nijjeya jjejojo, Jesosaa eshahua cuaya meequi ca'yonaje, Edosiquiana etii Meesemo nijjeya.

¹⁶Pea cuana jjashahuaba taiquia cua Jesosaja epeejji nisho epoji. Jesosa jama aca cuaa cua ba'a: —Ecuanaa ajjima aña Eyacuiñajjiya miya ca ca ameesahua caje pojja'a. ¡Jamajjeya amee'ajja socue oe! Majoya jama miya ajo, ecuanaa baje e'e jojo nei Eyacuiñajjiya miya huoojea canaje ecuana huasijje. Majoya aje oe ecuanaya jjapeequije minijje —jamaya cuana cua Jesosa Eyacuiñajjiya huoojea'yо pojjeama posojo.

¹⁷Jesosaja eba onajaya ejjashahuaba taiquijji. Jamajoya aje Jesosaa jama tecueame oya cuana aca cua ba'a: —¡Jjashajja'ajjaquicue oe! Joya emeshi

mese ojo chacochacoani cuaa shajja'ajja sa po ajjajo, ojee jjaquecuaqui majje jjaquecua iyaiyaquije'yo dejja cuana ma meshijo ba'e; chama'yo tii cuaje'yo. Huapa pojjeama cuana nijje jjacuiaquiaj chama' epereeji cuana cuaje'yo.

¹⁸ Jamaya pea'ai Edosiquiana etiiya Satanasa peahshahua huoojeacuaya'yo jojjemo, dejja huooje'yoiji pojjeama po'yoquiaye. Chojja, jama pojjeama ca coma. ¹⁹ ¿A'aya eyaya Edosiquiana nijjeya niñe cuana, pea eshahua cuana pea'ai huoojeacuayaajeña poso aña? Jamajjeya miquea epereeji cuanaa ¿ae nijje eshahua huoojeacuayaajea cani? Eyacuiñajjiya asahua canijo, jamajjeya ojaya eba miquianaya ejosiajje cuani. ²⁰E'e, Eyacuiñajji nijjeya eyaya eshahua huoojeacuayaajeña yaña. ¡Jamajjeya bacue eya e'e jojo nei Eyacuiñajji, Emeshi Mese oe nei jjeya cuani tii! ²¹ ¡Bacue! ¿A'a dejja quea ca'a neeja equi yasijje dobiquijji oja aquiana siiya o jeyo jjima nequijo? Chojja, o jeyo majje ojaya aquiana cuana sii caje cuaa. ²²Jiquio ecua e'aquiana mese ebionei jeyo cani jama amajje eyaya eshahua cuana jeacuayaajeña. ²³Miquianaya shajja'ajja sa po ajja ecuea esohui, jamajjeya ecuea epereeji nei pojjeama miquianaya cuani. Miquianaya ecuea esohui pea cuana huasijje huohui sa po ajjajo, jamajjeya miquianaya pea cuana quea mimishi po mee sa aña, de —jamaya Jesosa cua.

Eshahua dejjaja yami yasijje cue o'oyani
(Mateo 12.43-45)

²⁴ Jesosaa esohui ejjashahuabaqui meeji huohui ca cua jama ba'a:
—Eshahua dejjaja yamijo nequi cuayajequij'yo majje quea huesha poquinaje. Sa'ajja calyonaje pea enequij'yoiji. Jamatii ba'yo jjima cuanaje. Eshahua po'ayequiequinaje o nequijji sa'ajja'yohua. Jamajjeya oya jjashahuabaquinaje jama ba'a: "Eya poquije o'oya huacuaya ma e cuayaquinaje yasijjeya, ma ecuea equi jayojja huasijjeya". ²⁵Jamajjeya oya dejja huasijjeya cue o'oyanaje. Ojaya yami yasijje dobiquij'yonaje Eyacuiñajjiya epereeji pojjeama jojoya, ojaya eyami equi ecuiahaba jayojja jama, ehuana bamebame jayojja equi se ejjama!. ²⁶Jamajjeya ma eshahua poquinaje pea eshahua cuana jjequiya onijje enequij'yoiji ma dejjaja yamijo. Oya cuana quea mase nee nee cuanaje. Oe nei yahua ca ca quea mase pishana cuanaje. Majoya aje ojjaña dobiquiaj ma dejja quea yeno nee nee cuanaje. Yahuajo oe eshahua nequiahuajo ca ca quea yeno pishana cuanaje.

¿Yajja acuae po cajji queabihui epoji?

²⁷ Jesosa mimianijo oe epona ojjaña yiyesama neijo nequi sohuicuaya cua jama ba'a: —Jesosa, Eyacuiñajjiya miquea enaese quea bihui capo mee calyahua, ohuaya miya cuayajo tii mee canajejo.

²⁸ Majoya aje Jesosa jama cua ba'a: —E'e, quea bame pishana. Eyacuiñajjiya esohui shajja'ajja nei nei majje ca ca oe quea bihui nee nee capo'yahua. Joya Eyacuiñajji nijje jjapeequi neinei majje quea bihui nee nee capo'yahua. ¡Jamaya pocue quea bihui nee nee epoji! —jamaya Jesosa cua.

Dejja mimishi cuaa Jesosa huohui'ajja ca cua
(Mateo 12.38-42; Macoso 8.12)

²⁹Quea dejja huiso nee nee ejjachichaqui nequia cua Jesosa nijje. Majoya Jesosaa esohui jama huohuime aca cua ba'a: —Miquiaaya Eyacuiñajjiya esohui cajaa anaje. Jamatii miquianaya ba o'oya sa cuani eyaya yahuajo anaje jayojja. Ecuea jamaya e'abeca'yojji pojjeama miquea ebajji eya Eyacuiñajjiya huoojea'yo. ¡Jjashahuabaquicue yahuajo nei Eyacuiñajjiya Jjona jaahuana ca cua jai ai'ajja sei aijo ba'e! ³⁰Jjona emano'yo jayojja cua. Majoya shequi o'oyanaje jayojja cua pea beca peejjima cahuime po majje jaiya ojjajea ca'ya cua. Majoya dejja cuana Ninebe cuiñajjiyo ba'e yasijje poquia cua. Oya jjashahuabaquici'yo aña cua Jjona eshequi o'oya jayojjajo. Jjashahuaba bame nequia cua e'e jojo nei Eyacuiñajjiya Jjona huoojea ca cua oja esohui huohuiya. Eya Jjona jayojjaya cuaje, eya mano'yo majje mei jjanijo jaa shequije o'oya pea beca peejjima cahuime po majje, miquiana jjashahuubaquicujiya Eyacuiñajjiya eya huoojea canaje miquiana huasijje.

³¹⁻³²E'e, yahuajo Ninebejo ba'e cuaa Jjonaja esohui shajja'ajja majje mimishi pajea ca'ya cua. Jjapeequia cua Eyacuiñajji nijje. Jjonaa esohui quea bame huohui ca cua. Jjeya eyaya miquianaya huohui bamebame yaña, de. Jamatii miquianaya ecuea esohui shajja'ajja sa po ajja. Jamajjeya Eyacuiñajjiya miquianaya jeajea caje'yo cuaqui yasijje shajjama' jojoya.

—E'e, jamaya yahuajo cua ba'a: Eeno cuejjije emeshi mese pona cua. Oya quea huesha nee nee cueya cua Sanomoja esohui shajja'ajja. Sanomo quea jjashahuabaqui ja'a pishana cua. Eya ca iña quea jjashahuabaqui ja'a nee nee cuani. Jamatii miquianaya ecuea esohui shajja'ajja sa po'yo ajja. ¿Yajjajo acuae miquianaya ma epona jayojja mi po'ajjani so'o? Jamajjeya Eyacuiñajjiya miquianaya jeajea caje'yo cuaqui yasijje shajjama' jojoya, de —jamaya Jesosa cua.

Esohui ecojja cuaquijiji jayojjajo
(Mateo 5.15; 6.22-23)

³³Jesosa jama cua ba'a: —¿A'a miquianaya cuaquijiji dedo majje capanequiaña eshajaa? Chojja. ¿A'a miquianaya enequia quehua nequiajea'came? Chojja. E'e, eyajo nequiajea'came cani. ³⁴Miquianajaya ecojja cuaquijiji jama, de. Miquianajaya ecojja quea ja'a cuanijo miquianaya poqui bameje. Miquianajaya ecojja ja'a'ama cuanijo epoqui bamejji pojjeama. Jamaya miquianajaya ejjashahuubaquicujiya quea ja'a cuanijo, ba'e bameje. Miquianaya jjashahuaba taiquianijo, miquianaya cuaquijiji enequia quehua jayojja cuaje. ³⁵⁻³⁶¡Jamajjeya ma cuaquijiji eyajo nequiasohua nequi jayojja jama jjashahuaba bamebamequimeya oe pocue! —jamaya Jesosa cua.

**Jesosaa Paniseo dejja cuana Moisesija etehue'yo huohuijji tecuea ca cua
(Mateo 23.1-36; Macoso 12.38-40; Noca 20.45-47)**

³⁷ Jesosa mimipajea'yajo oe Paniseo dejja Jesosa iyaa ca cua ijjia'ijjiaa ojaya equi yasijje. Jesosa dobiqui majje e'anijjijo anioquea cua. Oya jjametopo neineiqui jjima cua, Jodio etiiquiaa acani jayojja ajjima aca cua. ³⁸ Jamajjeya Paniseo dejja Jesosa ba majje jjashahuaba taiquia cua jama ba'a: —E'e de, Jesosa quea tai cuani, eme topo neinei ajja, etiiquiaa jayojja jama ajjima acani, de.

³⁹ Jesosaja eba onajaya ejjashahuabaquijji; jamajjeya jama tecueame aca cua ba'a: —De, miquianaya, Paniseo dejja cuana jamatii esohui huohuijji nisho cuani, quea tai, de. Miquianaya joya caneco yiye topo jjimajo jayojja cuani. Jamaya miquianaaya dejja cuana jjashahuabaqui meeña, miquianaya Eyacuiñajjija epeeiji cuani poso acani dejja cuaa. Miquianaya ca mi ca ojaya epeeiji pojjeama, ojaya miquianaya eba, de. Ojjaña miquianaya quea bame cuani poso acani. Miquianaya ca ca quea tai nee nee cuani; jjashahuaba quehuaquiani, de. ⁴⁰⁻⁴¹ Miquianaya Eyacuiñajjijo jjashahuaba nishoquiani, ojaya epeeiji nisho cuani. Jamajjeya beca cuaa miquianaya quea bame ba'e poso acani. Eyacuiñajjija miquianaya quea bame nee jjashahuabaqui mee sa acani. Jamajjeya jja oe ionijke jjapeequicue e'le jojo nei epoji! Majoya aje miquianaya quea bame cuaje'yo.

⁴² —E'e de, miquianaya Paniseo dejja cuana jjashahuaba taiquiani, de. ¡A'a quea dejja tai pojji! Shajja'ajjaña ajeysa ca oe Eyacuiñajjija esohui, ojjaña ojaya esohui aje jje oe shajja'ajja jjima cuani, e'e nei. ¡Miquianaaya ojjaña Eyacuiñajjija esohui shajja'ajja jeyoyeyocue! ¡Huapa pojjeama cuana quea jea acue, Eyacuiñajjija ojjaña cuana quea jea acani jayojja oe acue! E'e de, ja'a pajea'yojji quea jea aiji! Jamajjeya miquianaya quea bame cuaje.

⁴³ —E'e de, miquianaya ca jja ca oe quea tai cuani, Paniseo dejja cuana. Jamatii miquianajaya equi ejjachichaquijji e'anijji quea bame sa'ajjaña. Pea nijjeya aje jja mi ca oe quea bame jayojjaya cuani, majoya aje jja mi oe pea cuua quea bame poso acani. Miquianaya ca jja mi ca siajjepoiji, de. E'e, ejiojjije pea'ai miquianaya po'ayequivijo dejja cuanaja esohui shajja'ajja sa cuani jama ba'a: "Paniseo dejja cuana ca jja ca quea bame nee nee, de". Ma esohui ca jja ca e'e jojo nei pojjeama acani.

⁴⁴ —E'e miquianaya quea tai po majamajani. Miquianaya dejja equehua mojea'yojaa jayojja, ma onajaya ba jjimajojo quishi cani jayojjaya cuani. Pea cuana jjashahuabaquiani ma meshi joya quea bame poso acani. Jamaya miquiana ma mojea'yojaa jama cuani. Pea cuana jjashahuabaquiani miquiana quea bame, onajaya miquianaya ba jjima quea tai nee nee cuani. Miquianaya jjashahuabatai tiitiiquiani; quea bame pojjeama cuani —jamaya Jesosa cua.

⁴⁵ Oe Moisesija etehue'yo huohuijji cuani jama cua ba'a: —Jesosa, miya pojja'a ecuana nijjeya pea'ai tecuetecueani.

⁴⁶Jesosaa oya jama huohuime aca cua ba'a: —E'e jojo nei eyaya miquianaya tecueaña. Miquianaya Moisesija etehue'yo huohuijji nisho cuani pea'ai, de. Miquiaaya pea cuana huasijje esohui quea camaja huohui nishoaña. Jamatii miquianaya ma esohui jayojja ba'e ajja; ona asahua ajja.

⁴⁷⁻⁴⁸—E'e, miquianaya quea tai nee cuani, miquianaja etiiquiana jayojja, de. Miquianaja etiiquiaa Eyacuiñajjija esohui huohuijji quecua ca'ya cua jjashajja'ajjaqui ajja jjejojo. Jamatii miquianaaya cuia'asha poquia tiitiiña etiiquiaa quecua ca'ya cua shahuaba poquia tiitiji, equecua'yo sajaa quea pame epoji epajea'yo cuani jjejojo. Jamajjeya miquianajaya etiiquiana jayojja jama jjashahuabaquime cuani. ⁴⁹E'e, Eyacuiñajjija eba, jamajjeya ohuaya jama huohuime aca cua yahuajo ba'a: “Eyaya ecuea esohui huohuijji cuana, e shajja'ajjajji cuana huoojeaje pea cuana huasijje. Ecuea ehuoojea'yo cuana beca cuaa quecua caje'yo nei nei. Beca ca mimi panajajije onijje” jamaya Eyacuiñajji cua. ⁵⁰⁻⁵¹E'e, miquianajaya etiiquiana huasijje huoojea ca cua Eyacuiñajjija huoojea'yo cuana. E'e, yahuajo miquianajaya etiiquiaa quecua ca'ya cua Eyacuiñajjija huoojea'yo cuana, de. Yahuajo Eyacuiñajjija esohuijo tehue ca cua Abenijo. Miquianajaya etiiquiaa Cainiya Abeni cuiahuejjajea ca'ya cua. Majoya oya jayojjaya quea huiso cuiahuejjajea ca'ya cua Eyacuiñajjija esohui huohuijji cuana. Quijje yejje nei Eyacuiñajjija etehue'yojo tehue ca cua ojaya pea esohui huohuijji, Sacaniajo. Oya Eyacuiñajji nijje mimiani cuiahuejjajea ca'ya cua cuaa Eyacuiñajjija equijo, aquiana dahuajeajji pejjejo, de. Jamajjeya eyaya miya e'e jojo nei huohuaña jama ba'a: Jjeya nei Eyacuiñajjiya miquianaya quea nee nee po mee caje'yo ojaja etiiquianaja mimishi cuanajo, miquianaya etiiquiana jayojja cuani jojoya. ⁵²E'e jojo nei miquianaya, Moisesija etehue'yo huohuijji cuana quea tai nee cuani. Jamatii miquianaya ca mi ca oe esohui huohuijji nisho, sjajjepojji. E'e, miquianaya Eyacuiñajji nijje jjapeequi ajja nei. Pea cuana Eyacuiñajji nijje jjapeequi sa cuani, miquianaaya jjapeequi pajea meeyaña, de. Jamajoya miquianaya quea nee nee po mee caje'yo quijje, de, quea nee tii tii cuaje'yo —jamaya Jesosa cua.

⁵³⁻⁵⁴Jesosa mimipajea'yajo Paniseo dejja cuana, Moisesija etehue'yo huohuijji cuana quea quene nee nee cua Jesosaja esohuijo. Oya cuana jjashahuaba taiquia cua. Ohuaya cuana Jesosa huohui'ajja neinei ca cua esohui quea tai ojaya yajji nisho, ejjajeanobiaquijji yasijje edojoji nisho.

Jesosaa esohui huohui ca cua ona jjashahuaba taiquianijo (Mateo 10.26-27)

12 ¹Quea dejja huiso nee nee ejjachichaqui nequia cua Jesosa shajja'ajjajji. Jjiojji quishi canequia cuaa cua quea dejja huisohua jjejojo. Jesosaa o shajja'ajjajji cuana jama huohuime aca cua ba'a: —Paniseo dejja cuana jjashahuabatai majamajaquiani. Jamajjeya aje esohui huohuijji nisho cuani, Eyacuiñajjija epeeiji nisho cuani, de.

Coya mi o jayojja po chana! ²⁻³Eyacuiñajjiya oya cuana ba cani ojaya epreejji nisho cuani. Ojaya ojjaña eba o jjashahuabaqu'yojji cuani cuana. Eyacuiñajjiya eba ojjaña, de. Jamajjeya joya Eyacuiñajjiya quea ja'a po mee caje huiso tiiya, quehua'ama cuaje'yо tii ojjañaja ebajji.

¡A'a quea mete pojji dejja cuanajo!
(Mateo 10.28-31)

⁴E'e ecuea epreejji nei, ja'a quea mete pojji ojjaña cuanajo, eshahua cuanajo pea'ai! Oya cuaa miquianaya quecuia caje'yo pojja'a. Jamatii miquianajaya edojjoshahua mano jjima cuaje. ⁵¡Miquianaya jja oe jjashahuabaquicue Eyacuiñajjiyo, de! Shajjama' cuajo ohuaya miquianaya mano mee'yo majje cuaqi yasijje jeajea caje'yo miquea edojjoshahua.

⁶—E'e de, quea anohuii huiso nee nee yani. Anohuii beshahua nei sosema' quea huiosojo. Eyacuiñajjiya oya cuana pajea'yo jjima acani. Ojaya eba ojjaña. ⁷Ohuaya anohuii jaahuana cani, jamajjeya ohuaya miquianaya jaahuana neinei cani pea'aiya, de. Ojaya esico miquianajaya ehuojaña. Jamajjeya ja'a pajea'yojji miquianaya ohuaya nahue cani! Anohuii ohuaya nahue cani pishana —jamaya Jesosa cua.

¡A'a quea bicho pojji Jesosa nijje jjapeequi majje!
(Mateo 10.32-33; 12.32; 10.19-20)

⁸Jesosa jama cua ba'a: —Ecuea epreejji cuaa ej oho hui cani jama ba'a: “E'e, eya ca iña bicho'ama Jesosajo. Eya ojaya epreejji nei nei, e'e jojo nei”. Jamajjeya eyaya Eyacuiñajjiya esohuidojiji cuana o que huijije jama ba'a: “E'e, oya cuana ecuea epreejji nei, e'e jojo nei”. ⁹Pea cuana ca jja ca quea bicho cuani ej. Jamajjeya oya cuaa huijije caje jama ba'a: “Cho, eya Jesosajo epreejji pojjeama”. Jamajjeya eyaya Eyacuiñajjiya esohuidojiji cuana huijije jama ba'a: “Cho, oya cuana ecuea epreejji pojjeama, cajaa” eyaya aje —Jesosa jamaya cua—. ¹⁰Beca cuaa eya niñebla cani; Eyacuiñajjiya maya mimishi cuijea sa acani. Peaa pojja'a Edojjoshahua Bame niñebla cani, Eyacuiñajjiya ca maya emimishi cuijea'yojji pojjeama. Ma mimishi ani tiitije'yо.

¹¹—Pea cuaa miquianaya dojo caje esohuinano mese ani yasijje, Jodio dejja etii ani yasijje ecuea epreejjiyo. Miquianaya pojja'a quea mete nee nee cuaje. Miquianaya jama jjashahuabaquije pojja'a ba'a: “¿Achajja shai huijime acajji? ¿Achajja shai saja'ame aje?” ¡A'a jamaya jjashahuabaquijji! ¡Mete'ama nei onijje mimicue! ¹²Edojjoshahua Bameya miquianaya mimi bame meesahua caje esohuinano mese nijje. Quea bame cuaje miquianaya —jamaya Jesosa cua.

¡A'a beijojo jjashahuaba majamajaquijji!

¹³Oe dejja Jesosa jama huijime aca cua ba'a: —Esohui huijiji, ecuanaja chii mano'yonaje. Ecue o'i ja che eya beijo eseija quia'yo jjima ecue chiija quijjojea. Jamajjeya jama huijui'ajjame acue ecue o'i ba'a:

"Che pa ¡chahua bejjo esejja quia'yocue!" acue —jamaya cuanaje oja chahua bejjo sa cuanijo.

¹⁴Jesosaa jama huohuime aca cua ba'a: —Chojja de, ¿yajjajo acuae moya jama huohui'ajjame aña? Eya ca iña mique chijja quijjojea bejjo quia'yohua cue pojjeama. Maya ecuea echacojjii pojjeama, de. ¹⁵Ojjaña dejja manoje'yo quea bejjo huiso cuana, aema' cuana pea'ai. Miquea aquianaa miquea bejcohua miya ba'e meesahua jjima acaje'yo, de. Jamajjeya ja'a aquiana bejjo pea'ai sa majamajajji! —jamaya Jesosa cua.

¹⁶Majoya Jesosaa jiquio esohui ebajji huohui ca cua jama ba'a: —Oe dejja quea bejjo huiso nee ba'enaje. Anoso que quea huiso nee nee cuanaje. Sejjajeyo'yo majje quea huiso nee nee cuanaje. ¹⁷Oya jama jjashahuabaquinaje ba'a: "De, eya quea bihui nee, quea bejjo huiso nee nee cuaje. ¿Achejo shai eyaya anoso quea huiso nequiaje? ¹⁸Eyaya pojja'a cajjajeaje'yo anoso nequijji, equi quea quemo nee nee iyaje'yo anoso quea huiso nee nee nequiajji, de. ¹⁹Majoya anoso iyajeyo'yo majje eya quea bihui cuaje, ecuea bejjo quea huiso nee nee cuaje. Quea shequija huiso nee nee eya chacochaco'yo jjima cuaje quea huiso jjejojo. Eyaya bobi quea huiso nee nee ijjiaje quea bihui epoji" jamaya cuanaje ma dejja. ²⁰Majoya aje Eyacuiñajjiya ma mecajje huohui canaje jama ba'a: "De, miya ca ca niñepoqui cuanaje. Miya jjeya nei manoje'yo. ¿Ajea acuae cuaje'yo miquea aquiana jiquio miya jaahuaña? Poquijeyoje'yo miya jiquio mecajje. Chama'yo tii cuaje. Miquea aquiana, anoso, bejjo pea'ai dojo'yo jjima cuaje. Miya aema' poquije'yo cuaquí yasijje enijje jjapeequi jjima jjejojo" cuanaje Eyacuiñajji. Majoya aje mano'yonaje ma dejja; chama'yo tii cuanaje —jamaya Jesosa cua—. ²¹E'e de, ma dejja jayojjaya miquianaya cuaje miya bejjojo jjashahuaba majamajaquianijo. Oe dejja jjashahuuba majamajaquiani ojaya bejjojo Eyacuiñajji oya jjashahuubaqui jjima cuani —jamaya Jesosa cua.

Eyacuiñajjiya ojaya epeejji cuana jaahuana cani (Mateo 6.25-34)

²²Majoya Jesosaa o shajja'ajjajji cuana jama huohuime aca cua ba'a: —E'e jojo nei eyaya miquianaya huohuiaña: ¡A'a quea yeno jjashahuaba tiitiiquijji miquianajaya eba'ejjijo! Jama ba'a: "E'e pojja'a eya bobimajo manoje'yo; bobi yasijje cuaje'yo. Ecuea daqui pojja'a huiñaje'yo, daquima' nei nei eya cuaje'yo". ¡A'a jamaya jjashahuuba tiitiiquijji! ²³⁻²⁴E'e de, cuichojji cuana ca ca quea jaji nee ba'e. Oya cuana ca ca chacochaco ajja, bobi chicha ajja equi yasijje quijje e'ijjia'yoji. Eseja Chiiya jja oya cuana jaahuana cani, de. Miquianaya ca ca oe ohuaya jaahuana neinei cani. ¡Jama jjashahuabaquimeya jja oe pocue ca quea bame eba'ejji, daquijo, bobijo! ²⁵¿A'a miya quea ao cuaje'yo jjashahuabaquime cuani? Chojja, jamatiyya cuaje'yo. ²⁶Jamajjeya oe ja'a aquianajo jjashahuuba tiitiiquijji! —Jesosa cua—. ¿Apiojji miquianaya jjashahuuba tiitiiquianii

miquianajaya daquijo? ²⁷ ¡Bacue shasha tiiani! Shasha cuana chacochaco ajja; oja daqui cuana soco ajja. Jamatii quea bame nee nee nequiani. Jamaya Eyacuiñajjiya shasha pohua mee cani. Jodioja emeshi mese yahuajo nei nequia cua Sanomo bajjani. Ohuaya daqui quea nahue nee nee huosho ca cua. Jamatii oja daqui quea bame pishana cua, shasha ca ca oe quea bame nee nee cuani. ²⁸E'e, Eyacuiñajjiya shasha cuana pohua mee cani quea bame nee. Jjeya shasha cuana enequi; mecahuajje yaa'yani, joca'yani; dahuaje cani cuua pojja'a, chama'yo tii cuani. Jiquio ecua Eyacuiñajjiya shasha quea bame nee pohua mee cani jamaya ohuaya e'e jojo nei miquianaya ba'e meesahua caje'yo quea bame nee nee. Miquianaya ojaya quea boti nee nee cuani. Miquianaya jjashahuaba taiquiani jama ba'a: "E'e pojja'a eseya jaahuana jjima Eyacuiñajji". Cho, ¡a'a jamaya jjashahuabaquijji! —jamaya Jesosa cua.

²⁹—E'e, a'a jama pea'ai jjashahuabaquime pojji ba'a: "¿A'ya shai che ijijiae? ¿A'ya shai che ishije; chama ena? ¿A'ya shai che ecuua huoshoje?" ³⁰Ojjaña cuana Eyacuiñajjiya epeejji pojjeama cuana aquianajo jjashahuabaquiani tii tii. Eyacuiñajjiyo jjashahuabaquijji aija. E'e jojo nei esejaya Chii eyajo ani miquianajaya aquianajo, eba'ejjijo jjashahuabaquiani. Ojaya eba ojjaña, de. Jamajjeya ohuaya miya jaahuana cani. ³¹ ¡A'a pea cuana jayojja pojji! ¡Jjashahuabaquicue oe Eyacuiñajjiyo! ¡Onijje oe jjapee tiitiiquicue! ¡Ojaya esohuijo jjashajja'ajja tiitiiquicue! Jamaya jjashahuabaquianijo ohuaya miquiana huasijje aquiana eba'e meeiji quia caje'yo —jamaya Jesosa cua.

**Jesosaa eseya ojo chacochaco ani quijje eyajo quea huiso sosequia caje'yo
(Mateo 6.19-21)**

³²—E'e ecuea epeejji cuana, ¡a'a quea mete pojji Eyacuiñajji nijje jjapeequi majje! Ohuaya miquianaya quea bihui po mee caje. Ohuaya miquianaya ba'e tiitii mee caje'yo eyajo. ³³¡Quiacue miquianaaya aquiana aema' cuana huasijje! Miquianaaya quia jjima ajje miquianajaya aquiana sii ca chanal'; nojjo ca'yoo majje huiñaje'yo. ¡Jjeya Eyacuiñajjiyo chacochaco neineicue! E'e jojo nei ohuaya quijje miquianajaya sosequia caje'yo quea huiso nee nee eyajo. Miquianajaya esijiji pojjeama, miquianajaya epo'yo tii tii. ³⁴E'e jojo nei miquianajaya aquiana equijo jaahuanaña, jamatii jjashahuabaquiani miquianajaya equijo. Miquianajaya aquiana ca ca eyajo jaahuanaña, jamatii jjashahuabaquiani eyajo eba'e'yojjijo —jamaya Jesosa cua.

¡Acua epo oe anicue!

³⁵⁻³⁶ Jesosaa jama huohuime aca cua ba'a: —Shajja'ajjacue jiquio esohui ehuohui'yojo: Oe emeshi mese poquinaje cuiñajji yasijje. Ojo chacochacoani cuua emeshi mese ishoa'ajja canaje. Echacojjija ba jjima ache shono shai ojaya emeshi mese cueje o'oya. Jamajjeya daqui bame huosho canaje,

cuaquijiji jijinequinaje peal'ai. Cahui jjima cuanaje ishoa'ishoanequi jjejojo. Emeshi mese cue'yajo, ojo chacochacoani cuaa dobiqui mee ca'yonaje ojaya equi yasijje. Emeshi mese queabihui cuanaje ohua ishoa'ajja ca'aninaje jjejojo.³⁷ Jamajjeya ojjaña ojee anioquenaje e'ijjia'ijjiajji. Majoya aje ojee ijja'ijjia majje ojaya echacojji cuana queabihui nee nee cuanaje.³⁸ Jamaya oya cuana queabame cuanaje ishoa'ajja neinei canequinajejo. Mecajje, mecashono, epojjajo pea'ai ishoa'ajja canequinaje, de. ¡Jamaya miquianaya pocue! ¡Ejo jja'ishoa'ajjaqui anicue!³⁹ E'e, jiquio jama cuaje ba'a: Equimeseya siipojjiache shono cuejeposo acani. Ojaya eba jojjemo, ohuaya ishoa'ajja ca anime equijaahuanajiya.⁴⁰ Eya miquianajaya Edoe Mese, ¿ache nei eshequi nequijo eya miquiana que cueje o'oya ebajo ese? ¡Jamajjeya jja'ishoa'ajjaqui anicue! —jamaya Jesosa cua.

Ojo chacochacoani queabame nee nee cua

(Mateo 24.45-51)

⁴¹ Penohua Jesosa jama huohui'ajjame aca cua ba'a: —Esohui huohuijji, ¿a'a jiquio esohui ecuanajaye nei ebajji? Ojjañaebajji pojja'a ca coma.

⁴² Jesosa jama cua ba'a: —Eyaya huohuinaje jiquio esohui onaa shajja'ajja caje huisotiija ejjashahuabaquijji. Shajja'ajjacue jama ba'a: Oe emeshi mese poquinaje pea cuiñajji yasijje. Poqui jjimahuaa ojo chacochacoani huohui canaje pea ojaya echacojji bobiajji. Ojo chacochacoaniya emeshi meseja sohui shajja'ajja nei canaje.⁴³⁻⁴⁴ Emeshi mese cue'yo majje queabihui cuanaje ojo chacochacoani queabame nee nee chacochaconajejojo. Jamajjeya emeshimeseya oya jama huohuime acanaje ba'a: “¡Miyaya jjeya ojjaña ecuea aquiana cuana jaahuaque, miyaya ecuea esohui shajja'ajja neineinajejojo!” Jamajjeya ojo chacochacoani queabihui cuanaje.⁴⁵ Pea ojo chacochacoani jjashahuubaqui jjima cuanaje. Jama jjashahuuba taiquime cuanaje ba'a: “Ecuea emeshi mese quijke nei cueje'yo, jamajjeya eyapea echacojji cuana huasijje bobi quia sa po ajja. Poquije ca iña ishi'ishiya”. Majoya oya ojaya pea echacojji cuana nijje jjacuia majamajaqui nequinaje, huoo majamajanequi jjejojo. Oya chacochaco jjima cuanaje.⁴⁶ Majoya aje oe ojaya emeshi mese cue'yonaje. Emeshimeseya ba caña'yonaje ojo chacochacoani ehuoojaa. Majoya aje quea quene nee nee poña'yo majje quecuacaña'yonaje shajjamalojojo. Ohuaya jeajea canaje queahuesha. Jamaya Eyacuiñajjiya ojjaña mimishi cuana acaje'yo, huoojeajea caje'yo cuaqui yasijje —jamaya Jesosa cua.

⁴⁷ —E'e de, echacomeejji eba emeshi meseja esohui, oya ca ca shajjama'nei nei cuanaje. Jamajjeya aje oe emeshimeseya echacomeejji cuia caña'yonaje.⁴⁸ Pea echacomeejji ca ca ba jjima nei emeshi meseja esohui cuanaje. Jamajjeya emeshimeseya echacomeejji oe pojji cuia meeme acanaje oja ba jjimajojo. Jamaya Eyacuiñajjiya esohui eba nei nei epocajjashajja'ajjaquiahua ojaya epeejji nei nei epojji. Shajjama'jojoya ca Eyacuiñajjiya cuaqui yasijje jeajea caje'yo —jamaya aca cua Jesosaa.

Beca cuana Jesosaja epeeiji nei cuaje beca cuaa ca ca cajaa acaje
(Mateo 10.34-36)

⁴⁹ Jamaya Jesosa cua ba'a: —Eya cueyanaje ojjaña nijje jjapeequiya, beca cuana jjapeequije enijje, beca cuana ca ca enijje ejjapeequijji pojjeama. Jama huoojeameya eya acanaje Eyacuiñajjiya. ⁵⁰Eya quea nee nee cuaje'yo, mano mee caje'yo cuaa. Eya manocuaj'iyo sa cuani ojjaña mimishi cuana cuijea'yoji sosejje. Quea camaja eya cuaje'yo, de. Mano'yo majje ca eya camaja'ama cuaje'yo. ⁵¹ ¡A'a jjashahuabaquijji eya cueyanaje ojjaña cuana ojjaña meshijo ojee quea bei ba'e mee'yohua! Chojja, de. Pea cuana quea mase cuaje ecuea epeeiji cuana nijje. ⁵²E'e, jamaya cuaje. Oe equijo ba'e beca cuana ecuea epeeiji nei, beca cuana ca ca ecuea epeeiji pojjeama, Eyacuiñajjiya epeeiji nijje ba'e sa po ajja oya. ⁵³Ebacua ejja esohui ba epo ejeajji nijje ba'e sa po ajja ohua quea mimishi e'aca cuani jjejojo. Enaeseya oja bacua piona tecuea cani, ecuea epeejjijojo. Jamajjeya oja bacua piona onijke ba'e sa po ajja. Yano mese osecuajana nijje mimijajiani o esohui ba epo jojoya. Jamajjeya osecuajana onijke ba'e sa po ajja. E'e, jamaya miquianajaya equijo cuaje —jamaya Jesosaa aca cua.

Ojjañaja eba ena cuaje jamatii Jesosa ba jjima cua
(Mateo 16.1-4)

⁵⁴ Majoya Jesosa jama cua ba'a: —Mecajjeahua quea ichi neequijo, miquianaya jama cuani ba'a: "E'e de, quea ichi nequi, ena cuaje, de". E'e jojo nei ena cuani. ⁵⁵E'e de, jamaya pealai miquianaya cuani ba'a: "E'e de, eeno jjayejjequiajo quiyo dobi'yani". E'e jojo nei quiyo dobi'yani. ⁵⁶Miquianajaya eba ena cuanijo, quiyo dobi yanijo pealai. Jamatii beshahua nei miquianaya ca jja ca oe jjashahuabaqui jjima e cueyanajejo. ¡Miquianaya jja oe jjashahuabaquicue Eyacuiñajjiya esohuijo! Jamajjeya eya miquianaaya baje —jamaya Jesosa cua.

Pea esohui ejjashahuabaqui ja'ajjijo
(Mateo 5.25-26)

⁵⁷ —¿A'a miquianajaya eba quea bame eba'ejji? E'e pojja'a, jamajjeya jjashahuabaquicue jiquio esohuijo jama ba'a: ⁵⁸Miquiana nijje oe dejja quea quene nee nee cuajo miquianajaya aquiana sosequia jjimajojo, ohuaya miquianaya dojo caje sohuinano huasijje. Jamajjeya ¡dojo jjimahuua aquiana miquianaaya sosequia'yocue! Miquiaa mi sosequia'yajje ohuaya miquianaya dojo caje sohuinano huasijje ejeadobia meeiji. Majoya miquianaya sohuinanohua jeadobia caje. ⁵⁹E'e jojo nei ejeadobia tii jaaje. Ejeacuaya'yoji pojjeama miquiaa mi sosequiajje. Miquianaya sosequiajeyo'yajje ca mi ca oe jeacuaya caje'yo. ¡Jiquio jayojjaya oe pocue! Jamajjeya jjjeya Eyacuiñajji nijje jjapeequicue miquianaya mano'yo jjimahuua, cuaqui yasijje jea jjimahuua pealai! Jamajjeya miya cuaqui yasijje ejeadobiajji pojjeama —jamaya Jesosa cua.

¡Jjapeequicue Eyacuiñajji nijje!

13 ¹Majoya pea cuana poquia cua Jesosa baa. Beca cuaa jama huohui'ajjame aca cua ba'a: —De, jjeya nei Pinatohua, emeshi meseya Jodio dejja cuana quecua mee ca'yonaje. Ma dejja cuana Janinea meshijo ba'e poquinaje Jenosanena huasijje Eyacuiñajji bihuiaa. Eyacuiñajjija equi yasijje dobiqui majje ijjiacajji ehuone' cuana quecua canaje edahuajji. Eyacuiñajjija equijo nequi sohuinano cuaa dobiqui majje quecuajea ca'yonaje. Hua canaje equecua'yo cuanaja ena' ijjiacajjija enajo, de. Quea mimishi nee nee cuanaje emeshi mese Pinato, de. ¿A'a ma Jodio dejja cuana quecua ca'yonaje quea mimishijojo? —jamaya poso aca cua.

²Jesosa jama cua ba'a: —Chojja, de. Miquianaya jjashahuaba taiquiani. Jodio dejja cuana quea mimishi cuani quecua'yo jjima. ¿Yajja ajjaja oe pea cuana Jenosanenajo ba'e mi mano'yonaje oya jayojjaya pea'ai ca jja coma? ³Jamajjeya miquianaya mano'yo majje pea'ai Eyacuiñajji nijje jjapeequi jjima jjejojo cuaqui yasijje poquije'yo. ⁴E'e, Sinoe cuiñajjijo pea dejja cuana mano'yonaje. Equi quea ao nee nee iya canaje meshi edahua ca'a. Meshi ca'a jjaajajeaquí'yo majje dejja cuiamo'ijea ca'yonaje meshiya. Quea huiso nee nee, 18 dejja cuana mano'yonaje, de. ¿A'a oya cuana quea mimishi nee neejo mano'yonaje poso aña? Chojja, de. ¿Yajja ajjaja oe pea cuana Jenosanenajo ba'e mi mano'yonaje oya jayojjaya pea'ai ca jja coma? Quea mimishi nee nee cuani; oya cuana eshe, de, mano'yo jjima. ⁵Eyaya huohuije o'oya, miquianaya Eyacuiñajji nijje jjapeequi jjima po majje cuaqui yasijje poquije'yo, de —jamaya Jesosa cua.

Esohui acui jjajjama' cuajo

⁶Jesosaa jiquio ehuohui'yo jama huohuime aca cua ba'a: —Oe dejja acuijjajja banajji epo poquinaje que yasijje. Acui tii majje jjajjama' cuanaje, de. ⁷Ma dejja ojaya echacojji jama huohuime acanaje ba'a: “De, pea beca peejiima shequijame ca cuanaje ma acui. Jjajja ajja cuanaje. ¡Jajajeal'yocue; pea acui bana'yocue!” ⁸Ojaya echacojjiya jama huohuime acanaje ba'a: “Emeshi mese, ¡ishoal'ajjacie oe eshequijame! Eyaya jaahuana neineije so'o. Meshi tio majje ana'aija see meshi tejjee huanaje so'o. ⁹Acui eya jaahuana neineiajje quea jjajja huiso nee nee cuaje pojja'a. Jjajjama' po o'yojao oe cajajajea'yahua” jamaya ojaya echacojji cuanaje —jamaya Jesosa cua—. E'e, ma acui jjajjama' jayojja oe dejja jjapeequi jjima Eyacuiñajji nijje. Ma echacojjiya jjajja meesahua cani jama jayojja eyaya aña, dejja cuana jjapeequi meesahuaña Eyacuiñajji nijje —jamaya Jesosa cua.

Jesosaa oe epona mo'aa jjapiqui meequi ca'ya cua

¹⁰Ejomishocajji pojxajo Jesosa poquia cua Jodioja ejjachichaquijji equi yasijje esohui huohuiya. ¹¹Oe epona mo'aa ania cua jomajo. Edosiquianaja jjamo'a aqui mee'yo cua yahuajo. Quea huiso nee nee, 18 eshequijame

epona ejjamo'aaqui'yo ania cua. ¹²Jesosaa oya ba majje jama huohui'ajjame aca cua ba'a: —¡Epona, cuecue! Eyaya miya jjadaasapiqui meeje'yō.

¹³Majoya Jesosa que cueajo Jesosaa emeya napa cajje epi nei nequi'ya cua. Ma eponaa Eyacuiñajji bihuia ca cua. ¹⁴Jesosaa ma epona jjadaasapi meequi ca'ya cua ejomishocajji pojja. Majoya aje Jodioja ejjachichaquijji equi jaahuanajji Jesosa nijje quenequenea cua. Deja cuana jama huohuime aca cua ba'a: —Me oeje oe cahuime echacojji yani. ¡Ma pojja cuanajo cuecue ejjaajaqui'yojji! ¡A'a ejomishocajji pojja. Jesosaja jjaajaqui mee'yohua cuejji!

¹⁵Jesosaa ma esohui shajja'ajja majje jama tecueame aca cua ba'a:
—Chojja, ja'a jamaya mimiji! Miquianaya jama cuanaje ba'a: “¡A'a chacojji ejomishocajji pojja!” Miquianaya ca ca jiquio pojja. chacocharcoqui. Miquea ana'ai ejomishocajji pojja. ijjia'ljjia mee año. Miyaya miquea ana'ai ejeyo nequi pichojeña ena ishi meequiviji. ¹⁶E'e, jiquio epona mi jayojja, oe Jodio epona. Quea huiso nee nee, ¹⁸eshequiajame Edosiquiana jjamo'aaqui mee ca'ya cua, de. ¿Yajjajo acuaeya mi cuayajea mee'ajjaqui'yaña so'o ejomishocajji pojja? ¿A'a mi o jjapiqui mee'yo ajja jjejojo jama cuani? ¿A'a miya jjashahuaba taiquiani jjejojo jama cuani? —jamaya cua Jesosa.

¹⁷Jesosaja esohui shajja'ajja majje o ñiñebajji cuana quea bicho po'ya cua. Beca cuana ca quea bihui cua Jesosa nijje, ma epona jjapiqui mee ca'yajo. E'e de, Eyacuiñajjiya Jesosa quea sohui poja po mee ca'ya cua.

Esohui acui so' che biso neijo motasa sojo

(Mateo 13.31-32; Macoso 4.30-32)

¹⁸Majoya Jesosaa jama huohuime aca cua ba'a: —Ebionei Eyacuiñajji oe pojji dejjaja Emeshi Mese nei cuaje, quijke ca ca Eyacuiñajji ojjañaja Emeshi Mese nei cuaje, oya quea epeejji huiso cuaje. ¹⁹E'e, oe motasa so' biso nei tii majje acui quea quemó jayojja cuani, huapeje cui quemajja. Cuichojji motasa acuijo jaani. Ma eso' biso nei jayojjaya Eyacuiñajji epeejji cuani oe pojji jayojjaya cuani ebionei. Majoya quea huiso nee nee oyaya epeejji cuaje motasa acui jayojjaya —jamaya Jesosa cua.

Esohui ehuohui'yojji pahui shejjee meejjijo

(Mateo 13.33)

²⁰⁻²¹Pea esohui ehuohui'yo Jesosaa jama huohuime aca cua ba'a:
—Eyacuiñajji ojjañaja Emeshi Mese nei cuaje pahui shejjee yani jayojjaya. Jamaya oe epona pahui dahuajje cuanaje. Oe pojji nei eshejjee meejjijo iya canaje. Majoya aje ohuaya jeahuahuo canaje quea huiso pohuipohui pahui yajji. Majoya aje ojjaña shejjee'yonaje pohuipohui. Majoya aje quea huiso pahui cuanaje. Jamaya Eyacuiñajji epeejji pahui shejjee meejjijo jayojjaya cuani. Ebionei oe pojji epeejji cuana cuani, majoya aje pea cuana jjashahuabaqui mee cani Eyacuiñajji epeejji epojji. Quea huiso nee nee po mee cani —jamaya Jesosa cua.

Esohui ehuohui'yojji esecuejjani biso neijo
(Mateo 7.13-14, 21-23)

²²Majoya aje Jenosanena huasijje poquije, Jesosa pea cuiñajji cuana huasijje dobiqui poquia cua sohui huohuiya. ²³Jesosa aniñaqui jjimahuajo pea cuiñajjiyo ba'eya oya jama huohui'ajjame aca cua ba'a: —¿A'a oe pojji Eyacuiñajjiya epeeiji cuana poquije'yo eyahuasijje onijke ba'e'yohua?

Jesosa aje majoya jama cua ba'a: ²⁴—E'e de, yani oe esecuejjani biso nei edobiquiji eyahuasijje. Joya jjapeequi sa cuani enijje ma esecuejjani biso neijje dobiqui majje poquije eyahuasijje. Beca cuana ca ca poqui ajja eyahuasijje, enijje jjapeequi ajja jjejojo. ²⁵E'e, eya oe equi mese jayojja. Equi meseya esecuejjani ca'a ca'yonaje, beca cuana edobiqui cuajejje. Majoya esecuejo tii nequijeaje. Oya cuana jama po'ajja nequinaje ba'a: “Equi mese, ¡ca'apejocue ecuana edobiquiji!” Equi mese jama cuanaje ba'a: “Chojja, ecuea miquianaya ba jjima, de”. ²⁶Majoya oya cuana jama po'ajja nequinaje ba'a: “De, ecuanajaya miya eba, minijje ijja'ijjiana je. Miyaya esohui huohuinaje ecuanaja meshijo”. ²⁷Majoya aje oya jama cuanaje ba'a: “Chojja, ecuea miquianaya ba jjima. ¡Poquicue quea huesha, quea mimishi nee nee mi ca cuanaje! Miquianaya ecuea epeeiji cuana pojjeamajojo, dobiqui mee jjima aña”.

²⁸E'e de, miquianaya ma dejja cuana esecuejo nequi tii tii jayojja cuani. Miquianaya dobiqui sajo pa neineije'yo; miquianaya quea yeno nee nee cuaje'yo. Jamaya aje nequiana esecuejo nequi cuaje ba'a: “Ecuea etiiquiana ca dobiquia cua, e'e jojo nei oya cuana Eyacuiñajjiya epeeiji cua. Oya bajjani cua ba'a: Amajama, Isaaca, Jacobo, Eyacuiñajjiya esohui huohuijji nei cuana pea'ai. Jjeya Eyacuiñajji nijje nequi. Ecuana capoqui'yahua eyahuasijje”. Cho, miquianaya poqui ajja; quea yeno nee nee cuaje'yo. Shajja'ajja sa po ajja cuanaje ecuea esohui, Eyacuiñajjiya esohui pea'ai. ²⁹Ojjaña dejja joya enijje jjapeequi jjima dobiqui ajja tii eyahuasijje. Ojjaña meshijo ba'e Eyacuiñajji nijje jjapeequiani eyahuasijje poquije'yo. Jomajo onijje ijja'ijjaje quea bihui epoji. ³⁰E'e, jjashahuabaquicue jiquio esohuijo jama ba'a: Beca cuana jjeya ona huoojea'yojji cuani eyajo ona huoojea'yojji pojjeama cuaje'yo. Joya jjeya ona huoojea'yojji pojjeama ca ca eyajo ona huoojea'yojji nei nei cuaje'yo e jayojja —jamaya Jesosa cua.

Jesosa quea yeno cua Jenosanenajo ba'eca cuanajo
(Mateo 23.37-39)

³¹Majoya aje Paniseo dejja cuana Jesosa que cueya cua onijje mimiya. Majoya aje oya cuana jama cua ba'a: —¡Poquicuajicue oe, miya emeshi meseya, Enodeya, quecua sa acani!

³²Majoya aje Jesosaa jama aca cua ba'a: —Cho, ¡miquianaya jja ca oe poquicuajicue emeshi mese yasijje, Enode yasijje; oya dejja quea mase nee nee! Jjeya jiquio pojjo, mecahuajje pea'ai eyaya eshahua quea mase

cuayaqui mee'yaña, emano cuana jaa jjaajaqui mee'yaña. Ma mecahuajje acua cuaje'yo ecuea echacojji; ijamaya Enode aquicue! ³³E'e jjeya ca iña poquije'yo Jenosanena huasijje. Jomajo eya manoje'yo ma ecua Eyacuiñajji esohui huohuijji cuana mano ca'ya cua huasijjea.

³⁴Majoya Jesosa quea yeno nee nee cua Jenosanenajo ba'e cuanajo. Oya jama cua ba'a: —Jodio cuana Jenosanenajo ba'e, miquianaya ecuea quea jea nee nee. Jamajjeya eya miquianajo quea yeno cuani. E'e, miquianaaya aje oe Eyacuiñajji esohui huohuijji quecua'ya cua; ojaya ehuoojea'yo cuana jajahuejjajea'ya cua meiya pea'ai. ¡Bacue! Oe cachina enaeseya ebacua ejaa huanajji huojje cani. Jama jayojjaya eyaya miquianaya iyaa sa neineiaña e que ejaa huanajji. Jamatii miquianaya enijje jjapeequi sa po ajja. ³⁵Jamajjeya eya quea yeno nee nee miquianajo cuani. Miquianaaya Eyacuiñajji eya pea'ai cajaa anaje. Jamajjeya ohuaya jaahuanajja miquianajaya cuiñajji Jenosanena. Jamatii miquianaaya nei jaahuanaje; ba'ajja, quea camaja cuaje. Miquianaaya eya cajaa anaje, jamajjeya eba beca'yoji pojjeama mo nequianajaya. Miquiaaya eya cue o'oyajo jama aje ba'a: "Miya Eyacuiñajji huoojea'yo ojjaña jaahuanajji. Eyacuiñajji miya cajaahuana cahua quea bame" jamaya miquianaya cuaje quijje —jamaya Jesosa cua Jenosanenajo ba'e cuana nijje.

Jesosaa oe dejja eshejjee tii tii nequi shacuashacua mee ca'ya cua

14 ¹Oe ejomishocajji pojjajo Paniseo dejja etiiya Jesosa iyaa ca cua ijjal'ijjiaa. Jamajjeya Jesosa poquia cua oja equi yasijje. Pea Paniseo dejja cuana Moisesija etehue'yo huohuijji cuana pea'ai poquia cua oja equi yasijje ijjal'ijjiaa. Oya cuana Jesosajo jama jjashahuaba taiquime cua ba'a: —Jesosaa pojja'a oe jjaajaqui mee caje'yo ejomishocajji pojjajo; ba'ajja.

²Jesosa pejjejo oe dejja quea mano nee, eshejjee tii tii nequia cua.

³Jesosaa oya cuana jama huohui'ajjame aca cua ba'a: —¿A'a ya che jjaajaqui mee'yome jiquio ejomishocajji pojjajo? E'e pojja'a, chojja pojja'a. ¿A'ya acuae miquianaya jjashahuabauquiani so'o?

⁴Oya cuana mimi jjima nequia cua Jesosa bahuejjajji nisho. Majoya aje Jesosaa ma dejja eshejjee tii nequi napa ca cua emeya. Ma dejja shacuashacua mee ca'ya cua. Jesosaa oya jama huohuime aca cua ba'a: —¡Poquicue miquea equi yasijje!

⁵Majoya Jesosaa Paniseo dejja cuana jama huohuime aca cua ba'a: —Miquianaya chacochacoani ejomishocajji pojjajo. Bacue miquea ebacua, ana'ai pojja'a ejomishocajji pojjajo jjani quea doe yasijje oquequiajo, miquianaaya jjequisohuaje'yo. Jamaya miya chacochacoani ¿a'a e'e? E'e jojo nei. Jama jayojjaya shacuashacua mee'yomeya eyaya anaje —jamaya Jesosa cua.

⁶Paniseo dejja cuana jjashahuabauquiequi jjejojo, mimi jjima nequia cua.

E'ijjia'ijjiajji equi yasijke iyaa ca cua

⁷Majoya Jesosaa Paniseo dejja cuana nijje ijjia'ijjiaa cueaniya ba ca cua Paniseo dejja cuana e'anijji bame bame sa'ajja cuequi. Ba majje jama huohuime aca cua ba'a: ⁸—Oe equi meseya miquianaya pojja'a iyaa caje ijjia'ijjiaa. ¡A'a e'anijji quea bame sa'ajjajji! ⁹Equi meseja epereeji nei cueje, ca'anijyahua ma e'anijji bame bamejo o pejjejo. Jamaya miquianaya nijje mimije ba'a: “¡Nequisohuacue miya; poquicue pea e'anijji yasijke! Ecuea epereeji ca jiquiojo ca'anijyahua”. Quijjeyejjenei nequi e'anijjijo anioque'yo majje quea bicho miya cuaje ojjaña ba caje'yo jjejojo. ¹⁰E'e de, jamajjeya miquianaya iyaa cajje ijjia'ijjiaa, janioquecue pea cuana nijje quijjeyejjenei nequi e'anijjijo! Majoya ma equi mese cueje mi que pojja'a, jama huohuime acaje ba'a: “¡Miya cuecue e'anijji bame yasijke e pejjejo!” Majoya pea cuaa ba caje miya anijji bamejo ani. Jamajjeya miquianaya quea bihui nee cuaje. ¹¹Jamaya cuaje miquianaya. Eyacuiñajji eba ojjaña jama cuani. Miquianaya jama jjashahuuba taiquime cuani ba'a: “Eya che oe ese ejja quea bame nee nee cuani”. Cho, Eyacuiñajji eba miya. Miquianaya jja oe jjashahuuba bamebamequicue jama ba'a: “Eya ca iña pea cuana ba'e meesahua sa cuani oya cuana quea bame epoji”. Majoya aje Eyacuiñajjiya miquianaya quea bame ba'e meesahua caje. Majoya miquianaya dejja quea bame nee nee cuaje —jamaya Jesosa cua.

¹²Majoya Jesosaa Paniseo dejja etii jama huohuime aca cua ba'a: —Jamatii miquea bobo quea huiso anijo, miquea huapa pojjeama, miquea epereeji nei pea'ai miyaya iyyaña ijjia'ijjiaa. ¹³Jamajjeya miya ohuaya iyaa caje esosejjeja. ¡A'a jama amajamajajji! ¡Iyaacue aema' cuana, jeo'ajja cuana, poquideja cuana, cojjama' cuana iyaacue bobo ijjiaa pea'ai! ¹⁴Ohuaya nequiana ca ca sosequia jjima miya acaje. Majoya miyaya ma jayojja ajo Eyacuiñajjiya miya quea bihui nee po mee caje. Quijje miya eyajo ba'eje'yo Eyacuiñajji nijje. Majoya aje Eyacuiñajjiya miya eyajo sosequia caje'yo quea huiso nee —jamaya aca cua Jesosaa.

Esohui ehuohui'yo ojee e'ijjia'ijjiajji (Mateo 22.1-10)

¹⁵Oe dejja Jesosaja esohui shajja'ajja majje Jesosa jama huohuime aca cua ba'a: —Ojjaña quea bihui cuaje eyajo ojee ijjia'ijjiani Eyacuiñajji nijje oja epereeji cuana nijje pea'ai.

¹⁶Jesosaa jama huohuime aca cua ba'a: —E'e jojo nei, ca joya eyahuasijje poquije'yo quea bihui nee cuaje. Jiquio esohui ehuohui'yojo ca jama jjashahuubaquime pocue ba'a: Oe emeshi meseja bobo quea huiso aninaje. Iyaa canaje dejja cuana quea huiso nee nee. ¹⁷Bobi acua cuajo, huoojea canaje ojaya echacoiji ona iyyaaa. Iyaa canaje ojaya epereeji cuana. ¹⁸Oe epereeji jama cuanaje ba'a: “De, eya poqui sa po ajja, jjeya jjeshenaje meshi, eya poquije ca iña meshi

baa".¹⁹ Pea epeejji jama cuanaje ba'a: "De, eya poqui sa po ajja pea'ai, eyaya jjeshenaje me oeje huisome anal'ai acuijo she'anayijaca. Poquije ca iña anal'ai jaahuanaa".²⁰ Pea epeejji jama cuanaje ba'a: "De, poqui sa po ajja ca iña; oya ca iña jjeya nei jjahuanaquiaña".²¹ Echacojjiya oja meshi mese yasijje cue'yo majje huohui canaje ojjañaja esohui ma cue ajja cuanaje cuanaja. Majoya emeshi mese huohui cajje quea quene nee cuanaje. Huoojea ca o'oyanaje ojaya echacojji pea iyaaa. Jama cuanaje ba'a: "¡Jjequicue jjeyahua nei pea cuana! ¡Iyaacuicue aema' cuana, jeo'ajja cuana, poquideja cuana, cojjama' cuana pea'ai ecuea equi yasijje bobi ijjiaa".²² Majoya echacojji poquinaje pea jjequiya. Jjequi majje echacojjiya emeshi mese jama huohuime acanaje ba'a: "Emeshi mese, eyaya pea cuana jjequinaje, e'aniji cuiñajeyo jjima cuanaje. Quea dejja huiso cue jjima, de".²³ Jamajjeya emeshi mese jama cuanaje o'oya ba'a: "¡Poqui o'oyacue quea huesha nee nee; pea cuana ba'e yasijje iyaacuicue! ¡Cue meecue pea cuana: "Ecuea e'aniji cuiñajeyo jjima" acue! Ecuea equi cuio mee sa aña dejja. ²⁴ Ecue epeejji cuana ca ca eyaya ebionei iya'a'ajjanaje, jamatii enijke ijija'ijjia jjima cuani" jamaya cuanaje emeshi mese —jamaya aca cua Jesosaa. Jamaya Eyacuñajjiya dejja cuana quea huiso nee nee iyaal'ajja cani, jamatii oe pojji poquiani onijke ijija'ijjiaa.

Quea camaja Jesosaja epeejji epojji
(Mateo 10.37-38)

²⁵ Ojjañaa Jesosa equijje aca poquia cua. Majoya Jesosa jjabajeaquí'yaa cua. Ohuaya jama huohuime aca cua ba'a: ²⁶—¡Miquianaya enijke jjapee neineiqui sa cuani, eya oe quea jea nee nee acue! ¡Miquea huapa pojjeama oe pojji quea jea acue! Miquea enaese, mique chii cuana, mique huanase cuana, mique bacua cuana, mique doe, mique jjo'i jama, ¡quea jea nee ameya mo oe acue!²⁷ Miquianaya enijke jjapeequiijo pea cuana miquiana nijje mimijajje. E'e, jiquio ecua acui ecueata'apee quea camaja e'abojji jama jayojja enijke jjapeequiijo quea camaja cuaje. E'e de, pea cuaa miquianaya cuia sa acaje, quecuia sa acaje pojja'a enijke jjapeepajeaquí'yoo aijajojo. Miquianaya ecuea epeejji nei po tiitianijo jamajjeya e'e jojo nei miquianaya ecuea epeejji nei nei cuani.²⁸ ¡Ejo jjashahuaba neineiquicue enijke jjapeequi jjimahua, quea camaja epo cuahuajje! Miya quea nee, quea yeno pojja'a cuaje enijke jjapeequi majje. E'e jojo nei oe dejja equi iya jjimahua jo jjashahuabaquiani ma equi e'iyajji nishojo.²⁹ Majoya ohuaya cajaa acanaje mi iya majje. Beca cuaa niñeba canaje jama ba'a:³⁰ "E'e de, ma dejja iya'ajja canaje, jjashahuaba neineiqui jjima jjejojo mi iyajeyo canaje". E'e, jamaya enijke jjapeequi jjimahua jo jjashahuaba neineiquicue ejapee tiitiiquijji enijke!

³¹—E'e de, oe emeshi meseya pea emeshi mese nijje jjaquecuaqui mee sa acanaje. Ebionei ohuaya sico canaje ojaya sohuinano cuana. Ojaya yani 10 mil sohuinano cuana, quea huiso pishana. Pea emeshi meseja ca ca sohuinano 20 mil cuanaje, quea huiso nee nee, de. Jamajjeya ma emeshi mese oe pojji pishana sohuinanojo jjaquecuaqui mee jjimahua jjashahuaba neineiquinaje.³² Oya jama cuanaje ba'a: "De, quea camaja,

ecuea oe pojji sohuinano yani". Jamajjeya emeshi meseya pea emeshi mese yasijje oe sohuinano huohui pohua huoojea canaje jjaquecuaqui mee sa po ajjaajjejo. Onijje jjapeequi sa cuanaje.

³³E'e, jamaya miquianaya jjapeequi sa cuani enijje pojja'a.
¡Jjashahuaba neineiquicue ejo jjapeequi jjimahua! Quea camaja cuaje enijje jjapeequi majje —jamaya Jesosa cua.

Ehuohui'yo sanejo
(Mateo 5.13; Macoso 9.50)

³⁴Jesosaa pea esohui jama huohuime aca cua ba'a: —Sane quea bame nee nee. Jamatii sane sese'ama cua jjemo jeajea cajji. ³⁵¿Achacua jeajea cajji? Quea huesha nee nee. E'e, quea huesha jea jjima ca ca meshi quea tai sane tejjee cuaje, saneya acui tii mee jjima acaje. Jamaya miquianaya enijje jjapeequiani, majoya jjapeepajeaquije'yo pojja'a. Miquianaaya eya pajea'yo majje eyaya miquianaya jeajeaje'yo quea huesha nee nee sane jayojjaya. Jamajjeya ¡jjashahuaba neineiquicue enijje jjapeequi jjimahua! —jamaya Jesosaa aca cua.

Ehuohui'yo ñajjajja epoquiquehua ba'yojjijo
(Mateo 18.10-14)

15 ¹Dejja cuana emeshi meseja bejjo jjeshejji cuani poquia cua Jesosa que oja esohui shajja'ajja. Oya cuana jamatii quea mimishi nee nee cua. Pea dejja cuana quea mimishi nee nee poqui pea'aiya cua Jesosaja esohui shajja'ajja. ²Paniseo dejja cuana, Moisesija etehue'yo huohuiji cuana jjaniñebaqui aña cua pea cuana nijje jama Jesosajo po aña cua ba'a: —De, Jesosa jjapeequiani dejja quea mimishi nee nee cuana nijje, ijja'ijja ani ona nijje, de.

³Ma esohui shajja'ajja majje Jesosaa esohui ejjashabaqui meeiji jama aca cua ba'a: ⁴—Oe dejja yarinaje, ojaya ñajjajja cuana quea huiso nee, 100 huisome. Oe ñajjajja poquiquehuhanaje. Dejja poquinaje ñajjajja sa'ajja'yohua. Pea ñajjajja 99 huisome ojee ijja'ijjaqui jea cananananje. Sa'ajja neinei ca'yoquinaje, de. ⁵Majoya aje ba'yo majje abo ca'yonaje. Abo majje dojo ca'yonaje o nequijji yasijje, quea jaji nee nee po'yonaje. ⁶Ñajjajja meseya ojaya epeeiji jama huohuime acanaje ba'a: "Ba'yonaje eyaya ecuea oe ñajjajja, de. Jjeya nei enequi'yo, e'e de, jjeya eseya quea bihui epo'yo".

⁷—E'e, ñajjajja epoquiquehua oe dejja quea mimishi nee nee jama jayojja cuani. Eyacuiñajji ma ñajjajja mese jayojja cuani. Jamatii Eyacuiñajjiya dejja mimishi cuana sa cani ojaya epeeiji epoji. Ohuaya dojo sa cuani ma dejja eyahuasijje. Eyacuiñajji quea bihui cuaje oe dejja mimishiya ojaya mimishi pajea ca'yajo, Eyacuiñajji nijje jjapeequiajo. Ojjaña eyajo ba'eca cuana quea bihui cuaje'yo ma dejja mimishi Eyacuiñajji nijje jjapeequiajo —jamaya Jesosa cua.

Esohui ehuohui'yo eponaa bejjo ba ca'ya cuajo

⁸Jesosaa pea esohui jama huohuime aca cua ba'a: —Oe eponaja bejjo ome miji peal'ai aninaje. Oe bejjo oquequehuajequinaje meshi yasijke equi yiyyedojjojo tiiya. Jamatii sa'ajja neinei ca'yoquinaje eponaa. Cuaquijijiya bejjo jeaja'a'ajja ca'yonequinaje. Majoya aje cuiashaba'ajja ca'yonaje. Majoya aje cuiashaba'yo majje ba ca'yonaje bejjo. ⁹Majoya aje quea bihui po'yonaje bejjo ba majje ojaya epeeiji cuana huohui ca'yonaje jama ba'a: “E'e ee, eseya jjeya quea bihui epo'yo. Eyaya ba'yonaje bejjo ma oquequehuajequi cuanaje” epona cuanaje. ¹⁰E'e, ma bejjo oe dejja jayojja cuani. Oya quea mimishi nee nee jjapeequi sa cuani Eyacuiñajji nijje; ojaya mimishi pajea'yo sa cuani. Jiquio ecua epona bejjo ba majje quea bihui nee nee cuani jayojja Eyacuiñajji quea bihui cuani dejja mimishi onijje jjapeequiajo. Eyacuiñajjiya esohuidojoojji cuana eyajo ba'e quea bihui nee nee cuaje oe dejja Eyacuiñajji nijje jjapeequiajo —jamaya Jesosa cua.

Esohui ehuohui'yo oja chiiya oja bacua nijje jjabeiqui'ya cuajo

¹¹Pea esohui Jesosaa jama huohuime aca cua ba'a: —Oe emeshi meseja becanejjiji peal'ai ebacua ejja nequinaje. ¹²Ebacua ejja shacuima' nequi epohua oja chii jama huohui'ajjame acanaje ba'a: “Ecue chii, ¡bejjo mo quia'yocue ecuea yajji; miya mano'yo jjimahua oe mo quia'yocue!” Jamajjeya oja chii jama cuanaje ba'a: “E'e ma'aje”. Ma echahua mesejame oja iya poquia quia ca'yonaje echahua mese que. ¹³Majoya aje quijje pishana echahua meseya ojaya aquiana, meshi peal'ai quia canaje bejjo sosejje. Ma bejjo sosejjea poquinaje pea meshi yasijke quea huesha nee nee. Jomajo quea mimishi nee nee ba'enaje, de. Ohuaya bejjo quia jeyojeyo ca'yonaje huoo majamajajjiya jjejojo. ¹⁴Chama'yo tii ojaya bejjo po'yonaje, quea shoe nee nee po'yonaje peal'ai. Ma meshijo bobo chama'yo tii cuanaje ejjeshejji, de. ¹⁵Ohuaya oe dejjaja echacojji sa'ajja canaje. Oe dejjaa oya huoojea canaje cuichi nequi yasijke cuichi cuiñajji epojji. Majoya ohuaya cuichi cuiñaqui canaje. Chama'yo tii ojaya bobo po'yonaje, de. ¹⁶Jamajjeya aje cuichija bobo ijija sa cuanaje quea shoe nee nee jjejojo, bobo peaja quia jjima nei nei cuanaje jjejojo.

¹⁷—Majoya aje jama jjashahuuba neineiqui'yome cuanaje ba'a: “E'e de, ecue chiiya echacojji jomajo yani, bobo quea huiso yani jomajo, de. ¡Yajjajje shai eya jiquiojo quea shoe nee nee po'yo ani, de? ¹⁸Eya capoqui'yahua ecue chiiya equi yasijke. Eyaya oya jama huohuiñaqui'yome aje ba'a: —Ecue chii, eya quea mimishi cuanaje minijje, Eyacuiñajji nijje peal'ai —eyaya añaquije'yo ecue chii. ¹⁹Ecue chii enijje quea quene cuaje eya quea mimishi cuanajejojo. Ohuaya eya oja bacua pojjeama jayojja acaje. Jamajjeya mo eya ojaya echacojji capo'yahua. Eya quea shoe nee nee, aema' peal'ai. Quea yeno nee nee eya cuani ecue mimishijo. E'e de, jjeya nei eya poquije'yo ecue chiiya equi yasijke” jamaya jjashahuubaquinaje ma ebacua ejja.

²⁰—Majoya aje poqui o'oyanaje oja chiiya equi yasijke. Majoya oja chiiya oja bacua ejja ejiojiji quea huesha cueje'yo ba canaje. Jama cuanaje ba'a: “Ecue bacua ejja pojja'a joma cueje'yo”. Oya majoya quea jaji nee po'yonaje oja bacua ejiojiji quee'yo ba majje. Majoya aje oja bacua que poquinaje; emeya cuiapashi cajjequi'yonaje; shemo tojjo cajjequi'yonaje quea jeajojo.

²¹—Majoya aje ebacua ejjaa oja chii jama huohuime acanaje ba'a: “Miya ecue chii nei nei, eya quea mimishi nee nee cuanaje minijje, Eyacuiñajji nijje pea'ai, de. Miyaya pojja'a eya niñeabaña, jamajjeya pojja'a eya miquea echacojji capo'yahua miquea ebacua pojjeama jayojja”.

²²—Oja chii jama cuanaje ba'a: “Chojja, miya ecuea ebacua ejja nei, echacojji pojjeama”. Oja chiiya echacojji cuana jama huohuime acanaje ba'a: “¡Yecue ecue bacua ejjaja daqui eyacua nei nei, oe emehuao pea'ai, ejiojji shejee pea'aiya oe yecue! ²³ ¡Quecuacue oe ana'ai esejaya ojee e'ijjajji! Jjeya eseja ojee ijija'ijjiaje ecue bacua ejja cue'yonajejo. ²⁴Eya jjeya queabihui ecue bacua ejjajo; oya emano'yo jayojja cuanaje, chama'yo tii, jjeya ca cue'yonaje ecue bacua ejja, eshe de. Oya ca ca ecuaquisho'yo cuanaje, jiquio pojja oca eyaya ba'yonaje ecue bacua ejja”. Majoya aje bobi acua amajje ojjaña ijija'ijjianaje.

²⁵—Edoe mese chacochaco aninaje quejo; oja ba jjima echahua mese cue'yonaje. Quijje oya cue'yonaje oja equi yasijke. Shajja'ajja caña'yonaje quea shajjaquijjo cuani ojjaña ijija'ijjiani ojee. ²⁶Ohuaya oe esho'i huohui'ajja canaje: “¿A'ya acuae po ca ani so'o?” ²⁷Jama esho'iya acanaje ba'a: “Mique chahua cue'yonaje quea aja nee nee, de. Mique chii queabihui po'yonaje, de. Jamajjeya ojjaña ijija'ijjia mee cani ojee queabihui'yohua jjejojo”.

²⁸—Majoya aje oja doe quea quene nee nee cuanaje, pea cuana nijje ijija'ijjia sa po aija cuanaje. Majoya oja chii cuayaquinaje edoe mese jjequidobiaa nisho. Dobiqui aija cuanaje oja bacua ejja equenequene neinei'yo jjejojo. ²⁹Majoya edoe mese oja chii nijje miminaje: “Eya chacochaco nei'yonaje ee nei, de. Quea shequiaja huiso nee nee. Eya mimishi'ama nei cuanaje minijje; jamatii eyaya miquea esohui shajja'ajjanaje, de. Miyaya che ecue chivo sho'i cuia jjima anaje ecuea epeejji nijje ojee e'ijjajji. Miquea quea nahue cuanaje ejo, de. ³⁰Mique bacua ejja sho'i shajjama' cue'yajo ca jjaya ca oe che ana'ai quecua'yonaje. Oya quea mimishi nee nee cuanaje; pea epona cuana nijje jjacoojojeaqui nequi'yonaje miquea beijo sosejje, de” jama cuanaje edoe mese.

³¹—Majoya oja chii jama cuanaje ba'a: “Miya ecue bacua ejja quea bame nee, miya eyaya jaahuana neineiaña. Ojjaña aquiana ecuea, miquea epo'yojji. ³²Mique chahua cue'yajo ecuanaya queabihui po'yonaje. Oya ca ca emano'yo jayojja cuanaje. Oya cue'yonaje jjeya, eshe de. Oya ecuaquisho'yo jayojja cuanaje; jjeya nei ca ca eyaya oya ba'yonaje” jamaya oja chiiya oja bacua ejja etii acanaje. E'e de, mahuiso —jamaya Jesosa cua. Jamaya Eyacuiñajjiya quea jea ameya acaje dejja mimishi cuua oja mimishi pajea cal'yajo, onijje jjapeequiajo pealai.

Esohui ehuohui'yo echacomeejji jjadasiaquia cuajo

16 ¹Jesosaa o shajja'ajjajji cuana jama huohuime aca cua ba'a:
 —Oe emeshi mese quea beijo huiso nee aninaje. Ohuaya
 shajja'ajja canaje ojaya echacomeejjiya sii cani ojaya aquiana. ²Jamajjeya
 huohui'ajja canaje ojaya echacomeejji jama ba'a: “Pea cuaa eya huohui
 canaje miya siipojji cuani. ¿A'a cuae jja miya siipojji nei so'o? ¡Huohui
 po'ajja socue! Jamajjeya miya ecuea echacomeejji nei pojjeama. ¡Yecue
 ma papenijo etehue'yo jaa ebajjani cuana!

³—Majoya aje echacomeejji jjashahuubaquinaje jama ba'a: “De, chama'yo
 tii ca ecua echacojji cuaje'yo, ecuea emeshi meseya eya cajaa aca'yonaje,
 de. Eya jjeya quea aa mano echacochacojji, de. Eya ca iña eme huo sa po
 ajja quea bicho jjejojo. ⁴E'e de, jjeya nei ca iña jjashahuubaquinaje pea dejja
 cuanaja sosequia'yo jjimajo. Eyaya oe pojji sosejjesheje'yo. Majoya eya ecuea
 emeshi meseya huoojea cajo pea cuaa ba'e meesahua caje, enijje queabihui
 cuaje. E'e de, eyaya tehueje o'oya ojjaña echacojji cuanaja emeshi mese
 sosequia jjima; oe pojji aje'yo” jamaya echacomeejji jjashahuubaquinaje.
⁵Jamajjeya ohuaya pea dejja cuana iyaa canaje emimijji, ache huiso onajaya
 sosequia'yo jjima ebajji. Ohuaya jama huohui'ajjame acanaje ba'a: “Ache
 sose huiso acuae miquea sosequia'yo jjima so'o? ⁶Oe dejjaaa jama saja'am
 acanaje ba'a: “Ecuea sosequia'yo jjima mahuiso ba'a: ecuea ese 100 natame,
 quea huiso nee nee eyaya jjeshenaje, de”. Majoya echacomeejji jama cuanaje
 ba'a: “E'e de, e'e jojo nei miquea papeni yani ecue tehue. Jjeya ca ca miquea
 sosequia'yo jjima nequi 50 natame, jamaya eyaya tehueje o'oya pea papenijo
 oe pojji esosequia'yojji”. ⁷Majoya ohuaya pea dejja acanaje jama ba'a:
 “¿Ache huiso acuae miquea sosequia'yo jjima so'o?” Oya jama cuanaje ba'a:
 “Quea huiso nee nee, 100 natame anoso ai, de”. Echacomeejji jama cuanaje
 ba'a: “E'e de, jjeya ca ca papenijo tehueje o'oya 80 natame esosequia'yojji”
 jamaya cuanaje echacomeejji dejja cuana nijje, onijje quea bei epoji.

⁸—E'e de, quijje pishana emeshi meseya ojaya echacomeejji ae po ani
 shai ba canaje. Ba majje jama cuanaje ba'a: “E'e de, ohuaya eya dasia
 canaje. Jamatii oya jjashahuaba neineiqui'yonaje. Oya quea epeejji huiso
 nee nee po sa cuanaje o ba'e meesahua jjiyojji”. Mahuisoya jiquio esohui
 —Jesosa cua—. ⁹¡Miquianaya ca ca jjashahuaba neineiquicue quea bame
 epoji pe a cuana nijje! Jamajjeya miya Eyacuiñajjiya ba'e meesahua caje.
 Majoya miquianaya mano'yajo, ohuaya dobiqui mee caje'yo eyahuasijje
 eba'e tiitii'yojji.

¹⁰—Miquianaya jjeya oe pojji aquiana jaahuana neineiaña, miquianaya
 quea bame po majje quijje eyajo miquianaya quea huiso jaahuana
 neineije'yo. Miquianaya oe pojji jjadasiaquiani quijje miquianaya
 jjadasiaquiji nei nei cuaje. ¹¹Miquianaya oe pojji aquiana jiquiojo jaahuana
 jjima aña, Eyacuiñajjiya miquianaya aquiana quia jjima acaje'yo eyajo. ¹²E'e

de, miquianaya pea cuanaja aquiana jaahuana jjima añajo Eyacuiñajjiya miquianajaya aquiana quia jjima acaje'yo eyajo —jamaya Jesosa cua.

¹³—E'e de, ¡miquianaya jja ca oe Eyacuiñajjiyo jjashahuuba majamajaquicue! ¡Oe nei neijo oe jjashahuabaquicue, aquianajo pojjeama! Jamaya oe Eyacuiñajji nijje jjapeequi sa cuanijo, ja'a aquianajo jjashahuabaqui majamajaji! —jamaya cua Jesosa.

¹⁴Paniseo dejja cuana ma esohui shajja'ajja majje mimijajia cua Jesosa nijje bejjo quea huiso sa cuanijo. ¹⁵Jamajjeya aje Jesosaa jama tecueame aca cua ba'a: —Miquianaya jjashahuuba taiquiani miquianaya oe dejjaya quea bame ba'yani poso cuani. Dejja cuaa ca ca oe miquianaya quea bame poso acani. Miquianaaya dejja cuana dasiaña. Miquianaaya ca ca oe Eyacuiñajji dasia jjima aña, ojaya miquianaya eba nei nei, de. Miquianaya jama cuani boti'ama. E'e, joya miquianaaya quea bame poso aña Eyacuiñajjiya boti'ama —jamaya Jesosa cua.

Eyacuiñajjiya esohui ma ani tiitii'yome cuaje

¹⁶—Yahuajo nei nei Eyacuiñajjiya esohui huohuijji cuaa huohui ca cua Moisesija etehue'yojo. Jama cua ba'a: "Quije Eyacuiñajjiya huoojea'yo ojjaña jaahuanajji Emeshi Mese oe nei cueje". Jjeya nei ca ca Huaniya enajo ona besameejji cuanaje huohui canaje Eyacuiñajjiya pea esohui jama ba'a: "Quito ojjaña Emeshi Mese cueje jjeya nei". Jamajjeya quea huiso nee nee dejja cuana jjapeequi sa cuani Eyacuiñajji nijje. ¹⁷Jamatii Eyacuiñajjiya esohui e'e jojo nei cuani, quea bame cuani. Quije ojjaña meshi cuana majameta cuana chama'yo tii cuaje, de. Eyacuiñajjiya esohui ca ca ma ani tiitii'yome cuaje —jamaya Jesosa cua.

Esohui ejjahueiquijijiyo (Mateo 19.1-12; Macoso 10.1-12)

¹⁸Jesosaa esohui jama huohuime aca cua ba'a: —Oe dejjaja ehuanase huei cuani pea ehuana'yojji jamaya pea cojjojji cuani. Oe dejja oe epona ehuei huana'yo majje pea cojjojji cuani pea'ai. Epona yahue hueijji cuani pea cojjojji pea'ai cuani. Jamajjeya dejja cuaa ja'a ehuanase hueijji, eponaa pea'ai a'a miquea yahue hueijji! —jamaya Jesosa cua.

Ehuohui'yo oe dejja quea aquiana huiso nee neejo Nasanojo pea'ai

¹⁹Jesosaa pea esohui jama huohuime aca cua ba'a: —Oe dejja quea bejjo huiso nee nee cuanaje. Ojaya daqui quea bame nee; quea nahue nee nee oja jjeshe huosho caninaje. Bobi quea huiso aninaje ojaya equijo; ijjiatijja majamajanaje.

²⁰Pea dejja ca aema' cuanaje Nasano bajjani. Oya chiji nei nei po'yonaje; oya quea mano cuanaje. Jamatii Nasano dejja quea bejjo huisoja esecuejjani pejjejo aniñaquinequinaje. ²¹Jamatii ojaya chiji iñahuehuaa sio canaje. Oya jama po'ajja aninaje ba'a: "¡Chemo bobo quiacue joya miquea ijja shaa an!" jamaya Nasano po'ajja aninaje. ²²Nasano Eyacuiñajjiya epeejji cuanaje, jamajjeya mano'yo majje

Eyacuiñajji ani yasijje poqui'yonaje. Nasano ani'yonaje Amajama pejjejo, Jodioja etiiquiana pejjejo. Majoya aje ma dejja quea aquiana huiso mano'yonaje pea'ai. Ohuajea canaje cuaa.²³ Oya Eyacuiñajji epeeiji pojjeama, jamajjeya emano'yo oijaña eshahuaja epeeiji cuana poqui caquijje poquinaje cuaqui yasijje. Jomajo oya quea nee nee po'yoqui. Jomajo ohuaya Nasano, Amajama pea'ai ba canaje eyajo quea huesha nee nee.²⁴ Oya jama taaame cuanaje ba'a: "Amajama ecuea etiiquiana, ¡che oe ejo jjashahuabaquicue! Eya quea quiyo nee nee po'yoqui jiquojo, de. ¡Che jjo yana chopeshihuacue! ¡Huoojeacue Nasano ecue yana chopeshiya eya quea naba taja nee nee acue!" jamaya ma dejja quea aquiana huiso cuaquijo nequi cuanaje Amajama nijje. Nasano ca oe poqui jjima cuanaje.

²⁵—Amajamaa eyajo jama huohuime acanaje ba'a: "De, miyaya pajea'yonaje pojja'a. Miya esheahua quea aquiana huiso ba'enaje meshijo. Jamatii Eyacuiñajji nijje jjapeequi jjima cuanaje. Nasano ca ca aema' quea mano po'yonaje pea'ai. Oya ca ca Eyacuiñajji epeeiji cuanaje. Jamajjeya Eyacuiñajjiya oya quea jaji nee nequi mee ca'yani. Miya ca mi ca oe quea yeno nequi'yo, quea quiyo nequi'yo.²⁶ Eyacuiñajjiya miya cue mee jjima acani ecuana nequi yasijje ojaya epeeiji pojjeama cuanajejojo. Ecuana mi que poqui mee jjima acani pea'ai" jamaya cuanaje Amajama.

²⁷—Ma dejjaya cuaqui dojjojo nequi jama taaame po nequinaje ba'a: "¡Che jjo oe ecue huapa pojjeama meshijo ba'e jjashahuabaqui meecue Eyacuiñajjiyo! ¡Huoojeacue Nasano ecue chiija equi yasijje huohuiya! ²⁸ ¡Ecue chahua me oeje huiso tiiya jjashahuabaqui meecue Eyacuiñajjiyo acue! Eyacuiñajji nijje cajjapeequiahua cuaqui yasijje mi cueje'yo acue".

²⁹—Majoya aje Amajama jama huohuime aca o'oyanaje ba'a: "Yani aje jja ca Eyacuiñajjiya esohui etehue'yo, Moisesiya tehue ca cua yahuajo nei nei. Pea cuaa tehue ca cua pea'ai yahuajo nei nei, de. Ma esohui oya cuaa cashajja'ajja cahua. Esohui shajja'ajja majje poqui'yo ajja cuaqui yasijje, mi jayojja epo'yojji pojjeama" jamaya cuanaje Amajama.

³⁰—Majoya aje ma dejja cuaquijo nequi jama cua ba'a: "Chojja de, oya cuana jjashajja'ajjaqui ajja. Ma esohui etehue'yojo jjashahuabaqui ajja. ¡Huoojeacue oe emano'yojaa shequi o'oya esohui huohuiya! Majoya quea bame cuaje, de. Onaaya emano'yojaa shequi o'oyajo ba majje jjashahuaba neineiquije Eyacuiñajjiya esohuiyo. Jjapeequije'yo Eyacuiñajji nijje, de" cuanaje ma dejja cuaquijo nequi.

³¹—Majoya aje Amajama jama cuanaje ba'a: "Chojja de, jjashajja'ajjaqui ajja Moisesija etehue'yojo, Eyacuiñajjiya esohuiyo, jamaya ohuaya shajja'ajja jjima acaje emano'yojaa shequi o'oya ca Eyacuiñajjiya epeeiji epoji. Chojja, eyaya oya emano'yojaa huoojea'yojji pojjeama esohui huohuiya" jamaya cuanaje Amajama eyajo nequi. E'e de, mahuiso —jamaya Jesosa cua.

Quea mimishi mi po o'oya chana'
(Mateo 18.6-7, 21-22; Macoso 9.42)

17

¹Jesosaa o shajja'ajjajji cuana jama huohuime aca cua ba'a:
 —Jamatii pea cuaa ecuea epjeeji eyacua quea mimishi po
 mee o'oya sa acani. Jamaya o cuajo Eyacuiñajji quea quene nee nee
 cuaje onijje. Ohuaya oya jeajea caje'yo cuaquí yasijje, de. ²Jamajjeya
 ¡ecuea epjeeji quea mimishi epo mee cuahuajje oe mano'yocue! E'e,
 ¡onaaya mei enaajo yiipeca mee majje bae quea doe yasijje jjajeaoquejea
 meequ'i'yocue! Jamajjeya ¡a'a quea mimishi po mee'yojji cuana!

³—E'e de, coya mi quea mimishi po o'oya chana!. Miquea epjeeji quea
 mimishi po o'oyajo, ca oe jama huohuiquime acue ba'a: “Miya quea
 mimishi cuanaje. ¡A'a quea mimishi po o'oyajji!” Majoya oya pojja'a jama
 cuaje ba'a: “E'e de, eya quea mimishi cuanaje, jjeya ca ca eya quea mimishi
 epo'yojji pojjeama minijje”. Jamajjeya ¡miquianaaya ma mimishijo a'a
 jjashahuuba majamajaquiji! ¡Jjapeequi o'oyacue onijje! ⁴E'e pojja'a ca ca
 oya mimijaji majamajaje minijje, majoya oya quea yeno nee nee cuaje ojaya
 mimishijo. Jamajjeya ¡jamatii miquianaya oja mimishijo a'a jjashahuuba
 majamajaquiji! ¡Jjabeiqui o'oyacue onijje! —jamaya Jesosa cua.

Jesosaa o shajja'ajjajji cuana jjabahuejjaqui mee ca cua

⁵O shajja'ajjajji cuua Jesosa jama huohuime aca cua ba'a: —¡Ecuanaya
 jjabahuejjaqui mee neineicue mijo e'e jojo nei ejjashahuabaquiji, mi
 jayojja eba'ejji!

⁶Jesosa jama cua ba'a: —De, miquianajaya eya eba, eya miquea epjeeji
 nei cuani. Eyaya miquianaya jjabahuejjaqui meenaje yahuajo. Miquianaya
 pojja'a ca mi ca oe jjashajja'ajjajpi pishananaje. Miquianaya ejo e'e jojo
 nei jjashahuabaqui pishana majje Eyacuiñajjiya miquianaya amee caje'yo
 ojjaña eyaya aña jayojja jama, ma dejjaajjima acani amee caje'yo
 pealai. E'e, miquianaya acui jama yajjemo ba'a: ¡Acui, nequisohuacue;
 ena huasijje poquicue! Majoya acui nequisohua majje ena huasijje
 poqui'yome. Jamajjeya ¡miquianaya ejo e'e jojo nei jjashahuabaquicue!
 —jamaya Jesosa cua.

Oe echacojji emeshi meshija esohuijo cajjashajja'ajjaquiahua

⁷⁻⁸Jesosaa pea esohui jama huohuime aca cua ba'a: —Oe echacojji chacojoyo
 majje cue'yonaje oja emeshi meseja equi yasijje. Jamatii hueahueanaje, oya
 ijjal'ijjia sa cuanaje, jomishoca'yo sa cuanaje. Oya jomishoca'yo jjima cuanaje;
 ijjal'ijjia jjima pealai cuanaje. Ma emeshi meseja oya jama huohuime acanaje
 ba'a: “¡Besaquicue, pea daqui huoshocue, ecuea bobí cuacuacue! ¡Majoya
 ecuea bobí yecue! ¡Eya ijjal'ijjia yasijje majoya miquea ya'yojjiya cuacuacu'ycue!”
⁹¿A'a ma emeshi meseja oja echacojji huohui caje oya quea bame cuanaje?

Chojja, ma echacojiyi jamatii shajja'ajja cani emeshi meseja esohui. ¹⁰ Jamaya miquianaya Eyacuiñajji esohui shajja'ajja majje ja'a miquianaya quea bame cuani poso jjabaquijji! ¡A'a jamaya jjashahuubaquijji nequiana! ¡Jamatii miquianaya jjashajja'ajjaquicue oja esohuijo, ma echacojiyi jamatii shajja'ajja canequinaje, emeshi meseja esohui jayojja jama acanaje! —jamaya Jesosa cua.

Jesosaa jjajeaqui mee ca'ya cua ome miji pe'a'i dejja batata epo'yo

¹¹ Majoya Jesosaa Jenosanena huasijke poquijeya Janinea meshi yejje ca cua. Samania meshi sahuajje jjayejjequia cua. ¹² Majoya aje oe cuiñaggi yasijke Jesosa dobiqui jjimahuajo, dejja batata epo'yo ome miji pe'a'i mimi sa cua Jesosa nijje. Jamatii nequinaje quea cuiñaggi huesha pishana onaja jeajea batata epo'yojojo. Jamajjeya oya cuana nequia cua quea huesha. ¹³ Onaaya Jesosa jama taaame aca cua ba'a: —Jesosa, miya ecuanaja Emeshi Mese, ¡ecuanaya che batata epo'yo jjajeaqui mee'yocue!

¹⁴ Jesosaa oya cuana bajea majje jama huohuime aca cua ba'a: —Eyaya miquiana jjajeaqui meeje'yo, ¡poquicue Eyacuiñajji equi yasijke! Jama huohuime acue esohui huohujji ba'a: “De, bacute, yahuajo pishana ecuana batata epo'yo cua, jjeya ca ecuana quea yami bame nee nee'yo”.

Majoya aje Jesosaa oya cuana jjajeaqui mee ca'ya cua. Majoya aje oya cuana poquije jjayamibamequijja cua, quea bihui nee nee cua. ¹⁵ Oe dejja ca ca jjashahuubaquia cua Jesosa bihuiajji ojaya eyami ejjajeaqui mee'yojojo. Majoya aje quea bihui po'yo majje jjanojjaquia cua; Jesosa que cue o'oya cua. Jjanobajjima nei Eyacuiñajji bihuija ca cua. ¹⁶ Ecui'oshajjajo nequia cua Jesosa cojja nei; oya jama cua ba'a: —E'de, Jesosa, miyaya eya jjajeaqui mee'yonaje, eya quea yami bame po mee'yonaje. Miya quea sohui poja nee nee —jamaya ma batata epo'yo cua. Oya Samania dejja cua, Samania meshijo ba'e, Jodio dejja pojjeama.

¹⁷ Majoya aje Jesosaa ona nijje nequi jama huohuime aca cua ba'a: —¿A'a cuae ome miji pe'a'i jjajeaqui mee'yonaje? ¿Aecue beca cuana so'o? Oe nei ca ca oe cue'yonaje e bihuiaa, Eyacuiñajji bihuiaa pe'a'i. ¹⁸ Ma dejja Jodio dejja pojjeama, Samania meshijo ba'e; beshahua nei Eyacuiñajji ojaya ba jjima. Jodio dejja cuana Eyacuiñajji epeeji nisho. Oya cuana quea yami bame nee po'yo sa cuanaje Eyacuiñajji bihuiajji pojjeama.

¹⁹ Majoya Jesosaa ma dejja jama aca cua ba'a: —¡Nequisohuacue; poquicue! Miyaya eya quea yami bame epo'yojji huohui'ajjanaje. Miya ejo e'e jojo nei jjashahuubaquinaje ecuea ejjajeaqui mee'yojji. Jamajjeya eyaya miya jjajeaqui mee'yonaje. E'e jojo nei miya jjapeequinaje Eyacuiñajji nijje.

**Achajja Jesosa Emeshi Mese nei epojji cueje
(Mateo 24.23-28, 36-41)**

²⁰ Paniseo dejja cuaa Jesosa jama huohui'ajjambe aca cua ba'a: —¿Ache shono Eyacuiñajji huoojea'yo ecuea Emeshi Mese nei epojji cueje? ¿A'a ohuaya ojaaña emeshi mese cuana jeajea caje'yo?

Jesosa jama cua ba'a: —Chojja, ma jayojja pojjeama, de. Ojaya emeshi mese cuana ejeabichajeajji pojjeama. ²¹ Pea cuana pojja'a jama mimime cuaje ba'a: "Eyacuiñajjiya huoojea'yo cueyanaje pea meshi yasijje". Siajje ca cuani, Eyacuiñajjiya huoojea'yo yani jjeyahua nei, jaahuana cani ojaya epjeejji cuana ojjaña Eyacuiñajji nijje jjapeequiajo. Oya Emeshi Mese cuani, de.

²²⁻²⁵ Majoya Jesosa o shajjalajjajji cuana nijje jama mimime cua ba'a: —Ecuea epeeiji nei, jjeya Jedio dejja cuaa eya quecua sa acani. Majoya aje eyahuasijje eya poquije'yo. Jiquio tii eya miquiana nijje nequi ajja. Miquianaaya ca ca eya nequi mee sa aje'yo minijje. Cho, nequi ajja. Beca cuaa miquianaya jama acaje ba'a: "Cue'yonaje aje Jesosa jiquiacua". Pea ca jama cuaje ba'a: "Jesosa yani jomajo".

¡A'a eya sa'ajjajji onaa siajje acajje! Eya jocuama poqui jjima. E cue o'oyajo pojjeje jayojja cuaje, jeaja'ajeaje ojjaña meshi cuana. Majoya aje ojjaña meshijo ba'e cuaa eya ba neinei caje'yo. Eya meshi yasijje cueje o'oya ojjaña Doe Mese epoji.

²⁶⁻²⁷ Yahuajo Noe ba'ya cua. Oya dobiqui jjimahuajo bishe ai yasijje, pea dejja quea mimishi nee cua, jjashajja'ajjaqui sa po ajja Eyacuiñajjiya esohuijo. Jamatii oya cuana ijji'lijji ania cua; ishi'ishi nequia cua; jjahuanaqui nequia cua. Majoya aje Noe dobiquia cua bishe ai yasijje. Ma dejja cuana ca ca jamatii jjashahuabaqui sa po ajja Eyacuiñajjiyo. Oya cuana jama jjashahuubaquime pojealajja aña cua ba'a: "Eyacuiñajjiya eseya hui'l mee'yo jjima acaje". Cho, majoya aje Eyacuiñajjiya ena quea quemo huoojea ca'ya cua; hui'l mee ca'ya cua ojjaña dejja cuana, de. Ma jayojjaya e cueyajo, dejja cuana jama cuaje. Quea mimishi tii tii po nequije.

²⁸ —E'e de, jamaya yahuajo Noti ba'ya cua tii. Dejja cuana quea mimishi nee cua. Jamatii ijji'lijji ania cua, ishi'ishi nequia cua, jjeshejjeshe nequia cuanaya cua, quiaquia nequia cuanaya cua, banabana nequia cuanaya cua, equi iya cuanaya po nequia cua. E'e de, Eyacuiñajjiyo jjashahuabaqui sa po ajja nei nei cua. ²⁹ Ma pojjaio Noti Sonoma cuiñajjiyo ba'e cuayaquiajo Eyacuiñajjiya ena cuani jayojja cuaqui oque mee ca cua Sonomajo. Ojjaña quiyo jeyojeyo'ya cua; chama'yo tii cuanaje.

³⁰ —Jamaya ojjaña cuana Eyacuiñajjiyo jjashahuabaqui jjima anijo, eya cueje o'oya. ³¹ Jamajjeya miquianaya pojja'a quejo chacochacoqui e cue o'oyanijo, ¡a'a miquianajaya equi yasijje poquijji aquiana jjequil'yhua! ¡A'a jjashahuubaquijji miquianajaya aquiana cuanajo! ³² ¡A'a pajea'yo'ji Notija ehuanase oja aquianajo jjashahuabaquia cua! Jamajjeya oya sane pojji po mee ca'ya cua Eyacuiñajjiya ojaya aquianajo jjashahuabaquique jojoya. Chama'yo tii oya po'ya cua. ³³ Jamaya miquianajaya aquianajo jjashahuabaqui majamaja anijo miquianaya Eyacuiñajjiyo jjashahuabaqui jjima cuaje, de. Jamajjeya miquianaya chama'yo tii cuaje'yo. E'e de, miquianaya ca ca jjashahuabaqui majamaja ani Eyacuiñajjiyo ojaya epjeejji cuaje; ba'e tiitijje'yo onijke.

³⁴ —E cue o'oyajo becamejjiji pe'a'i cahuijaa, oe dojosohuaqui caje'yo, pea ca jeajea canaje'yo. ³⁵ Beca epona quecuapasha cuequi oe

dojosohuaqui caje'yo, pea jeajea canaje'yo. ³⁶Beca dejja quejo chacochaco nequi oe dojosohuaqui caje'yo, pea ca jeajea canaje'yo Eyacuiñajjiya esohuidojijiya —jamaya Jesosa cua.

³⁷ Jesosa o shajja'ajjajjiya jama huohui'ajjame aca cua ba'a: —¿Achacua acuae maya cuaje so'o, Jesosa?

Jesosa jama cua ba'a: —Miquianaya eya baje joya ecua be'o e'ihui yasijje oqueani jama —jamaya Jesosa cua.

Jesosaja esohui ehuohui'yo oe epona e'ahuemanojo

18 ¹Jesosaa o shajja'ajjajji cuana huohui ca cua emimi majamajajji Ezacuiñajji nijje. Ohuaya jama huohuime aca cua ba'a: ²—Oe cuiñajjiyo oe sohuinano aninaje. Oya jjapeequi sa po ajja pea dejja nijje, Ezacuiñajji nijje peal'ai. ³Oya cuiñajjiyo tiiya oe e'ahuemano aninaje. Ma e'ahuemanoja aquiana peaa sii ca'yonaje. Jamajjeya oya poqui majamajanaje sohuinano huasijje. Jamajjeya ohuaya jama huohui'ajjame acanaje ba'a: “¡Che iña yohua sahuacue ma aquiana onaa sii ca'yonajejo!” Poqui majamajanaje sohuinano huasijje huohui'ajja. ⁴Jamatii sohuinanolhua saja'a jjima acanaje, de. E'ahuemano pajeapajea'yo ajja nei nei cuanaje huohui epo tiitiinequijji jjejojo. Sohuinano jama jjashahuabaquime cuanaje ba'a: “E'e de, ma e'ahuemano pajeapajea'yo ajja nei nei, cue majamajani ca coma. Ojaya esohui shajja'ajja sa po ajja nei nei ca iña. ⁵Eyaya aje ca oya yohua sahuajeya ma ca oe oya cue'yo jjima tii epoji”. ⁶Jamajojoya aje oe yohua sahua canaje —jamaya Jesosa cua.

—Sohuinano yohua sahua sa po ajja cuanaje. Jamatii ohua huohui'ajja majamaja cajje, ohuaya epona yohua sahua canaje. ⁷E'e de, Ezacuiñajjiya sohuinano jayojja pojjeama. Jamatii oya shajja'ajja sa cuani miquianajaya emimi. Majoya ohuaya miquianaya yohua sahua bamebame caje. Miquianaya ojjaña pojjaño mimi tiitiianijo, ohuaya miya shajja'ajja caje'yo. ⁸Ohuaya miya yohua sahua caje'yo. E'e jojo nei ecuea esohui. Jamatii e cue o'oyajo, ¿ae cuaje dejja cuana? ¿A'a oya cuana mimi majamaja nequije Ezacuiñajji nijje? E'e pojja'a. ¿A'a jjapeequi tiitiinequije Ezacuiñajji nijje? E'e pojja'a, ba'ajja —jamaya Jesosa cua.

Ehuohui'yo beca dejjajo oe quea bame pea bame'ama cuani

⁹ Jesosaa pea dejja cuana huohui ca cua ejjabahuejjaqui meejjijo. Ma dejja cuana jjashahuaba taiquia cua jama ba'a: —Ecuanaya ca quea bame nee cuani, beca cuana ca ca bame'ama ba'yani.

Jamajjeya ma dejja cuana Jesosaa jama huohuime aca cua ba'a: ¹⁰—Yaninaje beca dejja. Oe dejja Moisesija etehue'yo huohuijji nisho cua, oya Paniseo dejja cuanaje. Pea dejja emeshi meseja bejjo chichajji cuanaje. Oya cuana poquinaje Ezacuiñajjiya equi yasijje bihuiaa, mimiya Ezacuiñajji nijje. ¹¹Paniseo dejja dobiqui majje nequifaquinaje ojjañaja ebajji. Oya jjabajeasohuaqui majje Ezacuiñajji nijje mimi nishonaje ojjañaja eshajja'ajjajji jama ba'a: “E'e de,

yani eya jiquiojo, eya quea bame nee cuani. Eya mimishi'ama nei, siipojji pojjeama, eya pea cojjojji pojjeama, beca cuana ca quea mimishi nee cuani.

¹²E'e de, eya miquea esohui shajja'ajja majje quea bame cuani; miquea esohui jayojja ba'yani. Ecuea 10 bejjo yanijo, eyaya mi yasijje oe quiaña. Jamatii eyaya aña; quea bejjo huiso nee eyaya quiaña mi yasijje, Eyacuiñajji. Eya ma dejja bejjo chichajji jomajo nequi jayojja pojjeama, eya ca mimishi'ama nei, oya ca ca quea mimishi nee nee, de. E'e de, mahuiso Eyacuiñajji ecuea esohui" jama mimi nisho nequinaje onaja ebajji Paniseo dejja.

¹³—Majoya ca ma dejja bejjo chichajji cuani jjashahuabaqui majje miminaje Eyacuiñajji nijje. Oya quea yeno cuanaje ojaya mimishijo. Ohuaya Eyacuiñajji mimishi cuana cuijea mee'yo sa acanaje. Jamajjeya jama mimime cuanaje ba'a: "E'e de Eyacuiñajji, eya yani, eya quea mimishi nee cuanaje. Jjeya eya quea mimishi po maja sa po'yo ajja. ¡Jjapeequi sa cuani minijke, jamajjeya cuijea'yocue ecuea mimishi cuana! E'e de, mahuiso ecuea esohui, Eyacuiñajji, acua" jamaya cuanaje ma dejja.

—Eyacuiñajji nijje mimijeyo majje Paniseo dejja, bejjo chichajji cuani pea'ai poquinaje. ¹⁴Paniseo dejjaja mimishi cuana cuijea'yo jjima cuanaje quea bame nisho ba'ejajojo. Eyacuiñajjiya bejjo chichajji cuanija mimishi cuijea ca'yonaje, o quea mimishi po maja sa po ajjajojo. E'e de, miquianaya Paniseo dejja jayojja po chana!. ¡Miquianaya ca oe pea dejja jayojjaya pocue! Majoya aje mi jjapee tiitiquije'yo Eyacuiñajji nijje —jamaya Jesosa cua.

Esohui Jesosaa esho'iquiana ohua quea jea nee aca cuajo

(Mateo 19.13-15; Macoso 10.13-16)

¹⁵Dejja cuaa esho'i cuana dojo ca cua Jesosa que. Jama huohuime aca cua ba'a: —Jesosa, ¡miyaya ecuanajaya ebacua cuana napacue emeya! ¡Miyaya Eyacuiñajji huohuicue ecuanaja bacua jaahuanajji! —jamaya cua ejeajji cuana, enaese cuana pea'ai.

Jesosa shajja'ajjajji cuana quea quene cuanaje ma dejja cuana nijje. Jama cua ba'a: —¡A'a ye majamajajji miquianajaya bacua Jesosa que! —jamaya cua o shajja'ajjajji cuana.

¹⁶Jesosaa ca ejeajji cuana enaese cuana pea'ai jama huohuime aca cua ba'a: —¡Yacua oe miquianajaya bacua cuana yecue! Eyacuiñajjiya quea jea nee nee ebacua cuana, ecuea pea'ai. Oya cuana quea bame cuani, ojaya epjeejji nei cuani. Jamajjeya ¡ebacua cuana a'a poqui meeiji! ¡Ebacua cuana e que cacie'yahua, de! ¹⁷¡Miquianaya Eyacuiñajjiyo jjashahuuba cuajiquicue jiquio ecua esho'iquiana cuani jama! Jamajje e que poquije'yo eya eyajo ojjaña huoojea'yojji cuaje —jamaya Jesosa cua.

Oe dejja quea aquiana huiso Jesosa nijje mimia cua
(Mateo 19.16-30; Macoso 10.17-31)

¹⁸Pea pojajo oe dejja quea aquiana huiso poquia cua Jesosa huohui'ajja. Oya jama cua ba'a: —Jesosa, miya quea bame cuani, ¿achajja acuae po cajji Eyacuiñajji nijje eba'e tiitii'yoji so'o?

¹⁹Jesosa jama cua ba'a: —¿Yajjajo acuae moyea quea bame aña so'o? Oe neiya ca jja ca oe Eyacuiñajji quea bame nee cuani. ²⁰Miquea eba ojaya esohui. Jamajjeya miya ba'e tii tii sa cuani onijje, jama shajja'ajjame ejohua esohui acue ba'a:

¡A'a pea cojjojji pojji!

¡A'a dejja quecuajji!

¡A'a sii pojji; a'a siajje pojji!

¡Miquea chii, miquea enaese pea'ai shajja'ajjacue!

—jamaya Jesosa cua.

²¹Ma dejja quea aquiana huiso jama cua ba'a: —E'e de, jamaya eyaya anaje esho'yahuua, jama tii tii sohuaqui ca ca iña. Eya oe dejja quea bame nee, de.

²²Jesosaa ojaya esohui shajja'ajja majje jama huohuime aca cua ba'a: —A'yo sahua oe pea yohua'ajja jjima so'o. ¡Ojjaña miquea aquiana cuana quia jeyojeyo'yocue! ¡Aquiana quiajeyo'yo majje miquea aquiana sosejje jjeshenaje bejjo quiacue joya aema' cuana huasijje! Majoya miya Eyacuiñajji nijje jjashahuuba neineiquije, ohuaya miya ba'e tiitii mee caje'yo eyajo. Miyaya bejjo aema' cuana huasijje quiajeyo'yo majje majoya miquea aquiana cuanajo jjashahuubaqui'yo ajja cuaje, Eyacuiñajji ca ca jjashahuubaquije. Majoya eyahuasijje poqui'yo majje aquiana quea bame nee cuaje miquea epoji. E'e, ¡jamaya acue majoya cue o'oyacue enijje jjapeequiya! —jamaya Jesosa cua.

²³Ma esohui shajja'ajja majje dejja quea aquiana huiso quea yeno po'ya cua. Oya quia sa po'yo ajja cua quea bejjo huiso jjejojo, quea aquiana huiso nee nee jjejojo. Poqui'ya cua; aquiana quia'yo jjima aca cua.

Jjapeequi jjima Eyacuiñajji nijje, de. ²⁴Jesosa quea yeno cua ma dejja quea aquiana huiso poquije ba majje; jama cua ba'a: —Oe dejja quea bejjo huiso anijo, quea camaja ejjapeequijji Eyacuiñajji nijje. Jamattii jjashahuubaquiani ojaya aquianajo; Eyacuiñajji ca ca jjashahuubaqui ajja. ²⁵Oya cameno, mona ai'ai jama, jjayejjequi jjima cuaje ahuoja quii huejjajje jayojja. Jamaya dejja quea aquiana huiso beshahua nei poqui jjima eyahuasijje cuaje —jamaya Jesosa cua.

²⁶Pea cuaa ojaya esohui shajja'ajja majje Jesosa jama huohui'ajjame aca cua ba'a: —Ojjaña cuana quea bejjo huiso sa cuani, de. ¿Ae shai che poquije'yo eyahuasijje Eyacuiñajji nijje ba'e'yohua?

²⁷—E'e de, oe dejja oya eyahuasijje epoqui meeji pojjeama. Eyacuiñajjiya ca mi ca oe poqui mee caje'yo eyahuasijje onijje eba'e tiitii'yojji —jamaya Jesosa cua.

²⁸Majoya aje Peno jama cua ba'a: —De, ecuana poqui sa cuani eyahuasijje, jeajeana'yonaje ecuea aquiana jiquio meshijo minijje epoqui'yojji.

²⁹⁻³⁰Jesosa jama cua ba'a: —E'e, ecuea eba. Miquianaaya ojjaña aquiana cuana jeajeana'yonaje epoquiji enijke. Jamajjeya miquianaya mano'yajo, Eyacuiñajjiya miquianaya poqui mee caje'yo eyahuasijje onijje eba'e tiitii'yojji. E'e de, miquianaaya equi jeajeana'yonaje, jamajjeya Eyacuiñajjiya miquianaya sosequia caje quea huiso nee nee. Quijje miquianaya mano'yajo Eyacuiñajjiya quea huiso nee nee eyajo quia caje'yo. Miquianaaya jeananananje miquianajaya huanase, ebacua, miquianajaya o'i, miquianajaya chii pea'ai. Eyacuiñajjiya miquianaya huapa pojjeama jayojja quiame acaje mi jaahuanajji. Eyajo pea'ai miquianaya jama quiameya acaje quea huiso nee nee. Jamaya acaje ohuaya joya ojaya aquiana jeana'yojji cuani enijke chacochacohua —jamaya Jesosa cua.

Jesosaa huohui ca o'oya cua o mano'yojji

(Mateo 20.17-19; Macoso 10.32-34)

³¹Jesosaa oja 12 shajja'ajjajji nei cuana jjachichaqui mee ca'ya cua. Ohuaya jama huohuime aca cua ba'a: —E'e de, jjeya eseya poquije Jenosanena huasijje. Miquianajaya eba Eyacuiñajjiya esohui yahuajo nei nei pea cuaa ejo tehue ca cua. Joya ecua onaja tehue jaa jamaya eya acaje'yo cuaa. Eya mano mee caje'yo ojjañaja Edoe Mese cuanijojo. Jamajjeya eya Jenosanena huasijje poqui majje manoje'yo. ³²Eya pea cuaa iña majje dojo caje Jodio pojjeama huasijje. Oya cuanaja ba jjima Eyacuiñajji, de. Oya cuana mimijajje enijke; ejo soaje; cojja cuichojea caje cuaa mo. ³³Cuia caje mo emeya cuaa, de. Majoya aje mo mano mee caje'yo pea'ai cuaa. Eya mano neineije'yo. Majoya pea beca peejjima cahuime po majje, eya ca iña shequije o'oya, de —jamaya Jesosa cua.

³⁴O shajja'ajjajji cuana ca ca jjashahuabaqui jjima cua Jesosaja esohuijo. Oya cuana ba jjima, yajjajo ohua o mano'yojji huohui cani poso jjabaquia cua.

Jesosaa cojjama' quea cojja ja'a po mee ca'ya cua

(Mateo 20.29-34; Macoso 10.46-52)

³⁵Jesosa Jenico cuiñajji chipi nei poquia cua. Oe dejja cojjama' chemo po aña cua ejiojji cojja sahuajo. ³⁶Cojjamaa shajja'ajja ca cua dejja quea huiso cueje, jamajjeya huohui'ajja ca cua: —¿A'ya mi so'o?

³⁷Pea cuana jama cua ba'a: —Jesosa iquio cueje, de.

³⁸Majoya aje jama taaaame cua ba'a: —Jesosa, miya Eyacuiñajjija huoojea'yo cuani. Miya ma etiiquiana emeshi mese, Dabi jayojja cuani. Eya ca iña oe che cojjama', de. ¡Che iña jjacojjaja'aqui mee'yocue!

³⁹Ehui dojojji pea cuana poquije jama cua ba'a: —De, ¡quea shajjaquijjo pajjaja coma a'a taaaaji!

Oya ca ca taaa o'oya cua; jama cua ba'a: —Jesosa, ¡che iña yohua sahuacue, miya Eyacuiñajjija huoojea'yo!

⁴⁰Jesosa poquije tii nequiñaquia cua. Majoya aje oya jama cua ba'a: —¡Cojjama' e que jjequicue!

Yechipi cajo Jesosaa cojjama' jama huohui'ajjame aca cua ba'a:

⁴¹—¿Apiojji eya miyaya taaaña, cojjama'?

—Jesosa, miya ecuea Emeshi Mese nei, mi que e jjacojjaja'aqui mee'yojji mi taaaanaje —jamaya cua cojjama'.

⁴²—E'e de, jjeyya miya quea cojja ja'a po'yocue! Eyaya miya jjabapojjaqui mee'yonaje ejo e'e jojo nei jjashahuuba bamebamequinajejojo —jamaya Jesosa cua.

⁴³Majoya aje quea cojja ja'a nee nee po'ya cua. Oya Jesosa nijje poquia cua. Oya jama cua ba'a: —E'e de, Eyacuiñajji quea bame nee nee, de. Jesosaa ecuea ecojja quea ja'a po mee ca'yonaje, de.

Pea cuaa ma ba majjeya Eyacuiñajji bihuia ca cua.

Jesosaa Saqueo ba ca cua

19 ¹Jesosaa Jenico yejje canana cua; quea dejja huiso jjachichaquia cua Jesosa bajji. ²Oe dejja Saqueo bajjani cua. Ojjañaja eba Saqueo quea beijo huiso nee nee cua. Oya beijo chichajji cua emeshi meseja yajji. Oya ca jjadasiqquiji cua. ³Ohuaya ca ca Jesosa ba sa aca cua. Jamajjeya Saqueo poquia cua Jesosa baa pea cuana ejjachichaqui nequi yasijje. Quea chi'aa jjejojoya ca ca oe ojaya beshahua nei Jesosa ba jjima cua. ⁴Jamajjeya Saqueo cuajicuaji poquia cua, ejiojji cojja sahuajo nequi acui yasijje sohuaquñaquia cua. ⁵Jesosa jjayeje'ajjaquia cua acui aa biajje Saqueo anijje. Majoya aje ohuaya bajeasohua majje jama aca cua ba'a: —Saqueo, ¡oque'yocue! Jjeyahua nei iña poquije miquea equi yasijje aniya!

⁶Majoya aje oya nequioque'ya cua. Majoya aje nequioque'yo majje poquia cua ojaya equi yasijje Jesosa nijje. Oya quea bihui cua. ⁷Pea cuaa ca ca niñebe ca cua Jesosa poquije ba majje; jama mimijajime cua ba'a: —De, Jesosa Saqueo nijje poquinaje anicuua, Saqueo quea mimishi nee nee, de.

⁸Majoya aje dobiquia cua Jesosa Saqueoja equi yasijje. Quijje pishana ijji'lijjajjeyo majje Saqueo nequisohua'ya cua. Ohuaya Jesosa jama huohuime aca cua ba'a: —E'e de, jjeyahua eyaya aema' cuana huasijje beijo quiaje esejja. Eya siipojji nei cuanaje, de. Jjeya ca iña siipo sa po'yo ajja. Jamaya eyaya aje ba'a: Eyaya oe beijo siinaje, eyaya quiaje'yo ebeca pee pea'ai beijo. Eya mimishi po sa po'yo ajja. E'e jojo nei ecuea esohui jjeya. Siajje pojjeama cuani —jamaya Saqueo cua.

⁹Jesosaa oya jama huohuime aca cua ba'a: —E'e de, miya Jodio dejja nei, jamatii miya Eyacuiñajji nijje jjapeequi jjima cuanaje. Jjeya ca ca miya e'e jojo nei jjapeequi sa cuani Eyacuiñajji nijje. ¹⁰E'e, eya cueyanaje ojjaña jjapeequi meeya Eyacuiñajji nijje. Eyaya mi jayojja pea cuana ba sa aña —jamaya Jesosa cua.

Esohui ehuohui'yo bejjojo
(Mateo 25.14-30)

¹¹Jesosaja esohui shajja'ajja majje pea cuaa jama aca cua ba'a: —Jesosa, Jenosanena huasijje poqui majje miya ojjaña Emeshi Mese cuaje, jjeya nei pojja'a. Ecuana jamajjeya mijo quea bihui nee nee cuaje'yo —jamaya poso aca cua dejja cuaa.

¹²Jamajjeya Jesosaa oe esohui ejjashahuaba quimeejijo jama huohuime aca cua ba'a: —Oe dejja emeshi mese epo'yojji pea meshi yasijje poquinaje. Majoya oya emeshi mese epoiji bajjani ca'yajje huacuaya cue'yonaje o nequinaje meshi yasijje. ¹³Poqui jjimahuaa ohuaya iyaa canaje ojaya ome miji pealai echacoji cuana bejjo equiajji. Ojjaña oe ebashosocojo bejjo quea huiso quia canaje. Jama huohuime acanaje ba'a: "E'e de, jiquio bejjo eyaya miquianaya quiaña, aquiana jjeshejji. ¡Esoso quea huisojo bejjo jjahuisoqui meecue! Eya cue'yo majje quea huiso bejjo bañaje'yo. Eya majoya quea bihui cuaje" jamaya cua ma emeshi mese poqui jjimahua.

¹⁴—Majoya aje emeshi mese poquinaje pea meshi yasijje emeshi mese epoiji ohua bajjani ca'yajje. Oja meshijo nequi dejja cuanaja boti'ama cua. Jamajjeya dejja cuaa oe dejja huohui pohua ma meshi yasijje huoojea ca cua. Jama huohuime aca cua ba'a: "Ecuanjaya ma dejja emeshi mese cuajo boti'ama cuaje".

¹⁵—Oya ca ca bajjani ca'yajje emeshi mese cuanaje. Jamajjeya ma dejja huacuaya cue o'oya cua oja meshi yasijje. Cue o'oya majje iyaa mee ca cua ojaya echacoji cuana ehuohui'ajjajji, ache huiso bejjo chicha canaje ebajji. ¹⁶Ebionei oe echacoji poquinaje o que. Jama cua ba'a: "Emeshi mese, miquea bejjo quea huiso nee nee chichanaje. Miyaya eya oe bashosoco bejjo quianaje, jjeya ca ca yani ome miji pealai bashosocome bejjo. Eyaya chaco neineinaje, de". ¹⁷Emeshi meseya jama acanaje ba'a: "E'e de, miya oe echacoji quea bame nee cuanaje. Jjeyahua nei miya emeshi mese jayojja aje, ¡ome miji pealai cuiñajji jaahuanacue, miyaya quea bame cuanajeya jjejojo!"

¹⁸—Pea echacoji poquinaje emeshi mese que. Jama huohuime acanaje ba'a: "Emeshi mese, miyaya bejjo oe bashosoco quianaje. Jjeya ca ca eyaya iyehuiso chichanaje me oeje bashosocome bejjo. E'e de, eyaya chaco neineinaje pealai". ¹⁹Jamajjeya emeshi mese jama cuanaje ba'a: "E'e de, miya quea bame cuanaje. Miya emeshi mese jayojja aje, ¡ome oeje cuiñajji jaahuanacue!"

20—Pea echacojji poquinaje o que. Oya jama cuanaje ba'a: “Emeshi mese, ma'aje miquea oe bashosoco bejjo. Quia jjimajje bejjo cuanaje. Eja sisijo bebo majje jaahuanua neineinaje. 21 E'e de, miya etecueaje poso ca ca mi quianaje. Ecuea miya eba dejja quenequene cuajiji nei nei. Quea dejja taija jjejojo miquea aquiana quea huiso yani. Jamajjeya eya quea mete cuanaje miquea bejjo quiajjii. Jamajjeya jaahuananaje miquea bejjo nei”. 22 Majoya aje emeshi meseya oya tecuea canaje. Oya jama cuanaje ba'a: “Siajje miya, de. Miquea ejjashahuaba taiquijji jayojja jama eyaya miya aje. Miya shajjama' cuanaje; jjahuisoqui mee jjimaya ecua bejjo anaje. 23 ¡Bacue, ecue bejjo oya huiso tii miyaya jaahuananaje! ¿Apiojji miyaya bejjo ejjeshejji jaajji equi yasijje mi iyaquinaje, ejjahuisoquijji? Miyaya chacochaco jjima cuanaje, de”.

24—Emeshi mese oya cuana jomajo nequi jama huohuime acanaje ba'a: “E'e de, ijjequisejajeal'yocue ecue quia bejjo ma echacojji shajjama' cuanajeja! ¡Quia'l'yocue ma ebionei echacojji cuanaje yasijje, ma quea huiso bejjo chichajji cuanaje yasijje!” jamaya emeshi meseya acanaje.

25—Oya cuana jama cuanaje ba'a: “Emeshi mese, miquea ebionei echacojji ca ca quea bejjo huiro cuani. Yani ojaya ome mijji pea'ai huirose, de”. 26 Majoya aje emeshi meseya jama acanaje ba'a: “¡Shajja'ajjacue ecuea esohui e'e jojo nei! Oe dejja chacochaco ani quea bame, shajja'ajja cani ecuea esohui, eyaya quiaje quea huiro nee nee. Oe dejja ca ca chacochaco ajja, shajjama' cuani, eyaya quia jjima aje. Inaje'yo ojjaña ojaya aquiana o shajjama' jojoya. 27 E'e de, pea dejja cuanaja eya boti'ama. Oya cuana eya emeshi mese epoiji sa po ajja ca ca oya. ¡Ma dejja cuana yecue equ! E cojja nei nequia majje ¡quecuajeacue ojjaña ebajji!” cuanaje ma emeshi mese, de —jamaya aca cua Jesosaa.

Oya huohui ca cua ma esohui ojjaña ebajji eseya cachacochaco'yahua Jesosaja yajjijo quea bame nee, eseya cajjashajja'ajjaqui'yahua ojaya esohuijo pea'ai. Eseyaya quea huiro onijje cajjapeequi mee'yahua. Majoya Jesosa cue o'oya majje ojaya epeejji quea huiro cuaje. Majoya oya jama cuaje ba'a: “Miquianaya quea bame cuanaje; jjapeequi meenaje quea huiro nee ecuea epeejji epoiji. ¡Jamajjeya poquicue enijje eyahuasijje! Beca cuana ca ca jeajeaje cu aqui yasijje shajjamajojo, de”.

Jesosa nequiñaquia cua Jenosanenajo

(Mateo 21.1-11; Macoso 11.1-11; Huani 12.12-19)

28 Majoya Jesosa mimijeyo majje poquia cua Jenosanena huasijje. 29 Poquijeya ba cañaquia cua beca cuiñajji Mepaje, Betania pea'ai. Ma cuiñajji cuana chipi neijo eyiyo nequi yohua bajjani ba'a: Onimo. Majoya Jesosaa becamejjiji pea'ai o shajja'ajjajji cuana huoojea ca cua. Jesosaa oya cuana jama huohuime aca cua ba'a: 30—¡Poquicue jocuama ma cuiñajjijo chipi nei! ¡Bañaqui majje bacue mapichi esho'i ai ejeyonequia nequi! ¡Ba majjeya oe pichocue! ¡Picho majje yecue! ¡Joya onaja e'anisohuaquijji ajjima nei nei oe yecue! 31 Onaa: “¿Apiojji

acuae ecuea mapichi pichojeaña so'o?" acajje, oe jama huohuime acue ba'a:
"¡Mapichi jjequicue!" Jesosa cuanaje. Oya pa mapichi sa cuani, de, acue.

³²Majoya aje oya cuana poquia cua; bacañaquia cua mapichi. Majoya aje bañaqui majje pichojea ca cua ma ecua Jesosaa huohui ca cua jama pichojeameya aca cua. ³³Majoya aje emapichi mese cuaa ba ca cua, mapichi picho cuequi. Majoya aje ba majje emapichi meseya Jesosaja eshajja'ajjajji cuana jama huohui'ajjame aca cua ba'a: —¿Apiojji acuaeaya ecua mapichi pichojeaña so'o?

³⁴Oya cuana jama cua ba'a: —Jesosaa sa canijojo ca ca ecuaaya pichojeaña.

³⁵Majoya aje dojo ca cua Jesosa que. Daqui iya ca cua mapichija edaasa biajje. Majoya Jesosa anisohuaquia cua mapichija edaasa biajje; poquia cua Jenosanena huasijje. ³⁶Jesosa poquianijo jjachichaquia cua ojjaña dejja cuana ejiojji suhuajo. Onaaya daqui ao jjequi jeapiihui ca cua ejiojjiro Jesosa ja'ajjequijji. Emeshi mese jama ja'ajjequimeya acaninaje cuaa ohua ba cahuajje. ³⁷Eyiyo Onimojo ani jaaoque majje ojjaña Jesosaja epeejji cuana queabihui nee nee cua. Sohuicuayaña cua jama ba'a: ³⁸—Eyacuiñajji, miya quea bame nee nee. Miyaya Jesosa huoojeanaje ecuea Emeshi Mese epojji jjeya nei. Ecuana quea bishui nee nee. Ojjaña meshijo ba'e cuana, eyajo ba'e cuana pealai quea bei cuani —jama sohuicuayameya cua cuana.

³⁹Majoya Paniseo dejja cuaa quea dejja huiso pejjejo nequiya sohuicuayaqui shajja'ajja majje quea quene nee nee cua. Jamajjeya oya cuaa Jesosa jama huohui'ajjame aca cua ba'a: —Jesosa, ¡miquea epeejji cuana huohuicue: "¡A'a sohuicuayajji!" acue! —jamaya cua Paniseo dejja cuana.

⁴⁰Majoya aje Jesosaa jama saja'ame aca cua ba'a: —Chojja de, eyaya ecuea epeejji cuana: "¡A'a sohuicuayajji!" ajo, mei sohuicuayaje, de.

Ojjaña jja ca oe jjeya cabihuia cahua Eyacuiñajji —jamaya Jesosa cua.

⁴¹Quije pishana Jenosanena bañaqui majje Jesosa pa neineiya cua Jenosanenajo ba'e cuana ojaya esohuijo shajjamajjo. ⁴²Oya jama mimimeya cua ba'a: —Eya quea yeno nee nee jiquio cuiñajjiro ba'eca cuanajo, oya cuana quea mimishi nee nee jojoya. Oya cuana mimishi cuana pajea'yo sa po ajja nei nei, de. Jamajjeya aje jja oe quea nee nee cuaje'yo, ecuea epeejji po sa po ajja cuanajejojo. ⁴³Sohuinano cuana cueje o quecua'yohua. Sohuinano cuana jjanequitoquije'yo jiquio cuiñajjiro. Majoya oya cuana cuayaqui ajja nei nei cuaje. ⁴⁴Majoya aje oya cuana quecua jeyojeyo caje'yo, chama'yo tii acaje'yo. Equi cuana dahuajea jeyojeyo caje'yo chama'yo epo'yoji. Jamaya cuaje oya cuana ecuea esohuijo shajjamajjo, eya Eyacuiñajjiha huoojeal'yo ojjaña jaahuanajji cajaa acanajejojo —jamaya cua Jesosa Jenosanenajo ba'e cuana nijje.

**Eyacuiñajjiha equi aquiana quiajji pojjeama coma ca equi Eyacuiñajji
nijje emimijji**

(Mateo 21.12-17; Macoso 11.15-19; Huani 2.13-22)

⁴⁵Majoya Jesosa dobiquia cua Eyacuiñajjiha equi yasijje. Dobiqui majje Jesosaa beca cuana aquiana quia cuequi ba ca cua. Ma ba

majjeya quea quene nee nee cua. Majoya aje Jesosaa ma aquiana quia cuequi jeacuayajea ca cua. ⁴⁶Ohuaya jama tecueame aca cua ba'a:
—Eyacuiñajji etehue'yo jama cuani ba'a: “Eyacuiñajji equi onijje emimijji”. Aquiana quiajji pojjeama, ona siajje ajji pojjeama pealai
—jama tecuetecuemeya Jesosa cua.

⁴⁷Ojjaña pojajo Jesosaa esohui huohui ca nequia cua Eyacuiñajji equijo. Jamatii Eyacuiñajji nijje mimiani etii cuaa, Moisesija etehue'yo huohuijji cuaa, emeshi meseya pealaiya Jesosa salajja ca cua equecua'yojji.

⁴⁸Jamajjeya esohui huohuijji cuana jama jjashahuabiquimeya cua ba'a:
—Quea camaja ca e'iñajji Jesosa equecua'yojji, oya quea epjeejji huiso nee nee aña. Shajja'ajja neinei cani ojaya esohui cuaa, de.

¿Aya acuae Jesosa huoojea ca cua esohui huohuiya?

(Mateo 21.23-27; Macoso 11.27-33)

20 ¹Oe pojajo Jesosaa esohui huohui ca cua Eyacuiñajji equijo.
Jesosa que cueya cua Eyacuiñajji nijje mimiani etii cuana,
Moisesija etehue'yo huohuijji etii cuana Jodio etiiquiana pealai. ²Oya
cuua Jesosa jama huohui'ajjame aca cua ba'a: —¿Aya acuae mi huoojea
canaje esohui huohuiya so'o? —jamaya aca cuua cua.

³Jesosa jama cua ba'a: —Eyaya pealai miquianaya huohui'ajjaje.
⁴ ¿Aya acuae Huani ma ona besameejji cuanaje huoojea canaje so'o? ¿A'a
Eyacuiñajjiya pojja'a? ¿A'a dejja cuua pojja'a? ¡Huohui'ajja socue mo!
Majoya eyaya miquianaya huohuije ajea huoojea acuae eya.

⁵Oya cuana mimipanajajia cua. Majoya aje jama aca cua ba'a: —¿Yajja
saja'ame seya aje so'o? Eseya quea mete ojjaña dejja cuanajo, de. Eseya
saja'ajje jama cuaje ba'a: “Eyacuiñajjiya Huani huoojea canaje”. Majoya
pojja'a Jesosaa jama saja'ame acaje ba'a: “¿Yajjajo miquiaaya cajaa
Huanija esohui anaje so'o?” ⁶Eseya jama ajje ba'a: “Dejja cuua Huani
huoojea canaje”. Ojjaña dejja cuua se jaja ca'y chana' meiya, ojjaña dejja
jjashahuabiquiani Eyacuiñajjiya Huani huoojea canajejojo.

⁷Jamajjeya jjashahuabiqui majje Jodio cuua Jesosa jama saja'ame aca
cua ba'a: —Cua'a de. Ecuanaxaya ba jjima nei. ¿Aya shai Huani huoojea
canaje? —anisho ca cua quea meteya jjejojo.

⁸Majoya Jesosa jama cua ba'a: —E'e de, jamajjeya ecuea miquianaya
ehuohuijji pojjeama e huoojeajji epo —jamaya Jesosaa Jodio dejja cuana
aca cua.

Pea esohui ehuohui'yo ejjashahuabiquiji jjonojjajja quejo

(Mateo 21.33-44; Macoso 12.1-11)

⁹Jesosaa dejja cuana jama huohuime aca cua ba'a: —¡Jiquio
ejjashahuabiqui'yoji shajja'ajjacue! Oe eque meseya jjonojjajja bana canaje.
Ojaya que quea quemó nee nee cuanaje; oopana jjono bana canaje. Ma jjono

yohua bajjani cuanaje ba'a: uva. Ma jjono cuana bana majje ohuaya echacojji cuana cuiña mee canaje. Ohuaya ejjaja cuiñajji cuana jama huohuime aca cua ba'a: "Jjonojjajja jahujeyajo miquianajaya yajji eseija acue. Pea eseija ca ca ecuea cuaje". Majoya ojaya que cuiña mee majje quea huesha poquinaje quijje nei nei cue'yohua. ¹⁰Quijje jjonojjajja jahujao ohuaya ma pea meshijo ba'e ojaya pea echacojji huoojea canaje jjonojjajja cuiñajji cuana huasijje. Ma echacojji jjonojjajja cuiñajji cuana huasijje poqui majje jama huohui'ajjame acañaquinaje ba'a: "Eya eque meseya miquiana que huoojea canaje jjonojjajja eseija jjehua'yohua. ¿Ache acuae pa eque meseja iya tepe mee?" Majoya ejjaja cuiñajji cuana quea dejja ta jjejojo quea quene cuanaje eque meseja huoojeajji nijje. Jama cuanaje ba'a: "Cho, quia sa po ajja iña. Chama' ca jjaja ca oja, ecuea ca jjaja ca oe". Majoya ejjaja cuiñajji cuaa echacojji cuiajea canaje. Cuiajea majje huoojeajea ca'yonaje eque mese yasijje; jamattii poqui'yonaje. ¹¹Majoya eque meseya pea echacojji huoojea ca o'oyanaje huacuayaya. Huohui'ajja cañaqui o'oyanaje jama ba'a: "¿Ache acuae eque meseja jjonojjajja so'o?" Majoya quia sa po ajjaa jjejojo cuiajea ca o'oyanaje. Poqui o'oyanaje jamatiyya, de. ¹²Eque meseya pea echacojji huoojea ca o'oyanaje huacuayaya. E'e de, ma pea poqui majje jama huohui'ajjame acañaqui o'oyanaje ba'a: "¿Ache acuae pajjaja eque meseja jjonojjajja so'o? Eyaya cadojo'yahua o que". Majoya jjonojjajja cuiñajji cuana quenequene neineinaje onijje. Quecuaje'ajja canaje jjonojjajja cuiñajji cuaa. Poqui'yonaje echacojji jamatii eque mese yasijje.

¹³—Majoya eque mese jjashahuabiqui'yonaje oja quejo. Oya jama cuanaje ba'a: "¿Yajja acuae eyaya aje'yo so'o? Ecue bacua ejja pojja'a cahuuojeahua. E'e, oya poqui majje ma jjonojjajja cuiñajji cuaa oya ba caje. O ba majje pojja'a jjashajja'ajjaquije. Ba'ajja". Majoya aje oja bacua ejja huoojea canaje jjonojjajja cuiñajji cuana huasijje. Jjonojjajja jjequi'yohua nisho huoojea'ajja canaje. ¹⁴Majoya aje onaaya ebacua ba canaje. Jama cuanaje ba'a: "Bacue, eque meseja ebacua ejja cueyanaje, de. Cua'a ejja quecuaje'ajja oe eque mesena'yoiji" jama jjashahuaba taiquimeya cuanaje cuana. ¹⁵Jamajjeya jjonojjajja cuiñajji cuaa eque meseja bacua ejja quecuca ca'yonaje. Majoya aje quea huesha nee nee jeajea canaje —jamaya Jesosa cua—. ¿Yajja acuae eque meseya acaje'yo jjonojjajja cuiñajji cuana? ¹⁶Eque mese poquije jjonojjajja cuiñajji cuana quecuaje'ajja oe equi iyajji, equi yamajjana quea ca'a nee nee sa'ajja cani. Beca cuaa jeajea cani acui ca'a quea bame pojjeama posojojo. Pea dejjaja eba nei acui yamajjana equi iyajji. Jama cuaje ma acui ca'ajo ba'a: "Jiquio aje jja oe

Dejja cuana jama cua ba'a: —De, jjonojjajja cuiñajji cuana quea mimishi nee nee, de. Chama' ca jjaja ca dejja cuajjama mimishi.

¹⁷Jesosaa cojja ba oneone ca cua ma dejja cuana. Majoya aje oya jama cua ba'a: —E'e de, yani jjaja, de. ¿A'la jjaja miquianajaya ba jjima Eyacuiñajji etehue'yo pojja'a? Ba jjima pojja'a jjajajje, jamajjeya aje mi eyaya jama huohuime aje ba'a: Jamatii dejja cuaa oe equi iyajji, equi yamajjana quea ca'a nee nee sa'ajja cani. Beca cuaa jeajea cani acui ca'a quea bame pojjeama posojojo. Pea dejjaja eba nei acui yamajjana equi iyajji. Jama cuaje ma acui ca'ajo ba'a: "Jiquio aje jja oe

acui quea ca'a nee nee ba'a, de. Jamajjeya aje jja oe eyaya dojoje'yo quea bame nee nee jojoya". Jamaya Eyacuiñajjiya eya babaca canaje Emeshi Mese nei quea bame nee nee epoji acui quea bame jayojja. ¹⁸E'e de, miquianaaya ca ca eya cajaa aje, ma acui cajaa onaa acanaje jayojja. Ojjaña joya eya Emeshi Mese epoji cajaa acajo Eyacuiñajjiya jeajea caje'yo cuaquí yasijje —jamaya Jesosa cua.

¹⁹Jesosaja esohui shajja'ajja majje Eyacuiñajji nijje mimiani etii cuana, Moisesija etehue'yo huohuijji cuana pea'ai quea quene nee nee cua. Oya cuana jjaja'aqui majje jama mimimimime ojee cua ba'a: —¡De! A'a jja ca eseya jama acani, de. Oya mimiani eseya jjonojjajja cuiñajji cuana jayojja, de. Pea cuaa Jesosa cajaa acanaje jayojja eseyaya cajaa aje pea'ai pa —jamaya ma Jodio dejja cuana cua.

Jamajjeya Jodio dejja cuaa Jesosa iña sa aca cua ejeanobiajji nisho. Ojaya epeejji cuana quea huisojojo, Jesosa mi iña ca cuaa cua. Jama cua ba'a: —De, eseya o iñajo dejja cuana quea quene nee nee cuaje ese nijje —jamaya cua Jodio dejja cuana; Jesosa iña jjima cua.

Esohui ehuohui'yo emeshi mese yasijje bejjo quiajjijo

(Mateo 22.15-22; Macoso 12.13-17)

²⁰Majoya Eyacuiñajjiya esohui huohuijji cuaa pea dejja cuana Jesosa iñajji nisho bejjo quia ca cua. Ma dejja cuana poquia cua Jesosa baa; dejja quea bame nisho cua. Huohui'ajja ca cua Jesosa ojaya yajja saja'ame ya'yojji nisho. Jamajjeya Moisesija etehue'yo jayojja jama mi saja' a cajo dojo ca quiaye sohuinano huasijje jeanobiaa. ²¹Ma dejja quea bame nisho cuaa Jesosa jama huohui'ajjame aca cua ba'a: —Jesosa, ecuanaja eba miyaya e'e jojo nei huohuiña Eyacuiñajjiya esohui nei. Miyaya baña dejja cuana oya jayojjaya cuani. ²²¡Jamajjeya mo oe che huohuicue! ¿A'a jamajjeya Eyacuiñajjiya epeejji cuaa bejjo quia cajji emeshi meseja yajji? Quia ca aija pojja'a.

²³Jesosaja eba cuanaje Jodio cuanaja ejjashahuabaquijji. Jamajjeya ohuaya jama huohui'ajjame aca cua ba'a: —¿Apiojji acuae nequiaa iña dasia sa aña so'o? Miquianaya ca ca ecuea epeejji nisho cuani, de. ²⁴¡Jjequicue bejjo esodojjo ebajji, emeshi meseja epana'yojji!

Majoya oya cuaa oe bejjo jjequi ca cua. Jjequi cajo, Jesosaa jama huohui'ajjame aca cua ba'a: —¿Bejjojo ae ecajja'yo ani? ¿Ae bajjani tehueme'ya bejjo? —jamaya Jesosa cua.

—Emeshi mese oja cajja'yo, Sesa bajjani.

²⁵Majoya aje Jesosa jama cua ba'a: —Jamajjeya ¡Sesaja bejjo quiaquicue ohua sa cajo! ¡Eyacuiñajji a'l a pajeal'yojji; oya bihuiacue; shajja'ajjacue pea'ai!

²⁶Ma epeejji nisho cuana quea mete nee nee cua Jesosaja ojaya ejjashahuabaquijji ebajojo. Jamajjeya jama cuana cua ba'a: —Quea jjashahuabaqui ja'a nee oya, Jesosa. Jjadasia meequi aija, de —jamaya cua ma epeejji nisho cuana. Jamajjeya mimi o'oya sa po aija Jesosa nijje. Jamajjeya Jesosa iña jjima cuanaja cua.

Mano'yo majje eshequi o'oyajji
(Mateo 22.23-33; Macoso 12.18-27)

27 Ma pojxajo tii Sanoseo dejja cuana poquia cua Jesosa huohui'ajja. Sanoseo dejja cuana jamatii jjashahuabaquia cua pea cuana mano'yo majje eshequi o'oyajji pojeama.

Jesosaja ca ca jama sohui huohuime ajjima cua. Jamajjeya Sanoseo dejja cuaa oya edasiajji nisho aca cua. Majoya aje jama huohui'ajjame aca cuaa cua ba'a:

28—Esohui huohujji, Moisesiya jama tehueme aca cua yahuajo nei nei ba'a:

“Oe dejja jjahuanaquinaje. Majoya aje mano'ya cua bacuamahua.

Ojaya ehuanase quijjojea ca cua. Ahuema' ani'ya cua jjamejoqui jjimahua quijjojea. Majoya aje ahuemano'yajo oja chahuaa cahuana ca'yahua, oja doeja bacua jea jayojja nei epoji”.

29 Jamajjeya jama cuaje pojja'a ba'a: Oe dejja quea doe huiso cua, me oeje pea becanejjiji pe'a'i nequia cua. Ma dejja epona huana ca cua. Majoya mano'ya cua; bacuamahua quijjojea ca cua. **30** Ma dejjaja quijjojea ani echahua meseya huana ca o'yanaje. Bacua jea jjimahua quijjojea ca o'yanaje. **31** Majoya pea echahua meseya huana ca o'yanaje. Majoya pea echahua meseya huana'ajja ca poquia poquia cua. **32** Majoya aje oya epona mano'yonaje yahueja quijjojea ani tiiya. Jjamejoqui aija cuanaje, bacuama' nei nei tii pona cuanaje, de. **33** Jamajjeya miquea esohui jama cuani eyajo shequi o'oya majje ¿ajea ehuanase jiquio cuaje eyajo; ache oja doeja? O huanacoojji epoja pojja'a, pea echahua meseja pojja'a; oja chahua cuana ahui'a'jja'yo epo —jamaya cua Sanoseo dejja cuana.

34 Jesosaa jama aca cua ba'a: —De, miquianajaya ba jjima. Jiquio meshijo dejja cuana jjahuanaquiani; epona cuana jjahuiaquiani. **35** Jamajjeya jiquio meshijo Eyacuñajji epeejji mano'yo majje eyahuasijje poquije'ylo. Ejjhahuanaqui'yojji pojjeama cuaje'yo eyajo; epona cuana pea'ai ejjhahuiaqui'yojji pojjeama cuaje'yo eyajo. Jjamejoqui aija pea'ai cuaje'yo eyajo. **36** Mano'yo aija cuaje jomajo; esohuidojoji jayojja jama cuaje'yo. Eyajo ojjaña Eyacuñajji ebacua cuaje'yo, eshequi'yo jjejojo. **37** ¿A'a miquea ba jjima dejja cuana ojjaña mano'yo majje shequije o'oya? Jamajjeya Eyacuñajji yahuajo nei esohui tehue mee ca cua miquiana jjabahuejjaquijji. Moisesiya tehue ca cua yahuajo nei nei ma acui jijiqui ba majje. Eyacuñajji mimia cua onijje jama ba'a:

“Eyaya miquea etiiquiana cuana jaahuanaña, Amajama, Isaaca,
 Jacobo pea'ai ecuea epeejjijojo. Oya cuana enijje enequi tii tii”.

38 Eyacuñajji emano'yo cuana meshijo e'ohuajeajaa jaahuanajji pojjeama cuani. Eshe nequi cuana, emano'yo shequi'yo cuana pea'ai eyajo ohuaya jaahuana cani ojaya epeejjijojo —jamaya aca cua Jesosaa.

39 Pea Moisesija etehue'yo huohujji cuaa jama huohuime aca cua ba'a:
 —E'e de, quea ja'a nee nee miquea esohui, Jesosa. Quea bame nee nee, de.

40 Majoya huohui'ajja beca'yoo jjima tii aca cuaa cua quea meteya jjejojo, jjadasia meequi ajjajojo.

¿Aya Jesosa huoojea ca cua dejja jaahuanajji pojji?
(Mateo 22.41-46; Macoso 12.35-37)

⁴¹ Jesosaa oya cuana jama aca cua ba'a: —Miquianaya jama jjashahuaba taiquime cuani ba'a: "Jesosa Dabija osecua poso nequiaa aña. Jamajjeya oya Eyacuiñajji Bacua pojjeama poso nequiaa aña" jamaya jjashahuaba taiquimeya nequiana cuani. Dabi emeshi mese yahuajo nei nei ba'y a cua. Eya ojaya eba nei nei, de. Ojaya eya eba dejjaja bacua ejja pojjeama, Eyacuiñajji Bacua Ejja. ⁴² Jamajjeya ohuaya esohuicuayajji tehue ca cua Salmojo; jama cua ba'a:

"Eyacuiñajjiya ecuea Emeshi Mese Quito jama huohuime acanaje ba'a:
 —¡Enijje anioquecue ebañeii mijiji ojjañaja Emeshi Mese epojji!

⁴³ Eyaya mi quecua'yojji epo jeabichajea jeyojeyoje'yo. Majoya aje miyaya oya cuana jeajeaje'yo cuaqui yasijje cajaajojo —jamaya aca cua Eyacuiñajjiya".

Jamaya Dabiya ej otehue ca cua yahuajo nei nei. ⁴⁴ Jamajjeya Dabija Quito oja Emeshi Mesejojo bajjani ca cua. Jamajjeya Quito Dabija osecua cua, ojaya Emeshi Mese nei. Eya jja iña iquo Quito, de, dejjaja bacua pojjeama; Eyacuiñajji Bacua Ejja, jamajjeya eya ojjañaja Emeshi Mese nei —jamaya Jesosa cua.

Jesosaa Moisesija etehue'yo huohuijji cuana tecueajea ca cua
(Mateo 23.1-36; Macoso 12.38-40; Noca 11.37-54)

⁴⁵⁻⁴⁶ Ojjañaas Jesosaja esohui shajja'ajja canijo, Jesosaa o shajja'ajjajji cuana jama aca cua ba'a: —Coya mi oe Moisesija etehue'yo huohuijji jayojja po chana!. Oya cuana po'ayequiequi daqui aojji ojjañaja quea bame ebajji nishoya. Oya cuana quea bihui cuani shajja'ajja majje ojjañaja esohui jama cuani ba'a: "Ma esohui huohuijji quea bame cuani, oja daqui quea bame, oja esohui quea ja'a nee" jamaya shajja'ajja saya cuani ma esohui huohuijji cuana. ¡E'e jojo nei pojjeama! Jodioja equi ejjachichajji yasijje dobiqui majje ebionei anioque sa cuani Eyacuiñajji esohui huohuijji pejjejo. E'lijjal'lijajjijo pealai anioque sa cuani equi mese pejjejo. Beca cuaa quea bame poso acani. ⁴⁷ E'ahuemanoja aquiana sii cani o chaco sahuajji nisho po majje. Majoya oya cuana mimi nisho ani Eyacuiñajji nijje. Oya quea mimishi nee nee. Eyacuiñajjiya oya cuana jeajea caje'yo cuaqui yasijje, onijje mimi nishojjijojo —jamaya cuana Jesosaa aca cua.

E'ahuemano aemaa bejjo quia ca cua Eyacuiñajjiya equijo
(Macoso 12.41-44)

21 ¹ Eyacuiñajjiya equijo, Jesosaa dejja cuana quea aquiana huiso nequi ba ca cua. Ma dejja cuaa bejjo iya ca cua ejjeshejji iyajji yasijje. ² Majoya e'ahuemano aema' nei neiya bejjo iya ca cua. Becanejjiji pealai bejjo ojaya cua, oe pojji nei nei cua, de. Chama'yo cua ojaya bejjo ohua iya cajje bejjo iyajji

yasijke. ³Majoya Jesosa jama cua ba'a: —E'e, jiquio e'ahuemano quea bame cuanaje. Ohuaya ojña tii bejjo iya ca'yonaje. Jamajjeya Eyacuiñajji quea bihui cuanaje onijke. ⁴Quea aquiana huiso nee nee cuaa ca ca oja quiabishi iya canaje. Quea bame pojjeama ca ca oya cuana. Ma e'ahuemanohua iya canaje ojaya bejjo bobi jjeshejji nisho, de. Chama'yo ojaya bejjo po'yonaje. Jamajjeya quea aquiana huiso nee nee cuana quea bame pojjeama cuanaje —jamaya Jesosa cua.

Pea cuaa Eyacuiñajjija equi cajjajeajea mee caje'yo
(Mateo 24.1-2; Macoso 13.1-2)

⁵Beca cuana mimia cua Eyacuiñajjija equijo jama ba'a: —¡De, bacue mei quea bame, aquiana quea bame ani Eyacuiñajjija equijo! Aquiana quea bame sosema' quia Eyacuiñajjija equi quea bame epojji.

Majoya aje Jesosaa jama aca cua ba'a: ⁶—E'e de, quijje pishana jiquio equi, aquiana pea'ai chama'yo tii acaje'yo, de. Ma mei bame cuana pea biajje e'iya sohua'yoji pojjeama. Pea cuaa ma equi cajjajeajea caje'yo —jamaya cua Jesosa Eyacuiñajjija equijo.

Dejja cuana quea mase nee cuaje quijke
(Mateo 24.3-28; Macoso 13.3-23)

⁷Majoya o shajja'ajjajji cuaa jama huohui'ajjame aca cua ba'a: —Jesosa ecuea esohui huohuijji, ¿ache shono acuae shai pea cuaa Eyacuiñajjija equi mei cuana cajjajeajea mee caje'yo? ¿Yajja acuae acaje so'o?

⁸Jesosa jama cua ba'a: —Ma Eyacuiñajjija equi quea bame cajjajeajea'yo jjimahuajo, jamaya cuaje ba'a: Quea huiso nee nee cueje e bajjani nisho po majje. Jama mimi nishome cuaje ba'a: “Eya Jesosa Quito bajjani, de”. Pea jama cuaje ba'a: “Eya jjeyahua nei cue o'oyanaje, eya Quito, Eyacuiñajjija huoojea'yo”. ¡A'a ojaya esohui shajja'ajjajji! Sajje ca cuaje. ⁹Miquaaya shajja'ajjaje pea meshijo ba'e cuana jjaquecuaquiequi pea meshijo ba'e cuana nijje. ¡A'a miquianaya quea mete pojji! Jamatii acua pojjeama oe po ajja jjima cuaje so'o —Jesosa cua—. ¹⁰Dejja cuana jjaquecuaquije'yo ojña meshijo ba'e cuana, cuiñajjijo ba'e cuana pea'ai. ¹¹Quea huiso emano meejjiya mano mee caje'yo. Ojña quea mete nee nee cuaje, de. Bobima' cuaje, manoje'yo quea dejja huiso cuana bobimajo. Meshi huehuahuehuaje ojña meshi yasijke pea'ai, de. Ojña quea mete nee nee cuaje'yo eyatahuatuhua huehuahuehuajo meshi huehuahuehuajo pea'ai, de —jamaya Jesosa cua.

¹²—Jiquio jama po jjimahuajo beca cuaa miquianaya quea nee po mee caje'yo ecuea epeeiji cuanijojo. Oya cuanaja botíama nee nee cuaje, de. Miquianaya iña majje dojo caje jeanobiajea Jodioja equi ejjachichaquijji cuana huasijke. Dojo caje miquianaya emeshi mese nequi cojja nei yasijke. Majoya ohuaya jama huohui'ajjame acaje ba'a: “¿A'a miquianaya Jesosaja epeeiji nei?” E'e jojo neijojo, miquianaya jeanobiajea caje. ¹³Jama po majjeya ja'a quea mete pojji! Miquianaya ejo huohuije ma emeshi mese yasijke. Jamajjeya quea huiso emeshi mese cuaa

shajja'ajja caje ecuea esohui Eyacuiñajija esohui pea'ai —jamaya Jesosa cua—.
 14 E'e, ja'a quea mete pojji ache esohui miquianaaya huohuije'yo! 15 Eyaya nei miquianaya quea ja'a nee po meeje. Eyaya esohui huohui sahuaje ehuohuijji ej. Ma pojjojo pea cuanaja miya esaja'ajji pojjeama miquianajaya esohui quea ja'ajojo. Miquianajaya esohui e'e jojo nei cuaje, de. 16 Miquianajaya huapa pojjeama cuaa, miquianajaya epeejji cuaa pea'aiya dojo caje ejjajeanoibiajeaquijji equi yasijje miquianaya ecuea epeejjiyo. Ohuaya miquianaya quecua mee caje'yo, de.
 17 Ojjaña miquianaya cajaa acaje'yo ecuea epeejji cuanijojo. 18 Onaa cajaa acajje a'la jjashahuaba taiquijji jama ba'a: "Eyacuiñajija ecuana pajea ca'yonaje, de". Cho, Eyacuiñajija miquianaya pajea'yo jjima acaje'yo. Ohuaya ca ca miquianaya jaahuana caje'yo ojaya epeejji cuanijojo. 19 Ojjaña jiquio jayojja cuajo, ja'a miquianaya eya pajea'yojji! Miquianaya jjapeequipajea'yo ajjajo Eyacuiñajija miquianaya ba'e tiitii mee caje'yo eyajo.

20 —Miquianaaya sohuinano cuana Jenosanenajo ejjanequitoqui'yo nequi ba majje miquianajaya eba ma cuiñajijo ani cajjajeajea cuajicuaji caje'yo. 21 Ojjaña Jodea meshijo ba'e cuana capoqui'yahua eyiyo huasijje. Ojjaña Jenosanenajo ba'e cuana cacuayaqui'yahua. Quea huesha ba'e cuana, ja'a cue'yoquijji Jenosanena huasijje! Capoqui'yahua quea huesha nee, ma sohuinano cuaa equecua ca cuaje jjeojo. 22 E'e de, jamaya quea nee nee cuaje, Eyacuiñajija esohui yahuajo tehue ca cua jama jayojjaya cuaje. 23 Epona cuana o'ejji, bacua sho'iji pe'a'i quea yeno nee nee cuaje; quea camaja epoquicuajiji cuaje, de. Eyacuiñajija quea nee nee po mee caje Jenosanenajo ba'e cuana. 24 Sohuinanolhua beca Jodio dejja cuana yacula caje'yo. Beca cuana ca ca iña majje jeyo caje. Jeyo majje dojo caje pea meshi quea huesha nee yasijje. Quea yeno nee nee cuaje, de. Sohuinano cuaa, Jodio dejja pojjeama cuaa Jenosanenajo equi ani cajjajejea'yo majje pea equi iya caje'yo eba'e'yojji. Majotiiya oya cuana ba'eje'yo jiquio ecua Eyacuiñajija ba'e mee caje'yo. Ma shonoya aje oya cuana poquije'yo —jamaya Jesosa cua.

¿Achajja acuae cuaje Jesosa cue o'oyajo?
(Mateo 24.29-35, 42-44; Macoso 13.24-37)

25 Majoya aje Jesosaa jama aca cua cuana ba'a: —E cue o'oya jjimahuajo ojjaña quea mete cuaje eshequi, ba'i pea'ai quea apo cuajo. Jiji'yo ajja cuaje, de. Majameta cuana jjacajjaqui'yo majje jijijijioqueje. Ba majje dejja cuana quea mete nee nee cuaje; piopio caje'yo, de. Ena cuana quea shajjaquijjo cuaje enashajo quea quemó nee neejojo. 26 Mete caje'yo majameta huehuahuehuajo. Dejja cuana shacamano caje'yo mete'yo majje. Oya cuaa jama huohui'ajjame acaje ba'a: "¿Yajja shai cuani so'o?" 27 Ojjaña cuaa eya ba caje. Eya ojjaña Edoe Mese cuani cueje'yo bo biajje. Quea ca'a nee nee; quea sohui poja nee nee cuaje, de. E'e, quea bame cuaje ma pojrajoya. 28 ¡Miquianaaya jiquio ba majje nequisohuacue! ¡Jjabajeasohuaquicue! Eya cueje o'oya miquiana dojohua eyahuasijje eba'e'yojji tii tii. Jamajjeya ¡quea bihui pocue! —jamaya Jesosa cua.

²⁹ Jesosaa pea esohui jama huohuime aca cua cuana ba'a: —E'e de, ¡bacue ma acui, iquena bajjani! ¡Ojjaña acui cuana bacue! ³⁰ Esejaya meshijo acui iña yani ba majje eseya jama cuani ba'a: “E'e jojo nei nayaja po'yonaje”.

³¹ ¡Jiquio ecua acui iña yani ba majje acuujajjajo jjashahuabaquiani jayojja jama eyatahuatahua huehuahuehuani ba majje bacue eya cueje o'oya!

³² E'e jojo nei ojjaña ma pojja cuanajo ba'e cuana mano jeyojeyo'yo jjimahuajo ojjaña acua cuaje'yo eya ojjañaja Emeshi Mese oe nequije'yo.

³³ Eyatahuatahua, meshi pea'ai chama'yo cuaje'yo. Ecuea esohui ca ca ma ani tiitiime cuaje'yo.

³⁴ —¡Ishoa'ajja anicue iña oe nequia! ¡A'a jjashahuuba majamajaquianiji miquianajaya eba'ejjijo! ¡Miquianaya oe che jjashahuabaquicue e ecue o'oyajjijo! ³⁵ Ibia ijjiameejji eshe'a'ani jjacamicuajiqui'yani jayojjaya jama cuecuajimeya eya cuaje. E'e, ojjañaja eya ba jjima cuecuajije. ³⁶ Jamajjeya oe ¡shajja'ajjacue ecuea esohui! ¡A'a pajea'yojji, quea camaja cuaje, de! Ojjaña cuana quea mete nee nee, quea nee nee pea'ai cuaje, de. Jamajjeya ¡jja'ishoa'ajja aniqui tiitiicue! ¡Miquianaya ecuea epeejji po tiitiicue! ¡Eyacuiñajji nijje mimiani tiitiicue quea ca'a epojji! Eya cue o'oyajo miquianaya ecoja nei nequiñaquije. Eya miquianajaya Edoe Mese cuaje, jamajje miquianaya quea bihui cuaje, mete'ama cuaje —jamaya Jesosa cua.

³⁷ Ojjaña pojja Jesosaa esohui huohui canequia cua Eyacuiñajjija equijo. Mecajje poqui nequia cua eyiyo Onimo huasijje cahuiya.

³⁸ Mecajjeahua Jesosa cue o'oya nequia cua Eyacuiñajjija equi yasijje. Ojjaña dejja cue nequia cua oja esohui shajja'ajja.

Jodio dejja etii cuana jjashahuabaquia cua Jesosa quecua'yojjijo
(Mateo 26.1-5, 14-16; Macoso 14.1-2, 10-11; Huani 11.45-53)

22 ¹ Majoya aje quijke pishana ojjaña Jodio dejja cuana jjachichaquia cua Jenosanena huasijje ejjashahuabaquijji yahuajo nei esohuidojijiya cuia jjima oja bacua cuana aca cuajo. Ijjia'ijjia ca cua ojee pahui hua jjimajo, Jodio etiiquiana jayojjaya. ² Ma epojja cue jjimahuajo, Eyacuiñajji nijje mimiani etii cuana, Moisesija etehue'yo huohuijji etii cuana pea'ai jjashahuuba taiqui nequia cua jama ba'a: —¿Achajja iñame shai seya Jesosa aje? Eseya jjeya Jesosa iñajo ojjaña ejjachichaqui nequi cuana quea quene cuaje ese nijje —jamaya cua quea mete jjejojo Jesosaja epeejji cuanajo. Jamatii ca ca iña mee sa aca cua Jesosa equecua'yojji.

³ Jodasa Jesosa shajja'ajjajji nisho cua. Ojaya pea bajjani cua ba'a: Isicanote. Beca cuanaja Jesosa iña jjimajojo, Edosiquiaa Jodasa jjashahuuba taiqui mee ca cua Jesosa iña meesahuajji. ⁴ Jamajjeya Jodasa poquia cua Eyacuiñajji nijje mimiani etii cuana que, Eyacuiñajjija equi jaahuanajji cuana pea'ai ani yasijje huohui pohua. Jama huohuiñaquime aca cua ba'a: —Ecuea eba Jesosa ma o oe nei poquiani yasijje. Eyaya miquianaya huohuije'yo.

⁵Majoya oya cuana quea bihui cua Jodasaja esohui shajja'ajja majje. Jamajjeya jama cua ba'a: —E'e de, ecuana miyaya ba meecue ma Jesosa oe nei poquiani yasijje. Majoya aje ecuanaaya miya sosequiaje, de.

⁶—E'e de, eyaya aje mi iñasahua meeje'yo —Jodasa cua. Majoya ohuaya sa'ajja ca cua e'iña mee'yojji Jesosa dejjama huasijje poqui.

Jesosaa o shajja'ajjiji cuana nijje bobo ijija ca cua

(Mateo 26.17-29; Macoso 14.12-25; Huani 13.21-30; 1 Conitio 11.23-26)

⁷Majoya ma epojjajo Jodio cuana ijija'ijjianijo Eyacuiñajji nijje mimianiya oe ñajjajja yahue sho'i quea bame nee nee quecua ca'ya cua Eyacuiñajji bihuiajji. Jodio dejja cuaa pahui hua jjima ijija ca ania cua. ⁸Jamajjeya aje Jesosaa Peno, Huani pea'ai huoojea ca cua oe equi yasijje bobo jjequiya.

⁹O shajja'ajjiji cuaa jama huohui'ajjame aca cua ba'a: —Jesosa, ¿ache equijo acuae seja pahui hua jjima ijijaje so'o?

¹⁰Jesosa jama cua ba'a: —¡Jenosanena huasijje oe poquicue! Majoya aje miquiaaya baje oe dejja meshimisijo ena dojo caje. ¡O ba majje o cuaje jja nei nei poquicue o dobiquije'yo huasijjeya! ¹¹Majoya ma equi mese jama huohui'ajjame acue ba'a: “Ecuela esohui huohuijji jama cuanaje ba'a: —¿Ache equecuayijjijo acuae ecuana ijija'ijjaje e shajja'ajjiji cuana nijje so'o? Ecuana ijija sa cuani pahui hua jjima, Eyacuiñajji bihuiajji.”

¹²Majoya aje mi huohui caje equi meseya equecuayijji quea quemo.

¡Majoya aquiana iyajeacue; bobo cuacuacue! —jamaya Jesosa cua.

¹³Majoya aje oya cuana poquia cua; ba ca cua Jesosaja esohui jayojjaya. Majoya iya ca cua.

¹⁴Majoya siñajo Jesosa o shajja'ajjiji cuana cueya cua ma equi yasijje. Dobiqui majje anioquea cua e'ijjia'ijjajji.

¹⁵Majoya Jesosa jama cua ba'a: —Eya miquiana nijje oe yejje nei ijija'ijjajje'yo, onaa e quecua ca'yo cuahuajje. ¹⁶E'e de, eya e'l'ijja'ijja beca'yoji pojjeama miquiana nijje mano'yo majje. Jamajjeya quijje eyaya cue o'oya majje jiquio pahui ijijaje o'oya ojjaña cuanaja Emeshi Mese neiya jjejojo —jamaya Jesosa cua.

¹⁷Majoya ohuaya caneco jjeshe ca cua. Emejo iñanequia majje mimia cua Eyacuiñajji nijje. Majoya aje ohuaya o shajja'ajjiji cuana aca cua jama ba'a: —Ma'aje, jiquio jjonojjajja na ishicue; ishijeyocue oe! ¹⁸E'e de, eyaya ishi beca'yoo jjima jjonojjajja na aje, Ecuela Chiiya eya ojjaña huoojea'yojji po mee caje'yo; ojjaña eya shajja'ajja caje'yo —jamaya Jesosa cua.

¹⁹Majoya aje pahui jjeshe ca cua. Pahui jjeshe majje oya mimia cua Eyacuiñajji nijje. Mimi majje pahui miji ca cua. Majoya aje miji majje quia ca cuana cua. Jama huohuime aca cua ba'a: —Jiquio pahui ecuela eyami. Jjeya nei pishana eya manoje'yo, Eyacuiñajjija esohui jayojja cuaje miquianaja mimishi cuijea'yojji. ¡Jamajjeya miquianaaya jiquio pahui ijijacue; jamatii apoquiapoquiacue! Jiquiajja ijija majje ¡miquianaya jjashahuabaquicue e mano'ya cuajo!

²⁰Majoya ij{jia}'ij{jajeyo majje Jesosaa caneco jjeshe ca o'oya cua. Jjeshe majje jama huohuime aca cua ba'a: —Jiquio jjonojjajja na ecuea ena', de. Ecuea ena' cuayaqui'yajo eya manoje'yo. Jamajjeya Eyacuiñajjiya cuijea caje'yo tii ojjañaja mimishi cuana. Eyacuiñajjiya esohui eyacua quia caje'yo ba'a: "Ojaya epeejji cuanaja mimishi cuana cuijea mee caje'yo tii ecuea ena' cuayaquijeya".

²¹Majoya aje Jesosa jama cua ba'a: —Yani oe ese nijje e shajja'ajjajji nisho cuani; ij{jia}'ij{jiani ese nijje, de. Maaya eya sohuinano cuana iña mee caje'yo. ²²Eya manoje'yo, Eyacuiñajjiya esohui jama cuanaje jojoya. E'e de, ma e shajja'ajjajji nisho Eyacuiñajjiya quea nee nee po mee caje'yo. Ohuaya ma e shajja'ajjajji jeajea caje'yo cuaquí yasijje e ohua sohuinano cuana iña mee caje'yojojo —jamaya aca cua Jesosaa.

²³Majoya aje o shajja'ajjajji cuana mimia cua jama ba'a: —De, ¿aya shai jama acaje? —jama mimime o shajja'ajjajji cuana cua.

¿Ache o shajja'ajjajji quea bame nee nee cuaje eyajo?

²⁴O shajja'ajjajji cuana mimipanajaji nequia cua. Oya cuana jama cua ba'a: —¿Ache o shajja'ajjajji quea bame nee nee cuaje eyajo?

²⁵Jesosaa jama huohuime aca cua ba'a: —Miquianaya mimiani ecuea epeejji pojjeama jayojja, de. ¡A'a jama jjashahuubaquijji! Jamatii miquianajaya eba emeshi mese cuana quea mase cuani ojaya echacoji cuana nijje. Jamatii ma echacoji cuaa shajja'ajja cani ojaya emeshi meseja esohui jayojja oya quea mase cuanijojo. Ojaya echacoji cuana quea bihui nisho cuani. ²⁶⁻²⁷¡Miquianaya ma emeshi mese jayojja jama a'la pojji! ¡Eyajo emeshi mese jayojja quea bame nee nequi sa cuanijo pea cuana jjeya nei ba'le meesahuacue! ¿Ache shai quea bame nee nee so'o? Emeshi mese, ojaya echacoji pojja'a. Emeshi mese, de. Jamaya Eyacuiñajjiya epeejji pojjeama jjashahuubaquian. Ecuea epeejji cuana ca e jayojja caba'yahua. Eyaya miquianaya ba'le bame meesahuaña. Eya mase'ama cuani miquiana nijje; miquiana chacosahuajji cuani eya, de. ¡Jamaya pocue e jayojjaya! Majoya quea bame cuaje —jamaya Jesosa cua.

²⁸Majoya Jesosaa o shajja'ajjajji cuana jama huohuime aca cua ba'a: —Miquianaya jamatii po'ayequiequinaje enijke. Jjapeequi tiitiinequinaje enijke, jamatii beca cuaa eseya cajaa acanaje. ²⁹⁻³⁰Jamajojoya aje oe miquianaya Eyacuiñajjiya quea bame quia cani, e ohua acanaje jayojjaya. E'e, ohuaya eya ojjaña dejja cuanaja Emeshi Mese nei po mee ca'yonaje; jamaya eyaya miquianaya Jodio dejja cuanaja emeshi mese jayojja po meeje'yo eyajo. Jomajo eseya ba'le tiitijke'yo; quea bihui cuaje —jamaya aca cua Jesosaa o shajja'ajjajji cuana.

Jesosa Peno nijje mimia cua

(Mateo 26.31-35; Macoso 14.27-31; Huani 13.36-38)

³¹Majoya Jesosa mimia cua Peno nijje. Penoja pea bajjani cua ba'a: Simohui. Jama Jesosa cua ba'a: —Simohui, shajja'ajjacue jiquio esohui ba'a: Edosiquiaa

miquianaya eya pajea mee'yo sa acani. Ohuaya miquianaya mimishi po mee'yo sa acani. ³²Simohui, eya miminaje mijo Eyacuiñajji nijje. Miyaya eya cajaa jayojja aje. Majoya miya enijje jjapeequi neineije o'oya. Jamajjeya enijje jjapeequi o'oya majje ¡pea e shajja'ajjajji cuana jjapee titiiqui meesahuacue enijje!

³³Simohui jama cua ba'a: —Ecuea Emeshi Mese nei, Jesosa, eya aje minijje tiiya poquije mi jeanobia caje yasijje mi jayojja pea'ai mano'yome po'yohua. Ecuea aje mi epajea'yojji pojjeama.

³⁴Jesosaa Peno jama aca cua ba'a: —Peno, mecahuajje cachina yahue taaa jjimahuajo, miya jama siajje pome cuaje ba'a: "Chojja, ecuea Jesosa ba jjima". Pea beca peejjima siajje ameya aje miyaya —jamaya Jesosa cua.

Beshahua nei acua Jesosa e'iñajji

³⁵Majoya aje Jesosaa o shajja'ajjajji cuana jama huohui'ajjame aca cua ba'a: —Yahuajo pishana eyaya miquianaya huoojeanaje esohui huohuiya. Eyaya miquianaya huoojeanaje aema' jamatii bejjoma', bashosocoma', miquea ejiojjiyo nei nequi dojonaje. Eyaya miquianaya jaahuananaje. ¿A'a miquianaya quea shoe cuanaje? Chojja.

Oya cuana jama cua ba'a: —E'e jojo nei, jaahuananaje aje jja ca miyaya ecuana, de.

³⁶Majoya aje Jesosa jama cua ba'a: —E'e de, jjeya ca ca beca cuua eya quecua caje'yo. Eya miquiana nijje nequi tii ajja jiquio meshijo, eya mano'yo majje. ¡Jamajjeya ca oe miquea bejjo dojocue; miquea bashosocojo biyocuatajeacue quea huesha epoquiji! ¡Jjequicue miquea equecuajji! Chamajo jjeshecue miquea daqui moo sosejje. ³⁷E'e de, yahuajo Eyacuiñajji etehue'yo ejlo jama cua ba'a: "Dejja mase cuanaja boti'ama Eyacuiñajjiya huoojea'yo cuaje. Dejja mimishi jayojja acaje'yo. Jamajjeya quecua caje'yo cuaa" jamaya acaje jjeyahua nei, de —jamaya Jesosa cua.

³⁸O shajja'ajjajji cuana jama cua ba'a: —Bacue, yani ecuanaja beca equecuajji. Ecuanaa sohuinano cuana quecuaje'yo, de.

Jesosa jama cua ba'a: —Miquianajaya ba jjima ecuea esohui, de. Mahuiso ecuea esohui —jamaya Jesosa cua.

Jetesemani quejo Jesosa mimia cua Eyacuiñajji nijje

(Mateo 26.36-46; Macoso 14.32-42)

³⁹Majoya Jesosa poquia cua Onimo eyiyo huasijje mimiya oja Chii nijje. Cuamaya oya poqui majamaja nequia cua mimiya Eyacuiñajji nijje. Onije o shajja'ajjajji cuana poquia cua pea'ai. ⁴⁰Majoya aje Jesosaa jama aca cua ba'a: —¡Mimi majamajacue oe Eyacuiñajji nijje mimishi'ama epoji!

⁴¹Majoya Jesosa poquia cua quea huesha pishana mimiya Eyacuiñajji nijje oe nei. Majoya oya ecui'oshajjajo nequi majje mimia cua jama ba'a:

⁴²—E'e de, Eyacuiñajji, eya beshahua nei poqui sa po ajja acui ecueatal'apee yasijje. Eya quea mete nee nee ojjañaja mimishi cuanajo, de. Ecue

Chii, ecuea eba miyaya eya acui ecueata'apee yasijje poqui mee sa aña emano'yojji ojjañaja mimishijo. Jamajjeya ¡quea ca'a po meecue eya miquea ejjashahuabaqu'i'yojji jayojja jama e'ajji! —jama mimimeya Jesosa cua.

⁴³⁻⁴⁴ Jesosa quea mano jjabaquia cua emano'yojji jjejojo. Majoya mimi o'oya cua oja Chii nijje jjanobajjima nei. O janobajjima nei mimianijo, shishi majje ena! jayojja oquequia cua meshi yasijje, de. Majoya aje esohuidojiji eyajje nequioquea cua Jesosa mete'ama po meeya. Ohuaya majoya Jesosa quea nee ca'a po mee ca cua; jama cua ba'a: —¡Mique Chiija esohui jayojja jama acue! —jamaya aca cua.

⁴⁵ Majoya Jesosa oja Chii nijje mimipajea'yo majje oya poquia cua o shajja'ajjajji cuana huasijke. Ba ca cua oya cuana ecahuijaa quea yeno nee nee jjejojo, de.

⁴⁶ Ohuaya oya cuana jama aca cua ba'a: —¿Apiojji acuae miquianaya ecahuijaa so'o? ¡Anisohuacue jja oe; mimi majamajacue miquianaya Eyacuiñajji nijje! Jamajoya pea cuaa quea mimishi epo mee'yojji pojjeama —jamaya Jesosa cua.

Jesosa iña ca cuaa cua

(Mateo 26.47-56; Macoso 14.43-50; Huani 18.2-11)

⁴⁷ Jesosa mimianijo tii Jodio etii cuana, sohuinano cuana, Eyacuiñajji nijje mimiani etii cuana pe'a'i cueya cua. Jodasa, Jesosa shajja'ajjajji nisho cueya cua o que. Oya ehui dojodzi nei cueya cua. O e'ñajji jjanequichipiquia cua Jesosa nequi yasijke. Jjanequichipiqui majje shemo tojjo nisho ca cua. ⁴⁸ Majoya aje Jesosaa jama aca cua ba'a: —Jodasa, miyaya eya shemo tojjo nisho majje sohuinano cuana iña mee'yonaje. ¿Yajjajo Jodasa? —jamaya Jesosa cua.

⁴⁹ Majoya o shajja'ajjajji cuaa ba majje Jesosa jama huohui'ajjame aca cua ba'a: —Jesosa, ¿a' ecuaaya sohuinano cuana jajajeaje?

⁵⁰ Majoya aje oe oja eshajja'ajjajjiya dejja esapa jajapojojeajji nisho eshajja jajasejjajea ca cua ebañei shajjajje. Eyacuiñajji nijje mimiani etiija echacocji cuanija eshajja, de.

⁵¹ —Chojja, ¡a' jja oe jajajji! —Jesosa cua.

Majoya Jesosaa ma dejjaja eshajja ejajasejjajea emeya nequia ca'ya cua. Shajja jaja jjima jayojja shajja pana'yome aca cua. ⁵² Majoya Jesosaa dejja cuana jama huohui'ajjame aca cua ba'a: —¿Apiojji miquianaya cueyanaje baajji, acubjergi e'ñaa? ¿A'a cuae jja iña siipojji so'o? ⁵³ E'e de, ojjaña pojjajo eya esohui huohui po nequinaje Eyacuiñajjiya equijo. Miquianajaya eya iña jjima cuanaje ma equijo quea meteya jjejojo dejja cuanajo. Jjeya ca ca Edosiquiaa miquianaya iña mee canaje jiquio quejo dejjamajo.

Peno Jesosaja epeejji nisho jayojja cua

(Mateo 26.57-58, 69-75; Macoso 14.53-54, 66-72; Huani 18.12-18, 25-27)

⁵⁴ Majoya sohuinano cuaa Jesosa iña'yo majje dojo ca cua Eyacuiñajji nijje mimiani etiija equi yasijke. Penohua ca ca quea huesha pishana quiquishi ca poquia cua. ⁵⁵ Majoya pea sohuinano cuaa cuaquí

dahuahuojje ca cua equi epeeyi dojjojo. Majoya anioquea cua cuaquí pejjejo ejjayoquijji. Peno pea'ai anioquea cua ona nijje yajja Jesosa onaa acaje ebajji. ⁵⁶Echacojji ahuema'aniya Peno jjayoquiani ba majje cojja ba neinei ca cua. Ba majje pea cuana jama huohuime aca cua ba'a: —E'e, joya Jesosaja epeejji ani ba'a —jamaya cua ahuema'ani.

⁵⁷Peno jama cua ba'a: —Ecuea Jesosa ba jjima nei nei.

⁵⁸Quijje pishana pea dejja Peno ba ca o'oya cua. Jama cua ba'a:
—Miya jja Jesosaja epeejji, o shajja'ajjajji cuani.

—Chojja, ecuea Jesosa ba jjima nei nei —jamaya aca cua Penohua.

⁵⁹Majoya quijje pishana peaa oya ba ca o'oya cua: —E'e, oya jja Jesosaja epeejji nei nei. Oya jja Janinea meshijo ba'e Jesosa jayojjjaya.

⁶⁰Majoya aje Peno jama cua ba'a: —Chojja de, ¿ajeo ajja mi ca mimiani so'o?
Peno miminequijo tii, oe cachina yahue taaa cua. ⁶¹Ma cachina taaaajo Jesosa jjanequijea pajjaquia cua Peno bajji. Majoya aje Peno jjashahuabaquia cua Jesosaja ehuohuijo jama ba'a: “Cachina yahue taaa jjimahuajo, pea beca peejiima siajje ameya aje miyaya, eya ba jjima nisho aje”. ⁶²Majoya Peno cuayaquia cua. Pa neinei'ya cua Jesosa ba jjima nisho epo jjejojo; quea yeno nee nee'ya cua.

Jesosa Jodio dejja cuaa niñeba ca cua

(Mateo 26.67-68; Macoso 14.65)

⁶³Sohuinano cuaa Jesosa jaahuana ca nequia cua, cuaya meequi'yo jjima yajji. Majoya Jesosa niñeba ca cuaa cua, majoya Jesosa cuia ca cua.

⁶⁴Majoya cuia majje cojja japa ca cua. Cojja japa majje shemo cuiasejjajea ca cua. Shemo cuiasejjajea majje ohuaya cuaa Jesosa jama huohui'ajjame aca cua ba'a: —¿Aya acuae mi cuia canaje so'o? ¡Jjashahuaba'ajjaqui!

⁶⁵Majoya sohuinano cuaa Jesosa niñebajea neinei ca'ya cua, mimijaji neinei'ya cua onijke.

Pea cuaa Jesosa dojo ca cua Jodio etii cuana huasijke huohui'ajja

(Mateo 26.59-66; Macoso 14.55-64; Huani 18.19-24)

⁶⁶Jjapojaquiajao Jodio etii cuana jjachichaquia cua. Ojjaña Jodio etii, Eyacuiñajji nijje mimiani etii, Moisesija etehue'yo huohuijji etii cuana, ojjaña ojee mimia cua Jesosajo. Majoya sohuinano cuaa Jesosa dojo ca cua Jodio etii cuana huasijke. Majoya aje etii cuaa Jesosa jama huohui'ajjame aca cua ba'a: ⁶⁷—¡Huohuicue ecuanaya miquea ebajjani! ¿A'a miquea ebajjani Quito, Eyacuiñajji huoojea'yo, pojja'a?

Jesosaa jama saja'ame aca cua ba'a: —Eya "e'e" cuajo miquianaya jjashajja'ajjaqui ajja, de. ⁶⁸Miquianaya eyaya huohui'ajjajje saja'a jjima aje'yo eya. Jamaya eya saja'ajje miquianajaya eya epichojea'yojji pojjeama. ⁶⁹E'e, eya poquije'yo jjeya nei pishana eyahuasijke Eyacuiñajji nijje ebañeijje ani'yohua. Jomajo ecue Chii quea sohui poja nee nee enequi tii tii —jamaya Jesosa cua.

⁷⁰Majoya aje Jesosa ojjañaa jama huohui'ajjame aca cua ba'a: —¿A'a miya Eyacuiñajji Bacua Ejja nei so'o?

Jesosaa jama saja'ame aca cua ba'a: —E'e jojo nei miquiaaya esohui ejo aña.

⁷¹Majoya aje oya cuana jama mimijajime cua ba'a: —¡De, pea dejja a'a iyaajji Jesosa huohuijji! Ecuana jjeya nei shajja'ajjanaje ojaya esohui. Ohuaya Eyacuiñajji niñeba canaje Eyacuiñajji Bacua Ejja miame —jama mimijajimeya cua Jesosa nijje.

Jesosa emeshi mese Pinato huasijje dojo ca cua

(*Mateo 27.1-2, 11-14; Macoso 15.1-5; Huani 18.28-38*)

23 ¹Majoya ojjaña nequisohua majje poquia cua emeshi mese Pinato huasijje Jesosa dojohua. Pinato esohuinano mese cua, ojjaña emeshi mese cuanaja emeshi mese pea'ai cua. ²Jesosa dojo majje Pinato cojja nei nequia ca cua Jodio etii cuaa. Onaaya Jesosa jama niñebame aca cua ba'a: —Ecuaa jiquio dejja banaje. Mimitecuetecuequi ecuanaja meshijo. Oya jama cuanaje ba'a: “¡A'a bejjo quiajji emeshi mese sosequiajji!” Oya pa Eyacuiñajji huoojea'yo cuani; oya pa Jodioja emishi mese posa cuani, de —jamaya oya cuana siajje cua Jesosajo.

³Majoya Pinatohua Jesosa jama huohui'ajjame aca cua ba'a: —¿A'a miya Jodioja emeshi mese cuani?

Jesosaa jama saja'ame aca cua ba'a: —Miyaya huohuiaña jayojjaya cuani eya.

⁴Majoya Pinatohua etii cuana jama huohuime aca cua ba'a: —De, jiquio dejja jjashahuaba taiqui ajja, capichojea'yahua jja, de.

⁵Oya cuana quea quene nee nee cua. Mimia cua janobajjiima nei nei. Jama tecuetecueme cua ba'a: —Oya ca ca jjashahuaba taiquinaje, de. Ohuaya esohui huohui ca ayequiequinaje ojjaña cuiñajji yasijje. Ebionei Janinea meshijo hohui canaje, jjeya Jodea meshijo huohui canaje jiquio cuiñajji cuana huasijje, jjeya nei pea'asi, de. Ojjaña quea quene nee nee, quea shajjaquijjo nee nee ohuaya po mee canaje cuana —jama siajje ameya aca cua Jodio etii cuaa.

Jesosa dojo ca cua pea emeshi mese que, Enode que

⁶Pinatohua ona shajja'ajja majje jama huohui'ajjame aca cua ba'a: —¿A'a jiquio dejja Janineajo ba'e?

⁷—E'e —oya cuana cua.

Pinatohua ma shajja'ajja majje Jesosa huojea ca cua Enode que, Janinea ameshi mese que. Enode Jenosanenajo ania cua anicuua poqui. Jamajjeya Pinatohua Jesosa, Jodio etii cuana pea'ai huojea ca cua Enode que.

⁸Enode Jesosa ba majje jama cua ba'a: —E'e de, jjeya nei eyaya baña jiquio dejja Jesosa. Eyaya oya ba sa anaje ojaya esohui eshajja'ajjajji; emanoy'yo cuana eshequi mee caje'yo ba sa anaje pea'ai —jamaya cua Enode. Oya ca ca Jesosaja epeeiji po sa po ajja nei.

⁹Majoya Enodeya huohui'aja majamaja ca nequia cua. Jesosaja oya Enode sohui saja'a jjima cua. ¹⁰Jodio etii cuaa Jesosa niñeba neinei ca aña cua. ¹¹Majoya Enodeya, oja sohuinano cuaa Jesosa hue'e ca cua esodojojji. Daqui quea sose huiso emeshi meseja jayojja Jesosa huosho mee ca cua emeshi mese nisho yajji. Majoya aje daqui huosho mee majje bihuia nisho ca cua. Majoya aje Jesosa huoojea ca o'oya cua cuaa Pinato que. ¹²Ma pojxajo Jesosa nijje mimijaji majje Enode Pinato nijje jjapeequinaje. Yahuajo Pinato Enodeja epeeiji pojjeama cua.

Jesosa Pinatohua mano mee ca'ya cua

(Mateo 27.15-26; Macoso 15.6-15; Huani 18.39-19.16)

¹³Majoya aje Pinato jjachichaquia cua Jodio etii cuana nijje, Jenosanena emeshi mese cuana nijje, pea dejja cuana nijje pea'ai. ¹⁴Jama huohuime aca cua ba'a: —Miquianaya ¿apojiji Jesosa yenaje so'o? Miquianaya jama cuanaje ba'a: “Ohuaya ojjaña dejja cuana quea quene, quea shajjaquijjo po mee cani” poso anaje. Cho oya ca ca quea mimishi pojjeama cuani. E que miquiaaya yajo aje jja, eyaya Jesosa huohui'ajjanaje. Jjeya nei ecuea eba Jesosa, oya jjashahuuba taiqui ajja. Oya quea mimishi pojjeama. Joya ecua miquiaaya huohui yaña jama pojjeama. ¹⁵Enode jama cuanaje ba'a: “Oya ca jja ca quea mimishi pojjeama, de”. Jamajjeya ohuaya Jesosa huoojea ca o'yanaje e que. ¡Bacue! Eyaya Jesosa mano mee'yo jjima aje, capichojea'yahua jja Jesosa, de. ¹⁶Jamajjeya eyaya oya cuia meeje. Majoya aje cuia mee majje pichojea meeje'yo —jamaya cua Pinato.

¹⁷Ojjaña eshequiaja Pascuajo Pinatohua oe ejeanobia nequi huoojeacuaya ca'yarinaje, Jodio cuana quea bei epojji. Jamajjeya Pinato jama cua ba'a: —Jesosa eyaya huoojeacuaya meejo'yo jiquio shejo.

¹⁸Ma esohui shajja'ajja majje ojjaña Jodio cuana quenequene neinei'ya cua; taaa cua jama ba'a: —Chojja, ¡Mashama ca oe huoojeacuaya'yocue! ¡Quecuamee'yocue Jesosa!

¹⁹Mashama jeanobia ca cua yahuajo pishana, oya quea mase nee nee cua. Oya Shomano emeshi mese quecuapanajji epo; ona quecuayoyoji epo pea'ai. Oya quea mimishi nee nee cua.

²⁰Pinatohua ca ca Jesosa huoojeacuaya'yo sa aca cua, jamajjeya jama mimome po o'oya cua ba'a: —Cho, Jesosa ca ca oe huoojeacuaya mee'yo sa aña.

²¹Ojaya esohui shajja'ajja majje ojjaña cuana janobajjima nei nei jama taaaame cua ba'a: —Chojja de, ¡Jesosa ca oe quecuamee'yocue jjeya nei! ¡Acui ecueata'apeejo oe ba'ehuanasohuajeacue!

²²Pinatohua jama huohuime aca o'oya cua ba'a: —¿Apiojji shai miquianaaya oya mano mee'yo sa aña so'o? Oya ca jja ca quea mimishi pojjeama cuani. Eyaya oya cuia neinei mee'yo majje huoojeacuaya meeje'yo. ²³Majoya aje ojjaña cuana taaa o'oya cua jama ba'a: —¡Ba'ehuanasohuajeacue oe acui ecueata'apeejo Jesosa!

Ojjaña cuana taaa majamaja cua. Quenequene neineiya cua Pinato nijje.²⁴ Jamajjeya pinato jama jjashahuabaquime cua ba'a: —E'e de, eyaya Jesosa caquecua meejea'yahua, dejja cuana enije quea quene cuequijojo. Eyaya ca oe Mashama cahuojeacuaya mee'yahua.

²⁵Majoya aje pinatohua ma ecua ojjaña taaaanje jama jayojjaya aca cua. Jamajjeya ohuaya Mashama huoojeacuaya mee ca'ya cua; Jesosa ca ca oe huoojea ca cua acui ecueta'apeejo eme' cacajeajji emanol'yojji.

Jesosa ba'ehuanasohuajea ca cua acui ecueata'apeejo
(Mateo 27.32-44; Macoso 15.21-32; Huani 19.17-27)

²⁶Majoya sohuinano cuaa Jesosa acui ecueata'apeejji dojo mee ca cua o ba'ehuanasohuajeajji. Jesosa saja ca cua acui quea biquieya jjejojo.

Jamajjeya sohuinano cuaa oe dejja ma acui dojo mee ca cua. Oya Simoni bajjani cua; Sinene meshijo ba'e cue cua. Jamajjeya Simoniya Jesosa quiquisijji dojo ca cua acui ecueata'apee aboiji.²⁷ Ojjaña dejja cuana epona cuana pea'ai pa poquia cua Jesosajo quea yeno jjejojo.

²⁸Jesosaa epona cuana ba majje jama aca cua ba'a: —Jenosanenajo ba'e epona cuana, ja'a oe ejo paji! ¡Miquianaja pa sa cuanijo pacue miquianajo miquianaja bacuajo pea'ai!²⁹ Quijje pishana quea camaja cuaje miquianajo. Miquianaaya jama huohujie ba'a: “Oe epona bacuama' camaja'ama ba'yani”. Sohuinano cuana cueje jiquio cuiñajji yasijje miquiana quecuaa, chama'yo tii cuaje miquianajaya bobo. Jamajjeya miquianajaya ebacua yanijo quea yeno nee nee cuaje. Ebacua cuana pa neineije'yo bobimajo.³⁰ Dejja cuana quea yeno nee nee cuaje pea'ai. Joya ecua atii mano'yo sa cuani jama miquianaya cuaje. Majoya miquianaya jjashahuabaquije jama ba'a: “Eyiyo, jecuana biajje oe jaabicha cuajicue ecuana cuia cuají'yojji” jamaya miquianaya cuaje. E'e epona cuana, miquianaya ani sa po ajja cuaje quea camaja ba'e jjejojo. Jamajjeya ma pojargo quea nee nee cuaje.³¹ Jjeya nei sohuinano cuaa eya quecua caje'yo. Maya ca ca oe quea tai pishana. Quijje ojjaña sohuinano cuaa miquianaya quecua jeyojeyo caje'yo, maya quea tai nee nee cuaje'yo. Jamajjeya ja'a paji ejo; miquianajoya jja oe pa neineicue! —jamaya Jesosaa aca cua.

³²Majoya sohuinano cuaa beca siipojji dojo ca cua Jesosa nijje eba'ehuanasohuajeajji.³³ Majoya oya cuana poquia cua eyiyo Sapa Jjii bajjani yasijje. Bañaqui majje Jesosaja eme' caca ca cua acui ecueata'apeejo; ejiojjije pea'ai caca ca cua. Cacajeyo majje nequiasohuajea ca cua. Ma becanejjiji pea'ai siipojji pea acui ecueta'apee cuanajo nequiasohuajea ca cua Jesosa pejjejo oe ebañeijiji, pea shani mijijje.³⁴ Acui ecueata'apeejo ba'ehuanasohuajea cajje Jesosa mimia cua Eyacuiñajji nijje ojjaña nequijo jama ba'a: —Ecue Chii, ecue Chii jiquio dejja cuanaja ba jjima e'e jojo nei eya miquea Ebacua Ejja cuani. Jamajjeya jjiquio mimishi cuijea'yocue!

Majoya aje sohuinano cuaa Jesosaja daqui huijjiajea'yo majje hue'e ca cua oja daqui ya'yojiya. ³⁵Ojjaña dejaa Jesosa ba ca nequia cua, Jodio etii cuaa pe'aai. Niñeba ca cua Jesosa jama ba'a: —Dee, ¿a'a Jesosa ojjaña jaahuanajji pojjeama cuanaje? Oya ona nahuejji pojjeama. Jamajjeya mi nequioque'yani acui ecueta'apeejo ba'e. Oya Eyacuiñajji Bacua Ejja jjabaqui majje jja ca oe jjeyahua neiya canequioque'yahua —jama niñebameya Jodio etii cuaa aca cua.

³⁶Sohuinano cuana mimijajia cua pea'ai. Jesosa majoya quia'ajja ca cua jjonojjajja na sese e'ishiji nisho. ³⁷Jama mimijajime cua ba'a: —¡Miya Jodioja emeshi mese nei jjabaqui majje mee nei nequioque'yocue acui ecueta'apeejo ba'e jjeyahua nei!

³⁸Jesosa ba'e sapa biajje oja bajjani etehue'yo caca ca cua jama ba'a:

Oya Jesosa, Jodioja emeshi mese epo'yojji

³⁹Oe siipojji pea acui ecueata'apeejo ba'e mimijajia cua Jesosa nijje jama ba'a: —¡A'a cuae miya Eyacuiñajji Bacua Ejja nei jjaba'ajjaqui socue! ¡Ache oe nequioque'ajjaqui'yo socue; ecuanaya pea'ai pajjaja oe che nequioque meequi'yo!

⁴⁰Pea siipojjiya pea acui ecueata'apeejo ba'eya ca ca ma esohui shajja'ajja majje tanacua ca cua jama ba'a: —¡A'a jjashahuuba taiquiji, de! ¿A'a miya Eyacuiñajji jjashahuubaqui ajja nei nei? Jjeya se manoje'yo. ⁴¹Eseya mano mee ca'yani sohuinano cuaa quea mimishi nee neejojo. Jesosa ca ca mimishi'ama, de.

⁴²Majoya aje ohuaya Jesosa jama aca cua ba'a: —Jesosa, ¡miya eyahuasijje poqui'yo majje ejoo che jjashahuuba bamequicue!

⁴³Majoya Jesosaa jama aca cua ba'a: —E'e, jiquio pojajjo miya enijje eyahuasijje ba'esohuaquije'yo mano'yo majje.

Jesosa mano'ya cua

(Mateo 27.45-46; Macoso 15.33-41; Huani 19.28-30)

⁴⁴Majoya esheque biacojjajja nequijo, shequima'po mee ca'yaa cua. Quea apo nee nee po mee ca'yaa cua ojjaña meshi yasijke. Quijje nei jjapojjaqui mee ca'yaa cua eshequi ejjanequijeapaaquijo. ⁴⁵Eshequi quea apo nee nee po'yajo, Eyacuiñajji equijo ba'ehuana ba'e daqui moo nei jja'isaje aquia cua eyiyesama neijje. ⁴⁶Majoya aje Jesosa jjanobajjima nei taaa cua jama ba'a: —Ecue Chii, ecue Chii eyaya mi que ecue dojjoshahua huoojeaje'yo. Jjeyahua mo poquijeyoje.

Jama po majjeya poquijeyaa cua.

⁴⁷Sohuinano huoojeajji cuani meseya Jesosa mano'yajo, ba ca cua. Majoya jama cua ba'a: —E'e de, e'e jojo nei Jesosa mimishi'ama nei nei cuanaje; oya Eyacuiñajji Bacua Ejja cuanaje, de.

⁴⁸Ojjaña dejaa o ba cuequi poqui'ya cua. Ese'o cuiaqueyajea ca poqui'ya cua quea yeno nee neeyaa jjejojo sapa cuana cuiapashijea ca

poquia cua. ⁴⁹Ojjaña Jesosaja epeeiji cuana ca ca quea huesha nequia cua. Epona cuaa pealai quea huesha aniya ba ca cua Jesosa onaa cua ca'yoqui acui ecueata'apeejo ba'e. Ma epona cuana yahuajo nei jjapeequia cua Jesosa nijje, Janinea meshijo ba'e.

Jesosa mei jjani yasijje huananobia ca cua
(Mateo 27.57-61; Macoso 15.42-47; Huani 19.38-42)

50-51 Oe dejja Jose bajjani quea aquiana huiso cua. Oya pea Jose, Amatea cuiñajijo ba'e. Oya jjapee tiitiiquia cua Jesosa nijje. Oya Jodio etii cua. Jesosa mano'yo jjimahuajo, oya Jodio etti cuana nijje jjachichaquia cua. Ohuaya beca etii cuana jama huohuime aca cua ba'a: —Chojja de, eya ca iña Jesosa mano mee sa po'yo ajja.

52 Jamajjeya Jesosa mano'yajo Jose poquia cua Pinato que Jesosa epoquijeyo ba'e huohui'ajja; jama aca cua ba'a: —E'e de, ¡Jesosa mo quia'yoque! Oya ca ca mano neinei'yonaje. Eyaya oya dojoe'yo ecuea mei jjani yasijje ehuananobiaqui'yoiji.

53 Majoya aje ohuaya Jesosa mano'yo ba'e jjequioquea ca'ya cua acui ecuela'apeejo ba'e. Jjequioquea'yo majje bebo ca'ya cua daqui oshe quea bojea nee neeya. Bebo majje mei jjani ai yasijje huananobiaa dojo ca cua mano'yo tii cuanaja ejaaaji ajjima huasijje. ⁵⁴Sinecua nei, ejomishocajji epojja po jjimahuajo Jesosa huananobiaa dojo ca cua Joseya.

55 Janinea meshijo ba'e epona cuana Jose quishishi poquia cua mei jjani yasijje Jesosa emano'yo baa. Jesosa mei jjanijo huana ca cua Joseya. Epona cuaa Jesosa emano nei'yoja baqui ca cua shiyeshiyejo eshaquijji nisho. Majoya Joseya mei quea quemero jeacajjajja ca cua mei jjani naba capa'yoiji. ⁵⁶Majoya epona cuaa Jesosa jjanijo ehuananobia jaa ba majje shiyeshiyejo shaqui jjima aca cua. Jamajjeya poqui'ya cua ocuayaya equi yasijjeya. Majoya acui shiye pohuipohui shiyeshiye acua aca cua Jesosaja eyami shaquijji nisho. Shaqui jjima aca cua ejomishocajji pojja jojoya. Jamatii Jodio dejja cuana ma pojajoya chacochaco aija cua.

Jesosa shequi'ya cua
(Mateo 28.1-10; Macoso 16.1-8; Huani 20.1-10)

24 ¹Mecajjeahua nei nei nomico pojajajo, epona cuana poqui o'oya cua Jesosa ba o'oyaa. Shiyeshiye acua'ya dojo ca cua jjani jaa huasijje, Jesosaja eyami shaa nisho ihui jjima epojji. ²Epona cuaa ba cañaquia cua mei jjani eca'apejo'yo cua. ³Oya cuana dobiquia cua ma mei jjani dojjo huasijje Jesosa baa nisho. Dobiqui majje Jesosa chama' ba ca'ya cua. ⁴Majoya quea mete nee nee po'ya cua Jesosa chama' ba majje. Ma mete'yoquija aje eponaa beca esohuidojoji dejja jayojja ba ca cua o pejjejo nequi. Ojaya daqui quea oshe nee nee, quea siyo nee nee cua. ⁵Epona cuana quea mete nee nee cua; ecoja cahui cua quea cojja sajaja jjejojo. Majoya aje esohuidojojiya jama huohuime aca cua ba'a: —¿Yajjajo

acuaeaya miquianaya sa'ajjaña Jesosa jiquiojo so'o? ¿A'a emano'yo poso? Chojja, oya shequi'yonaje. ¡Chama'yo ca jja ca jiquiojo! ¡Oya ca jja ca eshe nequi'yo! ⁶ ¿A'a jja miquianaaya Jesosaja esohui pajea'yonaje ma ohua yahuajo huohui ca cua Janinea meshijo nequiahuua? ⁷ Jesosa yahuajo pishana, mano'yo jjimahua, jama cua ba'a: "Mimishi cuaa eya mano mee caje'yo acui ecueata'apeejo. Pea beca peejiima cahuime po majje shequije'yo" jamaya cua Jesosa mano'yo jjimahua. Jamajjeya ja'a quea mete pojji! —jamaya aca cua esohuidojijiya.

⁸ Ma esohui shajja'ajja majje epona cuaa Jesosaja esohui shahuaba ca'ya cua. ⁹ Majoya aje poqui cuajicuaji'ya cua pea cuana huohui'yohua. Huohui cañaquia cua o shajja'ajjajji cuana, ojjaña cuana pea'ai Jesosa shequi'yonajejo. ¹⁰ Mania Madanena, pea Mania Jacoboja nae, Huana, pea epona cuana pea'ai poquia cua huohui po'yohua. ¹¹ O shajja'ajjajji cuaa epona cuana ohua huohui cajje, jama aca cua ba'a: —Epona cuana, siajje mi ca cuani Jesosa eshequi'yojo miame. Miquianajaya esohui shajja'ajja sa po ajja ca iña —jamaya cuaa aca cua.

¹² Peno ca ca quea cuejipashi nei poquia cua mei jjani yasijje ba'ajja'yohua. Bañaqui majje mei jjani ye'e'ajja cañaquia cua ma Jesosa jaa cuajo. Ba ca cua o bebojji oe ani, oja jeajjeana'yo jja oe ania cua.

—De, chama'yo Jesosa yaña, de —jamaya Peno cua. Jamaya po majje poqui o'oya cua equi yasijje. Poquianijo oya jjashahuubaquia cua Jesosajo. Ojaya ba jjima; jamajjeya jama cua ba'a: ¿Yajja shai po'yonaje Jesosa? —jamaya cua Peno.

**Becanejjiji peal'ai o shajja'ajjajjiya Jesosa ba ca cua Emao jiojjiji
poquijeya**
(Macoso 16.12-13)

¹³ Oya pojjajo tii, becanejjiji peal'ai o shajja'ajjajji cuana poquia cua Emao cuiñajji yasijje. Quea huesha pishana cua Jenosanena ebañaquijji. ¹⁴ Jesosa emano'yo niñeba ca poquia cua. ¹⁵ O mimi poquijejo Jesosa jjanequichipiquia cua onijke. Jjanequichipi qui majje onijke poquia cua. ¹⁶ Jesosa ba majje ba tai ca'yonaje, pea dejja posoya aca cuaa cua. ¹⁷ Majoya aje Jesosaa jama huohui'ajjame aca cua ba'a: —¿A'ya cuae nequiaa ca niñeba poquiae so'o?

¹⁸ Majoya Quiopasiya jama saja'ame aca cua ba'a: —¿A'a miquea eba ma onaa acanaje Jenosanenajo?

¹⁹ Majoya aje jjaja Jesosa jama cua ba'a: —¡Huohui'ajja socue mo yajja acuae mi cuanaje!

Oya jama aca cuaa cua ba'a: —Jesosa Nasanenajo ba'e. Oya quea sohui poja nee nee cuanaje. Ohuaya Eyacuiñajjiya esohui huohui cuanaje, de. Ojjaña dejja jjashahuubaquinaje ojaya esohuijo. ²⁰ Majoya Jodio etii cuaa, emeshi mese cuaa, Jesosa iña mee ca'yonaje, acui ecueata'apeejo quecuo mee ca'yonaje. ²¹ Ecuana jjashahuubaquinaje Jesosa Jodio dejja cuanaja emeshi mese epojjijo Eyacuiñajjiya huoojea'yo peal'ijo. Oya ca ca chama'yo tii po'yonaje, de. Pea

beca peejima cahuime oya emano'yoja. ²²Jiquio pojajlo mecajjeahua nei nei epona cuana poquinaje mei jjani yasijje Jesosa shaa nisho. Jjajjasoquinaje Jesosa chama'yojojo. ²³Jesosa emano'yoja ba'yo jjima cuanaje, jamajjeya cue o'oyanaje huohui po'yohua. Majoya aje pa ponaa ohuaya esohuidojiji ani ba canaje jjani dojjojo ani. Jama huohuimeya aje pa pona majoya acanaje ba'a: "Jesosa ca ca emano'yo tii pojjeama jaa, shequi'yonaje ca coma" jamaya pa pona acanaje. ²⁴Majoya epona cuaa huohui cajje poquinaje beca cuana mei jjani yasijje. Mei jjani bañaqui majje chama' Jesosa ba canaje. Ma ecua epona cuaa esohui acanaje jayojjaya cuanaje. Onajaya Jesosa eshequi'yo ba'yo jjima tii cuanaje, de —jamaya mimia cua o shajja'ajjajji cuana.

²⁵Majoya aje Jesosaa jama huohuime aca cua ba'a: —Miquianaya jjashahuabaqui aija Eyacuiñajjija esohuijo. ²⁶¿A'a miquianajaya ba jjima Eyacuiñajjija huoojea'yo ebionei camanoqui'yahua? Majoya shequi'yo majje, eyahuasijje poqui majje Eyacuiñajji ebañeijje anioqueje'yo tii tii ojjañaja Emeshi Mese epo'yojji tii tii. Jamaya yahuajo tehue ca cua Eyacuiñajjija esohuijo. ¿A'a miquiaaya pajea'yonaje pojja'a? —jamaya Jesosaa aca cuana cua.

²⁷Majoya poquijeya Jesosaa oya cuana huohui ca poquia cua ojjaña Eyacuiñajjija esohui ojo. Ohuaya huohui coo ca cua Moisesija ojo oja tehue majoya pea esohui huohujji cuanaja ojo oja tehue huohui ca cua.

²⁸Majoya Emao ba cañaquia cua. Majoya aje bañaqui majje Jesosa ca jjayeje'ajjaquinana cua. ²⁹Majoya aje o shajja'ajjajji cuaa Jesosa jama aca cua ba'a: —Siña coma, jjaapoquia coma. ¡Ecuana nijje oe cahui chichacue! —jamaya cuaa aca cua.

Majoya Jesosa onijje dobiquia cua oe equi yasijje. ³⁰Majoya aje anioquea cua e'ijjia'ijjiajji. Majoya aje anioque majje Jesosaa pahui jjeshe ca cua. Pahui jjeshe majje Eyacuiñajji nijje mimia cua. Eyacuiñajji nijje mimi majje pahui miji ca cua. Majoya aje miji majje quia ca cuana cua. ³¹Pahui quia cajje Jesosa bahuejja ca'ya cuaa cua. Jama cua ba'a: —E'e de, a'a jja mi Jesosa, de. E'e jojo nei miya shequi'yonaje, de —jamaya o shajja'ajjajji cuaa aca cua.

Majoya aje Jesosa jjachamaquil'ya cua, de. ³²Majoya aje cuana jama mimime po ania cua ba'a: —E'e de, e'e jojo nei mi eyaya anaje yaña, de. Ecuea equijijji peyaanaje o shajja'ajja majje. Quea bihui nee eseya cuanaje Eyacuiñajjija esohui shajja'ajja majje.

³³Majoya aje o shajja'ajjajji cuana ocuayaya cue'ya cua Jenosanena huasijjeya mecajje tiiya. Bañaqui majje ba ca cua pea Jesosaja shajja'ajjajji cuana, 11 ejjachichaqui ani pea epeejji cuana nijje. ³⁴Pea cuaa majoya jama aca jjequia cua ba'a: —E'e jojo nei, de. Jesosa shequi'yonaje. Simohujia eba nei nei oya cuanaje.

³⁵Majoya aje Emao huasijje poqui cuaa jama huohuime aca cua ba'a: —Ecuana poquianijo Emao huasijje, oe dejja poquinaje ecuana nijje. Oya miminaje ecuana nijje, de. Majoya ecuana ijjia'ijjianaje ojee. Ohua pahui miji cajo ecuaaya oya bahuejjanaje Jesosa cuanaje, de. Oya ca ca shequi'yonaje, e'e jojo nei, de.

Jesosa ba ca cua o shajja'ajjajji cuaa*(Mateo 28.16-20; Macoso 16.14-18; Huani 20.19-23)*

³⁶ Jesosa jjapanaquia cua ona mimiani yiyesamajo. Jesosa jama cua ba'a: —¡Yani eya, de! ¡Quea bei oe pocue nequiana!

³⁷ Jesosa ba majje quea mete nee nee cua o shajja'ajjajji cuana eshahuajo poso. ³⁸ Jesosa majoya jama cua ba'a: —¿Yajjajje acuae nequiana quea mete cuani so'o? ¿Apiojji miquianaya jjashahuaba quehuaquiani? ³⁹ ¡Bacue mo oe! Ecuea eme jjoto huejja namoja quecuia huejja yani, ejiojjije pealai, de. Eyami nei jja iña iquo, eshahua pojjeama. Eshahua ca jja ca yamima', sama' pealai, de. ¡Napa'ajja socue mo, ecuea eyami; ba neineilajja socue mo!

⁴⁰ Majoya Jesosaa ojaya eme ja'a ca cua, ejiojji pealai. ⁴¹ Onaaya ca Jesosa pojjeama poso aca cua quea bihui jjejojo. Jjashahuabajeaquii jjima cua. Jamajjeya Jesosaa oya cuana huohui'ajja ca cua ejjashahuuba meequiviji jama ba'a: —¡Bacue eya, eyami nei; che mo bobi quiacie nequia! Eya ca ca eshahua pojjeama, eshahua cuana ca ca ijjial'ijjia ajja.

⁴² Majoya aje onaaya Jesosa nahuoo cuaquijo dahua quia ca cua. ⁴³ Jesosaa nahuoo ijjia ca cua, ona cojja nei aniya. ⁴⁴ Majoya ohuaya jama aca cua ba'a: —Eyaya mano'yo jjimahuaa miquianaya huohuinaje pea cuaa eya quecuia mee caje'yo. Majoya eya shequije o'oya. Jamaya Moisesija etehue'yojo, cua, Salmo etehue'yojo pea'ai huohui ca cua ejo. Ojjaña Eyacuiñajjija esohui huohuijji cuaa ejo tehue ca cua pea'ai —jamaya Jesosa cua.

⁴⁵ Majoya Jesosaa huohui ca cua Eyacuiñajjija etehue'yo ona jjabahuejjaquijji. ⁴⁶ Ohuaya jama aca cua ba'a: —Jama tehueme'ya cua ba'a: “Eyacuiñajjija huojea'yo ojjaña jaahuanajji manoj'e'yo. Mano'yo majje shequije'yo pea beca peejiima cahuime po majje. ⁴⁷ Ojjaña cuaa ojjaña meshi yasijje cahuohui ca'yahua Eyacuiñajjija esohui, ojaya epeejji epojji. Ebionei Jenosanenajo cahuohui coo ca'yahua. Eyacuiñajji nijje cajjapeequi'yahua, mimishi cuana capajea ca'yahua. Majoya pea cuiñajji cuana huasijje capoquiahua ojaya esohui huohuiya”. ⁴⁸ Jjeya nei miquianaaya eya banaje, shajja'ajjanaje jiquio esohui. Jamajjeya ja'a pajea'yojji; huohui tiitiicue! ⁴⁹ ¡Bacue oe, eyaya Edojoshahua Bame huoojeaje miquiana huasijje, miquiana quea bame ba'e meeji! Ecue Chiiya yahuajo huohui canajeya jjejojo Edojoshahua Bame huoojeaje'yo eyaya. Jamajjeya jjiquiojo tii anicue! ¡Jenosanenajo tii ishoal'ajjacue Edojoshahua Bame nei cueje eyajo ani! Ohuaya miquianaya quea jjashahuabaqui ja'a po mee caje'yo —jamaya Jesosa cua.

Jesosa poqui'ya cua eyahuasijje*(Macoso 16.19-20)*

⁵⁰ Majoya aje Jesosaa o shajja'ajjajji cuana dojo ca cua Betania huasijje. Bañaqui majje Jesosaa eme jeasohua ca cua, jama mimime cua ba'a: —¡Eniye jjapee neineiquicue! ¡Jjashahuabaquicue Eyacuiñajjijo miquianaya quea ca'a epojji!

⁵¹Majoya aje Jesosa eyahuasijje poqui'ya cua. ⁵²Oya cuana Jesosajo quea bihui nee nee po'ya cua. Majoya aje huacuayaya cue'ya cua Jenosanena huasijje quea bihui nee nee. ⁵³Majoya aje poqui majamaja nequia cua Eyacuiñajjija equi yasijje Eyacuiñajji bihuiaa.

E'e de, acua. Eyaya, Nocaa tehuejeyonaje. Mahuisoya.

HUANIYA ESOHUI QUEA PAME NEE TEHUE CANAJE JESOSA QUITOJA

JUAN

Eseya Eyacuiñajji ba meeya Jesosa Quito meshi
yasijje poeyanaje ese jayojja yamijji

1 ¹Yahuajo nei nei meshi, aquiana cuana, dejja pea'ai pana jjimahuajo, Jesosa Quito yaña tiiya poa Eyacuiñajji nijje. E'e, oya Eyacuiñajji nei neiya e'e jojo nei poa. ²E'e, oya Eyacuiñajji nijje yaña poa yahuajo nei nei meshi cuana, ojjaña aquiana cuana pana jjimahuajo. ³Eyacuiñajjiya oya pana mee ca'ya poa aquiana, meshi cuanaya, dejja, epona pea'ai, ojjaña pana ca'ya poa Jesosa Quitohua. Ojjaña aquiana pana jjima jjemo, chama' pome. ⁴E'e, oya, Jesosa Quito, yaña tiitiia poa. Ohuaya eseya Eyacuiñajji ba mee cani. Jamajjeya ohuaya ba'e tiitii mee cani eseya cuana. Eyacuiñajjiyo quea ja'a jjashahuabaqui mee cani pea'ai. ⁵Jamatii mecajje quea apo nee neejo cuaquijjiya jeaja'a cani. Jiquio ecua cuaquijji mecajje jjinequiani jama jayojja Jesosaa dejja mimishi cuana quea ja'a nee jjashahuabaqui mee cani. Eshahuaa Jesosa Quito eseya jaahuana pajea mee sa acani. Chojja. Ohuaya ojaya epeejji cuana jaahuana tiitii cani. E'e, oya cuaquijji quijjo'yo ajja jama.

Huani, Sacaniaja bacua ejja

⁶Oe dejja Jodea meshijo ba'e Huani bajjani Eyacuiñajjiya huoojea canaje Jesosa Quitojo huohuiya. ⁷Eyacuiñajjiya Huani jama acanaje ba'a: —¡Poquicue miya! Ojjaña huohuiquicue jama ba'a: “Eyacuiñajjiya huoojea'yo ma cuaquijji quijjo'yo ajja jayojja poeyani ojjaña cuana quea ja'a jjashahuabaqui meeya. Jamajjeya ¡onije jjapeequicue!”

Jamajjeya Eyacuiñajjiya Huani huoojea canaje.

⁸Oya Huani ma cuaquijiji jayojja jama pojjeama; oya ca ca oma oe poquinaje Jesosa Quitojo huohuiya, ma cuaquijiji jayojjajo huohuiya.

⁹Eyacuiñajjiya Jesosa huoojea canaje meshi yasijje. Ohuaya ojjaña cuana quea ja'a jjashahuubaqui mee caje Eyacuiñajjiyo. ¹⁰E'e, oya ma cuaquijiji jayojjaya poeyanaje dejja cuana nijje ba'eya. Yahuajo ohuaya meshi cuana, dejja cuana pea'ai pana ca'y poa. Jamatii oya dejja cuanaja ba jjima ojjaña cuana pana'yoji epo. ¹¹E'e, oya poeyanaje Jodea meshi yasijje, ojaya huapa pojjeama cuana huasijje. Jamatii oya cajaa acanaje beca cuaa: —;Chojja, oya Eyacuiñajji bameejji pojjeama! —poso beca cuaa acanaje.

¹²Beca cuaa ca ca Jesosa Quitoja esohui shajja'ajja canaje. Ojo jama acanaje ba'a: —E'e jojo nei oya Eyacuiñajji ese bameejji poani —acanaje beca cuaa.

Jamaya jjashahuabauquianijo, Jesosaa oya cuana Eyacuiñajjiya bacua cuana po mee canaje jama ba'a: ¹³Yahuajo eseja ejejjijiya eseya jea ca poa; eseja enaeseya eseya mejo ca poa. Jamajjeya eseya cuayani ese ejjaja bacua, Eyacuiñajjiya bacua pojjeama. Eyacuiñajjiya ca ca eseya oja bacua a sa acanijo ohuaya ohuaye nei eseya oja bacua po mee cani.

Esohui quea bihui nee Jesosa Quitojo

¹⁴Jamajjeya oya Eyacuiñajji ese ba meeya poeyanaje yamijji, ese cuana nijje ba'eya. Ecuanaa oya banaje quea ca'a nee nee. Oja Chiiya oya, oja Bacua Ejja oe nei quea ca'a nee huoojea canaje meshi yasijje ese cuana jaahuana tiitijji. Ohuaya ojjaña Eyacuiñajjiya esohui e'e nei huohui canaje ojjaña huasijje pea'ai.

¹⁵Huaniya ojo huohui canaje. Majoya oya ba majje taaaanje jama ba'a: —;Bacue! Jjeya nei pea dejja quea pame nee poeje. Yahuajo nei nei e cuaya jjimahuajo oya yaña tiitiia poa Eyacuiñajji nijje. Jamajjeya oya quea ca'a nee nee; eya quea ca'a pishana —poanaje Huani.

¹⁶E'e, eseya shajjama' poani. Jamatii ohuaya ojjaña cuana quea jea nee nee atiitii cani quea pame nee nee. ¹⁷Yahuajo nei nei esohui huohuijji Moisesiya esohui Eyacuiñajjiya ehuohui'yo cuana tehue majje ba mee ca'y poa. Jesosa Quitohua, ma Eyacuiñajjiya huoojea'yo ojjaña jaahuanajjiya ca ca ojjaña cuana ba mee canaje Eyacuiñajjiya eseya cuana quea jea nee nee acani, ojaya esohui e'e nei ba mee cani pea'ai. ¹⁸Eyacuiñajji Echii Ai jjacoja ba mee equi ajja tii. Jamatii oja Bacua Ejja oe nei Eyacuiñajji nei pea'ai, Eyacuiñajji nijje nequi, oja Chii nijje tii. Ohuaya eseya Eyacuiñajji ba mee cani, oja Chii.

Huaniya, ma ona besameejji poaniya huohui canaje Jesosa Quitojo (Mateo 3.11-12; Macoso 1.7-8; Noca 3.15-17)

Huaniya, ma ona besameejji poaniya Betania cuiñajjiyo, Jodana cuei ojje mijijje nequi, ojjaña cuana Eyacuiñajjiyo besa mee canaje.

¹⁹Jamajjeya Jenosanena cuiñajjiyo ba'eya Jodio dejja etii cuaa Huani que huoojea canaje Eyacuiñajji nijje emimijji cuana, Eyacuiñajjiya equi

jaahuanajji cuana pea'ai. Huani ba majje huohui'ajja canaje: —¿A'ya cuae mi so'o? ¿A'a miya Eyacuiñajjija huoojea'yo ojjaña jaahuanajji?

20—Chojja —saja'ame acanaje Huaniya—, chojja, eya Eyacuiñajjija huoojea'yo ojjaña jaahuanajji pojjeama. Eya ca ca iña Quito pojjeama —poanaje.

21—Jamajjeya ¿a'ya cuae mi oe so'o? —huohui'ajja canaje—. ¿A'a miya Enia, Eyacuiñajjija esohui huohuijji yahuajo ba'ya poa?

—Chojja —saja'ame acanaje Huaniya—. Eya Enia pojjeama.

Jamajjeya huohui'ajja ca o'oyanaje cuaa jama ba'a: —E'e. Yahuajo Moisesiya huohui ca poa Eyacuiñajjija pea esohui huohuijji nei poeje. ¿A'a miya ma esohui huohuijji neiya?

—Chojja —Huaniya acanaje.

22 Jamajjeya Jodio cuaa Huani huohui'ajja ca o'oyanaje: —¿A'ya cuae mi oe? ¿A'ya cuae mi poani so'o, de? ¡Huohuicue mo oe! Jodio etii cuaa ecuana huoojea canaje mi baa. ¿Yajja huohuiñaqui'yome acuae oe aje o que poqui o'oya majje so'o?

23 Jamajjeya Huaniya saja'a canaje jama ba'a: —Yahuajo nei nei Eyacuiñajjija esohui huohuijjiya Isaiaa ejo huohui ca poa jama ba'a:

“Quijje esohui huohuijji poeje esohui huohuiya. Meshi quimajo huohui huicha'a huicha'a caje jama ba'a: “Emeshi mese nei poeje. ¡Jamajjeya oe apoa pocuajicue! ¡Jamajje o poeyajo, ojaya esohui quea ja'a nee shajja'ajja neinei'yocue!”

Jamaya aca'ya poa Isaiaa yahuajo —Huani poanaje.

24-25 Jamajoya ma Jodio dejja cuanaa Huani huohui'ajja ca o'oyanaje: —¿A'a ele jojo nei miya Eyacuiñajjija huoojea'yo ojjaña jaahuanajji pojjeama? ¿A'a cuae mi Enia pojjeama, ma Eyacuiñajjija esohui huohuijji yahuajo ba'ya poa pojjeama so'o? ¿A'a cuae mi Eyacuiñajjija pea esohui huohuijji nei, ma ecuanaja etiiquiaa ishoa'ajja caninaje pojjeama so'o? ¿Achajjajo acuaeaya oe miyaya ecuana, Jodio cuana, besa meeña Eyacuiñajjijo so'o? —poanaje cuana.

26 Huaniya jama acanaje ba'a: —Eyaya miquianaya Eyacuiñajjijo besa meeña cuei enajo. Pea dejja jiquio tijio nequi. Jjeya oya miquianajaya ba jjima. 27 Oya quijje pishana miquianajaya eba poaje Eyacuiñajjija huoojea'yo ojjaña jaahuanajji. Oya ca ca oe nei quea ca'a nee nee nequi. Eya ca iña quea ca'a nee pishana.

Jamajjeya aje oe eya Jesosa Quito cojja neijo nequi sa po ajja. Eya quea bicho, de.

28 Jamaya poanaje Huani Betaniajo, Jodana cuei ojje mijijje nequi, ojjaña cuana Eyacuiñajjijo besa mee canijo.

Jesosa Quito Eyacuiñajjija huoojea'yo ojjaña cuanaja mimishijo mano'yohua

29 Majoya mecahuaje Huaniya ojjaña huasijje esohui huohui ca o'oyanijo, Jesosa o que poeyanaje. Huaniya Jesosa ba majje ojjaña cuana huohui neinei canaje jama ba'a: —¡Bacue oe, oya poeyani Jesosa, Eyacuiñajjija huoojea'yo! Oya manoje'yo ojjaña cuanaja mimishi cuijea'yojji. E'e, Eyacuiñajji nijje emimijji

cuaa ñajjajja cuia majje Eyacuiñajji yasijje dahua cani oya mimishi cuanajo quene'ama epo meeiji. Ñajjajja jayojja jama poaje'yo Jesosa; manoje'yo ojjaña cuanaja mimishi cuijea neinei'yojji —Huani poanaje—. ³⁰E'e, yahuajo pishana eyaya miquianaya huohuinaje ojo jama ba'a: Jjeya nei pea dejja quea pame nee nee poeje. Yahuajo nei nei e cuaya jjimahuajo oya yaña tiiya poa Eyacuiñajji nijje. Jamajjeya oya quea ca'a nee nee; eya quea ca'a pishana —Huani poanaje.

³¹⁻³³—E'e, yahuajo oya ecuea ba jjima poa. Jamatii Eyacuiñajjiya e huoojea jjimahuajo huohui canaje jama ba'a: “¡Dejja cuana besa meecue enajje ejo! Besa meeañajo, miyaya baje oe dejja. Ecuea Edojjoshahua Pame huia' jama ma dejja sapa biajje cuabesa ba'eje; jjapashineijje ba'eoqueje'yo. Maya ecuea ecue Bacua Ejja, ecue huoojea'yo. Ohuaya ojjaña miquiana que Edojjoshahua Pame dobiqui mee caje'yo, miquiana quea ja'a nee nee ejjashahuabaqui meeiji” eya acanaje Eyacuiñajjiya —Huani poanaje.

—E'e, eyaya e'e jojo nei banaje jama ba'a: Eya Jesosa besa meeañajo, eyatahuatahua jjaca'apejoquinaje. Eyacuiñajjiya Edojjoshahua Pame huia' jama o sapa biajje cuabesa ba'enaje. Jjapashineijje ba'eoquenaje. Jamajjeya jjeya oya ecuea eba nei nei, Jesosa. Yahuajo miquianajaya oya ba jjima. Jamajoya eya poeyanaje ojjaña Eyacuiñajjiya besa meeya. Miquianaya oya Eyacuiñajjiya huoojea'yo ojjaña jaahuanajji ba meeya eya poeyanaje pealai. ³⁴Jamajjeya eyaya miquianaya huohui neineiaña: E'e jojo nei nei eyaya oya banaje. Jesosa ca ca oe e'e jojo nei Eyacuiñajjiya Bacua Ejja oe nei —poanaje Huani Jodio cuana nijje.

Jesosaa iyaa canaje beca dejja onijje e'ani tiitijji, o shajja'ajjajji

³⁵Majoya mecahuajje Huaniya, ma ona besameejji poaniya jomajo, Jodana cuei sahuajo nequiya esohui huohui canaje oja epeejji nijje, becanejjiji pe'a'i nijje. ³⁶Jesosa jjayejjequiani ba majje Huaniya oja epeejji cuana huohui canaje jama ba'a: —¡Bacue Jesosa! Oya Eyacuiñajjiya huoojea'yo. Oya manoje'yo ojjaña cuanaja mimishi cuijea'yojji.

³⁷Huanija esohui Jesosajo shajja'ajja majje oja epeejji becanejjiji pe'a'i Jesosa nijje poquinaje. ³⁸Jesosaa ejiojjiji poquijeya Huanija beca epeejji o quiquisjiji poquije bajea canaje. Ba majje huohui'ajja canaje: —Epeejji cuana, ¿ajeo miya enijje poeyani?

—Esohui huohuijji —saja'a canaje—, ecuana poeyanaje mi baa; mi shajja'ajja sa poani. ¿Achejo ba'e miya? —poanaje.

³⁹—E'e —Jesosa poanaje—, ¡ocue poe'ajja! ¡Cua'a, enijje po'yocue!

Jamajjeya Jesosa nijje poquinaje equi yasijje, o ba'e yasijje. Onijje aninaje ma pojajao, eshequi oquequiajao; o shajja'ajjajji po'yonaje oya cuana, ma bajjani ba'a: Anesi oja epeejji nijje pe'a'i. ⁴⁰E'e, Anesi pea dejja nijje Huanija ehuohui shajja'ajja majje Jesosa nijje poquinaje. Anesi ca ca Simohuija echahua mese, ma quijje bajjani canaje Penoja echahua mese. ⁴¹Jamajjeya mecajjeahua nei Anesiya oja o'i sa'ajja canaje. Ba majje huohui canaje: —O'i, eyaya Eyacuiñajjiya huoojea'yo ese jaahuanajji banaje, Jesosa Quito.

⁴²Majoya Anesiya oja o'i Simohui bajjani Jesosa que dojo canaje. Simohui ba majje Jesosaa huohui'ajja canaje jama ba'a: —Epeejji, miya ecuea eba. Miya Huanija bacua ejja, Simohui bajjani. Eyaya miya bajjanije'yo ecuea esohuijo Sepa bajjani —poanaje. Jienoja esohuijo Peno bajjani canaje, Ese Ejjaja esohuijo Mei bajjani.

Jesosaa iya canaje pea cuana onijje e'ani tiitiijji, o shajja'ajjajji

⁴³Majoya mecahuajje, mecajjeahua nei Jesosa poquinaje Janinea meshi yasijje, Jodana cuei ojje miji yasijje. Poqui jeahuaa Penipe ba canaje. Ba majje iyaa canaje: —Penipe, ¡jocue poe'ajja, enijje po'yocue; ecuea epeejji po'yocue! —Jesosaa acanaje; o que poquiajo ojaya epeejji pojji aca'yonaje.

⁴⁴Penipe, Peno, Anesi pealai ca ca oe Betesaida cuiñajjijo ba'e. ⁴⁵Jamajjeya Penipeya oja epeejji Natanaeni sa'ajjaqui canaje. Ba majje huohui canaje: —Ecuea epeejji, ecuanaa Eyacuiñajjija huoojea'yo ese jaahuanajji banaje. Ojo Eyacuiñajjija esohui huohuijjiya yahuajo nei nei ba'ya poaa, Moisesiya pealaiya tehue ca poa, ma ojjaña Jodio cuaa ishoa'ajja caniya. Oya Jesosa bajjani, Joseja bacua ejja, ma Nasanena cuiñajjijo ba'enaje. Eyaya maya banaje, de —poanaje Penipe.

⁴⁶—¿A'a oya Nasanenajo ba'enaje? Jomajo pa jjaja chama' dejja quea pame —poanaje Natanaeni.

—Chojja —poanaje Penipe—, ¡poecue, oya bahuacue!

⁴⁷Jamajjeya oya cuana poquinaje Jesosa baa. Majoya Natanaeni poeje ba majje Jesosa onijje miminaje jama ba'a: —E'e Natanaeni, miya Jodio e'e jojo nei. Eyacuiñajji shajja'ajjajji poani. Miya ca ca oe siajje po ajja nei nei pealai.

⁴⁸Ma shajja'ajja majje Natanaeni jama poanaje ba'a: —¿A'a eya miquea eba? ¿Ache shono acuaeya miyaya eya banaje so'o? —poanaje.

—Natanaeni, miya ecuea eba yahuajo. Penipeja iyaa jjimahuajo, iquena acui yajjanajo ani eyaya miquea ejjashahuabaquijji banaje —Jesosa poanaje.

⁴⁹Jamajjeya Natanaeniya acanaje: —Esohui huohuijji, e'e jojo nei miya Eyacuiñajjija Bacua Ejja oe nei poani tii. E'e, ¡miya Jodio cuanaja Emeshi Mese nei!

⁵⁰⁻⁵¹Jesosaa oya huohui canaje: —Eyaya miya huohuinaje jama ba'a: “Eyaya miya banaje iquena acui yajjanajo ani”. Jamajjeya ecuea esohui shajja'ajja majje miya jjashahuabaquinaje jama ba'a: “E'e jojo nei miya Eyacuiñajjija Bacua Ejja”. Jamajoya miyaya baje Eyacuiñajjiya eya ma dejjaja ba jjima amee caje'yo. Cuanaya Eyacuiñajjija esohuidojiji cuana nequioqueje e jaahuanaa, ojjañaja Edoe Mese jaahuanaa. Jamaya miyaya baje'yo, Natanaeni, enijje jjapeequianijo —Jesosa poanaje.

Oe dejja jjahuanaquinaje Cana cuiñajjijo

2 ¹Majoya beca cahuime po majje oe dejja jjahuanaquinaje Canajo, Janinea meshijo. Ejjahuanaquijjijo quea huiso cuana iyaa canaje ojee ijjal'ijjiaa. Jesosaja enaese Mania iyaa canaje pealai. ²Jesosa

o shajja'ajjajji cuana nijje poeyanaje pea'ai jjahuanaquije baa, ojee ijja'iijjaaa pea'ai. ³Ojee ijja'iijja anijo, acuijjajja na ishijeyo canaje cuaa. Jamajjeya Jesosaja enaese onijje miminaje jama ba'a: —Jesosa, bacue, acuijjajja na ishijeyo canaje cuaa. Oe poanaje. ¿Ae e'ishi'yojji?

⁴—Ecue nae, ¿yajjajo acuae moya huohui'ajjaña acuijjajja najo? ¡Ishoa socue oe! Quijje pishana eyaya oya cuana asahuaqe —Jesosa poanaje.

⁵Jamajjeya ojaya enaeseya echacojji cuana huohui canaje jama ba'a: —¡Jesosaja esohui jayojjaya nequia oe acue! —poanaje Mania.

⁶Jomajo me oejje oe, 6 meshimisi ena nequijji quea quemó nee nee, quea ao nee nee yani, 60 litros shojji. Ma meshimisijo ena nequia cani eme shacula huicha'a huicha'ajji. Jamaya oya cuaa acanaje ijja'iijja jjimahuajo. ⁷Jamajjeya Jesosaa echacojji cuana jama acanaje ba'a: —¡Ena shocue meshimisi ai cuana huasijke! —poanaje.

Echacojji cuana: —E'e —poanaje.

Meshimisi ai cuana huasijke ena sho canaje. Cuatajea mee canaje.

⁸Jamajjeya cuatajea cajo, Jesosaa echacojji cuana jama acanaje ba'a: —E'e. ¡Jjeya oe pojji dojocue equi mese yasijke!

Jamajjeya oe pojji dojo canaje e'ishi mee'ajjajji. ⁹Ma ena ishi'ajja canaje equi meseya. Jamatii ojaya ba jjima jiquio etehuejjajo nequi ena Jesosaa acuijjajja na pojji acanaje. Echacojji cuanaja eba ojaye nei Jesosaa etehuejjajo nequi ena acuijjajja na pojji aca'ya poa; pea cuanaja ba jjima. ¹⁰Jamajjeya equi meseya ishi majje joya ejjahuanaquijji iyaa canaje. Huohui canaje jama ba'a: —Epeejji, jiquio acuijjajja na quea pame nee nee. Pea cuaa acuijjajja na quea pame, quea biquia nee ishi mee cani ebionei. Majoya ojjaña jeje majje acuijjajja na quea biquia pishana quia cani. Miyaya ca ca oe acuijjajja na quea biquia nee, quea pame nee nee quijje nei ishi meeña —poanaje e'equi mese.

¹¹Jamaya acanaje Jesosaa Janinea meshijo, Canajo. Jamaya ohuaya ma dejaa ajjima acani acoo canaje. Ba majje ojjaña cuana jama poanaje ba'a: —E'e jojo nei Jesosa quea ca'a nee nee. Ohuaya ojjaña acani, ma dejaa ajjima acani peal'ai.

O shajja'ajjajji cuana pea'ai jama poanaje ba'a: —E'e jojo nei Jesosa Eyacuiñajjija huoojea'y ojjaña jaahuanajji, Quito.

¹²Majoya Jesosa Capenaoma huasijke poquinaje. Oja nae, oja chahua cuana, ojaya epeejji cuana pea'ai onijje poquinaje. Jomajo aninaje cuana oe pojji cahuime.

**Eyacuiñajjija equi yasijke poqui majje Jesosaa aquiana quiajji cuana
huoojeacuayajea canaje**

(Mateo 21.12-13; Macoso 11.15-18; Noca 19.45-46)

¹³Quijje pishana ojjaña Jodio cuana Jenosanena huasijke poquinaje quea bihui nee ojee ijja'iijjaaa ma shejo ba'a esohuidojoji cuaa yahuajo Ejito meshijo Jodioja ebacua cuana cui'a'y ojjaña shejo. Ma epajeal'yojji pojjeamajo

jjachichaquinaje. Jamajjeya Jesosa pea'ai poquinaje Jenosanena huasijke. Poe majje Eyacuiñajjija equi yasijke poquinaje.¹⁴ Dobiqui majje Jesosaa ba canaje quea huiso dejja cuaa aquiana quia cani; ana'ai yahue cuana, ñajjajja cuana, huia' cuana pea'ai quia cani. Beijo pea beijo sosejje quia caqui ba canaje pea'ai.¹⁵ Ba majje Jesosaa jjono ecuiasejjajeajji iña canaje. Dejja aquiana quiajji cuana, ñajjajja cuana, ana'ai cuana pea'ai cuiahuoojeacuayajea canaje esecue yasijke, ojjaña.¹⁶ Beijo pea beijo sosejje quiajji cuanaja beijo nequijji cuana jeapajjajea canaje; beijo jjahuoojojeajeaqui canaje. Huia' quiajji cuana Jesosaa huohui canaje jama ba'a: —Jiquio equi ca ca ecue Chii nijje emimijji. Aquiana quiajji pojjeama equi. ¡Miquea aquiana cuana dojo'yocue esecue yasijke! ¡A'a jja oe Eyacuiñajjija equi aquiana quiajji equi jayojja jama aiji! —Jesosa poanaje.

¹⁷ Ma ba majje ecuana, Jesosaja epeejji cuana, ojee jjashahuabaquinaje jama ba'a: —E'e, Eyacuiñajjija esohui huohuijjiya yahuajo nei nei tehue ca poa jama ba'a:

“Ecue chii, eya jjashahuaba neineiquiani miquea equi jaahuanajji.

Jamajjeya mimishi cuaa eya niñebe cani”.

Jama tehuemeya aca poa yahuajo nei. Oya cuaa Jesosajo tehue ca poa, de —poanaje Jesosaja epeejji cuana.

¹⁸ Jamajjeya Jodio cuana Jesosa nijje quea quene poanaje, oya Eyacuiñajjija huoojea'yo pojjeama posojo onijje mimijinaje jama ba'a: —¿Aya acuae mi huoojea canaje ecuana Eyacuiñajjija equijo anijo huoojeacuayajeeaa? ¿A'a cuae miya Eyacuiñajjija huoojea'yo nei? ¡Caba'ajja sahua! !Ma dejja ajiima acani a'ajja socue ecuanaja ebajji, Eyacuiñajjija e'e jojo nei miya a'a huoojea canaje ebajji!

¹⁹ Jesosaa oya cuana saja'a canaje: —¡Bacue! Miquianaa jiquio equi jeabichajea'yajo eyaya jiquio equi iyaje o'oya pea beca peejjima cahuime.

²⁰ —Chojja, de —Jodio cuana poanaje—. Quea huiso nee nee, 46 shequijame jiquio equi iya canaje cuaa. ¿Achajja acuae equi jeabichajea majje miyaya iyaje o'oya pea beca peejjima cahuime? ¡Chojja, de! —poanaje.

²¹ Jamatii Jesosa Eyacuiñajjija equijo pojjeama miminaje; ojaya eyamijo jjashahuabaquian. ²²E'e, quijje Jodio cuaa Jesosa quecua'yo majje, Eyacuiñajjiya oya shequi mee caje o'oya pea beca peejjima cahuimejo. Jamajje quijje Jesosa shequi o'oyajo, ecuana o shajja'ajjajji cuana jiquio esohuijo jjashahuabaquije. Jama poaje ba'a: —E'e de, Eyacuiñajjija esohui e'e nei; Jesosaja ehuohui pea'ai e'e nei —poaje quijje.

²³ Jamajjeya Jenosanena huasijke Jodio cuana ojee jjachichaquinaje. Quea bihui nee ijja'ijjianaje esohuidojjiya yahuajo nei Jodioja ebacua cuana cui'a'yo jjima shejo, ma pajeal'yo jjima yajji. Jesosa pea'ai Jenosanenajo animajje. Jomajo Jesosaa quea huiso ma dejja ajiima acani acanaje. Ba majje quea huiso cuana poanaje: —¡E'e jojo nei Jesosa Eyacuiñajjija huoojea'yo ojjaña jaahuanajji! —poanaje cuana.

²⁴⁻²⁵ Jamatii Jesosaja eba nei nei ojjaña dejja cuanaja ejjashahuabaquijji. Quea tai, epeejji e'e jojo nei pojjeama beca cuana. Jamajjeya ohuaya ojjaña quea ja'a nee huohui jjima jama ba'a: —E'e jojo nei eya ca iña jiquio Eyacuiñajjija Bacua Ejja —jamaya huohui jjima so'o Jesosaja.

Jesosa miminaje Nicodemo nijje

3 ¹Majoya oe dejja Jesosa que poeyanaje, oya Nicodemo bajjani. Oya Jodio etii cuana nijje pea Jodio cuana huoojeajji poani, Paniseo dejja cuana jama jjashahuabaquime poani. ²Oya, Nicodemo Jesosa que poeyanaje mecajje quehuajje. Jama acanaje ba'a: —Esohui huohuijji, Eyacuiñajjiya miya ameesahua cani ma dejja ajiima acani. Jamajjeya ecuanaja eba Eyacuiñajjiya miya huoojea canaje ecuana sohuihuohuiya.

³Jesosaa oya huohui canaje Eyacuiñajji nijje eba'e tiitii'yojjijo; jama poanaje ba'a: —Nicodemo, eyaya miya e'e jojo nei huohuaña: ¡Bacue! Jiquio ecua epona jjamejoqui majje bacua cuayani jayojja jama Eyacuiñajjiya miya cacuaya mee ca o'oyahua jiquio ecua esho'i cuayani jama. Jamajjeya Eyacuiñajjiya miya ebacua sho'i jayojja jama acaje'yo, miya ba'e tiitii mee caje'yo onijje, ojjañaja Emeshi Mese nei nijje —Jesosa poanaje.

⁴—Chojja de, ¿a'a cuae se dejja etii cuaya o'oyame so'o? —Nicodemohua acanaje—. ¿A'a cuae eseja enaeseja yone yasijje ba'edobiqui o'oya majje ebacua jama cuaya o'oyame so'o? Chojja, de —acanaje Nicodemohua.

⁵Jamajjeya Jesosaa oya huohui ca o'oyanaje: —Nicodemo, e'e jojo nei ecuea ehuohui jama ba'a: Jiquio ecua ebacua esho'i cuayani jama Eyacuiñajjiya miya cacuaya mee ca o'oyahua. Joya Eyacuiñajji shajja'ajjajji poani enajo besa mee majje, Eyacuiñajji Edojjoshahua Pameya oya quea pame jjashahuuba tiitioui mee majje pea'ai miya pea jjashahuabaquime poaje'yo. Oya Eyacuiñajji nijje ba'e tiitije'yo. Jamaya po ajjajo ca ca Eyacuiñajji nijje eba'e tiitii'yojji pojjeama eyajo. ⁶E'e Nicodemo, ojjaña cuana enaeseja mejo bacua cuayani yahueja jea, oja chii jayojja yamiji. Joya Eyacuiñajji Edojjoshahua Pameya pea jjashahuabaquime po mee ca'yani ca ca Eyacuiñajji Edojjoshahua Pame onijje nequi —Jesosa poanaje—. ⁷Eyaya miya huohuinaje e'e jojo nei ebacua esho'i cuayani jama Eyacuiñajjiya miya cacuaya mee ca o'oyahua. Jamatii a'a jama jjashahuabaquijji ba'a: “Chojja de, ¿yajja epoji?” ⁸Miyaya beni shajja'ajjaña; beni baña pea'ai acui iña dojo cani. Jamatii ache huesha beni poeani miquea ba jjima; achacua poquije miquea ba jjima pea'ai. Jiquio ecua beni achacua poquije ba jjima jayojja jama miquea ba jjima pea'aiache shono,achejo pojja'a Eyacuiñajji Edojjoshahua Pameya dejja pea jjashahuabaquime po mee ca'yani. Jamaya miquea eba pojjeama. E'e, Eyacuiñajjiya miya cacuaya mee ca o'oyahua ebacua esho'i cuayani jayojja jama —Jesosa poanaje.

⁹—E'e pojja'a. ¿Achajja acuae ebacua esho'i cuayani jayojja jama epoji so'o? —huohui'ajja canaje Nicodemohua.

¹⁰—Nicodemo, miya Jodio esohui huohuijji; Eyacuiñajjiya esohui yahuajo nei etehue'yo huohuijji. Jamajjeya ¿yajjajo miquea ba jjima ebacua esho'i cuayani jayojja jama epoji eba'ejji pea ba'eme epo'yojji? —Jesosa poanaje.

¹¹—Eyaya, Huaniya ma ona besameejji poaniya pea'ai miya e'e jojo nei huohuiaña jama ba'a: Ma ecuanaja eba poa huohuiaña pea ba'eme epo'yojjijo; ma ecuaa yahuajo banaje pea'ai huohuiaña. Jamatii miya, pea Jodio esohui huohuiji cuana pea'ai ecuanaja esohujo jama poani ba'a: "Chojja, siajje oya cuana poani". E'e, miquianaaya ecuana siajjepojji poso aña —Jesosa poanaje—. ¹²E'e, eyaya miya huohuiaña ebacua esho'i cuayani jayojja jama Eyacuiñajji Edojjoshahua Pameya miya pea jjashahuabaquime po mee caje'yo, Eyacuiñajji nijje eba'e tiitii'yojji. Jamatii ecuea esohui quea quehua miquea. Jamajjeya eyaya miya Eyacuiñajji ejjashahuubaqui'yojji eyajo huohuiajo, ¿a'a ecuea esohui quea ja'a poaje miquea? Chojja, quea quehua poaje pea'ai.

¹³¡Shajja'ajjacue ecuea esohui, Nicodemo! Dejja cuana eyahuasijje dobiqui'yo majje meshi yasijje epoe o'oyajji pojjeama ojjaña eyajo ba'e huohuuya, Eyacuiñajji ejjashahuubaqui'yojji pe'a'i epoe o'oyajji pojjeama huohuuya. Eya ma ojjaña Edoe Mese eyajo ba'e'yonaje. Eya eyajo ba'e poeyanaje meshi yasijje. Jamajjeya eyaye nei baña ojjaña eyajo, Eyacuiñajji ejjashahuubaquijji ecuea eba pea'ai —Jesosa poanaje—. ¹⁴Cuanaya eya, Eyacuiñajji huoojea'yo ojjaña jaahuanaji ba'ehuanasohuaje caje'yo cuaa. E'e, yahuajo nei nei meshi jabojo Moisesiya baa peyo jayojja acui aojo ba'ehuanasohua ca poa ojjaña ebajji; ojjaña joya peyo ijjia baa peyo jayojja ba cajo, Eyacuiñajji huaquia mee ca'ya poa. Jiquio ecua Moisesiya baa peyo jayojja ba'ehuanasohua ca poa jayojja jamaya quijke eya ba'ehuanasohuaje caje'yo cuaa acui ecueata'apeejo ojjaña mimishijo mano'yohua, mimishi cuijea'yojji sosejje. ¹⁵Jamajjeya Eyacuiñajjiya ojjaña ba'e tiitii mee caje'yo onijje, ca ejo jama jjashahuabaquiajo ba'a: "E'e jojo nei ohuaya ecuea mimishi cuijea neinei caje'yo". E'e, enijje jjapeequiijo, Eyacuiñajji quea nee nee epo mee'yojji pojjeama cuaquijo —Jesosa poanaje.

¹⁶—E'e Nicodemo —Jesosa poanaje pea'ai—, Eyacuiñajjiya ojjaña cuana ojjaña meshijo ba'e quea jea nee nee acani. Jamajjeya eya, oja Bacua Ejja oe nei huoojea canaje ojjaña mimishijo mano'yohua. Jamajjeya ojjaña joya e'e jojo nei enijje jjapeequiani Eyacuiñajjiya ba'e tiitii mee caje'yo onijje eyajo; quea nee nee epo tiitii mee'yojji pojjeama. ¹⁷Ecue Chiija eya huoojea jjima ojjaña tecueaa. Ecuea ejjashahuubaqui'yojji jama pojjeama ba'a: "Ojjaña cuana quea mimishi nee poanijo, quea nee nee po meeje'yo; quea nee tii tii". Chojja, Eyacuiñajjiya eya, oja Bacua Ejja oe nei onijje eyajo ba'ya poa meshi yasijje huoojea ca poa. Ojjaña mimishi cuijea'yo majje enijje ba'e tiitii meeje'yo —Jesosa poanaje—.

¹⁸Jamajjeya ojjaña joya e'e jojo nei enijje jjapeequiani Eyacuiñajjiya huohui caje jama ba'a: "Miquianaya ecue Bacua Ejjaja epeejji e'e jojo nei poanijo, mimishi cuijeaje'yo. Quea nee nee epo mee'yojji pojjeama cuaquijo" Eyacuiñajjiya acaje —Jesosa poanaje—. Pea cuana enijje jjapeequi aijjajo ca ca Eyacuiñajjiya yahuajo jama acaje ba'a: "Miquianaya ecue Bacua Ejja oe nei nijje jjapeequi aijjajo cajaa

aje'yo, mimishi cuana cuijea'yo jjima aje'yo. Jamajjeya quea nee tii tii poaje'yo” Eyacuiñajjiya acaje —Jesosa poanaje—.¹⁹ E'e, Eyacuiñajjiya eya, oja Bacua Ejja huoojea canaje esohui e'e nei huohuiya, ojjaña cuana quea jjashahuubaqui ja'a nee po meeaya. E'e, eya cuaquijji jayojja jama poanijo ojjaña quea jjashahuubaqui ja'a po meeje'yo. Jamatii quea huiso cuana ecuea esohui shajja'ajja sa po ajja, mimishi cuana ojaya quea boti neeojo. Quea mimishi nee ba'e, de. Jamajoya Eyacuiñajjiya oya cuana cajaa acaje'yo. Quea nee tii tii poaje'yo cuaquijo. ²⁰ Quea mimishi ba'eja boti'ama Eyacuiñajjiya esohui e'e nei; cajaa acani quea mimishi ba'yaniya jjegojo. Jamajjeya enijje jjapeequi ajja. Quea mete jjashahuubaquiani jama ba'a: “¡Jesosaa mo tecuea caje ecue mimishijo!” ²¹ Ojjaña joya quea pame nee ba'leya ca ca Eyacuiñajjiya esohui quea boti nee acani. Enijje jjapeequianijo, eyaya oya cuana quea jjashahuubaqui ja'a po meeaña. Jamajjeya oya cuana jama poani ba'a: “E'e, Eyacuiñajjiya eya quea pame ba'e meesahua cani ojaya esohui jayojja” poani —Jesosaa Nicodemo huohui canaje. Majoya Jesosa Nicodemo nijje mimipajeanaje.

Huaniya ma ona besameiji poaniya Jesosajo huohui ca o'oyanaje

²² Majoya Jesosa Jenosanenajo ani poquinaje o shajja'ajjajji cuana nijje Jodea meshi yasijke, pea cuiñajji cuana huasijke. Jomajo nequi cuana Jesosaa sohuihuohui canananaje. O shajja'ajjajjiya dejja cuana besa mee canananaje Eyacuiñajjiyo. ²³ Huaniya jomajo dejja besa mee canaje pea'ai Enoni cuiñajjiyo, Sanima cuiñajji pejjejo pea'ai ena quea doejo. Ojjaña pojjafo quea huiso dejja cuana, ponáña pea'ai Huani que poquinaje. Eyacuiñajjiyo enajo besa mee canaje. ²⁴ E'e, ma pojjafo emeshi mese Enodeja Huani jeanobia jjima poanaje. ²⁵ Jamajjeya oe Jodio dejja Huanija epeejji cuana mimicuijjeanobia canaje. Jama poanaje ba'a: —¿Ache dejja acuae mi Eyacuiñajjiyo enajo besa mee majje eseyá e'e jojo nei quea boejea po mee caje'yo so'o? ¿A'a Huaniya pojja'a? ¿A'a cuae peaa besa mee cajji, Jesosa shajja'ajjajjiya pojja'a besa mee cajji? —Jodio poanaje.

²⁶ Jamajjeya Huani que poquinaje ojaya epeejji cuana, huohui'ajja jama ba'a: —Esohui huohuijji, ma dejja joya yahuajo minijje nequinaje cuei ojje mijijje, ma ojo miyaya jama huohuinaje ba'a: “Oya Eyacuiñajjiya huoojea'yo ojjaña jaahuanajji”, maaya jjeya o shajja'ajjajji nijje onaya besa mee cani; ojjaña cuana aje oe jjeya o que poquiani. Jesosaa quea huiso nee nee Eyacuiñajjiyo besa mee cani. ¿Apiojji shai? —poanaje Huanija epeejji cuana.

²⁷ Huaniya oja epeejji cuana saja'a canaje: —¿A'a quea yeno pojji! Jamaya Eyacuiñajjiya oya pea cuana besa mee cani. Yahuajo quea huiso dejja e que poeyanaje; Eyacuiñajjiya oya cuana huoojea canaje. Jjeya ca ca ojjaña cuana Jesosa que poquiani; Eyacuiñajjiya oya cuana huoojea cani. ²⁸ Miquiaaya ecue sohui yahuajo shajja'ajjanaje. Jama poanaje ba'a: “Eya Eyacuiñajjiya huoojea'yo ojjaña jaahuanajji pojjeama. Eyacuiñajjiya eya huoojea canaje ebionei Jesosajo huohuiya”. ²⁹ E'e —Huani poanaje—, Jesosajo jama jjashahuubaquicue ba'a: Ejjahuanaquijjiyo, epona yahueja ehuanase poaje'yo. Jamatii yahueja epeejjiya

poe majje jjahuanaquiequi ba cani. Yahue ojaya ehuanase nijje mimiani shajja'ajja majje quea bihui nee poani ojaya epeejji. Jiquio ecua yahueja epeejji o ba majje quea bihui nee poani jayojja jama eya Eyacuiñajjija huoojea'yo ojjaña jaahuanajji Jesosa bajjani ba coo majje quea bihui nee nee poani; eya Jesosaja epeejji.³⁰ ¡Ojjaña cuaa oya cashajja'ajja tiitii cuaha! Quijje ca ca ojjaña cuana e que poepajeaje'ylo. Jamatii capoahua —poanaje Huani, ma ona besameejji poani.

³¹ ¡Bacue! Eyacuiñajjija huoojea'yo ojjaña jaahuanajji eyajo tii ania poa, meshi yasijje poeyanaje. Jamajjeya oya ojjaña huoojea'yojji poani tii; ohuaya e'l jojo nei Eyacuiñajjija ejashahuabaquijji ba mee cani. Huani ca ca jiquiojo anija mejo, dejjaja jea. Jamajjeya aje oe dejja, oja chii jayojjaya. Dejja jama mimiani. Jamajjeya Eyacuiñajjija esohui oe pojji ba mee cani, Huaniya. ³²Eyacuiñajjija huoojea'yo ojjaña jaahuanajji ca ca Eyacuiñajji nijje eyajo ania poa. Jamajjeya ohuaya jama huohui cani ba'a: "Eyacuiñajjija ejashahuabaquijji ecuea eba nei nei. Maya eyaya miya huohuaña". Jamatii ojaya esohui shajja'ajja sa po ajja beca cuana. ³³Ojjaña joya e'l jojo nei oya shajja'ajja sa poani ca ca jama poani ba'a: "Eyacuiñajjija esohui e'l nei; ¡Cashajja'ajja'yahua!" ³⁴E'e, Eyacuiñajjija huoojea'yo ojjaña jaahuanajjiya, Jesosaa Eyacuiñajjija esohui huohui cani e'l jojo nei. Eyacuiñajjija Edojoshahua Pameya oya huohui meesahua cani; quea ja'a nee ameesahua cani tii tii.

³⁵Eyacuiñajjiya oja Bacua Ejja quea jea nee nee acani tii. Jamajjeya oya jama poani Jesosa nijje: —Miya ecuea ecue Bacua Ejja quea jea nee nee. ¡Jamajjeya ojjaña huoojea'yojji pocue tii, meshijo, eyajo peal'ai! —poani Eyacuiñajji.

³⁶Jamajjeya ojjaña joya e'l jojo nei Jesosa nijje jjapeequiani, Eyacuiñajjija Bacua Ejja shajja'ajja cani peal'ai onijje ba'e tiitii mee caje'yo eyajo. Ojjaña joya o shajja'ajja sa po ajja ca ca onijje eba'e mee'yojji pojjeama. Eyacuiñajjiya oya cuana cajaa acaje'ylo; quea nee nee poaje'yo tii cuaquijo.

Epona Samania meshijo ba'e jjapeequinaje Jesosa nijje

4 ¹Jamajje Jesosa Jodea meshijo ani quea huiso dejja cuana o shajja'ajja a poeyanaje, Eyacuiñajjiyo besa meeya peal'ai. Jesosa nijje jjapeequinaje quea huiso nee nee. Majoya aje oe onaaya Jodio esohui huohuijji cuana, Paniseo cuana peal'ai huohui canaje jama ba'a: —Jesosaja epeejji cuana quea huiso nee nee; Huanija epeejji ca ca oe pojji —jamaya poanaje pea cuana.

Ma shajja'ajja majje Paniseo cuana quea quene poanaje Jesosa nijje. Jjashahuabaquinaje jama ba'a: —Ecuana quea huiso epeejji sa poani Jesosaja epeejji huisoajja —poanaje. ²(Jamatii Jesosa shajja'ajjajji cuaa Eyacuiñajjiyo enajo besa mee canaje cuana, Jesosa que poeyajo. Jesosaja ca ca pea cuana Eyacuiñajjiyo besa mee jjima.) ³Jamajjeya Paniseo cuana onijje quea quene ba majje Jesosa Jodea meshijo ani poqui o'oyanaje Janinea meshi yasijje, ecuana nijje poquinaje.

⁴Janinea meshi yasijje ejiojjije poquije Samania meshijo aniñaquinaje. ⁵Samania meshijo ani poqui majje Sica cuiñajji pejjejo Jesosa jomishoca aninaje ena eteohuejja quea doe pejjejo. Jomajo yahuajo nei nei Jodio

etiiquianaa Jacobohua ma meshijo que quia ca poa oja bacua ejja Jose.

6 Ma quejo yahuajo nei nei Jacobohua teo mee ca poa ena eteohuejja quea doe nee nee. Jamajjeya Jesosa ma ena eteohuejja huasijje poeyanaje eshequi biacojjajja nequijo. Jesosa hueahuea majje anioquenaje ma ena eteohuejja pejjeo ejomishocajji. 7-8 Anioque majje Jesosaa ecuana acanaje jama ba'a: —¡Poquicue miquianaya Sica huasijje bobi jjesheya!

Ecuana poquiajo oe Samania epona poeyanaje ena eteohuejja huasijje ena jjequisohuua jjonojo. Jesosaa oya huohui canaje jama ba'a: —Epona, ¡che mo ena quiacie e'ishijji! —poanaje.

9 Jodio cuanaja Samania cuana boti'ama nei. Samania cuana nijje mimi ajja, ojee ijija'ijjia ajja pea'ai Jodio pojjeama jjejojo. Jamajjeya ohuaya Jesosa saja'a canaje: —Miya Jodio dejja; eya ca ca Samania pona. Jamajjeya ¿apiojji miya enijje mimiani enajo, ena quiaggi? —poanaje Samania pona.

10—E'e —Jesosa poanaje—, eya miquea ba jjima. Eyacuiñajjiji ejjashahuabaqui'yojji quea pame nee miquea ba jjima pea'ai. Maya miquea eba jojjemo miya enijje jama mimime pome ba'a: “¡Che mo oe ena quiacie e'ishijji!” Miya jama enijje emimi jojjemo eyaya miya quiame ena naba taja'ama epo'yojji tii tii —Jesosa poanaje.

11—E'e pojja'a —epona poanaje—, ena eteohuejja quea doe nee nee nequi. Miquea chama' ena ejjequisohuajji. Jamajje ¿achejo acuae ena nequi, ma ena ishi majje eya quea naba taja po maja ajja epoiji? 12 Esejaya etiiquianaa Jacobohua jiquio ena teohuejja mee ca poa yahuajo nei. Ohuaya oja bacua cuana, oja ñajjajja cuana, pea huo cuana pea'aiya ishi mee majamaja ca poa jiquio ena. Majoya ojjañaa ecuaaya jiquio ena ishi majamajaña. ¿A'a cuae miquea pea ena eba? ¿Achejo nequi pea ena quea pame nee nee? Jacoboja ba jjima poa. Miya pojja'a quea jjashahuabaqui ja'a nee nee. ¿A'a Jacobo quea jjashahuubaqui ja'a pishana? —huohui'ajja canaje eponaa.

13—Epona —Jesosaa huohui canaje—, ojjaña miquianaya jiquiacua poeyani ena ishiya. Jamatii ishi majje quea naba taja po o'oyani. 14 Eyaya pea ena quiaje ojjañaa e'ishijji. Ma ena ishi majje quea naba taja po o'oya ajja. E'e, jjanijo ena oshe quea pame nee cuayani, huosa'yo ajja. Jiquio jayojjaya eyaya quiaje'yo. Jamajjeya eyaya miya ba'e tiitii meeje'yo —Jesosa poanaje.

15—¡Che iña maya pea ena quiacie e'ishijji! —Samania ponaa Jesosa acanaje—. Jamajjeya eya quea naba taja po ajja o'oya poaje. Jamajjeya eya jiquio ena eteohuejja huasijje epoe o'oyajji pojjeama ena jjehuua —poanaje.

16—E'e, ¡poquicue! ¡Miqueahue jjequicue! —Jesosa poanaje ma epona nijje.

17—Chama' ecueahue —saja'ame acanaje eponaa.

—E'e jojo nei jjeya miquea yahue chama' —Jesosa poanaje—. 18 Ecuea eba jama ba'a: Yahuajo miquea yahue cuana me oeje huisome poa, ojjaña jja miquea yahue ehuei poanaje. Jjeya miya pea dejjajo ba'e, miquea yahue pojjeamajo. Jamajjeya miya e'e jojo nei poani: “Chama ecueahue” —Jesosaa acanaje Samania pona.

¹⁹—E'e jojo nei ojjaña miquea eba. Jamajjeya ecuea eba miya Eyacuiñajji esohui huohuijji e'e jojo nei. ²⁰Ecuana jama poa qeua eyiyo biajje. Miquianaya, Jodio cuana ca ca jama poani ba'a: “Jenosanenajo ca ca oeya Eyacuiñajji bihuiajji, pea eyiyojo pojjeama” miquianaya poani —poanaje Samania pona.

²¹—¡Shajja'ajjacue mo, epóna! —Jesosaa oya acanaje—. Quijje pishana miquianaaya Eyacuiñajji, esejaya Chii bihuiajje, ojjaña. Jiquio eyiyo huasijje poe jjimaa, Jenosanena huasijje poqui jjimaa pe'a'i oya bihuiajje. ²²Jjeya ojaya esohui jayojja jama pojjeama aje oe miquianaaya, Samania cuua Eyacuiñajji bihuiaña. Oya miquianajaya ba jjima. Ecuanaa ca ca Eyacuiñajji bihuiaña ojaya esohui jayojja. Eya oja huoojea'yo ojjaña mimishi cuijea'yojji Jodio dejja. Jamajjeya Eyacuiñajji ecuanaja eba, Jodio cuanaja. ²³Jamajjeya jjeya nei ojjaña esejaya Chii, Eyacuiñajji bihuiajje e'e jojo nei, ojo quea ja'a nee jjashahuabaquije. E'e, Eyacuiñajji jama poani ba'a: “Jamaya eya cabihuia cahua ojjaña. Jamaya ecuea quea boti nee” poani. ²⁴Eyacuiñajji yani tii tii eshe. Jamatii oya jjaba meequi ajja ecojjaa. Jamajjeya o bihuiajji epohua Eyacuiñajji cabihuia cahua e'e jojo nei, ojaya esohui jayojja jama quea ja'a nee ojo jjashahuabaquiani —Jesosaa acanaje.

²⁵—E'e —poanaje epóna—, ecuea eba quijje Eyacuiñajji huoojea'yo ojjaña jaahuanajji poeje. Oya Quito bajjani poaje. Poe majje ohuaya ecuana quea ja'a nee ba mee caje Eyacuiñajji esohui.

²⁶—Eya ca ca iña jiquio Eyacuiñajji huoojea'yo Quito bajjani. Jjeya nei miya Quito nijje mimiani —Jesosaa acanaje.

²⁷Majoya Jesosa shajja'ajjajji cuana bobo jjeshe majje poe o'yanaje Jesosa que. Jesosa ba caña'yonaje Samania pona nijje mimiani. Ba majje jjashahuabaquinaje jama ba'a: —¿Apiojji shai Jesosa epóna nijje mimiani? —jamatii huohui'ajja jjima: —Epóna, ¿ajeo miya poeyanaje? —ajjima: —¿Jesosa, ajeo miya Samania epóna nijje mimiani? —jamaya ecuana mimi jjima Jesosa nijje poanaje.

²⁸Majoya ena jjequijji ohua acani jea canananaje epónaa, poquicuajinaje Sica huasijje huohui pohua. ²⁹Ojjaña cuana huohui cañaquinaje jama ba'a: —¡Poecuajicue oe! Oe dejja ena eteohuejja pejjejo ani; ohuaya ojjaña ecuea eba'ejji huohui ca'yonaje. ¿A'a oya pojja'a Eyacuiñajji huoojea'yo ojjaña jaahuanajji? ¡Poe'ajja! ¡Ejjaba'ajjaquiqui! —poanaje epóna.

³⁰Eponaa huohui cajje ojjaña Sicajo ba'e poqui canaje Jesosa baa.

³¹Ojjaña cuana poe jjimahuajo, ecuana, o shajja'ajjajjiya Jesosa nijje jama poanaje ba'a: —Esohui huohuijji, ¡bobi oe ijjia socue!

³²Jamatii Jesosaa jama acanaje ba'a: —Ecuea pea bobo yani ecuea e'lijjajji, ma miquea ba jjima.

³³Jamajjeya ecuana ojee miminaje: —¿A'a pojjeama oya pea cuaa bobia canaje? —poanaje.

³⁴Jesosa ecuanaja esohui shajja'ajja majje jama poanaje ba'a: —Bobi ijjiya majje miquianaya quea bei poani. Ecue Chiiya eya huoojea canaje

ojjaña jaahuanajji; ojjaña ojaya esohui ajeyo'yo majje eya quea bei poaje, bobi ijija majje jayojjaya —Jesosa poanaje—.³⁵ Miquianaya jama poani ba'a: “Quijje anoso sejjaje'yo, ebeca pee pea'ai ba'ime po majje. Eyaya ca ca miquianaya huohuaña jama ba'a: ¡Bacue! Jomajo quea huiso dejja cuana poeani. Anoso ejahua jayojjaya jama oya cuana poeani. E'e, oya cuana Eyacuiñajji jjashahuabaquiani. Onije jjapeequi'yo sa poani.

¡Jamajjeya enijke jjapeequi meesahuacue!³⁶ E'e, echacoji anoso quecuajji, anoso sejjajji pea'ai eque meseya sosequia cajji. Jamajje ojjaña quea bihui nee poaje'yo —Jesosa poanaje—. Oya jayojjaya Eyacuiñajjiya acaje ojaya echacoji cuana. Joya esohui huohuicojjii cuana sosequia caje; joya pea cuana enijke jjapeequi meesahuajji poani pea'ai sosequia caje. Enijke jjapeequiatio ba'e tiitii meeje'yo enijke eyajo. Jamajjeya ojjaña cuana quea bihui nee nee poaje'yo.³⁷ E'e, yahuajo jama poanaje cuana ba'a: “Oe echacojiya eso' quecua majje quijje pea echacojiya chicha caje'yo”. Jjeya jamaya e'e jojo nei poani.³⁸ Jjeya eyaya miya huoojeaña anoso chichajji jama, ojjaña cuana enijke jjapeequi meesahuaa. Yahuajo Eyacuiñajjiya esohui huohuijjiya oya cuana esohui ba mee canaje. Jamatii ojjaña cuana jjabahuejjaqui jjima. Jjeya miquianaaya esohui huohui o'oyajo, oya cuana ecuea epeejji e'e jojo nei poaje'yo —Jesosa poanaje ecuana nijje, o shajja'ajjajji cuana nijje.

³⁹ Majoya quea huiso nee nee Samania cuana poeyanaje Jesosa que. Oya cuana Samania eponaja esohuijo jjashahuabaquiani. Ohuaya jama acanaje ba'a: —Jiquio dejja ojjaña ecuea eba'eiji huohui ca'yonaje. E'e jojo nei jiquio dejja Eyacuiñajjiya huoojea'yo ojjaña jaahuanajji, Quito bajjani —epona poanaje.

⁴⁰ Jamajjeya Jesosa que poe majje Samania dejja cuana jama poanaje ba'a: —Esohui huohuijji, iecuana nijje che anicue!

—E'e, anije ecuana —Jesosa poanaje.

Jamajje aninaje. Beca cahuime sohuihuohui canaje.⁴¹ Jamajjeya Jesosaja esohui shajja'ajja majje ojjaña cuaa jama acanaje ba'a: —¡E'e jojo nei oya Quito! —poanaje.

⁴² Epona nijje jama poanaje: —Yahuajo miquea esohuijo ecuana beshahua nei jjashahuabaquinaje oya e'e jojo nei Quito. Jjeya ca ca oja sohui shajja'ajja majje ecuanaja eba nei nei Jesosa e'e jojo nei Eyacuiñajjiya huoojea'yo ojjaña jaahuanajji; mimishi cuijea ca'yajje aje se ba'e tiitii mee caje'yo eyajo —poanaje Samania dejja cuana.

Jesosaa jjajaqui mee ca'yonaje onaja bacua ejja beshahua nei poqui jeyoani

⁴³ Jamajjeya Samania meshijo beca cahuime ani majje Jesosa poqui o'yanaje Janinea meshi yasijje, Cana huasijje. ⁴⁴ Yahuajo Jesosaa ecuana, o shajja'ajjajji cuana jama acanaje ba'a: —E'e jojo nei pea cuaa

Eyacuiñajjija esohui huohuijji shajja'ajja cani. Jamatii ojaya cuiñajjijo ojaya huapa pojjeama cuana ca ca oe jjashajja'ajjaqui sa po'yo ajja.

Jamajjeya Jesosa jjeya Nasanena huasijje, ma o esho'yahua ba'ya poa huasijje dobiqui jjima. ⁴⁵ Jamatii Janinea meshijo ejiojjije poquianijo, Janinea dejja cuana oya ba majje jama poanaje ba'a: —Esohui huohuijji, mi poe'yajo ecuana quea bihui nee nee. Yahuajo ecuanaa miya banaje Jenosanena huasijje poqui. E'e, esohuidojooji cuaa yahuajo Jodioja ebacua cuana cuia'yo jjima shejo, Jenosanena huasijje ojee ijja'l'ijjiaa poqui ecuaaya miya banaje. Miyaya quea huiso cuana jjaajaqui mee'yonaje, ma dejja acanajjima acani anaje quea huiso pea'ai. E'e, miya Eyacuiñajjija esohui huohuijji nei nei —poanaje cuana.

⁴⁶ Jamajjeya Jesosa poqui o'oyanaje Cana huasijje, ma ohua yahuajo ejjahuanaquijjijo ena acuijjajja na pojji aca'ya poa huasijje. Canajo Jesosa aninaje ecuana nijje, o shajja'ajjajji cuana nijje. Jamajjeya oe emeshi mese neija dejja huoojeasahuajjiya Jesosajo shajja'ajja canaje: —Jesosa Jodea meshijo yahuajo ani Janinea meshi yasijje poe'yonaje. Canajo jjeya nequi.

⁴⁷ Oja bacua ejja quea mano nee nee jaa quea huesha pishana, Capenaomajo jaa. Jamajjeya maya shajja'ajja majje Jesosa que poquicuajicuinaje. Jama acanaje ba'a: —Jesosa, ¡poecuajicue Capenaoma huasijje! ¡Ecue bacua ejja jjaajaqui mee'yonaje! Quea mano nee nee jaa, beshahua nei poquijeyo jaa —poanaje.

⁴⁸ Jesosa ojjaña cuana nijje jama poanaje ba'a: —Miquiana cuana Janinea meshijo ba'e beshahua nei jjashajja'ajjaqui ajja. Eyaya ma dejja acanajjima acani mi amajamajajo, miquianaya jjashahuubaqui ajja jama ba'a: “E'e jojo nei Jesosa Eyacuiñajjija huoojea'yo ojjaña jaahuanajji” —Jesosa poanaje.

⁴⁹ —Esohui huohuijji Jesosa, jamatii —ejeajji poanaje—. ¡Poecuajicue oe, ecue bacua ejja epoquijeyo cuahuajo!

⁵⁰ —Epreejji, ¡quea bihui poquicue miquea equi yasijje! Eyaya mique bacua ejja jjaajaqui mee'yonaje; apoa poanaje —Jesosaa emanoojaaja ejeajji acanaje.

Jesosaja esohui shajja'ajja majje ebacuaja ejeajji quea bihui nee poquinaje jjashahuubaquiani jama ba'a: —E'e jojo nei Jesosa quea sohui poja nee nee; ecue bacua ejja jjaajaqui mee ca'yonaje.

⁵¹ Ojaya equi yasijje poquianijo, oja chacojjii cuana poeyanaje. O ba majje taaaanaje: —¡Miquea ebacua ejja boeca'yonaje! Quea pame nee jjeya ani'yo. Huaquia'yonaje —poanaje.

⁵² —E'e —ejeajji poanaje—, jamaya quea pame nee. ¿Ache nei eshequi nequijo acuae apoa poanaje so'o?

—Yahuajo apoa poanaje, omamecasje tii, eshequi ejjajeapaaquijo oya boeca'yonaje —poanaje echacojjii cuana.

⁵³ —E'e nei —ejeajji jjashahuubaquinaje—, omamecasje tii eshequi ejjajeapaaquijo Jesosaa eya huohui canaje jama ba'a: “Miquea ebacua ejja jjaajaqui'yonaje; apoa poanaje” —ejeajji poanaje.

Jamajje equi yasijje dobiqui majje ojaya huapa pojjeama cuana nijje jama poanaje ba'a: —E'e, Jesosaa ecue bacua ejja jjaajaqui mee ca'yonaje, boeca mee ca'yonaje. ¡Oya ca ca oe Eyacuiñajjiha huoojea'yo ojjaña jaahuanajji! —poanaje ebacuaja ejejaji.

Jamajjeya ojjaña jama poanaje ba'a: —E'e jojo nei oya Jesosa.

⁵⁴ Jamaya Janinea meshi yasijje poe o'oya majje Jesosaa Cana cuiñajjiho pea dejjaja ba jjima aca o'yanaje.

Jesosaa dejja jeo'ajja Metena ena sahuajo jaa jeo mee ca'yonaje

5 ¹Majoya quijje ojjaña Jodio dejja cuana poqui o'yanaje Jenosanena huasijje ojee ijija'ijjiaa Eyacuiñajji bihuiaa. Jamajjeya ecuanaya Jesosa nijje, o shajja'ajjajji cuana nijje pealai Jenosanena huasijje poqui o'yanaje. ²Jenosanena cuiñajji mei jijojo Ñajjajja Dobiquijji esecue yani. Ma esecue pejjejo yani ena, bae sisi jama, ebessajji, Emeo esohuijo Metena ena bajjani. Ena sahuajo yani me oeije equi sisi. ³Jomajo quea huiso emano cuana jaanaje: cojjama' cuana, jeo'ajja cuana, jiojjijajja cuana pealai. Ohuaya esohuidojoji ishoa'ajja cani; jama jjashahuubaquime poani ba'a: —E'e, Eyacuiñajjiha esohuidojojiya ena cajeaquejjo cahua. Jamajjeya eya ena huasijje nequidobiquiajo, jjaajaqui mee caje'yo.

⁴E'e, Jodio cuaa jama acanaje ba'a: —Esohuidojojiya quijje nei poe huicha'anijo ena jeaquejjo mee cani. Ena jeaquejjo cajo, ojjaña emano cuana ena huasijje canequidobi cuajquiahua. Joya ebionei besaje'yo ca ca jjaajaqui mee caje'yo, huaquia mee caje'yo pealai Eyacuiñajjiha —poanaje Jodio cuana.

⁵Jamajjeya oe dejja jomajo jeo'ajja jaanaje. Quea shequiaja huiso nee nee jaa poa, 38 shequiajame. ⁶Jesosaa poe majje ba canaje dejja emanojaa jeo'ajja. Jesosaja eba ma dejja quea shequiaja huiso nee nee jaa poa. Jamajje oya huohui'ajja canaje: —¿A'a miya jjaajaqui'yo sa poani? ¿A'a miya jeo sa poani? —Jesosa poanaje.

⁷—E'e —emanojaaa saja'a canaje—, jamatii chama' pea dejja e dojodzi ena jeaquejjo poani yasijje e besa mee'yojji. Jamajjeya eya ebionei ebesa'yojji pojjeama. Eya jjapashineijje poquianijo, pea ebionei besacuajquije —poanaje emanojaa, jeo'ajja.

⁸Jesosaa oya jama acanaje ba'a: —Epjeejji, ¡nequisohua'yocue oe! ¡Jeocue! ¡Miquea equi yasijje equipajaajji bebo majje dojo'yocue!

⁹Jjeya nei jeo'ajja jeocuajjilonaje. Jamajje nequisohua'yonaje; oja equi yasijje equipajaajji bebo majje dojo ca'yonaje; jeopoqui'yonaje. Jesosaa oya jeo mee ca'yonaje Jodioja epojja ejomishocajji. ¹⁰Jamajjeya ma dejja equipajaajji dojo cani ba majje Jodio cuana quea tecue onijje poanaje: —¡De! ¡Apiojji acuae miyaya equipajaajji dojocia so'o! ¡Jjeya epojja ejomishocajji, de! ¡Aquiana jjeya dojocia ajja! Jamaya eseja esohui huohuijji cuaa huohui cani —poanaje.

¹¹Ma dejja ejeo'yohua saja'a canaje jama ba'a: —Jamatii. Oe dejjaa eya jeo mee'yo majje jama acanaje ba'a: “¡Poquicue miya; miquea equipajaajji bebo majje dojocue!” poanaje.

12—E'e pojja'a —Jodio cuana poanaje—. “¡Miquea equipajaajji dojocue!” poanaje. ¿Ae bajjaniya acuae maya miya huohui canaje so'o? —huohui'ajja canaje.

13—Cua'l, de —saja'ame acanaje—. Ache dejja shai eya jeo mee ca'yonaje. E jeo mee'yo majje oya pea dejja quea huiso nijje poquinaje —poanaje. (E'e, dejja quea huiso nee nee jomajo ani.)

14 Quije pishana Jesosaa ma dejja oja jeo mee'yo ba ca'yonaje Eyacuiñajiji equijo. Jama huohuime acanaje ba'a: —E'e epeejji, jjeya miya quea pame nee nequi'yo, quea aja nee nequi. Jamajjeya ¡a'a quea mimishi po o'oyajji! Quea mimishi po o'oya majje mi quea mano nee nee po o'oya chana', quea tai nee nee; yahuajo jeo ajja, quea nee pishana poanaje —Jesosaa acanaje.

15 Jesosa shajja'ajja majje poqui'yonaje Jodio cuana huasijje. Huohuiqui canaje jama ba'a: —E'e, Jesosa bajjaniya eya jeo mee ca'yonaje —poanaje.

16 Jamajjeya jeo'ajja poanajeya huohui cajje Jodio cuaa Jesosa niñeba canaje; quecua'yo sa acanaje pea'ai, Jesosaa jeo'ajja cuana jeo mee ca'yonaje epojja ejomishocajjijo.

17—Ecue Chiiya quea pame nee acani tii tii epojja ejomishocajjijo pea'ai —Jesosaa oya cuana saja'a canaje—. Jamajjeya eyaya pea'ai ecue Chiiya jayojjaya jama quea pame aña ojjaña pojajjo.

18 Jamajjoya Jodio etii cuaa Jesosa quecua sa neinei acanaje. Jama huohui canaje ba'a: —Esejaya etiiquiaa yahuajo esohui tehue ca poa jama ba'a: “¡Epojja ejomishocajjijo a'a chacojji!” aca poa.

Jodio cuaa Jesosa niñeba canaje jama pea'ai ba'a: —Oya, Jesosa etiiquianaja etehue'yo jama po ajja —poanaje.

Yahuajo Jesosa Jodio nijje jama poanaje pea'ai ba'a: —Eyacuiñajji ecue Chii, de.

—Chojja, de, Jesosa siajje poani —niñebame acanaje Jodio cuaa Jesosa. Jodio cuaa jama acanaje pea'ai ba'a: —Jesosa siajje poani jama ba'a: “Eya Eyacuiñajji jayojjaya poani” siajje, de —jamaya Jodio cuaa acanaje.

¡Eyacuiñajjija Bacua Ejja Jesosa quea ca'a nee eba'e tiitii mee'yojji!

19 Jamajjeya Jesosaa ma Jodio etii cuana huohui canaje jama ba'a: —Eyaya miquianaya e'e jojo nei huohuiaña jama ba'a: Eyacuiñajjiya eya, oja Bacua Ejja oe nei huoojjea canaje; eyaya ojaya esohui jayojja jama aña. Eyaya huohuiaña ecue Chiija ejjashahuabaquijji, ecuea ejjashahuabaquijji pojjeama. Ojjaña ecue Chiiya acani ecuea eba. Jamaya ca ca eyaya aña pea'ai. E'e, ojjaña ecue Chiiya acani eyaya aña pea'ai, eya oja Bacua Ejja jjiejojoya. 20 Eya ecue Chiija quea jea nee nee. Jamajjeya eya ba mee cani ojjaña joya ohua amee sa acani huiso tii. Eyaya ma dejja ajjima acani aña ba majje miquianaya jama poaje ba'a: “E'e nei, yahuajo jamaya ajjima cuanaja poa. Chama' pea Jesosa jayojja” poaje miquianaya. 21 Jamaya ecue Chiiya eya amee caje'yo ba'a: Ecue Chiiya emanoyojaa shequi mee

ca o'oyani jayojja jama eyaya ba'e meeje o'oya, ojjaña ecue babaca'yo cuana pea'ai —Jesosa poanaje—. ²²Ecue Chijja ehuohuijji pojjeama joya ojaya epjeejji pojjeama, joya quea nee nee poaje'yo tii cuaquijo. Joya ojaya epjeejji poani ba'e tiitii mee caje'yo onijke ehuohuijji pojjeama pea'ai.

Chojja, ohuaya jama huohuime acanaje ba'a: “Ecue Bacua Ejja cahuohui cahua ecuea ejjashahuubaqui'yojji”. ²³Jamajjeya ojjaña joya ecue Chii shajja'ajjajji poaniya eye oja Bacua Ejja shajja'ajja caje'yo pea'ai. Ojjaña joya eye Eyacuiñajji Bacua Ejja shajja'ajja sa po'yo ajja Eyacuiñajji, e huoojea'yojji shajja'ajja sa po'yo ajja pea'ai —Jesosa poanaje.

²⁴—E'e jojo nei nei ecuea ehuohui minijje jama ba'a —Jesosa poanaje—: Ojjaña joya ecue sohui shajja'ajja cani, e huoojea'yojji sohui e'e jojo nei shajja'ajjajji poani pea'ai ba'e tiitii meeje'yo enijje eyajo; cuaqui yasijje epoqui'yojji pojjeama. Chojja, oya cuana yahuajo eshahuaja epjeejji poanajejo cuaqui yasijje poqui'yo quiaye. Jjeya ca ca ba'e tiitii meeje'yo enijje, ecuea epjeejji jojoya. ²⁵¡Shajja'ajjacue mo! —Jesosa poanaje—.

E'e jojo nei ojjaña shajjama' poani Eyacuiñajjiya ba cani emano'yo jayojja, epoquijeyo'yo jayojja. Jamatii ehuohui'yo ejo, Eyacuiñajjiya Ebacua Ejjajo shajja'ajja caje'yo. Ecuea esohui jayojja jama e'e jojo nei atiitii cajo, eyaya ba'e tiitii meeje'yo enijje eyajo. ²⁶E'e, Eyacuiñajji ecue Chii yani tii tii, eshe. Jamajjeya ohuaya eye, oja Bacua Ejja huoojea canaje ojjaña joya onijke jjapeequiani ba'e tiitii mee'yohua. ²⁷Cuanaya eye ojjañaja Edoe Mese poanijo Eyacuiñajjiya eye huoojea canaje jama ba'a: “¡Miyaya huohuicue joya minijje jjapeequiani ba'e tiitii meeje'yo minijje! ¡Huohuicue pea'ai joya miquea epjeejji pojjeamajo quea nee tii tii poaje'yo cuaquijo!” jamaya Eyacuiñajjiya eye acanaje —Jesosa poanaje—.

²⁸E'e, e'e jojo nei quijje ojjaña yahuajo emano'yo cuana iyaa majje eyaya oya cuana shequi meeje o'oya —Jesosa poanaje—. Ecuea esohujio ja'a jjashahuubaquijji jama ba'a: “¿Yajja yajji? ¿Achajja shai ohuaya emano'yo cuana shequi mee caje o'oya?” a'a jamaya pojji! ²⁹E'e jojo nei oya cuana eshe o'oya po mee majje ojjaña ecuea epjeejji eyaya ba'e tiitii meeje'yo enijje. Ojjaña shajjama' cuana ca ca shequi o'oya majje quea nee nee poaje'yo tii tii cuaquijo. ³⁰E'e, Eyacuiñajjiya eye huoojea canaje ojjaña huasijje huohuiya jama ba'a: “Joya ecuea epjeejji cuana poani eyaya ba'e tiitii meeje'yo enijje. Beca cuana ca ca ecuea epjeejji pojjeamajo quea nee nee poaje'yo tii tii”. Eyacuiñajjiya e huoojea majje jama acanaje ba'a: “¡Ojjaña ecuea ejjashahuubaquijji ojjaña cuana huohuiquicue!” acanaje. Eyaya ojaya esohui jayojja jama aña, ecuea ejjashahuubaqui'yojjiyo pojjeama. Jamajoya eyaya Eyacuiñajjiya ejjashahuubaqui'yojji jayojja jama añaajo ecuea esohui ojjaña e'e jojo nei —Jesosa poanaje.

Jesosa Eyacuiñajjiha huoojea'yo ojjaña jaahuanajji, oja Bacua Ejja

³¹ Majoya Jesosaa Jodio cuana huohui canaje jama ba'a: —Miquianaya ejo jjashahuaba quehuaquiani jama ba'a: "Jiquio dejja jama huohui cani ba'a: —Eya ca iña iquio Eyacuiñajjiha huoojea'yo ojjaña jaahuanajji —acani, de. Jamatii ohuaye neiyá jama huohui canijo oya ecuanaja eshajja'ajjajji pojjeama" jjashahuaba quehuaquiani miquianaya —Jesosa poanaje—.

Jamatii ecuea esohui e'le jojo nei. ³² Eya ee nei pojjeama; eya ecue Chii nijje. Ohuaya ojjaña ba mee cani eya oja huoojea'yo. Ecuea eba ojaya esohui ejo e'le jojo nei. ³³ Yahuajo miquianaaya pea cuana huoojeanaje Huani que e huohui'ajjaa. Huaniya miquianaya e'le nei huohui canaje jama ba'a: "Jesosa e'le jojo nei Eyacuiñajjiha huoojea'yo ojjaña jaahuanajji, oja Bacua Ejja oe nei" acanaje Huaniya, ma ona besameejji poaniya —Jesosa poanaje.

³⁴ —Eyacuiñajjiya Huani huoojea canaje ejo huohuiya. Eyaya miquianaya huohui o'oyaña ma Huaniya ejo huohui canaje. Jamatii miquianajaya ejjashahuabaqui'yojji ejo quea ja'a pojjeamajojo eyaya miquianaya huohui o'oyaña. Miquianaaya Huanija esohui ejo eshajja'ajja jojjemo eyaya miquianajaya mimishi cuijea'yome —Jesosa poanaje.

³⁵ —Cuaquijiji meccajje jijianiya quea ja'a ojjaña ba mee cani jayojja jama Huani poa. Ohuaya miquianaya quea ja'a nee ba mee canaje Eyacuiñajjiha esohui ejo, ma yahuajo miquea ba jjima poa. Ebionei miquianajaya oja sohui ejo quea boti nee poanaje; jamatii quijje shajja'ajja sa po'yo ajja poanaje.

³⁶ E'e —Jesosa poanaje—, Huaniya ejo huohui canaje. Jamatii oya dejja. Pea yani, ecue Chii. Ecue Chiiya miquianaya ba mee cani eya oja huoojea'yo. E'e, ecue Chiiya eya ameesahua cani ma dejjaajjima acani. Ma ajeyo'yo majje miquianaya ba meeje e'le jojo nei eya Eyacuiñajjiha huoojea'yo ojjaña jaahuanajji. ³⁷ Ecue Chiiya miquianaya ba mee cani jama ba'a: Ohuaya e'e jojo nei eya huoojea canaje. Jamatii miquianajaya oya ba jjima ecojjaja.

Miquianajaya aje oe oja mimi shajja'ajja jjima pealai. ³⁸ Ojaya esohui miquianajaya shajja'ajja jjima. Eya oja huoojea'yo. Jamajjeya miquianaya ecue sohui shajja'ajja sa po'yo ajja pealai —Jesosa poanaje—. ³⁹ Eyacuiñajjiha esohui yahuajo etehue'yo miquianaaya ba huicha'a huicha'aña, ba majamaja majje miquianaya eba'e tiitiji poso jjabaquiani. Ma esohui etehue'yo yahuajo ejo tehue ca poa. ⁴⁰ Eyaya ca ca oe eyaye nei miya ba'e tiitii meeje'yo; jamatii miquianaya enijje jjapeequi sa po ajja —Jesosaa Jodio cuana acanaje.

⁴¹ —Eya dejja mimishi jama jjashahuabaqui ajja jama ba'a: "Ojjaña dejja cuaa jamatii eya shajja'ajja caje'yo" po ajja eya —Jesosa poanaje—. ⁴² Chojja, ecuea eba miquianajaya Eyacuiñajji quea jea nee pojjeama. ⁴³ Eyacuiñajjiha, ecue Chiiya eya huoojea canaje. Jamatii miquianaya e shajja'ajja sa po ajja. Pea dejja Eyacuiñajjiha huoojea'yo nishohua huohui cani jama ba'a: "Eya quea pame nee". Ojaya esohui ca ca miquianaaya shajja'ajjaje; siajjepoji nijje miquianaya jjapeequije. ⁴⁴ Eyacuiñajji oe nei enequi tii tii. Jamatii

miquianaaya ojaya esohui jayojja jama a sa po'yo ajja, jama jjashahuabaquime po ajja ba'a: "Eyacuiñajjiya ejo jama cahuohui cahua ba'a: —E'e, miya ecuea epeejji quea pame nee —cahuohui cahua". Chojja. Jamaya miquianaya jjashahuabaqu i ajja —Jesosa poanaje—. Miquianaya jjashahuaba titiquiani jama ba'a: "Pea dejja cuana ejo jama camimiquiahua ba'a: —E'e, miya ca ca oe quea pame nee nee —capoahua onaya". Jamajjeya miquianaya enijje jama po ajja ba'a: "Jesosa, miya Quito, Eyacuiñajjiya huoojea oijaña jaahuanajji" enijje po ajja. Jamaya huohui sa po ajja miquianaya —Jesosa poanaje.

45—¡A'a eya ecue Chii ehuohuije poso pojji jama ba'a: "Oya cuana e shajja'ajja sa po'yo ajja; quea mimishi nee nee" a'a eya ehuohuije poso pojji nequiana! —Jesosa poanaje—. Chojja, ecuea miquianaya ehuohuiji pojjeama. Miquianaya Moisesija etehue'yojo jjashahuabaquiani; jamatii ojaya esohui etehue'yo ajjimajo, Eyacuiñajjiya miquianaya jama acaje ba'a: "¿Apiojji acuae quiana Moisesija etehue'yojo shajjama' poani? Miquianaya quea mimishi nee nee" quijje Eyacuiñajjiya nequiana acaje'yo —Jesosa poanaje.

46—E'e, Moisesiya ejo tehue ca poa. Jamajjeya miquianaaya oja tehue e'e jojo nei eshajja'ajja jojjemo enijje jjapeequi'yome. 47 Jamatii miquianaaya Moisesija esohui eshajja'ajja jojjemo, ojaya ehuohui etehue'yo eba pea'ai jojjemo ecuea esohui shajja'ajja'yome pea'ai —Jesosa poanaje.

Jesosaa bobia canaje quea huiso nee nee dejja, 5.000 dejja
(Mateo 14.13-21; Macoso 6.30-44; Noca 9.10-17)

6 1 Majoya Jodio dejja cuana nijje mimi majje, quijje Jesosa o shajja'ajjajji nijje, ecuana nijje Jenosanenajo ani poquinaje Janinea bae yasijke, pea bajjani Timenia bae yasijke. Bishe aijo ojje miji yasijke besapoqui o'yanaje. 2-3 Ba'eñaqui majje eyiyo huasijke jaasohuaquinaje. Anioquenaje. Yahuajo Jesosaa quea huiso acanaje ma dejja ajjima acani; quea huiso emano cuana jjaajaqui mee ca'yonaje, jjajeaqui mee ca'yonaje pea'ai. Jamajjeya o ba majje quea huiso nee nee poqui canaje jocuama, Jesosa baa. 4 Jamaya poanaje Jodio cuana Jenosanena huasijke poqui o'yonani ojee ijija'ijija'yohua esohui dojorjiya Jodioja ebacua yahuajo cuija'yo jjima shejo. Ma epajea'yoji pojjeama jjachichaquinaje. 5-6 Jamajjeya Jesosaa bajea canaje quea huiso nee nee poje. Ba majje ohuaya Penipe huohui'ajja canaje: —Penipe, ¿achacua acuae seja che bobo jjesheje so'o dejja cuana quea huiro bobiajji? —Jesosaa acanaje, Penipeya yajja huohui'ajjame acaje ejjabaquijji. Jamatii Jesosaja eba poa Eyacuiñajjiya, oja Chiiya bobo pana caje'yo dejja cuana bobiajji.

7 Penipeya saja'a canaje jama ba'a: —¿Yajja yajji? ¿Ajeo ebobiajji? Oya cuana quea huiro nee nee aña, de. 200 esodojjo quea nahue ecuanaja yani jojjemo maya oe pojji bobo jjeshemec oijaña cuanaja ijijajji —poanaje Penipe.

8 Majoya aje oe o shajja'ajjajji Anesi, Simohui Penoja chahua jama poanaje ba'a: 9—Oe esho'iya ye canaje me oeje pahui, beca nahuoo sisi

pea'ai. Jamatii maya oe pojji nei nei, de; dejja cuana quea huiso nee nee ani jejje jjima poaje —poanaje Anesi.

¹⁰Majoya Jesosaa jama acanaje ba'a: —¡Ojjaña cuana jama acue ba'a: “¡Ojjaña anioquecue sipone biajje!” acue! —Jesosaa acanaje.

Jamajje quea huiso sipone yanijo, ojjaña cuana anioque mee canaje sipone biajje. Quea huiso nee nee poanaje, 5.000 dejja; epona, esho'i cuana pea'ai sico jjima. ¹¹Majoya Jesosaa pahui me oeje huiso jjeshe majje Eyacuiñajji bihuia canaje. Eyacuiñajji nijje bobijo mimi majje pahui tepe canaje; ecuana, o shajja'ajjajji cuana quia mee canaje dejja cuana e'anioquiani yasijke. Jamaya acanaje nahuoo sisi pea'ai. Quia ca poquije quea huiso nee nee jjapanaque poquipoquinaje bobo, de. Jamajjeya ojjaña cuua ijija neinei canaje. ¹²Ojjaña jejeeajo, Jesosaa ecuana huohui canaje: —¡Chichacue bobo ojjañaja ijjiasejja! ¡A'a jeana'yojji!

¹³Jamajjeya ecuanaa chicha'yonaje pahui ojjañaja ijjiasejja. Jjepai ai yasijke iya'yonaje. Quea huiso poanaje, 12 jjepaime. Jamatii yahuajo me oeje, 5 pahui poanaje. E'e, Eyacuiñajjiya jjapanaque mee capoquipoquinaje quea huiso bobo, de. ¹⁴E'e, Jesosaa ma dejjaja ba jjima acanaje; 5.000 dejja cuana bobia canaje. Ma ba majje dejja quea huiso cuana ojee miminaje jama ba'a: —E'e jojo nei Jesosa Eyacuiñajjiya huoojea'y ojjaña jaahuanajji. Yahuajo Eyacuiñajjiya ojo huohui mee ca poa jama ba'a: “Quije eyaya miquiana huasijke huoojeaje Quito, ojjaña jaahuanajji”. ¡Cua'a, oya esejaya emeshi mese epoji ejjanequi meequi! —dejja cuana poanaje.

¹⁵Onajaya ejjashahuabaquijji ba majje Jesosaa ojjaña dejja cuana huoojea canaje equi cuana huasijke. Majoya oya quehua poquinaje. Eyiyo huasijke oe nei jaasohuaqui o'yanaje oja Chii nijje mimiya.

Jesosa bae ena biajje poquinaje (Mateo 14.22-27; Macoso 6.45-52)

¹⁶E'e, sinecua, eyiyo huasijke poqui jjimahuajo Jesosaa ecuana, o shajja'ajjajji cuana huoojea canaje: —¡Bae ojje miji yasijke bishe aijo besapoquicue! Quije eya poquije miquiana que —Jesosa poanaje.

¹⁷Jamajjeya bishe ai yasijke ani majje ecuaa yonaje. Besapoqui'ajjanaje ojje miji yasijke epoquijji, Capenaoma huasijke. Mecajje quea apo nee poanaje. Jamatii Jesosa ecuana huasijke poe jjima poanaje. ¹⁸Beni quea quemó nee nee poeyanaje. Enashajo quea quemó anicuayanaje. ¹⁹Quea huesha nee yo'ajjanaje enabae yiyesama neijo. Jomajo ecuaaya banaje Jesosa. Eyiyoje ena biajje jeojeojebeje banaje. Jesosa ba majje ecuana quea ajjajja nee nee poanaje, oya eshahua poso anaje. ²⁰Jamajjeya Jesosa ecuana nijje jama poanaje ba'a: —¡A'a quea mete pojji! Eya ca ca iña iquo, eshahua pojjeama —poanaje.

²¹Jesosa shajja'ajja majje quea jaji nee po'yonaje ecuana. Bishe ai yasijke ani mee'yonaje. Jesosa ani'yajo, bishe ai bae ojje miji yasijke ba'eñaquinaje, Capenaoma huasijke. Jomajo cahuinaje ecuana.

Ojjaña cuaa Jesosa sa'ajja canaje

²²Mecahuajje ojjaña cuana, ma Jesosaa bobia canaje cuana jjachichaqui o'yanaje bae sahua huasijke. Jama ojee miminaje ba'a: —¿Achejo shai Jesosa? Oe bishe ejaanaje, de. Jamatii Jesosa o shajja'ajjajji cuana nijje besapoqui jjima, de, yaninaje eyiyojo tii —dejja cuaa acanaje. Ojjañaja ba jjima poanaje Jesosa ena biajje jeojeopoquije.

²³Majoya pea bishe cuana Timenia cuiñajjijo ani poeyanaje. Ba'eñaquinaje bae sahuajo, jomajo yahuajo Jesosaa Eyacuiñajji bihuia majje quea huiso cuana bobia canaje. ²⁴Jamajjeya ojjaña cuana Jesosa, o shajja'ajjajji cuana pea'ai chama' ba majje bishe cuana huasijke anisohuaquinaje. Capenaoma huasijke besapoquinaje Jesosa sa'ajja'yohua.

Jesosaa esohui huohui canaje pea cahuijo, eba'e tiitii mee'yojji

²⁵Ojje miji yasijke ba'eñaqui majje oya cuaa Jesosa ba canaje. Ba majje huohui'ajja canaje: —Esohui huohuijji, ¿ache shono acuae mi jiquiacua poeyanaje so'o ba'a? —poanaje.

²⁶Jesosaa oya cuana saja'a canaje quea yeno jama ba'a: —Miquianaya ejo jjashahuubaqui ajja jama ba'a: "E'e, Jesosa ma dejaja ba jjima acanaje; jamajjeya oya e'e jojo nei Eyacuiñajjija huoojea'yo ojjaña jaahuanajji". Chojja, miquianaya jama ejashahuaba meequiviji pojjeama. Bobijo ca ca miquianaaya eya sa'ajjaña, bobí quea huiso ijja majje quea jejje poanajeya jjejojo. ²⁷¡A'la jjashahuuba tiitiiquijji bobijo, eba'ejjijo! Maya jjeya nei oe poani. Sho caje o'oya. ¡Ecuea esohuijo ca ca jjashahuubaquicue oe! —Jesosa poanaje—. Maya e'e jojo nei shajja'ajjajo, eyaya miya ba'e tiitii meeje'yo enijje eyajo. Ecuea esohui pea bobí jayojja, eba'e tiitii mee'yojji. E'e, eyaya ojjañaja Edoe Meseya ma pea bobí eba'e tiitii mee'yojji quiae miquianaya, eya Eyacuiñajjija huoojea'yohua jjejojo. Eyacuiñajjija ecue Chiiya eya ma dejaja ba jjima amee cani; pahui jjapana meequei canaje miquiana bobajji. Jamajoya miquea eba eya oja huoojea'yo ojjaña jaahuanajji —Jesosa poanaje.

²⁸Majoya aje dejja cuaa Jesosa huohui'ajja canaje jama ba'a: —¿Achajja acuae ecuua Eyacuiñajjija esohui jayojjaya aje'yo so'o? ¿Jamajjeya oya ecuana nijje queabihui nee poaje'yo?

²⁹Jesosaa oya cuana saja'a canaje jama ba'a: —E'e jojo nei jama acue ejo ba'a: "E'e Jesosa, miya Eyacuiñajjija huoojea'yo ojjaña jaahuanajji" jamaya acue. Jamajjeya Eyacuiñajjija queabihui nee poaje'yo miquianajo —Jesosa poanaje.

³⁰—E'e pojja'a —Jodio cuaa huohui canaje—. Jamajjeya ¡miyaya Eyacuiñajjija jayojja jama acue dejja ajiima acani! Jamajjeya ecuanaja eba poaje miya e'e jojo nei Eyacuiñajjija huoojea'yo ojjaña jaahuanajji. ¿Ae poaje miya? ¡Eyacuiñajji jayojja jama acue, Moisesiya aca poa jama oe acue!

³¹E'e, yahuajo nei meshi jabojo Eyacuiñajjija esohui huohuijjiya Moisesiya esejaya etiiquiana bobí pahui jayojja quia ca poa ojjaña pojjajo. Yahuajo nei Eyacuiñajjija Moisesi tehue mee ca poa jama ba'a: "Eyacuiñajjija Moisesija

bobi pahui sisi jayojja eyajo oque mee ca poa meshi yasijje etiiquianaja e'ijjajji" jamaya tehue ca poa —Jodio cuana poanaje.

³²—Eyaya miya e'e nei huohuaña —Jesosaa acanaje—, Moisesiya pojjeama etiiquiana quia canaje bobo. Ma eyajo aniya tii bobi oque mee canaje ecue Chiiya. Ohuaya jjeya miquianaya quia cani peabobi ma eyajo ani meshi yasijje poeyanaje. ³³E'e, jjeya nei Eyacuiñajji bobi eyajo aninaje ohuaya huoojea cani ojjaña ba'e tiitii mee'yoji —Jesosa poanaje.

³⁴—E'e, emeshi mese, ¡che ecuana jiquio bobi quiacue ojjaña pojjajo! —poanaje oya cuana.

³⁵—Eya ca ca iña jiquio bobi jayojja tiiya Eyacuiñajji huoojea'yo —Jesosa poanaje—, Eyacuiñajji huoojea'yo ojjaña jaahuanajji, ojjaña ba'e tiitii mee'yoji peabai. Jamaya eya poani. Bobi ijija majje miya quea yeno poaje o'oya, quea shoe po o'oya majje. Quea naba taja peabai poaje o'oya. Enijke ejjapeequi jjemo, e eshajja'ajja jojjemo peabai miquiana quea bihui tii po'yome, quea jejje tii jayojja nequi mee'yome —Jesosa poanaje—.

³⁶—Eyaya miquianaya huohuaña jama ba'a: Miquiaaya ecuea ma dejaa ajjima acani quea huiso cuana banaje, pahui ecue pana ijjianajejo peabai. Jamatii jjashahuabuquiani jama ba'a: "Chojja, Jesosa Eyacuiñajji huoojea'yo ojjaña jaahuanajji pojjeama, ojjaña ba'e tiitii mee'yoji pojjeama peabai" jamaya jjashahuabuquiani miquianaya, eya Quito pojjeama poso aña —Jesosa poanaje—. ³⁷Ojjaña joya ecue Chiiya ejo e'e nei jjashahuabuqui meesahua cani e que poeje'yo, enijke jjapeequije'yo tii. E que poeyajo, ecuea miquianaya cajaa yajji pojjeama. ³⁸E'e, eya eyajo ani ecue Chiiya meshi yasijje huoojea canaje. Jamajjeya eyaya ojaya ejjashahuabuqui'yojji jayojja jama aña, ecuea ejjashahuabuqui'yojji jama pojjeama —Jesosa poanaje—. ³⁹Ecue Chiiya eya niñeshe'a ca poa jama ba'a: "Ojjaña joya eyaya minijje jjapeequi meesahuaña equiyo'yojji pojjeama. ¡Ojjaña oe ba'e tiitii mee'yocue minijje! Quijje miya poe o'oya majje joya emanoy'o cuana oe shequi mee o'oyacue, eba'e tiitiil'yojji" jama eya niñeshe'ameya ecue Chiiya aca poa —Jesosa poanaje—. ⁴⁰E'e, ecue Chii jama sa poani ba'a: Ojjaña joya eya Eyacuiñajji Bacua ba majje, enijke jjapeequijo, eyaya oya ba'e tiitii meeje'yo enijke eyajo; joya emanoy'o cuana jaa peabai shequi meeje o'oya quijje poe o'oya majje —Jesosa poanaje.

⁴¹ Majoya Jodio cuua Jesosajo niñeba canaje. E'e, Jesosaa yahuajo jama acanaje ba'a: —Eya Eyacuiñajji huoojea'yo ojjaña jaahuanajji eyajo yahuajo ania poa. Ohuaya eya huoojea canaje meshi yasijje —acanaje yahuajo. ⁴²—Jamajjeya Jodio cuua Jesosa Joseja bacua ejja poso acanaje: —¡De! Oya Joseja bacua ejja pojja'a jja coma. Oja chii, ojaya enaese peabai ecuanaja eba. ¿Yajjajje oya jama poani ba'a: "Eya yahuajo eyajo ania poa; eyajo ani meshi yasijje huoojea canaje ecue Chiiya"? ¿Yajjajje shai jama poanaje oya?

Jodio cuana quea sapa ca'a jjejojo, Jesosa Joseja jeajo poso ojaya esohui shajja'ajja sa po'yo ajja.

⁴³—¡A'a eya niñebajji! —Jesosa poanaje—. ⁴⁴Beca cuana jamatii enijje ejjapeequi'yojji pojjeama. Ecue Chiiya eya huoojea canaje. Joya ohuaya beca cuana ejo e'e jojo nei jjashahuabaqui meesahua cani enijje ejjapeequijji; oya cuana ca ca oe eyaya ba'e tiitii meeje'yo enijje poe o'oya majje. ⁴⁵E'e, Eyacuiñajji esohui huohuijji cuana yahuajo nei ba'eya jama tehueme aca poa ba'a:

“Eyacuiñajji ojjaña dejja cuana, epona cuana pea'ai oja sohui ba meesahua caje'yo”.

Jamaya tehueme aca poa. Jamajjeya ojjaña joya ecue Chii shajja'ajjajji poaniya, oja sohui jama acaje'yo. Jamaya amajje enijje jjapeequije'yo pea'ai —Jesosa poanaje.

⁴⁶—Jamatii ojjaña cuanaja Eyacuiñajji ba jjima ecojjaja. Eya Eyacuiñajji nijje, ecue Chii nijje ania poa. Jamajjeya eyaya, eyaye nei, oya baña ecojjaa —Jesosa poanaje—. ⁴⁷E'e jojo nei ojjaña joya ecue Chiiya enijje jjapeequi meeshahua cani eyaya ba'e tiitii meeje'yo enijje. ⁴⁸Miquiaaya bobo ijjiaña eba'ejji. Jamajjeya eya bobo jayojjaya. Eyaya ecuea epjeeji cuana ba'e tiitii meeje'yo. ⁴⁹¡Bacue! Yahuajo nei meshi jabojo Moisesiya miquianajaya etiiquiana bobo pahui sisi jayojja quia ca poa ojjaña pojja: jamatii mano'ya poa ojjaña etiiquiana. ⁵⁰Eya miquiana nijje mimiani pea bobijo, ma Eyacuiñajji eyajo aniya huoojea canaje meshi yasijje. Maya ijjia majje ca ca mano'yo aija tii poaje'yo. ⁵¹Eya ca ca iña pahui jayojjaya, Eyacuiñajji huoojea'yo. E'e, eya yahuajo eyajo ani meshi yasijje poeyanaje dejja cuana ba'e tiitii mee'yohua. Jamajjeya jiquio ecua bobo ijjia majje miquianaya ba'yani jayojja jama eyaya dejja cuana ba'e tiitii meeje'yo. Ojjaña joya enijje e'e jojo nei jjapeequiani ba'e tiitiye'yo enijje eyajo. Eyaya ojjaña cuana enijje ba'e tiitii mee'yo sa aña. Jamajjeya eya manoje'yo ojjaña mimishi cuijea mee'yojji. Jamajoya ecuea eyami ma pea pahui jayojja jama poani —Jesosa poanaje.

⁵²—¡Chojja, de! —Jodio cuana ojee jjamimicuiae nobiajeaqueinaje—. ¿Yajja yajji ohuaya aje oe oja yami quia caje'yo bobo jayojja ecuanaja e'ijjajji, de? —poanaje.

⁵³—Eyaya miya e'e jojo nei huohuaña —Jesosa poanaje—. ¡Shajja'ajjacue! Miquiaaya ecue sohui mi shajja'ajjajo, enijje mi jjapeequiajo pea'ai, enijje eba'e tiitii mee'yojji pojjeama. Ecue sohui shajja'ajjañajo, ecue yami ijjiaña jama jayojja poani; enijje jjapeequianijo, ecuea ena' ishiaña jama jayojja poani pea'ai. ¡Jamaya pocue, ecuea epjeeji poanijo! ⁵⁴Jamajjeya ecue sohui shajja'ajjajji cuana, ecuea epjeeji nei nei cuana eyaya ba'e tiitii meeña; poe o'oya majje joya emano'yo cuana jaa pea'ai shequi meeje o'oya. ⁵⁵—¡Bacue! —Jesosa poanaje—. Miquiaaya bobo ijjiaña quea bihui nee eba'ejji. Jamaya eya manoje'yo miquiana quea bihui nee eba'e tiitii mee'yojji. Miquiaaya ena oshe ishiaña naba taja'ama epoji. Jamaya ecuea ena' cuayaquije'yo miquiana quea boejea po meeiji, cuaqui yasijje epoquijji pojjeama, enijje jjapee neineiquianijo —Jesosa poanaje.

⁵⁶—E'e —Jesosa poanaje—, jiquio ecua miquianaya quea jeje po majje quea bei nee poani jama jayojja eya miquiana cuanajo mano'yajo,

miquianaya quea bei nee poaje'yo. Ecuea ecue ena' cuayaquije'yo miquianaja mimishi cuijea'yojji, miquiana quea bei nee po mee'yojji. Jiquio ecua ena' ishi majje quea bei poani jayojja jama quea bei nee poaje enijje jjapeequi majje. Jamajjeya joya e shajja'ajja neineijji poani enijje jjapeequiani; eya onijje jjapeequiani pealai.⁵⁷ E'e, Eyacuiñajji enequi tii eshe, ecue Chii e huoojeajji epo. Eya ecue Chija ejashahuabaqui'yojji jayojja jama poanijo, ohuaya eya ba'e tiitii mee cani. Jamajjeya ojjaña joya enijje e'e jojo nei jjapeequiani eyaya ba'e tiitii meeje'yo enijje —Jesosa poanaje—.⁵⁸⁻⁵⁹ Etiiquiana yahuajo nei nei bobi Moisesija quia ijja majje jamatii mano'ya poa. Eya ca ca iña jiquio pea pahui jayojja; eya eyajo ania poa, ecue Chiiya meshi yasijje huoojea canaje. Jamajjeya ojjaña joya enijje e'e jojo nei jjapeequiani eyaya ba'e tiitii meeje'yo enijje eyajo —jamaya Jesosaa Jodio cuana sohuuhuohui canaje Capenaomajo, Jodioja equi ojee ejjachichaquijiji.

Jesosaa huohui ca o'oyanaje esohui eba'e tiitii'yojji

⁶⁰ Jesosaja esohui Capenaomajo shajja'ajja majje quea huiso dejja cuana ojee jjaniñebaquinaje jama ba'a: —¡De! Jesosaja esohui quea tai nee nee, de; shajja'ajja maja sa po'yo ajja iña, ohua oja eyami e'lijja mee ca —poanaje Jodio cuana.

⁶¹ Onajaya ejjashahuabaquijji Jesosaja eba poanaje. Jamajjeya quea huiso cuana oja esohuijo jjaniñebaquianijo, Jesosaa huohui canaje jama ba'a: —Ecuea esohuijo ¿a'la miquiana quea tai jjashahuabaquian? ¿A'la mi enijje jjapeequi pajeaje'yo? ⁶² Quijje eya ojjaña Edoe Mese, ma yahuajo eyajo ania poa, jjequisohua caje o'oya iña eyahuasijje; jiquio meshijo enequi tijji pojjeama iña. Jamajjeya aje mi oe ¿yajja jjashahuabaqui'yo acuae mi poaje'yo e jjequisohua ca'yajo? —Jesosa poanaje—. ⁶³ Eyacuiñajji Edojjoshahua Pameya pea ejjashahuabaquijji ba mee cani yahuajo jama pojjeama. Miquianaya ca ca jjashahuabaquiani bobijo, jiquio meshijo eba'ejjijo. Jamajjeya miya ba'e tiitii mee ajja enijje. Eyaya ca ca huohuiaña Eyacuiñajji ejjashahuabaquijji. Maaya miquianaya ba'e tiitii mee caje'yo, Eyacuiñajji esohuijo jjashajja'ajjaquianijo. ⁶⁴ Jamatii miquianaya quea huiso ejo jama poani ba'a: “Mi shajja'ajja sa po'yo ajja iña; minijje jjapeequi sa po'yo ajja iña” miquianaya poani —Jesosa poanaje.

E'e, yahuajo nei Jesosaja eba poa jama ba'a: “Quijje ecuea epeejji nishohhua pea cuana eya iña meesahua caje'yo onaja equecua'yojji. Quijje quea huiso cuana enijje jjapeequi ajja poaje”. Jamaya Jesosaja eba. ⁶⁵ Jamajjeya Jesosa jama poanaje pealai ba'a: —Jamajoya eyaya miquianaya yahuajo huohuinaje jama ba'a: “Beca cuana jamatii enijje ejjapeequi'yojji pojjeama. Beca cuana joya ecue Chiiya ejo e'e jojo nei jjashahuabaqui mee cani ca ca oe enijje jjapeequije'yo” eyaya yahuajo miquianaya anaje —Jesosa poanaje.

⁶⁶ Majoya ma esohui shajja'ajja majje quea huiso dejja cuana Jesosa nijje poqui pajeajonaje, o shajja'ajjajji nisho cuana. ⁶⁷ Jamajjeya

Jesosaa ecuana, o shajja'ajjajji nei, 12 cuana huohui'ajja canaje: —¿Ae poaje miquianaya? ¿A'a miya pea'ai enijje jjapeequi sa po'yo ajja poaje? —Jesosa poanaje.

⁶⁸—Ecuea Emeshi Mese —Simohui Penohua Jesosa saja'a canaje—, chama' pea mi jayojja. Miyaya ca ca oe esohui e'e jojo nei huohuaña. Mi shajja'ajjajji caya ca oe ba'e tiitii meeje'yo minijje tii. ⁶⁹Ecuana minijje e'e jojo nei jjapeequinaje. Ecuana eba miya e'e jojo nei oya Eyacuiñajjija huoojea'yo ojjaña jaahuanajji quea tame nee nee —poanaje Peno.

⁷⁰—E'e —Jesosa poanaje—. Eyaya miquianaya, 12 cuana babaca'yo majje iyaanaje; jamatii oe dejja minijje nequi ecuea epeejji nisho; oya eshuahuaja epeejji poani —Jesosa poanaje.

⁷¹ Jesosa jjashahuabaquiani Jodasajo, ma Simohui Isicanio teja bacua ejjajo. E'e, Jodasa Jesosa shajja'ajjajji 12 cuana nijje nequinaje. Jamatii quijje Jodasaa Jodio etii cuana Jesosa iña meeshahua canaje bejjo sosejje, onaja quecua'yojji.

Jesosaja echahua mese cuana o shajja'ajjajji pojjeama poanaje

7 ¹Majoya Jesosaa esohui huohui canananaje Janinea meshijo, Jodea meshijo pojjeama. Jodea meshijo Jodio etii cuaa equecua ca poaje jjejojoya mi poqui o'oyanaje.

²Quije pishana ojjaña Jodio dejja cuana Jenosanena huasijje poqui o'oyanaje equi sisi iyaa, ojee quea bihui nee ijija'ijjiaa bobi cuana chichajji shejo. ³Jamajjeya Jesosaja echahua mese cuana onijje jama poanaje ba'a: —¿A'a jja oe jiquiojo Janinea meshijo tii ani tiitiji! ¡Ecuana nijje Jodea meshi yasijje poqui o'oyacue! ¡Jocuama aje oe miyaya ma dejja ajjima acani aquicue, ojjaña mi shajja'ajjajji cuanaja ebajji! ⁴¿A'a quehuajje ajji cuiñajji sisijo! Jamaya po ajja cuana. ¡Jenosanenajo aquicue oe, ojjaña ebajji! E'e, jjeya jomajo ojjaña dejja cuana jjachichaquiani —poanaje.

⁵Jamaya huohui canaje oja chahua cuaa, Jesosa ba'y ojji muhauajo, oya Eyacuiñajjija huoojea'yo ojjaña jaahuanajji pojjeama poso acanaje.

⁶Jamajjeya Jesosaa oja chahua cuana huohui canaje jama ba'a: —Chojja, eya Jenosanena huasijje poqui o'oya jjima so'o. Eya jjeya miquiana nijje epoqui jojjemo ojjaña cuaa eya shajja'ajja jjima acame. Jamatii, ¡miquianaya poqui'yo sa po majje poqui'yocue! Jomajo dejja cuana mijo jjashahuabaqui ajja. ⁷Miquianaya ojjaña dejja jayojja jama jjashahuabaquianijo, mi quecua sa po ajja cuana. Eyaya ca ca onaya jama anaje ba'a: “Miquianaya ojjaña quea mimishi poanijo, Eyacuiñajjija esohui jama po ajja” poanaje. Jamajjeya ojjaña ejo quea quene poani; quecua sa acani. ⁸¡Jamajjeya miquianaya jjeya Jenosanena huasijje poquicue quea cahui huiso ojee ijija'ijjiaa! Eya ca ca iña jjeya epoqui'yoyji pojjeama. E'e, jjeya nei miquiana nijje poqui'yajo eya shajja'ajja jjima acame cuaa —Jesosa poanaje.

⁹Jamaya huohui majje Jesosa Janinea meshijo aninaje so'o.

Jesosa Jenosanena huasijke poquinaje bobi chichajji shejo

¹⁰ Jamatii oja chahua cuana Jenosanena huasijke poqui'yajo, quijje pishana Jesosa pea'ai poquinaje. Ojjaña pea Jodio dejja cuana nijje pojjeama poquinaje; quehuajje Jenosanena huasijke poquinaje oe nei. ¹¹ Ojee ijja'iijjaia jjachichaqui majje Jodio etii cuana Jesosaja epoe'yojijo ishoa canaje quea quene. Huohui'ajja huicha'a huicha'a canaje jama ba'a: —¿Aecue Jesosa? ¿A'a cuae oya poeyanaje so'o? —acanaje.

¹² Ojjaña cuana echicha'yo pea echicha'yo cuana nijje jjapashineijke maimai aninaje Jesosajo jama ba'a: —Oya quea pame nee nee Jesosa. Siajjepoiji pojjeama —beca cuana poanaje.

—Chojja —pea poanaje—, ojjaña cuana se ca dasia cani Jesosaa. E'e, oya Jesosa siajje poani jama ba'a: “Eya ca ca iña Eyacuiñajji huoojea'yo ojjaña jaahuanajji” poani —pea Jodio cuaa acanaje, Jesosaja esohui shajja'ajja sa po ajja jjejojo. ¹³ Jamatii Jodio etii cuanajo quea mete jjejojo joya Jesosa shajja'ajjajji epo mi mimi neineinaje; jjapashineijke ojo maimainaje. ¹⁴ Jenosanenajo Jodio cuana ojee ijja'iijjani queabihui nee quea huiso cahuime, 7 cahuime. Ojee ijja'iijjani quiijje pishana beca cahuime po majje Jesosa Eyacuiñajji equi yasijke poquinaje. Equi shashajo ojjaña cuana sohuihuohui canaje. ¹⁵ Jesosaja esohui shajja'ajja majje Jodio etii cuana jama poanaje ba'a: —¡De! Ojaya eba quea huiso. ¿Achajja shai? Chama' ojaya esohui huohuijji poanaje. Esho'yahua oya dobiqui jjima de, esohui baa.

¹⁶ Jesosaa oya cuana saja'a canaje jama ba'a: —Eyaya huohuaña miquianaya ecuea esohui pojjeama. Eyacuiñajji eya huoojea canaje. Ohuaya eya huohui meesahua cani ojaya ejjashahuubaquijji. ¹⁷ Ojjaña joya Eyacuiñajji ejjashahuubaquijji jayojja jama ba'e'yo sa poaniya ba caje e'e jojo nei eyaya huohuaña Eyacuiñajji ejjashahuubaquijji, ecuea ejjashahuubaquijji pojjeama. ¹⁸ Joya beca cuaa ojaya ejjashahuubaquijji huohui cani aje oe pea cuana quea bihui po meeji jama ba'a: “Oya esohui huohuijji nei; joya shajja'ajjacue!” Jamaya amee sa acani, pea esohui huohuijji cuaa. Pea jayojja jama pojjeama eya. Eyaya ca ca pea cuana bihuia mee sa aña ca ca, ecue Chii, e huoojea'yojji epo oja sohui e'e nei huohuañajo. Jamajjeya eya edasiajji pojjeama. ¹⁹ ¡Bacue! Yahuajo nei Moisesiya miquianajaya etiiquiana cuana huasijke quia ca'y poa Eyacuiñajji esohui etehue'yo, miquianajaya ebajji. Jamatii ma esohui etehue'yo jama ba'e ajja miquianaya. Moisesija etehue'yo jayojja jama eba'e'yo jojjemo e quecua'yo sa po ajja pome —Jesosa poanaje.

²⁰ Ojjaña Jodio cuaa echicha'yo nequiya huohui canaje jama ba'a: —¿Aya acuae mi quecua'yo sa acani so'o? ¡Chojja, de, miya niñepoquiani pojja'a jja mi coma! Mi quecua sa po'yo ajja ecuanaya —siajje poanaje cuana.

²¹ Jesosaa oya cuana saja'a canaje jama ba'a: —Yahuajo eyaya ma dejjaajjima acani anaje miquea epoija ejomishocajjiyo; oe dejja jeo'ajja poa. Eyaya oya jeo mee'yonaje. Jamajjeya miquianaya ejo jama poanaje ba'a: “Ohuaya aje oe epojja

ejomishocajijo acani; equipajaaggi dojo mee cani pea'ai. Jamaya quea tai. Jamaya pojjeama etiiquianaja ehuohui'yo" miquianaya poanaje. ²²¡Bacue! Yahuajo nei nei ba'e etiiquianaa aca poa jayojja jama Moisesiya huohui ca poa jama ba'a: "¡Mique bacua huo'l nei, eshoi nei cuiishasha biso nei jehuisejjajeacue!" aca poa. Jamajjeya miquiaaya ebacua 8 cahuime poajo cuiishasha biso nei jehuisejjajeaña, jamatii epoja ejomishocajijo. ²³Jamajjeya Moisesija etehue'yo jama poanijo o miquianajaya ebacua cuiishasha biso nei jehuisejjajeaña epoja ejomishocajijo. E'e, miquianaaya pea'ai epoja ejomishocajijo chacoña. Jamajoya ¿apiojji acuae quiana enijke quea quene nee poani so'o dejja jeo'ajja jeo mee'yonajejo epoja ejomishocajijo? ²⁴¡A'a nequiaa eya niñepoqui poso aiji! Quea ja'a nee nee jjashahuubaqui majje miquea ehuohui ejo e'e jojo nei poaje, quea pame —Jesosa poanaje Eyacuiñajjija equi pejjejo nequia sohuihuohui canijo.

Jesosa e'e jojo nei Eyacuiñajjija huoojea'yo ojjaña jaahuanajji

²⁵Majoya quea huiso dejja cuana Jenosanenajo ba'eca ojee miminaje jama ba'a: —Jodio etii cuaa jiquio dejja quecua sa acani. ¿A'a e'e? ²⁶¡Bacue oe! Jjeya ohuaya ojjaña cuana sohuihuohui caqui. Jamatii oya iña jjima, mimi pajea mee jjima pea'ai, de. ¿E'e pojja'a etii cuana jjashahuubaquiani che jama ba'a: "E'e pojja'a oya Jesosa e'e jojo nei Eyacuiñajjija huoojea'yo ojjaña jaahuanajji". E'e pojja'a, de. ²⁷¡De! Ecuanaja eba jiquio dejjaja ba'ejjii; Quito poeyajo ca ca ojaya eba'ejjii ba jjima poaje cuanaja —poanaje cuana, Jesosa Nasanenajo cuaya poso aca poa.

²⁸Majoya Jesosaa Eyacuiñajjija equi pejjejo sohuihuohui huicha'a huicha'a canijo, oya cuana janobajjima nei saja'a canaje: —E'e, eya miquiaaya eba poso aña. Ecuea eba'ejjii miquiaaya eba pea'ai poso aña. Eya miquiana que jamatii poe jjima. Chojja, ecue Chiiya eya huoojea canaje. Ojaya esohui e'e nei. Oya miquianajaya ba jjima, de. ²⁹Eya onijje ania poa; ohuaya eya huoojea canaje. Jamajjeya oya ecuea eba nei —Jesosa poanaje.

³⁰Ma shajja'ajja majje Jodio etii cuana oya Jesosa Eyacuiñajjija Bacua Ejja pojjeama poso acanijo quea quene nee poanaje, iña sa acanaje. Jamatii iña jjima, jjeya iña mee jjima acanaje. ³¹Quea huiso dejja ejjachichaqui nequi'yo cuana jjashahuubaquiani jama ba'a: —Jesosa e'e jojo nei Eyacuiñajjija huoojea'yo ojjaña jaahuanajji.

Jama poanaje pea'ai ba'a: —E'e nei Jesosa Eyacuiñajjija huoojea'yo ojjaña jaahuanajji. Chama' pea dejja Jesosa jayojja epoe o'oyajji; ma dejja ajjima acani quea huiso acanaje ohuaye nei —poanaje cuana.

Paniseo cuaa sohuinano huoojea canaje Jesosa iñaa nisho

³²Paniseohua shajja'ajja canaje quea huiso dejja cuana jama poani ba'a: "Jesosa Eyacuiñajjija huoojea'yo ojjaña jaahuanajji". Ma shajja'ajja majje Paniseo etii cuaa, Eyacuiñajji nijje emimiji etii cuaa pea'ai Jodio sohuinano cuana huoojea canaje jama ba'a: —¡Jesosa iñaquicue ejeanobiajji! —acanaje. Ma Jodio sohuinano Eyacuiñajjija equi cuiñajji poani.

³³Majoya Jesosaa jama sohuihuohuime acanaje ba'a: —Eya minijje nequi tiitii ajja. Ecue Chiiya eya huoojea ca poa. Quijje pishana eya poquije o'oya o que. ³⁴Majoya eya sa'ajjaje'yo; jamatii eya miquianajaya eba'yojji pojjeama. Poqui meemee ajja enijje e ba'e yasijje —Jesosa poanaje.

³⁵—¿Achacua shai oya poquije'yo, jocuama ecuana epoqui'yojji pojjeama pojja'a? ¿A'a oya pojja'a poquije Jieno dejja cuana huasijje, Jodio cuana Jieno nijje ba'e cuana jjaba'echejjequiani yasijje poquije pojja'a, ojaya esohui huohuiya? —Jodio cuana ojee mimimiminaje Jesosajo.

³⁶—¿Ajeo shai Jesosa jama jjashahuabauquiani? —poanaje Jodio cuana—. “Miquiaaya eya sa'ajjaje'yo; jamatii miquianajaya eya eba'yojji pojjeama. Poqui meemee ajja ma e ba'e yasijje enijje” Jesosa poanaje, de —Jodio cuana poanaje.

³⁷Jenosanenajo Jodio cuana ojee ijjiatijjianaje quea huiso cahuime, 7 cahuime bobi chichajji shejo. Ma pojja cuanajo quea bihui nee poanaje, yahuajo ijjiatijji jjimahuajo quea bihui pishana poa. Beshahua nei ijjiapajea calyanijo, quea bihui nee nee poa. Jamajjeya beshahua nei ojee ijjiatijji pajea'yanijo Eyacuiñajjija equi pejjejo Jesosa que jjachichaqui o'yananje. Jesosa taaaanaje ojjaña huasijje jama ba'a: —¡Ojjaña miquianaya quea naba taja jayojja poanijo, poecue e que, ecuea e'ishiji ishiya! Enijje jjapeequi sa neinei poanijo quea naba taja jayojja jama poani; jamajjeya eyaya miquianaya ba'e tiitii meeje'yo ecuea esohui e'e jojo nei shajja'ajjañajo. ³⁸Jiquio ecua ena eteohueja cuayani tii tii jayojjaya, ojjaña ishi majje naba taja'ama poani jayojja jama ojjaña joya enijje jjapeequiani eyaya ba'e tiitii meeje'yo. Majoya oya cuaa pea cuana enijje jjapeequi meesahua caje'yo pea'ai —Jesosa poanaje.

³⁹Jesosa jjashahuabauquiani jama ba'a: —Edojjoshahua Pame poeje'yo. Dobiquije'yo ecuea epeeiji cuana huasijje. Enijje jjapeequi meesahua caje'yo quea pame nee; jiquio ecua enaa caneco cuatajea cani jama jayojja quea cuata poaje Edojjoshahua Pame dobiquiajo.

Jesosa jamaya poanaje Edojjoshahua Pame ojaya epeeiji cuana huasijje dobiqui jjimahuajo. Quijje Jesosa emano'yojaa shequi o'oya majje eyahuasijje jjequisohua ca'yajo, ohuaya Edojjoshahua Pame huoojea caje ojaya epeeiji cuana huasijje.

⁴⁰Jesosaja esohui shajja'ajja majje quea huiso cuana jama poanaje ba'a: —E'e jojo nei Jesosa Eyacuiñajjija esohui huohuijji nei. Yahuajo nei Moisesiya tehue ca poa jama ba'a: “Oya poeje Eyacuiñajjija huoojea'yo ojjaña jaahuanajji poe jjimahuajo” tehue ca poa —poanaje cuana; Jesosa esohui huohuijji poso acanaje, Eyacuiñajjija huoojea'yo ojjaña jaahuanajji pojjeama poso acanaje beca cuaa.

⁴¹Pea cuana ca ca jama poanaje ba'a: —Chojja. ¡Oya ca ca oe Eyacuiñajjija huoojea'yo ojjaña jaahuanajji e'e jojo nei, de!

Jamatii pea cuana poanaje: —Chojja, Jesosa Janinea meshijo ba'e. Eyacuiñajjija huoojea'yo ojjaña jaahuanajji ca ca Janinea meshijo pojjeama cuayaje —acanaje cuaa, Jesosa Janinea meshijo Nasanenajo cuaya poso.

⁴²—Eyacuiñajjija esohui etehue'yo yahuajo jama poani ba'a: “Dabi emeshi mese yahuajo ba'ya poa Eyacuiñajjija huoojea'yo ojjaña jaahuanajji emeshi mese ojaya osecua poaje. Jamajjeya Dabija meshijo cuayaje, Benenajo, Jodea meshijo” —poanaje beca cuana.

⁴³ Jamaya ojjaña Jodio dejja cuaa mimicuiajeanobia canaje Jesosajo. ⁴⁴Beca cuaa Jesosa iña mee sa acanaje; jamatii jja'iña meequi jjima poanaje.

⁴⁵ Jamajjeya sohuinano cuana, Eyacuiñajjija equi cuiñaji, ma Paniseohua yahuajo huoojea canaje Jesosa iñaa nisho Jesosa esohui huohui poequi baqui majje huacuaya poqui'yonaje Eyacuiñajji nijje emimiji etii yasijje, Paniseo cuana pea'ai yasijje. Poeyajo, Sohuinano cuana tecuea canaje Jodio cuaa: —¿Apiojji acuae quianaja Jesosa iña jjima so'o? Ye jjima, de —poanaje.

⁴⁶—Chama' pea dejja Jesosa jayojja jama mimime. Pea dejja o jayojja mimi jjima; ojaya esohui quea pame nee nee, de —sohuinanohua saja'ame acanaje.

⁴⁷—¡De! Ohuaya aje mi oe dasia canaje pea'ai —sohuinano tecueame acanaje Paniseo cuaa. ⁴⁸ ¿A'a Jodio etii cuana, ecuana pea'ai onijje jjapeequiani? ¿A'a oya shajja'a'jjaña pea'ai ecuua? Chojja, de —Paniseo cuaa acanaje. ⁴⁹Ojjaña jiquio dejja echicha'yo nequi ca ca Moisesija etehue'yo ba jjimajo, oya cuana Eyacuiñajjiya quea nee nee po mee caje'yo cuaquijo —acanaje Paniseo cuaa, jjashahuaba taiquaniya jjejojo.

⁵⁰Nicodemo, ma yahuajo Jesosa nijje miminaje mecajje Paniseo cuana nijje pea'ai nequinaje. Jamajjeya ohuaya pea Paniseo cuana jama huohui'ajjame acanaje ba'a: ⁵¹—¡Bacue! Moisesija esohui etehue'yo yahuajo jiquio jama poanaje ba'a: “¡Oe dejja niñeba jjimahuajo, oya iyaacue! Ohuaya huohui cajje, majoya miquianaaya baje'yo oya quea mimishi pojja'a, oya mimishi'ama pojja'a”. ¿A'a e'e? —poanaje Nicodemo.

⁵²Paniseo cuaa jja oya saja'a canaje. Quea mimi tecue poanaje jama ba'a: —¿A'a miya pea'ai Janinea dejja, Janinea meshijo ba'e pea'ai? ¡Eyacuiñajjija esohui ba neineicue! Chama' poaje Eyacuiñajjija esohui huohuijji Janinea meshijo ba'ecaja, pa —poanaje Paniseo cuana.

⁵³Majoya, siniajoo ijjal'ijjia pajea majje ojjaña cuana poquinaje equi cuana huasijje cahuiya.

8 ¹Jesosa ca ca eyiyo bajjani Onimo eyiyo huasijje poquinaje. Jomajo animaje jiquio mecajje.

Jodio cuaa epona quea mimishi Jesosa que ye canaje

²Mecajjeahua Jesosa poe o'oyanaje Eyacuiñajjija equi yasijje. Quea huiso nee nee cuana o que jjachichaqui o'oyanaje. Eyacuiñajjija equi pejjejo anioque majje Jesosaa sohuihuohui ca o'oyanaje ojjaña cuana huasijje. ³Majoya Paniseo cuaa, Moisesija etehue'yo huohuijji cuaa

pea'ai epona quea mimishi ye canaje. Pea cuua oya ba canaje pea dejja oja yahue pojjeama nijje jaa, pa. Jamajjeya Paniseo cuua huohui canaje epona jama ba'a: —;Jesosa nequi cojja nei nequicue!

⁴Majoya Paniseo cuua Jesosa huohui canaje jama ba'a: —Esohui huohujji, jiquio epona quea mimishi nee poanaje. Pea dejja oja yahue pojjeama nijje jaanaje —acanaje cuua—. ⁵Moisesiya yahuajo nei jama tehueme aca poa ba'a: “Epona pea dejja oja yahue pojjeama nijje jaajo, jahahuejjajeacue meiya!” tehueme aca poa yahuajo nei. Jamajjeya, Jesosa, ¿yajja acuae miyaya epona aje so'o? —poanaje Paniseo cuana Moisesija etehue'yo jayojja ohua mi saja'a cajje Jesosa e'iña'yoji nisho jjashahuabaquinaje. ⁶E'e, jjashahuabaquinaje jama ba'a: —E'e pojja'a Jesosa Moisesija etehue'yo jayojja jama pojjeama mimije. Jamajjeya ecuana jama poaje: “Oya Jesosa ca ca oma siajjepojji; Moisesija esohui jayojja jama po ajja”.

Jamatii Jesosaa oya cuana saja'a jjima acanaje. Meshi pohuijo tehue canaje eme sisiya. ⁷Paniseo cuua eponajo huohui majamaja'ajja canaje. Jamajjeya Jesosaa Paniseo cuana cojja ba jeyojeyo neinei majje saja'a canaje jama ba'a: —;Miquianaaya joya mimishi'ama nei neiya ebionei mei jea coocue, jahahuejjajeacue pona! —poanaje.

⁸Mimi majje Jesosaa meshi pohuijo tehue ca o'yanaje. ⁹Jesosaja esohui shajja'ajja majje Jodio dejja cuana oe cuayaqui, oe cuayaqui'yonaje esecue yasijje. Ebionei edejja tii ehui dojodzi cuayaqui'ya poa; o quishishijji joya etii pishana cuayaquinaje pea'ai. Quea bicho ojjaña poanaje quea mimishi jjeojo. Epona jeana ca'yonaje Jesosa cojja neijo nequi. ¹⁰Jamajjeya Jesosaa nequisohua majje bajea canaje epona nequi; chama! Jodio etii cuana. Epona nijje jama poanaje ba'a: —Epona, ¿ae acuae ma mi tecueajji epo? ¿A'a mi mique mimishijo jahahuejjajeal'ajja ca'yonaje cuaa? —ba majje acanaje Jesosaa.

¹¹—Esohui huohujji, jaja'yoo jjima mo Jodio etii cuanaja. Poquinaje oya cuana ojjaña —poanaje epona.

—E'e epona, ecuea miya ejahahuejjajeajji pojjeama pea'ai. ¡Poquicue miya; mimishi pajea'yocue! —Jesosa poanaje epona nijje.

Majoya epona poquinaje queabihui nee.

Jesosaa ojjaña cuana Eyacuiñajji ba mee caje

¹²Majoya epona nijje mimi majje Jesosaa sohuihuohui ca o'yanaje ojjaña ejjachichaqui anica huasijje. Jama poanaje ba'a: —Jamatii quea apo nee neeya, cuaquijijiya jeaja'a cani mecajje. Oya jayojjaya eya poani. Eyaya dejja cuana jamatii quea mimishi nee nee poa quea ja'a nee jjashahuabaqui meeña Eyacuiñajji. Ojjaña joya ejo e'e jojo nei jjashahuabaquiani aje oe quea mimishi, quea apo pea'ai ba'e maja ajja. Eyaya oya cuana ba'e tiitii meeje'yo enijje —Jesosa poanaje.

¹³Jamajjeya pea Paniseo cuana Jesosa nijje mimijajinaje jama ba'a: —;De! Miyaya neiya huohuaña jama ba'a: “Eyaya dejja cuana ba'e tiitii meeje'yo” poani. Miyaye nei jama huohuañajo, ecuanaja miya

eshajja'ajjajji pojjeama. Chojja, de. Moisesiya yahuajo nei jama huohui ca poa ba'a: “¡A'a oe dejjaja ehuohui shajja'ajjajji! ¡Becanejjiji pea'aiya huohui canijo oe shajja'ajjacue!” poa —poanaje Paniseo cuana.

¹⁴ Jesosaa oya cuana acanaje jama ba'a: —E'e, eya neiya poanaje eyaya ecuea epjeejji cuana ba'e tiitii meeña. Jamaya e'e jojo nei eyaya aña. Ecuea eba ecue Chii e huoojeajji epo. ¿Achacua eya poquije o'oya? Ecuea eba, de. Jamatii miquianajaya maya ba jjima. Jamajjeya jecuea ehuohui ejo shajja'ajjacue! ¡Jamatii eyaye nei huohuañajo shajja'ajjacue! ¹⁵ Dejja mimishi cuanaja ejjashahuabaquijji jama miquianaya ejo jjashahuabaquiani, quea quehua. Eya ca ca mi jayojja jama pojjeama. ¹⁶ Jamatii eyaya dejja cuanaja eba'ejji huohuañajo, ecuea ehuohui'yo e'e nei poani. E'e, ecue Chiiya eya huoojea canaje. Ojaya ehuohui jayojja jama eyaya aña, ecuea ejjashahuabaquijji jo pojjeama. Eya ecue Chii nijje beca. Jamajjeya ecuanaja ehuohui'yo dejja cuanajo e'e nei poani. ¹⁷ Miquianajaya etiiquianaja Moisesija etehue'yo jama yahuajo poa ba'a: “Becanejjiji pea'aiya oya jayojjaya huohui cajo ¡shajja'ajjacue, miquianaaya!” jamaya tehue ca poa. ¹⁸ Eyaya miya huohuañaja jama ba'a: Eyaya Eyacuiñajjija huoojea'yo ojjaña jaahuanajjiya ecuea epjeejji cuana ba'e tiitii meeje'yo. Ecue Chiiya pealai jama miya ba meesahua cani ba'a: “Jesosa ecue huoojea'yo” ecue Chii poani —Jesosa poanaje.

¹⁹ Jamajjeya Paniseo cuaa Jesosa huohui'ajja canaje jama ba'a:
—¿Achejo acuae mique Chii ani so'o?

Jesosaa saja'a canaje jama ba'a: —Miquianajaya eya ba'yo jjima; ecue Chii miquianajaya ba'yo jjima pealai. E'e, eya miquianajaya eba jojjemo ecue Chii pealai bame.

²⁰ Jamaya Jesosaa sohuihuohui canaje Eyacuiñajjija equi pejjejo nequiya, Jodio etii cuana ojee chacochacoani pejjejo. Jamatii Jodio etii cuana Jesosaja esohui shajja'ajja majje iña jjima poanaje jja'iña meequi ajjajojo.

Jesosaa Jodio shajjama' cuana tecuea canaje

²¹ Majoya Jesosaa ojjaña cuana huohui canaje jama ba'a: —Eya minijje nequi tii ajja; quijke pishana eya poquije o'oya. Quijke miquianaaya eya sa'ajja neineije'yo miquea mimishi cuijea'yojji, mi jaahuanajji pea'ai. Jamatii miquianaya quea mimishi tii manoje'yojo, quea nee nee poaje'yo cuaquijo. Ma e poqui yani yasijje miquianaya epoquijji pojjeama —Jesosa poanaje.

²² Jamajjeya Jodio etii cuana ojee huohui'ajja canaje jama ba'a:
—¿Yajjajje oya poquije? ¿A'a oya jjayacuaqui'yo majje mano'yo sa poani pojja'a? ¿A'a jamajoya ohuaya jama acanaje ba'a: “Ma e poqui yani yasijje miquianaya epoquijji pojjeama?” —acanaje Jodio etii cuaa.

²³ Jesosa jama poanaje ba'a: —Miquianaya meshijo ba'e. Jamajjeya Edosiquiana jayojja jjashahuabaquime poani, quea tai. Eya ca ca iña eyajo ba'e, Eyacuiñajji jayojja jama eya jjashahuabaquiani. ²⁴ Jamajoya eyaya miya huohuinaje jama ba'a: “Miquianaya quea mimishi tii manoje'yojo,

quea nee nee tii poaje'yo cuaquijo". Eyaya miquianaya huohuinaje eya Eyacuiñajjija huoojea'yo ojjaña jaahuanajji. Jamatii miquianaya jjashajja'a'jjaqui ajja. Jamajjeya miquianaya e'e jojo nei manoje'yo mimishi cuijea'yo jjima tii. Quea nee nee poaje'yo tii tii cuaquijo —Jesosa poanaje.

²⁵—E'e pojja'a —Jodio etii cuana poanaje. ¿Aya acuae mi huoojea canaje so'o ecuana que? ¿Ajeo miya poeyanaje jiquiacua? —Jodio cuana poanaje.

—¡De! Aje jja mi huohui huicha'a huicha'a'ajjanaje yahuajo ehuohui cooji —Jesosa poanaje—. ²⁶Miquianaya ecuea eba quea jjashahuabaqui tai, quea mimishi poani —Jesosaa Jodio cuana acanaje—. Jamajjeya eyaya miquianaya tecueaña. Miquianaaya niñebaña ecuea ehuohui'yojo. Jamatii ecue Chiiya eya huoojea canaje; ojaya eba ojjaña; ojaya esohui e'e nei. Maya eyaya ojjaña cuana huasijje huohuiaña —Jesosa poanaje.

²⁷Jesosaja esohui oja Chiijo Jodio etii cuana ba sa po ajja. Oya cuana jjashahuabaquiani quea tai jama ba'a: —Chojja, Jesosa Eyacuiñajjija huoojea'yo pojjeama —poso acanaje Jodio etii cuaa.

²⁸Jamajjeya Jesosaa huohui canaje jama ba'a: —¡Bacue! Quijje eya, ojjañaja Edoe Mese miquianaaya ba'lehuanasohuajeaje'yo acui ecueata'apeejo. Majoya miquianajaya eba poaje jama ba'a: "Jesosa e'e jojo nei Eyacuiñajjija huoojea'yo ojjaña jaahuanajji". E'e, ojaya esohui eyaya huohuiaña, ecue Chiija. Ecuea ejjashahuabaqui'yojji ca ca eyaya huohui jjima aña. ²⁹Ecue Chiiya eya huoojea canaje. Eyaya oya queabihui po mee sa aña tii. Jamajjeya oya enijje yani tii tii, ohuaya eya jeanana'yo ajja —Jesosa poanaje.

³⁰Quea huiso Jodio cuana Jesosa shajja'ajja majje jama poanaje ba'a: —E'e jojo nei nei Jesosa Eyacuiñajjija huoojea'yo ojjaña jaahuanajji. Oja sohui e'e jojo nei —poanaje.

Eyacuiñajjija bacua cuana eshahuaa napa ajja

³¹Jamajjeya quea huiso Jodio cuana Jesosa nijje jjapeequinaje. Oya cuana Jesosaa jama acanaje ba'a: —E'e, ecuea esohui jama ba'yani tijjo miquianaya e shajja'ajjajji e'e jojo nei poani. ³²Jama poanijo ecuea esohui miquianajaya quea ja'a nee poaje'yo. Ecuea esohui e'e jojo nei poani, siajje pojjeama. Jamajjeya ecuea esohui ba neineiyajo, miquianajaya mimishi cuana pajea meeje'yo, Edosiquianaja yajjijo chaco meepeajeaje'yo peajai —Jesosa poanaje.

³³Majoya pea Jodio cuana Jesosa nijje jjapeequi ajjajo quea tecue jama poanaje ba'a: —Chojja. Amajama ecuanaja etiiquiana, de. Jamajjeya pea cuanaja ecuana ehuoojea'yojji pojjeama peaja yajjijo chacochacohua sosema! —siajje poanaje oya cuana—. ¿Yajjajje miya jama poanaje ba'a: "Eyaya miquianaya chacochaco pajea meeje'yo peaja yajjijo?" —poanaje Jodio cuana.

³⁴Jesosaa oya saja'a canaje: —E'e jojo nei ojjaña joya quea mimishi poani ca ca o huoojea'yojji Edosiquiana bajjani jayojja jama poani tii, quea mimishi. Ojaya yajjijo chacopajea meemee ajja jama jayojjaya aña miquianaya, miquianajaya mimishi pajea'yo ajjajo. ³⁵¡Bacue! Echacojji

ba'e tiitii ajja echacoiji meseja equijo. Oja bacua ca ca oe onijje ba'e tiitiiye'yo. Miquiana huoojea'yoji Edosiquiana bajjani quea mimishi; ojaya yajjijo miquianaya sosema' chacochacoani. Jamajoya miquianaya ba'e tiitii mee ajja Eyacuiñajji nijje. E shajja'ajjajji poani ca ca Eyacuiñajji nijje ba'e tiitiiye'yo oja bacua jjejojoya.³⁶ Jamajoya eyaya, Eyacuiñajji Bacua Ejja miquianaya mimishi pajea meesahuaje'yo. Jamajjeya miquianaya e'e jojo nei Edosiquianaja huoojea'yo pojjeama poaje'yo.³⁷ E'e, ecuea eba Amajama miquianajaya etiiquiana poa. Jamatii miquianaya ecuea esohui shajja'ajja sa po'yo ajja nei nei. Jamajjeya miquiaaya eya quecua sa aña.³⁸ Miquianaaya mi huoojeajji jayojja jama atiitiña quea tai. Oya Edosiquiana huoojeajji poani, Satanasa bajjaniya. Eyaya ca ca huohuiaña ojjaña ecue Chii ejjashahuabauquiji quea pame —Jesosa poanaje.

39—Chojja —Jodio cuana po nishonaje—, Amajama ecuanaja etiiquiana. Ohuaya jayojja jama aña ecuanaa quea pame —poanaje.

—Chojja —Jesosaa Jodio etii cuana saja'ame acanaje—. Amajama quea pame, miquianajaya etiiquiana mese poa; jamatii miquianaya o jayojja quea pame po'yo ajja. ¿Yajjajo acuae miquianaya o jayojja mi po'yani?⁴⁰ Eyaya Eyacuiñajjiya esohui e'e nei huohuinajejo, miquianaya shajja'ajja sa po ajja. Jamajjeya eya miquianaaya quecua sa aña. Amajama ca ca jama po'yo ajja; quea pame nee oya.⁴¹ Miquianaaya aje oe mi huoojeajji ehuohui quea tai jayojja jama atiitiña, Edosiquianaja ehuohui jama —Jesosa poanaje.

Jamatii Jodio etii cuana quenequenenaje. Jama poanaje ba'a: —Chojja, Eyacuiñajji e'e jojo nei ecuanaja Chii. Ecuana ojaya ebacua cuana quea pame poani, de —poanaje Jodio etii cuana.

42 Jesosaa oya cuana huohui canaje jama ba'a: —Eya Eyacuiñajji nijje ani poeyanaje jiquiacua, jiquio meshi yasijje. Eyacuiñajji miquianaja Chii pojjeamajo eya miquianaaya botilama aña. E'e, Eyacuiñajjiya eya huooje canaje; eya jamatii poe'yo jjima. Chojja, ohuaya eya huoojea canaje.⁴³ ¿Apiojji acuae miquianaya ejo jjabahueijaqui jjima? Miya ca mi ca oe e shajja'ajja sa po'yo ajja tii nequi.⁴⁴ E'e, Edosiquiana huoojeajji poani mi huoojeajji poani; ojaya ejjashahuabauquiji jama atiiti'yo sa poani miquianaya. Yahuajo nei nei oya ona quecua coo'yoji poa. Eyacuiñajjiya esohui e'e nei jayojja jama ojaya ajiima pealai poa; esohui ojaya botilama nei nei poa. Oya siajje poani tii tii, siajjepoji nei nei. Oya ca ca oma siajje po coonaje; siajjepoji cuana huoojeajji poani. Ojjaña siajjepoji cuana ojaya epeejji cuana, Edosiquianaja epeejji.⁴⁵ Eyaya miquianaya Eyacuiñajjiya esohui e'e nei huohuiaña. Jamatii miquianaaya eya shajja'ajja jjima aña. Edosiquiana jayojja miquianaya jjashahuabauquiani.⁴⁶ Miquianaya ejo jama po ajja ba'a: "Jesosa quea mimishi". Chojja de. Jamajjeya eya esohui e'e nei huohuiaño, ¿apiojji acuae ecue huohui shajja'ajja jjima tii aña so'o? —Jesosa poanaje—.⁴⁷ ¡Bacue! Ojjaña Eyacuiñajjiya epeejjiya oja sohui shajja'ajja cani tii. Miquianaya ca ca Eyacuiñajjiya epeejji pojjeama jjejojo ojaya esohui shajja'ajja sa po'yo ajja tii —Jesosa poanaje.

⁴⁸Majoya Jodio etii cuaa quenequene majje jama acanaje ba'a: —¡Miya ca mi ca oe Samania dejja tai, niñepoqui!

⁴⁹—Chojja —Jesosaa acanaje—, eya niñepoqui pojjeama. Ecue huohui ecue Chijo e'e nei. Eyaya oya bihuiaña quea ja'a nee. Miquianaaya ca ca eya niñebaña —Jesosaa Jodio etii cuana acanaje—. ⁵⁰Eya onaya ejo mimi mee sa po'yo ajja jama ba'a: “Jesosa quea pame nee, ¡oya bihuiaque!” Chojja, eyaya dejja jamaya epo mee'yojji pojjeama ejo. Ecue Chii ca ca ejo jjashahuabaquiani quea pame nee; e'e jojo nei ejo huohui cani ohuaya —Jesosa poanaje—. ⁵¹Eyaya miquianaya e'e jojo nei huohuaña jama ba'a: Ojjaña joya e shajja'ajja neineijji poani ba'e tiitii meeje'yo, oya cuana ca ca emano'yojji mete'ama poaje'yo pealai —Jesosa poanaje.

⁵²Maya shajja'ajja majje Jodio cuaa Jesosa jama acanaje ba'a: —Miquea ehuohui emano'yojji ecuanaja eba miya e'e jojo nei niñepoqui poani eshahuaa napa canijo. ¡Bacue! Yahuajo ecuanaja etiiquiana Amajama mano'ya poa. Eyacuiñajjiya esohui huohuijji cuana yahuajo ba'e mano'ya poa pealai. Jamatii jjeya miyaya huohuaña jama ba'a: “Ecuea esohui jayojja jama ba'yanijo emano'yojji pojjeama miquianaya cuana poaje”. ¡Dee! ⁵³Ecuanaja etiiquiana Amajama quea pame nee, quea ca'a nee poa; jamatii oya mano'ya poa. ¿A'a miyaya ma Amajamaja ajjima aje'yo? Jesosa, ¿a'a miyaya emano'yo cuana shequi meeje'yo? Eyacuiñajjiya esohui huohuijji cuana yahuajo nei ba'e poquijeyo'ya poa pealai, de. ¿A'a miya pea dejja jayojja jama pojjeama? ¿A'a miyaya ojjaña baña quea ja'a nee? Chojja, siajje miya poani —Jodio cuana mimijaji majamajanaje Jesosa nijje.

⁵⁴Jamajjeyaya Jesosaa ojjaña cuana huohui canaje jama ba'a: —Eya onaya ejo mimi mee sa po'yo ajja jama ba'a: “Jesosa quea pame nee, ¡oya bihuiaque!” Chojja de, Eyacuiñajjiya, ecue Chiiya ca ca oe eya quea jea acani. Jamaya eyaya saña. E'e, ecue Chiiya ejo jama huohui cani ba'a: “Jiquio ecuea Ebacua Ejja quea pame nee nee, quea ca'a nee nee; ¡oya shajja'ajjacue!” poani ecue Chii. Ecue Chijo miquianaya jama siajje poani ba'a: “Ecuana Eyacuiñajjiya epeejji, oya ecuanaja eba”. ⁵⁵Chojja de. Oya miquianajaya ba jjima, de. Miquianaya siajje poani. Eya ca ca siajje po ajja. Oya ecuea eba nei nei; eya siajjepoiji pojjeama. Eyaya oya baña; ojaya esohui shajja'ajjaña; ojaya esohui jayojja jama poani tii tii. ⁵⁶Yahuajo nei miquianajaya etiiquiana Amajama quea bihui nee nee jjashahuabaquinaje ecuea epoe'yojji quiije nei. E'e, Eyacuiñajjiya yahuajo Amajama ba mee ca poa jama ba'a: Eya, Eyacuiñajjiya huoojea'yo ojjaña jaahuanajji quiije meshi yasijje poeje'yo. Ma ba majje quea bihui nee nee Amajama poa —Jesosa poanaje.

⁵⁷Majoya Jodio cuaa Jesosa jama acanaje ba'a: —Chojja de, miya siajje poani, de. Miya esho'i, 50 cui'ao sheme po jjima miya de. Amajama ca ca yahuajo nei nei ba'ya poa. Oya miquea ba jjima, de —poanaje Jodio cuana.

⁵⁸—¡Shajja'ajjacue! —Jesosaa saja'a canaje—. Eyaya miya e'e jojo nei huohuaña: Amajama cuaya jjimahuajo tii eya yaña tiia poa. Eya ca iña Eyacuiñajji nei —Jesosa poanaje.

⁵⁹Ma shajja'ajja majje Jesosa siajje poani poso Jodio cuaa mei iña canaje o jajahuejjajeajji nisho. Jamatii Jesosa chama' poanaje. Jesosa quea huiso dejja tejjee nequijje quehua cuayaquinaje Eyacuiñajiji equi esecue jjani yasijke. Poquinaje.

Cojama' cuaya jjabapojaqui mee canaje Jesosaa

9 ¹Quijje pea pojabajo, ejomishocajji pojabajo Jesosa ecuana nijje, o shajja'ajjajji cuana nijje ejiojjije poquijeya ohuaya ba canaje oe dejja cojama' cuaya. ²Ba majje ecuanaa Jesosa huohui'ajjanaje jama ba'a: —Esohui huohuijji, ¿yajjajje acuae jiquio cojama' cuayanaje so'o? ¿A'a ojaya mimishijo pojja'a? ¿A'a oja chiija, oja naeja mimishijo pojja'a? —poanaje.

³—Chojja —Jesosaa ecuana saja'a canaje—, oya cojama' cuaya poa ojaya mimishijo pojjeama, oja chii, oja nae cuanaja mimishijo pojjeama pea'ai. Oya jamatii cojama' cuaya mee ca poa. Jamajjeya eyaya oya jjabapojaqui meeje'yo. Ba majje ojjaña cuaa bihuia caje: “E'e, Eyacuiñajjiya Jesosa jjabapojaqui mee canaje cojama'; quea ca'a nee oya, quea pame nee nee” acaje —Jesosa poanaje—. ⁴Eyacuiñajjiya eya huoojea canaje o chacojji. Jamajjeya jjeya eya miquiana nijje nequianijo Eyacuiñajjiyo chacoaña. Quijje eya miquiana nijje nequi aija jiquiojo. Eyacuiñajjiyo chaco majamaja majje eya manoje'yo. ⁵Meshijo nequiyá eyaya ojjaña cuana Eyacuiñajjiya esohui ba meeaña. Eya cuaquijiji jayojja jama poani. Jiquio ecua cuaquijijiya jeaja'a canijo dejja cuana poquiquehua aija mecajje quea apojo jama jayojja eyaya ojjaña cuana Eyacuiñajjiyo quea ja'a jjashahuabaqui meeaña.

⁶Jamaya mimi majje Jesosaa cuichojea canaje meshi pohui yasijke. Cojjamaja ecojja iñapepa canaje meshi choeya. ⁷Majoya cojama' huohui canaje: —¡Poquicue miya; ecojja shacuaquicue ena eteohuejja huasijje, Sinoe' bajjani yasijke! —poanaje. (Ma ena eteohuejja Ese Ejjaja esohuijo: Eyacuiñajjiya huoojea'yo ena bajjani.)

Jamajjeya cojama' poquinaje ena eteohuejja huasijje ecojja shacuaa. Ecojja shacua majje jjabapojaquinaje. Equi yasijke poe o'oyanaje cojjajji. ⁸Jamajjeya dejja cuaa o peijejo ba'ecaa, pea cuaa yahuajo oya meme ani ba canajeya pea'ai oya cojjajji ba ca'yonaje. Ba'yo majje ojee mimimiminaje jama ba'a: —Jiquio dejja yahuajo cojama' e'anioque ani meme ani eseyaya banaje. ¿A'a e'e? —poanaje.

—E'e, oyaya jja coma —beca cuana poanaje.

—Chojja, pea coma; cojama' jayojja coma —pea cuana poanaje.

⁹Oya yahuajo cojama' jama poanaje ba'a: —E'e, eya iquio ma yahuajo cojama' cuaya poaya. Jjeya eya cojjajji —cojama' poanaje.

¹⁰—E'e nei. ¿Yajjajje acuae mi cojjajji'yo? ¿Yajja acuae mi po'yonaje? Jjeya miya cojjajji'yo —jama huohui'ajja neineimeya acanaje cuaa.

¹¹ Ohuaya saja'a canaje: —Jesosa bajjaniya mo cuichojea canaje meshi pohui tejjee. Ecuea ecojja iñapepa canaje meshi choeya. Majoya eya huoojea canaje Sinoe' ena eteohuejja huasijje ecojja shacuaa. Jamajjeya eya poquinaje. Ecojja shacuaqui majje eya jjabapojaquinaje —acanaje.

¹² —¿A'a e'e? —ojjaña cuana poanaje—. ¿Achacua acuae ani oya Jesosa jjeyea so'o? —poanaje.

—Cua'a de, ecuea oya ba jjima ecojjaja —poanaje.

Paniseo cuaa dejja yahuajo cojjama' cuaya ba canaje

¹³ Jamajjeya pea mecahuaje o pejjejo ba'e cuaa ma dejja yahuajo cojjama' cuaya poa jjequi canaje Paniseo cuanaja ebajji. ¹⁴ Jesosaa meshi pohui ecuichojea ecojja huasijje iñapepa cajje jjabapojaqui mee canaje epojja ejomishocajjijo. ¹⁵ Jamajjeya Paniseo cuaa ma ba majje huohui'ajja ca o'oyanaje jama ba'a: —¿Yajjajje acuae mi cojjajji'yo? ¿Yajja acuae mi poanaje so'o? —poanaje Paniseo cuana.

—Jesosaa ecuea ecojja iñapepa canaje meshi choeya. Majoya ecojja shacuaqui majje eya jjabapojaquinaje —poanaje ma dejja.

¹⁶ Jamatii beca Paniseo cuaa huohui canaje jama ba'a: —Ma dejja Jesosa bajjaniya ca ca oe epojja ejomishocajjijo chaco cani, de —poanaje Paneseo cuana. Jamajjeya Jesosa Eyacuiñajjija huoojea'yo pojjeama poso jjashahuabaquime poanaje.

Pea Paniseohua jama acanaje ba'a: —Chojja de, ohuaya cojjama' cuaya jjabapojaqui mee canaje, pa. Jamaya pea cuana poanaje. Jamajjeya oya mimishi'ama. Dejja mimishiya jamaya po meemee'yo ajja —poanaje.

Jamajjeya Jesosajo ojee jjamimicuajea nobiajeaquinaje Paniseo cuana. ¹⁷ Jamajjeya oya cuaa ma dejja yahuajo cojjama' cuaya huohui'ajja ca o'oyanaje: —¿Yajja acuae mijo poanaje Jesosa so'o? Jesosaa miya jjabapojaqui mee canaje, pa cuana poani. Jamajjeya ¿yajja acuae miya poani Jesosajo so'o? ¿A'ya cuae oya? —poanaje Paniseo cuana.

—Jesosa Eyacuiñajjija esohui huohuijji e'e jojo nei —saja'ame acanaje cojjama' cuayaa.

¹⁸ Jamatii Jodio etii cuana jjashahuabaqui sa po'yo ajja jama ba'a: —Oya cojjama' cuaya poa, jjabapojaqui mee canaje Jesosaa.

¹⁹ Jamajjeya oja chii, ojaya enaese pea'ai iyaa canaje. Poeyajo, huohui'ajja canaje: —¿A'a jiquio miquea ebacua ejja cojjama' cuaya poa? ¿Yajjajje acuae oya jjeya cojjajji? ¡Huohuicue ecuana! —poanaje.

²⁰ Echii mese jama poanaje ba'a: —E'e, jiquio ecuanaja ebacua ejja. Yahuajo oya cuaya poa cojjama' nei. ²¹ ¿Yajjajje shai oya cojjajji'yo jjeya? Ecuanajaya ba jjima. ¿Aya acuae oya jjabapojaqui mee canaje so'o? Ecuanaja ba jjima. ¿Apiojji acuae iñaya nequiaa huohui'ajjaña? Oya oe huohui'ajja socue; oya etii, esho'i pojjeama. ¡Ohuaya oe huohui cacie! —poanaje echii mese, enaese pea'ai.

²²Jamaya poanaje oya cuana, Jodio etii cuanajo quea mete jjejojoya. E'e, Jodio etii yahuajo jama poanaje ba'a: "Jesosa Eyacuiñajiji huoojeal'yo ojjaña jaahuanajji, ja'a jama huohuime aiji! Jarma mimime poajo jja oe ecuaaya miquianaya Jodioja equi ojee ejjachichaquijiji esecue yasijje huoojeacuayajeaje'yo" poanaje Jodio etii cuana. ²³Quea mete poanaje oja chii, ojaya enaese cuana pea'ai. Jamajoya oja chiya, ojaya enaeseya Jodio etii cuana huohui canaje jama ba'a: —¡Oya oe huohui ajjacue! Oya esho'i pojjeama, etii nojinoj.

²⁴Jamajjeya Jodio etii cuaa ma dejja cojjama' cuaya poa iyaa ca o'oyanaje ehuohuijji jama ba'a: —¡Bacue! Ecuanaja eba jiquio dejja Jesosa quea mimishi. Jamajjeya Eyacuiñajji oe nei bihuiaque jama ba'a: "Eyacuiñajji quea pame nee nee; jamajjeya eya ohuaya jjabapojaqui mee canaje ohuaye nei" —Jodio etii cuaa acanaje.

²⁵Cojjama' cuaya saja'a canaje jama ba'a: —Miquianaya: "Jesosa quea mimishi" poani. Oya quea mimishi poani jojjemo eya jjabaqui aija tii pome. Ecuea eba nei nei eya cojjama' cuaya poa; eya jjeya cojjajji'yo, oja jjabapojaqui mee'yo —poanaje cojjama'.

²⁶Majoya oya huohui'ajja ca o'oyanaje Jodio etii cuaa jama ba'a: —¿Yajja acuae mijo poanaje Jesosa? ¿Yajja acuae mi cojja aca'yonaje so'o? —poanaje cuana.

²⁷—E'e, eyaya miquianaya yahuajo huohuinaje Jesosa. Jamatii miquianaya jjashajja'ajjaqui aija —oya poanaje—. ¿Apiojji acuaeaya shajja'ajja o'oya sa aña so'o? ¿E'e pojja'a miquianaya o shajja'ajjajji poaje'yo? —poanaje cojjama' cuaya etii cuana nijje.

²⁸Majoya Jodio etii cuana onijje mimijajinaje jama ba'a: —Miya ca mi ca oe Jesosaja epeejji. Ecuana ca ca oe Moisesija esohui shajja'ajjajji poani. ²⁹Ecuanaja eba e'e jojo nei Eyacuiñajji yahuajo nei Moisesi nijje mimia poa. ¿Jesosa shai ajea huoojea jiquiacua? Cua'a de. Ba jjima ecuanaja —mimitecuetecueame poanaje Jodio etii.

³⁰—E'e pojja'a, de, —cojjama' cuaya oya cuana acanaje—; ¿apiojji shai oya miquianajaya eba pojjeama so'o de? ¿A'a miquianajaya ba jjima Jesosa huoojeajji epo? ¡Bacue oe! Eya ohuaya jjabapojaqui mee canaje. ³¹Eyacuiñajjiya ca ca dejja quea mimishija esohui eshajja'ajjajji pojjeama onijje mimianijo. Ohuaya dejja quea pameja esohui shajja'ajja cani, oja sohui jayojja jama poanijo. ³²Yahuajo nei, jjeya nei pe'a'i chama' pea dejja Jesosa jayojja. E'e, eya yahuajo cojjama' cuaya poa. Jjeya eya ohuaya cojjajji po mee canaje. Yahuajo nei nei meshi pana cajeahuajo chama' dejja poa Jesosa jayojja. Jjeya nei pe'a'i chama' pea dejja Jesosa jama. Pea cuaa ohuaya jayojja jama a'ajja. ³³Jesosa Eyacuiñajiji huoojea jjima poa jojjemo ohuaya ma dejja ajjima acani ajjima aca quiaye, eya jamatii anijea quiaye —poanaje cojjama' Jodio etii cuana nijje.

³⁴Oja sohui quea pame shajja'ajja sa po ajjajoo Jodio etii cuana quea quene nee nee poanaje. Tecuea canaje jama ba'a: —¡De! Miya quea mimishi nee nee jjejojo cojjama' cuaya poa; miya Eyacuiñajiji cajaa. ¿A'a ecuaaya miya shajja'ajjaje? Chojja. ¡Poquicue miya! ¡A'a jiquicua poe

o'oyajji! ¡Ecuanaja ojee ejjachichaquijji equi yasijke a'a poe o'oya tiitijji!
—jamaya Jodio etii cuaa oya huoojeacuayajea canaje.

Joya Eyacuiñajji ba po jjima cuana cojjama' jayojja

³⁵Majoya pea cuaa Jesosa huohuiqui canaje jama ba'a: —Jodio etii cuaa cojjama' cajaa acanaje; Jodioja equi ojee ejjachichaquijji esecue yasijke huoojeacuayajea canaje, pa —poanaje.

Jamajjeya Jesosaa oya sa'ajja canaje. Ba'yo majje huohui'ajja canaje jama ba'a: —¿A'a miquea eba Eyacuiñajji Bacua Ejja, Eyacuiñajji Bacua Ejja 'yo ojjaña jaahuanajji? —acanaje.

³⁶—Esohui huohuijji, oya ecuea ba jjima. ¡Oya mo ba meecue! Onijje iña jjapeequi'yo sa poani —poanaje.

³⁷—Eya jja iña iquio, de —Jesosa poanaje—, ma Eyacuiñajji Bacua Ejja nijje mimiani. Eya jja iña iquio, de —Jesosaa acanaje.

³⁸Majoya ohuaya Jesosa bihuia canaje ecui'oshajjajo nequi majje. Jama poanaje ba'a: —Ecuea Emeshi Mese, ¡eya miquea epeejji nei nei! —poanaje dejja cojjama' oja jjabapojojjaqui mee'yo.

³⁹—E'e nei —Jesosa poanaje—, ecue Chiiya eya meshi yasijke huoojea canaje; huohui canaje jama ba'a: “¡Baqicue! ¡Achajja shai ojjaña cuana jjashahuabaquiani mijo? ¡Ba'ajjaqui socue!” Eyacuiñajjiya aca poa eya. Jiquio ecua cojjama' jjabapojojjaqui mee'yaña jayojjaya eyaya ojjaña joya yahuajo Eyacuiñajjiya esohui ba po jjima ba meesahuaje'yo. Ojjaña joya Eyacuiñajjiya esohui ba nisho epo ecuea Eyacuiñajjiya esohui eba meeji pojjeama. Jamajjeya oya cuana cojjama' jayojja tii poaje —Jesosa poanaje.

⁴⁰Paniseo cuana jomajo nequi Jesosaja esohui shajja'ajja majje jama onijje poanaje ba'a: —¿A'a miya jjashahuabaquiani ecuanajo; Eyacuiñajjiya esohui eba pojjeama ecuanajaya, jamajjeya cojjama' jayojja poani? —poanaje Jodio etii cuana.

⁴¹—E'e —Jesosaa saja'a canaje—, miquianajaya Eyacuiñajjiya esohui ba jjima nei nei jojjemo eyaya miquianaya ba mee'yome. Cojjama' jjabapojojjaqui meenaje jama eyaya miquianaya amee'yome. E'e, eyaya miquianaya Eyacuiñajjiya esohui ba mee'yome quea ja'a nee. Jamatii miquianaaya Eyacuiñajjiya esohui ba neinei nishoañajo, Eyacuiñajjiya miquianaya tecuea caje'yo; quea nee nee po mee caje'yo cuaquijo —Jesosa poanaje.

Ñajajja cuiñajji jayojja jama Jesosa ojaya epeejji jaahuanajji

10 ¹Majoya Jesosa ojjaña nijje jama poanaje pealai ba'a: —Ecuea esohui ejjashahuabaqui meeji ñajajja cuiñajji jama ba'a: Ñajajja jaahuanajji ñajajja cuana jiyojo cahui mee cani, ijjiacajji mase cuaa e'ijjia ca poajejje. Ejaahuanajji jiyo esecue jjanijo jaani, esecue jjani queya cani. Siipojji cuana ca ca ñajajja jiyoje nequisohua majje quehua dobiqiani.

Oya cuana siipojji jjejojo esecuejje dobiqui ajja. ²Ñajjajja jaahuanajji ca ca esecuejje dobiquiani, de. ³Jijo esecue cuiñajjiya esecue ca'apejo cani ñajjajja cuiñajji dobiquiji. Dobiqui majje ejaaahuajjija ojaya ñajjajja iyaa cani. Iyaa cajje o que poeyani. Ñajjajja jaahuanajji ehui dojorji poquiani esecue yasijje. ⁴Cuayaqui majje ñajjajja cuana o quiquischiji poquiani. E'e, ejaaahuajjija esohui ojaya ñajjajjaja eba, shajja'ajjaji. Jamajjeya o quiquischiji poquiani. ⁵Peaa iyaa cajje ñajjajja shajja'ajja jjima acani; poe ajja. Jamajjeya oya ñajjajja poqui ajja pea nijje; ba jjimajo cuajicuajquehuajeananani —Jesosa poanaje.

⁶Jesosaja sohui ejjashahuabaqui meeiji ohuaya huohui canaje Jodio cuana huasijje. Jamatii ojaya, Jodio cuanaja quea quehua; jama acanaje ba'a: —¿Ajeo acuae ca oya mimiani ecuana nijje? —poanaje.

⁷Jamajjeya Jesosaa oya cuana huohui ca o'oyanaje: —¡Bacue, oe! Eya, Jesosa esecue jjani jayojja jama poani. Ecuea epjeejji dobiqui meesahuaña. ⁸Ojjaña ejaaahuajjija nisho cuana ca ca sii sa poani. Jiquio ecua ñajjajja peaja esohui ba jjimajo pea nijje poquiquehua ajja jama jayojja ecuea epjeejji nei nei esohui huohuiji nishojo jjashajja'ajjaqui ajja —Jesosa poanaje—. ⁹E'e, eya esecue jjani jayojja poani; ojjaña eya shajja'ajja canijo, enije jjapeequianijo pe'a'i, eyaya oya cuana ba'e tiitii meeje'yoo enijje. Jiquio ecua ñajjajja jaahuanajjiya ojaya ñajjajja esecuejje dojocuayaqui cani bobi ijjiia, jijo huasijje jaahuanana cani pea'ai jayojja jama eyaya ecuea epjeejji ba'e meesahuaña quea pame nee, Eyacuñajjija esohui jama —Jesosa poanaje—. ¹⁰Siipojji poeyani ñajjajja siiya, cuaquisho meeya pe'a'i, quecuaa pe'a'i. Jamaya esohui huohuiji nisho cuana siajje poani, sii cani, ecuea epjeejji cuana poquiquehua mee cani eshahua nijje, de. Eya ca ca poeyanaje quea ja'a nee nee ba'e meeya, pea ejjashahuabiquijijo ba'e meeya.

¹¹—E'e, eya ñajjajja cuiñajji quea pame nee jayojja jama poani. Ñajjajja cuiñajjiya ojaya ñajjajja nahue neinei cani ijjiacajji maseya e'ijjia ca poaje jjejojo. Oya jayojja eya manoje'yoo ecuea epjeejji cuana ba'e tiitii mee'yojji. ¹²Echacojji ca ca eñajjajja mese pojjeama jjejojo ijjiacajji mase ba majje cuajicuajinanani; ñajjajja jeajea canananani. Jamajje ijjiacajji maseya ñajjajja cuana ijji cani; poquiquehuajeanana mee cani pe'a'i. ¹³Ñajjajja cuana ojaya nahue'ama. Echacojji cuajicuajjeanananani, ojaya pojjeamajojo mi nahue cani —Jesosa poanaje.

¹⁴—Eya ca ca ñajjajja cuiñajji quea pame nee jayojja jama poani. Ecue Chiiya eya quea jea nee acani; oya ecuea quea jea nee pe'a'i. Oya jayojjaya eyaya ecuea epjeejji cuana quea jea nee nee aña; eya ecuea epjeejija quea jea nee pe'a'i. ¹⁵Jamajjeya eyaya oya cuana nahue neineiaña, ecuea epjeejji cuana. Jamajjeya ojaya mimishi cuijeal'yojji eya manoje'yoo ona ba'e tiitii mee'yojji —Jesosa poanaje—. ¹⁶Pea cuana yani pe'a'i, Jodio cuana pojjeama. Ohuaya pe'a'i ecuea esohui shajja'ajja caje'yoo. Ecuea epjeejji poaje'yoo pe'a'i. Eyaya oya cuana jjapeequi meesahua'yoo pe'a'i. Jamajjeya ojjaña cuana ojee cajjapeequiahua; eya ca ca oe o jaahuanajji poaje'yoo —Jesosa poanaje.

¹⁷—Ecue Chiiya eya huuojea canaje ojjaña jaahuanaa. Jamajjeya ecuea epjeejji ba'e tiitii mee'yojji eya manoje'yoo, ona nahuejo. E'e, e quecua'yojji

yani. Jamatii eya quecua ca'yajje shequije o'oya mo. Jamajjeya eya ecue Chiija quea jea nee nee.¹⁸ Eya quea ca'a nee nee poani. Jamajjeya ecuea epeejjijo mano'yo sa po'yo ajja jojjemo pea cuaa eya equecu'a'yojji pojjeama pome. Jamatii eya manoje'yo jama poani ba'a: "E'e, ecuea epeejjija mimishi cuijea'yojji mano'yo sa poanijo eya manoje'yo". Mano'yo majje eya shequije o'oya. Ecue Chiiya eya jamaya huoojeame aca poa —Jesosa poanaje Jodio cuana nijje.

¹⁹ Jesosaja esohui shajja'ajja majje Jodio cuana ojee jjamimicuajea nobiajequinaje jama ba'a: ²⁰—¡Oya Jesosa niñepoqui, de! ¡Oya quea jjashahuabaqui tai mimime poani! ¡A'a oya shajja'ajjaji! —poanaje beca cuana.

²¹—Chojja, de oya niñepoqui pojjeama. Esohui quea pame nee huohui cani. Ohuaya ca ca oe cojjama' cuaya jjabapojojjaqui mee ca'yonaje. Jamaya po ajja niñepoqui cuana —poanaje pea cuana.

Jodio cuana ojee jjachichaqui'yajo, Jesosaa huohui ca o'oyanaje
jama ba'a: —Eya Eyacuiñajiji Bacua Ejja e'e jojo nei

²²Quijje eeno shejo ojjaña Jodio cuana Jenosanena huasijje ojee jjachichaqui o'oyanaje. Quea bihui nee poanaje ma shejo. E'e, ma shejo yahuajo nei Eyacuiñajji equi pea iya ca o'oya poa quea bame nee. Jamajjeya ma shejoya ma shahuaba tiitii capoquiani Eyacuiñajji bihuia capoqui tiitiiani. Cuaquijji sisi dedo cani quea cahui huiso. ²³Ma shejo Jesosa Eyacuiñajji equi yasijje poqui o'oyanaje. ²⁴Equi quibojo jeojeonequinaje. Jodio dejja cuana o que jjachichaquinaje. Jama huohui'ajjame acanaje ba'a: —Jesosa, ¿apiojji miyaya ecuana huohui jjima? ¿A'a miya Eyacuiñajji huoojea'y ojjaña jaahuanajji? ¡Ecuana e'e nei huohuicue quea ja'a nee! —poanaje Jodio cuana.

²⁵ Jesosaa oya cuana jama acanaje ba'a: —E'e, eyaya miquianaya huohui huicha'a huicha'anaje yahuajo. Jamatii jjashajja'ajjaqui ajja. Ecue Chiiya eya ma dejjaajjima acani ameesahua cani miquianajaya ebajji nisho eya oja huoojea'yo ojjaña jaahuanajji. ²⁶ Jamatii miquianaya jjashajja'ajjaqui sa po ajja ecuea epeejji pojjeama jjejojoya. Jamaya eyaya miquianaya huohuinaje ba'a: "Ejaahuanajji emimi ojaya ñajjajjaja eba; jamajjeya onijje poquiani". ²⁷ Jama jayojjaya ecuea epeejji cuaa ecue sohui shajja'ajja cani, enijje poquiani tii pea'aiya. E'e, ecuea epeejji cuana ecuea eba. ²⁸ Eyaya oya cuana ba'e tiitii meeña. Jamajjeya oya cuana quea nee nee epo mee'yojji pojjeama cuaquijo, Eyacuiñajjiya. Eyaya ecuea epeejji cuana jaahuananajo pea cuaa oya ecuaquisho meejjji pojjeama eshahua nijje. ²⁹ Ecue Chiiya, Eyacuiñajjiya ecuea epeejji cuana enijje jjapee meequei cani. Oya oe nei quea ca'a nee nee; pea cuana ca'a'ama. Ohuaya oya cuana jaahuananajo cuaquisho meemeeajja eshahua nijje. ³⁰ E'e jojo nei eya ecue Chii jayojjaya poani tii —Jesosa poanaje.

³¹ Ma shajja'ajja majje Jodio etii cuaa mei iña ca o'oyanaje Jesosa jahahuejjajejjii nisho. ³²Jamajjeya Jesosaa oya cuana acanaje: —Ecue Chiiya

eya quea pame nee ma dejaa ajjima acani amee cani. Jamajjeya ɿapiojji acuae iñña jajahuejjajea sa aña so'o meiya? —huohui'ajjame acanaje Jesosaa.

³³—Chojja, mi jajahuejjajea sa po ajja ca ca ecuana miyaya ma dejaa ajjima acani quea pame añajo. Miya siajje poanijo ca mi ca oe jajahuejjajeame. Miya aje mi dejja; jamajjeya ɿapiojji acuae oe miyaya jama huohuime aña ba'a: “Eya Eyacuiñajji jayojja tiiya” poani? —Jodio etii cuaa Jesosa Eyacuiñajji Bacua pojjeama poso tii acanaje.

³⁴Majoya Jesosaa oya cuana jama acanaje ba'a: —Miquianajaya eba Eyacuiñajji yahuajo nei nei tehue mee ca poa Jodio jaahuanajji cuanajo jama ba'a: “Miquianaya Eyacuiñajji jayojja poani”. Jama tehuemeya aca poa yahuajo. ³⁵Jamajjeya ɿEyacuiñajji etehue'yo e'e nei shajja'ajja tiitiicue! Ma etehue'yojo ohuaya huohui ca poa Jodio esohui huohujji Eyacuiñajji jayojjaya poa. ³⁶Jamajjeya eya ca ca oe ecue Chiiya babaca ca poa ojjaña jaahuanajji; eya eyajo ani huoojea ca poa meshi yasijje. Matatii: “Eya Eyacuiñajji Bacua Ejja” anajejo, miquianaaya eya tecueña. Jama poani ba'a: “Miya siajje poani Eyacuiñajji jayojja miame” poani miquianaya. ɿApiojji jamaya poani? —Jesosa poanaje—. ³⁷ɿBacue! Eyaya ecue Chiiya acani jayojja a'lajja jojjemo ɿa'a eya shajja'ajjame so'o! ³⁸Miquianaya ecue esohui shajja'ajja sa po ajja; matatii ecue Chiiya acani jayojja quea pame nee eya añajo, jjashahuabaquicue jama ba'a: “Jesosa Eyacuiñajji huoojeal'yo poani”. ɿJamajoya jjabahuejjaquicue e'e jojo nei eya ecue Chii jayojjaya, de; oya e jayojjaya peal'ai poani! —Jesosa poanaje.

³⁹Jamatii Jodio cuaa Jesosa siajje poani poso acanaje. Jamajjeya ojee jama poanaje ba'a: —ɿCua'a, oya ejja'iññaquiqui ejeanobiajji! —taaame poanaje.

Jamatii Jesosa quea huiiso nee nee dejja nequi tejjee quehuajje poquinaje, jja'iñña meequi jjima.

⁴⁰Majoya Jesosa poqui o'oyanaje cuei Jodana ojje miji yasijje, ma yahuajo Huaniya ona besa mee ca poa huasijje.

⁴¹Jomajo o anijo quea huiiso dejja cuana o baa poeyanaje. Jjachichaqui majje jama ojee miminaje ba'a: —E'e, yahuajo Huaniya ajjima aca poa ma dejaa ajjima acani; matatii ojjaña ojaya ehuohui'yo Jesosajo e'e nei poanaje —acanaje cuaa.

⁴²Jamajjeya ojjaña jomajo Jesosajo jama poanaje ba'a: —E'e jojo nei Jesosa Eyacuiñajji huoojeal'yo ojjaña jaahuanajji.

Nasano mano'yonaje

11 ¹⁻²Pea cuiñajjijo Betania bajjanijo

Jesosajo epeejji cuana ba'enaje: Nasano, oja jjo'i cuana Manta, Mania pea'lai. Maniaa Jesosa ojaya quea jea neejo quijje oya jiojji sha canaje shiyeshiyeya. Sha majje ejiojji cui ca'yonaje ojaya esaohua, Maniaa. Jesosa Jodana cuei ojje mijijije anijo, Maniaja eno mese Nasano quea mano nee nee poanaje. ³Jamajjeya ejjo'i mese cuaa pea huoojea canaje Jesosa que: —Nasano quea mano jaa. Jesosa ba majje jama huohuime acue ba'a: “Emeshi Mese Jesosa, miquea epeejji Nasano quea mano nee nee jaa, poquijeyoje pojja'a” acue.

⁴Jamajjeya ma dejja poquinaje Jesosa que. Huohui cañaquinaje. Nasanojo shajja'ajja majje Jesosa jama poanaje ba'a: —E'e, oya mano'yo majje jamatii emano'yo tii tii pojjeama poaje. E'e, quijje ojo ojjaña cuua Eyacuiñajji bihuia caje'yo; ejo pea'ai jama huohuime acaje cuua ba'a: "E'e, miya Eyacuiñajji Bacua Ejja quea pame nee nee, quea ca'a nee pea'ai; ojjaña miyaya aña" acaje cuua —Jesosa poanaje.

⁵Jesosaja quea jea nee nee Manta, Mania pea'ai, oja jjo'i jayojja, oja o'i jayojja Nasano poani pea'ai. ⁶Jamatii Nasano quea mano nee nee jaa ba majje Jesosa jomajo tii aninaje becanejjiji pea'ai cahuime, poqui jjima poanaje.

⁷Majoya ecuana huohui canaje Jesosaa: —Cua'a, ¡Jodea meshi yasijje epoqui o'oya! —poanaje.

⁸—Chojja, Jesosa —saja'amé anaje ecuaaya—, yahuajo pishana Jodio cuua jomajo ba'eya miya jajahuejjajea sa acanaje meiya. ¿A'a jamatii miya poqui o'oya sa poani jocuama? —anaje.

⁹—E'e —Jesosa poanaje—, eya poquije. ¡Bacue! ¿A'a eshequi jaasohua jjimahuajo ejiojjiji poquije? Quea apo. Eshequiya jeaja'a canijo ejjaquecuasajaquijji pojjeama ejiojjijo. E'e, eshequiya jeaja'a canijo, ejiojjiji baje quea ja'a nee. ¹⁰Mecajje quea misi poanijo ca ca dejja oque chana' ejiojjiji poquianijo. Oya jayojja eyaya ecue Chii nijje chacoañajo, ohuaya eya jaahuana cani, onaya eya quecua'yo jjima amee cani. Ojaya eba nei epoija e mano'yonjiji.

¹¹Jamaya ecuana huohui majje Jesosaa jama acanaje ba'a: —Eseja epreejji Nasano cahui'yonaje. Jamatii eya poquije o ishe'a'yohua.

¹²Jesosa jamaya poanijo, Nasano mano'yo jjima poso ecuaa jama anaje ba'a: —Jesosa, Nasano cacahuiquiahua. Cahui majje oya jjaajaquije'yo.

¹³Jesosaja eba Nasano emano'yo, epoquijeyo'yo jaa. Ecuana ca ca jjashahuabaquiani jama ba'a: "Nasano jamatii cahuijaa" poso anaje ecuaaya. E'e, Jesosaja esohui ecuanaja quea quehua poanaje.

¹⁴Jamajjeya Jesosaa huohui ca o'oyanaje jama ba'a: —Epeejji cuana, Nasano epoquijeyo. Chama'yo tii jaa. ¹⁵Eya Nasano nijje ani jjima poanajejojo oya mano'yonaje. Jamatii jamaya miquianajo quea pame nee poaje'yo. E'e, eyaya Nasano shequi meeje o'oya ba majje miquianaya jjabahuejjaquije'yo eya e'e jojo nei Eyacuiñajji huoojea'yo ojjaña jaahuanajji. ¡Cua'a, Nasano ejjaba'ajjajiqui! —Jesosa poanaje.

¹⁶Jesosa shajja'ajjajji Tomasi, ma Becajaa bajjani miminaje pea shajja'ajjajji cuana nijje, ecuana nijje jama ba'a: —¡Cua'a, Jesosa nijje epoqui! Jodio etii cuua o cuia ca'yajo ecuana ojee Jesosa nijje tii manoje'yo pea'ai.

Jesosaa Manta, Mania pea'ai yeno'ama po mee sa acani

¹⁷Quijje Jesosa poeyanaje Nasanoja equi yasijje. Ba caña'yonaje Nasano epoquijeyo'yo poanaje. E'e, ebeca pee pea'ai cahuime yahuajo oya ehuananobia jaanaje mei jjani yasijje, enaba capa jaanaje.

¹⁸Betania cuiñajji Jenosanena chipi nei ani. ¹⁹Jamajjeya quea huiso Jodio cuana poeyanaje Manta, oja shehue Mania pa sahuaa, oja noo Nasano emano'yojo.

²⁰Jamajjeya Jesosa ejiojjije poeyani shajja'ajja majje Manta cuayaquinaje Jesosa baa. Mania ca ca equijo aninaje, poqui jjima ca oma poanaje.

²¹Jamajjeya Mantaa Jesosa ba majje huohui cañaquinaje jama ba'a: —Jesosa, ecue noo mano'yo jjimahuajo, miya jiquiacua epoe jojjemo oya mano'yo jjima poquiaye. ²²Jamatii ecuea eba jjeya nei peal'ai miya Eyacuiñajji nijje mimianijo, ohuaya miquea esohui jama acaje'yo —poanaje Manta.

²³—Manta, mique noo shequije o'oya, she —poanaje Jesosa.

²⁴—E'e —Manta poanaje—, jamaya ecuea eba oya shequije o'oya quijje nei, Eyacuiñajji ojjaña emano'yo cuana shequi mee ca o'oyajo, meshi oe poajo.

²⁵Jesosa poanaje: —Manta, eya ca ca iña ojjaña shequimee'yojji nei. Eyaya oya shequi meeje o'oya Eyacuiñajji nijje eba'e tiitii'yojji. Jamajjeya ojjaña joya e'e jojo nei enijke jjapeequiani ba'e tiitije'yo eyajo. Eyaya oya cuana ba'e tiitii meeje'yo jamatii yahuajo emano'yo cuana. ²⁶Ojjaña ecuea epeejji jjeya nei eshe nequi peal'ai eyaya ba'e tiitii meeje'yo, mete'ama poaje'yo emano'yojji. ¿A'a jamaya miyaya baña? —Jesosa poanaje.

²⁷—E'e Jesosa, ecuea eba miya Eyacuiñajji huoojea'yo ojjaña jaahuanajji, Eyacuiñajji Bacua Ejja. Miquea epoe'yojji yahuajo nei Eyacuiñajji esohui huohuijjiya tehue ca poa —Manta poanaje.

²⁸Majoya Manta poqui o'yanaje Mania que. Ba majje oya quehuajje huohui canaje jama ba'a: —Mania, Jesosa poeyanaje. Ohuaya miya iyaa cani —poanaje.

²⁹Mantaja esohui shajja'ajja majje Mania nequisohuanaje. Poquicuajinaje Jesosa baa. ³⁰Jesosa Betania huasijje dobiqui jjima; ohuaya Mania ishoa ca aninaje jomajo, ma o Manta nijje mimimimi aninajejo tiiya. ³¹Jodio cuaa Mania nijje equijo pa aniya oya ba canaje poquicuajije. Jamajje onijke poquinaje; jama poanaje ba'a: —Mania papoquinaje oja noo ehuananobiajaa huasijje quea yeno nee jjejojo.

³²Maniaa poe majje Jesosa ba cañanaje. Ecui'oshajjajo nequiya huohui canaje: —Jesosa, miya jiquiacua epoe jojjemo ecue noo mano'yo jjima poquiaye —Mania poanaje.

³³Jesosaa Mania pa'ani ba majje, Jodio cuana Mania nijje pani ba majje peal'ai quea yeno poanaje. Quea yeno jjashahuabaquinaje Jesosa onajo. Jamajjeya huohui'ajja canaje jama ba'a: ³⁴—¿Achacua acuae nequia Nasano huananobianaje so'o, she? —Jesosaa acanaje.

—Esohui huohuijji, ¡poeue; bahuacue! —poanaje cuana.

³⁵Jesosa cojjana cuayaquinaje onajo quea yeno po majje. Poquinaje onijke.

³⁶Jamajjeya Jodio cuana jama poanaje ba'a: —¡Bacue! Jesosa peal'ai pani. Nasano ojaya quea yeno nee ojaya epeejjijojo, de —poanaje Jodio cuana.

³⁷—E'e pojja'a —beca cuana poanaje—. Yahuajo Jesosa dejja cojjama' cuaya jjabapojjaqui mee ca poa. ¿Apiojji shai oya yahuajo poecuaji jjima Nasano jjaajaqui mee'yohua? Jamajjeya oya mano'yo jjima poquiaye.

³⁸Onajaya esohuijo Jesosa quea yeno nee nee poquinaje jjani ai yasijje. Mei copo enequi jjani secue capajji. ³⁹Jamajjeya Jesosaa jama acanaje ba'a: —¡Esecue jjani capajji'ya mei jeacajjajajea'yocue! —poanaje.

—Chojja, ecuea Emeshi Mese —Nasanoja jjo'i Manta poanaje—. Oya yahuajo huananobia canaje, ebeca pee pea'ai cahuime. Jjeya quea ihui nee nee —Manta poanaje.

⁴⁰—Manta, eyaya miya huohuinaje: Eya Eyacuiñajjija huoojea'yo ojjaña jaahuanajji ba majje miya jjabahuejjaquije'yo Eyacuiñajji quea ca'a nee nee, quea pame nee nee; ohuaya eya ojjaña amee cani ma dejjaajjima nei nei acani pea'ai —Jesosa poanaje.

⁴¹Majoya secue jjani capajji'ya mei jeacajjajajea canaje cuaa. Jesosa eyahuasijje jjabajeasohuaquinaje Eyacuiñajji nijje emimijji. Nasanojo jama miminajje ba'a: —Ecue Chii, eyaya miya bihuiaña. Ecuea esohui miyaya shajja'ajjaña Nasano shequi mee'yojji. ⁴²Ecuea eba miyaya eya shajja'ajja neineiaña minijje mimianijo. Jamaya eya poani, ojjaña jiquiojo nequi jjabahuejjaquijji miyaya e'e jojo nei eya huoojeanaje. E'e ecue Chii, apoa —Jesosa poanaje.

⁴³Eyacuiñajji nijje mimi majje Jesosa taaaanje jama ba'a: —Nasano, ¡shequi'yocue, oe; cuaya'yocue! —poanaje.

⁴⁴Jamajjeya Nasano shequi'yo majje cuaya'yonaje. Oya daqui osheja bebo tii, oja ejoojji, oja eme cuana pea'ai. Oja sapa ebebo pea'ai poanaje pea daqui osheja.

Jamajjeya Jesosaa huohui canaje jama ba'a: —E'e, ¡oya ebebojjii'ya pichojeajea'yocue! ¡Daqui oshe huijjiajea'yocue! Oya capoqui'yahua equi yasijje —poanaje.

Jamajjeya Nasano poqui'yonaje.

⁴⁵Jamajjeya quea huiso Jodio cuaa Mania baa poeya ba canaje Jesosaa Nasano emano'yojaa shequi mee ca'yonaje. Ba majje Jesosajo jama poanaje ba'a: —E'e jojo nei oya Eyacuiñajjija huoojea'yo ojjaña jaahuanajji; ¡onijje ejjapeequi'yojji!

⁴⁶Beca cuana ca ca Jenosanena huasijje poqui o'oyanaje Paniseo cuana huohuiya: —Jesosaa Nasano emano'yojaa shequi mee ca'yonaje, de —poanaje cuana.

⁴⁷⁻⁴⁸Jamajjeya Eyacuiñajji nijje emimijji etii cuaa, Paniseo cuaa pea'aiya ojjaña Jodio etii ojee iyaa canaje Jesosajo emimimijji.

—¿Yajja acuae seja Jesosa aje so'o, de? Ohuaya ma dejjaajje ba jjima acani quea huiso. ¡Cua'a ejja'iñaquequi oya! ¡Oya esohui ejjahuohui pajea meequei! Ojjaña aje oe onijje jjapeequi'yo, de. Majoya Shomano meshi mese cuana ojo quea mete poaje, ejjajjequique poso. Jamajjeya ese nijje jjacuiaqui majje jeabichajea caje'yo. Jiquio Eyacuiñajjija equi jajacajjajea caje'yo pea'ai, Shomano cuaa —poanaje Jodio etii cuana.

⁴⁹Ma shequijajo dejja Caipa bajjani Eyacuiñajji nijje emimijji etii poanaje Jodioja. Ohuaya pea cuana huohui canaje jama ba'a: —Ae po cajji Jesosajo

ecuea ohuejaya eba. ¿A'a miquea ba jjima? ⁵⁰¡Eya shajja'ajjacue! E'e, Shomano cuaa Jesosajo quea mete po majje eseya quecuia jeyojeyo ca'yo chana! Jamajjeya oe dejja, Jesosa camanoqui'yahua ojjaña cuanajo. Jamaya esejaya quea pame poaje'yo. Jamajjeya ojjaña cuana mano jeyojeyo'yo ajja poaje —poanaje Caipa.

Jamatii ohuaya ojaya ejjashahuubaquijiji pojjeama huohui canaje.

⁵¹Oya, Caipa Eyacuiñajji nijje emimijji etii ma shequiajajo. Jamajjeya Eyacuiñajjiya oya huohui meesahua canaje Jesosajo jama ba'a: —Jesosa quijje pishana ojjaña Jodio cuanajo manoje'yo.

⁵²E'e, ojjaña quea huesha ba'e cuanajo pealai, joya Eyacuiñajji epeejji quijje poaje ojjaña meshijo ba'e cuanajo pealai manoje'yo Jesosa. Jamajjeya ojjaña meshijo ba'eca cuana ojee jjapeequi mee caje'yo, Eyacuiñajji bihuiajji cuana.

⁵³Jamajjeya Caipaja esohui shajja'ajja majje Jodio etii cuana ojee jjashahuubaquinaje Jesosa quecuajji: —¡Jesosa ejjaquecuaqui'yo! —poanaje.

⁵⁴Jamajjeya majoya Jesosa po'ayequi jjima poanaje Jodioja meshijo Jodio cuana nijje. Oya quehuajje poquinaje Epaini cuiñajji sisi yasijje, quima' meshi pejjejo. Jomajo ba'enaje o shajja'ajjajji cuana nijje.

⁵⁵Quijje pishana ojjaña Jodio dejja cuana ojjaña meshijo ba'e poqui o'oyanaje Jenosanena huasijje. Jamajjeya ma shejo ba'a: Esohuidojojjii cuaa yahuajo nei nei Ejito meshijo Jodioja bacua cuana cuijal'yo jjima shejo Jenosanena huasijje jjachichaqui canaje. Majoya Jodio etiiquianaja ehuohui'yo jayojja jama quea huiso besa majamaja canaje cuana ojee queabihui nee ijjal'ijjia jjimahuajo. ⁵⁶Jenosanena huasijje poe majje ojjaña Jodio cuaa Jesosa sa'ajja canaje. Eyacuiñajji equijo jjachichaqui majje ojee mimimiminaje Jesosajo: —¿Ae jjashahuubaquiani miquianaya? ¿A'a Jesosa poeje jiquiacua Jenosanena huasijje ojee ijjal'ijjia? ¿A'a poe ajja pojala? —poanaje.

⁵⁷Jamaya miminaje Jodio etiija esohuijo. Paniseo cuaa, Eyacuiñajji nijje emimijji etii cuaa pealaiya jama huoojea canaje ba'a: —Jesosa ba majje jecuana huohuicuajihuacue e'iña meeji! —acanaje etii cuaa—. Miquiaa mi huohuajje quea quene nee nee poaje ecuan a.

Maniaa Jesosaja ejiojji shacula canaje shiyeshiyeya (Mateo 26.6-13; Macoso 14.3-9; Noca 7.36-50)

12 ¹Majoya Jesosa Epainijo nequi Betania huasijje poeyanaje me oejejje oe cahuime Jodio cuana ojee ijjal'ijjia jjimahuajo. Jomajo ba'enaje Nasano, ma ohua emanoyojaa shequi mee ca'yonaje. ²Jomajo Mantaa Jesosajo queabihui poanijo bobi quea huiso cuacula mee canaje. Quea huijaa canaje Jesosa nijje e'ijjal'ijjajji. Nasano pealai onijje ijjal'ijjianaje. ³Majoya Jesosa ojaya quea jea neejo Maniaa shiyeshiyeya quea nahue nee neeya Jesosaja ejiojji sha canaje. Quea huijaa sha canaje, oe tahuoo shiyeshiyee oe acanaje. Sha majje Jesosaja ejiojji cui cal'yonaje oja esao aohua, Maniaa. Equi quea shiyeshiyeya sha cajje.

⁴ Jamajjeya Jesosa shajja'ajjajji Jodasa Isicanioteya, ma quijje Jesosa iña meesahua'yojji epojjiya Mania ba canaje. Ba majje Jodasa quea tecue jama poanaje ba'a: ⁵—¡Dee! ¿Apiojji acuaeya shiyeshiyeya shanaje so'o? Ma shiyeshiye quea nahue nee nee baña cuaa, shequiaja oe chaco majje sose huisoajja jiquio shiyeshiye, de. Quea huiso bejjo sosejje oya equia jojjemo bejjo quea huiso iña caquiaye, majoya bejjo sosejje cuana jja oe aema' cuana bobia quiayeya —poanaje Jodasa.

⁶ Jamatii oya Jodasa aemajo pojjeama jjashahuabaquinaje. Chojja, oya ca ca oma siipoji. Ojjaña Jesosa shajja'ajjajji cuanaja ejjeshejji cuiña nisho cani bashosoco sisijo. Ma sii poquiambe beca cuana bejjo, Jodasaa acanaje.

⁷ Jesosaa Jodasa tecuea canaje jama ba'a: —Jodasa, ¡a'l'a jiquio epona tecueajji! Ojaya eba eya quijje pishana manoje'yo. Jamajjeya eya sha canaje shiyeshiyeya, e mano'yojji jojoya. ⁸E'e, eya miquiana nijje e'ani tiitiiji pojjeama. Aema' cuana ca ca miquiana nijje yani tii tii, de.

⁹ Quea huiso Jodio cuaa shajja'ajja canaje Jesosa Betania huasijke poe'yonaje. Quea huiso cuana poeyanaje Jesosa baa, Nasano pea'ai baa. Onajaya eba Jesosaa Nasano shequi mee ca'yonaje. Jamajjeya Nasano ba sa poanaje pea'ai. ¹⁰⁻¹¹ Nasano shequi mee ca'yonajejo quea huiso nee nee huohui canaje jama ba'a: —¡E'e jojo nei Jesosa Eyacuiñajji huoojea'yo ojjaña jaahuanajji!

E'e, Nasano shequi mee ca'yonajejo Jodio etii cuanaja esohui shajja'ajja pajea canaje cuaa.

Jamajoya Eyacuiñajji nijje emimijji etii cuana jjashahuabaquinaje jama ba'a: —¡De, Nasano pea'ai caquecuajea'yahua Jesosa nijje tii!

Jesosa Jenosanena huasijke dobiquinaje mapichi sisija edaasa biajje
(Mateo 21.1-11; Macoso 11.1-11; Noca 19.28-40)

¹² Jamajjeya mecajjeahua ojjaña Jodio cuaa ma ojee ijjal'ijjiaa poe'ya shajja'ajja canaje jama ba'a: —Jesosa ejiojjijje poeyani Jenosanena huasijke.

¹³ Jamajjeya ojjaña cuana jememe iña jaja majje poquinaje Jesosa baa. Poquijeya jememe iña cuana jeasohua canaje. Jamaya Jodio cuaa acanaje pea bihuiajji, emeshi mese ja'ajjequijji cuiñajji yasijke. Jesosa bihuija canaje pea'ai. Taaanaje jama ba'a: —Jesosa, ¡miya ojjaña jaahuanajji poeyanaje! ¡Eyacuiñajji miya huoojea canaje! ¡Ohuaya miya cajaahuana cahua! E'e de, miya ecuanajaya, Isaeni cuanajaya Emeshi Mese oe nei —taaame poanaje ojjaña cuana.

¹⁴ Jesosa mapichi sisi ba majje o daasa biajje anisohuaquinaje. E'e, Jesosajo Eyacuiñajji esohui yahuajo nei etehue'yo jayojja jama poanaje jama ba'a:

¹⁵ “Ojjaña Jenosanenajo ba'e cuana huohuicue jama ba'a: —¡Quea bei pocue! ¡Bacue oe! Miquiana huoojea'yojji nei poeyani. Oya quea bei nee. Jamajjeya mapichi sisija edaasa biajje poeyani —huohuicue cuana”.

aya yahuajo tehue ca poa Jesosajo.

¹⁶Ma etehue'yojo jjashahuabaqui jjimahuaa ecuaaya jama anaje ba'a:
—¿Yajjajje shai quea huiso nee nee jjachichaquiani Jesosa que, o bihuiaa so'o?

Quijje ca ca Eyacuiñajjiya Jesosa emano'yojaa shequi mee caje o'oya;
majoya ecuanaa niñebaje'yo jama ba'a: —E'e de, esohui huohujiji
cuana yahuajo ba'eja etehue'yo jama acanaje Jesosajo —quijje jamaya
niñebaje'yo ecuanaa Jesosa shequi o'oyajo.

¹⁷Yahuajo Jesosaa Nasano shequi mee ca'yajo, quea huiso dejja cuaa ba
ca poa Jesosa. Ma dejja cuaa ojjaña huasijje huohui huicha'a huicha'a ca
poquia poa jama ba'a: —Nasano mano'yo majje jjanijo ehuananobia jaanaje.
Jesosaa iyaa cajje oya shequi o'oyanje, de —acanaje cuaa Jesosajo.

¹⁸Jamajoya Jesosaa acani ma dejjaajjima acanijo quea huiso
cuana poquinaje o baa, ejiojjije poeje baa. ¹⁹Jamajjeya Jesosa
poeyanaje Jenosanena huasijje. Majoya Paniseo cuana quea quene ojee
mimimiminaje jama ba'a: —¡Bacue! Ecuanaaya pea dejja cuana Jesosa
nijje jjapeequi pajea mee ajja. Chojja, de. ¡Bacue oe! Ojjaña tii Jesosa
nijje jjapeequiani. Ecuanaja esohui shajja'ajja sa po'yo ajja. Jesosa iña
meesahua ajja peal'ai, de —poanaje Paniseo cuana.

Jesosaa huohui canaje ojaya epoqui'yoji eyahuasijje e'ani'yoji

²⁰Beca Jodio cuana quea huesha Jieno meshijo ba'e pea'ai ma shejo
poeyanaje Jenosanena huasijje ojjaña nijje ijija'ijjiaa, Eyacuiñajji bihuiaa.
²¹Oya cuana poeyanaje Penipe que, ma Betesaidajo ba'e que. Onijje jama
poanaje ba'a: —Penipe, ecuanaya Jesosa ba sa neinei poani —poanaje.

²²Jamajjeya Penipe ojaya epjeejji Anesi que poqui majje pea cuanaja
esohui huohui canaje. Majoya ojee poquinaje Jesosa huohuiya.

²³Shajja'ajja majje Jesosaa oya cuana jama acanaje ojjañaja eshajja'ajjajji
ba'a: —E'e, eyaya Eyacuiñajjiya esohui oe a'yonaje. Apoa a'yonaje. Jjeya nei
eya, ojjañaja Edoe Mese manoje'yo. Eyacuiñajjiya eya mano'yajo dojoshuaqui
caje'yo eyahuasijje. Omijje quea ca'a nee nee ani mee caje'yo. ²⁴Eyaya e'le jojo nei
huohuiña jama ba'a: Eso' quecua majje pohuani. Jamajjeya jjajja majje quea huiso
eso' poaje'yo. Eso' quecua jjima ani jjapapaqui ajja. Jiquio ecua eso' quecua cajje
quijje jjajjani jayoya jama poaje ej. Onaa quecua cajje eya manoje'yo ojjañaja
mimishi cuijea'yoji sosejje. Jamajjeya eyaya quea huiso ba'e tiitii meeje'yo enijje
eyajo. ²⁵Jamaya pea'ai joya enijje jjapeequiani dejja mimishi cuaa quecua caje'yo
pojja'a. Jamatii enijje jjapeequiamijo, mano'yo majje eyajo ba'eje'yo tii tii quea
pame nee. Quea mete nee nee jjejojo enijje jjapeequi'yo ajjajo ca ca mano'yo majje
cuaqui yasijje dobijuje'yo tii tii, quea nee nee poaje'yo. ²⁶Ojjaña joya enijje
chaco sa poaniya jeya cashajja'ajja cahua! Ecuea echacojji cuana quijje enijje
ba'e tiitije'yo. Ecue Chiiya oya cuana jama huohuime acaje ba'a: "E'e, jamaya.
Miya Jesosaja echacojji quea pame nee" acaje Eyacuiñajjiya —Jesosa poanaje—.
²⁷Jjeya eya quea yeno. ¿Ajeo mimi cajji ecue Chii nijje so'o? ¿A'a jama mimi cajji
pojja'a ba'a: "Ecue Chii, ja'a dejja cuana eya napa meeji! ¡A'a eya quea nee nee po

meejji!"? Chojja. Jamaya eya mimi ajja ecue Chii nijje. Ohuaya eya huoojea canaje ojjaña cuanaja mimishijo mano'yohua. ²⁸Jamajjeya eya jama poaje ba'a: "Ecue Chii, ojjaña cuana mijö quea bihu po meecuel!" —Jesosaa acanaje.

Majoya Eyacuiñajji eyajo ani miminaje jama ba'a: —Eyaya miya amee'yonaje ma dejjaajjima acani. Jamajjeya quea huisohua eya bihuia ca'yonaje. Jjeya ojjañaa eya jjabihuia meequije o'oya —poanaje Eyacuiñajji eyajo ani.

²⁹Ojjaña Jesosa que ejjachichaqui'yo nequi cuaa shajja'ajja canaje Eyacuiñajji eyajo janobajjima nei mimian. Jamajjeya oya cuana miminaje jama ba'a: —¡De! Cueji pojja'a poanaje.

Beca cuaa jama acanaje ba'a: —¡Chojja! Esohuidojojji eyajo Jesosa nijje miminaje —poanaje cuana.

³⁰Jesosa ojjaña nijje miminaje jama ba'a: —Ecue Chii eyajo miminaje miquiana jjabahuejja meequijji jama ba'a: Ohuaya eya shajja'ajja canaje onijje mimianijo —Jesosa poanaje—. ³¹Jjeya Eyacuiñajjiya ojjaña joya enijje jjapeequi ajja quea nee nee po mee caje'yo. Eyaya ojjaña jeabichajeje'yo; Edosiquiana nei Satanasa bajjani, ma ojjaña dejja mimishi huoojeajji poani jeabichajeje'yo. Quijje oya cuaqui yasijje dobiquije'yo tii tii. ³²Cuanaya eya ojjañaja Edoe Mese acui ecueata'apeejo ba'ehuanasohuajea cajo, quea huiso nee nee ojjaña meshijo ba'e enijje jjapeequi meeje'yo —Jesosaa acanaje.

³³Jamaya Jesosaa ojjaña ba mee canaje oya acui ecueata'apeejo manoje'yo. ³⁴Jodio cuana jomajo ejjachichaqui nequiya huohui canaje jama ba'a:

—Ecuana esohui huohuijji cuana jama poani ba'a: "Eyacuiñajjiya huoojeal'yo ojjaña jaahuanajji Quito bajjani ba'e tiitiije'yo. Mano'yo ajja poaje". Jamajjeya ¿apiojji miyaya huohuinaje ojjañaja Edoe Mese manoje'yo acui ecueata'apeejo ba'ehuanasohuajea cajje? ¿A'a miya Eyacuiñajjiya huoojea'yo? ¿A'a miya ojjañaja Edoe Mese ma Quito bajjaniya? —onaaya huohui'ajja canaje.

³⁵Jesosaa oya cuana saja'a canaje jama ba'a: —Eyaya miquiana huasijje esohui huohuije oe pojji cahuime. Ecuea esohui cuaquijji sisi jayojja. ¡Jjeya nei ecuea esohui jayojja jama acue! Jamajjeya miya poquiquehua ajja. Pea cuana ecuea esohui shajja'ajja sa po ajjajo poquiquehua tiitiije'yo. Jiquio ecua mecajje quea misijo cuaquisho chana' epoquijji jayojja jama ojjaña joya ecue sohui jayojja jama a'lajja, quea mimishi ba'yani. ³⁶E'e, ecue sohui cuaquijji quea ja'a jayojja jama. Jamajjeya eya minijje nequijo, jecuea esohui jayojja jama acue! Jamaya miquianaya ecuea epeejji quea ja'a nee poaje'yo. Poquiquehua ajja dejja mimishi jayojja jama epoiji pojjeama —poanaje Jesosa.

Majoya esohui huohui majje Jesosa poquinaje. Jja'aniquehuaquinaje.

Jodio cuana Jesosa nijje jjapeequi ajja tii

³⁷E'e, Jesosaa quea huiso ma dejjaajjima acani acanaje. Ojjañaa ba canaje. Jamatii Jodio cuaa huohui canaje jama ba'a: —Chojja, Jesosa Eyacuiñajjiya huoojeal'yo ojjaña jaahuanajji pojjeama —poanaje jjashajja'ajjaqui ajja jjejojo.

³⁸Yahuajo nei Eyacuiñajija esohui huohuijji Isaia bajjaniya tehue ca poa Jodio cuanajo jama ba'a:

“Eyacuiñajji, Jodio cuana ecuanaja esohui shajja'ajja sa po'yo ajja.
Miyaya ma dejjaja ba jjima aña. Ba huicha'a huicha'a majje
jamatii oya cuana jjashahuabaqui sa po ajja”.

³⁹Jamajoya Isaiaa yahuajo nei nei oya cuanajo tehue ca poa jama pea'ai ba'a:

⁴⁰“Jodio cuana cojjama' jayojja jama poanijo, miyaya ma dejjaja ba
jjima aña ba majje jjabahuejjaqui mee jjima mijo. Quea sapa ca'a
jjejojo miquea ejjashahuabaquijjijo jjabahuejjaqui mee jjima.
Jamajjeya minijje jjapeequi ajjajo Jodio cuanaja mimishi cuana
ecuijea'yoji pojjeama”.

Jamaya Isaiaa yahuajo tehue ca poa Jodio cuanajo. ⁴¹E'e, Eyacuiñajjiya yahuajo nei nei Isaia Jesosa ba mee majje ojo tehue mee ca poa jama ba'a: “Oya quea ca'a nee nee poani. Oya Eyacuiñajija huoojea'yo ojjaña jaahuanajji”.

⁴²Jamatii quea huiso Jodio etii cuaa quehuajje Jesosajo jama acanaje ba'a: —E'e jojo nei oya Jesosa Eyacuiñajijiya huoojea'yo ojjaña jaahuanajji —quehuajje poanaje Jodio etii cuana, Paniseo cuana yajjajo.

E'e, Paniseo cuana yahuajo jama poanaje ba'a: —Jesosa nijje jjapeequi aje oe ecuanaja equi ojee ejjachichaquijji yasijje edobiqui meeji pojjeama; jhuoojeacuayajeje'yo mi! —poanaje Paniseo cuana.

Jamajjeya beca Jodio etii cuana quea ajjaja poanaje ehuoojeacuayajea ca poanijje. ⁴³E'e, Jodio cuana jjashahuabaqui ajja Eyacuiñajji quea bei epo mee'yojji. Chojja, oya cuana aje oe jjashahuabaquinaje pea Jodio cuana quea bei epo mee'yojji onijje.

Jesosaa quijje ojjaña huohui caje'yo joya ojaya epeejji nei

⁴⁴Jamajjeya Jesosaa ojjaña ejjachichaqui nequi janobajjima nei, quea ja'a nee huohui canaje jama pea'ai ba'a: —Ecue Chiiya, Eyacuiñajjiya eya huoojea canaje. Jamajjeya ojjaña joya enijje e'e jojo nei jjapeequiani ecue Chii nijje pea'ai jjapeequiani. ⁴⁵Beca cuana mimiani jama ba'a: “E'e, Jesosa Eyacuiñajijiya huoojea'yo ojjaña jaahuanajji”. Joya e bajji poaniya Eyacuiñajji ba cani pea'ai, eya ecue Chii jayojjaya poani tii. ⁴⁶¡Bacue! Cuaquijjijiya jeaja'canijo, dejja cuana poquiquehua ajja meccaje quea apojo. Eyaya cuaquijjiji jayojja jamaa ojjaña quea ja'a jjashahuabaqui meesahuaña. Jamajjeya ojjaña joya enijje jjapeequiani mimishi cuana pajea meeje'yo. Jamajoya Eyacuiñajjiya eya huoojea canaje ojjaña cuana mimishi pajea mee'yohua. ⁴⁷Ecuea esohui shajja'ajja majje beca cuana jamaya ba'e sa po'yo ajja. Matatii eyaya oya cuana tecuea jjima aña. Eya ca iña poeyanaje ojjaña meshijo ba'eca cuanaja mimishi cuijea'yohua, enijje ba'e tiitii mee'yohua; quea mimishi nee poanijo, quea nee nee po mee sa po'yo ajja. Ecuea ejjashahuabaqui'yojji jama pojjeama ba'a: “Ojjaña quea mimishi nee poani quea nee nee po meeje'yo”. Chojja, eya ca iña poeyanaje ojjaña

meshijo ba'eca cuanaja mimishi cuijea'yohua, enijke eba'e tiitii'yojji. ⁴⁸Ojjañaa joya e cajaa ajji epo quijje quea nee nee poaje'yo cuaquijo ecue huohui jayojja jama ajjimajojo. Jjeya nei eyaya esohui huohuiaña. Quijje eya poe o'oya majje oijaña shajjama' cuana nijje mimije jama ba'a: "Ecuea esohui shajja'ajja jjimajo miquianaya cajaa aje'yo". ⁴⁹E'e, ecue Chiiya, e huoojea'yojji poaniya eya huohui meesahua cani ojaya ejjashahuubaqui'yojji. ⁵⁰Ecuea eba oijaña joya ojaya esohui jama poani Eyacuiñajjiya pea jjashahuabaquime po mee caje'yo. Ba'e tiitii mee caje'yo onijke peal'ai. Jamajjeya, e'e nei oijaña Eyacuiñajjiya huohui canajeya eyaya huohuiaña —Jesosa poanaj e.

**Jesosaja epeeiji cuanaa ojaya pea epeeiji cuana
cajaahuana cahua, caba'e meesahua cahua**

13 ¹E'e, Jodio cuana ojee jjachichaqui o'yanaje Jenosanena huasijje ojee ijja'iijja quea bihui nee epoji, eniñebe'yojji esohuidojijiya yahuajo nei Ejito meshijo Jodioja bacua cuana cuia'yo jjima epajea'yojji pojjeama. Jamajjeya oe cahuime ojee ijja'iijja jjimahuajo, Jesosa jjashahuabaquinaje jama ba'a: —E'e, jiquio shejo eya poquije o'oya eyahuasijje ecue Chii que. Eya ca iña nequi ajja jiquio meshijo.

Jesosaa ojaya epeeiji cuana jiquio meshijo ba'e quea jea nee nee acanaje. ¡Quea jea nee nee Jesosaja ojaya epeeiji cuana! Poqui jjimahuua ohuaya oya cuana jjabahuejjaqui mee canaje.

²⁻⁴Edosiquiana neiya Jodasa Isicaniote, Simonija bacua ejja quea tai jjashahuabaqui mee canaje. Jamajjeya Jodasa jjashahuabaquinaje Jesosa iña meesahuajji, onajaya equecua'yojji. Jamatii Jesosaja eba poanaje jama ba'a: Eyacuiñajjiya, oja Chiiya oya eyajo ani huoojea ca poa meshi yasijje. Jamajjeya oya oja Chii que poquije o'oya. Oja Chiiya oya oijaña huoojea'yojji po mee ca poa peal'ai. Jamajjeya sinecua ecuana nijje, o shajja'ajjajji cuana nijje ojee ijja'iijjianijo Jesosa nequisohuanaje. Oja daqui ao huijjiaeja majje pea daqui ejjacomayijjiquijji ai jayojjajo jjajeyoca'aquinaje. Ma daqui jjajeyoca'aqui majje ohuaya ena sho canaje tepe ai jayojja huasijje. ⁵Majoya ecuana jiojji topo canaje. Topo majje jiojji cui ca'yonaje ma daquia, ejjacomayijjiquijji ai jayojjaa, Jesosaa. Jamaya poanaje ecuana jjabahuejja meequiviji jama ba'a: Pea cuana quea jea nee aña, ¡ba'e meesahuacue! Jama jjashahuabaquime epo meeiji jiojji topo canaje. ⁶Jamajoya quijje Jesosaa Peno jiojji topo'ajja ca poa.

—Jesosa, miya ecuea Emeshi Mese nei. ¿A'a jjaya iña jiojji topoje pea'ai? —Peno poanaje.

⁷Jamajjeya Jesosaa oya saja'a canaje jama ba'a: —E'e, Peno, jjeya miya jjashahuabaquiani: "¿Yajjajo shai Jesosaa ecuana jiojji topo cani so'o?" miquea ba jjima; yajjajo eya jama aña poso jjabaquiani. Jamatii quijje pishana miquea eba poaje —Jesosa poanaje.

⁸—Chojja, Jesosa, miquea eya ejiojji topoiji pojjeama, de, miya ecuea Emeshi Mese nei poanijo —Peno poanaje.

Jamajjeya Jesosaa oya acanaje: —Peno, miya ecuea epeejji nei pojjeama poaje, ca eyaya miquea ejiojji mi topoajo —Jesosaa oya acanaje.

⁹—¿A'a e'e? Jamajjeya jecuea ejiojji topocue, ecuea eme' cuana, ecuea ecojja pealai, ojjaña topocue! —poanaje Peno, Jesosa nijje jjapee neineiqui sa poanijo.

¹⁰—Peno, miquianaya besanaje. Jamajjeya miya quea boejea. Jamatii jjeya ejiojji nei catopoahua. Jamajjeya miquianajaya mimishi cuijea'yo majje quea boejea a'yonaje. Oe nei nei yani quea boejea pojjeama —Jesosa poanaje.

¹¹Oya jjashahuabaquiani Jodasajo. Ojaya eba Jodasa o iña meeiji epojji. Jamajjeya: “Oe nei yani quea boejea pojjeama” Jesosa poanaje.

¹²Majoya ecuana jiojji topo majje Jesosaa oja daqui ao huosho ca o'oyanaje. Anioque o'oyanaje ecuana nijje. Jama poanaje ba'a: —¿A'a miquea eba yajjajo miquianaya eyaya jiojji toponaje? ¿A'a jjabahuejjaqui jjima pojja'a? ¹³¡Bacue! Miquianaaya eya jama aña ba'a: “Miya ecuea esohui huohuijji”, “Ecuea Emeshi Mese” aña. E'e, jamaya miquianaaya quea pame aña. Eya ca ca iña jiquio, miquianajaya esohui huohuijji, miquianajaya Emeshi Mese pea'ai. ¹⁴E'e, ¡bacue! Eyaya miquea esohui huohuijjiya, miquea Emeshi Meseya miquianaya jiojji toponeaje. Jamajjeya je jayojja jama pocue! ¡Pea cuana jiojji topoji jayojja jama pocue! ¹⁵E'e, eyaya miquianaya jjabahuejjaqui meeaña: ¡Eyaya miquianaya anaje jayojjaya pea cuana acue! ¹⁶Eyaya e'e jojo nei miquianaya ba meeaña jama ba'a: ¿A'a echacojjiya ojaya echacomeejji huoojea cani? Chojja. Emeshi meseya ca ca oe echacojji huoojea cani. Eya quea ca'a nee nee; miya ecuea echacojji quea ca'a pishana. Jamajjeya jecue sohui jayojja jama acue! E'e, ¡pea cuana ba'le meesahuacue oe! ¹⁷Jjeya ecuea esohuijji jjabahuejjaquinaje. Jamajoya miya quea bihui nee poaje'yo ca ecue sohui jayojja jama ba'yajo —Jesosa poanaje.

Jesosaa huohui canaje Jodasa o iña meeiji epojji

¹⁸Majoya Jesosaa jama acanaje ba'a: —Jamatii eya ojjaña miquianajo pojjeama mimiani. Miquianaya ecuea ebabaca; ecuea eba ojjaña. Oe dejja ese nijje nequi ecuea epeejji nisho; Eyacuiñajjija esohui etehue'yo ojo yahuajo nei jama poa ba'a:

“Oya enijje ijjia'ljjia anije. Jamatii aje oe ecuea epeejji nisho oya poaje, e quecua mee'yojji epojji”.

Ecuea eba jiquio etehue'yo jamaya poaje e'e jojo nei. ¹⁹E'e, eyaya miquianaya jjeyahua nei huohuaña jama po jjimahuajo. Jamajjeya quijke pea cuaa eya quecua cajo miquianaya jama ejo jjashahuabaquije ba'a: “E'e jojo nei oya Jesosa Eyacuiñajjija huoojea'yo ojjaña jaahuanajji. Jamajjeya ohuaya eseya huohui canaje yahuajo” jamaya poaje miquianaya quijke. ²⁰E'e jojo nei —Jesosa poanaje pea'ai—, ojjaña joya ecuea echacojji nijje jjapeequiani ecuea esohui huohuijji poanijo, enijje jjapeequiani pea'ai. Eyacuiñajji e huoojea'yojji poanijo, ojjaña joya enijje jjapeequiani Eyacuiñajjija epeejji poani pea'ai oya cuana.

Jesosa miminaje Jodasajo

(Mateo 26.20-25; Macoso 14.17-21; Noca 22.21-23)

²¹ Majoya Jesosa quea yeno nee nee poanaje Jodasaja ejjashahuubaquijji quea tai ba majje. O shajja'ajjajji cuana jama huohuime acanaje ba'a:
—Eyaya miquianaya e'e jojo nei huohuaña. Oe dejja jiquiojo enijje ijjal'ijja ani e iña meesahuajji epoji onajaya equecua'yojji —Jesosa poanaje.

²² Jamajjeya o shajja'ajjajji cuana quea metejo pea nijje ecapashe nei jama poanaje ba'a: —De, ¿ache shai o iña meesahuajji poaje so'o?
—jjashahuubaquime poanaje.

²³ Eya jiquio esohui tehuejji, Huani bajjani Jesosa pejjejo aninaje, eya ojaya quea jea nee nee. ²⁴ Jamajjeya Penohua eya Jesosa huohui'ajja mee canaje: —¿Ache shai o iña meesahuajji poaje?

²⁵ Majoya eyaya ecapashe nei Jesosa huohui'ajjanaje jama ba'a:
—Jesosa, ¿aya acuae mi quecua mee'yo sa acani so'o?

²⁶ Jesosaa acanaje: —Pahui noe najo peshepeshe mee majje eyaya maya quiaje, ma e iña meejjji epoji.

Majoya Jesosaa pahui noe najo peshepeshe mee majje quia canaje Jodasa, Simonija bacua ejja: —Ma'a je, Jodasa —poanaje.

—Ocuee, Jesosa —acanaje Jodasaa.

²⁷ Pahui ijja anijo Edosiquiana neiya Jodasa quea tai jjashahuubaqui mee canaje jama ba'a: “¡Onaya eyaya Jesosa iña meesahuaje!”

Majoya aje Jesosaa jama acanaje ba'a: —¡Poquicue, Jodasa! ¡Miquea ejjashahuubaqui'yojji jayojja jama acuajicue jjeyahua nei! —Jesosa poanaje.

²⁸ Pea shajja'ajjajji cuana jama poanaje ba'a: —¿Yajja poanaje Jesosa?
¿Ajeo Jesosaa Jodasa huoojea canaje so'o? ²⁹ Jodasaa bashosoco sisi esejaya ejjeshejji biojji dojo canaje. E'e pojja'a huoojea canaje bobi jjequiya, quijje ojee e'lijjajji pojja'a —poanaje.

Beca eshajja'ajjajji cuana jama poanaje ba'a: —E'e pojja'a Jesosaa Jodasa huoojea canaje bejjo quiaa aema' cuana huasijke —poso acanaje cuaa.

³⁰ E'e, Jesosaa huoojea cajje Jodasa pahui ijja majje poquinaje esecue yasijke. Jjasinecuaquiajo poquinaje.

Jesosaja esohui eyacua

³¹ Majoya Jodasa poqui'yajo, Jesosa ecuana nijje jama poanaje ba'a:
—Eya ojjañaja Edoe Mese. Eyacuiñajjiya jjeyahua nei ojjaña ba mee caje eya quea ca'a nee nee poani. Ma ba cajo, eyaya ojjaña jjabahuejjaqui meeje Eyacuiñajji quea ca'a nee nee, quea pame nee nee. ³² E'e, Eyacuiñajjiya eya ma dejjaajjima acani amee canaje ojjaña jjabahuejjaqui meenaje oya quea ca'a nee nee. Jamajjeya Eyacuiñajjiya jjeyahua nei ojjaña jjabahuejjaqui mee caje eya quea pame nee nee poani. E'e, Eyacuiñajjiya eya shequi mee'yo majje jjequisohua caje'yo eyahuasijke —Jesosa poanaje.

³³Majoya Jesosaa ecuana huohui canaje jama ba'a: —¡Miquianaya ecue bacua cuana jayojja, shajja'ajjacue mo! Eya minijje nequije oe pojji cahuime. E poqui'yajo, miquianaaya eya sa'ajjaje'yo. Jamatii jjeya nei poqui meemee ajja e poquiani yasijje. Jamaya yahuajo eyaya pea Jodio cuana huohuinaje pe'a'i. ³⁴Jamajjeya esohui eyacua eyaya huohuaña jama ba'a: ¡Pea cuana quea jea nee nee atiiticue! ¡Eyaya miquianaya quea jea nee nee aña jayojja jamaya pea cuana quea jea nee nee acue! ³⁵Pea cuana quea jea nee nee añajo, onaya miquianajo jama poaje ba'a: "E'e jojo nei miquianaya Jesosaja epeejji poani" —Jesosa poanaje.

³⁶Peno Simohuiya Jesosa huohui'ajja canaje jama ba'a: —Emeshi Mese Jesosa, ¿achacua acuae shai mi poquije'yo? —acanaje.

—Peno, jjeyahua nei miya epoquijji pojjeama e nequi yasijje. Quijje poe meeje e ani yasijje —Jesosa poanaje.

³⁷Penohua huohui'ajja canaje: —¿Yajjajo acuae jjeya eya minijje mi poqui meeaña? Miya ecuea quea jea nee neejo eyaya jaahuanaje'yo. Manoje'yo mi jaahuanajji.

³⁸Jesosaa quea yenohua Peno jama acanaje ba'a: —¿A'a miya manoje'yo e jaahuanajji? Chojja Peno, e'e jojo nei jiquio meccajje cachina yahue taaa jjimahuajo, miya ej'o jama po huicha'a huicha'aje ba'a: "¡Chojja, Jesosa ecuea ba jjima nei nei!" miya quea mete po majje pea beca peejjima huohuimeya aje —Jesosa po anaj e.

Jesosaa ojaya epeejji quea bihu nee po mee canaje

14 ¹Jesosaja esohui shajja'ajja majje ecuana quea yeno, quea mete poanaje. Jamajje Jesosa ecuana nijje miminaje jama ba'a: —¡A'a quea mete pojji! ¡Jiquio jama jjashahuubaquicue ba'a: "Eyacuiñajjiya eya jaahuanajcaje'yo tii" pocue! ¡Ejo jama jjashahuubaquicue pea'a'i ba'a: "Jesosaa eya jaahuanajcañi tii" pocue! ²Ecue Chii Eyacuiñajji eyajo ani. Jocuama ojaya eba'ejji quea huiso nee yani. Ecuea esohui e'e jojo nei, siajje pojjeama. Eya poquije ecue Chii que miquianajaya eba'ejji iyaa, apoa yajji. ³E'e, eyaya miquianajaya eba'ejji iyaje. Jamajjeya e'e jojo nei eya poeje o'oya. Poe o'oya majje eyaya miquianaya dojoje enijje eba'e tiiti'yojji. ⁴Miquianajaya eya eba ecue Chii que poquije. Miquianajaya eba pea'a'i ecue Chii que epoquijji —Jesosa poanaje.

⁵Majoya Tomasi Jesosa nijje jama poanaje ba'a: —Jesosa, ¿achacua miya poquije'yo? Joya mi poquije yasijje ecuanajaya ejiojji ba jjima, de. Jamajjeya ecuanajaya eba pojjeama ejiojji ma mi poquiani yasijje epoquijji —acanaje Tomasiya.

⁶—Tomasi, ojjaña ecue sohui e'e jojo nei. Eya ejiojji eyahuasijje epoquijji jayojja. E'e, ecuea esohui jayojja jama poanijo, miya ecue Chii ba'yani yasijje poqui meeje'yo. Ojjaña enijje jjapeequiani eyaya ba'e tiiti meeje'yo ecue Chii nijje tii. Ojjaña joya enijje jjapeequi ajja ca ca ecue Chii nijje eba'e tiiti'yojji pojjeama. ⁷Eya miquianajaya eba jojemo miquianaaya ecue Chii bame pea'a'i poaje. Jjeya nei oya miquianajaya eba poaje. Jamajjeya eya ecue Chii yasijje poqui'yajo, oya quea ca'a nee nee ani miquianaaya baje —Jesosa poanaje.

⁸Majoya Penipe jama poanaje ba'a: —Jesosa, jeseja Chii ai ecuanaya ba meecue! Jamajjeya ecuana quea bihui nee nee poaje'yo —poanaje Penipe.

⁹Jesosaa Penipe acanaje: —Penipe, ¿a'a miquianaya jjabahueijaqui jjima? Eya miquiana nijje ba'enaje quea shequiaja huiso. ¿A'a jjeya miquianajaya eya ba jjima? ¡Bacue oe! E ba majje esejaya Chii eyajo miquianajaya eba pea'ai. Jamajjeya ¿apiojji acuae miya jama poani so'o ba'a: “¡Esejaya Chii ai ecuanaya ba mee socue!” poani miya? —Jesosa poanaje—. ¹⁰E'e jojo nei eya ecue Chii jayojjaya, de. Oya e jayojjaya pea'ai. ¿A'a miquianaya jamaya jjashahuabaqui jjima? Ecue Chii nijjeya eyaya ohuaya jayojja aña, ma dejaa ajjima acani aña. Ecue Chiija ejjashahuabqui'yojji eyaya huohuaña pea'ai, ecuea ejjashahuabaqui'yojji pojjeama. ¹¹E'e jojo nei eya ecue Chii jayojjaya, de. Oya e jayojjaya pea'ai. ¡Jamaya jjashahuabaquicue, oe! Ecuea esohuijo miquianaya jjabahueijaqui jjima, ¡jamajjeya jjashahuabaquicue eyaya ma dejaa ajjima aña! ¡Jama acue ba'a: “E'e, Jesosa Eyacuiñajji jayojjaya” acue miyaya! —Jesosa poanaje—. ¹²Eyaya huohuaña e'e jojo nei jama ba'a: Ojjaña enijke e'e jojo nei jjapeequianiya eyaya aña jayojja jama acaje'yo. Eyaya quea huiso pishana jjapeequi mee'yonaje Eyacuiñajji nijje. Eya ecue Chii que poqui'yajo, ecuea epjeeji cuaa quea huiso nee nee pea cuana jjapeequi meesahua caje'yo onijke, Eyacuiñajji nijje. ¹³Jiquio ecua miquianaya enijke mimije jamaya eyaya aje'yo, ca ejo jama jjashahuabaquianijo ba'a: “E'e jojo nei Jesosaa ma ecua eya onijke mimiani jamaya acaje'yo”. Jamajoya ba majje ojjañaa ecue Chii bihuia caje jama ba'a: “Eyacuiñajji, ecuanaja Chii ai, miya quea ca'a nee nee eyajo ani”. ¹⁴Enijke mimicue jama ba'a: “¡Jesosa, jiquio ecua eya mimiani minijke jamaya miyaya acue!” Jamajjeya miya enijke poanijo eyaya joya ecua miya enijke mimiani jamaya aje'yo —Jesosaa ecuana huohui canaje.

Jesosaa huohui canaje Edojjoshahua Pameja epoejjijo

¹⁵Majoya Jesosaa ecuana, o shajja'ajjajji cuana huohui canaje jama ba'a: —Eya miquianajaya quea jea nee poanijo, jecuea esohui jayojja jama acue! ¹⁶Jamajjeya eya eseja Chii nijje mimije jama ba'a: “Ecue Chii, ¡Edojjoshahua Pame huoojeacue ecuea epjeeji cuana jjabahueijaqui mee'yohua! Oya ecuea epjeeji cuana nijje ani tiitiije'yo”. ¹⁷E'e, Edojjoshahua Pameya miquianaya esohui e'e neijo jjashahuabaqui mee caje'yo. Ecuea epjeeji pojjeama ca ca Edojjoshahua Pame nijje ejjapeequi meejjji pojjeama. Oya miquianajaya eba. Pea cuanaja oya ba jjima. Oya miquiana nijje enequi tii tii. Miquiana que dobiquije'yo, Edojjoshahua Pame —Jesosa poanaje.

¹⁸—Ecuea epjeeji, eya poquije'yo, miquianaya jeanaje'yo jiquiojo tii. Jamatii ecuea miquianaya jaahuana jjima jayojja jeansa'yome ajjima. Chojja. Eya miquiana huasijje huoojeaje'yo Edojjoshahua Pame miquiana nijje jjapeequi tiitiiya, miquiana jaahuana tiitiil'yoji. ¹⁹Quije pishana ecuea epjeeji pojjeama cuaa eya ba maja ajja. Miquianaaya ca ca eya baje o'oya. Eya ba'le tiitiije'yo, miquianaya pea'ai

ba'e tiitije'yo —Jesosa poanaje—. ²⁰Edojoshahua Pame poeyajo, miquianaya jjabahuejjaquije jama ba'a: Eya ecue Chii jayojjaya tii poani. Eya miquiana nijje nequi, miquianaya enijje nequi pe'aai —Jesosa poanaje—. ²¹Ojjaña joya quea e jea nee nee poani ecuea esohui shajja'ajja majje jamaya poani. Eya ojaya quea jea nee nee poanijo, oya ecue Chiija quea jea nee nee pe'aai, ecuea quea jea nee nee pe'aai. Eyaya oya ba meeje jama ba'a: Eya e'e jojo nei onijje ani tii tii —Jesosa poanaje.

²²Majoya pea Jodasa, ma Jodasa Isicaniote pojjeama, Jesosa nijje jama poanaje ba'a: —¿Yajjajo acuae miquea epeejji pojjeama mi jjaba meemajaquije so'o? Ecuanaa ca ca miya baje o'oya —huohui'ajja canaje pea Jodasaa.

²³Jesosaa oya jama acanaje ba'a: —Ojjaña joya quea e jea nee poaniya ecuea esohui jayojjaja jama acaje'yo tii. Jamajjeya ecue Chiiya oya cuana quea jea nee acaje'yo. Eya, ecue Chii pe'aai onijje jjapeequije'yo.

²⁴Pea cuana ca ca ecuea esohui shajja'ajja sa po ajja, e boti'ama jjejojo. Miquianaaya shajja'ajjaña. Ecue Chiiya eya huoojea canaje. Ojaya ejjashahuubaquijji eyaya miquianaya huohuiaña, ecuea ejjashahuubaquijji pojjeama. ²⁵Jamaya eyaya huohuiaña, miquiana nijje nequiya. ²⁶Ecue Chiija eba miquianaya ecuea epeejji poani. Jamajjeya ohuaya Edojoshahua Pame huoojea caje miquiana huasijje, miquiana jaahuanaa, miquiana enijje ejjapeequijji pe'aai. Poe majje ohuaya miquianaya ba meesahua caje'yo Eyacuiñajjija ejjashahuubaquijji cuana. Ojjaña ecuea esohuijo ohuaya miquianaya jjashahuubaqui mee caje'yo tii tii pe'aai —Jesosa poanaje.

²⁷—Eya quea bei nee nee. Eyaya miquianaya quea bei po meeña —Jesosa poanaje—. ¡Jamajoya quea bei pocue, e jayojja! ¡Mete'ama, yeno'ama pe'aai pocue! Ecuea epeejji pojjeama cuanaja aje oe miquianaya quea bei nee epo mee'yojji pojjeama, de. ²⁸Eyaya huohuinaje jama ba'a: Eya ecue Chii que poquije'yo. Poqui majje quijke eya poeje o'oya miquiana que. E'e, eyaya miquianaya huohuinaje jama ba'a: Eya poquije'yo ecue Chii que. Ecue Chiiya eyajo aniya ma dejjaja ba jjima quea huiso nee nee acani. Eyaya jiquiojo ma dejjaajjima acani oe pojji aña —Jesosa poanaje—. Jamajjeya miquianaya quea e jea nee poanijo, ¡queabihui nee pocue ejo, eya ecue Chii que poquianijo pe'aai! ²⁹E'e, eyaya miquianaya jjeyahua nei huohuiaña, eya ecue Chii que poqui jjimahuajo. Jamajjeya e poqui'yojjo miquianaya jama poaje ba'a: “E'e jojo nei Jesosaa poqui jjimahuua esaeya huohui canaje. Oya Eyacuiñajjija Bacua Ejja poeje o'oya” aje quiana oe poaje —Jesosa poanaje—. ³⁰Eya miquiana nijje jjeya nei mimi majamaja ajja. Edosiquiana nei poeyani e napaa. E'e, Edosiquiana nei, ma ojjaña meshijo dejja mimishi huoojeal'yojji poani e napaa poeje. Ojaya eya ejebichajejjia pojjeama. ³¹Jamatii eya quea nee nee poaje. Quea nee nee poaniya ojjaña ba meeje jama ba'a: “Jesosaja oja Chii quea jea nee nee. Oja Chiija ehuohui jayojjaja jama poani pe'aai” acaje cuaa. Mahuiso —Jesosa poanaje—. E'e. ¡Jjeya nequisohuacue! ¡Cual'a, esecue yasijje cuayaquicue! —Jesosa poanaje.

Jamajjeya equi quecuayijji eyajo ani ijji'lijja ani cuayaquinaje esecue yasijje acui yiye yasijje epoquijji.

Esohui eba meesahuajji uvajo bashococo ai jayojjayajo

15 ¹Majoya ejicjjije poquijeya Jesosaa ecuana huohui canaje: —Eyaya esohui mi ba meesahuajji huohuije uvajo, bashococo ai jayojjajo. Eya bashococo ai emaijje quea pame jayojja jama poani. Ecue Chii bashococo ai cuiñajji jayojja jama. ²Bashococo ai cuiñajjiya yaa sisi nojinoji'yajo tetojea ca'yani jjajja ajjajojo. Eña ba chii tetojea ca'yani pea'ai, jjono quea jjajja huiso epoji. Jiquio ecua jjono bashococo ai cuiñajjiya yaa enojinoji tetojea ca'yani jayojja jama ecue Chiiya ecuea epeejji nisho cuana cajaa acani. Jiquio ecua eña ba chii tetojea ca'yani jayojja jama epeejji e'e jojo nei cuana mimishi pajea mee cani, quea pame nee nee epoji. ³Ecuea esohui shajja'ajjanajejo miquianaya quea ja'a poanaje. Jamajjeya miquianaya bashococo ai jjono quea pame jayojja jama poanaje. ⁴¡Enijke jjapee tiitiiquicue! Jamajjeya eya miquiana nijje jjapee tiitiiquije'yo. Jamajjeya miquianaya ma dejjaajjima acani ameeje'yo. ¿A'a jjono emaijje jjasejjaqui majje jjajjaje so'o? Chojja. Jamaya miquianaya enijke jjapee pajeaqui'yo majje quea pame po ajja. Emaiijje jjasejjaqui'yo jjima jjonajjani —Jesosa poanaje.

⁵⁻⁶Eya jjono emaijje quea pame nee jayojja. Miquianaya jjono emaijo pohuani jayojja. Jjono emaijje jjasejjaqui'yo majje nojinojije. Joca'yajo chicha'yoy majje dahuajea ca'yani cuaa. Oya jayojjaya ojjaña enijke jjapee pajeaqui'yan cajaa acani. Joya enijke jjapee tiitiiquiani ca ca eya jjapee tiitiiquije'yo onijke pea'ai. Jamajjeya oya cuana ma dejjaajjima acani quea huiso ameeje'yo. ⁷E'e, miquianaya enijke jjapee tiitiiquianijo, ecue sohui jayojja jama atiitiañajo pea'ai, Eyacuiñajji joya ecua miquianaaya huohuinaje jamaya acaje onijke mimiyajo. ⁸Miquianaya ma dejjaajjima amee cani ba majje pea cuaa huohui caje jama ba'a: “E'e, Eyacuiñajji quea ca'a nei. Jiquio dejja cuana e'e jojo nei Jesosa shajja'ajjajji cuana” acaje cuaa.

⁹—Ecue Chiiya eya quea jea nee nee acani jayojja jama miya ecuea quea jea nee nee. Jamajjeya ¡eya miquianaaya quea jea nee nee pea'ai acue! ¹⁰E'e, eya ecue Chiiya quea jea nee nee poani, eyaya ojaya esohui jayojja jama atiitiañajo. Jamaya ecuea esohui jayojja jama poanijojo, miquianaya ecuea quea jea nee nee poani pea'ai —Jesosa poanaje.

¹¹—Eyaya jiquio esohui huohuaña miquiana quea bihui po meeiji. E'e, eyaya miquianaya quea bihui nee nee po mee sa aña. ¹²Eyaya miquianaya huohuina'yaña jama ba'a: ¡Pea cuana quea jea nee nee acue! ¡Jiquio ecua eyaya miquianaya quea jea nee nee aña jamaya acue cuana! ¹³Ojaya epeejji quea jea nee nee acani oe dejja manoje'yo ojaya epeejji nahuejo. Jamajjeya ¡ojaya oja epeejji quea jea nee nee poanijo nahue cani! ¹⁴Miquianaya ecuea quea jea nee nee; ecuea esohui jayojja jama poanijo ecuea epeejji e'e jojo nei poani. Jamajjeya eya miquiana nahuejo manoje'yo. ¹⁵Echacojjija ba jjima ojaya echacomeejjija ejjashahuabaqui'yojji. Ojaya epeejji ca ca ba mee cani. Jamajjeya jjeya eya jama po ajja ba'a: “Miquianaya ecuea echacojji poani”.

Chojja. Jjeya eya jama poani ba'a: "Miquianaya ecuea epeejji poani". E'e, ojjaña joya ecue Chiiya huohui canaje eyaya miquianaya ba meenaje ecuea epeejji poanijojo —Jesosa poanaje—.¹⁶ ¡Bacue, oe! Eya miquianajaya ebabaca pojjeama. Eyaya ca ca miquianaya babaca'yonaje ecuea epeejji epoji. Eyaya miquianaya huoojeaña ecue Chii nijje quea pame nee chacohua. Jamajjeya ¡pea cuana enijke jjapeequi meesahuacue! Jamajjeya enijke jjapeequianijo miquianaya cojjacahuijanijo. Eyacuiñajji nijje emimijji ohuaya miquianaya saja'a acaje —Jesosa poanaje—.¹⁷ Jamajjeya eyaya miquianaya huohuina'yaña jama ba'a: ¡Pea cuana quea jea nee nee acue! —Jesosa poanaje.

Eshahuaja epeejji cuanaja boti'ama nei nei poaje miquianaya

18—¡A'la quea yeno pojji dejja mimishi cuana miquiana nijje quea quene poanijo! Dejja mimishi cuana miquiana nijje quea quene nee nee po jjimahuajo enijke quea quene nee nee poanaje.¹⁹ Miquianaya dejja mimishi jayojja ba'e jojjemo ojaya quea jea pome miya ojaya pea epeejji quea jea jayojja. Jjeyahua nei miquianaya ona jayojja pojjeama, eyaya miquianaya babaca'yonajejo. Jamajjeya miquiana nijje quea quene nee nee poani dejja mimishi cuana.²⁰ ¿A'a ecuea ehuohui'yo baña? Jama ba'a: Echacomeejji quea sohui ca'a; echacojji ca ca ca'a'ama. Jamajjeya eya napa caje cuaa jayojja jama miquiana napa caje pea'ai. Ecuea esohui shajja'ajja canajejo, miquianajaya esohui shajja'ajja caje'yo pea'ai, onaaya.²¹ E'e, e acaje'yo jayojja jama miquianaya acaje'yo cuaa enijke jjapeequianijo. E'e, oya cuaa jamaya acaje'yo, Eyacuiñajji, e huoojea'yojji epo ba jjimajojo.²² E meshi yasijje, dejja mimishi cuana huasijje poe jjima jojjemo, esohui huohui jjima jojjemo pea'ai Eyacuiñajjiya shajjama' cuana quea nee nee po mee'yo ajja acame. Jamatii jjeya eyaya ojjaña huasijje esohui e'e nei huohuinajejo, jama po mee ajja ba'a: "Ecuea mimishi chama!. Ecuea shajja'ajja jjima". Chojja. Oya cuana quea mimishi tii —Jesosa poanaje—.²³ Joya e boti'ama aiji poaniya ecue Chii boti'ama pea'ai acani.²⁴ Eyaya dejja mimishi nijje nequiya ma dejja aijima acani a'yonaje. Ma dejja aijima acani ecuea aijima jojjemo Eyacuiñajjiya oya cuana tecuea jjima acame. E'e, onaaya ba canaje eyaya ma dejja aijima acani aña. Jamatii eya ecue Chii pea'ai boti'ama nei nei onajaya.²⁵ Yahuajo nei nei Eyacuiñajjiya esohui huohuijjiya esohui tehue ca poa ejo jama ba'a: "Eya quea pame nee poani. Jamatii dejja mimishi cuanaja eya boti'ama nei nei"—Jesosa poanaje—. Jjeya jamaya dejja mimishi cuana poanaje enijke, esohui huohuijjiya etehue'yo jama —Jesosa poanaje.

26-27—Miquianaya enijke aninaje ma eya dejja cuana huasijje esohui huohui coonajejo. Jamajjeya ¡miquianaya esohui e'e jojo nei ejo huohuicue ojjaña cuana huasijje! —Jesosa poanaje—. E poqui'yajo Edojjoshahua Pame poeje miquiana quea bihui nee po mee'yohua. Jjeya oya ecue Chii nijje yani. Eyaya oya huoojeaje miquiana que miquiana jaahuanaaa. Ohuaya Eyacuiñajjiya esohui e'e jojo nei ejo miquianaya ba meesahua caje'yo. Jamajjeya miquianaya jjashahuabaquije ejo —Jesosa poanaje.

16 ¹—Eyaya miquianaya jamaya huohuaña jjeya. Jamajjeya ecuea esohuijo quijje miquianaya enijke ejjapee pajeaqui'yojji pojjeama onaa napa cajje. ²Jodio cuana miquiana nijje quea quene poaje. Jamajjeya quijje, Jodioja equi ojee ejjachichaquijji yasijje dobiquiyajo miquianaya huoojeacuaya caje'yo esecue yasijje Jodio cuaa. E'e, quijje miquianaya quecua'yo majje oya cuana jjashahuaba quehuaquije jama ba'a: “Ecuaaya oya cuana quecua'yonaje. Jamaya Eyacuiñajjija quea boti” jama posoya acaje cuaa.

³—Jamaya acaje cuaa Eyacuiñajji ba jjimajojo, eya pea'ai ba jjimajojo. ⁴Jjeya eyaya miquianaya huohuaña. Jamajjeya quijje onaa napa cajje miquianaya jama poaje ba'a: “Jesosaja esohui yahuajo jayojja jama jjeyahua nei acani cuaa. Ecuana napa cani, onaaya” jamaya poaje —Jesosa poanaje—. Yahuajo miquiana nijje mimi coo majje eyaya miquianaya huohui jjima. Miquiana nijje enequiya jjejojo mi huohuinaje —Jesosa poanaje.

Edojjoshahua Pame poeje

⁵—Yahuajo eya eyajo ani ecue Chiiya huoojea ca poa jiquiacua. Jjeyahua nei eya o que poquije o'oya. Jamatii eya miquianajaya huohui'ajja jjima jama ba'a: “¿Achacula miya poquije'yo?” ajjima. ⁶Eyaya miquianaya huohuinaje jama ba'a: “Eya poquije'yo”. Jamajjeya miquianaya quea yeno nee poani. ⁷Jamatii eyaya miquianaya e'e jojo nei huohuiña: Poqui'yo majje eyaya miquianaya queabihui nee po meeje'yo. E'e, ecue Chii que poqui'yo majje eyaya Edojjoshahua Pame huoojeaje miquiana que. E poqui'yo ajja jojjemo ca ca oya poe jjima pome. ⁸Ecuea epeejji pojjeamaja ejjashahuubaquijji quea quehua. Jamajjeya poe majje Edojjoshahua Pameya oya cuana jjabahuejjaqui mee caje. Oya cuana quea mimishi poani, quea mimijjequiea poani. Edojjoshahua Pameya oya cuana quea ja'a nee ba mee caje'yo pea'ai. Eyacuiñajjiya ojjaña joya quea mimishi poani tii quea nee nee po mee caje'yo tii tii pea'ai. Jamaya ojjaña ba mee caje'yo, Edojjoshahua Pameya. ⁹E'e, Edojjoshahua Pameya ojjaña jjabahuejjaqui mee caje jama ba'a: Enijke jjapeequi sa po'yo ajja jojoya aje oe ojjaña quea mimishi poani. ¹⁰Ecue Chiiya eya shequi o'oya mee majje o que jjequisohua calyajo, Edojjoshahua Pameya ojjaña ba mee caje eya quea pame nee nee. Jamajjeya eyaya ojjaña quea ja'a nee ba'e meeje'yo. Jjeyahua nei ojjaña ecuea epeejji pojjeamaja eba majaji pojjeama tii. ¹¹Dejja mimishi huoojeajjijo, Edosiquianajo Eyacuiñajji miminaje jama ba'a: “Eyaya Edosiquiana nei quea nee nee po meeje'yo tii tii. Jamajjeya ojjaña quea mimishi poani quea nee nee po meeje'yo pea'ai”. Jamaya Edojjoshahua Pameya ojjaña jjashahuubaqui mee caje, poe majje —Jesosa poanaje.

¹²—Ecuea pea ejjashahuubaquijji yani quea huiso, miquianaya huohui jjima ecuea. Jamatii jjeya miquianajo quea quehua poaje; jamajjeya jjeyahua eba

meejji pojjeama. ¹³Jamajjeya Edojoshahua Pameya poe majje miquianaya ojjaña esohui e'e nei ba meesahua caje'yo ejo. Ojaya ejjashahuabaquijji pojjeama ohuaya miquianaya ba meesahua caje'yo. Chojja, ecue Chiija esohui ba meesahua caje'yo. Edojoshahua Pameya miquianaya ba meesahua caje'yo ojjaña ma Eyacuiñajjiya quijje acaje. ¹⁴Jamajjeya ecuea esohui ba meesahua cajo, miquianaaya eya bihuiae'yo jama ba'a: "E'e de, Jesosa quea pame nee nee, quea ca'a nee nee poani" miquianaya poaje. ¹⁵Ecuea ejjashahuabaquijji ecue Chiija ejjashahuabaquijji jayojjaya tii tii poani. Jamajoya eyaya huohuiaña jama ba'a: Ecuea esohui ba meesahua caje'yo Edojoshahua Pameya —Jesosa poanaje.

Jesosa mano'yo majje shequije o'oya

¹⁶—E'e, jjeya nei eya miquianajaya ba jjima poaje. Majoya quijje pishana baje o'oya. Majoya ecue Chiiya eya jjequisohua caje'yo o que —Jesosa poanaje.

¹⁷ Jamajjeya ecuana, Jesosa shajja'ajjajji cuana ojee mimimiminaje jama ba'a: —¿Yajjajje shai Jesosa jama poani ba'a: "Jjeya nei miquianajaya eya ba jjima poaje. Majoya quijje pishana baje o'oya. Majoya ecue Chiiya eya jjequisohua caje'yo o que" poani? —poanaje ecuana. ¹⁸Ojee mimi majamajanaje jama ba'a: —¿Ajeo oya mimiani jama ba'a: "Jjeya nei?" Ecuanaja quea quehua ojaya esohui —poanaje ecuana.

¹⁹Ecuana ejjashahuabaquijji Jesosaja eba poanaje. Jamajjeya ohuaya ecuana huohui'ajja canaje: —Eya jama poanaje ba'a: "Jjeya nei miquianajaya eya ba jjima poaje. Majoya quijje pishana baje o'oya" poanaje. Jamajjeya: "¿Ajeo shai oya Jesosa mimiani so'o?" miquianaaya huohui'ajjaña. ¿A'a e'e? ²⁰E'e jojo nei jjeya nei miquianaya quea yeno nee nee poaje. Ecuea epeejji pojjeama ca ca quea bihui nee nee poaje. E'e, miquianaya pa neineije. Jamatii quijje pishana quea bihui nee nee poaje o'oya, miquianaya. ²¹E'e, epona bacua nee majje quea yeno poani, quea bacua nee nee jjejojo. Jamatii bacua cuaya majje quea bihui nee poani. Ebacua ba majje enaese jjashahuabaqui maja ajja ebacua neejo. ²²Jiquio ecua bacua nee majje epona quea yeno nee poani jayojja jama miya jjeya quea yeno nee nee poaje'yo. Jamatii eya ba o'oya majje quea bihui nee nee poaje'yo. Quea bihui nee nee epo pajea mee'yoji pojjeama cuanaja mi —Jesosa poanaje.

²³—Jamajjeya eya ecue Chii que poqui'yajo, miquianajaya e ehuhui'ajja majajji pojjeama; enijke mimi ajja aquiana sa poanijo pealai. E'e jojo nei, ecue Chii nijke mimiánijo, jaquiana sa poanijo oya huohuicue! Ohuaya miya shajja'ajja caje. Miquianaya enijke jjapeequianijo quia caje joya miquiaa saña —Jesosa poanaje.

²⁴—Yahuajo miquianajaya jamaya ajjima. Ma miquiaa saña ecue Chii huohui jjima enijke jjapeequianijo. Jamajjeya ¡Eyacuiñajji nijke mimicue! Joya ecua miquianaaya oya huohuiaña jamaya ohuaya acaje, ecuea epeejji poanijo. Ohuaya joya miquiaa huohui'ajjajeya quia caje. Jamajjeya miquianaya quea bihui nee po tiitije'yo, e'e jojo nei —Jesosa poanaje.

²⁵—Jjeya eyaya miquianaya ecuea ejjashahuabaquijji sohuihuuinaje, esohui ebamee sahuajjijo ca ca oe huohuinaje. Quijje ca ca eyaya miquianaya ecue Chiijo

huohui neineije esohui quea ja'a neejo, esohui eba meesahuajjijo pojjeama —Jesosa poanaje—. ²⁶E'e, quijje pishana eya ecue Chii que poqui o'oyajo, miquianaya ecue Chii nijje mimijke, enijje pojjeama. ¡AQUIANA SA POANJO CA OE OYA HUOHUICUE! Ecuea epeejji poanijojo ohuaya miquianaya shajja'ajja caje —Jesosa poanaje—. ²⁷E'e, miquianaya ecue Chiija quea jea nee nee, eya miquianaja quea jea nee poanijojo, miquiana ejo quea ja'a jjashahuabiquiamijo pealai. E'e, miquianajaya ejjashahuabiquijji ejo jama ba'a: "Eyacuiñajjiya Jesosa huoojea canaje e'e jojo nei". ²⁸E'e jojo nei eya eyajo ani ecue Chiiya huoojea canaje meshi yasijje. Jjeyahua nei eya meshijo nequi jjima poaje. O que poquije o'oya —Jesosa poanaje.

²⁹Jamajjeya ecuana jama poanaje ba'a: —E'e Jesosa, jjeya miyaya quea ja'a nee huohuiaña, esohui eba meesahuajjijo pojjeama. Maya ecuanaja quea quehua poanaje. ³⁰Ecuanaja eba miyaya ojjaña baña e'e jojo nei. Minijke mimi jjimahuajo, ecuanaja ejjashahuabiqui'yojji miquea eba. Jamajoya jjeya ecuana jama poani ba'a: E'e jojo nei oya Jesosa Eyacuiñajjiya huoojea'yo —poanaje ecuana.

³¹Majoya Jesosaa ecuana jama acanaje ba'a: —E'e, Eyacuiñajjiya, ecue Chiiya eya huoojea canaje. ¡A'a jjeya jamaya miquianajaya eba e'e jojo nei! —Jesosa poanaje—. ³²¡Bacue! Jjeya nei miquianaya eya quea mete po majje jeananaje'yo. Poquicuajije miquianajaya equi yasijje. Jamatii eya ee nei enequijji pojjeama. Chojo, ecue Chii enijje enequi tii —Jesosa poanaje—. ³³Eyaya jamaya huohuiaña. Jamajjeya miquianaya ecuea epeejji nei poanijo quea bei poaje'yo, mete'ama. Jiquiacua ba'yanijo, onaa napa cajje quea nee poaje. ¡Jamatii yeno'ama pocue! E'e, Edosiquiana nei, ojjaña joya ecuea epeejji pojjeama pealai eyaya jeabichajea'yonaje. Oya cuana quea nee nee po meeje'yo tii —Jesosa poanaje.

Jesosa miminaje oja Chii nijje ojaya epeejji cuanajo

17 ¹Majoya ecuana nijje, o shajja'ajjajji nijje mimi majje Jesosa oja Chii nijje miminaje. Eyahuasijje jjabajeasohuaqui majje jama poanaje ba'a: —Ecue Chii, jjeya nei eya manoje'yo. ¡Miquea ejjashahuabiqui'yojji ejo yahuajo, e huoojeanajejo jama acue jjeya, miyaya! ¡Ojjaña ba meecue eya miquea Ebacua Ejja quea ca'a nee nee! Jamajjeya ba majje ojjaña miya bihuia caje. ²E'e, miyaya eya ojjañaja Emeshi Mese nei po mee'yonaje, ojjaña huoojeajji. Jamajjeya ojjaña joya miya enijje jjapeequi meesahuaña ba'e tiitii meeje'yo, eyaya. ³Ecue Chii, miya ca ca oe Eyacuiñajji nei e'e jojo nei. Pea chama!. Eya mique huoojea'yo ojjaña jaahuanajji, Jesosa Quito bajjami. Ojjaña minijke jjapeequianijo, enijje jjapeequianijo pealai, ba'e tiitije'yo eyajo. ⁴Eyaya ojjaña cuana ba meenaje miya quea ca'a nee nee poani. E'e ecue Chii, miyaya eya huoojeanaje miquea echacojji. Ojjaña miquea ehuohui eyaya ajeyojeoyo'yonaje. Apoa anaje. ⁵Ecue Chii, yahuajo nei nei meshi pana jjimahuajo, eya minijke quea ca'a nee nequia poa. Jamajjeya jjeya eya mi que poquije'yo; ¡quea ca'a nee nequi mee'yocue mo, minijke ojjaña huoojeajji! —jamaya Jesosa miminaje oja Chii nijje.

6—Ecue Chii, eya minijje mimiani e shajja'ajjajji cuanajo. Oya cuana yahuajo miquea epeejji pojjeama poa. Miyaya oya cuana enijje jjapeequi meesahuanaje. Jamajjeya eyaya oya cuana mijo jjabahuejjaqui meenaje. Miquea esohui jayojja jama acanaje. Jjashajja'a'jjaquinaje. ⁷ Jamajjeya jjeya ojjañaja eba ojjaña joya miya e ameesahuanaje eyaya aña. ⁸ Ecue Chii, miyaya eya huoojeanaje miquea esohui huohuiya esejaya epeejji cuana huasijke. Miquea esohuijo oya cuana jjashahuabaquinaje. Shajja'ajja majje jama acani ba'a: “E'e, Jesosa yahuajo Eyacuiñajji nijje nequi tiitija poa. Eyacuiñajjiya oya huoojea canaje” poani —Jesosa poanaje.

9—Ecue Chii, eya minijje mimiani esejaya epeejji jaahuanajji. Ecuea epeejji pojjeamajo, eshahuaja epeejjiyo eya mimi ajja. Miyaya esejaya epeejji cuana enijje jjapeequi meesahuanaje. Jamajjeya eya minijje mimiani esejaya epeejji cuanajo, ecuea epeejji miquea epeejji pe'a'i poani jojoya. ¹⁰E'e, ojjaña joya enijje jjapeequiani miquea epeejji poani pe'a'i. Ojjaña joya minijje jjapeequiani ecuea epeejji poani pe'a'i. Ojjañaa eya bihuia cani jama ba'a: “E'e, Jesosa Eyacuiñajjiya huoojea'yo”. ¹¹Ecue Chii, miya quea pame nee nee, quea ca'a nee nee. Jjeya eya mi que poquije'yo, meshijo enequi majajji pojjeama. Esejaya epeejji cuana ca ca jiquiojo nequiye. ¡Oya cuana mimishi'ama po meesahuacue! ¡Miquea esohui jayojja jama atiitii meecue! Jamajjeya ¡ojjaña ojee jjashahuabaqui meecue quea ja'a nee! ¡Eya mi jayojjaya jama ojee jjashahuabaquian! ¡Jamaya oya cuana ojee jjashahuabaqui meecue! ¹²Onijje nequiya eyaya ojjaña joya miya enijje jjapeequi meesahuanaje jaahuananaje mijo. Jamajjeya Edosiquiana nei oya cuana dasia mee jjima anaje, mi quea ca'a nee nee poanijojo. Ojjaña eshahua nijje poquiquehua mee jjima anaje pe'a'i. Oe nei enijje jjapee pajeaqui'yonaje, poquiquehuanaje. E'e, yahuajo nei esohui huohuijjiya ojo tehue ca poa jama ba'a: “Oya epeejji nisho po majje quea nee nee poaje'yo cuaquijo” ojo tehue ca poa yahuajo nei nei —jamaya Jesosa miminaje Jodasajo.

13—Ecue Chii, jjeya eya mi que poquije o'oya. Jiquiojo aniya eyaya ecuea epeejji cuana huohuiña jama ba'a: “Ecue Chii que eya poquije o'oya”. Ma esohuijo oya cuana quea bihui nee nee poaje. E'e, ¡eya quea bihui nee nee poani jayojja jama capoahua oya cuana! ¹⁴Eyaya ecuea epeejji miquea esohui huohuijji, onaaya shajja'ajja canaje. Ecuea epeejji pojjeama cuanaja ecuea epeejji cuana boti'ama. Eya oya cuanaja boti'ama pe'a'i, o jayojja po ajjajojo. ¹⁵Ecue Chii, ecuea emimi minijje ecuea epeejji cuanajo jama ba'a: ¡A'a jjeya nei oya cuana dojosohuaquijji mi que! Chojja, oya cuana ca ca jiquiojo ba'yanijo ¡jaahuanacue quea pame nee! ¡A'a Edosiquiana neiya oya cuana dasia meeji! ¹⁶Eyaya miquea epeejji pojjeama cuanaja ejjashahuabaquijji jayojja jama jjashahuabaqui ajja. Ecuea epeejji cuana e jayojja jama poani, pea cuanaja ejjashahuabaquijji jayojja jama pojjeama pe'a'i. ¹⁷Jamajjeya miquea esohui e'e nei. ¡Esohui jayojja jama poanijo, esejaya epeejji cuana quea ja'a nee nee ba'e meesahuacue, miquea ejjashahuabaquijji jayojjaya!

18Ecue Chii, miyaya eya huoojeanaje ojjaña cuana huasijje miquea esohui huohuiya. Jamaya eyaya ecuea epeejji huoojeaña pea'ai esohui e'e nei huohuiya ojjaña huasijje. 19Miquea ejashahuabaquijji ejo jayojja jama aña eyaya, oya cuana ecuea quea jea nee nee poanijo. E'e, jamaya eyaya aña oya cuana miquea ejashahuabaquijji jayojja jama epo meesahuajji. Jamaya onaaya acaje'yo miquea esohui bajji poaniya jjejojo —Jesosa poanaje.

Jesosa ojjaña joya ojaya epeejji quijke poajejo miminaje oja Chii nijje

20—Ecue Chii, eya minijje mimiani jiquio epeejji cuanajo —Jesosa poanaje—. Oya cuaa miquea esohui huohui caje pea cuana huasijje. Shajja'ajja majje pea cuana esejaya epeejji poaje'yo pea'ai. Ojjaña oya minijje mimiani, ojjaña jaahuanajji. 21 ¡Ojjaña ecuea epeejji cuana jjashahuabaqui meecue miquea ejashahuabaquijji jayojja, ecuea epeejji pojjeamaja ejashahuabaquijji jama pojjeama! Ecue Chii, eya mi jayojjaya poani. Miya e jayojjaya poani. ¡Esejaya epeejji cuana ese jayojjaya ameecue pea'ai! Jamajjeya ojjaña ba caje miya e huoojeajji epo. 22E'e, miyaya eya huoojeanaje miyaya jayojja yajji. Jamaya eyaya oya cuana huoojeaña ese jayojja epojji pea'ai. Jamajjeya oya cuana ese jayojjaya jama ameeña, ojjaña. 23E'e ecue Chii, eya ona nijje jjapeequiani. Miya enijje jjapeequiani pea'ai. Jamajjeya oya cuana cajjashahuubaquiahua ese jayojja, ojjaña. Jamajjeya esejaya epeejji pojjeama cajjabahuejjaquiahua esejo jama ba'a: Miyaya eya huoojea'yonaje. Miyaya eya quea jea nee nee aña jayojjaya esejaya epeejji cuana quea jea nee nee aña pea'ai —Jesosa poanaje.

24—Ecue Chii, yahuajo nei nei, meshi pana jjimahuajo tii, eya miquea quea jea nee nee poa; minijje ojjaña huoojea'yojji poa. Jamajjeya ojjaña ecuea epeejji, ma miyaya enijje jjapeequi mee'yonaje ¡enijje ba'e tiitii mee'yocue eyajo! Jomajo oya cuaa ba caje'yo tii tii miyaya eya ojjaña huoojeajji po mee tiitiiña —Jesosa poanaje.

25—Ecue Chii, miya quea pame nee nee, quea ja'a nee nee nequi. Esejaya epeejji pojjeama cuanaja aje oe miya ba jjima. Eyaya ca ca miya baña. Esejaya epeejji cuanaja eba eya mique huoojea'yo. 26Eyaya oya cuana miya ba meesahuajji poanaje. Jamaya po tiitiije'yo. Jamajjeya miyaya eya quea jea nee nee aña jayojjaya jama pea cuana onaaya quea jea nee nee acaje. Eyaya oya cuana esejaya esohui jayojja jama atiitii meesahuajje'yo pea'ai —Jesosa poanaje oja Chii nijje. Mahuiso ojaya emimi oja C hii ni jje.

Pea cuaa Jesosa iña ca'yonaje

(Mateo 26.47-56; Macoso 14.43-50; Noca 22.47-53)

18 ¹Majoya oja Chii nijje mimi majje Jesosa ecuana nijje poquinaje. Eta'a nama! Senono bajjani ojje mijji yasijje poqui majje onimo acui yiye yasijje poquinaje. ²Yahuajo Jesosa ma acui yiye yasijje poqui majamajanaje ecuana nijje. Jamajjeya jiquio acui yiye Jodasaja eba neinei poanaje, ma Jesosa iña meesahuajji epojji eba neinei poanaje. ³Jamajjeya mecajje onimo yiye yasijje Jodasa

poeyanaje Jesosa que, sohuinano cuana nijje. Jodio etii cuaa, Paniseo cuaa pea'ai sohuinano cuana, Eyacuiñajiji equi cuiñajji cuana pea'ai huoojea canaje Jodasa nijje, Jesosa iñaa. Ojjaña poeyanaje baajji, cuaquijijiji pea'ai.

⁴Jesosaja ojjaña ejjashahuabaquijji cuana ojaya eba poanaje. Jamatii oya cuana que poqui majje huohui'ajja canaje jama ba'a: —¿Ajeo a nequiana ca poeyanaje? ¿Ae sa'ajja'yohua?

⁵—Jesosa ma Nasanenajo ba'enaje sa'ajjaña ecuaaya —poanaje cuana.

—E'e, eya jiquio Jesosa bajjani —Jesosa poanaje.

Jodasa aje oe sohuinano cuana nijje nequinaje, Jesosa iña meeya poe.

⁶Jesosaja esohui shajja'ajja majje sohuinano cuana, Eyacuiñajiji equi cuiñajji cuana pea'ai edaasasje tii jaabichaquinaje, oquequinaje meshi yasijje mete majje. ⁷Jamajjeya Jesosaa oya cuana huohui'ajja ca o'oyanaje: —¿Ae sa'ajjaña?

—Ecuaaya Jesosa sa'ajjaña, ma Nasanenajo ba'enaje —poanaje.

⁸—E'e, eya jiquio Jesosa bajjani —Jesosa poanaje—. Miquianaaya eya oe nei sa'ajjaño, ¡ecuea epeejji enijje nequi capoquiahua! —Jesosa jamaya poanaje ojaya epeejji cuana nahuejji.

⁹E'e, yahuajo Jesosa oja Chii nijje jama poanaje ba'a: “Ojjaña joya miya enijje jjapeequi meesahuanaje eyaya jaahuananaje” jamaya poanaje Jesosa oja Chii nijje yahuajo.

¹⁰Eyacuiñajji nijje emimiji etiija echacojjii Manico bajjani sohuinano nijje nequinaje. Majoya Simohui Penohua baa iña majje Manico shajja jajasejjajea ca'yonaje; esapa jajapojojeajji nisho acanaje. Eshajja ebianei mijije jajasejjajea ca'yonaje, Manicoja.

¹¹—Peno, ¡miquea baa jja oe ejee yasijje nequia'yocue! ¡Ecue Chijja ejjashahuabaquijji ejo jayojja jama capoahua eya, jamatii quea nee nee poaje! —Jesosa poanaje.

Jesosa iña majje dojo canaje Anasi que (Mateo 26.57-58; Macoso 14.53-54; Noca 22.54)

¹²Majoya esohuinano huoojeajjiya ojaya sohuinano cuana nijjeya, Jodio etii cuanaja huoojea'yo sohuinano cuana nijjeya pea'aiya Jesosa iña ca'yonaje. Me jeyo majje dojo canaje. ¹³Anasija equi yasijje ebionei dojo canaje, ma Caipaja babaja equi yasijje. ¹⁴Caipa aje oe ma shequiajajo Eyacuiñajji nijje emimiji etii poanaje. Ohuaya yahuajo pishana Jodio etii cuana huohui canaje jama ba'a: —¡Oe dejja camanoqui'yahua ojjaña cuanajo! Jamaya quea pame nee poaje'yo esejo —poanaje.

Peno siajje poanaje Jesosajo (Mateo 26.69-70; Macoso 14.66-68; Noca 22:55-57)

¹⁵Jesosa dojo canaje cuaa, Peno enijje quea huesha pishana ocuenaje achajja Jesosa onaa acaje baa. Eya jiquio esohui tehuejji Huani bajjani. Eya Anasija eba. Jamajjeya eya dobiqui mee canaje ojaya equi yasijje, ma

ojjaña Eyacuiñajji nijje emimiji cuana ojee mimiani yasijke. ¹⁶Peno ca ca esecuejo nequinaje, dobiqui mee jjima jjejojo. Jamajjeya eya Anasia eba neineijo cuayaqui o'yanaje. Esecue jaahuanajji nijje epona nijje e mimiajo, ohuaya Peno dobiqui mee canaje. ¹⁷Ma eponeaa esecue jaahuanajjiya Peno huohui'ajja canaje: —¿A'a miya pe'a'i Jesosa nijje poani, o shajja'ajjajji?

—Chojja. Jesosa shajja'ajjajji pojjeama ca ca iña —siajje poanaje Peno quea mete jjejojo.

¹⁸Quea huoejo echacojjii cuana, esohuinano mese cuana pe'a'i cuaqui pejje nei yasijke poeyanaje. Cuaqui pejjejo jjayoqui nequinaje. Jamajjeya Peno jjanequichipiqui majje cuaquijo ejjayoquijji nequinaje ona nijje.

Anasiya Jesosa huohui'ajja canaje ojaya esohuijo
(Mateo 26.59-66; Macoso 14.55-64; Noca 22.66-71)

¹⁹Majoya Anasiya Jesosa huohui'ajja canaje ojaya esohuijo, o shajja'ajjajji cuana pe'a'ijo.

²⁰Jesosaa saja'a canaje: —Eyaya esohui huohuinaje ojjaña cuana huasijke. Esohui huohuinaje Eyacuiñajjiya equijo, equi ojee ejjachichaquijjiyo pe'a'i ojjaña Jodio cuanaja eshajja'ajjajji. Quehuajje esohui huohui jjima. ²¹Jamajjeya ¿apiojji acuae jja oe miyaya eya huohui'ajjaña ecuea ehuohui cuanajo so'o? Ojjaña eya shajja'ajja canaje. ¡Jamajjeya oya cuana huohui'ajja socue! —Jesosa poanaje.

²²Jesosa shajja'ajja majje sohuinanohua oya shemo cuiasejjajea canaje emeya. Huohui canaje: —¡A'a jamaya mimiji Eyacuiñajji nijje emimiji etii nijje! —tecuea canaje.

²³—¿A'a jjaya eya esohui quea tai aña? ¡Eyaya esohui quea tai añajoya jja ca iña oe huohuicue! Ecuea siajje ajjima cuana. Jamajjeya ¿apiojji acuae iña emeya cuiaña? —Jesosa poanaje.

²⁴Majoya Anasiya Jesosa huoojea canaje Caipaja equi yasijke. Eme jeyo tii, pichojea jjima. Ma Caipa ca ca oe Eyacuiñajji nijje emimiji etii ma shequiajajo poa.

Peno siajje po o'yanaje
(Mateo 26.71-75; Macoso 14.69-72; Noca 22.58-62)

²⁵Peno aje oe cuaqui pejjejo tii nequinaje ejjayoquijji. Jamajjeya pea cuaa oya huohui canaje: —E'e, miya e'e jojo nei Jesosa shajja'ajjajji poani pe'a'i —poanaje.

—Chojja. Eya ojaya epeeiji pojjeama —Peno siajje poanaje.

²⁶Jamajjeya Peno nijje nequinaje Eyacuiñajji nijje emimijiya echacojjii Manicoja huapa pojjeama, ma Penohua shajja jajasejjajea canajeja huapa pojjeama. Ohuaya Peno jama acanaje ba'a: —Eyaya miya banaje Jesosa nijje Onimo yiyejo, de —poanaje.

²⁷—Chojja, de, Jesosa ecuea ba jjima —nisho po o'yanaje quea mete jjejojo. Peno mimianijo tii cachina yahue taaaanje. E'e, ma ecua Jesosaa oya huohui canaje jamaya Penohua acanaje.

**Shomano emeshi mese Pinato bajjani yasijje Jesosa dojo canaje cuaa
(Mateo 27.1-2,11-14; Macoso 15:1-5; Noca 23.1-5)**

28 Majoya mecajjeahua nei onaaya Caipaja equijo nequi Jesosa huoojea canaje Shomano emeshi mese Pinato bajjani yasijje. Jomajo Pinatohua ojjaña huoojea cani equi yasijje Jesosa dojodobiaqui canaje sohuinano cuaa. Pinato ca ca Jodio pojjeama, Shomano dejja. Jamajjeya Jodio etii cuana ojaya equi yasijje dobiqui sa po ajja. E'e, Jodioja etiiquianaja etehue'yo jama poani ba'a: "Jodio pojjeamaja equi yasijje dobiquiajo, esohuidojijiya Jodioja bacua cuana cuia ajja shejo ojee ijija meemee ajja pea Jodio cuana nijje Eyacuiñaggi bihuaijji". 29 Jamajjeya Pinato Jesosa ba majje esecue yasijje cuayaquinaje Jodio etii nijje mimiya. Cuayaqui majje huohui'ajja canaje Pinatohua: —¿Ajeo shai miquianaaya jiquio dejja tecueaña so'o? ¿Yajja acuae oya poanaje? ¡Huohuicue mo!

30 —Oya aje oe quea tai pojjeama jojjemo ye jjima pome mi que —Jodio etii cuana Jesosajo siajje poanaje.

31 —¡Miquianaaya jja oe oya doj'yocue! ¡Miquea etiiquianaja etehue'yo jayojja jama oya acue! —Pinato poanaje.

—Chojja Pinato, Shomano emeshi mese neiya Sesaa ecuana dejja mimishi caca mee'yo jjima acani acui ecueata'apeejo. ¡Miquea esohuijo oe mano mee'yocue! —poanaje Jodio etii cuana.

32 E'e, jamaya Jodio etii cuaa acanaje ma ecua Jesosaa huohui canaje jayojjaya yajji. E'e, yahuajo Jesosa jama poanaje ba'a: "Quijje eya ba'ehuanasohuajea caje'yo cuaa acui ecueata'apeejo" poanaje.

33 Majoya Pinato equi yasijje dobiqui o'yananje Jesosa nijje mimiya. Sohuinano huohui canaje: —¡Jesosa e que jjequicue!

Sojuinano cuaa Jesosa jjequi cajo, Pinatohua huohui'ajja canaje: —Jesosa, ¿a'a miya e'e jojo nei Jodioja Emeshi Mese? ¡Huohuicue mo oe! —poanaje.

34 —Pinato, ¿a'a miya jamatii jjashahuabaquiani eya Emeshi Mese poani? ¿A'a pea cuaa miya ejo jamaya huohui canaje pojja'a? —Jesosa poanaje.

35 —Eya ca ca iña Jodio pojjeama. Jamajjeya miya ecuea eba pojjeama, de. Miya Jodio. Jodio etii cuaa, Jodio Eyacuiñaggi nijje emimijji etii cuaaya miya iña majje jjequi canaje e que. Jamajjeya ¡huohuicue mo! ¿Ae poanaje miya? ¿Yajjajje acuae minijje quea quene nee nee poani cuana? —Pinatohua huohui'ajja canaje.

36 Jesosaa oya saja'a canaje jama ba'a: —E'e, eya Emeshi Mese. Jamatii pea emeshi mese jama pojjeama eya. Jiquio meshi cuanajo dejja cuana huoojea'yojji pojjeama. Eya jiquiojo emeshi mese poani jojjemo ecuea echacojiya Jodio etii nijje jjaquecuauquime, Jodio etii cuaa e iña mee cajo —Jesosa poanaje.

37 —Jamajjeya miya emeshi mese poani, Jesosa. ¿A'a e'e? —Pinato poanaje.

—E'e, eya Emeshi Mese poani, miyaya eya e'e jojo nei aña —Jesosa poanaje—. Eya eyajo ani meshi yasijje poeyanaje. Cuayanaje ojjaña

cuana Eyacuiñajija esohui e'e nei ba meeya. Ojjaña joya esohui e'e nei jayojja jama a sa poaniya ecuea esohui shajja'ajja cani —Jesosa poanaje.

³⁸—¡Dee! Esohui e'e nei chama' pojja'a —Pinato poanaje. Majoya oya esecue yasijje cuayaqui o'oyanaje Jodio etii cuana nijje mimi o'oyaa. Jama poanaje ba'a: —Eyaya Jesosaja esohui shajja'ajjanaje. Oya ca ca quea tai pojjeama, mimishi'ama, de —Pinato poanaje—. ³⁹ Jamajjeya jjeya miquianaya ojee ijija'ijjiaje esohuidojojiya yahuajo nei etiiquianaja ebacua cuana cuiay'yo jjima aca'ya poa shejo. Ojjaña shequiaja jiquio shejo eyaya oe Jodio dejja ejeanobiajaa huoojeacuayajea'yaña miquianaya quea bihui nee epoji. Jamajjeya ¿e'le pojja'a eyaya Jodio cuanaja Emeshi Mese Jesosa bajjani pichojea'yajo, Jodio cuana quea bihui nee nee poaje? —Pinato poanaje.

⁴⁰ Jodio etii cuaa Pinato saja'a canaje quea tecueya: —¡Chojja! ¡A'l a jja oe Jesosa pichojea'yojji! ¡Mashama' jja oe pichojea'yocue! —janobajjima nei taaaanaje Jodio etii cuana. Mashama' aje oe siipojji quea mas e poan aje.

Jesosa mano'yo sa poanaje acui ecueata'apeejo
(Mateo 27.15-31; Macoso 15.6-20; Noca 23.13-25)

19 ¹Jamajoya Pinatohua sohuinano cuana huoojea canaje Jesosa cuiasejjajeaa, jjonohua. ²Majoya Jesosa cuiasejjajea majje sohuinano cuaa sapahuahuo nisho acuisha pipi majje oja sapajo iñape'ejea canaje. E'e, Jesosa emeshi mese nisho poso acanijo ojo soa neineinaje. Oja daqui huijjajea mee majje daqui huo'o quea ao, emeshi meseja daqui jayojja huosho mee canaje. ³Majoya aje oe oya bihuia nisho canaje: —Miya Jodio cuanaja emeshi mese quea pame nee —nisho amajje oya shemo cuiasejjajea canaje emeya. Jamaya ahuicha'a huicha'a canaje sohuinano cuaa.

⁴Majoya Pinatohua Jesosa pichojea sa acanaje; esecue yasijje cuayaqui o'oyanaje Jodio etii cuana nijje mimiya. Jama poanaje ba'a: —¡Bacue! Jesosa nijje mimi majje eyaya baña oya mimishi'ama nei nei. Eyaya oya ejeanobia meeji pojjeama. Jamajjeya jjeya eyaya miquianaya ba meeña oya Jesosa mimishi'ama nei nei —Pinato poanaje.

Jamajjeya Jesosa esecue yasijje cuayanaje. ⁵Ojjaña oya ba canaje sapahuahuo nisho acuisha e'iñape'ejea, daqui huo'o quea ao ehuosho ba'e pea'ai.

—Jiquio aje ca Jesosa ba'a. ¿Apiojji onijje quea quene nee nee poani?
—Pinato poanaje.

⁶Jamatii Jesosa ba majje Jodio sohuinano cuana, joya Eyacuiñajji nijje mimiani cuana pea'ai taaaanaje jama ba'a: —¡Oya acui ecueata'apeejo ba'ehuanasohuajeacue! E'e, ¡acui ecueata'apeejo ba'ehuanasohuajeacue ca coma! —ojjaña janobajjima nei taaaanaje.

—¡Miquiaaya jja oe oya dojo'yo majje acui ecueata'apeejo
ba'ehuanasohuajeacue! Eyaya ca ca oya baña mimishi'ama nei nei
—Pinato poanaje.

⁷Jodio etii cuaa Pinato saja'a canaje jama ba'a: —Jesosa jama poanaje ba'a: "Eya Eyacuiñajjija Bacua Ejja". ¡Jamajjeya oya cacuiajea'yahua! Jamaya ecuanaja etiiquianaja etehue'yo poani —jamaya poanaje jiquio Jodio etii cuaa; Jesosa Eyacuiñajjija Bacua Ejja pojjeama poso acanaje.

⁸Jamajjeya "Jesosa Eyacuiñajjija Bacua Ejja" Jodio etii cuaa acajo, shajja'ajja majje Pinato quea mete nee nee poanaje. ⁹Equi yasijje dobiqui o'oya majje Jesosa huohui'ajja ca o'oyanaje Pinatohua jama ba'a: —Jesosa, ¿achejo ani acuae miya poeyanaje so'o? —poanaje.

Jamatii oya Jesosaa saja'a jjima acanaje. Mimi jjima. ¹⁰Jesosaja oya saja'a jjimajojo Shomano emeshi mese Pinatohua oya huohui canaje: —¡Dee! Miya enijje mimi ajja. ¡Bacue! Ecuea esohuijo pea cuaa miya pichojea caje pojja'a; ecuea esohuijo pea cuaa miya acui ecueata'apeejo me cacajea caje pojja'a. ¿A'a miquea ba jjima eya Jodio huoojea'yojji poani jiquiojo? —Pinato poanaje.

¹¹Majoya Jesosa onijje miminaje jama ba'a: —Eyacuiñajjija miya ejo huohui mee cani. Miyaya miyaye nei jamatii ejo huohui mee ajja. Jamajjeya joya e iña meeiji epo cuana quea mimishi nee nee poani. Miya o jayojja quea mimishi nee nee pojjeama —Jesosa poanaje.

¹²Jamajjeya Pinatohua Jesosa pichojea sa neinei acanaje. Jamatii jiquio Jodio etii cuana taaa majamajanaje. Janobajjima nei poanaje: —¡A'a oya pichojea'yojji! Oya miya pichojea'yojo aje oe miya Shomano huoojea'yojji nei Sesa bajjanija epeejji pojjeama poaje, de. Ojjaña joya emeshi mese nei po sa poani ca ca Sesa jeacuayajeajji epo, de —poanaje.

¹³Majoya Jodio cuanaja esohui shajja'ajja majje Jesosa Pinatohua dojo capoquinaje ma ohua ona huoojea cani yasijje. Jomajo anioquenaje yohua bajjanijo ba'a: Mei E'iya nequijo, Jodioja esohuijo ca ca Jabata bajjanijo.

¹⁴Jomajo ojjaña Jodio cuana cojja nei anioque majje Jodio etii cuaa huohui canaje: —¡Bacue oe Jesosa, miquianajaya Emeshi Mese! —Pinato poanaje.

Ojjaña jiquio Jodio etii cuana taaa neineinaje. ¹⁵Jama poanaje ba'a: —Chojja, de. ¡Oya quecua'yocue! ¡Acui ecueata'apeejo ba'ehuanasohuajeacue!

—¿A'a eya miquianajaya Emeshi Mese nei me caca meeña acui ecueata'apeejo emano'yojji? —Pinatohua acanaje.

—Ecuanaja emeshi mese yani, oya Shomano emeshi mese Sesa bajjani. Pea chama' —taaame acanaje Eyacuiñajji nijje emimijji etii cuaa.

¹⁶Jamajjeya aje oe Jodio cuaa a sa acani jayojja jama Pinatohua amee canaje. Jesosa dojo mee canaje me caca meeya acui ecueata'apeejo eba'ehuanasohuajeajji. Jamaya poanaje epojja ejomishocajjijo eshequi biacojjajja nequijo, Jodio cuaa bobí chicha cani pojabajo, yahuajo nei esohuidojojiya Jodio etiiquianaja bacua cuana cui'a'yo jjima aca poa shejo. E'e, Jodio cuaa Jesosa manocuaji mee'yo sa acanaje emojea'yojji ojee ijja'ijja jjimahuajo.

Jesosa acui ecueata'apeejo ba'ehuanasohuajea canaje cuaa

(Mateo 27.32-44; Macoso 15.21-32; Noca 23.26-43)

¹⁷ Jamajjeya Pinatohua Jesosa Jodio etii cuana huasijje quia ca'yonaje. Sohuinanohua Jesosa iña majje acui ecueata'apee quea biquie nee bao mee majje dojo mee canaje. Dojo mee canaje eyiyo sisi yasijje, Sapa Jjii aniji bajjani meshi yasijje, Jodioja esohuijo ca ca Jonijota eyiyo huasijje. ¹⁸ Sapa Jjii bajjani eyiyo huasijje jaasohuaqui majje majo tii acui ecueata'apeejo Jesosa me cacajea canaje sohuianano cuaa. Me caca majje ba'ehuanasohuajea canaje. Beca dejja mimishi pea acui ecueata'apee cuanajo me jeyo canaje peal'ai. Ba'ehuanasohuajea canaje Jesosa pejjejo, oe shanijje, pea ebianeijje. Jesosa ca ca eyiyesamaneijje ba'ehuanasohuajea canaje.

¹⁹ Pinatohua acuijo esohui tehue mee canaje Jesosajo. Etehue'yo acui ecueata'apeejo Jesosa ba'e sapa biacua caca mee canaje. Etehue'yo jama ba'a:

OYA JESOSA NASANENAOJ BA'E JODIOJA EMESHI MESE NEI

²⁰ Jonijota ma Sapa Jjii eyiyo bajjani Jenosanena pejjejo nequi. Huesha'ama. Jamajjeya Jodio cuaa quea huisohua Pinatoja etehue'yo ba canaje. Ma etehue'yo Jodioja esohuijo tehue mee canaje, Shomano dejjaja esohuijo pea'ai, Jienoja esohuijo pea'ai tehue mee canaje, Pinatohua. ²¹ Jamajjeya Jodioja Eyacuiñajji nijje emimijji etii cuana Pinatoja etehue'yo Jesosajo ba majje Pinato que poqui o'yanaje. Huohui cañaquinaje jama ba'a: —¿Apiojji acuae miyaya tehue meenaje Jesosajo maya? Chojja, a'a jama tehuejji ba'a: “Jesosa Jodio cuanaja Emeshi Mese nei”. Jama tehueme acue ba'a: “Oya aje ca jja oe jama pojea'ajja nequinaje ba'a: —Eya Jodio cuanaja Emeshi Mese —poso poanaje”. Oya Jesosa ecuanaja Emeshi Mese nei pojjeama, de —Jodio etii cuana poanaje.

²²—Chojja. Jamattii. Apoa ecuea etehue mee'yo —Pinatohua oya cuana acanaje.

²³ Majoya Jesosa ba'ehuanasohuajeyo'yo majje ebeca pee pea'ai sohuinano cuaa oja daqui cuana chicha ca'yonaje. Iyachicha'yo majje peaa jjeshe'yo, peaa jjeshe'yo acanaje cuaa. ²⁴ Majoya oja daqui nei esipi bame iña canaje. Esipi aojo, esoco pojjeamajo jama poanaje ba'a: —¡A'a isajeajji! —poanaje.

Jamajjeya sohuinano cuaa quebanei po majje daqui nei majjo ca'yonaje ojaya pojji epo'yojji. E'e, joya ecua Eyacuiñajji esohui huohuijjiya yahuajo nei nei tehue ca poa jayojja jama acanaje sohuinano cuaa. Ma etehue'yo jama poa ba'a:

“Ecuea daqui iña caje. Ojjañaa jjeshe caje pea jayojja. Ecuea daqui ao iña majje, quebanei po majje daqui majjo caje'yo ojaya epo'yojji”. Yahuajo nei nei tehue ca poa. Jamaya Jesosaja daqui acanaje, sohuinano cuaa.

²⁵ Jesosa acui ecueata'apeejo ba'e pejjejo nequinaje ojaya enaese Mania oja shehue nijje, Queopaja ehuanase Mania bajjani nijje, pea Mania

Madanena cuiñajijo ba'e nijje pea'ai. ²⁶Jamajjeya Jesosaa enaese ba canaje enijje nequi. Eya aje oe Huani bajjani, Jesosaja quea jea nee nee. Jamajjeya Jesosa ojaya enaese nijje jama poanaje ba'a: —Ecue nae, Huani miquea ebacua ejja jayojja poaje'yo, mi jaahuanajji.

²⁷Majoya eya acanaje: —Huani, ecue nae miquea enaese poaje. ¡Oya jaahuanacue! —Jesosaa acanaje.

Jamajjeya eyaya Jesosaja enaese Mania ecuea equi yasijje dojo'yonaje enijje eba'e'yojji.

Jesosa mano'yonaje

(*Mateo 27.45-56; Macoso 15.33-42; Noca 23.44-49*)

²⁸Jesosaja eba poanaje ojaya ojjaña oja Chijja esohui jayojja ajeyo canaje. Apoa poanaje. Jamajjeya Eyacuiñajji esohui yahuajo nei nei jayojja jama poanijo Jesosa taaaanje jama ba'a: —Eya quea naba taja nee nee.

²⁹Jomajo oe meshimisijo nequinaje acuijjajja na sese. Jamajjeya shajashaja iyanobia canaje ena ejjequi yasijje. Majoya bequibobo sajo quecuahuosho majje Jesosaja enaba huasijje huo canaje ojaya el'ishijji.

³⁰Jjequibibi majje ishi canaje, Jesosaa. Ishi majje jama poanaje ba'a: —Apoa. Ojjaña Eyacuiñajji ehuohui'yo jayojja jama eyaya ajeyo'yonaje —poanaje. Jama mimime po majje Jesosa mano'yonaje, poquijeyo'yonaje.

Jesosa mape quecua canaje sohuinano cuaa

³¹Majoya Jodio etii cuana Pinato que poqui o'oyanaje. Ba majje jama poanaje ba'a: —Emeshi mese Pinato, ¡dejja cuana eba'ehuanasohua ba'eja equise sa' cuiasajajea meecue! Jamajjeya mano cuajije. Mano'yajo ijjequioquea meecue meshi yasijje emojejaji! —Jodio etii cuana poanaje.

Jamaya jjashahuabaquime poanaje ba'a: —Mecahuajje epojja ejomishocajji, ojee e'ijjia'ijjiajji quea bihui nee pea'ai. Jamajjeya ¡oya cuana jjeya nei camano mee cahua! ¡A'a mecahuajje ba'e meeji acui ecueata'apeejo! —jjashahuabaquinaje Jodio etii cuana.

³²Jamajjeya Pinatohua sohuinano cuana huoojea canaje. Poe majje sohuinano cuaa dejja mimishi cuana quise sa' cuiasajajea canaje, ma Jesosa pejjejo acui ecueata'apee cuanajo ba'e. ³³Majoya Jesosa ba canaje emanoy'o. Jamajjeya oya quise sa' cuiasajajea jjima acanaje. ³⁴Jamatii oe sohuinanohua Jesosa emapejje quecua canaje emeje aohua. Quecua cajje ena huo'o, ena oshe tejjee pea'ai cuayaquinaje. ³⁵Eyaya, Huani bajjaniya, banaje ecuea ecojaa. Jamaya poanaje ba'a: Sohuinano cuaa Jesosa ba'ehuanasohuajea majje oya emanoy'o ba'e quecua canaje pea'ai. Oya quise sa' cuiasaja jjima acanaje. Jjeya eyaya jamaya tehueña. Jamajjeya ojjaña cuana ba meeje ecuea ehuohui Jesosajo e'e jojo nei. Eya siajjepoiji pojjeama. ³⁶E'e, Eyacuiñajji esohui etehue'yo yahuajo nei Jesosajo jama poanaje ba'a: "Ojaya esa' cuana pea cuanaja ecuiasaja'yojji pojjeama". Ma ecua Eyacuiñajji esohui tehue mee ca'ya poa jamaya Jesosa acanaje cuaa.

³⁷Pea Jodio etiiquianaja etehue'yo yahuajo nei jama poa ba'a: "Oya quecuo cajo, ojjaña cuaa oya ba caje'yo ecojjaa". Jamaya tehue ca'ya poa yahuajo nei nei Jesosajo.

Jesosa mei jjani ai yasijje huananobia canaje
(Mateo 27.57-61; Macoso 15.42-47; Noca 23.50-56)

³⁸Majoya Jesosa mano'yo majje ojaya epeejji Jose bajjani poeyanaje, pea Jose, Amatea meshijo ba'e. Oya Jodio cuanajo quea metejo quehuajje jjapeequi'yonaje Jesosa nijje yahuajo. Poe majje Jose Pinato huasijje poquinaje. Pinato ba majje huohui'ajja canaje Joseya: —Emeshi mese Pinato, Jesosa mano'yonaje. ¡Eyaya oya jjani yasijje cadojo'yahua ehuananobia'yojjil! —poanaje.

—E'e, ¡dojocue! Eyaya sohuinano cuana jamaya huohuime aje
 —huoojea canaje Pinatohua.

Jamajoya Jesosaja epeejji cuaa oya emano'yo acui ecueata'apeejo ba'e jjequioquea'yo majje dojo canaje jjani yasijje huananobiaa. ³⁹Nicodemo, ma yahuajo Jesosa nijje miminaje mecajje, Jose nijje poquinaje Jesosa dojohua. Nicodemohua shiyeshiye pohuipohui, acui shiye sajja pohui quea shiye quea nahue pealai dojo canaje Jesosa shicuijji. Quea huiso nee nee dojo canaje 50 quinome. ⁴⁰Jamajjeya Jesosa dojo majje shiyeshiye pohuipohuiya shicui canaje. Majoya daqui oshe eyacua neijo bebo canaje. E'e, jamaya Jodio cuaa acani emano'yo cuana ehuananobiajji mei jjani yasijje. ⁴¹Jamajjeya Jesosa eyiyo Sapa Jjii bajjanijo acui ecueata'apeejo eba'ehuanasohua ba'e jjequioquea'yo majje shiyeshiyeyaa shicui canaje. Shicui majje dojo canaje que quea chipi nee yasijje, mei jjani jjeya nei teo huasijje. ⁴²Ma mei jjani quea chipi nee poanijo, ojaya epeejji cuaa Jesosa jomajo huananobia ca'yonaje sinecua nei. Jodio cuanaja epoja ejomishocajji poanijo Jesosa huananobia cuaji canaje. Mei copo quea quemohua esecue jjani jaja ca'ajeanay majje p oqui'yonaje.

Jesosa shequi o'oyanaje
(Mateo 28.1-10; Macoso 16.1-8; Noca 24.1-12)

20

¹Majoya mecajjeahua nei nei jjaja'a'ajjaqui jjimahuajo ebionei jjapojjaquiajoo, nomico pojaj Mania, pea Mania Madanenajo ba'e poquinaje mei jjani yasijje. Ba cañaquinaje mei copo quea quemoo jjani capajji'ya ejecajjajajea. ²Ba majje Mania cuajicuajipoquinaje Simohui Peno huohuiya, e huohuiya pea'ai. E'e, eya Jesosaja epeejji, ojaya quea jea nee nee. Jamajjeya poe majje Maniaa huohui cañaquinaje jama ba'a: —Jesosa dojo canaje cuaa. Jesosa aje oe mei jjanijo chama' nei nei. ¿Achacua shai dojo canaje cuaa? Ecuea ba jjima —poanaje Mania, jjashahuubaqui jjima.

³Jamajjeya Peno enijje poquicuajinaje mei jjani yasijje. ⁴Ecuana ojee cuajicuajinaje. Eyaya cuajicuaji neinei majje ebionei mei jjani bañaquinaje. Peno ca ca quijje pishana poeyanaje. ⁵Poe majje, eya jjacueanohuequi majje ye'lajjanaje. Daqui oshe banaje e'iyacoca'yo ani. ⁶Majoya Simohui Peno e

quiquisijji poeyanaje. Oya mei jjani ai yasijje dobiquinaje. Daqui oshe ba canaje meijo e'iyacoca'yo ani. ⁷Pea daqui oshe Jesosa sapa bebojji'ya o sapa jaanajejo tii e'iyacoca'yo ani ba canaje pe'a'i. ⁸E'e, eya ebionei mei jjani yasijje poeyanaje. Jamatii Peno dobiquiyo, eya dobiquinaje pe'a'i. Banaje e'e jojo nei Jesosa chama!. Daqui e'iyacoca'yo ani ba majje eya jjashahuabaquinaje jama ba'a: —;E'e de! E'e jojo nei Jesosa emanoy'o tii jaa shequi'yonaje. Ma ecua yahuajo ohuaya huohui canaje jamaya oya po'yonaje.

⁹Yacuiñajjija esohui etehue'yo Jesosajo jama poa ba'a: "Quito mano'y'o majje shequije'yo". Jamatii yahuajo ma etehue'yo ecuanaja quea quehua poanaje.

¹⁰Majoya jjani aijo Jesosa chama' ba majje eya Peno nijje equi yasijje poqui o'yanaje.

Mania Madanenaa Jesosa ba ca o'oyanaje (Mateo 28.9-10; Macoso 16.9-11)

¹¹E'e, eya, Huani, Peno nijje equi yasijje poqui o'yanaje. Jamatii Mania equi yasijje poqui'yo jjima. Mei jjani pejjejo pa aninaje. Oya pea'ai jjacueanohuequinaje eye'e'ajjajji. ¹²Ba canaje beca esohuidojiji. Ojaya daqui quea oshe nee nee, bo oshe nee nee jayojja poanaje. Shequi o'oya jjimahuajo Jesosa mei jjani dojjojo jaanaje pea mei baijje. Jjeya ca ca beca esohuidojiji cuana anioquenaje Jesosa jaanaje mei baijje. Jesosa sapa jaanajejo oe esohuidojiji aninaje. O jiojji jaanajejo pea aninaje.

¹³Esohuidojiji cuaa Mania jama acanaje ba'a: —Epona, ¿yajjajje acuae mi pani so'o?

—Ecuea Emeshi Mese Jesosa dojocuayaqui canaje cuaa. ¿Achacua shai dojo canaje? Ecuea ba jjima —Mania poanaje.

¹⁴Jamaya mimi majje Maniaa Jesosa bajea canaje. Jamatii oya Jesosa eque mese poso acanaje, Jesosa pojjeama poso acanaje.

¹⁵Jamajjeya Jesosaa oya jama acanaje ba'a: —Epona, ¿apiojji acuae mi pani? ¿A'ya cuae miyaya sa'ajjaña so'o? —Jesosa poanaje.

—¿A'a miya eque mese? ¿A'a miyaya oya dojonaje pojja'a? ¡Che mo oe huohuicue achacua oya dojonaje! Eyaya oya dojope'yo shiyeshiye shicuiya —Mania poanaje.

¹⁶—;Mania! —Jesosa poanaje.

Jesosa mimije shajja'ajja majje Maniaa oya ba canaje Jesosa. Jamajjeya Maniaa oya jama acanaje ba'a: —;Ecuea esohui huohuijji miya! —poanaje Mania, Jodioja esohuijo—. ¡Raboni! —poanaje.

¹⁷—Mania, ja'a eya iña neineijji! ¡Eya capoquiahua ecue Chii ani yasijje! ¡Jjeya poquicue; ecuea epeejjji cuana huohuiquicue miyaya! Jama oe acue ba'a: "Jesosa jama poanaje ba'a: —;Jjeya eya poquije'yo ecue Chii eyajo ani yasijje, mique Chii eyajo ani yasijje pea'ai. E'e, eya poquije'yo Eyacuiñajji ani yasijje. Oya Eyacuiñajji miquianajaya Chii pea'ai" jamaya aquicue ecuea epeejjji cuana —Jesosa poanaje.

¹⁸Majoya Mania Madanena poquinaje Jesosaja epeeiji cuana ani yasijje. Ecuana nijje jama poanaje ba'a: —¡Shajja'ajjacue oe! Eyaya Jesosa ba'yonaje; e'e jojo nei eshe ca coma.

Jamaya huohui majje Mania Madanenaa ma Jesosaa huohui canajeya ecuana huohui canaje.

Jesosa ojaya epeeiji cuana huasijje poe'yonaje
(Mateo 28.16-20; Macoso 16.14-18; Noca 24.36-49)

¹⁹Quijje nomico pojajlo sinecuajo ecuana Jesosaja epeeiji ojee aninaje equijo. Jodio yajjajo esecue eca'a nequinaje. Jamatii Jesosa equijo ecuana nijje jjaja'aqui'yonaje. Ecuana nijje miminaje jama ba'a: —¡Quea bei nee pocue miquianaya! —poanaje.

²⁰Majoya Jesosaa ecuana ba mee canaje onaja quecuahuejjajea oja eme jjoto, ojaya emape onaja quecua pe'a'i ba mee canaje. Jesosa ba majje ecuana quea bihui nee nee poanaje. ²¹Jesosaa ecuana huohui ca o'yanaje jama ba'a: —¡Quea bei nee nee pocue! Yahuajo ecue Chiiya eya huoojea canaje ojaya echacojji. Jamaya jjeya eyaya miquianaya huoojeaña ecuea esohui huohuiya —Jesosa poanaje.

²²Majoya Jesosaa ecuana huasijje sipojea majje huohui canaje jama ba'a: —¡Edojjosshahua Pame miquiana huasijje cadobiquiahua! ²³E'e, ¡miquianaya ecuea esohui huohuijji pocue! Jamajjeya ojjaña joya oja mimishi pajea sa poani miquianaaya huohuicue ejo jama ba'a: “E'e, Eyacuiñajjiya miquea mimishi cuijea ca'yonaje”. Mimishi pajea sa po ajjajo ca ca huohuicue jama ba'a: “Eyacuiñajjiya miquea mimishi ecuijea'yoji pojjeama” —Jesosa poanaje.

Jesosa Tomasi nijje miminaje

²⁴Jesosa ecuana nijje, o shajja'ajjajji cuana nijje jjaja'aqui'yonajejo, Tomasi, Beca Jaa bajjani chama' poanaje. ²⁵Jamajjeya ecuaaya Tomasi huohui majamajanaje jama ba'a: —E'e jojo nei ecuaaya Jesosa ba'yonaje. ¡Eshe ca coma! —ecuanaa anaje.

Jamatii Tomasiya saja'a canaje jama ba'a: —E'e pojja'a. Chojja, de. Equecuahuejja ojaya eme jjoto huejja cuana ba majje, napa'ajja majje, ojaya emapejje esi' napa'ajja majje pea'ai ecuea eba poaje Jesosa e'e jojo nei eshe —poanaje Tomasi; Jesosa shequi'yo ajja poso acanaje.

²⁶Quijje me oeije pea beca cahuime, 7 po majje ecuana ma equijo ojee ani o'yanaje Tomasi nijje pea'ai. Esecue eca'a nequinaje pea'ai. Jamatii Jesosa ecuana nijje jjaja'aqui o'yanaje. Ecuana nijje mimi o'yanaje jama ba'a: —¡Quea bei nee nee pocue! —poanaje.

²⁷Majoya ohuaya Tomasi huohui canaje: —Tomasi, ¡ecuea eme bacue! ¡Eme jjoto equecuahuejja napa'ajjacue eme sisiya! ¡Emapejje esi' pea'ai napa'ajjacue! ¡Bacue eya eshequi'yo e'e jojo nei! ¡A'a eya edojjosshahua poso ajji! —Jesosa poanaje.

28—Jesosa, miya ecuea Emeshi Mese nei, Eyacuiñajji —Tomasiya oya bihuia canaje.

29—Tomasi, miya e ba majje jjabahuejjaquinaje eya e'e jojo nei eshequi'yo. Pea cuanaja ba jjima ecuea eme jjoto huejja, emape si' pea'ai. Jamatii oya cuana jjabahuejjaquije ejo, eya eshequi'yo. Jamajjeya ḥoya cuana e'e jojo nei quea bihui nee capoahua! —Jesosa poanaje.

¡Huaniya etehue'yojo jjabahuejjaquicue!

30 Jesosaa quea huiso pea ma dejja ajiima acani acanaje. Maya ecuanaa, o shajja'ajjajji cuua banaje. Jamatii eyaya, Huani bajjaniya maya tehue jjima jiquio etehue'yojo. 31 Jiquio ecuea etehue'yo eyaya tehuena je miquiana jjabahuejjaquijji. Jamajjeya jiquio etehue'yo ba majje miquianaya jjabahuejjaquije Jesosa e'e jojo nei Eyacuiñajjiya huoojea'yo ojjaña jaahuanajji. Oya Eyacuiñajjiya Bacua Ejja nei. E'e, miquianaya majoya e'e jojo nei jjabahuejjaquiajo, Jesosaa miquianaya ba'e tiitii mee caje? ?yo onijj e eyajo.

Jesosa ba ca o'oyanaje ojaya epjeeji cuaa me oeje beca huisomeya

21 ¹Quije ecuana Janinea bae yasijke poqui o'oyanaje. Jomajo Jesosa ecuana nijje, ojaya epjeeji cuana nijje jjaja'aqui o'oyanaje. Jama poanaje ba'a: ²Simohui Peno, Tomasi Beca Jaa bajjani nijje, Natanaeni ma Canajo, Janinea meshijo ba'e nijje, ecuanaya Semeneoja bacua ejja eya, ecue o'i Jacobo nijje, pea beca dejja nijje pea'ai bae sahuajo aninaje. Mahuisoya ecuana ojee aninaje. ³Peno ecuana nijje jama poanaje ba'a: —Eya ca iña poquije'yo nahuoo cuiashajaa.

—E'e, ecuana minijje poquije'yo —saja'ame anaje ecuaa.

Jamajjeya ecuana poqui'yonaje bae sahuajje. Bishe ai yasijke aninaje. Mecajje ecuanaa nahuoo cuiashaja'ajja nequinaje tii tii. Jamatii mecajjeahua jjaja'aqui jjimahuajo nahuoo cuiashaja jjima; chama' poanaje. ⁴Mecajjeahua nei Jesosa bae sahuajo nequinaje. Jamatii ecuanaja bishejo nequija oya ba jjima poanaje Jesosa. ⁵Jesosa ecuana huasijke taaaanje jama ba'a: —Epjeeji cuana, ¿a'a nahuoo cuiashajanaje miquianaaya? —huohui'ajja acanaje.

—¡Chojja, chama! —saja'ame ecuaa anaje.

⁶—¡Eshajajji jeacue ena huasijke pea mijijke, bishe ebianei mijijke! Jomajo ani nahuoo cuana —Jesosa poanaje.

Jamajjeya ecuaaya eshajajji ebianei mijijke jea majje quea huiso nahuoo cuiashajanaje. Quea biquie nee neejo nahuoo cuana jjequisohua jjima anaje bishe yasijke. ⁷Jamajjeya eya Peno nijje jama poanaje ba'a: —Peno, maya Jesosa nequi, e'e nei —eya poanaje.

E shajja'ajja majje Simohui Penohua oja daqui huoshlo ca'yonaje. (E'e, chacochacoanijo oja daqui ao huijiajea canaje.) Daqui ao huoshlo'yo majje tohuaanaje ena huasijke Jesosa que besapoquiya. ⁸Eyaya ca ca pea cuana nijje bishe yonaje meshijaji sahua huasijke. Nahuoo dojobesanaje eshajajji, enajo

ba'e. Meshijaji huesha'ama, iye huesha nei, beshahua nei quea huesha 100 metros huesha nei. ⁹Ba'leñaqui majje ecuanaa banaje Jesosaja nahuoo jiñaqui cuaquijo. Pahui yani equeuemiji pe'a'i. ¹⁰Majoya Jesosa ecuana nijje jama poanaje ba'a: —¡Nahuoo cuana miquianaja cuiashaja'yo jja oe jjequicue edahuajji!

¹¹ Jamajjeya Simohui Peno bishe yasijje ani o'oya majje nahuoo cuiashajiji meshijaji yasijje jjequisohua sahua canaje. Majoya pejo majje nahuoo banaje quea huiso nee nee, 153 huisome. Ojjaña quea quemó nee, de. Quea biquie nee. Jamatii eshajajji quecuasejjajea jjima poanaje.

¹² Majoya Jesosaa ecuana jama acanaje ba'a: —E'e, ¡poecue! ¡Nahuoo ijijiahacue! —poanaje.

—¡Ocuae! ¡Ca'ijijiahua! —ecuana poanaje. Ecuana aya oya Jesosa. Jamajjeya oya huohui'ajja jjima jama ba'a: —¿Ae bajjani acuae mi so'o? —ajjima ecuanajaya.

¹³ Majoya Jesosaa pahui cuaqui pejjejo ani jjeshe majje ecuana quia ca'yonaje e'ijjiajji, nahuoo pe'a'i.

¹⁴ E'e, Jesosa mano'yo majje shequi o'oyanaje. Oya ecuana huasijke poe'yonaje. Jjeya pea beca peejjima jjaja'aqui'yome po'yonaje.

Jesosa miminaje Peno nijje

¹⁵ Majoya ecuana ijija'ijji majje Jesosa miminaje Peno nijje. Jama poanaje ba'a: —Peno, Huanija bacua ejja, ¿a'a miyaya eya quea jea nee nee aña? ¿A'a jiquio pea cuanaja eya quea jea pishana, miquea eya quea jea nee nee? —Jesosaa oya huohui'ajja canaje.

—E'e Emeshi Mese, eyaya miya quea jea nee nee aña. Jamaya miquea eba —Peno poanaje.

—Jamajjeya jecuea epjeeji enijje jjeya nei jjapeequiani huasijke ecuea esohui huohuicue! Oya cuana ñajjajjaja ebacua cuana jayojja jama; jamatii ani poquiquehua chana!

¹⁶ Majoya Jesosaa oya huohui'ajja ca o'oyanaje jama ba'a: —Simohui, Huanija bacua ejja, ¿a'a miyaya eya quea jea nee nee aña? —poanaje.

—E'e, Emeshi Mese, eyaya miya quea jea nee nee aña. Jamaya miquea eba —Peno po o'oyanaje.

—Jamajjeya jecuea epjeeji enijje jjeya nei jjapeequiani jaahuanacue! Oya cuana ñajjajjaja ebacua jayojja jama; ca'al'ama —Jesosa poanaje.

¹⁷ Jesosaa pea beca peejjima huohui'ajjame acanaje Peno jama ba'a: —Simohui, Huanija bacua ejja, ¿a'a miyaya eya quea jea nee nee aña? —po majamajanaje.

Peno quea yeno poanaje Jesosaja pea beca peejjima huohui'ajjame acajje. Jamajjeya Penohua Jesosa saja'a canaje jama ba'a: —Emeshi Mese, miquea eba ojjaña. Jamajjeya miquea eba eyaya miya quea jea nee nee aña —Peno poanaje.

—¡Ecuea epjeeji jjeya nei enijje jjapeequiani jaahuanacue! —Jesosaa oya aca o'oyanaje—. ¹⁸Peno, e'e jojo nei eyaya miya huohuiaña jama poaje ba'a:

Miya esho'yahuajo miquea daqui huosho majje cua mi poqui sa poani yasijje miya poquinaje. Quijje ca ca miya tii'yajo, me jeyo majje dojo caje cuaa. Ojaya ejashahuabaqui'yojjii jayojja jama miya acaje'yo cuaa —jamaya Jesosa poanaje.

¹⁹Ojaya ehuohuijo Peno ba mee canaje quijje nei oya manoje'yo eme jeyo. Cuanaya quijje nei Peno mano'yajo, ojjaña ba mee caje'yo Eyacuiñajji quea pame nee nee quea ca'a nee nee poani tii tii. Majoya Jesosaa Peno huohui canaje jama ba'a: —Peno, ¡enijke jjapee neineiquicue! —Jesosa poanaje.

²⁰Majoya Penohua bajea canaje. Eya, Huani ba canaje o quiquishi poeyani. Yahuajo eya Jesosa pejjejo ijija'ijjianaje, eya ojaya quea jea nee neejo. Ijija'ijjianijo eyaya Jesosa huohui'ajjanaje jama ba'a: “Jesosa, ¿a'ya cuae mi iña meesahuajji epoji?” eyaya anaje. ²¹Penohua e ba majje Jesosa huohui'ajja canaje: —¿Jesosa, yajja acuae Huani acaje cuaa so'o? —poanaje Peno.

²²Jesosaa Peno saja'a canaje jama ba'a: —Peno, ¿apiojji shai miyaya Huanijo huohui'ajjaña so'o? E'e pojja'a eyaya Huani ecuea epoe o'oyajjijo ba'le mee sa aña. Jamatii. ¡Miya jja oe enijke jjapee neineiquicue! —Jesosa poanaje.

²³Jesosaja esohui shajja'ajja majje ojjaña Jesosaja epeejji cuana huasijje huohuiqui canaje cuaa jama ba'a: —Huani ca pa jjaja ca oe mano'yo ajja poaje, de —poso acanaje cuaa.

Jamatii Jesosaja huohui jjima jama ba'a: “Huani emano'yojji pojjeama”. Chojja. Ohuaya jama huohui canaje ejo ba'a: “Peno, ¿apiojji acuae miyaya Huanijo huohui'ajjaña so'o? E'e pojja'a eyaya Huani ba'le mee sa aña ecuea epoe o'oyajjijo, jamatii. ¡A'a peajo jjashahuuba majaquijji! ¡Enijke oe jjapee neineiquicue, miya!” poanaje Jesosa Peno nijje.

²⁴Eya aje oe Huani bajjani Jesosa shajja'ajjajji poani. Ojjaña ecuea etehue'yo Jesosajo e'e jojo nei. Eyaya aje jja oe banaje ojjaña Jesosaa acaninaje cuana. Jamajjeya miquianajaya eba ecuea esohui Jesosajo e'e jojo nei. ²⁵Jesosaa pea ma dejaa ajiima acani quea huiso nee nee acaninaje cuana. Ojjaña ohuaya acaninaje cuana etehue poquia jojjemo quea huiso nee nee pome. Chama' pome papeni etehue'yo huanajji ojjaña meshijo, ca ojjaña Jesosaja esohui etehue poquia jojjemo.

Mahuiso ecuea esohui etehue'yo. Eyaya Huani bajjaniya esohui tehuejeyonaje. Apoa.

EDOJJOSAHUA PAMEYA JESOSAJA EPEEJJI PEA JJASHAHUABAQUIME PO MEE CANI

LOS HECHOS

¡Ishoacue Edojjoshahua Pameja epoejji! —Jesosa poanaje

1 ¹Ecuea epjeejji Teopino, eyaya, Noca bajjaniya jiquio esohui tehueña miquea ebajji. Yahuajo eyaya miya huohuinaje Jesosajo ma ohua acanaje oja Chijja jjequisohua'yo jjimahuaa. Ojaya ehuohui cuanajo pea'ai eyaya tehuenaje. Maya eyaya mi que tehuenaje ecuea ebionei esohui etehue'yojo. ²E'e, eyahuasijje sohuaqui'yo jjimahuaa Jesosaa Edojjoshahua Pame nijjeya o shajja'ajjajji cuana sohuihuohui canaje. Ma dejja cuana oja babaca'yо, oja huoojea'yo cuana ojaya esohui huohuijji epoji. ³E'e, Jesosa yahuajo quea nee nee poanaje. Mano'yonaje. Mano'yo majje shequi o'oyanaje. Shequi o'oya majje oya poe o'oyanaje o shajja'ajjajji cuana huasijje. Quea huiso ma dejja ajjima acani acanaje Jesosaa quea ja'a nee nee, ojjañaja ebajji oya e'e jojo nei eshe o'oya. Jesosaa oya cuana ba mee canaje Eyacuiñajji eyajo ojjaña huoojeajji poani. Shequi o'oya majje Jesosa oya cuana nijje nequi o'oyanaje quea huiso cahuime, 40 cahuime. ⁴Ijjia'ijjia aniya ohuaya oya cuana huohui canaje jama ba'a: —¡Jenosanena cuiñajji esecue yasijje a'a cuayaquijji! Eyacuiñajjiya ojaya esohui jayojja jama acaje'yo; ojaya Edojjoshahua Pame huoojea caje miquiana que dobiquiya. ¡Ishoacue Edojjoshahua Pame! Yahuajo eyaya miquianaya jamaya huohuinaje —Jesosa poanaje—. ⁵E'e, Huaniya yahuajo pishana quea huiso cuana enajo besa mee canaje Eyacuiñajjiyo. Quije pishana ca ca Edojjoshahua Pame miquiana que dobiquije'yo —Jesosa poanaje.

Jesosa Eyacuiñajjiya eyahuasijje jjequisohua ca'yonaje

6E'e, o shajja'ajjajji cuaa onijje nequi o'oya majje Jesosa huohui'ajja canaje jama ba'a: —Emeshi Mese Jesosa, ¿a'a jjeyahua nei miya Isaeni cuanaja Emeshi Mese poaje'yo jiquio meshijo? —acanaje cuaa.

7Jesosaa oya cuana saja'a canaje: —Cua'a, Eyacuiñajjiya eba ojaye nei, esejaya Chii eyajo anija ojaya eba. Ache shono,ache ba'ijo shai miquianajaya ba jjima.

8Jamatii, Edojoshahua Pame miquiana que dobiqui majje ohuaya miquianaya sohuihuohui meesahua caje quea ja'a nee. Miquianaya ecuea esohui huohuijjii poaje'yo. ¡Jenosanenajo, Jodio meshijo, Samania meshijo, ojjaña meshi quea huesha nee yasijje peal'ai ecuea esohui huohuiquicue! —Jesosa poanaje.

9Jamaya huohui canijo tii, onaaya ba neinei caqui tii, Eyacuiñajjiya Jesosa jjequisohua ca'yonaje eyahuasijje. Bo dojjo huasijje dobiqui'yajo, oja epeejji cuaa oya ba pajea ca'yonaje. **10**Jesosa ba'esohuaquianijo, ojaya epeejjiya eyahuasijje ba neinei caquijo tii, Eyacuiñajjiya esohuidojorri cuana becamejjiji pea'ai jjanequipanaquinaje ona nijje. Ojaya daqui quea oshe nee nee poanaje.

11Oya jama poanaje ba'a: —Miquianaaya, Janinea meshijo ba'e cuaa, ¡shajja'ajjacie mo! Miquianaaya Jesosa banaje ba'esohuaquije'yo eyahuasijje. Qui'ajjaya oya poeje o'oya quijje, e'e jojo nei —esohuidojorri poanaje.

Matia babaca canaje cuaa Jesosaja huoojea'yo esohui huohuijji epoji Jodasa jjoco cuiña'yojji epoji

12Jjeyahua nei Jesosaja epeejji cuana acuijjajja yiyejo, Onimo jjajja yiyejo nequi Jenosanena huasijje poqui o'yanaje; huesha'ama poanaje, beshahua nei beca mil metros. **13**Oya cuanaja ojaya equi yahuajo aminaje yasijje dobiqui o'yanaje. Ejamacoo equecuayijji ai yasijje dobiqui o'yanaje mahuiso ba'a: Peno, Jacobo, Huani, Anesi, Penipe, Tomasi, Batanomee, Mateo, Simoni Senote, Apeoja bacua ejja Satiaco, oja chahua Jode bajjani pea'ai; mahuisoya. **14**Oya cuana epona cuana nijje, Jesosaja enaese Mania pea'ai, Jesosaja echahua mese cuana pea'ai Eyacuiñajji nijje mimi majamajanaje, ojjaña.

15Quije pishana ojjaña jjachichaquinaje quea huiso nee; beshahua nei 120 huisome yaninaje. Majoya Peno nequisohuanaje emimijji. **16**Jama poanaje ba'a: —Ecuea epeejji cuana, Eyacuiñajjiya esohui yahuajo nei etehue'yo jayojja jama jjeyahua nei apoa poanaje. Edojoshahua Pameya yahuajo Dabi huohui meesahua canaje Jodasajo, ma Jesosa iñameejji poanaje onajaya equecua'yojji. **17**Yahuajo Jodasa ecuana nijje nequinaje. Jesosaa oya babaca canaje. Jamatii oya esohui huohuijji nisho poanaje. **18**Jodio etii cuaa aje oe Jodasa ejeshejji quia canaje Jesosa iña meesahua sosejje. Ma Jesosa sosejje quia bejjo meshi jjeshejji acanaje cuaa. Quije Jodasa acui aajo jjanaaninequiaqui majje tohuaanaje mishi yasijje; oquequinaje janobajjima nei. Jjajjono sejjaqui majje jjasapa cuiapopojeaquínaquinaje. Jjamajjii cuiapopojeaquínaquinaje. See ai cuayaquinanananje pea'ai. **19**Ojjaña Jenosanenajo ba'eja Jodasa eba poanaje

jomajo mano'yonaje. Jamajjeya oya cuaa ma meshi bajjani canaje Asedama meshi ojaya esohuji. Ese Ejja esohuji Ena' Cuayaquinaje Meshi bajjani acanaje cuaa. ²⁰E'e, yahuajo nei Dabiya esohuicuayajjijo Salmojo jama tehueme aca poa ba'a: "Ojaya equi cajíña ca'yahua tii. ¡A'a equi cuiña mee'yojji!" Jama yahuajo nei tehue ca poa ojo peal'ai ba'a: "Eyaya oya cajaa anaje. Jamajjeya peaa ecuea esohui cahuohui cahua" jamaya yahuajo nei tehue ca poa Jodasajo.

²¹—Jamajjeya Jodasa chamajo pea dejja ejjababacaqui ecuana nijje esohui huohuijji. Ejjababacaqui joya Jesosaja esohui shajja'ajjajji epo nei, ma Jesosaa dejjaajjima acani ba epo nei, joya ese nijje Jesosaja epeejji poanaje. ²²E'e, joya yahuajo Jesosa Huaniya enajo besa mee caqui ba epo ejjababacaqui; joya Jesosa nijje tii jjapeequinequinaje, eyahuasijje sohuaquije'yo ba epo. Jamajjeya ma dejjaecuana nijjeya Jesosa shequi'yonaje cahuohui cahua —Peno poanaje.

²³Jamajjeya ojjaña cuaa becanejjiji peal'ai dejja babaca ca'yonaje. Matia, pea Jose Basaba, ojaya pea bajjani Josoto. ²⁴⁻²⁵Babaca majje oya cuana Emeshi Mese nei nijje eyajo ani nijje miminaje jama ba'a: —Emeshi Mese nei, miquea eba ojjañaja ejashahuabaujiji cuana. ¡Ecuana ba meesahuacue ache edejja miquea ebabaca miquea ehuoojea'yo epojji! E'e, Jodasa miquea esohui pajeal'yo majje mano'yonaje; cuaquiyasijje poqui'yonaje. Jamajjeya Jodasa chamajo peaa miquea esohui cahuohui cahua —jamaya Eyacuiñajji nijje miminaje cuana.

²⁶Majoya oya cuana quebanei jayojja poanajeache dejja esohui huohuijji nequije ebajji. Babaca canaje Matia esohui huohuijji poaje. Jamajjeya Matia pea 11 huisome nijje nequi'yonaje Jesosaja ehuoojea'yo esohui huohuijji epojji.

Edojjoshahua Pame Jesosaja epeejji cuana huasijje poeyanaje

2 ¹Bobi chichajji shejo, Petecote pojajao bobi chichajjeyo majje Jodio cuana quea bihui nee ojee ijjal'ijjia aninaje. Ma pojajao Jesosa shajja'ajjajji cuana, oja huoojea'yo esohui huohuijji cuana pea'ai, pea epeejji cuana nijje ojee jjachichaquinaje oe equijo. ²Jjeyahua nei Edojjoshahua Pame beni quea quemo jjaqueyaquiani jayojja eyajo shajja'ajja canaje ojjañaa. Edojjoshahua Pame equi yasijje dobiquinaje. ³Majoya cuaqui jiji sisi jayojja ojjañaja esapa biajje nequinaje. Oe cuaqui jiji sisi oe epeejjiya esapa biajje jjinequinaje. Jamaya ojjaña poanaje. ⁴Edojjoshahua Pame ojjaña cuana huasijje dobiqui'yonaje. Majoya jjeya nei oya cuana pea mimi'yome poanaje. E'e, Edojjoshahua Pameya oya cuana pea mimime po meesahua ca'yonaje.

⁵Quea huiso Jodio cuaa ojjaña meshijo ba'yani cuaa Jenosanenajo ba'ecaa Eyacuiñajjija esohui yahuajo nei jayojja bihuiameya acani.

⁶Jamajjeya beni quea quemo eyajo poeyani jayojja shajja'ajja majje ojjaña cuajicuajjibebanje Jesosaja epeejji cuana huasijje. Jesosaja epeejji cuana pea mimi'yome mimiani shajja'ajja majje Jesosaja epeejji pojjeama quea mete nee jama poanaje ba'a: —¿Yajjajje shai Jesosaja epeejji cuana pea mimi'yome poani so'o, de? ¿Yajjajje shai joya esejaya esohuji mimiani, de?

⁷Jamajjeya quea mete poanaje. Huohui'ajja canaje jama ba'a: —E'e, ojjaña jiquio dejja cuana Janinea meshijo ba'e. ⁸¿Yajjajo shai jiquio pea esohujo mimi cani so'o? ¿Ma ecua eseyaya esho'yahuua shajja'ajjanaje jayojjaya seja jjeya shajja'ajjaña cuana? ⁹E'e, jiquiojo yani dejja cuana quea huiso meshijo ba'e: Dejja cuana Patia meshijo ba'e, Madia meshijo ba'e, Enami meshijo ba'e, Mesopotamia meshijo ba'e, Jodea meshijo ba'e, Capanosia meshijo ba'e, Ponito meshijo ba'e, Asia meshijo ba'e pea'ai yani. ¹⁰Pea cuana Pichia meshijo ba'e, Panipinia meshijo ba'e, Ejito meshijo ba'e, Apica meshijo ba'e, Sinene meshi ojje mijijje ba'e pea'ai yani. E'e, Jodio dejja cuana, Jodioja epeejji cuana Shoma meshijo ba'e cuana yani. Maaya Jodio pojjeama cuaa Jodioja ehuohui'yo Eyacuiñajji shajja'ajja cani.

¹¹Beca cuana Queta meshijo ba'e, Anamia meshijo ba'e yani pea'ai. Jamatii ojjaña eseyaya esejaya esohujo Eyacuiñajjiya ma dejjaja ba jjima acanaje cuana quea pame nee shajja'ajjaña, ma Jesosaja epeejji cuaa huohui canijo —poanaje ojjaña.

¹²Jamajjeya quea mete po majje pea cuana nijje mimimiminaje jama ba'a: —¿Yajja shai poani?

¹³Pea cuana ca ca Jesosaja epeejji cuanajo soa neineinaje. Jama poanaje ba'a: —Chojja, de. Oya cuana jja ca quea huiso ishi'ishinaje. Huooqui —poso acanaje cuaa.

Penohua esohui huohui canaje

¹⁴Majoya Penohua pea Jesosaja huoojea'yo esohui huohuijji cuana nijje, 11 huisome nijje ojee nequisohua majje janobajjima nei sohuihuohui canaje jama ba'a: —Dejja cuana Jodio meshijo ba'eya, ojjañaa Jenosanenajo ba'eya pea'ai, jjeyahua nei mo nequiaa shajja'ajjacue! Eya Jodio pea'ai. Jamajjeya eyaya miya jjabahuejjaqui meeje'yo. ¹⁵¿A'aya ecuana ehuoo poso aña? Jjeya mecajjeahua nei ishi'ishi ajja cuana. ¹⁶Chojja. Jamajjeya jshajja'ajjacue! Yahuajo nei nei Eyacuiñajjiya esohui huohuijji Joeni bajjani jama poa ba'a:

¹⁷“Eyacuiñajji jama poani ba'a: Quijje jiquio meshi beshahua nei apoa poajo, eyaya Edojoshahua Pame huoojeaje'yo ojjaña huasijje. Edojoshahua Pameya esho'i, epona sho'i cuana pea'ai huohui meesahua caje ma eyaya quijje nei aje. Ohuaya dejja etii pishana cuana jjacahuibaqui mee caje. Edejja tii cuaa cahuiba majje huohui caje pea'ai. ¹⁸E'e, eyaya Edojoshahua Pame huoojeaje'yo ecuea echacojji cuana que, epona, dejja cuana que pea'ai. Edojoshahua Pameya ecuea esohui huohui meesahua caje pea cuana huasijje. ¹⁹Quijje eyaya ma dejjaa ajjima acani aña eyajo ba majje dejja cuana quea mete poaje. Jiquio meshijo ma dejjaa ajjima acani eyaya aje pea'ai ojjañaja ebajji eya quea ca'a nee nee. E'e, quea huo'o nee ena' jayojja poaje eyajo, meshijo pea'ai. Cuaqui quea quemlo poaje. Huichacha quea quemlo nee, quea moo nee nee poaje. ²⁰Eshequi quea apo nee poaje. Ba'l quea huo'o nee ena' jayojja poaje. Majoya Emeshi Mese nei poeje o'oya. Ma pojjajo ojjañaa ba caje Emeshi Mese nei quea ca'a nee nee, quea pame nee nee poani.

²¹ Jamajjeya ojjaña Emeshi Mese nei nijje camimiahua jama ba'a:

—Emeshi Mese nei, ¡eya jaahuanacue! ¡Ecuea mimishi cuijea'yocue!

—jamaya onijje mimi'yajo, ohuaya oya cuana jaahuanca caje'yo; ba'e tiitii mee caje'yo eyajo, cuaqui yasijje huoojea'yo jjima acaje pe'a'i".

Jamaya yahuajo nei nei Joeniya tehue ca poa Eyacuiñajjiya esohui —Peno poanaje.

²² Majoya Peno jama poanaje ba'a: —Dejja cuana Isaeni meshijo ba'e, ¡shajjal'ajja neineicue mo! Jesosa ma Nasanenajo ba'ya poa miquiana nijje nequinaje. Eyacuiñajjiya Jesosaa ma dejja ajjima acani ameesahua canaje quea huiso nee nee. Jamaya miquianajaya eba —Penohua acanaje—.

²³ Jamatii Jesosa iña majje miquianaaya oya ona huasijje quianaje. E'e, miquianaaya Jesosa quia'yonaje dejja mase yasijje, acui ecueata'apeejo emano mee'yojji. Jamatii yahuajo nei jamaya Eyacuiñajjiya ejjashahuabaqu'il'yojji poa. ²⁴ Jamajjeya Eyacuiñajjiya Jesosa shequi mee ca o'yanaje. E'e, Jesosa jjanijo ehuananobia jaa tiitii ajja poa; emano'yo tii po mee'yo jjima acanaje.

²⁵ Yahuajo emeshi mese Dabiya Jesosajo huohui ca poa jama ba'a:

“Ecuea Emeshi Mese nei enijje ani tiitii'ya poa. Ohuaya eya jaahuanca tiitii canijo, eya mete'ama poaje'yo. ²⁶ Jamajjeya eyaya quea jaji neeya Eyacuiñajji bihuiaña. Eya jjanijo ehuananobia jaa shequije o'oya, yamiña. Ihui'yo ajja poaje. Jamaya ecuea eba. ²⁷ Miyaya eya jeana'yo ajja pea emano'yo cuana nijje. Jamajjeya eya mete'ama. Eya miquea quea boti nee. Jamajjeya eya meshijo ihui'yo ajja poaje'yo. ²⁸ Miyaya eya ba'e meeje o'oya quea pame nee. Minijje nequi tiitii meeje'yo. Queabihui nee eya poani”.

Jamaya yahuajo nei Dabiya huohui ca poa Jesosaja esohui —Peno poanaje.

²⁹ Penohua huohui canaje jama pea'ai ba'a: —Epeejji cuana, e'e jojo nei esejaya etiiquiana Dabi yahuajo nei mano'ya poa. Jjeya oya ehuananobia jaa jjanijo. Jamaya esejaya eba. ³⁰ Dabi ca ca Eyacuiñajjiya esohui huohuijji poa. Eyacuiñajjiya oya huohui ca poa jama ba'a: “E'e jojo nei miquea osecua quijke nei cuayaje eyaya Emeshi Mese nei po meeje'yo”.

³¹ E'e, yahuajo nei Dabija eba poa quijke nei Jesosa, Eyacuiñajjiya huoojea'yo ojjaña jaahuanajji shequije o'oya. Jamajjeya Dabiya huohui ca poa jama ba'a: “Miyaya oya jeana'yo ajja pea emano'yo cuana nijje. Oya meshijo ihui'yo ajja poaje'yo” jamaya Dabi yahuajo nei poa.

³² Penohua ojjaña cuana huohui ca o'yanaje: —E'e jojo nei Eyacuiñajjiya Jesosa shequi mee ca'yonaje; ecuanaaya Jesosa ba o'yanaje, eshe, de.

³³ Eyacuiñajjiya Jesosa nequi tiitii mee ca'yonaje eyajo onijje, o ebianei mijijke ojjaña huoojea'yojji. Eyacuiñajjiya esohui yahuajo jayojja jama Edojjoshahua Pame Jesosa que dobiqui'yonaje. Jesosaa ma Edojjoshahua Pame jjeyahua nei huoojea canaje ecuana que dobiquiya. Jiquia aje jja oya nequiaa banaje. Ojaya epoe'yo miyaya shajjal'ajjanaje pea'ai. ³⁴ ¡Bacue, Dabi ca ca oma sohuaqui jjima eyahuasijje yamiña! Ohuaya huohui ca poa jama ba'a:

“Eyacuiñajjiya ecuea Emeshi Mese nei huohui canaje jama ba'a: ¡E pejjejo anioquecue, ebianei mijijje, enijje ojjaña huoojea'yojji!

35 ¡Jjeyahua nei ojjaña joya minijje jjapeequi aija eyaya miya huoojea meeje'yo!”

Jamaya Dabiya tehue ca poa Jesosajo yahuajo.

36 Penohua jama acanaje pe'a'i ba'a: —Isaeni dejja cuana, ¡shajja'ajja neineicue! Miquianaaya ca ca oe Jesosa acui ecueata'apeejo ba'ehuanasohuajeanaje; mano mee'yonaje. Eyacuiñajjiya ca ca Jesosa ojjañaja Emeshi Mese nei po mee ca'yonaje. Ohuaya Jesosa Quito ojjaña jaahuanaa huoojea ca'yonaje pe'a'i —acanaje Penohua.

37 Ma shajja'ajja majje ojjaña jomajo nequica quea yeno nee nee poanaje. Jamajjeya Peno nijje, ojjaña Jesosaja huoojea'yo esohui huohuijji cuana nijje jama poanaje ba'a: —Epereeji cuana, ¿yajja acue poaje? Eseja iña mee'yo, eseja quecua mee'yo ca jja ca oe, de.

38 Penohua saja'a canaje jama ba'a: —¡Miquianajaya mimishi cuana pajeal'ycocue! ¡Jesosa nijje jjapeequicue! Majoya Eyacuiñajjiya esohui huohuijjiya miquianaya besa mee caje Jesosa Quitojo. Jamajjeya ojjaña ba caje miquianaya Jesosaja epereeji poani. E'e, Jesosa Quitohua miquianajaya mimishi cuana cuijea caje'yo. Ohuaya miquiana que Edojjoshahua Pame huoojea caje'yo pea'ai. **39** E'e, Eyacuiñajji Edojjoshahua Pame huoojea sa poani miquiana que, miquea ebacula cuana que pea'ai, ojaya epereeji cuana ojjaña meshijo ba'eca huasijje pea'ai, ojjaña Eyacuiñajjiya ebabaca huasijje pea'ai —Penohua acanaje.

40 Penohua quea huiso pea esohui huohui canaje. Jama acanaje ba'a: —¡Dejja quea mimishi jama a'a pojji! ¡Oya cuana nijje a'a jjapeequijji! Eyacuiñajjiya mimishi cuana quea nee nee po mee caje'yo, quea nee tii tii.

41 Quea huiso cuana Penoja esohui shajja'ajja majje Jesosa nijje jjapeequinaje. Jamajjeya Penohua oya cuana besa mee canaje Eyacuiñajjiyo enajo. E'e, ma pojxajo tii quea huiso nee nee Jesosaja epereeji po'yonaje, 3.000 huisome. **42** Jamajjeya oya cuaa Jesosaja huoojea'yo esohui huohuijji cuanaja esohui shajja'ajja canaje; jamaya acanaje pea'ai. Ojee jjapeequinaje pea'ai. Ojee Jesosaja bobi ijjiya canaje pea'ai. Eyacuiñajji nijje mimi majamajanaje, ojjaña.

Jesosaja epereeji cuana jamaya ba'e cooa poa

43 Edojjoshahua Pameya Jesosaja huoojea'yo esohui huohuijji cuana ma dejjaajjima acani ameesahua canaje quea huiso. Jamajjeya ojjaña cuana jama poanaje ba'a: —E'e de, jiquio esohui huohuijji cuaa ma dejjaajjima acani quea huiso nee nee acanaje —poanaje cuana.

44 Jesosaja epereeji cuana ca ca huapa pojjeama cuana jayojja jama poanaje. Ojjaña dejja tai'ama, nishehui'ama pea'ai poanaje. **45** E'e, ojaya cuanaja aquiana cuana chicha majje quia canaje Jesosaja epereeji jaahuanajji cuana huasijje. Majoya oya cuaa quia canaje ojjaña Jesosaja epereeji cuana huasijje. Joya aema' poani quea huiso quia canaje; joya aquianajji ca ca oe pojji quia canaje.

Jamaya ojjaña huasijke quia ca poquinaje. Jamajjeya ojjañaja aquiana peaja huiosoajjaya poanaje. ⁴⁶Ojjaña pojjajo ojjaña Jesosaja epeejji cuaa Eyacuiñajjija equi epeeiyi yasijke jjachichaqui majje esohui huohui canaje. Jesosaja bobi ijija canaje peaja equi cuana huasijke. Pea equi cuanajo anica ojee ijija'ijija ca ani ojjaña queabihui nee nee jjapeequinaje. ⁴⁷Ojee Eyacuiñajji bihuia majamaja canaje ojjaña pojjajo. Pea cuana Jesosaja epeejji cuana nijje quea bei poanaje. Eyacuiñajjiya ojjaña pojjajo pea cuana Jesosa nijje jjapeequi meesahua ca'yonaje. Jamajjeya Jesosaja epeejji cuana quea huioso nee nee poanaje.

Jiojjijjajja jjajiojji jeapiihuiqui'yonaje

3 ¹Majoya eshequi jjajeapaaquiao Peno, Huani nijje poquinaje Eyacuiñajjija equi yasijke Eyacuiñajji nijje mimiya. Jamaya ojjaña pojjajo Jodio dejja cuana Eyacuiñajji nijje mimi aninaje eshequi jjajeapaaquiao. ²Oe dejja ejiojji cojjasahuajo aninaje meme aninaje, jiojjijjajja. Oya jamatii cuaya jiojjijjajja tii. Jamajjeya ojjaña pojjajo pea cuaa oya dojo canaje Eyacuiñajjija equi yasijke, Esecue jjani Bame Bame bajjani yasijke. Jomajo ohuaya eme' huo ca aninaje bobijo, ejjeshejjijo pe'a'i. Oya jjashahuabaquinaje jama ba'a: —E'e pojja'a dejja cuaa Esecue Bame yasijke poe majje eya aquiana quia caje sosema!

³Jamajjeya Peno, Huani nijje Eyacuiñajjija equi yasijke dobiquiajo, jiojjijjajja o que eme' huo canaje. ⁴Jamajjeya Penohua Huaniya pea'ai jiojjijjajja ba canaje. Jama acanaje ba'a: —¡Ecuana bacue!

⁵Aquiana sosema' sa poanaje. Jamajjeya Peno bajeasohua canaje, jiojjijjajja. ⁶Jamatii Peno jama poa ba'a: —Ecuea epeejji, ecuea aquiana chama!. Ecuea ejjeshejjijo pe'a'i chama!. Eya Jesosaja epeejji; joya ecue ani aje mi quiaje jama ba'a: Jesosa Quitohua ma Nasanenajo ba'ya poaa miya jeo meesahua caje'yo. Jamajjeya ¡nequisohuacue! ¡Jeocue oe! —acanaje Penohua.

⁷Penohua jiojjijjajja ebianei mejje iña majje nequisohua mee canaje. Jjeyahua nei ojaya ejiojji quea pame poanaje, quibojjisha quea pame poanaje pea'ai. ⁸⁻⁹Jamajjeya oya jjeyahua nei nequisohua majje jeonaje. Peno nijje, Huani nijje pea'ai Eyacuiñajjija equi yasijke dobiquinaje, equecuayiji yasijke ma Sanomoja equi bajjani yasijke. Oya quea jaji nee jeonaje. Tohuaatohuua poanaje. Eyacuiñajji bihuia canaje pea'ai. Ojjañaa equijo nequiya oya ba canaje tohuaani, Eyacuiñajji bihuia poequi pea'ai. ¹⁰Jiojjijjajja yahuajyo ojjañaja eba. Eyacuiñajjija equi pejjejo ani tiitiinaje, Esecue Bamejo. Aquianajo meme ania poa. Ojjaña queabihui poanaje jiojjijjajja jeoje'yo ba majje: —E'e de, oya jiojjijjajja jeonaje jjeya nei —poanaje.

Penohua esohui huohui canaje Eyacuiñajjija equijo

¹¹Majoya ma jiojjijjajja poanaje Peno nijje, Huani pea'ai nijje po'yonaje, bihuabihuia'yo nequinaje. Eyacuiñajjija equijo equecuayiji bajjani Sanomoja equijo quea huioso cuana jjachichaqui canaje o baa. Ojjaña

quea bihui poanaje Penojo, Huanijo pe'a'i. Jama poanaje ba'a: —¡Dee! Penohua, Huaniya pe'a'i oya jiojjijajja jeo mee canaje. Quea ca'a nee nee oya, de, Eyacuiñajjija ma dejja ajjima acani —poanaje ojjaña.

¹²Ojjaña jjachichaquije ba majje, ojjañaja esohui shajja'ajja majje pe'a'i Penohua huohui canaje jama ba'a: —Dejja cuana Isaeni meshijo ba'e, jshajja'ajjacue mo! ¿Apiojji acuae ecuanaja esohuijo miquianaya quea ajjajja poani so'o? ¿Apiojji acuae jjashahuubaquiani jama ba'a: "Peno, Huani pe'a'i Eyacuiñajjija epeejji quea ca'a nee nee poani. Jamajjeya jiojjijajja cuaya ohuaya jeo mee canaje" poani nequiana so'o, de? —poanaje Peno—. ¹³Chojja, ecuaaya pojjeamaa jiojjijajja jeo meenaje. ¡Bacue! Eyacuiñajjija Amajama, Isaaca, Jacobo, eseja pea etiiquiana cuana pe'a'i jaahuanca ca poa. Jjeyahua nei ma Eyacuiñajjija ojaya Bacua Ejja Jesosa o pejjejo anioque mee ca'yonaje ojjaña huoojea'yoji. Miquianaaya ca mi ca Jesosa quianaje emeshi mese Pinatoja, equecua mee'yoji. Pinatohua Jesosa pichojea sa acajo, miquianaya quea quene taaanaje jama ba'a: "Jesosa me' cacacue! ¡Acui ecueata'apeejo ba'ehuanasohuajeacue!" anaje nequiaa. ¹⁴Eyacuiñajjija Jesosa quea boti nee nee. E'e, Jesosa quea name nee nee, mimishi'ama nei. Jamatii miquianaaya oya cajaa anaje jama ba'a: "¡A'la Jesosa pichojeajji!" taaageberaje quianaaya: "¡Mashama' oe pichojea'yocue!" anaje quianaaya. Mashama' aje oe ona quecua'yoji epo, de. ¹⁵Miquianaaya ca ca oe Jesosa mano mee'yonaje, ma ojjaña ba'e tiitii mee'yoji epo. Eyacuiñajjija ca ca Jesosa shequi mee ca o'yanaje. Jamaya ecuanajaya eba. E'e, Jesosa shequi o'yanaje ecuaaya banaje. ¹⁶E'e, Jesosa quea ca'a nee nee nequi. Ohuaya ca ca oe jiojjijajja jeo mee canaje. Ecuana Jesosaja epeejji. Ojo jjashahuubaquiani jama ba'a: "E'e jojo nei Jesosaa jiojjijajja jeo mee caje" jamaya Jesosajo e'e jojo nei jjashahuubaquianijo, ohuaya quea ja'a nee po mee canaje jiquio dejja. Maya miquianaaya jjeya nei baña —Peno poanaje.

¹⁷—Epeejji cuana, ecuea eba miquianaaya, Jodio etii cuana nijjeya oya ba jjimajoojo Jesosa quianaje onaja equecua'yoji. ¹⁸Yahuajo nei nei Eyacuiñajjija ojaya esohui huohuijji cuana tehue mee ca poa Jesosa Quito jama ba'a: "Quijje nei ecue huoojea'yo ojjaña jaahuanajji quea nee nee po mee caje'yo cuaa".

Ma etehue'yo yahuajo nei jayojja jama jjeya miquianaaya anaje —Penohua acanaje—. ¹⁹⁻²⁰¡Jamajjeya Eyacuiñajjija esohui jayojja jama acue! ¡Miquianaaya mimishi pajea'yocue! ¡Jesosa nijje jjapeequicue! E'e, Eyacuiñajjija ojaya esohui yahuajo nei jayojja jama huoojea ca'yonaje ojjaña jaahuanajji Jesosa Quito ese jaahuanaa. Jamajjeya ohuaya esejaya mimishi cuana cuijera caje'yo; ese nijje quea bei poaje'yo. ²¹Jjeya Jesosa eyajo nequi oja Chii nijje. Jomajo oya ani'yo; ojjaña Eyacuiñajjija esohui jayojja jama apoa poajo oya Jesosa poeje o'oya. E'e, Eyacuiñajjija yahuajo nei nei ojaya esohui huohuijji cuana huohui mee ca poa jama ba'a: "Quijje ojjaña Eyacuiñajjija esohui ma ohua yahuajo nei huohui ca poa apoa poajo, Eyacuiñajjija huoojea'yo ojjaña jaahuanajji poeje o'oya ojjaña aquiana jiquio meshijo eyacua po mee'yohua".

²²E'e —Penohua acanaje—, Eyacuiñajjija esohui huohuijji Moisesi yahuajo jama poa ba'a:

“¡Bacue! Eyacuiñajjiya eya huoojea canaje ojaya esohui huohuiya.

Quijje ohuaya pea esohui huohuijji e jayojja miquiana que huoojea caje, miquiana nijje meshijo ba'e. ¡Ojjaña ojaya esohui jayojja jama acue! ²³Ojjaña joya ojaya esohui jayojja jama po ajja aje oe Eyacuiñajjiya cajaa acaje'yo; quea nee nee po mee caje'yo”.

Jamaya yahuajo nei Moisesiya tehue ca poa Eyacuiñajjiya esohui —Penohua acanaje.

²⁴—E'e, yahuajo nei nei Eyacuiñajjiya esohui huohuijjiya Samoeni bajjaniya esohui quea pame nee huohui ca poa Jesosajo, Eyacuiñajjiya huoojea'yo ojjaña jaahuanajjijo. Majoya ojjaña Eyacuiñajjiya esohui huohuijji cuana Samoenija esohui jayojja jama huohui ca poquiapoquia poa quea huiso neeya. ²⁵Eseyá Eyacuiñajjiya esohui huohuijji yahuajo nei ba'e cuanaja osecua cuana, etiiquianaja osecua cuana poanijojo Eyacuiñajjiya esohui yahuajo esejaya etiiquiana cuana nijje jayojja jama ohuaya eseaya acaje jjeya nei pea'ai. E'e, yahuajo nei Eyacuiñajjiya Amajama huohui ca poa esejaya etiiquiana jama ba'a: “Quijje nei miquea osecuajo ojjaña cuana ojjaña meshijo ba'e queabihui nee nee poaje” ²⁶Peno poanaje: —E'e Eyacuiñajjiya oja Bacua Ejja oe nei Jesosa ese yasijke, Jodio cuana huasijke huoojea canaje ebionei, esejaya mimishi cuana pajea meesahuaa. Jamajjeya eseaya quea ja'a nee po mee caje'yo —Penohua acanaje Huani nijjeya.

Peno, Huani pea'ai iña canaje Jodio etii cuaa

4 ¹Majoya Penohua, Huani nijjeya ojjaña cuana huasijke Jesosaja esohui huohui canijo, Eyacuiñajji nijje emimijji cuana, Eyacuiñajjiya equi cuiñajji etii pea'ai, Sanoseo cuana nijje poeyanaje. ²Penoja esohui shajja'ajja majje jiquio Jodio etii cuana quea quene nee nee poanaje Penohua Jesosa shequi o'oyanaje huohuime acajje. ³Jamajjeya Peno, Huani pea'ai iña majje dojo canaje etecueajji. Siniajo mi tecuea canaje. Jeanobiajea canaje mecahuajje emimijji. ⁴Jamatii quea huiso dejja cuana, ponaaña pea'ai Penoja esohui Jesosajo shajja'ajja majje Jesosa nijje jjapeequinaje, me oejje mil huisome, 5.000 huisome.

⁵Mecajjeahua emeshi mese cuana, Jodio dejja etii cuana Moisesija tehue'yo huohuijji nijje ojee poanaje Jenosanenajo. ⁶Eyacuiñajji nijje emimijji etii Anasi bajjani, oja huapa pojjeama cuana Caipa, Huani, Anejano pea'ai ojee poanaje. ⁷Jodio dejja etiiya Peno, Huani, jiojjijjajja pea'ai iyaa canaje etecueajji. Poeyajo, Peno tecuea canaje jama ba'a: —¿Anijke acuae nequiaa jiojjijjajja jjajciojji jeapiihuiqui meenaje so'o?

⁸Edojjoshahua Pameya oya huohuisahua canijo, Penohua jama acanaje ba'a: —Emeshi mese cuana, dejja etii cuana pea'ai, e'e ecuaaya jiojjijjajja jeo meesahuanaje. ⁹Jamajjeya miquianaaya ecuana huohui'ajjaña jama ba'a: “¿Anijke acuae jiojjijjajja jeo mee'yonaje?” ¹⁰Jamajjeya jojjaña dejja cuana Isaeni meshijo ba'eya, ¡shajja'ajjacue mo! Miquiaaya ca ca oe Jesosa Quito,

ma Nasanenajo ba'ya poa acui ecueata'apeejo ba'ehuanasohuajeanaje; mano mee'yonaje. Jamatii Eyacuiñajjiya Jesosa Quito shequi mee ca o'oyanaje. Ohuaya, Jesosa Quitohua jiojjijjajja jeo mee canaje. ¡Bacue quea pame nee oya nequi! —Penohua acanaje—. ¹¹E'e, yahuajo nei Eyacuiñajjiya esohui huohuijji cuaa Jesosajo tehue ca poa jama ba'a:

“Oe equi yamajjana equi iyajji cajaa aca poa cuaa. Jamatii Eyacuiñajjiya ma eyamajjana equi yamajjana quea ca'a nee aca poa. Jamajoya ojjaña ojaya epeejji cuaa Eyacuiñajji bihuia cani”.

Jesosa Quito ma eyamajjana equi iyajji jayojja. Miquianaya Jesosa sa po'yo ajja poanaje. Jamatii jjeyahua nei oya Jesosa quea pame nee nee, quea ca'a nee nee nequi. ¹²Jesosa Quitohua ohuaye nei mimishi cuana cuijea'yo majje ba'le tiitii mee caje'yo se. E'e, Eyacuiñajjiya oya huoojea ca'yonaje ese nahuejji, ese cuaqui yasijje epoqu'yo poaje jjejojo. Pea chama' ese jaahuanajji —acanaje Penohua.

¹³Ma Jodio etii cuaa Penoja esohui, Huanija esohui pea'ai shajja'ajja majje jama acanaje ba'a: —¡De! Oya cuana bicho'ama mimiani ecuana nijje. ¿Yajjajje shai? Yahuajo ebiojo ba'e'ya poa oya cuana. Esohui etehue'yo quea huiso ojaya ba jjima yahuajo poa. Jamatii quea ja'a nee esohui huohui cani. E'e de, Jesosa nijje nequi tiitiinaje. Ohuaya pojja'a quea huiso ba mee canaje —acanaje etii cuaa Penojo, Huanijo pea'ai.

¹⁴Jamajjeya Jodio etii cuaa Peno Jesosajo mimipajea mee'yo sa acani. Jamatii joya jiojjijjajja Peno nijje, Huani pea'ai nijje nequi quea pame nee. Jamajjoya mi tecuea canaje. ¹⁵Jamajjeya Peno, Huani, Jiojjijjajja pea'ai esecue yasijje, equi quibo huasijje huoojeacuayajea canaje. O huoojeacuayajea majje mimimiminaje.

¹⁶Jama poanaje ba'a: —¿Ae acuae acajji so'o? Jesosaja esohui pajea'yo ajja. Ojjaña Jenosanenajo ba'eya ba canaje Penohua ma dejaa ajjima acani acanaje; jiojjijjajja jeo mee canaje. Jamajjeya ecuaaya yajja siajje ame yajji Peno jama ba'a: “Chojja Penoja, Huanija pea'ai jiojjijjajja jeo mee'yo jjima” jama siajje pomeya jjapo meequei ajja, de. ¹⁷Jamajjeya Peno, Huani pea'ai ejjatecueaqui jama ba'a: “¡A'a huohui'yojji Jesosajo!” jamaya ejjahuohuiqui: “¡A'a ojjaña cuana Jesosa shequi'yonaje mimime pojji! ¡A'a Jesosaa jiojjijjajja jeo mee canaje mimime pojji pea'ai!” —poanaje Jodio etii cuana.

¹⁸Majoya oya cuaa Peno, Huani iyaa ca o'oyanaje. Poe majje huohui canaje jama ba'a: —¡Bacue! ¡A'a jja oe Jesosajo mimi o'oyajji! Chojja. ¡A'a Jesosaa eshe o'oyaa jiojjijjajja jeo mee canaje a'a huohui majajji! —huohuime acanaje Jodio etii cuaa.

¹⁹Jamatii Penohua, Huanija pea'ai mete'ama saja'a canaje jama ba'a: —¡Jashahuabaquicue so'o! ¿A'a ecuaaya miquianajaya esohui jayojja jama aje? Cho. Eyacuiñajjiya esohui jayojja jama pojjeama. Miquianaaya ecuana Jesosaja esohui huohui mee jjima aña. Eyacuiñajjiya ca ca ecuana huoojea canaje Jesosajo huohuija. ²⁰¡Bacue! Ecuaaya Jesosa banaje eshe o'oya. Eyacuiñajjiya esohui ecuaaya shajja'ajjanaje onijje. ¡Maya ecuaaya cahuohuiahua!

²¹Jamatii Jodio etii cuaa Peno, Huani pea'ai cuia sa acanaje. Jamatii cuia jjima poanaje quea meteya jjejojo. Ojjaña cuaa Eyacuiñajji bihuia

canaje Jiojjijajja jeo mee canajejo; Peno, Huani pea'ai ojjañaja quea nahue ecuia mee'yoji poanaje. Jamajjeya mi cuia canaje. Tecuea canaje ca ca oe; majoya tecuea majje huoojea canaje Huani, Peno pea'ai.

²²E'e, Jiojjijajja jeonaje etii nei, peaja ojiojji miji pea'ai huiso shequijame, 40 shequijame poanaje. Eyacuiñajjiya Peno, Huani pea'ai oya jeo meesahua cal'yonaje.

Ojjaña Eyacuiñajji nijje miminaje esohui mete'ama ehuohui meesahuajji

²³Jamajjeya Jodio dejja etiiya oya huoojea cajje Peno, Huani nijje poqui'yonaje ojaya epeejji cuana que. Ma Jodio etii cuaa tecuea canaje, Eyacuiñajji nijje emimijji mese cuanajo pea'ai huohui cañaquinaje.

²⁴Ma shajja'ajja majje ojjaña cuaa ojee Eyacuiñajji bihuia canaje. Onijje miminaje jama ba'a: —Eyacuiñajji, ecuanaja Chii ai, miya quea pame nee nee. Miyaya ojjaña eyajo pana'ya poa, meshi cuana pana'ya poa, bae cuana pana'ya poa pea'ai. Ojjaña aquiana cuana eyajo, meshijo, enajo pea'ai ojjaña mique pana'yo. ²⁵Yahuajo nei nei miyaya ecuanaja etiiquiana que, miquea epeejji emeshi mese Dabi que huoojea'ya poa Edojoshahua Pame. Edojoshahua Pameya Dabi huohui meesahua ca poa jama ba'a:

“Joya, ojjaña cuana quea shajjaquijjo, Eyacuiñajji nijje mimipanajajiani. Oya cuana quea tai jjashahuabaquianai Eyacuiñajji jeabichajeajji nisho. ²⁶Emeshi mese cuana dejja huoojeajji poani nijje jjachichaquianai; ojee nequianiya Eyacuiñajjiya huoojea'yo ojjaña jaahuanajji jeabichajea'yoji nisho”.

²⁷—E'e Eyacuiñajji, miyaya miquea Ebacua Ejja quea pame nee Jesosa huoojeanaje ojjaña jaahuanajji epojji. Jiquio cuiñajjiyo ba'eca cuana quea huiso quea mase Jesosa quecua sa poanaje. Jodioja emeshi mese quea mase Enode, Shomano emeshi mese Ponosio Pinato nijje jjachichaquinaje Jodio pojjeama cuana nijje, Isaeni dejja cuana nijje pea'ai. Ojee jjashahuabaquinaje Jesosa quecua'yoji. ²⁸E'e Eyacuiñajji, miya yahuajo nei nei Jesosajo jjashahuabaquia poa jama ba'a: “Eyaya Jesosa huoojeaje dejja cuana huasijke. Jamatii onaaya oya iña caje equecua'yoji”. Miquea ejjashahuabaqui'yoji yahuajo jayojja jama jjeyahua nei dejja quea mase cuaa acanaje. ²⁹Eyacuiñajji, miya ecuanaja Emeshi Mese nei eyajo ba'e. Miquea eba jjeyahua nei emeshi mese cuana quea mase ecuana nijje mimijajiani Jesosaja esohui ecuaaya ehuohui poaje jjejojo. Jamajjeya ecuana miquea epeejji poanijo, jesohui Jesosajo huohui meesahuacue mete'ama! ³⁰¡Mique Bacua Ejja Jesosa nijje jjapeequianiya pea cuana huaquia meesahuacue! ¡Ma dejjaajjima acani ameesahuacue, Eyacuiñajji! —jamaya miminaje Eyacuiñajji nijje ojjaña.

³¹Eyacuiñajji nijje mimipajea'yajo, Eyacuiñajjiya ma equi jeahuehuahuehua mee canaje. Edojoshahua Pameya ojjaña huasijke dobiqui majje Eyacuiñajjiya esohui huohui mee canaje mete'ama.

Jesosaja epeejji cuana huapa pojjeama jayojja ba'ya poa.

³²Jomajo ojjaña Jesosaja epeejji cuana ojee jjapeequinaje quea bei. Oya cuana aquiana nahue'ama poanaje. Bobi nahue'ama poanaje. Nishehui'ama, dejja tai'ama ojjaña poanaje. Ojjaña Jesosaja epeejji cuana ba'e meesahua canaje. Ojjaña aquiana cuana ojjañaja poanaje. ³³Jamajjeya Eyacuiñajjiya huoojea'yo esohui huohuijji cuaa janobajjima nei esohui huohui canequinaje mete'ama. Jama huohuime acanaje ba'a: —Esejaya Emeshi Mese nei Jesosa Quito shequi o'oyanaje e'e jojo nei —acanaje.

Jamajjeya Eyacuiñajjiya oya cuana jaahuana neinei canaje; quea bei nee po mee canaje.

³⁴⁻³⁵E'e, jamajjeya Jesosaja epeejji cuaa meshi, equi cuana, aquiana pojja'a quia majje, ejjeshejji jjeshe majje quia canaje Jesosaja epeejji jaahuanajji yasijje. Majoya ohuaya ma ejjeshejji quia canaje Jesosaja epeejji aema' cuana huasijje, aema' pishana huasijje pe'a'i. Jamajjeya oya huiosoajjaya aquiana ojjañaja poanaje.

³⁶Majoya oe Nemita Jose bajjani ma yahuajo Chipe meshijo ba'e poenequinaje, Jesosaja epeejji. Oya Benabe bajjani aca'yonaje, Ese Ejaja esohuijo Ona Quea Bei pomeejji bajjani aca'yonaje Jesosaja huoojea'yo esohui huohuijjiya. ³⁷Ma Benabeya que jjinipea quia canaje ejjeshejji sosejje. Majoya ohuaya ejjeshejji ye ca'yonaje Jesosaja huoojea'yo esohui huohuijji Jesosaja epeejji aema' cuana huasijje equiajji. Jamajjeya ojjaña queabihui nee Benabe nijje poanaje.

Anania oja huanase Sapina pea'ai siajjepojji poanaje

5 ¹Majoya Ananiaa ojaya ehuanase Sapina nijjeya que jjinipea quia ca'yonaje ejjeshejji sosejje. Bejjo iñatepe majje equijo iyaquehua canaje. Quea bejjo jea poanaje. ²Jamajjeya Ananiaa oe pojji bejjo quia ca'yonaje Jesosaja huoojea'yo esohui huohuijji yasijje. Oja huanaseja eba poanaje. Jamatii siajje poanaje jama ba'a: —Ma'aje bejjo, Peno, ojjaña tii que sosejje ecue jjeshe —anisho canaje Ananiaa; ona quea bihui pojji nisho siajje poanaje.

³Edojjoshahua Pameya Peno huohui meesahua canaje jama ba'a: —Anania, ¿apiojji acuae mi Edosiquiana jama siajje poani? ¿Apiojji acuae Edojjoshahua Pame siajje aña so'o? Miquea ojjaña ejjeshejji que jjinipea sosejje quia'yo jjima; miquea equijo huanaquehuanaje. ⁴;Bacue, Anania! Que jjinipea quia jjimahuajo miquea tii poanaje. Quia'yo majje ejjeshejji miquea tii poanaje. Jamajjeya ¿apiojji acuae mi siajje poani ojjaña bejjo miquea que sosejje quia'yaña nisho poani? Miyaya ecuanaya pojjeama dasiaña; miyaya Eyacuiñajji dasia sa aña, de —poanaje Peno.

⁵Penoja esohui shajja'ajja majje Anania bichaquinananaje; poquijeyonanananaje. Chama'yo tii poanaje. Anania mano'yonaje ba majje ojjaña quea mete nee nee poanaje. ⁶Majoya dejja etii pishana cuaa Anania daqui oshejo bebo majje dojo canaje mojeaa.

⁷Quijje pishana eshequi jaasohua pishanajo, Ananiaja ehuanase Sapina poeyanaje Peno que. Oja ba jjima ojahue mano'ya poa. ⁸Penohua oya huohui'ajja canaje jama ba'a: —Sapina, ¿ache sose huiso que jjinipea quinaje miquiaaya?

Oya epona siajje poanaje pea'ai: —E'e Peno, ma sose huiso tii quianaje ecuaaya —poanaje epona.

⁹Majoya Penohua epona tecuea canaje: —¿Apiojji miya miqueahue jayojja jama siajje poani? ¿Apiojji miyaya Edojjoshahua Pame dasia sa aña pea'ai? ¡Bacue! Miqueahue mojeajji epo poe'yonaje. Ohuaya miya mojea pea'ai caje'yo —acanaje Penohua.

¹⁰Siajjepojji jjekojo jjeyahua nei epona mano bichajequinananaje Peno pejjejo tii. Jamajjeya dejja etii pishanaa ma Anania mojeal'yojji epohua Peno que poe o'oya majje epona emano'yojaa ba cañaquinaje. Epona dojo canaje mojeaa, ojahue pejjejo.

¹¹Ma ba majje ojjaña Jesosaja epeeiji cuana quea mete nee poanaje Eyacuiñajji dasiajji nisho. Ojjaña pea cuana ma shajja'ajja majje quea mete nee nee poanaje pea'ai.

Jesosaja huoojea'yo cuaa acanaje quea huiso ma dejja ajiima acani

¹²Majoya Eyacuiñajjiya Jesosaja huoojea'yo esohui huohuijji cuana ma dejja ajiima acani ameesahua canaje quea huiso nee ojjaña cuanajo. Ojjaña Jesosaja epeeiji cuana jjachichaqui nequinaje Eyacuiñajjiya equi yasijje, equi equecuayiji Sanomoja equi bajjani yasijje Eyacuiñajji bihuiaa. ¹³Pea cuana Jesosaja epeeiji cuana nijje quea bei nee poanaje jama ba'a: —Jesosaja epeeiji cuana quea pame nee —poanaje. Onijje mimijaji ajja nei poanaje, quea mete.

Jesosaja epeeiji cuana nijje jjachichaqui jjima poanaje Jesosaja epeeiji pojjeama. ¹⁴Ojjaña pojjajo quea huiso nee Jesosa nijje jjapeequinaje dejja cuana, epona pea'ai. ¹⁵Jesosaja huoojea'yo esohui huohuijji cuaa ma dejja ajiima acani acanaje: emanojaaca cuana huaquia meesahua ca'yonaje, jjajeaquí meesahua ca'yonaje. Jamajjeya ojjaña emanojaa cuana ejiojji cojja sahuajje dojo canaje cuaa, equipajaajjijo jaa. Ejiojji sahuajo huana yiyyo canaje. Jama poanaje ba'a: —Peno ejiojjije poquijeya oja yajjanaa emanojaa cuana biajje yejje cananaje pojja'a, jjaajaquije'yo pojja'a —poanaje cuana.

¹⁶Quea huiso dejja cuana cuiñajji sisi cuanajo ba'e, Jenosanena chipi neejo ba'e poeyanaje Jenosanena huasijje. Emanojaa cuana ye canaje quea huiso nee nee; niñepoqui cuana eshahuajo niñepoquiani cuana ye canaje pea'ai. Ojjaña cuana huaquia'yonaje, jjaajaquij'yonaje, niñepoqui pajea'yonaje pea'ai. Jesosaja epeeiji cuaa jjaaja meesahuaqui ca'yonaje.

Jesosaja epeeiji jeanobia canaje cuaa Jesosaja esohui huohuijjojo

¹⁷Majoya Eyacuiñajji nijje emimiji etii, Jodio dejja etii cuana, Sanoseo cuana pea'ai quea quene poanaje Jesosaja huoojea'yo esohui huohuijji cuana nijje. Mimimiminaje jama ba'a: —¡Dee! “¡A'a Jesosajo huohui

majajji!" aje oma a'ajjanaje yahuajo. Jamatii esohui huohuipajea ajja. Ecuana shajja'ajja jjima acani. Ojjaña cuana Jesosa nijje jjapeequi mee cani, ecuanaja esohui pajea mee cani —poanaje Jodio etii cuana.

¹⁸ Jamajjeya Jodio etii cuaa Jesosaja huoojea'yo esohui huohuipajea cuana iña canaje. Dojo canaje ejjajeanobiaquijji equi yasijje, dejja mimishi cuana nijje pe'aitya. ¹⁹ Jamatii mecashono Eyacuiñajjija esohuidojoji poeyanaje ejjajeanobiaquijji equi yasijje. Esecue jjani ca'apejo cañanaje. Jesosaja huoojea'yo esohui huohuipajje cuana dojocuayaqui ca'yonaje esecue yasijje. Huohui canaje jama ba'a: ²⁰—¡Poqui o'oyacue Eyacuiñajjija equi yasijje! ¡Ojjaña cuana huohuiquicue Jesosaja esohui onijje eba'e quea pame neejo, ma Jesosaa huohui canaje shequi o'oya majje! —poanaje esohuidojoji.

²¹ Jamajjeya mecajjeahua oya cuana poqui o'oyanaje Eyacuiñajjija equi yasijje. Jesosaja esohui huohui ca o'oyanaje ojjaña eshajja'ajjajji.

Ohua esohui huohui canijo tii, Eyacuiñajjija nijje emimijji etii cuana, ojjaña Jodio etii cuana pealai jjachichaquinaje pea equijo. Jjachichaqui majje sohuinano cuana huoojea canaje equi ejjajeanobiaquijji yasijje Jesosaja huoojea'yo esohui huohuipajje nisho. ²² Jamatii sohuinano cuana equi ejjajeanobiaquijji yasijje poqui majje ba cañaquinaje Jesosaja huoojea'yo esohui huohuipajje chama'. Ba'ajja cañaquinaje; sa'ajja cañaquinaje. Chama' equi ejjajeanobiaquijji. Jamajjeya esohuinano mese cuana poqui o'oyanaje Jodio etii cuana huohui'yohua. ²³ Jama poanaje ba'a: —Esecue jaahuanajji poani nequinaje esecue jjani pejjejo. Esecue jjani eca'a tii nequinaje. Jamatii esecue jjani ca'apejo'yo majje chama' ba canaje Jesosaja epeeciji cuana.

²⁴ Eyacuiñajjija equi jaahuanajji, Eyacuiñajjija nijje emimijji mese cuana pealai ma esohui shajja'ajja majje quea mete poanaje: —¿Yajja po majje shai cuayaqui'yonaje, de? ¿Achacua shai poqui'yonaje ma dejja cuana? —poanaje.

²⁵ Majoya pea dejja poeyanaje. Jama huohuime acanaje ba'a: —Dejja cuana ma miquianaja jeanobia'ajja poanaje jjeya nei Eyacuiñajjija equijo nequi o'oya, Jesosaja esohui huohui o'oya ca ca poequi ojjaña cuanaja eshajja'ajjajji.

²⁶ Jamajjeya sohuinano huoojeajji poani echacosahuajji nijje poquinaje Jesosaja esohui huohuipajje cuana jjequi o'oyaa. Jamajjeya quea huiso cuanaja Jesosaja esohui huohuipajje cuana quea jea nee poanaje, quea nahue nee poanaje etecueajji. Tecuea jjima nei jjequime acanaje. E'e, dejja mase quea mete jama poanaje ba'a: —E sapa jajahuejjajea ca meiya —poanaje.

²⁷ Jamajjeya jjequi majje nequi mee canaje Jodio etii cuana ani cojja nei. Majoya Jodio etii cuaa jama tecueame acanaje ba'a: ²⁸—Peno, “¡a' Jesosajo huohui majajji!” aje mi yahuajo a'ajjanaje. Jamajjeya ¿apiojji acuae Jesosajo huohuipajea'yo jjima aña ojjaña dejja cuana huasijje, ojjaña Jenosanenajo ba'e yasijje so'o? Miquianaaya ca ca oe ecuanaya niñebeña jama ba'a: “Jodio etii cuana ca ca oe Jesosa quecua'yojji epo, quea mimishi jjejojo”. ¿Apiojji acuaeaya jama sohuinano cuana aña tii so'o? —poanaje Jodio etii cuana.

²⁹ Jesosaja huoojea'yo esohui huohuijji cuaa, Penohua pea'ai jama saja'ame acanaje ba'a: —Ecuaaya Eyacuiñajjiya esohui jayojja nei nei aje'yo, miquianaja sohui jama pojjeama. ³⁰E'e, yahuajo esejaya etiiquiana cuana Eyacuiñajji nijje jjapeequi'yonaje. Miquianaaya ca ca oe Jesosa acui ecueata'apeejo ba'ehuanasohuajea meenaje emano'yojji. Jamatii Eyacuiñajjiya oya shequi mee ca o'yanaje. ³¹E'e, Eyacuiñajjiya Jesosa oijaña jaahuanajji, mimishi cuijea'yojji pea'ai po mee ca'yonaje. Ojaya ebianei mijijje nequi mee ca'yonaje eyajo oijaña huoojea'yojji epoiji. Jamajjeya Jesosaa Jodio cuanaja mimishi cuana cuijea ca'yani. Mimishi cuana pajea meesahua ca'yani pea'ai onijke jjapeequianijo. ³²Jamaya ecuanajaya eba. Edojoshahua Pameja eba pea'ai. Eyacuiñajjiya Edojoshahua Pame huoojea cani ojaya epeejji cuana que dobiquiya, ojaya ehuohui'yo jayojja jama acanijo —Penohua acanaje.

³³ Penoja esohui shajja'ajja majje Jodio etii cuana quea quene nee nee poanaje. Oijaña Jesosaja huoojea'yo esohui huohuijji quecua sa acanaje. ³⁴ Jamatii oe dejja ona nijje nequi Jjamani bajjani nequisohuanaje emimijji. Oya Paniseo dejja pea'ai, Moisesija etehue'yo huohuijji, dejja etii quea pame. Jamajjeya oijañaa oya shajja'ajja canaje. Jamajjeya Jjamani jama poanaje ba'a: —;Jiquio dejja, Jesosaja esohui huohuijji dojocuayaquicue esecue yasijje! —poanaje. Ojaya esohui shajja'ajja mee sa po ajja.

³⁵ Majoya cuayaquinaje. Jjamaniya sohuihuohui canaje jama ba'a: —Isaeni dejja etii cuana, ma dejja cuana quecua jjimahuaa, jecue sohui shajja'ajja neineicue! ³⁶ ¡Niñeba'yocue! Yahuajo pishana oe dejja Teodasi bajjani emeshi mese jayojja quea ca'a po'ajjanaje. Huohui canaje jama ba'a: “Eya quea pame nee, quea ca'a nee nee. Quea huiso nee nee ecuea eba. ¡Eya shajja'ajjacie!”

Jamajjeya quea huiso nee nee, beshahua nei 400 huisome dejja cuana onijke jjapeequi'yonaje. Jamatii peaa Todasi quecua ca'yonaje. Todasi quecua ca'yajo, ojaya epeejji cuana ojaya esohui pajea ca'yonaje. ³⁷ Quijje pishana pea shequiajajo, emeshi meseya oijaña cuana bajjani cuana tehue mee canaje esicojji. Ma shequiajajo pea dejja Jodasa bajjani emeshi mese jayojja po'ajjanaje. Jodasaja esohui shajja'ajja canaje quea huiso dejja cuaa. Jodasa nijjeya emeshi mese jeabichajea'yo sa acanaje. Jamatii Jodasa quecua ca'yajo, ojaya epeejji cuaa oja sohui pajea ca'yonaje. Poqui'yonaje. ³⁸ Jamajjeya ja'a Jesosaja epeejji cuana napajji! ¡A'a iña majajji! Eyacuiñajjiya oya cuana huohui meesahua ajjajo, quijje ojjañaas Jesosaja esohui pajea caje'yo pea'ai. ³⁹ Eyacuiñajjiya ca ca oya cuana huohui meesahua cani pojja'a. Jamajjeya ohuaya esohui mi huohuipajea cani. E'e, eseyaya Eyacuiñajji niñeba chana' pojja'a. Jama a sa po'yo ajja eseyaya —acanaje Jjamaniya.

⁴⁰ Oijaña Jodio etii cuaa oja sohui shajja'ajja canaje. Jamaya acanaje. Jamajjeya Jesosaja huoojea'yo esohui huohuijji cuana iyaa canaje. Cuiasejjajea canaje acui sisiya. Tecuea ca o'yananje jama ba'a: —¡A'a jja oe Jesosajo huohui majajji! —jamaya amajje oya cuana huoojeacuayajea ca'yonaje.

⁴¹ Jamajjeya Jodio etii cuana jeansa'yo majje Jesosaja huoojea'yo esohui huohuijji cuana poquinaje. Eyacuiñajji bihuia canaje jama ba'a: —E'e

Eyacuiñaggi, ecuana Jesosa nijje jjapeequianijo, Jodio etii cuaa Jesosa aca poa jayojja ecuana acani pea'ai. Jamaya capoahua —miminaje ojjaña.

⁴²Jamajjeya ojjaña pojajjo Eyacuiñajjija equijo, pea equi cuanajo pea'ai oya cuana huohuihuohui pajea'yо aja poanaje esohui quea pame nee Jesosajo. Jama huohuime acaninaje ba'a: —Jesosa Quito Eyacuiñajjija huoojear'o ojjaña jaahuanajji e'le jojo nei.

Me oeje beca, 7 dejja babaca ca poa Jesosaja epjeejjii aema' jaahuanajji

6 ¹Jamajjeya Jesosaja epjeejjii cuana quea huiso nee nee poanaje.

Majoya pea cuana nijje quea bei pojjeama poanaje. Jomajo ani Jodio cuana Jieno meshijo ba'yahua mimijajinaje pea Jodio cuana nijje, Emeoja esohuijo mimiani cuana nijje. Jama poanaje ba'a: —Ojjaña pojajjo bobi quiañajo miquianaaya quiaña quea huiso aquiana miquea e'ahuemano cuana. Ecuanaja e'ahuemano huasijke ca ca oe pojji quiaña, de —poanaje Jodio cuana ma Jieno meshijo ba'yahua.

²Jamajjeya ma shajja'ajja majje Jesosaja huoojear'o esohui huohuijji cuaa ma ome mijji beca, 12 huisomeya ojjaña Jesosaja epjeejjii cuana iyaa canaje. Quea huiso ojee poeyajo, huohui canaje jama ba'a: —Epeejjii cuana, ¡bacute! Ecuaaya Eyacuiñajjija esohui cahuohuiyahua. Ojjaña pojajjo bobi equiajji pojjeama ona huasijke. ³Jamajjeya ¡miquianaaya me oeje beca, 7 dejja quea pame cuana babacue bobi quiajji! E'e, ¡joya Edojoshahua Pame shajja'ajja cani, quea jjashahuabaqui ja'a nee nee poani babacue! Majoya ecuanaya ma dejja cuana huoojeaje bobi quiajji, pea aquiana cuana pea'ai quiajji ojjaña huasijke, e'ahuemano cuana huasijke pea'ai. ⁴Jamajjeya ecuanaya Eyacuiñajji nijje mimi majamajaje, ojaya esohui huohui tiitiije pea'ai.

⁵Jiquio ehuohui'yо jayojja jama a sa poanaje ojjaña Jesosaja epjeejjii cuana. Jamajjeya Estema babaca canaje Jesosaja epjeejjii e'ahuemano jaahuanajji. Ohuaya, Estemaa Edojoshahua Pame shajja'ajja neinei canaje. Eyacuiñajjija esohui jayojja jama atiitii canaje pea'ai. Majoya pea dejja cuana babaca canaje pea'ai: Penipe, Pocono, Nicaino, Timono, Pamenase, Niconasi pea'ai. Oya Niconasi Jodio pojjeama; oya yahuajo Atioquia cuiñajjijo ba'ya poa. Jodio cuanaja ehuohui'yо jayojja Eyacuiñajji bihuia ca poa, jjeya ca ca Jesosa nijje jjapeequiani. ⁶Majoya jiquio 7 epjeejjii cuana babaca majje Jesosaja huoojear'o esohui huohuijji cuana huasijke jjequi canaje cuaa. Poeyajo ma dejja cuana sapa biajje Jesosaja huoojear'o esohui huohuijji cuaa eme' huana canaje. Eyacuiñajji nijje miminaje onajo, o chaco meesahuajji. Jamajjeya ojjañaja eba poanaje ma dejja cuana e'ahuemano cuana huasijke aquiana quiajji epoiji.

⁷Majoya Jenosnenajo quea huiso nee neeya Eyacuiñajjija esohui shajja'ajja canaje. Quea huiso nee nee Jesosa nijje jjepeequinaje. E'e, Jodio etii cuana, Eyacuiñajji nijje emimijji cuana pea'ai Jesosaja epjeejjii poanaje, ojaya esohui jayojja jama acanaje.

Estema iña majje tecuea canaje Jodio etii cuaa

⁸Estema Eyacuiñajija quea jea neejo oya quea ca'a nee po mee canaje; quea huiso ma dejaa ajjima acani ameesahua canaje ojjaña cuanajo. Jamaya ojjaña ba mee canaje oya Jesosaja epeejji nei. ⁹Jamatii pea Jodio cuana Sinene cuiñajijo ba'e, Anejania cuiñajijo ba'e, Sinisia meshijo ba'e, pea cuana Asia meshijo ba'e pea'aiya Estema emimicuajeanobiajeajji nisho acanaje. E'e, Jodio cuaa equi bajjani Echacojjii epichojea'yoja equi ojee e'anijjijo jjachichaquiani cuaa Estema emimicuajeanobiajeajji nisho acanaje. ¹⁰Edojoshahua Pameya ca ca Estema quea jjashahuabaqui ja'a nee po mee canaje; oya mimi meesahua canaje pea'ai. Jamajjeya ma Jodio cuana Estema nijje jjamimicuajeanobiajea pajequinaje, yajja saja'amé yajji. ¹¹Oya cuana Estema nijje quea quene nee poanaje. Jamajjeya quecuay'yo sa acanaje. Siajjepoiji cuana beijo quia canaje Estema siajje ajji. Jama siajje ame aje acanaje ba'a: —Ecuaaya Estema shajja'ajjanaje. Ohuaya ca jja ca oe Eyacuiñajiji niñeba cani quea tai. Esejaya etiiquiana Moisesi niñeba cani pea'ai —poanaje ma siajjepoiji cuana, beijo sosejje.

¹²Jamajjeya ma shajja'ajja majje ojjaña Jodio cuana Estema nijje quea quene nee nee poanaje. E'e, Jodio etii cuana, Moisesija etehue'yo huohuijji cuana pea'ai quea quene nee poanaje Estema nijje. Jamajjeya Estema que cuajicuajijebenaje; iña canaje. Dojo canaje Jodio etii cuana ojee ani yasijje. O cojja nei nequi mee canaje. ¹³Majoya pea siajjepoiji cuana jjequi canaje Estemajo siajje ajji. Jama siajje pome poanaje ba'a: —Estemaya ca ca Moisesija etehue'yojo quea tai mimiani, Eyacuiñajiji equijo pea'ai. ¹⁴E'e, ecuaaya oya shajja'ajjanaje; jama poanaje Estema ba'a: "Jesosaa ma Nasanenajo ba'yahuaa jiquio equi, Eyacuiñajiji equi jeabichajea caje'yo. Jesosaa eseyaa Moisesija etehue'yo pajea mee caje'yo ojaya huohui'yo jayojja jama eba'ejji" —jama siajje pomeya poanaje Estemajo.

¹⁵Majoya ojjaña Jodio etii cuaa jomajo aniya Estema ba neinei canaje. Ba canaje ojaya ecojja esohuidojoojji jayojja cojjame, quea cojja bei nee nee, quea cojja ja'a nee nee.

Estemaa sohuihuohui canaje Jodio etii cuanaja eshajja'ajjajji nisho

7 ¹Majoya Eyacuiñajji nijje emimijji etiiya Estema huohui'ajja canaje jama ba'a: —¿A'a jiquio esohui e'e nei? ¿A'a cuae miyaya jamaya aña?

²Estemaa saja'a canaje jama ba'a: —Ecuaaya epeejji cuana, dejja etii cuana pea'ai, ¡shajja'ajjacue mo! Yahuajo nei nei Eyacuiñajiji quea pame nee esejaya etiiquiana Amajama que jjanequipanaquia poa. Jamaya poa Amajama Mesopotamia meshijo ba'yahua, Janani meshi yasijje poe jjimahuajo. ³Eyacuiñajiji Amajama huohui ca poa jama ba'a: "¡Mesopotamia meshijo a'a ba'e majajji! ¡Jiña'yocue oe! ¡Pea meshi yasijje poquicue! ¡Miqueua huapa pojjeama cuana jiña'yocue! Eyaya miya pea meshi ba meeje. Jomajo miya ba'e meeje'yo" aca poa Eyacuiñajiji.

⁴—Jamajjeya Amajamaa Canea meshijo ba'e poquia poa Janani meshi yasijje. Jomajo nequia poa. Oja chii mano'ya poa. Oja chii mano'yajo,

Eyacuiñajjiya Amajama huoojea ca'ya poa jiquio meshi yasijje, ma ese jjeyahua nei ba'yani yasijje. ⁵Jamatii Eyacuiñajjiya oya jiquio meshi quia jjima poa ojaya epojji. Que biso nei ojaya nahue mee jjima poa. Eyacuiñajjiya oya huohui ca poa jama ba'a: "Amajama, jiquio meshi miquea poaje'yo quijje; mique osecua cuanaja quijje nei poaje'yo pe'a'i" oya aca poa Eyacuiñajjiya, jamatii Amajama edejja tii nojinoji poa, bacuama' tii poa.

⁶—E'e, Eyacuiñajjiya Amajama huohui ca poa jama ba'a: "E'e jojo nei miquea osecua cuana jiquio meshijo ba'leje'yo quijje nei. Jamatii jjeya jiquio meshi onajaya. Jamajjeya miquea osecua cuana jiquio meshijo nequi poqui caje quea huesha nee pea meshi yasijje. Joma meshijo ba'e dejja cuaa miquea osecua cuana quea huiso napa caje. Chaco tiitii mee caje'yo sosema' quea huiso nee nee shequiajame, 400 shequiajame. ⁷Quea mase poaje miquea osecua cuana nijje. Majoya eyaya ma dejja quea mase cuana tecueaje'yo, quea nee nee po meeje'yo pealai. Jamajjeya miquea osecua cuana ma meshijo ba'e poqui mee caje'yo jiquio meshi yasijje epoe o'oyajji. Jiquio meshijo tii eya bihuia caje o'oya cuaa. Ecue sohui jayojja jama ba'e caje cuana pe'a'i". Jamaya yahuajo nei nei Eyacuiñajjiya Amajama aca poa.

⁸—Majoya Eyacuiñajjiya pea esohui huohui ca poa ojjaña ba meeiji oya e'e jojo nei Amajama nijje miminaje. Jama poa ba'a: "Amajama, jehuisejjajeacue cuiishasha biso nei miquea, mique bacua cuanaja, ojjaña. Jamajjeya ojjaña cuaa ba caje eya e'e jojo nei minijje miminaje, miya, mique osecua quea huiso nee nee cuana jiquio meshi quiaña miquea epo'yojji tii tii" aca poa.

—Jamajjeya Amajamaa Eyacuiñajji shajjal'ajja ca poa. Quijje oja bacua Isaaca cuaya poa. Ebacua jjeya cuaya me oeje pea beca pеejima cahuime poajo, Amajamaa oya cuiishasha biso nei jehuisejjajea ca poa. Majoya tii majje Isaacaja bacua Jacobo cuaya poa. Isaaca oya cuiishasha biso nei jehuisejjajea ca poa. Quijje tii majje Jacoboja bacua cuana cuaya poa quea huiso nee; 12 huisome dejja poa, epona oe nei poa. Jacobohua oya jayojjaya aca poa, ejeajjiya aca poa jayojjaya. Jacoboja bacua ejja cuana tiinaje ojjaña Isaeni cuanaja etiiquiana, esejaya, de.

⁹Ma edoe mese cuana aje echahua mesejo quea quene nee poa, Josejo. Quia ca'yá poa dejja cuana Ejito meshijo ba'e yasijje ejjeshejjí sosejje. Echacójji sosema' Jose poa. Jamatii Eyacuiñajjiya Jose pajea'yo jjima poa; jaahuana ca poa. ¹⁰E'e, jamatii pea cuaa oya quea mimishi acanaje, Eyacuiñajjiya Jose jaahuana ca poa. Ejito emeshi mese Panaohua Jose quea jea nee aca poa. Jamajjeya Panaohua Jose ojjaña huoojea'yojji po mee ca poa Ejito meshijo. Panaoja equi jaahuanajji po mee ca poa Jose. ¹¹Majoya bobí chama' poa Ejito meshijo, Canaani meshijo, ojjaña meshijo pealai. Bobimajo quea huiso bobí yasijje po'ya poa. Esejaya etiiquiana cuana pealai bobima' poa. ¹²Majoya Jacobohua jiquio meshijo ba'leya shajjal'ajja canaje bobí quea huiso Ejito meshijo yani, Ejito emeshi meseja. Jamajoya ohuaya esejaya etiiquiana, oja bacua cuana huoojea ca poa Ejito meshi yasijje bobí jjequiya. ¹³Quijje poqui o'oyanaje Ejito meshi yasijje bobí jjequí o'oyaa. Poqui o'oyajo Joseya oja doe cuana huohui ca poa: "Eya ca ca iña mique chahua Jose" aca poa.

—Joseya oja o'i cuana dojo ca poa emeshi mese Panao que, ojaya ebajji.

¹⁴Majoya Joseya oja o'i cuana huoojea ca poa oja chii jjequiya, Jacobo jjequiya. Ojjaña oja huapa pojjeama cuana quea huiso nee nee jjequi ca poa Ejito meshi yasijje, 75 huisome. ¹⁵Jamajjeya Jacobo ojjaña oja bacua cuana nijje, oja osecua cuana nijje peal'ai poquia poa Ejito meshi yasijje. Jomajo, Ejito meshijo oya mano'ya poa. Jomajo esejaya etiiquiana cuana quea huiso nee mano'ya poa. ¹⁶Jacobo, oja bacua beca cuana pea'ai mano'yajo esa' cuana ye ca'y poa cuaa jiquio meshi yasijje, Siqueme cuiñajji yasijje ohuajea'yohua. Mei jjani yasijje huananobiajea ca'ya poa, ma yahuajo Amajamaa jjeshe ca poa Jamonoja meshi, mei jjani ehuananobiajea'yojji, beijo sosejje —Estemaa acanaje.

¹⁷—E'e, ma Eyacuiñajji yahuajo nei Amajama huohui ca poa jayojja jama ohuaya aca poa. Isaeni dejja cuana Ejito meshijo ba'e jjapapaqui'ya poa; quea huiso nee nee po'y poa. ¹⁸Majoya Ejito meshi mese mano poqui'yan poa. Majoya pea cuaya majje oya jayojja poa. Quijje pea dejja Ejito emeshi mese poa, pea Panao. Jose ojaya ba jjima poa yahuajo nei mano'yojo. ¹⁹Ma emeshi mese eyacua quea mase poa esejaya etiiquiana nijje. Oya cuana quea mimishi aca poa. Quea yeno nee nee po mee ca poa. E'e, ebacua cuana jeajea mee ca poa emanojeajji —Estemaa acanaje.

²⁰—Majoya etiiquianaja bacua Moisesi bajjani cuaya poa. Oya quea bacua bame nee nee poa, pea ebacua cuana quea bame pishana poa. Oja enaeseya oya quehuajje nei jaahuanca ca poa oja equijo. Quehuajje tii mee ca poa pea beca peejjima ba'ime. ²¹Majoya emano'yojji nisho enaeseya Moisesi esecue yasijje dojocuaya'ajjaqui ca poa. Jamatii Emeshi mese Panaoja bacuaseya Moisesi ba ca poa. Jjeshe ca poa. Dojo ca poa tii meeja. Ojaya ebacua poa Moisesi, Panaoja bacuaseja. ²²Jamajjeya Moisesi ojjaña Ejito cuanaja esohui ba mee ca poa Ejito esohui huohuijji cuaa. Jamajjeya Moisesiya Ejito etii cuaa jayojja jama aca poa; quea ja'a nee esohui huohui ca poa peal'ai —Estemaa acanaje.

²³—Majoya Moisesi peaja ejiojji miji peal'ai shequijame tii majje, 40 shequijame po majje jama poa ba'a: "Ecuea huapa pojjeama cuana cabaquiahua, Isaeni cuana". ²⁴Moisesiya ba cañaquia poa oe Ejito dejja Isaeni dejja cuiasejjajea caqui. Ba majje, quenequene majje Moisesiya ma Ejito dejja cuiajea ca poa. Mano'ya poa. ²⁵E'e, Moisesi jjashahuabquia poa jama ba'a: "Ecuea huapa pojjeama cuanaja eba Eyacuiñajji yea huoojea canaje ona jaahuanca, eseja meshi yasijje dojohua, echacojji sosema' pojjeama epojji" poanaje Moisesi.

—Jamatii ojaya huapa pojjeama cuanaja Moisesi ba jjima Eyacuiñajji yuoojea'yo. ²⁶E'e, mecajjeahua Moisesi poe o'oyanaje ojaya huapa pojjeama cuana baa. Beca cuana jjacuiaquiani ba majje Moisesiya oya cuana quea bei po mee sa aca poa. Jamajjeya huohui ca poa jama ba'a: "Epjeeji cuana, miquianaya huapa pojjeama cuana. ¿Apiojji acuae huapa pojjeama nijje jjacuiaquiani so'o? Jamaya quea tai".

²⁷—Jamatii oe Jodiohua ma ojaya huapa pojjeama cuiajji nishohua Moisesi iñajjeanajea ca poa; shajja'ajja sa po'y poa. Jama aca poa

ba'a: “¿Aya shai miya ecuana huoojeajji po mee ca'yonaje so'o? ²⁸ ¿A'a eya cuiaje'yo pealai? Ecuea eba miyaya oma mecajje Ejito dejja cuia'yonaje.

²⁹—Ma shajja'ajja majje Moisesi quea mete poa: “Ojjañaja eba eyaya Ejito dejja cuia'yonaje. Ejito emeshi meseya eya cuia ca chana”. Jamajjeya quehua poquia poa pea meshi yasijje, Madiani meshi yasijje. Jomajo oya ba'ya poa oja huapa pojjeama cuana nijje. Jomajo ba'e eponajo jjahuanaquia poa. Jomajo oja bacua ejja cuaya poa beca. ³⁰Jomajo oya ba'ya poa peaja ejiojji miji pealai shequija huijome, 40 shequija. Majoya oya meshi jabojo, Sinai eyiyo pejejo poquianijo, ñajjajja jaahuana poequijo Eyacuiñajji o que poquia poa. Acui tii'ajja jiji mee ca poa. Jamatii ma acui quiyo'yo ajja poa. Eyacuiñajji ma acui jijiqui yiyesamajo jjanequipanaquia poa. ³¹Jamajjeya Moisesi acui jijiqui ba majje quea mete poa. Jjanequichipiquia poa acui jijiqui baa. Eyacuiñajji acui jijiqui yiyesamajo nequi onijje mimia poa. ³²Jama aca poa ba'a: “Moisesi, eya Eyacuiñajji. Miquea etiuiquiana enijje jjapeequia poa, Amajama, Isaaca, Jacobo pealai”.

—Jamajje Moisesi piopionaje quea mete jjejojo. Acui jijiqui ba maja sa po'yo ajja poa. ³³Majoya Eyacuiñajji oya jama aca poa ba'a: “Moisesi, jjiquio meshijo tii eya enequijo, miquea ejiojji shejee huijjiajeacue enijje emimijji! ³⁴Eyaya ecuea epeejji cuana baña Ejito meshijo ba'e. Jomajo Ejito dejja cuaa ecuea epeejji cuana janobajjima nei napa cani eyaya baña pealai. Oya cuana quea yeno nee nee pa neineiani eyaya shajja'ajjaña. Jamajjeya eyaya oya cuana nahueje'yo, oya cuana dojoe'yo sosema' echaco majajji pojjeama. ¡Poquicue, Moisesi! Eyaya miya huoojeaje o'oya Ejito meshi yasijje” aca poa Eyacuiñajjiya —Estema poanaje.

³⁵—¡Bacue! Yahuajo nei nei Moisesija huapa pojjeama cuaa oya cajaa aca poa. Shajja'ajja sa po'yo ajja poa: “¿Aya shai miya ecuana huoojea'yojji po mee canaje so'o?” aca poa cuaa.

—Jamatii Ejito dejja cuanajo sosema' echaco majajji pojjeama jojoya, Eyacuiñajjiya Moisesi huoojea ca poa ojaya epeejji cuana jaahuanajji epoji. Eyacuiñajjiya Moisesi oya cuana dojo meesahua ca poa Ejito dejja cuanajo sosema' echaco majajji pojjeama. E'e, Eyacuiñajji jjanequipanaquia poa acui jijiquijo Moisesija ebajji. ³⁶Jamajjeya Moisesiya Jodio cuana, Eyacuiñajjiya epeejji cuana Ejito meshijo ba'e dojocuayaqui ca'ya poa pea meshi yasijje epoqui'yojji. Eyacuiñajjiya Moisesi Ejito meshijo quea huiso ma dejja aijima acani ameesahua ca poa. Ojaya epeejji cuana Ejito meshijo ba'e dojocuaya meesahuaqui ca poa pea meshi yasijje epoqui'yojji, jiquio meshi yasijje. Bae ena huo'o ojje miji yasijje poqui meesahua ca poa. Bae ena nequiashiña mee ca poa. Majoya ojjaña poquia poa ojje miji yasijje. Meshi quea jabojo, quimajo ba'e meesahua ca poa quea shequija huiso nee, peaja ejiojji miji pealai shequijame, 40 shequijame. ³⁷Ohuaya, Moisesiya Isaeni dejja cuana jama aca poa ba'a:

“¡Bacue! Eyacuiñajjiya eya huoojea canaje ojaya esohui huohuiya. Quijje ohuaya pea esohui huohuijji e jayojja miquiana que huoojea caje, miquiana nijje meshijo ba'e tii. Ojjaña joya ojaya esohui jayojja jama po ajja aje oe Eyacuiñajjiya cajaa acaje'yo; quea nee nee po mee caje'yo tii”.

Jamaya Moisesiya aca poa yahuajo nei nei.

³⁸—E'l e, Moisesi Isaeni cuana nijje poquianijo meshi quea jabo neejo, meshi quimajo oya cuana nijje poquia poa Sinai eyiyo huasijje. Jomajo Sinai eyiyo biajje Eyacuiñajji mimia poa Moisesi nijje. Ma esohui shajja'ajja majje Moisesiya Isaeni cuana huasijje huohui ca poa, esejaya etiiquiana huasijje, esohui eba'e tiitii mee'yojji. Ma esohui Moisesiya tehue ca poa esejaya ebajji pea'ai.

³⁹—Jamatii esejaya etiiquiana Moisesija esohui shajja'ajja sa po'yo ajja poa. Oya cuaa ca ca Moisesi niñebe ca poa. Ejito meshi yasijje poqui o'oya sa poa quea mimishi jjejojo. ⁴⁰Moisesi eyiyo biajje Eyacuiñajji nijje mimianijo, etiiquianaa aje oe Anoni jama aca poa ba'a: “Anoni, Eyacuiñajji nisho acue ecuanaja ebihuiajji, ecuana hui dojorji epojji, ejiojji jaahuanajji. Moisesiya eseya Ejito meshijo ba'e jjequi canaje jiquio meshi tai yasijje; quea jabojo manoje'yo. Jjeya Moisesi chama!. ¿Achacua shai oya poquinaje? Ecuanaja ba jjima” poa esejaya etiiquiana cuana —Estemaa aca poa.

⁴¹—Jamajjeya etiiquiana cuaa eyacuiñajji nisho pana ca poa ana'ajja bacua nisho, mei huo'o. Aquiana cuana dahua ca poa ma eyacuiñajji nisho bihuiajji. Ojee ijjal'ijjia poa. Quea bihui nee jayojja poa oja panaa shajja'ajja cani poso.

⁴²Etiiquiana cuaa Eyacuiñajji pojjeama bihuia ca poa, oja pana, majameta cuana bihuia sa aca poa. Jamajjeya shajjama' jjejojoya Eyacuiñajji esejaya etiiquiana nijje jjapeepajequia poa. E'l e, jama poanaje ba'a: “Oya cuana quea jjashahuabauqui tai poani jojoya eyaya oya cuana jaahuanma aija poaje'yo, ecuea esohui eba nisho jjejojo”. E'l e, ma etiiquiana quea mimishijo yahuajo nei nei Eyacuiñajji esohui huohuijji cuaa tehue ca poa jama ba'a:

“Isaeni dejja cuana, e bihuiajji pojjeama miquianaaya huo quea huiso quecuanaaje quea huiso shequiajame, ⁴⁰ shequiajame meshi jabojo, dejjama' meshijo. Aquiana cuana dahanajje pe'a'i e bihuiajji pojjeama. ⁴³Chojja. Miquianaaya ca ca oe daqui equi sisi yajji dojo tiitii nequinaje eyacuiñajji nisho Monoca bihuiajji. Ma daqui equijo nequinaje eyacuiñajji nisho Monoca bajjani. Majameta Sepani bajjani aje oe bihuia tiitiinaje pe'a'i. E'l e, majameta miquianajaya eyacuiñajji nisho poanaje. Miquianaaya aje oe epana'yo cuana bihuia aninaje pe'a'i. Eya bihuia jjima miquianajaya. Jamaya quea tai. Jamajjeya eyaya pea dejja cuaa miquianaya iña meesahuaje quea huesha nee ee dojo'yojji pea meshi yasijje, Babinonia meshi yasijje dojo meeje. Jomajo quea yeno po meeje ejjabahuejjaquijji, enijje e'e jojo nei ejjapeequijji”.

Jamaya yahuajo nei nei tehue ca poa esejaya etiiquiana huasijje —Estemaa acanaje—. ⁴⁴E'l e, esejaya etiiquiana Eyacuiñajji daqui equijo Eyacuiñajji nijje mimianinaje. Ma daqui equi huacuaya huacuaya quea huesha nee dojo canequinaje meshi jabojo. E'l e, Moisesi Eyacuiñajjiya huohui ca poa: “¡Daqui equi iyacue enijje emimijji! Jama iyame acue ba'a” aca poa. E'l e, Moisesi daqui

equi cahui ba mee ca poa. Eyacuiñajji esohui jayojja neiya daqui equi iya ca poa, Moisesiya. ⁴⁵Majoya Moisesi mano'yajo, esejaya etiiquiana yahuajo nei nei ba'eya Josoe nijjeya ma daqui equi meshi jabojo dojo majamaja canequia poa jiquio meshijo eba'e'yoji. Jodio pojjeama cuua ca ca jiquio Jodioja meshi eba'e'yoji aca poa. Jamajjeya Eyacuiñajji Josoe huoojea meesahua ca poa Jodio pojjeama cuana; mete mee ca poa. Esejaya etiiquiana cuana jiquio meshi yasijke ba'e mee ca poa. E'e, ma daqui equi nequia poa jiquio meshijo, Jodioja meshijo. Jamaya nequi tiitiia poa esejaya etiiquiana Dabi ba'e jjimahuajo.

⁴⁶—Emeshi mese Dabi quea pame nee nee, Eyacuiñajji quea boti nee nee poa. Jaahuana ca'ya poa pea'ai. Jamajjeya Dabiya Eyacuiñajji equi iya sa aca poa daqui equi pojjeama, mei equi quea bame iya sa aca poa Eyacuiñaji bihuaijji. Ojjaña Jacoboja osecua cuana Eyacuiñajji bihuia mee sa aca poa mei equi eyacuajo. Jamatii Dabi mei equi iya mee jjima poa Eyacuiñajji. ⁴⁷Dabija bacua ejja Sanomo bajjaniya ca ca mei equi quea bame nee iya ca poa Eyacuiñajji bihuaijji.

⁴⁸—Eyacuiñaji quea pame, quea ca'a nee nee ca ca equi cuanajo ba'e ajja, dejjaja equijo. E'e, yahuajo nei Eyacuiñajji esohui huohuijji cuaa oja sohui tehue ca'ya poa jama ba'a:

⁴⁹ “Eya Eyacuiñajji, eyajo ojjaña huoojea'yoji poani. Ojjaña meshi cuanajo pea'ai eya Emeshi Mese nei poani. Ojjaña ecuea aquiana. Jamajjeya ¿yajja acuaeya equi iyaje so'o e ba'ejji? ¿A'a cuae eya equijo jomishocaje? Eya hueahuea ajja. ⁵⁰E'e, yahuajo eyaya ojjaña aquiana cuana pana poa”.

Jamaya yahuajo nei tehue ca poa Eyacuiñajji esohui —Estemaa acanaje.

⁵¹—Miquianaya ca ca oe quea sapa ca'a, jjashahuabaqui ajja. Edojoshahua Pameja ehuhui'yo a'ajja tii. Miquianajaya etiiquiana cuana quea mimishi nee jayojja jama poani. ⁵²E'e, etiiquiaa aje oe yahuajo ojjaña Eyacuiñajji esohui huohuijji cuana quea mimishi aca'ya poa. E'e, yahuajo nei Eyacuiñajji esohui huohuijji cuaa huohui ca poa Jesosajo jama ba'a: “Quijje Eyacuiñajji huoojea'yo ojjaña jaahuanajji poeje. Oya quea pame nee nee, mimishi'ama nei nei poaje” aca poa cuaa. Jamatii miquianajaya etiiquiaa ma esohui huohuijji cuana quecuca ca'ya poa. Oya jayojja jjeya miquianaaya Jesosa ñña meesahuanaje onaja quecuayoji. ⁵³Yahuajo Eyacuiñajji esohuidojojiya quea huiso nee neeya ba canaje Eyacuiñajjiya sohuihuohui caqui miquianajaya etiiquiana huasijke. Majoya etiiquiaa ma esohui miquiana huasijke huohui ca poa. Jamatii ma esohui jayojja jama ba'e sa po'yo ajja miquianaya —Estemaa acanaje.

Estema sapa jajahuejjajea ca'yonaje cuaa

⁵⁴Estemaja esohui shajja'tajja majje quea quene nee poanaje Jodio dejja cuana. Ese' ijjiayai canaje quea maseya jjejojo. ⁵⁵Jamatii Edojoshahua Pameya Estemajo nequiya oya eyahuasijke ba meesahua canaje jjeyahua nei. Eyajo ba mee canaje Eyacuiñajji quea jeajahua nee nee, quea ca'a nee nee. Jesosa ba

mee canaje pea'ai, Eyacuiñajji pejjejo. ⁵⁶Jamajjeya Estema jama poanaje ba'a: —¡Bacue! Eyaya esecue eca'apejo nequi baña eyajo. Ojjañaja Edoe Mese Jesosa baña Eyacuiñajji ebianeí mijijje nequi ojjaña huooje'yojjii —Estema poanaje.

⁵⁷Jodio dejja cuana ma shajja'ajja majje quea quene nee nee poanaje. Estemaja esohui Jesosajo eshajja'ajja poaje jjejojo eme sisiya eshajja huejja noco canaje. Taaa majje ojjaña cuajicuajijebenaje Estema que. ⁵⁸Estema iña canaje, cuiñajji esecue yasijje dojocuayaqui canaje. Mei jjeshe majje Estema sapa jajahuejjajea canaje meiya. Dejja cuaa ma Estema jajahuejjajeajji epo cuaa ojaya daqui nei cuana huijjajea canaje; Sanoni quia canaje ejaaahuanajji.

⁵⁹Onaaya Estema sapa jajahuejja canijo tii, Estema Jesosa nijje miminaje jama ba'a: —Jesosa, ecuea Emeshi Mese nei, ¡ecuea edojjoshahua jjequisohuacue eyahuasijje!

⁶⁰Ecui'oshajjajo nequi majje Jesosa nijje mimi neineinaje jama ba'a: —Emeshi Mese nei, ¡jiquio dejja cuana quea mimishi poanija mimishi cuijea'yocue! —jamaya mimi majje Estema mano'yonaje. Chama'yo tii poanaje.

Pabohua Jesosaja epeejji cuana napa canaje

8 ¹Pea cuaa Estema sapa jajahuejjajea cani ba majje Sanoni jjashahuabaquinaje jama ba'a: —E'e jamaya, casapa jajahuejjajea cahua, de —poanaje, Estema Jesosajo siajje poani posojo jamaya poanaje Sanoni.

Majoya ma pojajjo tii Jesosaja epeejji pojjeama cuaa Jesosaja epeejji cuana janobajjima nei napa canaje Jenosanenajo ba'eca cuaa. Jamajjeya beshahua nei ojjaña Jesosaja epeejji cuana poquinaje pea cuiñajji cuana Jodio meshi yasijje; Samania meshi yasijje pea'ai poquinaje. Jesosaja huoojea'yo esohui huohuijji cuana ca ca oe poqui jjima poanaje; Jenosanenajo nequinaje tii.

²Jamajjeya dejja quea pame nee cuaa, Jesosaja epeejji cuaa Estema dojo canaje mojea'yohua. Pa neinei'yonaje ojo pea'ai.

³Sanoniy ca ca quea tai aca'yonaje Jesosaja epeejji cuana. Napa huicha'a huicha'a ca'yonaje ojjaña equijo ba'e. Dejja cuana, ponáña pea'ai iña majje dojo canaje equi ejjajeanobiaquijji yasijje jeanobiaa. Dejja mimishi cuana nijje ejeanobia jaanaje.

Penipeya esohui huohuiqui canaje Samania meshijo

⁴Jesosaja epeejji cuana ojjaña meshi cuana huasijje poquinaje. Esohui huohui capoquinaje Jesosaja. ⁵Penipe ca ca poquinaje Samania meshi yasijje. Jomajo Jesosa Quitojo huohui canaje ojjaña cuana huasijje: —Jesosa Eyacuiñajji huoojea'yo ojjaña jaahuanajji, de —Penipeya acanaje.

⁶Ojjaña cuaa Penipeya esohui shajja'ajja canaje. Penipeya ma dejja ajiima acani ba majje ojjaña ojaya esohui shajja'ajja neinei canaje. ⁷E'e, eshahua cuana dejjajo nequi taaa neinei majje cuayaqui'yonaje ma Penipeya huoojeacuayajea canaje. Jeo'ajja cuana ohuaya jeo mee canaje. Jiojjijjajja

jjajiojji jeapiihui meequi ca'yonaje pe'a'i Eyacuiñajji nijjeya. ⁸Jamajjeya ojjaña cuana Samania meshijo ba'eca quea bihui nee poanaje.

⁹Samania meshijo ba'enaje eyamiquecuia Simoni bajjani. Edosiquiaa oya ma dejjaajjima acani ameesahua canaje quea huiso shequiajame. Jamajjeya quea huiso cuana Samania meshijo ba'eca quea mete nee poanaje Simonijo. Simoniya huohui canaje jama ba'a: —Eya ca iña quea ca'a nee nee. Ojjaña ecuea eba, de.

¹⁰Jamajjeya ojjaña cuaa ojaya esohui shajja'ajja neinei canaje, emeshi mese cuaa, echacojji cuaa, dejja tii cuaa, esho'iquiana cuaa pe'a'i. Ojo jama huohuime acanaje cuaa ba'a: —Jiquio dejja, Simoni Eyacuiñajjiya ameesahua cani —poso acanaje cuaa—, ma dejjaajjima acani quea huiso nee.

¹¹E'e de, quea huiso shequiajame ohuaya ma dejjaajjima acani acajo, quea huiso ojo quea mete poanaje. Oja sohui shajja'ajja canaje ojjaña.

¹²Jamatii Penipeya esohui quea pame nee Jesosa Quitojo huohui canaje jama ba'a: —Jesosa Quito Eyacuiñajji nijje eyajo nequi, ojjaña huoojea'yoffji poani. Onijje jjapeequi'yajo ohuaya miya ba'e tiitii mee caje'yo onijje eyajo —acanaje Penipeya.

Quea huiso nee nee dejja, ponaña pe'a'i Penipeja esohui Jesosajo shajja'ajja majje Jesosa nijje jjapeequinaje. Jamajjeya Penipeya oya cuana Eyacuiñajjiya besa mee canaje enajo.

¹³Majoya Simoniya pe'a'i Penipeja esohui shajja'ajja canaje. Jesosa nijje jjapeequinaje. Penipeya oya Eyacuiñajjiya besa mee canaje pe'a'i. Majoya oya Simoni Penipe nijje po'ayequi nequinaje. Penipeja esohui shajja'ajja huicha'a huicha'a canaje. Eyacuiñajjiya Penipe ma dejjaajjima acani ameesahua canaje. Jamajjeya ma ba majje Simoni jjaba'one neinequinaje.

¹⁴Majoya Jesosaja huoojea'yo esohui huohuimji cuaa Jenosanenajo nequiya onaja esohui shajja'ajja canaje. Jama acanaje cuaa ba'a: —Quea huiso nee Samania meshijo ba'eya Eyacuiñajjiya esohui shajja'ajja canaje. Jesosa nijje jjapeequinaje quea huiso nee nee, de —acanaje cuaa.

Jamajjeya ma shajja'ajja majje Jesosaja epjeeji etii cuaa Peno, Huani pe'a'i Samania meshi yasijje huoojea canaje Jesosaja epjeeji eyacua cuana baa.

¹⁵Samania huasijje poqui majje Peno, Huani pe'a'iya Jesosaja epjeeji cuana huasijje Eyacuiñajji nijje miminaje jama ba'a: —Eyacuiñajji, ¡Edojjoshahua Pame huoojeacue jiquio miquea epjeeji cuana huasijje dobiquiya!

¹⁶E'e, yahuajo Edojjoshahua Pameja Samania meshijo ba'e cuana huasijje dobiqui jjima. Oya cuana ca ca oe Emeshi Mese nei Jesosa nijje jjapeequi'yajo pe a cuaa oya cuana Eyacuiñajjiya besa mee canaje enajo. ¹⁷Jamajjeya Penohua, Huaniya pe'a'i poe majje ma epjeeji cuana sapa biajje eme' huana canaje. Peno Eyacuiñajji nijje mimiajo Edojjoshahua Pame ona que dobiqui'yonaje.

¹⁸Simoniya ba canequinaje Jesosaja huoojea'yo esohui huohuimjiya Jesosaja epjeeji cuanaja sapa biajje eme' huana cajo, Edojjoshahua Pame ona huasijje dobiquinaje. Ba majje Simoni jjashahuaba taiquinaje jama ba'a: —Eyaya Edojjoshahua jjesheje bejjo sosejje.

¹⁹Jamajjeya ohuaya Peno, Huani pea'ai jama acanaje ba'a: —Mi jayojja jama a sa aña eyaya. Jamajjeya eyaya dejja cuanaja sapa biajje eme' huana majje Edojoshahua Pame dobiqui meeje'yo pea'ai. ¡Che mo eya jamaya a'yocue miyaya bejjo sosejje! —acanaje Simoniya.

²⁰Ma shajja'ajja majje Penohua oya tecuea canaje jama ba'a: —Simoni, miya jjashahuaba taiquianijojo Eyacuiñajjiya miya mano mee ca chana! Miquea ejjeshejji pea'ai chama'yo tii po mee ca chana!. Miya jjashahuaba taiquiani; Eyacuiñajjiya Edojoshahua Pame huoojea caje'yo ejjeshejji sosejje poso miyaya aña. ²¹Chojja, Simoni. Miyaya Edojoshahua Pame bejjo sosejje ejjeshejji pojjeama. Eyacuiñajjiya eba miya quea tai jjashahuabaquiani, quea mimishi. Jamajjeya ecuana nijje echacojjji pojjeama Eyacuiñajjiyo. ²²Jamajjeya ¡miquea ejjashahuabaquijji pajea'yocue! ¡Eyacuiñajji nijje e'e jojo nei mimicue! “¡Eyacuiñajji, enije a'a quea quene pojji!” acue. “¡Ecuea mimishi, ecuea ejjashahuuba taiquijji pajea meesahua'yocue!” acue. ²³E'e Simoni, ecuea eba miquea ejjashahuabaquijji quea tai. Ecuaaya Edosiquiana nijjeya ma dejja ajjima acani anaje poso aña miyaya. Jama a sa aña pea'ai, de. Miquea mimishi cuana pajea meemee'yo aija pea'ai. Quea nee nee poaje miya, Simoni —Peno poanaje.

²⁴Peno shajja'ajja majje Simoni quea mete nee nee poanaje. Jamajjeya jama acanaje ba'a: —Peno, Huani pea'ai, ¡Eyacuiñajji nijje mimicue ejo! Jamajjeya Eyacuiñajjiya ecuea mimishi cuana cuijjea caje'yo. Miquea esohui jayojja jama pojjeama ohuaya eya acaje'yo —poanaje.

²⁵Majoya Penohua, Huaniya pea'ai Emeshi Mese nei Jesosaja esohui huohui majamaja canaje quea huiso cuana huasijke. Majoya oya cuana poqui o'oyanaje Jenosanena huasijke. Poquije ojjaña cuiñajji cuana huasijke dobiquipoquinaje. Ojjaña Samania meshijo ba'eca cuana huasijke Jesosaja esohui quea pame nee huohui capoquinaje. Majoya esohui huohui majje Jenosanena huasijke poqui o'oyanaje.

Penipeya Etiopia dejja huasijke Jesosaja esohui huohuiqui canaje

²⁶Majoya oe esohuidojijiya miminaje Penipe nijje. Jama poanaje ba'a: —Penipe, ¡poquicue miya eeno poejji miji jaa ejiojjije, ma Yasa cuiñajji yasijke quea huesha nee nee epoquijji, ma ejiojjije Jenosanenajo ba'e cuana poquiani Yasa cuiñajji yasijke, meshi jabo yejje majje!

²⁷Majoya Penipe poquinaje. Poquijeya dejja Etiopia meshijo ba'e ebiñajja cajja'yo ba canananaje. Oya Etiopia dejja etii, emeshi mese epona Canase bajjanijo chacochacoani, aquiana quea nahue, bejjo cuana jaahuanajji. Oya yahuajo poquinaje Jenosanena huasijke Eyacuiñajji bihuiaa. ²⁸Jjeya ca ca oja meshi yasijke poqui o'oyani, ejiojjije. Mapichiya oya dojo cani aquiana dojodzi biajje ani. Poquijeya esohui ba capoquinaje, ma yahuajo nei Eyacuiñajjiya esohui huohuijji Isaiaa tehue ca poa ba capoquinaje. ²⁹Jamajjeya Edojoshahua Pame Penipe nijje miminaje jama ba'a: —¡Aquiana dojodzi yasijke poquicue miya, Etiopia dejja etii yasijke!

³⁰ Jamajjeya Penipe poquicuajinaje ma dejja que. Shajja'ajja cañaquinaje ohuaya esohui acani. Shajja'ajja majje huohui'ajja canaje jama ba'a: —¿A'a ma esohui miquea eba? ¿A'a miquea quea ja'a nee? —Penipeya acanaje.

³¹ Etiopia dejja Penipe saja'a canaje jama ba'a: —Chojja. Ecuea ba jjima. Ecuea quea quehua. ¿Yajjajo ebajji ca huohui jjima, de? ¡E'e pojja'a miyaya eya ba meesahuacue jiquio esohui!

Jamajjeya ohuaya Penipe iyaa canaje. Anioque mee canaje o pejjejo, aquiana dojodzi biajje. ³² Majoya Eyacuiñajjija esohui ba canaje ma Isaiaa yahuajo tehue ca poa Jesosajo, Eyacuiñajjija huoojeal'yo ojjaña jaahuanajijo jama ba'a:

“Ñajjajja dojo cani quecua'yohua jayojja jama onaaya oya iña caje equecua'yojji. Ñajjajja ña dede canijo, quea nee po majje ñajjajja siasia ajja jama jayojja oya mimipanajea ajja poaje onaa oya napa canijo.

³³ Oya mimishi'ama. Jamatii oya quea mimishi acaje cuaa. Oya siajje acaje cuaa jama ba'a: —Oya quea mimishi —acaje. Ojo siajje poaje. Quea mimishi nee nee de, oya acaje onijje nequi cuaa; oya quecua caje'yo peal'ai. Chama'yo tii acaje'yo”.

Jamaya yahuajo Isaiaa tehue ca poa Jesosajo.

³⁴ Ba majje Etiopia dejja Penipe huohui'ajja canaje jama ba'a: —Ache dejjajo acuae huohui canaje Isaiaa? ¡Huohuicue mo oe! E'e pojja'a ohuaya pea dejjajo huohui ca poa. E'e pojja'a huohui ca poa ojaya emano'yojjijo —acanaje Etiopia dejja.

³⁵ —E'e —Penipeya acanaje. Majoya ohuaya Eyacuiñajjija esohui etehue'yo huohui capoquinaje quea huiso. Esohui quea pame nee Jesosajo huohui canaje.

³⁶ Majoya oya cuana poquianijo, ena huasijje poeyanaje. Jamajjeya ma Etiopia dejja jama poanaje ba'a: —¡Bacue, ena ani ba'a! Eya peal'ai Jesosa nijje jjapeequije. Jamajjeya ¡besa meecue mo Eyacuiñajjijo jjeya nei!

³⁷ Penipeya saja'a canaje jama ba'a: —E'e, miya Jesosaja epeejji e'e jojo nei poanijo, eyaya miya besa meeje Eyacuiñajjijo —acanaje.

—E'e jojo nei Jesosa Quito Eyacuiñajjija Bacua Ejja, Eyacuiñajjija huoojeal'yo ojjaña jaahuanajji. E'e de, jamaya eyaya baña —Etiopia dejja acanaje.

³⁸ Jamajjeya ohuaya echacojji acanaje jama ba'a: —¡Mapichi cuana nequiñaqi meecue!

Mapichi nequiñaqi majje Penipe Etiopia dejja nijje ena huasijje poquinaje. Etiopia dejja besa mee canaje Eyacuiñajjijo. ³⁹ Majoya Penipeya Etiopia dejja besa mee'yo majje, jjequicuaya'yo majje Edojjoshahua Pameya Penipe dojo canaje pea meshi yasijje. Etiopia dejjaja Penipe ba o'oya jjima poanaje. Jamatii oja meshi yasijje poqui'yonaje quea bhui nee nee; Jesosa nijje jjapeequi'yonaje.

⁴⁰ Jjeyahua nei Edojjoshahua Pameya Penipe dojo canaje quea huesha nee esohui quea pame Jesosajo huohuiya. Asota cuiñajji yasijje anioqueñaquinaje. Majoya Asoto cuiñajjijo ani poqui majje quea huiso cuiñajji yasijje poquijeya Eyacuiñajjija esohui huohui canananaje. Quea huesha esohui huohuiqui canaje Sesanea cuiñajji yasijje, Penipeya.

Sanoni Jesosa Quito nijje jjapeequi'yonaje

9 ¹Penipeya quea huesha sohuihuohui canijo, Sanoniya Emeshi Mese nei Jesosaja epeejji cuana niñeba majamaja canaje. Quecua sa acanaje. Jamajjeya oya poquinaje joya Eyacuiñaggi nijje mimiani etii yasijje. ²Poe majje Sanoni onijje jama poanaje ba'a: —¡Esohui tehuecue ojjaña Jodio cuana Damasico cuiñajijo ba'e yasijje, ojjaña Jodio cuanaja ebajji, equi ojee ejjachichaquijjijo anija ebajji! ¡Jama acue ba'a: “¡Sanoni ojjaña Jesosaja epeejji poani cuana iña meecue! ¡Jeyo majje dojo meecue Jenosanena huasijje jeanobiaa, dejja, ponaponaña pea'ai!” acue! —poanaje Sanoni Jodio etii nijje.

—E'e —poanaje Jodio dejja—, jamaya ejja'aqui.

³Majoya Sanoni poquinaje Damasico huasijje Jesosaja epeejji cuana iñaa nisho. Ejiojjije poquije Damasico chipi nee yasijje nequiñaquinaje. Eyajo ejjjijiya quea ja'a neeya jeaja'a canaje Sanoni. Quea jeajahua nee nee poanaje. ⁴Jamajjeya Sanoni meshi yasijje oquenaje. Shajja'ajja canaje pea eyajo onijje mimiani jama ba'a: —¡Sanoni, Sanoni! ¿Apiojji acuaeya miyaya eya napaña so'o?

⁵—¿Ae bajjani miya? —Sanoni poanaje.

—Eya Jesosa. Miyaya aje oe eya napaña —acanaje Jesosaa eyajo—.

⁶¡Nequisohuanue miya! ¡Poquicue Damasico huasijje! Jomajo peaa miya huohui caje miquea echacojji ma miyaya ejo quijje aje —Jesosa poanaje.

⁷Pea cuana Sanoni nijje poquiani nequiñaquinaje. Pea eyajo mimiani shajja'ajja canaje. Esohui ca ca oe shajja'ajja jjima. Oya cuanaja ba jjima eyajo mimiani. Jamajjeya quea mete nee poanaje. Mimimimi ajja poanaje.

⁸Majoya Sanoni nequisohuanaje. Jjabapoija'ajjaqui'yonaje. Cojjama!, de. Pea cuaa oya mepejjejea canaje Damasico huasijje. ⁹Jomajo oya nequinaje pea beca peejjima cahuime cojjama!. Eyacuiñaggi nijje mimi tiitiianijo ijja'ijja jjima poanaje Sanoni.

¹⁰Jesosaja epeejji Anania bajjani Damasicojo ba'enaje. Ma mecajje Eyacuiñaggiya Anania jjacahuiba meequi canaje Emeshi Mese nei Jesosaa oya jama iyaame acanaje ba'a: —¡Anania, shajja'ajjacue mo!

—¿Yajja? Jesosa, miya ecuea Emeshi Mese nei. Eyaya miya shajja'ajjaña —Anania poanaje.

¹¹Emeshi Mese neiya oya huohui canaje jama ba'a: —Anania, ¡poquicue ejiojji yasijje bajjani Ejiojji Epii Nei! ¡Jonasaja equi yasijje poquicue! Dobiqui majje Jonasaja huohui'ajjacue jama ba'a: “¿Achejo jaa Sanoni, ma yahuajo Tanaso cuiñajijo ba'ya poa? Eya onijje mimije” acue, Anania. ¹²E'e, jjeyahua nei Sanoni enijje mimiani. Eyaya Sanoni jjacahuibaqui meenaje pea'ai jama ba'a: Miya o que poenaje. Oja sapa biajje eme' huananaje. Jamajjeya oya quea cojja ja'a po'yonaje —Jesosaa acanaje. Jamaya Anania jjacahuibaqui mee canaje.

¹³Majoya Anania Jesosa nijje jama poanaje ba'a: —Emeshi Mese nei Jesosa, ecuea eba Sanoniya miquea epeejji cuana Jenosanenajo ba'e napa canaje quea huiso nee. Jamaya ojjañaa eya huohui canaje. ¹⁴Oya

jiquiacua poeyanaje ojjaña miquea epeejji cuana iñaa Jenosanena huasijje ejeanobiajeaquijji. Jodio etiiya oya huoojea canaje, Jodio Eyacuiñajji nijje emimijji etiiya. Eya quea mete Sanonijo, de —Anania poanaje.

¹⁵Majoya Jesosaa Anania huoojea canaje jama ba'a: —¡Poquicue miya, Sanoni que! Oya eyaya babacanaje ecuea esohui huohuijji epo'yojji. Ecuea esohui ohuaya huohui caje Jodio pojjeama cuana huasijje, emeshi mese cuana huasijje, ojjaña pea Jodio dejja cuana ojjaña meshijo ba'e yasijje pea'ai. ¹⁶Ecuea esohui huohuijjojo onaaya oya quea huiso napa caje'yo. Quea nee nee poaje oya. Jamaya eyaya oya ba meeje —acanaje Jesosaa. Jamaya Anania jjacahuibaquinaje.

¹⁷Majoya ecahuijaa shequi'yo majje Anania poquinaje Jonasaja equi yasijje, Sanoni jaa huasijje poquinaje. Sanonija sapa biajje eme' huana canaje Ananiaa. Jama acanaje ba'a: —Epeejji Sanoni, esejaya Emeshi Mese nei Jesosaa eya huoojea canaje mi que. E'e, miyaya ejiojjijje poejeya Jesosa banaje eyajo. Maaya eya huoojea canaje mi quea cojja ja'a po mee'yohua. Jesosaa Edojjoshahua Pame mi yasijje dobiqui mee caje'yo pea'ai —acanaje Ananiaa.

¹⁸Anania onijje mimianijo tii, oja sapa biajje eme huana cajo, aquiana esope jayojja Sanonija ecojjajo ani, ma o quea cojja misi po meejjji poani oquequinaje. Jamajjeya quea cojja ja'a nee po o'yanaje Sanoni. Jamajjeya nequisohua'yajo, Ananiaa Sanoni Eyacuiñajji besa mee canaje Eyacuiñajji nijje epo'yojji. ¹⁹Majoya ijjal'ijjia majje Sanoni quea ca'a po'yonaje.

Sanoniya Jesosaja esohui huohui canaje Damasicojo

Oe pojji cahuime Sanoni Jesosaja epeejji cuana nijje nequinaje Damasicojo. ²⁰Jodio cuanaja equi ojee ejjachichaquijji yasijje poquinaje Jesosaja esohui huohuiya. Jama huohuime acanaje ba'a: —Jesosa Eyacuiñajji Bacua Ejja e'e jojo nei —Sanoniya acanaje.

²¹Jodio dejja cuana ma equijo ani oja esohui shajja'ajja majje quea mete nee nee poanaje. Jama huohuime acanaje ba'a: —¿Apiojji acuae jiquio Sanoni mimiani Jesosajo? Jenosanenajo ohuaya quea huiso cuana cuia canaje Jesosa nijje mimianijojo. Oya jiquiacua poeyanaje Jesosaja epeejji cuana iñaa. Eyacuiñajji nijje emimijji etii cuana huasijje dojo sa acanaje, Jenosanena huasijje. Jjeya ca ca Sanoni Jesosajo mimi majamajani. ¿Yajjajo shai ohuaya Jesosaja esohui huohui cani?

²²Jamatii Sanoniya Jodio cuana Damasicojo ba'e sohuihuohui neinei canaje. Jama atiitii canaje ba'a: —Jesosa e'e jojo nei Eyacuiñajji huoojea'yo ojjaña jaahuanajji, Quito —Sanoniya acanaje.

Sanoniya quea ja'a nee nee huohui canaje Jesosajo. Matatii Jodio cuana onijje jjamimicuajeanobiqui nequinaje quea huiso. Quea quene nee poanaje: —¿Yajja acuae seya aje so'o? Jesosaja esohui huohuipajea'yo ajja. ¡Ejjacuiajequijji'yo Sanoni! —poanaje cuana.

²³Jamajjeya quijke pishana Jodio etii quea quene nee nee po majje jjachichaquinaje. Ojee mimimiminaje Sanoni cuia'yojji. ²⁴Pea cuaa ca

ca Sanoni huohui canaje jama ba'a: —Jodio dejja cuaa miya quecua sa acani. Ojjaña pojjajo, mecajje pe'a'i ohuaya cuiñajji esecue jjani pejjejo miya ishoal'ajja ca ani ecuia'yojji —acanaje.

²⁵Jamajjeya oe mecajje oja epeejji cuaa Sanoni quehua poqui mee ca'yonaje. E'e, cuiñajji mei jiyo ao'ao biajje oya cuana jaasohuaquinaje. Jomajo Sanoni jjepai aijo jjabioquinaje. Majoya oja epeejji cuaa oya jjapashineijje jeaoquea ca'yonaje meshi yasijje, cuiñajji secue yasijje. Majoya Sanoni Jenosanena huasijje poqui'yonaje.

²⁶Jamajjeya Jenosanena huasijje poqui'yo majje Sanoni Jesosaja epeejji cuana nijje jjapeequi sa poanaje. Jamatii Sanoni Jesosaja epeejji pojjeama poso acanaje cuaa. Ojo quea mete nee nee poanaje: "Eya iña ca chana!" poanaje cuana. ²⁷Majoya Jesosaja epeejjiya Benabeya Sanoni dojo canaje Jesosaja huoojea'yo esohui huohuijjii cuana huasijje. Oya cuana huohui canaje jama ba'a: —Epeejji cuana, ¡a'la quea mete pojji Sanonijo! E'e, jiquio Sanoniya ejiojjije poquijeya Emeshi Mese nei Jesosa ba canaje. Jesosa onijje miminaje pe'a'i. Majoya ohuaya Jesosaja esohui huohui neinei canaje Damasicojo nequiya —acanaje Benabeya.

²⁸Jamajjeya Sanoni Jesosaja huoojea'yo esohui huohuijjii cuana nijje ba'enaje. Ohuaya onijjeya Jenosanenajo mete'ama huohui mee canananaje Jesosaja esohui. ²⁹Jomajo yaninaje Jodio cuana Jienoja esohuijo mimiani. Sanoni ona nijje mimiquinaje quea huiso. Jesosaja esohui huohui canaje. Maaya mimicuiajeanobiajea sa acanaje Sanoni. Sanoni nijje quea quene nee nee po majje oya cuiajea sa acanaje Jesosaja esohui huohui cajo. ³⁰Maya ba majje Sanonija epeejji cuaa oya dojo canaje Sesanea cuiñajji yasijje. Majoya oya huoojea canaje quea huesha nee, oja cuiñajji yasijje, Tanaso huasijje bishejo.

³¹Majoya Jodea meshijo, Janinea meshijo, Samania meshijo pe'a'i pea cuana Jesosaja epeejji cuana nijje quea bei poanaje. Napa pajea canaje. Jamajjeya quea huiso nee nee Jesosa nijje jjapeequi'yonaje. Edojjoshahua Pameya oya cuana ba'e meesahua canaje. Ojjaña cuana Emeshi Mese Jesosaja esohui jayojja jama ba'enaje quea ja'a nee nee.

Peno poquinaje Nida cuiñajji yasijje, Jope cuiñajji yasijje pe'a'i

³²Majoya Peno ojjaña cuiñajji yasijje poquinaje Jesosaja epeejji cuana baa. Nida huasijje poquinaje Jesosaja epeejji cuana nijje jjapeequiya, esohui huohuiya pe'a'i. ³³Jomajo Penohua pea dejja ba canaje, Eneasi bajjani. Eneasi aje oe jeo'ajja. Oya ejaa jaanaje me oeje pea beca pеejjima shequijajame, 8 shequijajame. ³⁴Jamajjeya oya ba majje Penohua huohui canaje jama ba'a: —Eneasi, Jesosaa miya jeo mee caje'yo. ¡Nequisohuacu! ¡Miquea ejaa'ji bebocue!

Jjeyahua nei Eneasi nequisohuanaje. Quea ja'a nee nee poanaje, de. ³⁵Ojjaña cuaa Nidajo ba'eya, Sanohuijo ba'eya pe'a'i Eneasi ba canaje jeojeo'yonaje. Jamajjeya quea huiso nee Jesosa nijje jjapeequi'yonaje.

Tabita mano'yo majje shequi o'yanaqe

³⁶Jope cuiñajijo epona tii Tabita bajjani ba'ya poa, Ese Ejja esohuijo ca ca oya Docuei bajjani. Oya Jesosaja epeejji nei. Tabitaa quea pame nee atiitii canaje. Aema' cuana ba'e meesahua canaje pe'a'i. ³⁷Tabita aje quea mano poanaje. Mano'yonaje. Epeejji cuaa oya shacua ca'yonaje. Majoya jaahuana canaje eyajo jaa equecuayiji yasijje. ³⁸Jope, Nida quea chipi nee, huesha'ama. Jamajjeya Jesosaja epeejji cuana Jopejo ba'eya shajja'ajja canaje Peno Nidajo nequi. Jamajjeya beca dejja huoojea canaje Peno que. Jama huohuime acanaje ba'a: —Peno, ¡poecuajicue ecuana nijje Jope yasijje!

³⁹Jamajjeya shajja'ajja majje Penohua ojaya aquiana bio canaje. Ona nijje poquinaje Jope yasijje. Jope yasijje poe'yajo ojjaña cuana nijje oya sohuaquinaje eya equecuayiji yasijje Tabita baa. Ojjaña e'ahuemano cuaa pa neineianiya Peno ocuee canaje. Tabitaja soco ba mee canaje. Ojo jama huohuime acanaje ba'a: —¡Bacue, Peno! Eshe anijo Tabitaa ecuanaja daqui eyami, daqui nei pe'a'i quea huiso soco canaje. ¡Bacue ojaya esipi'yo ecuanajaya pe'a'i! —acanaje cuaa.

⁴⁰Majoya Penohua ojjaña cuana huoojeacuayajea canaje esecue yasijje. Ecui'oshajjajo nequi majje Eyacuiñajji nijje miminaje. Eyacuiñajji nijje mimi majje epona emano'yoja nijje miminaje jama ba'a: —¡Tabita, shequi'yocue! ¡Nequisohua'yocue miya!

Shequi'yo majje Tabita jjabapojjaqui'yonaje. Peno ba majje anisohuanaje. ⁴¹Majoya Penohua Tabita me iña majje nequisohua meesahua ca'yonaje. Tabita nequisohua meesahua'yo majje Penohua Jesosaja epeejji cuana, e'ahuemano cuana pe'a'i esecuejo nequi iyaa canaje Tabita bajji. Jama acanaje ba'a: —¡Dobicue! ¡Miquea epeejji Docuei bahuacue! Shequi'yonaje, Jesosaa oya shequi mee ca'yonaje.

⁴²Ma shajja'ajja majje quea huiso nee Jopejo ba'e Jesosa nijje jjapeequi'yonaje. ⁴³Jamajjeya Peno Jopejo nequinaje quea cahui huiso. Dejja Simono bajjani nijje ba'enaje, ijjiacajji jee chacojjii nijje.

Penohua Jodio pojjeama huasijje esohui huohui canaje, Conenio huasijje

10 ¹E'e Teopino, eyaya, Nocaa jiquio pea esohui tehueña miquea ebajji. Esohui e'e nei Jesosaja epeejji cuanajo tehueña jama ba'a: Oe dejja Conenio bajjani Sesanea cuiñajijo ba'enaje. Oya Jodio pojjeama, Shomano dejja, quea huiso nee sohuinano huoojeajji poani, ma bajjani ba'a: Itaniano sohuinano cuana. ²Jamatii Conenio quea pame nee. Ojaya huapa pojjeama cuana nijje Eyacuiñajjiya esohui jayojja jama ba'e sa poani. E'e, ohuaya aema' cuana ba'e meesahua canaje; quea huiso aquiana quia canaje sosema!. Eyacuiñajji nijje mimi majamajanaje pe'a'i. ³Oe pojjajo eshequi jjanequijeapaquiajo Eyacuiñajjiya Conenio jjacahuibaqui mee canaje jama ba'a: Cahuiba canaje Eyacuiñajjiya esohuidojoji o que poe majje onijje miminaje jama ba'a: —¡Conenio, shajja'ajjacue mo!

⁴Esohuidojodzi ba majje Conenio quea ajjajja nee jama poanaje ba'a:
—¿Yajja? ¿Ae sa poani miya? ¡Huohuicue mo!

Esohuidojodziya oya jama acanaje ba'a: —Eyacuiñajjiya miquea emimi cuana onijje shajja'ajja canaje. Miya aema' cuana huasijje aquiana quiaña sosema' ojaya eba pea'ai. Jamajjeya minijje quea bihui nee poani. ⁵Jamajjeya ijijeya nei beca dejja huoojeacue Jope yasijje! Jomajo oe dejja Simohui Peno bajjani enequi. ¡Peno jjequi meeque! ⁶Oya Peno Simonoja equijo ba'yani, ijjiacajji jee chacojji poanija equijo. Ojaya equi bae ai sahuajo ani —acanaje Eyacuiñajjiya esohuidojodziya. Jamaya Conenio jjacahuibaquinaje.

⁷Majoya esohuidojodzi poqui'yonaje. Conenio shequi'yonaje. Shequi'yo majje ojaya echacosahuajji beca iyaa canaje. Oe Sohuinano ojaya epeejji quea pame nee iyaa canaje, ma Eyacuiñajji nijje mimiani pea'ai.

⁸Eyacuiñajjiya esohuidojodziya esohui onijje Coneniohua huohui canaje. Majoya oya cuana huoojea canaje Jope yasijje.

Penohua cahuiba canaje

⁹Jamajjeya Conenioja epeejji cuana Jope yasijje poquinaje. Pea pojjajo eshequi biacojjajja nequijo Jope ba cañaquinaje quea chipi nee.

Peno ca ca Jopejo Simonoja equijo nequi equi jamacoo huasijje jaasohuaquinaje Eyacuiñajji nijje mimiya. ¹⁰Eshequi biacojjajja nequijo Peno quea shoe nee poanaje. Bobi ijija sa poanaje. Onaa Penoja bobi cuacula canijo, Penohua ishoa'ajja ca aninaje bobi. Majoya equi jamacoojo jaa cahuinaje. Eyacuiñajjiya oya jjacahuibaqui mee canaje jama ba'a: ¹¹Esecue quea quemo jayojja ba canaje eyajo. Esecue eca'apejo nequi. Aquiana equipajaajji quea quemo jayojja ba canaje, jjapashineijje jeaoquea canaje o que, jjono eyichijjo jayojjajo. ¹²Ma equipajaajjiyo ojjaña ijjiacajji cuana, peyo cuana, ojjaña cuichojji cuana pea'ai ba canaje, eshe, de. Jamaya jjacahuibaqui mee canaje pea'ai ba'a: ¹³Eyajo Jesosa Peno nijje miminaje jama ba'a: —Peno, ¡nequisohuacue! ¡ijjiacajji cuana, peyo cuana, cuichojji cuana pea'ai quecuacue e'ijjiajji! —poanaje.

¹⁴Penohua ca ca jama acanaje ba'a: —Emeshi Mese Jesosa, chojja. Eya ijija sa po'yo ajja ma aquiana cuana. Peajja, de. Yahuajo ecuanaja etiiquiana cuanaja esohui jayojja jama poanijo ma aquiana cuana ecuea ijija jjima. Eya coma ijija sa po'yo ajja nei nei —poanaje Peno.

¹⁵Eyajo Jesosaa Peno huohui ca o'oyanaje jama ba'a: —Eyacuiñajjiya ojjaña bobi quea pame po mee ca'yonaje. Jamajjeya ja'a jama pojji ba'a: “Jiquio bobi peajja, coma ijija ajja ca iña” a'a pojji, Peno! —Jesosa poanaje.

¹⁶Jamaya Jesosaa Peno pea beca peejiima huohui'yome acanaje, oya jayojja huohui'ajja o'oyame acanaje Peno ecahuijaa. Majoya equipajaajji jjequisohua ca'yonaje eyahuasijje.

Jamaya jjacahuibaquime meeya Peno Jesosaa acanaje ejjabahuejjaqui meeji jama ba'a: Jodio pojjeama cuana Jodio cuana jayojjaya

Eyacuiñajjija quea jea nee. Oya cuana pea'ai Jesosa nijje jjapeequi meesahua caje'yo, mimishi cuijea caje'yo pea'ai.

¹⁷ Jamajjeya shequi'yo majje Peno jjashahuabaqui aninaje jama ba'a: —¿Ajeo shai iña Jesosaa jjacahuibaqui mee canaje? ¿Ae shai ohuaya eya ba mee sa acani?

Peno jamaya jjashahuabaquianijo, Conenioja echacojjii cuana poeyanaje Jope yasijje. Simonoja equi sa'ajja canaje. ¹⁸ Ba majje esecue yasijje poeyanaje. Secuejo nequi taaaanje jama ba'a: —¿A'a Simohui Peno yani jiquojo?

¹⁹⁻²⁰ Peno ma ohua cahuiba canajejo jjashahuabaquianijo, Edojoshahua Pameya oya huoojea canaje jama ba'a: —Peno, ¡shajja'ajjacue! Pea beca peejjima dejja poeyanaje mi baa. ¡Jamajjeya nequisohuacue; jaaoquequicue; oya cuana baquicue esecue jjanijo nequi! ¡Onije poquicue, Peno! ¡A'a quea mete pojji! Eyaya oya cuana huoojeanaje mi dojhua.

²¹ Jamajjeya Peno jaaoquequinaje ma dejja cuana baa. Huohui'ajja cañaquinaje jama ba'a: —E'e. ¿A'a miyaya eya sa'ajjaña? Quioya iña. ¿Apiojji acuaeaya iña sa'ajjaña? ¿Ajeo acuae mi poeyanaje so'o?

²² Onaaya Peno huohui canaje jama ba'a: —Coneniohua, ma sohuinano cuana huoojeajji poaniya Sesaneajo ba'eya ecuana huoojea canaje. Ohuaya quea pame nee acani, Eyacuiñajjija esohui jayojja jama acani. Oya ojjaña Jodio cuanaja quea boti nee. Eyacuiñajjija esohuidojiji onijje miminaje jama ba'a: “¡Dejja cuana huoojeacue Jope yasijje Peno jjequiya! ¡Peno miquea equi yasijje jjequicue! ¡Penoja esohui shajja'ajja neineicue miquianaaya o poeyajo!” poanaje esohuidojiji —Conenioja epeejjiya Peno acanaje.

²³ Jamajjeya Penohua oya cuana iyaa canaje esecuejo nequi: —E'e, ¡dobicue! ¡Jiquiacua cahuicue ecuana nijje! —poanaje. Jomajo oya cahui oe poanaje.

Peno Conenioja equi yasijje poquinaje esohui huohuiya

Mecajjeahua nei shequi majje Peno poquinaje Conenioja epeejji cuana nijje Sesanea huasijje. Pea Jesosaja epeejji Jopejo ba'e poquinaje pea'ai.

²⁴ Sesaneajo ca ca Coneniohua oya cuana ishoa'ajja ca aninaje. Ojjaña ojaya huapa pojjeama cuana, ojaya epeejji cuana pea'ai iyaa canaje ojaya equi yasijje Peno ishoa'ajjajji. Jamajjeya beca cahuime po majje Penohua Sesanea ba cañaquinaje. ²⁵ Conenioja equi yasijje poeyajo, Conenio equijo ani cuayaquinaje o baa. Ecui'oshajjajo nequi majje Peno bihuia canaje, ohuaya.

²⁶ Penohua ca ca oya jama acanaje ba'a: —¡Dee! ¡Nequisohuacue oe, miya! Eya aje dejja pea'aiya, mi jayojjaya. ¡A'a jja oe eya bihuajji! —Peno poanaje.

²⁷ Conenio nijje mimimimiqui tii Peno dobiquinaje equi yibedojo huasijje. Eyiye dojjojo quea huiso ejjachichaqui nequi ba cañaquinaje. ²⁸ Majoya ojjaña ba majje Penohua huohui canaje jama ba'a: —¡Bacue! Yahuajo Jodio cuaa huohui ca poa jama ba'a: “Jodio cuana, ¡a'a dobiquijji Jodio pojjeamaja equi yasijje! ¡A'a ona nijje ijjal'ijjal'ijjal!” Jamaya yahuajo nei Jodio cuana poa. Maya miquianajaya eba. Jamatii Eyacuiñajjija eya ba mee canaje jama ba'a: “¡A'a Jodio pojjeama quea tai poso aiji!” jamaya eya acanaje Eyacuiñajjija —Peno poanaje.

²⁹—Jamajjeya miquianaaya eya iyaanajejo eya quea bihui nee poeyanaje miquiana baa. E'e. Jamajjeya ¿ae sa poani miya? ¿Apiojji acuae iñia iyaanaje so'o? —Peno poanaje.

³⁰Coneniohua Peno jama acanaje ba'a: —Peno, yahuajo Eyacuiñajjija esohuidojiji enijke miminaje. E'e, ebeca pee pea'ai cahuime yahuajo eshequi oya jayojja nequijo eya Eyacuiñajji nijje mimi nequinaje tii tii equijo. Eshequi jjanequijeapaaquianijo oe dejja jjanequipanaquinaje. Oja daqui quea jeajahua nee nee poanaje. ³¹Oya enijke miminaje: “Conenio, Eyacuiñajjiya miquea emimi shajja'ajja canaje. Miya aema' cuana bobiaña ba canaje pea'ai. Miya ojaya quea boti nee. ³²Jamajjeya ¡beca dejja huoojeacue Jope yasijje! ¡Dejja Simohui Peno bajjani iyaa meecue! Oya Peno pea dejja bajjani Simono nijje nequi, ijjiacajji jee chacojji poani nijje nequi, bae ai sahuajo ba'e nijje nequi” jamaya eya acanaje esohuidojijiya. ³³Jamajjeya ma shajja'ajja majje jjeyahua nei eyaya beca dejja huoojeanaje mi jjequiya. Mi poeyajo eya quea bihui nee poanaje. Eyacuiñajjija eba ecuana quea huiso jjachichaquinaje miquea esohui shajja'ajja. E'e, ecuaaya Eyacuiñajjija esohui shajja'ajja sa aña. Jamajjeya ¡ojaña Eyacuiñajjija esohui ecuana huohuicue jjeya nei, ma ohua mi huohui canaje ecuana huohuiji! —Conenio poanaje.

Penohua esohui huohui canaje Conenioja equijo

³⁴Jamajjeya Penohua huohui canaje jama ba'a: —E'e de. Jjeya ecuea eba Eyacuiñajjiya ojaña cuana quea jea nee acani. Jodio pojjeama Jodio cuana jayojjaya jama acani e'e jojo nei, Eyacuiñajjiya. ³⁵E'e, ojaña joya quea pame ba'yani, Eyacuiñajjija esohui jayojja jama poani pea'ai ohuaya jaahuana cani, ojaña cuana ojjaña meshijo ba'e, ojaña pea mimime poani pea'ai —Penohua acanaje.

³⁶—Conenio, miquea eba Eyacuiñajjiya Isaeni dejja cuana huasijje ojaya esohui quea pame nee Jesosa Quitoja huohui ca poa jama ba'a: “Emeshi Mese nei Jesosa Quito nijje jjapeequianijo, Eyacuiñajji ojaña nijje quea bei poaje'yo, mimishi cuijea'yo majje”. Jamaya aca poa cuaa yahuajo nei —Peno poanaje—. ³⁷E'e Conenio, miquea eba pea'ai Huaniya, ma Eyacuiñajji ebesameejji poaniya huohui canaje jama ba'a: “¡Miquea mimishi pajea'yonocu! ¡Eyacuiñajji besacue!” acanaje Huaniya. Ohuaya Jesosa besa mee canaje pea'ai. Majoya Jesosaa Janinea meshijo, ojaña cuiñajji Jodioja meshijo sohuihuohui canaje; quea pame nee acanaje pea'ai. ³⁸Jama poanaje ba'a: Eyacuiñajjiya Jesosa Nasanenajo ba'e que Edojoshahua Pame huoojea canaje, dobiqui mee ca'yonaje. Jesosa quea ca'a nee nee po mee canaje. Ma dejja ajiima acani quea huiso nee quea pame nee nee ameesahua canaje. Jesosaa poquijeya quea huiso nee nee emanojaa cuana huaquia mee ca'yonaje. Eshahua cuana dejjajo nequi huoojeacuayajea mee ca'yonaje Jesosaa Eyacuiñajji nijjeya —Penohua acanaje—. ³⁹E'e Conenio, Jesosaa quea pame nee acani ecuaaya, ojaya epeejji cuaa banaje. Onijje poquinaje

ojjaña Jodio meshi yasijke, Jenosanena huasijke pea'ai. Jamatii pea cuaa Jesosa quea mimishi aca'yonaje. Acui ecueatalapeejo ba'ehuanasohuajea ca'yonaje emano'yojji. ⁴⁰Jamatii Jesosa mano'yajo, pea beca peejiima cahuime epo jaa Eyacuiñajjiya oya shequi mee ca o'oyanaje. Majoya Eyacuiñajjiya oya ecuana huasijke huoojea ca o'oyanaje. E'e, ecuaaya oya banaje eshe o'oya. ⁴¹Ojjaña dejia cuanaja oya ba o'oya jjima. Ecuanaaya, ma Eyacuiñajjiya yahuajo babaca ca poaa oja esohui huohujji poaniya ca ca oe ecuanaaya Jesosa ba o'oyanaje. Shequi o'oya majje oya ecuana nijje ijija'ijjianaje, ena ishi canaje pealai. ⁴²Majoya ohuaya ecuana huoojea canaje ojaya esohui huohuiya ojjaña cuana huasijke. Jama huohuime aña ba'a: "Quijje Eyacuiñajjiya Jesosa huoojea caje o'oya. Jesosaa poe o'oya majje ojjaña sosequia caje'yo ma eseya mano'yo jjimahua animaje poa sosejje. E'e, ojjaña eshe nequi cuana, ojjaña yahuajo nei mano'yo pea'ai ohuaya sosequia caje'yo ma eseya mano'yo jjimahua animaje poa sosejje. Ojjaña joya quea pame ba'ya poa quea bilihui nee ba'e tiitii mee caje'yo eyajo onijje. Mimishi cuana ca ca quea nee nee po mee caje'yo tii tii. ⁴³E'e Conenio, yahuajo nei nei Jesosa poe jjimahuaajo Eyacuiñajjiya esohui huohujji cuaa Jesosajo huohui ca poa jama ba'a:

"Oya quea pame nee nee, quea ca'a nee nee poanijo, ojjaña joya onijje jjapeequiani Eyacuiñajjiya mimishi cuijear caje'yo. Jamajjeya oya cuana cuaqui yasijke poqui'yo ajja mano'yo majje".

Jamaya yahuajo nei Jesosajo tehue ca poa cuaa —jamaya Penohua esohui huohui canaje. Ojjaña cuaa Conenioja equijo nequiya shajja'ajja canaje.

Edojoshahua Pame Jodio pojjeama huasijke dobiqui'yonaje

⁴⁴Penohua sohuihuohui canijo tii, Edojoshahua Pame Conenio que, ojaya epeejji cuana que pea'ai dobiqui'yonaje, ma Penohua sohuihuohui cani yasijke.

⁴⁵E'e, Eyacuiñajjiya Edojoshahua Pame huoojea ca'yonaje Jodio pojjeama cuana huasijke. Ma ba majje Jodio cuana Peno nijje nequi jjajjasoquinaje: —E'e de, Eyacuiñajjiya Edojoshahua Pame huoojea ca'yonaje Jodio pojjeama huasijke pea'ai —poanaje Jodio cuana ma Peno nijje poquinaje.

⁴⁶E'e, Jodio cuaa Conenio shajja'ajja canaje Eyacuiñajji bihuia cani, de, pea mimi'yome poanaje pea'ai. ⁴⁷Jamajjeya Penohua jama acanaje ba'a: —Yahuajo Eyacuiñajjiya Edojoshahua Pame ecuana huasijke huoojea canaje jayojja jama jjeya ohuaya Edojoshahua Pame jiquio dejja cuana huasijke huoojea canaje pea'ai. Jamajjeya ecuanaaya oya cuana Eyacuiñajji cabesa mee'yahua ena huasijke, ¿a'a e'e? —Penohua acanaje.

⁴⁸Jamajjeya Penohua pea cuana huoojea canaje Jesosa Quitoja epeejji ma jjeya nei onijje jjapeequinaje besa meeya Eyacuiñajjiyo. Majoya Conenio, oja epeejji cuana pea'ai miminaje Peno nijje. Jama poanaje ba'a: —Peno, ¡che ecuana nijje nequicue, esohui ba meesahuacue! —acanaje.

Jamajjeya Peno onijje nequinaje. Majoya quijje pishana Peno poqui'yonaje Jenosanena huasijke.

**Penohua Jesosaja epeejji cuana Jenosanenajo ba'e
huohui canaje Coneniojo, Jodio pojjeamajo**

11 ¹Jamajjeya Jesosaja huoojea'yo esohui huohujiji cuaa, ojjaña Jesosaja epeejji cuaa Jodea meshijo ba'eya pea'ai shajja'ajja canaje Coneniojo. Ojjaña jama acanaje ba'a: —Jodio pojjeama cuaa pea'ai Eyacuiñajjiya esohui shajja'ajja ca'yonaje; jamaya aca'yonaje quea bihui nee, de —acanaje cuaa.

²⁻³Jamajjeya Peno Jenosanena huasijke poqui o'oyajo, beca Jodio cuana onijje mimijajinaje jama ba'a: —Peno, ¿apiojji miya Jodio pojjeama cuanaja equi yasijke dobiquinaje so'o? E'e, miya ca ca oe Jodio pojjeama cuana nijje ijija'ijjianaje pealai. ¿Apiojji? Jamaya pojjeama esejaya etiiquianaja esohui. Oya cuanaja cuiishasha biso nei ejehuisejjajea'yo pojjeamajo oya peajja, de —poanaje Jodio cuana.

⁴Jamajjeya Penohua oya cuana huohui canaje ojjaña joya Eyacuiñajjiya Jodio pojjeama cuanajo acanaje. ⁵Jama acanaje ba'a: —Ecuea epeejji cuana, eya Jopejo nequi Eyacuiñajji nijje mimi aninaje. Eyacuiñajjiya eya jjacahuibaqui mee canaje jama ba'a: Ijjiacajji cuana aquiana cuana quibi jayojjajo iya majje jeaoquea canaje e que, jjonojo. ⁶Ma quibi dojjojo eyaya banaje ojjaña ijjiacajji cuana, peyo cuana, ojjaña cuichojji cuana pea'ai. ⁷Eya jjacahuibaqui mee canaje jama ba'a: Eyajo Jesosa enijje miminaje jama ba'a: “Peno, ¡nequisohuacue! ¡Ijjiacajji cuana, peyo cuana, cuichojji cuana pea'ai quecuacue e'ijjiajjal” acanaje. ⁸Jamatii eyaya saja'anaje jama ba'a: “Jesosa, chojja, eya ijija sa po ajja ma aquiana cuana. Peajja, de. Yahuajo ecuanaja etiiquiana cuanaja esohui jayojja jama poanijo ma aquiana cuana ecuea ijija jjima” eya poanaje. ⁹Majoya Jesosa enijje mimi o'yananje: “Eyacuiñajjiya ojjaña aquiana cuana quea pame nee po mee ca'yonaje. Jamajjeya ja'a miya jama pojji ba'a: —¡Jiquio aquiana cuana peajja, coma ijija ajja ca iña! —a'a pojji, Peno!” acanaje Jesosaa eya ecahuijaa. ¹⁰Jamaya eya huohui huicha'a huicha'a canaje, pea beca peejjima huohuime acanaje. Majoya ojjaña jjequisohua ca'yonaje eyahuasijke.

¹¹—Majoya pea beca peejjima dejja ecuea equi yasijke poeyanaje. Oya cuana Sesaneajo ba'e o chacomeejjiya huoojea canaje e dojohua. ¹²Edojoshahua Pame enijje miminaje jama ba'a: “¡Ona nijje poquicue metel'ama!” Jamajjeya eya poquinaje Sesanea huasijke. Jiquio Jesosaja epeejji me oeje oe huisome enijje nequi poquinaje pea'ai enijje. Ecuana Conenioja equi yasijke dobiquinaje. ¹³Majoya Coneniohua ecuana huohui canaje jama ba'a: “Eyacuiñajjiya esohuidojoji ecuea equijo jjanequipanaquinaje. Enijje miminaje. Jama poanaje ba'a: —¡Beca dejja huoojeacue Jope yasijke Simohui Peno jjequiya!

¹⁴Ohuaya miquianaya sohuihuohui caje. ¡Ojaya esohui jama acue! Jamajoya Eyacuiñajjiya miquianajaya mimishi cuana cuijea caje'yo; onijje ba'e tiiti

mee caje'yo eyajo miya, miquea huapa pojjeama cuana pea'ai —eya acanaje esohuidojijiya" jamaya Coneniohua eya huohui canaje —Peno poanaje—.

¹⁵Eya Conenio sohuihuohui'anijo tii Edojoshahua Pame oijaña cuana huasijje dobiqui'yonaje. E'e, ma ecua eseya yahuajo acanaje jayojja jama oya cuana aca'yonaje. ¹⁶Majoya eyaya niñeba'yonaje esejaya Emeshi Mese nei Jesosaja esohui yahuajo jama ba'a: "Ena huasijje ca ca oe Huaniya miquianaya besa mee canaje Eyacuiniñajijo. Quijje ca ca eyaya miquiana que Edojoshahua Pame dobiqui meeje'yo Eyacuiniñajji nijje epo'yojji tii tii" poanaje Jesosa yahuajo —Penohua acanaje—. ¹⁷E'e, Jesosa Quito nijje jjapeequianijo, Eyacuiniñajjiya Edojoshahua Pame huoojea canaje ese que. Oya jayojjaya jjeya Jesosa Quito nijje jjapeequianijo, Eyacuiniñajjiya Jodio pojjeama cuana huasijje Edojoshahua Pame huoojea ca'yonaje pea'ai. Eyacuiniñajjiya quea pame nee nee acani tii tii. Jamajjeya eya ca iña Eyacuiniñajji huoojea'yojji pojjeama. Eyaya oya huohui'yo ajja jama ba'a: "¡A'a Jodio pojjeama huasijje Edojoshahua Pame huoojea'yojji!" Chojja, jamaya eyaya Eyacuiniñajji huohui ajja, de. Eya Eyacuiniñajjiya echacojji, de, ojaya esohui jayojja jama aña eyaya —Peno poanaje.

¹⁸Jamajjeya Penoja esohui shajja'ajja majje Jodio cuana Peno nijje mimijaji pajea'yonaje; Eyacuiniñajji bihuia ca'yonaje jama ba'a: —E'e, jamajjeya Eyacuiniñajjiya Jodio pojjeama cuana mimishi pajea meesahua cani. Jesosa nijje jjapeequi meesahua cani pea'ai. Jodio pojjeama cuanaja mimishi cuana cuijea'yo majje oya cuana ba'e tiitii mee caje'yo eyajo onijke pea'ai —poanaje oijaña cuana.

Jesosaja epeejji cuana Atioquia cuiñajjijo ba'e

¹⁹E'e, yahuajo Jodio etii cuua Jesosaja epeejji Estema sapa jahahuejjajea'yo majje oijaña Jesosaja epeejji cuana napa majamaja canaje pea'ai. Jamajjeya oijaña Jesosaja epeejji cuana quea huiso meshi yasijje quehua poquinaje quea mete jjejojo. Beca cuana quea huesha nee poquinaje Penisia meshi yasijje, Atioquia cuiñajji yasijje pea'ai. Pea cuana Chipe nasi yasijje besapoquinaje bishejo. Poquijeya Eyacuiniñajjiya esohui huohui capoquinaje Jodio cuana huasijje. Jodio pojjeama cuana huasijje ca ca Jesosaja esohui huohui jjima acapoquinaje.

²⁰Majoya Jesosaja epeejji Chipe nasijo ba'e, Sinene meshijo ba'e pea'ai poquinaje Atioquia cuiñajji yasijje. Jomajo ohuaya Jodio pojjeama cuana huasijje pea'ai Eyacuiniñajjiya esohui quea pame nee Jesosajo huohui canaje. ²¹Emeshi Mese nei Jesosaa oya cuana esohui huohui meesahua canaje. Jamajjeya quea huiso cuana Jesosaja esohui shajja'ajja majje onijke jjapeequi'yonaje, quea huiso nee nee. ²²Ma shajja'ajja majje Jesosaja epeejji Jenosanenajo ba'leya Jesosaja epeejji etii Benabe bajjani huoojea canaje Atioquia huasijje Jesosaja epeejji cuana baa. ²³Atioquia huasijje poe majje Benabeya ba cañaquinaje Eyacuiniñajjiya Jodio pojjeama quea jea nee acanaje e'e jojo nei. Jamajjeya Benabe quea bihui nee poanaje. Jesosaja epeejji eyacua cuana jama huohuime acanaje ba'a: —E'e, jamaya. ¡Eyacuiniñajjiya esohui jayojja jama atiitiicue! ¡A'a oya pajea'yojji! ¡Onijke jjapee tiitiiquicue!

²⁴Benabe Jesosaja epeeiji quea pame nee. Edojjoshahua Pameja ejjashahuabiquijji jayojja jama acanaje tii. Jesosaja esohui jayojja jama atitii canaje. Jamajjeya quea huiso cuana Emeshi Mese nei Jesosaja epeeiji poanaje Benabeja esohui shajja'ajja majje.

²⁵Majoya Benabe poqui'yonaje Tanaso cuiñajji yasijke Sanoni sa'ajja'yohua. ²⁶Ba majje ohuaya Sanoni jjequi canaje Atioquia huasijke onijke esohui huohujji. Jomajo Atioquiajo oya cuana nequi'yonaje Jesosaja epeeiji cuana nijje oe shequijame. Quea huiso nee nee Jesosaja esohui huohui majamaja canaje jomajo. Majoya Atioquiajo pea cuaa Jesosaja epeeiji cuana bajjani canaje Quitoja epeeiji, Quitiano cuana bajjani acanaje.

²⁷Majoya pea Jesosaja esohui huohujji cuana Jenosanenajo ba'le poquinaje Atioquia huasijke. ²⁸Majoya ojjaña Jesosaja esohui shajja'ajja ijachichaquinaje. Oe esohui huohujji Ajamo bajjani nequisohuanaje. Eyacuiñajji Edojjoshahua Pameya oya huohui meesahua canaje. Jamajjeya Ajamohua huohui canaje jama ba'a: —Quijje pishana ojjaña meshijo ojjaña cuana quea shoe nee nee poaje'yo. Bobi chama' poaje'yo —jamaya ojjaña acanaje, Ajamohua. (Quijje pishana pea shequijaja po majje e'le jojo nei jamaya poanaje. Bobi chama' poanaje. Quea huiso nee quea shoe nee nee poanaje Shomano dejja Canio bajjani emeshi mese nequijo.)

²⁹Jamajjeya Ajamoja esohui shajja'ajja majje Jesosaja epeeiji cuaa huohui canaje jama ba'a: —E'e, ecuaaya Jesosaja epeeiji cuana huasijke Jodea meshijo ba'e yasijke bejjo huoojeaje o ba'esahuajji —poanaje.

Jamajjeya aquiana cuana, bejjo pea'ai chicha canaje. Beca cuaa oe pojji quia canaje. Pea cuaa joya quea aquiana huiso neeya quea huiso bejjo quia canaje. ³⁰Jamajjeya quijje quea huiso bejjo chicha majje huoojea canaje Benabe nijje, Sanoni pea'ai nijje. E'e, ohuaya bejjo dojo canaje Eyacuiñajji epeeiji etii yasijke equia'yojji ojjaña Jesosaja epeeiji cuana huasijke.

Jacobo jaja ca'yonaje

12 ¹Ecuea epeeiji Teopino, eyaya, Nocaa pea esohui tehueña Jesosaja epeeiji cuanajo jama ba'a: Pea Enode emeshi mese nequinaje. Ohuaya Jesosaja epeeiji cuana napa ca'yonaje quea huiso. ²Huanija echahua mese Jacobo sapa jajasejjajea mee ca'yonaje baa aiya, de Enodeya. ³Jodio etii cuana quea bihui nee poanaje Jacobo quecua ca'yajo. Ma ba majjeya Enodeya huohui cajo Peno iña canaje pea'ai. Dojo canaje jeanobiaa, quijje equecua'yojji. Jamaya poanaje ojjaña Jodio cuana ijachichaquinaje pahui shejjee mee jjima e'lijajji, quea bihui epojji. ⁴E'e, ma shejo Enodeya Peno equi ejajeanobiaquijji yasijke jeanobia canaje. Sohuinano quea huisohua Peno jaahuana mee canaje. Enodeya Peno jaja mee sa acanaje quijje, ojjaña Jodio cuana pahui shejjee jjima ijija majje. ⁵Jamajjeya Sohuinano cuaa Peno jaahuana neinei canaje ejeyo'yo jaa. Jamatii Jesosaja epeeiji cuana Eyacuiñajji nijje mimi tiitiinaje Penojo: —Eyacuiñajji, ¡Peno jaahuanacue! ¡A'a quecua mee'yojji! —amajamaja canaje epojjajo, mecajje pea'ai.

Peno ejeanobia jaa esecue yasijje dojocuayaqui ca'yonaje esohuidojojjiya

⁶Majoya Enodeya Peno ejequicuayaqui'yoji nisho acanaje mecahuajje ejajajea'yoji nisho. Peno ca ca cahuijaanaje beca sohuinano yiyesama neijo. Baa jjonoja jeyo jaanaje. Pea sohuinano cuaa ejjajeanobiaquijji esecuejo nequiya oya jaahuana neinei'ajja canaje. ⁷Mecashono Eyacuiñajji esohuidojoji poquinaje Peno que. Ma equecuayiji jeaja'a cañaquinaje. Ohuaya Peno cuiapashi cañaquinaje eshequijji. Jama acanaje ba'a: —¡Peno, shequicue! ¡Nequisohua cuajicue, miya!

Jamajjeya baa jjono emejo ba'e jjapichoqui mee ca'yonaje, oquequi mee ca'yonaje meshi yasijje. ⁸Majoya esohuidojojjiya Peno jama acanaje ba'a: —¡Daqui huoshocuel! ¡Ejiojji shejee huoshocue pea'ai! —jamaya Peno acanaje esohuidojojjiya. Jamaya poanaje Peno. Majoya ohuaya Peno huohui ca o'oyanaje: —¡Miquea equipajaajji bebocue! ¡E quishishiji poecue! —poanaje.

⁹Jamajjeya Peno Eyacuiñajji esohuidojoji quishishi poquinaje. Jamatii jjacahuibaquiani poso Peno poanaje ba'a: —E'e de, eya jjacahuibaquiani. E'e pojja'a esohuidojoji chama', de —Peno poanaje.

¹⁰Jamatii Penohua esohuidojoji quishishiji cuayaquijeya ebionei sohuinano epi nequi yejje cananananje. Jamatii ojaya Peno, esohuidojoji pea'ai ba jjima poanaje. Mama pishana nequi pea ba canana o'oyanaje sohuinano. Yejje canana o'oyanaje. Ba jjima poanaje Peno, esohuidojoji pea'ai sohuinanoja. Poquinaje baa cui esecue quea quemó huasijje. O poe'yajo jamatii jjaca'apejoquinaje. Esecue jjani yasijje cuayaqui'yonaje. Cuama pishana dojo majje esohuidojojjiya Peno jea cana'yonaje, ejiojjijo. ¹¹Majoya Peno jjashahuubaquinaje: ¿A'a mo eshe, a'a mo jjacahuibaquiani pojjeama, de? Jjeya ecuea eba Emeshi Mese nei Jesosaa huoojea canaje ojaya esohuidojoji e dojocuayaqui'yohua. Mecahuajje Enodeya eya jaja ca'yó queaye poanaje. Jodio dejja cuaa e quecua'yoji nisho ishoa'ajja canaje pea'ai —Peno poanaje.

¹²Majoya ma shahuaba majje Peno poqui'yonaje Maniaja equi yasijje, Huani Macosoja enaeseja equi yasijje. Joma equijo quea huiso Jesosaja epeejji cuana jjachichaqui majje mimi aninaje Eyacuiñajji nijje, Peno jaahuana meeji. ¹³Penohua esecue jjani cuiaqueya cañaquinaje, epeeyiji esecue jjani. Oe epóna ahuema' ani Shona bajjani poeyanaje aya esecue jjani cuiaqueya cani baa. ¹⁴Ohuaya Penoja esohui shajja'ajja canaje. Jjashahuubaquinaje: —E'e ee, Peno cuayaqui'yonaje.

Bihui majje esecue jjani pajea cananananje. Peno esecuejo tii nequi jea canananaje epóna sho'iya, de. Cuajicuajinanajje equijo ani cuana huohuiya. ¹⁵Jamatii equijo ani cuaa Shona jama saja'ame acanaje ba'a: —Chojja, Shona. ¿A'a jja mi niñepoquiani?

—E'e jojo nei ca ca iña poani —poanaje Shona.

Jamajjeya ojjañaa jama saja'ame acanaje ba'a: —E'e pojja'a esohuidojojji Peno jaahuanajji ca ca coma poeyanaje.

¹⁶Penohua ca ca esecue cuiaqueya canequinaje, iyaa'iyaa nequinaje. Equijo nequi cuaa esecue ca'apejo'yo majje ba canaje Peno nequi. Quea bihui nee po'yo majje soa neinei'yonaje. ¹⁷Jamajjeya Penohua eme'sisi ecuasajo huana canaje: —¡A'a pa jjaja oe mimijji! —poanaje.

Ojjaña mimima'yо nequi ca'yonaje. Majoya Penohua oya cuana huohui canaje: —Emeshi Mese neiya Jesosaa eya ejeanobia jaa esecue yasijje jjequiquiaya meequi ca'yonaje esohuidojijiya.

Majoya huohui canaje pea'ai Penohua: —¡Ojjaña Jesosaja epeejji cuana huohuiquicue! ¡Satiaco Apeoja bacua ejja pea'ai huohuiquicue!

Majoya Peno quehua poquicuajinaje pea meshi yasijje. ¹⁸Mecajjeahua sohuinano cuaa chama' Peno ba canaje ejjajeanobiaquijiji. Ejjoco oe jaa ba canaje. Chama'. Ba majje oya cuana quea mete nee nee po'yonaje. Miminaanaa nequi'yonaje. ¹⁹Emeshi Mese Enodeya pea huoojea canaje Peno jjequiya nisho ejajajea'yojjii nisho. Peno chama' ba majje Enode quea mase nee nee poanaje. Sohuinano cuana ma Peno jaahuanajji cuana 'ya canaje. Huohui'ajja canaje: —¡A'a mi oe cahuijaanaje? —cahuijaa poso Enodeya acanaje.

Majoya Enodeya huoojea canaje ma sohuinano cuana quecuajea'yohua. Chama'yo tii acanaje.

Majoya Enode Jodea meshijo nequi Sesanea huasijje poquinaje. Jomajo nequi tiitiil'yonaje.

Enode, Jesosaja epeejji cuia'yojjii epo mano'yonaje

²⁰Majoya emeshi mese Enode quea quene nee nee poanaje Tino cuiñajjijo ba'e cuana nijje, Sinono cuiñajjijo ba'e cuana nijje pea'ai. Jamajjeya oya cuana Enode nijje jjapeequi o'oya sa poanaje. Ojee poquinaje Enode baa. Ebionei Basito ba cañaquinaje, Enodeja echacojji, oja aquiana cuana jaahuanajji. Bejjo quia cajje Basito quea bihui poanaje ona nijje. Majoya pea bejjo sosejje Basito Enode nijje miminaje: —Dejja cuana Tinojo ba'e, Sinonojo ba'e pea'ai minijje jjapeequi o'oya sa poani. ¡Che oe onijje mimicue! —acanaje Basitohua.

Tinojo, Sinono meshijo pea'ai chama' bobo. Jamajjeya Enodeja bobo sa poanaje quea huiso. Jamajoya Enode quea bihui po mee sa acanaje onijje.

²¹Majoya Enodeya ojjaña dejja cuana iyaa canaje oja sohui shajja'ajjajji. Ojjaña nijje mimi jjimahuajo Enodeya daqui quea nahue nee huoshlo canaje, emeshi meseja ehuoshojji. Ojaya e'anioquejji quea quemodo anioquenaje. Majoya Enodeya ojjaña cuana quea huiso huohui canaje. ²²Ojjaña jomajo nequi oja sohui shajja'ajja majje oya bihuia canaje jama ba'a: —Emeshi mese Enode, miya Eyacuiñajji. Miya dejja jayojja jama mimime pojjeama poani —jamajoya Enode bihuia canaje ojjañaa.

—E'e, jamaya —Enode poanaje, de.

²³Jamajjeya jjeyahua nei Eyacuiñajjiya esohuidojijiya Enode quea mano nee nee po mee caje'yo pea cuana Eyacuiñajji bihuia mee jjima jojoya, jama ajjima

jojoya Enodeja ba'a: —¡Eyacuiñajjiya oe bihuacue! ¡A'a eya bihuajji! —po jjima jojoya oya sosohua ijija ca'yajje quea mano nee po'yonaje. Mano'yonaje Enode, de.

²⁴Majoya Jesosaja epjeeji cuaa esohui quea pame nee Jesosaja huohui canaje quea huiso meshi yasijje. Quea huiso cuaa shajja'ajja canaje. Jesosa nijje jjapeequinaje quea bihu nee.

²⁵Majoya Benabe, Sanoni pea'ai Jenosanena huasijke poeyanaje. Jesosaja epjeeji cuana Jenosanenajo ba'e cuana bejjo quia canaje, ma Jesosaja epjeeji cuana Atioquiajo ba'eya huoojea canaje. Bejjo quia'yo majje Benabe Sanoni nijje huacuaya poqui o'yanaje Atioquia huasijke. Ohuaya Huani Macoso dojo canaje onijje.

**Benabe, Sanoni pea'ai huoojea canaje pea meshi
cuana huasijke Jesosaja esohui huohuiya**

13 ¹Jesosaja epjeeji cuana quea huiso nee nee poanaje Atioquiajo. Jomajo Eyacuiñajjiya esohui huohuiji, Eyacuiñajjiya esohui ba meesahuaji pea'ai yaninaje: Benabe, Sanoni, Simoni Ese Ejjaja esohuijo Dejja Tehue bajjani, Nosio ma Sinene cuiñajjiyo ba'ya poa, emeshi mese Enodeja edoe mese Manaeni pea'ai. Mahuiso. ²Oya cuana Eyacuiñajji bihuia po'aninaje. Eyacuiñajji bihuia canijo bobo ijija ajja aninaje. Jama poanijo Edojoshahua Pameya oya cuana huohui canaje jama ba'a: —Eyaya Benabe, Sanoni pea'ai babacanaje ecuea esohui huohuiji epojji. Jamajjeya ¡oya cuana huoojeacue ecue esohui huohuiya!

³Majoya oya cuanaa ijija'ijija ajja po majje, Eyacuiñajji nijje mimi majje pea'ai eme' huana canaje Sanoni sapa biajje, Benabe sapa biajje pea'ai. Jama acanaje ba'a: —Ecuaaya miquianaya huoojeaña pea meshi cuana huasijke Eyacuiñajjiya esohui huohuiya —acanaje.

Chipe nasijo Jesosaja esohui huohui canaje

⁴Majoya Edojoshahua Pameya Benabe, Sanoni pea'ai huoojea canaje esohui huohuiya. Senesia huasijke poqui majje bishe ai yasijke nequisohuaquinaje Chipe nasi ai yasijke ebepoquijji. ⁵Majoya oya cuana Sanamina cuiñajji yasijke ba'leñaquinaje Chipe nasi yasijke. Eyacuiñajjiya esohui huohui canananaje Jodio cuana huasijke, Jodioja equi ojee ejjachichaquijji cuanajo nequia. Huani Macosohua oya cuana chacoshua canaje.

⁶Majoya Chipe nasi ojje miji yasijke poquinaje ejiojjije Paposa cuiñajji yasijke. Jomajo Jodio dejja ba canaje Banajesosa bajjani. Oya Eyacuiñajjiya esohui huohuiji nisho, eyamiquecua poanaje oya. Jamajjeya Enimase bajjani acanaje cuaa. ⁷Oya emeshi mese Senio Paono nijje jjapeequinaje. Emeshi mese Senio Paono quea jjashahuabaqui ja'a nee nee, quea huiso nee ojaya eba. Oya Eyacuiñajjiya sohui shajja'ajja sa poanaje. Jamajjeya Benabe Sanoni pea'ai iyaa canaje. ⁸Jamatii eyamiquecua jjamimicuajea nobiajequinaje Sanoni nijje, Benabe nijje pea'ai. Emeshi mese Senio

Paono Eyacuiñajija esohui shajja'ajja mee jjima canaje: —¡A'a shajja'ajjajji Paboja esohui Jesosajo! Dasia cani mi coma —eyamiquecuaa acanaje.

⁹Pea esohuijo Sanonija bajjani Pabo. Edojoshahua Pame onijje nequi tiitiinaje. Jamajjeya Pabohua mete'ama eyamiquecua cojja ba neinei canaje. ¹⁰Jama tecueame acanaje ba'a: —Eyamiquecua, miya ca mi ca oe edosiquianaja bacua. Ojjaña quea pame nee ba'e miquea boti'ama. ¡A'a mimisho'i pojji Jesosajo miya! Ejjadasiaquijji miya de, quea mimishi. Eyacuiñajija esohui quea quehua po mee sa aña tii miyaya —Pabohua acanaje—. ¹¹Jamajjeya jjeyahua nei Eyacuiñajjiya miya cojjama' po mee caje'yo quea huiso cahuime —Pabohua acanaje.

Jjeyahua nei eyamiquecua cojjama' poaje'yo. Quea cojja misi nee nee. Taaanaje jama ba'a: —Cojjama' mo po mee ca'yonaje Jesosaa. ¡Emejo mo che dojocue quiaa! ¡Me pejjejeacue mo oe! —poanaje eyamiquecua.

¹²Ma ba majje emeshi mese Senio Paono quea mete poanaje. Jesosaja esohui shajja'ajja canaje. Jesosa nijje jjapeequi'yonaje, emeshi mese Senio Paono, de.

Pabohua Benabe nijjeya Atioquia huasijke Pisinia meshi yasijke esohui huohuiqui canaje

¹³Majoya Pabo ojaya epeejji cuana nijje bishe ai yasijke nequisohuaqui o'yanaje. Panipinia meshi yasijke besapoquinaje, Pene cuiñajji yasijke. Ba'eñaqui majje Huani Macosohua Pabo, Benabe pea'ai jiña ca'yonaje. Poqui'yonaje Jenosanena huasijke oe nei.

¹⁴Majoya Pabo Benabe nijje poquinaje Atioquia huasijke, pea Atioquia Pisinia meshijo nequi. Epojja ejomishocajjijo Jodioja equi ojee ejjachichaquijji yasijke poquinaje. Dobiqui majje anioquenaje. ¹⁵Jodioja equi ojee ejjachichaquijji mese cuaa Moisesija esohui etehue'yo huohui canaje. Eyacuiñajjiya esohui huohuujjija esohui yahuajo nei etehue'yo huohui canaje pea'ai. Majoya oya cuaa Pabo, Benabe pea'ai huohui'ajja canaje jama ba'a: —Epeejji cuana, e'e pojja'a miquea esohui yani ojjaña quea pame nee eba'e meesahuajji. ¡Jjeyahua nei huohuicue! —acanaje.

¹⁶Jamajjeya Pabohua nequisohua majje eme' jeasohua canaje. Jama acanaje ba'a: —Jodio cuana, Jodio pojjeama cuana pea'ai miquianaya Eyacuiñajjiya esohui shajja'ajjajji poani. ¡Jamajjeya shajja'ajjacue mo! ¹⁷Yahuajo nei Eyacuiñajjiya esejaya etiiquiana babaca ca poa ojaya epeejji epojji. Majoya Ejito meshijo ba'e oya cuana jaahuana ca poa. Quea huiso, quea ca'a pea'ai po mee ca'ya poa. Oya cuana Ejito meshijo ba'e dojocuayaqui ca poa pea meshi yasijke epoqui'yojji. Quea huiso ma dejajja ba jjima aca poa. ¹⁸Meshi jabojo, dejjamajo Eyacuiñajjiya oya cuana jaahuana ca poa quea huiso shequijame, 40 shequijame. Oya cuana quea mimishi, shajjama' poa. Jamatii ojaya oya cuana cajaa ajjima poa. ¹⁹Majoya ohuaya pea emeshi mese cuana me oeje beca huisome, 7 huisome, pea emimi'yo cuana Canaani meshijo ba'e jeabichajea ca'ya poa. E'e, Eyacuiñajjiya ojjaña ma

dejja pea esohuijo mimiani cuana chama'yo tii po mee ca'ya poa quea mimishijojo. Jiquio Canaani meshi Eyacuiñajjiya quia ca poa esejaya etiiquiana cuana ba'ejji.

²⁰Canaani meshijo esejaya etiiquiana cuana ba'ya poa quea huiso nee nee shequijame, 450 shequijame. Majoya Eyacuiñajjiya Jodio dejja huoojeajji pea nequi mee, pea nequi mee aca poquia poa Jodio cuana quea pame nee ba'le mee'yoji. Jamaya poanaje Eyacuiñajjiya esohui huohujiji Samoeni ba'e jjimahuajo. Majoya Samoeni mano'yajo, chama' pea Jodio dejja huoojeajji poa. ²¹Majoya esejaya etiiquiana cuana emeshi mese sa poa. Eyacuiñajji nijje mimi ca poa jama ba'a: “¡Emeshi mese nequi meecue ecuanajaya!” aca poa.

—Jamajjeya aje Eyacuiñajjiya Sisija bacua ejja Sao nequi mee ca poa Jodioja emeshi mese. Saoja etiiquiana Bejami' bajjani poa. Sao quea huiso shequijame nequia poa Jodio cuanaja emeshi mese, 40 shequijame. ²²Majoya emeshi mese Sao quea mimishi po majje mano'ya poa. Majoya Eyacuiñajjiya Dabi emeshi mese po mee ca'ya poa. Dabijo mimia poa jama ba'a:

“Isaija bacua Dabi ecuea eba. Oya quea pame nee nee. Ecuea
ehuohui'yo jayojja jama acani. Ecuea ejjashahuabaqui'yojji jayojja
jama jjashahuabaquiani peal'ai, Dabi”.

Jamaya yahuajo nei nei Dabijo mimia poa.

²³—Dabi Jesosaja etiiquiana poa. Yahuajo Eyacuiñajjiya Jesosajo huohui ca poa jama ba'a:

“Eyaya ojjaña jaahuanajji Quito huoojeaje. Ohuaya Isaeni cuanaja
mimishi cuijea'yo majje ba'e tiitii mee caje'yo eyajo onijke”.

Jamaya huohuime aca poa Eyacuiñajjiya Jesosajo.

²⁴—Jesosa poe jjimahuajo Huaniya ma ona besameejji poaniya ojjaña cuana huohui canaje jama ba'a: “¡Miquea mimishi cuana pajea'youc!
¡Eyacuiñajjiyo oe besacue, enajo!” jamaya Huaniya ojjaña Jodio cuana huohui canaje. ²⁵E'e, Huaniya echaco Eyacuiñajjiyo beshahua nei apoa po majje ohuaya huohui canaje jama ba'a: “¿Achajja miya jjashahuabaquiani? ¿Ae
acuae jja iña? Eya ca jja ca iña Eyacuiñajjiya huoojea'yo ojjaña jaahuanajji
Quito pojjeama. Oya quijje pishana poeje. Oya ca ca oe quea ca'a nee nee,
quea pame nee nee. Eya ca iña quea pame pishana. Jamajjeya aje oe eya
Jesosa Quito cojja nei nequi sa po ajja, quea bicho, de” acanaje Huaniya.

²⁶—Ecuea epeejji cuana, etiiquiana Amajamaja osecua cuana, ¡shajja'ajjacue
mo! ¡Eyacuiñajjiya epeejji cuana Jodio pojjeama cuana, shajja'ajjacue mo peal'ai!
Eyacuiñajjiya jiquio esohui huohui canaje esejaya eshajja'ajjajji jama ba'a:
Eyacuiñajjiya Jesosa huoojea canaje ese jaahuanaa, eseja mimishi cuijea'youhua
peal'ai. ²⁷Jamatii dejja cuana Jenosanenajo ba'ejja, Jodio etii cuanaja peal'ai
ba jjima Jesosa Eyacuiñajjiya huoojea'yo ojjaña jaahuanajji. Oya cuanaa
Eyacuiñajjiya esohui huohujijiya esohui shajja'ajja canaje ojjaña ejomishocajji
pojjajo; ma esohui Jodio cuanaja quea quehua. Jamatii Jesosa quecua ca'yonaje;
ma esohui yahuajo nei nei etehue'yo jayojja jama acanaje Jodio cuaa. ²⁸Jesosa
mimishi'ama nei nei ba canaje Jodio cuaa. Jamajjeya ¿yajjajo shai quecua mee

ca'yonaje oya? Jamatii oya cuaa emeshi mese Pinato jama acanaje ba'a: “¡Jesosa acui ecueata'apeejo ba'lehuanasohuajeacue emano'yojji!” taaa neineime ponaje.

²⁹—Ojjaña Eyacuiñajjiya esohui yahuajo nei nei etehue'yo jayojja jama aca poa Jesosa, Jodio etii cuaa. Majoya Jesosa acui ecueata'apeejo ba'e jjequioque'yo majje ojaya epeejji cuaa oya mei jjani ai yasijje huananobiaqui canaje. ³⁰Jamatii Eyacuiñajjiya oya shequi mee ca o'oyanaje. ³¹Mano'yo jjimahua Jesosa Janinea meshijo nequi Jenosanena huasijje poquinaje oja epeejji cuana nijje. Quijje shequi o'oya majje Jesosa oja epeejji cuana nijje jjapeequi o'oyanaje quea huiso cahuime. Ojaya epeejji cuana jjeyahua nei Jesosajo mimiani. Ojjaña Jodio cuana huohui cani jama ba'a: “Jesosa shequi o'oyanaje” acani. ³²Jjeyahua nei ecuanaa Eyacuiñajjiya esohui quea pame nee miquiana huasijje huohuije jama ba'a: ³³Esejaya etiiquiana nijje Eyacuiñajji yahuajo nei mimia poa. Eseyá ma etiiquianaja osecuaya. Jamajjeya Eyacuiñajjiya esohui esejaya etiiquiana huasijje jayojja jama jjeyahua nei ohuaya acani esejo. Ojaya esohui jayojja jama ohuaya Jesosa shequi mee ca o'oyanaje. Yahuajo nei nei Dabiya Eyacuiñajjiya esohui Jesosajo tehue ca poa jama ba'a: “Miya ecue Bacua Ejja. Maya eyaya ojjaña ba mee aña” jamaya yahuajo nei nei Dabiya Eyacuiñajjiya esohui Jesosajo tehue ca poa esohuicuayajjijo, Salmojo —Pabohua acanaje.

³⁴—Eyacuiñajjiya Jesosa shequi mee ca o'oyanaje emano beca'yojji pojjeama, e'iuhui'yojji pojjeama. Eyacuiñajjiya yahuajo nei jama aca poa Jesosa ba'a:

“Ecuea esohui quea pame nee Dabi nijje jayojja jama eyaya miya aje'yo. E'e, eyaya miya quea pame nee nee aje'yo”.

³⁵Pea esohui cuayajjijo Dabiya tehue ca poa jama ba'a:

“Miyaya eya, mique Bacua Ejja oe nei quea pame nee jaahuanañajo, eya e'iuhui'yojji pojjeama tii tii poaje'yo”.

Jamaya yahuajo nei Eyacuiñajjiya tehue mee ca poa Jesosajo.

³⁶—Yahuajo Eyacuiñajjiya esejaya etiiquiana Dabi emeshi mese po mee ca poa. Jamatii dejja tii majje Dabi mano'ya poa. Oya etiiquiana nijje emano'yo jaa. Oya ihui'ya poa peal'ai. ³⁷Jesosa Quito ca ca ihui'yo jjima poanaje. Eyacuiñajjiya oya emano'yo jaa shequi mee ca o'oyanaje. ³⁸Ecuea epeejji cuana, eyaya miquianaya huohuaña Jesosajo. Oya Jesosa eshe o'oya. Jamajjeya ohuaya mimishi cuana pajea meesahua caje'yo miquianajaya. Mimishi cuijea caje'yo peal'ai. ³⁹Moisesija etehue'yo jayojja jama añajo pojjeama mimishi cuana cuijea ca'yani Eyacuiñajjiya. Jesosa eshe o'oya, de. Onije jjapeequianijo ca ca oe ohuaya miquianaya mimishi cuana cuijea ca'yani. Majoya Eyacuiñajjiya miquianaya ba cani emimishi cuijea'yo. ⁴⁰¡Jamajjeya Eyacuiñajjiya esohui ba neineicu! miya ojaya etecuea'yojji pojjeama. E'e, yahuajo nei Eyacuiñajjiya esohui tehue mee ca poa jama ba'a:

⁴¹ “¡Shajja'ajjacue mo! Eya miquianaaya niñebaña. ¡Quea mete pocue! Eyaya miya chama'yo tii po meeje'yo. Eyaya ma dejja ajjima acani aje'yo miquianajaya ebajji. Jamatii ba majje miquianaya jjashahuabaqui ajja. Onaa huohui cajo, miquianajaya shajja'ajja jjima poaje”.

Jamaya yahuajo nei Eyacuiñajji poa —jamaya Pabohua esohui huohui canaje Atioquiajo, Jodioja equi ojee ejjachichaquijjijo.

⁴²Majoya esohui huohui majje Pabo, Benabe nijje esecue yasijje cuayaquinaje. Majoya beca cuana onijje miminaje jama ba'a: —Pabo, miquea esohui ecuana shajja'ajja sa o'oya poani. ¡Pea ejomishocajji pojjajo poe o'oyacue miquianaya!

⁴³Jodioja equi ojee ejjachichaquijjijo nequi esecue yasijje cuayaqui majje quea huiso Jodio cuana, Jodio pojjeama cuana ma Jodioja esohui jayojja jama Eyacuiñajji bihua cani pea'ai Pabo nijje jjapeequinaje, Benabe nijje pea'ai. Jamajjeya Pabo, Benabe pea'ai ona nijje jama poanaje ba'a: —¡Jesosa nijje jjapee neineiquicue! ¡Eyacuiñajjiya esohui a'a pajea'yoji pe'a'i! Ohuaya miya jaahuana tiitii cani.

⁴⁴Majoya pea epojja ejomishocajjiyo beshahua nei ojjaña cuana ma cuiñajjijo ba'eca jjachichaquinaje Eyacuiñajjiya esohui shajja'ajja, Emeshi Mese neija esohui. ⁴⁵E'e, quea huiso nee nee poeyanaje Paboa esohui shajja'ajja. Ma ba majje Jodio etii cuana quea quene poanaje. Jamajjeya Pabohua esohui huohui canijo mimicuiajeanobiajea canaje cuaa Pabo. Oya cuana Jesosajo mimisho'i poanaje pea'ai. ⁴⁶Jamajjeya Pabohua, Benabeya pea'ai mete'ama Jodio etii cuana tecuea canaje jama ba'a: —¡Bacue! Eyacuiñajjiya ecuana huoojea canaje Jodio cuana huasijje ebionei Jesosaja esohui huohui coohua, eba'e tiitii mee'yoji onijje. Miquianaya ca ca oe jjashajja'ajjaqui sa po ajja. Shajja'ajja sa po'yo ajjajo cuaqui yasijje poquije'yo, eyahuasijje eba'e tiitii'yoji pojjeama, miquianaya. Jamajjeya ecuana poquije Jodio pojjeama cuana sohuihuohuiya.

⁴⁷E'e, Emeshi Mese neija, Eyacuiñajjiya ecuana huohui canaje jama ba'a:

“Eyaya miya huoojeaje Jodio pojjeama cuana huasijje. ¡Ecuea esohui quea ja'a nee ba meecue! ¡Ojjaña cuana ojjaña meshijo ba'eca cuana enijje jjapeequi meesahuacue! Eyaya ojjañaja mimishi cuana cuijeaje'yo, enijje eyajo eba'e'yoji”.

Jamaya yahuajo Eyacuiñajji ecuana nijje poanaje —Pabohua acanaje.

⁴⁸Paboa esohui shajja'ajja majje Jodio pojjeama cuana quea bihui nee nee poanaje. Oya cuaa Eyacuiñajji bihua canaje ojaya esohui quea pame nee Jesosajo ba mee canajejojo. Ojjaña joya Eyacuiñajjiya babaca canaje onijje eba'e tiitii'yoji Jesosa nijje jjapeequi'yonaje, coya oja babaca'yo huiso tiiya.

⁴⁹Majoya ojjaña Atioquia chipi neijo ba'eya Jesosaja esohui shajja'ajja canaje. ⁵⁰Jamatii Jodio etii cuaa epona cuana quea quene po mee canaje Pabo nijje. Ma epona cuanaja yahuajo nei Eyacuiñajji quea jea nee poanaje. Oya cuana Jodio etii cuanaja Atioquiajo ba'e cuanaja ehuanase cuana poanaje. Jodio etii cuaa jama acanaje ba'a: —¡A'shajja'ajjaji Jesosaja esohui!

Jodio etii cuaa ojjaña quea quene nee nee po mee ca'yonaje Pabo nijje, Benabe nijje pea'ai. Iña majje oya cuaa Pabo Benabe pea'ai huoojea ca'yonaje. ⁵¹Majoya Pabohua Benabeya pea'ai ma shajjama' cuana tecueajea majje jiñajea ca'yonaje. Ojjaña ma cuiñajjijo ba'e ba mee canaje

oya cuana shajjama' poanaje, quea mimishi. Majoya Pabo Benabe nijje poquinaje ejiojjije pea cuiñajji yasijje, Iconio huasijje.

⁵²Edojjoshahua Pame o que dobiiqui'yajo, ojjaña Jesosaja epeejji Atioquiajo ba'eca cuana quea bihui nee nee poanaje.

Iconio huasijje esohui huohui canaje Pabohua, Benabeya pea'ai

14 ¹Majoya Pabo, Benabe nijje Iconio huasijje ba'eñaquinaje. Atioquiajo acanaje jayojja jama aca o'oyanaje Iconiojo pealai. E'e, Jodioja equi ojee ejjachichaquijji yasijje dobiquinaje. Eyacuiñajji esohui quea pame nee Jesosajo huohui canaje quea ja'a nee. Jamajjeya quea huiso Jodio cuana, Jodio pojjeama pea'ai Jesosa nijje jjapeequinaje. ²Jamatii beca Jodio cuana shajja'ajja sa po'yo ajja poanaje. Maaya Jodio pojjeama cuana jama acanaje ba'a: —¡A'a jjapeequijji Jesosaja epeejji cuana nijje! ¡A'a Jesosaja esohui shajja'ajjajji! —jama niñebameya acanaje Pabo cuaa.

Jamajjeya quea huiso cuana Jesosaja epeejji cuana nijje jjapeequi'yo ajja poanaje. ³Jamatii Pabo, Benabe nijje quea cahui huiso Iconiojo nequinaje. Mete'amaa Jesosajo huohui majamaja canaje, Emeshi Mese neijo jama ba'a: —Emeshi Mese neiya Jesosaa eseya quea jea nee acani, eseya jaahuana cani pea'ai —poanaje.

Jesosaa Pabo, Benabe pea'ai ma dejjaajjima acani ameesahua canaje. Ma ba majjeya ojjañaa ba canaje Paboja esohui Jesosajo e'e nei, Benabeja pea'ai. ⁴Jamajjeya Iconiojo quea huiso cuana shajja'ajja sa poanaje Jesosaja huoojea'yo cuanaja esohui. Pea cuana ca ca Jodioja esohui jayojja jama a sa poanaje. Shajja'ajja sa po'yo ajja poanaje Jesosaja esohui.

⁵Majoya beca Jodio pojjeama Jodio cuana nijje, ojaya emeshi mese cuana nijje jjachichaqui majje mimimiminaje. Jama poanaje ba'a: —¡Cua'l! ¡Pabo, Benabe pea'ai ejjacuiaequeiqui, ejjasapa jajahuejjajequeiqui oe meiya! —poanaje.

⁶⁻⁷ Jamatii Pabohua, Benabeya pea'ai maya shajja'ajja canaje. Shajja'ajja majje quehua poquinaje Nicaonia meshi yasijje. Debe cuiñajji yasijje, Nisata cuiñajji yasijje pea'ai esohui quea pame nee Jesosajo huohui capoquinaje ba'e chejje cuana huasijje, cuiñajji sisi cuana huasijje pea'ai.

Nisatajo Pabo iña canaje cuaa

⁸Nisata cuiñajji dejja jiojjijajja ba'e'yonaje, jeo ajja. Oya jamatii cuaya, jiojjijajja tii. ⁹Pabohua esohui huohui canijo, jiojjijajja shajja'ajja neinei ca'aninaje. Majoya Pabohua jiojjijajja ba neinei canaje. Jjashahuabaquinaje jama ba'a: —Jiojjijajja Jesosajo quea pame jjashahuabaquiani jama ba'a: "Jesosaa eya jeo mee caje'yo". Jamajjeya eyaya oya jjajiojji jeapiihuiqui meeje'yo —Pabo poanaje.

¹⁰Jamajjeya Pabohua oya jama acanaje ba'a: —Jiojjijajja, ¡nequisohuacue! ¡Jeocue! —acanaje.

Jiojjijajja nequisohua cuajinaje. Jeojeonaje. E'e, jiojjijajja jjajiojji jeapiihuiquinaje. ¹¹ Ma ba majjeya quea huiso cuaa Pabo bihuia canaje. Onajaya emimijo, Nicaoniaja esohuijo jama poanaje ba'a: —E'e de. ¡Bacue Pabo, Benabe pea'ai! Eyacuiñajji cuana ecuana que jaaoque'yonaje dejja jayojja, de —acanaje. Pabo, Benabe pea'ai eyacuiñajji poso acanaje cuaa.

¹² Jamajjeya Benabe eyacuiñajji nisho bajjani acanaje Jopite bajjani. Pabo mimi huicha'a huicha'anijo, oya pea eyacuiñajji nisho bajjani acanaje Meconio bajjani. ¹³ Epana'yo huohujji, epana'yo jaahuanajji ma epana'yo Jopite nequijji equijo nequinaje Nisata pejjejo. Ohuaya ana'ai yahue cuana, eshasha quea huiso cuana pea'ai jjequi canaje cuiñajji esecue yasijke, Pabo que. Ohuaya pea cuana nijjeya ana'ai cuana, eshasha cuana pea'ai dahuajea sa acanaje Pabo bihuiajji, Benabe pea'ai bihuiajji; eyacuiñajji poso bihuia sa acanaje.

¹⁴ Benabe, Pabo pea'ai ma ba majje quea mete poanaje. Poquicuajinaje dejja cuana jjachichaquiani yasijke. ¹⁵ Jama taaaame poanaje ba'a: —¿Apiojji acuaea miqianaaya jama aña so'o? Ecuana aje dejja cuana miqiana jayojjaya. ¡A'a ecuana bihuiajji! Ecuanaa esohui quea pame Jesosajo huohuaña. Jamajjeya ¡a'a eyacuiñajji nisho cuana bihuia majajji! ¡Pajea'yocue! Eyacuiñajji oe nei e'e jojo nei eshe tii nequi. ¡Oya oe nei bihuiacue! Ohuaya eyatahuatahua pana ca'ya poa. Meshi cuana, bae cuana pea'ai pana ca'ya poa. Ojjaña aquiana meshijo, eyajo, enajo pea'ai pana ca'ya poa ohuaya, Eyacuiñajjiya. ¹⁶ Yahuajo nei nei ojjaña cuaa ojjaña meshijo ba'eya quea mimishi nee aca poa. Jamatii Eyacuiñajjiya oya cuana mimishi cuana pajea mee'yo jjima poa. ¹⁷ Jamatii Eyacuiñajjiya yahuajo ojjaña cuana quea pame aca poa. Ojjaña ba mee ca poa oya eshe nequi. Jjeya ohuaya miqianaya quea pame nee acani pea'ai. Nayaja po mee ca'yani, eshequija po mee ca'yani, bobo tii mee ca'yani pea'ai. Jamaya ohuaya miqianaya quea bihui nee ba'e meesahua cani pea'ai —Pabohua acanaje.

¹⁸ Jamaya Pabohua, Benabeya pea'ai huohui canaje. Jamatii ma dejja cuaa beshahua nei oya bihuia canaje. Ana'ai beshahua nei dahuajea canaje o bihuiajji. Dahuajea jjima; beshahua nei, de.

¹⁹ Majoya Jodio cuana Atioquiajo ba'e, Iconiojo ba'e pea'ai poeyanaje Nisata huasijke. Oya cuaa Nisata dejja cuana siajje acanaje Pabojo. Siajje acajje quea quene nee nee poanaje Pabo nijje. Majoya oya cuaa Pabo iña canaje; sapa jaja canaje meiya, dojocuayaqui canaje cuiñajji esecue yasijke. Pabo emano'yo poso jeajea canaje cuaa jomajo tii. ²⁰ Jamatii quijje pishana Jesosaja epeejji cuana poeyanaje Pabo baa. Ojjaña o que jjachichaquiajo, Pabo shequi'yonaje. Shequi'yo majje huacuaya Nisata huasijke poe o'oyanaje. Majoya mecajjeahua nei oya Benabe nijje poquinaje pea cuiñajji yasijke, Debe yasijke.

Pabo, Benabe nijje huacuaya poqui o'oyanaje, Atioquia huasijke

²¹ Debe yasijke poqui majje Pabohua, Benabeya pea'ai Eyacuiñajiji esohui quea pame nee Jesosajo huohui cañaquinaje. Quea huiso cuaa shajja'ajja canaje. Jesosa nijje jjapeequinaje. Majoya, Pabo Benabe nijje huacuaya poqui o'oyanaje Nisata huasijke. Iconio huasijke pea'ai poqui o'oyanaje. Majoya Pisinia meshi yasijke Atioquia huasijke poqui o'oyanaje ojjaña Jesosaja epeejji eyacua cuana baa. ²²E'e, Pabohua, Benabeya pea'ai Jesosaja epeejji cuana ma cuiñajji cuanajo ba'eca cuana esohui huohui ca o'oyanaje jama ba'a: —¡Jesosa nijje jjapee neineiquicue! ¡A'a oya pajea'yojji! Eyajo Eyacuiñajji ojjaña huoojeajji poani. Eseya onijje ba'e tiitii sa poanijo, onaaya, mimishi cuaa eseya napa caje quea huiso. Quea camaja esejo poaje. Quea nee poaje pea'ai —Pabohua acanaje.

²³ Majoya Pabohua, Benabeya pea'ai ma cuiñajji cuanajo Jesosaja epeejji quea pame babaca canaje Jesosaja epeejji cuana jaahuanajji epojji. Majoya ijjal'ijjia jjima nequi Eyacuiñajji nijje mimi majamajanaje Jesosaja epeejji jaahuanajji cuanajo jama ba'a: —Emeshi Mese nei Jesosa, miya quea pame nee nee. Jiquio dejja cuana miquea epeejji nei cuana ecuanaaya babacanaje miquea epeejji cuana jaahuanajji epojji. Jamajjeya joya cuana miquea epeejji cuana jaahuanameesahuacue quea pame nee! —poanaje.

²⁴ Jamajjeya Pabohua, Benabeya pea'ai Pisinia meshijo esohui huohuinana o'oya majje Panipinia meshi yasijke poqui o'oyanaje. ²⁵ Majoya Eyacuiñajiji esohui quea pame nee Jesosajo huohui canana o'oyanaje Pene cuiñajji yasijke. Majoya oya cuana poquinaje Atania cuiñajji yasijke. ²⁶ Jomajo Ataniajo bishe ai yasijke nequisohuaquinaje. Besapoqui o'oyanaje Atioquia huasijke. Jomajo yahuajo pishana Jesosaja epeejji cuana Eyacuiñajji nijje mimi majje oya cuana huoojea canaje esohui huohuiya. Eyacuiñajji nijje miminaje pea'ai o jaahuanajji, esohui quea pame Jesosajo huohui canijo.

²⁷ Jamajjeya Atioquia huasijke poe'yo majje Pabohua, Benabeya pea'ai ojjaña Jesosaja epeejji cuana iyaa canaje. Jjachichaqui'yajo Pabohua, Benabeya pea'ai quio o poquinaje huohui canaje. Majoya jama acanaje ba'a: —Ojaya esohui quea pame nee Jesosajo huohuinanañajo, Eyacuiñajjiya ecuana quea pame nee acanaje. Eyacuiñajjiya quea huiso Jedio pojjeama cuana oja sohui ba meesahua canaje pea'ai —jamaya acanaje Pabohua, Benabeya pea'ai.

²⁸ Oya cuana Atioquiajo nequi'yonaje Jesosaja epeejji cuana nijje quea huiso cahuime.

Jesosaja epeejji cuana ojee miminaje Jenosanenajo

15 ¹ Majoya beca dejja cuana poeyanaje Atioquia huasijke. Oya cuana Jedio dejja, Jodea meshijo ba'e. Jamajjeya poe majje ohuaya Jesosa Quitoja epeejji cuana jama sohuihuohuime acanaje ba'a: —¡Etiiquiana Moisesija

esohui etehue'yo jayojja jama acue! ¡Cuiishasha biso nei jehuisejjajeacue!

Jamaya ajjimajo Eyacuiñajjiya miya emimishi cuijea'yojji pojjeama —acanaje.

²Shajja'ajja majje Pabo, Benabe pea'ai jjamimicuajea nobiajeaqueinaje janobajjiima nei, ma Jodio dejja cuana nijje quea huiso miminaje pea'ai. Majoya Jesosaja epeejji cuaa jama acanaje ba'a: —Benabe, Pabo, pea Jesosaja epeejji cuana nijje capoquiahua Jenosanena huasijke. Jomajo Jesosaja huoojea'yo cuana nijje, Jesosaja epeejji etii cuana nijje pea'ai camimiahua Moisesija etehue'yojo, Jesosaja esohuijo pea'ai —poanaje.

³Majoya Jesosaja epeejji cuaa Atioquiajo ba'eya oya cuana huoojea canaje. Jenosanena huasijke poquijeya oya cuana Penisia meshijo, Samania meshijo pea'ai cuiñajji cuana yejje ca poquipoquinaje. Jesosaja epeejji cuana sohuihuohui capoquinaje jama ba'a: —Jodio pojjeama quea huiso cuana Jesosa nijje jjapeequiani —poanaje.

Ma esohui shajja'ajja majje ojjaña Jesosaja epeejji cuana quea bihui nee nee poanaje.

⁴Majoya oya cuana Jenosanena huasijke poe'yonaje. Jomajo ojjaña Jesosaja huoojea'yo cuana, Jesosaja epeejji etii cuana pea'ai quea bihui nee miminaje Pabo nijje, Benabe nijje pea'ai. Majoya Pabohua, Benabeya pea'ai huohui canaje ojjaña Eyacuiñajjiya oya cuana ameesahua canaje Jodio pojjeama cuanajo, pea meshi cuana huasijke.

⁵Jamatii beca Paniseo cuana ma Moisesija etehue'yo jaahuanajji poani nequisohua majje jama poanaje ba'a: —Chojja. ¡Jodio pojjeama cuana Jesosa nijje jjapeequi majje cuiishasha biso nei cajehuisejjajea cahua! Ojjaña Moisesija etehue'yo cuana jayojja jama ca'a cahua pea'ai —poanaje Paniseo cuana, Jesosaja epeejji cuana.

⁶Jamajjeya Jesosaja huoojea'yo, Jesosaja epeejji etii cuana pea'ai jjachichaquinaje Paniseoja esohuijo mimiya. ⁷Ma esohuijo quea huiso mimimiminaje. Ojjaña cuana mimi'yajo, Penohua nequisohua majje ojjaña jama acanaje ba'a: —Epeejji cuana, yahuajo Eyacuiñajjiya eya huoojea canaje esohui quea pame nee Jesosajo huohuiya Jodio pojjeama cuana huasijke. Shajja'ajja cajo, Eyacuiñajjiya oya cuana Jesosa nijje jjapeequi meesahua canaje. Edojoshahua Pame huoojea canaje ona huasijke dobiquiya. Jamaya miquianajaya eba.

⁸Eyacuiñajjiya eba ojjaña ejashahuabaquijji. Ohuaya Jodio pojjeama cuana quea pame nee acanaje. E'e, yahuajo Eyacuiñajjiya eseya, Jodio cuana, quea pame aca poa jayojja jama jjeya ohuaya oya cuana acanaje pea'ai. E'e, Jodio pojjeama cuana que pea'ai ohuaya Edojoshahua Pame huoojea canaje ona huasijke dobiquiya. ⁹E'e, Eyacuiñajji jjashahuabaquinaje jama ba'a: “Jodio pojjeama cuana Jodio cuana jayojjaya” poanaje. Jamajjeya Jesosa nijje jjapeequianijo, ohuaya Jodio pojjeama cuanaja mimishi cuana cuijea ca'yonaje pea'ai. ¹⁰¿Yajjajo acuae mi Eyacuiñajji jayojja jjashahuabaquime mi poani so'o? Miquianaaya jama aña ba'a: “Jesosaja epeejji cuaa Moisesija etehue'yo jayojja jama ca'a cahua”. Chojja, quea camaja ca coma, de. Esejaya etiiquiana cuanaja, esejaya pea'ai Moisesija

esohui etehue'yo cuana jayojja jama a'yo jjima poanaje. Quea camaja.¹¹ ¡Chojja! Eseyaya ca ca Jesosaja esohui jayojja jama aña. Jamajjeya Emeshi Mese neiya Jesosaa eseya quea jea nee acani. Onijje jjapeequianijo, esejaya mimishi cuana cuijea'yo majje onijje ba'e tiitii mee caje'yo eyajo. Oya jayojjaya ohuaya acani Jodio pojjeama cuanajo, Jesosa nijje jjapeequianijo pe'a'i —Penohua acanaje.

¹²Peno mimi'yajo ojjaña cuana mimi'yо ајја poanaje. Shajja'ajja canaje. Majoya Pabohua, Benabeya pe'a'i huohui canaje jama ba'a: —Jodio pojjeama huasijke ojaya esohui huohuiqui'yajo, Eyacuiñajjiya ecuana ma dejja ajjima acani ameesahua canaje quea huiso —acanaje. Majoya Pabohua, Benabeya pe'a'i huohui canaje quea huiso.

¹³Majoya Pabo, Benabe pe'a'i mimi pajea'yajo Satiaco jama poanaje ba'a: —Epeejji cuana, ¡shajja'ajjacue mo! ¹⁴Penohua jjeyahua nei eseya huohui canaje Eyacuiñajjiya Jodio pojjeama cuana quea jea nee acanaje pe'a'i. Jamajjeya oya cuana Jesosa nijje jjapeequi meesahua ca'yonaje. Jamaya poanaje Peno. ¹⁵E'e, jamaya Eyacuiñajjiya esohui huohuijjiya yahuajo nei nei huohui ca poa pe'a'i. Jama tehueme aca poa ba'a:

¹⁶“Quijje eyaya Dabija osecua Emeshi Mese nei po meeje'yo. Equi e bihuiajji epajea'yo poa. Poe majje eyaya oya cuana bihui meesahua je o'oya. ¹⁷Jamajjeya pea cuana, Jodio pojjeama cuana, ojjaña meshijo ba'eca enijje jjapeequi sa poaje. Eya ojjaña Emeshi Mese nei quea tame nee poaje'yo. ¹⁸Jamaya Emeshi Mese nei quea tame nee yahuajo nei. Ma esohui yahuajo ohuaya pea cuana ba meesahua ca poa”.

Jamaya yahuajo nei Eyacuiñajjiya esohui poa.

¹⁹—Jamajjeya eya jjashahuabauquiani jama ba'a: Jodio pojjeama cuana Jesosa nijje jjapeequianijo ja'a Moisesija etehue'yo jayojja jama ameejji! Chojja, maya quea camaja nee nee. ²⁰Jamajjeya Jodio pojjeama cuana huasijke esohui tehuecue jama ba'a: “Jesosaja epeejji cuana, ¡noe eyacuiñajji nisho bihuijji onaja dahua a'a ijjiajji! ¡A'a pea cojjojji pojji pe'a'i! ¡Noe na' cuaya meeque jjima a'a ijjiajji! ¡Ijjiacajji na' a'a ishiji! Jamaya miquiaa ajo Jodio cuana miquiana nijje quea quene nee nee poaje”. ¡Jamaya tehuecue Jesosaja epeejji eyacuaja ebajji! —Satiacohua acanaje—. ²¹E'e ojjaña cuiñajji Jodio dejja cuanaja esohui huohuijji cuaa Moisesija etehue'yo huohui cani Jodioja equi ejjachichaquijji. Yahuajo nei huohui ca poa. Jjeya nei huohui cani pea'ai ojjaña epojja ejomishocajji. Jamajjeya ja'a Moisesija etehue'yo jayojja jama ameejji! —acanaje Satiacohua.

Jesosaja epeejji etii cuaa esohui tehue canaje Jodio pojjeama cuanaja ebajji, Jesosaja epeejji eyacua cuanaja

²²Majoya Jesosaja huoojea'yo cuaa, esohui huohuijji cuaa, Jesosaja epeejji etii cuaa, ojjaña Jesosaja epeejji cuana jomajo nequiyu pe'a'i Pabo nijje, Benabe nijje huoojea sa acanaje becamejiji pe'a'i epeejji cuana Atioquia huasijke.

Jamajjeya huoojea canaje Basabaja bacua ejja Joda. Onije huoojea canaje pea dejja Sinasi bajjani. Oya cuana Jesosaja epeejji cuanaja huoojea'yo poanaje, quea pame nee nee. ²³Sinasi nijje, Joda nijje pea'ai esohui etehue'yo huoojea canaje Jesosaja epeejji cuanaja ebajji. Ma esohui etehue'yo jama poanaje ba'a:

[“]Epeejji cuana Atioquiajo ba'e, Sinia meshijo ba'e, Sinisia meshijo ba'e pea'ai, ecuaaya, Jesosaja huoojea'yo cuaa esohui huohuijji, Jesosaja epeejji etii cuaa pea'ai jiquio esohui etehue'yo huoojeaña miquiana huasijke, Jesosaja epeejji cuana Jodio pojjeama cuana huasijke. E'e, ecuaaya queabihui nee tehuena miquiana huasijke. ²⁴¿Achajja a quiana ani, ecuanaja epeejji cuana? ¡Bacue! Miquiana huasijke beca dejja jiquio nequi tii cuaa Moisesija esohui huohui canaje. Moisesija esohui jayojja jama miquianaya ba'e meemee ajja. Quea camaja, de. Jamajjeya miquianaya quea yeno poanaje. Ecuanaja ma dejja cuana huoojea jjima miquiana que esohui huohuiya. ¡A'a shajja'ajjajji cuana!

²⁵Miquianaya quea yeno poanaje. Jamajjeya ecuaaya jiquio tii quea huiso nee ojee jjashahuabaqui majje jama poanaje ba'a: Ecuaaya miquiana que pea dejja cuana huoojeaña Benabe nijje, Pabo nijje pea'ai. E'e, Pabo, Benabe pea'ai ecuanaja epeejji cuana.

²⁶Oya cuana Emeshi Mese nei Jesosa Quitojo chacochaonaje mete'ama. Onaaya oya cuana beshahua nei jajahuejjajea ca'yonaje, Jesosa nijje jjapeequianijojo. ²⁷Jamajjeya ecuaaya dejja quea pame becanejjiji pea'ai huoojeaña miquiana que, Joda, Sinasi pea'ai. Oya cuaa ecuanaja etehue'yo huohui caje'yo miquianaja eshajja'ajjajji. ²⁸E'e, Edojjoshahua Pameya ecuaaya jjashahuabaqui mee cani jama ba'a: Ecuaaya miquianaya huohui ajja Moisesija esohui etehue'yo jayojja jama yajji. Chojja, jamaya miquianaaya ameemee ajja. Quea camaja. Jiquio jama acue miquianaaya ba'a: ²⁹¡Noe ma eyacuuiñajji nisho bihuijji onaja dahua a'a ijijajji! ¡A'a pea cojjoji pojji! ¡Noe na' cuaya meeque jjima a'a ijijajji! ¡Ijjiacajji na' a'a ishijji pea'ai! Jamaya miquiaa ajo Jodio cuana miquiana nijje quea quene nee nee poaje. Mahuiso ecuanaja esohui etehue'yo miquiana que. Jamajjeya jamaya añajo miquianaya quea pame nee ba'eje. Apoa.”

Jamaya Jesosaja huoojea'yo esohui huohuijji cuaa, Jesosaja epeejji etii cuaa pea'ai tehue canaje Jesosaja epeejji eyacua cuanaja ebajji.

³⁰Jamajjeya Pabo, Benabe nijje, becanejjiji pea'ai dejja nijje poqui o'yanaje Atioquia huasijke. Jomajo nequiñaqui majje ojjaña Jesosaja epeejji iyaa canaje. Ojee jjachichaqui'yajo, etehue'yo ba mee canaje. ³¹Ma esohui etehue'yo ba majje ojjaña Jesosaja epeejji eyacua cuana quea bihui nee nee poanaje.

³²Joda, Sinasi pea'ai Jesosaja esohui huohuijji poanaje. Jamajjeya oya cuaa Jesosaja epeejji cuana sohuihuohui canaje quea huiso nee. Quea huiso Jesosa nijje jjapeequi meesahua canaje quea ja'a nee. ³³Quea cahui huiso Atioquiajo esohui huohui canaje. Majoya Jesosaja epeejji cuaa Atioquiajo ba'eya oya cuana huoojea ca'yonaje Jenosanena huasijke, Jesosaja huoojea'yo esohui huohuijji

cuana huasijke. Quea bei nee poqui'yonaje.³⁴ Sinasi ca ca nequinaje Atioquiajо tii. Poqui sa po'yo ajja poanaje.³⁵ Pabo, Benabe pea'ai Atioquiajо nequinaje. Quea huiso pea cuana nijjeya Emeshi Mese nei Jesosaja esohui huohui tiitii canaje. Ojjaña Jesosaja epeejji eyacua cuana esohui ba neinei meesahua canaje.

Pabo Benabe nijje poqui pajea'yonaje

³⁶ Majoya Pabo Benabe nijje jama poanaje ba'a: —Cua'a, Jesosaja epeejji cuana ojjaña cuiñajji yasijke ejjabaquiqui o'oya, ma yahuajo eseaya Jesosaja esohui huohuiquinaje yasijke. E'e pojja'a esejaya esohui pajea ca'yonaje. E'e pojja'a pajea'yo jjima; ba'ajja —poanaje Pabo.

³⁷ —E'e —poanaje Benabe—. Jamaya quea pame. Huani Macoso ese nijje ejjadojoqui pea'ai, ma yahuajo ese nijje poqui'ajjanaje.

³⁸ —Chojja —acanaje Pabohua—. Yahuajo Panipinia meshijo Huani Macosohua eseaya jiña ca'yonaje. Chacochaco jjima ese nijje. Huacuaya poqui'yonaje Jenosanena huasijke. Eya o dojo sa po'yo ajja.

³⁹ Jamajjeya Pabo, Benabe nijje jjamimicuiajea nobiajeaquinaje. Ojee poqui pajeanaje. Majoya Benabe besapoquinaje Chipe nasi ai yasijke. Huani Macoso dojo canaje onijje echacojjи. ⁴⁰ Pabohua ca ca Sinasi babaca canaje onijje epoquijji Jesosaja esohui huohuisahuajji. Jamajjeya Jesosaja epeejji cuana ojee Eyacuiñajji nijje miminaje Paboo, Sinasio pea'ai jama ba'a: —Eyacuiñajji, ¡Pabo, Sinasi pea'ai poqui meesahuacue miquea esohui huohuiya! ¡Oya cuana jaahuanacue! —poanaje.

⁴¹ Majoya Pabo Sinasi nijje poqui o'yanaje Sinia meshi yasijke, Sinisia meshi yasijke pea'ai. Jesosaja esohui huohui capoqui o'yanaje. Ojjaña Jesosaja epeejji cuana Jesosa nijje jjapeequi meesahua canaje quea ja'a nee.

Timoteo poquinaje Pabo nijje, Sinasi pea'a nijje

16 ¹ Majoya Pabo Sinasi nijje poqui o'yanaje Debe yasijke, Nisata huasijke pea'ai. Jomajo ohuaya Jesosaja epeejji shacuima' nequi ba canaje Timoteo bajjani. Timoteoja enaese Jodio pona poanaje, Jesosaja epeejji pea'ai. Ojaya ejeajji ca ca Jieno dejja poanaje. ² Ojjaña Jesosaja epeejji cuaa Nisatajo ba'eya, Iconiojo ba'eya pea'ai Timoteojo quea bihui nee huohui canaje jama ba'a: —Timoteo quea pame nee, Jesosaja epeejji quea ca'a nee oya, de —poanaje.

³ Jamajjeya Pabohua Timoteo dojo sa acanaje onijje esohui huohuiya. Quea huiso Jodio cuana ma meshijo ba'enaje; ojjaña eba Timoteoja ejeajji Jodio pojjeama, Jieno dejja. Jamajjeya ebacua ejja Timoteo Jieno cuana jayojja jama tii'yonaje; Moisesija etehue'yo jayojja jama cuiishasha biso nei jehuisejjajea jjima poanaje. Jamajjeya Jodio cuana tecue'ama onijje epoiji Pabohua Timoteo cuiishasha biso nei jehuisejjajea mee canaje.

⁴ Majoya oya cuana poquinaje ojjaña cuiñajji cuana huasijke. Ojjaña Jesosaja epeejji cuana huohui capoquinaje esohui etehue'yo ma Jesosaja huoojea'yo

esohui huohuijji cuua, Jesosaja epeejji etii cuua Jenosanenajo tehue canaje. Ojjaña ma etehue'yo ba mee canaje: —E'e, ¡ma etehue'yo jayojja jama acue miquianaaya! —acanaje Pabohua, Sinasiya pe'a'i. ⁵Jamajjeya Jesosaja epeejji cuana Jesosaja esohui jayojja jama ba'e meesahua canaje. Yahuajo oya cuana quea ja'a pishana ba'enaje. Jjeyahua nei ca ca Jesosaja epeejji quea ja'a nee ba'enaje Jesosajo. Quea huiso cuana Jesosa nijje jjapeequi poquipoquinaje pe'a'i.

Pabo jjacahuibaquinaje Eyacuiñajji onijke miminaje

⁶Jamatii Edojjoshahua Pameya oya cuana Asia meshi yasijje poqui mee jjima acanaje. Jomajo esohui huohui mee jjima acanaje. Jamajjeya oya cuana Pichia meshi yasijje poquinaje, Janata meshi yasijje pe'a'i poquinaje. ⁷Majoya oya cuana poeyanaje Misia meshi yasijje. Jomajo oya cuana jjashahuubaquinaje Bitinia meshi yasijje epoquijji. Matatii Edojjoshahua Pameya oya cuana ma meshi yasijje poqui mee jjima acanaje. ⁸Jamajjeya oya cuana Misia meshije jjayejjequinaje. Toasa cuiñajji yasijje poquinaje, bae ai sahua huasijje. ⁹Jomajo Eyacuiñajjiya Pabo jjacahuibaqui mee canaje jama ba'a: Jjacahuibaquianijo Pabohua oe dejja cahuiba canaje Masenonia meshijo ba'e. Oya Pabo nijje miminaje jama ba'a: —Pabo, ¡poecue Masenonia meshi yasijje, ecuanaja meshi yasijje! ¡Ecuana Jesosaja esohui huohuihuacue! —jamaya acanaje Masenonia dejja.

Majoya Pabo shequi'yonaje. ¹⁰Jamajjeya shequi'yo majje Pabo Masenonia meshi yasijje ecuana nijje besapoqui sa poanaje. Jama jjashahuubaquime poanaje ba'a: —Eyacuiñajjiya eseaya huoojea cani Masenonia meshi yasijje esohui quea pame nee Jesosajo huohuiya, ojjaña Masenonia meshijo ba'e sohuihuohuiya.

Jamajjeya ecuana aquiana cuana chicha majje besapoquinaje.

Pabo, Sinasi pea'ai Pinipo cuiñajji yasijje besapoquinaje

¹¹E'e Teopino, eyaya, Nocaa pea esohui Jesosaja epeejji cuanaja, ma eyaya banaje eyaya tehueaña miquea ebajji jama ba'a: Majoya Toasa huasijje poe majje ecuana bishe ai yasijje nequisohuaquinaje. Besapoquinaje Samatasia nasi yasijje. Majoya pea mecahuajje besapoquinaje Neaponi cuiñajji yasijje, bishe aijo. ¹²Majoya Neaponijo nequi ecuana poquinaje quea huesha nee, Pinipo cuiñajji yasijje ejiojjije Masenonia meshi ebio dojjojo. Pinipojo Shomano dejja cuana ba'yani quea quemo cuiñajjijo. Jamajjeya quea huiso dejja Pinipo huasijje poeyani anicuua. Jamajjeya ecuana Pinipojo nequinaje quea cahui huiso. ¹³Majoya Jodioja epojja ejomishocajjijo ecuana cuiñajji esecue yasijje poquinaje cuei sahua huasijje. Jama jjashahuubaquime poanaje ba'a: —Jomajo Jodio cuana Eyacuiñajji nijje mimiani ba'ajja.

Jomajo quea huiso epona ejjachichaqui ani banaje. Jamajjeya Pabo, ojaya epeejji cuana pea'ai anioquenaje. Esohui huohui canaje epona cuanaja eshajja'ajjajji. ¹⁴Oe eponaa Ninja bajjaniya quea ja'a nee shajja'ajja canaje. Oya

Tiatina pona, Tiatina cuiñajijo ba'le, daqui huo'o quiajji pea'ai, daqui huo'o quea pame nee quiajji. Oya Ninja Eyacuiñajija epeejji yahuajo poanaje. Jamajjeya Emeshi Mese neiya oya shajja'ajja meesahua canaje Paboja esohui quea pame nee Jesosaja.¹⁵ Jamajjeya Ninja, oja huapa pojjeama cuana pea'ai Jesosa nijje jjapeequi'yonaje. Onaaya oya Eyacuiñajijo besa mee canaje enajo. Majoya Niniaa Pabo jama acanaje ba'a: —Miquea eba eya Emeshi Mese nei Jesosaja epeejji nei, ojaya esohui jayojja jama aña. Jamajjeya jecuea equijo ba'ecue! —poanaje Ninja. Jamajjeya ecuana Niniaa ja'a cajjequinaje ojaya equijo eba'ejji.

Pabo, Sinasi pea'ai jeanobiajea canaje cuaa

¹⁶Quijje ecuana poqui o'oyanaje cuei yasijke Eyacuiñajji nijje mimiya. Poquijeya ecuaaya banaje oe epona ahuema' ani. Ohuaya chaco cani sosema' niñepoqui yajjejojo. Jamajjeya eshahuaa esapajo nequiya epona huohui meesahua canaje ohuaye nei ma quijke onaa acaje. Maya huohui capoquinaje quea huiso bejjo sosejje. O chacomeejji poaniya quea huiso bejjo jjeshe canaje epona niñepoquiya huohui cani sosejje. ¹⁷Ma epona niñepoqui Pabo quishishiji poquinaje. Taaa poquinaje jama ba'a: —Jiquio dejja cuana Eyacuiñajji quea ca'a neeja echacojji poani. Onaaya miquianaya huohui cani esohui quea pame nee Jesosajo, ma ohuaya mimishi cuana cuijea'yо majje miquianaya ba'e tiitii mee caje'yо eyajo —jama taaa nishomeya poanaje ecuana quishishiji poquije.

¹⁸Jama taaa majamaja nishomeya epona popoquinaje quea huiso cahuijo. Quijje Pabo quea quene po majje, jjanojjaquicuaji majje eshahua eponajo nequi huoojeacuayajea ca'yonaje jama ba'a: —¡Eshahua eponajo nequi cuayaqui'yocue! ¡A'a dobiqui o'oyajji! Jesosa Quito nijjeya eyaya miya huoojeacuayajea'yaña —Pabohua acanaje.

Jjeyahua nei eshahua eponaja yamijo nequi cuayaqui'yonaje.

¹⁹Ma ba majje eponaja echacomeejji poani quea quene nee nee poanaje Pabo nijje, Sinasi nijje pea'ai. Jama poanaje ba'a: —¡De! Jjeya epona shahuama'yo. Jamajjeya ojaya ba'yo jjima poaje oyaje nei ma onaa quijke nei acaje. Onajaya ecuana esosequia'yojji pojjeama ma eponaa huohui cani sosejje —poanaje epona chacomeejji poani.

Jamajjeya epona chacomeejji poaniya Pabo, Sinasi pea'ai iña canaje. Dojo canaje ojjaña aquiana quiajji equi yasijke. Jomajo Pinipo emeshi mese nijje miminaje, etii cuana nijje. ²⁰Shomano emeshi mese huohui'ajja cañaquinaje jama ba'a: —¡Bacue! Jiquio Jodio dejja cuaa, Pabohua, Sinasiya pea'ai ojjaña cuana ecuanaja cuiñajijo ba'e quea quene nee nee po mee cani. ²¹E'e, oya cuaa pea ejjashahuabaquí'yojji huohui canaje. Pea eba'ejjijo huohui canaje. Jamaya pojjeama ecuanaja emeshi meseja esohui. Jamaya pojjeama Shomano dejja cuanaja esohui pea'ai. Ecuana Shomano dejja cuana, jamajjeya Paboja esohui jayojja jama yajji, ¿yajja e'ajji?

²²Majoya ojjaña dejja cuana cuajicuaji jebejenaje Pabo que. Quea quene nee ojjaña poanaje Pabo nijje, Sinasi pea'ai nijje. Emeshi mese

cuana pea'ai quea quene po majje Paboja daqui Sinasija daqui pea'ai oja ehuosho ba'e iña'isajea canaje. Huohui canaje jama ba'a: —¡Pabo, Sinasi pea'ai cuiasejja neineicue acui sisiya! ¡Majoya oe jeanobiajea meequivicue ejjajeanobiaquijji equi yasijje! —acanaje Pinipo emeshi mese cuaa.

²³ Jamajjeya Pabo, Sinasi pea'ai janobajjima nei cuiasejja huicha'a huicha'a canaje cuaa. Majoya oya cuana dojo canaje ejjajeanobiaquijji equi yasijje jeanobiajeaa. Ejjajeanobiaquijji equi cuiñajji jama acanaje ba'a: —¡Jiquio dejja cuana jaahuana neineicue! ¡A'a cuayaqui mee'yojji! Poquiquehuajo aje mi oe cuiaje caje'yo emeshi mese cuaa —acanaje.

²⁴ Jamajjeya ejjajeanobiaquijji equi cuiñajji ma esohui shajja'ajja majje quea mete poanaje. Pabo, Sinasi pea'ai ejjajeanobiaquijji equi dojjo nei yasijje jeanobiajea canaje; quibo jeyochicha canaje acui tejjee.

²⁵ Jamatii mecashono Pabo, Sinasi pea'ai Eyacuiñajji nijje mimi jaanaje. Sohuicuaya jaanaje pea'ai. Ojjaña cuaa ejeanobia jaaa shajja'ajja canaje sohuicuaya jaa. ²⁶ Majoya meshi huehuahuehuana jejanobajjima nei. Mei jiyo cuana huehuahuehua neineinaje pea'ai. Esecue cuana jamatii nequi jjaca'apejojeaquinate. Ojjaña dejja cuana ejeanobia jaa jjapichojeaqui'yonaje baa jjono cuana, de. ²⁷ Oja ejeanobia cuiña po'aní aje oe shequi'yonaje. Shequi'yo majje ba canaje ojjaña esecue cuana ejjaca'apejoqui'yo nequi. Ojjaña dejja ejeyoja poqui'yonaje poso metejeanaje. Baa iña canaje ejjaacuaqui'yojji nisho. ²⁸ Jamatii Pabo jama taaame poanaje ba'a: —¡A'a oe jjaacuaqui'yojji! Ecuana yani ojjaña tii; poqui'yo jjima —Pabo poanaje.

²⁹ Paboja esohui shajja'ajja majje equi ejjanobiaquijji cuiñajji taaanaje jama ba'a: —¡Cuaquijiji oe yecue! —poanaje.

Cuaquijiji iña majje ejjajeanobiaquijji dojjo huasijje cuajicuajipoquinaje Pabo baa. Pabo ba majje ecui'oshajjajo nequinaje. Quea mete jjejojo piopionequinaje. Ojaya eba Pabo, Sinasi pea'ai Eyacuiñajji epeejji cuana. Jamajjeya oya cuanajo quea mete nee poanaje. ³⁰ Majoya ohuaya Pabo, Sinasi pea'ai ejjajeanobiaquijji dojjojo nequi dojocuayaqui ca'yana je. Oja equi yasijje dojo canaje. Huohui'ajja cañaquinaje jama ba'a: —Epeejji cuana, ¿aya acuae ecuea mimishi cuana cuijea caje'yo so'l? ¿Yajja po majje acuae mo poquije'yo eyahuasijje? ¿Yajja acuae po cajjea cuaqui yasijje poqui'yo jjima epojji? —acanaje ejjajeanobiaquijji cuiñajji poaniya.

³¹ —E'e —Pabo poanaje—, Emeshi Mese nei quea pame Jesosa Eyacuiñajji huoojea'yo ojjaña jaahuana jiji. ¡Onijje mimicue, onijje jjapee neineiquicue! ¡Ojaya esohui jayojja jama ba'ecue! Jamajjeya ohuaya miquea mimishi cuana cuijea caje'yo. Ojjaña miquea huapa pojjeama cuaa miquea equijo ba'eya jamaya ca'a cahua pea'ai. Jamajjeya mimishi cuijea'yo majje Jesosaa miquianaya ba'e tiitii mee caje'yo eyajo onijje —Pabohua acanaje.

³² Majoya Pabohua, Sinasi nijjeya esohui quea pame nee Jesosajo, Emeshi Mese neijo huohui canaje ojjaña ma equijo ba'eca cuanaja eshajja'ajjaji.

³³ Shajja'ajja majje ejjajeanobiaquijji cuiñajji ecuia sii Paboja edaasa, Sinasija edaasa pea'ai shacula canaje. Shacula majje shicui canaje mechashono nei. Majoya

oya, ojjaña ojaya huapa pojjeama cuana nijje pea'ai Jesosa nijje jjapeequinaje. Majoya oya, ojaya huapa pojjeama cuana pea'ai Eyacuiñajji besa mee canaje enajo. ³⁴Majoya ohuaya Pabo, Sinasi pea'ai oja equi yasijje dojodobiaqui majje oya cuana bobia canaje. Oya, ojaya huapa pojjeama cuana pea'ai queabihui nee poanaje Jesosa nijje jjapeequi majje, Eyacuiñajji nijje pea'ai.

³⁵Majoya mecajjeahua nei Shomano emeshi mese cuaa sohuinano cuana huoojea canaje ejjajeanobiaquijji equi yasijje jama huohuime yajji ba'a: —;Pabo, Sinasi pea'ai pichojea'yocue!

³⁶Jamajjeya ejjajeanobiaquijji cuiñajjiya Pabo huohui canaje jama ba'a: —Pabo, Shomano emeshi mese cuaa miquianaya pichojea mee ca'yonaje. ¡Jjeyahua nei esecue yasijje cuayaqui'yocue! ¡Quea bei nee poquicue, Pabo, Sinasi! —acanaje ejjajeanobiaquijji cuiñajjiya.

³⁷—Chojja —Pabo poanaje—. Ecuana mimishi'ama. Jamatii Pinipo emeshi meseya ecuana iña mee canaje. Jeanobiajea mee canaje pea'ai. Ojjañaaa ba caquinaje onaa janobajjima nei cuiasejja caqui. Ecuana ca Shomano dejja pea'ai. Jamajjeya jjeyahua nei ecuana quehuajje nei huoojea sa acani. Chojja, de. Oya cuana capoe'yahua, oya tii. Shomano emeshi meseya ecuana capichojea ca'yahua, ecuana cadojocuayaqui ca'yahua esecue yasijje ojjañaaja ebajji —Pabo poanaje.

³⁸Jamajjeya sohuinano cuana poquinaje. Shomano emeshi mese cuana huohui cañaquinaje Paboja esohui. Shajja'ajja majje Shomano emeshi mese cuana quea mete nee poanaje: —E'e de, Pabo, Sinasi pea'ai Shomano dejja cuana, de. Jamaya ecuanaja ba jjima. Shomano emeshi mese etiiya ecuana tecuea ca chana' —poanaje Pinipo emeshi mese cuana.

³⁹Jamajjeya Pinipo emeshi mese cuana ma Pabo cuiasejja meeiji epo poquinaje Pabo baa, Sinasi baa pea'ai. Quea bei nee nee huohui canaje jama ba'a: —Pabo, Sinasi, ecuana quea yeno nee nee miquiana cuiasejja mee epojjijojo. ¡A'a che ecuana nijje quea quene nee pojji! ¡Jjeya quea bei cuayaqui'yocue! ¡A'a jiquio cuiñajjiyo esohui huohui o'oyajji! —acanaje Pinipo emeshi mese cuaa.

Majoya oya cuaa Pabo, Sinasi pea'ai pichojea ca'yonaje. Jama acanaje ba'a: —E'e pojja'a miya pea meshi yasijje poquije esohui huohuiya —jama amajjeya huoojea canaje quea beiya.

⁴⁰Jamajjeya Pabo, Sinasi pea'ai ejjajeanobiaquijji equijo nequi poqui o'yanaje Niniaja equi yasijje. Ojjaña Jesosaja epeejji cuana ba o'oya majje ojjaña nijje miminaje; poquinaje. —E'e, poquia iña. ¡Jesosa nijje quea pame nee jjapeequicue mete'ama! —Pabo poanaje, Sinasi pea'ai.

Pabo Tesanonica cuiñajji yasijje poquinaje

17 ¹Jamajjeya Pabo, Sinasi pea'ai Pinipojo ani poquinaje Tesanonica cuiñajji yasijje. Poquijeya Apiponi cuiñajji yejje canananaje, majoya Apononia pea'ai yejje canananaje. Tesanonica huasijje poqui majje aniñaquinaje. Jomajo

Jodioja equi ojee ejjachichaquijji yani. ²⁻³Ma equi yasijke Pabo poquinaje Sinasi nijje. Ojjaña ejomishocajji pojajo Jesosaja esohui huohui huicha'a huicha'a canaje. Jodio cuana nijje jjamimicuajea nobiajeaquinaje pe'aai. Beshahua nei oe ba'ime Eyacuīñajjija esohui huohuijji yahuajo nei ba'eja esohuijo ohuaya Tesanonica dejja cuana jjabahuejjaqui mee canaje. Jama acanaje ba'a: —Eyacuīñajjija huoojea'yō ojjaña jaahuanajji esejo quea nee poanaje. Mano'yonaje eseja mimishi cuijea'yōjji. Mano'yō majje shequi o'oyanaje. Eyacuīñajjija huoojea'yō ojjaña jaahuanajjijo, Jesosajo, eyaya huohuaña miquianajaya eshajja'ajjajji —Pabohua acanaje.

⁴Paboha esohui shajja'ajja canaje quea huiso Jodio cuaa. Jjaapeequi'yonaje Jesosa nijje. Pabo nijje, Sinasi nijje pe'aai jjaapeequinaje. Quea huiso Jieno cuana ma yahuajo nei Eyacuīñajjija epeejji epo cuana Pabo nijje jjaapeequinaje, Sinasi nijje pe'aai. Etii cuanaja ehuanase cuana Jesosa nijje jjaapeequi'yonaje pe'aai. ⁵Jamajjeya quea huiso nee Pabo nijje jjaapeequiani ba majje Jodio etii cuana quea quene poanaje. Quea huiso dejja mimishi cuana iyaa canaje. Quea huiso jjachichaqui mee canaje. Ojjaña quea quene, quea shajjaquijjo nee nee po mee canaje. Majoya ojjaña cuana Jasonija equi yasijke cuajicuajjebenaje Pabo, Sinasi pe'aai cuiaa nisho. ⁶E'e, oya cuaa Pabo, Sinasi pe'aai sa'ajja canaje. Chama' ba majje equi mese Jasoni bajjani iña canaje. Jesosaja epeejji cuana iña canaje pe'aai. Dojo canaje dejja etii cuana huasijke tecueaa. Janobajjima nei taaa majamajanaje jama ba'a: —Pabohua, Sinasiya pe'aai quea huiso cuana pea esohui huohui canaje. Oya cuana jiquiacua poeyanaje pe'aai esohui huohuiya. ⁷Jasoniya ca ca oma oya cuana oja equijo ba'e mee canaje. Oya cuana ecuanaja emeshi mese etija, Sesa bajjanija esohui shajja'ajja sa po'yo ajja. Oya cuaa ca ca huohui canaje pea emeshi mese nei yani, Jesosa bajjani —jama siajje ameya acanaje Jodio cuaa Tesanonicajo ba'e cuaa.

⁸Ojjaña Tesanonicajo ba'e, cuiñajji mese cuana pe'aai quea mete nee nee poanaje ma esohui shajja'ajja majje. ⁹Jamajjeya Tesanonica mese cuaa Jasoni, oja epeejji cuana pea'ai tecuea canaje jama ba'a: —¡Pabo, Jesosaja epeejji cuana pea'ai a'a miquea equi yasijke dobi mee o'oyajji! ¡Huoojeacue oe!

Majoya Jasoni, ojaya epeejji cuana pea'ai bejjo sose quia mee canaje ejeacuaya'yōjji. Ma sosequia majje Jasoni ojaya epeejji cuana nijje poqui'yonaje.

Pabo, Sinasi pe'aai Benea meshi yasijke poquinaje

¹⁰Jamajjeya ma mecajje tii Tesanonicajo ba'ecaa, Jesosaja epeejji cuaa Pabo, Sinasi pe'aai huoojea canaje Benea meshi yasijke. Benea cuiñajji yasijke poqui majje Pabo, oja epeejji cuana nijje poquinaje Jodioja equi ejjachichaquijji yasijke. Esohui huohui ca o'oyanaje. ¹¹Jodio cuana Beneajo ba'e quea pame nee, Jodio cuana Tesanonicajo ba'e jayojja jama pojjeama. Oya cuaa ca ca oe Paboha esohui quea bihui nee nee shajja'ajja canaje, Sinasija esohui pea'ai. Majoya Eyacuīñajjija esohui yahuajo nei tehue ba neinei canaje. Jama poanaje ba'a: —E'e, Paboha esohui e'e nei. Jamaya Eyacuīñajjija esohui yahuajo nei tehue poani e'e jojo nei —poanaje cuana.

¹²Jamajjeya quea huiso nei Beneajo ba'eca Jesosa nijje jjapeequi'yonaje. Quea huiso Jieno cuana jomajo ba'e pea'ai Jesosaja epeejji cuana poanaje. Jieno epona cuana quea huiso pea'ai Jesosa nijje jjapeequi'yonaje, epona quea pame nee cuana, etii cuanaja ehuanase cuana.

¹³Jamatii Jodio dejja cuana Tesanonicajo ba'e onaaya huohui canaje jama ba'a: —Pabohua Jesosaja esohui huohui cani Beneajo pea'ai.

Ma shajja'ajja majje oya cuana poeyanaje Benea huasijke; Pabo ocuena canaje ecuiajji nisho. ¹⁴Ma ba majje ca ca Jesosaja epeejji cuaa Beneajo ba'eya Pabo quehuadojo canaje bae ai yasijke. Sinasi ca ca Beneajo tii nequi'yonaje Timoteo nijje. ¹⁵Jamajjeya Jesosaja epeejji cuaa Pabo dojo canaje, Atena cuiñajji yasijke besapoquinaje. Majoya Pabohua oya cuana huohui canaje jama ba'a: —¡Ecuea epeejji Sinasi, Timoteo pea'ai huoojeacue jiuiquiacua jjeyahua nei! Oya poeyajo eyaya ishoaje jiquiojo —Pabo poanaje.

—E'e, huohuiñaquije'yo aje ecuaaya. Poqui'ya iña —amajje oya cuana poqui o'oyanaje Benea huasijke.

Atenajo Pabohua esohui huohuiqui canaje

¹⁶Jamajjeya Pabohua Atenajo aniya ojaya epeejji ishoa'ajja canaje, Sinasi, Timoteo pea'ai. Atenajo aniya Pabohua ba canaje quea huiso nee nee eyacuiñajji nisho, epa'yo cuana bihuia cani. E'e, ojjaña ma cuiñajji ba'eca cuaa pea epa'yo bihuia caqui ba majje Pabo quea quene nee nee poanaje. ¹⁷Jamajjeya Jodioja equi ejjachichaquijji yasijke Pabohua esohui huohui huicha'a huicha'a canaje. Quea huiso miminaje Jodio cuana nijje, Jodio pojjeama nijje pea'ai joya Eyacuiñajji esohui bajji cuana nijje. Ojjaña pojjaño aquiana quiajji equi yasijke poqui majje Pabohua esohui huohui canaje ojjaña cuana huasijke. ¹⁸Majoya pea cuana Epiconeoja esohui shajja'ajjajji, Esitoicoja esohui huohuijji pea'ai onijje miminaje quea huiso. Jjamimicuiae nobiajequinaje. Pabo nijje mimi majje beca cuana jama poanaje ba'a: —Jiquio dejja Pabo bajjaniya pea esohui huohui cani, de. ¿Ajeo shai oya mimiani so'o? Ecuanajaya Paboja esohui shajja'ajja jjima. Quea quehua, de.

Pea cuaa ca ca jama acanaje ba'a: —Ohuaya pea eyacuiñajji cuanajo huohui cani pojja'a, ma eyacuiñajji ecuanaja ba jjimajo —acanaje cuaa.

Pabohua Jesosajo huohui canaje jama ba'a: —Eyacuiñajjiya Jesosa emano'yojaa shequi mee ca o'oyanaje. Jamajjeya ohuaya dejja cuana shequi mee caje'yo —Pabohua acanaje.

Ma esohui Atena cuanaja quea quehua, yahuajo shajja'ajja jjimajojo.

¹⁹Jamajjeya ohuaya Pabo dojo canaje Aneopaco eyiyo huasijke esohui huohui meeya. E'e, ma eyiyo huasijke ojjaña cuana jjachichaquinaje ojjaña huohui caje esohui shajja'ajjaa. Jamajjeya Pabo poeyajo, jama acanaje cuaa ba'a: —E'e, ecuana miqea esohui shajja'ajja sa poani. ²⁰Ma ehuohui'yo eyacua pojja'a. ¡Ojjaña huasijke huohui neineicue! —acanaje cuaa—. E'e, qui'ajjaya ecuanaja esohui ba jjima yahuajo. ¡Ba meecue mo oe! —poanaje.

²¹(E'e, ojjaña Atenajo ba'eca cuana, ojjaña joya Atena huasijke poeyani anicuaa pea'aiya ehuohui'yo eyacua shajja'ajja sa acanaje ojjaña pojxajo. Esohui eyacua huohui canequinaje quea huiso neeya. Jamatii mimimiminequinaje ojjaña cuana, chacochaco jjima poanaje.)

²²Jamajjeya Pabohua Aneopaco eyijojo nequiya ojjaña huohui canaje jama ba'a: —Dejja cuana Atenajo ba'e cuaa, ¡shajja'ajjacue jiquio eya huohuije, miquianaaya! Miquianaya quea huiso nee jjashahuabaquiani eyacuiñajji cuanajo. Jamaya ecuea eba. ²³E'e, eya po'ayequiequinaje. Eyaya banaje quea huiso epana'yo cuana, ma miquianaa bihuaña. Majoya eyaya banaje pea'ai mei e'iyasohua ao ani pea'ai eyacuiñajji blhuijji; ma miquianaaya “Bajjani ba jjima” tehuename. Miquianaaya maya Eyacuiñajji bihuaña, jamatii miquianajaya oya ba jjima. Ma Eyacuiñajji neijo eyaya esohui huohuaña miquianajaya ebajji. ²⁴E'e, yahuajo nei nei Eyacuiñajjiya jiquio meshi pana ca poa. Ojjaña aquiana cuana oja pana pea'ai, de, ojjaña tii. Oya ca ca oe Emeshi Mese nei, ojjaña huoojea'yojji, ojjaña eyajo ani, ojjaña meshi cuanajo nequi huoojea'yojji pea'ai. Jamajjeya Eyacuiñajji equijo ba'e ajja, eseja iya equijo ba'e ajja oya. ²⁵Eseyaya oya jaahuana ajja, de; oya esejaya eba'esahuajji pojjeama pea'ai. Chojja, ohuaya ca ca oe eseja ojjaña cuana eshe po mee ca'yani; ba'e meesahua cani. Ojjaña aquiana cuana, bobi pea'ai ohuaya quia cani eseja. ²⁶Yahuajo nei nei Eyacuiñajjiya oe dejja pana ca poa. Ma dejja ojjaña jeajji poa; ojjaña cuana ojjaña meshi cuanajo ba'eca cuanaja baba. Tehuetehue cuanaja baba, pea dejja cuanaja baba, ojjaña ese ejja cuanaja baba pea'ai poanaje Adana. Eyacuiñajjiya ojjaña cuana jjaba'echejjequi mee ca poa ojjaña meshi cuana huasijke. E'e, yahuajo nei Eyacuiñajjiya huohui ca poa jama ba'a: “Ma dejja cuana ba'e caje ma meshijo, pea jomajo. Ma shequiaja huisome tii pea meshi cuanajo ba'e caje cuana” aca poa Eyacuiñajjiya. ²⁷Jamaya Eyacuiñajjiya amee canaje ojjaña cuana ojo ejjashahuabaquijji, onijje ejjapeequijji. Jamaya Eyacuiñajjiya eseja sa cani ojaya epeejji pojji. Jamatii oya huesha'ama, quea chipi nee ani tii tii, ojjaña ese chipi nei ani. ²⁸E'e, yahuajo miquianajaya esohui tehuejjiya tehue ca poa jama ba'a:

“Eyacuiñajji yanijo eseja eshe nequi. Ohuaya eseja ba'e meesahua cani, chaco meesahua cani pea'ai. Oja pana jjima jjemo eseja chama' pome. Ojjaña eseja Eyacuiñajjiya bacua cuana, oja pana pea'ai”.

Jamaya yahuajo nei tehue ca poa —Pabo poanaje.

²⁹—Jamajjeya eseja oja bacua cuana poaniya, oja pana poaniya ¿apiojji acuae oya miquianaaya ba jjima aña so'o? ¿Apiojji acuaeaya Eyacuiñajji mei huo'o epana'yo, mei oshe epana'yo, mei ca'a epana'yo jayojja jama poso aña so'o miquianaaya? Chojja, Eyacuiñajji miquianajaya epana'yo jayojja jama pojjeama. ¡Meshi epana'yo nequi jayojja jama poso a'a ajji, de! ³⁰Yahuajo nei dejja cuanaja Eyacuiñajji ba jjima poa. Jamatii Eyacuiñajjiya oya cuana napa jeyojeyo jjima poa oja mimishi cuanajo. Jjeya ca ca ohuaya ojjaña cuana huohui canaje jama ba'a: “¡Miquea mimishi cuana pajea'yocue! ¡Enijje jjapeequicue! ³¹E'e, quijje eyaya ecue

huoojea'yo ojjaña jaahuanajji Jesosa huoojeaje. Ojjaña ojaya eba quea ja'a nee. Jamajjeya ohuaya ojjaña sosequia caje ma oya cuaa acanaje sosejje. Joya quea pame nee ba'enaje ohuaya quea bihui nee ba'e tiitii mee caje'yo. Mimishi cuana ca ca oe quea nee nee tii tii poaje'yo" aca poa Eyacuiñajjiya —Pabo poanaje.

—Jamajjeya Jesosa mano'yajo Eyacuiñajjiya oya shequi mee ca o'oyanaje. Jamaya ohuaya ojjaña cuana ba mee canaje jiquio esohui Jesosajo e'e nei —Pabo poanaje.

³²Eyacuiñajjiya dejja cuana shequi mee ca o'oyanaje Pabo poajo shajja'ajja majje quea huiso dejja cuana soa neineinaje shajja'ajja sa po ajja jjejojo. Pea cuaa ca ca Pabo huohui canaje jama ba'a: —Quijje ecuaaya miquea esohui shajja'ajjaje o'oya —acanaje cuaa.

³³Majoya Pabo esohui huohuina'yo majje poqui'yonaje. ³⁴Beca cuana Pabo nijje poquinaje. Ojaya esohui shajja'ajja majje Jesosa nijje jjapeequi'yonaje. E'e, Aneopaco meshi cuiñajji Dionisio bajjani, oe epona Damanisi bajjani, pea cuana pea'ai Jesosa nijje jjapeequi'yonaje.

Pabo Conitio huasijje poquinaje

18 ¹Majoya Pabo Atenajo nequi poquinaje Conitio cuiñajji yasijje ejiojjije. ²Conitiojo ohuaya Jodio dejja Aquina bajjani ba canaje. Aquina aje Jodio dejja, Ponito meshijo cuaya. Yahuajo Ponito meshijo ba'e oya poquinaje Itania meshi yasijje. Shoma cuiñajjiyo ba'enaje. Majoya Itania meshi meseya Canio bajjaniya ojjaña Jodio cuana Shomajo ba'e huoojea canaje pea cuiñajji cuana huasijje: —Jodio cuana, Shomajo ja'a ba'ejjii! ¡Poquicue miquianaya ojjaña! —acanaje Shoma meshi mese Caniohua.

Jamajjeya Aquina oja huanase Pisina nijje poeyanaje Conitio huasijje ba'eya. Jamajjeya Pabo Conitio huasijje poe majje poquinaje Aquina baa. ³Pabo daqui moo equi socoji poanaje; Aquina pea'ai daqui moo equi socoji. Jamajjeya Pabohua Aquina nijjeya daqui equi cuana soco canaje ojaya equijo, Aquinaja equijo. ⁴Ojjaña epoja ejomishocajjijo Pabo Jodioja equi ejjachichaquijji yasijje poquinaje esohui huohuiya. Eyacuiñajjiya esohui Jesosajo huohui canaje Jodio cuana huasijje, Jodio porjeama cuana huasijje pea'ai. Jama acanaje ba'a: —Jesosa Eyacuiñajjiya huoojea'yo ojjaña jaahuanajji e'e jojo nei —Pabohua acanaje.

⁵Majoya Pabohua epeeji Sinasi, Timoteo nijje Masenonia meshijo nequi Benea cuiñajjiyo esohui huohui ponequinaje, poeyanaje Conitio huasijje Pabo baa. Timoteo, Sinasi pea'ai poeyajo, Pabohua Eyacuiñajjiya esohui Jesosajo huohui majamaja canaje Jodio oo pana huasijje: —Jodio cuana, ¡bacue! Jesosa e'e jojo nei Eyacuiñajjiya huoojea'yo ojjaña jaahuanajji —Pabohua huohui tiitii canaje.

⁶Jamatii Jodio dejja cuana Pabo nijje jjamimicuajea nobiajeaquinaje ma esohuijo. Pabo nijje mimijajinaje pea'ai. Jamajjeya quea tecue po majje Pabohua oja daqui ao jjequi'iyaja canaje. Jamaya ohuaya ojjaña ba mee canaje ma Jodio dejja cuana quea mimishi nee nee, shajjama!

nei nei. Majoya Pabohua jama acanaje ba'a: —Shajjama' nei nei ca mi coma. ¡Shajjama' poanijo Eyacuiñajjiya miquianaya canapa cahua! Eyya miquianaya ojjaña Eyacuiñajjiya esohui e'e nei Jesosajo huohuinaje. Jamajjeya mi jjashajja'ajjaquiajio eyaya miquianaya jeajeanaje'yo. Jjeyahua nei eya poquije'yo Jodio pojjeama cuana sohuihuohuiya —Pabohua acanaje.

⁷ Jamajjeya Jodioja equijo nequi cuayaqui'yo majje Pabo poquinaje Tito Jositoja equi yasijje. Tito Eyacuiñajjiya epeejji Jodio pojjeama. Ojaya equi Jodioja equi ojee ejjachichaquijji pejjejo nequi che chipi nei. ⁸ Jodioja equi ejjachichaquijji cuiñajji Quisipo ca ca Emeshi Mese nei Jesosa nijje jjapeequi'yonaje. Oja huapa pojjeama cuana oja equijo ba'e cuana pea'ai Jesosa nijje jjapeequi'yonaje. Quea huiso cuana Conitiojo ba'e pea'ai Paboa esohui shajja'ajja majje Jesosa nijje jjapeequi'yonaje. Jamajjeya pea cuaa oya cuana besa mee canaje Eyacuiñajji enajo.

⁹ Majoya oe mecajje Pabo cahuijaajo, Emeshi Mese neiya Jesosaa oya jjacahuibaqui mee canaje jama ba'a: —Pabo, ja'a quea mete pojji! ¡Ecuea esohui a'a huohui pajea'yoji! ¡Huohui tiitiicue! ¹⁰ Eya minijje nequinijo, pea cuaa miya enapajji pojjeama. Esapa jahuejjajeajji pojjeama. E'e, jiquio cuiñajji ecuea epeejji quea huiso yani —jamaya Jesosaa Pabo jjacahuibaqui mee canaje.

¹¹ Jamajjeya Pabo Conitiojo nequinaje; beshahua nei becanejjiji pea'ai daqui sheme epo nequinaje. Eyacuiñajjiya esohui Jesosajo huohui canaje quea huiso cuana jomajo ba'eja eshajja'ajjajji.

¹² Majoya dejja Canio bajjani Acaya meshi mese poanaje, Shomano emeshi meseja echacojji. Ma pojja Jodio cuana quea huiso mimijaji sa poanaje Pabo nijje. Jjachichaqui majje Pabo iña canaje; dojo canaje emeshi mese Canioja equi yasijje Canioja enapa meejjji nisho. Esohui huohuijjiyo Pabo niñeba canaje cuaa jama ba'a: ¹³—Jiquio dejjaja Pabo bajjanija esohui eyacua. Ecuana jama etiiquiana Moisesija esohui jayojja poanaje ohuaya ojjaña cuana Eyacuiñajji bihuia mee sa acani. Moisesija esohui pajea mee sa acani pea'ai —acanaje Jodio etii cuaa.

¹⁴ Pabohua beshahua nei saja'a canijo emeshi mese Caniohua Jodio cuana tecuea canaje jama ba'a: —Jodio cuana, ¡shajja'ajjacue mo! Jiquio dejja Pabo quea mimishi poani jojjemo eyaya miquianaya shajja'ajja'yome. ¹⁵ Jamatii oya mimishi ajjima'; eya onijje quea quene pojjeama. Miquianaya ca ca oe quea quene poani oja esohujo. Miquea etiiquianaja esohui cuanajo ca ca oe miquianaya mimipanajajiani onijje. Jamajjeya ¡poquicue! Eyya ehuohuijji pojjeama Paboo. Miquea esohui o tecueajji shajja'ajja sa po'yo ajja. ¡Miquianajaya ejashahuabaqui'yoji jayojja jama acue Paboo! —acanaje emeshi mese Caniohua.

¹⁶ Caniohua quea tecue nee po majje Jodio cuana huoojeacuayajea ca'yonaje esecue yasijje. ¹⁷ Esecue yasijje cuayaqui'yajo Jodio pojjeamaa Jodioja equi ejjachichaquijji cuiñajji Sosetene iña canaje. Cuiasejja neinei canaje Canio cojja nei. Jamatii emeshi mese Canio mimijajiqui bajea sa po ajja poanaje: —Jamatii —poanaje oya.

Pabo Antioquia huasijke poqui o'oyanaje

¹⁸Jamajjeya Pabo oja epeejji cuana nijje Conitiojo esohui huohui ponequinaje quea cahui huiso nee. Majoya ohuaya Aquina nijjeya, Pisina pe'a'i nijjeya ojjaña Jesosaja epeejji cuana Conitiojo ba'e jiña ca'yonaje: —Poquia iñá —amajje oya cuana poquinaje bae sahua huasijke. Ebishe mese sosequia canaje Sinia meshi yasijke ebepasoquij'yojji, quea huesha nee. Bishe ai yasijke ani jjimahuua Pabohua ehuojja dedejea mee canaje. E'e, ohuaya yahuajo huohui canaje jama ba'a: —Eyaya esapa dedepojijjeaje ojjaña ebajji eyaya ma ecua eya yahuajo Eyacuiñajji nijje miminaje jayojja jama ajeyo'yonaje —Pabohua acanaje. Jamaya yahuajo nei Jodio cuaa acaninaje.

¹⁹Majoya Pabo, Aquina nijje, Pisina pe'a'i nijje Epeso cuiñajji yasijke besapoquinaje bishejje. Paboja epeejji cuana Aquina, Pisina pe'a'i nequinaje Epesojo. Pabo Jodioja equi ejjachichaquijji yasijke poqui majje dobiquinaje Jodio dejja cuana esohui quea tame nee Jesosajo huohuya. ²⁰Shajja'ajja majje Jodio cuana onijje jama poanaje ba'a: —Pabo, ijiquiojo ecuana nijje nequicue! ¡Ecuana sohuihuohuicue quea cahui huiso nee! —poanaje ma Jodio cuana.

Jamatii Pabo nequi jjima poanaje. ²¹Poqui jjimahuua oya cuana huohui canaje jama ba'a: —Eyacuiñajjiya huoojea cajje eya poeje o'oya miquiana baa. Quijje poeje o'oya —acanaje Pabohua.

Majoya bishe ai yasijke ani o'oya majje Pabo Epesojo esohui huohui poequi besapoquinaje Jodea mese yasijke.

²²Sesanea huasijke ba'eñaqui majje Pabo etaja huasijke nequisohuaquinaje. Majoya poquinaje Jenosanena huasijke. Jenosanena bañaqui majje Jesosaja epeejji cuana ba canaje. Pabohua oya cuana huohui canaje quea bei neeya: —E'e, ¿achajja a nequiana ani so'o? —poanaje Pabo.

Majoya ma ba majje oya Jenosanenaje jjayejequinananaje. Poquil'yonaje Atioquia huasijke ejiojjijje. ²³Quea cahui huiso nequinaje Atioquiajo. Majoya oya poqui o'oyanaje Janata meshi yasijke, Pichia meshi yasijke pe'a'i. Ma meshi cuanajo Jesosaja epeejji cuana esohui huohui o'oya majje ojjaña quea ja'a nee jjapeequi meesahua canaje Jesosa nijje.

Aponohua esohui huohui canaje Epesojo

²⁴Pea Jodio dejja Apono bajjani poeyanaje Epeso cuiñajji yasijke. Yahuajo Apono Anejania cuiñajjiyo ba'e. Oya esohui huohuijji quea tame nee; Eyacuiñajjiya esohui etehue'yo ojaya eba nei nei. ²⁵Yahuajo onaaya oya huohui canaje esohui quea tame nee Emeshi Mese neijo, Jesosajo. Majoya ohuaya bicho'ama esohui huohui canaje e'e jojo nei Jesosajo. Matatii Huanija, ma ona besameejji poanija esohui ca ca oe ojaya eba, Aponoja. ²⁶Ohuaya esohui huohui canaje Jodioja equi ejjachichaquijjiyo quea huiso nee. Oja esohui shajja'ajja majje Paboja epeejji Aquinaa, oja huanaseya pe'a'i Apono dojo canaje equi yasijke. Majoya ohuaya

Apono ojjaña Eyacuiñajjija esohui Jesosaja epoe'yojijjo huohui canaje. Yahuajo Aponoja ba jjima poanaje ojjaña Jesosaja esohui.²⁷ Quijje pishana Apono Acaya meshi yasijje poqui sa poanaje. Jesosaja epeejji cuaa Atioquiajo ba'leya oya poqui meesahua canaje. Esohui quea tame nee ojo tehue canaje Jesosaja epeejji cuana Acaya meshijo ba'leya ebajji. Majoya Acaya meshi yasijje poqui majje Aponohua Jesosaja epeejji cuana Jesosaja esohujo jjashahuabaqui mee canaje. Ojjaña joya Eyacuiñajjija Jesosa nijje jjapeequi meesahua canajeya, ojaya quea jea nee neeyo shajja'ajja canaje.²⁸ Jamajjeya pea cuaa ba canijo, Aponohua quea ja'a nee Jodio dejja cuana huohui canaje Jesosajo. Apono quea mimi ja'a nee poanaje. Jamajjeya ohuaya Jodio cuana mimicuajeanobiajea ca'yonaje. Aponohua Eyacuiñajjija etehue'yo huohui neinei majje ojjaña ba mee canaje Jesosa e'e jojo nei Eyacuiñajjija huoojea'yo ojjaña jaahuanajji poani.

Pabo Epeso huasijke poqui o'oyanaje

19 ¹Apono Conitiojo nequijo Pabo eyiyo huasijke poquinaje, pea cuiñajji cuana huasijke. Esohui huohui capoquinaje. Majoya oya Epeso huasijke poqui o'oyanaje. Epesojo Pabohua Jesosaja epeejji cuana ma jjeya nei onijje jjapeequinaje ba cañaquinaje. ²Ba majje Pabohua oya cuana huohui'ajja canaje jama ba'a: —Epeejji cuana, ¿a'a Edojjosahua Pame miquiana que dobiqui'yonaje Jesosa nijje jjapeequianijo?

—Chojja —saja'ame acanaje cuaa—, onajaya ecuana huohui jjima Edojjosahua Pamejo.

³Jamajjeya Pabohua huohui'ajja ca o'oyanaje: —E'e. ¿Ajea ehuohui jayojja jama po majje onaaya miquianaya Eyacuiñajjijo besa mee canaje enajo?

Onaaya jama acanaje ba'a: —Huanija esohujo onaaya ecuana Eyacuiñajjijo besa mee canaje —acanaje cuaa.

⁴Majoya Pabohua jama acanaje ba'a: —Yahuajo mimishi cuana pajea ca'yajo, Huaniya pea cuana Eyacuiñajjijo besa mee canaje enajo. Jamaya ohuaya acanaje ojjaña jaahuanajji enajo ebesa cuaa mimishi pajea ca'yonaje. Huaniya ojjaña cuana huohui canaje jama ba'a: “Quijje eya esohui huohuijeyo'yajo, pea dejja poeje. Oya Eyacuiñajjija huoojea'yo ojjaña jaahuanajji, Jesosa. ¡Onijje jjapeequicue!” jamaya Huaniya huohui canaje Jesosajo —Pabohua acanaje.

⁵Paboja esohui shajja'ajja canaje dejja cuaa. Shajja'ajja majje peaa oya cuana Eyacuiñajjijo besa mee canaje enajo Jesosa nijje jjapeequianijojo. ⁶Majoya Pabohua onaja esapa biajje eme huana majje Eyacuiñajji nijje miminaje Edojjosahua Pame ojjaña que edobiujiji. Dobiqui majje Edojjosahua Pameya oya cuana pea esohui mimi mee canaje. Eyacuiñajjija esohui huohui mee canaje pea'ai. ⁷Ma dejja cuana, Jesosaja epeejji cuana, ma jjeya nei onijje jjapeequinaje ome miji becamejjiji pea'ai huisome poanaje, 12 huisome.

⁸Majoya Pabo poquinaje Jodio cuanaja equi ejjachichaquijji yasijje. Dobiqui majje ohuaya Eyacuiñajjija esohui quea tame nee Jesosajo huohui canaje quea ja'a nee, mete'ama. Pea beca peejjima ba'ime ohuaya huohui huicha'a huicha'a

canaje jama ba'a: —Eyacuiñajiji huoojea'yo ojjaña jaahuanaji poeyanaje. Oya, Jesosa ojjaña huoojea'yojjii quijje poaje Eyacuiñajji nijje.

⁹Quea huiso Jodio cuana quea sapa ca'a poanaje; shajja'ajja sa po'yo ajja. Oya cuana quea mimishi poanaje. Jesosa niñebea canaje ojjaña dejja cuana ma equijo nequija eshajja'ajjajji. Jamajjeya Pabohua ma dejja cuana jeajean'a'yo majje Jesosaja epeejji cuana dojo canaje pea equi yasijje, esohui huohuijji Tinano bajjanija equi yasijje. Jomajo oya cuana sohuihuohui neinei canaje ojjaña pojajo, Pabohua. ¹⁰Jamaya Pabo poanaje becanejjiji pe'a'i shequiajame. Jamajjeya quea huiso cuaa Asia meshijo ba'leya Emeshi Mese nei Jesosaja esohui shajja'ajja canaje. Quea huiso Jodio cuaa, quea huiso Jodio pojjeama cuaa pea'ai shajja'ajja canaje.

Esemaja ebacua ejja cuana eshahua huoojeacuayajeajji nisho poanaje

¹¹Eyacuiñajiji ohuaye nei ma dejja cuanaja ba jjima Pabo ameesahua canaje quea huiso. ¹²E'e, Pabo emanojaa cuana huaquia meesahua ca'yonaje, jjaajaqui meesahua ca'yonaje. Eshahua dejjajo nequi huoojeacuayajea mee ca'yonaje pea'ai. E'e, pea cuaa Paboja eja sisi cuana, pañoeno dojo canaje emanojaa cuana huasijje. Maya emanojaa cuana biajje huana canaje cuaa ehuaquia mee'yojjii. Quea aja nee po'yonaje ojjaña cuana. Eshahua cuana, o niñepoqui meeiji poani pea'ai Jesosaa Pabo huoojeacuayajea mee canaje Paboja eja sisi niñepoqui biajje iya cajo. ¹³Jamajjeya Jodio cuaa pea'ai poquinananiya eshahua cuana dejja niñepoqui meeiji poani ecuaya meeque'yojjii nisho acanaje. Oya cuana ca ca Jesosa nijje jjapeequi jjima. Jamajjeya eshahua cuana ohuaya jama huohuime acanaje ba'a: —Eshahua cuana, ecuanaaya Pabo jayojja jamaa miya huohuiaña. Emeshi Mese neiya Jesosaa miquianaya huoojeacuayajea mee cani. ¡Jjeyahua nei cuayaqui'yocue! —acanaje Jodio cuaa.

¹⁴E'e, Jodio Eyacuiñajji nijje emimiji etii Esema bajjanija bacua ejja cuaa, me oeje beca cuaa eshahua cuana jamaya ehoojeacuayajea meeiji nisho acanaje. ¹⁵Eshahuaa ca ca Esemaja bacua ejja cuana jama acanaje ba'a: —Jesosa ecuea eba quea ca'a nee nee, Jesosaja epeejji Pabo ecuea eba pea'ai. Ecuea miya eba ca'a'ama, jamatii —acanaje eshahuaa.

¹⁶Majoya jiquio eshahuaa dejja niñepoqui Esemaja bacua ejja cuana iña mee canaje, cuiajeabichajea mee ca'yonaje, onajaya daqui isajea ca'yonaje pea'ai. Jamajjeya Esemaja bacua ejja cuana esecue yasijje cuayaquinananaje daquima', quea nee pea'ai.

¹⁷Ma shajja'ajja majje ojjaña Jodio cuana, Jodio pojjeama cuana pea'ai Epesojo ba'e quea ajjajja nee nee poanaje jama ba'a: —E'e, ee. Jesosaa ohuaye nei eshahua cuana huoojeacuayajea cani. Oya quea ca'a nee nee poani. Ohuaya ojaya epeejji nei Pabo eshahua cuana huoojeacuayajea meesahua cani —jamaya Emeshi Mese nei Jesosa bihuia canaje quea huiso cuaa.

¹⁸Majoya Jesosaja epeejji cuana quea bicho nee poanaje oja mimishi cuanajo, eshahua cuana nijje jjapeequianijo pea'ai. Jesosaja epeejji cuana

jjachichaqui'yo majje mimishi cuana huohui canaje; quea bicho poanaje ojjaña: —¡Ecuana mimishi cuana pajea meesahua'yocue! —acanaje cuaa.

¹⁹ Joya yahuajo edasiajji poanajeya, eyamiquecua cuaa pea'aiya ojaya esohui etehue'yo ejjadasiaquijji cuana, eshahua nijje acanijo pea'ai chicha'yo majje dahuajea ca'yonaje. Ojjaña pea cuaa ba canaje. Ma papeni etehue'yo cuana quea nahue nee nee, quea sose huiso nee nee poanaje, (E'e, quea sose huiso nee, quea huiso nee huaca sosejje jayojja poanaje, 100 huaca yahue sosejje jayojja poanaje.) ²⁰E'e, quea huiso cuaa, quea huiso meshijo ba'eca cuaa Eyacuiñajji esohui Jesosajo shajja'ajja canaje. Quea huiso nee Emeshi Mese nei Jesosaja epeejji poanaje.

Epesojo ba'e cuana Pabo nijje quea quene poanaje

²¹ Majoya Pabohua jjashahuabaqui majje jama poanaje ba'a: —E'e, Masenonia meshi yasijje eya poquije o'oya, Acaya meshi yasijje pea'ai ojjaña Jesosaja epeejji cuana baa. Majoya eya Jenosanena huasijje poqui o'oya sa poani pea'ai. Jenosanena huasijje poqui majje eya poqui sa poani Shoma cuiñajji yasijje pea'ai, e'e jojo nei —Pabo poanaje.

²² Jamajjeya Pabohua ojaya echacosahuajji cuana Timoteo, Enasato pea'ai huoojea canaje Masenonia meshi yasijje. Pabo ca ca nequinaje Epesojo, Asia meshijo. ²³Pabo oe nei nequijo oja huohui'yo Jesosajo quea huiso cuana Epesojo ba'e quea quene nee nee poanaje onijje. ²⁴E'e, jama poanaje ba'a: oe dejja Demetio bajjani mei oshe pana nejji Epesojo ba'enaje. Ohuaya o chacosahuajji cuana nijjeya quea huiso epana'yo sisi cuana Diana nisho bajjani ne canaje. Maya Epesojo ba'e cuaa bihuia canaje, eyacuiñajji poso acanaje cuaa. Demetiohua, o chacosahuajji cuaa pea'ai Diana nisho quea huiso ne canaje. Ne majje quea huiso ejjeshejji jjeshe canaje Diana nisho sosejje. ²⁵Jamajjeya Demetiohua o chacosahuajji cuana iyaa canaje o que. Pea cuana o jayojja jama epana'yo nejji epo iyaa canaje pea ai. Jjachichaquiyajo Demetiohua oya cuana huohui canaje jama ba'a: —Epeejji cuana, ¡shajja'ajjacue mo! Ecuanaaya epana'yo sisi ne majje quea huiso beijo jjesheaña epana'yo cuana sosejje. Jamaya miquianajaya eba. ²⁶Miquea eba Paboja esohui pea'ai. Ohuaya jama acani ba'a: "Epana'yo cuana dejjaja pana, Eyacuiñajji pojeama. ¡A'la epana'yo cuana bihuaijji! ¡Eyacuiñajji o nei bihuacue!" Pabohua acani. Paboja esohui shajja'ajja majje quea huiso cuana Epesojo ba'e, Asia meshijo ba'e pea'ai epana'yo cuana jjeshe majja sa po'yo ajja poanaje. ²⁷E'e pojja'a ojjaña eseja nejo mimijaji caje. Epana'yo cuana bihuia pajea caje'yo pojja'a. Epana'yo quea quemlo nee Diana bajjani bihuia pajea caje'yo, oja equi yasijje poqui pajeeje. Jjeya ojjaña cuaa Asia meshijo ba'leya, ojjaña meshijo ba'eca cuaa pea'ai epana'yo Diana bihuia cani, eyacuiñajji poso acani Diana —jamaya huohui canaje Demetiohua. Jamatii ojaya esohui siajje, de.

²⁸ Demetioja esohui shajja'ajja majje ojjaña cuana quea quene nee nee poanaje. Jama taaaame poanaje ba'a: —Diana eyacuiñajji jayojja quea pame nee. Epesojo enequi oya —jamaya taaa neinei nequinaje ojjaña.

²⁹ Jamajjeya ojjaña cuana Epesojo ba'e cuajicuajijebenaje taaaqui baa. Ojjaña quea shajjaquijjo nee nee, quea mase nee nee poanaje. Paboja epeejji iña majje dojocuajije ca'yonaje equi esohui huohui cani yasijje. Ma epeejji cuana Jayo bajjani, pea Anitaco. Oya cuana Masenonia meshijo ba'e. ³⁰ Shajja'ajja majje Pabo poqui sa poanaje dejja quea quene yasijje mimiya. Jesosaja epeejji cuaa ca ca oya nahue canaje. Jama poanaje ba'a: —Chojja, Pabo, ¡a'a poquijji jocuama! Miya shajja'ajja jjima acaje cuaa. Cuia ca chana' cuaa mi —acanaje.

³¹ Pea cuana emeshi meseja meshi cuiñasahuajji cuana Asia meshijo ba'e Paboja epeejji cuana poanaje. Ohuaya esohui tehue majje huoojea canaje Pabo que jama ba'a: —¡A'a poquijji miya esohui huohui cani yasijje! —jamaya tehue canaje Paboja epeejjiya, emeshi meseja echacojji cuaa.

³² Dejja cuana ma equijo ejjachichaqui nequi quea shajjaquijjo nee nee taaa canaje. Quea huiso cuana oe esohui taaa canaje. Pea cuana ca ca pea esohui taaa canaje. Quea huiso cuana jamatii jjachichaquinaje. Jama poanaje ba'a: —¿Ajeo acuae ojjaña taaa? ¿Ajeo jjachichaquinaje eseya so'o? —acanaje.

³³ Majoya Jodio cuaa Anejano huoojea canaje; ojjaña ejjatanacuaquijji ehui dojoriji nequinaje. Onaa Anejano taaa canaje; huohui canaje ojjaña ehuohuijji. Jamajjeya Anejanolhua tanacua canaje; eme' jeasohua majje jama acanaje ba'a: —¡Quea bei pocue! ¡Jayo, Anitaco pea'ai jja oe pichojea'yocue jja oe, de! ¡A'a jja cuiajji! —acanaje Anejanolhua.

³⁴ Jamatii oya Jodio pea'ai ba majje ojjaña cuana taaa o'oyanaje. Taaa tiiti nequinaje jama ba'a: —¡Diana eyacuiñajji jayojja quea pame nee Epesojo nequi. ¡Oya bihuiacue! —Jodio cuana epana'yo bihuia ajja neinei jjiejojo jamaya taaa canaje Epeso dejja cuana.

³⁵ Quijje nei Epeso cuiñajji meseja ojjaña tanacua canaje. Majoya jama acanaje ba'a: —Dejja cuana Epesojo ba'e, ¡shajja'ajjacue mo! Ojjaña cuanaja eba eseyaya Epesojo ba'eya epana'yo Dianaja equi quea quemo jaahuanaña. Ojjañaja eba yahuajo nei oe mei eyajo nequi oquea poa jiquio meshi yasijje. Ma mei ecuanajaya eyacuiñajji Diana pojji aca poa, ma mei eyajje oque. ³⁶ Jamajjeya ¡a'a quea quene pojji, quea shajjaquijjo a'a pojji! ¡A'a quea mimishi pojji! ³⁷ E'e, miquianaya jiquio dejja cuana iñanaje; jiquiacua jjequinaje. ¿Apiojji acuaeaya jiquiacua yenaje so'o? ¿A'a cuae jja oe siipojji so'o? Chojja, oya cuanaja aquiana Dianaja equijo sii jjima. Epana'yo Dianajo jjaniñebeaquii jjima pea'ai. ³⁸ Jamajjeya Demetiohua, o chacosahuajji cuaa pea'ai jiquio dejja cuana niñebe sa acanijo, emeshi mese yasijje cadojo cahua. Emeshi mese chaco canijo cahuohuiqui cahua. Majo tii cajjaniñebeaquiahua cuana. ³⁹ Jamajjeya miquianaya jiquio dejja cuana nijje mimi o'oya sa poanijo ¡emeshi meseja equi yasijje mimiqui o'oyacue quijje! ¡Emeshi meseja esohui jayojja jama pocue! ¡A'a quea shajjaquijjo pojji! ¡A'a quea quene nee pojji! ⁴⁰ E'e, onaaya Shomano emeshi mese etii huohui ca chana'. Onaa oya huohui cajo, emeshi mese etii ecuana nijje quea quene po chana': “¿Apiojji quea shajjaquijjo poani so'o? ¿Apiojji ecuea esohui jayojja jama ajjima', e que poe

jjimaa?" ohuaya eseya aca chana!. Jamaya Shomano emeshi meseya acajo, ¿yajja sohui saja'ame aje so'o? —acanaje Epeso cuiñajji meseya.

⁴¹ Jamajjeya jama huohui majje ohuaya ojjaña huoojea canaje equi cuana huasijje. Majoya dejja e'lña nequi pichojea ca'yonaje.

Pabo poqui o'oyanaje Masenonia meshi yasijke, Acaya meshi pea'ai yasijke

20 ¹Majoya ojjaña cuana equi yasijke poqui'yo majje, quea shajjaquijjo popajea'yo majje Pabohua Jesosaja epeeiji cuana iyaa canaje. Poeyanaje. Pabohua oya cuana quea bei huohui canaje jama ba'a: —E'e, eya poquije o'oya Masenonia meshi yasijke esohui huohui o'oyaa. Jamatii Jesosa miquiana nijje nequi, miquiana jaahuanajji. ¡A'a quea mete pojji! Poquia iña —amajje Pabo poqui o'oyanaje Masenonia meshi yasijke.

²Masenonia meshijo poquijeya quea huiso esohui Jesosajo huohui canananaje ojjaña Jesosaja epeeiji cuana huasijje. Ojjaña quea bihui nee po meesahua canaje. Jomajo esohui huohui'yo majje Pabo Acaya meshi yasijke poqui o'oyanaje. ³Acaya meshijo oya nequinaje pea beca peeijima ba'ime. Majoya oya jjashahuabaquinaje Sinia meshi yasijke ebepoquijji bishe aijo. Sinia meshi yasijke ebepoquijji nisho poaniya Pabohua shajja'ajja canaje Jodio dejja cuaa oya ishoa'ajja cani equecua'yojji. Jamajjeya huacuaya poqui o'oyanaje Masenonia meshi yasijke, ejiojjije. ⁴Jesosaja epeeiji quea huiso cuana Pabo nijje poquinaje. Oya cuana ma bajjani ba'a: Pinisia bacua ejja Sopatene, ma Beneajo ba'e, Anitaco, Seconino pea'ai, ma Tesanonicajo ba'e; pea Jayo ma Debejo ba'e; pea Timoteo; pea Tiquico, Topimo pealai ma Asia meshijo ba'e. Mahuiso poquinaje Pabo nijje Masenonia meshi yasijke. ⁵Majoya beca cuana besapoquinaje Toasa huasijje. Toasajo onaaya Pabo, ecuanaya pealai ishoa canaje. ⁶Ecuana Pabo nijje ejiojjije poqui o'oyanaje Pinipo cuiñajji yasijke. Pinipojo nequinaje. Majoya Jodio cuana jjachichaqui majje ojee ijjilijjianaje quea bihui nee epojji. Pahui shejjee mee jjima ijjianaje ecuaaya. Ojee pahui ca'a ijji majje ecuana Pinipojo ani bishe ai yasijke ani'yo majje besapoquinaje. Me oeje cahuime po majje ecuana ba'eñaquinaje Toasajo. Toasajo nequinaje me oeje becamejjiji pealai cahuime, ⁷ cahuime.

Toasajo nequiya Pabohua esho'i shequi mee ca'yonaje

⁷Ebionei epojja ejomishocajjijo, nomicojo, sinecua Pabo Jesosaja epeeiji cuana nijje jjachichaquinaje Jesosaja bobo ijjiqiji. Mecajjehua nei poqui sa poanaje. Pabo quea huiso sohuihuohui poequi tii jjamecashonoquinaje. ⁸Ecuana jjachichaquinaje equi ejama coo eya equecuayijjijo. Quea misi nee poanijo, cuaquijji quea huiso cuana dedonaje ecuaaya. ⁹Jomajo oe esho'i Eotico bajjani equi jiyo huejjajo anioquenaje. Pabohua esohui huohui majamaja caquijo, esho'i quea cojja cahui nee nee poanaje. Jiyo huejjajo cahui'yo majje quea ao oquequi'yonaje meshi yasijke. Oya baqui majje: —E'e, ee, mano'yonaje chahua, chama'yo tii —taaanaje.

Onaaya oya dojo canaje equi yiye dojjo huasijje emanol'yojaa.
¹⁰Jamajjeya Pabo jaaoquequinaje esho'i baa. Esho'i huojje canaje

Pabohua. Jama acanaje ba'a: —¡A'a quea yeno pojji! ¡Oya eshe, emano'yo pojjeama! —Pabohua acanaje.

¹¹ Majoya Pabo jaasohuaqui o'yanaje equecuayiji yasijje. Ojjaña ecuaaya Emeshi Mese nei Jesosaja bobi ojee ijjanaje. Majoya Pabo pea cuana nijje mimi o'yanaje. Jamatii esohui huohui poequi tii jjapoijaquinaje. Mecajjeahua nei eshequi jaasohua pishanajo Pabo poquinaje.

¹² Majoya esho'ija epreeji cuaa oya dojo canaje equi yasijje. Oya eshe o'oyajo, quea aja neejo ojjaña queabihui nee poanaje.

Pabo besapoquinaje Mineto huasijje

¹³ Majoya Pabohua ecuana huoojea canaje Asoni cuiñajji yasijje: —E'e, ¡miquianaya bishe oe dojo huioce Asoni yasijje! ¡Jomajo ishoañaquicue iñ! Eya jjeya nei poquije ejiojjiji Asoni yasijje. Majoya mo bishe yasijje aniquije —poanaje.

¹⁴ Jamajjeya Pabo Jesosaja epreeji cuana nijje ejiojjiji poquinaje Asoni yasijje. Nequiñaqui majje oya bishe ai yasijje aninaje ecuana nijje. Majoya ecuana poquinaje Mitinene cuiñajji yasijje cahuiya. ¹⁵ Mitinenejo cahui majje mecajjeahua nei ecuana bishejje besapoqui o'yanaje. Oe cahuime po majje ecuana ba'eñaquinaje Quio nasi chipi nei yasijje. Jomajo cahuiñaquinaje Samosi nasijo. Pea cahuijo ba'eñaquinaje Mineto huasijje. ¹⁶ Majoya Pabohua Epeso yejje canaje, Asia meshijo quea cahui huiso nequi sa po ajja poanaje. Oya poquicuajicuaji sa poanaje Jenosanena huasijje. Ba'eñaqui sa poanaje Jodioja bobi chichajji shejo, Petecote shejo. Ojjaña Jodio cuana ma pojja cuanajo quea bihui nee ojee ijjal'ijjiani ojjaña bobi chicha'ylo majje. Ma pojajoya Pabohua Jenosanenajo Eyacuiñajji bihui sa acanaje.

Pabohua pea esohui esohui huohuijji Epesojo ba'e huohui canequinaje.

¹⁷ Jamajjeya Minetojo ba'eñaqui majje Pabohua Jesosaja esohui huohuijji cuana Epesojo ba'e iyaa canaje. ¹⁸ Poeyajo Pabohua oya cuana jama huohuime acanaje ba'a: —Epreeji cuana, eya Asia meshi yasijje poeyajo, miquianaaya eya banaje quea pame nee chacochaonaje; ecuea esohui miquianaaya shajja'ajjanaje pe'aai. ¹⁹ Miquea eba eya Emeshi Mese nei Jesosa Quitoja echacojjii poani. Jesosajo eya miminaje quea pame nee. Eya quea miminaa pojjeama. Miquea eba eya pa neineinaje Jesosaja epreeji quea mimishi ba'yanijo. Miquea eba pe'aai Jodio etii cuaa eya quecuia acanijo ejo quea camaja poanaje. ²⁰ E'e, eyaya ojjaña Jesosaja esohui mete'ama huohui majamajanaje equi cuana huasijje, ojjaña jjachichaquiajo pe'aai. Ojjaña ba meesahuanaje. Maya miquea eba. ²¹ E'e, eyaya ojjaña huasijje esohui huohui neineinaje Jodio cuana, Jodio pojjeama cuana huasijje pe'aai. Ojjaña jama anaje ba'a: “¡Miquea mimishi cuana pajea'yocue! ¡Eyacuiñajji esohui shajja'ajjacue! ¡Jesosa nijje jjapeequicue e'e jojo nei! Oya Emeshi Mese nei” eyaya anaje. ²² Jjeyahua eya Edojoshahua

Pameya huoojea caje Jenosanena huasijje. ¿Yajja shai Jodio cuaa eya acaje so'o? Ecuea ba jjima. ²³Jamatii Edojjoshahua Pameya eya ba mee cani jama ba'a: "Pea cuaa miya iñia caje o'oya. Ejjajeanobiaquijji yasijje miya jeanobia caje'yo. Mijo quea camaja poaje. Miya quea nee nee poaje" jamaya ojjaña cuiñajji yasijje poqui majanijo Edojjoshahua Pameya eya ba mee cani —Pabohua acanaje—. ²⁴E'e, onaaya eya sapa jajahuejjajea ca chana!. Jamatii eya mete'ama. Emeshi Mese nei, Jesosa e huoojea'yoji poani. Ojjaña ojaya ehuohui jayojja jama eya a sa poani. Ohuaya eya huoojea canaje esohui quea pame nee Jesosaja huohuiya jama ba'a: "Eyacuiñajjiya ojjaña cuana quea jea nee acani. Ojjaña Jesosaja epeejji cuanaja mimishi cuana cuijea ca'yani. Oya cuana ba'e tiitii mee caje'yo eyajo. Pabo, ¡jamaya huohuime acue!" eya acanaje Jesosaa. ²⁵Jamajjeya eyaya ojjaña miquianaya huohuinanananje Jesosajo: "Jesosa Eyacuiñajji nijje ojjaña huoojeajji oe nei poaje'yo" eyaya anaje. Jjeyahua nei ca ca eya poquije'yo. Ecuea eba miquianajaya eya eba o'oyajji pojjeama. ²⁶Jamajjeya jjeyahua nei eyaya miquianaya e'e jojo nei huohuiaña jama ba'a: E'e pojja'a beca cuana miquiana nijje nequi shajja'ajja sa po'yo ajjajo cuaqui yasijje poquije'yo; cuaquijo nequi tiitije'yo mano'yo majje. Jamatii eyaya esohui huohuinajje ojjaña cuana huasijje. Onaya mimimimi mee ajja jama ba'a: "Ecuea Jesosaja esohui shajja'ajja jjima poanaje. Paboja eya huohui jjima". Chojja, ehuohui poanaje.

²⁷—E'e, eyaya ojjaña Eyacuiñajjiya esohui huohui neineinaje miquianajaya eshajja'ajjajji. ²⁸Jamajjeya ¡miquianaya oe jjajaahuanaquicue! ¡Jesosaja epeejji cuana jaahuanacue quea pame nee peal'ai! E'e, Edojjoshahua Pameya mi huoojeajji poaniya miquianaya Jesosaja epeejji jaahuanajji po mee canaje. Jamajjeya joya cuana jaahuana neineicue! Eyacuiñajjiya oja Bacua Ejja oe nei huoojea canaje oja epeejji epoijiyo mano'yohua. Eyacuiñajjiya ojaya epeejji cuanaja mimishi cuijea ca'yonaje. Jesosaja epeejji cuanaja mimishi cuana cuijea ca'yajje oja bacua cuana po mee canaje, Eyacuiñajjiya. ²⁹Jamatii ecuea eba eya poqui'yajo beca cuana, eshahuaja epeejji cuana quea mimishi poaje. Jesosaja epeejji cuana poquiquehua mee sa acaje. Jesosaja esohui pajea mee sa acaje peal'ai. E'e, jiquio ecua ibia quea maseya ñajjajja poquiquehuajeanana mee cani, chama'yo tii po mee cani jayojja jama eshahuaja epeejji cuaa Jesosaja epeejji cuana aca chana!. ³⁰Jjeya beca cuana miquiana nijje nequi minijje jjapee nishoquije. Quijje ohuaya Jesosaja epeejji cuana siajje acaje; Eyacuiñajjiya esohui e'e nei huohui ajja. Jesosaja epeejji cuana oe pojji poquiquehuaje ma siajjepoji cuana nijje. ³¹Jamajjeya ¡jjashahuabaquicue oe! ¡Ecuea esohui a'a pajea'yoji miquianaaya! E'e, pea beca peejiima shequiajame eyaya miquianaya esohui huohui neineinaje epoijajo, mecajje peal'ai huohui majamajanaje eyaya. Huohuipoquia majje eyaya niñeshe'apoquianaje. Miquianajo eya quea yeno popoquinaje —Pabo poanaje.

³²—Jjeya eya poquije'yo. Eyacuiñajji nijje miquianajo mimije jama ba'a: "Eyacuiñajji, ¡Jesosaja epeejji cuana jaahuanacue! ¡Miquea esohui a'a pajea mee'yoji! Miquea esohuijo oya cuana miquea epeejji quea ja'a nee poaje'yo. Jamajjeya miquea epeejji quea ca'a nee poaje. ¡Oya cuana

quea pame nee acue! Jamaya miyaya aña ojjaña Jesosaja epeejji cuanajo. Eyajo minijje ba'e tiitii meeje'yo pealai. Jamaya ecuea eba". E'e, jamaya eya Eyacuiñajji nijje mimiani miquianajo.

³³—E'e, miquianajaya eba pealai onajaya daqui cuana, onajaya bejjo pealai ecuea jea ba jjima. ³⁴Chojja, ecuea bobijo, ojjaña ecuea eba'ejjijo pealai eya chacochaco nequinaje. Ecuea epeejji cuana enijje poquiani eyaya bobianaje pealai. Maya miquianajaya eba. ³⁵¡Jamaya eyaya miquianaya ba meenaje ojjaña quea pame nee chacocue! ¡Aema! ba'e meesahuacue pealai! Jamajjeya ijamaya acue miquianaaya! ¡Emeshi Mese nei Jesosaja esohui pealai a'a pajea'yojji! Jama ba'a: "Pea cuana aquiana quia majje miya quea bihui poaje. Joya miya aquiana quiaña quea bihui pishana poaje" jamaya Jesosa poanaje —Pabohua acanaje.

³⁶Majoya Pabo, ojaya epeejji cuana pealai Eyacuiñajji nijje ojee miminaje ecui'oshajjajo nequi majje. ³⁷Paboja epoqui'yojji ojjaña ojaya epeejji cuana pa canaje. Pabo cuiapashi ca'yonaje, poquije'yo ba canaje. ³⁸Quea yeno poanaje Paboja esohuijo: —E'e de, ecuanaja Pabo eba o'oyajji pojjeama pa jiquio meshijo —oya cuana poanaje.

Jamajjeya ojaya epeejji cuana quea yeno poanaje. Ojjaña cuana onijje bishe yasijje poquinaje. Besapoquije'yo ba canequinaje.

Pabo Jenosanena huasijje poqui o'oyanaje

21 ¹Jamajjeya bishe ai yasijje ani majje ecuanaja epeejji cuana jeana'yonaje. Epi nei besapoquinaje Cosi nasi yasijje cahuiya. Mecajjeahua nei besapoqui'yonaje Shona nasi yasijje. Majoya besapoquinaje Patana cuiñajji yasijje. ²Patanajo ecuaaya pea bishe ai sa'ajjanaje Penisia meshi yasijje ebepoquijji. Bishe ai jaa ba majje ecuana nequisohuaquinaje bishejo aninaje. Majoya besapoqui o'oyanaje. ³Besapoquijeya, Chipe nasi chipi nei besapoquijeya meshi banaje. Chipe nasi ai ebianeí mijijje yejjenaje Sinia meshi yasijje besapoquijeya. Tino cuiñajji bañaqui majje ba'leñaquinananaje. Ebishe ai meseya aquiana quea huiso nee bishejo ani jeasohuaqui canaje etaja huasijje. Pabo ecuana nijje etaja huasijje nequisohuaquinaje. ⁴Tino huasijje poquinaje Jesosaja epeejji cuana baa. Ba majje ona nijje nequinaje me oeje becanejjiji pealai cahuime, 7 cahuime. Edojjoshahua Pameya oya cuana Pabo huohui meesahua canaje jama ba'a: —¡Jenosanena huasijje poquiajo Jodio cuaa miya iña ca chana! Jamajjeya ja'a jocuama poquijji, Pabo! —acanaje cuaa.

⁵Jamatii bishe ai apoa poajo Pabo ecuana nijje poquinaje bishe yasijje. Jesosaja epeejji cuana, yahue cuana, ehuanase cuana, esho'iquiana pealaiya bishe ai yasijje poquinaje ecuana nijje Pabo poquije'yo baa. Meshijajijo, bae sahuajo Eyacuiñajji nijje ojee miminaje ecui'oshajjajo nequi majje. ⁶Majoya ecuana: —E'e, besapoquia iña —amajje bishe aijo ani o'oyanaje ebepoquijji Ojjaña Jesosaja epeejji cuaa Pabo poquije'yo ba canequinaje. Majoya oya cuana equi cuana huasijje poqui o'oyanaje.

⁷Jamajjeya Tino cuiñaggi jeana'yo majje ecuana besapoquinaje Tonemaina cuiñaggi yasijje. Ba'eñaqui majje Jesosaja epeejji cuana jomajo ba'e baquinaje. Ojjaña nijje miminaje quea bihui nee. Ona nijje nequinaje oe cahuime. ⁸Majoya meccajjeahua nei ecuana poqui o'oyanaje bishe yasijje. Besapoqui o'oyanaje Sesanea huasijje. Ba'eñaqui majje esohui huohuijji Penipe bajjanija equi yasijje jaasohuaquinaje; onijje ba'enaje. Oya Penipe yahuajo nei Jesosaja epeejji cuaa Jenosanenajo ba'eya babaca canaje me oeje becanejjiji pe'a'i, ⁷pea cuana nijje Eyacuiñajjija echacojji epoiji, e'ahuemano bobi quiajji. ⁹Penipeja ebeca pea pe'a'i ebacuase ahuema'ani, bii ani oja equijo ba'e. Oya cuana Eyacuiñajjija esohui huohuijji pe'a'i poanaje. ¹⁰Pabo, Penipeja equijo oe pojji cahuime nequiyajo, Eyacuiñajjija esohui huohuijji poeyanaje Acabo bajjani, ma Jodea meshijo ba'e. ¹¹Pabo que poe majje Acabohua Paboja ejjacomayijjiquijji jjeshe majje jjajiojji jeyoqui'yonaje, eme' cuana pe'a'i. Majoya Pabo huohui canaje jama ba'a: —Edojjoshahua Pame enijje jama poanaje ba'a: "Jiquio ejjacomayijjiquijji mese Jenosanena huasijje poqui'yajo jamaya Jodio cuaa oya jeyo caje'yo. Jeyo majje oya quia caje Jodio pojjeama huasijje; quea nee nee poaje" poanaje —Acabohua acanaje.

¹²Acaboja esohui shajja'ajja majje ecuaaya, pea epeejji cuaa jomajo ba'eya pea'ai Pabo pa'anija tii huohuinaje jama ba'a: —Pabo ¡a'a oe poqui'yojji Jenosanena huasijje! Jodio cuaa miya iña ca chana' —poanaje.

¹³Jamatii Pabohua ecuana jama acanaje ba'a: —¿Apiojji acuae quiana pani so'o? ¡A'a eya quea yeno po meeiji! Jodio cuaa Jenosanenajo ba'eya jeyo cajje mo mete'ama poaje. Emeshi Mese nei Jesosa nijje jjapeequianijojo onaa quecuca ca'yajje, jamatii eya mete'ama —Pabohua acanaje.

¹⁴E'e, ecuaaya Pabo nahue'ajjanaje: —¡A'a poqui o'oyajji!
—amajamaja'ajjanaje.

Jamatii Pabo jama poanaje ba'a: —Chojja, eya jocuama capoquiahua. Jamaya yahuajo Edojjoshahua Pameya eya acanaje.

Jamajjeya ecuana jama poanaje ba'a: —E'e Pabo, ¡Eyacuiñajjija ejjashahuabaquijji jayojja jama acue! —ecuana poanaje.

¹⁵Jamajjeya quea cahui huiso pishana Penipeja equijo ani majje ecuanaja aquiana cuana bio majje: —Epeejji cuana, poqui'ya iña —po majje ecuana Jenosanena huasijje poqui'yonaje ejiojjiji. ¹⁶Jesosaja epeejji cuana Sesaneajo ba'e ecuana nijje poquinaje. Jenosanenajo nequiñaqui'yajo ohuaya ecuana dojo canaje Masonija equi yasijje ba'eya. Yahuajo Masoni Chipe nasijo ba'enaje. Oya Jesosaja epeejji poanaje yahuajo nei.

Pabo poquinaje Satiaco baa o'oya

¹⁷Ecuana Jenosanena huasijje poe'yajo, Jesosaja epereeji cuana ecuana ba majje quea bihui nee poanaje. ¹⁸Mecahuajje Pabo ecuana nijje poquinaje Satiaco baa. Jomajo ojjaña Jesosaja epereeji etii cuana, esohui huohuijji cuana pea'ai jjachichaquinaje. ¹⁹Pabo ojjaña nijje esohui quea bei nee miminaje. Ohua chaco canajejo huohui canaje jama ba'a: —Eyacuiñajjiya eya esohui quea pame nee Jesosajo Jodio pojjeama cuana huasijje huohui meesahua canaje. Eyacuiñajjiya ohuaye nei ma dejja acjima acani eya ameesahua canaje Jesosaja esohui huohuañajo —Pabohua acanaje.

²⁰Jesosaja epereeji etii cuaa Paboja esohui shajja'ajja majje Eyacuiñajji bihuia canaje. Pabo jama acanaje ba'a: —Jamaya quea pame nee, epereeji. ¡Bacue! Jjeyahua nei quea huiso nee nee, quea huiso mil Jodio cuana Jesosa nijje jjapeequiani. Jamatii Jodio cuaa ojjaña Jesosaja epereeji cuana huohui cani jama ba'a: “Moisesija etehue'yo jayojja jama acue!” acani. ²¹Pea cuaa oya cuana quea huiso siajje acani mijo. Jama acani ba'a: “Pabohua Jodio cuana Jodio pojjeamaja meshijo ba'e huohui cani jama ba'a: —¡Moisesija etehue'yo jayojja jama a'a ajji! ¡Jodio cuanaja etiiquianaja ehuohui'yo jayojja jama a'a pojji! ¡Miquianajaya bacua a'a cuiishasha jehuisejjajea meeiji pea'ai! —acani Pabohua”. Jamaya onaaya mijo siajje acani, Pabo. Jamajjeya Jodio cuana jiquiojo ba'e minijje quea quene. ²²E'e jojo nei onaaya oya cuana huohui caje jama ba'a: “Pabo pa jjaja poe'yonaje Jenosanena huasijje”. Jamaya acajoya ojjaña cuana jjachichaquije. Majoya ¿yajja shai miya acaje, de? ²³Jamajjeya ¡ecuanaja esohui jayojja jama acue, Pabo! —poanaje Satiaco—. Jiquiojo yani ebeca pee pea'ai Jodio dejja Eyacuiñajji nijje miminaje. Ma ecua oya yahuajo Eyacuiñajji nijje miminaje jama amajje huojjaña dedejea mee caje. ²⁴Jamajjeya ¡onijke poquicue Eyacuiñajjiya equi quea quemo huasijje! ¡Esejaya etiiquiana Moisesija etehue'yo jayojja jama acue quea bojeja'yo jayojja epojji, ona nijje! ¡Ojjañaja huojja dedejea jjimahuajo sosequiacue! ¡Miyaya onajaya huo cuana jjeshecue! ¡Jjeshe majje dahua meecue Eyacuiñajji bihuiajji! Jamajjeya ojjaña Jodio dejja cuaa ba caje miya pea Jodio cuana jayojja jama poani. Moisesija etehue'yo jayojja jama poani pea'ai. ¡Jamaya ojjaña ba meecue pea cuaa mijo siajje acanaje! —poanaje—. ²⁵¡Jodio pojjeama Jesosaja epereeji poani ca ca Moisesija etehue'yo jayojja jama a'a ameejji! Chojja. Yahuajo eseyaya Jodio pojjeama huasijje esohui tehuename jama ba'a: “¡Noe ma onaa dahua canaje eyacuiñajji nisho bihuiajji'ya a'a ijjiajji! ¡Noe na' cuaya meequi jjima a'a ijjiajji! ¡Ijjiacajji na' a'a ishiji pea'ai! ¡A'a pea cojjojji pojji!” jamaya yahuajo eseyaya Jodio pojjeama cuana huasijje tehuename, mahuiso —jamaya acanaje Satiacohua.

²⁶Jamajjeya mecajjeahua nei Pabohua ma Jodio dejja cuana nijje poquinaje Eyacuiñajjija equi quea quemo huasijje. Ejiojji cuana, eme cuana pealai topo neinei canaje. Majoya oya cuana Eyacuiñajjija equi quea quemo huasijje dobiquinaje. Eyacuiñajji nijje emimiji huohui canaje jama ba'a: —Oe pojji cahui po majje, ecuana quea boejea nee nee po majje eyaya huo jjesheje ecuea, ecue epeejji cuanaja pealai. Jiquiacua yeje, dahua meeje Eyacuiñajji bihuiajji —Pabo poanaje.

Pabo iña canaje cuaa Eyacuiñajjija equijo nequi

²⁷Me oeje becanejjiji pealai, 7 cahui po majje Pabo oja epeejji cuana nijje poqui o'yanaje Eyacuiñajjija equi quea quemo huasijje. Moisesija etehue'y o jayojja jama ponequinaje. Pabo Eyacuiñajjija equijo nequi Jodio dejja cuaa Asia meshijo ba'eya oya ba canaje. Oya cuana Pabo nijje quea quene nee poanaje. Ojjaña cuana Pabo nijje quea quene nee po mee canaje. Pabo iña mee canaje cuaa. ²⁸Oya cuana taaaanje. Jama siajje pome poanaje Pabojo ba'a: —Isaeni dejja cuana, ¡poecue! ¡Jiquio dejja mo iñasahua meecue! Ohuaya ojjaña meshi yasijje poquijeya huohui canananaje jama ba'a: “¡A'A Moisesija etehue'y o jama pojji!” Ohuaya Eyacuiñajjija equi niñeba cani. Isaeni cuana niñeba cani pealai. Jjeyahua nei ohuaya Jodio dejja pojjeama dojodobiaqui canaje Eyacuiñajjija equi yasijje. Jamaya ohuaya jiquio equi quea jehue jayojja po mee cani —jamaya Pabojo siajje poanaje Jodio cuana. Jama mimime po majjeya Pabo iña canaje.

²⁹E'e, yahuajo onaaya Topimo ba canaje Pabo nijje Jenosanenajo nequi. Topimo aje oe Jodio pojjeama, Epesojo ba'e. Oya Eyacuiñajjija equi quea quemo huasijje dobiqui jjima. Jamatii Jodio cuaa Pabohua Jodio pojjeama Topimo bajjani Eyacuiñajjija equi quea quemo huasijje dojodobiaqui canaje poso acanaje. Jamajjeya quea quene nee nee poanaje. ³⁰Jamajjeya quea huiso Jodio cuana Jenosanenajo ba'e cuajicuajjebenaje Pabo que. Miminaanaa majje Pabo iña canaje. Dojocuayaqui canaje Eyacuiñajjija equi secue jjani yasijje. Pabo dojocuayaqui cajo, esecue ca'a canaje. ³¹Oya cuana quea quene nee nee, quea mase nee nee poanaje. Pabo sapa jajahuejjajea sa acanaje meiya. Onaaya ca ca Shomano emeshi meseja sohuinano huoojeajji poani que cuajicuajipoquinaje; huohuiqui canaje jama ba'a: —¡Bacue oe! Ojjaña Jenosanenajo ba'eca quea shajjaquijjo nee nee poani, cuajicuaji canaje jjachichaquiequi baa —poanaje.

³²Jamajjeya sohuinano huoojeajji pe a sohuinano huoojeajji cuana, sohuinano cuana pea'ai iyaa majje dojocuajicuaji canaje Jodio cuana quea quene jjachichaquiequi yasijje baa. Sohuinano cuana, sohuinano huoojeajji nijje poeje ba majje Jodio cuaa Pabo cuia pajea canaje.

³³Sohuinano huoojeajji Pabo que poe majje oya iña mee canaje. Jeyo mee canaje baa jjono becaa. Majoya Jodio cuana huohui'ajja canaje: —¿Ae bajjani oya? ¿Yajja acuae jja so'o? ¿Yajjajo acuae jjaya cuiaña?

³⁴Beca Jodio cuaa oe esohui huohui canaje. Pea cuaa pea esohui huohui canaje. Ojjaña quea shajjaquijjo poanijo, sohuinano huoojeajji shajja'ajja meemee ajja

ae shai Pabohua acanaje. Jamajjeya ohuaya sohuinano cuana huoojea canaje Pabo dojhua sohuinano cuanaja equi quea quemo huasijje.³⁵ Sohuinanoja equi ejiojji ejaasohuaquijji yasijje poeyajo, Jodio cuaa Pabo iñsa acanaje. Jamajjeya sohuinano cuaa oya jjequisohua majje dojo canaje equi yasijje.³⁶ Jodio cuana sohuinano huoojeajji quiquishiji poeje taaajebenaje jama ba'a: —¡Quecuajeacue oe! ¡Quecuajeacue oe! ¡Camano'yahua oya! —taaame pojebenaje.

Pabohua Jodio equenequene cuana saja'a canaje

³⁷ Sohuinano cuaa oya equi quea quemo huasijje beshahua nei ohua dojodobiaqui caniya Pabohua sohuinano huoojeajji jama acanaje ba'a: —Eya minijje mimi sa poani.

Ohuaya Pabo saja'a canaje jama ba'a: —¿A'a miquea Jieno cuanaja esohui eba? ³⁸ Jamajjeya miya Ejito dejja quea mimishi pojjeama, ma yahuajo emeshi mese quecuapanajji epo pojjeama. Ohuaya quea huiso nee nee, ebeca pee pea'ai mil dejja emeje dojorji cuana quehua dojo canaje meshi quima huasijje. Ojo onaya ojjaña quea mete poanaje. ¿A'a miya oya pojjeama? —acanaje sohuinano huoojeajjiya.

³⁹ Pabohua jama acanaje ba'a: —Chojja. Eya Jodio, Sinisia meshijo ba'e. Eya Tanasojo cuaya. Jomajo tiinaje. Ma cuiñajji quea quemo, ojjaña eba. ¡Che mo jjeya eya mimi meecue Jodio cuana nijje! —Pabohua acanaje.

⁴⁰ Jamajjeya sohuinano huoojeajjiya Pabo saja'a canaje jama ba'a: —¡E'e, mimicue! —acanaje.

Majoya Pabo nequinaje ejiojji ejaasohuaquijjijo. Eme jeasohua canaje. Ojjaña cuana tanacula canaje. Tanacula'yo majje Pabo miminaje Jodio cuana nijje ojaya esohuijo, Emeoja esohuijo.

22 ¹Pabohua jama acanaje ba'a: —Ecuea epeejji cuana, etii cuana pea'ai, ¡shajja'ajjacue mo! Eyaya miquianaya huohuije —acanaje.

²Pabo onajaya esohuijo, Emeoja esohuijo mimiani shajja'ajja majje ojjaña Jodio cuaa jecaje canaje. Jamajjeya Pabo miminaje jama ba'a: ³—Eya Jodio miquiana jayojjaya. Tanasojo eya cuayanaje, Sinisia meshijo. Majoya Jenosanena huasijje poeyanaje esohui huohuijji Jamanie bajjanija esohui baa. Ohuaya eya sohuihuohui canaje. Jiquiojo eya tiinaje. Jamanieya Eyacuiñajjija esohui esejaya etiiquianaja eya sohuihuohui canaje. Eya Eyacuiñajjija epeejji poanaje. Joya ecua miquianaaya jjeya bihuiaña jayojja jama eyaya Eyacuiñajjija bihuianaje. ⁴E'e, yahuajo eyaya Jesosaja epeejji cuana iñanaje Jesosaja esohui ehuohui ca poani jjejojo. Ejjajeanobiaquijji yasijje jeanobiajeanaje dejja cuana, epona cuana pea'ai. Oya cuana mano mee'yo sa anaje eyaya. ⁵Jodio etii cuanaja, joya Eyacuiñajjija nijje miminequianija eba ecuea esohui e'e nei. E'e, ohuaya eya esohui etehue'yo quia canaje Jodio dejja Damasicojo ba'e yasijje equiajji jama ba'a: ¡Pabo Jesosaja epeejji cuana iñsa meesahuacue! ¡Jeyo meesahuacue cadenaa Jenosanena huasijje edojorji, ejeanobiajeajji Jesosaja esohui huohuijjijojo!" jamaya Jodio etiiya tehue canaje —Pabo poanaje.

6—Majoya Damasico chipi nei nequiñaqui majje eshequi biacojjajja nequijo eyajo ejijiji quea ja'a neeya eya jeaja'a canaje. 7Eya quea ajjajja jjejojo oquequinaje meshi yasijje. Majoya eyaya shajja'ajjanaje eyajo enijje mimije jama ba'a: "Sanoni, Sanoni, ¿apiojji acuae miyaya eya napaña so'o?" eyajo aniya eya acanaje. 8"¿Ae bajjani miya?" eyaya anaje. "Eya Jesosa, ma Nasanenajo ba'enaje. Miyaya aje oe eya napaña" acanaje Jesosaa eyajo aniya.

9—Dejja cuaa enijje poquianiya ejeajijiji quea ja'a nee ba canaje. Onajaya ca ca Jesusaja esohui enijje shajja'ajja jjima, ojaya quea quehua. 10Majoya eyaya huohui'ajjanaje: "Emeshi Mese nei, ¿ae sa poani miya?" Ohuaya eya saja'a canaje jama ba'a: "¡Nequisohuacue! ¡Damasico huasijje poquicue! Jomajo peaa miya huohui caje miquea echacojji ma miyaya ejo quijje aje. ¡Ma esohui jayojja jama acue ejo!" eya acanaje.

11—Majoya eya nequisohu'a'yonaje; cojjama'. Jesosaa jeaja'a cajje cojja quijjo'yonaje. Jamajjeya ecuea epeejji cuaa eya mepejjejea canaje Damasico huasijje.

12—Jomajo oe dejja Anania ba'enaje. Ohuaya Moisesija etehue'yo jayojja jama atiiti canaje. Oya ojjaña Jodio cuanaja quea boti nee poanaje, Damasicojo ba'eja. 13Ohuaya e jaa huasijje poe majje eya huohui canaje jama ba'a: "Ecuea epeejji Sanoni, ¡quea cojja ja'a po o'oyacue!" Ohua huohui cajje jjeyahua nei eya quea cojja ja'a po o'oyanaje. Anania banaje eyaya. 14Majoya ohuaya eya jama acanaje ba'a: "E'e, Eyacuiñajji esejaya etiiquianaa bihuia ca poa. Ohuaya miya babaca ca poa oja huoojea'yo ojjaña jaahuanajji quea pame nee nee baa. Jjeyahua nei miyaya oya, Jesosa shajja'ajjanaje; minijje miminaje. Eyacuiñajjiya miya ba mee caje ojaya ejashahuabaqui'yojji pealai. 15Ma miya jjeya banaje, ma miya shajja'ajjanaje pea'ai miya huohui meesahua caje Eyacuiñajjiya ojjaña cuana ojjaña meshijo ba'e yasijje. 16Jamajjeya ja'a ishoa majajji! ¡Jjeya nei Eyacuiñajji nijje mimicue miquea mimishijo! ¡Jesosa nijje jjapeequi'yocue! Ohuaya miquea mimishi cuana cuijea caje'yo. Majoya eyaya miya besa meeje Eyacuiñajjiyo" eya acanaje Ananiaa.

17—Majoya eya poe o'oyanaje Jenosanena huasijje. Poe majje eya poquinaje Eyacuiñajjiya equi quea quemó huasijje onije mimiya. Eyacuiñajji nijje mimianijo, Jesosaa eya jjacahuibaqui mee canaje. 18Ohuaya eya jama huohuime acanaje ba'a: "¡Jenosanena esecue yasijje poquicue jjeyahua nei! Jiquiojo ba'e cuaa miquea esohui ejo shajja'ajja jjima acaje" eya acanaje. 19"Jesosa" eyaya oya saja'anaje, "miquea eba yahuajo eyaya Jodio cuanaja equi ejachichaquijji yasijje dobiqui majje, miquea epeejji iña majje jeyonaje baa jjonohua. Cuiasejjajeanaje. 20Yahuajo pea cuaa miquea esohui huohuijji Estema sapa jajahuejjajea canajejo, eyaya chipi nei nequiya banequinaje. E'e, oya cuana Estema nijje quea mase poanjo eya quea bihuí nee poanaje pea'ai. Dejja cuaa oya sapa jajahuejjajea canijo, eyaya onajaya daqui ao jaahuananaje, Estema sapa jajahuejjajeajji epo cuanaja daqui" jama saja'ameya eyaya Jesosa anaje. 21Majoya Jesosaa eya huoojea canaje jama ba'a: "¡Poquicue, Pabo! Eyaya miya huoojeaje quea huesha nee Jodio pojjeama cuana huasijje esohui huohuiya ejo" eya acanaje Jesosaa —Pabo poanaje.

Sohuinano huoojeajjiya Pabo nahue canaje

²²Jodio cuaa Paboja esohui shajja'ajja canaje. Ojaya esohui Jodio pojjeamajo oya cuana shajja'ajja sa po ajja. Quea quene nee poanaje. Janobajjima nei taaa o'oyanaje jama ba'a: —¡Oya dojo'yocue! ¡Oya quecuajeacue oe! ¡Oya quea taijo quecuajeacue! —taaame poanaje Jodio cuana.

²³Jodio cuaa quea queneya jjejojo daqui jeasohuajea canaje eyahuasijje. Meshi pohui jeasohuajea canaje pea'ai. Taaa neineinaje.

²⁴Jamajjeya sohuinano huoojeajjiya sohuinano cuana huoojea canaje jama ba'a: —¡Pabo eyiye dojjo huasijje dojocue! ¡Oya janobajjima nei cuiacue! ¡Achajja oya ba'e ba'ajja socue! ¡Yajjajo Jodio cuaa oya niñeba cani ba'ajja socue! ¿Ajeo quea quene nee nee taaani? ¡Ba'ajja socue! —acanaje sohuinano huoojeajjiya.

E'e, oya jjashahuabaquinaje jama ba'a: —Pabo siajje poani. Eya cuiajje oya siajje popajeaje —poso acanaje sohuinano huoojeajjiya.

²⁵Jamajjeya sohuinano cuaa Pabo jeyo canaje ecuiasejjajeajji. Jeyo cajo Pabohua sohuinano huoojeajji quea chipi nee nequi jama acanaje ba'a: —Eya miquea ba jjima. Eya Shomano dejja pea'ai. Jamajjeya emeshi meseya miquianaya eya cuia mee ajja quea mimishi po jjimajojo, achajja eya ba'e ba jjimajojo. Jamaya emeshi meseja esohui —Pabohua acanaje.

²⁶Ma shajja'ajja majje ma sohuinano huoojeajji quea mete poanaje. Poquicuajinaje sohuinano huoojeajji etii huohuiya. Jama huohuiñaquime acanaje ba'a: —¡Bacue! ¿Apiojji acuae miyaya jiquio dejja Pabo napa meeña so'o? Oya ca jja ca oma Shomano dejja, de —acanaje.

²⁷Jamajjeya sohuinano huoojeajji etiiya ma shajja'ajja majje metenaje, Pabo que poquicuajinaje. Oya huohui'ajja canaje jama ba'a: —¿A'a miya Shomano dejja e'e jojo nei? ¡Huohuicue mo oe!

—E'e —Pabohua oya saja'a canaje—, eya Shomano dejja, de.

²⁸Majoya sohuinano huoojeajji etiiya jama acanaje ba'a: —E'e pojja'a, de. ¡Bacue! Eyaya quea huiso bejjo quia majje Shomano dejja po'yonaje. Sosequianaje quea huiso nee nee, de —acanaje ohuaya; oja chii Shomano dejja pojjeamajojo oya pea.

Jamajjeya Pabohua jama acanaje ba'a: —Ecuea ca ca ecue chii Shomano dejja poanaje. Jamajjeya eya ca ca Shomano dejja cuayanaje —acanaje Pabohua.

²⁹E'e de, sohuinano cuaa beshahua nei Pabo cuiasejja canaje. Ma shajja'ajja majje ca ca ohuaya Pabo pichojea ca'yonaje. Oya Pabo Shomano dejja ba majje sohuinano huoojeajji quea mete nee poanaje ecuiajji. Jamajjeya ojaya esohuijo pea cuaa Pabo jeyo canaje baa jjonohua. Jamaya Shomano dejja ameemee ajja achajja oya ba'e ba jjimahuajo.

Pabo Jodio etii cuana nijje mimi o'oyanaje

³⁰Majoya mecajjeahua sohuinano huoojeajji ba sa poanaje jama ba'a:
—¿Ajeo shai Pabo nijje Jodio cuana quea quene nee nee poanaje?

Jamajjeya mecajjeahua ohuaya Pabo pichojea mee canaje ma ejeanobiajaa ejeyo nequi. Majoya ohuaya Jodio cuana Moisesija esohui etehue'yo huohuijji poani, Eyacuiñajji nijje emimiji cuana pea'ai iyaa canaje. Jjachichaqui'yajo, sohuinano huoojeajji etiiya Pabo dojo canaje esecue yasijje Jodio cuana nijje mimiya. Pabo mete'ama nequinaje. Dejja cuana cojja ba canaje mete'amaa jjekojo.

23 ¹Pabohua Jodio etii quea huiso cuana cojja ba majje jama acanaje ba'a: —Epeejji cuana, ¡shajja'ajjacue mo! Eyacuiñajji eba eya mimishi'ama ba'enaje yahuajo, jjeya pea'ai. Jamajjeya eya bicho'ama.

²Ma shajja'ajja majje Eyacuiñajji nijje mimiani etiiya Ananiaa pea Pabo chipi nei nequi jama acanaje ba'a: —¡Joya Pabo naba cuiasejjajeacue miyaya!

³Jamajjeya Pabo onijje jama poanaje ba'a: —Eyacuiñajjiya miya cuia caje pea'ai. Miya ejjadasiaquijji. ¿Apiojji acuae miya Moisesija etehue'yo jayojja jama po ajja? Miyaya eya pea cuia meeña. Jamaya pojjeama Moisesija etehue'yo —Pabo poanaje.

⁴Pea Pabo chipi nei nequiya oya jama acanaje ba'a: —¡A'a jja oe Eyacuiñajji nijje mimiani etii nijje mimijajiji, de!

⁵Pabohua majoya ojjaña saja'a canaje jama ba'a: —Epeejji cuana, ecuea ba jjima oya Eyacuiñajji nijje mimiani etii. E'e, Eyacuiñajjiya esohui etehue'yo jama poani ba'a: “¡Miquea emeshi mese nijje a'a mimijajiji!” —Pabohua acanaje.

⁶Paboha eba quea huiso Jodio cuana jomajo nequi Sanoseo cuana poanaje. Pea cuana ca ca Paniseo cuana. Jamajjeya Pabohua etii cuana jama acanaje ba'a: —Epeejji cuana, eya Paniseo. Ecue chii Paniseo poa. Paniseoja esohui jayojja jama eyaya huohuaña jama ba'a: “Quije Eyacuiñajjiya emano'yo cuana shequi mee caje o'oya. Ojjaña cuana eshe o'oya poaje”. Jama ehuohui poaje jjejojo eya pea cuaa iña canaje —Pabohua acanaje.

⁷Paboha esohui shajja'ajja majje Paniseo cuana jjamimicuajeanobiajea neineiquinaje Sanoseo cuana nijje. ⁸Paniseo jayojja jama pojjeama Sanoseo cuana aje oe jama poani ba'a: “Dejja cuana mano'yo majje eshequi o'oyajji pojjeama tii. Chama! Eyacuiñajjiya esohuidojiji cuana”. Oya cuana poani: “Eshahua cuana chama' pea'ai” jamaya Sanoseo cuaa huohui cani. Paniseo cuaa ca ca jama acani ba'a: “E'e jojo nei ojjaña eseya shequi mee caje o'oya. Eyacuiñajjiya esohuidojiji cuana enequi, de. Eshahua cuana enequi pea'ai” jamaya e'e jojo nei huohui cani Paniseo cuaa. ⁹Jamajjeya Jodio etii cuaa quea shajjaquijjo nee nee mimicuajeanobiajea canaje. Majoya Moisesija etehue'yo huohuijji cuaa, Paniseo cuaa nequisohua majje jama taaame acanaje ba'a: —Jiquio dejja Pabo mimishi'ama. E'e pojja'a Eyacuiñajjiya esohuidojiji onijje miminaje e'e jojo nei. ¡A'a oya napajji! —taaame poanaje.

¹⁰Majoya ojjaña Jodio etii cuana janobajjima nei jjamimicuajea nobiajeaquianijo, esohuinano mese quea mete poanaje. Pabo nahue canaje; sohuinano cuana huoojea canaje Pabo dojohua sohuinano cuanaja equi quea quemo huasijje: —E'e de, Jodio cuaa Pabo jajahuejjajea ca chana', de, meiya —sohuinano cuana poanaje.

¹¹Mecajje Emeshi Mese nei Jesosa eyajo nequi nequioquenaje Pabo que. Oya miminaje Pabo nijje jama ba'a: —Pabo, ja'a quea mete pojji! Jenosanenajo miya ecuea esohui huohuijji poanaje. Quijje miyaya ecuea esohui huohuiquije quea huesha nee, Shoma cuiñajji yasijje —acanaje Jesosaa.

Jodio cuana ojee jjashahuabaquinaje Pabo quecuajji

¹²Majoya mecajjeahua nei Jodio dejja cuana jjachichaquinaje. Ojee jjashahuabaquinaje Pabo quecuajji. Quea huiso cuaa jama acanaje ba'a: —E'e jojo nei Pabo cuiajea jjimahuajo ecuaaya ena e'ishijji pojjeama, bobi cuana e'ijjiajji pojjeama, Pabo cuiajea'yо majje ecuana ijija'ijjiae'yо. Siajje poani jjemoya aje ca iña oe Eyacuiñajjiya ecuana mano mee ca'yome —acanaje cuaa jjashahuaba taiqui majje.

¹³E'e, quea huiso nee nee dejja cuaa jamaya acanaje, 40 huisomeya. E'e pojja'a pea cuaa jamaya acanaje pea'ai, ecuea ba jjima. ¹⁴Majoya Eyacuiñajji nijje mimiani etii que, Jodio etii cuana que pea'ai poqui majje huohui cañaquinaje jama ba'a: —E'e, ecuaaya ena ishi jjimahuajo, ijija'ijjia jjimahuajo pea'ai Pabo cuiajea neineije'yо. Pabo cuiajea jjima yajji jojjemo aje ca iña oe Eyacuiñajjiya mano mee ca'yomeya. ¹⁵Jamajjeya jmiquianaaya, etii cuaa pea'ai esohuinano mese dasiacue! Jama nisho acue ba'a: “¡Pabo jjequi o'oyacue! Ecuaaya oya ba o'oya sa aña, oja sohui eshajja'ajjajji” nisho acue. Majoya oya jjequi cajo, ecuaaya Pabo cuiajeaje, sapa jajahuejjajeaje meiya jiquiacua poe jjimahua —acanaje dejja mimishi cuaa.

¹⁶Paboja jjo'yaseja ebacula ejja, oja boeya ca shajja'ajja canaje Jodio cuaa Pabo sapa jajahuejjajea caje'yо. Jamajjeya Paboja boeya sohuinano cuanaja equi quea quemo huasijje dobiqui majje Pabo huohuiqui canaje Jodio cuanaja esohui. ¹⁷Majoya Pabohua sohuinano huoojeajji iyaa majje huohui canaje jama ba'a: —Jiquio esho'i ecue boe dojocue sohuinano etii que! Oya esho'i onijke mimi sa poani.

¹⁸Majoya sohuinano huoojeajji esho'i dojo canaje esohuinano mese que. Poe majje jama acanaje ba'a: —Pabohua eya iyaa canaje. Ohuaya jiquio esho'i huoojea canaje mi que. Oya minijje mimi sa poani.

¹⁹Esohuinano meseya esho'i mepejjejea canaje dejja chama huasijje. Majoya oya jjapashineijje huohui'ajja canaje jama ba'a: —E'e, ¿ae shai miyaya eya huohui sa aña? —acanaje.

²⁰Esho'iya jama acanaje ba'a: —Jodio dejja cuana ojee miminequinaje. Mecahuajje pa miya dasia caje pa. Miya pa jama anisho caje ba'a: “¡Pabo jjequi o'oyacue Jodio etii cuana huasijje! Ecuaaya oya ba o'oya sa aña” jamaya miya siajje acaje pa. ²¹Jamajjeya ja'a oya cuana shajja'ajjajji! Quea

huiso nee nee, 40 huisome ejja'aniquehuaqui ani ejiojji sahuajo Pabo cuiajeal'yojji. E'e, oya jama poanaje ba'a: "Ena ishi jjima amajje ijja'iijja jjima po majje pea'ai ecuaaya Pabo cuiajeate'yo. ¡Pabo cuiajea jjima yajji jojjemo Eyacuiñajjiya ecuana napa ca'yome!" jama mimimeya poanaje. Jjeya nei miya isho'ajja cani cuaa. Jama poani ba'a: "E'e, jjeyahua nei esohuinano meseya Pabo jjequi caje ba'ajja" poani oya cuana —jamaya esho'i poanaje.

²²Majoya esohuinano mese jama poanaje ba'a: —E'e, jamajjeya ecuea eba pea cuaa eya edasiajji nisho acaje ma e miya huohuinaje. ¡A'a oe huohuijji cuana!

Jamaya huohui majje ohuaya esho'i quehuajje huoojea canaje equi yasijje.

Pabo huoojea canaje Shomano emeshi meseja huoojea Peni ani yasijje

²³Majoya esohuinano meseya iyaa canaje beca sohuinano huoojeajji. Poeyajo jama huohuime acanaje ba'a: —¡Miquea aquiana cuana, sohuinano cuanaja aquiana pea'ai chichacue epoquijji! ¡Mecajje quea misi nee poajo, poquicue Sesanea cuiñajji yasijje! ¡Quea huiso nee nee, 200 huisome sohuinano cuana ejjojjije dojocue! ¡Pea sohuinano quea huiso nee mejejji dojocue pea'ai! ¡Pea sohuinano cuana mapichi aija edaasa biajje ani dojocue minijje pea'ai, 70 huisome! ²⁴¡Pabo dojocue pea'ai pea mapichi aija edaasa biajje ani! ¡Oya Pabo dojocue emeshi meseja huoojea que, Peni que! ¡Pabo jaahuana neineicue! ¡A'a Jodio cuana oya napa meeji! —acanaje esohuinano meseya, Canio Nisia bajjaniya.

²⁵Majoya esohuinano meseya esohui tehue canaje Penija ebajji jama ba'a:

²⁶"Emeshi meseja meshi cuiñajji Peni: Ecuea epeejji Peni, mijo eya quea bihui nee. Eyaya, Canio Nisiaa jiquio esohui tehuename miquea ebajji jiquio dejjajo, Pabojo. Jama poa ba'a: ²⁷Jodio cuaa jiquio dejja Pabo bajjani iña canaje. Beshahua nei oya cuiajea ca'yonaje cuaa. Oya Shomano dejja ba majje eyaya oya nahuenaje; sohuinano cuana huoojeanaje o nahuejji.

²⁸Eya ba sa poanaje apiojji Jodio cuana omijje quea quene nee nee poanaje. Jamajjeya eyaya oya dojonaje Jodio etii cuana que. ²⁹Jodio etii cuanaja esohui shajjal'ajja majje eyaya banaje Pabo mimishi'ama, de. Mimishi po jjimajo Jodio cuana oya sapa jajahuejjajea mee jjima anaje meiya; jeyo mee jjima anaje ejeanobiajeajji. Oya Shomano dejja. Paboja ehuohuijo ca ca oe Jodio cuana onijje quea quene nee nee poanaje. Onijke mimijajinaje Jodio cuanaja etiiquianaja ehuohui'yojo, ma ohua huohui canijo. ³⁰Majoya Jodio cuaa eya dasia majje Pabo quehuajje sapa jajahuejjajea sa acanaje. Ma ba majje eyaya oya huoojeanaje mi que. Jodio dejja cuana, Pabo huohuijji epo, eyaya huoojeaje mi que pea'ai. ¡Miyaya oe huohui neineicue ache acue oe quea mimishi poani! Mahuiso ecuea esohui, epeejji Peni. Eyaya, Canio Nisiaa ecue sohui tehuename miquea ebajji. Apoa".

Jamaya tehue canaje. ³¹Tehue majje esohuinano meseya Caniohua oja tehue huoojea canaje emeshi mese Peni que.

Jamajjeya sohuinano cuaa Canioja ehuohui'yo jayojja jama acanaje; Pabo dojo canaje mecajje Atipati cuiñajji yasijje cahuiya.³² Majoya mecajjeahua nei sohuinano mapichima' huacuaya poe o'oyanaje Jenosanena huasijje, sohuinano cuanaja equi quea quemo huasijje. Joya mapichijiya ca ca oe Pabo dojo canaje Sesanea huasijje.³³ Sesanea huasijje poe majje Shomano emeshi meseja huoojeaja equi yasijje, Penija equi yasijje nequiñaquinaje. Majoya sohuinano cuaa Pabo quia canaje Peni que. Esohuinano mese Canioja esohui etehue'yo pea'ai quia canaje. Majoya oya cuana poqui'yonaje.³⁴ Canioja esohui etehue'yo ba neinei majje Peniya Pabo huohui'ajja canaje jama ba'a: —Pabo, ¿ache meshijo ami ba'e, ache mijije?

—Eya ca iña Sinisia meshijo ba'e —saja'ame acanaje Pabohua.

³⁵—E'e. Jamajjeya Jodio cuana ma mi huohuijji epo poeyajo, eyaya miquea esohui shajja'ajjaje —poanaje Peni.

Majoya Peniya pea sohuinano cuana iyaa canaje. Poeyajo jama huohuime acanaje ba'a: —¡Bacue! Jiquio dejja Pabo bajjani. ¡Oya emeshi mese Enodeja equi quea quemo neejo jaahuana neineicue! ¡Nahuecue oe! —acanaje.

Jodio cuaa emeshi mese Peni siajje acanaje Paboj

24 ¹Majoya me oeje cahuime po majje Jodio Eyacuiñajji nijje mimiani etii Anania poquinaje Sesanea huasijje Pabo niñebaa, Pabo huohuiya. Jodio etii quea huiso pishana Anania nijje poquinaje. Pea dejja, emeshi meseja etehue bajji poani Tetono bajjani onijje poquinaje pea'ai. Sesaneajo nequiñaqui majje oya cuana emeshi meseja huoojea Peni ba cañaquinaje. Majoya oya cuana Paboj mimimiminaje.² Majoya Peniya Pabo iyaa canaje. Poeyajo Tetonohua huohui canaje jama ba'a: —Emeshi mese Peni, miya quea ca'a, quea pame nee, ecuea epeejji pea'ai. Miya ecuana huoojeajji quea pame nee. Quea huiso shequiaja miquea esohuijo ojjaña quea bei po meenaje jiquio meshijo. Quea huiso dejja mimishi miyaya jjabahuejjaqui meenaje. Jamajjeya ecuana jiquio meshijo quea pame nee ba'yani.³ E'e, miyaya quea pame añajo, ecuana quea bihui nee poani, ojjaña cuiñajjijo ba'eca cuana pea'ai. Miya ecuanaja quea boti nee.⁴ Miquea pea echacorri quea huiso yanijo eyaya oe pojji esohui huohuiye. Jamajjeya jecuea esohui che shajja'ajja socue! —poanaje Tetono—.⁵ Jiquio dejja Pabo quea mimishi nee po tiitiiani. Jodio cuana ojjaña meshijo ba'e quea quene nee nee po mee cani. Ohuaya Jesosaja ma Nasanenajo ba'ya poaja esohui huohui majamaja cani. E'e, oya Jesosaja epeejji cuana huoojeajji poani.⁶ Ohuaya ca ca Eyacuiñajjija equi quea quemo quea jehue jayojja acanijo, ecuanaaya oya iñanaje. Jodio cuanaja ettiquinajja tehue jayojja jama oya amee sa anaje; ohua huohui tai canijo oya sapa jayahuejjajea sa anaje.⁷ Jamatii esohuinano mese Canio Nisia cuajicuajjibenaje Pabo nahueya; Pabo dojo canananaje. Oya quea quene nee nee poanaje ecuana nijje, de.⁸ Majoya Canio Nisiaa ecuana mi que huoojea canaje Pabo huohuiya. E'e, Pabo nijje mimi majje miyaya baje ecuanaja esohui e'e nei —acanaje Tetonohua.

⁹Majoya pea Jodio dejja cuaa Peni siajje aca o'oyanaje Pabojo jama ba'a: —E'e jojo nei Tetonoja esohui Pabojo e'e nei. Pabo quea mimishi nee nee poanaje —Peni acanaje cuaa.

Pabohua emeshi mese Peni huohui ca'yonaje ojaya eba'ejijo

¹⁰Majoya Peniya Pabo jama acanaje ba'a: —E'e pojja'a. ¿Pabo, yajjajje acuae minijje quea quene poani cuana so'o? ¡Huohuicue mo oe!

Jamajjeya Pabohua jama acanaje ba'a: —Emeshi mese Peni, ecuea eba miya jiquio meshijo ona huoojeajji poani quea shequiaja huiso. Jamajjeya ojjaña miquea eba. Jamajjeya ecuea eba'ejijo eyaya mete'ama huohuije. ¹¹Miquea eba ecuea esohui e'e nei. Jjeya nei eya Jenosanena huasijje nequiñaqui o'oyanaje Eyacuiñajji bihuiaa ome miji pea'ai beca cahuime poanaje. ¹²Jodio dejja cuaa eya ba canaje Eyacuiñajji equijo nequi. Eya ca ca iña dejja nijje jjamimicuiae nobiajeaqui ajja. Ecuea Jodio cuana quea quene po mee jjima Jodioja equi ejjachichaquijjiyo ani, ejiojji cuanajo nequi pea'ai, equi cuanajo ani pea'ai. Jama ajjima Jenosanenajo ecuea cuana. ¹³Ojjaña eba Jodio cuana ejo siajje poani. Eya mimishi'ama. ¹⁴Jodio cuanaja etiiquiaa cuaa Eyacuiñajji bihuia ca poa. Eyaya Eyacuiñajji bihuiaña pea'ai. Jamatii eyaya Jesosaja esohui jayojja jama aña pea'ai. Jiquio Jodio cuana ca ca siajje poani jama ba'a: “Jesosaja esohui etiiquianaja esohui jama pojjeama” jama poso acani. Chojja, ecuanaja etiiquiana Moisesija etehue'yo jayojja jama aña; Eyacuiñajji esohui huohuiji yahuajo nei ba'e cuanaja esohui etehue'yo jayojja jama aña pea'ai eyaya. Ohuaya jayojjaya eyaya jama huohuime aña ba'a: ¹⁵Ojjaña eseya mano'yajo quijke Eyacuiñajjiya shequi mee caje o'oya; mimishi cuana, dejja quea pame poani cuana pea'ai eshe poaje o'oya. Ecuea eba, jiquio Jodio cuanaja eba pea'ai Eyacuiñajjiya jamaya acaje'yo. ¹⁶Jamajjeya eya quea pame nee ba'e sa tii poani. Eyacuiñajjiya eba eya mimishi'ama. Jiquio Jodio cuanaja eba pea'ai eya bicho'ama, mimishi'ama —Pabo poanaje.

¹⁷—Eya pea meshi cuana huasijje poquinaje esohui huohuuya. Quea huiso shequiaja po majje jjeya eya quea huesha nequi Jenosanena huasijje poe o'oyanaje. E'e, Jesosaja epjeeji cuana pea meshijo ba'eca cuaa ejjeshejjii huoojea canaje Jodio aema' cuana bobiaa. E'e, eyaya maya ejjeshejjii ye majje Jodio cuana quianaje. Eyaya huo dahua meenaje pea'ai Eyacuiñajji bihuiajji. ¹⁸Jamajjeya eya Eyacuiñajjiya equi quea quemmo huasijje poquinaje. Jomajo nequiya eyaya eme shacula neineinaje quea boejea jayojja epoji. Jamaya poanijo, Jodio cuaa Asia meshijo ba'e cuaa eya ba canaje Eyacuiñajjiya equijo oe nei nequi. Quea huiso dejja cuana enijje nequi jjima poanaje. Quea shajjaquijjo pojjeama eya poanaje. ¹⁹Ma Jodio cuana Asia meshijo ba'e poe jjima jiquiacua. E huohui sa poanijo oya cuana capoe'yahua minijje mimiya. ²⁰Esohuinano meseya Canio Nisiaa eya nequi mee canaje Jodio etii cuana cojja nei. Jiquio Jodio cuaa ecuea esohui Jodio etii nijje shajjalajja canaje pea'ai. Jodio etiyya eya quea mimishi eba jojemo jjeyahua nei huohui ca'yome ecue mimishi. ²¹E'e, jomajo eyaya etii cuana huohuinaje jama

ba'a: "Quijje Eyacuiñajjiya emano'yo cuana shequi mee caje o'oya. Ojjaña eseya shequi mee caje o'oya. Eya jamaya ehuohui poaje jjejojo pea cuaa eya iña canaje" jamaya eyaya etii anaje. E'e, ma esohuijo jiquio Jodio cuaa eya niñeba cani, huohui cani pea'ai. Mahuiso ecuea esohui, emeshi mese Peni. Apoa —Pabohua acanaje.

²²Emeshi mese Penija eba Jesosaja epeejji cuanaja ehuohui'yo. Jamajjeya ohuaya jama acanaje ba'a: —E'e, quijje esohuinano mese Canio Nisia poe'yajo eyaya huohuije ecuea ejashahuabaquijji Pabojo. Mahuiso. Apoa —poanaje Peni.

Majoya Jodio cuana esecue yasijje huoojeacuayajea majje Peniya sohuinano huoojeajji huohui canaje jama ba'a: ²³—¡Sohuinano cuana huoojeacue Pabo nijje! ¡Oya jaahuanan neineicue! ¡Ojaya epeejji cuaa aquiana, bobi pea'ai o que caye cahua! ¡O que ca'anicauhua pea'ai! —acanaje emeshi meseya Peniya.

Pabohua Peni, oya huanase Nosiya pea'ai sohuihuohuime acanaje

²⁴Majoya quijje pishana Peni oja huanase nijje, Nosiya nijje poe o'yanaje Pabo baa. Nosiya aje oe Jodio epona poanaje. Jamajjeya ohuaya Pabo iyaa mee majje jama acanaje ba'a: —Pabo, ¡Jesosa Quitoja esohui mo huohuicue Jesosa Quito nijje jjapeequianijo! Eyaya shajja'ajja sa aña.

²⁵Jamajjeya Pabohua Jesosaja esohui huohui canaje jama ba'a:
—¡Eyacuiñajjiya esohui jayojja jama ba'ecue quea pame nee!
¡Jjashahuubaquicue! ¡A'a quea mimishi tii pojji! Quijje poe o'oya majje Jesosaa ojjaña cuana sosequia caje'yo, ma eseya eshe nequiahuaa anequinaje sosejje. Mimishi cuana quea nee nee po tiitii mee caje'yo, quea mimishi ba'enaje sosejje. Ojaya epeejji quea pame cuana ca ca ohuaya quea bihui nee ba'e tiitii mee caje'yo onijke eyajo Eyacuiñajjiya —jama huohuimaya Pabohua acanaje cuana.

Paboja esohui shajja'ajja majje Peni quea mete nee nee poanaje. Jama acanaje ba'a: —E'e, mahuisoya jjeya. Quijje eyaya miya iyaaje o'oya, ecuea pea echacoji chama' poajo.

²⁶Peni jjashahuaba taiquinaje jama ba'a: —Eyaya Pabo iyaaje o'oya enijje emimijji. E'e pojja'a ohuaya eya sosequia caje o pichojea mee'yo sosejje.

²⁷Jamatii Pabo emeshi mese Enodeja ejjajeanobiaquijji equijo nequinaje beca shequiajame. Majoya Shomano emeshi meseya pea dejja Posito Pesito bajjani huoojea canaje meshi cuiñasahuajji epojji. Oya Pesito emeshi mese Enodeja equijo ba'enaje. Jamajjeya Peni oja huanase Nosiya nijje poquinaje. Matatii Penija Jodio etii cuana onijke quea bihui nee epojji Pabo pichojea mee'yo jjima poanaje. Matatii ejjajeanobiaquijji nequi tii Pabo jiña ca'yonaje.

Pabohua emeshi mese eyacua Pesito sohuihuohui canaje

25 ¹Jamatii Shomano emeshi cuiñasahuajji eyacua Pesito Sesanea cuiñajjijo nequinaje. Pea beca peejjiima cahuime po majje oya poquinaje Jenosanena huasijje. ²Jomajo Eyacuiñajji nijje mimiani etii cuaa, Jodio etii cuaa

pea'ai Pabo niñeba canaje emeshi cuiñasahuajji Pesitoja eshajja'ajjajji. ³Pesito nijje mimi huicha'a huicha'anaje jama ba'a: —Emeshi mese Pesito, ¡che oe Pabo huoojeacue Jenosanena huasijje ecuana nijje mimiya! —nisho acanaje Jodio cuaa. Oya cuana aje oe jjashahuuba taiquinaje Pabo cuiajeal'yojjii poquianijo.

⁴Pesitohua Jodio cuana saja'a canaje jama ba'a: —Chojja. Pabo jiquiacua epoejji pojjeama. Eyaya oya cuiñaña Sesaneajo mei equi ejjajeanobiaquijji. Quijje pishana eya poquije o'oya Sesanea huasijje. ⁵¡Pabojo mimi sa poanijo miquianajaya etii cuana huoojeacue enijje Sesanea huasijje! Jocuama ohuaya Paboja mimishi cahuohui cahua. E'e pojja'a oya mimishi'ama, caba'ajja —poanaje Pesito.

⁶Majoya Pesito nequinaje Jodio cuana nijje Jenosanenajo me oeje pea beca peejiima, ⁸cahuime. Majoya oya poqui o'yanaje Sesanea huasijje. Oe cahuime po majje oya anioquenaje pea equijo, etii ojee chacochacoani equijo. Majoya ohuaya pea dejja huoojea canaje Pabo jjequiya. ⁷Pabo poe'yajo Jodio etii cuana ma Jenosanenajo ba'e cuana o que jjanequichipiquinaje; oya panajajinaje. Pabojo quea huiso siajje poanaje, de.

⁸Majoya Pabohua huohui canaje jama ba'a: —Eya quea mimishi pojjeama poani. Jodio etiiquiana cuanaja esohui etehue'yo pajea'yo jjima ecuea. Eyacuiñajjija equi quea jehue jayojja po mee jjima. Shomano emeshi mese ecuea niñeba jjima pea'ai —poanaje.

⁹Majoya Pesitohua Jodio cuana queabihui nee po mee sa acanijo huohui'ajja canaje jama ba'a: —Pabo, ¿a'la miya Jenosanena huasijje poqui sa poani? Jomajo Jodio etii cuanaja esohui mijo eyaya shajja'ajjaje, miquea esohui shajja'ajjaje pea'ai. Ojjaña shajja'ajja majje eyaya mijo jjashahuubaqui majje huohuije ecuea ejjashahuubaquijji —poanaje Pesito.

¹⁰—Chojja —saja'ame acanaje Pabohua—, eya jiquiojo tii yani, Shomano etiija equijo. ¡Jiquio Shomano etiija, miyaya pea'ai onaja esohui ejo shajja'ajja majje huohuicue miquea ejjashahuubaquijji! Eya Shomano dejja. Jamajjeya Jodio cuanaja eya ecuiaeal'yojjii pojjeama. Ecuea Jodio cuana quea mimishi ajjima, de. Jamaya miquea eba. ¹¹Ecuea emeshi meseja etehue'yo jama ajjima jojjemo, mimishi ya pea'ai jojjemo eya mano mee'yomeya. Ecuea mimishi ajjima jojoya ca ca miyaya e equia meeji pojjeama mimishi cuanaja ecuiaeal'yojjii. Jamaya emeshi mese etiija esohui poani. Eya ca ca iña Shomano emeshi mese etii nijje mimi sa poani, Sesa nijje. Ecue sohui shajja'ajja majje ohuaya cahuohui cahua ojaya ejjashahuubaquijji ejo —Pabohua acanaje.

¹²Majoya Pesito o chacosahuajji nijje ojee mimi majje Pabo huohui canaje jama ba'a: —E'e, eyaya miquea esohui jayojja jama aje: Miya huoojeaje Shomano emeshi mese etii yasijje, Sesa que. Miya shajja'ajja majje ohuaya huohui caje ojaya ejjashahuubaquijji mijo —jamaya po majje Pesitohua ojjaña huoojeacuaya ca'yonaje.

**Pabo miminaje Jodio meshi mese Anipa nijje
Anipaja jjo'yase Menise nijje pea'ai**

¹³Quijje pishana Jodioja emeshi mese etii Enodeja osecua Anipa bajjani oja jjo'yase Menise nijje poeyanaje Sesanea huasijje Pesito baa, emeshi cuiñasahuajji eyacua baa. Pesito nijje quea bihui nee mimimiminaje jama ba'a: —E'e Pesito, miya emeshi cuiñasahuajji eyacua Sesaneajo. Jamaya quea pame nee. ¡Quea bihui nee pocue! —ohuaya Pesito acanaje.

¹⁴Majoya Anipa Pesito nijje nequinaje oe pojji cahuime. Pesitohua Anipa huohui canaje Pabojo jama ba'a: —Emeshi mese Anipa, yahuajo e poe jjimahuajo pe a emeshi cuiñasahuajjiya Peniya Jodio dejja Pabo bajjani jiña canaje ejjajeanobiaquijjiyo jaa, jiquio ejjajeanobiaquijjiyo jaa. ¹⁵Eya Jenosanena huasijje poquiyajo, Jodio Eyacuiñajji nijje mimiani etii cuaa, Jodio etii cuaa pea'ai Pabo niñebe neinei canaje. Jama amajamaja canaje ba'a: “¡Pabo quea mimishi nee nee po tiitiiani! ¡Oya oe cuiajea'yocue!” acanaje cuaa. ¹⁶Eyaya Jodio cuana jama anaje ba'a: “Ecuana ca ca pea, Shomano dejja cuana. Miquianajaya ehuohui ca ca oe shajja'ajja majje eyaya oya equiajji pojjeama miquea ecuia'yojji. Chojja. Pabohua miquiana cojja nei nequi majje cahuohui cahua pea'ai. E'e, Shomano emeshi meseja etehue'yo jama ba'a: “Dejjaa peaja ehuohui ojo shajja'ajja majje ohuaya cahuohui pea'ai cahua, ona cojja nei nequia”. E'e pojja'a miquianaya Pabojo siajje poani” jamaya eya poanaje. ¹⁷Jamatjeya Jodio etii cuana jiquiacua poe majje, oe cahuime po majje eya anioquenaje etii cuana nijje. Majoya eyaya Pabo iyaa meenaje huohui pohua. ¹⁸Majoya Pabo poeyajo Jodio etii cuana nequinaje huohui epoji. Jamatii oya cuanaja Pabo quea mimishi nei poanaje huohui jjima. Ecuea ejjashahuabaquijji jama huohui jjima, Jodio etii cuanaja. ¹⁹Jodio etiiquianaja etehue'yojo ca ca janobajjima nei Pabo mimicuiajeanobiajrea canaje. Jesosajo, ma yahuajo mano'ya poajo pea'ai mimicuiajeanobiajrea canaje. Pabohua pa huohui canaje Jesosa shequi o'oya poa. ²⁰Ma esohui Jesosajo ecuea ba jjima. Jiquiojo ba meemee ajja. Jamatjeya eyaya Pabo huohui'ajjanaje jama ba'a: “Pabo, ¿a'a miya Jenosanena huasijje poqui sa poani? Jomajo eyaya huohuije ecuea ejjashahuabaquijji mijo, Jodio etii cuana shajja'ajja majje” eyaya a'ajjanaje. ²¹Jamatii Pabo Jenosanena huasijje poqui sa po ajja. Ohuaya eya huohui canaje jama ba'a: “Eya ca iña emeshi mese etii nijje mimi sa poani, Sesa nijje. Ohuaya ecuea esohui shajja'ajja majje cahuohui cahua ojaya ejjashahuabaquijji ejo” jamaya eya acanaje. Jamatjeya eya jama poanaje ba'a: “E'e, quijje eyaya miya huoojeaje emeshi mese etii que, Sesa huasijje” eyaya oya anaje —jamaya Pesitohua Jodio emeshi mese Anipa acanaje.

²²Majoya Anipaa jama acanaje ba'a: —E'e Pesito, eya Pabo shajja'ajja sa poani.

—E'e, emeshi mese —poanaje Pesito—, ¡mecahuajje miyaya Pabo shajja'ajjacue!

²³Jamajjeya mecajjeahua Anipa oja jjo'yase Menise nijje poeyanaje daqui quea nahue nee nee, emeshi meseja daqui huosho majje. Ojjaña cuaa oya cuana bihuia canaje, quea shajjaquijjo sajeame acanaje. Equi quea quemo huasijje, ma etii cuana chacochacoani yasijje dobiquinaje Pabo shajja'ajjaa. Sohuinano huoojeajji, etii cuana, Sesanea cuiñajji mese nijje ma equi yasijje dobiquinaje pea'ai. Ojjaña anioque majje Pesitohua pea dejja huoojea canaje Pabo iyaa. ²⁴Pabo poe'yajo Pesito jama poanaje ba'a: —Emeshi mese Anipa, ojjaña etii jiquiojo nequi pea'ai, ¡shajja'ajjacue mo! Ojjaña Jodio cuaa jiquio cuiñajji ba'eya, Jenosanenajo ba'eya pea'ai jiquio dejja Pabo niñeba cani. Oya cuana taaa majamajani jama ba'a: “¡Pabo cuiajea'yocue! Oya quea mimishi nee nee po tiitiianii”. ²⁵Jamatii Pabo shajja'ajja majje eyaya banaje oya mimishi'ama. Jamajjeya eyaya pea cuana oya cuia mee jjima anaje. ¿Yajjajo jja ecuia'yojji? Oya mimishi'ama. Majoya Pabohua eya jama acanaje ba'a: “Eya Shomano emeshi mese etii nijje, Sesa nijje mimi sa poani. Ecuea esohui shajja'ajja majje ohuaya cahuohui cahua ojaya ejjashahubaquijji ejo” jamaya Pabohua eya acanaje.

—Jamajjeya eyaya oya huoojeaje Shomano emeshi mese etii yasijje huohuiya. ²⁶Jamatii oya mimishi po jjimajo, ¿yajja tehueme shai eyaya Shomano emeshi meseja ebajji aje? Jamajjeya eyaya oya ye meenaje miquiana que. ¡Oya shajja'ajja majje eya huohuicue miquea ejjashahuubaquijji ojo! Emeshi mese Anipa, Jodio cuanaja ehuhui'yo miquea eba nei nei. Jamajjeya miquea ehuhui Pabojo eyaya tehueje Shomano emeshi mese etii yasijje, ojaya ebajji. ²⁷Eya ca iña jjashahuubaquiani jama ba'a: Ecuea Pabo ehuuoeajji pojjeama ojaya mimishi cuana tehue'yo jjimajo. Chojja, jama po ajja ca iña —poanaje Pesito.

Pabo emeshi mese Anipa nijje miminaje

26 ¹Majoya Anipa Pabo nijje miminaje jama ba'a: —E'e Pabo, ¡mimicue! ¡Miquea mimishi chamajo ecuanaya huohuicue ecuanaja ebajji! —acanaje Anipaa.

Jamajjeya Pabohua eme jeasohua majje ojaya eba'ejijo huohui canaje jama ba'a: ²—Emeshi mese Anipa, ojjaña miquea eba. Jodio etii cuanaja esohui ejo miyaya shajja'ajjanaje. Jamajjeya ecue sohui shajja'ajjañajo, eya quea bihui nee. ³E'e, Jodio etiiquianaja etehue'yo, ehuhui'yo cuana pea'ai miquea eba, ojjaña. Miquea eba pea'ai jjeyahua nei Jodio cuana jjamimicuajea nobiajeaquiani esohui quea pame nee Jeosajo. Jamajjeya ¡ecuea esohui quea bei shajja'ajja socue! ⁴Ecuea eba'ejji eya esho'yahua ojjaña Jodio cuanaja eba. E'e, ecuea cuiñajji ba'yahua, Jenosanenajo ba'e pea'ai eya ojjaña Jodio cuanaja eba. ⁵Yahuajo eya Paniseo jayojja ba'enaje e'e jojo nei. Jamaya ojjaña eba. Jamaya cahuohui cahua, ca ohuaya huohui'yo sa amajje —Pabo poanaje.

⁶—Yahuajo nei nei Eyacuiñajjiya esejaya etiiquiana huohui ca poa jama ba'a: “Ojjaña emano'yojaa cuana eyaya shequi meeje o'oya quijje” poa.

Jamaya eseya sa poani. Ma esohui huohuañajo, Jodio etii cuaa eya iña canaje. Jiquiacua eya jjequi canaje cuaa minijje emimijji.

⁷—Ecuanaja, Jodio cuanaja 12 etiiquiaa maya ehuohui'yo shajja'ajja ca poa yahuajo nei nei. “E'e jojo nei ojjaña eseya mano'yo majje shequije o'oya. Jamaya amee caje o'oya Eyacuiñajji” Jodio etiiquiaa aca poa. Jamajjeya ecuaaya, Jodio cuaa Eyacuiñajji bihuia tiitiiña ojjaña pojjajo, mecajje pea'ai. Jamatii eyaya maya huohuiñajo Jodio cuaa aje oe eya niñeba cani jjeya, tecuea cani pea'ai. ⁸Emeshi mese Anipa, miya Jodio dejja pea'ai. ¿Apiojji acuae miquianaaya, Jodio cuaa jjabahuejjaqui ajja Eyacuiñajji emano'yo cuana shequi mee caje o'oya? —Pabohua acanaje.

⁹—E'e Anipa, yahuajo nei eyaya pea'ai Jesosaja epjeeji cuana napa majamajanaje quea huiso, ma Nasanenajo ba'ya poaja epjeeji cuana. Eya jjashahuaba taiquinaje jama ba'a: “Jesosaja epjeeji napajji cuana quea pame poani”. ¹⁰ Jamajjeya eyaya Jesosaja epjeeji Jenosanenajo ba'e napanaje quea huiso. E'e, Eycuiñajji nijje mimiani etii cuaa eya esohui etehue'yo quia canaje Jesosaja epjeeji cuana jeanobiajea meeji. Majoya eyaya Jesosaja epjeeji cuana iñanaje, jeanobiajeanaje ejjajeanobiaquijji yasijke pea'ai. Onaaya Jesosaja epjeeji cuiajea canajejo, eyaya jama anaje ba'a: “E'e, ¡cuiajea'yocue!” anaje eyaya. ¹¹ E'e, yahuajo eya poqui majamajanaje ojjaña Jodioja equi ejjachichaquijji cuana huasijke Jesosaja epjeeji cuana cuiajear, Jesosa nijje ejjapeequi pajea'yoji nisho. Eya quea quene nee nee ona nijje po majje poquinaje pea cuiñajji cuana huasijke, pea meshi yasijke Jesosaja epjeeji cuana napaa.

¹²—Majoya Eyacuiñajji nijje mimiani etii cuaa eya huoojea canaje Damasico huasijke Jesosaja epjeeji napaa. Eya quia canaje esohui etehue'yo jama ba'a: “Pabo Jesosaja epjeeji cuana iña meesahuacue”. Majoya eya poquinaje Damasico huasijke. ¹³Emeshi mese Anipa, Damasico huasijke ejlojjije poquijeya, eshequi biacojjajja nequijo eyaya eyajo banaje ejeajijiji quea jiji nee nee, eshequi jayojja jama pojjeama, quea jiji ja'a nee nee. Dejja cuana enijje poquiani jeaja'a neinei canaje pea'ai. ¹⁴ Jamajjeya ecuana meshi yasijke oquequinaje quea mete nee nee jjejojo. Majoya eyaya pea eyajo enijje mimiani shajja'ajjanaje. Enijje miminaje Emeo esohuijua jama ba'a: “Sanoni, Sanoni, ¿apiojji acuae miyaya eya napaña? Quea bicho nee nee poaje ecuea epjeeji cuana napa majje. ¡A'a quea sapa ca'a pojji!” poanaje. ¹⁵ Majoya eyaya jama anaje ba'a: “Emeshi Mese, ¿ae bajjani acuae miya?” Jesosaa eyajo aniya eya jama saja'ame acanaje ba'a: “Eya Jesosa. Miyaya eya napaña, ecuea epjeeji cuana pea'ai. ¹⁶ Jamajjeya nequisohuacue jjeyahua nei! Eya mi que jjanequipanaquinaje mi jjabahuejjaqui meeji. Miya enijje chacochacoje, ecue sohui huohuijji poaje. Ecuea esohui jjeyahua nei miyaya shajja'ajjanaje, eya banaje pea'ai. Quijje pishana eyaya miya quea huiso ba meeje ejo. Maya miyaya huohuijje ojjaña huasijke. ¹⁷ Jodio cuaa napa cajo eyaya miya jaahuanaje. Eyaya miya huoojeaje Jodio pojjeama cuana huasijke. Onaa mi napa cajo, eya mi jaahuanajji poaje. ¹⁸ E'e, eyaya

miya Jodio pojjeama cuana huasijje huoojeaje. ¡Miyaya oya cuana ecuea ejiojji ba meecue eyahuasijje epoqui'yojji! ¡Miyaya oya cuana enijje jjapeequi meesahuacue quea ja'a nee eba'ejji, Edosiquiana nijje, Satanasa nijje epoqui majajji pojjeama! ¡Maya oya cuana pajea mee'yocue Eyacuiñajji esohui jayojja jama eba'ejji! ¡Enijje jjapeequi meesahuacue! Jamajjeya eyaya ojaya mimishi cuana cuijeaje'yo. Oya cuana ba'e tiitii meeje'yo eyajo ojjaña ecuea epeejji cuana nijje pe'a'i" jamaya Jesosaa eya huohui canaje —Pabo poanaje.

19—Emeshi mese Anipa, eyaya Jesosaja esohui shajja'ajjanaje. Ohua huohui canaje jayojjaya eyaya anaje. 20 Ebionei eyaya Jesosaja esohui quea pame nee huohuinaje Damasicojo ba'eca cuanaja eshajja'ajjajji. Majoya Jenosanena huasije poe o'oya majje eyaya ojjaña cuana sohuihuohuinaje. Majoya eya poquinaje ojjaña cuiñajji yasijje Jodea meshijo. Esohui quea pame nee Jesosajo huohui poquianaje. Jodio pojjeama cuana pea'ai eyaya sohuihuohui poquianaje jama ba'a: "¡Miquea mimishi cuana pajea'yocue! ¡Jesosa nijje jjapeequicue! ¡Quea pame nee ba'ecue! Jamaya onaaya ba caje miya e'e jojo nei Jesosaja epeejji poani, eshahuaja pojjeama" jamaya eyaya ojjaña cuana huohui poquianaje —Pabo poanaje—. 21 Eya jamaya ehuohui poaje jjejojo Jodio etii cuaa eya iña canaje Eyacuiñajji equi quea quemodo nequi. Eya cuijacea'yo sa acanaje cuaa. 22 Jamatii Eyacuiñajji eya jaahuanana canaje. Jamajjeya ojjaña pojjaño yahuajo, jjeya pea'ai eyaya ojjaña huasijje esohui quea pame nee Jesosajo huohui tiitiiaña. E'e, ojjaña emeshi mese cuana huasijje, ojjaña etii cuana huasijje, ojjaña pea cuana huasijje pea'ai eyaya esohui huohuaña pea'ai. Emeshi mese Anipa, yahuajo nei Moisesiya, Eyacuiñajji pe a esohui huohuijji yahuajo nei ba'e cuaa pea'ai esohui huohui ca poa jayojja jama eyaya esohui huohuaña jama ba'a: 23 "Eyacuiñajji huoojea'yo ojjaña jaahuanajji Quito quea mimishi acaje'yo cuaa. Oya quea nee nee po mee caje'yo, ba'ehuanasohuajea caje'yo emano'yojji. Jamatii oya emano'yojaa Eyacuiñajji oya shequi mee caje'yo, oja Chiiya. Ojaya ebionei eyami eyacua poaje'yo. Ohuaya Jodio cuana huasijje, Jodio pojjeama cuana huasijje pea'ai esohui huohui caje: Mimishi cuana cuijea mee'yo majje ba'e tiitii mee caje'yo onijje eyajo" jamaya pea'ai eyaya huohuaña, de —jamaya Pabohua emeshi mese Anipa, ojjaña cuana onijje ani pea'ai huohui canaje.

24 Pabohua jamaya huohui cajo, Pesitohua oya jama acanaje ba'a: —Pabo, quea huiso esohui etehue'yo ba majamaja majje eniñepoqui'yo jayojja jama poani miya —acanaje Pesitohua.

25—Chojja emeshi mese Pesito, eya quea jjashahuabaqui quehua poani pojjeama, eniñepoqui jayojja pojjeama poani. Ecuea esohui e'e jojo nei, quea ja'a nee pea'ai. 26 Jamaya emeshi meseja Anipaja eba. E'e emeshi mese Anipa, ojjaña Jodio cuanaja esohui etehue'yo miquea eba. Jamajjeya eya minijje mimiani bicho'lama. Ecuea esohui, Jodio etii cuanaja esohui pea'ai quehuajje huohui jjima. Jamajjeya ojjaña ma

esohui cuanajo miya quea ja'a nee jjashahuabaquinaje —Pabo poanaje—. 27 Ecuea emeshi mese Anipa, ¿a'a miyaya Eyacuiñajjija esohui huohuijjija esohui cuana shajja'ajjaña? Ecuea eba miya; jiquio esohui miyaya quea ja'a nee shajja'ajjaña —Pabohua Anipa acanaje.

28 Majoya emeshi mese Anipaa Pabo jama acanaje ba'a: —Pabo, miquea emimi oe pojji poanaje. Jamatii miyaya eya Jesosaja epeejji po mee sa aña jjeya nei —poanaje Anipa.

29 —E'e emeshi mese Anipa, eya miquianajo mimiani Eyacuiñajji nijje, miquiana Jesosaja epeejji epojji jjeyahua nei, quijje pishana pojja'a. E'e, ojjaña miquianaya jiquiojo nequi Jesosaja epeejji eyaya po mee sa aña e jayojja epojji, jamatii jiquio ecua eya baa jjonojji jama epojji pojjeama miquianaya —Pabohua acanaje.

30 Majoya emeshi mese Anipa nequisohua majje ojaya emeshi cuiñasahuajji Pesito nijje, Pesitoja jjo'yase Menise nijje, ojjaña etii onijje ani pea'ai poquinaje pea equecuayijji yasijje Pabojo mimiya.

31 Pea equecuayijji yasijje anioque majje ojee mimimiminaje; jama poanaje ba'a: —Jiquio dejja Pabo quea mimishi pojjeama. Jamajjeya oya ecuiajea'yojji pojjeama, ejeanobiajea'yojji pojjeama tii. 32 Anipaa Pesito huohui canaje jama ba'a: —Pabo emeshi mese Sesa nijje mimi sa po'yo ajja jojjemo ecuaaya oya pichojea'yome. Jamatii ohuaya yahuajo huohui canaje jama ba'a: “Eya Shomano emeshi mese etii nijje, Sesa nijje mimi sa poani. Ecuea esohui shajja'ajja majje ohuaya cahuohui cahua ojaya ejjashahuabaquijjijo ejo”. Jamaya poanajejo ecuanajaya oya epichojea'yojji pojjeama —poanaje Anipa.

Pabo besapoquinaje Shoma huasijke, Itania meshi yasijke

27 1 Ecuea epeejji Teopino, eyaya Nocaa jiquio banaje ecuea ecojaa. E'e, eya Pabo nijje poquinaje. Jamajjeya ƒecue tehue ba neineicue! Jama poanaje ba'a: Emeshi mese Anipa pea cuana nijje mimi majje jama huohui canaje ba'a: —E'e, jjeyahua nei ecuaaya Pabo huoojeaje Itania meshi yasijke Shomano emeshi mese etii baa, Sesa baa —acanaje.

Jamajjeya jama amajje ohuaya Pabo, pea cuana eme jeyo'yo pea'ai quia canaje sohuinano huoojeajji Joño bajjani yasijke, Itania meshi yasijke edojoji. Joño Shomano dejja cuanaja meshijo ba'e, Itania meshijo. Oya emeshi mese etija sohuinano cuana huoojeajji poanaje, Sesaja. 2 Majoya Joñohua Pabo, pea cuana pea'ai ani mee canaje bishe ai yasijke ecuana nijje. Ma bishe ai mese Anamitio cuiñajjijo ba'e poqui sa poanaje pea cuiñajjiji cuana huasijke, Asia meshi yasijke. Ojjaña apoa poajo, ebishe mese besapoquinaje. Ecuana Anitaco nijje besapoquinaje Pabo nijje. Anitaco yahuajo Tesanonica cuiñajjijo ba'enaje, Masenonia meshijo. Oya Pabo chacosahuajji poanaje. 3 Majoya quea huesha nee besapoqui majje ecuana Sinono cuiñajjiji yasijke ba'eñaquinaje. Ba'eñaqui majje Joñohua Pabo quea pame nee acanaje;

oya poqui mee canaje ecuana nijje Jesosaja epeejji cuana baa, bobo ijjiaa, aquiana chichaa pea'ai ebdesapoquijji. ⁴Majoya bishe aijo ani o'oya majje ecuana Sinonojo ba'e besapoqui o'yanaje. Beni quea quemohua bishe hui cuiasehuijea cajje enashajohua nane canaje. Jamajjeya ebishe mese besapoquinaje Chipe nasi yasijje. Chipe nasi shanijje, beni chama huasijje besapoquinaje, enashajo ai chama huasijje. ⁵Majoya Chipe nasi yejje majje ecuana bae ojje mijj yasijje, ena poejji miji yasijje besapoquinaje, Sinisia meshi chipi nei, Panipinia meshi pea'ai yejjenario quea chipi nee. Majoya besapoquinaje Nisia meshi yasijje. Miña cuiñajji yasijje ba'eñaquinaje.

⁶Miña cuiñajji jo ba'eñaqui majje ecuanaja aquiana cuana jeasohuaquinaje etaja huasijje. Majoya Joñohua pea bishe ai sa'ajja canaje Itania meshi yasijje ebdesapoquijji. Bishe ai Anejania cuiñajji jo ba'ële Itania meshi yasijje besapoquiani ba majje Joñohua ojjaña dejja cuana eme jeyo'yo ma bishe aijo ani mee canaje. Majoya ecuana besapoquinaje. ⁷Jamatii quea cahui huiso ecuana jjapashineijje besapoquinaje. Beni pajijiya enashajo quea 'aa nee nee aniya bishe ai nane canaje, hui cuiajjoti canaje pea'ai. Ebdesapoquijji quea camaja poanajejojo, quijje pishana ecuana poeyanaje Nido cuiñajji yasijje. Beni quea quemodojo bishe beni poejji miji yasijje besapoqui meemee ajja poanaje. Jamajjeya beniya ecuana dojoea canaje eeno poejji miji yasijje. Nasi quea quemo Queta nasi bajjani yasijje dojoea canaje. Queta nasi shanijje, benima huasijje besapoquinaje. Nasi huijje jjayejjequinaje Sanomo meshi bajjani huijje. Majoya beniya ecuana dojoea canaje Queta nasi pea miji yasijje. ⁸Nasi sahuajje quea besapoqui camaja poanaje. Jamajjeya ecuana Enashajoma' cuiñajji yasijje ba'eñaquinaje, Nasea cuiñajji chipi nei.

⁹Ebdesapoqui'yo quea cahui huiso nee nee poanaje. Jamajjeya jjohuee she poanaje. Jjohuee shejo quea beni quemodojo, enashajo quea quemo nee nee poanijo bishe hui'i'yo chana!. Jamajjeya Pabohua ojjaña cuana bishejo nequi jama acanaje ba'a: ¹⁰—Epeejji cuana, ¡shajja'ajjacue mo! Ecuea eba ecuana jjeyahua nei besapoquiajo quea camaja nee nee poaje. Bishe hui'i'je'yo, aquiana cuana bishejo ani hui'i'je'yo pea'ai. Eseyea pea'ai hui'i'yo chana! —Pabohua acanaje.

¹¹Jamatii sohuinano huoanjeajji Joñoja Pabo shajja'ajja jjima. Ebishe meseja esohui, bishe huijeajji esohui pea'ai ca ca shajja'ajja canaje. Onaaya huohui canaje jama ba'a: —Ecuana jjeyahua nei bishe aijo besapoquije. Ehui'i'yojji pojjeama, de. ¹²Enashajoma' cuiñajji quea tai poaje eeno shejo. Jiquiojo ba'e mee ajja; quea huoe nee nee poaje —acanaje cuaa.

Jamajjeya beshahua nei ojjaña dejja cuana jomajo nequi sa po'yo ajja poanaje. Besapoqui sa poanaje quea huesha Penise cuiñajji yasijje. Jama poanaje ba'a: —E'e pojja'a eseaya dojoea caje Penise yasijje, beni chama pishana huasijje. Jomajo nequije eeno shejo —poanaje cuana.

Enashajoma' cuiñajji beni poejji mijijje nequi; Penise ca ca pea ojje mijijje nequi.

Benipajiji quea quemohua bishe nane canaje

¹³Jamajjeya beni biso nei eeno po'yajo, dejja cuana ma bishejo nequi quea bihui nee jama poanaje ba'a: —E'e, jjeya quea pame nee ebdesapoquiji beni sisijo. Cua'a, ebdesapoqui —poanaje ojjaña.

Jamajjeya bishe picho canaje, besapoquinaje Queta nasi sahuajje quea chipi nee. ¹⁴Jamatii quijje pishana beni quea quemo nee ena poejji mijijje poeyanaje. ¹⁵Benipajijiya janobajjima nei bishe nane canaje. Beniya bishe huijea canaje. Ebishe meseya beni poejje bishe poqui meemee ajja poanaje. Quea camaja nee neejojo ojjaña hueahueanaje. Jamajjeya beniya bishe jamatii dojo canaje. ¹⁶Caona nasi sisi chipi nei yasijje bishe dojo canaje beniya. Caona nasi shanijje jjayejjequianijo beni nequioque pishanaquinaje. Jamajjeya bishe sisi quea pame jeyojaca'ajja canaje bishe ai pejjejo. Quea camaja poanaje bishe ejeyojacajji beni yejje. ¹⁷Jamajjeya bishe sisi bishe ai biajje jjequisohua majje jeyo canaje. Bishe ai jeyo ca'a canaje pealai jjono quea quemohua. Ebishe ai meseya jama acanaje ba'a: —Beniya bishe ai dojo ca chana' meshijaji yasijje, Sinite meshijaji quea chipi nee yasijje. Daqui quea quemo equecuaquini eyajo ba'eya beniya bishe dojocuaji ca chana' —acanaje.

Jamajjeya ma daqui cuana bebo ca'yonaje cuaa beni quea quemojo. Majoya bishe jamatii dojo canaje beniya. ¹⁸Beni quea quemo po tiitiianijo mecajjeahua ecuaaya aquiana cuana bishejo ani jeaoqueajeanaje ena huasijje, bishe quea peja epoji nisho. ¹⁹Pea pojjajo aquiana cuana quea biquie, bishe chacojjii cuana jeaoqueajeanaje ena huasijje pealai. Jjono cuana quea quemo quea huiso pealai jeaoqueajeanaje ena huasijje bishe quea peja epoji nisho. ²⁰Quea huiso cahuime benipajiji po tiitii nequinaje. Quea misi nee poanaje. Eshequi chama' poanaje, majameta cuana pealai. Ojjaña cuana quea mete nee jjashahuabaquinaje jama ba'a: —E'e de, hui'ije'yo se, de.

²¹Quea mete jjejojoya ojjaña cuana ijjal'ijjia jjima nequinaje quea huiso cahuime. Majoya Pabo ojjaña cojja nei nequinaje. Huohui canaje jama ba'a: —Epeejji cuana, yahuajo eseya Queta nasijo nequi eyaya miquianaya huohui'ajjanaje eseya poqui majje hui'l'yo chana!. Jamatii miquianaya jjashajja'ajjaqui sa po ajja poanaje. Yahuajo ecuea esohui miquiaaya eshajja'ajjanaje jojjemo aquiana quea huiso ena huasijje jeaoqueajea'yo jjima poquiaye. Jiquio bishe pealai hui'l'yo jjima pome. ²²Jamatii ja'a quea mete pojji! Ecuea eba jama ba'a: Jiquio bishe hui'ije'yo. Jamatii eseya hui'l'yo ajja poaje. ²³E'e, eya Eyacuiñajjija epeejji, ojaya esohui huohuiyya. Eyacuiñajjija eya jaahuana cani. Mecajje ojaya esohuidojiji huoojea canaje enijje mimiya. ²⁴Jama poanaje ba'a: "Pabo, ja'a quea mete pojji! Eyacuiñajjija miya huoojea caje Shomano emeshi mese yasijje esohui huohuiyya. Jamajjeya Eyacuiñajjija miya jaahuana caje, miya quea pame nee acaje. Jamajjeya ojjaña cuana minijje besapoquiani pealai ohuaya jaahuana caje'yo, ehui'l'yojji pojjeama" eya acanaje esohuidojijiya. ²⁵Jamajjeya quea bihui nee pocue! Eyacuiñajjija

esohui jayojja jama ohuaya acaje e'e jojo nei. Jamaya ecuea eba. ²⁶Jamatii beniya bishe dojo caje nasi yasijje; cuiayijejea caje. Jaañaqui majje cuiapojojea caje meshijajijo enashajo quea quemohua —Pabohua acanaje.

²⁷Majoya quea cahui huiso nee nee, 14 cahuime bishe jamatii dojo canaje beniya. Bishe dojo canaje bae sahua huasijje, Adia ena huasijje. Mecashono bishe chacoiji cuaa jama acanaje ba'a: —E'e pojja'a eseya meshi chipi nei dojo cani beniya.

²⁸Majoya ohuaya aquiana quea biquie jeyo canaje quea jjono aojo. Jeaoquea canaje ena huasijje. Ipi'a'jja canaje ache doe ebajji. Jjono quea aojo ba canaje ena quea doe nee nee, 36 metro doeme. Majoya quijje pishana ipia'a'jja ca o'oyanaje. Ba canaje ena quea doe pishana, 26 metro doemeya. ²⁹Jamajjeya quea ajjajja nee nee poanaje jama ba'a: —Beniya bishe dojo caje, cuiayijejea capoquije bajjoo ani yasijje. Bishe jjacuapirojeaquiquijje nei nei, de, bajjoojo pojja'a, de —taaame poanaje.

Jamajjeya bishe chacoiji cuaa ebeca pee pea'ai ejjashehuajiji iyanobia canaje ena huasijje beniya edojo capoani jjejojo. Jeyo ca'a majje epojja ishoa'a'jja po ba'enaje quea mete nee nee. ³⁰Bishe chacoiji poani aje oe jjashahuaba taiquinaje ebepoquijji etaja huasijje, enequisohuaquijji nisho epoquiquehuajji. Mecashono bishe sisi ecapashineijje jeaoqueajea canaje ena huasijje. Siajje poanaje jama ba'a: —Ecuana poquije bishe hui jeyohua. E'e, bishe hui ejjashehuajiji ena huasijje jeaoqueajea poquije ecuana —jama siajje pomeya poanaje.

³¹Pabohua ca ca sohuinano cuana, sohuinano huoojeajji Joño pea'ai huohui canaje jama ba'a: —Chojja. Bishe chacoiji cuana bishe aijo mi nequiajo Eyacuiñajjiya eseya ejahuanajji pojjeama —acanaje.

³²Jamajjeya Paboja sohui shajja'a'jja canaje sohuinano cuaa. Jjono cuana bishe sisi ejeyoji'y'a jajasejjajea canaje. Jajasejjajea cajje bishe sisi jamatii dojojea canaje se'ejjama'!

³³Beshahua nei jjapojjaquianijo, Pabohua ojjaña ecuana bobo ijija mee canaje. Huohui canaje jama ba'a: —Miquianaya quea huiso nee nee cahuime, 14 cahuime ijija'ijija jjima nequi, cahui jjima nei nequi beni yajjajo, enashajo yajjajo, ehui'ije'yo poso jjejojo. ³⁴Jamajjeya ijija'ijija socue! ¡Bobi ijjiacue! O'o mi oe shocuishocuaje so'o e'ijija'ijija jjejojo, mano'ama poaje eshocuishocuaje besapoquijji. Hui'il'yo aija se poaje bishe hui'il'yajo. Ojjaña eseya jamatii quea pame poaje —Pabohua acanaje.

³⁵Jamaya huohui majje Pabohua pahui iñanequia majje bihuia canaje Eyacuiñajji ojjañaja ecuanaja ebajji. Pahui mijisisi majje ijija canequinaje.

³⁶Pabo ba majje ecuana quea bihui nee poanaje. Jamajjeya bobo ijija pea'ainaje ecuaaya. ³⁷E'e, eseya jiquio bishejo ani dejja mahuiso ba'a: quea huiso nee nee, 276 huisome se poanaje. ³⁸Jamajjeya aje oe ojjaña cuana jejje canaje. Jejje majje quea huiso anoso ai, pahui pohui pea'ai jeaoqueajea canaje ena huasijje bishe quea peja epoji, eba'ecuaya'yojji pea'ai.

Bishe ai hui'i'yonaje

³⁹Japojjaquiajo mecajjeahua nei bishe chacojjii cuaa meshi quea chipi nee ani ba canaje. Onaja ma meshi ba jjima, ache meshi shai. Hueshalama meshijaji enashajoma' pishana, quea coe pishana ba canaje. Jamajjeya echacojjii cuana poqui sa poanaje bae sahua huasijje, ena coe yasijje bishe ba'ehuanañaquia nisho. Jomajo enashajo quea quemo pishana yani. ⁴⁰Majoya ejjashehuajijji cuana jajasejjajea canaje, dojojea canaje, ejehuibeje bishe quii ca'ajji ejeyo ba'e jjono jajasejja acanaje bishe epii nei edojo cajji. Majoya daqui quea quemo quecuauquini majje nequiasohua canaje, beniya bishe huijje dojobesa canaje meshijaji yasijje. ⁴¹E'e, beniya bishe ai hui dojobesa canaje. Meshijaji biajje huanasohuajea capoquinaje. Bishe jaañaquinaje. Bishe chacojjii cuaa bishe meshijajijo hui jaañaquiajo quecuauyiyejea'ajja ca'yo nequinaje. Enashajo quea quemohua, quea cuejipashi neeya bishe quijje nane amajje bishe cuiapojojea canaje. ⁴²Sohuinano cuana jama poanaje ba'a: —Bishe hui'i'yajo, dejja cuana ejeyo nequi meshi yasijje shocuishocui majje poquiquehua chana! Jamajjeya eseyaya ojjaña joya eme ejeyo ani quecuajea jeyojeyo'e'yo —poanaje sohuinano.

⁴³Jamatii sohuinano huoojeajjiya Joñohua Pabo nahue sa acanijo huohui canaje jama ba'a: —Dejja cuana eme jeyo ani ja'a quecu'a'yojjii! ¡Pichojea'yocue oe! ¡Joya shocuishocuiani tohuua meecue ena huasijje! ¡Meshi yasijje cashocuishocui besapoquiahua! ⁴⁴¡Pea cuana joya shocuishocui ajja ca ca huepee biajje, bishe ecuiapojojea biajje cuanaya cabesapoquiahua meshi yasijje! —acanaje Joñohua.

Jamajjeya ojjaña cuana meshi yasijje besapoquinaje. Hui'i'yo jjima nei nei cuana. Nequisohuaquinaje etaja huasijje, ojjaña ecuanaya.

Pabo Manita nasiyo nequinaje

28 ¹Jamajjeya ojjaña ecuanaya meshi yasijje besapoqui'yonaje. Etaja huasijje nequisohuaqui majje dejja cuana jomajo ba'e ecuaaya banaje. Ohuaya ecuana huohui canaje: —Jiquio meshi Manita nasi bajjani. Quea quemo nasi —acanaje.

²Ese ejja cuana jomajo ba'e mase'ama, quea pame nee nee. Miminaje ojjaña cuana nijje. Enapajiji quea huoejo cuaqui quea huiso chicha majje dahuahuojje canaje. Jama acanaje ba'a: —¡Poecue cuaqui yasijje; ojjaña nequiana jjayoquihuacu! ¡Quea pame nee ecuana nijje ba'ecue! —acanaje.

³Majoya Pabohua acui sisi cuana chicha canaje cuaqui. Ma acui sisi cuana cuaqui quea jiji nee, quea quiyo nee yasijje jeajea canijo, peyo se najjiya Pabo me ijija neinei ca'yonaje. ⁴Nasi aijo ba'e dejja cuaa peyohua me ijija caje Pabo ba canaje. Jamajjeya oya cuana ojee mimimiminaje jama ba'a: —E'e jojo nei jiquio dejja pea quecuajji. Jamajjeya oja mimishijo peyohua oya ijija canaje. Oya hui'i'yo jjima bae aijo. Jamatii jjeyahua nei oya manoje'yo oja mimishijo —jama posoya acanaje cuaa.

⁵Jamatii Pabohua peyo jeajea canaje cuaqi yasijje. Nee'ama, mano jjima oya poanaje, shejjee jjima pea'ai. ⁶Ojjaña cuaa Pabo ba neinei ca aninaje. Jjashahuabaquinaje jama ba'a: —Jjeyahua nei oya shejjeeje ba'ajja. Jjeya nei pojja'a oya manoje'yo —poanaje.

Chojja, Pabo mano'ama nei nei poanaje. Quijje pishana Pabo quea ja'a nee nee, quea mano pojjeama ba majje ma dejja cuaa oya jama acanaje ba'a: —Oya emano'yoji pojjeama —cuana poanaje.

Jamajjeya onaaya huohui canaje jama ba'a: —Oya dejja pojjeama. Oya pea eyacuiñajji dejja jayojja poeyanaje, de —poso acanaje cuaa ojjañaa.

⁷Manito nasi emeshi mese Pomino bajjani poanaje. Ojaya que cuana huesha'ama nequi. Ohuaya ecuana iyaa canaje ojaya equi cuana huasijje. Ecuana nijje miminaje quea pame nee nee. Ojaya equi cuanajo ecuana ba'e mee canaje pea beca peejjima cahuime, Pominohua. ⁸Emeshi mese Pominoja chii ca ca quea mano nee jaa, seeseejo; quea quiyo nee nee pea'ai. Jamajjeya Pabo oja equi quecuayijji yasijje dobiquinaje o baa, emanojaa baa. Ba majje Pabohua ma emanojaa ja eyami biajje ojaya eme huana canaje Eyacuiñajji nijje emimijji o jjaajaquí mee'yojji. Quea pame nee, quea aja nee Pominoja ejearaji po'yonaje. ⁹Jamajjeya Pominoja chii huaquia'yonaje ba majje ojjaña emanojaa cuana nasi aijo ba'e poeyanaje Pabo que. Jesosaa Pabo ojjaña huaquia meesahua ca'yonaje. ¹⁰Majoya ma dejja cuana quea bihui nee nee poanaje. Aquiana quea huiso ecuana quia canaje sosema!. Quijje ecuana pea bishe ai yasijje anisohuaqui'yonaje. Majoya nasi aijo ba'e cuaa quea huiso pea aquiana cuana eba'eiji ecuana quia canaje sosema!.

Pabo Shoma cuiñajji yasijje besapoquinaje

¹¹Jamajjeya ecuana Manita nasijo ba'enaje pea beca peejjima ba'ime, 3 ba'ime. Majoya ecuaaya pea bishe ai banaje eyacuiñajji beca jaa bajjani, Casito Pono bajjani. Ma bishe ai Anejania cuiñajji jo jaa poe majje eeno shejo Manita nasijo aniñaquinaje; majoya besapoquinaje Shoma meshi yasijje eba'eñaquijji. Jamajjeya sohuinano huoojeajji Joñohua ecuana ma bishe aijo ani mee canaje. ¹²Majoya besapoqui'yo majje ecuana pea nasi yasijje poeyanaje, Sinacosa cuiñajji yasijje ba'eñaquinaje. Jomajo ecuana nequinaje pea beca peejjima cahuime. ¹³Majoya Sinacosajo ani ecuana besapoqui o'yanaje. Itania meshi yasijje poeyanaje. Shejio cuiñajji yasijje ba'eñaquinaje. Majoya mecajjeahua eeno beni sisi poanaje. Jamajjeya beniya bishe dojo canaje quea pame nee. Beca cahuime po majje ecuana Poteoni cuiñajji yasijje ba'eñaquinaje, Itania meshi yasijje. ¹⁴Poteoni cuiñajji jo Jesosaja epjeeji quea huiso cuana ba'enaje. Ohuaya ecuana iyaa canaje oja equi yasijje e'aniji. Jamajjeya ecuana ma cuiñajji nequinaje me oeje beca cahuime, 7 cahuime Jesosaja epjeeji cuana nijje. Majoya ecuana poquinaje Shoma cuiñajji quea quemó huasijje ejiojjije. ¹⁵Jesosaja epjeeji cuaa Shomajo ba'leya shajjal'ajja canaje Pabo poeyani. Jamajjeya oya cuana Pabo ishoa sa po ajja Shomajo. Poeyanaje Apio cuiñajji

yasijje, pea cuiñajji yasijje yohua bajjani yasijje ba'a: Pea Beca Peejjima Equi cuana huasijje pealai Pabo baa. Jamajjeya Jesosaja epeejji cuana jomajo tii ba majje Pabo queabihui nee nee poanaje. Eyacuiñajji bihuia canaje, Pabohua.

Pabo Shomajo ba'enaje

¹⁶ Majoya ecuana Shoma huasijje poquinaje. Shomajo nequiñaqui majje sohuinano huoojeajji Joñohua Pabo huohui canaje jama ba'a: —Pabo, ¡miya mee nei ba'ecue jiquio equiojo! —acanaje.

Jamajjeya oe sohuinano Pabo jaahuanajji nequinaje ma equijo pea'aiya.

¹⁷ Majoya pea beca peejjima cahuime po majje Pabohua Jodio etii cuana iyaa canaje. Ojee jjachichaquiaj Pabohua oya cuana huohui canaje jama ba'a: —Epeejji cuana, ¡shajja'ajjacue mo oe! Ecuea Jodio cuana quea mimishi aijiima poanaje. Esejaya etiiquiana cuanaja esohui pajea'yo jjima ecuea pea'ai. Jamatii eya Jenosanenajo nequi Jodio etii cuaa eya iña canaje. Eya quia canaje Shomano dejja cuana huasijje. ¹⁸ Shomano etii cuaa eya huohui'ajja canaje. Jamatii ecuea esohui shajja'ajja majje onaaya eya ba canaje quea mimishi pojjeamajojo ecuiajea'yojji pojjeama onajaya, ejeanobiajea'yojji tii pojjeama pealai. Onaaya eya pichojea sa acanaje. ¹⁹ Jamatii Shomano cuaa eya pichojea sa acanijo, Jodio etii cuana quea mase nee, quea quene nee nee poanaje. Jamajjeya eyaya jama anaje ba'a: "Shomano emeshi mese etii nijje, Sesa nijje eya mimi sa poani. Ecuea esohui shajja'ajja majje ohuaya cahuohui cahua ojaya ejjashahuabaquijji ejo" eyaya anaje. Jamatii ecuea Jodio cuana niñeba jjima poanaje, o niñeba sa po ajja eya. Chojja, Jodio cuana ecuea huapa pojjeama cuana. ²⁰ Jamajjeya eya miquiana nijje mimi sa poani. E'e, ojjaña Isaeni cuaa ishoa'ajja canaje Eyacuiñajji huoojea'yo ojjaña jaahuanajji Quito. Quitohua ojjaña cuana ba'e mee caje o'oya eyajo onijje. Eyaya ojo huohuiñajo, Jodio etii cuaa eya jeyo mee canaje baa jjonohua. ¡Bacue jiquio baa jjono ba'a! —Pabohua acanaje.

²¹ Jodio cuaa Pabo sajalcanaje jama ba'a: —Pabo, Jodio cuana Jodea meshijo ba'eja ecuana huasijje esohui etehue'yo mijo huoojea jjima. Ecuana jaya epeejji Jodea meshijo ba'eja poe jjima mi huohuijji pealai. Oya cuana poe jjima mi niñebajji epo pealai. ²² E'e, ecuana miquea esohui shajja'ajja sa poani. Ecuana jaya eba ojjaña meshijo pea cuaa Jesosaja epeejji cuana niñeba cani. Jamajjeya shajja'ajja neinei sa poani ecuana —acanaje Jodio cuaa. ²³ Majoya Pabo huohui canaje jama ba'a: —E'e, ecuana jaya epeejji cuana huohui majje ojjaña poeje miquea esohui shajja'ajja.

Jamajjeya quijje pishana pea pojja quea huiso Jodio cuana mecajjeahua poeyanaje Pabo shajja'ajja. Pabohua esohui huohui canaje quea huiso nee nee. Meca cuanajje oya mimi tiitii nequinaje Eyacuiñajji ojjaña huoojeajji poajejo. Jodio cuana ba mee sa acanaje Jesosa Eyacuiñajji huoojea'yo ojjaña jaahuanajji, Quito. Pabohua Moisesija etehue'yo cuanajo, Eyacuiñajji esohui huohuijji yahuajo nei ba'eja esohui etehue'yo pealaijo

Jodio cuana ba mee sa acanaje Jesosa e'e jojo nei Eyacuiñajjija huoojea'yo ojjaña jaahuanajji, Quito. ²⁴Quea huiso Jodio cuaa ojaya esohui shajja'ajja majje huohui canaje jama ba'a: —E'e de, ojaya esohui e'e nei —acanaje.

Pea cuana ca ca ojaya esohui shajja'ajja sa po maja ajja. Jesosa Eyacuiñajjija huoojea'yo ojjaña jaahuanajji pojjeamajo poso quea quene nee poanaje cuana Pabohua jama huohuime acajje. ²⁵Jamajjeya ojee cuana anica jjamimicuajea nobiajeaqui poquinaje. Ojjaña cuayaquianijo Pabohua jama acanaje ba'a: —Edojoshahua Pameya Eyacuiñajjija esohui huohujji Isaia yahuajo nei nei esohui huohui meesahua canaje miquianajaya etiiquiana cuana huasijje. E'e, ¡miquianaya quea sapa ca'a poanijo shajja'ajjacue ojaya esohui etehue'yo! Jama aca poa Isaiaa yahuajo nei ba'a:

²⁶ “Jodio cuana huasijje poqui'yo majje huohuicue jama ba'a:

—Shajja'ajja majamaja majje jamatii ecuea esohui quea quehua poaje miquianajaya. Ba majamaja majje jamatii jjabahuejjaqui ajja poaje. ²⁷ Jiquio Jodio cuana quea jjashahuabaqui quehua poani tii tii. Quea sapa ca'a. Jjashajja'ajjaqui sa po'yo ajja. Ba sa po'yo ajja pea'ai. Ba sa pojji jojjemo ohuaya ba ca'yome. Jjashajja'ajjaqui sa pojjiya jojjemo jjashajja'ajjaqui'yome. Quea jjashahuabaqui ja'a po sa pojji jjemo quea jjashahuabaqui ja'a po'yome. Jamajjeya oya cuana ecuea epeejji cuana po'yome. Eyaya ojaya mimishi cuana cuijea'yome pea'ai”.

Jamaya Eyacuiñajjija Isaia huohui mee ca poa.

²⁸ Majoya Pabohua jama acanaje ba'a: —Jamajjeya ¡bacue! Eyacuiñajjija ojjaña jaahuanajji Jesosa huoojea canaje mano'yohua, mimishi cuana cuijea'yoji, mimishi sosequia'yoji pe'a'i. Ohuaya ojjaña ojaya epeejji cuana ba'e tiitii mee caje'yo onijje eyajo. Jodio cuana shajjama' poanijo, Eyacuiñajjija eya huoojea canaje Jodio pojjeama cuana huasijje ojaya esohui huohuiya. Jodio pojjeama cuaa ca ca shajja'ajja caje, de —Pabohua acanaje.

²⁹ Majoya Pabohua esohui huohujeyo cajo, Jodio cuaa oya jiñajea ca'yonaje. Majoya oya cuana janobajjima nei ojee jjamimicuajea nobiajeaquinaje.

³⁰ Jamajjeya beca shequiajame Pabo oe nei ba'enaje oe equijo, ejjeshejji sosejje. Ojjaña cuana o que poeyajo, ojjaña cuana nijje quea bihui nee miminaje, quea bei nee poanaje. ³¹ Ohuaya huohui canaje Jesosa ojjaña huoojeajji poaje. Emeshi Mese nei Jesosa Quitojo huohui majamaja canaje mete'ama. Pea cuanaja oya huohui pajea mee jjima poanaje, jamatii oya sohuinano cuanaja nahue poanaje. Jamaya poanaje.

Oeya ecuea esohui. Eya Noca bajjani esohui tehuejji. Apoa.

PABOJA ETEHUE'YO SHOMAJO BA'E CUANA HUASIJJE

ROMANOS

**Pabohua esohui tehue canaje Jesosaja epeejji
cuana Shoma cuiñajjijo ba'e yasijje**

1 ¹Eya Pabo bajjani. Jesosaja epeejji cuana, eyaya jiquio esohui tehueña miquiana huasijje Shoma cuiñajjijo ba'eca huasijje. Eya ca ca iña Jesosa Quitoja huoojea'yo ojaya esohui huohuijji. Eyacuiñajjija eya babaca canaje ojaya esohui huohuijji epojji. Ohuaya eya huoojea canaje quea huiso meshi yasijje ojaya esohui quea pame nee Jesosajo huohuiya.

²Yahuajo nei nei Eyacuiñajjija ma esohui quea pame Jesosajo ojaya etehue'yojo tehue mee ca poa ojjañaja ebajji. Ojaya esohui huohuijji yahuajo nei ba'le ma esohui huohui neinei mee ca poa pea'ai. ³Jamaya Eyacuiñajjija eseya ba mee cani oja Bacua Ejja oe nei Jesosa ese jayojjaya yamijji poeyanaje. Cuayanaje Maniaja bacua. Jodio cuanaja emeshi mese quea pame nee Dabi bajjani ojaya etiiquiana, huapa pojjeama yahuajo ba'ya poa. ⁴Oya Jesosa Quito ese jayojjaya yamijji poanaje. Oya Eyacuiñajji nei pea'ai, oja Chii jayojja nei nei, mimishi'ama nei nei. Oya mano'ya poa. Jamatii Eyacuiñajjija quea ca'a nee neeya oya emanoyojaa shequi mee ca o'yanaje. Jamaya ohuaya ojjaña ba mee canaje Jesosa e'e jojo nei oja Bacua Ejja, esejaya Emeshi Mese nei. ⁵Eya Jesosaja epeejji poanijo Eyacuiñajjija eya ojjaña meshi yasijje huoojea canaje jama ba'a: —¡Poquicue miya ojjaña Jodio pojjeama cuana huasijje! ¡Ecuea esohui ba meequivicue Jesosajo! ¡Onijke jjapeequi meesahuacue! Jamajjeya onaaya Jesosa bihuia tiitii caje'yo —jamaya Eyacuiñajjija eya huoojea canaje quea pame nee.

⁶E'e ecuea epeejji cuana Shomajo ba'e, Eyacuiñajjija miquianaya babaca canaje pea cuana nijje Jesosa Quitoja epeejji epojji. ⁷Jamajjeya eyaya miquiana que jiquio esohui tehueña. Miquianaya Eyacuiñajjija quea jea nee nee. Ohuaya miquianaya babaca canaje ojaya epeejji nei epojji.

¡Ejacuiñajjiya esejaya Chii aiya, Jesosa Quitohua esejaya Emeshi Mese neiya miquianaya cajaahuana cahua; quea bei nee caba'e meesahua cahua pea'ai!

Pabo ojaya epeeiji cuana Shomajo ba'ejo Ejacuiñajji nijje mimiani

⁸Ecuea epeeiji cuana Shomajo ba'e, ojjaña meshijo ba'e cuana miquianajo mimiani quea bei Jesosaja esohui jayojja jama ba'yanijo. Ma shajja'ajja majje eyaya Jesosa esejaya Chii ai pea'ai bihuiaña jama ba'a: —Ejacuiñajji, miya quea pame nee. Ojjañaja eba miyaya miquea epeeiji cuana Shomajo ba'e jaahuanaña —eya poani.

⁹Eyaya e'e jojo nei Ejacuiñajjiya esohui quea pame nee oja Bacua Jesosajo huohui tiitiaña quea bihui nee. Ojaya eba eya onije mimi majamajani miquianajo. ¹⁰Eya jama poani ba'a: —Ejacuiñajji, yahuajo eya poqui sa poanaje Shoma huasijke Jesosaja epeeiji cuana baa. Jamatii poqui mee jjima eya miquea. Ejacuiñajji, ¿a'a jjeya eya Shoma huasijke huoojea sa aña miyaya? —eya jamaya Ejacuiñajji nijje mimi majamajani.

¹¹E'e, eya miquiana ba neinei sa poani Jesosaja epeeiji quea ca'a nee epo meesahua'yoji. Edojoshahua Pameya eya ba mee canaje Ejacuiñajjiya esohui eyacua quea pame. Ma esohui eyacua shajja'ajja majje miquianaya Jesosaja epeeiji quea ca'a nee poaje. ¹²Miquianaaya eya baje Jesosaja epeeiji quea ja'a nee poani. Cuanaya miquianaya Shomajo ba'e Jesosaja epeeiji quea ja'a nee baje eyaya. Jamajjeya Ejacuiñajjiya eseyá ojaya epeeiji cuana quea ja'a nee po meesahua caje'yo.

¹³Ecuea epeeiji cuana, ¡bacue jiquio esohui! Yahuajo eya poqui sa neinei poanaje miquiana baa. Jamatii eya poqui mee jjima, de. E'e, eyaya Jodio pojjeama cuana pea meshi cuanajo ba'e jjapeequi meesahuanaje Jesosa nijje. Jamaya eyaya miquianaya Jesosa nijje jjapeequi meesahua sa aña pea'ai.

¹⁴Ejacuiñajjiya eya huoojea canaje ojaya esohui huohuiya ojjaña cuana huasijke jama ba'a: Ojjaña joya esejaya esohuiyo mimiani yasijke, ojjaña pea esohuiyo mimiani yasijke pea'ai, ojjaña joya papeni ba po jjima huasijke, joya papeni ba epo cuana huasijke pea'ai, ojjaña huasijke. ¹⁵Jamajjeya eyaya miquiana Shomajo ba'e yasijke Ejacuiñajjiya esohui huohui sa aña.

Jesosa nijje jjapee neineiquianijo mimishi cuijea ca'yani Ejacuiñajjiya

¹⁶;Bacue! E'e jojo nei ojjaña joya Jesosa nijje jjapee neineiquianijo Ejacuiñajjiya mimishi cuana cuijea neinei caje'yo, joya ojaya esohui shajja'ajja majje e'e jojo nei acani. Jamaya ecuea eba. Jamajjeya eyaya bicho'ama ma esohui huohui majamajaña ojjaña cuana huasijke. E'e, Jodio cuaa ma esohui shajja'ajja majje, Jodio pojjeama cuaa shajja'ajja canaje pea'ai. ¹⁷Ejacuiñajjiya esohui quea pame Jesosajo shajja'ajja majje eseyaya Ejacuiñajjiya ejjashahuabquijji baña jama ba'a: —Ojjaña Jesosaja epeeiji nei nei eyaya mimishi cuana cuijeaje'yo e'e jojo nei epoji. Jesosaja epeeiji pojjeamaja mimishi ecuijea'yojji pojjeama —Ejacuiñajji poani.

Ojjaña Jodio cuana, Jodio pojjeama pea'ai quea mimishi poani

¹⁸ ¡Bacue ecuea esohui ojjañaja mimishi cuanajo! Eyacuiñajji eyajo ba'e quea quene nee nee poaje ojjaña coya mimishi po majamajani nijje. Quea nee nee acaje'yo. Oya cuana aje oe jama poani ba'a: Quea mimishi poani tii, Eyacuiñajji bihuia ajja, mimishi pajea sa po'yo ajja. Eyacuiñajji esohui shajja'ajja sa po ajja, pea cuana esohui shajja'ajja mee ajja pea'ai shajjama' cuana nijje ejjapeequijji jjegojo. ¹⁹E'e, Eyacuiñajjiya ojjaña ba mee ca poa oya quea pame nee, quea ca'a nee enequi tii tii. Jamajjeya ¡Eyacuiñajji ojjañaa caba cahua, de! ²⁰E'e, oya ca ca oe Eyacuiñajji nei quea ca'a nee enequi tii tii. Ohuaya ca ca oe ojjaña pana ca'ya poa. Jamajjeya ojaya epana'yo ba majje joya e'e jojo nei Eyacuiñajji bacue, ojjañaa! Jamatii beca cuana siajje poani jama ba'a: —Esejaya Eyacuiñajji ebajji pojjeama, jjaba meequei ajja, de. ¿Yajja bame yajji eyami ebajjijojo? —poani. ¡A'a jama siajje pomeya pojji!

²¹ E'e de, yahuajo nei ojjañaja eba Eyacuiñajji yani. Jamatii onajaya Eyacuiñajji bihuia jjima jama ba'a: —Eyacuiñajji, miya oe nei quea ca'a nee nee enequi tii tii —jamaya ajjima—. Jamaya Eyacuiñajji, miya quea pame nee nee —ajjima. Oya cuana jamaya jjashahuubaqui jjima, de.

Jamajjeya oya cuana quea quehua jjashahuubaquiani, quea mimishi. Jiquio ecua mecajje quea misi poquiani jayojja jama oya cuana quea mimishi ba'yani, Eyacuiñajji ba pojima! ²²Ojjaña ba epo poso jjabaquiani. Chojja, ba jjima nei nei quianaja. Quea mimishi nee nee jjashahuubaquiani, ojjaña de. ²³Onaaya aje oe Eyacuiñajji nisho bihuia cani; dejja nisho, cuichojji nisho, aquiana nisho, peyo nisho pea'ai ne cani ebihuiajji. Eyacuiñajji nei ca ca bihuia jjima, de. Eyacuiñajji ca ca oe enequi tii tii quea pame nee nee.

²⁴ Jamajjeya oya cuana quea mimishi ca'a nee nee; jjashajja'ajjaqui aija jojoya Eyacuiñajjiya oya cuana cajaa acani jama ba'a: —Oya cuana shajjama' nei nei. Jamajjeya quea mimishi caba'yahua jamatii. Eyaya oya cuana mimishi pajea meesahua maja ajja —Eyacuiñajji poani.

Jamajjeya cajaa a'yo majje ojjaña ojaya ejjashahuubaquijji tai jayojja jama ca'latiitii cahua cuaa. Pea cuana nijje aje oe quea mimishi nee capoahua. ²⁵ ¡Bacue! Eyacuiñajji e'e jojo nei oe nei yani. Ohuaya ojjaña pana ca'ya poa. ¡Ojjañaa oya cabihuia tiitii cahua! Jamatii joya quea mimishi neeya Eyacuiñajji bihuia pajea cani eyacuiñajji nisho bihuajji. E'e, oya cuana quea jjashahuubaqui quehua poani, de. ²⁶ Jamajoya Eyacuiñajjiya oya cuana cajaa acani jama ba'a: —Oya cuana shajjama' nei nei. Jamajjeya jamatii quea mimishi canequiahua bicho'ama. Ecuea oya emimishi pajea meesahua'yojji pojjeama —Eyacuiñajji poani.

E'e, quea mimishi nee nee ba'yani bicho'ama. Eyacuiñajjiya esohui jama ba'e ajja. Epona cuana aje oe pea epona nijje quea mimishi nee poani, ojahue nisho acani, jjaso cojjoquiani. Pea cojjojji pea'ai poani. ²⁷ Dejja cuana pea'ai aje jjaja oe jamaya quea mimishi epona jayojjaya po pea'ai yani. Ehuanase jea majje epona nijje pojjeama jaani, pea dejja nijje quea mimishi ba'yani. Onijje dejja

nijje jjaseehuejja cojjoquiani. Jamajjeya jjashajja'ajjaqui aija jojoya Eyacuiñajjiya oya cuana cajaa acani. Ca'l'ama poani, quea jjashahuabaqui tai poani pea'ai.

²⁸Eyacuiñajjiya epana'yo ojaya eba. Jamatii oya cuana jama poani ba'a: —E'e pojja'a Eyacuiñajji e'e jojo nei yani. Jamatii ¿apiojji acuae oya shajja'ajja cajji so'o? Cajaa —oya cuana poani.

Jamajjeya Eyacuiñajjiya oya cuana jama acani ba'a: —Oya cuana ca ca oe quea jjashahuabaqui tai po tiitiiani; quea mimishi ba'yani tii bicho'ama jjejojo. Jamatii quea tai caba'yahua —Eyacuiñajji poani.

²⁹Jamajjeya ojjaña cuana quea mimishi nee nee poani tii tii. E'e, quea mimishi ba'yani, quea dejja tai, quea nishehui, onaja aquiana jea ba cani, pea cuana boti'ama nei nei poani, ona mimishi po meeiji pea'ai poani. ³⁰Pea quecuajji poani, jjamimicuajjea nobiaeajquiji poani, jjadasiaquiji poani, ojaya epeejji iñameejji poani equecua mee'yojji, mimijajiji poani, pea cuanajo maimaijji, Eyacuiñajji cajaa acani, pea cuana jeabichajeajji poani, pea nijje mimi aija pea'ai. Oya mimiani ojaya ejjashahuubaquijji poa cuana quea bihui po meeiji nisho, jjashahuuba tiittiuiquiani mimishi ya'yojji. Oja chii, oja nae shajja'ajja sa po aija pea'ai. ³¹Jjashahuubaquii aija, mimishi cuana quea pame poso acani, ojaya ehuohui jama a'ajja pea'ai. Huapa pojjeama cuana boti'ama acani, pea cuana quea nee po mee sa acani; pea quea nee, quea yeno po mee majje yeno'ama poani. ³²Dejja quea mimishija eba Eyacuiñajjiya esohui etehue'yo e'e nei jama poani ba'a: "Ojjaña joya quea mimishi poani quea nee nee poaje'yo. Mano'yo majje cuaqui yasijje poquije'yo. Enijje eyajo enequi'yojji pojjeama tii tii" Eyacuiñajji poani.

Maya ojjaña mimishi cuanaja eba. Jamatii shajjama' poani tii tii. Pea cuana aje oe quea mimishi po mee cani jama ba'a: —E'e, ocuee. ¡Jamaya a'ajja! —bihuia nisho cani.

Eyacuiñajjiya ca ca oeyaya huohui caje joya mimishi'amajo, joya quea mimishijo pea'ai

2 ¹Ecuea epeejji cuana, ¿a'a miquianaya jjashahuubaquiani miya ca ca oe quea pame, ma dejja mimishi cuana jama pojjeama? ¡A'a pea cuana jama ajji ba'a: —Oya cuana quea mimishi nee poani. ¡Quea nee nee capo mee cahua Eyacuiñajjiya! —a'a jamaya mimijji!

¡Dee! Miquianaaya beca cuaa ona jayojja jama quea mimishi aña pea'ai. Jamajjeya Eyacuiñajjiya miquianaya quea nee nee po mee caje'yo ona jayojjaya. ²Ecuanaja eba Eyacuiñajjiya ejjashahuubaquijji e'e nei, ojjaña ojaya eba. Jamajjeya ojjaña joya quea mimishi ba'yani ohuaya quea nee nee po mee caje'yo, Jodio cuana, Jodio pojjeama cuana pea'ai, ojjaña nei nei. ³Miya quea mimishi poanijo ¡a'a jjashahuubaquijji jama ba'a: —Eyacuiñajjiya pea cuana quea nee nee po mee caje'yo shajjama' poani jojoya. Eya ca iña cho, quea nee epo meeiji pojjeama —a'a jamaya pojji! ¡Dee! Miya quea mimishi poani ona jayojja. Jamajjeya Eyacuiñajjiya miya quea nee nee po mee caje'yo ona nijje. Miya ojaya eba, de,

ejjanequiquehuaquijji pojjeama miya. ⁴E'e pojja'a miya quea quehua jjashahuabaquiani jama ba'a: —Eyacuiñajji ojjaña nijje quea pame nee poani. Quenequene cuaji ajja. Joya ojaya esohui jama ba'e ajja jamatii quea nee nee epo meeiji pojjeama. Jamajjeya eya quea mimishi po tiitianijo, jamatii ojaya eya etecueajji pojjeama —poso jjabaquiani miya.

Chojja. Miya aje oe jjashahuabaquiani quea quehua nee. ¿A'a miquea ba jjima? Eyacuiñajji ojjaña nijje quea pame poani, ishoa cani emimishi pajea meesahua'yojji. ⁵Jamajjeya miya quea mimishi nee nee jjejojo, shajjama' poani tiitijo, Eyacuiñajjiya miya quea nee nee po mee caje'yo. E'e, quijje ohuaya ojjaña shajjama' poani tecuea neinei caje'yo. ⁶E'e jojo nei Eyacuiñajjiya ojjaña eseaya sosequia caje'yo ma eseaya aninaje sosejje. Ojaya epeejji quea pame quea bihui nee po mee caje'yo. Shajjama' cuana ca ca quea nee nee po mee caje'yo ma o quea mimishi ponequinaje sosejje. ⁷Jamajjeya beca cuana Eyacuiñajjiya esohui jama quea pame nee poani Jesosaja ejjashahuabaquijji jayojja epojji, o jayojja jama epojji, onijje eba'e tiiti'yojji. Eyacuiñajji quea bihui nee po mee sa acani. Jamajjeya Eyacuiñajjiya oya cuana bihuia caje jama ba'a: —E'e, miquianaya ecuea epeejji quea pame nee. Jamajjeya miquianaya enijje ba'e tiiti'yo eyajo.

⁸Pea cuana ca ca Eyacuiñajjiya esohui e'e nei jama ba'e sa po'yo ajja. Cajaa acani. Shajjama' poani. Jamajjeya Eyacuiñajji onijje quea quene tii tii poaje'yo. Quea nee nee po mee caje'yo. ⁹E'e, Jodio cuana, Jodio pojjeama cuana pea'ai Eyacuiñajjiya ojjaña quea yeno nee, quea nee nee po mee caje'yo shajjamajojo. ¹⁰Joya ojaya esohui jayojja jama quea pame poani ca ca Eyacuiñajjiya huohui caje jama ba'a: —E'e jamaya, miya quea pame poani. ¡Jamajjeya quea pame, quea bei ba'ecue! ¡Enijje ba'e tiitiuce eyajo! ¡Enijje ojjaña huoojeajji pocue! —oya cuana acaje.

E'e, Jodio cuana jamaya acaje Eyacuiñajjiya, Jodio pojjeama cuana pea'ai. ¹¹Ojjañajo Eyacuiñajji e'e jojo nei jjashahuabaquiani. Esejaya eba'ejjijo jjashahuabaquiani esosequia'yojji.

Eyacuiñajjiya ehuohui shajjama' cuanajo e'e nei

¹²Jodio pojjeama cuanaja ba jjima poa Eyacuiñajjiya esohui ma Moisesiya tehue ca poa. Jamatii oya cuana quea nee nee po mee caje'yo Eyacuiñajjiya quea mimishi ba'yanijo.

Jodio cuua ca ca Moisesija etehue'yo ba canaje. Jamajjeya shajjama' poanijo, Eyacuiñajjiya oya cuana tecuea caje jama ba'a: —Miquianaya ca mi ca shajjama'. Moisesija etehue'yo bajji poani, jamatii jamaya a'ajja. Jamajjeya ma etehue'yojo tehue ca poa jayojja jama miquianaya quea nee nee poaje'yo —Eyacuiñajji poani.

¹³Moisesija etehue'yo Eyacuiñajjiya esohui ba majje jamatii Jodio cuana shajjama' poani. Jamajjeya ojaya mimishi cuana ecujea'yojji pojjeama. Ojaya esohui jama acani ca ca oe Eyacuiñajjiya mimishi cuana cuijea caje'yo Jodio cuanaja. ¹⁴Jodio pojjeama cuanaja ba jjima Eyacuiñajjiya esohui Moisesija etehue'yo. Jamatii oya cuana ma esohui jayojja jama ba'yani beca cuana. E'e, quea ja'a nee jjashahuabaquiani. Jamaya ojaya eba quea pame eba'ejji. Ojaya

eba eba'ejji quea tai pea'ai. E'e, Moisesija etehue'yo Jodio pojjeama cuanaja ba jjima nei. ¹⁵ Jamatii, Eyacuiñajjiya oya cuana ba meesahua cani ojaya ejjashahuabaquijji'yojji. Jamajjeya oya cuana oja mimishijo jama poani ba'a: —Chojja, jamaya Eyacuiñajjiya boti'ama. Eya shajjama' jayojja poani.

Joya quea pame ba'yani jama poani ba'a: —E'e, jamaya quea pame eba'ejji. Jamaya Eyacuiñajjiya quea boti nee —oya cuana poani.

¹⁶ E'e, Eyacuiñajjiya eba ojjañaja ejjashahuabaquijji cuana. Jamajjeya quijje ohuaya e'e jojo nei huohui caje'yo ojjañaja eba'ejjijo. Ohuaya Jesosa huoojea caje jama ba'a: —Jesosa, joya cuana sosequiacue ma ohua meshijo ba'yahuua acanaje sosejje! —Eyacuiñajjiya acaje'yo.

Jamaya eyaya, Pabohua huohuiaña ojjaña esohui quea pame nee Jesosajo.

Jodio cuana Moisesija etehue'yo ba majje jamatii shajjama' poani

¹⁷ Jodio cuana, miquianaya mimi huicha'a huicha'ani jama ba'a: —Ecuana ca ce de Jodio cuana, Eyacuiñajjiya babaca ojaya nei epoiji. Ohuaya ecuana ojaya esohui ba mee ca poa Moisesija etehue'yo. Jamajjeya ohuaya ecuana ba cani mimishi'ama —miquianaya poani—. ¹⁸ E'e, ecuaaya baña Eyacuiñajjiya esohui Moisesija etehue'yo. Jamajjeya ecuanajaya eba Eyacuiñajjiya ejjashahuabaquijji'yojji. Jamajjeya ecuana ba'yani quea pame nee, mimishi'ama —miquianaya poani.

¹⁹ Jamajjeya miquianaya jama poani pea'ai ba'a: —Jodio pojjeama cuana, Eyacuiñajjiya esohui ecuanajaya eba nei nei Jodioja jjejojo. ¡Ecuana jayojjaya oe pocue! —miquianaaya aña—. Ecuaaya Eyacuiñajjiya esohui baña Jodiohua jjejojo. Jamajjeya ecuanaya cuaquijji jayojja jama poani. Jiquio ecua mecajje quea misijo cuaquijjiya ejiojji ba mee cani jayojja jama ecuaaya joya Eyacuiñajji ba pojshima' cuana quea ja'a nee ba'e meesahuaña. ²⁰ E'e, joya Eyacuiñajji ba pojshima' cuana, Eyacuiñajji oe pojji ba epo pea'ai ecuaaya esohui ba meesahuaña. Eyacuiñajjiya ecuana ojaya esohui etehue'yo ba mee ca poa. Ma esohui e'e jojo nei —jamaya miquianaaya aña.

²¹ Miquianaaya pea cuana esohui huohui huicha'a huicha'aña. Jamatii miquea ehuohui jayojja jama ba'e ajja miquianaya. E'e, jama huohuime aña ba'a: —¡A'a jja oe sii pojji!

Jamajjeya ¿apiojji acuae jja oe miya sii poani?

²² —¡A'a pea cojjojji! —huohui aña miyaya.

Jamajjeya ¿apiojji acuae jja oe miya pea cojjojji poani so'o?

—¡A'a eyacuiñajji nisho bihuiajji oe! —huohuime aña.

¿Apiojji acuae jja nequiaa oe Eyacuiñajji bihuia nishoaña quea aquiana jeaa jjejojo?

²³ Miquianaya mimi huicha'a huicha'ani Moisesija etehue'yojo: —Ecuana ca jja ca oe Eyacuiñajjiya ojaya esohui etehue'yo ba mee ca poa —ca jja nequiaa ca oe poani.

Jamajjeya apiojji shai miquianaya onijje jjapee nishoquiani, ojaya esohui jayojja jama ba'e tiitii ajja. ²⁴E'e, yahuajo nei Eyacuiñajjija etehue'yo jama poa ba'a:

“Jodio cuana, miquianaya ca jja ca oe shajjama' ba'yani. Mi ba majje Jodio pojjeama cuaa Eyacuiñajji cajaa acani”.

Jamaya Eyacuiñajjija esohui yahuajo nei etehue'yo poa.

**Cuiishasha biso nei jehuisejjajea majje pojjeama
eseya Eyacuiñajjija epeejji nei poani**

²⁵Jodio cuana, yahuajo nei esejaya etiiquianaa Moisesiya Eyacuiñajjija esohui tehue ca poa jama ba'a: —¡Mique bacuaja cuiishasha biso nei jehuisejjajeacue!

Jamaya eseyaya aña, Eyacuiñajjija esohui yahuajo nei jayojjaya aña. Jamajjeya Eyacuiñajjija etehue'yo jayojja jama quea pame nee ba'yanijo cuiishasha ejehuisejjajea'yo quea pame. Jamaya ojjaña ba meeña eseya, Jodio cuana Eyacuiñajjija babaca'yo o peeiji epoji. Jamatii Eyacuiñajjija esohui etehue'yo jayojja jama ba'e ajja ca ca ¿apiojji acuae cuiishasha biso nei jehuisejjajeaña so'o? Jamatii Eyacuiñajjija miquianaya ba cani Jodio pojjeama jayojjaya quea mimishi pealaiya. ²⁶Jodio pojjeamaa ca ca cuiishasha jehuisejjajea ajja. Jamaya po ajja oya cuana. Jamatii beca cuana Eyacuiñajjija esohui etehue'yo quea ja'a nee jayojja jama ba'yani. Jamajjeya Eyacuiñajji oya cuana ba cani Jodio jayojjaya, ojaya ebabaca'yo, jamatii cuiishasha jehuisejjajea jjima. ²⁷Jodio cuana, miquianajaya eba Eyacuiñajjija esohui. Cuiishasha jehuisejjajeaña pealai. Jamatii aje oe Eyacuiñajjija esohui etehue'yo jayojja jama ba'e ajja. Jamajjeya Eyacuiñajji miquianaya ba cani shajjama!. Jodio pojjeamaa ca ca cuiishasha jehuisejjajea ajja. Jamatii Eyacuiñajjija esohui jayojja jama ba'yanijo, ohuaya oya cuana ba cani mimishi'ama, quea pame. ²⁸E'e, eseya Eyacuiñajjija esohui jayojja jama ba'yanijo ojaya epeejji nei poani, cuiishasha jehuisejjajea majje pojjeama. ¿A'l miquianaya cuiishasha jehuisejjajeaña? ¿A'l mimishi pajea'yonaje pealai? ²⁹Eyacuiñajjija esohui jayojja jama añajo ca ca miquianaya ojaya epeejji nei poani. Beca cuanaja cuiishasha jehuisejjajea jjima; jamatii Edojjashahua Pameya pea jjashahuabaquime po mee ca'yani Jesosaja epeejji nei epoji. Jamajjeya miquianaya Jesosaja epeejji e'e jojo nei poani. Pea cuaa pojja'a miquianaya Jesosaja epeejji pojjeama poso acani, miquea cuiishasha jehuisejjajea jjimajojo. Jamatii Eyacuiñajjija eba miquianaya ojaya epeejji nei poani.

Jamajjeya ojjaña joya Eyacuiñajjija esohui jayojja jama ba'yani ojaya epeejji nei poani, Jodio cuana, Jodio pojjeama cuana pea'ai, ecuuishasha jehuisejjajea'yo cuana, ecuuishasha jehuisejjajea'yo pojjeama cuana pea'ai.

Eyacuiñajji e'e jojo nei, quea ja'a nee nee poani

3 ¹Jodio cuana, ¿a'l miquianaya jjashahuabaquiani? Jama ba'a:

—Eyacuiñajjiya Jodio pojjeama cuana ojaya epeejji nei po mee cani ecuana jayojjaya. Jamajjeya ¿apiojji acuae etiiquianaja ehuohui'yo jayojja

jama cuiishasha jehuisejjajeaña? ¿A'a Jodio pojjeama epoji quea pame nee nee, Jodio epoji quea pame pishana? —miquianaya pojja'a jamaya poani.

²Quea pame nee Jodio epoji. ¡Bacue! Eyacuiñajjiya eseya Jodio cuana yahuajo nei nei ojaya esohui etehue'yo ba mee ca poa, ba majje pea cuana huasijje ehuohui'yojji pealai. ³E'e, Eyacuiñajjiya esejaya etiiquiana Amajama bajjani huohui ca poa jama ba'a: —Eyaya mique osecua cuana quijje nei nei ba'eje quea pame nee nee aje'yo; ecuea esohui quea pame jayojja jama aje'yo —Eyacuiñajji poa.

—Esejaya etiiquiana Eyacuiñajjiya esohuijo shajjama' poajo, ¿a'a Eyacuiñajjiya ojaya esohui pajea caje'yo pojja'a? ¿A'a jamaya yajji pojjeama pojja'a? —miquianaya poani pojja'a.

⁴¡Chojja de! Dejja cuana siajje poani, ojjaña. Eyacuiñajji ca ca siajje po ajja nei nei. Ma ecua ohua huohui canaje jayojjaya ohuaya acaje'yo. Ojaya esohui yahuajo nei etehue'yo jama poa ba'a:

“Eyacuiñajji, miyaya ca ca oe esohui e'e nei huohuaña tii tii. Miquea ejjashahuabaqui'yojji ba majje ojjañaa ba caje miya e'e jojo nei poani, siajje po ajja nei nei”.

Jamaya Eyacuiñajjiya esohui yahuajo nei tehue ca poa.

⁵Jodio cuana, miquianaya jjashahuabaquiani quea quehua, de; jamaya poso nequiana jjabaquiani ba'a: —Ecuana quea mimishi poanijo, ojjañaa Eyacuiñajji bihuia caje jama ba'a: “Eyacuiñajji oe nei quea ja'a nee poani, oe nei quea pame”. Jamajjeya ¿apiojji shai Eyacuiñajjiya ecuana quea nee nee po mee caje'yo quea mimishi poanijo? —jamaya miquianaya Eyacuiñajji ba po jjima jayojja jama jjashahuabaquiani, quea quehua.

⁶Chojja Jodio cuana, jamaya pojjeama. Jamaya e'e nei poa jojjemo Eyacuiñajjiya mimishi cuana tecuea jjima aca'yome. Eyacuiñajjiya e'e nei nei acani tii tii. E'e jojo nei ojjaña shajjama' cuana ohuaya quea nee nee po mee caje'yo mimishi poani sosejje. ⁷Jamatii miquianaya quea quehua jjashahuabaquiani jama pea'ai ba'a: —E siajje poanijo pea cuaa Eyacuiñajji bihuia cani jama ba'a: “Eyacuiñajji oe nei siajje po ajja nei nei” acaje cuaa. Jamajjeya ¿apiojji shai Eyacuiñajjiya eya quea nee nee po mee caje'yo siajje poanijo? —miquianaya aje jja oe jamaya poani.

⁸Cho, jamaya pojjeama. Jamaya e'e nei poa jojjemo, ca ca e siajje poanijo pea cuaa Eyacuiñajji bihuia cani ecuana siajjepoji pome. E'e, beca cuaa aje oe eya niñebla cani jama ba'a: —Pabohua aje jja oe jamaya huohui cani ba'a: “¡Quea mimishi oe pocue pea cuana quea pame nee eba'e meesahuajjl!” —onaaya jama eya niñebamaya acani. Cho, eya jamaya po ajja. ¡Jamaya niñebla canijo, Eyacuiñajjiya oya cuana quea nee nee capo mee cahua, de!

Eyacuiñajjiya ojjaña cuana ba cani shajjama' jayojja

⁹Jodio pojjeama cuana shajjama' nei nei poani. ¿A'a Jodio cuana shajjama' pishana? Chojja, Jodio cuana Jodio pojjeama cuana jayojjaya

jama poani. Ojjaña shajjama' nei nei pea'ai poani. ¹⁰Eyacuiñajjiya esohui yahuajo nei nei Dabiya tehue ca poa jama ba'a:

“Ecuea esohui jayojja jama a'ajja ojjaña cuaa. Chama' joya quea pame poani. ¹¹Ecuea esohui e'e nei ba sa po ajjajo ojaya ba jjima ecuea ejjashahuabaqui'yojji. Oya cuana e ba sa po'yo ajja pea'ai. ¹²Chojja, oya cuana eshahua nijje poani, enijje jjapeequi ajja quea mimishi jjejojo. Shajjama' jjejojo quea pame po ajja ojjaña cuana. ¹³Ojjañaa esohui quea tai nee nee acani. Quea tai nee nee ojjañaja esohui, aquiana quea ihui jayojja. Ojjaña siajjepoiji pea'ai, siajje popajea'yo ajja pea'ai. Ojjaña mimijajiji poani pea'ai. Quea tai nee nee ojjaña poani. Jiquio ecua peyo se naa quea nee nee po mee cani jayojja jama ojjaña cuaa onaya quea yeno po mee cani. ¹⁴Ojjaña quea tecue nee nee poani, panajajiani pea'ai. ¹⁵Oya cuana quenequene cuaji majje jjaquecuaquiani. ¹⁶Oya cuana aje oe ona quea mimishi pomeejji poani; ojjaña quea yeno nee nee po mee cani. ¹⁷Ojjaña quea bei ba'e ajja tii tii. ¹⁸Ejo jjashahuabaqui ajja tii tii, jjashajja'ajjaqui ajja pea'ai”.

Jamaya Eyacuiñajjiya yahuajo nei tehue mee ca poa.

¹⁹Jamatii esejaya eba Jodio cuana jama siajje poani ba'a:

—Ejacuiñajjiya esohui Moisesija etehue'yo jayojja jama ecuanaaya aña.

Jamatii Eyacuiñajjiya Jodio cuana jama acani ba'a: —Miquianaya aje oe ecuea esohui ba majje jama a'ajja. Shajja huejjama' jayojja miquianaya poani.

Jamajjeya Eyacuiñajjiya ojjaña cuana quea nee nee po mee caje'yo; Jodio cuana, Jodio pojjeama cuana pea'ai quea jeca poaje'yo, quea mete poaje'yo shajjama' poani jjejojo.

²⁰E'e, Ejacuiñajjiya esohui Moisesija etehue'yo ba majje ojjaña cuana jama poaje ba'a: —E'e, eya shajjama' jayojja jama poani —ojjaña poaje.

Jamajjeya Ejacuiñajji ojjaña nijje mimi ajja jama ba'a: —Miquianaaya ecuea esohui etehue'yo jayojja jama e'e jojo nei aña. Jamajjeya miya quea pame nee nee —jamaya mimi ajja Ejacuiñajji. Chojja, ojjaña shajjama' poani, ojjaña tii.

Jesosa nijje e'e jojo nei jjapeequianijo Ejacuiñajjiya esejaya mimishi cuijea caje'yo

²¹Yahuajo nei nei Ejacuiñajjiya esohui huohuijjiya, Moisesiya pea'ai jama sohuihuohuime aca poa ba'a: “Ojjaña joya e'e jojo nei onijje jjapeequianijo Ejacuiñajjiya quea bojea po mee caje'yo” yahuajo jama huohuimeya aca poa. Matii ojjaña jjashahuabaquinaje Ejacuiñajjiya ojjañaja mimishi cuijea caje'yo Moisesija esohui etehue'yo jayojja jama añajo poso. ²²E'e, Ejacuiñajjiya esejaya mimishi cuana cuijea cani jama huohuime amajje ba'a: —Ecuea eba Jesosa Quitohua ecuea mimishi cuijea caje'yo. Eya onijje jjapeequije'yo.

E'e, Jodio cuana Jodio pojjeama jayojjaya jama acaje'yo Ejacuiñajjiya. ²³Ojjaña cuana ojjaña meshijo ba'e quea mimishi nee poani. Jamajjeya Ejacuiñajji ojjaña cuana nijje quea bihui pojjeama, o jayojja jama po ajjajojo. ²⁴Jamatii Ejacuiñajji

quea pame nee nee. Ojjaña quea jea nee acanijo ojjaña shajjama' cuanaja mimishi cuijea'yo majje ojjaña ba cani mimishi'ama. Jamaya Eyacuiñajjiya acani Jesosa Quito ojjaña cuanaja mimishi cuijea'yojji sosejje mano'yonajejo. ²⁵E'e, Jesosa Quito esejaya mimishijo mano'yonaje; ojaya ena' cuayaquinaje. Jamajjeya ojjaña eseya jama mimianijo ba'a: —Jesosa Quito mano'yonaje ecuea mimishijo —jamaya poanijo, Eyacuiñajjiya esejaya mimishi cuijea'yo majje eseya ba cani mimishi'ama.

E'e, Eyacuiñajjiya Jesosa ba ca poa ñajjajja equecua'yo jayojja, ma ona mimishi cuana nijje quea bei nee epojji. Eyacuiñajjiya oya Jesosa Quito mano mee ca'ya poajo, ojjaña ba mee cani oya e'e jojo nei quea pame poani. Eyacuiñajji jama poani ba'a: —Mimishi cuana sosequia'yojji oe dejja camanoqui'yahua.

Yahuajo nei nei Jesosa mano'yo jjimahuajo ojjaña cuana shajjama' poa. Jamatii Eyacuiñajjiya ishoa canaje; mimishi cuijea'yo jjima acanaje Jesosa mano'yo jjimahuajo. Jamajjeya Jesosa mano'yo jjimahuajo, dejja mimishi cuana jjashahuuba quehuaqui canaje jama ba'a: —Eyacuiñajjiya pajea ca'yonaje ecuanajaya mimishi cuana jamatii pojja'a —poanaje.

Jjeya ca ca Jesosa Quito mano'yonaje mimishi cuijea'yojji sosejje. Jamajjeya Jesosa mano'yajo, Eyacuiñajjiya ojjaña ba mee cani ohuaya jamatii pojjeama etiiquianaja mimishi pajea ca'yonaje. ²⁶Jjeya pealai Eyacuiñajjiya esejaya mimishi cuana cuijea ca'yani Jesosa nijje jjapeequianijo. Jamajjeya ohuaya ojjaña ba mee cani oya quea pame nee nee poanijo Jesosaja epeejji cuanaja mimishi cuana cuijea ca'yani. Eyacuiñajji jama poani ba'a: —Jesosa miquea mimishijo mano'yonajejo, eyaya miquianaya baña mimishi'ama —Eyacuiñajji poani.

Jesosa nijje jjapeequianijo ca ca oe Eyacuiñajjiya eseaya ba cani emimishi cuijea'yo

²⁷Eseya jama po ajja ba'a: —Eyaya ca eya Moisesija etehueya jayojja jama añajo, Eyacuiñajjiya eya mimishi cuijea ca'yonaje —eseya jamaya po ca ajja nei nei. ²⁸Jamajjeya esejaya eba jama ba'a: Jesosaja epeejji nei poanijo ca ca oe Eyacuiñajjiya eseya ba cani emimishi cuijea'yo, quea pame. Jamajjeya Moisesija etehue'yo jayojja jama ba'yanijo pojjeama mimishi cuijea ca'yani Eyacuiñajjiya. Chojja, shajjama' ojjaña poani; chama' joya Moisesija etehue'yo jayojja jama ba'yanii tii.

²⁹Jodio cuana, eyaya miquianaya huohui'ajjaña jama ba'a: —¿A'a Eyacuiñajjiya Jodio cuanaja mimishi cuijea cani, Jodio pojjeama cuanaja mimishi cuijea sa po ajja pojja'a?

Chojja. Jamaya pojjeama. Eyacuiñajjiya ojjañaja mimishi cuijea cani Jesosa nijje jjapeequianijo. ³⁰Ohuaya ojjaña acani oya jayojjaya Jodio cuana, Jodio pojjeama cuana pealai. Jamajjeya Jesosa nijje jjapeequianijo, Eyacuiñajjiya eseya ba cani emimishi cuijea'yo, Jodio pojjeama cuana pealai, de. ³¹Jamajjeya eseya, Jodio cuana Jesosa nijje jjapeequianijo, ¿a'a Eyacuiñajjiya esohui etehue'yo jayojja jama ca'apaje'yahua? Chojja de. Jesosaja epeejji poanijo ca ca eseyaya ojaya esohui jayojja jama ejja'aqui o quea bihui nee epo meeiji.

Onijje jjapeequianijojo Eyacuiñajjiya Amajamaja mimishi cuijea ca'yonaje

4 ¹ ¡Jashahuabaquicue Amajamajo, esejaya etiiquianajo, ma ojjaña Jodio cuanaja etiiquianajo! ¿Yajjajo shai Eyacuiñajjiya oya huohui ca poa so'o? Jama ba'a: —Amajama, eyaya miya baña emimishi cuijea'yo, ecuea epeejji nei. ²A'a Eyacuiñajjiya jamaya aca poa Amajama ojaya esohui etehue'yo jayojja jama ba'ya poajo? ³Chojja. Eyacuiñajjiya Amajamaja mimishi cuijea ca'ya poa ojaya esohui etehue'yo jayojja jama ba'ya poajo poso miquiaaya aña. Chojja. Eyacuiñajjiya Amajama jama aca poa ojaya esohui etehui'yo joyajja jama ba'ya poa jojjemo Amajama jama mimime poquiaye ba'a: —Eya ca ca iña quea pame nee, de. Ojjaña Eyacuiñajjiya esohui etehue'yo jayojja añajo, ohuaya ecue mimishi cuijea ca'yonaje —Amajama jama mimimeya poquiaye.

¡Dee! Becca cuana jamaya jjashahuaba quehuaquiani. Eyacuiñajji ca ca jamaya jjashahuabaqui ajja. ⁴Ojaya esohui yahuajo etehue'yo jama poa ba'a: —Amajama Eyacuiñajji nijje jjapeequia poa. Jamajjeya Eyacuiñajjiya oya jama aca poa ba'a: “Amajama, eyaya miya baña emimishi cuijea'yo” aca poa —jamaya esohui yahuajo nei etehue'yo poa, Eyacuiñajjiya.

⁴ ¡Bacue! Dejja chacochacoajo, casosequia cahua echacomeejjiya.

Echacomeejjiya sosequia cani jamatii pojjeama, chaco sosejje, de.

⁵ Eyacuiñajjiya ca ca esejaya mimishi cuana cuijea cani etehue'yo jayojja jama ba'yanijo sosejje pojjeama. Chojja. Jesosa nijje jjapeequianijo, ohuaya eseya ba cani emimishi cuijea'yo jamatii. E'e, oya shajjama' nei nei cuana ba cani mimishi'ama pea'ai Jesosa nijje mimi jeahuajo, onijje jjapeequi jeahuajo pea'ai. ⁶Maya esejaya etiiquiana Dabi bajjanija eba poa. Jamajjeya jama jjashahuabaquimeya poa ba'a: “Eyacuiñajjiya eseya ba cani emimishi cuijea'yo. Ojaya esohui etehue'yo jayojja jama ba'yanijo sosejje pojjeama. Eyacuiñajjiya eseya ba cani emimishi cuijea'yo. Quea bihui nee capoahua mimishi cuijea ca'yajje”. ⁷Jamaya Dabiya yahuajo nei tehue ca poa ba'a:

“Eyacuiñajjiya oja mimishi cuijea cajo, quea bihui nee capoahua ojjaña shajjama' cuana. Quea bojea'yo po mee canijo, quea bihui nee nee capoahua. ⁸Shajjama' cuana quea bihui nee capo'yahua Eyacuiñajjiya oya shajjama' pojjeama ba canijo, de”.

Jamaya esejaya etiiquiaa Dabiya tehue ca poa yahuajo nei.

⁹ ¡A'a ohuaya maya tehue ca poa Jodio ca ca oe mimishi jamatii cuijea cajo quea bihui poaje? Chojja. Jodio pojjeama pea'ai quea bihui poaje mimishi jamatii cuijea ca'yajje. E'e, Eyacuiñajjiya esohui etehue'yo jama poa pea'ai ba'a: “Onijje jjapeequianijo, Eyacuiñajjiya Amajama ba ca poa emimishi cuijea'yo” anaje. (Amajama ba'eya poa Moisesi cuaya jjimahuajo.) ¹⁰ ¡Ache shono acuae Eyacuiñajjiya Amajama ba ca poa emimishi cuijea'yo? ¡A'a cuiishasha biso nei jehuisejjajea cajo pojja'a? ¡A'a jehuisejjajea jjimahuajo pojja'a oya emimishi cuijea'yo ba ca poa, Eyacuiñajjiya? ¹¹Cuiishasha jehuisejjajea jjimahuajo ca jja ca oe Eyacuiñajjiya Amajama ba ca poa emimishi cuijea'yo. Jamajjeya ¿yajjajo shai

jehuisejjajea mee ca poa? Jama ba'a: Quije Amajamaa jamaya aca poa onajaya ebajji oya Eyacuiñajji nijje jjapeequianijo ca ca oe ohuaya oya emimishi cuijea'yo ba ca'ya poa, cuiishasha jehuisejjajea jjimahuajo. Jamajjeya oya jayojjaya Jodio cuana, Jodio pojjeama cuana pea'ai Jesosa nijje jjapeequianijojo Eyacuiñajjiya eseya ba cani quea boejea'yo, cuiishasha ejehuisejjajea'yo pojjeamajo, de.

Jamajjeya Amajama Jodio pojjeama cuanaja etiiquiana jayojja jama esejaya pea'ai, ca Jesosaja epeejji poanija.¹² Oya Amajama esejaya, Jodio cuanaja etiiquiana poa. Jamajjeya Amajamaa jayojja jama cuiishasha jehuisejjajeaña eseyaya, Jodio cuaaya. Amajama Eyacuiñajji nijje jjapeequia poa cuiishasha jehuisejjajea jjimahuajo. Jamajjeya Jodio cuana jjeya Amajamaja osecua nei poani Jesosa nijje jjapeequiani jojoya, cuiishasha jehuisejjajea majje pojjeama.

Eyacuiñajjiya ojaya esohui jayojja jama acaje'yo esejo, onijje jjapeequiajо

¹³E'e, yahuajo nei onijje jjapeequianijo Eyacuiñajjiya Amajama ba ca poa mimishi'ama. Ojaya ehuohui'yo jayojja jama po jjimahuajo ca ca Eyacuiñajjiya Amajamaja mimishi cuijea ca'ya poa. Jamajjeya Eyacuiñajjiya Amajama huohui ca poa jama ba'a: "Amajama, eyaya miya, mique osecua cuana pea'ai emeshi mese po meeaña ojjaña meshi yasijke" Eyacuiñajjiya jamaya aca poa Amajama onijje jjapeequianijojo.¹⁴ Jamajjeya ojjaña Moisesija etehue'yo aiji poani oe nei eyajo eba'e tiitii mee'yojji jojjemo eseya Jesosaja epeejji cuana eyajo ba'e tiitii'yo jjima pome, Eyacuiñajjiya ma Amajama nijje ohua huohui ca poa jama a'lajji pojjeama pome pea'ai.¹⁵ E'e, Moisesija etehue'yo jama a'lajjajo, Eyacuiñajjiya quea nee nee po mee caje'yo shajjama' cuana. Jamatii Eyacuiñajjiya esohui ba mee jjima jojjemo shajjama' cuana chama' pome. Chama' joya esohui etehue'yo jayojja jama ba'yani.

¹⁶ Jamajjeya Eyacuiñajjiya quea pame huohui ca poa ojjaña onijje jjapeequianijo. Eseya ojaya quea jea nee nee. Oya siajje po ajja nei nei pea'ai. Jamajjeya ma ohua Amajama nijje huohui ca poa jayojja jama ohuaya acaje'yo e'e jojo nei Amajamaja osecua cuana nijje. E'e, ohuaya jamaya acaje ojjaña ese nijje, Jesosa nijje jjapeequianijo; Jodio cuana nijje, Jodio pojjeama cuana nijje pea'ai. E'e, Jesosa nijje jjapeequianijo eseya Amajama jayojja, Eyacuiñajjiya epeejji nei nei ma ecua Amajama poa jamaya eseya. Jamaya Eyacuiñajjiya ojjaña eseya ba cani Amajamaja osecua cuana.¹⁷ Eyacuiñajjiya esohui ma ohua Amajama huohui ca poa ohuaya yahuajo nei tehue mee ca poa jama ba'a: "Amajama, eyaya miya ojjaña dejja cuanaja, pea jaajjija esohui mimianija etiiquiana po meeje'yo, ojjaña etiiquiana". Jamaya Eyacuiñajjiya yahuajo nei tehue mee ca poa ojjaña ojaya epeejji cuanaja. Jamajjeya onijje jjapeequianijo, Eyacuiñajjiya eseya Amajamaja osecua cuana po mee cani. E'e, ohuaya quea ca'a nee nee, ojjaña acani. Emano'yo cuana shequi mee ca'yani; ojjaña aquiana ma yahuajo chama' poa ohuaya pana cani, Eyacuiñajjiya.

¹⁸ Jamajjeya Amajama tii nojinojil'ya poa bacuama' tii. Jamatii Eyacuiñajjiya oya huohui ca poa jama ba'a: "Amajama, miquea osecua cuana quea huiso nee nee poaje. Emeshi mese cuana poaje'yo ojjaña meshi cuana

huasijje” jamaya Eyacuiñajji poa. Jamajjeya Amajama jjashahuabaquinaje jama ba'a: —E'e de, eya etii nei nei. Jamatii Eyacuiñajjiya eya e'e nei huohui cani. Jamaya ca'a cahua ohuaya. Eya quea osecua huiso nee nee poaje.

E'e jojo nei jamaya acanaje Eyacuiñajjiya, ma ecua ohuaya huohui canaje jamaya acanaje. Amajama quea osecua huiso nee nee po mee canaje, majameta huiosoaja sico meemee ajja, quea huiso nee nee.¹⁹ Eyacuiñajjiya esohui shajja'ajja majje Amajama jjashahuabaquia poa jama ba'a: —Eya etii nei nei, 100 shequijame etii. Ecuea ehuanase pealai etii nei, bacuama' pealai. Jamatii esho'yahua jjamejoqui jjima poanaje. Jamatii Eyacuiñajjiya ma ecua eya huohui canaje jamaya ohuaya ca'a cahua. Ecuea ebacua e'e jojo nei cuayaje, dejja —Amajama poanaje.²⁰ Jama po majamajanequinaje tii tii ba'a: —Eyacuiñajjiya eya e'e nei huohui canaje. Ohuaya eya jamaya amee caje. Oya ca ca oe siajje po ajja nei nei —jamaya mimi majamajanejo Amajama Eyacuiñajjiya epeejji quea ca'a nee nee poanaje. Bihuia ca poa jama ba'a: —E'e Eyacuiñajji, jamaya. Miyaya eya quea tame nee aña tii.²¹ E'e, miyaya quea ca'a nee nee poanijo, miquea ehuohui'yo jayojja jama aje'yo e'e jojo nei.

²² Amajama jamaya jjashahuabaquianijo, Eyacuiñajjiya oya huohui ca'ya poa: “Amajama, miya enijke jjapeequianijo, eyaya miya baña mimishi'ama. Miquea mimishi ecuijea'yo” Eyacuiñajjiya oya aca poa.

²³ E'e, Eyacuiñajjiya huohui ca poa Amajamaja ebajji jama ba'a: “Enijke jjapeequianijo eyaya miya baña mimishi'ama” Eyacuiñajji poanaje.²⁴ Eyacuiñajjiya jama tehueme aca poa esejaya ebajji ohuaya Amajama mimishi cuijea ca'ya poa onijke jjapeequianijo. Jamajjeya esejaya eba Amajama jayojjaya onijke jjapeequajo, Eyacuiñajjiya esejaya jama acaje pealai ba'a: “Eyaya miya baña mimishi'ama pealai” Eyacuiñajjiya esejaya acaje, de. Oya ca ca oe quea ca'a nee nee, ojjaña ohuaya acani; Jesosa esejaya Emeshi Mese nei emanoyojaa shequi mee ca o'yananje.²⁵ E'e, ojjaña quea mimishi poanijo, Eyacuiñajjiya Jesosa huoojea canaje emanoyojji esejaya mimishi sosequia'yojji. Majoya Eyacuiñajjiya oya shequi mee ca o'yananje. Shequi o'oya majje Jesosa jama poanaje ba'a: —Ecue Chii, ¡bacue! Ecuea epeejji cuanaja mimishi cuijea'yojji sosejje eya mano'yonaje. Oya cuana jjeya mimishi'ama enijke jjapeequianijo —oya Jesosaa acanaje.

Eyacuiñajjiya eseaya mimishi'ama ba cani

5 ¹ E'e, Jesosa nijje jjapeequianijo, Eyacuiñajjiya eseaya ba cani emimishi cuijea'yo. Jamajjeya Jesosa nijje, Emeshi Mese nei nijje jjapeequianijo, ohuaya Eyacuiñajji quea bei po mee cani ese nijje. Yahuajo ca ca quea mimishi poanijo, ese nijje quea quene nee poanaje.² Jesosa nijje jjapeequi majje eseaya Eyacuiñajji nijje mete'ama mimiani. Eseyaa jama poani ba'a: —Jesosa ecuanajo mano'yonajejo, ecuana Eyacuiñajjiyo mete'ama; oya ecuana nijje quea bei nee po mee canaje Jesosaa. Cuanaya ecuana quea bihui nee jjashahuabaquianyi quea ja'a nee jama ba'a: “Eyacuiñajjiya e'e jojo nei ecuana ba'e tiitii mee caje'yo onijke eyajo” —jamaya eseaya poani.

³Jesosa nijje jjapeequianijo, pea cuua eseya napa cani. Quea camaja poani. Jamatii eseya quea bihui nee poani, yeno'ama. Dejja mimishiya napa cajje eseya Jesosaja epeejji quea ca'a nee poaje'yo. ⁴Eseya quea bihui nee Jesosa nijje jjapeequi pajea'yo ajja jamatii onaa napa cajo, Eyacuiñajjiya eseya huohui cani jama ba'a: —E'e, jamaya miya quea pame nee poani.

—E'yacuiñajjiya eseya quea pame ba canijo, eseya jama poani pea'ai ba'a: —E'e jojo nei Eyacuiñajjiya eseya onijje ba'e tiitii mee caje'yo eyajo.

⁵E'e, esejaya eba Eyacuiñajjiya ojaya ehuohui jayojjaya acaje'yo. Ohuaya Edojjoshahua Pame huoojea canaje ese ba meeiji jama ba'a: —E'e jojo nei Eyacuiñajjiya oja sohui jayojjaya acaje'yo; miquianaya onijje ba'e tiitii mee caje'yo. Miquianaya ojaya quea jea nee nee —jamaya eseya Edojjoshahua Pameya jjashahuabaqui mee cani.

⁶E'e, Jesosa mano'yo jjimahuajo eseyaya Eyacuiñajji quene'ama epo meeiji pojjeama ese nijje, ¿achajja shai quene'ama epo mee'yojji? Yahuajo Eyacuiñajji jjashahuabaquinaje jama ba'a: —Eyaya ma eshequiajajo, ma pojjaeo Jesosa huoojeaje'yo shajjama' cuanajo mano'yohua. Ecuea eba epojja Jesosa manoje'yo —jamaya Eyacuiñajji poanaje.

Jamajjeya ma pojjaeo tii Jesosa mano'yonaje esejaya mimishi cuijea'yojji sosejje. ⁷¡Bacue! Beshahua nei eseya mano'yo sa po ajja pea mano'yo jjima epojji. E'e pojja'a oya quea pame nee nee ba'yanojo, ojo beca cuana mano'yome. ⁸Jamatii eseya Eyacuiñajjiya quea jea nee nee poanijo ohuaya jama acanaje ba'a: Ecuana quea mimishi poanijo tii oya, Jesosa mano'yonaje esejaya mimishi cuijea'yojji sosejje. ⁹E'e, Jesosa esejoya mano'yonaje eseya quea mimishi poanijo tii. Ojaya ena' cuayaquinaje esejaya mimishi cuijea'yojji. Jamajjeya eseya mimishi cuijea'yo majje Eyacuiñajjiya eseya ba cani mimishi'ama. E'e jojo nei. Jjeya ca ca oya ese nijje quene'ama; cuaqui yasijje ehuoojeajji pojjeama, de. ¹⁰E'e, yahuajo ese nijje Eyacuiñajji quea quene nee poa. Ese shajjama' poanijo tii Jesosa esejaya mimishi cuijea'yojji sosejje mano'yajo, Eyacuiñajji ese nijje quea quene popajeana. Jamajjeya Eyacuiñajji ese nijje quea bei poanijo, eseyaya baña jama ba'a: Jesosa shequi mee ca o'yanajejo, e'e jojo nei Eyacuiñajjiya eseya ba'e tiitii mee caje'yo onijje pea'ai. ¹¹E'e, Jesosaa, Emeshi Mese neiya esejaya mimishi cuijea'yojji, Eyacuiñajji quea bei nee ese nijje, epeejji nei po mee cani. Jamajjeya eseya quea bihui nee jama poani ba'a: —Eyacuiñajji, miya quea pame nee; ecuana quea jea nee poani.

Yahuajo eseya Adana jayojja ba'ya poa; jjeya ca ca eseya Jesosa jayojja ba'yani

¹²¡Bacue! Yahuajo nei nei Adana ba'ya poa. Oya ojjañaja ejejaji poa. Oya Adana ebionei shajjama' poa. Jamajjeya esejaya ejejaji Adana shajjama' poajo, Eyacuiñajjiya ojjaña ba cani shajjama' nei nei, Adana jayojjaya: "Miya shajjama' poanijo, manoje'yo ojjaña" Eyacuiñajjiya Adana huohui ca poa. Jamajjeya Adana mano'yonaje. O jayojjaya ojjaña mano'yani. Ojjaña shajjama' poani cuana, de. ¹³E'e, Adana ebionei shajjama' poa. Moisesiya Eyacuiñajjiya

esohui tehue jjimahuajo, jamaya ojjaña po poquia poa, quea mimishi. Yahuajo Moisesija esohui tehue jjimahuajo, Eyacuiñajji etiiquiana nijje jama mimi jjima ba'a: —Ecue sohui jama ba'e ajjajo miquianaya shajjama' —jamaya Eyacuiñajji etiiquiana nijje mimi jjima yahuajo, maya tehue jjima poa Eyacuiñajjiya esohui.

¹⁴E'e, Adana shajjama' po majje, Moisesija esohui tehue jjimahuajo aje oe ojjaña mano poquipoqui'ya poa quea tai ba'yanijo. Onajaya Eyacuiñajjiya esohui shajja'ajja jjimajo Adana jayojja jama pojjeama. Adana ca ca Eyacuiñajjiya esohui shajja'ajja majje shajjamaa jjejojo acuijjajja ijja ca poa, de. Eyacuiñajjiya Adana ebionei pana ca poa. Quije ohuaya oja Bacua Jesosa huoojea canaje.

¹⁵¿Ae poanaje Adana? ¿A'a Adanaa jayojja jama acanaje Jesosaa? Chojja, quea pame nee nee eseya acanaje, Jesosaa. Shajjamaa jjejojo Adanaa ca pa jjaja ca oe ojjaña cuana shajjama' po mee ca poa. Jamajjeya ojjaña mano jeyojeyo mee ca'ya poa. Mano'yo majje cuaqui yasijje poqui ca'ya poa. Jjeya Jesosa Quitojo eseya ba'e tiitii mee caje'yo Eyacuiñajjiya. E'e, eseya Eyacuiñajjiya quea jea nee poanijo Jesosa Quito huoojea canaje ese que. Oya Jesosa ese jayojjaya yamijji poeyanaje eseja mimishijo mano'yohua mimishi cuijea'yoji.

¹⁶E'e, Eyacuiñajjiya eseya quea jea acanijo Jesosa huoojea canaje mano'yohua eseja mimishi cuijea'yoji sosejje. Jamajjeya eseya quea mimishi po huicha'a huicha'a majje, jamatii Eyacuiñajjiya eseya huohui cani jama ba'a: —Eyaya miya baña emimishi cuijea'yo.

Adana ca ca shajjama' po cooa poajo, Eyacuiñajjiya oya huohui ca'ya poa jama ba'a: "Adana, miya ca mi ca oe shajjama!. Jamajjeya miya manoje'yo; quea nee nee poaje'yo. Mique osecua cuana pea'ai mi jayojjaya mano'yomeya poaje; jama mano'yomeya popoquije'yo mique osecua cuana" poanaje. ¹⁷E'e, oe dejja quea mimishi po cooa poajo, Eyacuiñajjiya ojjaña mano mee ca'yani; quea nee nee po mee ca poqui'yani. Jesosa Quitohua ca ca eseya quea pame nee acanaje. Eyacuiñajjiya ojjaña quea jea nee nee poanijo oja Bacua Jesosa huoojea canaje ese jayojjaya yamijji. Jesosa ojjaña cuanajo mano'yonaje mimishi cuijea'yoji sosejje. Ohuaya eseya ba'e tiitii mee caje'yo onijke. Jesosa nijje ona huoojea'yoji po mee caje'yo, Eyacuiñajjiya.

¹⁸E'e, Adana shajjama' poa. Oya shajjama' poajo, Eyacuiñajjiya ojjaña ba cani shajjama!. Ojjaña quea nee nee po mee caje'yo. Jesosa Quitohua ca ca quea pame acanaje esejo; ese mimishi cuijea'yoji mano'yonaje. Jamajjeya Jesosa nijje jjapee neineiquianijo, Eyacuiñajjiya esejaya mimishi cuijea majje mimishi'ama ba cani. Mimishi cuijea'yo majje eseya ba'e tiitii mee cani onijke eyajo. ¹⁹Jama ba'a: Oe dejja, Adana shajjama' poa. Jamajjeya ojjaña o jayojja jama shajjama' poani. Pea dejja, Jesosaa ca ca oja Chijja, Eyacuiñajjiya esohui jayojja jama aca poa. Jamajjeya eseyaya, ojaya epeejji cuaa Jesosaa jayojjaya aña; Eyacuiñajjiya esohui shajja'ajjaña. Jamajjeya Eyacuiñajjiya eseya ba cani mimishi'ama.

²⁰Adana shajjama' poajojo quijke nei nei Eyacuiñajjiya Moisesi tehue mee ca poa ojaya esohui. Ojaya esohui tehue mee ca'ya poa ojjaña ebajji oya cuana Eyacuiñajjiya esohui jayojja jama a'ajja tii. Jamatii esohui ba

majje ojjaña quea mimishi tii tii poani. Eyacuiñajji ca ca quea pame po tiitiani ojjaña nijje. Quea mimishi tii poanijo aje oe jamatii ohuaya eseya quea jea nee acani tii. ²¹ Yahuajo esohui etehue'yo ba majje jamatii etiiquiana cuana mimishi pajea sa po'yo ajja poa. Jamajjeya oya cuana mano'yo majje cuaqui yasijje poqui'yonaje. Eyacuiñajjiya ca ca eseya shajjama' poani tii quea jea nee acanaje. Esejaya Emeshi Mese nei Jesosa Quito huoojea canaje ese mimishi cuijea'yohua ese ba'e tiitii mee'yojji.

¡Mimishi pajea'yocue; Jesosa nijje jjapeequicue!

6 ¹Eyacuiñajjiya eseya quea jea nee acani; jamatii quea mimishi poanijo beca cuana jamaya poani pojja'a ba'a: —¡Dee! Jamajjeya eya quea mimishi capoahua tii. Jamaya Eyacuiñajjiya eseya caba mee cahua eseya ohua quea jea nee acani jamatii —jamaya pojja'a beca cuana poani.

² ¡Choja! ¡A'a oe jamaya pojji! Jiquio ecua ese ejja mano'yo majje shajoshajo'yo ajja jama jayojjaya eseya Jesosa nijje jjapeequi majje mimishi sa po maja'yo ajja. Cajaa seya aña. ³E'e, eseya Jesosajo besa majje, ohuaya eseya ba cani ojaya epeejji mimishi po maja sa po'yo ajja. ¿A'a miquea maya ba jjima?

—E'e, eya Jesosa nijje jjapeequiani —eseyaya jamaya huohui majje, onaaya eseya Eyacuiñajjiyo besa mee cani. Jamajjeya jiquio ecua emano'yo cuana shajoshajo'yo ajja jayojja jama eseya mimishi po maja sa po'yo ajja Jesosa nijje jjapeequianijo. ¿A'a miquea maya ba jjima? ⁴Jesosa mano'yonaje. Mano'yo majje mei jjani ai yasijje huananobia ca'yonaje. Eyacuiñajji quea ca'a nee nee. Jesosa shequi mee ca'yonaje jama jayojjaya ohuaya eseya pea jjashahuabaquime po mee ca'yani Jesosa nijje jjapeequianijo. Jesosa nijje jjapeequiajo pea'ai onaaya eseya enajo besa mee cani Eyacuiñajjiyo. Jamajjeya Jesosaa eseya ba cani o jayojja e'e jojo nei, yahuajo jama pojjeama. Pea jjashahuabaquime poani, de; mimishi po maja sa po'yo ajja.

⁵Jamajjeya eseya jama poani ba'a: —Jesosa Quito acui ecueatal'apeejo mano'yonaje esejaya mimishi cuijea'yoji. Jamajjeya eseya onijje jjapeequi majje mimishi pajea neinei sa poani. Eyacuiñajjiya Jesosa shequi mee ca o'yananje; ba'e mee ca o'yananje. O jayojja jjashahuabaqui meeme po mee ca'yani.

⁶Jamaya esejaya eba ba'a: Jesosa Quito acui ecueatal'apeejo mano'yonaje eseya ojaya epeejji quea ca'a nee epo meeiji, mimishi pajea neinei meesahua'yoji. Esejaya eba'e yahuajo, ejjashahuabaquijji yahuajo jayojja jama pajea mee ca'yonaje, eyacua po mee canaje. Yahuajo jama poanaje ba'a: Jiquio ecua sosema' chacochacoani echacomiejjiya yajjijo chacochaco pajea mee jjima acani jayojja jama yahuajo eseya mimishi pajea'yo jjima poanaje. ⁷Jama ba'a: Ese ejjaa mano'yo majje mimishi amaja ajja. Oya jayojjaya eshahuaja epeejji emano'yo jayojja jama Jesosaa eseya po mee cani ojaya epeejji nei epojji.

⁸Jamajjeya onijje jjapeequi majje Jesosa Quito mano'yonaje jayojja jama ecuana eshahuaja epeejji poanijo emano'yo jayojja poanaje; Jesosa shequi'yonaje jayojjaya eseya o jayojja ba'yani, yahuajo jama pojjeama. E'e

jojo nei eseya onijke ba'e tiitije'yo eyajo; o jayojjaya pea'ai poaje'yo. ⁹E'e, Jesosa emano'yo jaa Eyacuiñajjiya oya shequi mee ca o'oyanaje. Eshe nequi'yo, emano beca'yiji pojjeama. Pea cuaa oya mano mee'yo jjima acaje'yo. ¹⁰Oya mano'yonaje; oe nei mano'yome poanaje esejaya mimishi cuijea'yoji. Oya Jesosa mano beca'yо ajja. Jjeya oya eshe'yo; Eyacuiñajjiya ejjashahuabaquijji jayojja jama atiitii cani. ¹¹Jamajjeya ojaaña Jesosaja epeejji cuana, ijashahuabaquicue jama ba'a: —Eya mimishi pajea neinei'yo sa poani —pocue!

E'e, jiquio ecua emano'yo cuana shajoshajo'yo ajja jayojja jama Jesosaja epeejji cuana mimishi po maja sa po'yo ajja. Pea jjashahuabaquime po'yani, de. Jjeya Jesosa nijje jjapee neineiquianijo eseyaya o jayojja. Eyacuiñajjiya ejjashahuabaquijji jayojja jama atiitiaña.

¹²Jamajjeya eshahuaa miquianaya shajjama' po mee sa acanijo, ja'a shajjama' pojji! Chojja. ¡Ejjashahuabaquijji yahuajo quea tai, quea mimishi jayojja jama a'a pojji! ¹³Eshahuaa miquianaya quea mimishi o jayojja jama po mee sa acani. ¡A'a jjashajja'ajjaquijji! Eyacuiñajjiya ca ca miya quea pame, o jayojja jama po mee sa acani. ¡Oya shajja'ajjacue! Ohuaya miya pea jjashahuabaquime po mee ca'yani. Jamajjeya ja'b'ecue ojaya ejjashahuabaquijji quea pame nee jayojja jama! ¹⁴E'e, Eyacuiñajjiya huohui canaje jama ba'a: —¡Mimishi pajea neinei'yocue!

Jamatii ojaya esohui etehue'yo shajja'ajja majje mimishi pajea meemee'yo ajja. Eyacuiñajjiya ca ca oe eseya quea jea nee acani; mimishi pajea meesahua ca'yani. Jamajjeya ¡eshahuaa miya shajjama' po mee sa acanijo a'a jjashajja'ajjaquijji! Jjeya oya, eshahua ese huoojea'yoji pojjeama, de. Eyacuiñajji ca ca esejaya Emeshi Mese nei, ese huoojea'yoji poani.

Eyacuiñajjiya echacojji quea pame

¹⁵Jamajjeya jjeya Eyacuiñajjiya eseya napa ajja esohui etehue'yo jayojja jama ajjimajo. Chojja, Eyacuiñajjiya eseya quea jea nee acanijo esejaya mimishi cuijea ca'yani. Huohui jjima jama ba'a: —Esohui etehue'yo jayojja jama ba'yanijo, eyaya miquianajaya mimishi cuijeaje'yo —jamaya jjeya huohui jjima Eyacuiñajjiya.

Jamajjeya ¿ae jjashahuabaquiani eseya? ¿A'a quea mimishi capoahua? ¹⁶Chojja de. ¡Bacue! Jiquio ecua echacomeejji nijje poquiajo, ohua mee'ajja cajje miya chacocho majje miya ojaya echacojji poani, oya mi huoojeajji poani jama jayojjaya eshahua jayojja jama añajo miya ojaya epeejji poani, oya mi huoojeajji poani. Miya jamaya po majje quea nee poaje'yo quijje cuaquijo. ¡Eyacuiñajji mi huoojeajji poanijo ojaya esohui shajja'ajjacue! Ohuaya miya quea boejea ba'e mee caje. Majoya miya ba'e tiitii mee caje'yo eyajo, Eyacuiñajjiya. ¹⁷Jamajjeya eyaya Eyacuiñajji bihuaña ohuaya miquianaya eshahua jayojja nahue canijo. E'e, yahuajo eshahua mi huoojeajji poanijo shajjama' poanaje. Jjeya ca ca ecuea esohui shajja'ajja majje Eyacuiñajjiya esohui e'e nei jayojja jama aña quea bihue nee. ¹⁸Jamajjeya Eyacuiñajjiya miquea eshahua poqui mee ca'yonaje, mi huoojeajji pojjeama po mee ca'yonaje. Jjeya Eyacuiñajji mi huoojeajji poani. O jayojja ba'e mee ca'yani. Jamajjeya miyaya ojaya esohui

jayojjaya jama aña quea bihui nee. ¹⁹Miquea eba neineiji eyaya quea ja'a esohui huohuaña jama ba'a: Yahuajo eshahua mi huoojeajji poanaje, miyaya o jayojja ojjaña mimishi a sa anaje, quea ja'a jjashahuubaqui sa po aija poanaje. ¡Jjeya ca ca Eyacuiñajji mi huoojeajji nei nei a'yocue! ¡Ojaya ejjashahuubaqui'yojji jayojja jama atitiicue quea pame nee eba'e'yojji!

²⁰Yahuajo aje oe eshahua mi huoojeajji poanijo, miquianaya quea pame po sa po'yo aija nei nei poanaje. ²¹Eshahua jayojja jama quea mimishi ba'enajejo ;a'a quea bei po tiitii mee canaje? Cho. Jjeya ma ecua ese ba'enaje jamajo eseya quea bicho nee nee poani. Jamaya eba'e tiitii jojjemo Eyacuiñajjiya eseya cuaquí yasijje huoojea ca'yoquiyate. ²²E'e, yahuajo eshahua mi huoojeajji poanaje. Eyacuiñajjiya miquea eshahua poqui mee ca'yonaje. Jjeya ca ca Eyacuiñajji mi huoojeajji poani. Oya shajja'ajjañajo, ohuaya miya quea boejea'yo po mee cani; ba'e tiitii mee caje'yo eyajo. ²³Eyacuiñajjiya shajjama' cuana huoojea caje'yo cuaquí yasijje eshahua nijje quea mimishi poanaje sosejje. Pea ca ca jama ba'a: Eseya jamatii quea pame ba'e meemee aija. Emeshi Mese nei Jesosa Quito nijje jjapeequianijo, Eyacuiñajjiya eseya o jayojja jjashahuuba meequei ca'yani; eseya ba'e tiitii mee caje'yo eyajo onijje. E'e de, eseya jamatii quea pame nee ba'e neinei aija.

Esohui eba meesahuajji epona ahuejjijo

7 ¹Ecuea epeeji cuana, Eyacuiñajjiya esohui etehue'yo miquianajaya eba.

Jamajjeya jama baña ba'a: Eseya eshe nequijo ca ca oe esohui etehue'yo jayojja jama caba'yahua tii, mano'yo majje pojjeama. ²Miquiana ba meesahuajji eyaya jama huohuaña ba'a: Eyacuiñajjiya jama huohui canaje ba'a: —Ehuanase ojaya yahue nijje caba'yahua tii tii. ¡Yahue mano'yo jjimajo, pea nijje a'a jjahueaqui mee'yojji! ¡O mano'yajo ca ca peajo cajjahueaqui'yahua! ³Ojaya yahue mano'yo jjima eshe nequi tiijo, peajo jjahueaqui nisho'yanijo, oya ehuanase pea cojjoji poani. Ojaya yahue mano'yo majje ca ca oya e'ahuemano. Oya ahuema' jayojja peajo cajjahueaqui'yahua. Jjahueaqui o'oya majje pea cojjoji jayojja jama pojjeama —jamaya huohui canaje yahua nei Eyacuiñajjiya.

⁴Jamajje ecuea epeeji cuana, miquianajaya eba neineiji eyaya jamaya huohuaña. Jesosa nijje jjapeequianijo epona e'ahuemano jjahueaquinai jayojja jama poani. E'e, yahuajo Jesosa ba jjimahuajo eseya quea quehua jjashahuubaquinaje jama ba'a: —Eyacuiñajjiya esohui etehue'yo jayojjaya jama atitiiañajo, ohuaya eseya ba'e tiitii mee caje'yo onijje eyajo —jamaya eseya po'ajjanaje.

Jjeya ca ca Jesosa esejaya mimishi cuijea'yojji sosejje mano'yonajejo yahua jama jjashahuubaqui aija, de. Jjeya ca ca pea jjashahuubaquime poani. Jiquio ecua oja yahue mano'yo majje ehuanase peajo jjahueaqui'yani jayojja jama jjeya eseya Jesosa nijje jjapeequi'yani. Eyacuiñajjiya Jesosa emano'yojaa shequi mee ca o'oyanaje jayojja jama eseya pea jjashahuubaquime po mee ca'yani. Jamajjeya eseya jjashahuubaquinai quea pame nee eba'ejji, Eyacuiñajji quea bihui nee epo

meejji. ⁵Yahuajo Jesosaja epeejji po jjimahuajo eseya ba'enaje esejaya ejjashahuabaquijji quea tai jayojjaya. Eyacuiñajji esohui etehue'yo ba majje shajjama' po sa neinei poanaje jama ba'a: "¡A'a pea siijjil!" ba majjeya eseya pea sii sa neinei poanaje. Jamaya eseyaya Eyacuiñajji quea quene po meenaje. Jamajjeya Eyacuiñajji nijje eba'e'yojji tii tii pojjeama. ⁶Yahuajo aje oe eseya mimishi pajea meemee ajja. Jiquio ecua Eyacuiñajji esohui shajja'ajja majje jamatii ameemee ajja. Jjeya ca ca Jesosa esejaya mimishi sosejje mano'yonajejo, eseya pea jjashahuabaquime poani. Eseyaya baña esohui etehue jayojja jama añajo pojjeama Eyacuiñajjiya eseya quea pame ba'e tiitii mee caje'yo. Jesosa nijje jjapeequianijo ca ca eseya pea jjashahuabaquime poani. Edojoshahua Pameya eseya quea pame nee ba'e meesahua canijo, Eyacuiñajji quea bihui nee po mee sa aña.

**Eyacuiñajji esohui ba neinei majje esejaya
eba poa eseya shajjama' nei poani**

⁷Eyacuiñajji esohui etehue'yo ba majje ca ca esejaya eba poa eseya shajjama' poani. Jamatii beca cuana jama poani pojja'a ba'a: —¿A'a esohui etehue'yo jayojja jama e'a'yojji pojjeama?

Chojja, quea pame nee. Etehue'yo ba jjima jojjemo esejaya Eyacuiñajji quea quene poani ba jjima pome. E'e, Eyacuiñajji esohui etehue'yo jama poani ba'a: "¡A'a oe onajaya aquiana jea bajji!" poani. Jamatii Eyacuiñajji esohui ba jjima jojjemo onajaya aquiana jea bañajo Eyacuiñajji enijke quea quene poani ecuea ba jjima pome. ⁸Ma ba majje ca ca eshahuaa eya onajaya aquiana jea ba neinei mee canaje quea huiso nee. Yahuajo esohui ba jjimajo ca ca ecuea ba jjima poanaje eya shajjama' poani onajaya aquiana jea ba majje. ⁹Yahuajo esohui etehue'yo ba jjimajo eya shajjama' pojjeama poso jjabaquinaje. Quijje Eyacuiñajji esohui etehue'yo ba majje ca ca eyaya banaje jama ba'a: —E'e, eya ca iña shajjama' nei nei poani, de. Eyacuiñajjiya eya quea nee nee po mee caje'yo, de —eya poanaje.

¹⁰Jamajjeya Eyacuiñajji esohui jama eba'e tiitii jojjemo eseya Eyacuiñajji nijje ba'e tiitii mee'yome. Eyaya ojaya esohui jama ajjima tiitijo ca ca eya Eyacuiñajjiya quea nee nee po mee caje'yo. ¹¹Eyaya Eyacuiñajji esohui etehue'yo jayojja jama a'lajja'yonaje. Chojja, ameemee ajja, de, quea mimishi nee nee. Jamajjeya esohui jayojja jama atiitii jjimajo aje oe Eyacuiñajji enijke quea quene nee nee poaje, eya quea nee nee po mee caje'yo tii tii. ¹²Jamatii Eyacuiñajji esohui etehue'yo quea pame nee e'e jojo nei, Eyacuiñajji ejjashahuabaquijji ese quea bihui ba'e meesahua. ¹³Jamajjeya Eyacuiñajji esohui quea pame ba neinei'yo majje, ¿a'a Eyacuiñajjiya eya quea nee nee po mee caje'yo? Chojja, jamaya pojjeama. Eyacuiñajjiya ojaya esohui tehue mee ca poa ojjañaja ebajji shajjama' nei nei quea tai nee nee poanai cuana jjabahuejjaquijji Eyacuiñajjiya quea nee nee po mee caje'yo. Jamajjeya esohui ba jjimajo eya shajjama' pojjeama poso jjabaquinaje; ba majje ca ca jamatii eya

mimishi po majamaja sa neinei poanaje. Eyacuiñajji quea quene po meenaje enijje. Quea pame po sa poani, jamatii quea pame po ajja. Mimishi boti'ama; jamatii jamaya eyaya aña. ¹⁴Esejaya eba Eyacuiñajji esohui quea pame nee nee. Eya ca ca pame'ama, shajjama' pea'ai, de. Jamajjeya eya jamatii quea pame ba'e meemee ajja ojaya esohui jayojja. Jiquio ecua echacojji ojaya echacomiejiji esohui jayojja chaco sa po ajja, jamatii jamaya chaco caje jama jayojjaya eya quea mimishi po sa po'yo ajja, jamatii quea mimishi poani. ¹⁵Eyacuiñajji esohui jayojja jama a'ajja majje eya jjashahuabaquiani jama ba'a: —¡Dee! ¿Apiojji shai eya quea pame nee po ajja? E'e de, eya quea pame po nishoani.

Eya quea mimishi po majje jjashahuabaquiani jama ba'a: —¡Dee! ¿Apiojji shai eya quea mimishi poanaje? Jamaya eya po sa po'yo ajja —jamaya eya jjashahuabaquiani.

¹⁶E'e de, ecuea eba Eyacuiñajji esohui quea ja'a nee. Jamajjeya eya quea yeno poani ma esohui jayojja jama mi amajje. ¹⁷Jjeya ca ca ecuea pea jjashahuabaquime quea ja'a poanijo ma ecua eya yahuajo ba'yaninaje jama po sa po'yo ajja. Jamatii ecuea ejjashahuabaqui'yojji quea mimishi; e poaninaje yahuajo pajepajea'yo ajja. E'e de, ecuea ejjashahuabaquijji quea mimishi yani, de. Cajaa.

¹⁸Ecuea eba jama ba'a: Quea mimishi jjejojo eya jamatii quea ja'a nee jjashahuabaqui ajja tii tii. Eya quea ja'a nee po sa po'yo majje jamaya eyaya ameemee ajja, de. Quea mimishi nee nee iña, de. ¹⁹E'e de, eya quea pame nee po sa poani. Jamatii quea pame, quea ja'a po'ajjani. Mimishi po sa po'yo ajja, de. Jamatii quea mimishi poani. ²⁰Mimishi amajje eya quea yeno poani. Mimishi a sa po'yo ajja. Jamajjeya mimishi a'yo majje ecuea eba ecuea eba'ejji ma ecua eya yahuajo ba'yaninaje jama eyaya atiitiñaña.

²¹E'e, eya quea pame nee Jesosa jayojja ba'e sa poani nei nei. Jamatii eya ca'a'majo quea pame atiiti aja. Ecuea ejjashahuabaquijji quea mimishi yani, ma e yahuajo ba'yaninaje quea tai poaninaje. Maya eya pajepajea'yo ajja. ²²E'e de, Eyacuiñajji esohui ecuea quea jea nee nee. Maya eyaya a sa aña. ²³Jamatii ecuea ejjashahuabaquijji jjeya jiquio jama ba'a: —Quea pame nee a sa aña Eyacuiñajji esohui jayojjaya —eya poani. Jamatii jamaya eyaya ameemee ajja. Ecuea ejjashahuabaquijji yahuajo jayojja jama aña, quea mimishi. E'e de, eya quea mimishi nee nee; mimishi cuana pajea'yo ajja. Eya jama poani ba'a: Onajaya esohui quea mimishi jayojja jama eyaya aña tii tii. ²⁴E'e, eya quea yeno poani mimishi amajje. ¿Aya acuae eya mimishi pajea neinei meesahua caje'yo so'o? ²⁵Esejaya Emeshi Mese nei Jesosa Quito quea ca'a nee nee poani. Jamajjeya ohuaya eya mimishi pajea meesahua caje'yo, e'e jojo nei. Jamajjeya eyaya Eyacuiñajji bihuiaña jama ba'a: —Ecue Chii, miyaya eya jaahuanaña quea pame nee nee.

E'e, Eyacuiñajji esohui jayojja jama a sa aña. Jamatii eyaya jamaya pojjeama atiitiñaña. Jesosa Quito ca ca quea ca'a nee nee poani. Ohuaya eya mimishi pajea meesahua ca'yani. Jamajjeya Eyacuiñajji esohui jayojja jama eyaya aña.

**Edojjoshahua Pameya eseya ba'e mee cani
Jesosa jayojja, yahuajo jama pojjeama**

8 ¹Jjeya Jesosa Quito nijje jjapeequianijo, Eyacuiñajjiya eseya huohui cani jama ba'a: —Eyaya jja miquianaya emimishi cuijea'yo baña. Jesosa Quito mique mimishi cuijea'yoji poanaje. Quea boejea poanijo, miquianaya ecuea etecueajji pojjeama —Eyacuiñajji poani.

²Yahuajo Jesosa Quitoja epeeiji pojjeama poanaje. Yahuajo eseya quea mimishi po tiitiianijo cuaqui yasijke edobiquijji nisho poanaje. Jjeya ca ca Jesosa Quitoja epeeiji poanijo, Edojjoshahua Pameya eseya ba'e mee cani o jayojja, mimishi'ama. ³E'e, eseya quea mimishi poaniya jjejojo Eyacuiñajjiya esohui jayojja jama ameemee aja. Jamajjeya Eyacuiñajjiya eseya quea boejea pojjeama ba cani. Chojja. Eseya quea mimishi nee nee poanaje. Jamajjeya Eyacuiñajjiya Jesosa, oja Bacua Ejja oe nei huoojea canaje jiquio meshi yasijke. Oya, Jesosa yamijji dejja jayojja poanaje. E'e, Jesosa ese jayojjaya yamijji poa, jamatii oya mimishi'ama tii. E'e, Jesosa mano'yonaje esejaya mimishi cuijea'yoji, esejaya mimishi sosequia'yoji pealai. Jesosaa esejaya mimishi pajea meesahua ca'yanijo, Eyacuiñajji ese nijje quea bei poani. ⁴Jamaya acanaje Eyacuiñajjiya eseya ojaya esohui etehue'yo quea ja'a nee jayojja jama ameeya, ojaya ejjashahuabaquijji quea ja'a nee jayojja jama epo meeiji pealai. Jjeya Edojjoshahua Pameya eseya ba'e mee cani Eyacuiñajjiya esohui jayojjaya. Jjeya eseya Jesosa jayojja ba'yani, pea jjashahuabaquime poani, yahuajo jayojja jama pojjeama. Yahuajo quea mimishi poanaje, jjeya ca chojja. ⁵Beca cuana quea mimishi ba'e sa poani, yahuajo ba'enaje jama. Ojaya ejjashahuabaquijji quea mimishi jama atiitii cani. Mimishi pajea sa po'yo aija tii. Pea cuua ca ca Edojjoshahua Pame shajja'aja cani. Ojaya ejjashahuabaquijji quea pame jayojja jama jjashahuabaquime poani pealai. E'e, Edojjoshahua Pameya Jesosaja epeeiji cuana jjashahuabaqui meesahua cani o jayojjaya. ⁶Ojjaña quea mimishi ba'yaniya ejjashahuabaquijji quea mimishi jama atiitii cani. Mimishi cuana pajea sa po'yo aija nei nei. Jamajjeya cuaqui yasijke poquije'yo. Quea nee nee poaje'yo. Edojjoshahua Pameya eseya Eyacuiñajjiya ejjashahuabaquijji jayojja jama po meesahua cani. Jamajjeya eseya ba'e tiitii mee caje'yo eyajo Jesosa nijje quea bei nee nee. ⁷Ojjaña quea mimishi, quea mimijjequiea jjashahuabaquiani Eyacuiñajjiya epeeiji pojjeama. Shajjam'a cuana, de. Oya cuana Eyacuiñajjiya esohui jayojja jama a'laja tii. Mimishi pajea'yo aija tii tii. ⁸E'e, quea mimishi, quea mimijjequiea poanijo, Eyacuiñajji onijje quea bei pojjeama poani.

⁹Jesosa Quitoja epeeiji Shoma cuiñajjiro ba'e, miquianaya yahuajo quea mimishi poa. Jjeya ca chojja. Edojjoshahua Pameya miquianaya ba'e meesahua cani quea pame nee nee, yahuajo jama pojjeama. E'e, Edojjoshahua Pame Jesosaja epeeiji cuana huasijke edobiquinequi. O miquiana que dobiqui jjima jojjemo miquianaya Jesosaja epeeiji pojjeama pome, miquianajaya mimishi cuijea'yo jjima pome. ¹⁰E'e jojo nei Jesosa Quito miquiana nijje nequi tiitiiani. Ohuaya miquianajaya edojjoshahua ba'e tiitii mee caje'yo miquea mimishi

ecuijea'yojojo. E'e, miquianaya mano'yo majje eyami ihuije'yo quea mimishi poa jjejojo. ¹¹ Jamatii Eyacuiñajji quea ca'a nee nee poani; ohuaya Jesosa emano'yojaas shequi mee ca o'yanaje. Jamajjeya Jesosaja epeejji poanijo, ohuaya miquianaya ba'e mee caje o'oya eyami eyacua nei. Emano beca'yoji pojjeama. Jamaya poaje Edojoshahua Pame miquiana huasijje dobiqui majje.

¹² Jamajjeya ecuea epeejji cuana, jmiquianaya Jesosaja epeejji poanijo, pea jjashahuubaquime poanijo Eyacuiñajji esohui jayojja jama acue! ¡Yahuajo jayojja jama a'a po o'oyajji! ¹³ E'e, quea mimishi po tiitiianijo, Eyacuiñajjiya eseya quea nee nee po mee caje'yo. Edojoshahua Pameya ca ca ojjaña eseya mimishi pajea meesahua caje'yo. Jamajjeya mimishi pajea'yo epo Eyacuiñajjiya eseya ba'e tiitii mee caje'yo onijke eyajo. ¹⁴ Ojjaña joya Edojoshahua Pame jayojja jama jjashahuubaquime poani Eyacuiñajji bacua cuana poani.

¹⁵ Yahuajo, Jesosaja epeejji po jjimahuajo eseya quea mete ba'enaje. Eshahua jayojja jama jjashahuubaquime eseya poanaje. Jjeya ca ca Edojoshahua Pameya eseya Eyacuiñajji bacua po mee cani. Ohuaya eseya mimi meesahua cani Eyacuiñajji nijje jama ba'a: —Eyacuiñajji, miya ecue Chii e'e jojo nei.

¹⁶ E'e, jjeya Eyacuiñajjiya ba cani eseya oja bacua poani. Edojoshahua Pameya eseya ba mee cani jama ba'a: —Miquianaya Eyacuiñajjiya bacua cuana poani.

¹⁷ Jamajjeya Eyacuiñajjiya bacua cuana poanijo ojjaña ojaya aquiana esejaya poaje; eseya ohuaya quia caje'yo. E'e, ojaya esohui yahuajo jayojja jama acaje'yo ese nijje jama ba'a: Ojjaña aquiana Eyacuiñajjiya quia ca'yonaje Jesosa Quito que. Maya aquiana esejaya poaje'yo pe'a'i Jesosa Quito nijje jjapeequianijo. Onijke jjapeequianijo, pea cuaa eseya napa caje, quea nee nee po mee caje'yo. Jamatii. Ecuana quea nee poani Jesosa jayojja. Jamajjeya Eyacuiñajjiya eseya ba'e tiitii mee caje'yo Jesosa nijje quea ja'a nee eyajo. Onijke ona huoojeajji po mee caje'yo.

Quijje eseya quea pame nee anije'yo eyajo Jesosa nijje

¹⁸ Jjeya eseya jiquiojo tii quea yeno poani, quea nee poani Jesosa nijje jjapeequianijo. Jamatii ja'a quea yeno pojji! Quea pame nee nee eseya ba'e tiitiije'yo Jesosa nijje eyajo.

¹⁹ Adana, esejaya ejearaji quea mimishi poa. Adana quea mimishi poanijo, Eyacuiñajjiya ojjaña ojaya epana'yo cajaa acanaje beshahua nei. Eseya Eyacuiñajjiya bacua cuana quea ja'a nee, quea ca'a nee Jesosa nijje poanijo, ojjaña aquiana cajaa ya'yojji pojjeama po mee caje'yo Eyacuiñajjiya. ²⁰ E'e, yahuajo nei Eyacuiñajjiya ojjaña quea pame nee pana ca'y poa. Adana quea mimishi poajo ca ca Eyacuiñajjiya ojjaña cajaa aca poa. Quijje ojjaña aquiana cajaa ya'yojji pojjeama poaje'yo. Ma Eyacuiñajjiya ebionei pana ca poa jayojja ishoa ca ani, ojjañaa. ²¹ E'e, jjeya ojjaña aquiana mano'yani, ihui'yani pe'a'i. Quijje, Jesosa poe o'yojjo ca ca ojjaña aquiana cuana quea pame nee poaje o'oya. Adana quea mimishi po jjimahuajo jama jayojjaya poaje o'oya. Eyacuiñajjiya bacua

cuana, ma Jesosa nijje jjapeequiani quea pame nee poaje'yo Jesosa poe o'oyajo. Ma shejo ojjaña aquiana ojjaña Eyacuiñajji panay' quea pame nee poaje o'oya. ²² Adana quea mimishi poa jojoya ojjaña aquiana quea nee, quea tai, quea camaja nee poa. Jjeya nei pea'ai jamaya poani, jiquio jama ba'a: Jesosa poe o'oya jjimahuajo ojjaña Eyacuiñajji panay quea yeno, quea nee nee poani, jiquio ecua epona bacua cuayani jama jayojja quea nee nee poani bacua cuaya jjimahuajo. ²³ Edojoshahua Pame dobiqu'yonaje ese que, Jesosaja epeejji cuana huasijje. Jamatii eseya pea'ai quea nee, quea mano, quea shoe pea'ai poani. Edojoshahua Pameya eseya ba meesahua cani jama ba'a: Jesosaa poe o'oya majje eseya quea pame nee po mee caje'yo eyacua. Eyacua po'yo majje mano'yo aija, nee'ama ba'e tiitije'yo eyajo pea'ai. Eyacuiñajji esohui ma ecua ohua yahuajo huohui canaje jayojja jama ohuaya eseya, ojaya bacua cuana acaje'yo Jesosa poe o'oyajo. Jamajjeya eseyaya ishoaña Jesosaja epoe o'oyajji. Eba'eiji eyacua quea pame nee esejaya poaje, de. ²⁴ Jama poaje ba'a: Eyacuiñajji eseya mimishi cuijea'yo majje ba'e tiitii mee cani. Esejaya eyami eyacua amee caje'yo pea'ai, Jesosa poe o'oyajo. Jamajjeya eseyaya ishoaña ojaya epoe o'oyajji. Jjashahuabaquiani quijje eyacua epoji. ²⁵ Jamajjeya ishoaña tii tii Jesosa ache shono poeje o'oya ebajji. Eyami eyacua yajji eseyaya ishoaña quea bihui nee nee.

²⁶ Cuanaya eseya ca ca ca'l'ama poanijo, Edojoshahua Pameya quea ja'a nee ba'e meesahua cani. Eba'eiji quea camajajo Eyacuiñajji nijje emimiji esejaya ba jjima. ¿Yajja mimime epoji? Jamajjeya Edojoshahua Pame esejo mimi neineiani Eyacuiñajji nijje; eseya mimi meesahua cani Eyacuiñajji nijje pea'ai. ²⁷ E'e, ojjaña esejaya ejjashahuabaqui'yojji mimi meemee ajja quea ja'a nee Eyacuiñajji nijje. Jamatii Edojoshahua Pameya eseya jjashahuabaqui meesahua canijo, ojjaña esejaya ejjashahuabaquijji Eyacuiñajji eba nei nei poani. E'e, Edojoshahua Pame jama poani ba'a: —Eyacuiñajji, Jesosaja epeejji cuana huohui'ajja cani ma oya cuana sa poanijo. Jamajjeya jjamaya acue! ¡Miquea ejjashahuabaquijji quea pame nee jayojja jama acue Jesosaja epeejji cuanajo! —jamaya esejo mimiani Eyacuiñajji nijje Edojoshahua Pame.

Eyacuiñajjiya eseya Jesosa jayojja jama ba'e meesahua cani

²⁸ E'e, jjeya quea camaja Jesosa nijje jjapeequijji. Jamatii Eyacuiñajjiya eseya babaca canaje ojaya epeejji epoji. Jamajjeya ohuaya eseya jaahuana cani tii tii. Jamaya acani esejaya oya quea jea nee poanijo. ²⁹ E'e, yahuajo nei ese pana jjimahuajo Eyacuiñajji esejo jjashahuabaquinaje jama ba'a: —Ecuea eba a'ya cuae ecuea epeejji poaje quijje nei nei. Eyaya oya cuana ecuea Ebacua Ejja Jesosa jayojja jama ba'e meesahuaquea pame nee —jamaya poanaje Eyacuiñajji.

Jamajjeya eseya Jesosa jayojja jama poanijo, oya esejaya Edoe Mese poaje, eseya Noo. ³⁰ E'e, yahuajo nei nei ese cuaya jjimahuajo Eyacuiñajjiya babaca ca poa ojaya epeejji epoji. Babaca majje eseya mimishi cuijea'yo jyonaje. Mimishi cuijea'yo majje eseya ba cani mimishi'ama. Ba'e tiitii mee cani quea ja'a nee, quea ca'a nee Jesosa nijje eyajo, Eyacuiñajjiya.

Quea pame nee nee Eyacuiñajjiya eseya acani

³¹E'e, eseya Jesosa nijje ba'e tiitije'yo quea ja'a nee o jayojjaya. Quea pame nee nee poaje'yo esejaya ebalejji. Eyacuiñajjiya eseya jaahuana tiitii cani. Oya oe nei quea ca'a nee nee poani tii. Jamajjeya eseya onaa napa canijo, jamatii Jesosaja eseya epajea'yojji pojjeama. ³²Eyacuiñajjiya eseya quea jea nee nee acanijo ohuaya huoojjea canaje ojaya Ebacua Ejja Jesosa esejo manoyohua ese mimishi cuijea'yojji. Jamajjeya eseyaya jama baña ba'a: Eyacuiñajjiya eseya quea jea nee nee atiitii caje'yo; eseya jaahuana tiitii caje'yo pealai. Ohuaya eseya jjapeequi meesahua caje'yo quea ja'a nee Jesosa nijje. ³³Eyacuiñajjiya eseya babaca canaje ojaya epeejji epojji. Jamajjeya pea cuana esejo emimijajiji pojjeama Eyacuiñajji nijje jama ba'a: —Miquea epeejji quea tai. ¡Cajaa acue!

Chojja. Jamaya emimijajiji pojjeama esejo. Eyacuiñajjiya eseya emimishi cuijea'yo ba cani. ³⁴Jesosa Quito manoyonaje eseja mimishi cuijea'yojji. Emanoyojaa Eyacuiñajjiya oya shequi mee ca'o yanaje, nequi mee ca'yonaje o pejjejo eyajo ojjaña huoojeajji. Jomajo oya Jesosa Quito esejo mimiani jama ba'a: —Ecuea epeejji cuana quea bojea poani, emimishi cuijea'yo —Jesosa poani.

Jamajjeya pea ese nijje emimijajiji pojjeama jama ba'a: —Miquianaya shajjama' nei nei poanijo quea nee nee poaje —jama mimijajimeya epojji pojjeama ese nijje, Jesosaja epeejji cuana nijje.

³⁵Eseya Jesosa Quito quea jea nee nee poani e'e jojo nei. Jamajjeya pea cuaa eseya napa caje Jesosa nijje jjapeequianijo; jiquio jama poaje ba'a: Eba'ejji quea camaja poaje. Quea nee, quea mete poaje. Eshahuaja epeejji cuaa quea mimishiya eseya napa caje Jesosaja esohui huohuiji poanijo. Quea shoe nee poaje pojja'a. Quima', aema' poaje pojja'a. Pea cuaa esejaya aquiana sii caje ojjaña pojja'a. Jesosa nijje chacochacoanijo, pea cuaa eseya quecua caje'yo pojja'a. Jamatii esejaya eba e'e jojo nei Jesosa Quito eseya quea jea nee nee, epajea'yojji pojjeama. Ohuaya eseya jaahuana cani. ³⁶Beca cuana yahuajo nei quea mase poa. Jamajjeya ohuaya Jesosaja epeejji cuana quecua ca'ya poa. Jjeya beca cuaa quea mase poaniya eseya quecua sa acani Jesosaja epeejji poanijo. Yahuajo nei nei Eyacuiñajji epeejjiya esohui tehue ca poa. Eyacuiñajjiya esohui etehue'yo jama poani ba'a:

“Eyacuiñajji, ecuana minijje jjapeequianijo pea cuana jjashahuuba majamajaquiani jama ba'a: —Cacuiaealyahua —poani. Jiquio ecua ñajjajja iña majje quecua cani jayojja jama onaaya ecuana acani”.

Jamaya yahuajo nei nei Eyacuiñajji epeejjiya tehue ca poa.

³⁷Dejja mimishi cuana quea huiso nequijo quea camaja nee Jesosa nijje ejjapeequijji. Jamatii pea cuaa eseya ejjapeequi pajea mee'yojji pojjeama Jesosa nijje. Chojja. Eseya Jesosaja quea jea nee poanijo eseya ojaya epeejji poani. Ohuaya eseya jaahuana cani. ³⁸Cuanaya esejaya eba e'e jojo nei Jesosa Quito, Emeshi Mese neija epeejji poanijo, Eyacuiñajjiya quea jea nee nee poani eseya. E'e, jiquiojo ba'e, manoyo majje pealai eseya Eyacuiñajjiya quea jea nee. Epajea'yojji pojjeama tii tii. Esohuidojiji cuaa, eshahua cuaa pealai Eyacuiñajji ese pajea

mee'yojji pojjeama. Ojjañaa jjeya nei aniya, ojjañaa quijje nei poajeya peal'ai Eyacuiñajji ese pajea mee'yojji pojjeama tii. Ojjañaa quea taiya quea mimishiya peal'ai Eyacuiñajji ese pajea mee'yojji pojjeama tii. Eseyo ojaya quea jea nee nee poaje'yo tii tii.³⁹ Jesosa Quitoja epeejji poanijo, ojjañaa quea ca'a eyajo nequiya, ojjañaa quea ca'a meshijo nequiya, ojjaña Eyacuiñajji panaa pea'ai Eyacuiñajji eseya epajea mee'yojji pojjeama. Eseyo ojaya quea jea tii tii poaje'yo.

Yahuajo nei Eyacuiñajjiya Isaeni cuana babaca ca poa ojaya epeejji nei epojji

9 ¹Eyaya, Pabohua miquiana que, Jodio cuana huasijje tehueña, ma Shoma cuiñajji ba'e yasijje. Eya Jesosa Quitoja epeejji poanijo ecuea esohui e'e nei poani. E'e, Edojoshahua Pameya eya jjashahuabaqui meesahua cani quea ja'a nee. ²Eya Jodio dejja peal'ai. Jamajjeya eya quea yeno po tiitiiani Jodio cuanajo, Jesosa nijje jjapeequi sa po ajjajo. ³Jodio cuana Jesosaja epeejji epojji eyaya sa neineiaña. Jjashahuabaquiani Jodio cuanajo, ecue huapa pojjeama cuanajo jama ba'a:
—Eyacuiñajjiya eya cajaa ca'a cahua Jodio cuana cuaquí yasijje poqui'yo jjima epoji. Jamaya Eyacuiñajjiya ya'yo jojjemo eya quea bihui nee pome —eya poani.

⁴Yahuajo Eyacuiñajjiya Jodio cuana babaca ca poa ojaya epeejji cuana epoji. Oja bacua cuana po mee ca'ya poa. Eyacuiñajji Jodio cuana nijje nequinajejo, onajaya eba poa Eyacuiñajji ojjaña huoojea'yojji quea ca'a nee poani tii tii. Jodio cuana nijje mimi majamajanaje jama ba'a: “Enijje jjapeequianijo miquianajaya ebacua cuana quea huiso nee poaje. Jiquio meshi eyaya quiaje miquianajaya enequijji, miquianajaya osecua cuana nequijji” Eyacuiñajji poanaje. Quijje Eyacuiñajjiya Moisesi tehue mee ca poa ojaya esohui Jodio cuana quea ja'a nee ba'e meesahuajji. Etiiquiana nijje miminaje jama ba'a: “Miquianaya e'e jojo nei e bihuiajji poajo, eya miquiana nijje mimije” Eyacuiñajji poanaje. Cuanaya Eyacuiñajjiya huohui canaje jama ba'a: “Mique osecua nei quijje poeje; ohuaya miquianaya ba'e tiitii mee caje'yo onijje” Eyacuiñajjiya jamaya Jodio etiiquiana aca poa.

⁵E'e, Jodio cuanaja etiiquiana ma bajjani poa ba'a: Amajama, Amajamaja bacua ejja Isaaca, Isaacaja bacua ejja Jacobo, ma quijje Isaeni bajjani aca poa, Isaenija bacua ejja cuana 12 huisome poa, Jodio cuanaja etiiquiana poa. Jesosa Quito cuaya poa dejja jayojja, yamijji, Jodio ponaja mejo poa. Etiiquianaja osecua poa Jesosa, esejaya etiiquianaja osecua. Jjeya oya ojjaña huoojeajji poani. Jamajjeya joya ejjabihuiaqui tii tii!

⁶Jodio cuana oe pojji cuana Jesosaja epeejji poanaje. Jamajjeya oe pojji cuanaja mimishi ecujea'yo poanaje, Jodio cuanaja. Jamatii esejaya eba Eyacuiñajjiya ojaya ehuohui'yo ma etiiquiana cuana nijje ohua huohui ca poa jayojjaya acani Jesosaja epeejji cuana nijje. Jesosaja epeejji cuana ca ca oe Isaeni dejja e'e jojo nei poani, Eyacuiñajjiya babaca. ⁷Pea cuana ca ca, mimishi cuana ca ca Eyacuiñajjiya Isaenija osecua nisho ba cani. Amajamaja osecua cuana Eyacuiñajjiya babaca'yo beca cuana poanaje. Yahuajo nei nei Eyacuiñajji Amajama nijje mimia poa jama ba'a: “Amajama, Sanaja mejo miquea ebacua Isaaca bajjani poaje. Ojaya osecua

cuana quea huiso nee nee poaje. Oya cuana ca ca mique osecua cuana e'e jojo nei poaje". Jamaya Eyacuiñajjiya aca poa.⁸ Ma esohui ba majje esejaya eba poa ojjaña Amajamaja osecua cuana Eyacuiñajjiya babaca jeyo jjima poa ojaya epeeiji epoji. Amajamaja pea ebacua cuana cuaya poa. Jamatii Eyacuiñajji onajaya osecua cuanajo mimi jjima jama ba'a: "Miquianajaya osecua cuana ecuea ebabaca ecuea epeeiji epoji" jamaya ajjima onaya. Chojja. Oe ebacuajo huohui ca poa Eyacuiñajjiya. Amajamaja ebacua Isaaca bajjanijo ca ca oe jamaya huohui ca poa. Isaaca cuaya jjimahuajo jamaya huohui ca poa Eyacuiñajjiya.⁹ Jama aca poa ba'a: "Amajama, miquea ehuanase etii, bacuama! Jamatii quijje oya o'ejji poaje. Ecuea eba ache shono miquea ebacua cuayaje, dejja shoi. Apoa poajo eyaya miquea ebacua cuaya meeje". Jamaya Eyacuiñajjiya aca poa.

¹⁰Eyaya, Pabohua miquianaya pea esohui huohuije Isaacaja bacua cuanajo. Jamajjeya miquianaya ba meeje ojjaña Amajamaja osecua cuana Eyacuiñajjiya babacajeyo jjima ojaya epeeiji nei epoji. Oe nei babaca ca poa; etiiquiana Isaaca ojaya ebabaca poa. Isaacaja ehuanase Shemeca bajjani poa, oja mejo ebacua becajaa poa, dejja pealai.¹¹ E'e, Shemecaja ebacua becajaa cuaya poa. Ma ebacua cuana cuaya jjimahuajo, mimishi ajjimahuajo pealai, Eyacuiñajjiya huohui ca poa oe ebacua ojaya ebabaca'yo ojaya epeeiji nei epoji, pea cho. Jamajjeya ojjaña ba mee ca poa ohuaya babaca cani coya ohua quea jea ba caje. ¹²Ba majje pojjeama Eyacuiñajjiya ojaya epeeiji epoji babaca cani. Joya ohuaya sa caniya babaca cani. Jamajjeya huohui ca poa enaese Shemeca bajjani ojaya ebacua becajaaajo jama ba'a: "Mique bacuua Esao bajjaniya cashajja'ajja cahua oja chahuaja esohui, Jacoboja" Eyacuiñajjiya aca poa Shemeca.¹³ Eyacuiñajjiya esohui huohuijji yahuajo ojaya esohui tehue mee ca'ya poa jama ba'a: "Ecuea Jacobo quea jea nee nee. Esao ca ca cajaa anaje" Eyacuiñajjiya aca poa.

¹⁴—¿Apiojji shai Eyacuiñajjiya ebionei cuaya cajaa aca'yonaje, ebacua quijje cuaya babaca ca poa? ¿Apiojji shai? Jamaya eseyaya ajjima aña. Jamaya quea pame pojjeama —beca cuana poani.

Chojja. Eyacuiñajjiya quea pame nee nee tii acani.¹⁵ Ohuaya Moisesi huohui ca poa jama ba'a: "Eya beca cuana nijje quea bei poani. Beca cuana eyaya jaahuanaña. Cua eya quea jea aña eyaya babacaña" Eyacuiñajjiya aca poa.¹⁶ Esejaya eba'ejjijo pojjeamajo, esejaya ejjashahuabaquijjiyo pojjeamajo pealai ese nijje quea bei poani Eyacuiñajji. Chojja, ojaya quea jea nee nee poanijo ohuaya eseyaya jaahuana cani, ese nijje quea bei poani pealai.¹⁷ Cuanaya yahuajo nei Ejito emeshi mese Panao bajjanijo Eyacuiñajjiya esohui etehue'yo jama poa ba'a:

"Panao, eyaya miya nequi meeaña Ejito emeshi mese epoji. Eyaya ma dejja cuanaja ba jjima aña mi quea mete po meeiji ejo. Jamaya ojjaña cuana ojjaña meshijo ba'e ba meeje eya e'e nei quea ca'a nee nee poani tii".

Jamaya Panao Eyacuiñajjiya aca poa.¹⁸ E'e, Eyacuiñajji beca cuana nijje quea bei poani. Ojaya mimishi cuana cuijea cani. Pea cuana nijje ca ca chojja, quea bei pojjeama po tiitiiani shajjamajoo. Mimishi pajea mee'yo jjima tii tii acani Eyacuiñajjiya.

¹⁹Jamajjeya beca cuaa huohui'ajja cani jama ba'a: —Eyacuiñajjiya ecuana mimishi pajea meesahua ajja. Jamajjeya ¿apiojji ohuaya tecuea cani ecuana quea mimishi poanijo? Ojaya ejjashahuubaquijji jayojja jama acani ohuaya, de —beca cuana poani.

²⁰Eyaya miquianaya saja'anña jama ba'a: ¡A'a Eyacuiñajji niñebajji! Miquianajaya Eyacuiñajji emimicuiajeanobiajeajji pojjeama. Jama ba'a: Meshimisi iñacajjiya meshimisi pana majje iñaca cani shajjajji acani. ¡A'a meshimisiya tecuea caje meshimisi iñacajji jama ba'a: —¿Apiojji acuaeaya miyaya eya jamaya anaje so'o? —a'a jamaya meshimisiya acani?

Cho, jamaya po ajja meshimisi. ²¹Meshimisi iñacajjiya meshi iña majje ojaya ejjashahuubaquijji jayojja jama acani. E'e pojja'a meshimisi quea bame nee asa acani, yiye bame nee nee a sa acani pojja'a. Ojaya ejjashahuubaquijji jayojja jama pana'yome acani. ²²Jamaya Eyacuiñajjiya acani peal'ai, ojaya ejjashahuubaquijji jayojja jama acani. Beca cuana quea mimishi po tiitiianijo, Eyacuiñajjiya oya cuana quea nee po mee sa acani. Jamajjeya ojjaña ba mee caje Eyacuiñajji quea ca'a nee nee poani. Jamatii oya jjeya nei quea tecue nee pocuaji ajja shajjama' nijje. Chojja, quijje nei quea nee nee po mee caje'yo. Ishoa cani. E'e pojja'a shajjama' cuana Jesosaja epeejji poaje ba'ajja!. Jamajjeya Eyacuiñajjiya oya cuana quea nee nee epo meeji pojjeama. ²³Ese beca cuana nijje ca ca Eyacuiñajji quea bei poani. Jamaya acani eseya ojaya quea jea nee nee poanijo. E'e, Eyacuiñajji quea ca'a nee nee poani; eseya jjapeequi meesahua cani Jesosa nijje. Jamajjeya ohuaya eseya quea ja'a, quea pame nee nee ba'e mee sa acani eyajo Jesosa nijje. ²⁴E'e, Eyacuiñajjiya eseya beca cuana, Jodio cuana, Jodio pojjeama cuana peal'ai babaca canaje ojaya epeejji epojji. Ojaya ejjashahuubaquijji jayojja jama acani, Eyacuiñajjiya. ²⁵Jamajjeya yahuajo nei ojaya esohui huohuijji Osea bajjani tehue mee ca poa jama ba'a:

“Yahuajo nei Jodio pojjeama ecuea ebabaca pojjeama ecuea epeejji epojji. Jjeya ca ca oya cuana ecuea ebabaca ecuea epeejji epojji.

Yahuajo oya cuana ecuea quea jea nee pojjeama. Jjeya ca ca oya cuana ecuea quea jea nee nee poani. ²⁶Jodio pojjeama quea mimishi poanajejo, pea cuaa huohui ca poa jama ba'a: —Miquianaya Eyacuiñajjiya epeejji pojjeama —poanaje. Jjeya ca ca onaaya huohui caje jama ba'a: —Miquianaya Eyacuiñajjiya ebacua cuana poanaje”.

Jamaya yahuajo Eyacuiñajjiya tehue mee ca poa.

²⁷Cuanaya yahuajo nei Eyacuiñajjiya esohui huohuijji Isaiaa esohui tehue ca poa Jodio cuanajo jama ba'a:

“Etiiquiana Isaeni bajjanija osecua cuana quea huiso nee nee poaje.

Meshijaji sope huisoajja poaje, sicosico meemee ajja quea huiso nee neejo. Jamatii oe pojji cuanaja mimishi ecuijea'yo poaje.

Eyacuiñajjiya oe pojji ba'e tiitii mee caje'yo onijje quea ja'a nee.

²⁸ Ohuaya ojaya esohui jayojja jama acaje'yo. Ojjaña shajjama' cuana quea nee nee po mee jeyojeyo caje'yo onijje jjapeequi sa po'yo ajjajojo. E'e jojo nei jamaya Eyacuiñajjiya acuaji caje".

Jamaya aca poa Isaiaa. ²⁹ Ohuaya pea esohui tehue ca poa jama ba'a:
 "Yahuajo Eyacuiñajjiya quiyo jeyojeyo mee ca'ya poa ojjaña quea mimijjequijea, ojjaña quea mimishi Sonoma cuiñajjiyo ba'e, ojjaña Comosha cuiñajjiyo ba'e pea'ai. Oya jayojja beshahua nei Isaeni cuana chama'yo tii popoquia poa shajjama' poanijojo. Eyacuiñajjiya oe pojji Isaenija osecua cuana jaahuana ca poa".

Jamaya aca poa Isaiaa.

**Jodio cuana Jesosa nijje jjapeequi jjima; Eyacuiñajjiya
 oya cuana ba jjima emimishi cuijea'yo**

³⁰ ¡Jamajjeya bacute jiquio! Eyacuiñajjiya quea huiso Jodio pojjeama ba caje mimishi'ama. Jodio cuana ca ca oe pojji ba caje mimishi'ama. Yahuajo Jodio pojjeama cuana jjashahuabaqui jjima poanaje jama ba'a: —¿Achajja shai ecuana ba'eje Eyacuiñajjiya esohui jayojja jama so'o? Jamajjeya ohuaya ecuana ba caje mimishi'ama —jamaya jjashahuabaqui jjima Jodio pojjeama poanaje.

Jamatii Jesosa nijje jjapeequianijo, Eyacuiñajjiya oya cuana ba cani mimishi'ama. ³¹ Jodio cuana ca ca Eyacuiñajjiya babaca ca poa onijje ejjapeequijji. Jamatii oya cuana jjashahuaba quehuaquinaje jama ba'a: —Ecuana ojjaña Eyacuiñajjiya esohui cuana jayojja jama atiitiañajo, ohuaya ecuana ba caje mimishi'ama —Jodio cuana poanaje.

Cho. Eyacuiñajjiya Jodio cuana ba ca poa quea mimishi ojaya esohui cuana jayojja jama mi atiitii cajo. ³² ¿Yajjajje? ¡Bacute! Eyacuiñajjiya Jodio cuana ba cani mimishi'ama ca ca Jesosaja epeejji poanijo. Jamatii onaaya aje oe Jesosa cajaa acanaje. Jama poa cuana ba'a: —Ecuaya esohui etehue'yo jayojja jama atiitiaña. Jamajjeya Eyacuiñajjiya ecuana mimishi'ama ba caje —oya cuana poa. Chojja de, ajjima ojaya, de.

³³ E'e, yahuajo Isaiaa Eyacuiñajjiya esohui tehue ca'ya poa jama ba'a:
 "Eyaya huoojeaje mimishi cuijeajji Isaeni cuana huasijke. Jamatii Isaeni cuana jjashahuaba quehuaquije; mimishi cuijeajji cajaa acaje'yo.
 Beca cuana onijje jjapeequiajjo ca ca quea bihui nee nee poaje'yo".

Jamaya aca poa Isaiaa Isaeni cuanajo, Jodio cuanajo.

10 ¹ Miquianaya Jodio cuana Shomajo ba'e Jesosaja epeejji poanijo ecuea epeejji poani pea'ai. Eya, Pabo Jodio pea'ai. Eya ojjaña Jodio cuanajo mimi tiitiiani Eyacuiñajji nijje jama ba'a: —Eyacuiñajji, ¡Jodio cuana jjapeequi meesahuacue Jesosa nijje! Jamajjeya oya cuana cuaki yasijke epoqui'yojji pojjeama —jamaya eyaya atiitiaña.

² Ecuea eba ojjaña Jodio cuana Eyacuiñajji epeejji po sa poani. Jamatii onajaya ejjashahuabaquiji quea quehua poanijo Eyacuiñajji nijje jjapeequi meemee aja. ³ Jesosa nijje jjapeequiajjo, Eyacuiñajjiya

Jodio cuana mimishi'ama ba caje, ma yahuajo shajjama' poa. Jamaya beshahua nei ojjaña Jodio cuanaja eba pojjeama. Jesosa cajaa acanaje. Ojaya ejjashahuabaquijji quea quehua jama ba'a: —Quea pame poanijo, Eyacuiñajjiya ecuana ba caje mimishi'ama —jamaya poso jjabaquinaje.

Cho, Eyacuiñajjiya ojjaña ba cani mimishi'ama Jesosa nijje jjapeequianijo, quea pame ba'yanijo pojjeama. ⁴E'e, Jesosa Quito mano'yonaje esejo. Jamajjeya ojjaña onijje jjapeequiani Eyacuiñajjiya ba cani mimishi'ama. Jamatii beshahua nei ojjaña Jodio cuana jjashahuuba quehuaquiani jama ba'a: —Moisesija etehue'yo jayojja jama atiitiiañajo, Eyacuiñajjiya ecuana ba caje mimishi'ama —jama posoya acani Jodio cuaa.

Eyacuiñajjiya ojjaña mimishi cuijea'yo sa acani

⁵Yahuajo nei Moisesiya Eyacuiñajjiya esohui tehue ca poa jama ba'a: “Eyacuiñajjiya eseya ba caje mimishi'ama ojaya esohui atiitiiañajo.

“Jamajjeya ¡ojaya esohui jayojjaya oe atiitiicue!”

Jamaya esohui tehue ca'ya poa Jodio cuanaja yajji.

⁶¡A'a jjashahuuba quehuaquijji jama ba'a: —Eyacuiñajjiya ecuana ba cani mimishi'ama oja esohui etehue'yo jayojja jama aña tiitijo —a'a jamaya jjabaquijji! Chojja, Jesosa nijje e'e jojo nei jjapeequianijo, Eyacuiñajjiya eseya ba cani mimishi'ama.

Eyacuiñajjiya Moisesi esohui jama tehue meeme aca poa ba'a:

“A'a jjashahuabaquijji jama ba'a: —E'e pojja'a beca cuana eyahuasijje poqui majje, poe o'oya majje huohui caje achajja shai amajje Eyacuiñajjiya ecuana ba caje mimishi'ama”.

Jama tehuemeya aca poa Moisesiya.

Jjamajjeya ¡jamaya a'a jjashahuuba quehuaquijji! Jesosa poeyanaje ese que; mano'yonaje Eyacuiñajjiya ese mimishi'ama ebajji. ⁷Moisesiya pea esohui tehue ca poa jama ba'a:

“¡A'a jjashahuuba quehuaquijji jama ba'a: —Beca cuana emano'yo huasijje poqui majje, poe o'oya majje huohui caje achajja shai amajje Eyacuiñajjiya ecuana ba caje mimishi'ama —jamaya a'a jjashahuabaquijji!”

Jamaya Moisesiya tehue ca poa.

E'e, jamaya quea jjashahuabaqui quehua. Jesosa shequi o'oyanaje ese mimishi cuijea'yojji epoji. ⁸Jamajjeya Eyacuiñajjiya Moisesi esohui jama tehue meeme aca poa ba'a:

“Eyacuiñajjiya miquianaya ba caje mimishi'ama eba'e tiitii'yojji. Quea camaja nee nee pojjeama. Eyacuiñajji miquianaya mimishi'ama ebajji mimi huicha'a huicha'anaje. Miquianaaya shajja'ajja majamajanaje. Majoya jjashahuabaqui majamajanaje miquianaya”.

Jamaya aca poa Moisesiya. Maya ecuaaya huohuaña miquianajaya eshajja'ajjajji, Jesosa nijje ejjapeequijji. ⁹E'e jojo nei ejjahuohiphi jiquio jama ba'a: —Jesosa ecuea Emeshi Mese nei poani —ejja'aqui. E'e jojo nei

ejjashahuabaqui jama ba'a: —Ecuea eba Eyacuiñajjiya Jesosa shequi mee ca o'oyanaje —jamaya poanijo Jesosaa eseya ba'e tiitii mee caje'yo eyajo onijje.

¹⁰ Jesosajo e'e jojo nei jjashahuabaquianijo, Eyacuiñajjiya eseya ba cani mimishi'ama. Eseyaya e'e jojo nei huohuiaña: —Eya Jesosaja epeejji.

Jamajjeya Jesosaa eseya onijje ba'e tiitii mee caje'yo. ¹¹ Yahuajo nei nei Isaiaa esohui tehue ca poa jama ba'a:

“Ojjaña joya jjeya nei Eyacuiñajjiya huoojea'yo ojjaña jaahuanajji nijje jjapeequiani Eyacuiñajjiya ba cani mimishi'ama e'e jojo nei”.

Jamaya Isaiaa aca poa.

¹² E'e, Jesosa esejaya Emeshi Mese nei oe nei, ojjaña; Jodio cuanaja, Jodio pojjeama cuanaja pea'ai. E'e, Jodio cuana Jodio pojjeama jayojja nei pea'ai. Onijje mimianijo, Jesosaa eseya jaahuanana cani quea pame nee.

¹³ E'e, eseya beca cuana mimije Jesosa nijje jama ba'a: —Jesosa, ecuea Emeshi Mese nei, jecuea mimishi cuana cuijea'yocue! —jamaya mimianijo, Jesosaa esefa mimishi cuijea'yo majje ba'e tiitii mee caje'yo eyajo.

¹⁴ Pea cuanaja Jesosa ba jjima, onijje mimi jjima; emimishi cuijea'yoji pojjeama. Shajja'ajja jjima Jesosa mano'yonaje ojjaña; mimishi cuijea'yoji. Jesosaja esohui huohuiji poqui jjima ona huasijje esohui quea pame Jesosajo huohuuya. ¡Achajja shai oya cuana Jesosaja epeejji poaje so'o? ¹⁵ Eyacuiñajjiya ojaya esohui huohuiji pea cuana huasijje huoojea jjimajo, oya cuana Jesosajo shajja'ajjajji pojjeama. Yahuajo nei Eyacuiñajjiya esohui huohuiji Isaiaa esohui tehue ca poa jama ba'a:

“Eyacuiñajjiya esohui huohuiji poeyajo esohui quea pame huohuuya, ecuana quea bihui nee nee poaje. E'e jojo nei jamaya poaje”.

Jamaya esohui tehue ca poa.

¹⁶ E'e, Eyacuiñajjiya esohui huohuiji poquinaje Isaeni cuana huasijje. Huohui ca'ya poa ojaya esohui quea pame nee. Jamatii Isaeni cuana aje oe shajja'ajja sa po'yo ajja poa. Isaiaa yahuajo nei esohui tehue ca poa Isaeni cuanajo jama ba'a: “Emeshi mese, oe pojji Isaeni cuaa ecuanajaya esohui shajja'ajja canaje” jamaya Isaiaa aca poa.

¹⁷ Eyacuiñajjiya ojaya esohui huohuiji huoojea cani esohui quea pame nee Jesosajo huohuuya. Jamajjeya ma esohui quea pame nee shajja'ajja majje Jesosa nijje jjapeequije'yo. ¹⁸ Jamatii beca cuana jjashahuabaquianijo jama ba'a: —E'e pojja'a Isaeni cuanaja shajja'ajja jjima esohui quea pame Jesosajo. Jamajjeya Jesosa nijje jjapeequi jjima poanaje.

Chojja. Shajja'ajja canaje. Jamatii shajjama' jayojja poanaje. Yahuajo Eyacuiñajjiya esohui quea pame Jesosajo tehue mee ca poa jama ba'a:

“Ojjaña meshijo ba'e yasijke Eyacuiñajjiya esohui huohuiji cuana esohui quea pame huohui mee canaje”.

Jamaya yahuajo nei aca poa Dabiya.

¹⁹ Beca cuana jjashahuuba quehuaquianijo jama ba'a: —E'e pojja'a Isaeni cuanaja Eyacuiñajjiya esohui quea pame shajja'ajja jjima. Jamajjeya mi jjapeequinaje Eyacuiñajji nijje —jamaya beca cuana poani.

Cho. Onaaya shajja'ajja canaje. Yahuajo nei Moisesiya Eyacuiñajjija esohui tehue ca poa jama ba'a:

"Isaeni cuana, miquianaya ebionei ecuea ebabaca coo, eyaya babaca coonaje ecuea epjeeji epoji. Miquiaaya ca mo ca oe cajaa anaje. Jamatii eyaya pea cuana babacaje'yo ecuea epjeeji nei epoji. Jamajjeya miquianaya quea quene poaje ona nijje, Isaeni pojjeama cuana nijje. Jjashahuabaquije jama ba'a: —Isaeni pojjeama cuana quea pame pojjeama. Ecuana ca ca quea pame nee. Eyacuiñaji e'le jojo nei onajaya ba jjima. Ecuanajaya ca ca oya eba. ¿Apiojji shai Eyacuiñajjiya babaca cani Isaeni pojjeama cuana? Oya cuana cajaa —jamaya miquianaya poaje".

Jamaya Moisesiya aca poa Isaeni cuana. ²⁰Majoya Isaiaa Eyacuiñajjija esohui quea ja'a nee tehue ca poa jama ba'a:

"Pea cuanaja eya ba jjima. Eyaya oya cuana jjapeequi meesahuaje'yo enijke. Oya cuana mimi jjima enijke ojaya mimishi cuijea'yojji. Jamatii oya cuana ecuea esohui ba meesahuaje'yo".

Jamaya Isaia tehue mee ca poa yahuajo nei nei. ²¹Eyacuiñajjiya Isaia pea esohui tehue mee ca poa Isaeni cuanaja jama ba'a:

"Eyaya Isaeni cuana iyaa majamajanaje enijke ejjapeequijji. Jamatii ecuea esohui etehue'yo jayojja jama a sa po'yo ajja tii tii.

Shajjama' ojjaña cuana, quea mimishi nee nee".

Jama tecueameya Isaiaa Isaeni cuana aca poa.

Eyacuiñajjija Jodio cuana cajaa ajjima

11 ¹Beca Jodio cuana jjashahuabaquiani jama ba'a: —Ecuana Isaeni cuana. Eyacuiñajjiya babaca. Jamatii jjeya Eyacuiñajjiya ecuana cajaa acanaje —beca cuana jamaya poani.

Chojja de. ¡Bacue! Eya Isaeni dejja, Jodio dejja. Eya Eyacuiñajjiya cajaa ajjima. Amajama ecuea etiiquiana poa. Bejami Amajamaja osecua. Eya Bejamija osecua. ²E'e, Eyacuiñajjiya Jodio cuana babaca coo ca poa ojaya epjeeji epoji. Yahuajo nei Eyacuiñajjiya esohui huohuijji Enia bajjanija esohui etehue'yo miquianajaya eba. Enia Jodio cuanajo quea quene mimia poa Eyacuiñajji nijje jama ba'a:

³ "Eyacuiñajji, Emeshi Mese nei, ¡bacue pea Isaeni cuana! Ohuaya aje oe cuiajea ca'yonaje miquea esohui huohuijji cuana. Mei e'lya ani iñajeaoqueajea ca'yonaje, ma aquiana dahuajji acani cuaa mi quea bei ecuana nijje epoji iñajeaoqueajea ca'yonaje. Eya ee nei yani miquea epjeeji. Eya cuiajea sa acani pea'ai Isaeni cuaa".

Jamaya aca poa Eniaa.

⁴Eyacuiñajjiya Enia saja'a ca poa jama ba'a:

"Chojja. Quea huiso nee Isaeni cuana ecuea epjeeji yani. E'e, 7.000 huisse Isaeni cuana eyacuiñajji nisho Baani bajjani bihuajji pojjeama. Quea huiso Isaeni cuana ecuea esohui jayojja jama ba'yani".

Jama saja'ameya Eyacuiñajjiya aca poa Enia.

⁵Jjeya nei cuanaya beca Jodio cuaa Eyacuiñajjiya esohui jayojja jama acani. Eyacuiñajjiya oya cuana babaca canaje ojaya epeejji epoiji. Oja mimishijo jjashahuabaqui tiitii ajja. Eyacuiñajjiya oya cuana quea jea nee acani. Jamajjeya oya quea bei nee poani ona nijje, Eyacuiñajji. ⁶E'e, Eyacuiñajjiya Jodio cuana quea jea nee acanjo oya cuana babaca canaje ojaya epeejji epoiji. Quea bei Jodio cuana nijje poanaje. Onaja mimishi cuanajo jjashahuaba tiitioui ajja. Jodio cuana ojaya quea jea nee poanajeojo babaca ca'ya poa. Babaca'yo jjima ojaya esohui jayojja jama atiitii canajejojo.

⁷E'e, beca Jodio cuana Eyacuiñajjiya epeejji pojjeama poanaje. Quea huiso Eyacuiñajjiya esohui jayojja jama anisho canaje. Jamajjeya Eyacuiñajjiya oya cuana ba canaje quea mimishi. E'e, Eyacuiñajjiya Jodio cuana babaca canaje ojaya epeejji epoiji. Beca cuana e'e nei poanaje. Jamatii pea cuana quea mimishi nee nee poanaje. ⁸Yahuajo nei nei Moisesiya Eyacuiñajjiya esohui tehue ca poa jama ba'a:

“Jamajjeya Eyacuiñajjiya shajjama' cuana quea jjashahuabaqui ja'a epo meeji pojjeama. Eyacuiñajjiya etehue'yo e'e nei ba majje jamatii ojaya quea quehua poa. Esohui e'e nei shajja'ajja majje jamatii quea quehua poa pealai. E'e, jamaya Isaeni cuana jjeya pealai shajjama' po tiitiiani”. Jamaya Moisesiya tehue ca poa.

⁹Yahuajo nei nei emeshi meseya Dabiya Jodio shajjama' cuana tecuea ca poa jama ba'a:

“Esejaya etiiquianaja esohui jayojja jama atiitiaña miquianaaya. Poquiquehuaje'yo, de, edasia'yo poaje'yo, de, quea mimishi nee nee. Jamajjeya Eyacuiñajjiya miquianaya quea nee nee capo mee cahua. ¹⁰Cojjamaja ejiojji ba jjima jayojja jama miquianajaya ba jjima capoahua tii tii Eyacuiñajjiya ejjashahuabaqui'yojji. Cuanaya aquiana quea biquie abo tiitii cani jayojja jama capoahua miquianajaya mimishi; epajeal'yojji pojjeama tii tii capoahua”. Jamaya Dabiya tehue ca poa yahuajo nei nei Jodio cuanajo.

Eyacuiñajjiya Jodio cuana iyaa cani tii ojaya epeejji epoiji

¹¹E'e pojja'a beca cuana jama jjashahuabaquime poani ba'a: —¿A'a Jesosa cajaa acanajejo, Eyacuiñajjiya Jodio cuana cajaa acaje'yo tii?

Chojja, jamaya pojjeama. Ecuana, Jodio cuana quea mimishi nee nee poanijo, Eyacuiñajjiya esohui a'ajjajo, ohuaya Jodio pojjeama cuana jjapeequi meesahua cani Jesosa nijje. Onajaya mimishi cuana cuijea ca'yani. Eyacuiñajji jjashahuabaquiani jama ba'a: —E'e, Jodio pojjeama cuana Jesosa nijje jjapeequi'yo pealai enijje eba'e tiitii'yojji —jamaya Eyacuiñajji jjashahuabaquiani.

¹²Jodio cuana aje oe jjashajja'ajjaqui ajja. Jamajjeya Eyacuiñajjiya Jodio pojjeama cuana Jesosa nijje jjapeequi meesahua ca'yonaje. Eyacuiñajjiya Jodio pojjeama cuana quea pame acanaje Jodio cuana

Jesosa nijje jjapeequi jjima jojoya. Jodio cuana Jesosa nijje jjapee neineiquiajo ca ca Eyacuiñajjiya quea pame nee acaje'yo ojjaña.

¹³Jodio pojjeama cuana Shomajo ba'e, Eyacuiñajjiya eya huoojea canaje miquiana que ojaya esohui huohuiya. Eyaya esohui huohuiaña tii tii miquianaya Jesosaja epeejji epo meesahuajji. ¹⁴Jamajjeya ma ba majjeya Jodio cuana pojja'a Jesosaja epeejji po sa poaje'yo pea'ai. ¹⁵E'e, Jodio cuaa Jesosa cajaa aca poajo, Eyacuiñajjiya Jodio pojjeama onijje jjapeequi meesahua canaje. Jamaya quea pame nee. Jamatii quijje Jodio cuana Jesosa nijje jjapeequi meesahua caje'yo pea'ai. E'e, jjeya Jodio emano'yo jayojjaya poani shajjama' jjejojo. Jesosa nijje jjapeequi'yo majje ca ca eshequi'yo jayojja poaje'yo, de, quea pame nee nee. ¹⁶E'e, jjeya oe pojji Jodio cuana Jesosaja epeejji nei poani. Jamajjeya quijje Eyacuiñajjiya quea huiso Jodio cuana ojaya epeejji nei po mee caje'yo. Jama ba'a: Acui esajja quea pame nee poajo, quijje tii majje ejjajja quea pame nee poaje pea'ai. Oya jayojjaya Amajama Eyacuiñajjiya ebabaca poa. Jamajjeya oja osecua cuana Eyacuiñajjiya ebabaca poaje pea'ai.

¹⁷Jjashahuabaquicue jama ba'a: E'acui meseya acui aa enojinoji cobojea majje ejee cojjajji iyanobia cani etii'yojji. Acui sajja quea pamejo pea acui jee cojjajji e'iyanobia pohuaje'yo. Oya jayojjaya beca Jodio cuana Jesosa cajaa acanajejo quea tai poa, acui aa enojinoji jayojja. Pea ejee cojjajji iyanobia majje pohua'yani jama Jodio pojjeama Jesosaja epeejji cuana poaje. Jiquio ecua ecuicojjone sajjajji jayojja eseya quea pame ba'e mee cani. ¹⁸Jamajjeya Jodio pojjeama cuana, ja'a jjashahuabaquijji miquianaya quea pame nee, Jodio cuana quea pame pishana! Chojja. Eyacuiñajji miquianajaya eba poanaje Jodioja ehuhuuijo. Miquianajaya ehuhuuijo pojjeama ca ca Eyacuiñajji Jodio cuanaja eba poa.

¹⁹E'e pojja'a miquianaya jjashahuabaquiani jama ba'a: —Jesosa cajaa aca poajo Jodio cuana acui aa ecobojea'yo jayojja jama poanaje. Eseya, Jodio pojjeama ca ca Jesosaja epeejji poanijo ecuicojjonejo pea ecojja posho e'iyanobia'yo quea pame pohua'yani jayojja jama —miquianaya poani.

²⁰E'e, jamaya poanaje. Jesosa cajaa amajje Jodio cuana acui aa ecobojea'yo jayojja jama poanaje. Eyacuiñajjiya oya cuana cajaa aca poa. Miquianaya ca ca oe Jesosa nijje jjapeequi'yojji, Eyacuiñajjiya ba cani mimishi'ama. E'e, jjeya Eyacuiñajjiya miquianaya babaca canaje. Jamatii ja'a jjashahuabaquijji miquianaya quea pame nee Jodio cuana quea pame pishana! Chojja. ¡Miquianaya quea ja'a nee Jesosa nijje jjapee tiitiiquicue! ²¹¡Bacue oe! Eyacuiñajjiya Jodio cuana babaca coo ca poa ojaya epeejji epoji. Majoya Jodio cuana jjashajja'ajjaqui sa po ajjajo, ohuaya miquianaya babaca canaje, Jodio pojjeama cuana. Jiquio ecua acui aa nojinoji jehuisejjajea'yo majje eyacua iyanobia ca'yani jama jayojja Eyacuiñajjiya Jodio shajjama' cuana cajaa ajea'yo majje miquianaya babaca canaje. Jamajjeya ja'a shajjama' pojji! Eyacuiñajjiya miquianaya cajaa aca chana! ²²E'e, Eyacuiñajjiya ojjaña quea jea nee acani. Shajjama' cuana ca ca tecuea neinei caje'yo, de. E'e, ojjaña joya shajjama' poani ohuaya quea nee po mee caje'yo. Miquianaya ca ca ohuaya quea pame nee acani ojaya quea jea nee neejojo. Ohuaya miquianaya

quea jea nee acaje'yo tii tii, ca jjashajja'ajja tiitiiquiajo. Shajjama' poajo ca ca ohuaya miquianaya quea nee po mee caje'yo pea'ai, de.²³ E'e, Jodio cuana pea'ai Jesosa nijje jjapeequiajo Eyacuiñajjiya ojaya epeejji nei po mee caje o'oya, yahuajo nei nei jayojjaya. E'e nei, jiquio ecua acui aa ejehuisejjajea'yo iyanobia ca o'oyani jama jayojja Eyacuiñajjiya oya cuana acaje'yo; ojaya epeejji nei po mee caje o'oya.²⁴ Miquianaya ca ca Jodio pojjeama cuana yahuajo nei Eyacuiñajjiya ebabaca pojjeama poa. Jamajjeya miquianaya pea acui aa jayojja, ebiojo nequi acui aa jayojja. Jamatii jiquio ecua ebiojo nequi acui aa acui bame bame yasijje iyanobia cani jayojja jama Eyacuiñajjiya miquianaya babaca canaje ojaya epeejji nei epoiji. Jamajjeya Eyacuiñajjiya miquianaya acanaje jayojja jama ohuaya Jodio cuana acaje'yo. E'e, ecuea etiiquiana Eyacuiñajjiya babaca coo ca poa. Jamajjeya jiquio ecua acui ebana'yo acui aa ejehuisejjajea'yo oya tii acujo iyanobia caje o'oya jayojja jama Eyacuiñajjiya Jodio cuana acaje'yo. Jesosa nijje jjapeequiajo Eyacuiñajjiya huohui caje jama ba'a: —E'e Jodio cuana, jjeya miquianaya ecuea epeejji nei po o'yanaje, ojjaña —acaje Eyacuiñajjiya.

Jodio cuana Jesosaja epeejji quijje poaje'yo

²⁵ Ecuea epeejji cuana, eyaya miya huohuije ma Eyacuiñajjiya quijje acaje Jodio cuanajo, ma yahuajo ojjaña ja jjima poa. Jamajjeya ecuea esohui ba majje miquianaya ejjashahuabaquiji pojjeama jama ba'a: —Ecuanaya nei ca ca oe Eyacuiñajjiya ebabaca ojaya epeejji nei epoiji —a'a oe miquianaya pojji.

Chojja. Jjeya Jodio cuaa Emeshi Mese nei Jesosa cajaa acani beshahua nei ojjañaa. Jamaya epo'yojji tii pojjeama. ¿Ache Jodio pojjeama cuana Jesosaja epeejji poaje? Eyacuiñajjiya eba. Mahuiso jjapeequiajo, Jodio cuana jjapeequije o'oya Jesosa nijje.²⁶ Jamajjeya quea huiso nee nee Jodio cuana eyajo ba'e tiitii mee caje'yo Jesosa nijje jjapeequiajo. E'e, yahuajo nei Eyacuiñajjiya Isaia tehue mee ca poa Isaeni cuanajo, ma Jacoboja osecua cuanajo jama ba'a:

“Eyacuiñajjiya huoojea'yo ojjaña jaahuanajji poeje. Oya Jodio dejja poaje. Oya Jacoboja osecua cuana mimishi pajea meesahua'yojji poaje'yo.²⁷ Ma ecua eyaya Jodio etiiquiana huohuinaje jamaya eyaya aje'yo; ojjaña mimishi cuijea neineije'yo”.

Jamaya yahuajo nei nei Eyacuiñajjiya aca poa.

²⁸ Jamatii jjeya Eyacuiñajjiya Jodio cuana ba cani ojaya epeejji pojjeama Jesosa cajaa aiji poajojo. Jamajjeya Jodio cuaa ma esohui cajaa acajo, Eyacuiñajjiya esohui quea pame nee Jesosajo miquianaya shajja'ajja mee canaje, Jodio pojjeama cuana. Jamatii Eyacuiñajjiya Jodio cuana cajaa tiitii ajiima, de. Yahuajo nei ecuana ojaya ebabaca poa. Ohuaya ecuanaja etiiquiana huohui ca poa jama ba'a: “Miya, miquea osecua cuana pea'ai ecuea epeejji nei cuana poaje'yo tii tii” jamaya ohuaya Amajarma, Jacobo, Isaaca pea'ai huohui ca poa.²⁹ E'e jojo nei Eyacuiñajjiya ojaya esohui jayojja jama acaje'yo, epajeal'yojji

pojjeama tii tii. Babaca'yo majje cajaa ya'yoji pojjeama tii.³⁰ Jamajjeya jjeya Jodio cuana Jesosa nijje jjapeequi sa po'yo aija jojoya Eyacuiñajjiya miquianaya, Jodio pojjeama cuana quea bei nee acani. Miquianaja mimishijo jjashahuuba tiitiiqui aija, jamatii yahuajo shajjama' nei poa.³¹ Eyacuiñajjiya quijje Jodio cuana jama acaje'yo ba'a: Jjeya ohuaya miquianaya quea bei acani; miquea mimishijo jjashahuabaqui aija. Oya jayojjaya quijje ohuaya Jodio cuana acaje'yo, jamatii jjeya shajjama' nei poani.³² Jamajjeya Eyacuiñajjiya ojjaña cuana ba cani shajjama' nei nei. Jesosa nijje jjapeequiajo ca ca ojjaña mimishijo jjashahuuba tiitiiqui aija poaje. Quea bei ojjaña cuana nijje poaje'yo Eyacuiñajji.

Eyacuiñajji bihuia cani Pabohua

³³ Quea pame nee nee Eyacuiñajjiya eseya acani. Ojjaña eseya ojaya eba nei nei; oya esejaya mimishi cuijear'yojji. E'e jojo nei ojjaña ojaya eba nei nei. Quea ja'a nee nee ojaya ejjashahuabaquijji. Quea pame nee nee ohuaya acani ojjaña.³⁴ Yahuajo nei Eyacuiñajjiya Isaia tehue mee ca poa jama ba'a:

“¿Ajea eba nei nei Eyacuiñajjiya ejjashahuabaquijji? ¿A'ya shai o ba meesahuajji? Chama' nei nei. Oya oe nei quea jjashahuabaqui ja'a nee nee.³⁵ ¿Aya acuae jja mi oe che quia cani aquiana Eyacuiñajjiya? Ojjaña aquiana cuana ojaya, de”.

Jamaya Eyacuiñajjiya esohui Isaiaa yahuajo nei tehue ca poa.

³⁶ E'e, Eyacuiñajjiya ojjaña aquiana pana ca'ya poa. Ojjaña ojaya aquiana. Quea sohui poja nee neeya jjejojo ohuaya ojjaña quea pame amee cani. Jamajjeya ojjañaa ba cani oya quea ja'a nee, quea pame nee nee pea'ai: —Eyacuiñajji, miya quea pame nee. Pea chama' mi jayojjaya —jamaya ioya ejjabihiua tiitiiqui! ¡Jamaya ejja'aqui!

¡Jesosaja epjeeji poanijo ojaya esohui jayojja acue!

12 ¹ Jamajjeya ecuea epjeeji cuana, ¡shajja'ajjacue mo! Eyacuiñajji ese nijje quea bei poani, mimishijo jjashahuuba tiitiiqui aija. Jamajjeya ioyer ojaya epjeeji nei nei ba'ecue! ¡Eyacuiñajji bihuacue jama ba'a: —Eyacuiñajji, eya miquea nei nei. Miquea ejjashahuabaqui'yojji jayojja jama eyaya aje'yo —jamaya pocue! E'e, ¡Jesosa jayojja jama ba'e tiitiicue quea pame nee! Eyacuiñajji bihuacue jama ba'a: —Eyacuiñajji, miya quea pame nee nee.

² ¡A'a Eyacuiñajjiya epjeeji pojjeama jayojja pojji! ¡Eyacuiñajjiya eseya ojaya esohui jayojja jama capo mee cahua! Cajjashahuabaqui mee cahua o jayojja. Majoya ojaya ejjashahuabaquijji eseya ba mee caje'yo. Ma ese ohua amee caje'yo ojo ohuaya eseya ba mee caje'yo. Ojaya ejjashahuabaquijji quea pame nee nee, quea ja'a nee nee enequi tiitijji pea'ai.

³ Eyacuiñajjiya eya huoojea canaje ojaya esohui huohuiya. Jamajjeya eyaya miquianaya ba meesahuaña quea pame nee eba'ejji. E'e, Eyacuiñajjiya eseya ba'e meesahua cani ojaya epjeeji epojji. Jamajjeya ja'a jjashahuabaquijji jama ba'a: —Eya quea pame nee nee —a'a jamaya pojji!

Chojja, ¡quea bei nee jjashahuabaquicue! ¡Jama acue ba'a: —Eyacuiñajjiya eya chaco meesahua cani jayojja jama eyaya onijje chacoje —jamaya pocue!

⁴ ¡Bacue! Esejaya eyami oe. Jamatii esejaya eyamijo yani eme', ejiojji, ecojja, equise pealai. Eme' ca ca ecojja jama pojjeama; pea. Jamatii ojee chaco cani oe eyamiya. ⁵Oya jayojjaya eseya Jesosaja epeejji cuana quea huiso nee. Oe epeejji pea jayojja chacochaco ajja. Jamatii eseyaya ojee chacoña Jesosa nijje. ⁶Jesosa nijje jjapeequianijo, Eyacuiñajjiya eseya chaco meesahua cani quea pame ojaya echacojjijo. E'e, ohuaya beca cuana chaco meesahua cani oe echacojjijo. Pea epeejji chaco meesahua cani pea echacojjijo, de. Jamajjeya ¡ohuaya chaco mee cani jayojja jama ejja'aqui! Jamajjeya ¡quea ja'a nee ejjasohuihuohuiqui, ohua huohui mee cani jayojja jama ejja'aqui! ⁷Beca cuana ca ca ona ba'e meesahuajji po mee cani ohuaya. Jamajjeya ¡quea bihui nee ojjaña caba'e meesahua cahua! Jesosaja epeejji sohui bameejji ohuaya po mee canijo, ¡ojjaña esohui caba meesahua cahua, huea'ama capoahua! ⁸Ona jjabahuejjaquijji po mee canijo, pea epeejji cajjabahuejjaqui mee cahua quea ja'a nee: —Eyacuiñajjiya miya quea bihui po mee caje mimishi'ama ba'yanijo —cahuohui cahua cuana.

Eyacuiñajjiya Jesosaja epeejji beca cuana quea aquiana huiso po meesahua cani pealai. Jamajjeya quea bihui nee capoahua, nishehui'ama, dejja tai'ama. Beca cuana pea epeejji jaahuanajji po mee cani. Jamajjeya e'e jojo nei quea ja'a nee nee cajjashahuabaquiahu. Pea epeejji ca ca aema' cuana, emanooja cuana jaahuanajji po mee cani. Jamajjeya quea jea nee cajaahuana cahua Jesosaja epeejji cuana.

¡Jesosaja epeejjiya pea epeejji cuana quea jea nee acue!

⁹ ¡E'e jojo nei ojjaña cuana quea jea nee nee acue! Jamajjeya ja'a pea cuana quea tai ajji! Chojja, ¡ojjaña cuana quea pame nee nee acue! ¹⁰E'e, ¡ojjaña Jesosaja epeejji quea jea nee acue! ¡Miquea huapa pojjeama jayojja jama quea jea nee neeya acue! ¹¹Jamajjeya ¡quea ja'a chacocue huea'ama! ¡Jesosajo, Emeshi Mese neijo quea bihui nee acue ojaya yajjijo! ¹²Eyacuiñajjiya esohui ese nijje jayojja jama ohuaya acaje'yo e'e jojo nei. ¡Jamajjeya quea bei pocue! Quea yeno dejja mimishiya mimia cajje ja'a oe Jesosa pajea'yojji quea yeno po majje! ¡Eyacuiñajji nijje mimi tiitiicue jama ba'a: —Eyacuiñajji, ¡jeya jaahuanacue! ¡Eya ba'e meesahuacue quea ja'a nee! —jamaya pocue Eyacuiñajji nijje!

¹³ ¡Jesosaja epeejji aema' poanijo eba'e meesahuajji quiacue! Pea cuana miquea cuiñajjijo nequiñaaqui'yajo, ¡iyacue bobo ijijajji, ecahuijji pealai! ¹⁴Jesosaja epeejji, dejja mimishiya miya mimia cajje ja'a panajajiji! ¡Eyacuiñajji nijje mimicue jama ba'a: —Ecue Chii, ¡e cuiajji epo mique Bacua Ejja Jesosa nijje jjapeequi meesahuacue! —acue!

¹⁵ ¡Joya quea bihui nee poani onijje quea bihui pocue! Quea yeno poanijo, pa'anijo ca ca ¡onijje mimicue; yeno'ama tii tii po meecue! ¹⁶¡Mi jayojjaya Jesosaja epeejji cuana quea pame nee ba'e meesahuacue! ¡A'a jama jjashahuabaquijji ba'a: —Onajaya aquiana quea pame nee nee. Eya o jayojjaya poaje —a'a jama jjashahuabaquimeya pojji!

¡Aema' cuana a'a cajaa ajji! Chojja. ¡Jjapeequicue onijje! ¡A'a jjashahuabaquijji miya quea pame nee nee, pea cuana quea pame pishana! ¹⁷Onaa miya quea mimishi acajje ja'a onijje quea mimishi pojji! ¡Quea pame nee po tiitiicue ojjañaja ebajji miya e'e jojo nei Jesosaja epeejji poani! ¹⁸Quea camaja eba'ejji pojja'a. Jamatii ojjaña nijje quea bei nee ba'ecue! ¹⁹Onaa napa cajje ja'a jjashahuabaquijji jama ba'a: —Ohua e acanaje jayojjaya eyaya oya aje, de —a'a jamaya pojji!

Chojja. Eyacuiñajjiya casosequia ca'yahua. Jamaya Eyacuiñajjiya esohui etehue'yo poa ba'a:

“Ecuea epeejji napajji poani eyaya eyaye nei sosequiaje'yo; quea nee nee po meeje'yo. Eyaya, Emeshi Mese neiya jamaya huohuiaña”. Yahuajo nei jamaya Eyacuiñajjiya tehue mee ca poa. ²⁰Pea tehue mee ca poa jama ba'a:

“Mi napajji poani cuana quea shoe poajo, ¡bobiacue oe! ¡Quea naba taja poajo, ena quiacue! Miya jamaya aije oya quea bicho nee nee poaje. Miya napa pajea caje'yo pojja'a, miquea epeejji poaje”.

Jamaya yahuajo tehue ca poa Eyacuiñajjiya esohui.

²¹ ¡A'a jjashahuabaquijji jama ba'a: —Ojjaña joya ecuana nijje quea mimishi poani eya o jayojjaya poaje pea'ai, de —a'a jamaya pojji!

Chojja. Miya napa cajje ¡jamati oya cuana quea pame nee acue!

Jesosaja epeejji cuaa emeshi mese cuana cashajja'ajja cahua

13

¹Emeshi meseya huoojea canijo, ¡jjashajja'ajjaquicue! Emeshi mese cuana Eyacuiñajjiya huoojea canaje ojjaña cuana quea ja'a ba'e meesahuaa.

Jamajjeya emeshi mese cuana Eyacuiñajjiya quea ca'a po mee cani ese huoojeajji.

²Jamajjeya jjashajja'ajjaqui ajjajo ca mi ca oe Eyacuiñajjiya miquianaya ba cani shajjama' ojaya ehuoojea'yoja esohui shajja'ajja sa po ajjajo. Shajjama' cuana aje oe quea nee po mee caje'yo. ³Eyacuiñajjiya emeshi mese cuana huoojea jjima quea pame ba'yani cuana quea mete po meeya. Quea mimishi ba'yani cuana ca ca quea mete capo mee cahua. ¿A'a miya emeshi mese cuanajo mete'ama ba'e sa poani?

¡Quea pame acue, ojaya esohui jayojja! Jamajjeya oya minijje queabihui nee poaje pojja'a: —E'e, ¡jamaya quea pame nee acue! —oya poaje.

⁴E'e, Eyacuiñajjiya emeshi mese cuana huoojea canaje ese quea ja'a ba'e meesahuaa. Jamajjeya ¡quea mimishi po majje quea mete pocue ojo! Ohuaya miya jjabahuejjaqui mee caje. Jamaya Eyacuiñajjiya oya cuana huoojea cani shajjama' cuana jjabahuejjaqui meeji. ⁵Jamajjeya ¡emeshi mese cuana shajja'ajjacue mete'ama eba'ejji, Jesosaja epeejji quea pame nee epoji pe'a'i! ⁶¡Jamaya pea'ai oya cuana sosequiacue! Ojjaña quea pame ba'e mee cani sosejje emeshi mese sosequia cani cuaa, Eyacuiñajjiya huoojea. ⁷Jamajjeya: —¡Sosequiacue mo! —ohua acajje ¡jamaya quiacue emeshi meseja eba'e meeji ohua chaco cani sosejje, mahuiso tiiya! ¡Miya jaahuana canijo, miquea meshi cuiña canijo pea'ai, sosequiacue! ¡E'e, emeshi mese cuana shajja'ajjacue! ¡Oya cuana sosequiacue pea'ai! ¡Jama acue pea'ai ba'a:

—Emeshi mese, miya quea pame nee ecuana ba'e meesahuaña —acue!
Jamaya quea pame nee.

¡Jesosaja epeejji cuana quea jea acue; pea cuana nijje quea bei pocue!

8 Jamajjeya ¡aquiana jjeshe majje sosequiacue! E'e, ¡miyaya yahuajo huohui'yonaje jayojjaya sosequiacue! Eyacuiñajjiya eseya quea jea nee nee acani. Jamajjeya ¡pea cuana quea jea nee acue, ojjaña! Pea cuana quea jea nee añajo Eyacuiñajjiya esohui jayojja aña. 9 E'e, Eyacuiñajjiya esohui Moisesiya tehue ca poa jama ba'a:

“¡A'a onajaya ehuanase jea bajji! ¡A'a pea quecuajji! ¡A'a sii pojji! ¡A'a onajaya aquiana jea bajji!”

Quijje Eyacuiñajjiya huohui canaje jama ba'a:

“¡Minijje ba'e quea jea nee acue! ¡Miya quea pame ba'yani jayojja jama ba'e meesahuacue!”

Jamajjeya ¡pea cuana quea jea nee añajo ba'e meesahuacue! ¡Ojjaña Eyacuiñajjiya esohui jayojjaya jama acue! 10 E'e, onaya miquea quea jea nee poanijo oya cuana quea yeno, quea nee po mee sa po'yo ajja. Jamajjeya onaya quea jea nee poanijo ojjaña Eyacuiñajjiya esohui jayojjaya aña.

11 E'e, ¡jamaya Eyacuiñajjiya esohui jayojja jama acue! ¡Bacue jiquio! Jesosa esejaya Emeshi Mese nei jjeya nei pojal'a poeje o'oya. Jamajjeya ¡quea ja'a nee ba'ecue Eyacuiñajjiya esohui jayojja! ¡A'a quea huea pojji! ¡Ojaya esohui bacue! Yahuajo pishana eseya Jesosaja epeejji poanaje. Ohuaya esejaya mimishi cuijea ca'yonaje. Poe o'oya majje eseya ba'e tiitii mee caje'yo eyajo onijje, Jesosaa.

12 Jjeya eseya jiquiojo ba'yani quea camaja poani, mecajje quea misi quea poqui camaja jayojja. Jesosa poe o'oyajo ca ca quea pame nee nee poaje'yo. Epojja jayojja jama poaje'yo. Ojaya epoe o'oyajji beshahua nei apoa. Jjapojjaqui majje ja'a laja'a poani jayojja poaje. Jamajjeya ja'a quea mimishi pojji! ¡Pea jjashahuabaquime po'yocue! ¡Jesosaa eseya ba'e meesahua canijo, ojjaña mimishi pajea neinei'yocue! 13 E'e, ¡quea ja'a nee nee ba'ecue bicho'ama epojji onaa ba canijo! Jamajjeya ja'a huoojjii! ¡A'a ona ishi'ishiqui yasijje poquijji! ¡A'a pea epona cuana jea bajji! Epona, ja'a onaja yahue, shacuima' nequi cuana pea'ai sijiji! ¡A'a quea mimishi ba'ejji! ¡A'a quea quene pojji! ¡A'a jjamimicuiajea nobiajeaquijji peal'ai! 14 Chojja. ¡Jesosa nijje mimicue ojaya ejjashahuabaquijji jayojja jama eba'e meesahuajji! Jamajjeya miquea ejjashahuabaquijji yahuajo nei jayojja jama eshahuaja miya eba'e mee'yojji pojjeama.

¡A'a Jesosaja epeejji cuana nijje mimijajiji!

14 1 Jesosaja epeejji cuana, miquianaaya pojja'a Eyacuiñajjiya esohui quea ja'a nee baña. Jesosaja epeejji beca cuana ca ca quea jjashahuabaqui ja'a pishana. ¡Jamatii onijje jjapeequicue quea bei! ¡A'a mimicuiajeanobiajeajji ojaya esohui quea quehuajol! 2 E'e, miquianaya beca cuana jjashahuabaquiani jama ba'a: —Ojjaña noe cuana ca'lijjiahua, jamatii onaaya ba'ehuana canaje

ecuiquiaja e'ijjiajji nisho. Ecuaaya ijja'yajo Eyacuiñajji cuana nijje quea quene pojjeama poaje —jamaya beca cuana poani. Jamajjeya noe ijjaña, ojjaña.

Beca cuana ca ca jama poani ba'a: —Chojja, ¡noe ma onaaya ecuiquiaja e'ijja'yoji nisho ba'ehuana canaje a'a ijjiajji! Ma eseya ijjaijo Eyacuiñajji quea quene poaje ese nijje —jama posoya acani. Jamajjeya acuijjajja cuana, bobi ebana'yo pea'ai ijja cani; noe ijja'yо jjima acani quea meteya jjejojo.

³Noe ijjiajji cuana, ja'a jama pojji pea cuana nijje ba'a: —¿Apiojji acuae miquianaaya acuijjajja, ebana'yo oopana ijjaña, noe ijja ajja so'o? Chojja. ¡A'a quea mete pojji! —a'a jamaya ajji!

Oya jayojja noe ijja ajja cuana, ja'a pea cuana nijje jama pojji ba'a: —Miquianaaya aje oe noe ijjaña. ¿Apiojji? Eyacuiñajji quea quene po chana', de —a'a jamaya ajji!

¡Bacue! Eyacuiñajjiya noe ijjiajji cuana pea'ai ojaya bacua cuana po mee canaje. Jamajjeya ja'a jamaya pea cuana nijje mimijji! ⁴E'e, miquianaya noe ijja ajja jjejojo mimimimiani. Eyaya miquianaya huohuaña jama ba'a: Eyacuiñajji ona huoojeajji poani, miquianaya pojjeama. Jamajjeya ja'a mimijajji! Eyacuiñajji ona huoojeajji poanijo ohuaya ohuaye nei jama acaje ba'a: —E'e, miquianaya quea pame nee ba'yani —Eyacuiñajjiya acaje.

Quea ja'a ba'e ajjajo ca ca: —Chojja, ja'a jamaya ajji! Quea tai —Eyacuiñajjiya acaje. Eyacuiñajji ese huoojeajji quea ca'a poanijo, ohuaya eseya quea ca'a po mee cani ojaya ejjashahuabauquijji jayojja jama eba'ejji.

⁵Cuanaya beca cuana jama poani ba'a: —Beca epojja cuana Eyacuiñajji bihuiajji. ¡Ma epojja cuanajo a'a chacojji!

Pea cuana ca ca jama poani ba'a: —Ojjaña epojja oya jayojjaya, pea epojja jayojjaya. ¡Eyacuiñajji bihuiaque ojjaña pojjajo! —oya cuana poani.

Jamajjeya ja'a pea nijje mimijji ache epojjajo chaco cajji! ¡Miquea ejjashahuabauqui'yoji epojja cuanajo jayojja jama acue! Pea cuana ojaya ejjashahuabauquijji jayojja jama ca'a cahua pea'ai epojja cuanajo. ⁶E'e, Emeshi Mese neija esohui jayojja jama ba'e sa poani miquianaya, ojjaña. Beca cuana quea huiso epojja cuanajo chacochaco ajja Eyacuiñajji bihuia poani jjejojo. Pea cuana ca ca oe pea epojjajo jayojjaya jama acani, oya jayojjaya. Noe ijjiajji cuaa esejaya Emeshi Mese nei bihuia cani. Ijjial'ijja jjimahua Eyacuiñajji nijje mimiany jama ba'a: —Eyacuiñajji, ecue Chii ai, eyaya miya bihuiaña noejo.

Noe ijja pojjima' cuaa esejaya Emeshi Mese nei bihuia cani pea'ai jama ba'a: —Eyacuiñajji, ecue Chii ai, eyaya miya bihuiaña jiquio bobijo, acuijjajjajo, eso' cuanajo, ebano'yojo cuanaya. E'e, miyaya ojjaña tii meesahua'yonaje —jamaya acani ohuaya.

⁷Jamajjeya ja'a esejaya eba'ejji, eseya sañajo jjashahuaba tiitiiquijji! Eseya eshe nequijo ca ca Jesosaja esohui jayojja jama caba'yahua. Mano'yajo pea'ai eseya Jesosaa jaahuana caje'yo. Eseya ojaya tii poaje'yo. ⁸E'e, eshe nequiya eseyaya Emeshi Mese nei Jesosaja esohui jayojja aña. Mano'yo majje onijje ba'e tiitiije'yo. Jamajjeya eshe nequi, mano'yajo pea'ai ohuaya eseya jaahuana cani; ese huoojeajji

poani tii tii oya. ⁹ Jesosa mano'yo majje shequi o'oyanaje ese jaahuanaji epojji. Jamajjeya ese eshe nequi, mano'yajo pea'ai oya, Jesosa esejaya Emeshi Mese nei poani tii tii. ¹⁰ Jesosaja epeejji poani ojjaña eseya. Jamajoya ¿apiojji acuaeya Jesosaja epeejji quea ja'a nee nijje jjamimicuiajea nobiae aquiani so'o? Cuanaya epeejji quea ja'a nee poaniya, ¿apiojji miquianaaya Jesosaja epeejji cuana niñebaña so'o? Oya Jesosaja epeejji pea'ai. ¡A'la pajeal'yojji quijje eseya ojjaña nequije Eyacuiñajji nequi cojja nei! Ohuaya huohui caje jama ba'a: —E'e jamaya, miyaya quea pame anaje —acaje'yo. Quea pame pojjeama añajo ca ca pea nijje jama poaje ba'a: —Chojja, miya quea mimishi poanaje —acaje'yo Eyacuiñajjiya.

¹¹ Eyacuiñajjiya esohui etehue'yo jama poani ba'a:

“Eya Eyacuiñajji eshe tii tii nequi. Jamajjeya e'e jojo nei ojjaña e cojja nei nequi majje, ecui'oshajjajo nequioque majje eya bihuia caje jama ba'a: —Miya ca ca oe Eyacuiñajji quea ca'a nee, quea pame nee enequi tii tii —ojjaña poaje”.

Jamaya esohui etehue'yo poani. ¹² Jamajjeya e'e jojo nei o cojja nei nequiajo, Eyacuiñajjiya eseya ojjaña huohui'ajja caje esejaya eba'e'yojjijo. Quea ja'a ba'enajeya eseyaya oya saja'aje'yo queabihui. Quea ja'a pojjeama ba'enajeya ca ca quea mete saja'aje'yo.

¡Ona quea mimishi po meeiji a'a pojji!

¹³ E'e, Eyacuiñajjiyo quea pame nee chacoañajo jojaya pea epeejji cuana a'a niñebajji! Chojja, ijama acue ba'a: —Jesosaja epeejji quea jjashahuubaqui ja'a po jjima ecuea eba'ejji ba majje quea mimishi po chana'. Jamajjeya eyaya maya e'amajjaji pojjeama oya quea mimishi, quea mete nee epo meeiji pojjeama —jamaya pocue!

¹⁴ Esejaya Emeshi Mese neiya eya ba meesahua canaje jama ba'a: Noe ma onaja ba'ehuanaqui ecuiquiaja e'ijjajji nisho eseya ijjiago, Eyacuiñajji ese nijje quea quene pojjeama poani. Pea bobi eseya ijjiago, jamaya pea'ai poani. Jamatii Jesosaja epeejji beca cuana quea jjashahuubaqui ja'a pishana jama poani ba'a: —Ma noe, bobi pea'ai eseya ijjiago, Eyacuiñajji quea quene poaje ese nijje —jama posoya acanijo, ohuaya maya ijjiia jjima ca'a cahua. E'e, jamaya jjashahuubaquianijo ijjiia majje oya quea mimishi poani.

¹⁵ Miquianaya, noe ijjiajji cuana, jjashahuubaquicue Jesosaja pea epeejji cuanajo, ma acuijjajja oopana ijjiajjijo! Jamajjeya miya noe ijjiajji ba majje ohuaya ijjiia pea'ai ca chana', mi jayojjaya poaje. Jamatii oya cuana quea mete jjashahuubaquije jama ba'a: —¡Dee! Eyaya eshahuaja bobi ijjianaje. Eyacuiñajji enijje quea quene poaje —jamaya jjashahuubaqui majje Jesosaja epeejji quea mimishi po chana'.

Jamajoya jama acue ba'a: ¡Jesosaja pea epeejji cuana quea jea acue! Oya ca'a'ama; quea mimishi po o'oya mee chana'. Jesosa onajo mano'yonaje pea'ai. Jamajjeya joya cuana jaahuanacue! ¹⁶ Miquianaya jjashahuubaquianyi pojja'a jama ba'a: —Eyaya jamaya aña, quea ja'a nee aña.

Jesosaja epeejji quea ja'a pojjeama jjashahuabaquiani mi ba majje jama poani ba'a: —Chojja, jamaya quea mimishi, quea tai —poso acani.

Jamatjeya ohua jamaya huohui canijo, ja'a oe jamaya amajajji, jamatii miquianaya quea ja'a jjashahuabaquiani! ¹⁷Bobijo, e'ishijji peal'ajo jjashahuabaquianijo pojjeama eseya Eyacuiñajji yasijje, ojjaña huoojoe'yojji poani yasijje poquije'yo. Chojja. Quea ja'a nee, quea bihui nee, quea bei nee pea'ai caba'yahua Edojoshahua Pameya eseya ba'e meesahua canijo. ¹⁸E'e, jamaya Jesosa Quito nijje ba'yanijo Eyacuiñajjiya eseya huohui caje jama ba'a: —E'e, jamaya quea pame.

Cuanaya ojjaña mijo huohui caje jama ba'a: —Oya Jesosa Quitoja epeejji quea ja'a nee nee poani —acaje.

¹⁹Jamatjeya jjashahuuba tiitiuquicue ojjaña Jesosaja epeejji cuana nijje quea bei nee eba'ejjii! ¡Pea Jesosaja epeejji cuana quea ja'a po meesahuacue peal'ai! ²⁰¡A'a noe ijijajji ecuquiaja e'ijijajji nisho onaja ba'ehuana ba'e! Quea mete oya cuana poaje. Eyacuiñajji onijje quea quene poani posojo ma bobijo onaya quea mete poanijo, ja'a ijija majajji! Jamatii Eyacuiñajji pana ojjaña bobi quea pame. Jamatii ma bobi miya ijijajo onaya quea mete po mee chana', quea mimishi po o'oya mee chana!. ²¹E'e, e'e pojja'a Jesosaja pea epeejji quea mimishi poaje miyaya ma bobi ijijaña, acuijjajja na biso nei pojja'a ishiaña ba majje. E'e pojja'a mi ba majjeya ohuaya quea mimishi acaje o'oya. Jamajjeya ja'a jamaya amajajji! Oya quea mimishi po o'oya chana!. ²²Jamatjeya ja'a Jesosaja pea epeejji cuana nijje jjamimicuiae nobiajeaquijji bobi cuanajo, eba'e meejjii cuanajo peal'ai! ¡Jjashahuuba neineiqui majje quea pame nee nee acue! ¡Jesosaja epeejji cuana quea pame ameesahuacue peal'ai! Jamaya poanijo ojjaña Jesosaja epeejji quea bihui nee capoahua. Jesosaja epeejji quea mimishi po mee cani o ba majje ca ca cajjashahuabaquiahua jama ba'a: —Chojja, eya ona mimishi pomeejji poani. Jamaya eya quea tai poani.

²³E'e pojja'a Jesosaja epeejji jjashahuabaquiani jama ba'a: —E'e pojja'a jiquio bobi eya ijijañajo, Eyacuiñajji enijje quea quene poaje —poani.

Jamatjeya jamatii ijija cajo, Eyacuiñajji onijje quea quene poaje.

E'e, jjashahuuba neineiquicue Eyacuiñajji esohui jayojja jama yajji! Eba'e quea mimishi miquea eba. Jamajjeya ja'a jamaya aiji! ¡E'e jojo nei quea pame nee pocue!

¡Jesosaja epeejji cuana quea jjashahuabaqui ja'a ejjapo meequi!

15 ¹E'e, ecuana quea jjashahuabaqui ja'a, Eyacuiñajji esohui ba neineiaña. Beca cuana cho, quea jjashahuabaqui ja'a pishana. Ona nijje ja'a quea quene pojji! ¡A'a jjashahuabaquijji jama ba'a: —Eyaya ca eya ojjaña bobi ijijaje, jamatii onaaya eya quea mimishi poani poso acani —a'a jamaya pojji!

²Chojja, ¡Jesosaja epeejji ca'a'ama nijje a'a jjamimicuiae nobiajeaquijji bobijo! ¡Oya cuana quea bei po meesahuacue miquea ojjaña bobi ijijaña jjimahuajo! E'e, ¡Jesosa nijje jjapee neinei sahuameequicue! ³Jamatjeya ¡Jesosa jama ba'ecue, miquea ejjashahuabaquijji jayojja jama pojjeama! Ohuaya oja

chii jama acanaje ba'a: —Ecuea ejjashahuabaquijji jayojja jama a sa po ajja. Chojja ecue chii, eyaya miquea ejjashahuabaquijji ejo jama a sa aña.

Yahuajo nei onaaya Jesosaja esohui tehue ca poa jama ba'a:

“Ecue Chii, eya miquea ejjashahuabaquijji jayojja jama poanijo, dejja cuaa miya niñeba cani, eya pealai niñeba cani quea tai nee”.

Jamaya esohui yahuajo nei etehue'yo poa.

⁴Ecacuiñajjiya ojjaña ojaya esohui yahuajo tehue mee ca poa eseya ojaya epreejji quea ja'a epo meesahuajji. Ma esohui etehue'yo eseyaya baña onaa napa cajje ona nijje mimijaji ajja, eseya. Ma esohujo pealai eseyaya baña Jesosa nijje jjapee neineiquianijo quijje ba'e tiitijje'yo onijje eyajo.

⁵E'e, Ecacuiñajjiya eseya ba'e meesahua cani ojaya epreejji nei. Onaa napa cajje jjapeequi pajea'yo ajja. Jamajjeya eya onijje mimiani miquianajio jama ba'a: —Ecue Chii, ¡miquea epreejji cuana Shomajo ba'e ojee jjapeequi meesahuacue; Jesosaja esohui jama ameesahuacue! —eya poani.

⁶Jesosa nijje ojee jjapeequianijo miquianaaya ojee Ecacuiñajji bihuiaña sohuicuayanijo, esejaya Emeshi Mese nei Jesosa Quitoja Chii miquianaaya bihuiaña jama ba'a: —Ecacuiñajji, miya ca ca oe quea pame nee, quea ca'a nee. Pea chama' mi jayojja —jamaya miquianaya poaje'yo tii tii.

¡Pea cuana nijje quea ja'a jjapeequicue!

⁷Jamajjeya ¡Jesosa Quitohua miquianaya quea jea acani jayojja jama ojaya epreejji cuana quea jea nee acue! Jamajoya pea cuaa jama acaje ba'a: —E'e, Ecacuiñajji quea pame nee nee. Ojaya epreejji cuaa onaya quea jea nee acani.

⁸Yahuajo nei Ecacuiñajjiya ecuanaja etiiquiana huohui ca poa jama ba'a: “Eyaya miquiana huasijje huoojeaje ojjaña jaahuanajji” poa.

Jamajjeya Jesosa Quito huoojea nei canaje ojaya yahuajo ehuoojeapana poa jojoya. Jamajjeya eseya ba mee canaje Ecacuiñajjiya ohua aca poa esohui jayojjaya e'e jojo nei acani. ⁹Oya Jesosa poeyanaje Jodio pojjeama cuana Ecacuiñajji bihuia meeya pealai, jama po meeya pealai ba'a:

“Ecacuiñajji, miya quea pame nee nee, quea ca'a nee nee. Ecuanaja mimishi cuanajo jjashahuuba tiitiiqui ajja. Cuijea'yo majje quea bei ecuana nijje poani”.

Yahuajo nei Ecacuiñajjiya Dabi tehue mee ca poa oja sohui jama ba'a:

“Jamajjeya eyaya Jodio pojjeama cuana nijjeya miya bihuiaje.

Sohuicuaya majje miya bihuiaje”.

Jamaya yahuajo nei nei poa. ¹⁰Yahuajo nei tehue mee ca poa jama pealai ba'a:

“Jodio pojjeama cuana, ¡Jodio cuana nijjeya Ecacuiñajji bihuiaque!

¡Quea bihui nee nee pocue!”

¹¹Jamaya tehue mee ca poa pealai ba'a:

“Jodio pojjeama cuana, ¡Ecacuiñajji bihuiaque! E'e, ¡ojjaña cuaa

Ecacuiñajji bihuiaque, sohuicuayacue jama ba'a: —Ecacuiñajji, miya quea pame nee —jamaya acue!”

Jamaya aca poa. ¹²Eyacuiñajjiya Isaia tehue mee ca poa jama ba'a:

“Quijje nei nei Isaija osecua cuayaje. Oya ona huoojea'yojji poaje'yo.

Ohuaya Jodio pojjeama pe'a'i mimishi cuijea'yo majje ba mee caje'yo, onijje ba'e tiitii mee caje'yo”.

E'e, jamaya yahuajo nei Isaia tehue mee ca poa Jesosajo. ¹³Jamajjeya Eyacuiñajjiya eseya ba meesahua cani jama ba'a: Quijje ohuaya eseya ba'e tiitii mee caje'yo eyajo onijje. Eya Eyacuiñajji nijje mimi majamajani miquianajo jama ba'a: —Eyacuiñajji, ¡miquea epeeiji cuana Shomajo ba'e quea bihui nee po meecue! ¡Minijje jjapeequianijo quea ja'a nee jjashahuabaqui meesahuacue! —eyaya aña.

Edojjoshahua Pame miquiana nijje nequi. Oya quea ca'a nee nee. Miya ba meesahua cani miquiana quijje Eyacuiñajji nijje ba'e tiitije'yo eyajo.

Pabohua Shomano cuana Jodio pojjeama cuana baqui sa acani

¹⁴E'e ecuea epeeiji cuana, eya ca ca iña miquianajo jjashahuabaquiani jama ba'a: Miquianaya Jesosaja epeeiji quea pame nee. Miquianajaya eba nei nei Eyacuiñajjiya esohui e'e nei Jesosajo. Ma esohui huohui huicha'a huicha'aña. Pea cuana quea ja'a nee jjapeequi meesahuaña Jesosa nijje, miquianaaya. ¹⁵Jamatii Eyacuiñajjiya eya huohui canaje jayojja jama eyaya miquiana huasijje oja sohui tehuename. Beca ejjashahuabaquiji quea ja'a nee nee tehuename mi jjabahuejjaqui meeiji, miquianajaya epajealoyiji pojjeama. ¹⁶E'e, Eyacuiñajjiya eya huoojea canaje Jodio pojjeama huasijje ojaya esohui huohuiya, Jesosajo ehuohuijji. Jiquio ecua yahuajo nei Eyacuiñajji nijje emimiji Jodio huasijje Eyacuiñajjiya esohui aca poa jayojja jama eyaya ojaya esohui Jesosajo cahuohuihua miquiana que, Jodio pojjeama huasijje Jesosa nijje ejjapeequi meesahuaji. Jesosa nijje jjapeequianijo, Eyacuiñajji miquiana nijje quea bihui nee poani, Edojjoshahua Pameya pea jjashahuabaquime po mee ca'yanijo.

¹⁷Jamajjeya eya quea bihui nee poani. Jesosa Quitohua eya Jodio pojjeama cuana huasijje Eyacuiñajjiya esohui huohui meesahua cajje ojaya epeeiji cuana poanaje. ¹⁸Jiquio ca ca oe eyaya miquianaya quea bihui huohuiña jama ba'a: Jesosa Quitohua Jodio pojjeama quea pame ba'e meesahua cani Eyacuiñajjiya esohui jama ojaya epeeiji nei epoji. Ohuaya jamaya acanaje eya ojaya esohui huohuijji poanijojo. E'e, Jesosaa eya ameesahua canaje, huohui meesahua canaje pe'a'i jama ba'a: ¹⁹Eya Edojjoshahua Pameya ma dejjaa ajjima acani ameesahua canaje. Jamaya eya esohui huohui meesahua canaje quea ja'a nee Jenosanena huasijje, quea huesha nee pe'a'i, johuaam Ininico huasijje pe'a'i eyaya ojjaña Eyacuiñajjiya esohui quea pame nee Jesosajo huohui neinei poquia poa. ²⁰Jamaya eyaya esohui huohui sa aña pea cuana huasijje, onaja sohuihuohuiqui jjima huasijje. E'e, jiquio esohui quea pame Jesosajo shajja'ajja jjima cuana huasijje eyaya ma esohui huohui sa aña. ²¹E'e, yahuajo nei Eyacuiñajjiya esohui etehue'yo jama aca poa ba'a:

“Ojjañaja yahuajo shajja’ajja jjimaa Eyacuiñajjija huoojea’yo ojjaña jaahuanajjijo shajja’ajja caje. Ojjañaa joya o ba pojimaa oya ba caje”. E’e, jamaya eyaya a sa aña, Eyacuiñajjija esohui etehue’yo yahuajo jama.

Pabo Shoma huasijje poqui sa poani Jesosaja epeejji cuana baa

²²Yahuajo eya quea huiso poqui sa poa Shoma huasijje miquiana baa. Jjeya pea’ai eya poqui sa poani. Quea huiso pea cuana huasijje esohui huohui poequi jjejojo mi poquinaje. ²³Jjeya ca ca eya apoa. Ojjaña cuiñajji yasijje jiquiojo esohui huohujeyonaje. Jamajjeya ma ecua eya yahuajo jjashahuubaquinaje jamaya eyaya jjeyahua nei aje. ²⁴Eya poqui sa poani España meshi yasijje esohui huohuiya. Jamajjeya España meshi yasijje poquijeya eyaya miquianaya bananaje. Shomajo anije beca cahuime pojja’la. Queabihui nee nee eya poaje miquiana nijje nequinana majje. Miquiana nijje mimi majje eya poquije España meshi yasijje. E’e pojja’la miquianaaya eya aquiana quiaje epoqui meesahuajji pojja’la. ²⁵Miquiana huasijje poqui jjimahua eya poquije so’lo Jenosanena huasijje Jesosaja epeejji aema huasijje ejjeshejji quiaa, Jodio cuana huasijje. ²⁶Ma ejjeshejji Jesosaja epeejji cuana Masenonia meshijo ba’leya, Asia meshijo ba’leya pea’aliya chicha canaje Jesosaja epeejji aema’ ba’le meesahuajji. Jamaya oya cuana a sa poanaje. Oya Jodio pojjeama poani. ²⁷Jamatii quea bihui nee quia canaje. E’e, ohuaya ejjeshejji caquia cahua Jesosaja epeejji Jodio cuana ba’le meesahuajji. E’e, Eyacuiñajjija Jodio cuana iyaa coo ca poa ojaya epeejji epoji. Majoya Jodio cuaa Eyacuiñajjija esohui quea pame nee Jesosajo Jodio pojjeama cuana huohui cajje Jesosa nijje jjapeequinaje. Jamajjeya Jodio pojjeama cuaa Jodio cuana huasijje eba’le meeiji cahuojea cahua, Jesosaja epeejji cuaa. ²⁸Jamatii Jenosanena huasijje poqui majje, ma ejjeshejji quia majje eya poquije España meshi yasijje. Poquijeya eyaya miquianaya bananaje. ²⁹Miquianaya banana majje quea bihui nee nee poaje. Ojee jjapeequianijo, Jesosaja esohuijo eseaya quea bihui nee poaje’yo.

³⁰Epeejji cuana, esejaya Emeshi Mese nei Jesosa nijje jjapeequianijo, Edojjoshahua Pameya eya miquianajaya quea jea ameesahua canijo, ¡Eyacuiñajji nijje mimicue ejo! ¡Jama acue ba’la: —Eyacuiñajji, Pabo miquea esohui huohui canijo quea camaja nee nee. ¡Oya jaahuanan neineicue! ³¹Jamatii Jenosanena huasijje poqui majje, ma ejjeshejji quia majje eya poquije España meshi yasijje. Miquea epeejji jomajo ba’le quea bihui nee ejjeshejji jjeshe meesahuacue ma Pabohua ye cani! —jama oe miquianaaya acue Eyacuiñajji nijje mimi majje!

³²E’e pojja’la Eyacuiñajjija eya miquiana que huoojea caje. Ohuaya eseaya quea bihui nee jjapeequi meesahua caje quea pame nee.

³³Eyacuiñajjija eseaya quea bei ba’le meesahua cani. ¡Ohuaya miquianaya cajaahuana cahua! ¡Jamaya capoahua!

Pabohua Jesosaja epeejji cuana huasijje tehue canaje quea bihui o pojji

16 ¹Ecuanaaja epeejji epona Peme bajjani Jesosa nijje chacochacoani Senesea cuiñajjijo. Oya Jesosaja epeejji quea pame nee. Jesosaja

pea epeejji cuana jaahuana cani. ²Miquiana que poquiyajo, ¡oya huohuicue jama ba'a: —Mi poeyajo ecuana queabihui nee —acue!

Ohuaya eya ba'e meesahua cani, pea Jesosaja epeejji cuana pe'a'i ba'e meesahua cani quea huiso nee. Jamajjeya miquianaya Jesosaja epeejji poani pe'a'ijo ¡oya ja'ajjequicue! ¡Oya aquiana quiacue eba'ejji! ³Pisina pe'a'i, oja yahue Aquiana pe'a'i miquiana nijje ba'e. Oya huohui'ajjacue jama ba'a: —¿Achajja acuae quiana so'o? —ecuea ebajji.

Oya cuana enijke chacochaconaje. Jesosaja esohui huohui sahua canaje. ⁴E'e, eyaya Jesosaja esohui huohuiañajo, pea cuaa cuia'ajja canaje. Pisina, Aquina pe'a'i ca ca e nahuejo beshahua nei cuia canaje cuaa. Jamajjeya eyaya, Pabohua Jesosaja epeejji Jodio pojjeama cuana nijjeya oya huohuiaña jama ba'a: —E'e, jamaya miquianaya quea pame nee nee poanaje —ecuaaya anaje.

⁵Ojjaña Jesosaja epeejji cuana ma Pisinaja equijo jjachichaquianni eyaya huohui'ajjaña jama ba'a: —¿Achajja acuae quiana ani so'o? —ecuanaja ebajji.

Jamaya acue pe'a'i ecuea epeejji Epeneto bajjani. Asia meshijo ba'ya poa oya. Ecuea esohui Jesosajo shajja'ajja majje oya ebionei Jesosaja epeejji poanaje jomajo Asia meshijo ba'yahu. ⁶Mania pe'a'i quea huiso chacochaconaje miquiana nijje. ¡Oya ecuea esohui huohuicue quea bihui nee o pojji! ⁷¡Oya jayojjaya mimicue Anidonico nijje, Jonia pe'a'i nijje! Oya Jodio cuana, ecuea huapa pojjeama cuana. Oya enijke ejeanobia jaanaje. Jesosaja epeejji quea pame nee oya poa, Jesosaja huoojea'yo esohui huohujiji. E Jesosa nijje jjapeequi jjimahuajo oya cuana jjapeequia poa. ⁸¡Oya jayojjaya mimicue Amepia nijje pe'a'i! Oya Emeshi Mese nei Jesosaja epeejji nei. Jamajjeya: —¿Achajja ami ani so'o, ecuea epeejji? —acue oya, ecuea ebajji.

⁹¡Oya jayojjaya mimicue Omano nijje, ma ecuana nijje Jesosa Quito nijje chacochaconaje! ¡Etaqui pe'a'i, ¹⁰Apene pe'a'i jama acue! Oya Emeshi Mese nei nijje chacochacoanijo quea nee poanaje quea huiso. Ecuana eba oya Jesosaja epeejji quea ca'a nee. ¡Ojjaña Anisitomoja huapa pojjeama cuana ecuea esohui huohuicue pe'a'i quea bihui nee o pojji! ¹¹¡Jodio dejja Jenonio bajjani jama acue! Oya huapa pojjeama pe'a'i poani. ¡Oya Nasiso, Nasisoja huapa pojjeama ecuea esohui huohuicue pe'a'i, Jesosa nijje jjapeequianijo! ¹²¡Tipena, Tiposa oya jayojjaya huohuicue! Ma epona cuana Emeshi Mese neijo, Jesosajo quea huiso chacochaconaje. Epona Pesina bajjani pe'a'i Emeshi Mese neijo janobajjima nei chacochaconaje. ¡Oya pe'a'i ecuea esohui huohuicue, ecuea epeejji nei oya! ¹³¡Jamaya mimicue Shopo nijje, ojaya enaease nijje pe'a'i! Ojjaña eba Jesosaa, Emeshi Mese neiya Shopo babaca canaje ojaya esohui huohujiji. Ojaya enaeseya eya jaahuana canaje ecuea enaeseya jayojjaya. ¹⁴Jamajjeya oya jayojjaya huohuicue ejo Jesosaja pea epeejji cuana nijje pe'a'i, ma bajjani cuana nijje ba'a: Asinisito, Peconete, Jemesi, Patomasi, Jemase pe'a'i. ¡Ojjaña Jesosaja epeejji onijje nequica pe'a'i jamaya acue! ¹⁵¡Ecuea esohui quea bihui nee o pojji huohuicue Pinonoco, Joña, Neneo, oja jjo'i pe'a'i, Onipa pe'a'i ojjaña Jesosaja epeejji cuana onijje nequica pe'a'i huohuicue!

¹⁶E'e, miquianaya jjachichaqui majje ¡pea cuana nijje quea bihui nee mimicue jama ba'a: —¿Achajja ami ani so'o, epeejji? —acue!

E'e, ojjaña Jesosaja epeejji cuaa jiquiojo enijje nequiya miquianaya Shomajo ba'e quea bihui nee acani jama ba'a: —¿Achajja acuae quiana ani so'o? —acani ojaya ebajji.

Mahuiso.

Pabohua pea esohui quea ja'a nee eba'e meeiji huohui cani

¹⁷Ecuea epeejji cuana, eyaya miquiana cuana pea esohui tehueaña jama ba'a: Beca cuaa miquiana nijje nequiya Jesosaja epeejji cuana pea epeejji cuana nijje jjamimicuajea nobiajea meeque cani. Pea esohui e'e nei pojjeama Jesosa Quitojo huohui cani pea'ai, ecuanaja esohui jayojja jama pojjeama. Ecuaaya ca ca e'e nei esohui huohuaña. ¡A'a oya cuana shajjal'ajjajji! ¡A'a jja oe onijje jjapeequijji! ¹⁸Ma siajjepoji cuana esejaya Emeshi Mese neijo Jesosajo chaco ajja. Chojja. Oya cuana esohui huohujji nisho. Ojaya ejashahuubaquijji quea quehua jayojja jama acani. Mimiani esohui quea pame jayojja. Jamatii quea tai. Siajje poani. Jama poani ba'a: —E'e, eya miquianajaya epeejji; miquianaya quea pame nee ecuea epeejji —anisho cani. Jamaya Jesosaja epeejji quea jjashahuubaqui ja'a pishana dasia cani.

¹⁹Ojjaña Jesosaja epeejji cuaa shajjal'ajja canaje miquianaya Shomajo ba'e Eyacuiñajjiya esohui jayojjaya ba'yani. Jamajjeya eya miquianajo quea bihui nee. ¡Quea ja'a nee jjashahuubaquicue quea pame nee eba'ejji! ¡Ma esohui huohujji nishoja esohui e'e nei pojjeama a'a shajjal'ajjajji! ¡A'a jamaya pojji!

²⁰E'e, Eyacuiñajjiya eseaya quea bei ba'e meesahua cani, quea ja'a jjashahuubaqui meesahua cani jjeya nei. Ohuaya miquianaya Edosiquianaja epeejji mimicuajeobiajea meesahua caje'yo. Miquianaya ojaya edasia'yojji pojjeama. E'e, ¡Jesosa Quitohua esejaya Emeshi Mese neiya miquianaya cajaahuana cahua!

²¹Timoteo enijje chacochacoani Jesosa Quito nijje. Ohuaya pea'ai miquianaya jama huohui'ajjame acani ba'a: —¿Achajja acuae quiana ani so'o? —acani.

Ecuea huapa pojjeama Jodio dejja cuana Nosio, Jasoni, Sosipate pea'aiya jama huohui'ajjame acani ba'a: —¿Achajja acuae quiana ani so'o? —acani pea'ai.

²²⁻²⁴Cayo pea'ai oya jayojjaya miquiana nijje mimiani. Eya oja equijo ba'e. Ojaya equijo Jesosaja epeejji cuana ojee jjachichaquiya Eyacuiñajjiya esohui baa. Enasitohua, pea epeejji Cuanito bajjaniya pea'aiya huohui'ajja mee cani jama ba'a: —Epeejji cuana, ¿achajja acuae quiana ani so'o? —acani. Oya Enasito ejjeshejji cuiñajji poani, ma Conitio dejja etiiya chicha mee cani ejjeshejji.

Eya ca iña Jesosaja epeejji Tesio bajjani. Eyaya Paboja esohui miquiana que tehueaña ojo. Eyaya miquianaya huohuaña jama ba'a: —Miquianaya Jesosa Quitoja epeejji, esejaya Emeshi Mese neija epeejji poanijo, ohuaya miquianaya quea pame nee cajaahuana cahua. E'e, jamaya capoahua —jamaya Pabohua eya tehue mee cani.

Eyacuiñajji bihuia cani Pabohua

25 Eyacuiñajji ejjabihuiaqui jama ba'a: —Eyacuiñajji, miya quea pame nee, quea ca'a nee nee. Miquea esohui jayojja jama ba'e meeaña ecuanaya. Eyacuiñajji, miyaya eya huohui meesahuaña esohui quea pame nee Jesosa Quitojo. Ba meesahuaña Jesosa Quito ca ca oe mimishi cuijea'yojji poani ojjañaja. Maya yahuajo ecuanaja etiiquianaja ba jjima poa. 26 Jodio esohui huohuijjji yahuajo nei ba'ya poaa Jesosajo huohui ca poa quea ja'a pishana, ojaya ba jjima pishanajo. Jjeya ca ca ma esohui e'e nei miyaya ba meesahuaña quea ja'a nee.

—E'e Eyacuiñajji, miya ba'e tiitiani. Miya ca ca oeya ojjaña cuana ojjaña meshijo ba'e ba meesahuaña esohui e'e nei Jesosaja. Ma esohui quea pame jayojja jama ameesahuaña pea'ai. Jamaya ojjañaja eba poaje.

27 —E'e Eyacuiñajji, miya oe nei Eyacuiñajji, pea chama! Ojjaña ca ca oe miquea eba, miquea nei. Ecuana Jesosaja epeejji poanijo ecuanajaya eba miya quea pame nee nee, quea ca'a nee poani tii tii. Jamaya capoahua —jamaya ejjabihuiaqui Eyacuiñajji.

Eya Pabo bajjani. Mahuiso ecuea esohui miquiana Shoma cuiñajjijo ba'e yasijje tehue meeaña. Apoa.

PABOJA ETEHUE'YO CONITOJO BA'E CUANA HUASIJJE EBIONEI

1 CORINTIOS

Pabohua tehue canaje Jesosaja epeejji cuana Conitojo ba'e yasijje

1 ¹Jesosaja epeejji cuana, eya Pabo, Jesosa Quitoja huoojeal'yo ojaya esohui nequi. ²Eyaya tehueña miquiana huasijje, Jesosaja epeejji cuana Conito cuiñajjiyo ba'eca huasijje, ojjaña meshijo ba'eca huasijje pealai tehueña. E'e, yahuajo Eyacuiñajjiya miquianaya ojjaña babaca canaje Jesosaja epeejji e'e jojo nei epo'yojji, quea pame nee. Jamajjeya miquianaya ojjaña cuana jama poani ba'a: —Jesosa, je jaahuanajji pocue! —jamaya poani esejaya Emeshi Mese nei Jesosa Quito nijje, ojjaña esejaya Emeshi Mese nei nijje. ³¡Esejaya Emeshi Mese nei Jesosa Quitohua, Eyacuiñajjiya esejaya Chiiya pealai miquianaya cajaahuana cahua, quea bei caba'e mee cahua pealai!

Pabohua Eyacuiñajji bihuia canaje

⁴Eya Eyacuiñajji nijje mimiani miquianajo quea huiso nee jama ba'a: —Eyacuiñajji, miya quea pame nee nee. Jesosa Quitoja epeejji ojjaña cuana jaahuanaña quea pame nee nee —eya poani.

⁵E'e epeejji cuana, miquianaya Jesosa Quitoja epeejji poanijo, ohuaya miquianaya quea pame nee ameesahua cani tii, quea huiso nee. Jamajjeya miquianaya ojaya ejashahuabaquijji ba meesahua canaje quea ja'a nee. Ojaya esohui ba meesahua canaje, huohui meesahua canaje pealai. ⁶Esohui quea pame nee Jesosa Quitoja eyaya miquianaya huohui huicha'a huicha'anaje yahuajo. Jamajjeya ojaya esohui jayojja jama miquianaaya atiitiaña. ⁷Jamajjeya esejaya Emeshi Mese nei Jesosa Quitoja epoe o'oyajjiyo ishoañajo, o jayojjaya jama Edojoshahua Pameya miquianaya ameesahua cani quea huiso. ⁸E'e, Edojoshahua Pameya miquianaya Jesosa jayojja jama amee canijo, Jesosa nijje jjapeequi pajea'ylo ajja. Jamajjeya esejaya Emeshi Mese nei poe o'oyajo,

Eyacuiñajjiya miquianaya ba caje mimishi'ama. ⁹E'e, Eyacuiñajjiya miquianaya babaca canaje ojaya Ebacua Ejja nijje, Jesosa Quito nijje ejjapeequijji tii, esejaya Emeshi Mese nei nijje. Eyacuiñajjiya ojaya esohui jayojja jama acaje'yo nei nei, e'le jojo nei; miquianaya Jesosaja epeejji quea ca'a nee po mee caje'yo tii tii.

Ojaya epeejji cuana ojee cajjapeequi'yahua Jesosa nijje

¹⁰⁻¹¹Ecuea epeejji cuana, Jesosa Quitoja epeejji Coeja huapa pojjeama poeyanaje e que. Enije miminaje miquianajo jama ba'a: —Pabo, Jesosa Quitoja epeejji cuana Conitojo ba'e jjamimicuiajea nobiajeaquiani quea huiso nee —poanaje.

Epeejji cuana, ¿apiojji acuae nequiana jjamimicuiajea nobiajeaquiani so'o? Jamaya miquianaya quea tai poani.

Jamajjeya ¡shajja'ajjacue mo! Esejaya Emeshi Mese neiya Jesosa Quitohua eya huoojea canaje ojaya esohui huohuiya. Jamajjeya eyaya miquianaya huohuiña jama ba'a: Ojjaña miquianaya Jesosa Quitoja epeejji poanijo ¡ojjaña ojaya ejjashahuubaquijji jayojja jama jjashahuubaquicue! ¡A'a jjamimicuiajea nobiajeaquijji! ¡A'a peapea ejjashahuubaquijji ajjil! E'e, ¡ojee jjapeequicue quea bei nee Jesosa nijje! ¹²Miquianaya aje oe beca cuana jama poani ba'a: —Eya ca iña Pabo shajja'ajjajji poani.

Pea ca jama poani ba'a: —Eya ca iña Apono shajja'ajjajji.

Pea ca jama poani ba'a: —Eya ca iña Peno shajja'ajjajji.

Pea ca jama poani ba'a: —Eya ca iña Jesosa Quito shajja'ajjajji poani —nequiana poani, de.

¹³¿Apiojji acuae nequiana jamaya jjamimicuiajea nobiajeaquime poani so'o? ¡A'a Jesosa ojjañaja mimishi cuijea'yojji pojjeama? ¿A'a ojjaña jaahuanajji pojjeama? E'e, oya ojjaña ojaya epeejji cuanaja mimishi cuijea'yojji, ese jaahuanajji oe nei poani tii tii. Eya pojjeama miquianaja mimishijo manoje'yo. Jesosa Quito ca ca oe miquianajo mano'yonaje acui ecueata'apeejo miquianajaya mimishi cuijea'yojji. Onaaya miquianaya besa mee canaje Jesosa nijje jjapeequianijo, enije jjapeequianijo pojjeama. ¹⁴Jamajjeya eya, Pabo quea bihui poani ecuea miquianaya besa mee jjimajo. Jesosaja epeejji cuana oe pojji eyaya besa meenaje Quipo, Mayo pea'ai. ¹⁵E'e, eyaya oe pojji besa meenajejo, ejjamimicuiajea nobiajeaquijji pojjeama pea cuana nijje jama ba'a: —Pabohua ecuana besa mee canaje o shajja'ajjajji epoji —e'ajji pojjeama.

E'e, eyaya miquianaya besa meenaje ecuea epeejji epoji pojjeama.

¹⁶E'e pojja'a eyaya Etepana, ojaya huapa pojjeama cuana pea'ai besa meenaje. Oe pojji pea cuana besa meenaje pea'ai pojja'a. Cua'a de, pajea'yonaje eyaya. ¹⁷Jesosa Quitoja eya huoojea jjima ojaya epeejji cuana besa meeya. Chojja, ohuaya eya huoojea canaje ojaya esohui quea pame nee huohuiya jama ba'a: —Ecuea esohui quea pame nee huohuiña, ¡eya acui ecueata'apeejo mano'yonajejo oe huohuicue! ¡A'a dejjaja ejjashahuubaquijji jayojja jama huohuijji, ma ojaya ejjashahuubaquijji quea ja'a poso acanija! Jamaya ehuohui'yo jojjemo, miya quea sohui ja'a jojjemo ojjaña mi

bihuiajji pome. Jamajjeya jamaya ehuohui jojjemo Eyacuiñajji bihuia jjima acame. “Jesosa Quito acui ecueata'apeejo mano'yonaje ecuanaja mimishi cuijea'yojji” ajjima acame onaaya —jamaya Jesosaa eya huohui cani.

**Eyacuiñajji ejjashahuubaquijji esejaya
ejjashahuubaquijji jayojja jama pojjeama**

¹⁸ Eyacuiñajji esohui quea pame nee Jesosajo, oya mano'yonaje esejaya mimishijo shajja'ajja majje shajjama' cuana jama poanaje ba'a: —Cajaa Jesosaja esohui, ma oya ojjañaja mimishi cuijea'yojji poani; acui ecueata'apeejo mano'yonaje cajaa pea'ai —poanaje. Maya Eyacuiñajjiya quijje quea nee nee po mee caje'yo.

Eseyá, Jesosaja epeejji cuana ca ca Eyacuiñajjiya ba'e tiitii mee caje'yo. E'e, oja sohui shajja'ajja majje eseaya jama poani ba'a: —Eyacuiñajji quea ca'a nee neeya eseaya ba'e tiitii mee caje'yo onijje; oja Bacua Ejja Jesosa acui ecueata'apeejo mano'yonaje esejaya mimishi cuijea'yojji —poani.

¹⁹ E'e, yahuajo nei Eyacuiñajjiya Isaia tehue mee ca poa jama ba'a:

“Beca cuana jama poani ba'a: —Ecuea eba ojjaña —poani. O shajja'ajjajji poaniya pea'ai jama acani ba'a: —E'e de, ¡ojjaña ojaya eba! —poso acani. Ojjaña ojaya eba poso acani. Eyaya ca ca ojjaña cuana ba meeje ojaya eba oe pojji nei”.

Jamaya Eyacuiñajjiya yahuajo nei Isaia tehue mee ca poa.

²⁰ E'e, Eyacuiñajji ese jayojja jama jjashahuubaqui ajja. Ojjaña ba epo poso ohuaya ba cani quea sapa ca'a. E'e, dejja quea huiso esohui bajji, esohui huohuijji cuana, joya dejja cuanaja ejjashahuubaquijjiyo mimicuijanobiaeja cani pea'ai quea huiso ba epo poso Eyacuiñajjiya esohuiyo Jesosajo jjabahuejjaqui mee ajja jama ba'a: Eyacuiñajjiya eseaya ba cani emimishi cuijea'yo Jesosa nijje jjapeequianijo ma dejja cuanajaya ba jjima. Yajja jjabahuejjaqui meeme yajji, quea huiso ba epo poso oya jjabaquiani.

²¹ Eyacuiñajjiya ejjashahuubaquijji quea ja'a poanijo ohuaya eseaya ba'e tiitii mee caje onijje, Jesosa nijje jjapeequianijo, ojaya esohui shajja'ajja poquiañajo pea'ai. Ohuaya eya esohui quea pame nee Jesosajo huohui mee canaje. Jamatii ojjaña quea jjashahuubaqui quehua jama poani ba'a: —¿Yajja yajji joya miquianaaya huohuaña Jesosa mano'yonaje esejo, esejaya mimishi cuijea'yojji? Quea jjashahuubaqui quehua miya poani, de —jamaya Jesosaja epeejji pojjeama poani.

²² E'e de, ecuana Jodio cuaa jama acani ba'a: —¡Eyacuiñajjiya jayojja acue, ma dejja ajjima acani! Majoya ecuaaya miya baje e'e jojo nei Eyacuiñajjiya huoojea'yo ojaya esohui huohuijji —jamaya quea tai poani Jodio cuana.

—¡Esohui huohuijji quea huiso ba epo jayojja jama mimicue! Jamajjeya ecuaaya miya baje Eyacuiñajjiya huoojea'yo esohui huohuijji —jamaya quea tai poani Jodio pojjeama cuana.

²³ Ecuanaya ca ca jama poani ba'a: —Jesosa Quito Eyacuiñajjiya huoojea'yo ojjaña jaahuanajji acui ecueata'apeejo mano'yonaje eseja mimishi cuijea'yojji.

Jesosa Quitoja esohui shajja'ajja sa po ajja jjejojo Jodio cuana quea quene poani, poquiquehuani tii onijje jjapeequi ajja jjejojo. Jodio pojjeama cuaa pea'ai esohui cajaa acani: —Chojja Pabo, miyaya esohui quea ja'a pojjeama huohuiaña —jama siajje pomeya onaya poani.

²⁴Jamatii Eyacuiñajjiya Jodio cuana, Jodio pojjeama cuana pea'ai babaca canaje Jesosa Quitoja epeejji nei epo'yojji. Esejaya, Jesosa Quitoja epeejji cuanaja eba Jesosa Quitoja esohui quea pame nee. E'e, Eyacuiñajjiya Jesosa huoojea canaje mimishi cuijea'yojji. Jamajjeya esejaya eba Eyacuiñajji quea ca'a nee nee, ojjaña ojaya eba. ²⁵E'e, Eyacuiñajji quea jjashahuabaqui ja'a nee nee. Ojjaña nei nei ojaya eba. Oya quea ca'a nee nee; pea chama' o jayojja. Jamajjeya ohuaya eseya ba'e tiitii mee caje'yo Jesosa Quito acui ecueata'apeejo esejaya mimishijo mano'yonajejo. Matii Jesosaja epeejji pojjeama aje oe jama poani ba'a: —¿Yajja poajo acuae Eyacuiñajjiya ecuanaja mimishi cuijea ca'yome Jesosa mano'ya poajo? Chojja —acani quea quehua jjashahuabuiani jjejojo.

**Eyacuiñajjiya eseya babaca canaje ojaya epeejji
epoji jamatii onajaya eseya boti'ama**

²⁶Epeejji cuana, jjashahuubaquicue! Eyacuiñajjiya miquianaya Jesosa nijje jjapeequi meesahua jjimajo, ¿achajja miquianaya poanaje? Beshahua nei esohui ba po jjima. Beshahua nei ona huoojea po jjima, emeshi mese cuanaja bacua po jjima pea'ai miquianaya poanaje. ²⁷Jamatii Jesosaja epeejji pojjeamaa jama acani ba'a: —Jesosaja epeejji quea pame pojjeama. Oya cuana quea jjashahuabaqui ja'a pojjeama —jama posoya acani Jesosaja epeejji pojjeama cuaa.

Eyacuiñajjiya ca ca eseya babaca canaje ojaya epeejji epoji, quea huiso esohui ba epo ona quea bicho po meeji. Eyacuiñajji jama poani ba'a: —Jesosaja epeejji pojjeama quea pame pojjeama jjashahuabuiani —jamaya Eyacuiñajji poani.

²⁸E'e, Jesosaja epeejji pojjeamaa eseya niñe ba cani jama ba'a: —Jesosaja epeejji cuana ona huoojeajji jayojja pojjeama, esohui ba po jjima jayojja pea'ai, aema' pea'ai. ¿Ajeo oya cuana eshajja'ajjajji? —poani.

Jamatii Eyacuiñajjiya eseya iyaa ca poa ojaya ebabaca. Jamajjeya ohuaya onaya ba mee caje jama ba'a: —Miya ojjaña ba epo poso poanijo, miquianajaya ejjashahuubaquiji quea tai. Miquianaya quea pame pojjeama. ¡Quea bicho pocue! —Eyacuiñajjiya acani.

²⁹Jamajjeya ae pishana Eyacuiñajji nijje mimije jama ba'a:
—Eyacuiñajji, ¡bacue! Eya ca ca iña jamatii quea pame nee —jamaya emimijji pojjeama miya Eyacuiñajji nijje.

Quije pea'ai ojjaña Eyacuiñajji cojja nei nequi majje quea bicho, quea mete poaje. ³⁰Jamatii Eyacuiñajjiya eseya Jesosa Quito nijje jjapeequi meesahua ca'yonaje. Ojaya epeejji poanijo, ojaya ejjashahuubaquiji ba meesahua cani. Ojaya esohui jayojja jama ba'e meesahua cani. Mimishi cuijea'yo majje quea boeja po mee cani. Eseya ba'e tii tii mee caje'yo onijje, Eyacuiñajjiya. ³¹Yahuajo nei Eyacuiñajjiya esohui etehue'yo jama poa ba'a:

“Jamajjeya ¡esejaya Emeshi Mese nei bihuiacue! Oya oe nei quea pame nee. A'a jama pojji ba'a: —Eya ca ca iña jamatii quea pame nee”. Jamaya Eyacuiñajjija esohui etehue'yo poa.

Jesosa Quito acui ecueata'apeejo mano'yonaje

2 ¹Ecuea epeejji cuana, yahuajo miquiana que poe jeahuaa eyaya esohui quea pame Jesosajo huohuinaje. Eya jama po jjima ba'a: —Eya ohueya dejja ojjaña esohui ba epo nei nei. Ecuea emimi quea ja'a. ¡Jamajjeya shajja'ajjacie mo! —jamaya ajjima ecuea.

Chojja, miquiana que poe majje eyaya Eyacuiñajjija esohui e'e nei Jesosa Quitojo huohuinaje, ma onajaya yahuajo ba jjima poa. ²Miquiana que poe jjimahua eya jjashahuabaquinaje jama ba'a: —Eyaya Conitojo ba'e cuana huohuije esohui quea pame nee Jesosa Quitojo, ma acui ecueata'a peejo mano'yonaje esejaya mimishi cuijea'yoji. Pea esohui huohui jjima aje.

³Miquiana que poe majje eya jjashahuaba neineiquinaje jama ba'a: —¿A'a eyaya Eyacuiñajjija esohui huohuije quea ja'a nee pojja'a? —eya quea mete poanaje.

⁴Jamajjeya Edojjoshahua Pame quea ca'a neeya eya huohui meesahua canaje esohui e'e nei miquianajaya eshajja'ajjajji. Esohui huohuijji ojjaña ba epohua jayojja jama ecuea huohui jjima. ⁵Jamajjeya Eyacuiñajjija miquianaya Jesosa Quito nijje jjapeequi meesahua canajejo, ojaya epeejji nei poanaje. Dejja ojjaña esohui ba epohua jama ecuea huohui jjima.

Eyacuiñajjija ejjashahuabaquijji e'e jojo nei quea ja'a nee

⁶Jamatii Jesosaja epeejji eyacua pojjeama eyaya huohuaña; etii jayojja eyaya huohuaña esohui quea ja'a nee, Eyacuiñajjija ejjashahuabaquijji. Jesosaja epeejji pojjeamaja esohui jayojja jama pojjeama, emeshi mese cuanaja esohui jayojja jama pojjeama eyaya esohui huohuaña, eshahuaja esohui jayojja jama pojjeama pea'ai. Maya quijje ojjaña ca'a'ama poaje. Eyacuiñajjija oya cuana ona huoojeajji popajea mee caje'yo.

⁷E'e, ojjaña nei nei Eyacuiñajjija eba. Eyaya Eyacuiñajjija ejjashahuabaquijji quea ja'a nee Jesosa Quitojo huohuaña. Yahuajo maya ejjashahuabaquijji ba mee jjima ojjaña, Eyacuiñajjija. Jjeya ca ca ohuaya eseya, ojaya ehuoojea'yo cuana ba mee canaje jama ba'a: Meshi pana jjimahuajo tii Eyacuiñajjija eseya babaca ca poa Jesosaja epeejji cuana epo'yiji, onijje eba'e tiitii'yoji. Jesosa Quitohua mano'yo majje oja epeejji cuana ba'e tiitii mee caje'yo quea pame nee onijje. Jamaya Eyacuiñajjija jjashahuabaquia poa. ⁸Maya Jodio pojjeamaja emeshi meseja ba jjima poa; Jodio etii cuanaja ba jjima pea'ai poa. Maya onajaya eba jojjemo Emeshi Mese nei quea ca'a Jesosa Quito bajjani acui ecueata'a peejo mano mee'yo jjima aca quiaye. ⁹Jamatii Eyacuiñajjija yahuajo nei esohui tehue mee ca poa jama ba'a:

“Oya esejaya quea jea neejo, Eyacuiñajjija eseya quea pame nee acaje'yo, ojjaña ojaya epeejji cuana. Maya esejaya ba jjima ecojjaja, maya esejaya shajja'ajja jjima eshajjaja, huohui jjima pea'ai.

Maya eseya jjashahuabaqui jjima pe'a'i. Eseyá ohuaya quea pame nee nee acaje'yo".

Yahuajo nei jamaya tehue mee ca poa. ¹⁰ Maya Edojjoshahua Pameya eseya ba mee cani: Eyacuiñajjiya quea pame nee acani esejo, ma Jesosa Quitohua ojaya epeejji cuana ba'e tiitii mee caje'yo onijje eyajo.

Ojjaña Edojjoshahua Pameja eba. Jamajjeya ese que dobiqui majje ohuaya eseya ba mee cani Eyacuiñajjiya ejjashahuabaquijji. ¹¹ ¿Ajea eba oe dejaja ejjashahuabaquijji? Ojaya eba ojaye nei ojaya ejjashahuabaquijji, onajaya ba jjima. Oya jayojjaya Edojjoshahua Pameja eba Eyacuiñajjiya ejjashahuabaquijji, ojaye neija. Eyacuiñajjiya eseya ba'e tiitii mee caje'yo Jesosa nijje jjapeequianijo ojaya eba nei. ¹² E'e, eseya Jesosaja epeejji poanijo shajjama' jayojja jama jjashahuabaqui ajja. Jamajjeya Eyacuiñajjiya Edojjoshahua Pame ese que dobiqui mee canaje. Ohuaya eseya ba mee canaje jama ba'a: Jesosaja epeejji poanijo ca ca oe Eyacuiñajjiya eseya ba'e tiitii mee caje'yo onijje, eseya ojaya quea jea neejo. Quea pame nee eseya acaje'yo pe'a'i ohuaya. ¹³ Jamajjeya Jesosaja epeejji pojjeamaja esohui jayojja jama esejaya ehuhuijji pojjeama. Chojja, Edojjoshahua Pameya eseya huohui meesahua cani ojaya ejjashahuabaquijji quea ja'a Jesosaja epeejji nei cuana huasijke.

¹⁴ Jamatii Jesosaja epeejji pojjeamaja ba jjima Edojjoshahua Pame. Ba meemee ajja Edojjoshahua Pameja ejjashahuabaquijji, quea quehua nee ojaya. Jamajjeya jama poani ba'a: —¿Apiojji Jesosa nijje jjapeequijji? Maya ecuanajaya esohui quea quehua —jamaya poani.

E'e, ojaya jamatii ebajji pojjeama Jesosa Quitoja esohui. Maya Edojjoshahua Pameya eseya ba mee cani. ¹⁵ Eseyá ca ca Jesosaja epeejji poani. Edojjoshahua Pameya ese que dobiqui majje ba mee cani ojjaña eba'eiji quea pame; eba'eiji quea mimishi pe'a'i ba mee cani jama ba'a: —E'e, jamaya. ¡Quea pame nee acuel! —amee cani—. Pea'ai quea tai jjashahuabaquianijo, ohuaya jama amee cani ba'a: —Chojja, jamaya quea tai, Eyacuiñajjiya boti'ama —ameesahua cani pe'a'i ojjaña quea ja'a eba'eiji.

Maya onajaya quea quehua nee nee. Jamajjeya Jesosaja epeejji pojjeamaja ojaya epeejji eniñebajji pojjeama jama ba'a: —¿Apiojji miquianaya jama ba'yani? ¿Apiojji ma esohui shajja'ajjaña, huohuaña pe'a'i? —jamaya e'ajji pojjeama onajaya.

¹⁶ E'e, yahuajo Eyacuiñajjiya esohui etehue'yo jama poa ba'a:

“Ojjaña Eyacuiñajjiya ejjashahuabaquijji ¿ajea eba? Chama'. ¿A'a eseyaya Eyacuiñajji ba meesahua? Chojja”.

Jamaya yahuajo nei poa.

Jamatii Jesosa nijje jjapeequianijo, Edojjoshahua Pameya eseya Eyacuiñajjiya ejjashahuabaquijji ba meesahua cani.

Pabohua Jesosaja epeejji jjabahuejjaqui mee cani

3 ¹Ecuea epeejji cuana, miquianaya ebacua esho'i jayojja jama poani, quea jjashahuabaqui ja'a pojjeama poani tii tii. E'e, yahuajo miquiana nijje

nequiya eyaya Jesosa Quitoja huohuinaje. Jamatii beshahua nei miquianaya jjashajja'ajjaqui ajja. Jesosa nijje jjapee neineiqui jjima jayojja jama poani; ojaya epeejji pojjeama jama poani. ²Jiquio ecua ebacua esho'i toijo ba'e noe quia jjima acani jayojja jama ecuea miquianaya huohui jjima esohui quea ja'a nee quea camaja ebajji. Jjeya pea'ai miquianaya Jesosaja epeejji etii jayojja jama pojjeamajo ma esohujo jjashajja'ajjaqui ajja. ³Miquianaaya aje oe Jesosaja epeejji pojjeamaa jayojja tiiya aña. E'e, Jesosaja pea epeejji cuanaja esohui shajja'ajja sa po'yo ajja. Jjamimicuiajea nobiajeaquiani. Jamaya poanijo miquianaya Jesosaja epeejji quea ja'a pojjeama. Ojaya epeejji pojjeama jama poani, de. ⁴E'e, miquianaya aje oe jama poani ba'a: —Eya ca iña Pabo shajja'ajjajji poani.

Beca ca jama poani ba'a: —Eya ca ca Apono shajja'ajjajji.

Jamaya poanijo Jesosaja epeejji quea ja'a nee jama jjashahuubaqui ajja miquianaya, de.

Ecuana Apono nijje Jesosaa huoojea ca'yonaje ojaya esohui huohuijji epoji

⁵Eya, Pabo Apono jayojja Jesosaja esohui huohuijji. Ohuaya ecuana huoojea ca'yonaje ojaya esohui huohuiya. Jamajjeya miquianaya Jesosa nijje jjapeequi'yonaje ecuanaja esohui shajja'ajja majje. E'e, Eyacuiñajjiya ojjaña ecuana chaco mee cani. Ojaya esohui jama poani eya. Ojaya esohui jayojja jama acani Aponohua pea'ai. ⁶Eyaya Eyacuiñajjiya esohui huohui coonaje miquiana huasijje. Aponohua ma esohui huohui ca o'oyanaje. Eyacuiñajjiya ca ca oe miquianaya ojaya esohui ba meesahua ca'yonaje. E'e, jiquio ecua acui sisi banajjiya bana cani jayojja jama eyaya, Pabohua Eyacuiñajjiya esohui huohui coonaje miquiana huasijje. Echacojjiya acui sisi ebana'yo enaa sha cani jayojja jama Aponohua esohui huohui ca o'oyanaje miquianajaya eshajja'ajjajji. ⁷Esohui huohui cooijiya, esohui huohui o'oyajjiya pea'aiya ishoa'ajja cani esohui huohui majje. Eyacuiñajjiya ohuaye nei ojaya esohui ba meesahua cani. E'e, jiquio ecua acui sisi banajjiya, acui sisi shajjiya pea'ai chaco majje ishoa'ajja cani a'a acui tiiye'yo ebajji jayojja jama Eyacuiñajjiya ohuaye nei acui sisi jayojja tii mee cani. ⁸Ebanajji epo acui sisi shajji jayojja jama jjashahuubaquiani jama ba'a: —Eya quea pame nee chaco majje, e'acui yiye meseya eya sosequia caje —jjashahuubaquiani cuana.

E'e jojo nei e'acui yiye meseya jamaya acaje'yo. ⁹Miquianaya Eyacuiñajjiya acui yiye jayojja. E'acui yiye mese jamaa Eyacuiñajjiya miquianaya quea pame nee jaahuana cani. Jiquio ecua acui yiye chacojji jamaya ecuanaya Apono nijje Eyacuiñajjiya echacojji poani; miquiana que ojaya esohui huohuiña.

Jesosaja epeejji cuana Eyacuiñajjiya equi jayojja

Jiquio ecua e'equi meseya oja equi jaahuana cani jayojja jama Eyacuiñajjiya miquianaya jaahuana cani, ojjaña. ¹⁰Eyacuiñajjiya Jesosa Quito equi yamajjana quea ca'a nee jayojja jama nequi mee cani. Ecuana Apono nijje Eyacuiñajjiya equi iyajji jayojja jama poani. Jiquio ecua echacojjiya equi iya cani eyamajjana nequia majje equi e'oquejji pojjeama jayojja jama ecuanaaya

Jesosaja esohui huohuaña, miquianaya nahueaña pea'ai Jesosa nijje ejjapeequi meesahuajji, quea nee nee epojji pojjeama cuaquijo. Eyacuiñajjiya eya huoojea majje quea ca'a po mee canaje ojaya esohui pea cuana huasijje ehuohui cooiji. Jamajjeya eya equi yamajjana nequiajji jayojja poanaje. Jjeya pea cuaa miquianaya esohui huohui cani e chamajo. Oya equi iyajeyoiji jayojja jama poani. ¡Miquiana quea ja'a nee nee casohuihuohui cahua!

¹¹ Yahuajo Eyacuiñajjiya Jesosa Quito jiquio meshi cuana huasijje huoojea majje eseaya huohui canaje jama ba'a: —A'a pea nijje jjapeequijji! ¡Ecuea Ebacua Ejja oe neija esohui shajja'ajjacue! —acanaje.

Equi iyajjiya eyamajjana quea ca'a nequia cani jayojja jama equi nequi tiiti mee'yojji jayojja jama Eyacuiñajjiya oja Bacua oe nei huoojea canaje ese ba'e tiiti meeya. ¡Oya oe shajja'ajjacue! ¹²E'e, esohui huohuijji cuana equi iyajji jayojja. Beca equi iyajjiya equi quea ca'a nee iya cani. Iya cani mei huo'o, mei oshe quea siyo, mei copo quea siyo nee nee pojja'a. Pea cuaa equi iya cani ca'a'ama; acui equi, bequiboa iña, huenihueni equi pojja'a. Jamaya esohui huohuijji quea hueaa acani. ¹³Quijje cuaqi poeyajo, equi quiyo'yajo, ojaañaña ba cajeache equi iyajji quea pameya equi quea ca'a nee iya canaje,ache equi iyajji quea hueaa equi ca'a'ama iya canaje pealai. Oya jayojjaya Jesosa Quitohua poe o'oya majje huohui caje jama ba'a: —Ma esohui huohuijji quea pameya esohui e'e nei huohui canaje. Jamajjeya o shajja'ajjajji cuana enijje jjapeequi pajea jjima acaje. Maya esohui huohuijji quea hueaa poanaje; quea tai esohui huohui canajejo, o shajja'ajjajji cuana enijje jjapeequi pajea'yonaje.

¹⁴Jiquio ecua cuaqi poeyajo, equi iyajji quea ja'aja equi nequije quea ca'a jayojja jama Jesosa poe o'oyajo, esohui huohuijji quea ja'a nee Eyacuiñajjiya sosequia caje quea pame nee, oja chaco quea pame sosejje. ¹⁵Equi iyajji quea hueaja ca ca oja equi quiyo jeyojoye'yo cuaqi poe'yajo jayojja jama poaje esohui huohuijji quea hueaa, Jesosa poe o'oyajo. Eyacuiñajjiya oya cuana esosequiajji pojjeama. Jamatii equi jiji'yajo dejja cuayajequinanani equiyo'yo poajejje jayojja jama oya cuana cuaquijo quiyo'yo aija poaje'yo, beshahua nei.

Miquianaya Eyacuiñajjiya equi ;a'a quea mimishi ajji!

¹⁶Ecuea epeejji cuana Conitojo ba'e, ;a'a pajea'yojji eseaya Eyacuiñajjiya equi jayojja! Edojoshahua Pame nei ese que dobiquinaje Jesosaja epeejji poanijo. Oya miquianaya nijje anijo, miquianaya Eyacuiñajjiya equi jayojja poanaje. ¹⁷Eyacuiñajjiya ojaya equi quea nahue nee: —Ecuea equi quea pame nee, jehue'ama. Miquianaya ecuea equi jayojja poanaje. Jamajjeya ecuea equi, miquea eyami, nahue ajjajo, quea mimishi poanijo eyaya miquianaya tecueaje —ohuaya acanaje.

;Eyacuiñajjiya ejjashahuabaquijji quea ja'a bacue, dejjaja pojjeama!

¹⁸Ecuea epeejji cuana, ;a'a quea jjashahuabaqui quehua pojji! Miquianaya beca cuana jama poani ba'a: —Ecuana quea jjashahuabaqui ja'a poani, dejja ojjaña ba epo jayojja jama poani.

Chojja. ¡Jjashahuubaquicue jama ba'a: —Eyacuiñajji, ecuea eba oe pojji nei. ¡Eya ba meesahuacue miquea ejjashahuubaquijji quea ja'a nee! —jamaya oya acue!

¹⁹ Jesosaja epeejji pojjeama quea huiso jamaya jjashahuubaquiani ba'a: —Ojjaña ecuanaja eba quea ja'a nee nee.

Eyacuiñajjiya ca ca onajaya ejjashahuubaquijjiyo jama poani ba'a: —Oya cuana quea quehua jjashahuubaquiani, quea ja'a pojjeama, cajaa —oya poani.

E'e, Eyacuiñajjiya esohui etehue'yo yahuajo nei jama poa ba'a:

“Quea huiso jiquio meshi cuanajo ba'e jjashahuaba taiquiani jama ba'a: —Ecuanaja ejjashahuubaquijji quea ja'a nee poani —poso oya poani. Chojja, oya cuana jjadasiaquijji poanijo, eyaya oya jjadasiaqui pajea meeje'yo”.

Jamaya aca poa Eyacuiñajjiya oja sohui etehue'yojo.

²⁰ Eyacuiñajjiya pea esohui yahuajo nei etehue'yo jama poa ba'a:

“Eya oe nei quea jjashahuabaqui ja'a; jjadasia meequi ajja pea'ai.

Dejja cuana chojja, ojjaña ejjashahuubaquijji quea ja'a pojjeama”.

Jamaya yahuajo nei nei tehue mee ca poa.

²¹ Jamajjeya ja'a jama pojji ba'a: —Ma esohui huohuijjija ejjashahuubaquijji quea ja'a nee. Oya cajjashahuubaquiahu —a'a pojji!

¡Bacue! Jesosa Quito miquea Emeshe Mese nei. Ohuaya ojjaña esohui huohuijjija huoojea canaje miquiana onijje jjapeequi meesahuaa. ¡Jamajjeya shajja'ajjacue! ²²E'e, Eyacuiñajjiya ojaya esohui huohuijjija huoojea canaje miquiana huasijje. Ohuaya eya, Pabo ebionei huoojea canaje. Apono, Peno pea'ai huoojea canaje. Ohuaya ojjaña aquiana pana ca poa miquianajaya quea pame nee ejaahtuanaji. Miya eshe ani ohuaya jaahuana cani; mano'yajo pea'ai jaahuana caje'yo quea pame nee. Ohuaya jjeyahua nei miquianaya jaahuana cani. Quijje nei miquianaya jaahuana caje'yo tii tii pea'ai, Eyacuiñajjiya. E'e, Jesosaja epeejji poanijo miquianaya e'quiana mese jayojja jama poani. ²³Eyacuiñajji Jesosa Quitoja Chii. Miquianaya Jesosa Quitoja epeejji cuana. Jamajjeya ojjaña Eyacuiñajjiya aquiana quea pame nee miquianajaya poani.

¡A'a Jesosaja huoojea'yo esohui huohuijjiji niñebajji!

4 ¹ ¡Epeejji cuana, ecuana shajja'ajjacue! Eyacuiñajjiya ecuana huoojea ca'yonaje esohui e'e nei Jesosa Quitoja huohuiya, ma yahuajo nei onajaya ba mee jjima poa. ² ¡Bacue! jiquio ecua echacojiya o huoojeajji shajja'ajja cani jayojja jama ecuaaya aña. Jamajjeya ohua huoojea cajje ecuaaya Eyacuiñajjiya esohui huohuiña, onajaya esohui pojjeama. Esohui quea pame nee Jesosa Quitoja ehuohui pajea'yoji pojjeama. ³ Jamajjeya ecuea miquianaya eshajja'ajjajji pojjeama ejo jama poani ba'a: —Pabohua quea ja'a nee huohui cani —poani—. Pabohua quea ja'a pojjeama huohui cani —miquiaa ajje, eyaya eshajja'ajjajji pojjeama pea'ai. Onaa jama ejo huohui cajje pea'ai eyaya eshajja'ajja'yoji pojjeama.

Eya pea'ai ecue huohuijo jjashahuabaqui ajja jama ba'a: —E'e pojja'a ecuea ehuohui quea ja'a nee; e'e pojja'a quea ja'a pishana —jamaya eya jjashahuabaqui ajja pea'ai.

⁴E'e, eya jjashahuabaquiani jama ba'a: —Eyaya Jesosa Quitoja chacoaña quea pame nee.

E'e pojja'a. Eyacuiñajjiya ojaya ejjashahuabaquijji ejo, eya chacoañajo cahuohui cahua quijke. ⁵Jamajjeya ecuanaja ejjashahuabaquijji, ojjaña ecuaaya anaje pea'ai miquianajaya ba jjimajo, ja'a ecuanaya niñebajji! ¡Ishoa socue oe Jesosa Quitoja epoe o'oyajjijo! Majoya ohuaya, esejaya Emeshi Mese neiya ojjaña cuanaja ejjashahuabaquijji, ojjaña quehuajje acanaje pea'ai ba mee caje. Ojjaña shajja'ajja caje. Majoya eseya quea pame nee anajejo, Eyacuiñajji quea bihui nee poaje: —E'e, jamaya. Miya Jesosaja epeejji quea ja'a nee; quea pame nee ojo chaconaje —eseya acaje ohuaya.

¡Esohui huohuijji cuana pea jayojjaya quea jea ameya acue!

⁶E'e epeejji cuana, miquiana jjabahuejjaqui meeji eyaya tehueaña Aponojo, ejo pea'ai. Eyacuiñajjiya esohui jama poa ba'a: “¡Oe epeejji quea boti, pea epeejji boti'ama a'a aiji!” Jamaya esohui etehue'yo poa.

Jamajjeya ja'a jama aiji ba'a: —Aponohua quea pame nee acani; Pabohua ca ca quea pame pishana acani —a'a pojji!

¡Ojjaña Jesosaja esohui huohuijji pea jayojjaya oe acue! Jamajjeya miquianaaya ma esohui etehue'yo jayojja jama e'e jojo nei aje. ⁷E'e, Eyacuiñajjiya ojjaña Jesosaja epeejji pea jayojjaya ba cani. Ohuaya oe epeejji pea epeejji jayojjaya acani. Jamajjeya ja'a jjashahuabaquijji jama ba'a: —Eya ca iña quea pame nee. Pea cuana quea pame pishana —a'a jamaya jjashahuabaquijji!

Miquianaya ca mi ca oe Eyacuiñajjiya esohui jamattii ba epo poso poani. Chojja, ojaya esohui miquianajaya ebajji pojjeama jamatii. Eyacuiñajjiya esohui huohuijji miquiana huasijje esohui huohui mee majamaja canaje. ⁸Miquianaya ca mi ca oe jama poso jjabaquiani ba'a: —Ecuana ca ca oe Jesosaja esohui jayojja jama ba'yani quea pame nee —poso jjabaquiani quiana—. Quea huiso ecuanajaya eba —nequiana poani pea'ai—. Ecuana ca ca ona huoojea'yoji poani Eyacuiñajji nijje. Pabo chojja, ona huoojeajji pojjeama —jamaya poso poani miquianaya.

Miquianaya Eyacuiñajji nijje ona huoojea'yoji e'e jojo nei jojjemo miquianajo eya quea bihui nee pome. Jamaya e'e jojo nei jojjemo ecuana miquiana nijje ona huoojea'yoji pome pea'ai.

¡Jjashahuabaquicue ecuana quea nee poanaje miquiana sohui huohuijji!

⁹Eyacuiñajjiya ecuana huoojea canaje ojaya esohui huohuiya. Jamatii ojaya eba ecuana shajja'ajja majje ojjaña soadojo cani jama ba'a: —¿Apiojji shai oya cuana shajja'ajjaje so'o, de? ¡Cua'a, oya cuana quecuajeacue! Ojjaña oya cuana quea tai —jamaya onaya siajje poani.

Ecuana ca ca jjashahuabaquiani jama ba'a: —E'e de, ojjaña meshijo ba'eca cuaa ecuana soadojo cani, ojjaña eyajo aniya pea'ai.

¹⁰E'e, Jesosa nijje jjapeequianijo, Jesosaja epeejji pojjeama cuaa ecuana niñepoqui poso acani. Miquianaya ca ca ojjaña ba epo poso acani cuaa. Jesosaja epeejji pojjeama cuaa ecuana ona huoojea'yojji jayojja jama pojjeama poso acani. Miquianaya ca ca ona huoojea'yojji jayojja jama acani. Onaaya ecuana shajja'ajja jjima acani. Jamatii miquianaya shajja'ajja cani. ¹¹E'e, jjeyahua nei ecuana Jesosa Quitojo mimianijo quea nee poani; ojjaña pojajao quea shoe poani. Quea naba taja poani. Daqui chiichiiani ecuanaja. Pea cuaa ecuana cuia cani Jesosa nijje jjapeequianijo. Ecuana poqui majamajani ojjaña cuiñajji yasijje quima' jayojja ecuana. ¹²E'e, ecuaaya bobijo janobajjima nei chacoaña. Pea cuana mimijaiyajo, ecuanaaya mimisaja'la jjima aña. Jama poani ba'a: —Eyacuiñajjiya miquianaya cajaahuana cahua —ecuaaya dejja quea tecue aña.

Jesosa nijje jjapeequianijo, pea cuaa ecuana napa cani. Jamatii quea quene po ajja. Jesosa nijje jjapeequi pajea'yo ajja pea'ai. ¹³Pea cuaa niñeba cajje ecuaaya esohui quea beiya saja'aña. Jjeya pea'ai pea cuana ecuanajo quea tai mimiani jama ba'a: —Oya cuana Jesosaja epeejji cuana, cajaa. Shabo jama, caquishijeahua —poani.

¡E jayojja jama pocue Jesosa nijje jjapeequianijo! —Pabohua aca poa

¹⁴Ecuea epeejji cuana, eyaya jiquio esohui tehueaña miquiana quea yeno po meeji pojjeama. Miquianaya ecuea ebacua jayojja jama poanijo, jjabahuejjaqui mee sa aña. ¹⁵Esohui quea pame nee Jesosa Quitoja eyaya huohuinaje miquiana huasijje. Ecuea esohuijo miquianaya ojaya epeejji poanaje. Jamajjeya eya oe nee mique chii jayojja jama poanaje. E'e pojal'a Jesosa Quitoja sohuihuohuijji quea huiso nee poeje miquiana sohuihuohuiya. Sico meemee ajja pojal'a, quea huiso nee nee. Jamatii eyaya ebionei miquiana huasijje esohui huohuinajejo miquianajaya chii jayojja poanaje. ¹⁶¡Jamajjeya ecuea esohui shajja'ajja socue! ¡E jayojja jama pocue!

¹⁷Jamajjeya eyaya Jesosaja epeejji Timoteo huoojeaje miquiana quea pame ba'e meesahuaa. Timoteo ecuea quea jea nee, Jesosaja epeejji quea ja'a nee poani. Ecuea eba'ejjijo, ecuea esohui Jesosa Quitojo pea'ai ohuaya huohui caje o'oya miquianajaya epajea'yojji pojjeama, ma eyaya ojjaña Jesosaja epeejji cuana ojjaña cuiñajjijo ba'e yasijje huohuaña.

¹⁸Miquianaya beca cuana shajjama' poani ojjaña miquea eba poso poanijo. Ecuea esohui shajja'ajja sa po'yo ajja. Jjashahuabaquiani jama ba'a: —Pabo poe ajja ecuana baa —poani.

¹⁹E'e pojjal'a Eyacuiñajjiya eya huoojea caje'yo Conito huasijje, miquiana huasijje quijje pishana. Shajjama' cuanaja esohui shajja'ajja maja sa po ajja eya. ¿A'a oya cuana Jesosa nijje jjapeequiani e'e jojo nei? ¿A'a Eyacuiñajjiya oya cuana ojaya esohui huohui meesahua cani quea ja'a nee? Maya eyaya ba sa aña. ²⁰E'e, quea huiso esohui mimi majamaja majje e'e pojjal'a jamatii

Jesosaja epeejji pojjeama pojja'a nequiana. Jesosa nijje quea pame nee jjapeequianijo ca ca Eyacuiñajjiya eseya ba'e tiitii mee caje'yo onijje eyajo.

²¹E'e, eya poeje'yo miquiana baa. Shajjama' poani tii, tecueajeaje'yo. Ecuea etehue'yo jayojja jama poanijo, eya quea bihui nee, quea bei nee poaje. Jamajjeya ¡ecuea esohui shajja'ajjacue, eya miquiana nijje quea bei epoji!

¡Jesosaja epeejji quea mimishi poani beibeiya tecueacue!

5 ¹Jesosaja epeejji Conitojo ba'eya eya huohui cañanaje jama ba'a: —Pabo, oe dejaa Conitojo ba'eya oja shanase cojo cani, Jesosaja epeejjiya, de —acanaje.

Jamaya quea tai nee nee. Eyacuiñajjiya boti'ama nei nei. Jesosaja epeejji pojjeama jama po ajja, quea mete oya cuana. ²Jamatii miquianaya aje oe bicho'ama jjejojo jama poani ba'a: —Ecuanaya quea pame nee ba'e —nisho poani.

¡Oe epeejji quea mimishi nee poanijo, quea yeno pocue! Ma dejja oja mimishijo yeno'ama po jjimajo, ¡a'a onijje jjapeequijji! ¡Jesosaja epeejji cuana nijje a'a dobiqui meejjil!

—¡A'a ecuana nijje Eyacuiñajjiya equi yasijje dobiquijji! Eyacuiñajjiya miya eshajja'ajjajji pojjeama —oya acue.

³Eya quea huesha nee yani; miquiana nijje nequi meemee ajja. Matatii miquianajo jjashahuuba majamajaquiani tii. ¡Eya Jesosaja epeejji etii ojaya ehuoojea'yo poanijo, shajja'ajjacue mo! Ecuea ejjashahuubaquijji ma dejja quea mimishijo jama ba'a: —Oya quea mimishi poanijo, ¡quea bicho nee po meecue! —eyaya miquiana nijje nequiya jjemo jamaya huohuime.

⁴Jamajjeya miquianaya Eyacuiñajjiya equi yasijje ojee poe majje, Jesosa Quito esejaya Emeshi Mese nei miquiana nijje anije, miquiana quea jjashahuubaqui ja'a po meeji ojaya esohui jayojja jama ameesahua caje. Eya pealai miquiana nijje jjashahuubaquianijo miquiana nijje nequi jayojja poaje. ⁵Jamajjeya ojee poe majje ¡ma dejja mimishi tecueacue jama ba'a: —¡Edosiquiana mi huoojeajji poaniya miya canapa cahua! —jamaya acue oja mimishijo quea yeno epoji!

Quea yeno po majje oja mimishi pajea caje'yo. Manoje'yo pojja'a. Matatii esejaya Emeshi Mese neiya Jesosaa poe o'oya majje ma dejja huoojea ajja cuaqui yasijje, ca ohua mimishi pajea ca'yajo.

⁶Dejja quea mimishi miquiana nijje jjapeequianijo, matatii miquianaya bicho'ama poanaje. Jamaya quea tai. Miquianajaya eba jiquio esohui jama ba'a: “Oe pojji neiya pahui shejjeemeejjija iñahuahuo cajje pahui shejje mee cani” jamaya onaaya huohui cani. ⁷E'e, mimishi eshejjeemeejjima' jayojja jama poani. Oe dejja quea mimishi minijje ojee jjapeequianiya ojaña quea mimishi po mee caje o jayojjaya. ¡Mimishi cajaa acue, ojjaña! Jamajjeya miquianaya quea mimishi po ajja, pahui eshejjeemeejjima' jayojja poaje. E'e, yahuajo nei Jodio cuaa Ejito meshijo nequiya ñajjajja cuia cal'a poa ebacua cuana emanoyojji pojjeamajo jama jayojjaya Eyacuiñajjiya Jesosa Quito esejo mano mee cal'yonaje

eseya onijke eba'e tiitii'yoji. ⁸E'e, Jodio cuana pahui eshejjemeejjima' ojee ijija cani Eyacuiñajjiya etiiquianaja ebacua cuana mano mee'yo jjima aca poa shahuaba'yoji. Jamaya jayojja Jesosa esejo mano'yonajejo, eseya caba'yahua mimishi'ama e'e jojo nei. E'e, jamaya ba'yanijo Jesosa eseja mimishijo mano'yonaje esejaya epajea'yoji pojjeama. Jamajjeya jiquio ecua Jodio cuaa ñajajjaja cui'a'yo majje ojee ijija cani jayojja, etiiquianaja bacua cuana mano mee'yo jjima aca poa shahuaba'yoji jayojja jama eseyaya aña Jesosajo.

⁹Yahuajo pishana eyaya miquiana huasijje pea esohui etehue'yo huoojeanaje. Ma etehue'yojo eyaya jama huohuinaje ba'a: —¡Jesosaja epeejji quea mimishi nee poani nijje a'a jjapeequijji! ¡Joya pea cojjoji nijje a'a jjapeequijji! ¡Ona napajji nijje, quea mimishi jjashahuabaquiani nijje pea'ai a'a jjapeequijji! —eyaya miquiana huasijje tehuenejaje.

¹⁰Eyaya jamaya tehuenejaje Jesosaja epeejji quea mimishijo. Jesosaja epeejji pojjeamajo jamaya tehue jjima. E'e, mimishi cuana quea huiso nee yani: Quea nahue poani, sii poani, eshahua nijje mimiani pea'ai. Jamajjeya dejja mimishi pejjejo ba'e sa po'yo ajjajo jiquio meshijo ba'e meemee ajja. ¿Achejo dejja mimishi chama' huasijje eba'ejji? ¹¹Beca cuana ca ca jama po nishoani ba'a: —Epeejji cuana, eya Jesosaja epeejji pea'ai —poani. Jamatii oya cuana aje oe quea mimishi poani: Pea cojjoji poani, quea dejja tai, quea nishehui poani, quea mimijjequijea poani, meshi epanta bihuia cani, ishi'ishiani, sii poani, shajjama' poani pea'ai. ¡Jesosaja epeejji jama poajo, onijke a'a jjapeequijji, a'a anioquejji e'ijjia'ijjiajji!

¹²Eyacuiñajjiya eya huoojea jjima Jesosaja epeejji pojjeama tecueaa jama ba'a: —¡Miquianaya quea ja'a pojjeama ba'yanijo quea nee nee poaje!

¡Eyacuiñajjiya ca ca oya cuana catecueajea cahua! Ohuaya ecuana huoojea canaje Jesosaja epeejji quea mimishi cuana jjabahuejjaqui meeya. ¹³Jamajjeya Jesosaja epeejji miquiana nijje nequi quea mimishi poajo, ¡niñeshe'acue: —Miya quea ja'a pojjeama poani —oya acue!

Jamajjeya ¡Eyacuiñajjiya esohui yahuajo tehue'yo jayojja jama acue! Yahuajo nei nei jama poa ba'a:

“Ecuea epeejji quea mimishi poanijo, ¡a'a miquiana nijje nequi meeiji, ecuea epeejji cuana nijje! ¡Huoojeacuayajea'yocue esecue yasijje!”

Jamaya yahuajo nei Eyacuiñajjiya esohui etehue'yo poa.

**¡A'a epeejji cuana dojodzi dejja etii yasijje ca
Jesosaja epeejji pojjeama huasijje!**

6 ¹Miquianaya Jesosaja epeejji poanijo ecuea huapa pojjeama cuana poani. Jamajjeya Jesosaja epeejji nijje quea quene po majje Jesosaja epeejji pojjeama huasijje dejja etii yasijje ¡a'a oya dojodzi ojaya ejjashahuabaquijji baa! Chojja. ¡Jesosaja epeejji etii yasijje poquicue! Eyacuiñajjiya ojaya epeejji etii huohui meesahua caje quea ja'a nee ojjaña quea bei epo meeiji. ²E'e, eseya Jesosaja epeejji cuana quijje onijke ona huoojeajji poaje. Jamajjeya ijjeyahua

nei ojjaña ojaya epeejji cuana quea bei po meesahuacue pea epeejji cuana nijje! ¡O huoojea'yojji nei jayojja jama oya cuana quea pame nee ameesahuacue! ³E'e, Jesosa poe o'oyajo, eseya esohuidojiji eyajo nequi huoojea'yojji poaje'yo onijke pe'a'i. Jamajjeya jiquio meshijo nequiya ¡Jesosaja epeejji pea cuana nijje jjamimicuiajea nobiajeaquiani quea bei po meecue! ¡Oya cuana shajja'ajja majje quea ja'a nee huohuicue! ⁴Jamajjeya Jesosaja epeejji nijje jjamimicuiajea nobiajeaqui majje ja'a poquiji dejja etii yasijje, Jesosaja epeejji pojjeama huasijje miquiana quea bei epo meeji! ⁵Jamaya poanijo miquianajaya ejashahuabaquijji quea tai poani. Jamajjeya miquianaya jjamimicuiajea nobiajeaqui majje ¡Jesosaja epeejji etii iyaacue! Ohuaya miquianaya quea bei po mee caje pea epeejji nijje. ⁶Jamajjeya Jesosaja epeejji nijje mimijaji majje ja'a jja oe oya dojojji Jesosaja epeejji pojjeama huasijje ojaya ejashahuabaquijji huohui meeya! Jamatii miquianaaya ca ca quea tai aña.

⁷E'e, miquianaya ca mi ca oe Jesosaja epeejji pojjeama jayojja jama poani. Jesosaja epeejji nijje jjamimicuiajea nobiajeaqui majje oya dojoaña Jesosaja epeejji pojjeama huasijje. ¡A'a jja oe jamaya pojji! Chojja, miquianajaya epeejji minijje quea tai poajo, jamatii ja'a jjamimicuiajea nobiajeaqui! ¿Yajjajo acuae jjaya jamatii mi sii mee'ajjaña? ⁸Miquianaaya ca ca oe Jesosaja epeejji cuana minijje nequi quea tai aña, oya cuana dasiaña, onajaya aquiana siiyaña pea'ai, de. Jamaya quea tai. ⁹¡Jjashahuabaquicue oe! Miquianajaya eba mimishi cuana Eyacuiñajji nijje eba'ejji pojjeama eyajo ojaya cuiñajji eyacuajo. Eyacuiñajji esohui a'a pajea'yojji jama ba'a: "E'e jojo nei ojjaña quea mimishi poani pea nijje, ojjaña eshahua nijje mimiani, peaja ehuanase sii cani pea'ai, onaja yahue sii cani pea'ai, dejja cuana pea dejja nijje jjacojoquiani, epona pea epona nijje yahue nisho poani pea'ai, ¹⁰siipojji cuana pea'ai, quea dejja tai poani pea'ai, ehuuo nei po huicha'a huicha'anai pea'ai, pea siajje ajji poani pea'ai, shajjama' cuana pea'ai Eyacuiñajji nijje eba'ejji pojjeama eyajo ojaya cuiñajji eyacuajo". ¹¹Jamaya yahuajo miquianaya poanaje Jesosa nijje jjapeequi jjimahua. Jjeya ca ca esejaya Emeshi Mese neiya, Jesosa Quitohua miquianajaya mimishi cuijea ca'yajje quea boejea po mee ca'yonaje. Jamajjeya miquianaya jjeya ba'yani Eyacuiñajji. E'e, Jesosa Quito esa jaya Emeshi Mese nei miquianajaya mimishi cuanajo mano'yonaje. Miquianaya quea boejea po mee ca'yonaje. Jamajjeya Eyacuiñajji miquianaya ba cani mimishi'ama. Edojoshahua Pameya miquianaya Eyacuiñajji esohui jayojja jama ba'e meesahua cani pea'ai. Jamajjeya iojjaña Jesosaja epeejji cuana nijje quea bei, quea pame nee ba'ecue! ¡Mimishi'ama pocue!

¡Eyacuiñajji chococue quea pame nee!

¹²Epeejji cuana, miquianaya eya huohui'ajjanaje esohui etehue'yojo jama ba'a: —Eya ca ca Jesosaja epeejji. Jamajjeya eyaya ojjaña aña mete'amaa jjejojo, ma Jesosaja epeejji pojjeama cuaa acani —jamaya miquianaya poani quea quehua jjashahuabaquianijo.

Eya ca ca jama poani ba'a: —Pea cuana jayojja jama ba'e majje miquianaya quea pame pojjeama poaje —eya poani. E'e pojja'a eya mimije jama ba'a: —Ojjaña pea cuana jayojja jama eyaya aje —poaje.

Jamatii eya jamaya emimiji pojjeama. Chojja, jama po majje quijje eyaya jamaya apajea'yo jjima aje. E'e, jiquio ecua echacojiyi o chacomeejiji esohui apajea meemee ajja jayojja jama quijje eyaya maya apajea'yo jjima aje.

¹³ Bobi ijji majje see ai yasijje dobiquiani. Bobi chamajo see ai quea nee poaje. Jamatii quijje eyajo ba'e'yo majje eseya bobi ijji pajaje'yo. Quea shoe pojjeama poaje'yo. Jamaya Eyacuiñajjiya acaje'yo. Jamajjeya ja'a jjashahuuba tiitiiquiji bobijo quea jejjie nee epojji! Jama jjashahuabaquime pocue ba'a: —Eya Eyacuiñajjiya equi jayojja. Oya ecuea eyamijo ba'yani. Eya quea jejjie jayojja po mee cani.

E'e, Emeshi Mese neiya, Eyacuiñajjiya ecuea eyami quea pame nee pana ca poa. Jahuana cani quea pame nee peal'ai oja equi jayojja epojji. Ohuaya ecuana pana ca poa quea mimishi nee pea nijje epojji pojjeama; onajaya ehuanase, yahue pojja'a esijiji pojjeama peal'ai. ¹⁴ Jamajjeya esejaya Emeshi Mese nei Jesosa Quito mano'yajo, Eyacuiñajjiya oya shequi mee ca o'yananje. Jamaya ohuaya eseya ba'e mee caje o'oya peal'ai. Quea ca'a nee nee poaniya jjejojo ojjaña acaje'yo ohuaya.

¹⁵ Jesosa Quitoja epeejji poanijo ojjaña eseya ojaya eyami jayojja jama poani. Jamaya miquianajaya eba. Jamajjeya ipea cojjojji nijje a'a jaajji! Chojja. Jamaya poajo Eyacuiñajji miquiana nijje quea tecue nee nee poaje.

¹⁶ E'e, dejja epona quea mimishi nijje jaa majje oya cuana oe yamime jayojja poani. Jamaya Eyacuiñajjiya oya cuana ba cani. Miquea eba Eyacuiñajjiya esohui etehue'yo jama ba'a: "Dejja epona nijje jaa majje oya cuana oe yamime jayojja poani". ¹⁷ Emeshi Mese nei Jesosa nijje jjapeequi majje ca ca eseya o jayojjaya jama jjashahuabaquime poani peal'ai.

¹⁸ Jamajjeya eyaya miquianaya huohuaña jama ba'a: Dejja cuana, iepona miquea ehuanase pojjeama nijje a'a jaajji! Epona cuana, ja'a pea dejja nijje jaajji! ¡Jiñayii acue! Quea mimishi po majje miquea eyami nei quea tai poaje. ¡Ojjaña mimishi cuana a'a ajji peal'ai! ¹⁹ ¡Bacue! Miquea eyami Edojjoshahua Pameja equi jayojja jama poani. Oya mique yami dojjo huasijje nequidobiqui'yonaje. E'e, Eyacuiñajji mi huoojeajji poani. Ohuaya huoojea ca'yonaje Edojjoshahua Pame miquiana que dobiquiya. ²⁰ Oya mi mesenajji epo. E'e, Jesosa Quito mano'yonaje miquianaja mimishi cuijea'yojji sosejje. Jamajjeya jojaya esohui jayojja jama ba'ecue! Miquianaya jama ba'yajo, pea cuaa mi ba majje Eyacuiñajji bihuia caje jama ba'a: —Eyacuiñajji quea ca'a nee nee. Ojaya epeejji quea pame nee ba'e meesahua cani —poaje.

¿A'a shacuima' nequi cuana cajjahuanaquiahua?

7 ¹ Yahuajo pishana miquianaaya esohui tehueneaje ecuea ebajji. Ma esohui etehue'yojo eya miquiaaya huohui'ajjanaje jama ba'a: —*¿A'a*

shacuima' nequi cajjahuanaquiahua? ¿A'a jamatii canequiahua pojja'a?
—huohui'ajjame miquianaaya eya anaje.

Jamajjeya jjeya eyaya miquianaya saja'aña. E'e, shacuima' nequi eshacui
sa po'yo ajjaje ca jamatii canequiahua. Jamaya quea pame.² Jamatii
quea huiso shacuima' nequiya epona cuana jea ba cani, onaja huanase sii
cani. Epona ahuema'ani jamaya quea mimishi poani pea'ai. Jamajjeya
cajjahuanaquiahua, cajjahueaquiahua pea'ai, ojjaña. Jamaya quea pame nee.

³ Yahue cuaa, ¡miquea ehuanase quea bihui nee po meecue! ¡Jaahuanacue
quea pame nee pea'ai! Ehuanase cuaa, ¡miquea yahue quea bihui nee po
meecue! ¡Onijje tii jaacue!⁴ ¡Mique yahueya huohui cani jayojja jama pocue
onijje jaanijo! Yahue, ¡miquea ehuanase nijje jaanijo ohua sa cani jayojja jama
acue! ⁵E'e pojja'a yahue, ehuanase pea'ai mimi sa poani Eyacuiñajji nijje beca
cahuime. Eyacuiñajji nijje mimianijo yahue ojaya ehuanase nijje jaa sa po ajja
pojja'a. Jamaya quea pame, ca ehuanase yeno'ama poanijo. Beca cahui cuana
Eyacuiñajji nijje mimi majje ¡yahue oja ehuanase nijje cajjacoccoqui o'oyahua!
Jamajjeya ehuanase yeno'ama, yahue pea'ai yeno'ama poaje. Quea yeno
poajo, eshahuaa oya cuana quea mimishi jjashahuubaqui mee ca chana' pea
cojjojji epoji. E'e, yahue, epona pea'ai ca'a'ama.

⁶⁻⁷Ecuea epjeeji cuana, jiquio esohui etehue'yo ecuea ejjashahuubaquijji
jama ba'a: Eya ca ca shacuima' nequi. Ojjaña Jesosaja epjeeji e jayojja jama
shacuima' nequi, ahuema'ani pea'ai quea pame nee chaco majamajaje Jesosa
Quitojo. Jamatii eyaya miquianaya jamaya epoji pojjeama huohuiaña.
Eyacuiñajjiya beca cuana quea pame nee ba'e meesahua cani jamatii
shacuima' nequi, ahuema'ani pea'ai. Pea cuana ca ca jamatii ani quea mimishi
po chana!. Jamajjeya oya cuana cajjahuanaquiahua, cajjahueaquiahua pea'ai.
¡Eyacuiñajjiya ejjashahuubaquijji mijo ohua acani jayojja jama acue!

⁸Jamatii eya jjashahuubaquiani shacuima' nequijo, eshacuimanojo,
ahuema'anijo, e'ahuemanojo pea'ai jama ba'a: Eya ee nei, shacuima'
nequi. Miquianaya e jayojja jama mee nei nequi majje jama quea pame
nee nee poaje. ⁹Jamatii e'e pojja'a miquianaya beca cuana ehuanase
chamajo mimishi'ama eba'ejji pojjeama. Jamajjeya ijjhahuanaquicue!
E'ahuemano cuana, miquiana ahuema'ani jayojja mimishi'ama eba'ejji
pojjeama. Jamajjeya ijjhahueaqui'yocue! Jamaya quea pame. Miquianaya
quea yeno mee nei ba'yanijo quea mimishi po chana!. Jamaya quea tai.

¿A'a Jesosaja epjeeji cuana huei cajji?

¹⁰Jjeyahua nei eyaya Eyacuiñajjiya esohui tehueje yahue cuana huasijje,
ehuanase cuana huasijje pea'ai miquianajaya ebajji jama ba'a: Ehuanase
cuana, ¡miquea yahue oe nei nijje ba'ecue! ¡A'a oya hueijji!¹¹ ¡Huei majje
ca oe ahuema' ba'e tiitii'yocue! ¡E'e pojja'a miqueahue jjeshe o'oyacue!
Jamaya quea pame nee. Yahue cuana, joya jayojja a'l a miquea ehuanase
hueijji! ¡Jaahuana tiitiicue! ¡Eyacuiñajjiya esohui jayojja jama acue!

¹²Jeya ca ca eyaya pea esohui tehueje, ma Jesosaa tehue mee jjima, ecuea ejjashahuabaquijji tehueje pea cuana huasijje, Jesosaja epeejji cuana huasijje. Yahue cuana, e'le pojja'a miya Jesosaja epeejji poani, miquea ehuanase Jesosaja epeejji pojjeama. Jamatii miquea ehuanase minijje ba'e sa poanijo, ja'a oya hueiji!

¹³Ehuanase cuana, e'e pojja'a miya Jesosaja epeejji poani, jamatii mique yahue Jesosa nijje jjapeequi jjima. Miqueahue minijje ba'e sa poanijo, ja'a oya hueiji!

¹⁴Miya Jesosaja epeejji poanijo, miqueahue minijje ba'e sa poanijo, Eyacuiñajjiya oya quea pame acaje Jesosaja epeejji nijje ba'e sa poanijo. Yahue cuana, oya jayojja miquea ehuanase miquea huei jjima minijje ba'e sa poanijo, Eyacuiñajjiya oya quea pame acaje pea'ai miya Jesosaja epeejji poanijo. Oe yamime jayojja ohuaya micuana ba cani. Jamajjeya ohuaya miquianajaya ebacua cuana jaahuana caje pea'ai. Jesosaja epeejji pojjeama bacua cuana jama pojjeama oya cuana.

¹⁵Jiquio esohui bacutea pea'ai, epeejji cuana! Eyacuiñajjiya ojaya epeejji cuana quea bei ba'e mee sa acani. Jamajjeya miquea ehuanase Jesosaja epeejji pojjeama jjejojoya minijje ba'e sa po'yo ajja po majje capoquiahua. E'e, Jesosaja epeejji pojjeama Jesosaja epeejji nijje ba'e sa po'yo ajja capoquiahua, epona, yahue pea'ai. Jamajjeya Jesosaja epeejji e'ahuemano jayojja anije, eshacuimano jayojja jama nequije. ¹⁶Jamajjeya ehuanase cuana, ¡miquea yahue nijje anicue, jamatii oya Jesosaja epeejji pojjeama! Oya Jesosa nijje jjapeequije pojja'a mi quea pame ba'yani ba majje. Yahue cuana, ¡miquea ehuanase Jesosaja epeejji pojjeama nijje ba'ecue! Jamajjeya oya Jesosa nijje jjapeequije pojja'a.

¡Eyacuiñajjiya ejjashahuabaquijji jayojja jama ba'ecue!

¹⁷Eyacuiñajjiya ojjaña miquianaya ojaya echacojji po mee cani. Oe epeejji pea epeejji jayojja jama chaco ajja. E'e, Eyacuiñajjiya miquianaya huoojea cani ojo chacohua. Peapea chaco meeeme asahua cani. ¡Jamaya atiitiicue! Jamaya eyaya huohuiaña ojjaña Jesosaja epeejji cuana ojjaña cuiñajji cuanajo ba'e yasijje.

¹⁸Jamajjeya oe epeejji Jesosa nijje jjapeequianijo cuiishasha jehuisejjajea ca'ya poa, Jodio cuaa jjejojo. ¡Jamatii nequicue! Pea dejja cuiishasha ejehuisejjajea'yo pojjeama Jodio dejja pojjeama jjejojo. ¡Jamatii nequicue, cuiishasha jehuisejjajea jjima tii! ¹⁹Jjeya nei Jesosa nijje jjapeequianijo, Eyacuiñajjiya eseya jama aijima ba'a: —¡Cuiishasha jehuisejjajea meecue! —po ajja eseya jjeya.

—¡A'a cuiishasha jehuisejjajea meeji! —po ajja pea'ai jjeya.

Chojja. Jjeya Jesosa nijje jjapeequianijo, Eyacuiñajjiya eseya jama acani ba'a: —¡Ecuea esohui jayojja jama ba'ecue! —ohuaya eseya acani.

²⁰Jamajjeya ¡miquianaya Jesosa nijje jjapeequi jeahuajo jayojja jama anicue quea pame nee! Jama ba'a: ²¹Eyacuiñajjiya miquianaya iyaa canajejo, beca cuana echacojji sosema' poanaje. ¡Jamaya anicue yeno'ama! Jamatii miya miquea echaco meseja nahue'amajo, poqui sa po majje ¡poquicue, miquea yajjiyo chacoquicue!

²²Jamajjeya beca cuanaja echaco mese yanijo, jojaya esohui jayojja jama cachaco cahua! Esejaya Emeshi Mese nei Jesosaa oya cuana iyaa cajje ca ca oya echaco mesema' jayojja jama jjashahuabaquime poani. ¡Jesosaja ejjashahuabaquijji jayojja

jama ca'a cahua! Oya jayojjaya pea cuaa echaco mesema' nequiya chaco cani ojaya yajjijo. Jamatii Jesosa Quito oya cuana iyaa cajje ojaya ejjashahuabaquijji jayojja jama ca'a cahua pealai. Jama ba'a: Jesosa nijje jjapeequi jjimahuajo eseya eshahuaja echacojji sosema' poa ojjaña. Jesosaa iyaa majje eseya poqui mee canaje eshahuaja echaco majajji pojjeama. Jamajjeya Jesosaja ejjashahuabaquijji jayojja jama ejja'a qui, esejaya Emeshi Mese neija.²³E'e, Eyacuīñajjiya eseya jjeshe ca'yonaje quea nahue nee nee, Jesosa Quito esejo mano'yonaje sosejje. Jamajjeya ¡ojaya esohui jayojja jama atiitiicue, onajaya pojjeama! ¡Ojo oe chacocue!²⁴¿Ae shai po aninaje miquianaya Eyacuīñajjiya iyaa jjimahuajo? ¡Jamaya atiitiicue quea bei! Eyacuīñajjiya miquianaya jaahuana caje'yo quea pame nee.

Pea etehue'yo shacuima' nequi yasijke, ahuema'ani yasijke pea'ai

²⁵Miquianajaya etehue'yojo yahuajo eya huohui'ajjanaje nequiaa jama ba'a: —¿Yajja acuae poaje shacuima' nequi, ahuema'ani pea'ai? —tehuenaje nequiaa.

Maya esejaya Emeshi Mese neiya Jesosaa eya huohui jjima shacuima' nequijo, ahuema'anijo pea'ai. Eyaya ecuea ejjashahuabaquijji tehueaña miquianajaya ebajji. Jamatii Eyacuīñajjiya eya babaca canaje esohui quea pame nee Jesosaja ehuohuijji. Ohuaya eya esohui e'e nei huohui meesahua cani tii pealai. Jamajjeya ¡ecuea esohui shajja'ajjacue!

²⁶Jjeya Jesosaja epeeiji pojjeamaa eseya napa cani quea huiso nee. Jamajjeya quea camaja eba'ejji. Jamajjeya epona cuana, jjeya nei miya ahuema'ani, ¡jamaya ba'ecue! Shacuima' nequi cuana pea'ai, ¡jamatii ba'ecue! Jamaya eya jjashahuabaquiani. ²⁷Jamatii miquea ehuanase yanijo ¡a'a oya hueijji! Miya shacuima' nequiya, ¡a'a ehuanase sajji! ²⁸Eponajo jjahuanaqui sa poanijo miya quea mimishi pojjeama; jamaya quea pame. Epona, miya jjahueaqui sa poanijo quea pame, quea mimishi pojjeama pea'ai. Jamatii jjahuanaqui majje quea camaja poaje miquianajaya eba'ejji, bobijo, aquiana eba'ejjijo. Ehuanasejo quea huiso jjashahuabaqui majamajaje. Ebacua quea huiso po majje quea camaja poaje. Eya ca ca shacuima' nequi. Eba'ejjijo jjashahuabaqui tiitii ajja. Jamajjeya miquianaya e jayojja nequianijo miquea eba'ejji camaja'ama pishana poaje.

²⁹Ecuea epeeiji cuana, eya jjashahuabaquiani jama ba'a: Epojja Jesosa Quitoja epoe o'oyaji beshahua nei apoa. Jamajjeya ¡a'a jjashahuaba tiitiiquijji miquea ehuanase neijo! ¡Jesosa Quitojo oe jjashahuaba neineiquicue!³⁰E'e, Jesosa Quito poe o'oyani. ¡Ojaya epoejjijo jjashahuaba tiitiiquicue! Jamajjeya ¡a'a quea yeno po tiitiiji eba'ejji quea camajajo, emano'yojo pealai! ¡Quea bihui nee nee poani, a'a jjashahuaba tiitiiquijji pealai! ¡A'a jjashahuaba tiitiiquijji aquiana jjeshejjijo, meshi cuana jjeshejjijo pealai!³¹Echaco quea huioso jjashahuabaquianijo ¡a'a Jesosa Quitojo jjashahuabaqui pajea'yoji! Oya Jesosa poe o'oyajo jiquio meshi cuana, ojjaña aquiana cuana pea'ai chama'yo tii poaje'yo.³²Jamajjeya ¡a'a miquianajaya aquiana quea huioso jjashahuabaqui majamajajji! Jesosaja epeeiji shacuima' nequi jjashahuabaquiani Jesosa Quitojo, ojaya ejjashahuabaquijji jayojja jama a sa neinei poani tii.³³Yahue ca ca jjashahuabaquiani ojaya ehuanase quea bihui

nee epo meeji. Jamajjeya oya quea huiso aquianajo jjashahuubaquiani.³⁴ E'e, shacuiji Jesosa Quito oe neijo jjashahuubaqui tiitii aija. Oya ojaya ehuanasejo quea huiso jjashahuubaquiani pea'ai. Epona Jesosa Quitoja epeeji ahuema'ani Jesosajo jjashahuubaquiani. Jesosaja ejjashahuubaquijji jayojja jama a sa poani. Ojo chaco sa neinei poani pea'ai. Oja yahue enequijo, ehuanase jjashahuubaquiani quea huiso ojahue quea bihui po meeji. Jesosa Quito oe neijo jjashahuubaqui tiitii aija. Jamajjeya oya quea huiso aquianajo jjashahuubaquiani.³⁵ Jamajjeya epeeji cuana, eyaya jiquio esohui tehueña miquiana quea pame ba'e meesahuajji, mijo quea camaja epo meeji pojjeama. E'e, eyaya miquianaya jama ajjima ba'a: —¡A'a jjahueaquijji! ¡Miquianaya quea pona jea nee po majje jamatii a'a jjahuaquijji! —jamaya ecuea miquianaya huohui jjima. Chojja, eyaya miquianaya huohuiaña jama ba'a: —¡Jesosa nijje quea ja'a nee jjapeequicue! ¡Ojaya esohui jayojja jama ba'ecue! ¡Quea huiso nee jjashahuubaquicue Jesosajo, aquiana cuanajo pojjeama! ¡Onijje chacocue! —jamaya eyaya aña miquianaya.

³⁶ Shacuima' nequija ebajji eyaya jama tehueña ba'a: E'e pojja'a miquianaya yahuajo jama poa ba'a: —Ecuana ejjhuanaquequijji pojjeama Jesosaja epeeji pojjeamaa ecuana quea huiso napa canijo. Quea camaja nee poaje —poa yahuajo.

Jamajjeya shacuima' nequi cuana, miquea eshiye mese ahuema'ani jaajaa epo, miya huana sa neinei poanijo ¡yo jjahuanaquequicue! Jamaya quea pame nee, mimishi'ama.³⁷ Jamatii shacuima' nequi oja shiye nijje ojaya ejjashahuubaqui'yojjijo jama poaje pojja'a ba'a: —Eya ca ca iña jjahuanaque qui sa po'yo aija pea'ai. Eya quea pona jea nee pojjeama, quehuajje jjacojoqui aija nei nei —jamaya e'e jojo nei jjashahuubaqui majje jamatii canequiahua oya cuana, jjahuanaquequijji tii. Jamaya quea pame nee nee. E'e, onaaya Jesosaja epeeji napa canijo, quea camaja poaje jjahuanaque qui majje.

³⁸ Jamajjeya shacuima' nequi cuana, miquea eshiye mesejo jjahuanaque qui majje miyaya quea pame aña. Eshiye mese mi huana majje ca ca miyaya quea pame nee nee aña. E'e, miya Jesosajo nei jjashahuubaqui sa poani.

Paboya esohui e'ahuemanojo

³⁹ Epeeji cuana, jiquio esohui eyaya tehueña Jesosaja epeeji e'ahuemanoja ebajji jama ba'a: Epona, ¡miqueahue eshe nequijo, onijje tii anicue! ¡A'a oya hueijji! ¡Miqueahue mano'yajo oe pea dejjajo jjahueaquij'yoocue ca jjahueaquij'yo sa po majje! ¡Jesosaja epeejiyo oe jjahueaquij'yoocue, epona cuana!⁴⁰ Jamatii ecuea ejjashahuubaquijji e'ahuemanojo jama ba'a: Miqueahue mano'yajo, ¡mee nei anicue, ahuema'ani jama! Jamaya miya quea bihui nee nee poaje'yo. Edojoshahua Pameya eya jjashahuubaqui meesahua canijo, ecuea esohui e'e nei.

¿A'a bobo eshahuaja e'ijjiajji nisho ba'ehuanasohua majje ijgia cajji?

8 ¹Yahuajo miquianaaya ecue bajji tehuename. Jama huohui'ajjame nequiaa iña anaje ba'a: —¿A'a noe eyacuiñajji nishoja e'ijjiajji nisho,

eshahuaja e'ijjiajji nisho pea'ai ba'e huanasohua majje ijzia cajji? ¿A'a e'ijjiajji pojjeama pojja'a? —eya huohui'ajjanaje nequiaa.

Jamajjeya jjeya eyaya miquianaya saja'aje jama ba'a: Pea cuaa bobi edahua'yo quia cani eyacuiñajji nisho huasijje, eshahua cuana huasijje pojja'a onijje ejjapeequijji, mase'ama epo meeiji. Beca cuana jama poani ba'a: —Ecuana jama eba epa'yo acui ejehui'yo, meshi epa'yo pea'ai, Eyacuiñajji pojjeama. Jamajjeya maya bobi ijzia ca'yojji.

E'e jojo nei. Jamatii jamaya poanijo miquea ejjashahuabaquijji quea pame pishana. Ojjaña miya ojjaña ba epo poso poanijo quea pame pojjeama poaje. Pea ejjashahuabaquijji quea pame nee nee jama ba'a: —¡Pea epeejji cuana ejja'asahuauqui quea pame nee! ¡Quea jaji nee ejjapo meequi!

²E'e jamaya quea pame. Pea cuana jama jjashahuabaquiani ba'a:
—Jamatii ecuea eba nei nei quea huiso.

Jamaya jjashahuabaquianijo oya quea ja'a jjashahuubaquijji jjima. ³Quea Eyacuiñajji jea nee poanijo ca ca, ojaya eba eseaya ojaya epeejji nei poani.

⁴Jamajjeya jjeya eyaya miquianaya huohuije bobijo, ma eshahua huasijje, eyacuiñajji nisho huasijje quia canijo. Quia majje pea cuaa bobi ijzia cani. Esejaya eba eyacuiñajji nisho acui ejehui'yo, meshi epa'yo pojja'a, Eyacuiñajji e'e nei pojjeama. Eyacuiñajji e'e jojo nei oe nei yani. Jamajjeya bobi eyacuiñajji nisho huasijje quia majje eshahuaja e'ijjiajji nisho ba'ehuanasohua ijzia ca'yojji eseaya. Jamaya quea mimishi poani pojjeama. ⁵Pea cuana ca ca jjashahuuba quehuaquiani jama ba'a:
—Eyajo, meshijo cuana pea'ai quea huiso eyacuiñajji yani.

Jamaya jjashahuuba quehuaquianijo quea huiso cuaa eyacuiñajji nishojo chaco cani, eshahuajo pea'ai. E'e, acui ejehui'yo, meshi epa'yo pojja'a, eshahua pojja'a, emeshi mese pea'ai Eyacuiñajji poso acani pea cuaa. ⁶Esejaya ca ca eba Eyacuiñajji oe nei yani. Oya esejaya Chii ai. Ohuaya ohuaye nei ojjaña aquiana cuana pana ca'ya poa. Eseya onijje jjapeequiani, ojaya esohui shajja'ajjaña pea'ai. Jesosa Quito esejaya Emeshi Mese oe nei poani pea'ai. Yahuajo nei Eyacuiñajjiya Jesosa Quito nijjeya ojjaña pana ca'ya poa. Nequi mee cani pea'ai. Jesosa Quito eseya ba'e mee cani pea'ai, ojaya epeejji nei cuana.

⁷E'e jojo nei Eyacuiñajji oe nei yani esejaya Chii ai. Jamatii jamaya Jesosaja epeejjiya ba jjima beca cuanaja. Yahuajo Jesosa Quito ba jjimahuajo onaaya bobi edahua'yo eshahua quea bihui po mee'yojji ijzia canaje quea huiso. Jjeya ma bobi ijzia majje oya cuana quea mete nee jjashahuabaquiani jama ba'a:
—¡Dee! Eya eshahuaja epeejji jayojja jama poani o'oya. Quea mimishi poani —jamaya eshahuajo jjashahuabaquianijo, e'e, oya cuana quea mimishi poani.

⁸Miquianaya quea quehua jjashahuabaquiani jama ba'a: —Eyacuiñajji ecuanajo quea bihui nee pojjeama poaje, ca ojjaña bobi ijziañajo. Eyacuiñajji ecuanajo quea bihui nee pojjeama poaje, ca ecuaa pea bobi ijzia ajjajo —poani beca cuana.

Chojja. Eyacuiñajji ese nijje quea bei poani Jesosa nijje jjapeequianijo, bobi ijziañajo pojjeama.

⁹Epeejji cuana, ¡shajja'ajjacue mo! Miquianaya quea jjashahuubaqui ja'a. Jamajjeya bobi eshahuaja e'ijjiajji nisho eba'ehuanasohua ijja majje miquianajaya eba jamaya poani quea mimishi pojjeama. Jesosaja epeejji ca'l'ama cuana ca ca quea jjashahuubaqui ja'a pojjeama quea mimishi po o'oya mee chana! ¹⁰Jama po chana' ba'a: Miya eyacuiñajji nishoja equijo bobi ijja ani ba majje ohuaya ijja caje pe'a'i pojja'a. Ijjia'ijja ani, oya jjashahuubaquije eyacuiñajji nishojo, eyacuiñajji nisho bihuia cani poso oya quea ja'a pojjeama poaje. ¹¹E'e, mi ba majje mi jayojja jama ma bobi ijja majje oya quea mete poaje: —E'e, eya eshahuaja bobi ijja majje quea mimishi po o'yanaje —poso jjabaquije.

Jamajjeya Eyacuiñajji onijje quea quene poaje poso oya quea yeno poaje. Oja mimishijo Jesosa Quito mano'yonaje pe'a'i. Oya mique chahua jama. Jamajjeya ¡oya quea yeno po chanajo a'a maya noe ijjiajji! ¹²Miquianaya Jesosaja epeejji cuana quea ja'a poani. Jamatii pea epeejji ja'a'ama quea bicho, quea mete poani mi jayojja jama po majje. Jamajjeya miyaya oya quea mimishi po meenaje. Jamajjeya Jesosa Quitohua miya ba cani ona mimishi po meeiji jayojja, quea mimishi pe'a'i. ¹³¡Bacue, oe! Pea epeejji quea mete, quea mimishi pe'a'i poani eya maya noe ijjiaña ba majje, eyaya maya noe e'ijjia o'oyajji pojjeama nei nei. Jamajjeya Jesosaja epeejji ja'a'ama quea mimishi epo meeiji pojjeama nei nei. ¡E jayojja jama pocue; Jesosaja epeejji ja'a'ama a'a quea mimishi po meeiji!

¿Achajja ba'e cajji Jesosaja huoojea'yo esohui huohuijji?

9 ¹Ecuea epeejji cuana Conitojo ba'e, eya ca iña e'e jojo nei Jesosaja huoojea'yo oja esohui huohuijji. Dejjaja huoojea'yo pojjeama iña iquo. Jesosaja epeejji quea ja'a nee ba'e meesahua sa aña nei nei. Yahuajo eyaya Jesosa banaje, esejaya Emeshi Mese nei. Esohui quea pame nee ojo eyaya huohuinaje miquiana huasijke. Shajja'ajja majje miquianaya ojaya epeejji poanaje. Maya miquianajaya eba. ²Jamajjeya e'e pojja'a pea cuana jama poani ba'a: —Pabo Jesosaja huoojea'yo pojjeama —poani.

Jamatii miquianajaya eya eba Jesosaa huoojea cani. E'e, miquianaya ojaya epeejji poanaje eya huohuijje. Jamajjeya quea huiso jama poani ba'a: —Conitojo ba'e cuana Jesosaja epeejji poanaje Paboja esohui shajja'ajja majje. Jamajjeya esejaya eba Eyacuiñajjiya Pabo huoojea canaje; ohuaya Pabo esohui huohui meesahua cani tii —poani cuana.

³E'e, beca cuaa eya niñebla cani jama ba'a: —Pabo ca jja ca oma Eyacuiñajjiya huoojea'yo pojjeama.

Jamaya poajo, eyaya saja'aña jama ba'a: —Jesosaa ecuana huoojea ca'yonaje ojaya esohui huohuiya —saja'ame aña.

⁴E'e, eya Jesosaja huoojea'yo ojaya esohui huohuijji. Jamajjeya eyaya miquea bobi ijjiaje sosema', eya sohuihuohuiña sosejje. Jamatii eya jamaya po ajja nei nei. ⁵Jesosaja esohui huohuijji cuana, oja chahua mese pe'a'i ca ca ehuanase cuana nijje poquiani esohui huohuiya. Jamaya poani Peno pe'a'i. Jamaya quea pame nee. Eya jamaya po sa po majje quea pame poaje,

ca ehuanase Jesosaja epeejji poanijo. ⁶Ojjaña Jesosaja huoojea'yo esohui huohuijji cuana esohuijo nei chacochoacoani tii, bobi yajjijo chacochoaco ajja.

¿A'a ecuaaya oeyaya Benabe nijjeya cachacoahua bobi sosejje? ¿A'a ecuaaya oeyaya casohuihuojuiahuasosema! ¿A'a jamaya quea pame? Eya ca ca jamaya poani ba'a: —Chojja; ecuanaya pe'a'i casosequia cahua esohui huohuiña sosejje —poani eya.

⁷¡Bacue! Emeshi meseja huoojea'yo, ona oja esohui shajja'ajja meeji poani ohuaya sosequia cani ojo chaco canaje sosejje. Oya jayojjaya e'acui yiye meseya acuijjajja ijija cani acui yiye chaco canaje sosejje. Ana'ai jaahuanajjiya tojjo na ishi cani jaahuanajja sosejje. ⁸Jiquio ecuea esohui etehue'yo jayojjaya jama ojjaña poani. Jamaya ojjañaja eba. Jamajjeya ecuana pe'a'i cabobia cahua cuaa Eyacuiñajjiya esohui huohui sosejje. ⁹Eyacuiñajjiya Moisesi yahuajo nei nei jama tehue meeme aca poa ba'a:

“¡Ana'ai chacochoacoanijo bobiacue! Eso' quishihuoj poequiya tii ca'ijjia cahua; ja'a naba huoshoji!”

Jamaya yahuajo nei Eyacuiñajjiya tehue mee ca poa. Ohuaya Moisesi jamaya tehue meeme aca poa ana'ijo nei pojjeama jjashahuabauquianijo. ¹⁰Ohuaya esejo jjashahuabauquianijo pe'a'i jamaya tehue mee ca poa. Oya jayojjaya que chacoiji cuana, anoso sejjajji pe'a'i chaco majje jama jjashahuabauquianiji ba'a: —Eyaya anoso sejja sosejje quijje yeje'yo ecuea equijo e'ijjajji.

¹¹Jiquio ecua chacochoajjiya jayojjaa ecuaaya miquianaya sohuihuohuinaje. Shajja'ajja majje Jesosaja epeejji poanaje. Jamajjeya jjeya ecuana bobi quiaje esohui huohuinaje sosejje miquianaya quea pame nee poaje. ¹²E'e, pea esohui huohuijji sohuihuohui majje jama poani ba'a: —Ecuaa miquiana sohuihuohuinaje sosejje bobi, aquiana pe'a'i che ecuana quiacue! —poani pea esohui huohuijji.

Jamaya quea pame. Ecuaaya ca ca quea huiso nee esohui quea pame nee Jesosaja huohuinaje miquianajaya eshajja'ajjajji. Sosema!. Jamatii ecuanajaya miquianaya jama ajjima ba'a: —Aquiana mo che quiacue eya esohui huohuinaje sosejje! —ajjima ecuanajaya.

Chojja. Jamaya e'a aojjemo Jesosaja epeejji pojjeama siajje pome jama ba'a: —Pabohua ca jja ca esohui huohui cani quea huiso aquiana sosejje. Jamajjeya ecuana shajja'ajja sa po ajja —siajje pome.

Jamajjeya eya aema' jayojjaya jama ba'yani; esohui huohuiña sosema' ojjañaja eshajja'ajjajji.

¹³Yahuajo nei nei Eyacuiñajjiya jama aca poa ba'a: —Jodio dejja cuaa Eyacuiñajjiya equijo chaco majje bobi Eyacuiñajji yasijje onaja quia ijija ca poa sosema!. Jodio etii cuaa Eyacuiñajjiya equijo huo dahua ca poa Eyacuiñajji quea bei epo meeji. Ma huo dahua tehuejea jjimahua ijija ca poa Eyacuiñajjiya equijo chaco cani sosejje.

Maya miquea eba. ¹⁴Oya jayojjaya esejaya Emeshi Mese neiya Jesosaa huohui canaje ojaya esohui huohuijji cuanajo jama ba'a: —Sohuihuohui canijo, ¡sose quiacue ecuea esohui huohuijji! —poa.

¹⁵ Jamatii eya jamaya epoji pojjeama nei nei. Esohui huohuinaje sosejje bobo edojoji pojjeama. Jjeya esohui tehueña miquiana huasijje miquea bobo equia meeji pojjeama. Bobijo pojjeama eyaya esohui huohuaña. Eyaya Jesosa Quitoja esohui huohui tiitiije sosema' miquianaya. ¹⁶ Eyaya ehuohuijji pojjeama jama ba'a: —Eyaya ca eya Jesosaja esohui quea pame huohuaña; jamajjeya eya quea pame nee.

Chojja. Eyacuiñajjiya eya huoojea ca'yonaje Jesosa Quitoja esohui huohuiya. Esohui huohui ajja jjemo eya quea yeno nee nee pome, Eyacuiñajjiya eya quea nee nee po mee came pea'ai. ¹⁷ Eyaya jamatii ecuea ejjashahuabaquijji jayojja jama esohui huohuaña jojjemo jama huohuime ba'a: —¡Sosequiacue mo esohui huohuaña sosejje! —ame.

Yahuajo eya jjashahuabaqui jjima Jesosaja esohui huohuijji. Chojja. Eyacuiñajjiya eya huoojea ca'yonaje ojaya esohui huohuiya. Eyaya ojo sosema' jayojja quea bihui nee chacoña. ¹⁸ ¿Ae sa poani eya esohui huohuaña sosejje? Eya bejjo, bobo pea'ai sa po ajja esohui huohuaña sosejje. E shajja'ajjaji huohui jjima jama pea'ai ba'a: —¡Che mo bejjo quiacue eya esohui huohuaña sosejje! —jamaya ecuea ajjima.

Chojja, eya quea bihui nee Jesosaja esohui quea pame nee huohuaña sosema!. ¹⁹ Chama' dejja e huoojea'yojji esohui huohuijji. Chojja. Jesosa nijje chaco sa poanijo eya chacochacoani. Ojjañaja yajjijo chacoña. E'e, eyaya esohui huohuaña ojjaña Jesosa nijje ejjapeequi meesahuajji. ²⁰ Jamajjeya Jodio cuana nijje ba'yanijo, o jayojja jama ba'yanijo eya Moisesija etehue'yo jayojja jama aña pea'ai. Jamajjeya ohuaya ecuea esohui Jesosa Quitojo shajja'ajja caje'yo pojja'a. Moisesija etehue'yojo jjamimicuajea nobiajeaqui ajja onijje. ²¹ Oya jayojjaya Jodio pojjeama cuanaja Moisesija etehue'yo ba jjimajo, eyaya onijje nequiya ohuaya jayojjaya jama aña. Moisesija etehue'yo huohui ajja. Chojja. Eyaya esohui quea pame nee Jesosaja huohuaña ona Jesosa nijje jjapeequi meesahuajji. Jamajjeya Jesosaja esohui jama po majje Eyacuiñajjiya ejjashahuabaquijji jama aje pea'ai. Eya ca ca Eyacuiñajjiya esohui jayojja jama ba'yanji tii, shajja'ajjaña tii tii, Jesosa Quitoja. Jamajjeya Eyacuiñajji quea bihui nee poani enijje. ²² Jesosaja epeejji quea jjashahuabaqui ja'a pishana nijje ba'yanijo eya o jayojja jama poani, Jesosa nijje ejjapee neineiqui meesahuajji. E'e, Jesosa nijje ejjapeequi meesahuajji eyaya ojjaña joya e pejjejo ba'e nijje jjapeequiani. Eyaya aje oe ojjaña pea cuana Jesosaja epeejji quea ja'a po meesahuña.

²³ Jamaya eyaya aña ojjaña cuana esohui quea pame nee Jesosa Quitojo eshajja'ajja meeji. Jamajjeya eya quea bihui nee jjapeequiani Jesosaja epeejji eyacua cuana nijje.

²⁴ ¡Jjashahuabaquicue esho'i quiana quebanei poanijo! Ojjaña cuajicuajiani aquiana iñajji sosema!. Oe esho'i quea cuejipashi nee nee ebionei poeje. Oya oe nei iña mee caje aquiana sosema!. Jiquio ecua esho'i quiana quea cuejipashi nee cuajicuajiani aquiana iñajji jayojja jama ¡miquianaya Jesosa

Quito nijje jjapeequicue quea pame nee nee! ¡Ojaya esohui jama acue! Jamajjeya quijje ohuaya miquianaya quea pame nee ba'le tiitii mee caje'yo. ²⁵Ojjaña esho'i cuana janobajjima nei cuajicuaji huicha'a huicha'aní, jjashahuabaquiani quea cuejipashi nee epojji, aquiana e'iñajji. Jamatii ma aquiana quijje pishana chama'yo tii poaje'yo. Jesosa nijje jjapee neineiquiajo ca ca quijje ohuaya eseaya quea pame nee nee sosequia caje'yo, eba'eiji quea pame nee nee epo tii tijji. ²⁶Jamajjeya eya Jesosa nijje jjapee neineiquiani. Jjashahuaba tiitiiquiani. Eya poqui ajja cojjama' jama; dejja ehuoo jama poqui ajja, eya. Ecuea eba Jesosaja esohui quea pame nee nee. ²⁷Jesosaja epeejji quea pame nee, quea ja'a nee epojji eya jjashahuabaquiani quea huiso. E'e, ojaya esohui huohui huicha'a huicha'a majje eya quea bicho nee nee pome Jesosaja epeejji pame'ama po majje. Jama poajo Jesosa Quitohua quijje eya esosequia'yojji pojjeama. Eya ba caje ohuaya epeejji quea mimishi.

¡Etiiquiaa jayojja a'a eyacuiñajji nisho ajji!

10 ¹Ecuea epeejji cuana, ijiquio esohui shajja'ajjacue! Yahuajo nei nei ecuanaja etiiquiana Moisesi nijje meshi jabojo poquianijo, Eyacuiñajjiya jaahuana ca'ya poa. Eyajo ona biajje bo ai nequi mee ca'ya poa eshequia edahua ca poani jjejojo. Poquianijo bae huo'o huasijje poe'yanaje; bae yiyesamajje ejiojji quea jabo nee po mee majje, ojjaña tii ojee ojje miji yasijje poqui meesahua ca'ya poa quea pame nee ejiojijje. ²Yahuajo nei bo quimejjeFFE poquianijo, bae huo'o ojje miji yasijje poquianijo pea'ai ecuanaja etiiquianaa Moisesija esohui shajja'ajja ca poa. Jamajjeya onajaya emeshi mese po'ya poa Moisesi. Oya jayojjaya jjeya eseaya enajo besa mee cajje Jesosaja esohui jayojja jama eba'eiji. ³Yahuajo nei meshi jabojo Eyacuiñajjiya bobo pahui jayojja oque mee ca'ya poa meshi yasijje ojjaña etiiquianaja e'ijjajji. ⁴Ena chama' poajo, Quitohua ena jamatii cuaya meequi ca'ya poa bajjooje etiiquianaja e'ishijji.

Jamajjeya Quitohua ojaya epeejji cuana jaahuana cani. Etiiquiana Quitojo jama poa ba'a: —Oya ecuana nijje poquiani, de; ohuaya ecuana jaahuana cani. Jamajjeya ohuaya bajjooje ena cuaya meequi canaje —poa.

⁵Jamatii aje oe beshahua nei ojjaña ecuanaja etiiquiana quea mimishi po tiitiia poa. Eyacuiñajji bihuia jjima aca poa. Eyacuiñajji quea quene ona nijje poa. Jamajjeya beshahua nei ojjaña mano ca'ya poa meshi jabojo tii.

⁶Eyacuiñajjiya etiiquiana quea mimishi nee nee mano mee ca'ya poa ese jjabahuejjaquijji, mimishijo quea mete epojji. Jamajjeya mimishi cuana a sa po ajja poaje'yo eseaya. ⁷E'e, ecuanaja etiiquiana eyacuiñajji nisho nijje, acui ejehui'yo nijje, eshahua nijje pea'ai mimi ca'ya poa. Eyacuiñajjiya esohui yahuajo nei etehue'yo jama poa ba'a:

“Yahuajo oya cuana ijja'ijjia majje, ishi'ishi majje pea'ai majamaja ca poa eshahua nijje jjapeequianijo”.

Jamaya yahuajo poa.

¡A'a ona jayojja jama quea mimishi pojji eshahua nijje! Jamaya quea tai.

⁸Etiiquiana cuana aje oe onaja ehuanasejo jaanaje, onaja yahuejo jaanaje. Quea mimishi nee nee poanijo, Eyacuiñajjiya oya cuana quea huiso nee nee, 23.000 mano mee ca'ya poa oya pojajo tii. Jamajjeya ¡a'a jja oe ona jayojja jama pojji! ¡A'a onajaya ehuanasejo, yahuejo pe'a'i ba'ejjii! ⁹Ecuana etiiquiana cuana jjashahuubaquia poa jama ba'a: —Ecuana quea mimishi poajo, e'e pojja'a Eyacuiñajji quene'ama poaje ecuanaja mimishi cuanajo —jamaya poa, de.

Chojja. Quea mimishi poajo, Eyacuiñajjiya peyo cuana huoojea ca poa ona ijiaa. Jamajjeya ¡etiiquiana jayojja jama a'a pojji!

¹⁰Ecuana etiiquiana cuaa Eyacuiñajji niñebea ca poa. Jama poa ba'a: —Eyacuiñajjiya ecuana quea pame nee ejahuanajji pojjeama —aca poa.

Eyacuiñajji niñebea canijo, ohuaya ojaya esohuidojiji quea ca'a cuana huoojea ca'ya poa o niñebajji cuana mano mee'yohua. Jamajjeya ¡etiiquiaa aca poa jayojja jama niñebame a'a ajji Eyacuiñajji!

¹¹¡A'a pajea'yojji! Ecuana etiiquiana quea mimishi poaninajejo mano ca'ya poa yahuajo nei. Jamaya Eyacuiñajjiya amajje esohui tehue mee ca poa esejaya ebajji. Jamajjeya jjeya ba mee cani e'e jojo nei oya quea quene poaje esejaya mimishijo. Jesosa Quito pojja'a jjeya poeje o'oya. ¡Jamajjeya etiiquiana quea mimishi nee nee poa jayojja a'a pojji!

¹²E'e pojja'a beca cuana quea quehua jjashahuubaquiani jama ba'a: —Eya quea pame nee poanijo eshahuua eya quea mimishi epo meeji pojjeama.

Chojja. ¡Jamaya jjashahuubaquicue ba'a: —Eyacuiñajji, ¡eya quea pame po meesahuacue! ¡Nahue neineicue mo; quea mimishi a'a po mee o'oyajji! —jamaya Eyacuiñajji nijje mimicue!

¹³Eshahuua ojjaña quea mimishi po mee sa acani. Ohuaya miquianaya quea mimishi po mee sa acani. Jamatii Eyacuiñajjiya miquianaya epajeal'yojji pojjeama. Ohuaya miquianaya ojaya epeejji quea pame nee po mee canijo, eshahuua miya quea mimishi epo mee'yojji pojjeama. Beshahua nei quea mimishi po mee canijo, ¡Eyacuiñajji nijje mimicue: —Jesosa, ¡eshahuua quea huesha nee huoojeacue! ¡Eya quea pame po meecue mimishi'ama epoji! —jamaya pocue!

Jesosaja bobo ijiañajo ¡a'a eshahuaja epeejji jama pojji!

¹⁴Jamajjeya ecuea epeejji cuana, ¡eshahuaja epeejji cuana nijje a'a jjapeequijji! ¡Onaya eshahua nijje mimiani yasijje a'a poquijji! ¡Epana'yo cuanajo a'a jjashahuubaquijji pe'a'i! ¹⁵Ecuea eba miquianaya quea jjashahuubaqui ja'a nee poani. Jamajjeya ¡ecuea esohuijo jjashahuaba neineiquicue, quea ja'a nee! ¹⁶Eseyaya Jesosaja bobo ijiañajo oya esejaya mimishijo mano'yonaje pajea'yo jjima yajji. Jesosaja bobo ijiañajo, oja ena ishi jjimahuajo pe'a'i eseya Eyacuiñajji nijje emimi jama ba'a: —Eyacuiñajji, miya quea pame nee nee.

Ma ena ishi jjimahuajo Jesosa Quitoja ena' ecuaya'yojo eseya ejjashahuubaqui jama ba'a: —Jesosa mano'yonaje ecuea mimishi cuijeal'yojji sosejje —jamaya jjashahuubaquime epo.

Pahui ij{jia jjimahuajo eseya ejjashahuubaqui Jesosa Quitoja yamijo jama ba'a: —Jesosa Quito eseya ojaya epeejji quea pame nee epo meeiji sosejje mano'yonaje.

¹⁷ Pahui mijisisi jjimahuajo oe pahui yani. Eseya Jesosaja epeejji cuana quea huiso. Jamatii pahui oe jayojja jama eseya poani. E'e, eseya ojee nequianijo eseye nei jayojja nequiani Jesosa Quito nijje nei jjapeequianijo.

¹⁸ ¡Jjashahuubaquicue ecuanajaya etiiquianajo, Jodio cuanajo! Oya cuana yahuajo nei jama poa ba'a: Eyacuiñajji nijje emimijji cuaa noe Eyacuiñajji yasijje equia'yo dahua ca poa. Noe dahua tehuejea jjimahua ij{jia caninaje Eyacuiñajji nijje jjapeequianiya jjejojo. ¹⁹ ¿Ajeo acuae eyaya miquiana jama huohuaña, ae ba meesahuajji? Jama ba'a: Bobi eyacuiñajji nisho huasijje quia majje dejja cuaa jamatii ij{jia cani. Eyacuiñajji nisho eshe pojjeama, Eyacuiñajji e'e jojo nei pojjeama, de. ²⁰ Jamatii eshahuaja epeejji cuaa bobi quia cani eyacuiñajji nisho epana'yo huasijje pojjeama. Maya eshahua cuana huasijje quia cani. Jamajjeya oya cuana Eyacuiñajji e'e jojo nei nijje jjapeequi ajja. Miquianaya Jesosaja epeejji cuana, ¡a'a eshahuaja epeejji jayojja jama ajji! ¡A'a eshahua cuana nijje pojji!

²¹ Jesosa Quito nijje jjapeequianiya ¡eshahua cuana nijje a'a jjapeequijji! Pea oya, de. Jamajjeya Jesosaja ena ishiañajo, oja bobi ij{jiañajo pea'ai ¡bobi eshahua huasijje equia'yo a'a ij{jia pea'aijjji! ²² Eshahua cuana Eyacuiñajji boti'ama nei nei. ¡A'a esejaya Emeshi Mese nei Eyacuiñajji quea quene po meeiji eshahua nijje jjapeequianijo! ¿A'a miya quea ca'a nee poso jjabaquianii? ¿A'a ya Eyacuiñajji ca'a'ama poso aña? Jamajjeya Jesosa nijje jjapeequianii ¡a'a eshahuaja epeejji po pea'aijjji!

²³ Jesosa Quitoja epeejji beca cuana jama mimiani ba'a: —Eya Jesosaja epeejji poanijo ojjaña bobi, epana'yo huasijje quia'yo pea'ai ij{jia majje quea mimishi pojjeama poani —jamaya poani.

E'e jojo nei. Jamatii eyaya miquianaya saja'aña jama ba'a: —Chojja. Ma bobi ij{jia majje quea pame pojjeama poani. Maaya ojjaña Jesosa nijje jjapeequi meesahuua ajja. Miquianaya jama jjashahuuba quehuaquianii pea'ai ba'a: —Ecuaaya ojjaña aje mimishi'ama poanijo.

Eyaya ca ca miquianaya huohuaña jama ba'a: —Ojjaña quea pame pojjeama e'ajji. ¡Jesosaja epeejji quea ja'a pojjeama cuana quea mimishi po mee o'oya chana! ²⁴ Jamajjeya a'a quea quehua jjashahuubaquijji jama ba'a: —Eyaya ojjaña bobi jjesheje ecuea e'ij{jiajjji —jamaya poanijo miquianaya Jesosaja pea epeejji cuanajo jjashahuubaqui ajja.

Chojja. ¡Jjashahuubaquicue pea cuana Jesosa nijje ejjapeequi meesahuajji quea ja'a nee! ²⁵ Jamajjeya noe edahua'yo jjesheañajo ¡a'a huohui'ajjajji jama ba'a: —¿A'a jiquio noe edahua'yo eshahua huasijje quia? —a'a jamaya huohui'ajjajji!

Jamajjeya ¡miyaya maya ij{jiaque quea bihui nee, mete'ama! ²⁶ E'e, Eyacuiñajji esaohui etehue'yo jama poa ba'a:

“Eyacuiñajjiya ojjaña meshi cuana pana ca'ya poa. Ojjaña aquiana pe'a'i pana ca'ya poa. Jamajjeya ojaye nei meshi, aquiana pe'a'i, ojjaña”.

Jamaya poa yahuajo nei.

²⁷E'e pojja'a Jesosaja epeeiji pojjeamaa miya iyaa caje ojaya equi yasijje bobi ijjiacia. Jamajjeya ojaya equi yasijje poqui majje jbobi ijjiacue mete'ama! Ijjial'ijjianijo ja'a huohui'ajjajji jama ba'a: —¿A'a jiquio noe edahua'yo eshahua huasijje quia? —a'a huohui'ajjajji! ¡Jamatii ijjiacue mete'ama!

²⁸Jamatii ojee ijjiail'ijjianiyi, pea eseja epeeijiya miya jama huohui caje pojja'a ba'a: —Jiquio bobi eshahua huasijje quia —jamaya acajje ja'a maya bobi ijjiajji! Ma bobi quea pame nee e'ijjiajji. Matatii miya Jesosaja epeeiji neiya ma bobi ijjiña ba majje esejaya epeeiji quea yeno poaje pojja'a. ¡A'a oya quea yeno, quea bicho po meeji! ²⁹E'e, miya Jesosaja epeeiji quea pame poaniya ijjiaje mete'ama. Matatii mi ba majje Jesosaja epeeiji quea ja'a pishana quea mete po chana' miyaya ma bobi ijjiajo. Jamajjeya ja'a ijjiajji! ¡Oya quea bei po meecue; miya pe'a'i quea bei pocue!

E'e pojja'a beca cuua huohui caje jama ba'a: —Eyaya Jesosaja epeeiji poaniya ojjaña bobi ijjiña mete'ama —acaje.

Eya ca ca jama po ajja. Pea cuana quea jjashahuabaqui ja'a pojjeamajo quea mete poanijo, eyaya ojjaña bobi ijjiña ajja.

E'e pojja'a onaaya jama acaje pe'a'i ba'a: ³⁰E'e, eyaya Eyacuiñajji bihuiaña ojjaña bobi ijjiña jjimahuajo. Jamajjeya eyaya ojjaña bobi ijjiña mete'ama. Bobijo eyaya Eyacuiñajji bihuiaña; jamajjeya ja'a enijje mimijajiji eya ojjaña bobi ijjiñaajo! —jamaya acaje pojja'a onaaya.

³¹Jamajjeya jiquio esohui bacue! Miyaya bobi ijjiñaajo, e'ishiji ishiañajo pe'a'i ojjaña miquea eba'ejjijo pe'a'i jjashahuabaquicue jama ba'a: —Eyaya ojjaña cuana Eyacuiñajji bihuia mee sa aña.

³²Jamajjeya quea ja'a nee ba'e tiitiicue! ¡A'a esejaya epeeiji cuana quea mimishi po mee o'oyajji! ¡Jodio cuana, Jodio pojjeama, Jesosaja epeeiji cuana pe'a'i a'a quea mimishi po mee o'oyajji! ¡E'e, quea ja'a nee ba'ecue ojjaña cuana Jesosa nijje quea ja'a nee ejjapeequi meesahuajji! ³³¡E jayojja jama pocue! Eya jjashahuabaquianai ona quea bei po meesahuajji. Eya jjashahuabaqui ajja jama ba'a: —¿Ae shai ejoo quea pame?

Eyaya ca ca ojjaña quea bei po mee sa aña. Jamaya eyaya aña ojjaña Jesosaja epeeiji epoji.

11 ¹Eyaya Jesosa Quito esohui jayojja jama aña. ¡Jamajjeya e jayojja jama pocue miquianaya!

Esohui Eyacuiñajjiya equi yasijje dobiqianijo

²Ojjaña pojja'o miquianaya ejoo jjashahuabaquianai. Ecuea esohui jayojja jama po tiitiiani, miquianaya. Jamaya quea pame. ³Jamatii jecuea esohui etehue'yo ba neineicue yahue cuana, ehuanase cuana pe'a'i! Yahue cuana ojaya ehuanase huoojeajji poani. Jesosa Quito ojjaña huoojeajji poani tii,

dejja cuana huoojeajji poani, ojaya epeejji cuana huoojeajji poani. Ojaya Chii Eyacuiñajji eyajo ani Jesosa Quito huoojeajji poani pe'a'i. ⁴Jamajjeya dejja cuana, Eyacuiñajjiya equijo nequi onijje mimianijo, oja sohui huohui canijo pe'a'i ʃejaahuojja cajjajeal'yocue! Jaahuojjajjiya Eyacuiñajjiya esohui huohui canijo Jesosa Quito cajaa ajji jayojja jama poani. ⁵Epona cuana ca ca Eyacuiñajjiya equijo ani onijje mimianijo, ojaya esohui huohui caqui pe'a'i ijjasapataquicue! E'e, epona jjasapataqui ajjajo oja yahue cajaa ajji jayojja jama poani. Jamajjeya jjasapataqui ajjajo esao cobojea majje jayojja jama poani, quea bicho poani. ⁶E'e, eponaa jjasapataqui ajjaa jjejojo cacobojea cahua. Jamatii epona esao cobojea majje quea bicho nee nee poaje. Jamajjeya bicho'ama epoiji epona cajjahuojja taquiahua Eyacuiñajjiya equijo mimianijo.

⁷Dejja cuaa, Eyacuiñajjiya epeejiya ejaahuojja iya ajja Eyacuiñajjiya equijo esohui huohui canijo. E'e, Eyacuiñajji dejja cuanajo jama poa ba'a: —Dejja cuana oijaña e'aquiana mese poaje oijaña aquiana meshijo ani. Jamaya Eyacuiñajjiya oijaña ba mee caje ohuaya dejja pana ca'ya poa quea pame nee oya jayojja jama epoiji. Jamajjeya ja'a epona jama pojji! ¡A'a jjahuojjataquijji nequiana dejja! Oya jayojjaya epona oja yahueja esohui jayojja jama acani oja yahueja yajjijo. ⁸Eyacuiñajjiya dejja ebionei pana coo ca'ya poa. Dejja pana majje quijje epona pana ca'ya poa dejjaja edojjojaniji sa!. ⁹Eyacuiñajjiya dejja pana jjima eponaja yajji. Chojja. Epona pana ca'ya poa dejjaja yajji. Dejja epona huoojeajji poa. Jamaya Eyacuiñajjiya a sa aca'ya poa. ¹⁰Jamatii epona cuana cajjahuojjataquiahua Eyacuiñajji nijje ojee mimianijo. Jamajjeya oijañaa ba cani yahue epona huoojeajji poani.

¹¹Jamatii jjeya Emeshi Mese nei Jesosa nijje jjapeequi majje ehuanase cuaa yahue cuana ba'e meesahua cani Jesosa Quito. Yahue cuaa ehuanase jaahuana cani pe'a'i. ¹²E'e, yahuajo nei nei dejja pana majje quijje Eyacuiñajjiya epona pana ca'ya poa dejjaja edojjojaniji sa!, ebionei epona. Jjeya ca ca dejja sho'i cuana eponaja mejo cuayani. Jamatii Eyacuiñajjiya oijaña pana ca'ya poa, oijaña nei nei.

¹³Jamatii jjashahuabaquicue epona cuanajo! ¿A'a oijaña ojee Eyacuiñajji nijje mimianijo epona camimiahua jjahuojjataqui jjima? ¿A'a jamaya quea pame nee? Chojja, quea pame pojjeama. ¹⁴Ecuanaja eba dejja cuana saoiji quea pame pojjeama. Epona jayojja poani, saoiji. ¹⁵Epona saoiji ca ca quea pame nee nee. Eponaja esao ao ojaya ejjahuojja taquijji jayojja. Jamaya Eyacuiñajjiya quea boti nee nee. ¹⁶E'e pojja'a eponaja esao ajo, ejjahuojjataquijjiyo pe'a'i pea cuana jjamimicuajea nobiajeaqui sa poani enijje. Jamatii ecuea esohui jiquio jama ba'a: Epona cuana Eyacuiñajjiya equijo cajjahuojjataquiahua. Jesosaja epeeji cuaa oijaña cuiñajjiyo ba'leya jamaya huohui cani pe'a'i.

¡Pea Jesosaja epeeji cuana nijje a'a quea mimishi pojji!

¹⁷Ecuea epeeji cuana, jjeya pea esohui eyaya tehueje miquianaja ebajji. Miquianaya Eyacuiñajjiya equijo ojee anijo quea pame pojjeama poani.

Ojjaña cuana Jesosa nijje quea ja'a nee jjapeequi meesahua jjima. Pea epeejji cuana ca ca quea yeno po mee año. Jamajjeya eyaya miquianaya huohuije Eyacuiñajjija equijo quea ja'a nee epojji. ¹⁸Pea cuaa eya huohui canaje jama ba'a: —Jesosa Quitoja epeejji cuana Conitojo ba'e Eyacuiñajjija equijo ojee jjachichaqui majje jjamimicuiajea nobiajeaquiani. Oe pojji epeejji cuaa pea epeejji cuana nijje jjapeequi sa po ajja acani cuaa —jamaya acani cuaa.

E'e pojja'a miquianaya jamaya quea tai poani. ¹⁹Jesosaja epeejji quea bei pojjeama mimicuiajeanobiajea sa poani, pea nijje jjapeequi ajja. Jamaya quea tai. Jamatii jamaya poanijo, ojjañaa ba caje ache dejja cuana Jesosaja epeejji e'e jojo nei pojjeama,ache oja epeejji e'e jojo nei ba caje pea'ai. ²⁰E'e, miquianaya ca mi ca oe Eyacuiñajjija equi yasijje dobiquiani esejaya Emeshi Mese nei Jesosaja bobi ojee ijjiāa poso. Chojja, Jesosajo miquianaya jjashahuabaqui ajja, oya esejo mano'yonajejo jjashahuabaqui ajja. ²¹Ojee ijjiā'ijjiā ajja pea'ai miquianaya. Chojja, pea cuana ishoa ajja. Jamajjeya beca cuaa quea huiso ijjiā cani. Quea huiso ishi cani pea'ai, quea jejjie nee nee poani. Pea cuana ca ca quea shoe nee poani. ²²Jamajjeya bobi quea huiso ijjiā sa poanijo jmiquianajaya equijo ijjiā'ijjiā socue! ¡A'a Eyacuiñajjija equijo quea dejja tai pojji! ¡Jesosaja epeejji aema' a'a quea bicho po meeji ojaya bobi quea huiso chamajo! Eyacuiñajjija equijo quea tai añajo, eyaya ojjaña miquianaya tecueaña jama ba'a: —¡Eyacuiñajjija equijo ani a'a Jesosaja epeejji quea mimishi ajji bobijo!

¡Jesosaja bobi e'e jojo nei ijjiacue o pajea'yo jjima yajji!
(Mateo 26.26-29; Macoso 14.22-25; Noca 22.14-20)

²³Esejaya Emeshi Mese neiya Jesosaa eya ba mee canaje jiquio esohui oja bobi ojee e'ijjiājjijo, oya esejaya mimishijo mano'yonaje pajea'yo jjima yajji. Maya yahuajo eyaya huohuinaje jama ba'a: —Oe mecajje esejaya Emeshi Mese nei Jesosaja epeejji nishohua oya quia canaje dejja maseja equecua'yojji. Iña majje dojo canaje cuaa. Iña jjimahuajo Jesosaa oe pahui jjeshe canaje. ²⁴Eyacuiñajji bihuia majje pahui mijisisi canaje. Ojaya epeejji cuana jama huohuime acanaje ba'a: —Jiquio pahui emijisisi ecuea eyami. Eya miquianajaya mimishi cuanajo mano'yo. Jamajjeya jiquio pahui ijjiānajo miquianaaya eya miquianaja mimishijo mano'yonaje pajea'yo jjima yajji —Jesosa poanaje.

²⁵Pahui ijjiā majje Jesosa Quitoja caneco jjeshe canaje. Eyacuiñajji bihuia ca o'yanaje. Huohui canaje jama ba'a: —Jiquio ena canecojo nequi ecuea ena'. E'e, ecuea ena' cuayaquije'yo. Eya ojjañaja mimishijo mano'yo. Jamajjeya Eyacuiñajjiya miquianaya huohui caje, ma ohua miquianajaya mimishi cuana cuijea caje'yo e mano'yajo, ma oja yahuajo huohui jjima. Jamajjeya jiquio ena canecojo nequi ishiañajo jjashahuuba tiitiiquicue jama ba'a: "Jesosa mano'yajo oja ena' cuayaquinaje ecuea mimishi cuijea'yojji" jamaya acue —Jesosaa acanaje.

²⁶Jiquio pahui, ena canecojo nequi pea'ai Jesosa Quitoja bobi poani. Jamajjeya ojee ojaya bobi ijjiānajo o shahuaba poquiajji, ma oya eseja

mimishijo mano'yonaje. ¡Jamaya acue esejaya Emeshi Mese nei Jesosa Quito poe o'oya jjimahuajo! ²⁷ Jamajjeya esejaya Emeshi Mese nei Jesosaja bobi, pahui ijjiāñajo ojaya ena canecojo nequi pealai ojee ishiañajo ja'a quea dejja tai pojji! Quea nishehui a'a pojji! JA'a quea mimishi jjashahuabaquijji pealai! Jamaya poanijo Jesosa quecuayojji jama poani miya. Eyacuiñajjiya quea nee nee po mee caje'yo. Jamajjeya quea ja'a jjashahuubaqui ajja a Jesosaja bobi ijjiāñaji, ojaya ena canecojo nequi pealai a'a ishiji! Quea ja'a ba'yaniya quea bihui nee Jesosaja bobi ijjiacue, ojaya ena ishicue pealai!

²⁸ Jamajjeya Jesosaja bobi ijjiāñajo, ojaya ena ishi jjimahuajo pealai jjashahuaba neineiquicue jama ba'a: —¿A'a eya e'e jojo nei Jesosa Quito nijje jjapeequiani quea ja'a nee? —jjashahuabaquicue!

Majoya pahui ijjiacue, e'ishiji ishicue quea bihui nee pealai! ²⁹ Jesosa Quitoja esohui ojaya bobijo miquea quea quehuajo ja'a ijjiāñaji! Jesosa mijo mano'yonajejo jjashahuabaqui jjimaa ja'a oja bobi ijjiāñaji! Miya ijjiāñajo Eyacuiñajji quea quene nee nee po chana!. Miya quea nee po mee caje. ³⁰ Quea hioso miquiana nijje nequiya Jesosajo jjashahuabaqui jjima oja bobi ijjiāñaji cani. Jamajjeya quea mano poani, beca cuana ca'a'ama poani. Jamajjeya beca cuana mano'yonaje pealai. ³¹ Miquea eba'ejji jjashahuabaqui majje mimicue Eyacuiñajji nijje jama ba'a: —Ecuea mimishi cuana cuijear'yocue! —jamaya acue!

Jamajjeya Eyacuiñajjiya miquea mimishi cuijear'yo majje miya etecueajji pojjeama Jesosaja bobi ijjiāñajo. ³² Jamatii Eyacuiñajjiya jjeya Jesosaja epeejji quea ja'a pishana quea mano, quea nee po mee cani ejjabahuejjaqui meeiji, mimishi cuana epajea mee'yojji. Jamajjeya quijje Jesosaja epeejji pojjeama cuana nijje equiyo'yojji pojjeama cuaquijo eshahuaja epeejji cuana nijje.

³³ Jamajjeya epeejji cuana, ishajja'ajjacie mo! Miquianaaya Jesosaja bobi ijjiāñajo ojee oe ijjiacue o shahuaba'yojji! JA'a mee nei ijjiāñaji; ishoa socue cuana! ³⁴ Ojjaña joya quea naba taja, quea shoe pealai poani equijo ca ijjiāñajiua Jesosaja bobi ijjiāñajo. Jamajjeya Eyacuiñajji quea tecue po ajja miquiana nijje, quea pame nee ojee Jesosaja bobi ijjiāñajo.

Miquea esohui etehue'yojo, quea hioso eya miquianaaya huohui'ajjanaje. Maya eyaya huohuije miquiana huasijje poe o'oya majje.

Edojoshahua Pameya eseaya Eyacuiñajjiyo chaco meesahua cani

12 ¹ Ecuea epeejji, miquianajaya esohui etehue'yojo eya huohui'ajjanaje miquianaaya Edojoshahua Pamejo. Jjeya nei eyaya maya huohuije miquianajaya ebajji. Edojoshahua Pameya eseaya Eyacuiñajjiyo chaco meesahua cani. Ojjaña Eyacuiñajjiya ejjashahuabaquijji jayojja jama ameesahua cani. ² Yahuajo Jesosa Quito nijje jjapeequi jjimahua miquianaya jjapeequinaje eshahuaja cuana nijje. Eyacuiñajji nisho nijje miminaje, acui ejehui'yo nijje pealai. Maya shajjama', nabama' pealai. Jamaya miquianajaya

eba.³Beca cuana jama siajje pome poani ba'a: —Jesosa siajjepoji. Oya Eyacuiñajji Bacua Ejja pojjeama —jama siajje pomeya poani.

Jamajjeya miquianajaya eba oya cuana Edojoshahua Pame nijje jjapeequi ajja. Onijje jjapeequianijo ca ca Edojoshahua Pameya oeyaya eseya huohui meesahua cani jama ba'a: —Esejaya Emeshi Mese nei oe nei nequi, Jesosa Quito —e'e, jamaya Edojoshahua Pameya oeyaya eseya huohui meesahua cani.

⁴Edojoshahua Pame oe neiya eseya amee cani Eyacuiñajji quea pame nee. Oe epeejji oe aquiana quea pame nee Eyacuiñajji ameesahua cani. Beca cuana pea aquiana quea pame nee ameesahua cani. Quea huiso aquiana cuana Eyacuiñajji ameesahua cani Edojoshahua Pameya.
⁵Esejaya Emeshi Mese oe nei yani. Ojaya nei yajjijo eseyaya chacoña. Ohuaya ojaya epeejji cuana huoojea cani quea huiso ojaya yajjijo quea pame a'yohua. Ojaya yajjijo ohuaya chaco meesahua cani ojjaña echaco.
⁶Eyacuiñajji oe nei yani. Ohuaya Jesosaja epeejji cuana huoojea cani ojaya echacojji cuana a'yohua. Oe epeejji oe echacojji ameesahua cani, Eyacuiñajjiya. Pea epeejji pea echacojji ameesahua cani. ⁷Edojoshahua Pameya Jesosaja epeejji cuana quea pame ameesahua cani peal'ai. Jamajjeya ojjaña ba mee caje oya ese nijje nequi. E'e, ohuaya Jesosaja epeejji cuana quea ja'a ameesahua cani ojjaña Jesosa nijje ejjapeequi meesahuajji. ⁸E'e, Edojoshahua Pameya Jesosaja epeejji beca cuana quea jjashahuubaqui ja'a po mee cani Eyacuiñajji ejjashahuubaquijji e'e jojo nei ehuohujji. Pea epeejjiya Eyacuiñajjiya esohui jayojja jama onaya ba meesahua cani quea ja'a nee. ⁹Pea epeejji cuaa Jesosaja epeejji cuana quea ja'a, mete'ama peal'ai po mee cani. Beca epeejji cuana emanojaa cuana huaquia meesahua cani Edojoshahua Pameya. ¹⁰Ohuaya pea epeejji cuana ma dejjaajjima acani ameesahua cani. Pea epeejji Eyacuiñajjiya esohui huohui meesahua cani quea ja'a nee, pea ba'e meeiji. Beca cuana ba meesahua cani ache cuana e'e jojo nei ojaya, Edojoshahua Pameja huoojea'yo poani ebajji. Ache dejja eshahua nijje quehuajje jjapeequiani ba meesahua cani peal'ai. Edojoshahua Pameya beca cuana Eyacuiñajji emimi mimi meesahua cani. Pea cuana ma emimi huohui meesahua cani ojjaña cuanaja ebajji. ¹¹E'e, Edojoshahua Pameya ojjaña Jesosaja epeejji jamaya ameesahua cani quea huiso. Ojaya ejjashahuubaquijji ojaya epeejji cuana huoojea cani, Edojoshahua Pameya.

**Esejaya Emeshi Mese oe nei yani; ojaya epeejji
cuana oja yami jayojja jama poani**

¹²Ecuea eyami oe nei yani. Yaa cuana yani, equise cuana peal'ai yani. Quea huiso pea aquiana cuana yani ecue eyamijo. Jamatii ecuea eyami oe nei. Oya jayojjaya Jesosaja epeejji cuana poani, quea huiso ojee onijje jjapeequianijo. Jamatii ojjaña oe eyami jayojja jama poani; Jesosa Quitoja

eyami jayojja jama eseya poani. ¹³Jamaya poanaje ojjaña eseya ojaya epeejji cuana poanijo. E'e, Jodio cuana, Jodio pojjeama cuana ojaya epeejji poani. Sosema' chacochacoani cuana, echaco mesema' pea'ai ojaya epeejji poani. Jamajjeya Edojjoshahua Pameya eseya Jesosa Quitoja eyami jayojja jama po mee canaje ojjaña, onijje jjapeequianijo. Edojjoshahua Pameya esejo nequiyi Jesosaja epeejji quea ja'a po mee cani.

¹⁴E'e, esejaya eyami oe nei yani. Jamatii yaa yani, equise yani, ecojja yani, quea huiso pea aquiana yani esejaya yamijo pea'ai. ¹⁵Ejiojji eme' jayojja jama pojjeama. Jamatii ejiojji quea pame nee. A'a ejiojji jama poaje pojja'a ba'a: —Eya eme' jayojja pojjeamajo eyamijo enequijji pojjeama —¿a'a jamaya mimi majje enequijji pojjeama? Chojja, jamaya po majje oya jamatii eyamijo nequi, de.

¹⁶E'e, eshajja ecojja jayojja jama pojjeama. Jamatii eshajja pea'ai quea pame nee, esapajo nequi pea'ai. Eshajja jama mimijajime epoji pojjeama ba'a: —Eya ecojja jjemo eyamijo nequime —jamaya mimijaji ajja, jamatii jamaya po majje eyamijo nequime, de.

¹⁷E'e, ecuea eyami ecojja oopana pojjeama. Chojja. Eshajja yani pea'ai ejjashajja'a'jjaquijji. Ecuea eyami eshajja oopana pojjeama. Yani ehui pea'ai ejjashiye'a'jjaquijji. ¹⁸E'e, Eyacuiñajjiya ecuea eyami pana ca poa. Ohuaya sa cani jayojja jama aca poa. Jamajjeya ecojja cuana, eshajja cuana, ehui cuana, quea huiso pea aquiana pea'ai pana ca poa, ohuaya. ¹⁹Jamaya epana jojjemo eya ese ejja pojjeama pome. E'e, Eyacuiñajjiya ecuea eyami ecojja oopana ajiima poa. Eya ecojja oopana e'a jojjemo eya ese ejja jayojja jama pojjeama pome. Jamajjeya ohuaya ecue eyamijo quea huiso aquiana pana canaje, jjashajja'a'jjaquijji po mee canaje, jjashiye'a'jjaquijji po mee canaje pea'ai. ²⁰E'e jojo nei ecuea eyamijo yani quea huiso aquiana. Jamatii ecuea eyami oe nei jayojja jama poani. Oya jayojjaya Jesosaja epeejji quea huiso nee yani. Jamatii ojee onijje jjapeequianijo eseya oe jayojja jama poani, Jesosaja eyami jayojja jama poani.

²¹Ecuea ecojjaa eme' cajaa a'ajja poani. Esapaa ejiojji cajaa ajiima acani pea'ai. Chojja ojjaña ojee quea pame nee nee poani. ²²Eyami dojjojo ca'a'ama. Jamatii eyami dojjojo cuana chama' jojjemo eyami eshe pojjeama pome.

²³Beca eyami dojjojo e'e pojja'a hua'ama. Jamatii eseyaya eyami dojjojo ani nahue neineiaña. Pea aquiana eyamijo anijo eseyaya daqui huoshoña bicho'ama epoji. ²⁴Jamatii pea eyamijo esapajo, emejo bicho'amajo daqui mi huoshoña. Eyacuiñajji ca ca bicho'ama eseja eyamijo. Ojjaña aquiana eyamijo oja pana. Ojjaña eyami ojee nequia canaje oe eyamijo. Jiquio ecua eseyaya esejaya eyami nahueña ojjaña eyami, jamatii beca cuanajo se quea bicho poani jama jayojja ¡Jesosaja epeejjiya pea epeejji jjapeequi meesahuacue onijje quea pame nee! ²⁵Ojjaña aquiana eyamijo ani oe eyami poani, ojee acani quea pame nee. Oe eyami pea eyamiya nahue cani. Jamajjeya eyami quea pame nee poani. ¡Ma jayojja jama eseyaya Jesosaja epeejji ojee ejjachacoqui onijje!

²⁶E'e, oe mijijje eyami quea nee poanijo, pea mijijje quea mano poaje pe'a'i. Ojjaña mijijje eyami cuana quea aja poanijo, quea pame nee poaje ojjaña. Oya jayojjaya eseya Jesosaja epeejji oe eyami jayojjaya poani. Jamajjeya oe epeejji quea nee poanijo, ojjaña quea yeno poani ojo. Oe epeejjiya quea pame nee nee acanijo, ojjaña onijje quea bihui nee poani.

²⁷Jamajjeya ojaya ejjashahuabaquijji jama Eyacuiñajjiya esejaya eyami cuana pana ca poa quea huiso peapea cuana eyami. Oya jayojjaya Jesosaja epeejji cuana ojaya eyami quea huiso cuana jayojja jama poani.

²⁸Jamajjeya Eyacuiñajjiya eseya Jesosaja epeejji cuana quea huiso peapea jjashahuabaqui'yome asahua cani ojaya epeejji cuana quea ja'a epoji. E'e, ohuaya beca epeejji huohui canaje jama ba'a: —Miya ecuea ehuoojeacoo Jesosa Quitojo huohuiya.

Ohuaya pea cuana huohui canaje jama ba'a: —;Ojjaña cuiñajji yasijje esohui quea pame nee Jesosa Quitojo huohuiquicue quea ja'a nee ojjañaja eshajja'ajjajji!

Pea cuana huohui canaje jama ba'a: —;Jesosa Quitoja epeejji cuana esohui huohuijji pocue!

Pea cuana ma dejjaajjima acani ameesahua canaje. Pea cuana emanoja cuana huaquia meesahua canaje pea'a'i. Pea epeejji cuana ona quea pame ba'e meesahuaJJji po mee canaje. Pea epeejji emeshi mese jayojja jama ojjaña jaahuanajji po mee cani. Pea cuana Eyacuiñajjiya pea emimi mimi meesahua cani. ²⁹¿A'a ojjaña Jesosaja epeejji cuana Eyacuiñajjiya huoojea cani esohui quea pame Jesosajo huohui coohua? ¿A'a ojjaña epeejji cuaa Eyacuiñajjiya esohui quea huesha huohui cani? ¿A'a ojjaña ojaya epeejji cuana esohui huohuijji poani? ¿A'a ojjaña epeejji ma dejjaajjima acani ameesahua cani? Chojja. ³⁰¿A'a ojjaña epeejji cuaa emanoja cuana huaquia mee cani? Chojja. ¿A'a ojjaña ojaya epeejji cuana Eyacuiñajjiya emimi mimi meesahua cani? Chojja. ¿A'a ojjaña epeejjiya ma emimi eseja esohuijo huohui cani ojjañaja ebajji? Chojja. ³¹E'e, Edojjoshahua Pameya eseya, Jesosaja epeejji cuana Eyacuiñajjiyo chaco meesahua cani. ¡Miquianaaya Eyacuiñajjiyo quea pame nee chaco neinei sa añajo quea pame nee oe acue, pea epeejji cuana quea ja'a nee eba'e meesahuaJJji! Jamatii eyaya miya huohuije e'e jojo nei joya ojjaña quea jea nee acani Eyacuiñajjiya ba cani quea pame nee nee. Jamajjeya ojjaña quea jea acue!

Eyacuiñajjiya eseya ojjaña quea jea nee ameesahua cani

13 ¹E'e, ojjaña e'e jojo nei quea jea acue jama ba'a: E'e pojja'a ojjaña dejjaja emimi, esohuidojijiya emimi quea pame nee pea'a'i mimi majje jamatii pea epeejji ecuea quea jea nee pojjeama. Jamajjeya ecuea pea cuana Jesosa nijje ejjapeequi meesahuaJJji pojjeama. Eya mimiani emimijeajji, esho'iquiaa cuiaqueyajea cani jama quea shajjaquijjo epoji. ²Eyacuiñajjiya eya ojaya esohui quea huesha nee huohui meesahua cajje ojaya ejjashahuabaquijji

ba meesahua cajje pe'a'i, ojjaña ojaya esohui etehue'yo ba meesahua cajje pe'a'i, ma dejaa ajjima acani ameesahua cajje pe'a'i jamatii pea epeejji ecuea quea jea nee pojjeama. Jamajjeya eyaya pea cuana Jesosa nijje ejjapeequi meesahuajji pojjeama. Eyacuiñajjiya eya ba cani mimishi cuijea'yo jjima pea'a'i.
3 Ojjaña ecuea aquiana cuana aema' cuana huasijje quiaje'yo pojja'a; Jesosa nijje jjapee nishoquianijo, e'e pojja'a pea cuua eya iña caje ejeanobiajeajji. Jamatii pea cuana quea jea nee a'ajjajo eyaya oya cuana eba'e meesahua'yoji pojjeama Jesosa nijje. Eyacuiñajjiya eya ba cani mimishi cuijea'yo jjima pea'a'i.

4 Pea cuana e'e jojo nei ecuea quea jea nee nee amajje oya cuana ecuea tecuea cuajiji pojjeama. Quea bei poaje. Pea cuanaja aquiana quea jea yajji pojjeama. Ecuea ehuohuijji pojjeama jama ba'a: —Eya ca iña quea pame nee nee poani.

Pea jayojja po sa po ajja nei nei pe'a'i ca iña. **5** Pea cuana e'e jojo nei ecuea quea jea nee neejo ecuea eniñeabajji pojjeama. Pea nijje emimijajiji pojjeama. Quea nahue pojjeama poani, equenequene cuajiji pojjeama pe'a'i. Pea cuana e'e jojo nei ecuea quea jea neejo, eya onaa quea tai acajje, aquiana napa cajje pe'a'i eya quea yeno po tiitii ajja: —Onaaya eya quea mimishi acajje eyaya oya quea mimishi a pe'aije'yo —jamaya a'a jjashahuabaquijji.

6 Eyacuiñajji ecuea quea jea nee poanijo ecuea onajaya mimishi cuana boti'ama poaje. Ona quea pame nee poanijo ca ca eya quea bihui nee poaje pe'a'i. **7** Pea cuana e'e jojo nei ecuea quea jea nee poanijo e napajji cuana nijje quea quene po ajja. Oe epeejji pea epeejjiro siajje poanijo, ecuea eshajja'ajjajji pojjeama. Jesosa nijje jjapee tiitiiquije'yo jamatii quea camaja poanijo. Jjashahuuba tiitiiquije'yo jama ba'a: —E'e jojo nei Jesosaja epeejji poanijo, ohuaya eya ba'e tiitii mee caje'yo onijje eyajo.

8 Eyaya pea cuana quea jea nee atiitiije'yo. Jamaya sa poani Eyacuiñajji. Jjeya ca ca Eyacuiñajjiya ojaya epeejji cuana esohui quea pame huohui meesahua cani. Jamatii eyajo huohui pajaeje'yo. Jjeya beca cuana Eyacuiñajjiya emimi mimi cani. Jamatii eyajo ma emimi mimi pajea caje'yo. Jjeya Eyacuiñajjiya ejjashahuabaquijji ba meesahua cani oe pojji. Quijje eyajo ojjaña ba mee caje'yo quea huiso. **9** Jjeya eseyaya Eyacuiñajjiya ejjashahuabaquijji oe pojji nei ba mee cani. Jjeya Edojoshahua Pameya eseyaya Eyacuiñajjiya ejjashahuabaquijji oe pojji nei huohui meesahua cani. **10** Jesosa Quito poe o'oyajo ca ca eseyaya ojjaña Eyacuiñajjiya ejjashahuabaquijji cuana quea pame nee nee ba mee caje'yo.

11 Jama poaje ba'a: Eya esho'yahuajo oe pojji jjashahuabaquinaje quea pame pishana. Ecuea esohui cuana quea pame pishana poanaje pe'a'i. Tii majje ca ca etii jama jjashahuabaquime poanaje, quea ja'a nee. Quea ja'a nee huohuinaje pe'a'i. **12** Oya jayojjaya jjeya eseyaya Quito ba jjima aña ecojjaa. Jamajjeya ojjaña ojaya ejjashahuabaquijji ba mee jjima acani. Quijje poe o'oya majje ese cojja neijo nequi oya mimije'yo. Jjeya ohuaya ojjaña eseyaya ejjashahuabaquijji ba neinei cani. O poe o'oyajo eseyaya ojaya ejjashahuabaquijji ba neineije'yo pe'a'i quea ja'a nee. Oya eseyaya ba neineije'yo pe'a'i.

¹³E'e, Jesosa Quito poe o'oyajo, eseya onijke jjapee tiitiiquije'yo. Ojaya epoe'yojjiyo eseya jja'ishoa'ajjaquiani. Jjeya esejaya ojaya epeejji cuana quea jea nee poani. E'e, Jesosa Quitoja epoe'yojjiyo jja'ishoa'ajjaquiani, onijke jjapeequiani pealai. Ojaya epeejji cuana quea jea nee atiitiaña pealai. Jamaya Eyacuiñaggi sa poani.

Edojjoshahua Pameya eseya chaco meesahua cani Jesosa nijje

14

¹Jamajjeya jjashahuaba tiitiiquicue pea cuana quea jea nee e'ajji! Jamaya mimicue ba'a: —Eyacuiñaggi, ¡Edojjoshahua Pame huoojeacue e que mi jayojja ameesahuaa, Jesosaja epeejji cuana quea ja'a nee onijke ejjapeequi meesahuaaji! E'e, ¡miquea ejjashahuabaquijji huohui meesahuacue ojjaña meshi yasijje!

²Ojjaña joya Eyacuiñaggi emimijo mimianyi onajaya ba jjima esohuijo Eyacuiñaggi nijje mimianyi, pea cuana nijje pojjeama. Edojjoshahua Pameya maya mimi meesahua cani. Jamatii pea cuanaja maya emimi quea quehua. Eyacuiñaggiya ohuaye nei shajja'ajja cani. ³Eyacuiñaggiya esohui cuana quea ja'a nee huohui canijo ca ca Jesosaja epeejji cuaa quea ja'a shajja'ajja cani. Onijke jjapee neinequi meesahua cani. Quea bihui nee po meesahua cani pealai. ⁴Ojjaña joya Eyacuiñaggiya emimijo mimianyi onijke nei mimianyi. Oya oe nei quea bihui nee poaje. Joya Eyacuiñaggiya esohui quea ja'a nee huohuijji poaniya ca ca quea huiso Jesosaja epeejji cuana quea bihui nee po mee caje.

⁵Eya miquianajo jjashahuabaquiani jama ba'a: Ojjaña miquianaya Eyacuiñaggiya emimijo mimianijo jamaya quea pame pishana poaje. Eya quea bihui pishana poaje. Miquianaaya Eyacuiñaggiya esohui joya ojjaña eba esohuijo huohuijji ca jamaya quea pame nee nee, eya quea bihui nee nee poaje. E'e, Eyacuiñaggiya esohui quea ja'a nee huohui majje pea cuana Jesosa nijje ejjapeequi meesahuaña. Eyacuiñaggiya pea emimijo mimi majje aje oe pea cuana Jesosa nijje ejjapeequi meesahuaaji pojjeama. Pea epeejjiya Eyacuiñaggiya pea emimi, ma ojjaña quea quehua shajja'ajja majje cahuohui cahua esejaya esohuijo. Jamaya ohuaya huohui majje ojjaña Jesosaja epeejji cuana quea pame nee ejjapeequi meesahua caje Jesosa nijje.

⁶Jamajjeya epeejji cuana, eya miquiana que poe majje mimi ajja pea emimijo joya miquianajaya bajjima esohuijo. Chojja, maya emimi shajja'ajja majje miquianaya Jesosa nijje ejjapeequijji pojjeama. Quea ja'a nee ca ca eyaya Eyacuiñaggiya ejjashahuabaquijji miquianaya ba meesahuaje. Ojaya esohui eyacua Jesosaja ba meesahuaje pea'alai.

⁷¡Jiquio esohuijo jjashahuabauquicue pea'alai! Dejja cuanaja ba jjima pishanajo dehue quea ja'a nee miamia ajja. E'iñaqueyajji bajea jjimajo quea ja'a iñaqueyaqueyajji pealai. Jamatii quea shajjaquijjo poaje, quea quehua. Jamajjeya ojjaña eshajja'ajjajji pojjeama. ⁸Echacomeejjiya eshe'ana mia jjimajo, echacojji cuana poqui ajja chacohua. ⁹Oya jayojjaya miquianaya pea emimijo joya onajaya quea quehuajo mimianijo, miquea esohui onajaya

eshajja'ajjajji pojjeama. Jamajjeya jesohui joya onaja quea ja'a neejo huohuicue ojjañaja ebajji! ¹⁰E'e, dejja cuana quea huiso meshi cuanajo ba'yani. Quea huiso emimijo mimiani pea'ai. Jamatii ojjaña emimi ojjaña meshijo quea ja'a nee poani, ma meshijo ba'leja quea ja'a. Jamajjeya ojjañaja emimi onijje ba'e cuanaja quea ja'a nee. ¹¹Jamatii oe dejja pea emimijo joya ecuea quea quehuajo mimianijo oya pea dejja, eya ojaya pea poani pea'ai. ¹²Jamajjeya miquianaya Edojjoshahua Pame nijje quea pame nee a sa poanijo Edojjoshahua Pame nijje mimicue jama ba'a: —¡Eya ameesahuacue quea pame nee, quea ja'a nee! Jamajjeya eya quea huiso Jesosaja epeejji cuana onijje jjapeequi meesahuaje. E'e, ¡quea ja'a nee nee Eyacuiñajji esohui huohui meesahuacue mo!

¹³Jamajoya Jesosaja epeejji Eyacuiñajji emimijo joya pea cuanaja quea quehuajo mimi majje oya Eyacuiñajji nijje camimiahua jama ba'a: —Ecue Chii, ¡joya o miminaje mo huohui meesahua'yocue pea epeejji cuanaja quea ja'a nee epoji! ¡Maya esohui mo huohui meesahuacue quea ja'a nee onajaya ebajji! —jamaya mimicue Eyacuiñajji nijje.

¹⁴E'e, Eyacuiñajji pea emimijo ma ecuea ba jjimajo onijje mimi mee caje jamatii ma e miminaje ecuea quea quehua poani pea'ai. Edojjoshahua Pameya eya mimi meesahua cani ecuea ejjashahuabaquiji pojjeama. ¹⁵Jamajjeya eya jama poaje ba'a: Ecuea ejjashahuabaquiji quea ja'a nee jayojja eya mimije Eyacuiñajji nijje ecuea esohuijo; pea emimijo joya ecuea ba jjima esohuijo pea'ai eya onijje mimije pea'ai. Edojjoshahua Pameya eya sohuicuaya meesahua cani pea emimijo joya ecuea ba jjima esohuijo, ecuea edojjoshahua Jesosajo sohuicuayani; ecuea ejjashahuabaquiji quea ja'a nee jayojja jama eya sohuicuayani ecuea esohuijo pea'ai. ¹⁶Miquianaya pea emimijo Eyacuiñajji bihuiañajo, pea epeejji minijje Eyacuiñajji bihuiajji pojjeama. Ojaya ba jjima miquea esohui. ¹⁷E'e, miyaya Eyacuiñajji bihuiaña quea pame nee. Jamatii miquea emimi onajaya quea quehua. Jamajjeya miyaya Jesosaja epeejji cuana onijje jjapeequi sahua jjima aje.

¹⁸Miquianaya oe pojji mimiani Eyacuiñajji pea emimijo. Eyacuiñajji eya ojaya pea emimijo mimi meesahua canaje quea huiso. Jamajjeya eya onijje mimiani jama ba'a: —Jamaya Eyacuiñajji, miyaya eya quea pame nee anaje.

¹⁹Jamatii Jesosaja epeejji cuana ojee nequiani Eyacuiñajji esohui shajja'ajjajji, eyaya quea ja'a nee huohui sa aña joya onaja ojjañaja eba esohuijo. Esohui quea ja'a nee, quehua'ama mimianijo, ojjaña shajja'ajja caje quea ja'a nee. Jamaya quea pame nee nee. Huohui sa po ajja quea huiso esohui pea emimijo, joya onajaya ba jjima esohuijo. Jamaya quea pame pishana.

²⁰Ecuea epeejji cuana, ¡quea sho'i tai jayojja jama a'a jjashahuabaquiji! ¡Quea ja'a nee jjashahuabaquicue! ¡Jesosa Quitoja esohui ba neineicue! ¡A'a quea mimishi ba'ejjii pea'ai! ²¹Eyacuiñajjiya esohui yahuajo nei tehue mee ca poa jama ba'a:

“Pea cuana pea meshijo ba'e, ma pea esohuijo mimiani pea'ai eyaya huoojeaje Jodio cuana jjabahuejjaqui meeya. Jamatii oya cuana aje oe o shajja'ajja sa po ajja poaje”.

Jamaya Eyacuiñajjija esohui poa.

²²Jamajjeya Jesosa Quitoja epeeiji etiiya Eyacuiñajjija pea emimi shajja'ajja majje ba caje Eyacuiñajjiji e'e jojo nei ona nijje nequi. ¡Jesosaja epeeiji pojjeama cuana ca oe Eyacuiñajjija esohui huohuicue; joya o mimiani esohuijoya oe huohuicue! Esohui shajja'ajja majje oya cuana jjapeequije'yo Jesosa nijje. ²³Jamajjeya Jesosaja epeeiji cuana ojee nequianijo, e'e pojja'a ojjaña miquianaya Eyacuiñajjija pea emimijo mimije. Jesosaja epeeiji pojjeama cuaa, ojaya epeeiji eyacua pealaiya ma emimi shajja'ajja majje ¿ae shai oya cuana jjashahuabaquije? Miquianaya onajaya ba jjima esohuijo mimiani shajja'ajja majje jama acaje ba'a: —¡Dee! Jesosaja epeeiji cuana niñe poqui'yonaje. Jamajjeya quea quehua mimiani —acaje.

²⁴Jesosaja epeeiji cuaa ojee nequi majje Eyacuiñajjija esohui quea ja'a nee huohui canijo ca ca, pea cuana shajja'ajja majje ojaya mimishi cuanajo quea yeno poaje. E'e, Jesosaja epeeiji pojjeama cuana, ojaya epeeiji eyacua cuana pojja'a Eyacuiñajjija esohui shajja'ajja majje quea mete poaje jama ba'a: —Eyacuiñajjija eya quea nee nee po mee caje'yo, de, ecuea mimishijo.

²⁵Eyacuiñajjija esohui huohuijjiya ma dejja cuanaja ejjashahuabaquijji tai huohui cajo, shajja'ajja majje oya cuaa Eyacuiñajji bihuia caje ecui'oshajjajo nequiya. Jama poaje ba'a: —E'e jojo nei Eyacuiñajji miquiana nijje nequi —acaje cuaa. Jesosa nijje jjapeequije'yo pea'ai.

**¡Jesosaja epeeiji ojee nequianijo Eyacuiñajjija
esohui huohuicue quea ja'a nee!**

²⁶Jamajjeya ecuea epeeiji cuana, ¡bacute jiquio esohui! Miquianaya ojee nequi majje Eyacuiñajjija esohui huohuiya, jama acue ba'a: Oe epeeijiya Jesosa cabihuia cahua esohuicuayajjijo. Pea epeeijiya Eyacuiñajjija esohui cahuohui cahua. Peaa Eyacuiñajjija ejjashahuabaquijji pea cuana que cahuohui cahua. Majoya pea epeeiji Eyacuiñajjija pea emimijo mimi sa poanijo, peaa cahuohui cahua esejaya esohuijo. Jamajjeya ¡Jesosaja epeeiji ojee nequianijo quea ja'a nee acue! ¡Ojjaña Eyacuiñajji nijje jjapeequi meesahuacue! ²⁷E'e pojja'a beca cuana Eyacuiñajjija pea emimijo mimi sa poani. ¡Beca cuana, pea beca peejjima pojja'a mimi meecue, quea huiso pojjeama! Ma pea emimi mimianijo, ¡a'a ojee mimi meeji! ¡Oe epeeiji mimi pajea'yajo, pea mimi meecue! ¡Oya mimi pajea'yajo, pea mimi meecue! Ma epeeiji cuana Eyacuiñajjija pea emimijo mimi majje, peaa cahuohui cahua esejaya esohuijo ojjañaja ebajji. ²⁸Pea epeeijiya ma emimi ba jjimajo, ¡a'a mimi meeji! Jesosaja epeeiji cuana ojee nequi yasijje! Oya oe nei nequi majje Eyacuiñajjija emimijo camimiahua Eyacuiñajji nijje.

²⁹Miquiana ojee nequijo beca esohui huohuijjiya, pea beca peejjima pojja'a Eyacuiñajjija esohui quea ja'a nee cahuohui cahua, quea huiso pojjeama. Pea cuaa cashajja'ajja cahua. Shajja'ajja majje cajjashahuabaquiahua jama ba'a: —¿A'a e'e jojo nei Eyacuiñajjija esohui huohui canaje? —cajjashahuabaquiahua.

³⁰Jamatii Edojjoshahua Pameya pea epjeeji jjashahuabaqui meesahua caje, oya pea'ai camimiahua ojaañaja eshajja'ajjajji. E'e, esohui huohuijjiya huohui pajea cajo, ma epjeejiya Eyacuiñajjiya ejjashahuubaquijji cahuohui cahua. ³¹Jamaya miquianaaya Eyacuiñajjiya ejjashahuubaquijji ba majje huohuije ojaaña. ¡Pea acaje jja a'a huohuijji! ¡Oe epjeejiya huohui pajea cajo, pea epjeejiya cahuohui cahua! Jamajjeya Jesosaja epjeeji cuana ba mee caje quea huiso Eyacuiñajjiya esohui. Quea bihui nee poaje pea'ai. ³²Jesosaja esohui huohui sa poanijo ¡ca'ishoa cahua! ¡Pea mimi pajea'yajo cahuohui cahua! ³³E'e, Eyacuiñajjiya equijo ojaya epjeeji cuaa ja'a becasje huohuijji! Quea shajjaquijjo poaje. Eyacuiñajjiya ojaya epjeeji cuana ojee shajja'ajja mee cani quea bei. ¡Bacue! Ojjaña Eyacuiñajjiya equi cuanajo Jesosaja epjeeji ojee nequi majje quea ja'a nee esohui huohui cani; becasje pojjeama huohui cani.

³⁴Epona cuana, ojjaña Eyacuiñajjiya equijo ojee nequianijo, ja'a mimiji Eyacuiñajjiya esohui huohuijji mimianijo! ¡Jjashajja'ajjaquicue oe! Jodio cuanaja esohui etehue'yo yahuajo jama poa pea'ai ba'a:

“¡Eyacuiñajjiya equijo epona cuana cajjashajja'ajjaquiahua!

Eyacuiñajjiya epjeeji cuana huoojeajji pojjeama oya cuana”.

Jamaya poa yahuajo. ³⁵Esohui shajja'ajja majje e'e pojja'a epona cuana huohui'ajja sa poani ma esohuijo. Jamatii ¡Eyacuiñajjiya equijo a'a huohui'ajjajji! Jamaya quea pame pojjeama. Ojaya equi yasijje poqui majje ojaya yahue cahuohui'ajja cahua, eponaa.

³⁶Ecuea epjeeji cuana Conitojo ba'e, miquianajaya eba Eyacuiñajjiya esohui miquiana que poe coo jjima. Chojja. Pea cuaa ojaya esohui shajja'ajja canaje miquianaja shajja'ajja jjimahuajo. Jamajjeya ¡shajja'ajjacue mo!

³⁷Miquianaya beca cuana jama poani ba'a: —Eya Eyacuiñajjiya esohui huohuijji e'e jojo nei poani. Eya Edojjoshahua Pameya quea pame nee ameesahua caje'yo Eyacuiñajjiyo. Jamajjeya ¡miquianaya jjabahuejjaquicue ecuea esohui Eyacuiñajjiya esohui e'e nei poani! ³⁸Ojjaña joya miquiana nijje nequi ecuea esohui shajja'ajja sa po ajja, ja'a oya cuana shajja'ajjajji!

³⁹Ecuea epjeeji cuana, jamajjeya ¡Eyacuiñajjiya esohui huohui neineicue! Pea epjeeji Eyacuiñajjiya pea emimijo mimi sa poanijo ¡oya camimiahua!

⁴⁰Jamajjeya ¡Eyacuiñajjiya equijo ojee nequi majje ojjaña quea ja'a nee acue! ¡Ojjaña Jesosaja epjeeji cuana shajja'ajjacue quea ja'a nee pea'ai!

Jesosa Quito mano'yo majje shequi o'oyanaje

15 ¹Jjeyahua nei eya miquiana huasijje huohui sa o'oya poani esohui quea pame nee Jesosa Quitojo. Yahuajo pishana ma esohui shajja'ajja majje miquianaya onijje jjapeequi'yonaje quea ja'a nee. ²Ma esohui Jesosa Quitoja eyaya huohuinaje. Shajja'ajja majje miquianaya onijje jjapeequi'yonaje quea ja'a nee, cuaqui yasijje epoqui'yojji pojjeama. Jamatii Jesosa Quito nijje e'e jojo nei jjapeequi jjima ca mi ca oe cuaqui yasijje poquije'yo.

³E'e, ma esohui quea pame nee Jesosa Quitojo shajja'ajja majje eyaya huohuinaje miquianajaya eshajja'ajjajji jama ba'a: Eyacuiñajjiya esohui yahuajo etehue'yo jayojja jama e'e jojo nei Jesosa Quito eseja mimishi cuanajo mano'yonaje. ⁴Jesosa Quito mano'yajo, ojaya epreejji cuaa oya jjani ai yasijje huananobia ca'ya poa. Pea beca peejjima cahui po majje, Eyacuiñajjiya oya, Jesosa Quito shequi mee ca o'oya poa. E'e, Eyacuiñajjiya esohui yahuajo nei etehue'yo jayojja jama aca poa Jesosaa. ⁵Eshe o'oya poajo, Penohua oya ba canaje. Majoya ome miji pealai pea becaa, 12 huisomeya ojaya pea epreejji cuaa Jesosa Quito ba ca'yonaje, oja huoojea'yo cuaa. ⁶Majoya quijje pishana quea huiso ojaya epreejji cuaa, 500 huisomeya ojee jjachichaqui majje Jesosa Quito ba canaje eshe o'oya. Quea huiso ma epreejji jjeya eshe enequi'yo. Beca cuana mano'yonaje. ⁷Majoya pea pojajjo Satiacohua Jesosa Quito ba canaje eshe o'oya. Majoya ojjaña oja huoojea'yo cuaa oya ba canaje eshe o'oya. ⁸Majoya eyaya quijjeyejje neiya Jesosa Quito banaje pea'ai. E'e, yahuajo eya ojaya epreejji pojjeama poa. Jjeya ca ca eya ojaya epreejji po mee ca'yonaje pea'ai. ⁹Jamajjeya eya quea pame pishana. Pea oja huoojea'yo cuana quea pame nee poani. E'e, o ba jjimahuajo eyaya ojaya epreejji cuana janobajjima nei napanaje. Jamatii Eyacuiñajjiya eya babaca canaje Jesosaja huoojea'yo epoji pealai. ¹⁰Eya Eyacuiñajjiya quea jea nee nee poani. Jamajjeya ojaya esohui huohuijji po mee canaje, Jesosaja huoojea'yo po mee canaje pea'ai. Ohua huoojea cajje eyaya ojaya esohui huohui neinei'yonaje. Jesosaja pea ehuoojea'yo cuaa quea huiso pishana chaco canaje ojo. Eyaya ca ca ojo janobajjima nei chaco tiitiiaña ohuaya eya chaco meesahua canajejo. E'e, ohuaya eya chaco meesahua ajja jojjemo eyaya ojo chaco jjima ame. ¹¹E'e pojja'a pea ehuoojea'yoja esohui Jesosa Quitojo miquianaaya shajja'ajjanaje. E'e pojja'a ecuea esohui ojo shajja'ajjanaje. Jamatii, ojjaña ecuaaya ma esohui quea pame Jesosa Quitojo huohuaña. ¡Shajja'ajja majje miquianaaya ojaya esohui jayojja jama e'e jojo nei ba'ecue!

Jesosa Quitoja epreejji cuana quijje eshe o'oya poaje

¹²E'e, miquiana huasijje ecuaaya huohuinaje jama ba'a: —Jesosa Quito mano'yajo, Eyacuiñajjiya oya shequi mee ca o'yananje.

Jamajjeya ¿apiojji acuae jja oe miquianaya beca cuana jjeya siajje poani? Jama ba'a: —Eseyá mano'yajo quijje eshequi mee'yojji pojjeama —¿apiojji jamaya siajje poani?

Chojja. Shequi mee caje o'oya eseya. ¹³¡Bacue, oe! Mano'yo majje eshe o'oya po meemee ajja jojjemo Jesosa Quito mano'yo majje shequi mee o'oya jjima acaquiate pea'ai. Chojja. Oya shequi mee ca'ya poa, Eyacuiñajjiya. ¹⁴Oya eshe o'oya pojjeama poa jojjemo ecuanaja esohui quea pame nee ojo e'e nei pojjeama pome. Oya mi shequi o'oya poa jojjemo miquianaya onijje jjapeequi jjima pome pea'ai. ¹⁵Ecuaaya huohuaña jama ba'a: —Eyacuiñajjiya Jesosa Quito shequi mee ca'yonaje —jamaya e'e nei pojjeama jojjemo ecuana siajje ponequime. Chojja,

de. ¡Shajja'ajjacue mo! Ma siajjepojji cuanaja esohui e'e nei poani jojjemo ca emano'yo cuana shequi'yo jjima pome, Jesosa Quito shequi'yo jjima poquiate pe'a'i. Chojja, ecuea eba oya shequi'yonaje. ¹⁶E'e, emano'yo cuana shequi'yo ajja jojjemo Jesosa Quito pea'ai shequi'yo jjima poquiate. ¹⁷Oya shequi o'oya jjima jojjemo miquianaaya siajjepojjiya esohui shajja'ajja'yome, Jesosa nijje jjapeequi jjima pome. E'e, Jesosa Quito shequi o'oya jjima poa jojjemo Eyacuiñajji quea quene nee tii pome, miquianajaya mimishi cuijea'yo jjima pe'a'i pome. Chojja, ecuea eba Jesosa Quito shequi o'yanaje. ¹⁸Oya shequi o'oya jjima jojjemo ojaya epeejji yahuajo mano'yo cuana cuaqui yasijje poqui'yoquiate. Chojja, ecuea eba Jesosa Quito shequi o'oya poa. ¹⁹E'e, eseya queabihui nee onijje jjapeequi mee canaje jiquio meshijo ba'yanijo. Jamatii eseya eshe o'oya po mee ajja jojjemo eyajo onijje ba'e tiitii mee'yo jjima acame. Jamaya poani jojjemo ojjaña cuana esejo mimi'yome jama ba'a: —Pabohua ecuana siajje acanaje, de. “¡Jesosa Quito nijje jjapeequi'yocue!” siajje a'yome acanaje.

Chojja, ecuea eba eseya eshe o'oya po mee caje'yo. ²⁰E'e jojo nei jamaya poanaje ba'a: Eyacuiñajjiya Jesosa Quito shequi mee ca o'yanaje, eyami eyacua acoo ca'yonaje emano o'oyajji pojjeama. Jamajjeya esejaya eba ohuaya e'e jojo nei Jesosaja epeejji cuana ojjaña tii shequi mee caje o'oya emano o'oyajji pojjeama. ²¹E'e, Adana quea mimishi poa sosejje mano mee ca'ya poa. Jamajjeya ojjaña manoje'yo, ba'e tiitii ajja meshi cuanajo ba'eca. Jesosa Quito hua ca ca quea pame nee nee acanajejo, ojjaña eshe o'oya po mee caje'yo. ²²Ojjaña cuana Adanaja osecua cuana poanijo o jayojja quea mimishi poani. Jamajjeya Eyacuiñajji nijje ba'e meemee ajja eyajo. Jesosa Quito nijje jjapeequi majje ca ca ohuaya eseya ba'e tiitii mee caje'yo onijje eyajo eshe o'oya po mee'yo majje. ²³¿Ache ebionei shequi mee ca o'yanaje? Eyacuiñajjiya Jesosa Quito ebionei shequi mee ca o'yanaje. Quijje poe o'oya majje ohuaya ojaya epeejji cuana shequi mee caje o'oya.

²⁴E'e, quijje poe o'oya majje Jesosa Quito ojjaña Emeshi Mese nei poaje'yo, ojjaña huoojea'yojji. Jamajjeya ohuaya ojjaña quea mimishi poani jeabichajea'yo majje iña caje'yo. Iña majje shajja'ajja mee caje'yo. E'e, ohuaya Edosiquiana nei shajja'ajja mee caje'yo pe'a'i. Ojjaña eshahua cuana pe'a'i, ojjaña emeshi mese quea tai cuana pe'a'i shajja'ajja mee caje'yo, Jesosa Quito hua. Jamaya amajje ohuaya ojjaña cuana ojjaña meshi cuanajo ba'e oja Chii bihuia mee caje'yo jama ba'a: —Eyacuiñajji, miya quea ca'a nee nee ojjaña huoojea'yojji. ¡Ojjaña miya cashajja'ajja cahua! —jamaya ojjaña amee caje Jesosaa.

²⁵E'e, Eyacuiñajjiya Jesosa Quito ojjaña mimishi cuana, eshahua cuana pe'a'i jeabichajea meesahua cani. Jeabichajea jeyojeyo majje oya, Quito Emeshi Mese oe nei nei poaje'yo; ojjaña huoojea'yojji nei poaje'yo. ²⁶Yahuajo mimishi aca poa sosejje mano poquipoqui'yani. Quijjejejje nei ese mano mee'yojji chama'yo tii a'yo majje ojjaña cuana eshe o'oya po mee caje'yo, Jesosa Quito hua. Mano'yo ajja tii tii po mee caje'yo. ²⁷Yahuajo nei Eyacuiñajjiya esohui etehue'yojo jama

poa ba'a: "Eyacuiñajjiya ojjaña jeabichajea'yo majje ojjaña huoojea'yojji po mee caje'yo oya". Jamaya yahuajo Eyacuiñajjiya Jesosa Quitojo aca poa.

Jamatii Jesosa Quito Eyacuiñajji huoojea'yojji pojjeama. Ojjaña pea cuana huoojea'yojji ca ca Quito po mee caje'yo, Eyacuiñajjiya.²⁸ E'e, Jesosa Quito ojjaña quea mimishi cuana jeabichajea sahuamee caje Eyacuiñajjiya, oya ojjaña huoojea'yojji po mee caje'yo. Majoya oja Chii nijje Jesosa Quito mimije jama ba'a: —Ecue Chii, miya e huoojea'yojji poani tii tii —jamaya poaje oja Bacua Ejja Jesosa Quito.

E'e, Eyacuiñajji e'e nei ojjaña huoojea'yojji poaje'yo tii tii; eyajo nequi cuana, meshijo ani cuana pea'ai huoojea'yojji poaje'yo tii tii.

²⁹ E'e jojo nei Eyacuiñajjiya eseya shequi mee caje o'oya. Jamatii beca cuana jama poani ba'a: —Emano'yo cuana eshequi mee o'oyajji pojjeama.

Beca epeejji cuana quea quehua jjashahuabiquiani jama ba'a: —Yahuajo Jesosaja epeejji mano'ya poa Eyacuiñajjiyo besa mee jjima. Jamajjeya emano'yoja yajjiyo ojaya epeejji eshe nequi Eyacuiñajjiyo besa mee cani cuaa emano'yoja bajjanijo, emano'yo cuana cuaquijo equiyo'yojji pojjeamajo —jamaya beca cuaa acani. Oya cuana jjashahuabiquiani ojjaña cuana shequi mee caje o'oya. Jamajjeya jamaya acani.

³⁰ Eyacuiñajjiya eseya eshe o'oya epo mee'yojji pojjeama jojjemo ¿ajeo acuae ecuaaya ojjaña pojjafo Jesosa Quitoja sohui huohuime? Ojaya esohui huohuiañajo pea cuaa ecuana quecua nei nei sa acani.³¹ Epeejji cuana, e'e jojo nei Eyacuiñajjiya eseya shequi mee caje o'oya. Miquiana esejaya Emeshi Mese nei Jesosa Quitoja esohui shajja'ajjanajejo, eya quea bihui nee. Jamatii pea cuaa quecuapanana caniya tii eya Jesosa Quitojo chacochacoani quea bihui nee.³² E'e, eshahuaja epeejji cuaa ibia jama quea mase neeya Epesojo ba'eya eya beshahua nei mano mee ca'yonaje eya esohui ehuohui poajejje. Jesosa Quito eshe o'oya po ajja poa jojjemo ¿apiojji shai eyaya esohui huohui tiitiime so'o? Quea camaja nee poanaje. Dejja mimishi cuaa huohui cani jama ba'a: —Mecahuajje ecuana manoje'yo eshequi'yojji pojjeama. ¡Jamajjeya jjeyahua nei e'l'ijjal'ijjia, e'ishi'ishi peal'ai! —poani.

Jamatii eshe epo o'oyajji pojjeama jojjemo eseya jamaya po pea'aime.³³ ¡A'a quea quehua jjashahuabiquiji! ¡A'a onaaya miya jjadasia meequijji! Pea cuana siajje poani jama ba'a: —Ecuana eshequi mee o'oyajji pojjeama. ¡Onijke a'a jjapeequijji! O jayojjaya mi po chana', quea mimishi.³⁴ Jamajjeya ¡pajea'yocue ejjashahuabiquiji quea quehua! ¡Jesosaja esohui jayojja jama po o'oyacue! ¡Esohui quea quehuajo a'a jjashajja'ajjaquijji! Beca cuanaja Eyacuiñajjiya esohui e'e nei ba jjima. Eyaya miquianaya huohuiaña quea bicho epoji.

¿Achajja shequi o'oyame acuae se poaje?

³⁵ E'e pojja'a miquianaaya eya huohui'ajjanaje jama ba'a: —¿Achajja shai Eyacuiñajjiya emano'yo cuana shequi mee caje o'oya? ¿Ache eyami shai esejaya poaje'yo? ¡A'a eyami eyacua?

³⁶Miquianaya quea quehua jjashahuabauquianijo ;bacue! Anoso quecuajjima tii ajja. Quejo quecuajje meshijo pohua'yani. Siobijje pohua majje ejjii chama'yo poani, meshi pojji po'yani. ³⁷Quejo quecuajje cani cuaa anoso, pea eso' pojja'a. Anoso sa' bana ca ajja. Chojja, eso' pohua majje esa' tiiye'yo. ³⁸Eyacuiñajjiya eso' pohua mee'yo majje esa' tii mee cani. Jamajjeya anoso pohua majje anoso sa' tiiani. Pea same anoso, huenehuene sa' jayojja pojjeama. Jamaya Eyacuiñajjiya pana ca'ya poa.

³⁹Oya jayojja eyami cuana: Oe eyami pea eyami jayojja pojjeama. Quea huiso peapea yamime yani. Ijjiacajji pea yamime, dejja jayojja jama pojjeama. Cuichojjiya eyami pea. Jai cuana pea yamime, cuichojjiya jama pojjeama. ⁴⁰Oya jayojjaya eyajo Eyacuiñajjiya esohuidojiji cuana yani quea huiso nee. Oya cuana yamima', dejja cuana jama pojjeama. Esohuidojiji cuaa quea pame acani Eyacuiñajjiya yajjijo. Jamatii dejja acani jayojja jama pojjeama acani. Dejja cuanaja eyami quea bame pea'ai. Eseyaya quea pame aña Eyacuiñajjiya yajjijo pea'ai. ⁴¹Oya jayojjaya eshequi epojjajo quea pame nee. Ba'i eshequi jayojja jama pojjeama. Jamatii ba'i quea pame nee pea'ai. Majameta ba'i jayojja jama pojjeama. Jamatii majameta quea pame nee pea'ai. Oe majameta pea majameta jayojja jama pojjeama. Oe quea jiji nee, pea quea jiji pishana. Jamatii ojjaña quea pame nee.

⁴²Jiquio ecua anoso quecuajje Eyacuiñajjiya esa' pohua mee cani jayojja jama eseaya mano'yajo, Eyacuiñajjiya eshe o'oya po mee caje'yo. E'e, mojea ca'yajje esejaya eyami ihuije'yo. Chama'yo tii poaje'yo. Eshe o'oya po mee ca'yajje ca ca emano'yojji pojjeama. Eyami eyacua poaje'yo, quea pame nee esejaya. ⁴³E'e, esejaya eyami mojea ca'yajje ihuije'yo. Ca'a'ama. Eshe o'oya po mee majje ca ca quea pame nee po mee caje'yo, Eyacuiñajjiya. Pea eyami eyacua quea ca'a nee poaje'yo emano beca'yojji pojjeama tii. ⁴⁴Jjeya meshijo ba'yanijo esejaya eyami ca'a'ama. Manoje'yo. Ojjaña cuana eseaya jamatii ihuije'yo. Eshe o'oya po majje ca ca pea eyami poaje esejaya. Eyajo anicaja jayojja jama poaje'yo. E'e, jjeya esejaya eyami meshijo eba'ejji ca'a'ama. Jamajjeya e'e jojo nei quijje Eyacuiñajjiya esejaya pea eyami pana caje'yo eyacua, quea ca'a nee eyajo eba'e tiitii'yojji.

⁴⁵Eyacuiñajjiya esohui etehue'yo jama poa ba'a: "Eyacuiñajjiya ebionei dejja Adana bajjani pana ca'ya poa. Eshe po mee ca'ya poa". Jamaya yahuajo nei nei poa.

Adanaja eyami ca'a'ama poa. Quijje Jesosa Quitohua eseaya eshe o'oya po mee caje' esejaya eyami eyacua poaje'yo, pea eyami. Eyajo anicaja jayojja jama poaje'yo quea ca'a nee, ihui'yo ajja. ⁴⁶Eyacuiñajjiya esejaya eyami ca'a'ama ebionei pana ca'ya poa meshijo eba'ejji. Quijje Jesosa Quitohua esejaya eyami eyacua pana caje'yo quea ca'a, quea pame nee pea'ai eyajo eba'e tiitii'yojji. ⁴⁷Eyacuiñajjiya ebionei dejja Adana bajjanija eyami pana ca'ya poa meshijo eba'ejji. Shequi o'oya majje Jesosa Quitoja eyami eyacua poa, meshijo pojjeama. Pea eyami ojaya, de, quea

ca'a nee eyajo e'ani tiitii'yojji. ⁴⁸Ojjaña cuana meshijo ba'e Adana jayojja. Eyami ca'a'ama. Meshi oopana. Jesosaja epeejji cuana ca ca o jayojja jama poaje'yo quea pame nee, quea ca'a nee onijje eyajo eba'e tiitii'yojji. Eyami meshi pojjeama poaje. ⁴⁹Jjeya meshijo ba'yanijo esejaya eyami ebionei dejjaja eyami jayojja poani, meshi oopana. Quijje eyajo ba'e majje eseya Jesosa Quitoja eyami eyacua jayojjaya poaje'yo, meshi pojjeama.

⁵⁰Epeejji cuana, ¡shajja'ajjacue ecuea esohui! Ojjaña meshijo ba'eja eyami ca'a'ama, e'ihui'yojji, meshi pojji epo'yojji, Jesosa Quitoja eyami eyacua jayojja pojjeama. Ba'e meemee ajja eyajo Eyacuiñajji cuiñajji. E'e, jjeya esejaya eyami meshi, de, eshe epoiji tiitii pojjeama eyajo. Quijje ca ca eseya eyami eyacuajji ba'e tiitii mee caje'yo eyajo, Eyacuiñajji ojjaña huoojea'yojji poanijo.

⁵¹¡Jjeya shajja'ajjacue pea esohui! Yahuajo eseya jiquio esohui ba mee jjima, eyacua, jama ba'a: Beca cuana mano'yo ajja nei nei Jesosa poe o'oya jjimahuajo. Ojjaña joya eshe nequi Jesosa Quito poe o'oya, emano'yojji pojjeama; onajaya eyami e'ihui'yojji pojjeama. Jesosa Quitohua ojaya epeejji cuanaja pea eyami panacuaji caje'yo eyacua. ⁵²E'e, quijjeyeje nei eshe'ana ai mia cajo, Jesosa Quitohua ojaya epeejji eshe nequi cuanaja pea eyami eyacua pana caje'yo. Jiquio ecua cojja capicapijani jayojja jama panacuaji'yomeya acaje. Eshe'ana mia cajo, ojjaña emano'yo cuana shequi mee caje'yo. Eyami eyacua panacuaji caje'yo eba'e tiitii'yojji. Mano o'oya ajja poaje'yo. E'e, ojjaña esejaya eyami eyacua poaje'yo.

⁵³Jjeya esejaya eyami eba'e tiitiji pojjeama. Ca'a'ama. Manoje'yo. Chama'yo tii poaje'yo. Jamajjeya poe'yo majje Jesosa Quitohua esejaya eyami eyacua pana caje'yo ese nequi tiitii mee'yojji, emano'yojji pojjeama tii tii. ⁵⁴Jjeya jiquio meshijo eseya Jesosa Quitoja epeejji cuana enequi tiitiji pojjeama. Quijje ca ca ohuaya eseya nequi tiitii mee caje'yo eyajo. Jjeya meshijo ba'e eseya manoje'yo. Quijje ca ca esejaya eyami eyacua mano'yo ajja poaje'yo. Ba'e tiitiji'yo. E'e, Eyacuiñajji esohui yahuajo nei nei etehue'yo jayojja jama poaje. Yahuajo jama poa ba'a: "Dejja cuana mano'yo ajja tii tii. Eshe o'oya po tiitii mee caje'yo Eyacuiñajji". ⁵⁵Jamaya tehue mee ca poa yahuajo nei nei peal'ai ba'a:

"Emano'yo cuana emojea'yo jaa tiitii ajja; eshe o'oya po mee caje'yo tii tii. Quijje mano'yo ajja nei nei poaje'yo".

Jamaya yahuajo nei nei tehue mee ca poa Eyacuiñajji.

⁵⁶Mimishi cuana po nequi jjejojo ojjaña cuana mano ca'yani. Jamajjeya ojjaña quea mete nee poani emano'yojji. Moisesija esohui etehue'yojo eseyaya baña ojjaña shajjama' poani. Jamajjeya manoje'yo. ⁵⁷Jjeya Eyacuiñajji ejjabihuiaqui jama ba'a: —Eyacuiñajji, miya quea pame nee nee. Miyaya ecuanaja Emeshi Mese nei Jesosa Quito huoojeanaje ecuanaja mimishi cuijea'yohua. Jamajjeya ecuana shequi meeje o'oya. Ba'e tiitii meeje'yo eyajo.

⁵⁸Jamajjeya ecuea epeejji cuana, ¡Jesosa Quitoja esohui etehue'yo jayojja jama atiitiicue! ¡Ojaya epeejji quea pame nee po tiitiicue! ¡A'a Jesosa nijje

jjapeequi pajea'yojji! ¡Emeshi Mese neijo Jesosajo chaco tiitiicue! Jjeya ojo chacockaoanijo, quijje ohuaya eseya quea huiso sosequia caje'yo eyajo.

¡Ejjeshejji chichacue Jesosaja epeeiji aema' ba'e meesahuajji!

16 ¹Yahuajo pishana miquianajaya etehuejo eya huohui'ajjanaje bejjo Jesosaja epeeiji huasijke, ma Jodea meshijo ba'e yasijke ehuoojeajji. Jjeya eyaya miquianaya saja'a je jama ba'a: Eyaya esohui tehuenejje Jesosaja epeeiji cuana huasijke, Janata meshijo ba'e yasijke. ¡Ma esohui etehue'yo jayojja jama acue pea'ai miquianaaya! ²E'e, ¡bejjo chichacue! E'e, chacockaojo miquianaya sosequia cani cuaa ejjeshejji. Jamajjeya ojjaña epoja Eyacuiñajji ojee bihuijji, nomico pojja, ejjeshejji chichacue Jesosaja epeeiji aema' huasijke ehuoojeajji, Jodea meshijo ba'e yasijke! E'e pojja'a oe epeeijiya oe pojja chaco majje oe pojja quia caje. Pea epeeijiya quea huiso quia caje pojja'a. ¡Jamaya quea pame quiacue! Jamajjeya eya miquiana que poe jjimahuajo miquea ejjeshejji echicha'yo poaje. ³¿Ache dejja cuana pojja'a ejjeshejji echicha'yo dojo meeje'yo aema huasijke, Jenosanenajo ba'e yasijke? ¡Jjashahuabaquicueache dejja cuana quea pame nee ehuoojeajji! Jamajjeya miquiana huasijke poe majje eyaya ma dejja cuana huoojeaje ejjeshejji dojohua. Eyaya ecuea esohui etehue'yo huoojeaje onijke ojjaña esejaya epeeiji cuana Jenosanenajo ba'eca ba meeiji ma dejja cuana ecue huoojea'yo ejjeshejji quiaa. ⁴E'e pojja'a quijje jjashahuabaqui majje eya jama poaje ba'a: —E'e, eya pea'ai Jenosanenaja huasijke capoquiahua. Jamaya quea pame nee —eya poaje. Jamajjeya ojee poquije.

⁵Quijje eya Masenonia meshi yejjenanasa poani. Yejjenanamajje miquiana que poqui sa poani. ⁶E'e pojja'a eya miquiana nijje nequije quea huiso cahui cuanajo; quea huoe poani ba'i pojja cuanajo eya miquiana nijje anije. Majoya eya ojjaña huapa cuana huasijke poquije o'oya. Miquianaaya eya poqui meesahuaje. Aquiana epoqui meeiji quiaje pojja'a. ⁷Jjeya ca ca eya miquiana que poe sa po ajja. E'e, jjeya miquiana nijje nequi meemee ajja quea huiso cahui. Jamajjeya quijje eya poeje miquiana baa. Poe majje miquiana nijje nequije quea cahui huiso. Jamaya eya poaje esejaya Emeshi Mese neiya Jesosaa eya miquiana nijje nequi mee sa acanijo. ⁸Jjeya ca ca eya jjashahuabaquiani jiquiojo Epesojo enequijji. E'e, eya jiquiojo tii nequije. Jodio cuana ojjaña bobique cuanajo nequi chicha majje, bobipa o po majje pea'ai ojjaña quea bihui nee ojee ijija'ijija. Maya eyaya ishoaña. ⁹E'e, jiquiojo eyaya quea huiso cuana Eyacuiñajji esohui huohuaña. Quea huiso nee neyya shajja'ajja cani. Jamatii quea huiso eshahuaja epeeijiya eya Jesosa Quitojo mimi pajea mee'yo sa acani cuua.

¹⁰E'e pojja'a Timoteo miquiana que poeje'yo. ¡Poe'yajo oya jaahuanacue, quea bihui nee po meecue! Oya e jayojja jama poani; esejaya Emeshi Mese nei Jesosajo chaco cani. ¹¹Oya etii pishana. ¡Jamatii ojjaña miquianaaya oya shajja'ajjacue! ¡A'a ojo miamiajji! ¡Pea huasijke poqui meesahuacue quea bihui

nee! Jamajjeya oya poeje o'oya e que. Eyaya oya ishoa'ajja anije Jesosaja pea epreejji cuana nijje.

¹²Yahuajo eya Jesosaja epreejji Apono bajjani nijje miminaje jama ba'a: —Apono, ¿ache shono acuae miya poquije Conito huasijje esejaya epreejji cuana baa? ¡Jesosaja pea epreejji cuana nijje oe poquicue jocuama! —eya poanaje.

Jjeya oya, Apono poqui sa po ajja quea huiso chacochacoanijo. Quijje apoa po majje oya poquije miquiana baa.

Pea esohui quepe nei Etepanajo

¹³Ecuea epreejji cuana, ¡quea ja'a nee jjashahuubaqui tiitiicue! Peaa miya dasia ca chana'. ¡Jesosa nijje jjapeequianijo Eyacuiñajjija esohui jayojja jama po tiitiicue quea pame nee! ¡A'a Jesosaja epreejji quea mete pojji! ¡Ojaya epreejji quea ca'a nee, quea pame nee pocue! ¹⁴¡Ojjaña quea jea nee acue! ¡Quea bei nee ba'ecue ona nijje!

¹⁵¡Epreejji cuana, shajja'ajjacue mo! Miquianajaya eba Jesosaja epreejji quea pame nee Etepana bajjani. Ojaya huapa pojjeama cuana miquianajaya eba pe'a'i, Jesosaja ebionei epreejji cuana Acaya meshijo poanaje. Jesosaja pea epreejji cuana jaahuana tiitii cani quea pame nee, Etepanaa. ¹⁶Jamajjeya ¡onijje jjapeequicue! ¡Quea pame poanijo, oya shajja'ajjacue! ¡Pea cuua Etepana jayojja jama quea pame nee Jesosajo chaco cani shajja'ajjacue pea'ai!

¹⁷Ojjaña miquianaya poe ajja e baa, enijke jjapeequi'yohua. Jamatii miquianajaya epreejji cuana Etepana bajjani, Potonato pe'a'i, Acaico pe'a'i poeyanaje e chaco sahuua. Jamaya quea pame nee. ¹⁸Miquiana quea bihui nee po mee canaje jayojjaya jama ohuaya eya quea bihui nee po mee cani. Quea pame nee poanijo, ¡oya cuana cashajja'ajja cahua ojjaña!

Esohui quijjeyejje nei tehue'yo

¹⁹Jesosaja epreejji cuana Asia mishijo ba'e miquianajo jjashahuubaquiani. Jamajjeya eya huohui'ajja mee cani jama ba'a: —¿Achajja acuae nequiana ani so'o? —onajaya ebajji.

Jesosaja epreejji Aquinaa ojaya ehuanase Pisina nijjeya, ojjaña Jesosaja epreejji cuana Aquinaja equijo ojee dobiquiani Jesosaja esohui baa pe'a'iya miquiana huohui'ajja cani jama ba'a: —¿Achajja acuae nequiana ani so'o?

²⁰Ojjaña Jesosaja epreejji cuana jiquiojo ba'eya miquianaya huohui'ajja cani jamaya pe'a'i.

Ojjaña Jesosaja epreejji cuana esejaya quea jea neejo, ¡quea bihui nee mimicue ojjaña cuana nijje!

²¹Eya bajjani Pabo. Miquiana quea bihui nee epojji eyaya eyaye neiya jiquio esohui tehueña miquiana huasijje jama ba'a: ²²—¡Ojjaña joya Emeshi Mese nei Jesosa Quito nijje e'e jojo nei jjapeequi ajja Eyacuiñajjija quea nee nee capo mee cahua! ¡Esejaya Emeshi Mese nei Jesosa Quito capoe o'oyahua jjeya nei!

²³ ¡Esejaya Emeshi Mese nei Jesosa Quitohua miquianaya cajaahuana
cahua quea pame nee!

²⁴ Eseyá Jesosaja epeejji cuana poanjo miquianaya ecuea quea jea nee
nee poani, ojjaña. Mahuiso. Eyaya, Pabohua jiquio esohui tehuejeyonaje.
Apoa.

PABOJA ETEHUE CONITO CUIÑAJIJO BA'E YASIJJE BECANEJJIIJI PEA'AI

2 CORINTIOS

Pabohua tecue ca o'o yanaje Jesosaja epeejji cuana Conitojo ba'e yasijje

1 ¹Eya Pabo, Jesosa Quitoja huoojea'yo oja sohui huohuijji. Jamaya Eyacuiñajjiya a sa acani. Timoteo esejaya epeejji enijke nequi. Eyaya tehueaña miquiana huasijje. E'e, miquiana Jesosaja epeejji cuana Conito cuiñajjiyo ba'e yasijje, ma Acaya meshijo ba'e yasijje cuanaya tehueaña eyaya.
² ¡Esejaya Emeshi Mese neiya Jesosa Quitohua, Eyacuiñajjiya, esejaya Chii neiya pea'ai miquianaya cajaahuana neinei cahua; quea bei caba'e mee cahua pea'ai!

Pabo Eyacuiñajji nijje mimiani quea bihui

³ ¡Eyacuiñajji ejjabihuiaqui! E'e, oya esejaya Emeshi Mese nei Jesosa Quitoja Chii, esejaya Chii nei pea'ai poani. Oya esejo jjashahuabauquiani quea bei. Ohuaya eseya quea bihui nee po mee cani pea'ai. ⁴Eseyá quea nee, quea yeno poanijo, ohuaya quea bihui nee po mee cani. Quea bihui nee po majje eseyaya pea cuana quea bihui nee po meeje'yo, yeno'ama pea'ai. Jamaya ejja'aqui ba'a: —Eyacuiñajjiya ecuana jaahuana cani. Oya miquiana jaahuanajji poani pea'ai. Jamajjeya ja'a quea yeno pojji!

⁵Jesosa Quito quea nee poanaje dejja mimishi cuaa napa cajje. Eseyá onijke jjapeequianijo, pea cuaa eseya napa caje pea'ai. Jamatii, eseya quea bihui nee po mee caje Jesosaa. Majoya eseyaya pea cuana quea bihui nee po meesahuaje Jesosa nijje. ⁶E'e eyaya, Timoteohua pea'ai esohui huohuaña Jesosajo. Jamajjeya pea cuaa ecuana napa cani. Jamatii, ecuanaja esohui shajja'ajja majje miquianaya Jesosa nijje jjapeequi'yani. Ohuaya miquianaja mimishi cuana cuijea ca'yonaje. Jamajjeya miquianaya quea bei nee poani.

E^le, Jesosaa ojaya epreejji quea ca'a nee po mee canijo, miquianaya quea ca'a nee poaje pealai. Jamajjeya pea cuaa miquiana napa cajje Jesosaja epreejji quea ca'a nee poaje tii. Onijje jjapee tiitiiquije'yo pealai. E^le, Jesosaa miquianaya ojaya epreejji quea ja'a po mee caje'yo ecuana jayojjaya, quea bei. ⁷Jiquio ecuanajaya eba ba'a: Miquianaya Jesosaja epreejji quea ja'a po tiitiije'yo. E^le, miquianaya ecuana jayojja poaje. Jesosa nijje jjapeequianijo, pea cuaa napa caje. Jamatii Jesosaa miquianaya quea bei nee po mee caje ecuana jayojjaya. Jamaya Jesosaa acaje'yo miquianajo, ecuanajo pealai.

⁸Epeejji cuana, jjeya ecuaaya huohuije quea nee ecuana poanaje Asia meshijo nequi miquianajaya ebajji. Jomajo ecuana ba'enaje quea camaja nee nee, quea mano poanaje. E^le, ecuana jjashahuabaquinaje jama ba'a: —E^le, ecuanaja quea camaja nee nee Jesosa nijje ejjapeequijji, jiquio meshijo pojja'a mo manoje'yo. ⁹E^le, mimishi cuana jjashahuubaquiani ecuana quecuajji.

Eyacuiñajjiya ecuana ba mee canaje jama ba'a: Dejja cuanaja ecuana ejaaahuanajji pojjeama. Oya oe nei ecuana jaahuanajji poani. Ohuaya ohuaye nei emano'yojaa cuana shequi mee ca o'yansi. Jamaya eseya ba mee canaje Eyacuiñajjiya.

¹⁰E^le, mimishi cuaa napa huicha'a huicha'a cajje, ecuana quea nee nee poanaje. Beshahua nei mano'yonaje quea nee nee poanijo. Jamatii, Eyacuiñajjiya ecuana jaahuanca'a'yonaje; mano'yo jjima Asia meshijo nequi. Ecuana jjashahuuba tiitiiquiani jama ba'a: —Eyacuiñajjiya ohuaye neiya ecuana jaahuanca'a canijo, mano'yo jjima jjeya.

¹¹E^le, miquianaya Eyacuiñajji nijje miminaje ecuana ojaya ejaaahuanca'a titiiji. Jamajjeya ohuaya miquianaya shajja'ajja canaje onijje mimiani. Ecuana jaahuanca'a canaje. Jamajjeya quea huiso Jesosaja epreejji cuaa Eyacuiñajji bihuia caje jama ba'a: —Eyacuiñajji, miya quea pame nee nee. Miquea epreejji jaahuanca'a quea ja'a nee.

Pabo Conito huasijke poqui jjima poaje

¹²Ecuana eba'ejjijo, echacojjijo, ehuohuijjijo pealai ecuanaaya quea bihui nee huohuaña. E^le, miquiana nijje, ojjaña pea cuana nijje nequinajejo pealai e'e jojo nei ecuanaja echaco quea pame nee poanaje. Eyacuiñajjiya ecuana chaco meesahua canaje ojo quea pame nee. Ecuana ejjashahuubaquijji quea ja'a nee pealai. Dejja cuanaja ejjashahuubaquijji yojji jayojja jama ba'e ajja. Chojja, de. Eyacuiñajjiya ecuana ba'e meesahua cani ojaya esohui jayojja. ¹³Ecuana esohui etehue'yo miquiana huasijke quea ja'a nee. Esohui quea quehua tehue jjima. Eya jjashahuubaquiani jama ba'a: ¹⁴Yahuajo miquianaaya ecuana ba pishana majje ejjaba'e bamequi'yojji banaje. Quijje quea ja'a nee bajeyo ecuana ba neinei majje. Jamajjeya Jesosa, Emeshi Mese nei poe o'oyajo, ecuaaya oya huohuije'yo miquiana ojaya epreejji quea pame poanaje. Cuanaya ojaya esohui jayojja ba'yanijo, miquianaaya quea bihui nee ecuanajo huohuije'yo Jesosa poe o'oyajo.

¹⁵E'e, ecuea eba miquianaya jjabahuejjaquije eya esohui jayojja quea ja'a ba'yani. Jamajoya jjeyahua nei eya miquiana que poqui o'oya sa poanaje miquiana Jesosajo quea ja'a nee ba'e meesahua o'oyaa. ¹⁶Yahuajo eya jjashahuubaquinaje jama ba'a: —Jesosaja epeejji cuana Maseronia meshijo ba'e yasijje poquije eya dobiquinanaje Conito cuiñajji yasijje Jesosaja epeejji cuana sohuihuohuiya. Ma ba majjeya eya poquije Jodea meshi yasijje. Jamajjeya Conitojo ba'eca cuaa eya poqui meesahua caje pojja'a Jodea meshi yasijje —eya jjashahuubaquinaje.

¹⁷Jamatii eya poqui jjima miquiana baa. Miquiana baquijji eya jjashahuubaquinaje quea ja'a nee. Ecuea epoquijjiyo eya jjashahuubaqui ajja pea cuana jayojja jama. Jesosaja epeejji pojjeama cuaa huohui cani jama ba'a: —Eya poquije. Chojja, eya poqui ajja —jamaya eya jjashahuubaqui ajja. Eyaya ecuea ejjashahuubaquijji jayojja jama aje'yo. ¹⁸Eyacuiñajji siajje po ajja, ojaya esohui jayojja jama ohuaya acani. Ojaya eba eya o jayojja e'e nei poani, siajje po ajja jama ba'a: —E'e pojja'a, de —jamaya eya siajje po ajja.

¹⁹Eyaya Sinasi nijjeya, Timoteo nijjeya pe'a'i Jesosa Quitojo huohuinaje miquiana huasijje. Oya Eyacuiñajji Bacua Ejja. Ojaya esohui jayojja jama acaje'yo e'e jojo nei, ohuaya. ²⁰Eyacuiñajji esohui yahuajo quea huiso, quea pame nee nee. Jesosa Quito ese jaahuanaa poeyanaje. Ohuaya ojjaña Eyacuiñajji esohui yahuajo jayojjaya jama jjeya acaje'yo esejo. Jamajjeya Jesosa Quitohua Eyacuiñajji esohui jayojja jama acanijo, eseyaya Eyacuiñajji bihuiaña jama ba'a: —Jamaya Eyacuiñajji, miquea esohui quea pame nee nee, quea huiso ecuana nijje. Ojjaña e'e jojo nei poani. Miya siajje po ajja nei nei —jama bihuameya seya aña.

²¹Eyacuiñajjiya ecuana, miquianaya pe'a'i ojaya epeejji po mee canaje. Ohuaya eseyaya babaca ca'yonaje onijje ejjapeequijji. ²²Jama esejo acanaje ba'a: —Miquianaya ecuea epeejji cuana poani. Ecuea ejjeshe jayojja jama miquianaya —Eyacuiñajji poanaje.

Eyacuiñajjiya ese que huoojea canaje Edojjoshahua Pame ese jaahuanajji. Edojjoshahua Pameya eseyaya ba mee cani jama ba'a: Quijje eseyaya quea ja'a nee Jesosa jayojja ba'e tiitije'yo Eyacuiñajji nijje eyajo.

²³Eyacuiñajjiya ba cani ecuea ejjashahuubaquijji miquianajo quea pame nee poani. Jama poani eya ba'a: —Conito huasijje jjeya epoquija jjemo eyaya onaya tecueaje'yo yome pojja'a, quea mimishi ba'yaniyo. ²⁴Eya miquianajaya emeshi mese pojjeama, miquiana huoojea neinei'yojji pojjeama. Eyaya ca ca esohui huohuaña, Jesosaja esohui, miquiana quea bihui nee po meeji. E'e, Jesosaja esohui jayojja jama añajo, ojaya epeejji quea ja'a nee poaje'yo miquianaya.

2 ¹Jjeya eya jama jjashahuubaquiani ba'a: —Jjeya Jesosaja epeejji Conitojo ba'e beca cuana quea mimishi poanijo, eya poqui ajja jocuama o tecueaa. Jjabahuejjaqui o'oyajo, quea yeno poaje o'oya oya cuana —eya poani.

²E'e, miquianaya eyaya quea yeno po mee majje, ¿ajeo acuae che eya quea bihui po'yome? ³Jamajjeya yahuajo eyaya miquianaya tehuenaje quea tecue mimishi

pajea mee'yojji. E'e, miquiana quea mimishi poanijo, eya quea yeno poanaje. Pea chama' e quea bihui nee po meeji. Eya jjashahuabaquinaje miquianajo jama ba'a: —E'e jojo nei ohuaya Eyanguiñajjija esohui jayojja jama acaje'yo. Majoya eya quea bihui nee poaje. Oya cuana quea bihui nee poaje pea'ai e'e jojo nei ba'e majje.

⁴E'e, eyaya quea yeno nee esohui quea tecue tehuename miquiana jjabahuejjaqui mee'yojji. Quea camaja esohui quea tecue etehuejji. Miquianaya quea yeno po mee sa po'yo ajja. Chojja. Eya jjashahuuaquinaje jama ba'a: —Ecuea esohui etehue'yo quea tecue mimishi cuanajo ba majje onajaya eba poaje ecuea quea jea nee nee poani —eya poani. E'e, jamaya ecuea ejjashahuubaquijji miquianajo.

Jesosaja epeeiji quea mimishi tecuea majje ;a'a quea tecue po tiitiji onijke ohua mimishi pajea cajo!

⁵Jesosaja epeeiji miquiana nijje nequi ca ca oe quea mimishi poanaje. Eya quea yeno nee poanaje ojo. Miquianaya quea yeno poanaje pea'ai ojo. Jamajjeya eyaya o jjabahuejja meequiviji tehuename oja mimishi cuana pajea mee'yojji.

⁶Beshahua nei miquianaaya, ojjaña oya jjabahuejjaqui meenaje ojaya mimishi epajeal'yojji. Apoa. ⁷Jamajjeya ja'a oya quea yeno po tiitii meeji! ;A'a oya tecuea titiji! Chojja. Quea yeno nee nee po tiitii majje oya Jesosa nijje jjapeequi pajea'yo chana!. Jjabahuejjaqui'yajo, ionijke jjapeequi'yocue quea pame neel! ⁸E'e, oya jama huohuicue ba'a: —Miya ecuanaja quea boti nee, epeeiji —jamaya oya acue.

⁹Yahuajo eyaya ma esohui tehuename miquiana ba'ajjaggi so'o. Eya ba sa poanaje jama ba'a: —¿A'a shajjama' poaje? ¿A'a ecuea esohui jayojja jama poaje? —poanaje.

Jamajjeya eyaya esohui tehuename miquiana huasijje ma dejja quea mimishi jjabahuejjaqui mee'yojji. Miquianaya ecuea esohui etehue'yo jayojja jama po'yonaje. Quea pame. Apoa poanaje. ¹⁰Jamajjeya miquianaya ma dejja quea mimishi poani nijje quene'ama poajo, eya onijke quene'ama poaje'yo pea'ai. E'e, ecuea aje ojaya mimishi epajeal'yo pea'ai. Eya Jesosa Quitoja esohui huohuiji poanijo ma dejja mimishi nijje quea tecue poanaje. Jjeya ma dejja nijje tecue'ama poanaje. Jamajjeya ;miquianaya pea'ai quea bei, quea ja'a pocue! ¹¹Eseyá quea bei, quea ja'a poanijo, Edosiquiaa eseaya edasiajji pojjeama. E'e, esejaya eba Edosiquianaja ejjashahuubaquijji. Oya aje oe edasiajji poani, de, Jesosaja epeeiji cuana quea mimishi po mee o'oya sa acani.

Jesosaja ehuohui eyacua

¹²Yahuajo pishana eya poquinaje Toasa cuiñajji yasijje esohui quea pame Jesosa Quitojo huohuuya. Jomajo esejaya Emeshi Mese neiya Jesosaa eya huohui meesahua canaje. Beca cuaa shajja'ajja canaje quea bihui nee. ¹³Jamatii ecuea epeeiji Tito poe jjima Toasa huasijje. Eya quea mete ojo poanaje: —E'e pojja'a oya quea huesha nee quea mano jaa pojja'a, quea nee poani pojja'a —jjashahuubaquinaje. Jamajjeya eya Toasajo ba'e nijje miminaje jama ba'a: —Poquia iña Tito sa'ajja.

Majoya eya poquinaje Masenonia meshi yasijke.

¹⁴Eseyaya Eyacuiñajji bihuiaña. Ohuaya eseya quea ja'a nee nequi mee cani. E'e, ohuaya eseya dejja mimishi cuana mimicuiajeanobiajea meesahua cani; eseya Jesosa Quito nijje jjapeequi mee cani quea ja'a nee. Ohuaya ecuana huohui meesahua cani ojjaña meshijo Jesosa Quitoja esohui. Ma esohui quea pame nee nee. Jiquio ecua shiyeshiye esejaya quea boti nee aña jama jayojjaya Jesosaja esohui ecuanajaya quea boti nee.

¹⁵E'e, Eyacuiñajjiya ecuana huoojea ca'yonaje Jesosa Quitojo huohuiya. Ma esohui quea pame nee nee, ecuanaja quea boti nee nee. Jamajjeya ojjaña Jesosaja epeejji cuaa, ma Eyacuiñajjiya onijje ba'e tiitii mee caje'yohua, ojjaña quea mimishi poaniya pea'ai ma quijje quea nee nee po tiitijje'yohua pea'ai ba caje'yo Eyacuiñajji quea pame nee: —E'e Eyacuiñajji, miya quea pame nee nee. Pea chama' mi jayojja —oya bihuaje eseyaya.

¹⁶E'e, Jesosa Quitoja esohui shajja'ajja majje ojjaña mimishi cuana jjabaquije oya cuana cajaa'ya'yo, quea nee nee poaje'yo cuaquijo. Ma esohui shajja'ajja majje Jesosaja epeejji cuana ca ca jjabaquije oya cuana ba'e tiitijje'yo quea ja'a nee eyajo Eyacuiñajji nijje. ¹⁷¿Aya acuae maya esohui eyacua Jesosajo huohui caje pea cuana huasijke, de? Ma esohui quea pame Jesosa Quitojo ecuana huoojea majje sohuihuohui meesahua caje quea ja'a nee, ohuaya. Pea cuaa Eyacuiñajjiya esohui huohui cani bejjo sosejje. Ecuna, chojja. Ecuaaya, Jesosaja epeejji poaniya quea bihui nee huohuaña e'e jojo nei. Ecuanaja eba jama ba'a: E'e jojo nei Eyacuiñajjiya ecuana huoojea ca'yonaje ojaya esohui huohuiya.

Jesosa nijje chaco cani esohui eyacuajo

3 ¹E'e, Eyacuiñajjiya ecuana huoojea ca'yonaje miquiana huasijke ojaya esohui huohuiya. Pea cuaa miquiana que quia ca'yonaje esohui peaja tehue'yo jama ba'a: “¡Jiquio dejja Jesosaja epeejji e'e jojo nei! ¡Jamajjeya oya cuana shajja'ajjacue!” Ecuanaja ca ca peaja tehue'yo equiajji pojjeama miquiana que jama ba'a: “¡Pabo quea pame nee; oya shajja'ajjacue!” Chojja. Ecuna miquianajaya eba Eyacuiñajjiya huoojea'yo. ²Ecuna jama jjashahuabauquiani ba'a: —Ojjaña ba cani ecuanajaya esohui shajja'ajja majje Jesosaja epeejji quea pame nee poanaje miquianaya, Conitojo ba'e cuana.

Jamajjeya ecuana e'e jojo nei Eyacuiñajjiya huoojea'yo ojaya esohui huohuiji ojjaña eba, de. Jamajjeya esohui mi tehue mee cani jama ba'a: “Pabo quea pame nee, Eyacuiñajjiya huoojea'yo”.

³E'e, ojjaña ba cani miquianaya Jesosaja epeejji cuana poanaje ecuanaja esohui shajja'ajja majje. Edojjoshahua Pameya miquianaya Jesosa nijje jjapeequi meesahua ca'yonaje. Yahuajo nei Eyacuiñajjiya esohui mei beje biajje tehue majje ojjaña ba mee ca poa etiiquiana Moisesi oja huoojea'yo. Jjeya ca ca Eyacuiñajjiya Edojjoshahua Pameya miquianaya Jesosa Quito nijje

jjapeequi meesahua ca'yonaje ecuea esohui miquiana shajja'ajjajo. Jamaya ohuaya ojjaña ba mee canaje eya oja huoojea'yo, ojaya esohui huohuijji.

⁴Ecuanajaya eba Eyacuiñajjiya ecuana Jesosaja epeejji quea ja'a nee po mee majje huoojea canaje miquiana huasijje esohui huohuiya. ⁵Jamajjeya jama jjashahuabaquiani ecuana ba'a: —¿A'la ecuana quea pame nee poanijo, quea sapa ja'a poanijo esohui huohuije quea ja'a nee? Chojja. Eyacuiñajjiya ecuana esohui huohui meesahua canijo ca ca quea ja'a nee poani ecuanaja esohui —jamaya ecuana jjashahuabaquiani.

⁶E'e, Eyacuiñajjiya ecuana huohui meesahua cani ojaya esohui eyacula Jesosajo. Etiiquianaja esohui jayojja jama pojjeama ecuanajaya esohui; eyacula. Ecuanajaya etiiquiana Moisesija esohui yahuajo nei etehue'yojo ojjañaa ba ca poa jama ba'a: —E'e jojo nei mimishi poajo, Eyacuiñajjiya ojjaña quea nee nee po mee caje'yo tii tii; Eyacuiñajji nijje eba'e'yoji pojjeama.

Jjeya ca ca ecuaaya huohuaña jama ba'a: —Mano'yajo, Edojjoshahua Pameya Jesosaja epeejji cuana ba'e tiitii mee caje'yo —ecuana poani.

⁷E'e, yahuajo nei Moisesiya ojjaña jama tehueme aca poa ba'a: "Eseyea quea mimishi poajo, Eyacuiñajjiya quea nee nee po mee caje'yo tii tii cuaquijo". Jamatii Moisesiya Eyacuiñajjiya esohui quea tecue mei biajje tehue majje ojaya ecojja quea jiji nee nee cuaquijji jayojja poa esohui quea pamejojo. Jamajjeya Isaeni cuaa Moisesija ecojja ba jjima aca poa quea siyo nee neejojo. Jamatii ojaya ecojja quea jiji nee po tiitii jjima poa. Quijje pishana quea jiji pojjeama po'ya poa. ⁸¿Ajea esohui quea pame nee nee po tiitiji? ¿A'la Moisesija pojja'a? ¿A'la Edojjoshahua Pameja? Edojjoshahua Pameya eseya ba'e tiitii mee canijo quea pame nee; e'e, Moisesija iye bame bame. ⁹¡Bacue! Moisesija esohui etehue'yo quea pame pishana ojjaña cuaa ba canaje jama ba'a: Eseyea quea mimishi poajo, Eyacuiñajjiya quea nee nee po mee caje'yo tii tii.

Edojjoshahua Pameya ca ca eseya Eyacuiñajjiya epeejji mimishi'ama po mee cani. Quea pame nee nee Edojjoshahua Pameya eseya acani. ¹⁰Yahuajo nei Moisesija etehue'yojo ojjaña jjashahuabaquinaje ojaya esohui etehue'yo quea pameya poa. Jjeya pea ejashahuabaquijji yani. Jjeya ca ca esohui quea pame nee eba'e tiitiji ecuanajaya eba. Quea pame nee nee esohui eyacula poani. ¹¹E'e, yahuajo nei ojaya esohui etehue'yo quea pame neejojo Moisesi ma esohui tehue majje quea cojja jiji poa, quea cojja jiji nee epo tiitiji pojjeama. Jjeya ca ca esohui eyacula quea ja'a capo tiitii'yahua. E'e, ecuana ba'e tiitii mee caje'yo quea pame nee nee epo tiitiji.

¹²E'e, ecuanajaya eba Edojjoshahua Pameya ecuana ba'e tiitii mee caje'yo. Jamajoya ma esohui eyacula huohui tiitiiña bicho'ama. ¹³Moisesi esohui tehue majje quea cojja jiji nee poa. Jamajjeya ojjaña cuana ojo quea mete poanijo, Moisesi jjacojja dodoquil'ya poa Isaeni cuana mete'ama epoji. Ecuanaya ca ca Moisesi jama pojjeama. Esohui eyacula eba'e tiitiji nahue ajja; huohui

majamajaña ojjañaja ebajji. ¹⁴E'e, yahuajo Isaeni cuua Moisesija esohui etehue'yo shajja'ajja majje jamatii eba'e tiitii'yojji ba meemee ajja poa. Esohui eyacua onajaya quea quehua poa. Ejjacossa dodoqui jayojja oya poa. Jesosa Quitoja epeejji nei poanijo ca ca ohuaya esohui eyacua eba'e tiitii'yojji ba mee cani. ¹⁵Jjeya nei pealai Isaeni cuua Moisesija esohui etehue'yo shajja'ajja canijo esohui eyacua eba'e tiitii'yojji onajaya quea quehua. ¹⁶Jamatii ojjaña joya Jesosa Quito nijje jjapeequiani ohuaya esohui eyacua ba mee caje'yo quea ja'a nee. ¹⁷E'e, jamaya poaje Edojoshahua Pameya, Jesosa Quitohua pealai eseya ba mee caje quea ja'a nee Eyacuiñajji ejashahuubaquijji. Ma ba majje esohui eyacua esejaya quea ja'a nee poaje. Jamajjeya Jesosa nijje jjapeequi'yajo, ohuaya eseya ba'e tiitii mee caje'yo onijje, Moisesija esohui amajje pojjeama. ¹⁸Jesosaja epeejji cuana poanijo eseya jjacossa paaqui jjima jayojja jama. E'e, ojjaña ba meeje Eyacuiñajji eseya Jesosa jayojja jama atiitii meesahua cani. Jamajjeya Edojoshahua Pameya eseja eyamijo aniya quea ja'a nee jjashahuubaqui mee cani. Jesosa jayojjaya popoqui mee cani eseya.

Pabohua esohui huohui cani quea ja'a nee eba'e meesahuaaji

4 ¹Eyacuiñajji ecuana nijje quea quene nee nee po tiitii ajja ecuanaja mimishi yahuajo poanaje cuanajo. Ecuana quea jea nee poanijo huoojea ca'yonaje ojaya esohui eyacua Jesosajo huohuiya. Jamajjeya ecuaaya quea ja'a nee huohuaña yeno'ama, mete'ama. ²E'e, ma esohui Jesosajo huohuañajo quea mimishi ba'e'yo ajja. Quea mimishi jjashahuubaqui ajja pea'ai. Edasiajji cuana pojjeama. Ecuanaja esohui Jesosajo e'e jojo nei poani. Jamaya Eyacuiñajji eba. Jamajjeya ecuanaja esohui e'e jojo nei poanijo, ojjaña jjashahuubaquije jama ba'a: —E'e, jiquio esohui huohuijji cuanaja esohui e'e jojo nei poanijo, eyaya shajja'ajjaje. Oya cuana edasiajji cuana pojjeama.

³Ecuaaya Eyacuiñajji esohui e'e nei huohui tiitiña. Jamatii beca cuanaja, Edosiquiana nijje jjapeequianija Jesosaja esohui quea quehua. Oya cuana aje oe quea nee nee poaje'yo tii tii. ⁴Quea pame nee nee Jesosa Quito. Oya Eyacuiñajji Echii ai jama poani tii. Jamaya esejaya eba. Jamatii dejja mimishi cuana onijje jjapeequi sa po ajja. Oya cuana aje oe cojjama' jayojja, de. Jamajjeya Edosiquiana neiya, ma ojjaña dasiajji poaniya oya cuana dasia cani esohui quea pame nee nee Jesosajo ojaya ebajji pojjeama. ⁵Joya ecuaaya sohuihuohuaña miquianajaya e bihuiajji pojjeama. Chojja. Ecuaaya huohuaña jama ba'a: —Ecuanaya miquiana ba meesahuaaji poani. Jesosa Quito ca ca Emeshi Mese nei poani. Jamajjeya ¡Jesosa bihuiacue miquianaaya! —ecuanaya miquiana niñeshe'ajji poani.

⁶ ¡Bacue! Yahuajo nei meshi pana jjimahuajo Eyacuiñajjiya jama huohuime aca poa ba'a: "Quea misi, ¡quea ja'a nee oe po'yocue!" aca poa; jjaja'aqui mee ca'ya poa. Jjeya ohuaya tiiya eseya Jesosajo jjashahuubaqui

meesahua cani quea ja'a nee. Jamajjeya oya esejaya eba quea pame nee nee Jesosa, quea ja'a nee nee poani tii. E'e, Jesosa Quito Eyacuiñajji jayojjaya nei nei. Oya esejaya eba poanijo Eyacuiñajji quea pame, quea ja'a nee nee poani tii tii esejaya eba pealai.

Ona Jesosa nijje jjapee meesahuaquiañajo ba'e tiitije'yo

⁷Eyacuiñajjiya ecuana babaca canaje esohui quea pame nee huohuijji. Jamaya quea pame nee, de. Jamatii jiquio ecua meshimisi ca'a'ama jayojja jama eseya ca'a'ama. Jamatii Eyacuiñajjiya eseya ojaya epjeejji quea ca'a nee acanijo, ojjañaa ba cani jama ba'a: —E'e de, Eyacuiñajjiya quea ca'a neeya Jesosaja epjeejji cuana quea ca'a nee o jayojja jama po mee cani. Ojjaña huasijje esohui quea pame nee huohui meesahua cani.

⁸Mimishi cuaa ecuana napa cani. Jamatii ecuana ejeabichajea'yojji pojjeama. Pea cuana quea mimishi poanijo, quea camaja tii ecuanaja eba'ejji. Jamatii quea yeno nee nee pojjeama ecuana poani. ⁹Mimishi cuaa napa cani Jesosaja esohui ehuohui poaje jjejojo. Jamatii Eyacuiñajjiya ecuana ejeana'yojji pojjeama. Pea cuaa cuiajea cajo, jamatii ecuana mano'yajja. ¹⁰Jesosa quea nee nee poanaje mimishi cuaa napa majamaja ca'yajje. Oya mano mee ca'yonaje, de. Jamaya ecuana acaje'yo pea'ai pojja'a Jesosa nijje jjapeequianijo. Jamajjeya ojjañaa jama acaje ba'a: —E'e jojo nei Jesosaa jiquio dejja cuana ojaya epjeejji nei po tiitii mee cani. Mimishi cuaa napa cajje jamatii esohui huohui pajea jjima acani.

¹¹E'e, pea cuaa ecuana napa majamaja cani Jesosa nijje jjapeequianijo. Ecuana quecua sa acani pea'ai. Jamatii ecuana quea ja'a nee po tiitiianijo, ojjañaa ba caje Jesosa ecuana jaahuanajji quea ja'a nee. Oya eshe, de. ¹²E'e, mimishi cuaa ecuana quea nee nee po mee cani esohui Jesosaja huohuañajo. Jamatii ecuanaja esohui shajja'ajja majje miquianaya Jesosaja epjeejji poanaje. Jamajjeya ohuaya miquianajaya mimishi cuana cuijea'yo majje ba'e tiitii mee caje'yo.

¹³Yahuajo Eyacuiñajjiya esohui huohuijjiya Dabiya huohui ca poa jama ba'a: "Ecuea eba e'e jojo nei Eyacuiñajji e jaahuanajji poani. Jamajjeya jamaya eyaya huohuaña" Dabiya aca poa. Jjeya ecuana Dabi jayojja Eyacuiñajji nijje jjapeequiani. Ecuanaja eba e'e jojo nei Eyacuiñajjiya ecuana jaahuanajjiya cani. Jamajjeya ecuaaya esohui huohui tiitiiñajjiya jamatii mimishi cuaa napa cani tiiya. Jama poani ba'a: ¹⁴—Emeshi Mese nei Jesosa mano'yajo, Eyacuiñajjiya oya shequi mee ca'yonaje. Jamaya ecuana mano'yajo, e'e jojo nei Eyacuiñajjiya ecuana shequi mee caje'yo. Ohuaya ecuanaya, miquianaya pea'ai nequi tiitii mee caje'yo Jesosa nijje eyajo —ecuaaya aña.

¹⁵E'e, quea camaja poani ecuana Jesosaja esohui huohuañajo. Jamatii ecuanaja esohui ba majje miquianaya Jesosa nijje jjapeequinaje.

Jamajjeya Eyacuiñajjiya miquianaya ba'e tiitii mee cani. Pea cuana quea huiso Jesosa nijje jjapeequi'yajo, Eyacuiñajjiya oya cuana ba'e tiitii mee caje'yo. Jamajjeya oya bihuia caje jama ba'a: —Eyacuiñajji quea pame nee nee poani. Quea ca'a nee nee poani pea'ai —acaje ojjaña.

¹⁶ Jamajjeya ecuaaya maya esohui Jesosajo huohui pajea'yo ajja. Chojja. Onaa napa cajje ecuana quea nee nee poani. Edejja tii cuana jayojja jama ca'a'ama poaje. Jamatii Eyacuiñajjiya ecuanaja edojjoshahua cuana quea ja'a po tiitii mee cani. ¹⁷ Jjeya onaa napa cajje ecuana quea nee poani Jesosa nijje jjapeequianijo. Quea nee po tiitii'yo ajja. E'e, jjeya quea nee poani. Jamatii Jesosa nijje jjapeequianijo, quijje ohuaya ecuana ba'e tiitii mee caje'yo quea pame nee nee eyajo onijje. Quea nee popajeaje'yo. Jamaya quea pame nee nee. ¹⁸ Jjeya nei ecuaaya Jesosa ba jjima aña ecojjaa. Jamatii ecuana jjashahuabaquiani Jesosa nijje eyajo eba'e'yojji. Jiquio meshijo eba'ejji ecuana jjashahuabaqui ajja. Jiquiojo ba'e tiitii ajja. Eyajo Jesosa nijje ca ca oe ba'e tiitije'yo.

Eba'ejji quea pame nee eyajo

5 ¹ Ecuaaya jama baña ba'a: Eseyá mano'yajo Eyacuiñajjiya eyacula pana caje'yo esejaya eyami. Eyami eyacula ani tiitije'yo eyajo. E'e, eseyá jiquio meshijo ba'yanijo ca'a'ama. Eyajo ba'e'yo majje quea ca'a nee eseyá poaje'yo tii tii. ² Eseyaya jjeya nei ishoaña eyami eyacula. Cuanaya eseyá jiquio meshijo ba'yanijo quea nee nee poani. Jamajjeya jjashahuabaquiani jama ba'a: —Eya poqui sa poani eyahuasijke. Jomajo ecuea eyami eyacula poaje'yo.

³ Jesosa poe o'oyajo, jiquio eyami eyacula poaje. Jiquio ecua jjapipi eyacula poani jama jayojja esejaya eyami eyacula poaje'yo. E'e, eseyá jjashahuabaquiani eyami eyacuajo. Quea pame nee poaje. ⁴ Jiquio meshijo ba'yanijo eseyá quea nee nee poani. Quea camaja nee jiquiojo eba'ejji. Esejaya eyami ca'a'ama, jjapipi jjacocoqui jjima jama. Jjacocoqui sa poani. E'e, eseyá poqui sa poani eyahuasijke. Jomajo eyami eyacula sa poani. Jiquiojo manoe'yo. Eyacula po majje ca ca eseyá ani tiitije'yo eyajo.

⁵ Eyacuiñajjiya eseyá ba'e tiitii mee cani; esejaya eyami eyacula aca'yani pea'ai. Ohuaya Edojjoshahua Pame huoojea canaje ese que ese jaahuanajji. Edojjoshahua Pameya eseyá ba mee cani jama ba'a: E'e jojo nei Jesosaja epeejji poanijo ohuaya ecuana eyami eyacula quia caje'yo; ani tiitii mee caje'yo onijje eyajo.

⁶⁻⁷ Jamajjeya jjashahuabaquiani jama ba'a: —E'e, Eyacuiñajjiya eseyá ba'e tiitii mee caje'yo onijje. Eseyá jiquio meshijo ba'yanijo Jesosa cojja neijo ani ajja. Esejaya eyami eyacula po majje Jesosa nijje ani tiitije'yo. Jjeya Jesosa esejaya ecojjaja ba jjima; jjaba meequejja. Jamatii eseyá jjashahuabaqui mee cani onijje enequi tiitii'yojji. Jiquio meshijo aquiana cuana quea huiso baña ecojjaa. Jamatii ma aquiana cuanajo jjashahuaba neinequejja. ⁸ E'e jojo nei baña Eyacuiñajjiya

eseya ba'e tiitii mee caje'yo. Jamajjeya mete'ama, quea bei nee poani. Poqui sa poani Jesosa nijje eba'e tiitiil'yojji, Emeshi Mese nei nijje. Ishoaña esejaya eyami eyacua. ⁹Jamajjeya jjeya nei eseya Jesosaja esohui jayojja jama atitii sa poani jiquio meshijo ba'yanijo. Quijje pea'ai eyajo onijje ani tiitije'yo. Jamaya sa poani. ¹⁰E'e, eseja eba jama ba'a: Jesosa Quitohua eyajo ojjaña huoojeajji poanijo ojjaña meshijo ba'ya poa nequi mee caje o cojja neijo. Ojjaña quea mimishi poanaje ohuaya quea nee po tiitii mee caje'yo. Ojjaña quea pame poanaje ca ca quea bihui nee nee po tiitii mee caje'yo. Jamaya eseyaya baña.

Jesosaa ecuana sohuihuohui mee cani ona onijje ejjapeequijji

¹¹E'e, Jesosaa, Emeshi Mese neiya ojjaña quea mimishi poani quea nee nee po mee caje'yo tii tii. Quea tecue nee nee poa je ojjaña quea mimishi poani nijje. Jamajjeya ecuaaya ojjaña dejja cuana huohuaña jama ba'a: —¡Jesosaja epeejji pocue! ¡Miquea mimishi cuana pajea'yocue!

Eyacuiñajji eba ecuana ojaya epeejji poani. Ecuana jaya esohui e'e jojo nei poani, siajje pojjeama. Jamaya ojaya eba pea'ai.

Ecuana jjashahuubaquiani jama ba'a: —Ojjaña Conitojo ba'leja eba esohui e'e nei ecuaaya huohuaña.

¹²Jamajjeya ecuana miquiana nijje jama po ajja ba'a: —¡Ecuana bihuacue quea pame poanijo! —chojja, jamaya ecuana po ajja. Jiquio jama ecuana a sa poani ba'a: Ecuaaya huohui tiitiiaña eyacua eba'e'yojji Jesosa nijje eyajo.

Jamajjeya miquianaaya esohui huohuijji nisho huohuicue quea ja'a nee jama ba'a: —Miquianaaya ca ca oe niñebaña Pabo, esohui huohuijji nei. Miya janobajjima nei mimianijo quea pame esohui huohuijji poso jjabaquiani. Jamatii quea ja'a ba'e ajja. ¡Jesosa Quitojo oe quea ja'a nee jjashahuubaquicue! ¡Quea pame a'yocue! —jamaya esohui huohuijji nisho acue.

¹³Ecuana jaya esohui quea pame Jesosaja, eba'e'yojji eyacuajo pea'ai shajja'ajja majje beca cuana siajje poani jama ba'a: —Pabo niñepoqui, de, ojaya epeejji cuana pea'ai niñepoqui —siajje poani.

Eyacuiñajji nijje chaco tiitiiañajo, onaaya ecuana niñepoqui poso acani. Jamatii ecuaaya chaco tiitiiaña Jesosaja esohui quea ja'a nee miquianajaya ebajji. ¹⁴Jesosa Quito ecuanajaya quea jea nee poanijo esohui e'e nei huohuaña. E'e jojo nei ojjaña mimishi acanijo mano tiitije'yo. Jesosa mano'yonaje ojjañaja mimishi cuijea'yojji, ojjaña cuaqui yasijje epoquijji pojjeamajo. Jamaya ecuanaja eba nei nei. ¹⁵E'e, Jesosa mano'yonaje ojaya epeejji mimishi cuijea'yojji. Mano'yajo, Eyacuiñajji oya shequi mee ca o'oyanaje. Jamajjeya ¡ojaya esohui jayojjaya ca'a cahua! ¡Yahuajo ejjashahuubaquijji capajea ca'yahuua! ¹⁶Jesosaja epeejji cuana po jjimahua ecuana pea cuanajo jjashahuubaquinaje quea tai dejja mimishi jama. Jjeya, cho. Jjeya ecuanaja ejjashahuubaquijji pea cuanajo Jesosaja ejjashahuubaquijji jayojja jama quea ja'a nee poani. Ojaya epeejji cuana po jjimahua ecuana Jesosa Quito jjashahuubaquinaje quea tai dejja mimishi jama. Jjeya, cho. ¹⁷Jamajjeya Jesosa Quito nijje jjapeequianijo, ohuaya eseyaya

pea jjashahuabaquime po mee cani. Esejaya ejjashahuabaquijji eyacua quea ja'a nee po mee cani. Jesosa Quito ba jjimahuajo ba'ya poa jayojja po'yo ajja. Jjeya eseya pea jjashahuabaquil'yome poani Jesosa jayojja.

¹⁸Eyacuiñajjiya Jesosa Quito huoojea canaje esejo mano'yohua. Jesosa mano'yajo, Eyacuiñajji ese nijje quea quene po tiitii ajja. Ese nijje quea bei po'yo majje ohuaya eseya huoojea canaje ojjaña huasijje ojaya esohui huohuiya jama ba'a: —Eyacuiñajjiya Jesosa huoojea canaje eseja mimishijo mano'yohua. Jamajjeya Eyacuiñajji ese nijje quea quene po tiitii ajja. ¡Jesosa nijje jjapeequicue! ¹⁹E'e, ohuaya Jesosa Quito huoojea canaje ojjaña mimishijo mano'yohua. Jamajjeya Eyacuiñajji ojjaña ese nijje quea bei poani. Quea quene jjashahuaba tiitioui ajja esejaya mimishi cuanajo —jamaya Eyacuiñajjiya eseya huohui meesahua cani.

E'e, jjeya Eyacuiñajjiya ecuana huoojea canaje jama huohuime aa ba'a: —Jesosa esejaya mimishi cuijea'yojji mano'yonaje Eyacuiñajji ese nijje quene'ama epo'yojji. ¡Ojaya epeejji cuana pocue!

²⁰E'e, ecuana Jesosa Quitoja esohui huohuijji poani. Ohuaya ecuana huoojea canaje onijje chacohua. E'e, Eyacuiñajjiya ecuana huoojea canaje ojaya esohui huohuiya miquiana huasijje. Jamajjeya ecuaaya esohui huohuaña miquianaya Jesosaja epeejji epo meeiji. Jama aña ba'a: —¡Jesosa esejaya mimishi cuijea'yojji mano'yonaje Eyacuiñajji ese nijje quene'ama epo'yojji. ¡Jesosaja epeejji pocue, Eyacuiñajjiya pea'ai! —ecuana poani.

²¹Jesosa Quito quea pame po tiitiinaje mimishi'ama nei. Jamatii Eyacuiñajjiya jama acanaje ba'a: —Ojjaña mimishi cuana Jesosa Quitoja poaje. Jiquio ecua miquianaya aquiana aboaña jama ohuaya mimishi abo caje. Jamajjeya eyaya oya quea nee nee po mee'yo majje ojjaña mimishi cuana enapa tiitii'yojji pojjeama ca onijje jjapeequi'yajo —Eyacuiñajji poanaje. Jamajjeya Eyacuiñajjiya huohui canaje jama pea'ai ba'a: —Ojjaña Jesosa nijje jjapeequiani eyaya baña ecuea epeejji, shajjama' pojjeama —Eyacuiñajji poanaje.

6 ¹E'e, ecuaaya Eyacuiñajji nijjeya ojjaña huasijje esohui quea pame nee Jesosajo huohuaña. Jamajjeya ecuaaya miquiana huohui neineiaña jama ba'a: —¡Eyacuiñajjiya esohui shajja'ajja majje jamaya pocue! ¡A'a shajjama' pojji! Shajjama' cuana eba'e meeiji pojjeama eyajo Jesosa nijje.

²¡Eyacuiñajjiya esohui shajja'ajjacue! Yahuajo nei nei ohuaya tehue mee ca poa jama ba'a:

“Jjeya nei miquianaya enije mimiani miquiana mimishi cuijea'yojji. Eyaya miquianaya shajja'ajjanaje. Enije mimianijo, eyaya miquianaya ba'e tiitii meeje'yo pea'ai”.

Jamaya Eyacuiñajjiya esohui yahuajo nei etehue'yo poa.

¡Bacue oe! Jjeyahua nei Eyacuiñajji miquiana shajja'ajja sa poani. Jjeya nei ohuaya miquianaya ba'e tiitii mee sa acani ojaya epeejji nei nei epojji.

Pabo quea nee nee poanaje

³Ecuaaya Jesosaja esohui jayojja jama atitiiña quea ja'a nee. Jamajjeya ojjaña ecuana ba majje Jesosaja esohui shajja'ajja caje'yo. Jamaya ameemee ajja ba'a: —E'e de, Jesosaja epeejji cuana quea mimishi nee poani. Jamajjeya ecuana ojaya epeejji po sa po ajja —jama siajje pomeya epoji pojjeama.

⁴Chojja. Ecuana ba majje ojjaña caba cahua ecuana Eyacuiñajijo quea pame nee chacockoani jamatii onaa napa caniya tii. Quea pame nee po tiitiiani.

E'e, onaaya ecuana quea nee po mee cani, ecuana niñebea cani, Jesosa nijje jjapeequianijo eba'ejji quea camaja poani pea cuana quea mimishi poanijo.

⁵Maaya ecuana cuia majamaja canaje, jeanobiajea majamaja canaje, ecuana nijje quea quene nee po majje quea huiso jjachichaquinaje. Ecuana cojja neijo nequi majje janobajima mimipanajajinaje. Ecuana quea camaja chacocko majje cahui jjima tii aninaje. Quea shoe po majamajanaje pea'ai. Jamatii ecuanaaya esohui quea pame Jesosajo huohui majamajaña, huea'ama nei nei ecuana poani. ⁶Mimishi'ama nei nei ba'yani pea'ai. E'e, ecuana chacockoani Jesosajo quea pame nee. Quea huiso esohui Jesosaja ecuanaja eba quea ja'a nee. Ecuana quenequene cuaji ajja pea cuana nijje. Quea bei poani. Dejja tai'ama poani. Edojoshahua Pameya quea pame nee ameesahua cani pea'ai. Pea cuana ecuanaja quea jea nee poani e'e jojo nei pea'ai. Jamajjeya ojjaña ba cani ecuana Jesosa Quitoja echacojji quea ja'a nee. ⁷Ecuanaaya esohui e'e jojo nei poani.

Eyacuiñajjiya huohui meesahua canijo ecuanaja esohui quea ja'a nee poani.

Eyacuiñajjiya emimishi cuijea'yo jjejojo ecuana ba'yani quea ja'a. Jamajjeya ecuaaya eshahuaja epeejji cuana mimicuiajeanobiajeaña esohui e'e nei mimi majje. Eyacuiñajjiya ameesahua canijo esohui e'e nei mimiani tii. ⁸Cuanaya eya quea pame nee poanijo jamaya cuana poani ba'a: —Pabo quea pame nee poani.

Beca cuana jama poani ba'a: —Pabo ecuea boti'ama, Jesosaja esohui huohuijjijo.

Pea cuana ca ca jama poani ba'a: —Paboja esohui quea ja'a nee.

Beca cuana ca jama poani ba'a: —Chojja, Paboja esohui shajja'ajja sa po ajja ca iña.

Pea cuaa ca jama saja'ame acani ba'a: —Pabo Eyacuiñajjiya esohui huohuijji quea ja'a nee.

—Chojja, Pabo esohui huohuijji nisho. Oya siajje pojji —jama eya niñebameya acani cuaa.

⁹—Pabo ecuea eba. Ohuaya quea pame nee huohui cani —beca cuana poani.

Pea cuana ca jama poani ba'a: —¿Ae shai poani Pabo? Oya ecuea ba jjima —poani.

Pea cuaa eya cuiajea sa acani. Jamatii eya eshe nequi, mano'yo jjima. Niñebea majje eya cuiá canaje cuaa. Jamatii Eyacuiñajjiya jaahuana canaje jjejojo eya mano'yo jjima. ¹⁰Quea huiso epeejji nisho poanajejo, eya quea yeno poani.

Jamatii Eyacuiñajjiya eya quea bihui nee po mee cani. Eya aema' poanaje pe'a'i. Jamatii ecuea esohui shajja'ajja majje quea huiso Jesosaja epeejji poani, quea pame ba'yani. E'e, Jesosaja epeejji poanijo eseya quea aquiana huiso nee nee jayojja. Jiquio meshijo ba'yanijo ca ca eya e'aquiana mese pojjeama. Jamatii Jesosaja epeejji poanijo ecuea quea huiso aquiana yani eyajo.

¹¹ Ecuea epeejji cuana Conitojo ba'e, eyaya ojjaña ecuea ejjashahuabaquijji huohuaña quea ja'a nee miquiana huasijke miquianaya ecuea quea jea nee nee poanijo. ¹²E'e, miquiana nijje jjapee neineiquiani, miquiana quea jea nee nee poanijo. Miquianaya ca ca enijje jjapee neineiqui sa po'yo ajja. ¹³Jamajjeya epeejji cuana, ecuea esohui miquiana huasijke jama ba'a: —Jiquio ecua miya ecuea quea jea nee nee jamaya oe eya acue miquiaaya! ¡Enijje jjapee neineiquicue! —eya poani.

¡Dejja mimishi nijje a'a jjapee neineiquijji!

¹⁴Miquianaya Jesosaja epeejji cuana poanijo ja'a nequijji Jesosaja epeejji pojjeama cuana nijje! ¡Ojaya epeejji cuana jayojja a'a pojji! Jesosaja ejjashahuabaquijji Edosiquiana neija ejjashahuabaquijji jama pojjeama. Pea oya, de. Jesosaja esohui quea ja'a nee cuaquijji jayojja. Edosiquiana neiya ca ca quea mimishi nee nee, quea tai nee nee acani. Ojee nequi ajja Jesosaja epeejji Edosiquianaja epeejji nijje. Pea oya, de. ¹⁵Jesosa Quitoja ejjashahuabaquijji quea pame nee nee. Edosiquianaja ca ca quea tai. Pea ojaya, de. Jesosa Quitoja epeejji cuanaja ejjashahuabaquijji quea pame. Ojaya epeejji pojjeama cuanaja ejjashahuabaquijji ca ca quea tai. Pea ojaya, de. ¹⁶Eyacuiñajji equi yasijje Jesosaja epeejji cuana dobiquiani ojee Eyacuiñajji bihuiaa, eyacuiñajji nisho bihuiaa pojjeama. Maya quea tai. Cuanaya Jesosaja epeejji cuana huasijke Eyacuiñajji dobiquinaje. Jamajjeya eshahuaja epeejji cuana nijje jjapeequi meemee ajja. Yahuajo nei Eyacuiñajjiya esohui huohui mee ca poa ojaya epeejji cuana huasijke jama ba'a:

“Miquianaya ecuea huapa pojjeama cuana poanijo, eya miquiana huasijke dobiquiani, miquiana nijje jjapee tiitiiquiani pe'a'i. E'e, eya oe nei miquea Eyacuiñajji. Miquianaya jaahuanajaya Chii nei pe'a'i. Miquiana ecuea epeejji cuana poani”.

Jamaya pea esohui etehue'yo poa pea'ai ba'a:

¹⁷ “Jamajjeya iecuea epeejji pojjeama cuana nijje a'a jjapee tiitiiquijji! ¡Enijje nei oe jjapee tiitiiquicue! ¡A'a quea mimishi pojji! Jamajjeya eyaya miquianaya ba'e meeje'yo enijje. ¹⁸Cuanaya eya miquianajaya Chii nei poaje. Miquianaya ecuea ebacua piona cuana, ecuea ebacua ejja cuana poaje'yo pea'ai. Eyaya mi jaahuanajji quea ca'a neeya jamaya aña”.

Jamaya Eyacuiñajjiya yahuajo nei huohui ca poa.

7 ¹Ecuea epeejji cuana, išhajja'ajjacue mo! Eyacuiñajjiya jiquio esohui huohui canaje esejaya ebajji, ese jaahuanajji poaniya. Jamajjeya ja'a quea mimishi ba'ejji; a'a quea mimishi jjashahuabaquijji pea'ai!

Miquianajaya eba Eyacuiñajjiya ojjaña mimishi cuana quea nee po mee caje'yo tii tii. Jamajjeya ¡quea pame nee oe acue! ¡Eyacuiñajjiya ejjashahuubaquijji jama oe pocue! ¡Oya oe shajja'ajjacue!

Pabo quea bihui nee poanaje

²¡Eya quea jea nee acue! Eyaya miquianaya quea pame nee a'yonaje. Ecuea esohui quea pame poanijojoya miquianaya quea pame nee nee po meeje'yo. E'e, miquianaya ecuea edasiajji pojjeama. ³Eyaya jiquio esohui huohuiaña miquiana tecueajji pojjeama. Chojja. Yahuajo eyaya huohuinaje jama ba'a: —Miquianaya ecuea quea jea nee nee. Jamajjeya eya miquiana nijje ba'e majje quea bihui nee poaje. Cuanaya miquiana nijje nequi majje eya manoje'yo pojja'a. Jamatii, jamaya quea pame nee miquianaya ecuea quea jea nee poanijo.

⁴Ecuea eba miquiaaya ecuea esohui etehue'yo jayojja jama aje'yo. Jamajjeya eyaya miquianajo jama huohuiaña ba'a: —Jesosaja epeejji cuana Conitojo ba'eya ecuea esohui etehue'yo jayojja jama acani —eya poani.

E'e, miquianajo eya quea bihui nee poani. Pea cuaa eya quea nee nee po mee cani Jesosa nijje jjapeequianijo. Jamatii eya quea bihui nee nee poani miquiana quea pame nee nee poanijojo.

⁵Ecuea epeejji Conitojo ba'e, eyaya miquianaya huohujje ecuea eba'ejjiyo pea meshijo. Eya Masenonia meshijo nequi pea cuaa napa majamaja canaje, niñebe majamaja canaje pea'ai. Jamajjeya eya quea ajjajja poanaje. ⁶Jamatii Eyacuiñajjiya ojaya epeejji quea yeno nee nee poajo jaahuanan cani. Jamajjeya ohuaya Tito huoojea ca'yonaje e quea bihui po mee'yoyji. ⁷E'e, Tito ba majje eya quea bihui nee poanaje. Ohuaya miquianajo huohui canaje quea pame jama ba'a: —Pabo, Jesosaja epeejji cuana Conitojo ba'eya eya, Tito, jaahuanan ca'yonaje quea pame nee. Miya ojjañaja quea jea nee poani, Pabo. Yahuajo onaaya esohui huohujji nisho shajja'ajja canaje. Jamajjeya miya quea yeno poanajejo, miquea epeejji cuana pea'ai quea yeno poanaje. Miya ona nijje quea bei po mee o'oya sa acani cuaa —jamaya Tito poanaje.

Jamajjeya miquianaya ejo jjashahuubaquianijo, eya quea bihui nee poani.

⁸Yahuajo eyaya pea tehue'ya poa quea tecue. Ma esohuijoya miquianaya quea yeno poanaje. Quea camaja nee ma esohui etehuejji poanaje, miquiana tecueajji. Jamatii, ma etehue'yojo miquianaya quea yeno po tiitii ajja. ⁹E'e, ma esohui etehue'yo ba majje miquianaya quea yeno poanaje. Quea yeno po majje miquianajaya mimishi pajea'yonaje. Esohui huohujji nishoja esohui siajje shajja'ajja pajea'yonaje pea'ai, miquianaaya. Jamajjeya miquianajo eya quea bihui nee poani. E'e, quea yeno poanajejo, Eyacuiñajjiya miquianaya ba'le meesahua ca'yonaje quea pame nee. Jamaya quea pame nee miquianajo. ¹⁰Dejja cuana quea mimishi poani Eyacuiñajjiya quea yeno po mee cani oja

mimishi pajea'yojji. Mimishi pajea'yo ca'yajo, Eyacuiñajjiya ojaya mimishi cuana cuijea ca'yani. Eshahuaja epeeiji cuana quea yeno poani mimishi amajje. Jamatii Eyacuiñajjiya oya cuana quea nee nee po tiitii mee caje'yo mimishi pajea sa po'yo ajjajojo. ¹¹ E'e, Eyacuiñajjiya miquianaya quea yeno po mee ca'yonaje. Quea yeno po majje miquianaya quea pame nee poani. Shajjama' cuana, mimishi cuana miquiana nijje nequi. Ojaya mimishi cuana cajaa aña miquianaaya. Oya miquianajaya epee'yojji pojjeama; miquianaya onaya jayojja jama po ajja. Quea quene poanaje peal'i esohui huohuijji nisho cuana nijje e siajje ajjijojo. Miquianajaya eba Eyacuiñajjiya quea nee nee po mee caje'yo ojjaña mimishi cuana. Jamajjeya quea mete nee po majje mimishi cuana a sa po'yo ajja. Cuanaya enije jjapee neineiqui sa poani, quea bei. Miquianajaya Eyacuiñajji quea boti nee poanijo esohui shajja'ajja o'oya sa poani. E'e, miquianaya quea ja'a jjashahuubaquianijo, ecuea eba miquianaya mimishi poani nijje jjapeequi'yo ajja. Jjabahuejjaqui meesahuaje'yo Jesosa nijje ejjapeequijji. Jamaya quea pame nee.

¹² Jamajjoya eyaya yahuajo esohui tehue majje miquiana huasijke huoojeanaje. Eyaya maya esohui tehuename miquiana jjashahuubaqui meeiji jama ba'a: —E'e de, Pabo Eyacuiñajjiya huoojea'yo esohui huohuijji. Oya ecuanaja quea jea nee. ¡Oja tehue jayojja jama ejja'aqui o quea bihui pojji! —jamaya miquianaya jjashahuubaquinaje.

Maya esohui eyaya tehuename dejja quea mimishi cuana tecueajji. Ma dejja cuanaja mimishijo pea cuana quea yeno poanaje. Eyaya ma esohui tehuename dejja quea yeno ani cuana yeno'ama po mee'yojji pea'ai.

¹³ Jamajjeya ecuea etehue'yo ba majje miquianaya quea ja'a jjashahuubaqui o'oyani. Jamajjeya eya quea bihui nee poani.

Yahuajo miquiana nijje mimi jjimahuajo Tito quea yeno jjashahuubaquinaje jama ba'a: —Jesosaja epeeiji cuana Conitojo ba'e quea mimishi jea nee nee.

Jamatii miquiana nijje mimi majje Tito quea bihui nee poanaje. Jamajjeya eya quea bihui nee poanaje Titoja esohui shajja'ajja majje miquianajo ohua huohui cajje. ¹⁴ Yahuajo eyaya oya huohuinaje jama ba'a: —Tito, Jesosaja epeeiji cuana Conitojo ba'e minijje jjapeequije'yo. Miquea esohui shajja'ajja caje pea'ai —eyaya anaje.

E'e, ecuea esohui Tito nijje jayojja jama a'yonaje miquianaaya. Jamajjeya miquianaaya quea pame anaje; eya bicho'ama miquianajo. ¹⁵ Miquiana huasijke poqui jjimahuaja miquianaya Titoja quea boti nee pishana. Miquiana que poqui majje miquianaya ojaya quea boti nee nee. Oya quea bihui nee nee pea'ai. E'e, miquianajo jama poani ba'a: —E'e, Jesosaja epeeiji cuaa Conitojo ba'eya ecuea esohui shajja'ajja canaje quea jaji nee. Ohuaya ojjaña ecuea esohui shajja'ajja neinei canaje eya etecuea poajeya jjejojo. Ecuea esohui jayojja jama a sa poanaje —Tito poanaje.

¹⁶ E'e, ecuea eba miquianaya ecuea esohui jayojja jama poaje. Jamajjeya eya, Pabo, miquianajo quea bihui nee poani, de.

¡Jesosaja epeeiji cuana ba'e meesahuacue!

8 ¹Ecuea epeeiji cuana Conitojo ba'e, jjeya eyaya miquianaya huohuije Jesosaja epeeiji cuana Masenonia meshijo ba'ejo. Eyacuiñajjiya oya cuana ejjeshejji quia meesahua canaje Jesosaja epeeiji cuana Jodea meshijo ba'e yasijje equiajji. ²E'e jojo nei quea camaja nee nee onajaya eba'ejji, Masenonia meshijo ba'eja. Aema' cuana poanaje. Jamatii onaaya ejjeshejji quia canaje quea bihui nee Jesosaja pea epeeiji aema' nei cuana ba'e meesahuajji. Quea bihui nee nee poanijo quea huiso quia sa poanaje. ³Ecuea eba oya cuana aema' poanaje. Jamatii ejjeshejji quia canaje. Quia majje quea camaja, aema' nei poanaje. Ecuea oya cuana huohui jjima ejjeshejji quiajji, pea cuana ba'e meesahuajji. Chojja. Jamatii quia canaje. ⁴Oya cuana enijke mimi majamajanaje jama ba'a: —¡Ecuana ejjeshejji dojocue! ¡Quiacue Jesosaja epeeiji cuana Jodea meshijo ba'e yasijje ona ba'e meesahuajji! Jamaya ecuana a sa neinei poani —poanaje Jesosaja epeeiji cuana Masenonia meshijo ba'e.

⁵ Eya jjashahuabaquinaje jama ba'a: —Onaaya ejjeshejji quia caje oe pojji pojja'a, quea huiso pojja'a.

Chojja de. Oya cuana jama poanaje ba'a: —Ojjaña ecuanaya Eyacuiñajjiya esohui jayojja jama poaje'yo. Cuanaya ojjaña ecuanajaya aquiana ojaya poani —jamaya oya cuana poanaje—. ¡Ecuana huohuicue Eyacuiñajjiya ejjashahuubaquijji! Miquea esohui jayojja jama ecuana poaje'yo —jamaya Jesosaja epeeiji cuaa Masenonia meshijo ba'eya huohui canaje.

⁶ E'e, quea ja'a nee acanaje. Jamajjeya eya Tito nijje miminaje jama ba'a: —Tito, ¡Jesosaja epeeiji cuana Conitojo ba'e yasijje poqui o'oyacue! Yahuajo miya ona nijje miminaje ejjeshejji Jesosaja pea epeeiji cuana huasijje equiajji, ona ba'e meesahuajji. Jamatii ejjeshejji huoojea jjima. Jamajjeya jjeya ona nijje mimi o'oyacue ejjeshejji equiajjijo! ¡Jama acue ba'a: “Jesosaja epeeiji ba'e meesahuañajo miquianaya quea pame nee poani Jesosajo” jamaya acue, Tito! —eyaya Tito huoojeaña ma esohui huohuiya.

⁷ E'e epeeiji cuana, miquianaya quea pame nee poani jama ba'a: Jesosaja esohui jayojja jama poani. Miquianajaya esohui Jesosajo quea pame pealai. Miquianajaya eba quea huiso esohui Jesosaja. E'e jojo nei quea ja'a nee jjashahuabaquiani pealai. Eya miquianajaya quea jea nee poani pealai. Jamatii jjeya Eyacuiñajjiya miquianaya ejjeshejji quia meesahua cani Jesosaja epeeiji Jenosanenajo ba'e yasijje ona ba'e meesahuajji. Jamaya quea pame pealai. Onaa napa cajje oya cuana aema' nei. Napa huicha'a huicha'a canaje cuaa Jesosaja epeeiji poanijo. ⁸Ecuea Tito miquiana que huoojea jjima ejjeshejji quia meeya. Chojja. Jesosaja pea epeeiji cuaa jamatii ejjeshejji quia canaje quea bihui nee. ¿A'a miquianaya onaya jayojja po sa poani pealai? ¿A'a miquianaya quea pame nee aje pealai? ⁹¡Jjashahuubaquicue Jesosaa miquianaya quea pame nee acanaje! Jama ba'a: Jesosa ba jjimahuajo

miquianaya aema' jayojja poanaje. Jamatii ohuaya, Jesosa Quitohua, esejaya Emeshi Mese neiya miquianaya ba'e tiitii mee caje'yo onijje eyajo quea ja'a nee nee. Dejja cuana huasijke poe jjimahua Jesosa ba'e'yonaje eyajo quea ja'a nee nee. Meshi yasijke poe majje ca ca dejja cuana jayojjaya poanaje, aema' pealai. Jamaya oya poanaje miquiana ba'e tiitii mee'yojji eyajo.

¹⁰ Jamajjeya miquianaya ejjeshejji quiajijo eya jama poani ba'a: Oe shequiaja yahuajo miquianaya ebionei jjashahuubaquinaje ejjeshejji aema huasijke equiajji. Pea cuana jjashahuubaqui jjimahuajo miquianaya quia sa poanaje.

¹¹ E'e, miquianaya ejjeshejji quia sa poanaje. Jamajjeya ijjeya miquianajaya ejjashahuubaquijji yahuajo jayojja jama acue! ¡Miquianajaya aquiana quea huiso yanijo quea huiso quiacue pealai! ¡A'a quea bejjo nahue pojji! ¹² Aquiana quia sa poanijo, Eyacuiñajji quea bihui nee poani e'aquiana mese nijje. Ojaya Eyacuiñajji quea jea nee poanijo e'aquiana meseja aquiana quea huiso poanijo quea huiso quia caje pojja'a. Aquiana oe pojji poanijo ca ca oe pojji aquiana quia caje. Jamatii Eyacuiñajji eba esejaya aquiana quea huiso pojja'a, oe pojji pojja'a. ¿A'a aquiana cuana miquianajaya quea nahue? ¹³ Onaa napa caje aema' nei nei ani quea camaja. Oya cuana miquianaa aquiana quiajje aema' nei epo'yojji pojjeama. Ma aema huasijke quea huiso aquiana quia majje miquianaya aema' nei poaje pojja'a. ¡A'a jamaya pojji! Chojja, jamaya eya huohui jjima. Eya jjashahuubaquiani jama ba'a: —Oe Jesosaja epeejiji aquiana cuana quea huiso poajo epeejji aema huasijke iye huiso quia majje chama' aema' poaje.

Jamaya eyaya amee sa aña. ¹⁴ Jjeya nei miquianajaya aquiana quea huiso. ¡Jesasaja epeejji aema huasijke quiacue! Quia majje oya cuana aema' pojjeama poaje. Quea ja'a ba'eje'yo. Quijje miquianaya aema' poajo, onajaya aquiana yanijo quia caje'yo miquiana huasijke pojja'a. E'e, ojjañaja aquiana cuana pea cuanaja aquiana cuana oya huiosoajja poaje.

¹⁵ E'e, esohui etehue'yo yahuajo nei jayojjaya jama poani ba'a:

“Beca eque mese cuaa oe pojji bobo chicha canaje. Pea eque mese cuaa bobo quea huiso nee nee chicha majje nahue'ama poanaje bobijo. Jamajjeya ojjaña cuana bobijji poanaje, pea cuanaja bobo oya huiosoajjaya poanaje”.

Pabohua Tito huoojea caje Conito cuiñajji yasijke

¹⁶ Eyaya Eyacuiñajji bihuiaña jama ba'a: —Eyacuiñajji, miyaya Tito jjashahuubaqui meenaje quea ja'a nee miquea epeejji cuanajo, Conitojo ba'ejo. Jamajjeya oya e jayojjaya onajo jjashahuubaquiani. Conitojo ba'e cuana quea ja'a nee ba'e mee sa acani Jesosajo. E'e Eyacuiñajji, jamaya miyaya Tito ameesahuanaje —jamaya eyaya Eyacuiñajji bihuiaña.

¹⁷ E'e epeejji cuana, ecuea esohui etehue'yo miquiana huasijke ejjeshejji aema huasijke equiajji ba majje Tito quea bihui nee poanaje. Miquiana huasijke poqui sa poani ecuea esohui etehue'yo huohuiya. Eyaya oya huoojea jjima. Chojja, oya jamatii poqui sa poani miquiana que. ¹⁸ Tito

nijje eyaya pea dejja huoojeaña, Jesosaja epeejji pea'ai. Maya poquinaje ojjaña Jesosaja epeejji cuana huasijke esohui Jesosajo huohuiya.

Shajja'ajja majje ojjaña Jesosaja epeejji cuaa huohui canaje jama ba'a:
—Maaya Jesosajo quea pame nee esohui huohui cani —acanaje cuaa.

¹⁹ Jesosaja epeejji cuaa pea cuiñajji cuanajo ba'eya jiquio epeejji babaca canaje enijje epoquiji Jenosanena huasijke ejjeshejji aema huasijke dojosahuaa. Jamaya eya ejjeshejji dojo sa neinei poani Jesosaja epeejji aema' poani yasijke ona ba'e meesahuajji. Jamajoya pea cuana Jesosajo jjashahuabaquije jama ba'a: —E'e de, Jesosaa ojaya epeejji cuana quea ja'a nee ameesahua cani. Jesosa ca ca oe quea pame nee nee poani —poaje cuana.

²⁰ Ma epeejji enijje poquianiya ohuaya ba caje eyaya e'e jojo nei ma ejjeshejji aema huasijke quiaña. Jamajjeya pea cuana ejo siajje epojji pojjeama jama ba'a: —Pabo ejjeshejji siiiji pojja'a —pea cuana jamaya epojji pojjeama.

²¹ E'e, eya jjashahuabaquiani jama ba'a: —Eyaya quea pame nee ejjeshejji dojoje. Jamajjeya ojjañaa ba caje eya siipojji pojjeama. Jesosaja eba eyaya quea ja'a nee aña.

²² Tito nijje eyaya beca dejja huoojeaña miquiana baa. Maya ecuea eba. Oya pea'ai quea ja'a nee po tiitiiani. Jesosajo chaco cani. Jjeya maya miquiana nijje quea ja'a nee nequije. Miquianajo jjashahuabaquiani jama ba'a: —Jesosaja epeejji cuana Conitojo ba'e quea pame nee poani. Quea beijo nahue pojjeama, shajjama' pojjeama pea'ai poani.

²³ E'e pojja'a pea cuaa huohui'ajja caje: —A'ya cuae Tito?

Jamajjeya joya cuana huohuicue jama ba'a: —Tito Pabo nijjeya esohui quea pame nee Jesosaja huohui cani. Ohuaya Pabo miquiana nijje chaco meesahua cani —huohuicue!

Pea dejja ma beca epeejji cuanajo huohui'ajja cajo, jama acajo ba'a:
—¿Aya acuae oya cuana huoojea canaje? —acajo, joya cuana huohuicue jama ba'a: —Jesosaja epeejji cuaa beca epeejji huoojea canaje miquiana huasijke, miquiana Jesosajo ba meesahuaa. Ohuaya Jesosajo huohui cani quea pame nee nee pea'ai —acue!

²⁴ Jamajjeya ¡jiquio Jesosaja epeejji cuana quea jea nee acue! ¡Oya cuana jaahuanacue quea pame nee! ¡Oya cuana shajja'ajjacue pea'ai! Ma ba majje ojjaña Jesosaja epeejji cuaa ba caje miquianaya Jesosaja epeejji quea ja'a nee poani pea'ai. Jamajjeya ojjañaa ba caje ecuanaja esohui quea pame miquianajo e'e nei poani pea'ai.

Ejjeshejji Jesosaja epeejji cuana huasijke equiajji

9 ¹ Eyaya miquiana huasijke esohui etehue majamajajji pojjeama Jesosaja pea epeejji aema' ba'e meesahuajji. ² Chojja. Ecuea eba miquianaya pea cuana ba'e meesahua sa neinei poani. Jamajjeya eyaya Jesosaja epeejji cuana

Masenonia meshijo ba'e huohuinaje jama ba'a: —Jesosaja epeeiji cuua Acaya meshijo ba'eya ejjeshejji chicha sa acani aema huasijje equiajji. Jamaya ohuaya acanaje ce shequija yahuajo —jamaya eyaya pea cuana huohuinaje.

Ma esohui miquianajaya shajja'ajja majje pea epeeiji cuana ejjeshejji chicha sa poanaje pea'ai Jesosaja epeeiji aema huasijje equiajji.³ Jjeya eyaya beca cuana, Jesosaja epeeiji cuana huoojeaña miquiana huasijje. Jamajjeya jecuea esohui ma ecua eyaya yahuajo huohuinaje jayojjaya oe acue! E'e, ma beca epeeiji cuaa miquianaya ojee iyaa caje ejjeshejji echichajji, aema' nei Jodea meshijo ba'e yasijje equiajji. Jamajjeya miquianajaya ejjeshejji equiajji apoa poaje pea cuana poe jjimahuajo.⁴ E'e, Jesosaja epeeiji cuana Masenonia meshijo ba'e miquiana huasijje poe'yajo, miquianajaya ejjeshejji aema huasijje equiajji apoa ajjimajo quea bicho nee nee poaje miquianaya. Eya pea'ai quea bicho poaje miquianaaya ecuea esohui jama ajjimajo. Quea bicho nee eya poaje.⁵ Jamajjeya eyaya Jesosaja epeeiji beca cuana huoojeaña pea epeeiji cuana miquiana que poe jjimahuajo. Ohuaya miquea ejjeshejji aema huasijje equiajji chicha meesahua caje. ¡Miquianajaya esohui yahuajo jayojjaya jama acue! Jamajjeya miquianajaya ejjeshejji equiajji quea huiso poaje, miquianajaya ejjashahuabaquijji yahuajo jayojjaya. Jamajjeya miquianaaya quea bihui nee quiaje'y.

;A'a quea dejja tai pojji; a'a quea nishehui pojji!

⁶ ¡Jiquio esohui shajja'ajjacue pea'ai! Oe pojji bana majje quijje oe pojji chichaje'yo. Jiquio ecua eso' jayojjaya jama miquianajaya ejjeshejji poaje. Jjeya quea dejja tai poanijo, quea nishehui poanijo pea'ai oe pojji aema huasijje quiajo, quijje Eyacuiñajjiya oe pojji quia caje'yo miquiana huasijje. Jjeya quea huiso quiañajo ca ca, dejja tai'ama poanijo ca ca quijje Eyacuiñajjiya quea huiso quia caje'yo miquiana huasijje.⁷ Jamajjeya ijjashahuaba neineiquicue ache huiso miquianaya quia sa poani! ¡Quea bihui nee quiacue! E'e, ¡jamati miquianajaya ejjashahuabaquijji jayojja jama quiacue! Eyacuiñajjiya quea jea nee ojaya epeeiji cuana. Ejjeshejji quea bihui nee quia canijo, dejja tai'ama poanijo pea'ai Eyacuiñajji quea bihui nee poani.⁸ E'e, Eyacuiñajjiya aquiana cuana quea huiso nee nee yani. Jamajjeya miquianajaya quea huiso ejjeshejji aema huasijje quia majje, jamati ohuaya miquianajaya aquiana quea huiso po tiitii mee caje'yo. Miquianaya aema' nei epoji pojieama. Chojja. Eyacuiñajjiya miquianaya jaahuana cani.⁹ Yahuajo nei nei esohui etehue'yo jama poa ba'a:

“Ojjaña joya ejjeshejji quea huiso quia tiitii canaje aema' ba'e meesahauajji quea pame nee poanaje. Jamajjeya jjeyahua nei Eyacuiñajjiya oya quea ja'a ba'e meesahua caje. Quijje pea'ai ba'e tiitii mee caje'yo”.

Jamaya yahuajo nei nei esohui etehue'yo poa.

¹⁰ Eyacuiñajjiya eso' quia cani ojjaña huasijje quejo equecuajji. Ohuaya bobí quia cani ojjaña bobiajji pea'ai. Jamajjeya ohuaya miquiana huasijje

eso', bobi pea'ai quia majje, ¡miquianaaya aquiana cuana quiacue pea cuana huasijje! Jamaya quea pame nee.¹¹ E'e, Eyacuiñajjiya miquiana huasijje aquiana mi ba'e meeiji quia caje'yo. Jamajjeya miquianaaya pea huasijje aquiana o ba'e meeiji quia poquia tiitije. Jamajoya miquianajaya aquiana quea huiso equia'yo aema huasijje eya quiajje onaaya huohui caje jama ba'a; —Eyacuiñajji ecuana jaahuanajji quea pame nee poani. Ohuaya Conitojo ba'e cuana ecuana que quia meeshahua canaje quea huiso, ma ecua Pabohua huohui canaje jama acanaje —poaje queabihui nee.

¹² Ma aquiana cuana miquianaaya Jesosaja epeeiji aema' cuana huasijje quiañajo, quea ja'a nee ba'e meeña. Cuanaya ma aquiana quea huiso quiañajo, onaaya Eyacuiñajji bihuia neinei cani: —E'e, Eyacuiñajji, jamaya. Miya quea pame nee poani ecuana nijje —poaje.

¹³ E'e, miquianaya dejja tai'ama poanijo, aquiana quiañajo quea huiso ba meeña miquiana Jesosaja epeeiji quea ja'a nee poani. Jamajjeya oya cuana mimije jama ba'a: —Eyacuiñajji, miyaya miquea epeeiji cuana quea ja'a nee po meeña. Miyaya oya cuana quea huiso aquiana quianaje. Jamajjeya miquea pea epeeiji cuana huasijje aquiana quea huiso huoojea canaje ona ba'e meesahuajji. E'e, miquea epeeiji cuaa Conitojo ba'eya huohui cani oya cuana Jesosa Quitoja epeeiji cuana poani. Ecuana eba onajaya esohui e'e jojo nei poani miquea esohui jayojja jama oya cuana poanijo —jamaya pea cuaa huohui caje miquianajo.

¹⁴ Jamajjeya miquianaya ojaya quea jea poanijo, Eyacuiñajji nijje mimi majje jama poaje miquianajo ba'a: —Eyacuiñajji, miyaya quea huiso aquiana quianaje ona que. Majoya Jesosaja epeeiji cuana Conitojo ba'e quea huiso aquiana quia meesahuanaje ecuana que. Ecuana quea jea ameesahuanaje. ¡Quea pame nee poanijo, oya cuana jaahuanacue! —jamaya onaya mimije Eyacuiñajji nijje.

¹⁵ Eyacuiñajji esejo jjashahuabaquiani. Jamajjeya eyaya oya bihuiaña jama ba'a: —Eyacuiñajji, miyaya mique Bacua Ejja huoojeanaje ecuana jaahuanaa. Quea pame nee nee poanaje miya —jamaya Eyacuiñajji bihuiaña eyaya.

Mahuiso ecuea esohui ejjeshejji equiajjijo.

Pabo esohui huohuijji nei nei

10 ¹⁻² Jjeya eyaya, Pabohua pea esohui tehueña. Eyacuiñajjiya eya huoojea canaje miquiana sohuihuohuiya. Jamajjeya ¡shajja'ajjacue mo! Jesosa Quito ese nijje quea bei poani. Jamajjeya eseya ojaya epeeiji poanijo, eya miquiana nijje mimi neineiani jama ba'a: —Beca siajjepoiji cuana miquiana nijje mimiani ejo jama ba'a: "Pabo aje oe ecuana nijje nequiahua oya ca'a'ama, quea mete poanaje. Quea huesha nei nequija jjejojo ca ca quea sohui bishaa, quea tecue pealai poani; poe majje, cho" oya siajje poani.

¡A'a maya siajjepoiji cuana shajja'ajjajji! ¡A'a o jayojja jama mimiji! E niñebajji, eyaya miquiana tecueaje poe majje. Eya quea tecue poaje beca cuana nijje ejo quea tai jjashahuabaquianijo. Oya cuana aje oe jjashahuabaquiani jama ba'a: —Pabo Eyacuiñajjiha huoojea'yo jayojja jama po ajja. Ohuaya ojaya ejjashahuabaquijji jayojja jama poani, Jesosaja ejjashahuabaquijji jayojja jama pojjeama —ejo siajje poani beca cuana.

³Chojja de. Eseya Jesosaja epreejji cuana jiquio meshijo ba'yanijo oijaña quea mimishi mimicuiajeanobiajea sa seya aña. Jamatii eshahuaja epreejji cuana jayojja jama jjashahuabaqui ajja eseja. ⁴Eshahuaja epreejji cuaa onajaya ejjashahuabaquijji quea tai jayojja jama acani. Eya, chojja. Ecuea ejjashahuabaquijji pojjeama eyaya eshahuaja epreejji cuana mimicuiajeanobiajeaña. Eyacuiñajjiya ca ca eya ojaya ejjashahuabaquijji ameesahua cani. Jamajjeya ohuaya eya oijaña joya quea mimishi nee poani mimicuiajeanobiajea meesahua cani. ⁵Ecuea eba Eyacuiñajjiha esohui quea ja'a nee. Jamajjeya beca cuana Eyacuiñajjiha esohui niñeba canijo, eyaya oya cuana mete mee majje mimicuiajeanobiajeaje; jjaniñebapajeaquee meeje'yo. Cuanaya beca cuana Eyacuiñajjiha quea tai jjashahuabaquiani mimicuiajeanobiajeaje'yo pealai. E'e, Eyacuiñajjiha eya ameesahua canijo, beca cuana quea tai jjashahuabaquiani eyaya Jesosa Quitoja esohui jayojja jama ameeje'yo. ⁶Miquianaaya Jesosaja esohui jayojja jama acue! ¡Ojaya epreejji nei pocue! Majoya eyaya shajjama' cuana miquiana nijje nequi, oijaña quea mimishi poani pealai tecueaje.

⁷Beca cuaa miquiana nijje nequiya e cojja ba majje huohui cani jama ba'a: —Pabo ca'a'ama pojja'a. Sohui sajea'ama. Eyacuiñajjiha huoojea'yo pojjeama, sohuihuohui sahua jjima pojja'a —jamaya poani e ba pishana majje.

Jamatii ecuea ejjashahuabaquijji Jesosajo onajaya eba pojjeama. Oya nei Jesosa Quitoja epreejji poso jjabaquiani. Cajjashahuabaquiahu jama ba'a: —Pabo pea'ai Jesosa Quitoja epreejji poani e'e jojo nei. E'e, Pabo ecuana jayojjaya jama poani —cajjashahuabaquiahu.

⁸E'e, eya bicho'ama miquiana nijje emimiji. Jama mimi majamajame eya poani ba'a: —Eya iña iquio Eyacuiñajjiha esohui huohuijji. Ohuaya eya huoojea canaje miquiana huasijke oja sohui huohuiya, miquiana ojaya epreejji quea ja'a nee po meeya. Eya miquiana jjabahuejjaquianijo quea yeno po mee sa po'yo ajja. Cajaa sa po'yo ajja pea'ai —jamaya eya miquiana nijje mimiani.

⁹Eyaya miquianaya jjabahuejjaquianijo, quea ajjajja po mee sa po'yo ajja.
¹⁰Beca siajjepoiji cuana miquiana nijje nequi ejo siajje poani jama ba'a: —Paboja esohui etehue'yo quea sohui ja'a poani. Emeshi meseja esohui etehue'yo quea ja'a jayojja jama poani pea'ai. Jamatii oya ecuana nijje nequianijo ca'a'ama poani. Ojaya esohui quea ja'a pojjeama pea'ai —jamaya siajje poani beca cuana.

¹¹Ma siajjepoiji cuana cajjabahuejjaquiahua jiquio jama ba'a: Miquiana huasijke poqui majje jiquio ecuea esohui etehue'yo jayojja jama eyaya aje'yo miquiana huasijke, e'e jojo nei.

¹²E'e, beca siajjepoji, esohui huohuijji nisho cuana miquiana nijje nequi mimiani jama ba'a: —Ecuana ca ca quea pame nee nee poani. ¡Ecuana oe shajja'ajjacue! —jama siajje pomeya poani.

Eya ca ca jjashahuabaqui sa po ajja jama ba'a: —Pea cuaa aje oe quea tai acani. E jayojja pojjeama onaya. Eyaya ca ca oe quea pame nee aña —chojja, jamaya eya, Pabo po sa po'yo ajja.

Ma siajjepoji, esohui huohuijji nisho cuana aje oe jama poani tii ba'a: —Ecuana ejjashahuubaquijji quea ja'a nee nee, onajaya, chojja. Ecuana jayojjaya jama capo'yahua ojjaña —jamaya poani.

Chojja. Quea ja'a pojjeama jjashahuubaquiani, de. ¹³Eyacuiñajjiya ca ca eya huoojea canaje miquiana huasijje ojaya esohui huohuiya. Jamajjeya ojaya esohui eyaya huohuiaña bicho'ama miquiana huasijje. Ojjaña huasijje ca ca huohui jjima. ¹⁴E'e, miquiana huasijje esohui Jesosa Quitojo eyaya huohuinaje. ¡Bacue! Eyacuiñajjiya eya huoojea canaje miquiana huasijje esohui huohuiya. Ojaya esohui huohuijji e'e jojo nei eya. Eyaya quea ja'a nee huohuiaña. Jiquio ecue tehue'yojo eya bicho'ama. ¹⁵Cuanaya miquianaya sohuihuohuiañajo eya siajje po ajja jama ba'a: —Eya ee nei ojjaña huasijje esohui huohuijji nei quea ja'a nee. Onaya miquiana nijje chaco jjima; siajje poani —eya jama siajje pomeya po ajja.

Esohui huohuijji nisho ca ca oe jama siajje pomeya poani, oe nei esohui huohuijji poso jjabaquiani. Eya ca ca quea pame nee jjashahuubaquiani jama ba'a: —Miquianaaya Conitojo ba'eya Jesosa Quitoja esohui jayojjaya jama quea ja'a añajo eya pea cuiñajji cuana huasijje esohui huohui meesahuaje Jesosaja.

¹⁶Jamajjeya miquianaya jamaya poajo eya poqui meeje pea meshi cuana huasijje esohui quea pame nee huohuiya Jesosajo, onaja esohui huohui jjima huasijje. Esohui huohuijji pea meshi cuanajo enequijo eya ona nijje enequi tiitiiji pojjeama. Iña ca jja ca poquije, de, pea cuana huasijje Jesosaja esohui huohuiya. ¹⁷E'e, yahuajo nei esohui etehue'yo jama poa ba'a:

“¡A'a jama huohuijji ba'a: —Eyaya jamatii quea pame aña. Chojja, jamaya pojjeama. Jamaya huohuicue ba'a: —Eyacuiñajjiya eya quea pame nee ameesahua cani. Jamajjeya eyaya quea pame aña —jamaya acue!”

Yahuajo nei esohui etehue'yo jamaya poa. ¹⁸Eyacuiñajji ojaya epeejji quea pame neejo mimiani jama ba'a: —Jiquio epeejjiya quea pame nee acani. Jamaya ecuea quea boti nee.

Beca cuaa ca ca huohui cani jama ba'a: —Eya quea pame nee poani jamatii. Jamajjeya jecuea esohui shajja'ajjacue! —jamaya esohui huohuijji nisho poani onajaya quea jea e'ajji. Jamaya ca ca Eyacuiñajjiya boti'ama.

Esohui huohuijji nishojo Pabo quea yeno mimiani

11

¹Dejja ma ohua acanajejo jjashahuuba tiitiiquianijo esho'i jama mimijajjani, de. Jamatii ma eya ananjejo mimianijo, ja'a jja oe enijje quea quene pojji! ¡Shajja'ajja socue mol! ²E'e, miquianaya Eyacuiñajjiya quea jea nee nee

poanijo, ecuea quea jea nee nee poani pea'ai. E'e, eyaya miquianaya Jesosa nijje jjapee coo meesahuaquinaje. Jiquio ecua ejearjiya ojaya ebacuase mimishi'ama nei huana mee sa acani jayojja jama eyaya miquianaya Jesosa nijje jjapeequi mee sa aña quea boejea nee, eshahua nijje pojjeama.³ Ecuea eba miquianaya Jesosaja epeejji e'e jojo nei po sa neinei poani. Jjeya ca ca eya quea mete jjashahuabaquiani miquianajo, esohui huohujiji nishohua miquianaya quea tai jjashahuabaqui mee ca chana! Jiquio ecua Edosiquiana neiya ma ecua peyo jayojja Ema dasia ca poa jayojja jama esohui huohujiji nishohua miquianaya dasia ca chana'; Jesosa nijje jjapee pajea meequi ca chana!⁴ E'e de, miquianaaya aje oe oijaña esohui huohujiji nisho shajja'a'jaña. Oya cuana Jesosajo siajje poani, Edojoshahua Pamejo siajje poani pea'ai. Esohui quea pame Jesosajo ecuanaja esohui jayojja jama pojjeama huohui cani. ¿Apiojji acuaeya oya cuana shajja'a'jaña so'o?⁵ Oya cuana ca jja ca oe Eyacuiñajjija huoojea'ylo esohui huohujiji e'e jojo nei poso nequiaa aña; eya ca jja nequiaa ca oe cajaa aña. Chojja, eya ca ca iña iquio e'e jojo nei Eyacuiñajjija huoojea'ylo.⁶ E'e pojja'a oya cuana mimiani quea bishaa nee. Jamatii esohui quea pame Jesosaja ecuea eba nei nei. Jamaya miquianajaya eba. E'e, eyaya ma esohui huohui neineinaje oijaña cuiñajji cuana huasijje.

⁷Eyaya Eyacuiñajjija esohui quea pame Jesosaja huohuinaje miquiana huasijje sosema!. Eyaya ecuea eba'ejji jjeshenaje pea'ai ecue chaco sosejje. Miquea echacojji jayojja jama poanaje eya. Jamaya miquianaya Eyacuiñajjija esohui ba meesahuanaje. ¿A'a jamaya quea tai, quea pame pojjeama? Chojja. Jamatii beca cuana jama poani ba'a: —Pabo pojja'a Eyacuiñajjija huoojea'ylo pojjeama. Jamajjeya mi sosequia mee cani esohui huohui cani sosejje —jama siajje pomeya beca cuana poani.

⁸;Bacue! Miquiana huasijje esohui huohuañajo, Jesosaja epeejji cuaa pea cuiñajjijo ba'eya eya sosequia canaje. Eya sohuihuohui meesahua canaje. Miquianaya ca ca oe Eyacuiñajjija esohui shajja'a'ja majje jamatii sosequia jjima.⁹ E'e, Jesosaja epeejji cuaa Masenonijao ba'eya poe majje ecuea eba'ejji ye canaje. Yahuajo miquiana nijje ba'eya eyaya miquianajaya bobijjia jjima: —;Che mo oe esohui huohui sosejje! —ajjima ecuea miquianaya. Jamaya eyaya sosema' esohui huohui poquia tiitije quijje pea'ai.

Jamajjeya miquianajaya jama yajji pojjeama ba'a: —Pabo ecuaaya bobianaje, quea huiso ba'e meesahuanaje —jamaya e'ajji pojjeama miquianajaya.

¹⁰Chojja. Jamajjeya oijaña cuaa Acaya meshijo ba'eya ba caje eyaya esohui huohuinaje miquiana huasijje sosema!. Jesosa Quitohua ba cani eya e'e jojo nei mimiani.¹¹ Jamaya eyaya huohuañajo miquiana ecuea quea jea nee nee poanijo. Jamaya Eyacuiñajjija eba.¹² E'e, eyaya Jesosajo huohui tiitije miquiana huasijje sosema!. Jamajjeya esohui huohujiji nishohua jama huohuime yajji pojjeama ba'a: —Ecuana Pabo jayojja chacochacoani —jamaya e'ajji pojjeama onajaya.

Esohui huohujiji nisho nequiaa sosequianaje esohui huohui cani sosejje.¹³ Oya cuana ca ca oma Eyacuiñajjija huoojea'ylo nisho poani, Eyacuiñajjija huoojea'ylo pojjeama. Miquianaya dasia cani; Jesosaja huoojea'ylo esohui

huohuijji poso nequiaa aña. ¹⁴E'e de, Edosiquiana nei Satanasa jama oya cuana poani. Ohuaya, Satanasa ojaña dasia cani; Jesosaja esohuidojiji quea pame nee poso acani cuaa. ¹⁵Jamajjeya ojaya echacojji cuaa miquianaya dasia cani pea'ai jama ba'a: Oya cuana Eyacuiñajjija echacojji quea pame nee poso nequiaa aña, de. ¡Poe o'oya majje Jesosaa oya cuana quea nee nee po mee caje'yo tii tii!

Pabo Jesosaja huoojea'yo poanijo quea nee poa

¹⁶Jamajjeya eyaya miquianaya huohui o'oyaje quea bicho pishana. ¡A'a eya esho'i jama mimiani poso ajji ma eya anajejo mimianijo! ¡Miquiaaya ejo jamaya poso aña, jamatii eya che shajja'ajja socue! Ma eya Jesosajo anajejo mimije so'o esho'i jama, onajaya quea jea e'ajji nisho. ¹⁷Jiquio ca ca ecuea esohui; eya jjeya Jesosa jayojja jama pojjeama mimiani. Eya esho'i jama ma eya anajejo mimiani quea huiso. ¹⁸Jamatii quea huiso esohui huohuijji nisho esho'i jama ojaya huapa pojjeamajo, ma ohua acanajejo pea'ai mimimimiani. Jamajjeya ona jayojja jama eya pea'ai mimije. Eya ca ca iña quea bicho mimije. ¹⁹Miquianaya aje oe jjashahuabauquiani jama ba'a: —Ojjaña ecuea eba. Eya ca ca iña jjadasia meequi ajja esohui huohuijji nisho cuana —jjashahuabauquiani.

Jamajjeya shajja'ajjaña joya esho'i jama joya ohua acanajejo mimiani pea'ai. ²⁰E'e, ma esohui huohuijji nishohua miya chaco mee cani sosema', minijje ba'yani sosema', miquea aquiana mesena'yo sa acani, miya tanacula cani, cojja cuiapojojea cani pea'ai quea bicho epo meeiji. Jamatii miquianaya aje oe oya cuana shajja'ajjaña, de. ²¹¿Apiojji acuae jja oe shajja'ajjaña? Ecuea ca ca jamaya aijima. Jamajojoya ¿a'a eya ca'a'l'ama poso nequiaa aña, de? ¿A'a ma esohui huohuijji nisho cuana esho'i jayojja jama mimiani onaja quea jea e'ajji? E'e. Jamajjeya eya jamaya mimije pea'ai. ²²Esohui huohuijji nisho jama poani ba'a: —Ecuanaya jja iquo Emeo dejja cuana, Emeo esohui mimiani.

¡Dee! Eya pea'ai Emeo dejja, Emeo esohui mimiani.

—Ecuanaya Isaeni dejja cuana —poani pea'ai ma esohui huohuijji nisho.

Eya pea'ai Isaeni dejja, onaya jayojjaya.

—Ecuanaya etiiquiana Amajama bajjani —ma esohui huohuijji nisho poani.

Amajama ecuea etiiquiana pea'ai, de.

²³—Ecuanaya jja oe Jesosa Quitohua huoojea canaje esohui huohuijji —oya cuana siajje poani.

Eya ca ca e'e jojo nei Jesosa Quitoja huoojea'yo, de. Jjeya eya esho'i jama mimiani. Jamatii eyaya janobajjima nei chaconaje Jesosa nijje. Esohui huohuijji nishohua aje oe oe pojji chaco cani. Dejja mimishi cuaa eya jeanobiajea huicha'a huicha'a canaje esohui eya ehuohui poaje jjejojo. Oya cuana, cho. Jodio etii cuaa eya cuia majamaja canaje Jesosaja esohui eya ehuohui poaje jjejojo. Ma esohui huohuijji nisho pea cuanaja cuia neinei jjima. Eya beshahua nei mano'yonaje; quea

huiso mano huicha'a huicha'a'ajja'yonaje. ²⁴E'e, ojaaña ba canijo, Jodio etii cuaa eya quea huiso cuiasejja neinei'ajja canaje, 39 cuiasejjame acanaje, de, huaca jee ejeapashajjajaa. Cuiasejja majamaja canaje, me oeije huisome cuiasejjame acanaje; pea meshijo cuia, pea meshi cuanajo cuia ca iña acanaje cuaa, de. Beshahua nei ca iña mano'yonaje mo, de. ²⁵Jodio cuaa eya cuiasejja canaje acui sisiya, pea beca peejiima cuiasejjame acanaje pea'ai. Jaja canaje pea'ai meiya eya esohui ehuohui poaje jjejojo. Beshahua nei eya hui'l'yonaje, pea beca peejiima hui'ime poanaje. E'e de, bishe ai cuana jaanobiquinaje bae ai yasijje. Jamajjeya oe mecajje, oe pojajao pea'ai eya bae aijo huepee biajje jjeejee ba'e'yonaje. ²⁶Cuanaya eya poqui huicha'a huicha'anaje pea cuiñajji cuana huasijje esohui huohuiya. Poquije beshahua nei eya mano'yonaje yohuajo ba'a: cuei quea cuejipashi neijo, siipojji cuanajo, Jodio cuanajo, Jodio pojjeama cuanajo pea'ai. Cuiñajji quea quemodo, ebiojo pea'ai dejja mimishi cuaa napa cajje eya beshahua nei mano'yonaje. Bae aijo beshahua nei hui'l'yonaje pea'ai. Jesosaja epeejji nishohua cuia cajje beshahua nei eya poquijeyo'yonaje pea'ai. ²⁷Eyaya chaco neineinaje; cahui jjima poanaje pea'ai. Quea camajajo hueahuea'yonaje. Quea mano poanaje. Quea shoe poanaje. Quea naba taja nee nee poanaje. Bobimajo mano'ajja'yonaje. Eya quea huoe nei nei poanaje, daqui mooma' poanaje pea'ai. ²⁸E'e, quea camaja ecuea eba'eiji. Cuanaya ojaaña pojajao eya jjashahuuba majamajaquiani ojaaña Jesosaja epeejji cuana jaahuanajji. ²⁹Jamajjeya Jesosaja epeejji nei cuana quea mete, cal'ala ma poanijo, eya quea yeno nee nee jjashahuubaquiani. Oya cuana quea mimishi poajo, mimishi pajea mee sa neineiaña eyaya. Jamaya eya poanaje.

³⁰Esohui huohuiji nishohua miquianaya dasia canijo, eya camimi majamajaquiahua ecuea eba'ejjijo. Jjeya ca ca eyaya miquianaya huohuije pea esohui. Ma ba majje miquianaaya baje eya quea mete, dejja ca'a'ama jayojja jama poani. ³¹Eyacuiñajji esejaya Emeshi Mese nei Jesosaja Chii. ¡Oya cabihuia tiitii cahua! Ojaya eba eya e'e jojo nei mimiani jama ba'a: Yahuajo Aneta emeshi mese poa Damasico cuiñajjijo. Ohuaya ojaya echacosahuajji cuana huoojea canaje e sa'ajja'yohua ojaaña ejiojjije, ba'yo majje e jeanobiajeajji. ³²Jamatii eya ojaya iña jjima, de. Eya Damasicoco nequi quehua poquinaje mecajje. ³³E'e, Jesosaja epeejji cuaa mei jiyojo nequiya equi huejjajje eya jjepai aijo jjabioquiajo, jeaoquea ca'yonaje cuaa jjonojo.

Jesosaa Pabo jjacahuibaqui mee canaje ojaya eba'eiji eyajo

12 ¹Eya esho'i jama ma eya añajo mimi majamajani miquiana sohui huohuiji nisho eshajja'ajja poaje jjejojo. Jjeya ca ca eyaya miquianaya huohuije pea esohui, ma Jesosaa eya jjacahuibaqui mee canaje huohuije. ²Yahuajo nei quea shequijaja huiso, 14 shequijajame yahuajo Jesosaa eya ojaya e'anijji eyajo jjacahuibaqui mee ca poa. Eya jjacahuibaquinaje pojja'a. E'e pojja'a eya eshe dojosohuaqui ca poa pojja'a. Ecuea ba jjima. Eyacuiñajjija ca ca oe eba. ³E'e, eya pojja'a eshe ba mee ca poa.

Jjacahuibaqui mee ca pojja'a mo poa. Eyacuiñajjija ca ca oe eba. Ecuea ca ca ba jjima. ⁴Jamatii ecuea eba maya: Jesosaa eya ba mee ca poa; ohuaya eya dojosohuaqui ca poa ojaya eba'ejji Quea Pame Nee bajjani yasijje, Panaiso bajjani yasijje. Jomajo eyaya shajja'ajjanaje esohui quea bame nee nee. Maya eyaya miquianaya huohui meemee ajja, yajja huohuime yajji jojoya. E'e, Jesosa eyajo ba'e enijke miminaje. ⁵Jamatii eya ma esohuijo mimi huicha'a huicha'a ajja esho'i jama. Chojja. Eyaya miya ba meeje eya quea ca'a nee nee pojjeama. E'e jojo nei Jesosa enijke miminaje eyajo. ⁶Jamajjeya ma eya anajejo mimi huicha'a huicha'ajo jamatii eya esohui huohuijji nisho jama pojjeama mimiani. Ecuea esohui ca ca e'e jojo nei. Miquiana nijje ba'eya eyaya chaco neineinaje miquianaaya banaje. Shajja'ajjanaje ecuea esohui Jesosaja esohui huohuañajo. Jamajjeya ejo jjashahuubaquiani e'e jojo nei miquianaya. Jamajjeya ma eya anajejo ehuohui majajji pojjeama esho'i jama, de, miquiana ejo jama ehuohui poaje jjejojo ba'a: —Pabo ca ca quea pame nee nee Jesosaja epeejji quea ca'a tii tii —miquianaaya ehuohui poaje jjejojo.

Chojja, eya jamaya pojjeama.

⁷Jamajjeya Jesosaa eya ojaya eba'ejji quea pame nee nee eyajo ba mee majje Eyacuiñajjija eya quea nee po mee canaje emanomeejjijo pojja'a. Jamajoya eya quea ca'a tii tii ejjashahuubaquijji pojjeama. Jiquio ecua Edosiquiana neija Satanasaja huoojea e cuiajji jayojja jama jiquio emanomeejjiji pojja'aa eya quea nee nee po tiitii mee cani. ⁸Eya Jesosa nijje miminaje pea beca peejjima mimime. Jama poanaje ba'a: —Jesosa Quito, eya quea nee nee nequi. ¡Che mo oe nee'ama po meecue! —eya mimime poanaje.

⁹Jamatii Jesosaa eya saja'a canaje jama ba'a: —Pabo, e'e jojo nei eyaya miya jaahuanaje. Eyaya miya chaco meesahuaje. Miya ca'a'ama poanijo, chaco neinei meesahuaje, jamatii quea nee —acanaje.

Jamajoya eya ca'a'ama poanijo quea bihui nee poani. E'e, ecuea eba Jesosaa quea ca'a nee nee poaniya eya quea ja'a nee ojo chaco meesahua cani. ¹⁰Jamajjeya eya quea nee nee poanijo, ecuea eba'ejji quea camaja poanijo pealai jamatii eya quea bihui nee poani. Pea cuaa eya napa canijo, mimijajaniyo pealai, jamatii quea bihui poani. Jesosaja esohui huohuijjiyo, jamaya dejja mimishiya eya acani. Jamatii eya quea bihui nee poani tii. E'e, eya ca'a'ama poanijo, Jesosaa eya quea ca'a nee po mee cani.

Pabo Jesosaja epeejji cuana Conitojo ba'ejo quea yeno poanaje

¹¹Eya esho'i jama ma eya anajejo mimi majamajaje miquiana esohui huohuijji nisho eshajja'ajja poaje jjejojo. Oya cuana aje oe Eyacuiñajjija huoojea'yo esohui huohuijji poso jjabaquiani. Eya ca ca iña e'e jojo nei Eyacuiñajjija huoojea'yo. Miquianaaya ca jja ca oe eya banaje Jesosajo chacockacho aninaje. Jamatii ejo huohui jjima jama ba'a: —Pabo e'e jojo nei Jesosaja huoojea'yo esohui huohuijji —miquiaa mo che ehuohuinaje ese.

Miquianaaya mo oe che quea pame nee mi huohuinaje, jamajjeya eya ecuea eba'ejji jo camimi quiahua esho'i jama, de. ¹²E'e, eya miquiana nijje nequi Jesosaa eya atitii mee canaje quea huiso ma dejja ajiima acani amee canaje miquianajaya ebajji. Jamajoya miquea eba eya Jesosaja huoojea'yo esohui huohuijji. ¹³¿A'a eyaya miquianaya quea pame pishana anaje, Jesosaja epeejji cuana pea cuiñajijo ba'e quea pame anaje pojja'a? Chojja. Ohuaya e ba'e meeji quia canaje. Maya eyaya jjeshenaje. Miquianajaya quia jjima. Jamatii ecuea bobijo huohui'ajja jjima. E'e pojja'a eyaya miquianaya ehuohui'ajjanaje ese jama ba'a: —¡Jesosaja pea epeejji jama sosequiamaya mo che acue esohui huohuiña sosejje! —e'anaje ese. Jamatii jamaya mimi jjima eya.

¹⁴Yahuajo eya miquiana baa poquinaje beca poquime. Jjeya eya apoa. Poquije o'oya miquiana baa. Poqui majje eyaya eba'e meeji jo mimimimi ajja poaje. Chojja. Eya miquianajaya ejjeshejji sa po ajja. Miquianaya ca ca eya sa poani ecuea epeejji pojji. Jiquio ecua esho'i cuaa oja chii, ojaya enaese pea'ai bobia ajja jayojja jama eyaya miquea bobi sa ajja. Jamajjeya eya mique chii jayojja jama poanijo eya mi jaahuanajji poani. Miquianaya ca ca e jaahuanajji pojjeama. ¹⁵Jamajjeya eyaya miquianaya Jesosajo ba meesahuaje sosema!. Jamajjeya e'e pojja'a eya aema' poaje. Cuanaya eyaya quea huiso chacoje miquiana esohui ba meesahuajji. Eya pojja'a hueahueaje miquianaya jaahuanajo. Jamatii. Ecuea miquianaya quea jea nee nee. ¡Apiojji acuae eya miquianajaya quea jea pishana, miquianaya ecuea quea jea nee nee poanijo?

¹⁶Miquianajaya eba eya miquiana nijje nequi camaja'ama miquianajo poa. Chojja. Miquianajaya bobo ijjia jjima ecuea. Jamatii beca cuana aje ejo siajje poani jama ba'a: —Pabo siajjepoiji. Ecuana dasia ca'yonaje —siajje oya cuana poani.

¹⁷Chojja de, ecuea miquianaya dasia jjima. Esohui huohuijji ma eya huoojeanajeja miquianaya dasia jjima pea'ai. ¹⁸Eyaya Tito huoojeanaje jama ba'a: —¡Poquicue miya Conito huasijje esohui huohuiya Jesosajo! ¡Jesosaja epeejji oe dojocue minijje! —poanaje eya.

¿A'a Titohua miquianaya dasia canaje? Chojja. Ohuaya eyaya jayojjaya acanaje. Miquianaya ojaya quea jea nee pea'ai ecuea jayojjaya.

¹⁹¿A'a cuae miquianaya ecuea etehuejo jama jjashahuabuquiani pojja'a ba'a: —Pabohua aje pojja'a jja oe huohui cani oya e'e jojo nei Jesosaja huoojea'yo esohui huohuijji. Ecuana Jesosaja huoojea'yo nisho poani —a'a jamaya miquianaya jjashahuaba taiquiani?

¡Bacue oe! Eyacuiñajjija eba eya Jesosaja esohui jayojja jama e'e jojo nei huohuiña. Epeejji cuana, miquianaya ecuea quea jea nee. Jamajjeya eyaya ojjaña aña miquiana Jesosa nijje quea ja'a nee ejjapeequi meesahuajji.

²⁰Jjeya eya poquije miquiana baa. Miquianajo quea yeno jjashahuabuquiani jama ba'a: —¡Dee! E'e pojja'a quea mimishi poani o'oya: Jjamimicuiaeja nobiajeaquiani, onaja aquiana jea ba cani, quea quene nee nee poani, quea aquiana nahue poani, quea nishehui poani, mimijajiani, pea cuanajo maimaiani, oya jjeshe sa pojji pea'ai jjejojo mimiani, quea shajjaquijjo,

shajjama' poani pea'ai pojja'a —jamaya eya jjashahuabaquiani miquianajo, Conitojo ba'e cuanajo.

Miquianaya jamaya poajo eya quea yeno nee poaje. ¿A'a miquianaya quea yeno poaje miquianajaya mimishijo eya tecueajje? ²¹E'e, miquiana quea mimishi poani ba majje eya quea tecue nee nee po chana'. Eya quea yeno nee, quea bicho poaje miquianajo. E'e pojja'a eya paje miquiana ba majje, ca beca cuanaja mimishi pajea'yo jjimajo, de, quea mimishi ba'yanijo, quea apo, quea tai, de. Jamaya miquianaya poanijo, eya quea yeno nee nee poaje ba majje.

13 ¹Yahuajo eya miquiana huasijke poquinaje becanejjiji pe'a'i poquime poanaje. Jjeya eya poquije o'oya miquiana baa. Jamajjeya ¡bacie! Eyacuiñajji esohui yahuajo etehue'yo jama poa ba'a: "Oe dejja peajo maimaiani ja'a shajja'ajjajji! ¡Becaa, pea beca peejjima oya jayojja huohui cajo, shajja'ajjacue!"

Jamaya tehue ca poa yahuajo nei.

²Jamajjeya jjeya eya miquiana huasijke poquije o'oya pea beca peejjima poquime epojji. Yahuajo miquiana nijje nequiya eyaya huohuinaje jama ba'a: —Ojjaña joya quea mimishi po tiitiiiani, joya jjeya nei quea mimishi poani pea'ai eyaya tecueajea neineije poe o'oya majje —jamaya eyaya jjeya miquianaya huohui o'oyaña.

³E'e, Jesosa Quitohua eya huoojea canaje miquiana huasijke ojaya esohui huohuiya. Ohuaya eya huoojea cani miquiana jjabahuejjaqui meeji pe'a'i. Joya miquiana nijje ba'e quea mimishi poani tii tii quea nee nee po mee caje'yo, ohuaya. ⁴¡Bacie! Dejja maseya Jesosa yahuajo nei acui ecueata'apeejo me cacajea cajje oya mano'yonaje. Jesosaja ca ca oya cuana jeabichajea jjima. Jamatii Eyacuiñajji quea ca'a nee nee poaniya Jesosa shequi mee ca o'yanaje; quea ca'a nee nee ba'e tiitii mee cani. Yahuajo Jesosa ca'a'ama jayojja poa. Jamaya pealai eya ca'a'ama. Jamatii Jesosaa eya quea ja'a nee ojaya esohui huohui meesahua cani miquiana jjabahuejjaqui meeji.

⁵¡Jjashahuabaquicue! ¿A'a Jesosaja esohui jayojja jama aña miquianaaya? Jesosa Quito miquiana nijje yani. ¿A'a miquianajaya ba jjima? Jesosa miquiana nijje pojjeama ca miquianaya ojaya epeejji nishojo, de. ⁶Eya ca ca iña Jesosaja esohui huohuiji e'e jojo nei. ⁷Jamajjeya eya Eyacuiñajji nijje mimiani miquiana mimishi pajea meesahuaji jama ba'a: —Eyacuiñajji, ¡miquea epeejji cuana Conitojo ba'e mimishi'ama nei ba'e meesahuacue! —eya poani.

Eya jama jjashahuabaqui ajja ba'a: —Jesosaja epeejji Conitojo ba'eca mimishi'ama ba'e ba majje pea cuaa eya bihuia caje, esohui huohuiji nei —jamaya eya po ajja.

Chojja, miquianaaya eya Eyacuiñajji huoojea pojjeama poso aña; esohui huohuiji nisho poso aña; jamatii eya Eyacuiñajji nijje mimiani miquianaya

ojaya epeeiji quea ja'a nee eba'e meesahuajji. ⁸E'e, dejjaja Eyacuiñajjija esohui e'e nei ehuoojea pajea mee'yojji pojjeama ojjaña huasijke. Jamajjeya ecuea esohui e'e jojo nei, siajje pojjeama. ⁹Jamajjeya miquianaya quea pame, mimishi'ama ba'e ba majje eya quea bihui nee poaje. Jamajjeya miquianaya etecueajji pojjeama, jamatii tecuea jjimajo eya Eyacuiñajjija huoojea'yo quea ja'a nee pojjeama poso aña. Jamajjeya eya Eyacuiñajjiji nijje mimiani miquianajo jama ba'a: —Eyacuiñajji, ¡miquea epeeiji cuana quea ja'a nee ba'e meesahuacue oe! —eya poani.

¹⁰Jamajoya miquiana huasijke poqui jjimahuaa eyaya esohui tehueña miquianajaya mimishi epajea'yojji. E'e, eya Eyacuiñajjija huoojea'yo esohui huohujji, miquiana jjabahuejjaqui meejji. Eyacuiñajjija eya huoojea jjima miquiana janobajjima nei tecueajeaa quea yeno nee nee epo meejji. Chojja, ohuaya eya huoojea canaje miquiana quea ja'a nee ba'e meesahuua. Jamajjeya mi ba majje eyaya miquianaya etecueajeajji pojjeama mimishi'ama ba majje.

¹¹Mahuiso ecuea esohui.

Esohui oe yejje nei etehue'yo

Ecuea epeeiji cuana, ¡quea bihui nee pocue! ¡Shajja'ajjacue ecuea esohui! ¡Jama acue! ¡Jjashahuaba neineiquicue quea ja'a nee nee eba'ejji! ¡Ojee Jesosa nijje jjapeequicue! ¡Quea bei nee pocue! Jamaya poajo, Eyacuiñajjiya minijje ani tiitije'yo. Miquianaya ojaya quea jea nee nee. Oya ca ca oe quea bei nee.

¹²¡Ojjaña Jesosaja epeeiji nijje mimicue quea bei!

¹³Ojjaña enijje nequiya miquianaya huohui'ajja cani jama ba'a: —¿Achajja acuae nequiana so'o? —onajaya ebajji.

¹⁴¡Esejaya Emeshi Mese nei Jesosa Quitohua miquianaya cajaahuana cahua! Eyacuiñajjija miquianaya quea jea nee. ¡Onijje caba'e tiitii mee cahua! ¡Edojjoshahua Pame miquiana nijje cajjapeequiahua tii tii!

Mahuiso. Eyaya, Pabohua jiquio esohui tehue'yonaje. Apoa.

PABOJA ETEHUE'YO JANATA MESHIVO BA'E YASIJJE

GÁLATAS

Pabohua tehue canaje Jesosaja epeejji cuana Janata meshijo ba'e yasijje

1 ¹⁻²Eya Pabo bajjani. Ecuea epeejji cuana Janata meshijo ba'e, eyaya miquiana que jiquio esohui tehuename, Jesosaja epeejji cuana huasijje. Ojjaña Jesosaja epeejji cuana enijke nequiya pea'ai miquianajo jjashahuabauquiani. Eya huohui'ajja mee cani jama ba'a: —¿Achajja a nequiana ani so'o? ¿A'a quea tame? —poani ecuanaja ebajji.

Eyacuiñajjiya, esejaya Chii aiya Jesosa Quito emano'yojaa shequi mee ca o'oya poa. Ohuaya Jesosa Quito nijjeya eya huoojea canaje esohui huohuiya. Dejja cuana ca ca e huoojea'yoiji pojjeama.

³Ecuea epeejji cuana, eya Eyacuiñajji nijje mimiani miquianajo jama ba'a: —Ecue Chii, ¡miquea epeejji cuana Janata meshijo ba'e quea tame nee jaahuanacue! ¡Quea bei po meecue pea'ai! —jamaya eya mimiani esejaya Chii ai nijje, Jesosa esejaya Emeshi Mese nei nijje pea'ai.

⁴Eyacuiñajjiya Jesosa Quito huoojea ca poa mano'yohua, esejaya mimishi cuijea'yoiji epoji. Jamajjeya Eyacuiñajji ejjashahuabauquiji jayojja jama Jesosa mano'yonaje esejo, shajjama' cuana jayojja jama pojjeama eba'e mee'yoiji. ⁵Jamajjeya Eyacuiñajji ejjabihuiaqui jama ba'a: —Eyacuiñajji, ecuanaja Chii, miya quea ca'a nee nee, quea tame nee nee yani tii tii. Pea chama' mi jayojja —oya ejjabihuia tiitiiqui. Jamaya capoahua.

Jesosa Quito oe nei ese mimishi cuijea'yoiji poani

⁶Ecuea epeejji cuana Janata meshijo ba'e, eya quea mete miquianajo. Yahuajo miquiana nijje nequiya eyaya miquianaya huohua poa. Jesosa Quito miquianaja mimishijo mano'yonajejo, Eyacuiñajjiya miquianaya iyaa canaje onijke jjapeequiji. Shajjaj'ajja majje Jesosa nijje jjapeequi'yonaje. Jamatii onijke jjapeequi pajea'yani. ¿Apiojji acuae oe onijke jjapeequi

pajea'yani so'o? Jjeya aje oe miquianaaya onajaya esohui e'e nei pojjeama shajja'ajjaña, esohui quea tame poso aña. ⁷Pea chama' esohui quea tame nee ese ba'e tiitii mee'yoji. Esohui Jesosa Quitoja ecuanajaya yani oe nei e'e jojo nei. Esohui huohuijji nisho cuua ca ca miquianaya quea quehua jjashahuabaqui mee sa acani Jesosa Quitojo. Jama siajje poani ba'a: —Ecuanaja etiiquiana Moisesija esohui jayojja jama ba'ejo ca ca oe Eyacuiñajjiya miquianaya emimishi cuijea'yo ba caje'yo, Jesosa Quito nijje jjapeequiajo pojjeama —siajje poani esohui huohuijji nisho cuana.

⁸Yahuajo ecuaaya miquianaya esohui huohuia poa esohui quea tame nee Jesosaja jama ba'a: —Jesosa nijje jjapeequianijo, Eyacuiñajjiya miquianaya ba cani emimishi cuijea'yo —ecuaaya huohuinaje.

Onaaya miquianaya pea esohui ma ecuanaja esohui jayojja jama pojjeama huohui cajo, Eyacuiñajjiya oya cahuoojea cahua cuaqui yasijje quea nee nee epo'yoji tii tii. E'e, ecuanaya pojja'a, esohuidojoji pojja'a Jesosajo siajje pojji jjemo Eyacuiñajjiya huoojea came cuaqui yasijje. ⁹E'e, yahuajo ecuaaya miquianaya huohuinaje. Jjeya eyaya huohui o'oyaña jama ba'a: —Yahuajo ecuea esohui shajja'ajja majje miquianaya jjapeequi'yonaje Jesosa nijje. Oya oe nei miquea mimishi cuijea'yoji. Jamajjeya ojjañaa esohui huohuijji nishohua pea esohui, ma ecuea esohui jayojja jama pojjeama Jesosajo huohui cajo, Eyacuiñajjiya cahuoojea cahua cuaqui yasijje quea nee nee epo'yoji tii tii.

¹⁰Eyaya Eyacuiñajjiya esohui jayojja jama huohuaña. Eyacuiñajji ca ca oe eyaya quea bihui po mee sa aña. Eyaya esohui huohuaña dejja cuana quea bihui epoji pojjeama ejo. Jama epo meeiji pojjeama ba'a: —Pabo ca ca oe quea tame nee —e'ameejji pojjeama. Chojja, eya onaaya bihuia cani jojjemo Jesosa Quitoja esohui huohuijji pojjeama pome.

Jamaya Pabo Jesosa Quitoja esohui huohuijji poa

¹¹Epeejji cuana, ¡bacue! Eyaya esohui quea tame nee Jesosa Quitoja huohuinaje, dejjaja ejjashahuabaqui'yoji pojjeama. ¹²Jiquio esohui quea tame nee onajaya eya huohui jjima, ba meesahua jjima pea'ai. Jesosa Quitohua ca ca oeyaya eya ba meesahua canaje.

¹³Yahuajo nei Jodio etiiquianaja esohui jayojja jama ba'yaniya eyaya Jesosaja epeejji cuana napanaje quea huiso onije ejjapeequi poani jjeojo. Jamaya miquianajaya eba. E'e, eyaya aje oe ojjaña Jesosaja epeejji cuana quecua'yo sa anaje. ¹⁴E'e, yahuajo eyaya Jodio etiiquianaja esohui jayojjaya ba'e sa neinei poa. Ba neineinaje. Pea Jodiohua e tii nei'ajja esohui ba pishana canaje. Jamajjeya: —¡Etiiquianaja esohui jayojja jama caba'yahua ojjaña Jodio cuana! ¡A'a pajea'yoji! —eya jamaya po huicha'a huicha'anaje yahuajo.

¹⁵Jamatii Eyacuiñajjiya eya quea jea nee poa. E'e, ohuaya eya babaca ca poa eteejo ba'yahua ojaya esohui huohuijji epoji: ¹⁶—Pabo ecuea poaje. Eyaya oya babacanaje ecue Bacua Ejja Jesosa peejji epoji —poanaje Eyacuiñajji.

Majoya eya babaca majje Eyacuiñajjiya eya huoojea canaje ojaya esohui huohuiya Jodio pojjeama cuana huasijje. Jamajjeya ohua huoojea cajje eya pea cuana nijje mimi jjima jama ba'a: —¡Che mo eya huohuicue esohui quea pame Jesosaja! ¡Achajja acuae Jesosajo ehuohujji? —ecuea ajjima cuana.

¹⁷ Jesosaja huoojea'yo ojaya esohui huohujji Jenosanenajo ba'e yasijje eya poqui jjima pea'ai onijje mimiya. Yahuajo Jesosaa oya huoojea ca poa ojaya esohui huohuiya e huoojea jjimahuajo. Jamatii eya ona nijje mimi jjima esohui huohui sahuajji. Chojja. Eyacuiñajjiya iyaa cajje jjeya nei Anamia meshi yasijje ca ca eya poquicuajinaje meshi jabo huasijje, quima huasijje. Jomajo ani quijje nei eya poe o'yanaje Damasico cuiñajji yasijje. ¹⁸E'e, pea beca peejjima shequijame po majje eya poquinaje Jenosanena huasijje Peno baa. Onijje aninaje oe pojji cahuime, ejioji oejjye cahuime, 15 cahuime. ¹⁹Jomajo nequi eyaya Satiaco banaje pea'ai, esejaya Emeshi Mese neija echahua mese. Mahuiso banaje Jesosaja huoojea'yo esohui huohujji. Pea cuana nijje ca ca iña mimi jjima. ²⁰Jamaya eyaya e'le jojo nei huohuiaña; Eyacuiñajjiya eba eya siajje poani pojjeama.

²¹ Majoya Peno nijje mimi majje eya poquinaje Sinia meshi yasijje, Sinisia meshi yasijje pea'ai. ²² Jamajjeya Jesosaja epeejji cuana Jodea meshijo ba'eja eya ba jjima ecojjaja. Cho, eya pea meshi yasijje poquia poa. ²³ Jamatii onaaya ejo huohui canaje jama ba'a: —Pabohua ca pa jjaja ca oe jjeya Eyacuiñajjiya esohui huohui cani, Jesosaja. Yahuajo aje ohuaya ecuana quea huiso napa canaje, Jesosaja epeejji cuana. Ecuana quecua jeyojeyo sa acanaje. Jesosa nijje jjapeequi pajea mee sa acanaje. Jjeya ca ca ohuaya esohui e'e nei huohui cani. E'e de, ohuaya esohui jama huohui cani pea'ai ba'a: “¡Jesosa nijje jjapeequicue eba'e tiitiil'yojji!” poani oya Pabo, de —jamaya onaya poani.

²⁴ Jamajjeya ma esohui ejo shajja'ajja majje Jesosaja epeejji Jodea meshijo ba'e cuana quea bihui nee poanaje. Eyacuiñajji bihuiua canaje jama ba'a: —Ecue Chii, miya quea pame nee nee, quea ca'a nee nee. Miyaya miyaye nei Pabo miquea epeejji po meenaje, ecuana napa pajea meenaje —acanaje cuaa.

Jesosaja huoojea'yo esohui huohujji Jenosanenajo ba'e cuana Pabo nijje jjapeequinaje

2 ¹ Majoya quijje nei nei, 14 shequijame po majje eya Benabe nijje poe o'yanaje Jenasanena huasijje. Tito yenaje pea'ai enijke. ² Eyacuiñajjiya huoojea cajje eya Jenosanena huasijje poe o'yanaje. E'e, eya jjacahuiba meequei canaje jama ba'a: —Pabo, ¡Jenosanena huasijje poqui'yocue! —acanaje Eyacuiñajjiya eya cahuijo.

Jamajjeya Jenasanena huasijje poe'yo majje eya Jesosaja huoojea'yo ojaya epeejji jaahuanajji cuana nijje miminaje, pea cuana nijje pojjeama. Jjachichaquiajo, eyaya huohuinaje jama ba'a: —Esohui quea pame nee Jesosaja eyaya huohuinaje Jodio pojjeama cuana huasijje —eyaya anaje.

Jamaya ecuea huohui jjima ona que. Jodio pojjeama cuana huasijje esohui huohui pajea mee ca chana', jama huoojeame eya aca chana' cuaa

ba'a: —¡A'a jja oe Jodio pojjeama huasijke esohui huohui majajji Jesosaja esohui! —jamaya quea pame pojjeama poso aca chana' cuaa.

³Jamajjeya e shajja'ajja majje Jesosaja epeejji jaahuanajji cuana quea bhui nee poanaje: —E'e, ¡jamaya acue! —poanaje.

E'e, ohuaya Tito enijje poe' ba canaje Jodio pojjeama; Jieno dejja ca ca oya, Tito. Jamajjeya Jodio etiiquianaja esohui jayojja jama ajjima, cuiishasha jehuisejjajea jjima. Jamatii Tito ecuanaja etiiquianaja esohui jayojja jama amee jjima, cuiishasha jehuisejjajea mee jjima Jesosaja epeejji jaahuanajji cuanaja. Jamajjeya jjeya Jesosaja epeejji cuanaja cuiishasha jehuisejjajea jjima.

⁴Beca cuana ca ca jamatii iyaa jjima dobiquinaje ecuanaja esohui shajja'ajja, ecuana mimicuiajeanobiajeaa. Oya cuana aje oe siajje poanaje: —Ecuana peal'ai Jesosa Quitoja epeejji —oya poanaje. Siajje po majje ecuana tecueajea canaje jama ba'a: —Tito aje oe Jieno, esejaya etiiquianaja esohui jayojja jama ajjima; cuiishasha jehuisejjajea jjima. ¡Oya oe jamaya ameecue! ¿Apiojji acuae etiiquianaja esohui jama apajea meeña? Jesosa nijje jjapeequi majje jamatii Moisesija esohui jayojja jama caba'yahua —jamaya oya cuana mimijajinaje ecuana nijje.

Chojja. Jesosa nijje jjapeequi majje eseya etiiquianaja esohui jayojja jama epo'yoji pojjeama. Jamatii ma dejja cuaa ecuanaya yahuajo jama ba'e mee sa acani.

⁵Chojja de, ma dejja cuanaja esohui shajja'ajja jjima ecuanajaya. Ojaya esohui jama huohui ajja nei nei. Jamaya huohuime ya jojjemo miquiana ma Jodio pojjeama cuana dasial'yome. Ecuaaya ca ca yahuajo jama huohui tiitiña esohui quea pame nee Jesosajo miquianaya onijje ejjapeequi meesahua'yoji tii tii.

⁶Jamajjeya Jesosaja huoojea'yo ojaya esohui huohuijji etii Jenosanenajo ba'e enijje jama mimime poanaje ba'a: —E'e, ¡yahuajo jama esohui quea pame nee Jesosajo huohuiquicue Jodio pojjeama cuana huasijke! ¡A'a huohui pajea'yoji! —poanaje.

E'e, pea esohui ecuea ba jjima onajaya huohui jjima. Ma esohui ecuea eba poanaje, ecuea eyacua pojjeama. Ojjaña Jesosaja epeejji cuaa shajja'ajja neinei cani. Jamatii eya Eyacuiñajjiha huoojea'yo, onajaya pojjeama. Jamajjeya Eyacuiñajjiha eba ecuea ejjashahuubaquijji. Eyaya quea ja'a nee nee esohui huohuiaña ojaya eba. O quea bhui po mee sa iña poani, dejja cuana pojjeama. ⁷Jamajjeya ma dejja etii cuaa eya pea esohui huohui mee jjima. Chojja, huohui canaje jama ba'a: —E'e, jamajjeya Eyacuiñajjiha Pabo huoojea canaje Jodio pojjeama huasijke esohui quea pame Jesosajo huohuuya. Peno ca ca ohuaya huoojea canaje Jodio cuana huasijke esohui huohuuya —acanaje Jesosaja epeejji etii cuaa.

⁸E'e, jamaya poanaje. Ma dejja etii cuaa ba canaje Eyacuiñajjiha Peno sohuihuohui sahua canaje Jodio cuana huasijke. Oya jayojjaya ohuaya eya sohuihuohui sahua canaje Jodio pojjeama huasijke. E'e, Peno, eya pea'ai Jesosaja huoojea'yo esohui huohuijji. ⁹Jamajjeya ma dejja etii cuaa,

Jesosaja epeejji jaahuanajjiya, Penohua, Satiacohua, Huaniya pea'ai eya jama acanaje ba'a: —Pabo, ecuanaja eba e'e jojo nei miya Eyacuiñajjiya huoojea'yo Jodio pojjeama huasijje ojaya esohui huohuiya —acanaje.

Jamajjeya ojee quea bihui nee jama poanaje ba'a: —Pabo, ¡miyaya Benabe nijjeya esohui quea pame nee, Jesosaja esohui huohuiquicue Jodio pojjeama cuana huasijje! Ecuaaya ca ca Jodio cuana huasijje esohui huohuije —poanaje.

¹⁰Ecuana huohui canaje jama pea'ai ba'a: —E'e, ¡jamajjeya Jesosaja epeejji aema' a'a pajea'yojji! ¡Bejjo oe pojji huoojeacue aema' nei neija o ba'e meesahuajji! —acanaje.

Ma esohui shajja'ajja majje eya quea bihui nee poanaje. Eya pea'ai aema huasijje bejjo huoojea sa poani nei nei.

Peno Atioquia cuiñajji yasijje poquiyajo Pabohua oya tecuea canaje

¹¹Majoya Jesosaja epeejji jaahuanajji nijje mimi majje eya: —Poquia iña —poanaje. Majoya ecuana poqui'yonaje Atioquia cuiñajji quea quemo huasijje, quea huesha nee. Jomajo quea huiso Jodio pojjeama cuana ba'yani. Quijje Peno ecuana que poeyanaje Atioquia huasijje. Jomajo ani pishana majje Peno quea ja'a pojjeama poanaje. Jamajjeya eyaya oya tecueanaje ojjañaja ebajji. ¹²Jama poanaje ba'a: Poe coo majje Peno quea pame nee ijjal'ijjianaje ojjaña Jesosaja epeejji cuana nijje, Jodio pojjeama cuana nijje, jamatii Jodio etiiquianaja esohui jama ajjima cuanaja; cuiishasha jehuisejjajea jjima. Majoya quijje pishana beca Jodio dejja cuana poeyanaje, Satiacoja huoojea'yo. Ma Jodio cuana poeyajo, Peno aje oe quea pame po'yo ajja. Ani sa po'yo ajja Jodio pojjeama cuana nijje. Jodio pojjeama cuana nijje ijjal'ijjal'yo ajja poanaje Jodio cuanajo quea mete jjejojo. Jodio cuana quea quene po mee sa po'yo ajja poa, ma jama poani ba'a: —Jodio pojjeama aje oe Jodio etiiquianaja esohui jayojja jama ca'a cahua, cuiishasha cajehuisejjajea cahua de, jamatii Jesosaja epeejji cuana pea'ai —beca Jodio cuaa acani.

¹³Jamajjeya Peno Jodio pojjeama cuana nijje ijjal'ijjal'yo ajja ba majje pea Jodio cuana pea'ai aje oe Jodio pojjeama cuana nijje ijjal'ijjal'yo ajja poanaje. E'e, yahuajo oya cuana jama poanaje ba'a: —Eyacuiñajjiya ecuana ba'e tiitii mee caje'yo eyajo Jesosa nijje jjapeequianijo, etiiquianaja esohui jama añajo pojjeama —acanaje cuaa yahuajo.

Jamatii aje oe Jesosaja epeejji Jodio cuana Jesosaja epeejji Jodio pojjeama cuana nijje ijjal'ijjal'yo ajja poanaje. Ma ba majje Benabe pea'ai jamaya quea ja'a pojjeama poanaje, jamatii yahuajo Eyacuiñajjiya oya huoojea canaje Jodio pojjeama cuana huasijje.

¹⁴Jamajjeya ma ba majje eya jjashahuabaquinaje jama ba'a: —Quea ja'a pojjeama ohuaya acani, esohui quea pame nee Jesosaja jayojja jama ajjima acani.

Jamajjeya eyaya Peno tecueanaje ojjañaja eshajja'ajjajji. Jama anaje ba'a: —Peno, miya Jodio dejja. Mique chii, miquea enaese pea'ai Jodio. Jamatii Jodio cuana jama ba'e pajea'yonaje. E'e, Jodio pojjeama cuana

nijje aninaje, ona nijje ijjia'ijjia aninaje. Jamajjeya ¿apiojji acuae jjeya miyaya Jodio pojjeama ba'e mee sa aña Jodio etiiquianaja esohui jama? Jamaya miyaya quea ja'a pojjeama aña, Peno —eyaya Peno jamaya anaje.

Jesosa nijje jjapeequianijo, Eyacuiñajjiya Jodio cuana, Jodio pojjeama cuana pea'ai ba'e tiitii mee caje'yo.

15 Majoya eya Peno nijje, pea Jodio cuana nijje pea'ai jama poanaje ba'a: —Ecue chii aje jja Jodio pea'ai, miquianajaya aje jja Jodio pea'aiya. Jamajjeya jama poani Jodio pojjeama cuanajo ba'a: “Ecuanaya Jodio dejja; joya ecua Jodio pojjeama cuana jama po ajja. Oya cuana aje oe quea mimishi nee nee poani tii, ecuanajaya etiiquianaja esohui jayojja jama ba'e ajja” jamaya poani Jodio cuana quea quehua jjashahuabaquianijo —eyaya anaje—. 16 Jjeya ecuanaya Jesosa nijje jjapeequianijo. Jamajjeya ecuanaja eba e'e jojo nei Jesosa Quito nijje jjapeequianijo ca ca oe Eyacuiñajjiya eseya ba cani mimishi'ama'yo, etiiquiana Moisesija esohui jama ba'e nishoanijo pojjeama. Jamajjeya eseya Jesosa Quito nijje jjapeequianijo mimishi ecuijea mee'yojjii. Jamaya eseya jjashahuabaquianijo ba'a: —E'e jojo nei Eyacuiñajjiya ecuana ba cani emimishi cuijea'yo Jesosa nijje jjapeequianijo, etiiquiana Moisesija esohui jama ba'yanijo pojjeama. Jamajjeya Moisesija esohui jama añajo pojjeama Eyacuiñajjiya eseya ba caje mimishi'ama'yo.

17 Eya Peno nijje, pea Jodio cuana nijje jama poanaje pea'ai ba'a: —E'e, esejaya eba e'e jojo nei Jesosa nijje jjapeequianijo ca ca oe Eyacuiñajjiya eseya ba cani emimishi cuijea'yo, jamatii Moisesija esohui jayojja jama ba'e ajja. Jamajjeya eseya Jodio pojjeama jayojja poani. ¿A'a jamajjeya Jesosa Quitoja quea jea nee mimishi poanijo? Chojja, jamaya pojjeama. Mimishi Jesosa Quitoja boti'ama. Mimishi po mee'yo ajja nei nei oya.

18 E'e, eyaya huohui huicha'a huicha'anaje Moisesija esohui jama caba'e pajea'yahua. Ojaya esohui jama ba'e nishoanijo ca ca Eyacuiñajjiya eseya mimishi'ama'yo ebajji pojjeama. Jamajjeya eyaya jjeya jama ehuohui'yo jojjemo ba'a: —¡Moisesija esohui jayojja jama acue! Jamajjeya Eyacuiñajjiya miquianaya ba caje emimishi cuijea'yo —e'a jojjemo eyaya Eyacuiñajji quea quene po mee'yome, miquiana dasiajji po mee'yome pea'ai.

E'e, jiquio ecua equi caja'yo majje oya tii iya o'oyaña jayojja jama eyaya a'yome, ca Moisesija esohui ehuohui o'oya jojjemo. 19 Moisesija esohui ba neinei majje eya jjabahuejjaquinaje ma esohui jayojja jama quea camaja nee nee eba'ejji. Ameemee ajja, de. Jamajjeya ecuea eba e'e jojo nei Jesosa nijje jjapeequianijo ca ca oe Eyacuiñajjiya eya ba caje emimishi cuijea'yo.

Jiquio ecua emano'yo cuana esohui jama eba'e majajji pojjeama jayojja eya Jesosa nijje jjapeequi majje Moisesija esohui jama eba'e majajji pojjeama. Eyacuiñajjiya ejjashahuabaquijji quea ja'a nee jayojja jama ca ca iña ba'eje.

20 E'e, eya Jesosa Quitoja quea jea nee neejo oya acui ecueata'apeejo mano'yonaje ejo, ecue mimishi cuijea'yojjii, eya onijje eba'e tiitii mee'yojjii. Jamajjeya onijje jjapeequi majje eya yahuajo jama quea mimishi eba'e majajji

pojjeama. Pea jjashahuabaqui'yome ecuea poani. Jjeya ca ca Eyacuiñajjiya Bacua Ejja Jesosa Quitohua enijje nequiya eya ojaya ejjashahuabaquijji jayojja jama ba'e meesahua cani. E'e, eseya ojaya quea jea nee neejo. Eyacuiñajjiya oja Bacua Ejja huoojea canaje eseja mimishi cuijea'yohua.
 21 Jamajjeya eya onijje jjapee titiiquije'yo. ¿A'a Moisesija esohui jayojja jama poanijo, Eyacuiñajjiya eseya ba caje mimishi'ama'yo? Chojja. Ohuaya eseya ba caje'yo mimishi'ama'yo Moisesija esohui jayojja jama ba'yani jojjemo Jesosa Quito mano'yonaje emanojea'yojji, manojeal'yo quiaye.

¿Achajja acuae mi Eyacuiñajjiya emimishi cuijea'yo ba cani?

3 ¹Ecuea epeeiji Janata meshijo ba'e, ¿apiojji acuae miquianaya quea jjashahuabaqui quehua poani? ¿A'a cuae onaaya miquianaya dasia majje esohui e'e nei pajea mee ca'yonaje? Yahuajo miquiana nijje nequiya ecuaaya Eyacuiñajjiya esohui Jesosaja huohuinaje quea ja'a nee: —Jesosa Quito acui ecueata'apeejo mano'yonaje esejaya mimishi cuijea'yojji sosejje —huohuinaje.

Shajja'ajja majje miquianaya Jesosa Quitoja epeeiji nei po'yonaje.
 2 ²Jjashahuabaquicue oe! Jesosa nijje jjapeequiajo ca ca oe Eyacuiñajjiya ojaya Edojjoshahua Pame huoojea canaje miquiana huasijje dobiquiya. Moisesija esohui jayojja jama ba'e nishoanijo pojjeama miquiana huasijje dobiquinaje Edojjoshahua Pame. ³Edojjoshahua Pame quea ca'a neeya miquianaya Jesosa Quitoja epeeiji po mee cajje Eyacuiñajjiya bacua poanaje. ¿A'a cuae jjeya nequiana jama poani so'o ba'a: —Eyaya ca ca eya eyaye nei Eyacuiñajjiya esohui jayojja jama ajeyojeyoje'yo —a'a jamaya poso nequiaa aña?

Chojja. ¡A'a quea jjashahuabaqui quehua pojji! ⁴Yahuajo Jesosa nijje jjapeequianijo, pea cuaa miquianaya quea nee nee po mee canaje. Jamatii Jesosa nijje jjapeequi pajea jjima poanaje. ¿A'a jjeya jamatii onijje jjapeequi pajea sa poani? Jamajjeya ¿ajeo acuae nequiana yahuajo quea nee poa Jesosa nijje jjapeequi majje? Chojja. ¡A'a jamaya pojji! ⁵Yahuajo Jesosa nijje jjapeequianijo ca ca oe Eyacuiñajjiya quea ca'a neeya ojaya Edojjoshahua Pame miquiana huasijje huoojea canaje. Miquianaya o jayojja jama ameesahua canaje ma dejja aijima acani peal'ai. Ohuaya jamaya ameesahua canaje miquiaaya esohui quea pame nee Jesosajo shajja'ajjañajo, onijje jjapeequianijo peal'ai; Moisesija etehue'yo jayojja jama anishoañajo pojjeama.

**Onijje jjapeequianijo Eyacuiñajjiya Amajama ba ca poa emimishi cuijea'yo
*(Geneses 12.3)***

⁶ ⁶Jjashahuabaquicue Amajamajo! Yahuajo nei Eyacuiñajjiya Amajamajo tehue mee ca poa jama ba'a:

“Amajama Eyacuiñajji nijje jjapeequi'ya poa e'e jojo nei. Jamajjeya Eyacuiñajjiya oya ba ca poa mimishi'ama”.

Yahuajo jamaya tehueme aca poa.

Jamajjeya Amajama Eyacuiñaggi nijje jjapeequi'ya poa; o jayojjaya eseya Jesosa nijje cajjapeequi'yahuua. ⁷E'e, ojjaña joya Amajama jayojja Jesosa nijje jjapeequiani Amajamaja osecua nei cuana poani, Jodio cuana, Jodio pojjeama cuana pea'ai. Jamaya miquianajaya eba. ⁸E'e, yahuajo nei nei Eyacuiñaggi jjashahuubaquinaje jama ba'a: "Enije e'e jojo nei jjapeequi'yajo, eyaya Jodio pojjeama pea'ai baje mimishi'ama". Jamaya yahuajo poa. Jamajjeya yahuajo nei Eyacuiñaggiya Amajama huohui ca poa jama pea'ai ba'a:

"Amajama, miya ecuea epeejji nei poanijo, eyaya miya baña mimishi'ama. Quea huiso nee ojjaña meshijo ba'e, ojjaña esohuijo mimiani cuana pea'ai eyaya mimishi'ama baje'yo enije jjapeequi'yajo".

Jamaya Eyacuiñaggiya Amajama huohui ca poa yahuajo nei nei.

⁹E'e, Amajama Eyacuiñaggi nijje jjapee neineiqui'ya poa. Jamajjeya ojjaña o jayojja jama Eyacuiñaggi nijje jjapee neineiquiani Eyacuiñaggiya ba caje mimishi'ama'yo. ¹⁰Yahuajo nei nei Eyacuiñaggiya tehue mee ca poa jama ba'a:

"Moisesija esohui etehue'yo jayojja jama ba'e tiitii ajjajo, Eyacuiñaggiya miquianaya quea nee nee po mee caje'yo, quea nee tii tii".

Jamaya yahuajo nei nei tehue ca poa. Jamajjeya Moisesija esohui jayojja jama ba'e nishoanijo quea nee nee poaje'yo. Chama' joya ojjaña Moisesija esohui etehue'yo atiitiji poani. Quea camaja nee nee. Ameemee ajja.

¹¹E'e jojo nei Eyacuiñaggiya esohui huohijjiya tehue ca poa jama ba'a:

"Ojjaña joya onijje jjapeequi'yani Eyacuiñaggiya ba caje mimishi'ama. Onijje ba'e tiitii mee caje'yo eyajo".

Jama tehuemeya aca poa. Jamajjeya ecuanaja eba e'e jojo nei onijje jjapeequi'yanijo ca ca oe Eyacuiñaggiya eseya ba caje mimishi'ama, Moisesija esohui jayojja jama ba'e nishoanijo pojjeama. ¹²Jamajjeya a'a quea quehua jjashahuubaquijji jama ba'a: —Eyacuiñaggiya eya ba'e tiitii mee caje'yo Moisesija esohui etehue'yo jayojja jama eya atiiiañajo.

Jamaya jjashahuubaquianijo Jesosa oe nei nijje jjapeequi ajja tii tii. Maya ba'e tiitii sa poanijo Moisesija esohui jayojja jama atiitii nisho cani. Jamatii ba'e tiitii ajja. ¡Bacue! Eyacuiñaggiya esohui yahuajo nei tehue mee ca poa jama ba'a:

"Ojjaña cuaa Moisesija esohui etehue'yo jayojjaya jama ca'a tiitii cahua eyajo eba'e'yoji tii tii".

Jamaya yahuajo tehue mee ca poa. Jamatii chama' nei nei joya Moisesija esohui etehue'yo jayojjaya jama atiitii cani.

¹³Eyacuiñaggiya mimishi cuana jama acani ba'a: —Eyaya miquianaya baña quea mimishi nee, e que ejjanequichipiquijji pojjeama poaje —poani Eyacuiñaggi.

Jesosa Quito ca ca mimishi'ama mano'yonaje esejaya mimishi cuijeal'yoji sosejje. Yahuajo nei Eyacuiñaggiya esohui tehue ca poa jama ba'a:

“Ojjaña joya acuijo ba'ehuanasohua ba'e, e'aa jeyo ba'e aje oe
Eyacuiñajjiya ba cani quea mimishi, o que ejjanequichipiquijji
pojjeama”.

Jamajjeya Jesosa Quito acui ecueata'apeejo ba'ehuanasohuajea cajo,
Eyacuiñajjiya oya huohui ca poa jama ba'a:

“Miquea epjeeji cuanaja mimishi miquea po'yonaje. Jamajjeya eyaya
oya cuana baña mimishi'ama, mimishi cuijea'yonaje”.

¹⁴Yahuajo nei Eyacuiñajjiya Amajama jama aca poa ba'a:

“Amajama, miya enijje jjapee neineiquianijo, quijje eyaya quea huiso
cuana, ojjaña meshijo ba'e cuana baje mimishi'ama”.

Jamaya yahuajo nei aca poa. Jamajjeya Jodio pojjeama cuana pea'ai
Jesosa Quito nijje jjapeequi'yanijo, Eyacuiñajjiya oya cuana ba caje
mimishi'ama. E'e, Jesosa Quito mano'yonaje acui ecueata'apeejo esejaya
mimishi cuijea'yoiji. Jamajjeya Eyacuiñajjiya ojaya esohui jayojja jama
acaje: Eseyo ba'e tiitii mee caje'yo onijje. Edojjoshahua Pame huoojea
canaje ese yasijje pea'ai, Jesosa nijje jjapeequi'yanijo.

Eyacuiñajjiya esohui Amajama nijje Moisesija esohui jayojja jama pojjeama

¹⁵Ecuea epjeeji cuana Janatajo ba'e, jjeya eyaya pea esohui tehueña
miquiana ba meesahuajji, Eyacuiñajjiya esohui ba meesahuajji. ¡Bacue! Jama
aña ba'a: Eseyaya papeni tehueña esejaya aquiana quijje equijjojeajjijo.
Tehue majje bajjani tehueña. Epjeejiya bajjani tehue meeñaña pea'ai ojjaña
ebajji. Bajjani tehue majje esejaya esohui etehue'yo epajea'yoiji pojjeama.
Jamaya e'e jojo nei acaje'yo cuaa. ¹⁶Oya jayojja yahuajo nei Eyacuiñajjiya
Amajama huohui ca poa jama ba'a: “Amajama, eyaya miya quea pame nee
aje'yo, mique osecua pea'ai”. Jamaya Eyacuiñajjiya yahuajo nei aca poa.

E'e, Eyacuiñajjiya Amajama jama aca poa ba'a: “Eyaya quea pame
nee aje'yo miquea osecua oe” aca poa. “Miquea osecua quea huiso
cuana nijje” ca ca ajjima aje'yo Eyacuiñajjiya aca poa. E'e, Eyacuiñajji
jjashahuabaquinaje ojaya huoojea'yo ojjaña jaahuanajjijo, Jesosa
Quitojo, Amajamaja osecuajo. ¹⁷Jamaya poanaje ba'a: Yahuajo nei nei
Eyacuiñajjiya Amajama huohui ca poa jama ba'a: “Enijke e'e jojo nei
jjapeequianijo, eyaya miya quea pame nee aje'yo, ojjaña meshi yasijje
ba'e cuana quea pame nee aje pea'ai. E'e jojo nei eyaya ecuea esohui
jayojja jama aje'yo tii tii” huohuime aca poa.

Jamaya Eyacuiñajjiya Amajama huohui ca poa yahuajo nei nei. Majoya quijje
nei nei, 430 shequiajame po majje ohuaya Moisesi huohui ca poa ojaya esohui
cuana ojjaña Jodio cuana huasijje ehuohujji. Jamajjeya Moisesi ojaya esohui
tehue mee majje Eyacuiñajjiya ojaya esohui Amajama nijje epajea'yoiji pojjeama
pea'ai. Chojja. Jama po ajja ba'a: “Jjeya ecuea esohui Amajama nijje eya anaje
e'abecajji pojjeama” po ajja Eyacuiñajji. Ohuaya jamatii ojaya esohui Amajama

nijje aca poa jayojja jama acaje'yo tii tii: Eseyá mimishi'ama ba caje onije jjapeequianijo; Moisesija esohui etehue'yo jayojja jama anishoañajo pojjeama.

¹⁸ Jamajjeya e'e jojo nei onije jjapeequianijo ca ca oe Eyacuiñajjiya eseyá ba caje mimishi'ama, Moisesija esohui etehue'yo jama ba'e nishoanijo pojjeama. E'e, Eyacuiñajjiya eseyá ba'e tiitii mee caje'yo Moisesija esohui jama ba'yani jojjemo ojaya esohui Amajama nijje ohua huohui ca poa jayojja jama ajjima aca'yome. Chojja, ohuaya ca ca oe ojaya esohui jayojja jama acaje'yo tii tii.

¹⁹ Jamajjeya miquianaya pojja'a jama poani ba'a: —¡Dee! Jamajjeya ¿apiojji acuae Moisesija esohui ba mee ca poa, ajeo shai tehue mee ca poa?

Eyaya miquianaya ba meeje. Jama ba'a: Eyacuiñajjiya maya tehue mee ca poa ese ba meeji ojjaña tii shajjama' poanijo. Yahuajo ca ca Eyacuiñajjiya Amajama huohui ca poa oja osecua poeje, ma ojjaña meshijo ba'e cuana quea pame acaje, Jesosa Quito bajjani. Jesosaa poe majje ecuana ba mee ca poa Eyacuiñajjiya eseyá mimishi'ama ba caje onije jjapeequianijo, Moisesija esohui jayojja jama ba'e nishoanijo pojjeama. Jamatii Jesosa cuaya jjimahuajo, Moisesija esohuijo ojjaña ba ca poa jama ba'a: Ojjaña meshijo ba'e cuana shajjama' poani. Jamajjeya Eyacuiñajjiya shajjama' cuana quea nee nee po mee caje'yo.

Yahuajo nei nei Eyacuiñajji Amajama nijje miminaje jama ba'a: "E'e jojo nei eyaya miya quea pame nee aje". Moisesija esohui tehue mee ca poajo ca ca Eyacuiñajji onijke mimi jjima. Ohuaya ojaya esohuidojiji huoojea ca poa Moisesi sohuihuohuiya. Majoya Moisesiya Eyacuiñajjiya esohui huohui ca poa pea cuana huasijje.

²⁰ E'e, oya Eyacuiñajji Amajama nijje miminaje: —E'e jojo nei eyaya miya quea pame nee aje —aca poa ohuaya. E'e, Eyacuiñajji Amajama nijje miminaje, pea Eyacuiñajjiya huoojea jjima Amajama nijje mimiya. Jamajjeya e'e jojo nei ma esohui jayojja jama acaje'yo tii tii, Eyacuiñajjiya.

²¹ E'e pojja'a miquianaya jjashahuaba quehuaquiani jama ba'a:
—Jamajjeya Moisesi ojaya esohui tehue mee majje ojaya esohui ma Amajama nijje ohua huohui ca poa pajea ca'yonaje pojja'a Eyacuiñajjiya
—jamaya jjashahuaba quehuaquiani pojja'a beca cuana.

Chojja, jamaya pojjeama. Yahuajo nei nei Eyacuiñajjiya huohui ca poa ojjaña onijke jjapeequiani ohuaya ba caje mimishi'ama. Majoya Moisesiya Eyacuiñajjiya sohui tehue ca poa ojaya ejjashahuabaquijji ba meesahuajji. Ma esohui cuana tehue mee ca poa jamatii ojaya eba jamaya ba'e tiitii aija ojjaña. Chama' nei nei joya ojaya esohui jayojja jama ba'yani tii. Ma esohui jayojja jama eba'e mee jojjemo Eyacuiñajjiya eseyá ba'e tiitii mee ca'yome jamaya ba'yani jojjemo: —Eyaya miya baña mimishi'ama ecuea esohui jayojja jama ba'yani jojjemo —jama huohui'yomeya jojjemo.

²² Jamajjeya Eyacuiñajjiya etehue'yo jayojja jama ba'e tiitii aija eseyá shajjama' cuana poani, quea mimishi. Jamaya ohuaya huohui ca poa. Jamajjeya Jesosa nijje jjapeequianijo ca ca oe Eyacuiñajjiya eseyá ba cani mimishi'ama, eba'e tiitii mee'yojji.

**Jesosa nijje jjapeequianijo eseya ba'e tiitii mee
caje'yo, Moisesija esohui jama amajje pojjeama**

²³Yahuajo nei onajaya huohui jjima Jesosa nijje ejjapeequi'yojjii. Moisesija esohui jayojja jama ba'yanijo, Eyacuiñajjiya ojjaña mimishi'ama ba cani poso aca poa cuua. Jamajjeya ma esohui jayojja jama ba'e meemee ajjajo, ejeanobiajea jayojjaya ojjaña poa. Jamaya ojjaña poa esohui quea pamé nee Jesosaja shajja'ajja jjimahuajo. ²⁴Cuanaya Jesosa Quito poe jjimahuajo, ojjaña cuana esho'i jama poanaje. Moisesija esohui esho'i jjabahuejjaqui meeiji jayojja jama poa. Jlquio ecua o jaahuanajjiya esho'iiquiana niñeshe'a cani jayojja jama Moisesija esohui ba majje ojjañaa ba ca poa quea ja'a eba'eiji, quea ja'a eba'eiji pojjeama pea'ai. Jamajjeya ma esohuijo ojjañaa ba ca poa Eyacuiñajjiya ona nijje quea quene poani Moisesija etehuo'yo jayojja jama ajjimajo. Jesosa poeyajo ca ca onijje jjapeequi'yajo, Eyacuiñajjiya eseya ba cani mimishi'ama. ²⁵Jjeya eseya Jesosaja epeejji poani. Jamajjeya esejaya eba Eyacuiñajjiya ojjaña ba caje mimishi'ama Moisesija etehue'yo jayojja jama ba'e nishoanijo pojjeama. Jamajjeya jjeya eseya esho'iiquiana jayojja jama pojjeama; etii jayojja jama poani.

Jjeya eseya Eyacuiñajjiya bacua cuana po'yonaje

²⁶E'e, Jesosa Quito nijje jjapeequi'yo majje eseya Eyacuiñajjiya bacua cuana poani, Jodio cuana, Jodio pojjeama cuana pea'ai, ojjaña. ²⁷Jesosa nijje jjapeequi'yajo eseya onaaya besa mee canaje Eyacuiñajjiyo. Jamaya ojjaña ba meenaje eseya Jesosaja epeejji e'e jojo nei poani, Eyacuiñajjiya bacua cuana. Jjeya eseya Jesosa Quito jayojja jama ba'yan, yahuajo jama pojjeama. ²⁸E'e, Jesosaa ojjaña ojaya epeejji ba cani oya jayojjaya, pea epeejji jayojjaya. Jama poani ba'a: —Jodio cuana Jodio pojjeama cuana jayojjaya; echacojji sosema' cuana ona huoojeajji poani jayojja; dejja cuana epona cuana jayojjaya pea'ai. Ojjaña pea jayojjaya eyaya ecuea epeejji baña —Jesosa poani.

²⁹Jesosa Amajamaja osecua nei poa. Jamajjeya ojaya epeejji nei Amajamaja osecua cuana poani. Onijje jjapeequianijo, Eyacuiñajjiya Amajama ba ca poa mimishi'ama. Jamajjeya Eyacuiñajjiya Jesosaja epeejji cuana mimishi'ama ba cani pea'ai, Amajama jayojjaya.

**Jlquio ecua ebacua ejjaa aquiana mesena ca'yani jama jayojjaya
Eyacuiñajjiya eseya ba'e tiitii mee caje'yo Jesosa esejo mano'yonajejo**

4 ¹⁻²Ecuea epeejji cuana, eseya Eyacuiñajjiya bacua po'yonaje. Jamajjeya ojjaña ojaya aquiana esejaya poaje'yo. Eyaya miquianaya maya esohui ba mee sa aña. Jamajjeya jlquio jama acue ba'a: Oe esho'i oja chijja quijjojea. Mano'yo jjimahuua ejeajjiya o tiimeejji epojji huohui ca poa jama ba'a: —Ojjaña aquiana ecue quijjojea ecue bacuaja poaje'yo. ¡O esho'yahua miyaya jaahuanacue! ¡Ecuea aquiana pea'ai jaahuanacue! ¡Oya tiiyajo quia'yocue! —aca poa ejeajjiya.

Jamajjeya jjeya nei ojjaña aquiana oja chija quijjojea esho'i ja. Jamatii esho'i neiya o tiimeejji cashajja'ajja cahua, echacojjija jama cashajja'ajja cahua. Tii majje ca ca onaja huoojea'yo shajja'ajja pajea caje'yo, esho'i ya.

³Esho'i nei oja chija aquiana quia jjima jayojja jama yahuajo Eyacuiñajjiya eseya quea jjashahuabaqui ja'a po mee jjima poa. Epeejji pojjeamaja esohui jayojja jama eseya poa. Shajjama' jayojja ba'e sa po'yo ajja poa; jamatii jamaya poa. ⁴Jamajjeya Eyacuiñajji yahuajo nei jama poanaje ba'a: —Ecuea eba ache shejo, ache pojjajo eyaya ecue Bacua huoojeaje —poa.

Jamajjeya ma shejo, ma pojjajo tii ojaya ejjashahuabaquijji yahuajo jayojja jama ohuaya Jesosa huoojea canaje. Jesosa ese jayojjaya yamiji poa, Jodio eponaja mejo. Jamajjeya ohuaya Moisesija esohui etehue'yo jayojja nei nei aca'ya poa e'e jojo nei. ⁵Ojjaña ma esohui jayojja jama ba'e nishoanijo, Eyacuiñajjiya eseya ba cani mimishi cuijea'yo jjima. Jamajjeya oya, Jesosa poeyanaje ese mimishi cuijea'yoiji sosequia'yohua. E'e, oya mano'yonaje eseya Eyacuiñajjiya bacua cuana epo mee'yojji.

⁶Jamajjeya oja bacua poanijo, Eyacuiñajjiya Edojjoshahua Pame huoojea canaje ese que dobiquiya. Edojjoshahua Pameya eseya mimi meesahua cani jama ba'a: —Eyacuiñajji, Echii ai, jjeya miya ecue Chii e'e jojo nei —ameesahua cani eseya.

⁷Jamajjeya Eyacuiñajji eseja Chii poanijo jjeya eseya esho'i nei jayojja pojjeama, echacojjija jayojja jama pojjeama pealai. Jjeya ca ca eseya oja bacua etii pishana poani. Jamajjeya jiquio ecua ejeajjiya oja bacua etii acani jayojja jama Eyacuiñajjiya eseya acani, ma ecua ohuaya huohui ca poa jamaya acani.

Pabo quea mete Jesosaja epeejji cuanajo poa

⁸Ecuea epeejji cuana, yahuajo miquianajaya ba jjima poa Eyacuiñajji. Jamajjeya eshahua nijje miminaje, eyacuiñajji nisho nijje pea'ai. Maya mi huoojeajji poanaje; o jayojja jama popajea meemee ajja poa. ⁹¡A'a jja oe jamaya po o'oyajji! Maya miquiana ba'e meesahua ajja, jaahuana ajja, mimishi cuijea'yo ajja pea'ai. Jjeya ca ca miquiaaya Eyacuiñajji babacanaje mique Chii epojji, ama e'e jojo nei ohuaya miya babaca ca poa oja bacua cuana epo'yojji. Jamajjeya ¿apiojji acuaeya jja oe jjeya esohui quea quehua shajja'ajja o'oya sa aña so'o? Jamaya quiana quea jjashahuabaqui quehua poani, de. ¹⁰E'e, jjeya miquianaya Jodio etiiquiana jama ba'e sa poanijo quea quehua jjashahuabaquiani jama ba'a: —Jodio etiiquiana ojee ijja'ijja aninaje Eyacuiñajji bihuiajji, ojaya esohui epajea'yojji pojjeamajo. Oe epojjajo jamaya acaninaje, oe ba'ijo cuanaya jamaya acaninaje, pea ba'ijo jamaya acaninaje pea'ai, pea shequiaja cuanajo jamaya acaninaje pea'ai. Ecuanaya Jodio etiiquiana jama attitiji, Eyacuiñajjiya ecuana ba caje mimishi'ama —jamaya quea quehua jjashahuabaquiani miquianaya.

¹¹Jamajjeya eya quea mete miquianajo. E'e pojja'a eyaya quea huiso cahui miquiana huasijje esohui huohui majamajanaje ehuohuijeajji.

¹²Ecuea epeejji cuana, miquianaya ecuea quea jea nee, Jesosaja epeejji cuana. Yahuajo eya miquianajaya quea jea nee poa. Miquiana nijje nequiya eyaya ecuea etiiquianaja esohui apajea'yonaje. Jamajjeya eya Jodio pojjeama jama ba'enaje, miquiana jama. ¡Che, oe e jayojja jama ba'ecue! ¡Yahuajo jama Jesosaja epeejji nei po o'oyacue! ¹³Miquianajaya eba yahuajo eya quea mano poanaje miquiana nijje ani. Miquiana nijje aniya esohui quea pame nee Jesosaja huohui coonaje, jamatii quea manohua poaniya tii. ¹⁴Eya jjashahuabaquinaje jama pe'a'i ba'a: —Eya quea mano poani ba majje Janata dejja cuaa eya cajaa acaje, eya huoojeacuayajea caje pojja'a cuiñajji esecue yasijje —poanaje.

Chojja, miquianaaya eya jaahuananaje, huoojeacuayajea jjima poanaje. Eyacuiñajji esohuidojiji poeyajo miquianaaya oya quea pame aje jayojja jama eya quea pame nee anaje; Jesosa Quito poeyajo, oya quea pame nee aje pe'a'i jayojja jama eya anaje, de miquiaaya. ¹⁵Eya miquianajaya quea jea neejo ecuea esohui shajja'ajjanaje quea jaji nee nee. Jjashajja'ajjaquinaje pe'a'i. Ecuea eba miquianaya jama poanaje ba'a: —Pabo ecuanaja quea jea nee neejo oya quea pame nee ca'l'yahu. E'e, ecuea ecojja cajja cajji jjemo eyaya oya quia'yome, de —poanaje.

Jjeya ca ca miquianaaya eya shajja'ajja pajea'yonaje. ¿Apiojji acuae ecue esohui shajja'ajja sa po'yo ajja quiana jjeya, de? ¹⁶Eyaya esohui e'e nei huohuiña tii. ¿A'a majoya eya miquianajaya boti'ama?

¹⁷Beca cuaa, esohui huohuiji nishohua miquianaya quea jea nee nisho acani. Ohuaya miquianaya enijke jjapeequi pajea mee sa acani ecuea esohui Jesosajo epajea mee'yojji. Ojaya esohui oe nei shajja'ajja mee sa acani. ¹⁸Onaaya miquianaya e'e jojo nei quea jea acani ca ca jamaya quea pame nee. E'e, pea cuana quea jea nee ejja'aqui tii. Esohui huohuiji nishohua miquianaya esohui e'e nei pajea mee cani quea pame pojjeama. Jamajjeya miquianaaya esohui e'e nei aña tii quea pame nee eya miquiana nijje nequi jjimahuajo, miquiana nijje nequianijo pe'a'i. ¹⁹Epeejji cuana, ecuea ca mi ca miquianaya quea jea nee e'e jojo nei. Jiquio ecua epona cuana quea bacua nee nee poani jayojja jama eya quea yeno nee jjashahuabaquime poani miquianajo, ecuea esohui pajea'yañajo. Eya quea yeno nee poaje tii tii; miquiana Jesosa Quito jayojja jama ba'e'yajo ca ca iña oe yeno'ama poaje'yo; ojaya ejjashahuabaquijji jayojja jama miquiana po'yajo, eya yeno'ama poaje'yo. ²⁰Jamajjeya jjeya nei miquiana que poqui sa poani. Miquiana nijje mimi sa poani. Miquiana nijje enequi jojjemo ecuea eba pome mi jjabahuejjaqui meejjji.

;Esohui Jesosajo shajja'ajjacue Sanaja bacua jama epojji!

²¹Miquiana beca cuana Eyacuiñajji esohui ma Moisesi tehue mee ca poa jayojja jama ba'e sa poani. Jamatii miquianajaya ma esohui shajja'ajja jjima, ba jjima pe'a'i. ²²Jamajjeya eyaya miquianaya huohuije jama ba'a:

¡Jashahuabaquicue Eyacuiñajjia esohujo Amajamajo! Amajamaja bacua ejja cuayanaje becamejjiji peal'ai. Oe ebacua ejjaja enaeseya chaco ca poa Amajamaja equijo, oja huanaseja yajjijo. Oya Janita bajjani poa. Pea ebacua ejja Isaaca bajjanija enaese Amajamaja ehuanase poa. Oya Sana bajjani poa. ²³Janita epona sho'yahua jjamejoquinaje. Oja bacua cuaya poa Amajamaja bacua, ojjaña esejaya ebacua cuayani jayojja jama poa. Chama' Eyacuiñajjia ehuohui ma ebacuajo poa. Sana ca ca epona tii, bacuama' poa, esho'yahua jjamejoqui jjima poa. Eyacuiñajjia Sana huohui ca poa jama ba'a: "Sana, ecuea eba miya epona tii, esho'yahua miya jjamejoqui jjima poa. Jamatii miya jjamejoquije; miquea ebacua cuayaje, dejja" aca poa. Jamajjeya Eyacuiñajjia huohui canaje jayojja Sanaja bacua Isaaca cuaya poa, Amajamaja jea. ²⁴Jiquio beca eponajo jjashahuabaquicue eba meesahuajji beca ejjashahuabaquijji jama ba'a: Beca enaese yania poa, Sana, pea ca Janita. Eyacuiñajji beca dejja nijje miminaje peal'ai, Amajama nijje, Moisesi nijje peal'ai. Ebionei Eyacuiñajji Amajama nijje miminaje. Huohui ca poa jama ba'a: "Enijje jjapee neineiquianijo, eyaya miya baña mimishi'ama" aca poa. Ma esohui quea pame nee epona Sana bajjani jayojja.

Majoya quijje Eyacuiñajji Moisesi nijje miminaje eyiyo Sinai bajjani biajje. Ojaya esohui huohui mee ca poa: "Moisesi, jjiquio ecuea esohui Jodio cuana shajja'ajja meecue!" aca poa. Jiquio esohui quea camaja nee e'ajji, epona Janitaja eba'ejji jayojja jama. Oya onaja huoojea'yo Amajamaja equijo echacojji. Jamajjeya ojjaña joya Moisesija esohui jayojja jama ba'e sa poani Janitaja bacua cuana jama, echacojji sosema' jayojja. Moisesija etehue'yo shajja'ajjajji cuana Eyacuiñajjia ba cani mimishi cuijea'yo jjima. ²⁵E'e, Sinai meshijo yani eyiyo Janita bajjani Anamia meshijo ba'leja esohujo. Cuanaya Jodio cuanaja cuiñajji quea quemó Jenosanena bajjani Janita jayojja jama. Janita epona echacojji onajaya yajjijo jayojja jama ojjaña Jenosanenajo ba'e cuana quea jjashahuabaqui quehuajo jama poani ba'a: —Eyacuiñajjia ecuana ba caje mimishi'ama ojjaña Moisesija etehue'yo jayojja jama ba'yajo —poani.

Jamajjeya Jodio cuaa Moisesija esohui etehue'yo anisho cani tii tii. ²⁶Jenosanena eyacua eyajo nequi. Ojjaña Jenosanena eyacuajo eba'ejji cuana echacojji soesema' jayojja yajji pojjeama. Ma ecua Eyacuiñajjia huohui ca poa jayojja jama eseja acaje'yo; Jesosa nijje jjapeequi'yajo, ohuaya eseja mimishi cuijea ca'yani. Jamajjeya eseja Sanaja bacua jayojja jama poani. ²⁷E'e, yahuajo Eyacuiñajjia esohui etehue'yo Sanajo jama poa ba'a:

"Epona, ¡quea bihui nee pocue, jamatii miya bacuama!! ¡Jamatii jjamejoqui jjima quea bihui pocue! Eyaya miya quea osecua huiso po meeje. Quijje miquea ebacua poaje, miqueahueja jea. Quea huiso nee nee poaje mique osecua cuana. E'e, miya ehuei'yo pojjeama. Quijje miquea osecua quea huiso poaje".

Jamaya yahuajo nei Eyacuiñajjia tehue mee ca poa.

E'e, Eyacuiñajjia Sana quea pame aca poa jama ohuaya jjeya eseja quea pame acani, Jesosaja epeejji cuana.

²⁸Ecuea epeejji cuana, jjeya eseya Jesosaja epeejji poani cuana. Ma ecua ohuaya yahuajo huohui ca poa jamaya Eyacuiñajjiya Amajamaja bacua Isaaca cuaya mee ca poa. Oya jayojjaya jjeya ohuaya eseya oja bacua cuana po mee ca'yani, Jesosa nijje jjapeequi jeahuajo. Jamaya ohuaya huohui ca poa yahuajo. ²⁹Yahuajo Eyacuiñajjiya Edojjoshahua Pameya Sanaja bacua Isaaca cuaya meesahua ca poa, Amajamaja jea. Oya jayojjaya Edojjoshahua Pameya eseya pea jjashahuabaquime po mee cani. Jiquio ecua yahuajo nei Janitaja bacua mimijajinaje Sanaja bacua nijje jayojja jama jjeya Jesosaja epeejji pojjeama ese nijje mimijajiani, quea mimishi acani ojaya epeejji epo poani jjejojo. ³⁰Jamatii miquea eba Eyacuiñajjiya esohui etehue'yo jama poa ba'a:

“Epona Janita bajjani equipo chacochaco ani ¡huoojeacuayajea'yocue!
¡Quea huesha huoojeajea'yocue oja bacua nijje! E'e, miquea
aquiana equipojea oja bacuaja pojjeama poaje. Miquea ehuanase
neija, Sanaja bacuua ojjaña mesena caje”.

Jamaya yahuajo Eyacuiñajjiya Amajama huohui ca poa.

³¹Janitaja osecua cuana Moisesija esohui etehue'yo jayojja jama aca poa. Eyacuiñajjiya maya ba cani mimishi cuijea'yo jjima. Eseya ca ca, Jesosaja epeejji cuana ca ca Sanaja bacua Isaaca jama Eyacuiñajjiya ba cani emimishi cuijea'yo, Jesosa nijje jjapeequianijo.

Etiiquianaja esohui jayojja jama ja'a ba'e o'oyajji!

5 ¹Ecuea epeejji cuana, Jesosa nijje jjapeequi meesahua majje Eyacuiñajjiya eseya ba canaje emimishi cuijea'yo. Jamajjeya ja'a jama pojji ba'a: —Etiiquiana jayojja tiiya oe eba'e'yo Eyacuiñajjiya eseya mimishi'ama ebajji, Moisesija esohui etehue'yo jayojja jama oe eba'e'yo —a'a jamaya pojji!

Chojja. Jjeya Jesosaja epeejji poanijo, ja'a miquianaya Moisesija esohui etehue'yo jayojja jama ba'e o'oyajji! ¡A'a echacojji sosema' jayojja jama po'yojji! ²¡Shajja'ajjacue! Eyaya, Pabohua miquianaya jama huohuaña ba'a: E'e jojo nei miquianaaya etiiquianaja ehuohui'yo jayojja jama amajje, cuiishasha jehuisejjajea mee majje ojjaña miya ba cani Jesosa nijje jjapeequi pajea'yani. Jamajjeya etiiquianaja ehuohui'yo jayojja jama amajje, cuiishasha jehuisejjajea mee majje ca mi ca oe Jesosa nijje jjapee nishoquiani. ³Jamajjeya eyaya miquianaya e'e jojo nei huohui o'oyaña ma Eyacuiñajjiya yahuajo nei huohui ca poa jama ba'a: “Isaenija bacua cuana cuiishasha cajehuisejjajea cahua. Jamaya ojjaña ba caje oya cuana Moisesija etehue'yo jayojja jama ba'yani” jamaya yahuajo aca poa e'e jojo nei. Jamajoya miquianaaya etiiquianaja, Moisesija esohui etehue'yo jayojja jama a sa po'yo majje ojjaña tii aneinei'yocue oe! ⁴E'e, jama aña ba'a: —Eyacuiñajjiya eya ba caje mimishi'ama Moisesija esohui etehue'yo jama añajo.

Jamajjeya aje oe ma miquianayame tii ca jja mi ca oe Jesosa oe nei nijje jjapee neineiqui ajja. Jiquio jama mimi pajea'yome aje mi poani

ba'a: —Eyacuiñajji, ¡eya miquea quea jea neejo jaahuanacue mo! ¡Miquea esohui jayojja jama ecue mimishi cuijea'yocue! —jamaya mimi pajea'yome mi poanaje, de.

⁵Ecuanaya ca ca jama poani ba'a: —Ecuanaja eba Jesosa nijje e'e jojo nei jjapeequianijo, Eyacuiñajjiya ecuana ba caje emimishi cuijea'yo.

Edojoshahua Pameya ecuana ba meesahua cani e'e jojo nei Eyacuiñajjiya jamaya eseya acaje'yo o que poqui'yajo. ⁶Jamajjeya Jesosaja epeejji cuana, Jodio cuana, Jodio pojjeama cuana pea'ai Eyacuiñajjiya ba cani oya jayojjaya, pea jayojjaya. Ohuaya jamaya acani ba'a: —Ojjaña joya e'e jojo nei Jesosa nijje jjapeequi'yani, Jesosa quea jea nee acani pea'ai eyaya baña emimishi cuijea'yo —Eyacuiñajjiya acani.

⁷Ecuea epeejji cuana, yahuajo miquianaya esohui quea pame nee Jesosaja shajja'ajjanaje quea ja'a nee. Beshahua nei jjapee neineiquinaje. Jjeya ca ca onaaya miquianaya esohui e'e nei pajea mee cani pea esohui eshajja'ajjajji.

⁸Eyacuiñajji pojjeamaa miquianaya jama huohuime acani. Chojja.

—¡Esohui e'e nei ba neinei poquiacue! —jamaya ca ca Eyacuiñajjiya eseya acani.

⁹¡Bacue! E'e jojo nei pa ponaja oe pojji pahui shejjee meeijiya quea huiso pohuipohui shejjee mee cani. Jiquio ecua eshejjee meeijiya pahui shejjee mee cani jayojja jama oe esohui huohuijji nishohua quea huiso cuana esohui e'e nei pajea mee ca'yani. ¹⁰Jamatii ecuea eba esejaya Emeshi Mese nei Jesosaa ojaya esohui jayojja jama acaje. Jamajjeya miquianajaya esohui e'e nei epajeal'yojji pojjeama, etiiquiana Moisesija esohui jayojja jama eba'e nisho'yojji pojjeama. Jamajjeya ecuea eba Eyacuiñajjiya e'e jojo nei ma esohui huohuijji nisho quea nee nee po mee caje'yo pea'ai, matatii edejja tiiya jamaya huohuime acani pojja'a.

¹¹Epeejji cuana, jjashahuabaquicue! Beca cuana ejo siajje poani jama ba'a: —Pabohua pea'ai ca pa jjaja ca oe huohui cani etiiquianaja Moisesija esohui jayojja cuiishasha jehuisejjajea mee cani pea'ai —siajje poani ejo.

Chojja. Yahuajo ca ca oe Jesosa nijje jjapeequi jjimahuua eyaya jamaya pea Jodio cuana huohuia poa. Jamajjeya oya cuana enijje quea bei poa, quea quene pojjeama. Jjeya ca ca eyaya esohui eyacula huohuiaña jama ba'a: —Jesosa acui ecueata'apeejo mano'yonaje esejo, eseja mimishi cuijea'yojji sosejje. Onije jjapeequi'yajo ca ca oe Eyacuiñajjiya miquianaya ba caje emimishi cuijea'yo —huohuime jjeya aña.

Jamajjeya ma shajja'ajja majje Jodio cuana enijje quea quene poani. Eyaya yahuajo jama Moisesija esohui ehuohui jojjemo Jodio enijje quene'ama pome. Oya cuana enijje quea quene poanijo, miquianajaya eba eyaya jamaya huohui maja ajja.

¹²¡Esohui huohuijji nisho, ma miquiana dasiajji poani ca'a'ama capoahua! Maya jama poani ba'a: —¡Moisesija esohui jama ca'a cahua! ¡Cuiishasha cajehuisejjajea cahua! —acani.

jOya cuanaya cabiña jjajeajeaquiahua pea'ai, de! Jamajjeya jiquio ecua ejjajja chamajo jjabacuajeaquí aija jayojja jama esohui huohuijji nishoja mi dasiajji epo cuanaja quea huiso edasia maja'yojji pojjeama.

¡Edojjoshahua Pameja esohui jayojja jama ba'ecue!

¹³Jesosaja epeeiji cuana Janata meshijo ba'e, miquianaya ecuea quea jea nee. ¡Jamajjeya mo shajja'ajjacue! Eyacuiñajjiya miquianaya babaca canaje Jesosaja epeeiji epo'yojji, Moisesija esohui e'ajji pojjeama. Jamatii miquianaaya, Jesosaja epeeijiya ja'a jamaya ajji ba'a: —Eyacuiñajjiya eya ba cani mimishi'ama Jesosa nijje jjapeequianijo. Eya Moisesija esohui etehue'yo jayojja jama apajea mee canaje. Jamajjeya eya jamatii ba'eje o'oya yahuajo jama, quea mimishi —a'a jamaya pojji!

Chojja, jamaya pojjeama. ¡Pea cuana asahuacue; quea jea nee nee acue! Jesosa Quito nijje jjapeequi'yanijo, Eyacuiñajjiya miquianaya quea ja'a po mee cani ojaya esohui jama eba'ejji. ¹⁴Jamaya Moisesiya tehue ca poa yahuajo ba'a:

“¡Pea cuana quea jea nee nee acue! Miya quea ja'a ba'e sa poani.
Jamajjeya ¡pea cuana quea ja'a ba'e mee sahuacue, mi jayojjaya!
¡Pea cuana mi pejjejo ba'e pea'ai mique huapa pojjeama jayojja
quea jeaya oe acue!”

Jamaya yahuajo Moisesiya tehue ca poa.

E'e jojo nei pea cuana quea jea nee nee añajo ojjaña Moisesija esohui jama aña. ¹⁵Pea cuana nijje mimijajiani ca ca oya cuana miquea quea jea pojjeama. ¡Jiquio ecua ijjiacajji cuua jja'ijjiaqui majje jja'ijjia jeyojoyoquiani jayojja jama a'a pojji! ¡A'a pea cuana nijje quea quene nee nee pojji! ¡A'a quea yeno nee nee po meeji! ¡A'a mimijajiji! ¡Pea epeeiji cuana nijje quea bei pojjeamajo ojee jjapeepajeaquí mee ca chana!!

Edojjoshahua Pameja ejjashahuubaquijji pea ojjaña yahuajo ba'eja jayojja jama pojjeama

¹⁶Ecuea epeeiji, ¡shajja'ajjacue! ¡Edojjoshahua Pameja ejjashahuubaquijji jayojja jama ba'ecue, yahuajo jama pojjeama! ¡Yahuajo jayojja a'a sa'yojji! Quea mimishi ja'a ba'e sa po o'oyajji! ¹⁷E'e, yahuajo quea mimishi ba'ya poa. ¡Jamaya a'a po sa po o'oyajji! Edojjoshahua Pameya ca ca eseaya ba'e meesahua cani; pea ejjashahuubaqui'yojji po mee cani, de. ¿Apiojji acuae mi yahuajo ba'ya poa jayojja jama ba'yani, ejjashahuubaquijji eyacua jama pojjeama ba'yani? ¹⁸Jjeya Edojjoshahua Pameja ejjashahuubaquijji jama ba'yanijo ca ca Eyacuiñajjiya eseaya ba cani emimishi cuijea'yo; etiiquiana Moisesija esohui jayojja jama ba'yanijo pojjeama.

¹⁹Ojjaña joya Edojjoshahua Pameja ejjashahuubaquijji jayojja jama a'ajja ca ca quea mimishi poaje'yo. E'e, jamaya pojjeama ba'yanijo onajaya

ehuanase sii caje, onajaya yahue jea ba majje sii caje pea'ai, quea mimishi jjashahuabuquianijo edejja oya dejja nijje, epona oya epona nijje pea'ai quea mimishi acaje bicho'ama. Quea tai jjashahuabuqui majje jamaya acaje'yo. ²⁰Eshahua nijje, eyacuiñajji nisho nijje mimije; eyamiqueua poaje, quea quene nee nee poaje; jjamimicuiajea nobiajeaquije; pea jayojja jama nequi sa poaje; quea tecue nee nee poaje; quea dejja tai, quea nishehui poaje; mimijajije pea'ai. Ojjaña joya Edojoshahua Pame jayojja jjashahuabuqui ajja quea tai acani. ²¹Onajaya aquiana jea ba cani, ehuoo nei po tiitiiani, ojee ishi'ishi majje quea tai poani pea cuana nijje. E'e, ojjaña mimishi acani; yahuajo jayojja ba'yanijo tii quea mimishi po tiitiiani.

Yahuajo eyaya miquianaya huohuinaje; jjeya eyaya huohui o'oyaña jama ba'a: E'e jojo nei ojjaña joya jamaya ba'yani aje oe Eyacuiñajji nijje eba'e'yojji pojjeama, Eyacuiñajji cuiñajji eyacua huasijje edobiquijji pojjeama Jesosa poe o'oyajo.

²²Edojoshahua Pameya eseya ba'e meesahua canijo ca ca jama poani ba'a: Pea cuana esejaya quea jea poani, queabihui nee poani, quea bei poani, ojjaña nijje quea pame nee poani, quenequenecuaji ajja pea'ai, mase'ama poani pea'ai, ojjaña cuana quea jea nee aña tii tii; esejaya esohui jayojja jama aña pea'ai. ²³Eseya jjabihuiaqui mee sa po'yo ajja pea'ai. Quea mimishi po sa po majje quea ja'a jjashahuabuquianji mimishi epojji pojjeamajo. Jamaya poani Edojoshahua Pameja ejjashahuabuquijji jayojja jama ba'yanijo. E'e, jamaya ba'yanijo Eyacuiñajji quea bihui po mee aña seya. ²⁴Eseya Jesosa Quitoja epeejji poanaje. Jamajjeya mimishi a sa po'yo ajja. E'e, Jesosa Quito mano'yonaje acui ecueata'apeejo ecuanaja mimishi cuijea'yojji. Jiquio ecua emano'yo shajoshajo'yo ajja jayojja jama eseya Jesosaja epeejji poanijo mimishi a sa po'yo ajja. Pea jjashahuabuqui'yome eseya Jesosaja epeejji cuana poani. ²⁵E'e, Edojoshahua Pameya ecuana Jesosa nijje jjapeequi meesahua canajejo, eseya ojaya ejjashahuabuquijji jayojja jama ejja'aqui. ²⁶Jiquio jama a'a jjashahuabuquijji ba'a: —Eya ee nei Jesosaja epeejji quea pame nee poani. Pea cuana quea pame pojjeama —jamaya a'a pojji!

¡A'a pea cuana quea quene po meeiji! ¡Pea cuanaja aquiana a'a jea bajji pea'ai!

¡Quea pame nee pocue pea cuana nijje!

6 ¹Ecuea epeejji cuana, ¡bacue jiquio esohui! Jesosa Quitoja epeejji quea mimishi po o'oyajo, ¡onijje mimiquicue! E'e, miquianaya Jesosaja epeejji quea ja'a poanijo ¡oya mimishi pajea meesahua'yocu! ¡Quea bei oya jjabhuejjaqui meecue! ¡Quea jjashahuabuqui ja'a nee pocue! Miya quea mimishi po o'oya chana' pea'ai. ²¡Jesosa Quitoja epeejji ojaya esohui jayojja jama ba'e meesahuacue! ¡Jamajjeya ojjaña miquianaya ojaya esohui jayojja jama acue! Jiquio ecua e'abojji quea biquiejo ishajja cani jayojja jama eba'ejji quea camaja poanijo, ¡epeejji cuana ba'e meesahuacue! ³Beca

cuana jjashahuaba taiquiani jama ba'a: —Eya ee nei quea pame nee; pea cuana quea pame pojjeama —poso jjabauquiani.

Chojja, ejaya ejjashahuabaquijji quea quehua, quea tai. ⁴Ojjaña Jesosaja epeejji cajjashahuaba neineiquiahua ojaya eba'ejjijo. ¡Quea pame amajje quea bihui nee capoahua! ¡A'a jjashahuabaquijji jama ba'a: —¿A'a pea cuana e jayojja jama quea pame aña? —a'a jamaya pojji!

⁵Jamajjeya ojjaña esa yaya quea mimishi po majje ¡Eyacuiñajji huohuicue! A'a jama aiji ba'a: —Onaaya eya quea mimishi po mee canaje.

Chojja. Ma miyame tii ca mi ca quea mimishi.

⁶Epeejji cuana, ¡Jesosaja esohui huohuipji aquiana ojaya eba'e meeiji quiacue! E'e, esohui huohui cani sosejje casosequia cahua.

⁷¡A'a jjadasiaquijji pojji! ¡A'a quea jjashahuabaquai tai pojji! Eyacuiñajji ca ca jjadasia mee qui aja. Ohuaya quijje ojjaña sosequia caje'yo ma esa yaya meshijo ba'yahuaa anaje sosejje. Ojjaña ojaya eba. Jamajjeya jiquio ecua anoso quecua majje quijje anoso chicha caje'yo quea huiso nee jayojja jama quijje Eyacuiñajjiya acaje'yo. ⁸E'e. Jamajjeya yahuajo jayojja jama jjashahuaba tiitiquiani quea mimishi epojji, e'e jojo quea mimishi poaje. Jamajjeya quijje Eyacuiñajjiya quea nee nee po mee caje'yo tii tii quea mimishi poanaje sosejje. Edojjoshahua Pameja esohui shajja'ajjañajo ca ca e'e jojo nei quea pame po mee caje'yo; esa yaya ba'e tiitii mee caje'yo onijje.

⁹¡Jamajjeya quea pame nee ejja'atiitiqui! Quea pame nee apajeal'yo ajjajo, e'e jojo nei Eyacuiñajjiya esa yaya quea bihui nee po mee caje'yo Jesosa Quito poe o'oyajo. E'e, jiquio ecua eque meseya oja quejo chaco pajeal'yo jjima acani jama, quijje ti'il'yajo ejjajja quea pame chicha ca'yani jayojjaya esa yaya Edojjoshahua Pameja esohui jayojja jama apajeal'yo ajjajo, quijje Eyacuiñajjiya esa yaya quea pame nee acaje'yo. ¹⁰¡Jamajjeya ojjaña cuana quea pame ejja'atiitiqui! ¡Jesosaja epeejji cuana ca ca quea pame nee ejja'atiitiqui esa yaya huapa pojjeama jayojja!

Pabohua pea esohui huohui canaje

¹¹Epeejji cuana, esa yaya eyaye nei jiquio esohui tehueña. Miquea eba esa yaya tehueña jayojja; tehue ai'ai yaña. ¹²¡Bacue! Beca cuana jjashahuaba taiquiani; onaya jjabuhuaqui mee sa poani. Oya cuana esohui huohuipji nei poso acani. Miquianaya huohui cani esohui siajje jama ba'a: —¡Moisesija esohui jayojja jama acue! ¡Onaya cuiishasha jehuisejjajea meecue Eyacuiñajjiya miquianaya ebajji emimishi cuijeal'yo! —jama siajje ameya mi acani.

Jamajjeya esohui e'e nei mi huohui cani jama ba'a: —Jesosa acui ecueata'apeejo mano'yonaje esejo. Onijje jjapeequil'yajo Eyacuiñajjiya esa yaya ba caje emimishi cuijeal'yo —jamaya miquianaya huohui jjima acani. Chojja, oya cuana quea mete jjashahuabaquiani jama ba'a: —Ecuaa jama ehuohui'yo jojjemo ba'a: “¡Jesosa nijje oe jjapeequil'yocue!” jamaya e'a jojjemo onaya ecuana nijje quea quene nee pome —jamaya esohui huohuipji nisho poani.

¹³E'e de, maya etiiquiana Moisesija esohui etehue'yo jayojja jama ecuiishasha jehuisejjajea'yo. Jamatii aje oe ojjaña pea esohui etehue'yo jayojja jama ba'e'yo ajja. Miquianaya cuiishasha jehuisejjajea mee sa acani jama ehuohui mee'yojji ba'a: —Ecuana jaya esohui ca ca oe shajja'ajja cani ojjañaa.

¹⁴Eyaya ca ca oe quea bihui huohui tiitiña jama ba'a: —Jesosa Quito acui ecueata'apeejo mano'yonajejo, onijje tii tii jjapeequiani. Jamajjeya Eyacuiñajjiya eya ba cani emimishi cuijea'yo.

Jamajjeya eya yahuajo jama ba'e maja sa po'yo ajja. Mimishi cajaa a'yonaje. Jjeya ecuea eba'ejji pea'yo poanaje. Jesosaja epeeiji pojjeama cuana ca ca oe e jayojja jama ba'e sa po'yo ajja cuana. Eya ojaya boti'ama nei. ¹⁵Jesosa Quito hua eseya pea jjashahuabuquime po mee cani. Eyacuiñajjiya eseya ba cani emimishi cuijea'yo Jesosa nijje jjapeequianijo, Moisesija esohui jayojja jama añajo pojjeama; cuiishasha jehuisejjajeañajo pojjeama, cuiishasha jehuisejjajea jjimajo pojjeama pea'ai. Chojja, pea jjashahuabuquime eseya po mee cani Eyacuiñajjiya.

¹⁶Jamajjeya ojjaña quea pame nee ba'yanijo, Jesosaja epeeiji e'e jojo nei cuanajo eya Eyacuiñajji nijje mimiani jama ba'a: —Ecue Chii, ¡Jesosaja epeeiji cuana quea bei ba'e meesahuacu! ¡Tecue'ama ona nijje pocue!

¹⁷¡A'a jja oe enijje jjamimicuiajea nobiajeaquijji esohui huohuipji nishoja esohuijo! Eya e'e jojo nei Jesosaja huoojea'yo esohui huohuipji. Jamajjeya ja'a huohui o'oyajji jama ba'a: —Pabohua cahuohui cahua jama ba'a: “¡Etiiquianaja Moisesija esohui etehue'yo jama acue Eyacuiñajjiya miquianaya emimishi cuijea'yo ebajil!” —a'a jamaya pojji!

Mimishi cuaa eya cuia canaje quea huiso esohui eya ehuohui poaje jjejojo. Ecuea esil' quea huiso yanijo, ojjañaa ba caje eya e'e jojo nei Jesosaja huoojea'yo.

¹⁸Ecuea epeeiji cuana, jesejaya Emeshi Mese nei Jesosa Quito hua miquianaya caba'e meesahua cahua quea pame nee! Jamaya capoahua tii.

Mahuiso ecuea esohui. Pabohua jiquio esohui tehue'yonaje. Apoa.

PABOJA ETEHUE'YO EPESO CUIÑAJJI YASIJJE

EFESIOS

Pabohua tehue canaje Jesosaja epeejji cuanaEpeso cuiñajjijo ba'e yasijje

1 ¹Eya bajjani Pabo. Jesosa Quitohua eya huoojea canaje oja sohui huohuiya. Jamaya Eyacuiñajji sa poanaje. Eyaya miquianaya Epeso cuiñajjijo ba'e yasijje esohui tehueaña. E'e, miquianaya Jesosa Quito nijje jjapeequiani. ²Eyacuiñajji esejaya Chii ai poani. Jesosa Quito esejaya Emeshi Mese nei oe nei. ¡Ohuaya miquianaya quea bei nee caba'e meesahua cahua! ¡Quea boejea capo mee cahua pea'ai!

Jesosa eyajo ba'e jayojja jama eseya ba'e mee caje'yo Eyacuiñajjiya

³Eyacuiñajji ca ca oe Jesosa Quitoja Chii poani. Jesosa esejaya Emeshi Mese nei poani. Eyacuiñajji ejjabihuiaqui jama ba'a: —Eyacuiñajji, miya quea pame nee nee poani.

E'e, ohuaya Jesosa huoojea canaje esejaya mimishi cuijea'yohua. Cuanaya ohuaya eseya ba'e tiitii mee caje'yo onijje eyajo. E'e, eseya o jayojjaya jama ba'e mee caje'yo quea pame nee eyajo. ⁴Jiquio meshi pana jjimahuajo Eyacuiñajji jjashahuabaquinaje jama ba'a: —Ojjaña cuana Jesosa nijje jjapeequiani ecue bacua cuana po meeje'yo. Quea pame nee poaje. Mimishi'ama pea'ai poaje.

⁵E'e, yahuajo nei nei eseya Eyacuiñajjiya quea jea nee poanijo oya jjashahuabaquinaje jama ba'a: —Oya cuana ecue bacua cuana po meeje'yo, eba'ehuana jayojja ecue Bacua Jesosa Quito nijje jjapeequianijo.

E'e, jamaya Eyacuiñajji sa poanaje yahuajo nei nei. ⁶Jamatjeya eseyaya oya bihuiaña jama ba'a: —Eyacuiñajji, miyaya ecuana jaahuana neineiaña.

E'e, Eyacuiñajjiya oja Bacua Jesosa quea jea nee nee acani. Eseyaya quea jea nee nee acanijo pea'ai Jesosa huoojea canaje mano'yohua, eseja mimishi cuijea'yoiji. Jamatii, sosema' huoojea canaje. ⁷Jamatjeya eseyaya cuaqui yasijje epoquijji pojjeama. E'e, jamaya poanaje Jesosa mano'yajo; ena' ojaya

cuayaquinaje eseja mimishi cuana cuijea'yojji. E'e, eseya quea jea nee nee poanijo jamaya amee canaje Eyacuiñajjiya. Quea pame nee nee oya. Pea chama' o jayojja. ⁸Quea pame nee nee ojaya ejjashahuubaqui'yojji. Ojaya eba ojjaña nei nei. Jamajjeya ohuaya eseya ba'e tiitii mee caje'yo onijje eyajo. ⁹E'e, yahuajo nei nei esejaya ba jjima ojaya ejjashahuubaquijji. Jjeya ca ca ohuaya eseya ba meesahua cani ojaya ejjashahuubaquijji cuana Jesosa Quitojo. Jamaya ohuaya acaje'yo ba'a: Jesosa Quitohua esejaya mimishi cuana cuijea ca'yonajejo, Eyacuiñajjiya eseya ba'e tiitii mee caje'yo onijje eyajo Jesosa Quito poe o'oyajo. ¹⁰E'e, quijje Eyacuiñajjiya Jesosa Quito Emeshi Mese nei oe nei po mee caje'yo. Ojjaña meshijo, ojjaña eyajo pealai huoojeajji poaje'yo tii tii. Oya ojjaña quea bei po meeji poaje. Jama jjashahuubaquimeya poa Eyacuiñajji.

¹¹E'e, yahuajo nei nei Eyacuiñajjiya eseya Jesosaja epeejji cuana babaca ca'ya poa Jesosaja epeejji epo'yojji. Cuanaya Eyacuiñajji yahuajo nei nei meshi pana jjimahuajo jjashahuubaquinaje esejo jama ba'a: —Jesosaja epeejji cuana quijje nei ecuea ejjashahuubaqui'yojji jayojja jama poaje'yo.

Jamajjeya Eyacuiñajjiya ojaya epeejji cuana quijje ojaya ejjashahuubaquijji jayojja jama amee caje'yo. ¹²Jamajjeya ecuaa, Jesosa Quitoja ebionei epeejji cuaa Eyacuiñajji bihuiaje jama ba'a: —Eyacuiñajji, miya quea pame nee poani, ecuana Jesosaja epeejji po mee'yonaje.

¹³Yahuajo Eyacuiñajji ecuanajo jjashahuubaquinaje, Jodio cuanajo. Jjeya oya miquianajo, Jodio pojjeama cuanajo jjashahuubaquiani pea'ai. E'e, eyaya miquiana huasije Jesosa Quitoja esohui e'e nei huohuinaje Jodio pojjeama huasije. Shajja'ajja majje miquianaya Jesosa Quitoja epeejji poanaje. Jamajjeya Eyacuiñajjiya miquianaya ojaya ebacua cuana po mee ca'yonaje. E'e, miquianaaya shajja'ajjanaje Eyacuiñajjiya ejjashahuubaqui'yojji quea pame nee miquianajo jama ba'a: —Eyaya Jodio pojjeama cuana ba'e tiitii mee sa aña Jesosa nijje eyajo Jesosaja epeejji poanijo.

Cuanaya Eyacuiñajjiya yahuajo nei huohui ca poa jama ba'a: —Eyaya Edojjoshahua Pame huoojeaje'yo Jesosaja epeejji yasijje ona jaahuanaa. Oya cuana Jesosa nijje jjapee tiitiiqui meesahua caje'yo —oya poa.

Jamajjeya esejaya eba jama ba'a: —E'e, Eyacuiñajjiya eseya jaahuana canijo ohuaya ojaya ejjashahuubaqui'yojji esejo jayojja jama acaje'yo e'e jojo nei —eseyaya baña.

¹⁴E'e, Eyacuiñajjiya yahuajo huohui ca poa jama ba'a: —Jodio pojjeama cuana ecuea epeejji poaje'yo beca cuana.

Eyacuiñajjiya jamaya huohui ca poa. Jamajjeya Jodio pojjeama cuana oja bacua cuana po mee caje'yo. Onijje ba'e tiitii mee caje'yo. Ojaya ebacua cuana po'yo majje ohuaya bihuia caje jama ba'a: —E'e Eyacuiñajji, miya quea pame nee poani e'e jojo nei.

**Pabo miminaje Eyacuiñajji nijje Epesojo ba'e
cuana quea pame nee epo mee'yojji**

¹⁵E'e, miquianaya Eyacuiñajjiya epeeiji poanaje. Peaa eya miquianajo huohui canaje jama ba'a: —Beca cuana Epeso cuiñajjiyo ba'e Jesosaja, esejaya Emeshi Mese neija epeeiji poanaje. Onaaya ojjaña Jesosaja epeeiji cuana quea jea nee acani —eya acanaje cuaa.

¹⁶Jamajjeya ohuaya miquianaya oja bacua cuana po mee ca'yonaje shajja'ajja majje eya mimiani Eyacuiñajji nijje miquianajo: —Eyacuiñajji, ¡miquea epeeiji cuana Epesojo ba'e minijje jjapeequi meesahuacue quea pame nee!

¹⁷E'e, eya mimiani Eyacuiñajji nijje miquianajo jama ba'a: —Eyacuiñajji, miya Emeshi Mese nei Jesosa Quitoja Chii quea pame nee. Jamajjeya ¡miquea epeeiji cuana Epesojo ba'e quea ja'a nee jjashahuabaqui meecue! ¡Oya cuana miquea ejjashahuabaqui'yojji, miquea esohui cuana pea'ai ba meesahuacue! Jamajjeya onajaya eba nei nei miya poaje. ¹⁸E'e Eyacuiñajji, ¡oya cuana ba meecue quea ja'a nee miquea ejjashahuabaquijji! E'e Eyacuiñajji, miyaya oya cuana babaca'yonaje; oya cuana ba'e tiitii meeje'yo Jesosa nijje eyajo. ¡Quea pame nee nee Jesosa nijje eba'ejji, de! ¡Maya oya cuana ba meesahuacue quea ja'a nee! E'e, jamaya miquea ejjashahuabaquijji miquea epeeiji cuanajo. ¹⁹Eyacuiñajji, miya quea ca'a nee nee poani; pea chama' mi jayojja quea ca'a nee nee. ¡E'e Eyacuiñajji, miya quea ca'a nee nee poanaje Jesosa Quito jaahuanajji! ¡Miquea epeeiji cuana ba meesahuacue miya quea ca'a nee nee poani ecuana jaahuanajji pea'ai! —eya jamaya mimiani Eyacuiñajji nijje miquianajo.

²⁰E'e jojo nei Eyacuiñajji quea ca'a nee nee. Jamajjeya Jesosa Quito dejja mase cuaa quecua ca'yajje mano'yajo, Eyacuiñajjiya shequi mee ca o'oya poa. Shequi mee'yo majje eyahuasijje dojosohuaqui ca'ya poa. Jomajo Eyacuiñajjiya Jesosa Quito onijje ojjaña huoojea'yojji po mee cani. ²¹E'e, Jesosa oe nei quea ca'a nee nee po mee ca'yonaje. Oya ojjaña huoojea'yojji po mee ca'yonaje. Emeshi Mese oe nei po mee ca'yonaje pea'ai. E'e, Jesosa quea ca'a nee nee, quea pame nee nee yani jjeya; quijje aje oe oya ma ani tiitii'yome poaje. Oya quea bajjani huiso nee, quea pame nee nee poani Jesosa. ²²E'e, Eyacuiñajjiya Jesosa Quito Emeshi Mese quea ca'a nee nequi mee canaje. Ojjaña aquiana cuana Jesosaja poanaje. Ojjañaja oja epeeiji cuanaja Emeshi Mese nei poanaje Jesosa. Eyacuiñajjiya huohui canaje jama ba'a: —¡Jesosa Quito shajja'ajjacie, ojjañaa!

²³E'e, Jesosaa ojaya epeeiji cuana ojaya esohui jayojja jama ameesahua cani. Ojjaña ojaya epeeiji cuana nijje nequi majje oya cuana ameesahua cani quea pame nee. E'e, ojaya epeeiji cuana Jesosaja eyami jayojja jama poani.

Eyacuiñajjiya eseya eyajo ba'e tiitii mee caje'yo

2 ¹Yahuajo miquianaya quea mimishi nee nee poa jjejojo Eyacuiñajji nijje jjapeequi jjima poa. ²E'e, yahuajo miquianaya pea cuana quea mimishi jayojja jama Edosiquiana nijje jjapeequinaje, eshahua cuanaja mese nijje. Ohuaya shajjama' cuana quea mimishi po meesahua cani. ³E'e ecuana, Jodio cuana miquiana jayojjaya poa. Eyacuiñajjiyo jjashajja'ajjaqui ajja pealai poa. Shajjama' jayojja jama po sa poanaje eshahua ja epeeiji jayojjaya. E'e de, ecuanajaya ejjashahuabaquijji quea mimishi jayojja jama po sa poanaje. Jamajjeya yahuajo pishana ecuana, Jodio cuana, miquianaya Jodio pojjeama cuana pealai eshahua ja epeeiji quea mimishi poanijo Eyacuiñajjiya huohui canaje jama ba'a: —Miquianaya aje oe quea nee nee po meeje'yo eyaya, eshahua ja epeeiji quea mimishi nee neejojo —Eyacuiñajji poa.

⁴Jamatii Eyacuiñajji eseya mimishijo jjashahuabaqui tiitii sa po ajja eseya ojaya quea jea nee nee poanijo.

⁵E'e, yahuajo pishana eseya Eyacuiñajji nijje jjapeequi jjima poa quea mimishi po sa neinei poanijo. Matii Eyacuiñajjiya eseya oja bacua quea pame cuana po mee canaje Jesosaja epeeiji poanijo. E'e de, jamaya Eyacuiñajjiya eseya quea jea nee acanijo esejaya mimishi cuana cuijea ca'yonaje. ⁶Jamajjeya Jesosa Quitohua eseya mimishi cuana cuijea ca'yonajejo, Eyacuiñajjiya ecuana, miquianaya pealai ojaya bacua cuana po mee ca'yonaje ojee eyajo eba'e tiitii mee'yojji. Jamajjeya Eyacuiñajjiya ecuanaya, miquianaya pealai ba'e tiitii mee canaje Jesosa Quito nijje eyajo. Jamaya ohuaya huohui ca poa ba'a: —Jesosaja epeeiji poanijo eyaya miquianaya o jayojjaya nequi tiitii meeña quea ca'a nee, quea pame nee pealai.

⁷E'e, Eyacuiñajjiya esejaya mimishi cuijea'yo majje ese nijje quea bei poani. Jamajjeya ojjaña cuana esohuicuayajji ba mee cani; quije pealai ba mee caje jama ba'a: —E'e nei eseya Jesosa Quitoja epeeiji poanijo, Eyacuiñajji ese nijje quea bei poani. E'e, Eyacuiñajji ese nijje quea pame nee nee poani tii.

⁸E'e de, eseya Eyacuiñajjiya quea jea nee nee. Jamajjeya miquianaaya huohuaña jama ba'a: —Ecuea eba Eyacuiñajjiya ecuea mimishi cuana cuijea ca'yonaje eya onijje jjapeequi jeahuajo —jamaya poanijo Eyacuiñajjiya miquianaya quea pame nee acanijo. E'e, ohuaya miquianajaya mimishi cuijea ca'yonaje onijje mimiyajo.

¿A'a miquianaya quea pame nee nee poani sosejje mimishi cuijea ca'yonaje? Chojja de, ohuaya mimishi cuana cuijea ca'yonaje sosema'. ⁹E'e, ohuaya esejaya mimishi cuijea ca'yonaje sosema'. Jamajjeya pea cuana siajje epoji pojjeama jama ba'a: —Eya quea pame nee poani sosejje Eyacuiñajjiya ecuea mimishi cuijea ca'yonaje —chojja, jamaya poani siajjepoiji cuana.

¹⁰E'e, esejaya eba Eyacuiñajjiya eseya pea jjashahuabaquime po mee ca'yonaje. Jamaya ohuaya aca'yonaje Jesosaja epeeiji cuana poanijo. E'e, ohuaya jamaya aca'yonaje. Eseysa ojaya ejjashahuabaquijji jayojja jama

atiitii mee ca'yani pea'ai. Ojaya ejjashahuabaquiji esejo jama ba'a: —¡Eya miquianajaya quea jea neejo pea cuana quea pame nee atiitiicue!

Eyacuiñajjiya Jodio pojjeama sa cani ojaya epeeiji epoji

¹¹ Miquianaya Epesojo ba'e Jodio cuana pojjeama. ¡Jamajjeya jjashahuabaquicue! Miquianajaya chii cuana Jodo pojjeama poa. Jamajjeya Jodio cuana miquianajo maimai aninaje jama ba'a: —Oya cuana ca ca oma Jodio pojjeama; Eyacuiñajji epeeiji pojjeama.

E'e, Jodio cuana quea quehua jjashahuabaquinaje jama ba'a: Cuiishasha biso nei jehuisejjajeñaño ecuana Eyacuiñajji epeeiji quea pame nee poani poso ecuaa anaje, Jodio cuaa. ¹² Jamajjeya yahuajo Jesosa Eyacuiñajji huoojea'yo ojjaña jaahuanajji miquianajaya ba jjima poa Jodio pojjeamaja jjejojo. Miquianaya Eyacuiñajji ba po jjima jjejojo Eyacuiñajji ba epo cuana nijje jjapeequi ajja poa. E'e, miquianajaya Eyacuiñajji bihuia jjima Jodio cuana nijje. Yahuajo Eyacuiñajjiya huohui ca poa Jodio cuana jama ba'a: —Eyaya huoojeaje ojjaña jaahuanajji miquiana huasijke —poanaje.

Maya miquianajaya ba jjima poa Jodio pojjeamaja jjejojo. Jamajjeya miquianaya jjashahuabaquinaje jama ba'a: —E'e de, ecuana jaahuanajji quea pame nee chama!. ¿Aya acuae ecuana jaahuanajja caje'yo? —poanaje.

E'e de, miquianajaya Eyacuiñajji ba jjima poanaje. Jamajjeya ¿aya miquianaya jaahuanajja canaje? Quea camaja eba'ejji mee nei jiquio meshijo. ¹³ Jjeya ca ca miquianaya Eyacuiñajji epeeiji cuana poani Jesosa Quito nijje jjapeequianijo. E'e, yahuajo miquianaya Eyacuiñajji bihuia po jjima poanaje. Jjeya ca ca Eyacuiñajjiya miquiana Jodio cuana jayojja jama amee canaje. E'e, jjeya miquianaya Eyacuiñajji bihuiajji. Jesosa Quito miquianajaya mimishi cuijea'yojji mano'yonaje, ojaya ena' cuayaqui'yonaje. Jamajjeya Eyacuiñajjiya miquianaya oja bacua cuana po mee ca'yonaje.

Jodio cuana nijje Jodio pojjeama cuana ojee jjapeequije Eyacuiñajji nijje

¹⁴ E'e, Jesosa Quitoecuana ojaya epeeiji po mee canajejo, beca Jodio cuaa Jodio pojjeamajo huohui cani jama ba'a: —E'e de, Jodio pojjeama cuaa Eyacuiñajji bihuia cani ecuaa jayojjaya Jesosaja epeeiji poaniya jjejojo —poani.

E'e, Jodio cuana Jodio pojjeama cuana nijje Jesosaja epeeiji poani jjejojo huapa pojjeama poani. Jjeya Jesosaja epeeiji poani jjejojo Jodio cuanaja ejjashahuabaquiji jayojja jama Jodio pojjeama cuana jjashahuabaquiani. Epeeiji nei nei poanaje. E'e de, jamaya poanaje Jesosa Quito ojjaña mimishi cuijea'yojji acui ecueata'apeejo mano'yonajejo. ¹⁵ Ojjaña mimishi cuijea'yojji poani jjejojo Jesosa ojaya epeeiji cuana nijje miminaje jama ba'a: —¡Jodio etiiquianaja esohui jayojja jama a'a aiji ca ecuea epeeiji epoji! Chojja, enijje jjapeequianijo Jodio cuana, Jodio pojjeama cuana pea'ai ecuea epeeiji cuana poanaje. Ojjaña cuana huapa

pojjeama cuana poanaje. Jamajjeya Jodio cuana Jodio pojjeama cuana nijje ojee jjapeequi meeje'yo quea bei —acanaje Jesosa Quitohua.

¹⁶ Jesosaa Jodio cuana, Jodio pojjeama cuana pea'ai ojaya epeeiji cuana po mee ca'yonaje; oya cuana Eyacuiñajji epeeiji cuana poanaje. E'e, oya cuana Eyacuiñajji bacua cuana poanijo, ojee nequi mee caje huapa pojjeama jayojja jama, quea bei. Jamaya amee canaje Jesosaa acui ecueata'apeejo mano'yo majje. ¹⁷ Cuanaya Jesosa Quito poeyanaje miquiana que, ma Jodio pojjeama huasijke jama huohuiya ba'a: —E'e de, jjeya miquianaya Eyacuiñajji epeeiji po meeña. Yahuajo miquianajaya Eyacuiñajji ba jjima Jodio pojjeamaja jjejojo. Jjeya ca ca ojaya epeeiji quea bei poani miquianaya —Jesosa poanaje.

Jesosa ecuana huasijke, ma Jodio cuana huasijke poeyanajeya Eyacuiñajji esohui bajji yasijke. Ma ecua miquiaaya huohui canaje jayojjaya jama ecuaaya huohui canaje pea'ai. ¹⁸ Jamajjeya ecuana, Jodio bajjani cuana Eyacuiñajji nijje mimiani; miquianaya Jodio pojjeama cuana pea'ai Eyacuiñajji nijje mimije'yo, esejaya Chii ai nijje. E'e, Edojjoshahua Pame oe nei yani ojjaña Jesosaja epeeiji cuana nijje. Ohuaya Jesosaja epeeiji cuana Eyacuiñajji nijje mimi meesahua cani mete'ama.

¹⁹ Jamajoya jjeya Eyacuiñajjiya Jodio pojjeama cuana jama acani ba'a: —Yahuajo miquianaya ecuea epeeiji pojjeamajo eyaya miquianaya jaahuana jjima poa. Jjeya ca ca miquianaya ecuea epeeiji poani. Ecuea huapa pojjeama poani ecuea pea epeeiji cuana nijjeya —acanaje Eyacuiñajjiya. ²⁰ E'e, Jesosaja huoojea'yo cuanaja esohui shajja'ajjanaje miquianaaya. Cuanaya yahuajo nei Jodio esohui huohuijji cuaa esohui e'e nei huohui canaje. Maya jjeya miquianaaya shajja'ajjanaje. Jamajjeya miquianaya Jesosaja epeeiji poanaje pea'ai. Jamaya po mee canaje Jesosaa ba'a: Ojaya epeeiji cuana equi jayojja jama nequi. Jesosa Quito ca ca quea ca'a nee, quea pame nee nee poani, equi yamajjana quea ca'a jayojja oya. E'e, jiquio ecua eyamajjanajo acui ejeasehuijaajji huana majje acui equecuajeajji huisajo bequiboa ba'ehuana cani jayojja jama Jesosaa ojaya esohui huohuijji cuana quea pame nequi mee cani. Majoya esohui huohuijjiya ojjaña Jesosaja epeeiji cuana quea pame ba'e meesahua cani. Jesosaja huoojea'yo esohui huohuijji cuana, Jodioja esohui huohuijji cuana pea'ai ma acui eba'ehuanasohuajji jayojja jama poani. ²¹ Jjeya miquianaya Jesosaja epeeiji po majje acui ejeasehuijji jaajji biajje nequi jayojja jama poani. Jamajjeya jiquio ecua equi yamajjana quea ca'a nequijo equi quea ca'a nequia mee cani jayojja jama Jesosaa quea ca'a poaniya ojaya epeeiji cuana ojee quea ca'a onijje jjapeequi mee cani. Equi quea ca'a jayojja po mee cani. ²² E'e, jjeya miquianaya, Jodio pojjeama Jesosa Quitoja epeeiji poanijo Edojjoshahua Pame ojjañajo nequi. Jamajjeya ojaya epeeiji Jodio bajjani cuana nijje ojee nequi, equi quea ca'a jayojja poani.

Pabohua esohui huohui majamaja canaje Jodio pojjeama cuanaja ebajji

3 ¹Eya Pabo, Jessosa Quitoja esohui huohuijji. Eyaya ojaya esohui huohuinaje miquiana huasijje, Jodio pojjeama bajjani yasijje ojaya epeejji nei epo meeiji. Jesosaja esohui huohuiañajo pea cuaa eya iña majje jeanobiajea ca'yonaje eya esohui ehuohui poaje jjejojo. ²Jamatii. Pea cuaa miquiana huasijje huohuiqui canaje ejo jama ba'a: —Eyacuiñajjiya Pabo huoojea canaje ojaya esohui Jesosajo huohuiya Jodio pojjeama cuana huasijje —acanaje.

³ Yahuajo miquianajaya ba jjima Eyacuiñajjiya ejjashahuabaquijji jama ba'a: —Jessosa Quitohua ojjaña ojaya epeejji cuana, Jodio cuana, Jodio pojjeama cuana pea'ai ba'e tiitii mee caje'yo onijje eyajo.

Maya Eyacuiñajjiya eya ojaya epeejjiyo ba mee canaje. Jamaya ecuea esohui etehue'yo miquiana huasijje yahuajo huohuia poa. ⁴E'e, maya miquianaya banaje. Jamajjeya jama jjashahuabaquime poanaje ba'a: —E'e jojo nei Eyacuiñajjiya Pabo ba mee canaje ojaya ejjashahuabaquijji jama ba'a: Jesosa Quitohua ojjaña ojaya epeejji cuana, Jodio cuana, Jodio pojjeama cuana pea'ai ba'e tiitii mee caje'yo onijje eyajo —jamaya miquianajaya eba poanaje.

⁵ Yahuajo nei ca ca Eyacuiñajjiya pea cuana huasijje huohui jjima ojaya ejjashahuabaquijji Jesosa Quitojo, ma Jodio pojjeama cuana ojaya epeejji po mee majje o jaahuanajji poaje'yo pea'ai. Jjeya ca ca Eyacuiñajjiya Edojjoshahua Pame huoojea canaje ojaya epeejji cuana huasijje. Ojaya epeejji beca cuana huoojea canaje ojaya ejjashahuabaquijji jayojja jama huohuiya. Edojjoshahua Pameya ma esohui huohuijji cuana ba mee canaje Eyacuiñajjiya ejjashahuabaquijji Jodio pojjeamajo pea'ai. ⁶Eyacuiñajji jjashahuabaquinaje Jodio pojjeama cuanajo jama ba'a: —Jodio pojjeama cuana ecuea epeejji po majje ecuea huapa pojjeama cuana poaje. Oya cuana ba'e tiitii meeje'yo eyajo Jesosa nijje. E'e nei, eyaya huohuinaje ecuea epeejji cuana Jodio bajjani cuana huasijje jayojja jamaya eyaya aje'yo ecuea epeejji Jodio pojjeama cuana huasijje pea'ai. Jamaya eyaya aje, oya cuana Jesosaja epeejji poanijo. E'e, Jodio pojjeama cuaa shajjal'ajja canaje ecuea esohui Jesosa Quitojo —Eyacuiñajji poanaje.

⁷E'e jojo nei Eyacuiñajjiya eya huoojea canaje ojaya esohui quea pame nee Jesosajo huohuiya. Eya ojaya quea jea poanajejo, ohuaya eya ojaya epeejji po mee ca'yonaje, eya ojaya esohui huohuijji po mee canaje pea'ai. ⁸Jamatii Jesosa nijje jjapeequiyajo, Eyacuiñajjiya eya huoojea canaje ojaya esohui huohuiya. E'e de, eya ojaya esohui huohuijji poanaje, esohui quea pame nee Jesosa Quitojo ehuohuijji Jodio pojjeama cuana huasijje. Jamajjeya oya cuana ba meejeache pame nee nee Eyacuiñajjiya ejjashahuabaquijji onajo. E'e, jjeya oya cuana

ba'e tiitii mee caje'yo eyajo Jesosaja epeeiji poani jojoya. ⁹Eyacuiñajjiya eya huoojea canaje ojjaña ojaya ejjashahuabaquijji ba meesahuaa, ma yahuajo ojjañaja ba jjima poa. Ecuea esohui shajja'ajja majje ojjañaa ba caje jama ba'a: Ojjaña Jesosaja epeeiji ojee ba'e tiitii mee caje'yo eyajo onijke e'e jojo nei jjapeequianijo, Jodio cuana, Jodio pojjeama cuana pea'ai. E'e, Eyacuiñajji quea ca'a nee nee. Oja pana'yo ojjaña, de. Yahuajo nei oya jjashahuabaquia poa ojjaña jaahuanajji. Jamatii ecuanajaya etiiquiana maya ejjashahuabaquijji ba mee jjima poa Eyacuiñajjiya. ¹⁰E'e, Eyacuiñajjiya eya huoojea canaje ojaya ejjashahuabaquijji huohuiya. Jamajoya ojjaña esohuidojorji mese cuaa, ojjaña pea cuana eyajo nequiya cahuohui cahua jama ba'a: —¡Bacue oe! Eyacuiñajji jjashahuabaquiani quea pame nee, quea ja'a nee nee. E'e, ohuaya ojjaña ojaya epeeiji cuana onijke nequi tiitii mee cani eyajo —ojjanaa ca'a cahua.

¹¹Jamaya Eyacuiñajji jjashahuabaquia poa yahuajo nei nei, jiquio meshi pana jjimahuajo. Ojaya ejjashahuabaquijji quea ja'a nee jayojja jama poanaje Jesosa Quito, esejaya Emeshi Mese nei. ¹²Jamajjeya jjeya eseya mimije'yo Eyacuiñajji nijje mete'ama Jesosa Quitoja epeeiji po majje. ¹³Jamajjeya eyaya miquianaya huohuiña jama ba'a: —Miquiana huasijje Jesosaja esohui huohuiñajo, pea cuaa eya jeanobiajea canaje eya miquiana huasijje esohui ehuohui poaje jjejojo. Jamatii ja'a quea yeno pojji! Quea camaja ejeanobia ejaaaji, de. Jamatii ecuea esohuijo miquianaya Jesosaja epeeiji poanaje.

Jesosa Quitohua eseya quea jea nee nee acani

¹⁴Jamajjeya miquianaya, Jodio pojjeama Jesosaja huapa pojjeama poanijo, eya Eyacuiñajji nijje mimiani miquianajo. E'e, Eyacuiñajji esejaya Chii ai quea pame nee nijje eya mimiani jama ba'a: —Eyacuiñajji, miya quea pame nee nee —eya poani.

¹⁵E'e, Eyacuiñajjiya pana ca poa ojjaña. Jesosaja epeeiji jjeya eyajo nequi, ojjaña ojaya epeeiji jiquiojo nequi pea'ai Eyacuiñajjiya bacua cuana poani. Etiiquiana ojaya epeeiji cuana pea'ai Eyacuiñajjiya bacua cuana poa. ¹⁶Jamajjeya eya onijke jama mimiani miquianajo ba'a: —Eyacuiñajji, miya quea pame nee yani tii tii quea ca'a nee nee. Miyaya Edojoshahua Pame huoojeanaje miquea epeeiji cuana Epesojo ba'e yasijje quea ca'a po meeya. ¡Edojoshahua Pameya miquea epeeiji cuana cabal'e meesahua cahua quea ja'a nee miquea esohui jayojja jama! ¹⁷E'e Eyacuiñajji, miquea epeeiji cuaa huohui cani jama ba'a: "Jesosa nijje ecuana jjapee tiitiiquiani". Jamajjeya joya cuana Jesosa Quitoja ejjashahuabaqui'yojjii jayojja jama jjashahuabaqui meesahuacue quea ja'a nee! ¡Jamaya acue Eyacuiñajji, miya quea ca'a nee poanijo! E'e, miquea ejjashahuabaquijji jama ba'a: "Ecuea epeeiji cuana quea jea nee poani. Eyaya oya cuana quea ja'a nee ba'e meesahuaje ecuea ejjashahuabaquijji quea ja'a nee jayojja jama". E'e Eyacuiñajji, quea jea nee nee miquea epeeiji cuana. ¡Maya miyaya oya cuana ba meesahuacue! Jamajjeya oya cuana mijlo jama poani ba'a: "Eyacuiñajjiya ecuana quea jea nee nee poani. Ecuana jaahuanana cani quea pame

nee nee” oya cuana poani. ¹⁸E'e Eyacuiñaggi, ijamajjeya miquea epeejji cuana Epesojo ba'e, ojjaña miquea pea epeejji cuana pealai ba meesahuacue miquea ejjashahuabaquijji quea pame nee onajo poani! Jamaya miyaya ojjaña quea jea nee nee aña. ¹⁹E'e, oya cuana Jesosa Quitoja quea jea nee nee poanaje. Ojaya epeejji cuana po meesahua ca'yonaje. ¡Jamaya oya cuana ba meesahuacue, Eyacuiñaggi! Quea jea nee nee miquea ojjaña. Ecuanaya ba meemee ajja.

Jamatii jjashahuabaqui meemee ajja. E'e Eyacuiñaggi, ¡miquea epeejji cuana ba meesahuacue miquea ejjashahuabaquijji quea ja'a nee onajo pealai! Quea huiso nee, de. Jamajjeya joya ecua miyaya huohuaña jamaya acaje'yo cuaa quea pame nee. Onajaya ejjashahuabaquijji miquea jayojja jama poaje'yo.

²⁰—E'e Eyacuiñaggi, ecuaaya miya bihuiaña. Miya quea ca'a nee nee oe nei poani quea pame nee nee. Jamajjeya miquea ejjashahuabaquijji quea ja'a nee nee ecuanajo aña, miyaya. E'e, quea pame nee nee ecuana jaahuanaña, miyaya. Quea pame nee nee miyaya aña, Eyacuiñaggi. E'e, ecuana jjapeequi meesahuaña minijje miya quea ca'a nee nee poanijo. Jamaya apoa —jamaya eya mimiani Eyacuiñaggi nijje miquianajo.

²¹ Jamajjeya jeseyaya ojjaña Jesosaja epeejji cuaa Eyacuiñaggi ejjabihuia tiitiiqui'yo! Oya quea pame nee nee.

¡Ojee ejjachacoqui ojjaña queabihui ba'yani!

4 ¹E'e, eyaya, Pabohua Emeshi Mese neija esohui huohuañajo, pea cuaa eya jeanobiajea canaje eya esohui ehuohui poaje jjejojo. Jamajjeya jecuea esohui shajja'ajjacue! Jjeya miquianajaya eba Eyacuiñaggi ja ejjashahuabaquijji miquianajo; ohuaya miquianaya babaca canaje onijke quea ja'a nee nee ejjapeequijji. Jamajjeya ijamaya ba'ecue ojaya epeejji nei! ²¡Jesosaja epeejji cuana quea bei pocue! ¡A'a quea mase pojji pea cuana nijje! ¡A'a tecueacuajiji! Minijje quea mimishi poajo, ijamatii oya cuana quea jea nee acue! ³E'e, Edojjoshahua Pameya Jesosaja epeejji cuana ojee jjapeequi meesahua cani quea bei. Jamajjeya ¡miquianaaya ojjaña jamaya atiitiicue pealai! ⁴¡Bacue! Ojjaña eseaya Jesosaja epeejji cuana Jesosaja eyami jayojja jama poani, oe eyami jayojja poani. ¡Bacue! Edojjoshahua Pame oe nei esejo yani, ojjaña Jesosaja epeejji cuanajo. Eyacuiñaggiya eseaya babaca cajje ojaya oe nei ejjashahuabaquijji ojjañajo jjashahuubaqui mee canaje jama ba'a: —Ecuea epeejji cuana ba'e tiitii meejet'yo Jesosa nijje eyajo —poanaje.

⁵Esejaya Emeshi Mese nei oe nei yani. Jesosaja esohui e'e nei oe nei yani, pea chama!. Onaaya eseaya besa mee canaje enajo ojjañaja ebajji eseaya Jesosa Quito oe nei nijje jjapeequiani. ⁶Oe Eyacuiñaggi yani tii tii; pea chama!. Oya oe nei ojjañaja Chii ai. Oya ca ca oe ojjaña huoojeajji. Ojjaña ameesahua cani de, ojjaña nijje nequi pealai. Jamajjeya ¡Jesosaja epeejji cuana nijjeya oe quea bei nee jjapeequicue miquianaya!

⁷E'e. Jamajjeya Eyacuiñaggiya ojjaña Jesosaja epeejji cuana chaco meesahua cani onijke. Oe epeejji chaco meesahua cani iye huiso; pea chaco

meesahua cani quea huiso, esohui huohuijji pojja'a, pea echacojjijo pojja'a.

⁸Jamajjeya Eyacuiñajjiya yahuajo nei jama tehueme aca poa Jesosajo ba'a:

“Eyahuasijje sohuaqui'yo majje ohuaya quea huiso dejja cuana onijje jjapeequi meesahua caje'yo. Ohuaya ojaya epeejji cuana onijje chaco meesahua caje pea'ai”.

Jamaya tehue mee ca poa yahuajo nei nei Jesosa Quitojo.

⁹¿Yajjajje acuae yahuajo nei tehue ca poa? Jama ba'a: “Eyahuasijje sohuaqui'yonaje”. Jama poanijo ba'a: Ebionei Jesosa eyajo ani meshi yasijje poeyanaje. ¹⁰Meshi yasijje poe majje eyahuasijje poqui o'yanaje. Jomajo oya quea ca'a nee nee nequi tiitiije'yo, ojjaña huoojea'yoji epoji tii tii, Emeshi Mese nei epo'yojji. ¹¹Jesosaa ojaya epeejji cuana onijje chaco meesahua cani jama ba'a: Beca cuana ohuaya huoojea canaje ojaya esohui huohuiya. Beca cuana huohui meesahua cani ma ohua quijje acaje'yo. Pea cuana huohui meesahua cani ojaya esohui quea ja'a nee nee. Pea cuana ca ojaya epeejji jaahuanajji po mee cani. Pea ca esohui huohuijji po meesahua cani ojaya epeejji cuana quea huiso ojaya esohui eba meesahuajji. ¹²Jamaya Jesosaa ameesahua cani ojjaña ojaya echacojji quea pame nee epoji. Jamajjeya ojjaña ojaya epeejji cuana quea ja'a nee nee eba'e poquijji.

¹³Jamajjeya eseya Eyacuiñajjiya Bacua Jesosaja epeejji cuana ojee jjapeequije ojaya esohui jayojja jama. Ojjañaa eseyaya oya ba neineije'yo pea'ai. Jamaya eseya ojaya epeejji cuana quea ja'a nee poaje. O jayojja jjashahuubaquime poaje, epeejji etii jayojja poaje. ¹⁴Jjeya nei jjapeequiani jayojja jama pojjeama eseya poaje. E'e, jiquio ecua beniya enashajo dojo cani pea mijijje jayojja jama esohui huohuijji nisho cuaa joya jjeya nei Jesosa nijje jjapeequiani dasia majje poquiquehua mee cani. Oya cuana jjashahuaba majamajaquiani ese dasijji. ¹⁵Eseyaya ca ca pea cuana quea jea poanijo esohui e'e jojo nei huohuaña Jesosa, esejaya Emeshi Mese nei jayojja jjashahuubaquime epoji. ¹⁶¡Bacue! Dejjaja eyami: eme', equise, ojjaña ojaya ejjashahuubaquijji jayojja jama ojee quea pame poanijo quea ja'a nee nequi dejja. Jiquio ecua dejjaja eyami jayojja jama Jesosaja epeejji cuaa ojee chaco cani quea pame nee, Jesosaja ejjashahuubaquijji jama. E'e, ohuaya ojjaña ojaya epeejji huoojeajji poaniya ojee chaco mee cani onijje. ¡Jamajjeya ojjaña quea jea nee acue cuana! ¡Onaya jjapeequi meesahuacue!

Pea ba'e'yome epoji Jesosa Quito nijje

¹⁷Eya, Pabo Jesosaa huoojea ca'yonaje miquiana huasijje esohui huohuiya. Jamajjeya jecuea esohui shajja'ajjacue! ¡Jesosaja epeejji pojjeama cuana quea mimishi jama a'a pojji! Ojaya ejjashahuubaquijji cuana cajaa. ¹⁸E'e, oya cuana quea mimishi jjashahuubaquiani. Pea eba'ejjijo jjabahuejjaqui ajja. Jjapeequi ajja Jesosa nijje. Shajjama' de, mimishi quea boti nee ojaya. ¹⁹Mimishi cuanajo bicho'ama. Quea tai nee nee atitii

cani. Quea mimishi tii tii po sa neinei poani, de.²⁰ Miquianaaya ca ca Jesosaja esohui shajja'ajjanaje. Jamajjeya ¡ba'ecue quea pame nee!²¹ ¿A'a miquianaaya Jesosaja esohui shajja'ajjanaje? E'e. ¿A'a jjabahuejjaquinaje? E'e. Ojaya esohui ca ca oe e'e jojo nei poani.²² Jama poanaje ba'a:

—¡Ma mi ba'ya poa quea tai Jesosa Quito ba jjimahuajo pajea neinei'yocue! ¡Cajaa acue! Quea mimishi jjashahuuba tiitiiqui aninajejo beshahua nei miya poquinaje cuaqui yasijje.²³ ¡Eyacuiñajjiya miquianaya quea pame nee cajjashahuabaqui mee cahua Jesosaja ejjashahuabaquijjijo!²⁴ Eyacuiñajjiya miquianaya ba'e mee caje o jayojja. Jamaya e'e jojo nei quea pame nee eba'ejji. Jamajjeya ¡ba'ecue Eyacuiñajjiya ejjashahuabaquijji jayojja jama!

²⁵ Eseya Jesosa nijje jjapeequi majje huapa pojjeama cuana poani. Jamajjeya ¡a'a onaya siajje ajji! ¡Ojjaña Jesosaja epjeeji cuana nijje e'e nei mimicue!²⁶ ¡Miquianaya onaja mimishijo a'a quea quene po tiitiji! ¡Jjeyahua nei oe quea bei nee po o'oyacue!²⁷ Quea quene po tiitiianijo, Edosiquiaa miquianaya dasia ca chana!. Quea mimishi, quea mimijequijea po mee ca o'oya chana', de.²⁸ Jamajjeya miya siipojji ¡sii popajea'yocue! ¡Quea pame oe chaco neineicue! Jamaya eba'ejji quea pame poaje miquea quea huiso, aema' ba'e meesahuajji pea'ai.

²⁹ ¡A'a quea mimishi mimijji pea'ai! ¡Esohui quea pame nee mimi tiitiicue pea cuana jjapeequi meesahuajji! Jamajjeya pea cuana miquea esohui shajja'ajja majje quea pame poaje.³⁰ Cuanaya Jesosaja epjeeji quea mimishi po o'oyajo, Edojjoshahua Pame quea yeno poani. ¡A'a oya quea yeno po meejjii! E'e, Eyacuiñajjiya ese quea boejea po mee'yo majje Edojjoshahua Pame huoojea canaje ese nijje nequiya. Jamajjeya Jesosa Quito poe o'oyajo Edojjoshahua Pameya huohui caje esejo jama ba'a:
—Oya cuana Jesosaja epjeeji nei —poaje.

³¹ Jamajjeya ¡a'a mimijajjiji! ¡A'a quea quene pojji! ¡A'a quea tecue pojji! ¡A'a jjaniñebaquijji! ¡A'a jjamimicuajea nobiajeaquijji pea'ai! Chojja, ¡ojjaña mimishi cuana pajea neinei'yocue!³² ¡Pea cuana oe ba'e sahuacue quea pame nee! ¡Quea jea nee acue! Pea cuaa miya niñebe canijo, napa canijo pea'ai ¡onijke quea bei pocue! E'e, Jesosa Quito miquea mimishijo mano'yajo, Eyacuiñajjiya miquea mimishi cuana cuijea ca'yonaje, quea quene po tiitii ajja mimishijo. ¡Jamaya acue miquianaaya, ojjaña!

Jesosaja epjeeji, ¡ojaya esohui jayojja jama acue!

5 ¹Eyacuiñajjiya miquianaya quea jea nee acani, oja bacua cuana. Jamajjeya ¡o jayojja jama pocue miquiana ojaya epjeeji cuana poanijo! ²Jesosa Quito ese cuanajo mano'yonaje oya quea ese jea nee poanijo. Eyacuiñajji quea bihui nee poanaje oja Bacua Ejja esejo mano'yajo. E'e, yahuajo nei Jodio cuaa huichacha quea shiye nee nee ba'lesohuaqui mee ca poa Eyacuiñajji bihuijji. Ma jayojjaya Jesosa mano'yonaje esejaya mimishijo. Jamajjeya ¡pea cuana quea jea nee

acue miquianaaya, Jesosa Quitohua jayojja jama acue! ³Jamajjeya miquianaya ojaya epeejji poanijo ¡Jesosa jama pocue! ¡A'a quea mimishi jjashahuabaquijji! ¡Mimishijo oe a'a mimijji peal'ai! ¡Quea mimishi a'a pojji! E'e, ja'a shacuima' nequi, ahuema'ani pea'ai, onajaya yahue, ehuanase pea'ai a'a siiji! ¡A'a quea dejja tai pojji! ¡A'a quea nishehui pojji pea'ai! ⁴Esohui quea tai a'a mimijji pea'ai! ¡Shajjama' jayojja a'a mimijji! ¡Quea mimishi, quea mimijjequijea a'a mimijji! Jamaya quea tai. ¡Quea bihui nee ca ca Eyacuiñajji nijje mimicue! ⁵¡Bacue oe! Pea cojojji, dejja quea tai pea'ai, quea aquiana nahuejo epaño'yo bihuiajji jayojja poani pea'ai eyahuasijje edobiquijji pojjeama. Jesosa Quito nijje, Eyacuiñajji nijje pea'ai eba'ejji pojjeama eyajo, Jesosa ojjaña huoojeajji poanijo. Chama' dejja mimishija eba'ejji yajji eyajo. ⁶Siajjepoiji cuua miya ba'e mee ca chana' quea mimishi. ¡Oya cuana a'a shajja'ajjajji! Mimishi acanijo, shajjama' poanijo pea'ai Eyacuiñajjiya quea nee tii tii po mee caje'yo e'e jojo nei. ⁷Jamajjeya ja'a mimishi cuana nijje jjapeequijji!

⁸Yahuajo miquianaya quea mimishi ba'yá poa pea'ai. Jjeya ca ca miya Jesosaja epeejji cuana poanijo ejiojji quea ja'ajje onijje poquiani. Jamajjeya ¡Jesosaja esohui jayojja jama quea ja'a nee acue! ⁹E'e, Jesosa nijje jjapeequianijo ojjaña quea pame nee eseyaya aña. Jjashahuabaquiani quea ja'a nee pea'ai. Esohui e'e nei jayojja jama ba'yani pea'ai. ¹⁰Quea pame nee eseya añajo, Eyacuiñajji quea bihui nee poani. Jamajjeya ¡jjashahuabaquicue Eyacuiñajji quea bihui nee epo meeji! ¹¹Jamajjeya shajjama' cuana quea mimishi poanijo, ¡onijje a'a quea mimishi pojji! ¡Oya cuana tecueacue jama ba'a: —Jamaya quea tai. ¡A'a quea mimishi pojji! —acue!

¹²Ohuaya quehuajje mimishi quea tai nee nee acani. ¡A'a mimishi cuanajo mimimimijji! ¡Cajaa acue! ¹³Jesosaa shajjama' cuana jjabahuejjaqui meesahua cani; jama poani ba'a: —Coma ca quea tai; ja'a jamaya pojji! ¡Quea pame nee acue!

¹⁴Jiquio ecua cuaquijjiya mecajje ojjaña jeaja'a cani jayojja jama Jesosa Quitohua shajjama' cuana mimishi pajea mee'yo majje quea ja'a ba'e meesahua cani. Jamajjeya yahuajo nei nei jama sohuicuayame poa cuana ba'a:

“Shajjama' cuana, ¡jjashajja'ajjaquicue! ¡Eshahua nijje popajea'yocue!
Quitohua miya quea ja'a nee ba'e meesahua caje'yo”.

Jamaya aca poa yahuajo nei nei.

¹⁵Jamajjeya ¡jjashahuuba neineiquicue quea ja'a nee eba'ejji! ¡Shajjama' cuana jayojja jama a'a ba'ejji! ¡Jesosaja esohui jayojja jama ba'ecue! ¹⁶E'e, ¡jjeya janobajjima nei chacochaco tiitiicue quea ja'a nee Jesosa Quitojo! Jjeya aje oe quea camaja, quea huiso cuana quea mimishi poani. ¹⁷Jamajjeya ja'a shajjama' pojji! Eyacuiñajjiya miya sa cani ojaya echacojji epoiji. Jamajjeya oya huohui'ajjacie jama ba'a: —Eyacuiñajji, ¿a'yá cuae eya miyaya chaco meeje so'o?

¹⁸¡A'a jja oe huoojji! Chojja, ishi'ishianijo miquianaya quea tai nee poaje'yo. ¡Edojjoshahua Pameja esohui miquiana nijje jama acue!

19 ¡Jamaya esohui quea pame nee Eyacuiñajijo mimicue! Jama acue ba'a:
—Cua'a. ¡Eyacuiñajji nijje esohuicuaya!

E'e, Edojoshahua Pameya sohuicuaya mee caniya ¡quea bihui nee
Eyacuiñajji bihuiacue sohuicuayanijo! **20** Cuanaya Jesosa Quito esejaya
Emeshi Mese nei poanijo, ¡Eyacuiñajji, esejaya Chii ai bihuiacue jama
ba'a: —E'e Eyacuiñajji, jamaya. Miyaya quea pame nee atiitiiña —acue!

Ehuohuijji yahue cuana huasijke, ehuanase cuana huasijke pea'ai

21 ¡Jiquio pea esohui bacue! Jama ba'a: Jesosa Quitoja esohui shajja'ajjajji
poanijo ¡ba'ecue quea bei nee miquea huapa pojjeama cuana nijje!

22 Ehuanase cuana, ¡shajja'ajjacue mo! Miquiana Jesosaja epeejji
poanijo ¡miquea yahue shajja'ajjacue oe! **23** E'e, Jesosa Quito Emeshi
Mese nei oe nei poanijo, ojaya esohui shajja'ajja cani ojaya epeejji cuaa.
Jamaya miquea yahue mi huoojeajji poani pea'ai. ¡Oya shajja'ajjacue!
Cuanaya Jesosaa ojaya epeejji cuana jaahuana cani quea pame nee.
Jesosaa jayojjaya yahue cuaa ehuanase cajaahuana cahua pea'ai. **24** Jesosa
Quitoja epeejji e'lé jojo nei cuaa ojaya esohui jayojja jama atiitii cani.
Jamaya ehuanase cuaa, ¡miquea yahue shajja'ajja tiitiicue!

25 Yahue cuana, ¡shajja'ajjacue mo pea'ai! Jesosa Quito ojaya epeejji
cuana quea jea nee poanijo mano'yonaje onaja mimishi cuijea'yoji.
Jamaya yahue cuaa, ¡miquea ehuanase quea jea nee acue! ¡Quea ja'a nee
jaahuanacue! **26** E'e, Jesosa Quito ojaya epeejji cuana mimishi cuijea'yo
majje Eyacuiñajji nijje miminaje jama ba'a: —Jiquio cuaa ecuea esohui
shajja'ajja canaje. Peaa oya cuana besa mee canaje mijo pea'ai —poanaje.

27 Jamaya poanaje Jesosa, ojaya epeejji e'lé jojo nei cuana quea pame nee
nee epo meeiji ba'a: mimishi'ama, quea tai pojjeama, quea ja'a nee nee epo
meeiji. **28** Jamajoya yahue cuaa, ¡miquea ehuanase ba'e meesahuacue! E'e,
miya quea pame ba'e sa poanijo ¡miquea ehuanase ba'e meesahuacue quea
pame! Ehuanase ba'e meesahuañajo miya quea pame ba'eje pea'ai. **29** E'e,
dejja cuana quea nee nee nequi sa po ajja. Chojja. Bobi, daqui pea'ai sa'ajja
cani quea pame eba'ejji. Quiajjaya Jesosaa jaahuana cani ojaya epeejji cuana.
30 Jamaya oya poani eseya ojaya eyami jayojja nei nei poanijo. **31** Jamajjeya
Eyacuiñajji esohui yahuajo nei etehue'yo jama poa ba'a:

“Joya. Yahue ojaya ehuanase nijje ba'yanijo oya cuana oe nei poani, beca
pojjeama. Jamaya oya cuana ba cani Eyacuiñajjiya. Jamajjeya yahueya
ojaya ehuanase oe nei cajaahuana cahua quea pame nee. Quea jea nee
nee ca'a cahua; oja chii, oja enaese quea jea pishana ca'a cahua”.

Jamaya yahuajo nei Eyacuiñajjiya tehue mee ca poa.

32 Eyacuiñajjiya esohui quea pame nee nee yani Quitojo, ojaya epeejji cuanajo
pea'ai jama ba'a: Jesosa Quito ojaya epeejji cuana nijje oe nei jayojja poani,
quea huioso pojjeama, oya jayojja jjashahuabuquime poani pea'ai. Jamaya
Eyacuiñajjiya oya cuana ba cani oe nei jayojja. **33** Oya jayojjaya yahueya, miya

quea pame nee ba'e sa poanijo ¡miquea ehuanase quea jea nee nee acue! ¡Ba'e meesahuacue quea pame nee! Ehuanaseya, ¡miquea yahue shajja'ajjacue oe!

Ehuohuijji esho'i cuana huasijje echii mese cuana huasijje pea'ai

6 ¹Esho'i cuana, miya Emeshi Mese neija, Jesosaja epeejji poanijo ¡shajja'ajjacue mique chii, miquea enaese pe'a'i! Jamaya quea pame. E'e, Eyacuiñajjiya jama aca poa ba'a:

² "¡Mique chiiya, miquea enaeseaya pe'a'i huohui cani jayojja jama acue! ³Jamajjeya eyaya miquianaya ba'e meeje quea bihui nee, quea pame nee. Quea huiso shequiaja ba'e meeje".

Jamaya Eyacuiñajjiya huohui ca poa.

⁴Echii meseya, enaeseaya pe'a'i, ¡miquea ebacua cuana jaahuanacue quea pame nee! ¡A'a onijje quea tecue nee pojji! ¡A'a quea quene nee po meeiji! ¡Oya cuana huohuicue Emeshi Mese neija, Jesosaja esohui! ¡Miquea esohui shajja'ajja meecue!

Ehuohuijji echacojji cuana huasijje echaco meeiji cuana huasijje pea'ai

⁵Echacojji cuana, ¡miquea echacomeejjiya esohui jayojja jama pocue! ¡Chacocue quea pame nee ojaya! Jamajjeya Jesosa miquianajo quea bihui nee poaje. ⁶Miya chacochacoani quea pame nee miquea echaco meeijiya ba canijo o quea bihui po meeiji. ¡Ojaya ba jjimajo a'a quea huea pojji! ¡Chacocue quea pame nee Jesosa Quitohua miya ba canijo! Jesosa miquea echacomeejji poani. ⁷E'e, ¡miquea echacomeejjiyo chacocue quea bihui nee! Pea cuanaja yajjiyo quea pame chacochacoanijo Jesosa quea bihui nee po mee aña miyaya. ⁸E'e, ijiquio esohui shajja'ajjacue! Beca cuaa chaco cani ojaya echacomeejjiyo. Pea cuanaja echacomeejji chama!. Quea pame nee chacochacoanijo Emeshi Mese neiya, Jesosaa ojjaña sosequia caje'yo quijje eyajo.

⁹Echacomeejji cuaa, ¡sosequiacue miquea echacojji cuana ma ona chacochaconaje sosejje! ¡A'a quea mete po meeiji! ¡A'a tecuea neineijji! Echaco meeijiya Emeshi Mese nei yani eyajo. Echacojjiya Emeshi Mese nei yani eyajo pe'a'i, Jesosa bajjani. Eyacuiñajji mijo jjashahuabuquiani jayojja jama ojjaña cuanajo jjashahuabuquiani pe'a'i. Quea pame nee chacoañajo, ojjaña sosequia caje'yo quijje eyajo, echacojji, echacomeejji pe'a'i.

Eyacuiñajjiya eseya quea ca'a nee po mee cani

¹⁰ ¡Pea esohui shajja'ajjacue! ¡Jjapee neineiquicue Jesosa nijje! Jamajjeya ohuaya miquianaya ojaya epeejji quea ca'a po mee caje'yo. Oya quea ca'a nee nee poanijo miquianaya quea ca'a po mee caje'yo pe'a'i.

¹¹ Eyacuiñajji nijje mimicue pe'a'i jama ba'a: —Eyacuiñajji, ¡eya miquea ejjashahuabuquiji jayojja jama ameesahuacue quea ja'a nee!

Jamajjeya ohuaya miquianaya Edosiquiana nei, Satanasa bajjani jeabichajea mee caje'yo, ohua dasia sa acanijo. ¹²Pea cuaa quea mase cuaa ecuana Jesosa

nijje jjapeequi pajea mee'yo sa acani. Oya cuana dejja pojjeama, Edosiquiana, eshahua cuana pea'ai. Jjeya quea camaja eshahuaja epeejji cuanaa quea tai acanijo. E'e, eshahua cuaa huoqjea cani ojaya epeejji cuana, ojjaña quea mimishi poani pea'ai ecuana dasiaa nisho, ecuana jeabichajea nisho pea'ai. 13 Jamajjeya ¡Eyacuiñajji nijje mimicue jama ba'a: —Eyacuiñajji, jeya miquea ejjashahuabaquijji cuana jayojja jama ameesahuacue! —jamaya acue!

Jamajjeya eshahuua jeabichajea sa acanijo, miquianaya quea ca'a poaje; eshahua jeabichajeje'yo Eyacuiñajjiya miya asahua canijo. E'e, Eyacuiñajjiya miquianaya ojaya epeejji quea ca'a po mee caje'yo. 14 ¡Quea ja'a nee jjashahuabaquicue! ¡Esohui e'e nei ba neineicue! Jiquio ecua Shomano sohuinanohua ejjacomayijjiquiji yii cani ejjaquecuaquijji jama jayojja ¡esohui e'e nei ba neineicue quea ja'a nee epoji! Cuanaya sohuinanohua baa daqui quea moo ese'oje huosho cani onaa equecua'yo poani jjejojo jama jayojja ¡quea ja'a nee, mimishi'ama ba'ecue eshahuua napa cajje miya ejjadasia meequiviji pojjeama! 15 Jiquio ecua ejiojji shejee, sapato, sohuinanohua huosho cani acuishajo mete'ama epoji jayojja jama ¡Eyacuiñajjiya esohui ba neineicue mete'ama esohui huohujji! 16 ¡Eyacuiñajjiya esohui jayojja jama atitiicue pealai! Jiquio ecua sohuinanohua copocopo baa emejo huosho cani ejjaqueyaquequijji, iña cani ejjaquecuaquijji, emeje edahua huo'ohuo'o icui nequijjiji jayojja jama ¡Eyacuiñajjiya esohui jayojja jama atitiicue Edosiquianaja miya edasiajji pojjeama! 17 Cuanaya jiquio ecua sohuinanohua ejaahuojja ca'a, baajee sapa iya cani jama onaja sapa jaja jjima yajji jayojja jama ¡esohui esapajo huanacue miquianaya quea tai ejjashahuabaqui meeiji pojjeama eshahuaja, Jesosaja epeejji nei poanijo! Jamaya pea'ai jiquio ecua sohuinanohua baa se beca iña cani pea jajajeabichajaejjiji jama jayojjaya ¡Eyacuiñajjiya esohui mimicue eshahua mimiciujeanobiajeajji, Edojjoshahua Pameya ameesahua canijo! 18 Jamajjeya ¡Eyacuiñajji nijje mimicue jama ba'a: —Eyacuiñajji, jeya miquea epeejji quea ca'a nee mo po meecue eshahua cuana, eshahuaja epeejji cuana pea'ai mimiciujeanobiajeajji! ¡Edojjoshahua Pame huoojeacue minijje emimi tiitii meesahuajji! —jamaya oe acue!

Jamajjeya jjashahuaba neineiquicue quea ja'a nee! ¡A'a Jesosa nijje jjapeequi pajea'yojji! ¡Ojjaña Jesosaja epeejji cuanajo mimi huicha'ahuicha'acue jama ba'a: —Eyacuiñajji, ¡ojjaña Jesosaja epeejji cuana jaahuanacue! ¡Quea ja'a nee po meecue! —jamaya acue!

19 Jamajjeya Eyacuiñajji nijje mimicue ejo jama ba'a: —Eyacuiñajji, Pabo miquea esohui huohui canijo ¡huohui meesahuacue mete'ama! Oya huohui meesahuacue, Eyacuiñajji, jama ba'a: "Jesosaa Jodio pojjeama cuana ojaya epeejji po mee cani onijje eba'e tiitii'yojji eyajo. Maya yahuajo onajaya ba jjima" —jamaya mimicue Eyacuiñajji nijje ejo.

20 E'e, Eyacuiñajjiya eya huoojea canaje Jesosaja esohui huohuiya. Ma esohui quea pame nee huohuañajo, dejja quea mase cuaa eya iña majje jeanobiajea canaje. Jamajjeya ¡Eyacuiñajji nijje mimicue ejo esohui quea pame nee Jesosajo mete'ama ehuohui meesahuajji!

Pabo mimiani Eyacuiñajji nijje ojjaña Epesojo ba'e jaahuanajji

²¹ ¡Pea esohui bacue! Dejja bajjani Tiquico yani ecuana nijje. Oya ecuanaja quea jea nee nee, ecuea epreejji nei nei. Ohuaya ecuana Jesosaja esohui huohui sahua cani. Miquiana huasijje poqui majje ohuaya huohui caje ejo, ma eya aña jayojjaya huohui caje'yo pea'ai. ²²E'e, eyaya oya huoojeaña miquiana huasijje ecuanajo huohuiya. Oya shajja'ajja majje miquianaya yeno'ama poaje ecuanajo.

²³Eya quea huiso mimiani Eyacuiñajji nijje miquianajo jama ba'a: —Eyacuiñajji, miya ecuanaja Chii ai. Jesosa Quito, miya ecuanaja Emeshi Mese nei. ¡Ojjaña miquea epreejji cuana Epesojo ba'e quea bei nee po meecue! ¡Oya cuana ojjaña miquea epreejji cuana quea jea nee po meesahuacue! ¡Oya cuana miquea esohui jayojja jama ba'e meesahuacue quea ja'a nee pea'ai! —jamaya eya poani.

²⁴Jamajjeya esejaya Emeshi Mese nei Jesosa Quito quea jea tii tii poanijo, ¡Eyacuiñajjiya miquianaya caba'e meesahua cahua!

Mahuiso ecuea esohui. Eyaya Pabo bajjaniya esohui tehuejeyonaje. Apoa.

PABOJA ETEHUE'YO PINIPO CUIÑAJJI YASIJJE

FILIPENSES

Pabohua Shomajo ejeanobia aniya esohui tehue cani
Jesosaja epeejji cuana Pinipo cuiñajjiyo ba'e yasijje

1 ¹Ecuanaya bajjani Pabo, Timoteo pe'a'i. Ecuanaya Jesosa Quitoja echacojji cuana ojaya yajjijo. Ecuaaya esohui tehueaña ojjaña miquiana huasijke, Eyacuiñajjiya epeejji cuana Pinipo cuiñajjiyo ba'e yasijje, Eyacuiñajjiya esohui huohujji cuana huasijke, o pejjejje ca'ajji yasijke pealai tehueaña ecuaaya. ²Eyacuiñajji ecuanaja Chii ai. Jesosa Quito ecuanaja Emeshi Mese nei. Ohuaya miquianaya cajaahuana cahua quea pame nee. Mimishi cuana cuijea'yo majje quea bei capo mee ca'yahua pealai.

Pabo Eyacuiñajji nijje mimiani Jesosa Quitoja epeejjiyo

³Miquianajo jjashahuabaqui'yo majje ecuanaja Eyacuiñajji bihuia tiitiiaña. ⁴⁻⁵Yahuajo Jesosa Quitoja esohui shajja'ajja jeahuajo miquianaaya eya esohui huohui meesahua'yonaje, jjeya nei pealai. Jamajjeya eya Eyacuiñajji nijje miquianajo mimi tiitiianijo quea bihui nee poani. ⁶Ecuea eba e'e jojo nei Eyacuiñajjiya miquianaya ojaya esohui jama ba'e meesahua coo ca'ya poa yahuajo. Jesosa Quitoja epeejji quea ca'a pishana po mee ca'yonaje. Jjeya quea ca'a nee pishana po mee ca'yani. Quijje ca ca Jesosa Quito poe o'oyajo ohuaya miquianaya quea ca'a nee nee ba'e tiitii mee caje'yo eyajo onijke. ⁷Eya miquianajo jjashahuaba tiitiiquiani miquiana quea jea nee neejojo. Jamaya quea pame. E'e de, eyaya Jesosa Quitoja esohui janobajjima nei huohuañajo, miquiaaya eya huohui meesahuanaje. E'e, dejja cuanaja eya iña jjimahuajo, jeanobiajea cajo pealai, miquianaaya aquiana eba'e meesahuajjii huoojeanaje e que. ⁸Jesosa Quitohua miquianaya quea jea nee acani, jamaya eyaya miquianaya aña. Jamajjeya miquianaya eyaya baqui sa aña, de. Eyacuiñajjiya eba eya e'e jojo nei mimiani.

⁹Eya mimiani Eyacuiñajji nijje miquianajo jama ba'a: —Eyacuiñajji, Jesosa Quitoja epeejji cuaa pea epeejji cuana quea jea pishana acani. ¡Oya cuana pea cuana quea jea nee amecue, miyaya! ¡Quea huiso mijo ba meesahuacue pea'ai! ¡Quea jjashahuabaqui ja'a nee po meecue pea'ai quea pame nee eba'ejji, mimishi'ama! ¹⁰Jamajjeya Quitohua poe o'oya majje oya cuana etecueajji pojjeama. ¹¹E'e Eyacuiñajji, Jesosa Quito onijje ba'yanijo, ohuaya ojaya epeejji cuana quea pame nee ba'e meesahua cani mijo. Jesosaja epeejji cuaa quea pame nee acanijo, dejja cuaa miya bihuia caje'yo. Ojjaña ba caje miya, Eyacuiñajji ca ca oe quea ca'a nee nee, quea pame nee nee pea'ai poani —jamaya eya, Pabo mimiani Eyacuiñajji nijje miquianajo, Pinipo meshijo ba'ejo.

Jesosa Quito ecue yami dojjojo nequi

¹²Ecuea epeejji cuana, ¡bacute jiquio esohui! Dejja cuaa eya iña majje quea huesha dojo canaje jeanobiaa. Quea camaja ejo poanaje. Jamatii, pea meshi cuana huasijke pe a dejja quea huiso cuana huasijke Jesosa Quitoja esohui huohui'yonaje eyaya. Jamaya quea pame nee. ¹³E'e, eya jiquiacua ye canaje cuaa emeshi meseja ejjaquecuaquijji quea huiso huasijke, pea cuana emeshi meseja equi quea quemojo ba'e yasijke. Onaaya ba canaje eya eme' jeyo'yo nequi Jesosa Quitoja esohui huohuijijojo onaja jeyo'yo. ¹⁴Eya jiquiojo nequianijo, beshahua nei ojjaña Jesosa Quitoja epeejji cuana onijje jjapee neineiquiani e'e jojo nei. Jjeya ca ca onaaya janobajjima nei Eyacuiñajjiya esohui huohui cani mete'ama.

¹⁵Jesosa Quitoja epeejji cuaa, oe pojji cuaa Jesosaja esohui huohui cani ejo quea quene poaniya jjejojo. Jjamimicuajea nobiajeaqui sa poani pea'ai. Beca cuana ca, cho. Jesosa Quitojo mimiani quea bihui nee, quea bei pea'ai. ¹⁶⁻¹⁷Oluaya Jesosa Quito, eya pea'ai quea jea nee acanijo huohui cani. Onajaya eba Eyacuiñajjiya eya huoojea ca'yonaje Jesosa Quitoja esohui huohuiya. Janobajjima nei huohuiañajo, pea cuaa ba caje Jesosa Quitoja esohui e'e nei. Pea cuaa enijje quea bei pojjeamaa, Jesosa Quitoja esohui huohui cani quea tecue, emaimaijji jayojja. Ma dejja cuaaya aje oe pea cuana eya pajea mee'yo sa acani, onijje jjapeequi mee'yo sa acani. Eya ejeyo'yo nequijo quea camaja pishana. Oluaya eya quea camaja nee nee po mee sa acani. ¹⁸E'e de, beca dejja cuaa quea tecue nee huohui cani. Pea cuaa quea bei huohui cani. ¿Apiojji shai Jesosa Quitojo huohui cani? Jamatii, Jesosa Quitojo huohui canijo, eya quea bihui nee nee.

¹⁹E'e, miquianaya ejo mimiani Eyacuiñajji nijje; Jesosa Quitohua, Edojjoshahua Pameya pea'ai eya quea ca'a po mee cani quea pame nee. Jamajoya quijje eya quea pame nee ba'eje'yo. Jamaya ecuea eba. Jamajjeya eya quea bihui nee po titiijje'yo.

²⁰Eya jjashahuaba titiiquiani Jesosa Quitojo echacojji. Jesosa Quitojo chaco sa neinei poani quea pame nee nee. Jamajjeya eya bicho'ama ecuea eba'ejjijo.

E'e, jjeyahua nei, quijke pe'a'i eya eshe nequi ba'e sa poani Quito nijje mete'ama nei. Eshe nequije pojja'a; quecua caje'yo cuaa pojja'a. Jamatii. Eya quea pame, mete'ama ba'yaniijo, pea cuaa Quito bihuia caje'yo. ²¹Eya jjashahuubaquiani jama ba'a: —Eya eshe nequianijo, Jesosa Quito ecue eyamijo nequi. Quijje, mano'yo majje eya omijje ba'eje'yo eyajo quea pame nee nee. Jiquiojo ca ca quea pame pishana eya ba'yani. ²²E'e de, jiquio meshijo ba'yaniijo eyaya Jesosa Quitoja esohui huohuije'yo pea cuana huasijje. ¿Achejo shai ba'e sa poani eya jjeya? Jiquiojo pojja'a. Eyajo Jesosa Quito nijje pojja'a. Cua'a de. ²³Jjeyahua nei jiquio meshijo ba'e sa neinei poani eya. ¿Achejo shai? Eyajo Jesosa Quito nijje eba'ejjii ca ca oe e'e jojo nei ecuea quea pame nee nee. ²⁴Jamatii, eya jiquio meshijo ba'e tiitidianijo, quea pame nee poaje miquianaya. ²⁵E'e nei jamaya ecuea ejjashahuubaqu'i'yoji. E'e, eya ba'eje'yo jiquio meshijo. Jamaya ecuea eba. Eya miquiana nijje nequije Jesosa Quitoja epjeejjii quea ca'a nee epo meesahuajji, queabihui nee Jesosa Quito ba meesahuajji pe'a'i. Jamaya e'e jojo nei. ²⁶Jamajjeya miquianaaya Jesosa Quito bihuiae'yo e'e jojo nei enijje quijke e miquiana que poquiyajo.

²⁷E'e, eya epoquijji pojjeama pojja'a miquiana baa; baquije pojja'a mi ba'ajjaa. ¡Jamatii! Eshui quea pame nee Jesosa Quitojo miquianajaya eba. Jamajjeya ¡jamaya ba'ecue quea ja'a nee! Jamajjeya eyaya shajjal'ajjaje miquianaya Jesosa Quitoja epjeejjii cuana ojee quea ca'a nee ba'yani. Ojee janobajjima nei huohuaña Eyacuiñajjija esohui Jesosa Quitojo pe'a'i. ²⁸Dejja mimishi cuaa miquianaya napa cajo, ja'a oe quea mete pojji! Chojja, miya ca ca mete'ama tiitii anianijo, ma dejja mimishi cuaa ba caje jama ba'a: Quijje Eyacuiñajjija oya cuana napa tiitii caje'yo cuaquijo. Oya cuana ba mee caje pe'a'i miquianaya ca ca ba'e tiitii mee caje'yo eyajo, ohuaya. ²⁹E'e, Eyacuiñajjija miquianaya jjapeequi meesahua cani Jesosa Quito nijje. Pea cuana, cho. Jamaya pe'a'i ba'a: Jesosa Quito nijje ba'yaniijo, pea cuaa miquianaya napa caje. Jamaya Eyacuiñajjija eba. E'e, ohuaya miquianaya nahue caje peaa napa cajo. ¡Jamatii queabihui pocue! ³⁰¡Jjeya miquianaya, e jayojjaya janobajjima nei eshahuaja epjeejjii cuana jeabichajeacue! E'e, jjeyahua nei eyaya jamaya Jesosa Quitojo huohuaña tii. Jamaya miquea eba.

Jesosa Quito quea bei, quea ca'a nee nee pe'a'i

2 ¹¿A'a Jesosa Quitohua miquianaya queabihui nee po mee cani? Ohuaya quea jea nee nee acanijo, ¿a'a miquianaaya pea cuana quea jea nee aña pe'a'i? ¿A'a Edojoshahua Pame nijje jjapeequiani miquianaya? ¿A'a pea dejja cuana nijje miquianaya quea bei? ¿A'a pea dejja ba'e meesahuaña pe'a'i? ¡E'e jojo nei jamaya oe pocue! ²Jamajjeya ¡miquianaaya iña oe che queabihui nee nee po meecee, de! Ojjaña oe ojee jjashahuubaquicue Jesosa Quitoja ejjashahuubaquijji jayojjaya jama ba'a: ¡Ojee jjapeequicue quea bei nee! ¡Pea cuana quea jea nee acue miquianaaya! E'e, ¡ojee Jesosa Quitojo jjashahuubaquicue! ³¡A'a mimijajjiji pea quea bicho po meeji! ¡A'a jamaya pojji miquianaya! Chojja. ¡Pea cuana nijje quea bei nee nee pocue! Jjashahuubaquicue jama ba'a: —Eya quea pame pishana; pea cuana quea pame nee.

⁴Miquianaya quea pame nee ba'e sa poani. Jamaya quea pame.
 ¡Pea cuana a'a pajea'yojji! ¡Ba'e meesahuacue quea pame nee pea'ai!
⁵¡Jesosa Quitoja ejjashahuabaquijji jayojja jama jjashahuaba tiitiiquicue!
⁶Jama ba'a: Oya, Jesosa Quito Eyacuiñajji jayojjaya tii tii poa. Jamatii
 Eyacuiñajji jayojja pojjeama po'yo majje meshijo nequi yeno'ama Jesosa
 Quito poa. ⁷E'e, Jesosa Quito nequi tiitii ajja poa eyajo, Eyacuiñajji
 jayojjaya jama pojjeama poa. Oya Eyacuiñajjiya yajjijo ojaya echacojji
 meshi yasijje poe sa poa. Jamajjeya eseya esho'i cuaya poa jama Jesosa
 Quito cuaya pohua, yamiji. ⁸Oya ba'e'yonaje dejja cuana jayojja.
 Eyacuiñajjiya oya huoojea canaje dejja cuana jayojja mano'yome epoji.
 Jamajjeya oya dejja cuana jayojja jama quecua mee'yome acanaje
 cuaa. E'e nei acui ecueata'apeejo Jesosa Quito mano'yonaje dejja
 mimishi jayojja. ⁹Jamajjeya Eyacuiñajjiya oya shequi mee ca o'oyanaje.
 Eyahuasijje dojosohuaqui ca'yonaje. Jesosa Quito oe nei ojjañaja Emeshi
 Mese nei po mee ca'yonaje. ¹⁰Jamajjeya quijje ojjañaa eyajo ba'eya, dejja
 eshe cuana pea'aiya, ojjaña yahuajo emano'yo pea'aiya, ojjaña eshahua
 cuana pea'aiya Jesosa Quito bihuia caje'yo ecui'oshajjajo nequiya.
¹¹Ojjañaa cojja ba majje ojjañaa huohui caje'yo Jesosa Quito e'e jojo nei
 Emeshi Mese oe nei quea ca'a nee nee po tiitiiani. Jamajojoya Eyacuiñajji,
 Jesosa Quitoja Chii bihuia caje'yo, ojjañaa nei neiya. Jamaya poaje'yo.

Jesosa Quitoja epeeiji ejijiji jayojja

¹²Jamajjeya ecuea epeeiji e'e jojo nei cuana, ¡shajja'ajjacue ecuea
 esohui! Yahuajo miquiana nijje nequiahua eya miquiaaya ecuea
 esohui shajja'ajjanaje. Jjeya eya quea huesha nee nequi. Miquiana
 nijje enequijji pojjeama. ¡Jamatii jiquio ecua eyaya huohuaña jama
 atiitiicue! ¡A'a pajea'yojji! Eyacuiñajjiya miquianajaya mimishi cuijea
 ca'yonaje, jamajjeya ¡shajja'ajja tiitiicue oe ojaya esohui! ¡Miquianaya
 oe jjashajja'ajjaquicue quea bei! ¹³E'e de, Eyacuiñajjiya miquianaya ba'e
 meesahua cani ojaya ejjashahuabaquijji jayojja. Jamajjeya miquianaya
 ojaya esohui jama ba'e sa poani. Ohuaya miquianaya jjashahuubaqui
 meesahua cani queabihui nee ojaya ejjashahuabaquijji jayojja.

¹⁴Eyacuiñajjiyo chacochacoani ¡a'a panajajiji! ¡A'a jja oe jjamimicuajea
 nobiaequeijji! ¹⁵Jamajjeya miquianaya pea cuanaja etecueajji pojjeama.
 Eyacuiñajjiya ebacua cuana quea pame nee miquianaya poaje. Eshahuaja
 epeeiji cuana ca ca quea tai nee nee, siajjepoiji nee nee quea chipi
 nee nequi. E'e nei miquiana quea boejea ba'yanijo, majameta beca
 jijinequi jama poaje. Jamajjeya ojjaña dejja quea mimishi cuaa ba caje
 miquianaya Jesosa Quitoja epeeiji e'e jojo nei. ¹⁶E'e, miquiaaya ona
 huasijje Eyacuiñajjiya esohui huohuaña Jesosa jayojja eba'eiji, yahuajo
 jama pojjeama eba'eiji huohuaña. Miquianaya jamaya poanijo, eya
 queabihui nee poaje'yo Jesosa Quito poe o'oyajo. Ma pojajao eyaya

baje ecuea echaco, ecuea esohui pea'ai miquianajaya pajea'yo jjima pojja'a. ¹⁷Jamaya poaje pea'ai pojja'a ba'a: Yahuajo nei nei Eyacuiñajjija epeejji cuaa aquiana dahuajea caninaje Eyacuiñajji bihuajji. Aquiana Eyacuiñajji quea bihui nee epo meeji jayojja jama jjeya e'e pojja'a eya manoje'yo miquianaya Jesosa Quito nijje ejjapeequi meesahuajji. Jamajjeya Eyacuiñajji quea bihui nee poaje miquianajo. E'e de, eya pea'ai miquianajo quea bihui nee poani. ¹⁸¡Jamajjeya quea bihui nee pocue enijje!

Pabohua Timoteojo, Epamonitojo pea'ai huohui cani

¹⁹Eyaya Timoteo huoojea sa aña miquiana que. E'e pojja'a Jesosaa, esejaya Emeshi Mese neiya eya Timoteo huoojea mee caje jjeyahua nei. Timoteohua miquiana ba majje eya huohui cahuaje e quea bihui pojji. ²⁰E'e, ecuea ejjashahuabaquijji quea pame nee jayojja jama Timoteo oe nei jjashahuabaquiani miquianajo. Ohuaya miquianaya quea pame nee Jesosa Quito nijje ba'e meesahua sa neinei acani. ²¹Pea dejja cuana ca ca oja aquianajo jjashahuuba tiitiquiani. Jesosa Quitoja echacojjijo jjashahuabaqui sa po ajja. ²²Timoteohua Eyacuiñajjija esohui quea pame nee huohui canaje. Jamajjeya miquianajaya eba oya quea pame nee. Esho'yahua oja chii nijje chaco ca poa jayojja jama acanaje Timoteohua enijje; esohui Jesosa Quitoja huohui canaje, Timoteohua. ²³Jamajjeya jjeyahua nei eyaya oya huoojea sa aña miquiana que. ¿Yajja shai dejja cuaa eya acaje'yo jiquiojo ba'ecaa? Maya shajja'ajja majje eyaya Timoteo huoojeacuajije miquiana que. ²⁴Eya jjashahuabaquiani jama ba'a: Esejaya Emeshi Mese neiya eya poqui meesahua caje miquiana que, Pinipojo ba'e yasijje quijje pishana pojja'a.

²⁵Eya jjeya miquianajo jjashahuabaquiani. Jamajjeya eyaya Epamonito huoojeaje miquiana que. Oya ecue chahua jayojja Jesosa Quito nijje jjapeequianijojo. Ohuaya Jesosa Quitoja esohui eya huohui meesahua canaje. Yahuajo miquianaya oya huoojeanaje e que aquiana quiaa, e jaahuanaa pea'ai. ²⁶Oya miquianaya ba o'oya sa poani, de. Miquianaya shajja'ajjanaje oya quea mano nee nee poanaje. Miquianaya ojo quea yeno poso, oya quea yeno poanaje. ²⁷E'e, oya quea mano poanaje. Beshahua nei mano'yonaje. Eyacuiñajjiya oya huaquia meesahua ca'yonaje, de. O emano'yo jojjemo eya quea yeno nee nee pome. Eyacuiñajji e quea yeno nee nee nequi mee sa po ajja. ²⁸Jamajjeya jjeya eya o huoojea sa neinei poani miquiana que. O ba o'oya majje quea bihui nee miquianaya poaje. Miquianaya ojo quea bihui nee poanijo, eya pea'ai quea bihui nee poaje. ²⁹Jamajjeya Jesosa Quito nijje jjapeequianijo Epamonito miquiana que poe o'oyajo, ionijke jama mimicue ba'a: —¡Mi poe'yajo eya quea bihui nee! —acue!

Quea pame nee poani Epamonito. Pea oya jayojja poanijo pea'ai ¡shajja'ajjacue! ³⁰Oya Jesosa Quitojo chacochacoanijo beshahua nei mano'yonaje. E'e, quea camaja nee nee, de. Jamatii ohuaya chaco tiitii canaje mete'ama nei. Miquianaaya e que poe ajja jjejojo Epamonito huoojeanaje e chacosahua.

Esohui e'e jojo nei quea pame nee

3 ¹Ecuea epeejji nei cuana, jjeya eyaya pea esohui tehueje miquiana que. ¡Emeshi Mese neijo quea bihui nee pocue, miquianaya! Yahuajo eyaya esohui miquiana que huohuinaje. Jjeya oyaya tehue o'oyaña quea bihui nee miquiana Jesosa Quitoja epeejji quea ca'a nee nee epo meeiji. Jamajjeya pea cuaa miquianaya edasiajji pojjeama. ²Jodio esohui huohujji nisho cuana ¡a'a shajja'ajjaji! Oya edasiajji cuana, iñaehua quea mase jjalijjaquiani jama. Jesosa Quito nijje jjapeequi ajja. Miquea cuiishasha jee biso nei jehuisejjajea mee sa acani huohuime acani ca ohua. ³Cuiishasha biso nei jehuisejjajea mee majje maya dejja cuana jjapee nishoquiani Eyacuiñajji nijje. Eseya ca ca Eyacuiñajji epeejji e'e jojo nei. E'e, Edojjoshahua Pameya eseya Eyacuiñajji bihuia meesahua cani. Jamajjeya eseya quea bihui nee nee jjapeequiani Jesosa Quito nijje. Ohuaya, Jesosa Quito hua ca ca oe eseya mimishi'ama po mee caje'y. ⁴Pea dejja aje oe Jodio etiiquianaja esohui jama amajje jjashahuaba quehuaquiani jama ba'a: —Eya Eyacuiñajji epeejji quea pame nee.

Chojja de. Yahuajo Jodio etiiquianaja esohui jama quea huiso eyaya a'yonaje. Ma esohui quea huiso nee nee yahuajo jama amajje ¡a'a eya quea pame nee? Chojja. ⁵Yahuajo aje eyaya jama anaje ba'a: Jodio etiiquianaja esohui etehue'yo jama acanijo, eya me oeje pea beca peejjima cahuime, 8 cahuime etijjo, ecuea cuiishasha biso nei jehuisejjajea ca'ya poa cuaa. Eya Isaeni dejja. Jamaya ecue chii poa. Ecuea etiiquiana Bejami bajjani. Jamajjeya eya Jodio nei Bejami cuana nijje. Jamajjeya eya Emeo esohui mimiani. Eya Jodio etiiquianaja esohui jayojja jama poanaje pea Jodio esohui huohujji Paniseo bajjani cuana nijje. ⁶Jodio etiiquianaja esohui cuana quea jea nee nee poa ecuea. Jamajjeya eyaya Jesosa Quitoja epeejji cuana janobajjima nei napanaje; etiiquianaja esohui a sa po ajjajojo napanaje. E'e, eyaya ma esohui cuana jayojja jama aneinei'yonaje yahuajo. Jamajjeya Jodio dejja cuana enijke mimijaji jjima poa. ⁷Jodioja esohui quea huiso shajja'ajja majje eya jjashahuaba taiquinaje jama ba'a: —Eya quea pame nee nee ba'e —poso jjabaquinaje.

Jjeya ca ca Jesosa Quitoja esohui ya'yojji eyaya Jodioja esohui cajaa a'yonaje. ⁸E'e, eya jjashahuabaquiani jama pea'ai ba'a: Ojjaña aquiana quea pame cuana oe pojji sosejje, sosema', shabo jama cajaa aña. Jesosa Quito ca ca aquiana quea sose huiso nee nee jayojja eyaya baña. Jamajjeya aje iña oe jama jjashahuabaquime poani ba'a: Jesosa Quito, ecuea Emeshi Mese nei nijje jjapeequianijo eya quea pame nee nee poani.

Quea sose huiso nee nee eyaya Jesosa Quito baña. ⁹E'e, Jesosa Quitoja epreejji poanijo, eya ohuaya onijje nequi tiitii mee caje'yo; quea boejea'yo nee nequi mee caje'yo. Jodioja esohui cuana jama amajje eya quea boejea'yo pojjeama. Eya Jesosa Quito nijje e'e jojo nei jjapeequianijo, ohuaya eya quea boejea po mee ca'yani. E'e, Eyacuiñajjiya huohui cani: —Ojjaña Jesosa Quitoja epreejji cuana eyaya quea boejea'yo po mee yaña.

¹⁰E'e, yahuajo Jesosa Quito ecuea eba pishana poanaje. Jjeya eya o ba neinei'yo sa poani. Eyacuiñajji quea ca'a nee poanijo ohuaya Jesosa Quito shequi mee ca o'oyanaje. Jamajoya eya o jayojjaya caba'e mee ca'yahua. Ma ecua oya napa ca poa jama jayojjaya eya acaje'yo pea cuaa, Jesosa nijje jjapeequianijo mo cuia caje'yo cuaa pojja'a o jayojjaya. ¡Jamatii mo ca'a ca'yahua! ¹¹Jamajjeya jjeya eya jjashahuabaquiani jama ba'a: —Eyacuiñajjiya eya shequi mee caje o'oya. Jesosa Quito nijje ba'e tiitii mee caje'yo Jesosa Quito jayojjaya, quea boejea ba'eje'yo onijje tii.

Pabohua Jesosa Quitojo chaco tiitii cani

¹²Eya Jesosa Quito jayojja jama pojjeama. Oya quea pame nee nee, quea ca'a nee nee peal'ai. Eya quea ca'a pishana. Jjeya eyaya janobajjima nei chacoaña Jesosa Quitojo. Jamajjeya ohuaya eya ojaya epreejji quea ca'a po mee cani. E'e, Jesosa Quitohua eya jjeshe'yo majje onijje jjapee tiitii meeque ca'yani. ¹³Ecuea epreejji cuana, ¡shajja'ajjacue! Ecuea ejjashahuabaquijji jama ba'a: Eya Jesosa Quitoja epreejji quea ca'a nee, quea pame nee nee pojjeama. Eya ca ca jamaya poani ba'a: Eya jjashahuabaqui tiitii ajja ecuea esohui ma eya yahuajo anajejo. Jjeya eya jjashahuabaquiani jama ba'a: Jesosa Quitohua eya chaco meesahua caje janobajjima nei ojo. Jamaya eyaya a sa neineiaña. ¹⁴Eyaya janobajjima nei chaco tiitiñaña Jesosa Quitojo. Jamajjeya quijje Eyacuiñajjiya ecuea echaco sosejje sosequia caje'yo. Jamaya acaje Jesosa Quitohua eya eyahuasijje iyaa'yo majje onijje eba'e tiitii'yojji.

¹⁵Jamajjeya eseya, Jesosa Quitoja epreejji quea ca'a cuana Jesosa Quitoja ejjashahuabaquijji jayojja jama jjashahuabaquiani tii tii. E'e pojja'a miquianaya jamaya po ajja. Eyacuiñajjiya miquianaya jjashahuabaqui mee caje'yo quea ja'a nee o jayojjaya. ¹⁶E'e nei, eseyaya Eyacuiñajjiya esohui quea huiso ba huicha'a huicha'aña. Jamajjeya ¡ojaya esohui jayojja jama ejja'a tiitiiqui!

¹⁷Ojjaña ecuea epreejji cuana, ¡e jayojja ba'ecue! ¡Pea dejja cuana babacacue; ma ecua eyaya miquiana nijje nequuya anaje jamaya ca'a cahua cuaa! ¡Onaya oe jamaya atiitiicue, miquianaaya! ¹⁸Yahuajo eyaya miquianaya huohui majamajanaje pea dejja cuana quea mimishi nee nee poanijo. Jjeya quea yeno nee eyaya huohuije o'oya ma dejja cuanajo. Jesosa Quito acui ecueata'apeejo mano'yonaje. Oya cuana ca ca Jesosa Quitoja esohui jayojja jama po ajjajo o quecuayojji epo jayojja poani. ¹⁹Jamajjeya ma dejja cuana cuaqui yasijje poquije'yo. Ojaya aquiana huisojo jjashahuaba tiitiiquianyi. Eyacuiñajjiyo

jjashahuubaqui sa po'yo ajja. Oya cuana oja mimishijo bicho'ama, quea bihui nee poani. E'e, jjashahuaba tiitiiquiani quea tai.²⁰ Eseyá ca ca jamaya ba'e ajja; Jesosa Quito nijje eyajo ba'e tiitiije'yo. Jesosa Quito hua eshahua eseyá mesena pajea mee ca'yonaje. E'e de, esejaya Emeshi Mese nei Jesosa Quito poeje o'oya. O poe o'oyajji eseyaya ishoal'ajjaña quea bihui neeyá. ²¹ Esejaya eyami ca'a'ama. Jesosa Quito hua poe o'oya majje esejaya eyami quea ca'a nee nee panacuaji caje'yo ojaya eyami jayojja jama quea ca'a nee nee epo'yojji tii tii. Jamaya po mee caje'yo ohuaya quea ca'a nee nee poanijo. E'e, quea ca'a nee poanijo ohuaya ojjaña huoojea tiitii cani. Ojjaña aquiana cuiña cani, Jesosa Quito hua.

Pea esohui cuana eba'ejji quea pamejo

4 ¹Jamajjeya ecuea epeeiji cuana, ijjaapee tiitiiquicue quea ca'a nee! Miquianaya ecuea quea jea nee. Baqui o'oya sa neinei poani. Miquianajo eya quea bihui nee. Miquianaaya quea pame nee Jesosa Quitojo añajo maya ecuea esosequia'yojji jayojja. Jamajjeya ecuea etehue'yo jayojja jama poanijo, miquianaya esejaya Emeshi Mese neijo quea ca'a ba'eje. Eyaya miquianaya quea jea nee aña.

²Epona cuana Emonia bajjani, Sinitique pea'ai, ¡shajja'ajjacue mo, che! Emeshi Mese nei Jesosa nijje jjapeequianijo ¡a'l' jjamimicuiajea nobiajeaquijji! ³Ecuea pea epeeiji nei, ¡miyaya ma epona beca quea bei ba'e meesahuacue! Ohuaya yahuajo eya Eyacuiñajjiya esohui huohui meesahua neinei ca'yonaje. Dejja Cuemete bajjaniya esohui huohui meesahua neinei ca'yonaje pea'ai. Quea huiso ecuea pea epeeiji cuana esohui huohui meesahua ca'yonaje pea'ai. E'e, Eyacuiñajjiya ojaya esohui etehue'yojo eyajo oja bajjani cuana tehue ca'yonaje ona ba'e mee tiiti'yojji.

⁴Miquianaya Jesosa nijje jjapeequianijo ¡quea bihui nee po tiitiicue! ⁵¡Quea bei nee pocue ojjaña cuana nijje! Jamajjeya ojjaña cuaa ba caje esejaya Emeshi Mese nei poeje jjeyahua nei pojja'a. ⁶¡A'a quea mete pojji! Chojja. ¡Mimicue Eyacuiñajji nijje! ⁷Aquiana sa poanijo oya oe huohuicue! ¡Eyacuiñajji bihuiacue pea'ai! ⁷Jamajoya Eyacuiñajjiya miquianaya quea bei nee nee po mee caje. Quea bei nee nee miquianaya poaje Jesosa Quitojo. Ojjaña dejja cuana jamaya jjashahuubaqui ajja. E'e, Jesosa Quito nijje jjapeequianijo, ohuaya miquianaya quea quijijji jaji nee po mee caje. Mete'ama jjashahuubaqui meeme acani pea'ai.

⁸Epeeiji cuana, jjeya pea esohui oe pojji eyaya miquianaya huohuiche. ¡Esohui e'e jojo neijo jjashahuaba tiitiiquicue ojjaña Eyacuiñajjiya esohui quea pame neejo pea'ai! ¡Jjashahuabaquicue pea dejja cuanaja eba'ejji quea pame neejo pea'ai! Ejjashahuabaquijji quea bei epo'yojji, quea bihui nee epo'yojji pea'aijo ¡jjashahuabaquicue! Echacojji quea pame nee neejo, Eyacuiñajjiya dejja cuana quea bihui nee po mee canijo pea'ai ¡jjashahuaba tiitiiquicue! E'e, jamaya ojjaña quea jea nee. ⁹Ecuea esohui shajja'ajjanaje miquianaaya. Ecuea esohui etehue'yo banaje pea'ai. ¡Jamaya miquianaya po

tiitiicue! Ecuea echaco quea pame banaje. ¡Jamaya miquianaaya atiiticue pe'a! Jamajjeya Eyacuiñajji minijje nequi tiitije; quea bei po mee caje.

Pabo ojaya epeejji Pinipojo ba'e cuana nijje quea bihui poani

¹⁰Yahuajo nei miquianaaya aquiana eba'e meeiji huoojeanaje e que, sosema!. Yahuajo pishana quiojoya miquianaaya pajea'yo jjima aña. Jamatii aquiana huoojea jjima poa. Jjeya eya ba'e sahua o'oyaña. Jamajjeya eya quea bihui nee nee esejaya Emeshi Mese nei nijje, Jesosa Quito nijje jjapeequiani. ¹¹¡A'a jjashahuabaquiji eya mimiani eya aema' poanijo! Eya jjashahuabaqui tiitii aija aquiana eba'e meeiji. Oe pojji aquiana ecuea poanijo, jamatii. ¹²E'e, aema' poanijo, jamatii. Eya quea bei. Ecuea aquiana quea huiso yanijo, jamatii eya quea bihui. E'e pojja'a ecuea eba'eiji quea camaja poaje o'oya. E'e pojja'a camaja'ama poaje. Jamatii. Eya mimije Eyacuiñajji nijje jama ba'a: —E'e Eyacuiñajji, ecuea eba'eiji quea pame.

E'e, quea jejejo, quea shoe peal'aijo, aema' poanijo, aquianajji pojja'a poanijo jamatii eya quea bihui. ¹³Jamajjeya quea camaja poanijo jamatii eya quea bihui nee Jesosa Quitohua eya ba'e meesahua canijo. ¹⁴E'e, ecuea eba'eiji quea camaja poanijo, miquianaaya eya ba'e meesahuanaje quea jea nee. Jamaya quea pame.

¹⁵Yahuajo Eyacuiñajji esohui quea pame miquiana huasijke, Pinipojo ba'e yasijke huohui coo majje eya Maseronja meshijo nequi poquinaje. Ma pojja, quijje peal'ai miquiaaya nei eya aquiana quianaje. Jesosaja epeejji cuana pea cuiñajji jo ba'ela aquiana quia'yo jjima. Maya miquianajaya eba. ¹⁶E'e, eya Tesanonicajo chacochacoanijo eba'eiji quea camaja ecuea poanaje. Jamajjeya miquiaaya aquiana huoojea huicha'a huicha'anaje e que. ¹⁷Miquianajaya aquiana ehuoojeajji eya jjashahuabaqui aija poanaje. Ecuea ejjashahuubaqui'yoji ca ca jiquio jama ba'a: Miquiaaya aquiana e que quia'yonaje sosema!. Jamajjeya Eyacuiñajji miquianaya quea ja'a nee po mee caje. E'e, quijje peal'ai quea huiso sosequia caje'yo ohuaya ma miquiaaya anaje sosejje. ¹⁸Miquiaaya Epamonito huoojeanaje e que aquiana quiaa. Jamajjeya jjeya quea huiso nee ecuea aquiana eba'eiji yani. Ba'eje eya quea pame nee. E'e, ma aquiana equia'yoiji aquiana Eyacuiñajji yasijke ebihuia'yoiji jayojja, quea shiye nee nee jayojja, Eyacuiñajji quea bihui nee nee epo meeiji. ¹⁹Esejaya Eyacuiñajji aquiana quea pame nee, quea huiso yani, de. Jamajjeya e'e jojo nei ohuaya miquianaya ba'e meesahua caje. Jamaya poaje ohuaya miquianaya Jesosa Quito nijje jjapeequianijo.

²⁰Ojjaña Jesosaja epeejji cuaa Eyacuiñajji, esejaya Chii ai eyajo cabihuia tiitii cahua jjeya nei, quijje peal'ai. Jamaya capoahua.

Esohui quea bihui epo meeiji

²¹Ojjaña Jesosaja epeejji cuana quea bihui nee huohui'ajjacue jama ba'a: —¿Achajja acuae quiana so'o, de? —ecuanajaya ebajji.

Jesosaja epeeiji cuaa enijje nequiya miquianaya huohui'ajja cani jama ba'a: —¿Achajja acuae quiana so'o de? —onajaya ebajji.

22 Jesosaja epeeiji cuana emeshi mesejo chaco canijo, ojjaña cuana jiquio tiijo pea'aiya miquianaya huohui'ajja cani jama ba'a: —¿Achajja acuae quiana so'o, de? —onajaya ebajji.

23 Esejaya Emeshi Mese nei Jesosa Quito miquianajaya eyami dojjojo nequi. ¡Ohuaya miquianaya quea pame nee cajaahuana cahua! Mahuiso ecuea esohui.

Eyaya Pabohua tehuejeyonaje. Apoa.

PABOJA ETEHUE'YO CONOSA CUIÑAJJI YASIJJE

COLOSENSES

Pabohua Shomajo ejeanobia aniya esohui tehue canaje
Jesosaja epeejji cuana Conosa cuiñajjiyo ba'e yasijje

1 ¹Eya Pabo, Jesosa Quitoja huoojea'yo ojaya esohui huohuiya.
Jamaya Eyacuiñajji sa poanaje. ²Timoteohua esejaya epeejji enijke
esohui tehue cani miquiana huasijje jama ba'a: Ma Eyacuiñajjiya epeejji
cuana huasijjeme Conosa cuiñajjiyo ba'e, ecuanaja epeejji e'e jojo nei
Jesosa Quito nijje jjapee neineiquiani yasijje.

¡Esejaya Chii aiya, Eyacuiñajjiya miquianaya cajaahuana cahua quea
pame nee, quea bei capo mee cahua pea'ai!

Pabohua Eyacuiñajji bihuia cani

³Eyacuiñajji, esejaya Emeshi Mese nei Jesosa Quitoja Chii eyaya bihuia
tiitiaña onijke miquianajo mimianijo. ⁴E'e, pea cuaa eya huohui cani jama
ba'a: —Jesosaja epeejji cuaa Conosajo ba'ecaa Jesosa Quito shajja'ajja cani
tii. Ojjaña Eyacuiñajjiya epeejji cuana quea jea nee acani pea'ai.

⁵E'e, miquianaya esohui e'e jojo nei Jesosa Quitoja yahuajo pishana
shajja'ajja coo majje onijke jjapeequinaje. Jjashahuabaquiani eba'e tiitii'yojji
quea pame nee eyajo onijke pea'ai. E'e jojo nei Eyacuiñajjiya jamaya
acaje'yo miquianajo. ⁶Jiquio esohui e'e jojo nei Jesosa Quitojo ojjaña
meshi yasijje huohui cani. Jamajjeya quea huiso dejja ba'e mee cani quea
pame nee, miquiana jayojjaya. Jamaya miquianaaya esohui shajja'ajja coo
majje jjabahuejjaqui'yonaje. Jamajjeya jjabahuejja neineiqui'yonaje ba'a:
Eyacuiñajjiya dejja cuana jaahuana cani e'e jojo nei. ⁷Dejja Epapasi bajjani
ecuanajjaya quea jea nee. Ohuaya Jesosa Quitoja esohui huohui ca'yonaje
miquiana que. Oya ecuana jayojjaya Jesosa Quitoja yajjiyo chacochacoani.
Ecuana sohuihuohui sahuajji quea pame nee pea'ai. ⁸Ohuaya ecuana huohui

canaje jama ba'a: —Edojjoshahua Pameya Jesosaja epeejji cuana Conosajo ba'e pea epeejji cuana quea jea nee po mee cani —Epapasi poanaje.

Pabo miminaje Eyacuiñajji nijje

⁹Epapasija esohui quea pame nee miquianajo shajja'ajja'yo majje ecuana Eyacuiñajji nijje mimi huicha'a huicha'ani jama ba'a: —Eyacuiñajji, ¡ecuanajaya epeejji cuana ba neinei meesahuacue ache echacojjji shai mijo onajaya poaje! Edojjoshahua Pameya oya cuana miquea esohui caba meesahua cahua quea pame nee, cajjashahuubaqui meesahua cahua quea ja'a nee epoiji pe'a! ¹⁰Jamajjeya joya cuana Jesosa Quitoja esohui jayojja jama ba'e tiitii mee'yocue! Jamaya poanijo Jesosa Quito quea bihui nee nee poaje onajo. ¡Quea pame nee nee chaco tiitii meecue Jesosa Quitojo pe'a! E'e Eyacuiñajji, ¡miquea epeejji mijo jjabahuejja tiitii meequivue pe'a! ¹¹Miya ca ca oe quea ca'a nee nee, Eyacuiñajji. Jamajjeya ¡miquea epeejji cuana Conosajo ba'e jjapeequi meesahuacue quea ca'a nee nee! Jamajjeya oya cuana miquea esohui pajea'yo ajja tii dejja quea mase cuaa napa cajje, yeno'ama poaje. ¹²Eyacuiñajji, ecue Chii ai, oya cuana quea boejea'yo po mee'yonaje miyaya. Jamajjeya quijje oya cuana miquea pea epeejji cuana nijje ba'e tiitii meeje'yo quea ja'a nee minijje eyajo. E'e Eyacuiñajji, jamajjeya apoa.

¹³Yahuajo eseya Edosiquiaa napa ca'yonaje. Quea mase nee, quea mimishi nee nee. Jjeya ca ca esejaya Chii aiya eseya jjeshe ca'yonaje. Jamajjeya oja Bacua oe nei esejaya Emeshi Mese nei quea ca'a poaje'yo tii. Oja Bacua Jesosa Quito Eyacuiñajjiya quea jea nee nee poani tii tii.

¹⁴Jama ba'a: Jesosa Quitohua esejaya mimishi cuana cuijea'yo majje Edosiquiana quea ca'a nee eseya mesena pajea mee ca'yonaje.

Jesosa Quito esejo mano'yonaje

¹⁵Dejja cuanaja Eyacuiñajji ecojja bajji pojjeama, jjacojjaba meequivi ajja. Jamatii oja Bacua Jesosa Quito Eyacuiñajji jayojja nei neiya, o jayojjaya jama poani pe'a! Jamajjeya Jesosa Quito ba majje Eyacuiñajji esejaya eba. Oya, Jesosa Quito ojjaña e'aquiana mese. Ojjaña aquiana cuana oja pana poa. ¹⁶E'e, Eyacuiñajjiya Jesosa Quito nijjeya ojjaña aquiana cuana pana ca'ya poa, jiquio aquiana ba'a: Ojjaña aquiana ojjaña meshi cuanajo pana ca'ya poa; ojjaña aquiana eyajo pana ca'ya poa pe'a! Aquiana cuana ecojjaja ebajji, pea aquiana ecojjaja ebajji pojjeama pe'a! pana ca'ya poa jiquio ba'a: Eyacuiñajjiya esohuidojji quea ca'a nee pana ca'ya poa, eshahua cuana quea huiso, quea mimishi po jjimahuajo, pana ca'ya poa pe'a! E'e, Eyacuiñajjiya Jesosa Quito nijjeya ojjaña aquiana, ojjaña tii pana ca'ya poa Jesosa Quitoja ya'yojji. ¹⁷E'e, oya Jesosa Quito ba'e tiitiyya poa ojjaña aquiana pana jjimahuajo. Ojjaña aquiana nequi tiitii mee cani quea pame nee, Jesosa Quitohua. ¹⁸Ojjaña ojaya epeejji cuanaja mese poani tii tii pe'a! Ohuaya ma epeejji ojaya huapa pojjeama jayojja jama ojee jjapeequi meesahua cani, ojjaña. O

jayojja ba'e meesahua cani. Mano'yo majje Jesosa Quito ebionei shequi o'oyanaje. Jamajjeya oya oe nei quea ca'a nee poani tii tii. ¹⁹E'e, oja Bacua Jesosa Quito o jayojja poani tii tijo, Eyacuiñajji quea bihui nee nee poani. ²⁰Yahuajo dejja cuana quea mimishijo Eyacuiñajjiya ojjaña aquiana cajaa aca'ya poa. Jesosa Quito acui ecueata'apeejo ba'e na cuayaqui'yonaje. Mano'yonaje. Jamajjeya Eyacuiñajjiya mimishi cuana cuijea caje'yo. Jamajjeya quea bei po o'oyanaje ojjaña oja pana cuana nijje eyajo, meshi cuanajo anica cuana nijje peal'ai.

²¹E'e, miquianaya yahuajo quea mimishi poanijo, quea jjashahuabaqui tai poanijo pea'ai Eyacuiñajji nijje jjapeequi ajja. Quea huesha nee poquiquehuani jayojja poanaje. ²²Jesosa dejja jayojja yamiji nequinaje. Jamajjeya Jesosa Quito esejaya mimishi cuanajo mano'yonajejo, Eyacuiñajjiya eseya ojaya epeejji cuana po mee ca'yonaje. Jamajjeya Jesosa Quitohua eseya Eyacuiñajji yasijje poqui mee caje'yo mimishi'ama, quea boejea epo'yo pea'ai. Jamajjeya Eyacuiñajji ese nijje quea bei poaje eyajo, ca ojaya esohui jama ba'e tiitiinajejo, Jesosa Quitoja esohuijo jjashahuaba tiitiquinajejo pea'ai. ²³Jiquio esohui shajja'ajja majje ja'a pajea'yojji pea'ai! Quea huiso dejja quea huiso meshijo ba'eya jiquio esohui shajja'ajja cani eseyaya jayojjaya.

Jesosa Quitohua ca oe Pabo huoojea canaje esohui huohuiya

Jesosa Quitoja esohui ojjaña dejja shajja'ajja canaje ojjaña meshijo. Eya ca ca iña e'e jojo nei Eyacuiñajjiya esohui huohuijji; Jesosa Quitoja esohui huohuaña. ²⁴Jesosa Quitoja esohui eya huohuiyajo, pea cuaa eya jeyo majje jeanobiajea canaje quea huiso cahuijo; quea nee. Jamatii eya quea bihui nee poani. Yahuajo Jesosa Quito quea nee nee poa. Jjeya eya quea nee pishana poani miquiana Jesosaja esohui jayojja ba'e meesahaujji. E'e pojja'a quijje Jesosa jayojja eya quea nee nee poaje. Dejja cuaa eya napa cajje eya quea ca'a poajo, Jesosaja epeejji cuana quea ca'a poaje pea'ai. ²⁵E'e jojo nei Eyacuiñajjiya eya huoojea ca'yonaje ojaya esohui huohuiya ojaya epeejji cuana huasijje. Jamaya miquianaya jjapeequi meesahuaña Jesosa Quito nijje. Ojjaña Jesosaja esohui huohuaña pea'ai. Jiquio esohui eseya Eyacuiñajjiya ba meesahua cani. ²⁶Jiquio esohui dejja cuanaja quea quehua yahuajo nei poa. Ba mee jjima poa. Jjeya ca ca Eyacuiñajjiya ojaya epeejji nei cuana Jesosa Quitoja esohui ba meesahua cani quea ja'a nee. ²⁷Jamajjeya jjeya Eyacuiñajjiya ojjaña ojaya epeejji cuana, Jodio pojjeama cuana pea'ai ba mee sa acani ojaya esohui Jesosa Quitojo. Ma esohui quea pame nee nee jama ba'a: Jesosa Quito esejaya eyami dojjojo nequi tiitiiyani. Jamajjeya eseya jjashahuabaquiani onijke eyajo enequi tiitii'yojji. ²⁸Ojjaña Jesosa Quitoja esohui ecuaaya huohuaña quea ja'a nee ojjaña huasijje. Ojjaña nei nei jjabahuejjaqui meeña ojjaña Jesosa Quitoja epeejji quea ca'a nee epoji. E'e, jamaya poaje Jesosa Quito poe o'oyajo. ²⁹Miquianaya Quitoja epeejji quea ca'a nee epoji eyaya janobajjima nei esohui huohuaña

Jesosa Quitoja. Jesosa Quito ecuea eyami dojjojo quea ca'a nee nequi.

Ohuaya eya esohui ba neinei meesahua cani miquiana huasijje ehuohujiji.

2 ¹¡Bacue jiquio! Eya janobajjima nei jjashahuabaqui majje Eyacuiñajji nijje mimi neineiani miquianajo Conosajo ba'e yasijje. Mimi neineiani Jesosa Quitoja epeejji cuana Naonisea cuiñajjijo ba'e yasijje pea'ai, Jesosa Quitoja epeejji cuana ecuea ba jjima cuana huasijje pea'ai. Jamatii eya jjashahuabuquiani onajo pea'ai. ²Jamajjeya eyaya ojjaña miquianaya Jesosa Quitoja epeejji cuana quea ca'a nee po meesahuaje'yo. Miquianaya pea cuana nijje jjapeequi meesahuaje'yo e'e jojo nei pea'ai, esohui quea pame nee Jesosa Quitojo jjabahuejjaqui meesahuaje. Quea bei nee jjashajja'ajjaquije. E'e, jjeya ojjaña cuana esohui Jesosa Quitoja Eyacuiñajjiya ba meesahua caje'yo quea ja'a nee. Yahuajo ca maya ba mee jjima poa. ³Jesosa Quitoja eba ojaye nei Eyacuiñajjija ejjashahuabuquijji, ojjaña tii. Onijje jjapeequianijo, Eyacuiñajjija ejjashahuabaqui'yojji quea ja'a nee ba meesahua cani Jesosa Quitohua. ⁴¡Ecuea esohui etehue'yo ba neineicue miquiaaya! Pea dejja cuana siajje poani Eyacuiñajjijo ja'a shajja'ajjajji! Dasia ca chana' mi. ⁵E'e, eya ejeanobia ani. Jamajjeya miquiana nijje eya enequijji pojjeama. Jamatii eya jjashahuuba tiitiiquiani miquianajo, miquiana nijje nequi jayojjaya. Ecuea eba miquianaya Jesosa Quito nijje jjapee neineiquiani quea pame nee, ojaya esohui jayojja jama poani pea'ai. Jamajjeya eya quea bihui nee nee poani miquianajo.

Jesosaa eseya o jayojja ba'e meesahua caje'yo

⁶Jamajjeya miquianaya Jesosa Quito nijje ebionei jjapeequi'yonajejo oya miquea Emeshi Mese nei quea pame nee poanaje. Jamajjeya ¡ba'ecue ojaya epeejji nei! ⁷Jamajjeya ¡Jesosa Quitoja epeejji quea ca'a nee oe pocue! ¡Ojaya esohui ba tiitiicue! ¡Ojaya esohui e'e jojo neijo jjashahuaba tiitiiquicue pea'ai! E'e, jamaya pea dejja miquianaya huohui canaje. Eyacuiñajji nijje jamaya mimi tiitiicue: —E'e Eyacuiñajji, jamaya miquea esohui quea pame nee nee.

⁸Dejja cuaa esohui e'e nei pojjeama huohui cani miquianaya. Quea quehua nee, etiiquiana cuanaja esohui. Jesosa Quitoja esohui jayojja jama pojjeama, quea ja'a nee pojjeama. ¡A'a shajja'ajjajji! Dasia caje'yo cuaa mi.

⁹Jamajjeya ¡bacue jiquio! Oya Jesosa Quito eseya jayojja yamiji poa. Jamatii oya Eyacuiñajji nei poa. ¹⁰Jesosa Quito nijje jjapeequianijo, Eyacuiñajjiya eseya ba'e tiitii mee caje'yo Jesosa Quito jayojja epo'yojji. E'e, Jesosa Quito Emeshi Mese nei oe nei quea ca'a nee nee. Ojjaña eshahua cuanaja mese, Eyacuiñajjija esohuidojiji cuanaja mese pea'ai quea ca'a pishana, de.

¹¹Ojaya etiiquianaja esohui jama Jodio dejja cuaa cuishasha jehuisejjajea cani. Jamaya huohui jjima acani Jesosa Quitohua. Onijje jjapeequianijo, ohuaya miquianajaya mimishi pajea mee ca'yani, miquianajaya ejjashahuabaqui'yojji

quea mimishi chama'yo po mee ca'yani. ¹²Jesosa Quito mano'yajo dejja cuaa ohuajea ca poa. Eyacuiñajjiya oya shequi mee ca o'yanaje. Jesosa Quito ohuajea ca poa jayojja jamaya peaa miquianaya enajo besa mee canaje Eyacuiñajjiyo. Jamajjeya Eyacuiñajjiya Jesosa Quito shequi mee ca o'yanaje jayojja jamaya ohuaya miquianaya ba'e meesahua caje'yo Jesosa Quito jama epo'yojji, ojaya esohujo jjashajja'ajjaquianijo. ¹³Yahuajo Jodio pojjeamaja Eyacuiñajjiya esohui miquianajaya ba jjima. Quea mimishi nee nee poanijo miquea edojoshahua cu aqui yasijke dobiqui'yo quiaye poanaje. Jjeya ca ca Eyacuiñajjiya miquianaya ba'e tiitii mee caje'yo Jesosa Quito nijje mimishi cuana ojjaña tii cuijea ca'yonajejo. ¹⁴Eseyo aje oe Moisesija esohui etehuejo jjashajja'ajjaqui ajjajo, Eyacuiñajjiya tehue mee canaje jama ba'a: "Ojjaña quea mimishi nee nee" poanaje. Jamatii jojoya Jesosa Quito esejaya mimishijo mano'yonaje acui ecueata'apeejo. Jamajjeya Eyacuiñajjiya e'e jojo nei esejaya mimishi cuana cuijea neinei ca'yonaje. ¹⁵E'e, Jesosa Quito acui ecueata'apeejo mano'yonaje. Jamajjeya eshahua cuana ca'l'ama po mee ca'ya poa, Eyacuiñajjiya. Jamaya ojjaña eshahua mese cuana jeabichajea ca'ya poa. Eyacuiñajjiya ojjaña ba mee canaje eyajo anica.

¡A'a esohui e'e nei pojjeama shajja'ajjajji!

¹⁶Jamajjeya ¡bacue oe! Pea cuaa miquianaya tecuea cani ojjaña bobi miquiaa ijjiānajo, pea e'ishiji ishiañajo pea'ai. ¡A'a oya cuana shajja'ajjajji! Jodio cuanaja esohui jama ba'a: Ojee e'ijjiājji pojja, epojja chacochaco mee ajja pea'aiho huohui cani; ¡a'a oya cuana shajja'ajjajji!

¹⁷Yahuajo ma esohui cuanajo dejja cuana jjashahuaba meequi ca'yonaje ma Jesosa Quitohua quijje poe majje acañaje. ¡Jjeya nei Jesosa Quitojo jjashahuabaquicue! Oya ca ca oe nei quea pame nee. ¹⁸Pea dejja cuaa jjacahuibaqui majje miquianaya Eyacuiñajjiya esohuidojoji bihuia mee sa acani bobima' ani tii. Ma dejja cuana ojaya ejjashahuabaquijji quea taijo mimi huicha'a huicha'ani. Jama siajje pome poani ba'a: —Ecuea ejjashahuabaquijji quea ja'a nee; onajaya quea ja'a pojjeama —poani.

Tecuea canijo ca oe ja'a jjashajja'ajjaquijji! Eyacuiñajji nijje mi poqui pajea mee ca chana!. ¹⁹Ma dejja cuana aje oe Jesosa Quito nijje, esejaya Emeshi Mese nei nijje jjapeequi pajea'yonaje. Esejaya Emeshi Mese neiya Jesosa Quitohua ojjaña ojaya epeejji cuana jjabahuejjaqui mee cani ojee. Jama ba'a: Jesosa Quito ojjaña ojaya epeejji cuana nijje ese ejja jayojja poani. Ojjaña ojaya epeejji cuana Jesosa Quitoja eyami jayojja poani. Esapa jayojja esejaya Emeshi Mese nei Jesosa Quito poani. Jiquio ecua esapaa eyami poqui mee cani jayojja jama Jesosa Quitohua ojjaña ojaya epeejji cuana huoojea cani, jjabahuejja meequi cani ojee jjapeequijji. Jamaya Eyacuiñajjiya quea boti nee. Jamaya Eyacuiñajjiya ojjaña ojaya epeejji quea ca'a nee po mee sa acani. Esejaya Emeshi Mese neiya Jesosa Quitohua ojjaña ojaya epeejji cuana ojee onijje jjabahuejja meequi cani; jamaya Eyacuiñajjiya ojjaña ojaya epeejji cuana quea ca'a nee po mee cani. Jamajjeya ojjaña ojee jjapeequi mee cani Jesosa nijje.

²⁰Miquianaya Jesosa Quito jayojja jama poanijo Jesosa Quitoja epeejji pojjeama cuanaja esohui quea quehua ¡a'a shajja'ajjaji! ¿Apiojji acuae jjeya maya esohui quea quehua shajja'ajja sa poani? Jesosa Quito nijje jjapeequianijo eshahuaja epeejji pojjeama poani. ²¹Esohui quea quehua jiquio jama ba'a: —Jiquio aquiana ja'a napajji! ¡A'a pea bobi cuana ijiajji! ¡Pea e'ishijji a'a ishijji! —jamaya dejja cuaa huohui nisho cani.

²²Jama pojjeama ca ca Eyacuiñajjiya esohui. Bobi cuana ijiajeyo majje chama'yo tii poani. Joya miquiaa napaña aquiana chama'yo tii poaje pea'ai. ²³E'e, jiquio dejja cuaa pea cuana dasia cani; ojaya esohui quea quehua quea ja'a poso acani cuaa. Jamajjeya pea cuana jjashahuuba quehuaqui majje oe pojji bobi ijija jjima acani. Pea'ai Jesosaja esohui jama ba'e sa po'yo ajja. Cho, quea ja'a pojjeama ba'yani. Jamaya poanijo dejja cuana quea mimishi jjashahuubaqui pajea ajja.

Yahuajo quea tai ba'ya poa eba'ejji Jesosa Quito nijje quea pame

3 ¹Eyacuiñajjiya Jesosa Quito ba'e mee ca o'oyanaje. Jamajjeya ohuaya miquianaya ba'e mee caje'yo Jesosa Quito jayojja. Jamajjeya ijashahuuba tiitiiquicue Jesosa Quitojo eyajo eba'ejji! Jama ba'a: Eyacuiñajjiya Jesosa Quito ojjaña huoojea'yoji quea ca'a nee po mee ca'yonaje. Oya Eyacuiñajjiya ebianei mijiji ani. ²E'e, ijashahuuba tiitiiquicue oe Jesosa Quitojo! Aquiana taijo oe a'a jjashahuubaquijji! ³Jama ba'a: Dejja emano'yojaa mimishi po'yo ajja. Jamaya miquianaya jjeya emano'yo jayojjaya mimishi po sa po'yo ajja. Jesosa Quito Eyacuiñajji nijje nequi tiitiiani. Ohuaya miquianaya jaahuanca cani quea pame nee. ⁴Jesosa Quito poe o'oyajo, eseya onijje nequi tiitiije'yo quea ja'a nee nee; o jayojjaya poaje'yo onijje jjapee tiitiiquianijo. Jamajjeya oe ijashahuuba tiitiiquicue Jesosa Quitojo!

⁵E'e, Jesosa Quito nijje jjapeequi majje jamaya ebionei acue ba'a: ¡Ojjaña mimishi cuana oe pajea neinei'yocue! ¡A'a pea cojjojji pojji! ¡A'a jama jjashahuubaquimeya pojji! ¡A'a quea tai jjashahuubaquijji! ¡A'a quea mimishi ba'e sa pojji! Onajaya aquiana ja'a quea jea bajji pea'ai! Quea dejja tai poanijo aje oe miquianaya eyacuiñajji nisho bihuiajji jayojja poani, de. ⁶Jiquio mimishi cuana jama atiitii canijo, Eyacuiñajjiya shajjama' cuana quea nee po mee caje'yo. ⁷Jamaya aje oe miquiaaya yahuajo mimishi ahuicha'a huicha'a'yonaje pea'ai onaaya acani jayojjaya. ⁸¡Jjeya ca ca pajea neinei'yocue ojjaña mimishi cuana! Jamajjeya ¡a'a quea tecue nee nee pojji! ¡A'a quea quene nee nee pojji! ¡A'a quea mase nee nee pojji! ¡A'a pea nijje mimijajji! ¡A'a quea tai mimiji! ⁹E'e, miquianajaya eba'ejji quea mimishi yahuajo jama apaje'a'yonajejo ¡a'a siajje pojji! ¹⁰Jjeya miquianajaya eba'ejji quea pame nee po'yonaje. Eyacuiñajjiya miquianaya ba'e meesahua cani quea boejea, o jayojja epojji, o ba neineijji epojji. Jamajjeya ¡a'a quea mimishi po'yojji!

¹¹Jamajjeya Jesosa Quito nijje jjapeequianijo ojjaña ojaya epeejji cuana cajjapeequiahua pea nijje; pea jayojja oe capoahua. Jodio cuana ca ca Jodio

pojjeama jayojjaya ca'a'ama; dejja ecuiishasha jehuisejja'yo ca ca cuiishasha jehuisejja jjima jayojja pe'a'i, Jieno dejja pojjeama cuana, Sitinia dejja cuana pe'a'i; echacojji sosema' ca ca dejja echacomeejjima' jayojja, ca'a'ama ojjaña. Jesosa Quito ca ca oe nei quea ca'a nee nee nequi tii tii. ¹²E'e, Eyacuiñajjiya miquianaya babaca ca'y'a poa ma ojaya epeejjime epojji. Ohuaya miquianaya quea jea nee acanaje pe'a'i, Eyacuiñajjiya. Jamajjeya quea pame ba'ecue jiquio jama ba'a: ¡Aema' cuana ba'e meesahuacue! ¡Pea cuana nijje jjapeequicue! ¡Mase'ama oe pocue! ¡Quea bei oe pocue! ¡Tecue'ama pea'ai oe pocue! ¹³¡Ona nijje tecue'ama pocue! E'e pojja'a pea cuaa miquianaya quea mimishi acaje. ¡Jamatii ojaya mimishi pajea'yocue; ohuaya miquea mimishi capajea ca'yahua pe'a'i! E'e, Jesosa Quitohua miquianajaya mimishi cuana cuijea ca'yonaje; jamajjeya ¡miquianaaya oe pea cuanaja mimishi pajea'yocue! ¹⁴E'e jojo nei ¡pea cuana quea jea nee acue! Jamaya poanijo miquianaya ojee quea ja'a nee nee ba'leje. ¹⁵¡Miquianaya oe quea bei nee nee ba'ecue Jesosa Quitohua miquianaya quea bei nee ba'e meesahua canijo! Miquianaya ca ca oe Jesosa Quitoja epeejji poani. Jamajoya eseaya jjapeequi mee caje'yo quea cojja bei epojji. Majoya miquianaya iyaa ca'yonaje Eyacuiñajjiya. ¡Eyacuiñajji bihuiacue pe'a'i!

¹⁶¡Ojjaña Jesosa Quitoja esohui cuana shajja'ajja tiitiicue! ¡Quea ja'a nee esohui esejaya epeejji cuana huasijje huohuicue; shajja'ajjacue pea'ai! ¡Ojee jjabahuejjaqui meecue quea ja'a nee pea'ai! Eyacuiñajji bihuiañajo jama pocue ba'a: ¡Sohuicuayacue quea bihui nee Jesosa Quitojo! ¡Miquianaaya Eyacuiñajji bihuiacue sohuicuayaniya pea'ai! ¡Quea quijiji bei nee pea'ai pocue Eyacuiñajjiyo! E'e, ¡o jayojjaya jama ba'ecue! ¹⁷Esejaya Emeshi Mese nei Jesosa. Ojaya epeejji poanijo ¡ojjaña miquea esohui ojaya yajji acue! ¡Ojjaña miquea echaco ojaya epojji chacocue pea'ai! Jesosa Quitohua miquianaya jamaya ameesahua canijo, ¡Eyacuiñajji, esejaya Chii ai oe bihuiacue!

Eyacuiñajji esejaya eyamijo quea pame nequi

¹⁸Jamajjeya ehuanase cuaaya, Jesosaja epeejjiya, ¡yahue shajja'ajjacue! Jamaya miquianaya quea pame nee poaje. ¹⁹Yahueya, ¡miquea ehuanase quea jea nee acue! ¡A'a oe onijje quea tecue nee pojji!

²⁰Esho'i cuaa, Jesosaja epeejji poaniya, ¡shajja'ajja tiitiicue mique chii, miquea enaese pea'ai! Jamaya miquianaya poanijo, Jesosa Quito quea bihui nee poaje. ²¹Echii cuaa, enaeseya pea'ai, ¡a'a jamatii tecuea huicha'ajji mique bacua cuana! Oya cuana quea yeno nee poaje miquiaa tecuea tiiti'yajje.

¡Echacojji cuana, echacomeejji cuana pea'ai quea pame oe pocue!

²²Miquianaaya echacomeejjijo chacochacoani ojaya yajjijo ¡miquianaja echacomeejjija esohui jama chacomeya oe acue, ojjaña tii! ¡O ba majje a'a chaco nishojji! Cho. ¡E'e jojo nei quea bihui nee oe chacocue ojaya! ¡Jamaya oe acue miquianaaya! ¡Jesosa Quito oe quea jea nee ejja'aqui! ²³Miquianaaya echacomeejjijo chacoañajo Eyacuiñajjiyo chacoña pea'ai.

Jamajjeya ¡chaco neineicue Eyacuiñajji quea bihui nee epoji! ²⁴E'e, miquianajaya eba jama ba'a: Quijje eyajo esejaya Emeshi Mese neiya miquea echaco quea pame nee cuana sosequia caje'yo, ma ecua ohuaya huohui ca poa jayojjaya acaje'yo. E'e, miquianaya chacochacoani Jesosa Quitojo, esejaya Emeshi Mese neijo. ²⁵¡Bacue oe! Eyacuiñajjiya ojjaña shajjama' cuana napa caje'yo quea mimishi poani sosejje. Ohuaya ojjaña mimishi ba cani. Jamajjeya joya quea mimishi nee nee poani janobajjima nei napa caje'yo; joya quea mimishi pishana poani oe pojji napa caje'yo.

4 ¹Ojjaña echacomeejji cuaa, ¡shajja'ajjacue mo oe! Miquea echacojji cuana miquea yajjijo chacochacoani ¡sosequiacue oya huiso tii!
¡Oya cuana oe jaahuanacue quea pame nee epoji! ¡A'a pajea'yojji miquea Emeshi Mese neiya eyajo aniya miya ba tiitii cani!

Pea cuana Pabohua niñeshe'a cani

²Epeejji cuana, ¡mimi majamajacue Eyacuiñajji nijje ojjaña pojjajo! ¡Huea'ama mimicue! ¡Oya oe bihuiacue onijje mimianijo! ³¡Eyacuiñajji nijje oe ojee mimicue ecuanajoya pea'ai! Jamajjeya ohuaya ecuana huohui meesahua tiitii caje'yo esohui pame nee Jesosa Quitoja, ma onajaya yahuajo ba jjima. Ma esohui eya huohuiajoya, dejja mimishi cuaa eya iña majje jeanobiajea ca'yonaje. ⁴Jamatii miquianaya ejo Eyacuiñajji nijje mimianijo, ohuaya eya Jesosa Quitoja esohui huohui meesahua caje'yo quea ja'a nee.

⁵Jesosa Quitoja epeejji pojjeama cuana nijje mimianijo ¡jjashahuuba neineiquicue quea ja'a nee! ¡Quea pame nee oe ona nijje po tiitiicue pea'ai! ⁶¡Quea bei, quea ja'a nee pea'ai mimicue Jesosa Quitoja epeejji pojjeama cuana nijje! ¡Jjashahuuba neineiquicue onijje mimi jjimahuajo! Jamajjeya onaya Jesosa Quito ba meesahuaje'yo.

Pabohua quea bihui nee esohui tehue canaje pea cuana huasijje

⁷Dejja Tiquico bajjani Jesosaja epeejji, e jayojjaya Jesosajo chacochacoani, ecuanajaya quea jea nee nee. Ohuaya eya chacosahua ca'yonaje Jesosa Quitojo quea pame nee pea'ai. Ohuaya miquianaya huohui cañaquije jiquiojo e ba'yanijo. ⁸Eyaya oya huoojeaje miquiana huasijje e huohuiya. Ojaya esohui ecuanajo shajja'ajja majje ¡quea bihui nee pocue! ⁹Tiquico nijje Onesimo poquije. Oya ecuana jayojjaya Jesosaja epeejji quea pame nee pea'ai. Yahuajo oya miquianajaya cuiñajjiyo ba'ya poa. Ojjaña jiquiojo onaa acani huohui caje miquiana huasijje, Onesimohua. ¹⁰Anitaco enijke ejeyo'yo nequi ejjajeanobiaquiji equijo. Ohuaya miquianaya huohui'ajja cani jama ba'a: —¿Achajja acuae quiana so'o? —ojaya ebajji.

Macosohua pea'ai huohui'ajja cani: —¿Achajja acuae quiana so'o, de, ecuanajaya ebajji?

Oya Macoso Benabeja jjo'yaseja bacua ejja. Miquiana que poquiyajo, ¡oya jaahuanacue quea pame nee! Jamaya eyaya miquianaya huohuinaje

yahuajo.¹¹ Jesosa Josoto yani pea'ai. Ohuaya huohui'ajja cani pea'aiya:
—¿Achajja acuae nequiana so'o, ecuanajaya ebajji?

Jiquiojo pea beca peejjima Jodio cuana Jesosaja epeejji yani. Ohuaya
eya chaco meesahua cani quea pame nee Eyacuiñajjija yajjijo, esejaya
Emeshi Mese neija yajjijo. Pea Jodio cuanaja enijje chaco jjima, de.
¹² Epapasi cuanaya yani enijje. Ohuaya pea'ai esohui quea bihui nee
huohui cani miquiana que. Yahuajo oya miquiana nijje ba'ya poa pea'ai.
Jesosa Quitoja yajjijo chaco cani ohuaya. Janobajjima nei mimi tiitiiani
Eyacuiñajji nijje miquianajo jama ba'a: —Eyacuiñajji, ¡miyaya ojjaña
Conosajo ba'e cuana Jesosa Quito nijje jjapeequi meesahuacue quea ja'a
nee! ¡Miquea esohuijo e'e jojo nei oya cuana jjabahuejjaqui meesahuacue!
¡Miquea esohui jama ba'e tiitii meesahuacue, Eyacuiñajji! —jamaya
Epapasi mimiani Eyacuiñajji nijje miquianajo.

¹³ E'e, Epapasi mimi tiitiiani Eyacuiñajji nijje miquiana jaahuanajji.
Quea huesha cuiñajji yasijje Jesosaja epeejji cuana Naonisea cuiñajjijo
ba'e yasijje, Jienaponi cuiñajjijo ba'e pea'ai yasijje Eyacuiñajji nijje
mimi tiitiiani, Epapasi. Jamaya eyaya oya baña.¹⁴ Ecuanajaya epeejji
quea pame nee Noca bajjani yani jiquiojo. Oya eshicuijjiquiajji, de. Dejja
Demasi bajjani yani pea'ai. Ohuaya esohui quea bihui nee huoojea cani
miquiana huasijje.

¹⁵ ¡Ecuanajaya esohui quea bihui nee huohuiquicue Jesosaja epeejji
nei cuana huasijje Naoniseajo ba'e yasijje! ¡Epona Nema bajjani oe
huohuicue! ¡Ojaya epeejji cuanaya pea'ai huohuicue, joya oja equi yasijje
jjachachaquiani Eyacuiñajjija esohui baa! ¹⁶ E'e, jiquio ecuea esohui
etehue'yo ba neinei majje ¡huohuiquicue Jesosaja epeejji cuana huasijje
Naoniseajo ba'e yasijje! Majoya ohuaya miquianaya quia caje o'oya
pea esohui etehue'yo, ma eyaya ebionei tehuenaje o que. ¡Ma esohui
shajja'ajjacue, ojjaña miquiaaya!¹⁷ Pea dejja Aquipo bajjani huohuicue
ecuea esohui jama ba'a: —Eyacuiñajjiya miya huoojea ca'yonaje ojo
chacohua. Jamajjeya ¡chacocue quea pame nee ojo! ¡Ojjaña joya ecua
ohuaya huohui cani jamaya oe acue!

¹⁸ Eyaya ca eya jiquio esohui quea bihui nee tehue'yonaje. Dejja
cuanaja eya pichojea'yo jjima; eya ejeyo'yo tii nequi. ¡A'a eya pajea'yojji!
¡Eyacuiñajjiya miquianaya cajaahuana tiitii cahua quea pame nee!

Mahuiso. Eya Pabo bajjani esohui tehuejji. Apoa.

PABOJA ETEHUE'YO TESANONICA CUIÑAJJIJO BA'E YASIJJE EBIONEI

1 TESALONICENSES

Pabohua esohui tehue canaje Jesosaja epeejji
cuana Tesanonica cuiñajjiyo ba'e yasijje

1 ¹Eya Pabo. Sinasi, Timoteo pea'ai enijke nequi. Jiquio esohui ecuaaya tehueaña miquiana huasijje, ma Jesosaja epeejji nei cuana Tesanonica cuiñajjiyo ba'e yasijje. Miquianaya Eyacuiñajji eseja Chii ai nijje jjapeequiani, Jesosa Quito esejaya Emeshi Mese nei nijje jjapeequiani pea'ai. ¡Eyacuiñajjiya, Jesosa Quitoqua pea'ai miquianaya quea pame nee cajaahuana cahua! ¡Quea bei capo mee cahua pea'ai!

Jesosaja epeejji cuana quea pame nee ba'yani

²Eyacuiñajji nijje mimianijo ecuaaya oya bihuiaña miquianajo. E'e, ecuana Eyacuiñajji nijje mimi huicha'a huicha'ani miquianajo jama ba'a:
³—Eyacuiñajji, ecuanaja Chii ai, Jesosaja epeejji Tesanonicoajo ba'eca minijke jjapeequiani cuana quea pame nee nee. Miya ojaya quea boti nee nee; minijke quea pame nee chaco cani tii. Oya cuana Jesosa Quito nijje, ecuanaja Emeshi Mese nei nijje jjapee tiitiiquiani quea pame nee. E'e, jjashahuabaquiani jama ba'a: “Jesosaa ecuana ba'e tiitii mee caje'yo onijke eyajo” —jamaya ecuana mimiani Eyacuiñajji nijje miquianajo.

⁴Epeejji cuana, miquianaya Eyacuiñajji quea jea nee nee. Ohuaya miquianaya babaca majje iyaa canaje ojaya epeejji epo tiitii'yojji. Jamaya ecuanajaya eba. ⁵E'e, ecuaaya Eyacuiñajjiya esohui quea pame nee Jesosaja huohuinaje miquianajaya eshajja'ajjajji. Edojjoshahua Pameya ecuanaya sohuihuohui meesahua canaje quea ja'a nee nee; miquianaya ba mee canaje Eyacuiñajjiya esohui e'e nei, dejjaja esohui pojjeama. Ecuana quea pame nee ba'enaje miquiana nijje. Jamajjeya

ecuanaya miquiaaya banaje quea pame nee ba'e. Jamajjeya miquianaya ba'enaje quea pame nee ecuana jayojjaya.⁶E'e, miquianaya ecuana jayojjaya ba'enaje quea pame nee nee; esejaya Emeshi Mese nei jayojja jama pe'a'i ba'enaje. Jamajjeya pea cuaa miquianaya cuia canaje Jesosa nijje jjapee neineiquianijojo. Jamatii miquianaaya quea bihui neeya Jesosaja esohui shajja'ajjanaje; Edojjoshahua Pameya miquianaya quea bihui nee po mee canaje.⁷E'e, miquianaya quea ja'a nee jjapeequinaje Jesosa nijje. Jamajjeya ojjaña Jesosaja epeejji cuana Masenonia meshijo ba'eca cuana, Acaya meshijo ba'eca pea'ai miquiana ba majje quea ja'a nee jjapeequi sa poani Jesosa nijje miquiana jayojjaya.⁸Miquianajaya esohui Emeshi Mese neijo, Jesosajo ojjaña Jesosaja epeejji cuaa shajja'ajja canaje. E'e, Masenonia meshijo ba'eca cuaa, Acaya meshijo ba'eca cuaa pea'ai shajja'ajja canaje. Ojjaña ba canaje miquianaya Jesosaja epeejji quea ja'a nee poani. Ojjaña cuaa quea huiso meshijo ba'eya pea'ai ba canaje miquianaya Eyacuiñajji esohui jayojja jama po tiitiiani quea pame nee. E'e, ojjaña cuaa ojjaña meshi cuanajo ba'eya miquianajo shajja'ajja canaje. Jamajjeya ecuaaya oya cuana huohui o'oya jjima aña.⁹Onaaya ca ca ecuana huohui cani miquianajo jama ba'a: —Jesosaja epeejji cuana Tesanonicajo ba'e Paboja esohui Jesosajo ebionei shajja'ajja jehaua jjashajja'ajjaquinaje quea bihui nee. Jesosaja epeejji cuana poanaje. Eyacuiñajji nisho, meshi epaño'yo cuana bihuia pajea ca'yonaje. Jjeya nei ca ca oya cuana Eyacuiñajji e'e nei nijje jjapeequiani. E'e, Eyacuiñajji ca ca oe nei yani tii tii, eshe.¹⁰Ohuaya Eyacuiñajji Bacua Ejja oe nei Jesosaja epoe o'oyajji ishoa'ajja cani —jamaya ojjaña miquianajo poani.

E'e, Eyacuiñajji Bacua Ejja Jesosa mano'yajo, Eyacuiñajji oya ba'e mee ca o'yanaje. Jjeya ohuaya, Jesosaa esejaya mimishi cuana cuijea ca poquipoqui'yani. Jamajjeya quijje Eyacuiñajji eseya sosequia caje'yo jiquio meshijo ba'ya poa sosejjeya; ohuaya eseya quea nee nee epo mee'yojji pojjeama shajjama' cuana nijje.

Pabo chacockoa poa Tesanonica meshijo

2 ¹Yahuajo ecuaaya Jesosaja esohui huohuinaje; miquianaya shajjama' pojjeama poa. Chojja, shajja'ajja neinei nequiaa poa. Miquianajaya jama eba pea'ai ba'a: ²Miquiana baa Tesanonica huasijje poqui jjimahua ecuana cuia canaje Jodio cuaa Pinipo cuiñajji jo ba'eca cuaa. Ecuana nijje mimijajinaje pea'ai. Pea cuaa ecuana cuia canaje Jesosaja esohui huohui mee ajjaa jjejojo; jamatii Eyacuiñajji eseya ojaya esohui quea pame nee Jesosa Quitojo huohui meesahua canaje miquiana huasijje mete'ama, miquianajaya eshajja'ajjajji.

³E'e, miquiana huasijje sohuihuoriañajo ecuanajaya ejjashahuabquijji quea ja'a nee poanaje. Ecuanajaya esohui siajje pojjeama. Miquiana dasia sa po'yo ajja pea'ai. ⁴Chojja. Eyacuiñajji eba ecuanaya siajjepoiji pojjeama. Jamajjeya ohuaya ecuana huoojea canaje Jesosaja esohui quea pame nee huohuiya. Eyacuiñajji ejjashahuabquijji jayojja jama huohuaña ecuaaya. Eyacuiñajji eba nei nei

ecuanajaya ejjashahuabaquijji ojaya ejjashahuabaquijji jayojja jama poani tii. Ecuaaya oya queabihui nee po mee sa aña ecuana nijje. E'e pojja'a pea cuana queabihui pojjeama ecuanajaja huohui'yojo. Jamatii ecuana jjashahuabaquianijama ba'a: —Ecuaaya esohui huohuaña pea cuanaja ejjashahuabaquijji jayojja jama pojjeama, pea cuana enijje queabihui epoji pojjeama —chojja, Eyacuiñajji queabihui nee po mee sa aña ecuana nijje.⁵ Miquianajaya ecuana eba. Esohui queabihui nisho mimi jjima miquiana nijje miquiana dasiajji, aquiana sosema'edojojji pea'ai. Chojja, Eyacuiñajji eba ecuanajaya ejjashahuabaquijji queapame nee.⁶ Jjashahuabaqui aija jama ba'a: —Ecuanajaya esohui queapame nee shajja'ajja majje ecuana cabihuia cahua cuaa; aquiana caquia cahua pea'ai —chojja, ecuana jjashahuabaqui aija pea cuanaja ebihuiajji.

⁷ Ecuana Jesosa Quitoja huoojea'yo ojaya esohui huohuijjji. Jamajjeya miquianajaya aquiana sosema' jjesherme esohui huohuinaje sosejje. Jamatii aquiana cuana ecuanajaya jjeshe jjima poanaje. Chojja, miquiana nijje queabei ba'enaje. Jiquio ecua enaeseya oja bacua cuana jaahuana cani, quea jea nee acani jayojjaya jama ecuaaya miquianaya anaje.⁸ Miquianaya ecuanajaya queaboti nee nee poanijo Eyacuiñajji esohui queapame nee nee Jesosaja huohuinaje miquiana huasijje. Pea cuaa ecuana cuia ca chana' Jesosaja esohui ehuohui poaje jjejojo. Jamatii miquianaya ecuanajaya quea jea nee nee poanijo esohui huohui tiitiinaje.⁹ E'e, miquianajaya eba miquiana nijje nequianijo ecuaaya janobajjima nei chaco tiitiinaje eba'ejji sosejje. Eyacuiñajji esohui queapame nee Jesosaja huohuaña chaco tiitiinaje epojjajo, mecajje pea'ai. Jamaya anaje ecuaaya. Jamajjeya miquianajaya ecuana eba'ejji quia jjima poanaje. Eyacuiñajji esohui huohuinaje sosema' miquianajaya eshajja'ajjajji.

¹⁰ Ecuana miquiana nijje ba'enaje queabei nee, mimishi'ama, queapame nee, dejja tai'ama. Jamaya miquianajaya eba. Jamaya Eyacuiñajji eba pea'ai. Jamajjeya ;yajjajo pea cuaa ecuana niñebe cani so'lo queadejja tai poanaje miame?¹¹ E'e, echii meseya oja bacua cuana cuiña cani queapame nee jayojjaya jama ecuaaya miquianaya anaje. Jamaya miquianajaya eba pea'ai.

¹² Ecuaaya miquianaya huohui majamajanaje jama ba'a: —Queabihui nee Jesosa Quito nijje jjapeequicue! ¡A'a quea yeno pojji onaa miya quea mimishi acajje! Eyacuiñajji oe nei quea ja'a nee nee, quea ca'a nee nee poani tii tii. Oya oe nei ojjaña huoojea'yojji poani. Ohuaya miquianaya babaca canaje onijje eba'tiiti'yojji eyajo. Jamajjeya ;ojaya esohui jayojjajama ba'e tiitiicue Eyacuiñajji miquiana nijje queabihui nee epojji!

¹³ Ecuaaya Eyacuiñajji bihuiaña miquianajo jama ba'a: —Eyacuiñajji, eyaya miya bihuiaña Jesosaja epeejji cuana Tesanonicojao ba'e queapame nee poani yasijje. E'e, miyaya miquea esohui huohui meesahuaña, onaaya shajja'ajja canaje. Queabihui nee poanaje. Quea ja'a jjashahuabaquinaje jama ba'a: "E'e jojonei Pabohua ojaya esohui pojjeama huohui cani; Eyacuiñajji esohui queapame ca ca huohui cani" poanaje cuana —jamaya ecuaaya Eyacuiñajji bihuia huicha'a huicha'laña miquianajo.

E'e epjeeji cuana, Jesosa nijje jjapeequianijo, Eyacuiñajjiya miquianaya ba'e meesahua cani quea pame nee ojaya esohui e'e nei jayojjaya.

¹⁴Yahuajo Jesosaja peeji cuana Jodio meshijo ba'e onijje, Jesosa Quito nijje jjapeequianijo, pea Jodio cuaa, oja huapa pojjeama cuaa oya cuana cuia ca poa quea huiso nee. Oya jayojjaya jjeya miquianaya Jesosa nijje jjapeequianijo, miquianajaya huapa pojjeama cuaa miquianaya cuia cani pealai. ¹⁵E'e, yahuajo nei nei Jodio cuaa Eyacuiñajjiya esohui huohuijji cuana cuiajea ca'ya poa. Majoya esejaya Emeshi Mese nei Jesosa quecuamee ca'ya poa pealai. Jjeya eseya cuia cani pealai, Jodio cuaa. Shajjamaa po tiitiya jjejojo Jodio cuaa Eyacuiñajji quea quene po tiiti mee capoquiani. Jodio cuaa aje oe ojaa dejja cuana quea tai acani. ¹⁶E'e, ecuaaya Jodio pojjeama cuana huasijje Eyacuiñajjiya esohui quea pame nee Jesosajo huohuaña. Jodio pojjeama cuana Jesosa nijje jjapeequi mee sa aña onijje eyajo eba'e tiiti mee'yoji quea pame nee. Jamatii Jodio cuaa aje oe ecuaaya Jesosaja esohui huohui pajea mee'yo sa acani tii. Jamaya oya cuana, Jodio cuana quea mimishi nee nee po tiitiiani. Jamajojoya aje jja oe Eyacuiñajji quea quene nee poani Jodio cuana nijje. Quea yeno nee nee po tiiti mee cani Jodio cuana.

Pabo poqui o'oya sa poanaje Tesanonica huasijje

¹⁷Epjeeji cuana, yahuajo ecuaaya miquiana nijje nequijo, Jodio cuana ecuaaya nijje quea quene nee nee poanaje. Jamajjeya miquiana nijje nequi tiiti jjima poanaje. Jamatii miquianaya ecuanajaya pajea'yo jjima. Chojja, miquianajo jjashahuabaquiani tii. Poqui o'oya sa neinei poanaje miquiana baa. Mi poqui mee ca o'oyajje ecuaaya quea yeno nee poanaje. ¹⁸E'e jojo nei ecuaaya poqui o'oya sa poanaje miquiana huasijje. E'e eya, Pabo poqui huicha'l huicha'l'ajjanaje. Jamatii Edosiquiana neiya eya poqui mee jjima acanaje. ¹⁹E'e jojo nei miquianaya Jesosaja epjeeji poanijo, ecuaaya quea bihui nee nee poani. Jamajjeya esejaya Emeshi Mese nei Jesosa Quito poe o'oyajo, miquiana onijje nequi'yajo, ecuaaya quea bihui nee poaje'yo. E'e, jiquio ecua se chacochacoajo sosequia cajje eseya quea bihui nee poani jayojja jama ecuaaya quea bihui nee nee poaje miquiana Jesosa nijje nequi ba majje. ²⁰E'e, miquianaya quea pame nee Jesosa nijje jjapeequianijo, ecuaaya Eyacuiñajji bihuiaña. Quea jaji nee poani pealai miquianajo.

Pabohua Timoteo huoojea canaje Tesanonicaajo ba'eca cuana ba'ajja'yohua

3 ¹Jamajjeya miquianajo quea yeno jjashahuaba tiiti qui majje eya jama poanaje ba'a: —E'e, eya ee nei Atena cuiñajjiyo nequije. Timoteo, ¡miya poquicue Jesosaja epjeeji cuana Tesanonicaajo ba'e baa! —eya poanaje.

²Majoya eyaya esejaya epjeeji nei Timoteo huoojeanaje miquiana baa. Timoteohua ecuaaya nijjeya Eyacuiñajjiya esohui quea pame nee Jesosaja huohui tiiti cani. Eyaya oya huohuinaje jama ba'a: —Timoteo, ¡Jesosaja epjeeji cuana quea ja'a nee, quea pame nee jjapeequi meesahuacue Jesosa nijje! ¡Oya cuana Jesosaja esohui jayojja jama atitii meesahuacue quea bihui nee! ³Jamajjeya onaaya oya cuana cuia canijo, Jesosa nijje

jjapeepajequi'yo ajja —jamaya eyaya Timoteo huohuinaje miquiana que huoojea jjimahuaa.

Jamatii miquianajaya eba pea cuaa Jesosaja epeejji cuana cuia caje'yo. Eyacuiñajjija eba eseya ojaya epeejji cuana quea ja'a poaje onaa cuia cajje. Jamajjeya cuia pajea mee jjima acani.⁴ E'e, yahuajo miquiana nijje nequiya ecuaaya huohuinaje jama ba'a: —Jesosaja epeejji poanijo pea cuaa eseya cuia caje.

E'e jojo nei. Jjeya pea cuaa miquianaya cuia cani. Jamaya miquianajaya eba.⁵ Jamajjeya eya quea mete miquianajo poanaje. Timoteo huoojeanaje miquiana baa: —¡A'a Jesosa nijje jjapeequiani tii ba'ajjaqui'yo socue, Timoteo! —eya poanaje.

E'e, eya quea mete miquianajo poanaje. E'e pojja'a Edosiquiana neiya miquianaya Jesosa nijje jjapeequi pajea mee ca'yonaje. Jamaya epo'yo jojjemo, miquianajaya Eyacuiñajjija esohui epajea'yo jojjemo ecuana quea yeno pome; esohui huohuijeajji pojja'a eyaya sohuihuohuijea nequinaje.

⁶E'e de, miquiana ba majje jjeya nei Timoteo poe o'oyanaje e que. Ohuaya huohui caña'yonaje jama ba'a: —Jesosaja epeejji cuana Tesanonicajo ba'e Jesosa nijje jjapeequiani tii; pajea'yo jjima. Eyacuiñajjija esohui jayojja jama po tiitiiani; pea cuana quea jea nee acani. Eya pea'ai ohuaya quea jea nee acajjequinaje. Oya cuana ecuanajo jjashahuuba tiitiiquiani quea pame nee. Jiquio ecua ecuanaya jjashahuubaquinaje o baquijji jamaya oya cuana jjashahuubaquiniani ecuana bahuajji —jamaya eya Timoteohua huohui caña'yonaje miquianajo.

⁷Jamajjeya ma shajjal'ajja majje ecuana queabihui nee poanaje. E'e de, ecuana aema' poani Jesosa nijje jjapeequianijo. Pea cuaa ecuana cuia cani pea'ai. Matatii miquianaya ecuana queabihui nee po meeaña. E'e, miquianaya Jesosa Quitoja esohui jayojja jama poanijo tii miquianaaya ecuana queabihui nee nee po meeaña.⁸ E'e de, miquianaaya esejaya Emeshi Mese neija esohui jayojja jama atiitiiañajo, ecuana queabihui nee, quea bei nee pea'ai poani.⁹ E'e jojo nei jjeya miquianajo ecuaaya Eyacuiñajji bihuia neineiaña. Eyacuiñajjiya ecuana queabihui nee po mee cani miquianaya quea pame nee onijje jjapeequianijo.

¹⁰Jamajjeya ecuana onijje mimi tiitiiani jama ba'a: —Eyacuiñajji, ¡ecuana poqui meesahua o'oyacue ecuanaja epeejji cuana baa! ¡Ojjaña miquea esohui huohui meesahua o'oyacue onajaya eshajja'ajjajji, quea pame nee minijje ejjapeequi'yojji! —jamaya ecuana Eyacuiñajji nijje mimiani ojjaña pojajo, ojjaña mecajje pea'ai.

¹¹Ecuana onijje mimi neineiani jama pea'ai ba'a: —Eyacuiñajji, ecuanaja Chii ai, Emeshi Mese nei Jesosa pea'ai, ¡che ecuana poqui meesahuaue Tesanonica huasijje miquea epeejji cuana baa!¹² E'e Emeshi Mese nei, ¡miquea epeejji cuaa Tesanonicajo ba'e cuaa pea miquea epeejji cuana quea jea nee nee ameesahuaue! ¡Ojjaña cuana pea'ai quea jea nee ameesahuaue! ¡Ecuaa oya cuana quea jea nee nee aña jayojjaya jama oya cuana pea cuana quea jea nee ameeshahuacue pea'ai!

13 E'e Eyacuiñajji, ecuanaja Chii ai, joya cuana Jesosaja epeeiji cuana quea ja'a nee po meesahuacue quea boejea, mimishi'ama eba'e'yoji! Jamajjeya ecuanaja Emeshi Mese nei Jesosaa ojjaña ojaya esohuidojiji cuana nijje poe o'oya majje oya cuana mi cojja nei nequi mee caje'yo quea boejea, bicho'ama. E'e, ijamaya acue Eyacuiñajji! —jamajjeya eya Eyacuiñajji nijje mimi tiitiiiani miquiana huasijje.

¡Quea pame nee ba'ecue Eyacuiñajji minijje queabihui epoji!

4 ¹Jamajjeya epeeiji cuana, eyaya pea esohui tehueje miquianajaya ebajji.

Yahuajo ecuaaya miquianaya huohuinaje quea pame nee eba'ejji. Ma ecuanajaya esohui jayojja jama ba'yanijo, Eyacuiñajji queabihui nee poani miquiana nijje. Jamaya miquianaya ba'enaje. Jjeya esejaya Emeshi Mese neiya, Jesosaa Quitohua ecuana ma esohui tehue mee ca o'oyani miquiana huasijje quea pame tii eba'e poquijji. ²Yahuajo esejaya Emeshi Mese neiya, Jesosaa ecuana huoojea canaje miquiana sohuihuohuiya. Ma esohui miquianajaya eba. ³Eyacuiñajjiija ejjashahuabaquijji miquianajaya eba'e'yoji jama ba'a: —¡Quea pame nee ba'ecue, mimishi'ama nei nei! ¡A'a onajaya ehuanase sijji! ¡A'a peaja yahue sijji! ¡A'a pea cojjojji pojji! ⁴Dejja cuana, ¡miquianaya eponajo jjahuanaqui sa poanijo quea ja'a nee jjashahuabaquicue! ¡Eyacuiñajjiija esohui jayojja jama epona huanacue quea pame nee! ⁵¡A'a quea mimishi jjashahuabaquijji Eyacuiñajjiija epeeiji pojjeama cuana jayojja! Oya cuana aje oe pea epona cuana nijje jaani; ojaya ehuanase jaahuana jjima acani. ⁶Onajaya ehuanase sii canijo, e'e jojo nei Eyacuiñajjiya dejja cuana quea nee nee po mee caje'yo. Jamajjeya miquianaaya ca ca ja'a onajaya ehuanase sijji! ¡A'a jea bajji pea'ai! —jamaya Eyacuiñajji jjashahuabaquiani ojaya epeeiji cuanajo. Jamaya yahuajo ecuaaya miquianaya huohuinaje.

⁷E'e, Eyacuiñajjiya eseaya iyaa majje huohui canaje jama ba'a: —¡Ecuea epeeiji cuana po majje ecuea esohui jayojja jama ba'ecue quea pame nee nei! ¡A'a oe quea mimishi pojji! ¡A'a oe quea mimishi ba'ejji!

⁸Jiquio esohui cuana Eyacuiñajjiija esohui, de; dejjaja esohui pojjeama. Jamajjeya ojjaña joya jiquio esohui cuana jayojja jama ba'e sa po'yajja Ajja Eyacuiñajji nijje jjapeequi sa po'yajja; Eyacuiñajji cajaa a'yoji poani. Eyacuiñajjiya ca ca oe ese yasijje ojaya Edojjoshahua Pame huoojea ca'yonaje quea pame nee eba'e meesahua'yoji.

⁹Miquianaaya Jesosaja pea epeeiji cuana quea jea nee añajo, eyaya miquianaya que esohui etehue o'oyajji pojjeama ca comajo. E'e, Eyacuiñajjiya miquianaya jjabahuejja meequi canaje ojjaña ojaya epeeiji cuana quea jea nee e'ajji. ¹⁰E'e jojo nei miquianaaya jamaya aña; Jesosaja epeeiji cuana ojjaña Masenonia meshijo ba'e cuana quea jea nee aña. E'e, Eyacuiñajjiija esohui jayojja jama aña miquianaaya. Epeeiji cuana, ¡Jesosaja epeeiji oe quea jea nee nee atiitiicue! Jamaya ecuaaya miquianaya huohui neineiaña.

¹¹Yahuajo ecuaaya miquianaya sohuihuohuinaje jama ba'a: —¡Quea bei ba'e tiitiicue! ¡A'a jjachichaquijji pea cuana miminaanaa ani yasijje!

¡Miquea bobijo, daquijo, eba'ejijo pe'a'i chacocue! ¡Quea ja'a nee jjashahuaba tiitiquicue! ¹²Jamajjeya miquianaya aquianajji poaje; miquianaya bobi yasijje epo'yojji pojjeama bobijji po'yo majje. Pea huasijje bobijo cua ajja poaje. Jamajjeya miquianaya quea pame ba'yani ba majje Jesosaja epeejji pojjeama cuaa miquianaya shajja'ajja caje Jesosaja esohui miquianaaya huohuiañajo. Jamajjeya miquianaya quea pame ba'eje.

**Emeshi Mese nei Jesosa poe o'oyajo ojaya
epeejji emano'yo cuana shequije o'oya**

¹³Epeejji cuana, eyaya jiquio pea esohui tehueaña miquiana ba meeiji e'e jojo nei Jesosaja epeejji cuanajo, ma yahuajo mano ca'ya poajo. Jamajjeya miquianaya yeno'ama poaje emano'yo cuanajo. Pea cuana ca ca, Jesosaja epeejji pojjeama cuana quea yeno nee nee poani emano'yo cuana shequi'yo jjima poanijo poso. ¹⁴Esejaya eba e'e jojo nei Jesosa mano'yajo Eyacuiñajjiya oya shequi mee ca o'oya poa. Oya jayojjaya Jesosaja epeejji cuana mano'yajo, Eyacuiñajjiya oya cuana shequi mee caje o'oya. Jamajjeya Jesosa poe o'oyajo Eyacuiñajjiya onijje huoojea caje ojaya epeejji ma yahuajo mano'ya poa cuana. Jamaya e'e jojo nei; jamaya jjashahuabaquime eseya poani.

¹⁵E'e, Emeshi Mese neiya Jesosaa ecuana huohui ca poa jamaya eyaya miquianaya huohuiaña jama ba'a: Poe o'oya majje Emeshi Mese neiya, Jesosaa ojaya epeejji eshe nequi cuana, ojaya epeejji yahuajo emano'yo cuana nijje ojee jjequisohua caje'yo onijje eyahuasijje. ¹⁶E'e, Emeshi Mese nei Jesosa eyajo ani meshi yasijje poe jehuajo janobajjima nei taaa; esohuidojiji jaahuanajjiya quea ca'a nee neeya emiajji mia cani jayojja taaaame poaje, janobajjima nei nei. Eyacuiñajjiya emiajji mia caje cuaa pea'ai. Majoya Emeshi Mese nei eyajo ani jjapashineijje nequioqueje bo biajje nequi. Jamajjeya ojaya epeejji cuanaja, ma yahuajo mano'ya poaja eyami eshe po mee caje o'oya, eyacua. ¹⁷Majoya poe o'oya majje, emano'yo cuanaja eyami eshe o'oya po mee majje Jesosa Quitohua ojaya epeejji eshe nequi cuana bo biajje jjequisohua caje'yo emano'yo cuana nijje, ojee. Bo biajje nequije Jesosa nijje. Majoya ojjaña ojaya epeejji cuana onijje ba'e tiitiije'yo Emeshi Mese nei nijje, Jesosa nijje. ¹⁸Jamajjeya jjiquio esohui quea bihui nee nee pocue! ¡Jesosaja pea epeejji cuana quea bihui nee po meesahuacue! ¡Jiquio esohui cuana huohui huicha'la huicha'acue! Jama ba'a: —Jesosaa ojjaña ojaya epeejji cuanaja eyami eyacua po mee majje jjequisohua caje'yo eyahuasijje onijje eba'e tiiti'yojji, ojaya epeejji yahuajo mano'ya poa cuana nijje pea'ai.

¡Jesosaja epoe o'oyajjijo jjashahuaba tiitiquicue!

5 ¹Epeejji cuana, jshajja'ajjacue mo oe! Jesosaja epoe o'oyajji miquianajaya eba. Jamajjeya eyaya miquiana huasijje etehuejji pojjeama ache pojjajo oya poeje o'oya ebajo ese. ²Chojja, ¿ache pojjajo

shai poeje o'oya Jesosa? Emeshi Mese neija epoe o'oyajji esejaya ba jjima epojja. Jiquio ecua siipojji quehuajje poecuajiani jayojja jama Jesosa quehua poecuajije o'oya. ³O poe jjimahuajo pishana mimishi cuana jama poaje ba'a: "Ojjaña quea bei poani. Ecuana quea pame nee ba'e tiitiji'e'yo" onaa jama po'ajjaquijo tiiya Jesosa Quito poeje o'oya. Mimishi cuana quea nee nee po mee caje'yo. E'e, Jesosa poe o'oyajo chama' ejja'aniquehuaquijji poaje. Jiquio ecua epona cuana bacua nee cuajiani jama poecuajime poaje Jesosa.

⁴Ecuea epeejji cuana, miquianaya Jesosa nijje jjapeequiani. Jamajjeya ¡quea ja'a nee jjashahuabaquicue! ¡Jesosaja epoe o'oyajji ishoa'ajja anicue! Jamajjeya ijiquio ecua siipojji chamajo poso equi jaahuana ajja jayojja jama a'a pojji! ¡Jesosaja epoe o'oyajji ishoa anicue! ⁵Ojjaña miquianaya onijje jjapeequiani; quea ja'a nee nee ba'yani, epojjajo quea ja'a poquiani jayojja jama poani. E'e, eseya eshahua nijje poquiquehua ajja. ¡Joya ecua eshahua quea mimishi poani jama a'a pojji! ⁶Pea cuanaa ca ca Jesosaja epoe o'oyajji ishoa ajja. Jamaya pojjeama eseya. Chojja. ¡Jesosaja epoe o'oyajji ejja'ishoa'ajjaqui! ¡Quea ja'a nee ejjashahuabaqui peal'ai!

⁷Shajjama' cuana quea jjashahuabaqui quehua poani Jesosaja epoe o'oyajji ishoa ajja. Quea jjashahuabaqui quehua poanijo shajjama' cuana quea mimishi ba'yani. E'e, jiquio ecua mecajje huoo majje shajjama' cuana jjashahuabaqui ajja jayojja jama onaya Jesosaja epoe o'oyajji jo jjashahuabaqui ajja. ⁸Eseya ca ca, Jesosaja epeejji cuana quea ja'a nee ba'yani Eyacuiñajjiya esohui jama. Quea ja'a nee jjashahuabaquiani. Jamajjeya Jesosaja epoe'yojji ishoa'ajjaña. E'e, jiquio ecua sohuinanohua baa daqui quea moo ese'ojje huoshu cani onaja quecua jjima yajji jayojja jama eseya Jesosa nijje jjapeequiani. ¡Pea cuana quea jea nee nee ejja'aqui pea'ai! Jamajjeya Eyacuiñajjiya eseya Edosiquiana nei jeabichajea meesahua caje. Jiquio ecua sohuinanohua ejahuojja ca'a, baajee sapajo iya cani onaja sapa jaja jjima yajji jayojja eseya Jesosa nijje jjapeequiani; esejaya eba Eyacuiñajjiya eseya mimishi cuana cuijea'yo majje ba'e tiitii mee caje'yo onijje eyajo. ⁹¿A'a Eyacuiñajjiya eseya babaca canaje cuaquí yasijje quea nee nee epo'yojji? Chojja. Esejaya Emeshi Mese nei nijje, Jesosa Quito nijje jjapeequianijo, mimishi cuana cuijea majje Eyacuiñajjiya eseya ba'e tiitii mee caje'yo onijje. ¹⁰E'e, Jesosa Quito eseja mimishijo mano'ya poa. Jamajjeya eseya onijje ba'e tiitii mee caje'yo eyajo. E'e pojja'a o poe o'oya jjimahuajo eseya manoje'yo. E'e pojja'a oya poeje o'oya ese eshe nequijo. Jamatii ojjaña eseya onijje ojee ba'e tiitiji'e'yo eyajo.

¹¹Jamajjeya ijiquio esohuijo quea bihui nee nee pocue! ¡Jiquio esohui huohui huicha'a huicha'acue Jesosaja epeejji cuana quea bihui nee epoji! ¡Oya cuana Jesosa Quito nijje quea jaji nee jjapeequi meesahuacue peal'ai! Jamaya miquiaaya aña; ¡jamaya oe atiitiicue!

Pabohua eba'eiji quea pamejo tehue canaje

¹²Epeejji cuana, jjeya eyaya pea esohui tehueña miquianaja ebajji jama ba'a: ¡Jesosaja epeejji etii cuana miquiana nijje nequi shajja'ajjacue oe! Ohuaya miquianaya jaahuana cani, Eyacuiñajji esohui huohui cani pea'ai. ¹³Oya cuana Eyacuiñajji quea pame nee chacochacoanijo ¡quea boti nee acue! ¡Quea pame nee jjashahuabaquicue onajo pea'ai! ¡Ojjaña Jesosaja epeejji cuana nijje quea bei pocue!

¹⁴E'e epeejji cuana, jama acue pea'ai ba'a: Jesosaja epeejji quea huea poanijo, ijanobajjima nei onije mimicue! ¡Epeejji quea mete cuana quea bei po meesahuacue! Epeejji eshahua nijje poquiquehua sa poanijo, ¡quea ja'a ba'e meesahuacue! ¡Tecue'ama po tiitiicue ojjaña cuana nijje! ¹⁵Onaa miya napa cajje ja'a jjasoseaquijji! ¡A'a onaya napa pea'aijjii! ¡Ojjaña pojjajo jjashahuuba neineiquicue ojjaña Jesosaja epeejji cuana nijje, pea cuana nijje pea'ai quea pame nee epojji! ¹⁶Jesosaja epeejji poanijo ¡queabihui nee po tiitiicue! ¹⁷¡Eyacuiñajji nijje mimi huicha'la huicha'acue ojjaña pojjajo! ¹⁸Miquianaya quea pame ba'yanijo, quea camaja miquianajo poanijo pea'ai ijamatii Eyacuiñajji bihuiacue oe! Jamaya Eyacuiñajji ejjashahuabaqu'yojji miquianajo, Jesosa Quito nijje jjapeequianijo.

¹⁹Edojjoshahua Pame minijje mimianijo, ja'a shajjama' pojji!
²⁰Eyacuiñajji esohui huohuijjiya esohui huohui canijo, ¡shajja'ajja neineicue oe! ²¹¡Jamatii ojjaña esohui shajja'ajja neinei majje quea ja'a jjashahuabaquicue! ¡Esohui e'e nei jama acue! ²²¡Ojjaña mimishi cuana pajea neinei'youcue! E'e, ¡quea pame nee nee ba'e tiitiicue!

²³Jamajjeya eya Eyacuiñajji nijje miquiana huasijke mimiani jama ba'a: —Eyacuiñajji, miyaya ojjaña quea bei po tiitii meeña. ¡Miquea epeejji cuana minijje jjapee neineiqui meesahuacue quea boejea nee epo'yojji! ¡Oya cuana ba'e meesahuacue quea pame nee nee, mimishi'ama: ojaya ejjashahuabaquijji, ojaya eyami pea'ai, ojaya edojjoshahua pea'ai! Jamajjeya ecuanaja Emeshi Mese nei Jesosa Quito poe o'yojyo oya cuana bicho'ama, mimishi'ama poaje'yo —jamaya eya mimiani Eyacuiñajji nijje miquiana huasijke.

²⁴Eyacuiñajji ojaya esohui miquiana nijje epajea'yojji pojjeama tii tii. Ohuaya miquianaya iyaa canaje onije ejjapee tiitiiqui poquijji. Jamajjeya ohuaya miquianaya jjapeequi tiitii mee caje'yo quea pame nee nee.

²⁵Ecuea epeejji cuana, ¡Eyacuiñajji nijje mimicue ecuanajo, ejo pea'ai!
²⁶Ojjaña Jesosaja epeejji cuana nijje quea bihui nee mimicue jama ba'a: —Pabo miquianajo jjashahuuba tiitiiquian; quea jea nee nee pa mi Paboja.

²⁷Eyaya Emeshi Mese nei Jesosaja esohui huohuijji poaniya miquianaya huohuijña jama ba'a: ¡Jiquio ecuea esohui etehue'yo ojjaña Jesosaja epeejji cuana huasijke huohuicue, ojjaña tii! Jamaya.

²⁸¡Esejaya Emeshi Mese neiya Jesosa Quitohua miquianaya quea pame nee cajaahuana cahua!

Mahuiso. Eyaya Pabohua jiquio esohui tehue'yonaje. Apoa.

PABOJA ETEHUE'YO TESANONICA CUIÑAJJI YASIJJE BECANEJJIIJI PEA'AI

2 TESALONICENSES

Pabohua esohui tehue ca o'oyanaje Jesosaja
epeejji cuana Tesanonicaajo ba'e yasijje

1 ¹Eya Pabo. Sinasi, Timoteo pea'ai enijje nequi. Ecuaaya jiquio esohui tehue o'oyaña miquiana huasijke, ma Jesosaja epeejji cuana Tesanonica cuiñajjiyo ba'e yasijje. Miquianaya Eyacuiñajji esejaya Chii ai nijje jjapeequiani; Jesosa Quito esejaya Emeshi Mese nei nijje jjapeequiani pea'ai.
²¡Esejaya Chii ai Eyacuiñajjiya, esejaya Emeshi Mese nei Jesosa Quitohua pea'ai miquianaya cajaahuana cahua quea pame nee! ¡Quea bei capo mee cahua pea'ai! Jesosa Quito poe o'oya majje oijaña huoojea'yojji poaje'yo.

³Epeejji cuana, ecuanaaya Eyacuiñajji nijje mimianijo oya bihuiaña miquianajo jama ba'a: —Eyacuiñajji, Jesosaja epeejji cuana Tesanonicaajo ba'eca minijje jjapeequi poquipoquiani cuana quea pame nee nee. Ohuaya Jesosaja pea epeejji cuana quea jea nee nee acani; yahuajo ca ca pea cuana quea jea pishana aca poa —jamaya ecuana Eyacuiñajji nijje mimi huicha'a huicha'ani miquianajo. Jamaya quea pame nee miquianaya Eyacuiñajjiya esohui jayojjaya jama po tiitiianijo.

⁴Jamajjeya Eyacuiñajjiya epeejji cuana pea meshijo ba'e cuana nijje ecuana mimiani quea bihui nee miquianajo jama ba'a: —Jesosaja epeejji cuana Tesanonicaajo ba'eca onijje jjapee tiitiiquiani quea pame nee. Eyacuiñajjiya esohui jayojja jama poani. Oya cuana janobajjima nei napa cani cuaa Jesosa nijje jjapeequianijojo. Jamatii Jesosa nijje jjapeequi pajea'yo ajja.

⁵E'e, jjeya pea cuaa miquianaya napa cani Jesosa nijje jjapeequianijojo. Miquianaya omijje jjapeequi pajea ajjajojo Eyacuiñajjiya miquianaya Jesosaja

epeejji quea ca'a po mee cani. Jesosa que, ma ese huoojea'yojji poani yasijje eseya ba'e tiitii mee caje'yo onijje. Jamajjeya ojjaña cuaa ba caje Eyacuiñajjiya ejashahuabaquijji miquianajo quea pame nee. ⁶Eyacuiñajjiya quea pame nee nee atiitii cani. Jamajjeya mimishi cuaa miquiana napa canijo, quijje Eyacuiñajjiya oya cuana sosequia caje'yo; quea nee nee po mee caje'yo tii tii. ⁷Eyacuiñajjiya mimishi cuana eseya, Jesosaja epeejji cuana napa pajea mee caje'yo. Jamaya Eyacuiñajjiya eseya acaje'yo Emeshi Mese nei Jesosa poe o'oyajo. E'e, Jesosa eyajo ani quea jeajahua nee nee cuaqui jama oya jjapashineijje nequioqueje. Eyacuiñajjiya esohuidojiji quea ca'a cuana omijje nequioqueje. ⁸Nequioque majje ohuaya, Jesosaa ojjaña ojaya epeejji pojjeama cuana quea nee nee po mee caje'yo Eyacuiñajjiya esohui shajjalajja sa po'yo ajja poajojo, esohui quea pame nee nee Emeshi Mese nei Jesosaja jayojja jama a sa po ajja poa jojoya. ⁹Jamajjeya oya cuana quea yeno poaje'yo tii tii. Eyacuiñajjiya oya cuana huoojea caje'yo cuaqui yasijje quea nee nee epo tiitii nequi'yojji. Esejaya Emeshi Mese nei quea pame nee nee, quea ca'a nee nee nijje eyajo eba'e'yojji pojjeama oya cuana. ¹⁰Ojjaña ojaya epeejji cuana ca ca, ma ohua mimishi cuijea ca'yajje quea pame nee po mee ca'yonaje ca ca Jesosaa ba'e mee caje'yo quea pame nee nee poe o'oya majje. Eseyaya Jesosa bihuia neineije'yo ba majje. Epeejji cuana, miquianaaya ecuanaja esohui Jesosajo quea bihui nee shajjalajjanaje. Jamajjeya miquianaaya ojaya pea epeejji cuana nijjeya Jesosa bihuia neineije'yo.

¹¹Jamajjeya ecuana Eyacuiñajji nijje mimi huicha'a huicha'ani miquiana huasijje jama ba'a: —Eyacuiñajji, miyaya miquea epeejji cuana uyaanaje quea pame nee minijje ejjaapeequil'yojji. Jamajjeya ¡oya cuana quea pame nee ba'e meesahuacue mi jayojjaya! E'e Eyacuiñajji, miquea epeejji cuana quea pame nee po sa poani. Miya quea ca'a nee nee poani tii. Jamajjeya ¡oya cuana quea pame nee po meesahuacue! ¡Miquea esohui jayojja jama ameesahua tiitiicue quea pame nee, Jesosa nijje jjapeequianijo! —jamaya eya mimiani Eyacuiñajji nijje.

¹²Jamajjeya Eyacuiñajjiya miquianaya ba'e meesahua canijo, miquiaaya Jesosa bihuaje jama ba'a: —Emeshi Mese nei Jesosa, ¡miya quea pame nee nee poani tii tii!

Jesosaa miquianaya pea'ai bihuia caje jama ba'a: —Miquianaya ecuea epeejji quea pame nee.

E'e, jamaya poaje Eyacuiñajjiya, esejaya Emeshi Mese nei Jesosa Quitohua pea'ai miquianaya jaahuana cani quea pame nee neejo.

Jesosa poe jjimahuajo Edosiquiana neija epeejji quea mimishi nee nee poeje'yo

2 ¹Ecuea epeejji cuana, e'e jojo nei esejaya Emeshi Mese nei poeje o'oya. Eseyaa, ojjaña ojaya epeejji cuana ojee jjequisohua caje'yo onijje epo'yojji tii tii. ²Jamajjeya ¡quea jjashahuabaqui ja'a nee pocue! ¡A'a quea mete pojji Jesosa Quito poe o'oyanajejo poso! Onaya siajje poani jama ba'a: —Emeshi Mese nei Jesosa poe o'oyanaje yahuajo. Jamaya Pabo poanaje —jama siajje pomeya poani cuana.

¡A'a quea mete pojji pea cuanaja esohui e'e nei pojjeamajo! Chojja, Jesosa poe o'oya jjima. E'e pojja'a pea cuana siajje poanaje jama ba'a: —Eyacuiñajjiya ecuana ma ohua quijje acaje'yo huohui meesahua cani. Ohuaya ecuana ba mee canaje Jesosa Quito poe o'yananje —jamaya poani beca cuana.

Onaya siajje poani jama ba'a: —Pabohua, ojaya epjeeji cuaa pea'ai tehue canaje Jesosa poe o'yananje yahuajo pishana —jamaya poani cuana.

Chojja, oya poe o'oya jjima. ³ ¡Ma siajjepojji cuana a'a shajja'ajjajji! Onaaya miquianaya jjashahuubaqui quehua mee ca chana! Jamajjeya eyaya miquianaya huohuije Jesosa Quitoja epoe o'oyajji: Ebionei, Jesosa Quito poe jjimahuajo, quea huiso cuana onijje jjapeequi pajea caje'yo, Eyacuiñajjiya esohui shajja'ajja sa po'yo ajja poaje pea'ai. Majoya Edosiquiana neija epjeeji quea mimishi nee nee poeje. Oya Eyacuiñajjiya quea nee nee po mee caje'yo cuaquijo. ⁴ Ma dejja quea mimishiya jama acaje ba'a: Ohuaya Eyacuiñajji e'e nei, ojjaña eyacuiñajji nisho cuana pea'ai jeabichajea mee sa acaje. Ojjaña cuana jjashahuubaqui quehua mee sa acaje jama ba'a: —Oya oe nee quea pame nee nee poani. ¡Ojjaña oya cabihuia cahua! —poaje cuana.

Oya Jenosanena huasijke poqui majje Eyacuiñajjiya equi quea quemo huasijke dobiquije. Anioque majje siajje poaje jama ba'a: —Eya ca iña Eyacuiñajji e'e jojo nei —jama siajje pomeya poaje.

⁵ Epjeeji cuana, yahuajo eyaya miquiana nijje nequija jamaya huohuinaje. ¡A'a ecuea esohui pajea'yonaje? ⁶ ¿Apiojji ma dejja quea mimishi nee nee poe jjima? Miquianajaya eba. Eyacuiñajjiya poe mee jjima jjejojo mi poeyani. Jamajjeya quijje ojaya epoeji apoa poajo ma dejja, Edosiquiana neija epjeeji quea mimishi nee nee poani poeje. ⁷ Jjeya Edosiquia huoojeajji poaniya dejja cuana quea mimishi quehuajje po mee cani. Jamatii jjeya Eyacuiñajjiya Edosiquiana neija epjeeji quea mimishi nee nee poe mee jjima acani. Quijje ca ca oya poeje ojjaña Jesosa nijje jjapeequi mee pajea'yohua nisho. ⁸ Majoya ojjaña oya ba caje ecojaa. Jamatii esejaya Emeshi Mese neiya, Jesosaa oya tecueajea caje'yo, mano mee caje'yo. Ma ohua acaninaje chama'yo tii po mee caje'yo. Jamaya Jesosaa quea ca'a nee nee, quea jeajahua nee nee poe'yo majje acaje'yo, ojjaña huoojea'yojjiya. ⁹ Edosiquiana huoojeajji poaniya, Satanasa bajjaniya ma dejja quea mimishi huoojea caje. Jamajjeya ohuaya oya ma pea dejja ajjima acani ameesahua caje ojjaña dasiajji nisho. Ba majje ojjaña quea ajjajja nee nee poaje, quea mete nee nee poaje cuana. ¹⁰ Ma dejja quea mimishi nee neeya quea huiso cuana dasia caje'yo. Jesosaja epjeeji pojjeama cuana dasia neinei caje'yo, ojjaña joya cuaqui yasijje poquije'yo. Onaya aje oe Jesosaja esohui e'e nei shajja'ajja sa po ajjajojo Jesosaa ojaya mimishi ecuijea'yoji pojjeama. Jamajjeya cuaqui yasijje poquije'yo. ¹¹ Shajjama' poani jojoya Eyacuiñajjiya oya cuana jjashahuubaqui meesahua ajja. Jamajjeya onaaya Edosiquiana neija epjeejiya siajje acani e'e jojo nei poso acaje cuaa. ¹² Jamajjeya oya cuana, ojjaña joya Jesosaja esohui shajja'ajja sa po'yo ajja, ojjaña joya mimishi quea boti nee nee aiji poani Eyacuiñajjiya huoojea caje'yo cuaqui yasijje.

Eyacuiñajjiya ojaya epeejji cuana ba'e tiitii mee caje'yo

¹³ Jesosaja epeejji cuana, ecuana Eyacuiñajji nijje mimi majamajani miquianajo jama ba'a: —Eyacuiñajji, ecuaaya miya bihuiaña. Miyaya miquea epeejji cuana Tesanonicajo ba'e Jesosa nijje jjapeequi meesahua'yonaje quea pame nee —jamaya ecuana mimiani Eyacuiñajji nijje miquianajo.

E'e epeejji cuana, miquianaya esejaya Emeshi Mese neija quea boti nee nee. Yahuajo nei nei, meshi pana jjimahuajo Eyacuiñajjiya miquianaya babaca ca'yá poa Jesosaja epeejji epoji, onije eba'e tiitii'yojjii. Ohuaya Edojjoshahua Pame huoojea ca'yonaje miquiana Jesosa nijje jjapeequi meesahua'yojjii. Jamaya miquianaya Eyacuiñajjiya acani ojaya esohui jayojja jama añajo. ¹⁴ Eyacuiñajjiya ecuana huoojea canaje miquiana huasijje ojaya esohui huohuiya. Jjashajja'ajjaquiajo Eyacuiñajjiya miquianaya Jesosa nijje jjapeequi meesahua ca'yonaje. Jamajjeya miquianaya esejaya Emeshi Mese nei nijje, Jesosa Quito nijje quea ja'a nee ba'e tiitii mee caje'yo eyajo pealai.

¹⁵ Jamajjeya epeejji cuana, ¡esohui e'e nei pojjeama a'a shajja'ajjajji!
¡Ecuanaja ehuohui'yo, esohui etehue'yo cuana pea'ai a'a pajea'yojjii!

¹⁶ Jamajjeya ecuana Eyacuiñajji nijje, Jesosa Quito nijje pea'ai mimi neineiani jama ba'a: —Jesosa Quito, miya ecuanaja Emeshi Mese nei. Eyacuiñajji, miya ecuanaja Chii ai eyajo ani. Miya quea pame nee nee. Miyaya ecuana quea jea nee aña. Jamajjeya Edojjoshahua Pame huoojeanaje ecuana quea bihui nee po tiitii meeja. Miyaya ecuana ba'e tiitii meeje'yo eyajo pea'ai. ¹⁷ Jamajjeya ¡miquea epeejji cuana Tesanonicajo ba'e quea bihui nee, mete'ama po meecue! ¡Oya cuana ba'e meesahuacue tii quea pame nee! ¡Miquea esohui quea pame nee jayojja jama atiitii meesahuacue pea'ai! —jamaya ecuana mimiani Eyacuiñajji nijje miquianajo.

¡Eyacuiñajji nijje mimicue ecuanajo!

3 ¹ Epeejji cuana, jjeyhua nei ecuaaya pea esohui tehueje miquianajaya ebajji. ¡Eyacuiñajji nijje mimicue ecuanajo! Jama acue ba'a: —Eyacuiñajji, ecuanaja Chii, ¡miyaya Pabo, ojaya epeejji cuana pea'ai jaahuanacue! ¡Jesosaja esohui huohuicuaji meesahuacue ojjaña cuana huasijje! Esohui shajja'ajja cajo ¡quea huiso minijje jjapeequi meesahua'yoocue! Jamajjeya ¡ecuana jayojjaya pea cuana jjeyhua nei Jesosaja epeejji po meesahuacue! ¡Oya esohuijo jjashajja'ajja meesahua'yoocue pea'ai! ² E'e Eyacuiñajji, ¡Pabo, ojaya epeejji cuana pea'ai jaahuanacue dejja mase cuanajo, mimishi cuanajo pea'ai! ¡A'a Pabo napa meeji cuana esohui huohui canijo! —jamaya mimicue Eyacuiñajji nijje ecuanajo. E'e, quea huiso cuana Jesosa nijje jjapeequi sa po'yo ajja.

³ Eseya Emeshi Mese nei Jesosaa pajea'yo jjima acaje. Ma ohua yahuajo huohui ca poa jayojja jama ohuaya e'e jojo nei acaje'yo. Jamajjeya miquianaya

onijje jjapeequi meesahua caje'yo tii tii quea ja'a nee, ohuaya. Edosiquiaa miya napa cajo, quea mimishi po mee sa acajo, ohuaya miquianaya jaahuana tiitii caje'yo; quea pame nee ba'e meesahua caje'yo. ⁴Ecuanajaya eba esejaya Emeshi Mese neiya, Jesosaa miquianaya jaahuana cani. Jamajjeya miquianaaya ecuanaja esohui pajea'yo jjima aje; atiitiije'yo peal'ai. E'l'e, jamaya ecuanajaya eba. ⁵Ecuanaya Eyacuiñajji nijje mimiani miquianajo jama ba'a: —Eyacuiñajji, ecuanaja Chii, miyaya Jesosaja epjeeji cuana Tesanonicajo ba'e quea jea nee aña. ¡Maya oya cuana ba meesahuacue! Ecuanaja Emeshi Mese nei Jesosa meshijo ba'yahua quea nee nee poanaje mimishi cuaa napa cajje. Jamatii ohuaya miya pajea'yo ajja tii tii poanaje, quea quene nee nee po jjima peal'ai. ¡Jesosa Quito jayojja jama ojaya epjeeji cuana po meecue! Jamajjeya mimishi cuaa napa cajo Jesosa nijje jjapee tiitiuijje'yo. ¡Jamaya oe ameesahuacue cuana, Eyacuiñajji! —jamaya ecuana Eyacuiñajji nijje mimiani.

Ojjañaa cachaco cahua

⁶Epjeeji cuana, jjeyya ecuanaja pea esohui shajja'ajjacue! Esejaya Emeshi Mese nei Jesosa Quitohua ecuana huohui meesahua cani jama ba'a: —¡Jesosaja epjeeji quea huea cuana nijje a'a jjapeequijji! Ma epjeeji quea huea cuana chacochaco ajja, ecuanaja esohui jayojja jama ba'e sa po'yo ajja, jjashajja'ajjaqui ajja pea'ai. ⁷Miquianaaya ecuana banaje miquiana nijje nequiya chaco tiitiinaje, huea'ama poanaje. ¡Ecuana jayojjaya jama pocue; huea'ama chaco tiitiicue! ⁸E'l'e, ecuaaya miquianajaya aquiana eba'ejji jjeshe majje sosequianaje; sosema' pojjeama jjeshenaje. Mecajje, epojjajo pea'ai chaco titiinaje ejjeshejji sosejje, bobi jjeshejji. Jamajjeya miquianajaya bobi cuana jjeshe jjima sosema!. ⁹Jesosaa ecuana huoojea canaje ojaya esohui huohuiya. Jamajjeya esohui huohuiaña sosejje ecuaaya miquianaaya cahuohuiahua jama ba'a: “¡Ecuana eba'ejji quiacue sosema!, esohui huohuiaña sosejje!”

Jamatii ecuaaya miquianaya jamaya ajjima nei nei. Chojja, ecuaaya chaconaje aquiana jjeshejji. Jamaya quea pame nee. ¡Ecuana jayojjaya jama pocue! ¡Miquianaaya chacocue! ¹⁰Miquiana nijje ba'yahuua ecuaaya huohuinaje jama ba'a: —Ojjaña joya quea huea poani, chacochaco sa po'yo ajja aje oe ¡a'a bobiajji!

¹¹Epjeeji cuana, onaaya ecuana huohui canaje jama ba'a: —Jesosaja epjeeji cuana Tesanonicajo ba'e quea huea poani beca cuana. Pea cuanajo maimaiani, quea miminaa poani, chacochaco sa po'yo ajja tii pea'ai. Jamaya quea pame pojjeama poani.

¹²Jamajjeya esejaya Emeshi Mese neiya, Jesosa Quitohua ecuana huohui meesahua cani ojjaña quea huea poani yasijje jama ba'a: —¡Eyacuiñajji! esohui jayojja jama ba'ecue! ¡Quea bei pocue! ¡Chacocue oe! ¡Bobi miquea tii ijjiacue! —jama huohuimeya ecuaaya aña joya quea huea poanijo.

¹³Ecuea epjeeji cuana, miquianaaya pea cuana quea pame nee aña. ¡Jamaya quea pame nee atiitiicue! ¡A'a quea huea pojji!

¹⁴Beca cuana jiquio esohui etehue'yo jayojja jama a sa po'yo ajja pojja'a. ¡Shajjama' cuana ba neineicue! ¡Ona nijje a'a jjapeequijji! Jamajjeya shajjama' cuana quea bicho poaje ojaya mimishi cuanajo. Quea bicho po majje jjashajja'ajjaquije pojja'a. ¹⁵Jesosaja epeejji cuana quea mimishi poanijo, shajjama' poanijo ¡jamatii a'a quea quene nee nee pojji onijje! Chojja. Oya cuana miquea epeejji. ¡Huapa pojjeama jayojja jama oya cuana niñeshe'acue!

Pabohua esohui quea bihui nee huohui canaje

¹⁶Ecuea epeejji cuana, ¡bacue ecuea pea esohui! Eya Eyacuiñajji nijje mimiani miquianajo jama ba'a: —Eyacuiñajji, ecuanaja Emeshi Mese nei, miyaya ecuana quea bei po mee tiitiñaña. Jamajjeya ¡miquea epeejji cuana Tesanonicajo ba'e quea bei nee nee po meecue, quea bei tii tii! ¡Oya cuana jaahuanacue, quea pame nee ba'e meesahuacue! —jamaya eya poani.

¹⁷Eya Pabo. Eyaya ca eya jiquio esohui quea bihui nee tehue'yonaje miquiana huasijke. Jamaya eyaya ecuea bajjani tehueaña ojjaña ecuea esohui etehue'yojo. Jamajjeya ¡miquianaaya bacue jiquio esohui ecue tehue'yo!

¹⁸¡Esejaya Emeshi Mese neiya Jesosa Quitohua miquianaya quea pame nee cajaahuana cahua!

Mahuiso ecuea esohui. Apoa.

PABOJA ETEHUE'YO TIMOTEO HUASIJJE EBIONEI

1 TIMOTEO

Pabohua esohui tehue canaje Timoteo que

1 ¹Timoteo, eyaya esohui tehueña mi que miquea ebajji. Eya Pabo, Jesosa Quitoja esohui huohuijji. Jamaya Eyacuiñajjiya, Jesosa Quitohua pe'a'i eya huoojea canaje. Eyacuiñajjiya esejaya mimishi cuana cuijea jeyojeyo ca'yonaje. Jesosa Quitohua eseya ba'e tiitii mee caje'yo onijje, esejaya ejjashahuabaqui'yojji quea pame jayojja. ²Timoteo, miya ecuea ebacua ejja jayojja poani Jesosa nijje jjapeequianijo. Jamajjeya eyaya esohui tehueña mi que.

Eyacuiñajji esejaya Chii ai eyajo ani; Jesosa Quito esa je Emeshi Mese nei poani pea'ai. ¡Ohuaya miya cajaahuana cahua quea pame nee! ¡Mijo cajjashahuabaqui'yahua quea pame nee pea'ai! ¡Miya quea bei nee capo mee cahua pea'ai!

¡Esohui e'e nei pojjeama a'a shajja'ajjajji!

³Timoteo, ecuea esohui minijje Masenonia meshi yasijje poquianijo jama eyaya huohuije o'oya ba'a: ¡Epeso cuiñajjiyo nequicue! Jamajjeya miyaya pea esohui huohuijji cuana huoojeacue jama ba'a: —Esohui e'e nei pojjeama Jesosajo ja'a huohui o'oyajji! Esohui e'e nei pojjeama cuana, esohui quea huiso etiiquianaja pea'ai ja'a shajja'ajjajji! ⁴Ma esohui cuanajo jjashahuabaqui majje dejja cuana mimicuijeanobiajea cani cuaa. Jamajjeya ¡oya cuana e'e jojo nei Jesosaja epeejji cuana ca ca jjabahuejja neineiqui meecue! ¡A'a oe esohui quea quehua shajja'ajjajji! ⁵E'e, Eyacuiñajjiya esohuijo esohui huohuijji cuana jjashahuabaqui majje mimishi a sa po'yo ajja poani. Quea jjashahuabaqui pame poani pea'ai. Jamajjeya Jesosaja esohui e'e jojo nei jama acanijo pea'ai pea cuana e'e jojo nei quea jea nee acaje'yo. ⁶Jamaya po ajja esohui huohuijji shaja. Jamajjeya oya cuana esohui quea ja'a pojjeamajo mimimimiani.

⁷Moisesija esohui etehue'yo huohui sa poani. Ma esohui ojaya ba jjima; quea quehua ojaya. Jamatii mimi neineiani esohui huohujji shaja cuana.

⁸Jamaya esejaya eba ba'a: Moisesija esohui etehue'yo cuana quea pame nee. ¿Apiojji acuae Moisesiya esohui tehue ca poa? Quea jjashahuabaqui ja'a po majje ca oe ¡Moiseija esohui etehue'yo jayojjaya jama acue!

⁹¡Bacue oe! Eyacuiñajjiya Moisesi esohui tehue mee ca poa dejja quea pame tecueajji pojjeama. Cho, tehue mee canaje shajjama' cuana tecueajji. Dejja shajjama' jama poani ba'a: Esohui etehue'yo jayojja jama a'ajja; emeshi meseja esohui jama a sa po ajja pea'ai; Eyacuiñajji shajja'ajja sa po ajja; quea tai ba'yani; quea jjashahuabaqui tai poani; Eyacuiñajjiyo jjashahuabaqui ajja; oja chii quecuajji poani; oja nae quecuajji poani; pea cuana quecuajji poani pea'ai. ¹⁰E'e, shajjama' cuana pea cojjoji poani; pea dejja see huejja cojjoji poani; pea epona so cojjoji poani; peaja ebacua sii majje quiajji poani; pea jeameejji poani; siajjepoiji poani; oya esohui pajea'yojji poani; peaja esohuijo siajje poani pea'ai; Eyacuiñajjiya esohui etehue'yo jama po ajja pea'ai. ¹¹E'e, jiquio Moisesija etehue'yo Eyacuiñajjiya esohui quea pame nee nee. Maya eya Eyacuiñajjiya huohui meesahua cani. Oya quea ca'a nee nee; oe nei quea pame nee nee eya jaahuana cani, Eyacuiñajjiya.

Eyaya Jesosa Quito bihuiaña ohua sohuihuohui meesahua caniya jjejojo

¹²Esejaya Emeshi Mese neija, Jesosa Quitoja eba ojaya esohui pajea'yo ajja tii tii, eya. Jamajjeya ohuaya eya huoojea ca'yonaje ojaya esohui huohuiya. Jamajjeya eyaya Jesosa Quito bihuiaña ohua sohuihuohui meesahua caniya jjejojo. ¹³Yahuajo aje eya Jesosa nijje mimijaji'yonaje, ojo quea tai miminaje, ojaya epeejji cuana iña mee'yonaje ejeanobiajeajji. Jamatii, eya jjashahuabaqui jjimahua, oya ecuea ba jjimahua, Jesosa Quito ejo quea tecue jjashahuuba tiitiiqui'yo ajja poanaje, de; ¹⁴ejo quea pame nee jjashahuubaquinaje de, esejaya Emeshi Mese nei, Jesosa Quito. Jamajoya jjeya eya ojaya epeejji nei poani; ohuaya eya quea jea nee nee acani, de.

¹⁵¡Bacue jiquio esohui e'e nei nei, quea pame nee poani! Ojjaña cuaa caba neinei cahua jama ba'a: Jesosa Quito jiquio meshi yasijje poeyanaje ojjaña cuanaja mimishi cuana cuijea'yohua. Eya jamaya jjashahuabaquianai ba'a: Ojjaña dejja cuana quea mimishi pishana; eya ca ca quea mimishi nee nee poanaje. ¹⁶Jamatii Jesosa Quito ejo quea pame nee jjashahuubaquinaje, de. Jamajjeya oya enijje tecue'ama poanijo, pea cuaa ba cani oya tecue'ama enijje, oya tecue'ama dejja mimishi cuana nijje, ca onijje jjapeequi'yajo. Ba'e tiitii mee caje'yo Eyacuiñajji nijje.

¹⁷¡Emeshi Mese nei ejjashajja'ajjaqui! ¡Ejjabihuia tiitiiqui pea'ai! Eyacuiñajji ese huoojeajji poani nequi tiitiije'yo. E'e, oe nei nei Eyacuiñajji yani; pea chama!. Jamajjeya oya dejja cuanaja ecojja bajji pojjeama. Jamaya capoahua.

Jamaya pea cuana cahuohui cahua Timoteohua

¹⁸E'e Timoteo, miya ecue bacua ejja jayojja jama poani. Jamajje eyaya miya huoojeaña ecuea esohui huohuiya pea esohui huohuijji cuana huasijje. Yahuajo pishana pea cuaa miya huohui canaje jama ba'a: —Timoteo, quijke miya esohui huohuijji quea pame nee nee poaje'yo —acanaje cuaa miya.

Jamajjeya jesohui e'e jojo nei janobajjima nei huohuicue queabihui nee, dejja quea ca'a jayojja! ¹⁹¡Eyacuiñajji esohui e'e nei shahuaba neineicue! ¡Quea ja'a nee ba'ecue e'e jojo nei ojaya esohui jayojja jama! Beca cuana jama a sa po'yo ajja jjejojo poquiquehua'yonaje. Jamajjeya aema' nei nei jayojja jama poanaje. Esohui e'e jojo nei pajea ca'yonaje, Jesosa Quitoja. ²⁰Jamaya poanaje dejja bajjani Imeneo, Anejano cuanaya. Jamajje eyaya oya cuana cajaa a'yonaje. ¡Edosiquiaa canapa cahua! Jamajjeya joya cuana cajjabahuejjaquiahua Eyacuiñajji nijje emimijaji pajea'yoji!

Jesosaja epeejji cuana ojjaña cuanajo camimiquiahua Eyacuiñajji nijje

2 ¹Ebionei eyaya huohuaña jama ba'a: ¡Eyacuiñajji nijje mimicue! Eseya cuana Eyacuiñajji nijje camimiquiahua ojjaña cuanajo. Jamajjeya Eyacuiñajji epeejji cuana jama ameecue ba'a: —Ecue Chii ai, Eyacuiñajji, ¡eya ba'e meesahuacue! ¡Ojjaña cuana ba'e meesahuacue pe'a! Ecuaaya miya bihuiaña. ²Jamajjeya ojjaña cuana jaahuanacue! ¡Emeshi mese cuana, emeshi meseja echacojji cuana pea'ai huohui meesahuacue quea bei nee! Jamajjeya ecuanaya miquea esohui jayojja jama quea ja'a nee ba'yanijo quea bei nee nequije'yo —jamaya acue cuana.

³E'e, jamaya onijje mimianijo Eyacuiñajji quea bihui nee po meeña, eseyaya. Ohuaya esejaya mimishi cuana cuijea ca'yonaje, de. ⁴Ojjaña mimishi cuana cuijea neinei'yo sa poani pea'ai. Ojaya esohui e'e nei ba meesahua sa poani pea'ai. ⁵Oya ojjaña nahue sa poani. E'e, Eyacuiñajji e'e jojo nei oe nei yani dejja cuiñajji. Cuanaya oe nei yani Jesosa Quito. E'e, Eyacuiñajji dejja quea mimishijo quea tecue poani. Jamajjeya Jesosa Quito Eyacuiñajji nijje mimiani ojjaña dejja mimishi cuanajo. Eyacuiñajji quea bei ona nijje poaje'yo. Jesosa Quito Eyacuiñajji; oya dejja pea'aiya poanaje. ⁶Oya mano'yonaje ojjaña mimishi cuijea mee'yoji sosejje. Jamaya oya sa poanaje. Jamajoya ojjaña cuana ba'e tiitii mee sa poani Eyacuiñajji nijje eyajo. ⁷Jamajjeya Jesosaa huoojea canaje ojaya esohui huohuiya. E'e jojo nei, siajje pojjeama, ohuaya eya huoojea ca'yonaje Jodio pojjeama cuana huasijje ojaya esohui e'e nei huohuiya. Jamajjeya ojjaña cuana eyaya Jesosajo jjabahuejjaqui meeje'yo.

Jamaya ca'a cahua Eyacuiñajji equijo

⁸Majoya eyaya miya huohuaña jama ba'a: Eseya, ojjaña meshi cuanajo ba'e cuana pea'ai camimiquiahua Eyacuiñajji nijje ojaya equijo. Onijje

mimianijo ja'a quea mimishi pojji! ¡A'a quea quene pojji pea cuana nijje! ¡A'a jjamimicuajea nobiajeaquijji pea'ai!

⁹Majoya eyaya miya huohui meeña epona cuana jama ba'a: —Epona cuana, ¡daqui quea pame nee huoshocue! ¡A'a daqui huoshojji quea bicho epo mee'yojji! ¡Aquiana quea nahue neeya ehuojja a'a ijzia ca'a meejjji! ¡Mei siyosiyo quea nahue nee nee, eijji quea nahue nee nee pea'ai a'a yijiji! ¡Daqui quea nahue nee a'a huoshojji pea'ai, eponaa! —jamaya acue, Timoteo, jamajjeya peaja ejea bajji pojjeama.

¹⁰Timoteo, ¡epona cuana jama acue pea'ai ba'a: —Epona cuana, ¡miya Eyacuiñajji bihuiajji poanijo quea ja'a nee nee ba'ecue! ¹¹¡Jjabahuejjaquicue, Jesosaja epeejji nei pocue! ¡Eshohu huohuijjiya esohui huohui canijo jjashajja'ajjaquicue! ¡A'a mimi neineijji! —jamaya epona cuana acue!

¹²Eyaya epona cuana huoojjea ajja dejja cuana huasijje esohui huohuiya. Cuanaya ja'a dejja cuana huoojeajji eponaa! Cho, jamaya quea pame pojjeama. Epona ca oe cajjashajja'ajjaquiahua. ¹³E'e, Eyacuiñajjiya ebionei dejja Adana bajjani pana coo ca'y poa. Majoya Adana pana'yo majje epona Ema bajjani pana ca'y poa. ¹⁴Edosiquanaja Adana dasia'yo jjima poa; epona ca ca oe dasia ca'y poa. Dasia cajje shajjama' poanaje. Quea mimishi aca'yonaje Emaa. ¹⁵Jamajjeya bacua cuayanijo epona quea nee nee poani. Jamatii, Eyacuiñajjiya eponaja mimishi cuana cuijea caje'yo pea'ai ca ojaya esohui jayojja jama jjashahuabaquianijo, ojaya epeejji poanijo. (Eyacuiñajjiya epona cuana cuaqui yasijje huoojjea ajja ojaya epeejji cuana poanijo.)

Jesosaja epeejji jaahuanajji cuana jamaya capoahua

3 ¹Timoteo, ¡pea esohui shajja'ajjacue! Jiquio esohui e'e nei, ba'a: Dejja cuana Jesosaja epeejji cuana jaahuanajji sa poanijo, jamaya quea pame nee. ²E'e Timoteo, jamajjeya miyaya Jesosaja epeejji jaahuanajji epojji jama huohuicue ba'a: —¡Quea pame nee ba'ecue! Jamajjeya pea miya etecueajji pojjeama. ¡Ehuanase oe nei huanacue! ¡Quea ja'a nee jjashahuabaquicue, yajjajja'ama! Jamajjeya quea mimishi ba'e ajja. ¡Quea pame nee pea'ai ba'ecue pea cuana nijje! ¡Jjapeequicue pea cuana nijje! ¡Quea ja'a nee Eyacuiñajjiya esohui huohuicue! ³¡Ecahuishi, ejjisese quea sese nee nee a'a ishijji! ¡A'a jjacuiaquijji! Cho. ¡Quea bei pocue ojjaña nijje! ¡A'a quea tecue pojji! ¡A'a quea bejjo huiso sa pojji! ⁴Ojjaña cuana miquea equijo ba'e jaahuanacue jama ba'a: ¡Miquea ebacua cuana miquea esohui jayojja jama po meecue! ¡Jjashajja'ajjaqui meecue pea'ai! —jamaya Jesosaja epeejji jaahuanajji epojji acue, Timoteo.

⁵E'e, Jesosaja epeejji jaahuanajjiya ojjaña cuana ojaya equijo ba'e jaahuanahuana ajjajo Jesosaja epeejji cuana jaahuanajjiya pea'ai poaje. ⁶Timoteo, ¡Jesosaja epeejji jjeya nei jjapeequi a'a huoojeajji Jesosaja epeejji jaahuanaa! Oya shajjama' po chana'; quea ja'a huohui ajja.

Jamajjeya Eyacuiñajjiya oya tecuea ca chana'. Jamaya Eyacuiñajjiya Edosiquiana shajjama' poanijo tecueajea ca'yonaje yahuajo nei nei. ⁷E'e, Jesosaja epeejji jaahuanajji quea huiso shequijajo jjapeequiani caba'eyhua quea pame nee. Jamajjeya Jesosaja epeejji pojjeama cuaa ojo huohui caje jama ba'a: —E'e, oya dejja quea pame nee poani tii.

Oya quea tai poajo ca ca pea cuaa oya tecueajea caje'yo. Edosiquiana peaa cuana onijke mimijaji mee ca chana', dasia ca chana'. Jamajjeya onaa tecuea cajje quea yeno po majje quea mimishi po chana'.

Jesosaja epeejjiya eba'esahuajji cuana jamaya capoahua

⁸Timoteo, ¡Jesosaja epeejjiya eba'esahuajji cuana babacaquicue! Jama acue cuana ba'a: —¡Quea ja'a nee ba'ecue! ¡E'e jojo nei nei mimicue! ¡A'a quea huiso ishiji, a'a huoojji! ¡A'a quea dejja tai pojji! ¡A'a edasajji pojji pea'ai! ⁹¡Ojjaña Eyacuiñajjiya esohui e'e nei jama atiitiicue quea ja'a nee! Yahuajo ma esohui Eyacuiñajjiya dejja cuana ba meesahua jjima; jjeya ba mee cani quea huiso —jamaya oya cuana acue, Timoteo.

¹⁰Cuanaya ¡Jesosaja epeejjiya eba'esahuajji cuana babaca jjimahua oya ba neineicue! ¡Oya jjabahuejjaqui meecue pea'ai! ¡Quea pame nee poanijo, oya huoojeacue Jesosaja epeejji ba'esahuua!

¹¹Jesosaja epeejjiya eba'esahuajji cuanaja ehuanase cuanaya jama acue ba'a, Timoteo: —¡Quea ja'a nee ba'ecue, epona! ¡A'a quea mimijjequijea pojji! ¡A'a ishi'ishiji! ¡Jesosaja epeejji cuana ba'e meesahuacue; nishehui'ama pocue! —jamaya miyaya oya cuana acue, Timoteo.

¹²E'e Timoteo, Jesosaja epeejjiya eba'esahuajji babaca majje oya cuana jiquio jama acue ba'a: —¡Oe ehuanase huanacue! ¡Miquea ebacua cuana, ojjaña miquea equijo ba'e pea'ai jaahuanacue quea ja'a nee! ¹³E'e, miyaya quea ja'a nee Jesosaja epeejji ba'esahuañajo, onaaya miya ojjañaa shajja'ajja caje quea bihui nee. Jesosa Quitoja esohui bicho'ama nei huohuime aje, ¡quea ja'a nee acue!

E'e Timoteo, ¡Jesosaja epeejji quea pame nee babacacue Jesosaja epeejji ba'esahuajji! Jamaya apoa.

Eyacuiñajjiya equijo ojaya epeejji jamaya capoahua

¹⁴Timoteo, jiquio pea esohui cuana eyaya tehueña mi que. Eya mi baa poqui sa poani quijje pishana. ¹⁵E'e pojja'la jjeya eya epoquiji pojjeama mi que. Jamajjeya eyaya mi que esohui tehueña mi huohuijjii achajja Jesosaja epeejji cuana poaje so'o quea pame nee epojji. Ecuea esohui etehue'yojo miyaya ba meeje cuana. E'e, Eyacuiñajji ca ca enequi eshe tii tii. Ojaya epeejji cuana ojjaña meshijo ba'yani. Oya cuana Eyacuiñajjiya huapa pojjeama jayojja jama poani. Ojaya esohui e'e nei ojjaña cuana ba meesahua cani, Eyacuiñajjiya.

¹⁶Jamaya e'e jojo nei ba'a: Eyacuiñajjiya esohui e'e nei, quea pame nee nee. Ma esohui yahuajo ojaya ba mee jjima poa. Jjeya ojaya esohuijo eseya quea ja'a nee ba'eje'yo. Jamaya ojaya esohui Jesosa Quitoja ba'a:

“Eyacuiñajji jiquio meshi yasijke poeyanaje; dejja jayojjaya yamiji ba'ya poa. Edojjoshahua Pameya huohui canaje quea pame nee oya. Eyacuiñajji esohuidojiji cuaa oya ba canaje. Ojaya epeejji cuaa ojo huohui canaje Jodio pojjeama cuana huasijke. Quea huiso dejja cuaa ojjaña meshi cuanajo oja sohui shajja'ajja majje jjabahuejjaqui ca'yonaje. Quijje Eyacuiñajjiya oya jjequisohua ca'yonaje eya huasijke”.

Jamaya yahuajo nei Isaiaa tehue ca poa.

Beca cuana Eyacuiñajji nijje poquipajeanaje

4 ¹Timoteo, pea esohui eyaya huohuije esohui huohuijji nishojo. Yahuajo nei Edojjoshahua Pameya huohui ca poa jama ba'a: —Quijje Jesosa Quito poe o'oya jjimahuajo, Eyacuiñajji esohuijjo jjabahuejjaqui majje beca cuaa ojaya esohui jayojja jama apajea caje'yo. Eshahua cuana shajja'ajja caje. Eshahuaja esohui tai cuana jayojja jama acaje. Eshahua cuana aje oe jjadasiaquijji, de. ²Ojaya esohui e'e nei pojjeama. Eshahua cuaa beca dejja cuana siajje po mee cani. Jamajjeya ma dejja cuana siajje po majje bicho'ama poani. ³Jama siajje pome poani ba'a: —¡Eponajo a'a jjahuanaquijji! ¡A'a beca bobí cuana ijjiajji; quea ajja coma! ¡Eshahuua cuia caje! —poani.

⁴Chojja. Eyacuiñajjiya ojjaña bobí cuana pana ca'ya poa e'ijjiajji; quea pame nee. Jamajjeya Jesosaja epeejji cuaa esohui e'e nei ba majje, Eyacuiñajji bobijo bihuia majje pealai ojjaña bobí quea pame cuana cal'ijjia cahua. ⁵Jamajjeya Eyacuiñajji nijje mimi majje, ojaya esohui mimi majje pealai quea jaji nee cal'ijjia cahua bobí cuana.

¡Jesosaja echacojji quea pame nee pocue!

⁶Timoteo, pea esohui eyaya tehueaña mi que Jesosa Quitoja jama ba'a: ¡Esohui cuana ojo Jesosaja epeejji cuana huasijke huohui majamajacue miyaya! Jamajjeya oya cuana ba'e meesahuaje quea pame nee. ¡Eyacuiñajji esohui e'e nei cuana ba huicha'a huicha'acue! Miya ojaya esohui huohuijji quea ja'a nee poaje pealai. Ma esohui e'e nei Jesosa Quitojo yahuajo shajja'ajja majje jamaya ahuicha'a'yonaje miyaya, Timoteo. ⁷¡Etiiquianaja esohui quea quehua a'a shajja'ajjajji, Eyacuiñajji esohui cuana jayojja jama pojjeama! Onaajaya esohuiya quea pame ba'e mee nisho cani. ¡A'a jamaya pojji! Timoteo, ¡miyaya oe Eyacuiñajji esohui jayojja jama amajamajacue! ⁸Jamaya acue ba'a: Chaco tiitii majje miquea eyami quea ca'a poaje. Jamaya quea pame pishana. Eyacuiñajji esohui jayojja jama atiitii majje ojaya epeejji quea ja'a poaje. Jamaya quea pame nee nee. Jamaya poanijo Eyacuiñajjiya miya jjeyahua nei quea pame nee ba'e mee caje; mano'yajo, ba'e tiitii mee caje'yo eyajo pealai.

⁹E'e, jiquio esohui e'e nei nei. Jamajjeya ¡ojjaña cashajja'ajja tiitii cahua! ¹⁰Jamajoya Eyacuiñajjiya esohui e'e nei poanijo ecuana janobajjima

nei Jesosaja epeejji cuanajo chacochacoani. Pea ecuana nijje janobajjima mimijajani. Jamatii Eyacuiñajji eshe yani; o epoe o'oyajjijo ecuaaya ishoa'ajjaña. Ohuaya ojjaña onijje jjapeequi mee'yo sa acani. Ojjaña joya e'e jojo nei poani ohuaya mimishi cuijea caje'yo. ¹¹Jamajjeya jjiquio esohui cuana huohui neineicue! ¡Ojjaña cuana jjabahuejjaqui meecue miyaya, Timoteo!

¡Quea pame nee ba'ecue, Timoteo!

¹²Timoteo, miya edejja sho'i pishana poani. Jamatii pea cuaa miquea esohui cashajja'ajja cahua. Jamajjeya ¡quea ja'a nee Jesosa Quitojo mimicue, miya! ¡Quea jaji nee oe pocue! ¡Pea cuana quea jea nee acue! ¡Eyacuiñajji nijje jjapee tiitiiquicue e'e jojo nei! ¡Ojaya epeejji nei nei pocue! ¡Quea jjashahuubaqui ja'a nee oe pocue pea'ai! Jamajjeya ojjaña Jesosaja epeejji cuana mi jayojjaya poaje. Quea pame nee nee acaje'yo cuaa.

¹³Eya, Pabo poeje quijje pishana mi baa. E poe jjimahuajo, ¡Eyacuiñajji esohui huohuicue ojjaña joya Jesosaja epeejji ejjachichaqui ani yasijje! ¡Ojjaña cuana jjabahuejjaqui meesahuacue; Jesosaja esohui ba meesahuacue pea'ai!

¹⁴Yahuajo Jesosaja epeejji etii cuaa miya huoojea sa poanijo mijo huohui canaje jama ba'a: —Timoteo quijje esohui huohuijji quea pame nee poaje'yo.

Jamajjeya onaa huoojea cajje miya Eyacuiñajjiya esohui huohui meesahua canaje. ¡Maya a'a pajea'yoji! ¡Jamaya po tiitiicue Eyacuiñajjiyo! ¹⁵Jamajjeya ¡Eyacuiñajjiya esohui ba neineicue! ¡Ojaya esohuijo jjashahuaba tiitiiquicue pea'ai! Jamajjeya ojjaña miya ba caje jjeya esohui ba neinei'yonaje; yahuajo miquea bajea jjima poanaje.

¹⁶E'e, ¡miquea esohui jayojja jama ba'e tiitiicue quea pame nee! ¡Esohui e'e nei huohui huicha'a huicha'acue! Jamajjeya miya poquiquehua ajja eshahuaja ejiojji tai yasijje. Pea cuana miquea esohui shajja'ajja majje cuaqui yasijje epoqui'yojji pojjeama pea'ai.

¡Jamaya ba'ecue Jesosaja epeejji cuana nijje!

5 ¹Pea esohui eyaya, Pabohua tehueña mi que, Timoteo: ¡Edejja tii a'a tecueajji! ¡Quea jea acue! Quea mimishi poajo, ¡onijje mimicue, mique chii nijje jama mimimeya pocue! ¡Oya ba meesahuacue pea'ai! ¡Mique chahua jayojja jama jahuanameya acue esho'i cuana! ²¡Epona tii nijje mimicue quea pame nee! Quea mimishi poajo, ¡miquea enaese nijje mimiani jayojjaya jama mimimeya pocue! Epona sho'i cuana quea mimishi poajo, ¡mique jjo'i nijje jayojja jama mimimeya oe pocue! E'e, ¡epona cuana nijje oe quea pame nee nee pocue!

E'ahuemano cuanajo huohui canaje Pabohua

³Timoteo, miyaya Jesosaja epeejji cuana e'ahuemanojo jama huohuicue ba'a: —¡E'ahuemano cuana ba'e meesahuacue quea pame nee, ca ebacua etii chamajo! ⁴E'ahuemanoja ebacua cuana yanijo, oja osecua cuana yanijo

ohuaya cajaahuana cahua oja nae; oja yano mese cuanaya cajaahuana cahua oja equijo. Nishehui'ama capoahua. ¡Oja chii etii, oja nae epona tii po'yajo pea'ai cabobia cahua! Esho'yahua eseja naeya bobia ca poa. Jamaya eseyaya eseja nae aje'yo ohua jaahuana ca poa sosejje. Jamaya Eyacuiñajija quea boti nee nee. ⁵Beca e'ahuemano quea yeno nee nee poani; oja bacua cuana chama!, oja osecua cuana pea'ai chama!. Jamajjeya e'ahuemano aema' Eyacuiñajji nijje jjapeequiani. Ebacua etii chamajo Eyacuiñajji nijje mimi huicha'a huicha'ani ojjaña pojajjo, mecajje pea'ai. Onijje mimiani pea cuanajo pea'ai. Jamajjeya Eyacuiñajjiya pea cuana ba'e meesahua cani quea pame nee.

⁶Beca cuana e'ahuemano quea mimishi poani. Yajjajja'ama. Poquiquehuani cuaqui yasijje, Eyacuiñajji nijje jjapeequi jjima jayojja jama poani. ⁷Jamajjeya jjiquio esohui cuana huohuicue e'ahuemanoja bacua cuana huasijje, Jesosaja epeejji cuana huasijje! Jamajjeya pea cuanaja oya cuana etecueajji pojjeama. ⁸E'e, esejaya huapa pojjeama cuana, ojjaña eseja equijo ba'e mi jaahuana majje eseyaya Eyacuiñajji cajaa aña. Jamaya quea tai nee nee. Pea cuana Eyacuiñajjiya esohui ba po jjima cuana ca ca quea tai pishana poani.

⁹Jamajjeya ¡Jesosaja epeejji e'ahuemano quea pame nee miquianaaya ba'e meesahuacue! Ca joya jama ba'yani ba'a: E'ahuemano epona tii, pea beca peejjima dejjaja pea ejiojji cuana huiso shequiajame, 60 shequiajame etiijo; pea yahuejo jjahueaqui'yo jjima; ¹⁰ojjaña cuana ojo quea pame mimianijo pea'ai, ohuaya ebacua quea pame nee tii mee ca'yonajejo, pea cuana ojaya eba pojjeama bobia canajejo pea'ai, pea cuanaja equi shabojeajji epo pea'ai; emanajaa cuana jaahuana canajejo pea'ai, quea pame nee ahuicha'a huicha'a ca'yonajejo pea'ai, ¡ma e'ahuemano ba'e meesahuacue quea pame nee! E'e, oja bajjani catehuequiahua pea e'ahuemano etii quea pame cuana nijje Jesosaja epeejji cuanaja eba'e meesahuajji.

¹¹Ecuea ehuohuijji e'ahuemano etii pishanajo jama ba'a: E'ahuemano cuana etii pishana ca ca e'ahuemano etii nei jayojja jama pojjeama; chacochaco ajja Jesosa Quitojo. ¡A'o jaya bajjani tehuejji pea e'ahuemano etii quea pame nijje! Quea dejja jea po o'oya majje jjahueaque o'oya. Jesosa Quito nijje jjapeequi pajea'yo chana!.

¹²Jamajjeya beca cuana ojaya esohui ma ecua oya Jesosa Quito nijje poanaje jama e'ajji pojjeama. E'e, yahuajo ohuaya huohui canaje jama ba'a: —Ecuana ejjahueaqui o'oyajji pojjeama; Jesosa Quitojo nei chacochacoje'yo tii tii —poanaje.

Ma o Jesosa Quito nijje jama miminaje pajea ca'yonaje. Jamajjeya Jesosaja epeejji cuaa oya cuana tecuea caje'yo. ¹³E'ahuemano esho'i pishana chacochaco ajjajo quea huea poaje. Poqui majamajaje ojjaña equi cuana huasijje anicuaa. Pea cuana niñeba caje pojja'a. Ojjaña cuanajo quea miminaa nee nee poanijo mimijaji chana!. ¹⁴Timoteo, jamajjeya

eya e'ahuemanojo jjashahuabaquiani jama ba'a: E'ahuemano cuana etii pojjeama cajjahueaqui o'oyahua. Ojaya ebacua cuana catii mee cahua; oja equijo cachacochacoquiahu pe'a'i. Jamaya poanijo mimishi'ama nei. Jamajjeya Jesosaja epeejji pojjeama cuana ojaya epeejji cuana nijje tecuetecue ajja poaje. ¹⁵Eya jamaya mimiani oe pojji e'ahuemano cuana nijje, ma Jesosa nijje jjapeequi pajea'yani nijje, Edosiquiana nijje jjapeequi sa poani nijje pe'a'i.

¹⁶Jamajjeya Jesosaja epeejji cuaa e'ahuemano oja huapa pojjeamaa cajaahuana cahua ojaya equijo; ja'a oya Jesosaja pea epeejji cuana jaahuana meeji! Jamajjeya Jesosaja epeejjiya e'ahuemano jaahuana caje, ca joya ebacua etii chamajo.

Jesosaja epeejji jaahuanajji etii

¹⁷Jesosaja epeejji jaahuanajji cuaa Jesosaja epeejji quea pame jaahuana canajejo, caba'e meesahua cahua Jesosaja epeejji cuaa. E'e, ohuaya Eyacuiñajji esohui etehue'yo huohui canaje; onaya jjabahuejjaqui mee canaje pea'a'i. Jamajjeya ¡caba'e meesahua cahua cuaa! ¹⁸E'e, yahuajo nei jamaya Moisesija esohui etehue'yo poa ba'a:

“Ana'aiya anoso ai dojo cani edaasa biajje. ¡Jamajjeya anoso ai oe pojji quiacue e'ijijiaggi!”

Yahuajo nei jama poanaje pea'ai ba'a: “¡Echacojjiya chaco cajo sosequiacue!” Jamajjeya ¡Jesosaja epeejji jaahuanajji sosequiacue ohua chaco canaje sosejje!

¹⁹Oe dejaa Jesosaja epeejji jaahuanajji tecuea cajo, ja'a shajja'ajjajji! ¡Beca, pea beca peejiima pojja'a pea jayojja pea'ai mimime poajo, shajja'ajjacue! ²⁰Jesosaja epeejji jaahuanajji quea mimishi po huicha'a huicha'anijo, ¡tecueaquicue ejjabahuejjaquijji, ojjaña ba caqui, ojjaña jjabahuejjaquijji! Jamajjeya pea cuana mimishijo quea mete poaje.

²¹Timoteo, Eyacuiñajjiya, Jesosa Quitohua, esohuidojoji quea pame cuaa cojja ba canijo pea'ai, eyaya miya huohuaña jama ba'a: ¡Miyaya ecuea esohui jama acue! ¡Jjashahuabaquicue quea ja'a nee Jesosaja epeejji jaahuanajji cuana tecuea jjimahuajo! ¡Oya jayojjaya ojjaña apea'aicue!

²²¡Jesosaja epeejji jjeya nei jjapeequi a'a huoojea cuajiji Jesosaja epeejji jaahuanaa! ¡Oya ba neineicue huoojea jjimahuua! Oya quea mimishi poajo, pea cuaa miya tecuea ca chan'. ¡Quea ja'a nee jjashahuaba tiitiquicue! Peaa mimishi acanijo, ¡ona nijje a'a quea mimishi pojji!

²³Timoteo, miquea see ai quea nee po huicha'a huicha'anijo ¡oe pojji acuijjajja na, uva na quea sese pishana ishicue, ena oopana pojjeama!

²⁴Jamajje jjeyahua nei beca cuaa mimishi quehuajje pojjeama acani; ojjaña ba cani. Eyacuiñajjiya oja mimishi cuanajo quea nee nee po mee

caje'yo quijje pishana. Pea cuaa mimishi cuana quehuajje acani. Quijje oja mimishi ba majje ojjañaa oya cuana tecuea caje'yo. ²⁵Jamaya pea'ai beca cuaa quea pame nee acani. Jjeya nei ojjañaa oya ba cani. Oe pojji cuaa quea pame nee quehuajje acani. Quijje ojjañaa ba caje oya quea pame nee poani.

Echacoiji cuaa sosemajo chacochacoaniya o chacomeliji cashajja'ajja cuhua

6 ¹Timoteo, echacoiji cuana Jesosaja epeejji cuana huohuicue jama ba'a: —Epeejji cuana, ¡miquianaaya chacoaña sosemajo, mi chacomeliji esohui shajja'ajjacue! Miquiana mi jjashajja'ajjaquiajo, pea cuaa Eyacuiñajji niñebe ca chana'; esejaya esohuijo pea'ai jjaniñebaqui chana!. ²Miquea echacomeliji Jesosa nijje jjapeequianijo, edoe mese jayojja tecue'ama poanijo, ja'a shajjama' pojji! Chojja, ¡shajja'ajja tiitiicue oya! Mi chacomeliji poani Jesosaja epeejji poanijo Jesosa ojaya quea boti nee pea'ai. Miya miquea echacomeliji yajjijo chacochacoanijo quea huiso sosejje poaje ojaya —jamaya acue echacoiji cuana, Timoteo.

E'e Timoteo, ¡jiquio esohui cuana huohui neineicuel! ¡Jamaya ojjaña cuana jjabahuejjaqui meesahuacue!

¡Quea bei ba'ecue esohui e'e nei jayojja!

³Timoteo, pea dejja cuaa ecuanaja esohui jayojja jama huohui ajjajo, esohui e'e nei Jesosajo huohui sa po ajjajo oya cuana shajjama', de. Eba'e quea ja'a neejo huohui sa po ajjajo pea'ai oya cuana shajjama' poani. ⁴Esohui e'e nei onajaya ba jjima. Esohui quea quehuajo mimicuiajeanobiajea sa poani, de. Mimicuiajeanobiajea canijo dejja cuana quea quene po mee cani pea cuana nijje. Quea bei pojjeama po mee cani; pea cuana mimijaji mee cani; quea tai nee jjashahuabaqui mee cani pea cuanajo pea'ai. ⁵E'e, esohui e'e jojo neijo jjabahuejjaqui mee jjimajo, quea jjashahuabaqui tai neejo pea'ai quea huiso cuaa mimicuiajeanobiajea huicha'a cani. Jamajjeya oya cuana jjashahuaba quehuauiani jama ba'a: —Ecuaaya Eyacuiñajji esohui huohuañajo quea huiso ejjeshejji chichaje.

¡Jiquio dejja cuana nijje a'a jjapeequijji! Quea tai nee nee.

⁶E'e jojo nei Eyacuiñajji esohui jayojja jama ba'yanijo, quea jaji nee poanijo pea'ai, quea bihui nee nee poaje'yo. ⁷E'e, eseuya cuayanaje aema' nei nei. Quijje mano'yo majje aema' nei nei poquije'yo. ⁸Bobi, daqui, equi yani. Jamajjeya se quea bihui nee nee poaje'yo. ⁹Joya quea huiso aquiana nahue sa poani ca ca eshahuaja ejiojji yasijje poqui quehua'yo chana!. Ejjashahuabaqui'yojji cuana quea taijo quea tai ba'eje'yo, quea yeno. Cuaqui yasijje quijje poquije'yo pea'ai, de. ¹⁰E'e, quea huiso ejjeshejji cuana, quea huiso aquiana cuana sa neinei poanijo ojjaña mimishi cuana acani cuaa. Ejjeshejji cuana, aquiana cuana sa neinei poanijo Eyacuiñajji esohui jayojja jama apajea cani. Jamajjeya quea yeno nee nee poani; quea bei nee ba'e ajja.

Pabohua Timoteo huoojea cani quea pame eba'ejji

11 Timoteo, miya ca ca oe Eyacuiñajji epeejji nei, ojo chacochacoani pea'ai. ¡Ma acajji tai jama a'a ajji! Jjashahuabaquicue quea pame nee eba'ejji jama ba'a: ¡Pea cuana quea jea nee acue! ¡Eyacuiñajji jayojja ba'ecue, quea ja'a nee! ¡Ojaya esohui jayojja jama atiitiicue! ¡Pea cuaa miya napa cajje quea ca'a nee nee pocue! ¡Quea bei nee nequicue pea'ai! 12 Jama jjashahuabaquime pocue ba'a: ¡Dejja quebanei poanijo janobajjima nei nei cuajicuajiani jayojjaya miya Eyacuiñajji nijje quea ja'a nee nee jjapeequicue! Huea'ama poajo ohuaya miya ba'e tiitii mee caje'yo onijje, mano'yajo. Yahuajo ojjañaa cojja ba canijo miyaya huohuinaje jama ba'a: —Jesosa Quito ecuea Emeshi Mese nei jjeya poani.

Jamajjeya miya Jesosaja epeejji poanaje e'e jojo nei; Eyacuiñajji miya babaca ca'yonaje onijje eba'e tiitii'yojji. 13 Jamajjeya Eyacuiñajji ojjaña aquiana eshe po mee ca'yani; Jesosa quea pame nee miminaje emeshi mese Ponisio Pinato bajjani nijje jama ba'a: “Eya ca iña Emeshi Mese oe nei; ecuea esohui e'e nei nei” poanaje Jesosa. Jamajjeya Eyacuiñajji, Jesosa Quitohua peal'ayi ba canijo, eyaya miya huohuiaña jama ba'a: 14 ¡Eyacuiñajji esohui jayojja jama atiitiicue! Jamajjeya pea cuanaja miya etecueajji pojjeama. ¡Jamaya acue Jesosa Quito esejaya Emeshi Mese nei poe o'oya jjimahuajo!

15 ¿Ache shono poeje o'oya Jesosa Quito? Eyacuiñajji eba. Ohuaya Jesosa Quito poe meesahua caje'yo. Eyacuiñajji quea pame nee nee, quea ca'a nee pea'ai, ojjaña huoojea'yojji oe nei. E'e, Eyacuiñajji ojjañaja emeshi mese huoojeajji poani. Ojjaña dejja jaahuanajji poani cuana huoojeajji poani oya. 16 Oya ca ca oe mano'yo ajja tii tii. Oya quea jeajahua nee nee enequi tii tii. Jamajjeya dejja cuana jamatii o que poqui ajja. Dejja cuanaja oya cojja ba jjima poani. Jjeya jjacojjaba meequi ajja pea'ai. Jamajjeya ojjañaa oya cabihuia cahua. ¡Oya oe nei quea ca'a nee nee po tiitii'yani! Jamatii oya, de.

Dejja cuana quea aquiana huiso nee neejo

17 Timoteo, dejja cuana quea aquiana huiso nee nee yasijje huohuicue jama ba'a: —¡Pea cuana a'a cajaa ajji! ¡Miquea aquiana quea huisojo a'a jjashahuabaqui tiitiji! Quea huiso aquiana cuana nequi tiitii ajjajo ja'a aquiana quea huiro jea bajji! Miyaya ¡Eyacuiñajji eshe tii tii nequi quea jea nee acue! Ohuaya ojjaña aquiana quia cani ese quea jaji pojji. 18 ¡Pea quea pame nee acue miyaya! E'e, ¡pea cuana nijje quea pame nee atiitiicue! ¡A'a quea aquiana nahue pojji aema' cuana nijje; nishehui'ama pocue! —jamaya oya cuana acue, Timoteo.

19 Jamaya poani tiitijo, quijje Eyacuiñajji oya cuana sosequia caje'yo quea huiro eyajo. Jamajjeya Eyacuiñajji oya cuana nequi tiitii mee caje'yo eyajo onijje. Eba'ejji quea ja'a nee nee, quea pame nee nee ojaya poaje'yo.

²⁰Timoteo, ¡miyaya Eyacuiñajjija esohui quea pame nee jama atiitiicue! ¡Esohui e'e nei pojjeama Eyacuiñajjija esohui jayojja jama pojjeama a'a shajja'ajjajji! Quea quehua, de. ²¹Jamajjeya beca cuana esohui quea quehua nee, e'e nei pojjeama shajja'ajja majje poquiquehua'yonaje. Jamajjeya Eyacuiñajjija esohui e'e nei pajea ca'yonaje, onaaya.

Timoteo, ¡Eyacuiñajjiya miquianaya cajaahuana cahua! Jamaya capoahua. Apoa.

Eya, Pabo esohui tehuejji.

PABOJA ETEHUE'YO TIMOTEO QUE BECANEJJIIJI PEA'AI

2 TIMOTEO

Pabohua Eyacuiñajjija esohui tehue ca o'oyanaje Timoteo que

1 ¹Timoteo, eyaya esohui mi que tehueje o'oya. Eya Pabo, Jesosa Quitoja esohui huohuijji. E'e, Eyacuiñajjija eya huoojea canaje ojaya esohui huohui'yohua jama ba'a: Jesosa Quito nijje e'e jojo nei jjapeequianijo, onijje eyajo eseaya ba'e tiitii mee caje'yo Eyacuiñajjija.
²Timoteo, miya ecuea quea jea nee nee, ecuea ebacua ejja jayojja jama Jesosa Quito nijje jjapeequianijo. ¡Eyacuiñajjija esejaya Chii ai eyajo aniya, Jesosa Quitohua esejaya Emeshi Mese neiya pe'aitya miya cajaahuana cahua quea pame nee! ¡Mijo cajashahuabaquiahua quea pame nee! ¡Miya quea bei nee capo mee cahua pe'aai!

³Eyacuiñajjijo eya quea bihui nee chacochacoani bicho'ama nei nei. Jamaya ecuea etiiquiana cuana pea'ai poa. Timoteo, miya quea ja'a nee ba'yanijo, eyaya Eyacuiñajji janobajjima nei bihuiña mijo. E'e, mijo pea'ai eya onijje mimi huicha'a huicha'ani ojjaña mecajje, ojjaña pojajao pea'ai.
⁴Miya pa neineinaje e poqui'yajo. Maya ecuea pajea'yo jjima. Eya mi ba sa neinei poani quea bihui nee epojji. ⁵Eya jjashahuabaquiani jama ba'a: Miya Eyacuiñajjija esohui jayojja jama aña quea bihui nee. Ecuea eba yahuajo miquea yano mese Moina bajjaniya, miquea enaese Enise pea'aiya Eyacuiñajjija esohui jayojja jama aca poa quea bihui nee. E'e, jamajjeya o jayojja jama jjeya miya Eyacuiñajji nijje e'e jojo nei jjapeequianini.

⁶Jamajjeya eyaya miya huohui o'oyaña jama ba'a: Yahuajo mijo Eyacuiñajji nijje mimi majje eyaya miya huoojeanaje ojaya echacojji epojji. E'e, sapa napa'ajjanaje emeya Jesosaja echacojji quea pame epojji. Jamajjeya Eyacuiñajjija miya Jesosaja epeejji jaahuana sahua cani. ¡Jamaya ojo chaco tiitiicue! ⁷E'e, Edojjoshahua Pameya, Eyacuiñajjija huoojea'yohua eseaya mete'ama po mee cani. Quea ja'a nee Eyacuiñajjijo chaco mee ca'yani. Eseyá

Eyacuiñajji, pea cuana pea'ai quea jea nee po meesahua ca'yani pea'ai. Quea ja'a nee jjashahuabaqui mee cani pea'ai, Edojjoshahua Pameya.

⁸Jamajjeya esejaya Emeshi Mese neijo huohuañajo ja'a quea bicho pojji, miya! Eya onijje jjapeequianijo, dejja quea mase cuaa eya iña majje jeanobia canaje. Eyacuiñajji esohui quea pame nee huohuañajo eya napa cani cuaa. Jamatii ja'a quea bicho pojji ejo! Chojja. E jayojja jama napa cajo, ja'a oe quea mete pojji! Eyacuiñajjiya miya quea ca'a po meesahua canijo, ja'a ojaya esohui huohui pajea'yojjii! ⁹Ohuaya esejaya mimishi cuijea ca'yonaje. Jamajjeya cu aqui yasijje epoqu'iyojji pojjeama. Iyaa ca'yonaje ojo quea pame nee eba'e'yojji, ma ojaya epeejjime epo'yojji. ¿A'a eseaya quea pame poanijo, ohuaya eseaya iyaa ca'yonaje onijje ejjapeequijji? Chojja. Yahuajo nei nei meshi pana jjimahuajo Eyacuiñajji jjashahuabaquia poa Jesosa Quito huoojeajji esejaya mimishi cuana cuijeal'yojji. ¹⁰E'e, yahuajo esejaya ba jjima poa ojjaña cuana Eyacuiñajjiya quea jea nee acani. Jjeya ca ca esejaya eba. Ese jaahuanajji Jesosa Quito poeyanaje. Mano'yonaje. Mano'yo majje shequi o'yanaje. Eyahuasijje jjequisohua ca'yonaje. Eseyaa ohuaya jama acanaje ba'a: —Mano'yo majje miquianaya cuana ba'e tiitiji'e'yo Eyacuiñajji nijje —Jesosaa acanaje.

Jamajjeya ohuaya mete'ama po mee caje'yo eseaya mano'yanijo. Ba'e tiitii mee caje'yo ojaya esohui quea pame nee ba mee canijo. ¹¹Ma esohui quea pame nee Jesosa Quitoja eyaya huohuaña. Eyacuiñajjiya eya huoojea ca'yonaje ojaya esohui huohuiya, ojjaña cuana jjabahuejjaqui meeya pea'ai. ¹²Ma esohui huohuañajo, pea cuaa eya napa cani. Quea nee poani eya. Jamatii eya bicho'ama Jesosa Quitojo. Eyacuiñajji ecuea eba nei nei. E'e jojo nei oya ese jaahuanajji, de. Jamajje ecuea eba ojaya esohui jayojja jama eya ameesahua tiitii caje'yo ohuaya, Jesosa poe o'oyajo.

¹³Ma esohui e'e nei Jesosa Quitoja eyaya miya ba meenaje. ¡Ecuea esohui jayojja tii huohuicue! Jamaya poanijo ¡Jesosa Quito shajja'ajjacue! ¡Eyacuiñajji quea jea nee acue pea'ai, jamaya Jesosa Quitohua miya po meesahua canijo! ¹⁴Ohuaya miya jiquio esohui quea pame neejo jjabahuejjaqui meesahua canaje. ¡Ma esohui jayojja jama po tiitiicue! Edojjoshahua Pameya esejo nequi tiitiianiya miya jamaya asahua caje'yo.

¹⁵Quea huiso dejja Asia meshijo ba'e enijje jjapeequi pajea'yonaje. Pijeno, Emojene pea'ai jamaya poanaje. Maya miquea eba. ¹⁶Ecuea Emeshi Mese neiya dejja Onesipono bajjani, ojaya huapa pojjeama pea'ai caba'e meesahua cahua quea pame nee. Ohuaya eya quea jaji nee po mee canaje. Pea dejja cuaa eya jeanobia canaje. Jamatii oya, Onesipono ejo bicho'ama poanaje. ¹⁷E'e, Shoma cuiñajji yasijje poe majje, eya sa'ajja neinei'yo majje eya ba ca'yonaje, Onesiponohua. ¹⁸Jamajjeya esejaya Emeshi Mese neiya poe o'oya majje Onesipono sosequia caje'yo. Jamajjeya ohuaya Onesipono jaahuanajji quea pame nee. Dejja mimishi ca ca quea nee po mee caje'yo tii tii. E'e, miquea eba eya Epeso cuiñajjiyo nequijo, Onesiponohua eya quea pame nee ba'e meesahua ca poa.

¡Echacojji quea pame jayojja jama pocue Jesosajo!

2 ¹E'e Timoteo, miya ecuea ebacua ejja jayojja. Miya quea ca'a po mee cani Jesosa Quitohua, ese jaahuanajjiya. Jamajjeya ¡quea pame tiitii jjapeequicue onijje! ²Miyaya ecuea esohui shajja'ajjanaje. Quea huiso dejja shajja'ajja canaje pe'a'i. ¡Jiquio esohui huohuicue miyaya Jesosaja epeejji e'e jojo nei yasijje! Ona jjabahuejaqui majje ¡ma esohui quea pame che jja oma oe huohui meesahuacue quea pame nee pea cuana huasijje! ³Pea cuaa miya napa caje'yo Jesosa Quito nijje jjapeequianijo; jamatii ¡a'a quea mete pojji! ¡Jjapee tiitiquicue e'e jojo nei! ¡Emeshi Mese neija echacojji quea ca'a pocue! ⁴Jama ba'a: Dejja echacomeejjiyo chaco canijo pea nijje chacochaco sa po ajja. Chojo. Ohuaya ojaya echacomeejjiya esohui jama chaco cani. ¡Jamaya oe pocue; Jesosa Quito nijje chacochacoanijo a'a eshahua nijje pojji! ⁵Jamajjeya jama poani pe'a'i ba'a: Dejja janobajjima nei cuajicuaji neineiani pea cuana nijje. Joya ebionei cuajicuaji cooani oe aquiana quea pame quia cani sosema!. Jiquio ecua ohua huohui caje jama mi cuajicuajijo, shajjama' poajo, aquiana equiajji pojjeama. ¡Jamaya jjashahuabaquicue Jesosa Quitojo chacoañajo; janobajjima chacocue! ¡A'a shajjama' jayojja jama pojji! ⁶Dejja quejo janobajjima nei chaco'yo majje, que bana majje pe'a'i ohuaya ebionei bobo cachicha cahua ojaya e'ijjajji. Jamajjeya ¡a'a quea huea pojji Jesosa Quitojo chacochacoani! ⁷¡Jiquio ecuea esohuiyo jjashahuaba neineiquicue, miya! Esejaya Emeshi Mese neiya miya jiquio esohui ba meesahua caje'yo.

⁸Jamajje jjashahuaba tiitiiquicue Jesosa Quitojo! Eyacuiñajjiya Jesosa Quito shequi mee ca o'oya poa. Ojaya Jesosaja etiiquiana yahuajo nei nei ba'yá poa Dabi bajjani etiiquianaja emeshi mese poa. ⁹Jiquio esohui quea pame nee Jesosa Quitojo eyaya huohuaña. Jamajjeya dejja tai cuaa eya napa canaje, dejja quea mimishi poso eya jeanobia canaje. Jamatii. Dejja tai cuanaja eya Eyacuiñajjiya esohui ehuohui pajea mee'yojji pojjeama. ¹⁰Jamajjeya dejja cuaa eya napa cajje jamatii eya quea ca'a tii tii Jesosajo poani. Jamajjeya eyaya ojjaña Eyacuiñajjiya ebabaca cuana quea ca'a po meesahuaje'yo. Jamajjeya Jesosa Quitohua onajaya mimishi cuana cuijea neinei caje'yo. Oya cuana nequi tiitii mee caje'yo eyajo quea ja'a nee nee ese jayojja. Eyacuiñajji nijje nequi tiitije'yo.

¹¹Jiquio esohui e'e nei jama ba'a:

"Eseyaya Jesosaja epeejji jjejojo pea cuaa mano mee ca'yajje Jesosa nijje eshe tiitii ba'eje'yo eseyaya eyajo. ¹²Jjeya onijje jjapee tiitiiquianijo quijje Jesosa nijje ona huoojea'yojji poaje'yo. Jjeya eseyaya cajaa ajje ohuaya eseyaya quijje cajaa acaje'yo pea'a'i.

¹³Eseyaya ojaya esohui atiitii ajjajo, jamatii ohuaya eseyaya pajea'yo ajja. Ojjaña ojaya esohui jayojjaya jama acaje'yo tii, ohuaya. Oya esohui siajje a'ajja nei nei".

Echacojji quea pame nee

¹⁴ ¡Jamaya miyaya ecuea ehuohui'yo cuana esohui huohujji cuana huasijje huohui huicha'a huicha'acue! Janobajjima nei huohuicue jama ba'a: —Emeshi Mese neiya miya ba neinei canijo, ¡a'a mimicuiajeanobiajeajji!

Jjamimicuiajea nobiaejaquijji ca ca quea tai. Jamaya poanijo mi shajja'ajjajji poani cuana poquiquehua chana! ¹⁵ ¡Quea ja'a nee nee oe jjashahuabaquicue quea pame nee Eyacuiñajji echacojji! Jamajjeya oya mijo quea jaji nee poaje. E'e, ¡miyaya ojaya esohui e'e nei huohuicue quea ja'a nee! Jamajjeya miya ojaya echacojji quea pame nee poaje, bicho'ama. ¹⁶ Beca cuanaja Eyacuiñajji boti'ama, de. Jamajjeya ¡a'a shajja'ajjajji onajaya mimi quea tai Eyacuiñajji! Ma esohui tai shajja'ajja canijo pea cuaa Eyacuiñajji ba jjima acaje. E'e, esohui tai shajja'ajja majje jjashahuabaqui ajja poaje. ¹⁷ Tajjaja ijija biso nei anicuayani, quijje ijija huesha cani. Tajjaja ijija jayojja jama poani esohui quea tai. Esohui huohujji taija esohui quea tai shajja'ajja majje quijje quea tai nee poaje'yo quea huiso cuana. Jjapeequi pajea caje'yo pojja'a. Jamaya esohui huohujji nisho cuana Pineto bajjani, Imeneo pealai poani. ¹⁸ Ohuaya esohui e'e nei pajea ca'yonaje. Siajje poani jama ba'a: —Ojaya epeejji mano'yajo, Eyacuiñajjiya eyami eyacua aje oe e'a'yoji pojjeama —acani.

Jamajjeya beca cuana ma esohui taijoya poquiquehua mee cani. Eyacuiñajjiya esohui e'e nei pajea mee cani pealai, ma esohui huohujji nishohua. ¹⁹ ¡A'a oya cuana shajja'ajjajji! Eseyá ca ca Eyacuiñajji nijje jjapeequi pajea'yo ajja. Eyacuiñajjiya esohui quea ja'a neejo jjashahuabaquiani. Equi yamajjana quea ca'a nee nee nequi jayojja jama Eyacuiñajjiya esohui nequi tiitiije'yo. E'e, yahuajo nei nei esohui tehue mee ca poa jama ba'a: “Esejaya Emeshi Mese neija ebacua cuana ojaya eba ache ese ejja e'e jojo nei poaje”. Pea tehue mee ca poa jama ba'a: “¡Eyacuiñajjiya epeejji neiya mimishi cuana capajea neinei cayahua!” Jama yahuajo nei tehue meemeya aca poa, Eyacuiñajjiya.

²⁰ Cuanaya equi tii tiijo quea huiso aquiana cuana yani: ena ishiji cuana, ena nequijji cuana, ena shoji natajee oshe quea nahue siyosiyo yani. Ena nequijji mei huo'o quea ca'a yani aquiana quea nahue iyajji. Acui epejja cuana yani, meshimisi pealai yani, ca'a'ama, aquiana nahue'ama iyajji. ²¹ Jiquio ecua ena nequijji ca'a'ama jayojja jama eseya poaje mimishijo. Eseyá mimishi cuana pajea'yo majje ena nequijji quea nahue jayojja jama poaje'yo. Jamajjeya mimishi pajea'yojji chacoje'yo Eyacuiñajjiyo. E'e, quea pame nee poanijo Eyacuiñajjiya eseya huoojea caje'yo ojo chacohua. Jamaya eseya Eyacuiñajjiya tii poaje'yo.

²² Jamajjeya ¡shacuima' nequia ejjashahuaba taiquijji jama a'a pojji miya! Jiquio jama quea bihui nee po huicha'acue ba'a: ¡Quea ja'a ba'ecue! ¡Eyacuiñajjiya esohuijo jjabahuejja neineiquicue! ¡Pea cuana quea jea nee

acue! ¡Ojjaña nijje quea bei pocue! Beca cuana quea bihui nee Eyacuiñajji nijje mimiani. Quea ja'a nee jjashahuabaquiani pe'a'i. ¡O jayojjaya oe pocue! ²³ Esohui quea tai, quea quehua pe'a'i a'a shajja'ajjajji! Ma esohui shajjal'ajja majje dejja cuana jjamimicuajea nobiajeaquije. Jamaya miquea eba. ²⁴ Miya Eyacuiñajji echacojjii poanijo ca ja'a jjamimicuajea nobiajeaquijji! Chojo. ¡Ojjaña nijje mase'ama pocue! ¡Jesosa Quitoja esohui cuana oe huohuicue quea pame nee! ¡A'a tecuea cuajiji pe'a'i! ²⁵ Pea cuana esohui e'e neijo maimaianijo, ¡quea bei esohui huohui o'oyacue! Jamajjeya e'e pojja'a Eyacuiñajjiya ojaya esohui e'e neijo jjabahuejjaqui meesahua caje'yo oya cuana; jjashahuaba taiqui pajea mee caje'yo. ²⁶ Jamajjeya oya cuana quea ja'a nee jjashahuabaquije o'oya pojja'a, Eyacuiñajji nijje jjapeequije'yo. Joya esohuijo mimijajani aje oe poquiquehua'yonaje de, Edosiquiana nijje. Ohuaya oya cuana dasia ca'yonaje o jayojja epo'yojji. ¡Oya cuana Eyacuiñajji nijje cajjapeequiahua! E'e, dejja ibia me' ijja mee cani. Ibia eme' ijja meeani, eme' jjequihuijjiajea majje poquiani. Eme' ijja mee'ajja jjabahuejjaquiani. Jiquio ecua ibia eme' ijja mee'ajja poe beca'yo ajja jayojja jama eshahuaja epeejjiya dasia cajje eshajja'ajja becaqui'yojji pojjeama; jjabahuejjaquiani oya pojja'a.

Epoja apoa epojjijo

3 ¹Timoteo, jiquio ba neineicue pea'ai ba'a: Epoja cuana beshahua nei oe poajo, Jesosa Quito poe o'oya jjimahuajo, eba'ejji quea camaja nee nee poaje ojjaña cuanaja dejja quea mimishi nee nee poanijo. ²E'e, dejja cuana ojaya aquiana cuanajo, ojaya eba'ejji, ejjeshejji jo pea'ai quea nahue poaje'yo. Quea dejja tai poaje'yo, quea nishehui poaje'yo epona cuana pea'ai. Bicho'ama jjejojo quea miminaa ojaya ejjashahuubaquijji jo poaje'yo tii tii. Eyacuiñajji esohui huohuijji shajja'ajja sa po ajja poaje'yo. Mimijajiji cuana pea'ai poaje'yo. Oja chijja, enaese pea'ajja esohuijo shajjama' poaje'yo oya cuana. Ejeajji etii cuana, enaese etii pea'ai boti'ama acaje'yo: —Ecuea miya ebobiajji pojjeama —acaje'yo.

Eyacuiñajji esohui jama a sa po'yo ajja poaje'yo. ³Ojaya huapa pojjeama cuana boti'ama acaje'yo pea'ai. Quea sapa ca'a jjejojo jjashahuabaqui ajja pea'ai. Pea cuanajo siajje poaje'yo. Mimishi cuana epajea mee'yojji pojjeama. Quea mase ibia jama poaje'yo. Mimipanajea panajeaje'yo pea nijje. Dejja quea pame nee boti'ama acaje'yo, cajaa acaje'yo pea'ai. ⁴Pea nijje jjapee nishoquije'yo. Jjabahuejjaqui jjima tii tii poaje'yo. Jama siajje pome poaje ba'a: —Eya ca ca oe che oeya quea pame nee —nisho poaje.

Quea mimijjequiya jjejojo Eyacuiñajji boti'ama poaje'yo. ⁵Eyacuiñajji nijje jjapee nishoquije'yo. Jamatii ojaya esohui jayojja jama oya po ajja poaje. Timoteo, ja'a onijje jjapeequijji! ⁶Jjeya nei esohui huohuijji tai cuana equi cuana huasijje poqui majamaja majje siajje poani. Epona jjabahuejjaqui ja'a jjima cuana dasia cani. Jiquio epona cuana aje oe quea mimijjequiea nee nee; quea ja'a jjashahuubaqui'yo ajja, de. Ma dejja tai

cuana esohui tai shajja'ajja sa poani. ⁷Oya cuana ojjaña esohui quea quehua shajja'ajjajji jjejojo Jesosa Quitoja esohui e'e neijo jjabahuejjaqu'il'yo ajja. ⁸Jamaya yahuajo nei nei ejiojjicuajji cuana Janese, pea Jamese cuanaya nequia poa. Moisesija esohui shajja'ajja sa po ajja poa. Jjeyahua nei esohui huohuijji quea mimishi Janese, Jamese pea'ai jayojja jamaya yani. Oya cuana esohui e'e nei Jesosa Quitoja shajja'ajja sa po ajja pea'ai. Quea jjashahuubaqui tai nee nee poani pea'ai. Jamajjeya Eyacuiñajji oya cuana cajaa acaje'yo, Jesosa Quito nijje jjapeequi sa po ajjajo. ⁹Quijje pishana quea huiso dejja jama acaje'yo ba'a: —E'e, joya esohui huohuijji tai cuana jjadasiaqu'il'yojji, ejiojjicuajji Janese, Jamese pea'ai jayojja poani —acaje cuaa. Jamajjeya jjadasia mee majamajaqui ajja poaje.

Paboja esohui apoa epoji ni Timoteo huasijje

¹⁰Timoteo, miya enijje nequinajejo eya ca ca miquea eba nei nei poanaje. Ojjaña ecuea ehuohui'yo miquea eba pea'ai. Ojjaña ecuea eba'e'yojji miquea eba pea'ai. Ecuea ejjashahuubaqui'yojji quea pame nee. Miquea eba eya Eyacuiñajji epeejji nei poani. Pea cuaa eya napa cajje ona nijje quenequene ajja poa. Ecuea pea cuana quea jea nee. Eyaya mete'ama Eyacuiñajji chaco tiitii'yonaje. Jamaya miquea eba pea'ai. ¹¹E'e, miquea eba ecuea ehuohuijo pea cuaa janobajjima nei eya napa ca'yonaje Atioquiajo ba'e cuaa, Iconiojo ba'e cuaa, Nisatajo ba'e cuaa pea'ai. Napa majamaja cajje eya quea nee nee poanaje. Jamatii ecuea Jesosa Quitoja esohui pajea'yo jjima. Emeshi Mese neiya eya jaahuana tiitii ca'yonaje. Jamaya miquea eba, Timoteo. ¹²E'e de, ojjaña joya Jesosa Quito nijje jjapee neineiquiani pea cuaa napa caje. ¹³Edasiajji cuana jjeyahua nei quea tai. Quijje ca ca quea tai nee nee poaje. Eshahua ma deja tai cuana nijje sijasse poanaje. Jamajjeya ma edasia'yojji cuaa pea cuana dasia caje'yo pea'ai. ¹⁴Timoteo, miquea eba miquea esohui huohuijji cuanaja ehuohui'yo e'e nei. Ma ehuohui'yo cuanajo miya jjabahuejjaqu'il'yonaje. Jamajjeya ¡maya esohui shahuaba tiitiicue; a'a pajea'yojji! ¡Jamaya oe acue! ¹⁵Miyaya esho'yahuua Eyacuiñajji esohui quea pame nee ba neinei'yonaje. Ojaya esohui etehue'yo miquea eba. E'e, ma etehue'yojji miyaya baje'yo jama ba'a: Eyacuiñajjiya miya jaahuana caje'yo miya Jesosa Quito nijje jjapeequianijo.

¹⁶Eyacuiñajjiya dejja pame cuana ojjaña ojaya esohui tehue mee ca'ya poa. Eseyaya jiquio esohui huohuijje pea cuana Jesosa Quitojo jjabahuejjaquije'yo, ojaya mimishijo quea yeno poaje'yo pea'ai, ojjañaa ba caje'yo ache esohui e'e nei pojjeama pea'ai. E'e, ma esohui huohui majje ojjaña quea boejea nee ba'e meesahuaje'yo. Eba'ejji quea pame ba meesahuaje'yo pea'ai. ¹⁷E'e, ma esohui etehue'yo quea ja'a nee ba majje Eyacuiñajji echacojji quea ja'a nee poaje'yo. Ojjaña quea pame nee poaje'yo pea'ai Eyacuiñajji nijje, esohui ba neinei majje.

Pabo Eyacuiñajjiya sosequia caje'yo

4 ¹Eyacuiñajjiya, Jesosa Quitoja pe'a'i ecuea esohui eba. Jesosa Quito poe o'oya majje ojjaña huoojea'yoji poaje'yo. Yahuajo mano'yo cuana, jjeya eshe nequi cuana pea'ai sosequia caje'yo. Ojjaña ojaya epjeeji cuana quea pame poani ba'e tiitii mee caje'yo omijje eyajo, Eyacuiñajjiya. Mimishi cuana ca ca quea nee nee po mee caje'yo cuaquijo. ²Jamajjeya eyaya miya huoojeaña jama ba'a: ¡Eyacuiñajjiya esohui oe huohui tiitiicue jjeya, miyaya! Dejja cuana jjashajja'ajjaqui sa po ajjajo ¡jamatiya huohuicue! Mimishi cuana acanijo ¡tecueajeña jayojja acue! Jama acue ba'a: “¡A'a quea tai pojji! ¡A'a quea mimijkequiea pojji!” Pea cuana quea pame poanijo jama acue ba'a: “E'e, ¡jamaya Eyacuiñajjiyo ba'ecue!” ¡Quea pame, quea mimi bei nee huohui tiitiicue ojjaña Eyacuiñajjiya esohui! ³Quijje ca ca dejja cuana esohui e'e nei shajja'ajja sa po ajja poaje. Quea mimishi ba'e sa poanijo oya cuana quea huiso esohui huohuijji tai iyaa caje ojaya ejjashahuabaqui'yojjiyo huohuiya. ⁴Eyacuiñajjiya esohui e'e nei shajja'ajja sa po'yo ajja poaje. Etiiquianaja ehuohui'yo quea quehua cuana shajja'ajja caje'yo. ⁵Timoteo, ¡miya ca oe quea ja'a nee nee jjashahuubaquicue ojjaña pojjajo! Peaa miya napa cajje ¡jamatií quea ca'a, mete'ama pea'ai pocue! ¡Eyacuiñajjiya esohui Jesosa Quitoja huohui tiitiicue! ¡E'e jojo nei ojjaña ma ecua eyaya miya huohuinaje jamaya acue!

⁶E'e, ecuea echacojji Eyacuiñajjiya esohuijo jjeya beshahua nei apoa poanijo, dejja mimishi cuaa eya mano mee caje'yo. Ijjiacajji jayojjaya mano mee'yome acaje'yo cuaa. Quijje pishana, jjeyahua nei pojja'a eya poquije'yo eyahuasijje Jesosa Quito que ba'e'yhua. ⁷Eya janobajjima nei chacochoaco'yonaje Eyacuiñajji nijje. Ecuea echacojji Jesosa Quitoja apoa. Eyacuiñajjiya esohui jayojja jama a'yonaje e'e jojo nei eyaya. Jamajjeya eya onijje quea ja'a nee ba'yanijo, eya sosequia caje'yo eyajo. ⁸Esejaya Emeshi mese nei nijje quea pame nee chacocharonajejo, eya quea huiso sosequia caje'yo poe o'oya majje. Ohuaya eya huohui caje'yo jama ba'a: —Miya ecuea echacojji quea ja'a nee poanaje.

E'e, ojjaña ojaya epjeeji cuaa ma ojaya epoe o'oyajjijo quea bihui neeya ishoa'ajja ca'ani Jesosa Quitohua sosequia caje'yo quea huiso pea'ai.

Pea esohui Timoteo que

⁹Eya ee nei ani. Jamajjeya ijjeyahua nei poecuajicue ee nei anijo! ¹⁰Ecuea epjeeji Quesete poquinaje Janata meshi yasijje. Tito pea'ai poquinaje Damasia meshi yasijje. Dejja Nema bajjani aje oe ojaya aquiana cuana quea boti neejo Eyacuiñajjiyo jjashahuabaqui ajja. E pajea'yo majje e que nequi'yo ajja. Oya poqui'yonaje Tesanonica huasijje. ¹¹⁻¹²Tiquico eyaya huoojea'yonaje Epeso huasijje. Noca ca ca oe enijje nequi. Jamajjeya miya e que poe o'oya majje ¡ecuea epjeeji Macoso jjequicue pea'ai! Ohuaya eya chacosahua caje'yo. ¹³Ecuea daqui moo quea ao eyaya jeana'yonaje

Toasajo, Capoja equijo. ¡Maya jjequi'yocue! ¡Esohui etehue'yo cuana pea'ai ye'yocue! ¡Esohui ejeejo tehue'yo cuana pea'aiya oe ye'yocue jjo!

¹⁴Timoteo, Anejano ma baa huo'o chacojjii poani janobajjima nei mimijajinaje enijke quea mimishi, de. Ojaya mimishijo Jesosa Quitohua oya napa caje'yo quijje. ¹⁵Eseyaya Jesosa Quitoja esohui huohuañajo oya janobajjima nei mimijajinaje pea'ai. ¡Jamajjeya oya ba neineicue! Oya quea tai, de.

¹⁶Dejja etii cuaa eya jeanobia'yo majje iyaa ca o'oyanaje ehuohui'ajjajji ecuea esohuijo. Eya huohui'ajja coo canajejo, ecuea epeejji cuana enijke nequi ajja. E ejeanobiajojo oya cuana quea mete nee nee poanaje. Poquinaje. Eya jea cana'yonaje: —Paboja esohui Jesosa Quitojo e'e nei nei —jamaya huohuime ajjima ecuea epeejji quea meteja jjejojo. Eya nahue jjima onajaya. Eya Eyacuiñajji nijje miminaje ona cuanajo. Jamajjeya e'e pojja'a Eyacuiñajji oya cuana etecueajeajji pojjeama quea mete poanijo. ¹⁷Jamatii Jesosa Quito ecuea Emeshi Mese nei ca ca enijke nequi'yonaje. Ohuaya eya quea ca'a po mee ca'yonaje. Ojjaña ojaya esohui janobajjima nei huohuañajo quea huiiso cuana Jodio pojjeama shajja'ajja mee'yonaje. Pea cuana ibia jama quea mase e quecuia sa poanijo, Eyacuiñajji oya jaahuana ca'yonaje pea'ai. ¹⁸E'e, ojjaña ma dejja mase cuanajo ecuea Emeshi Mese neiya, Jesosa Quitohua oya jaahuana caje'yo. Ohuaya eya eyahuasijje dojosohuaqui caje'yo onijje ba'e'yohua. Jomajo oya ojjaña huoojea'yojji ca ca oe quea ca'a nee nee. ¡Oya ojjaña dejja cuaa cabihuia tiitii cahua! ¡Jamaya capo'yahua!

¡Ojjaña nijje mimicue quea bihui nee ejo!

¹⁹Aquina, ojaya ehuanase Pisina pea'ai, Onesipono, ojaya huapa pojjeama cuana pea'ai jama huohuicue miyaya ba'a: —¿Achajja acuae nequiana so'o?

²⁰Dejja Enasito bajjani nequinaje Conitojo. Topimo eyaya jeana'yonaje Mineto cuiñajjijo emano jaa.

²¹¡Poecuajicue e que, eeno po jjimahuajo!

Dejja Eomono bajjani, Ponete pea'ai, Nino pea'ai, Caonia pea'ai, ojjaña Eyacuiñajji epeejji cuana pea'aiya miya huohui'ajja cani jama ba'a: —¿Achajja acuae mi ani so'o, de? —ojaya ebajji nequiana.

²²¡Emeshi Mese neiya Jesosa Quitohua miya quea ja'a capo mee cahua! ¡Ohuaya ojjaña miquianaya cajaahuana cahua quea pame nee! ¡Jamaya capo'yahua!

Mahuiso. Eyaya Pabohua esohui tehue'yonaje. Apoa.

PABOJA ETEHUE'YO TITO QUE TITO

Pabohua esohui tehue canaje Tito que

1 ¹Tito, eyaya jiquio esohui tehueaña mi que miquea ebajji. Eya, Pabo Eyacuiñajjijo chacochacoani oja yajjijo. Jesosa Quitohua eya huoojea canaje ojaya epereeji cuana huasijke ojaya esohui huohuiya. Jamajjeya eyaya Eyacuiñajjija babaca'yo cuana onijje jjapeequi meesahuaña e'e jojo nei. Oya cuana Eyacuiñajjija esohui e'e jojo nei ba meesahuaña pe'aai. Jamajjeya oya cuana ma esohui jayojja jama ba'e meeje quea ja'a nee. ²E'e, Jesosa nijje e'e jojo nei jjapeequianijo, Eyacuiñajjija ojjaña eseya ba'e tiitii mee caje'yo onijje eyajo. Jamaya Eyacuiñajjija huohui ca'ya poa meshi pana jjimahuajo. Oya ca ca oe siajje po aija nei nei. ³Jjeya nei ca ca Eyacuiñajjija eseya ojaya esohui quea pame nee Jesosajo ba mee ca'yonaje. E'e, ohuaya, esejaya ejaahuanajjija eya huoojea ca'yonaje jama ba'a: —¡Poquicue miya; ecuea esohui quea pame nee huohuicue ojjaña dejja cuana huasijke! —jamaya ohuaya eya acanaje.

⁴Tito, eyaya jiquio esohui tehueaña mi que, miya e jayojjaya Jesosa nijje jjapeequianijo. ¡Eyacuiñajji esejaya Chii ai eyajo aniya, Jesosa Quito ese jaahuanajjija pea'ai miya cajaahuanca cahua quea pame nee! ¡Miya quea bei nee capo mee cahua pea'ai!

Jesosaja epereeji jaahuanajji cuana quea pame nee caba'yahua

⁵Tito, yahuajo eseya Queta nasijo Eyacuiñajjija esohui huohui nequinaje. Jamatii Eyacuiñajjija esohui huohui jeyojeyo jjima poanaje. Jamajjeya eyaya miya nequi mee'yonaje Queta nasijo Jesosaja epereeji jjabahuejja meequiviji ojjaña ojaya esohuijo. ⁶Jamajjeya ojjaña cuiñajji yasijke Jesosaja epereeji etii babacacue Jesosaja epereeji jaahuanajji epoji! Ecuea esohui Jeosaja epereeji jaahuanajjijo huohuicue jama ba'a: —Jesosaja epereeji jaahuanajji caba'yahua jama ba'a: ¡Quea ja'a nee caba'e tiitii'yahua, mimishi'ama! Jamajjeya o ba majje onaaya jama acaje ba'a: "Oya e'e jojo nei Eyacuiñajjija esohui jayojja jama ba'yani". ¡Shacujji

poaniya ehuanase oe nei cahuana cahua quea ja'a nee! ¡Oja bacua cuana Jesosaja epeejji cuana capo'yahua, shajjama' pojjeama capo'yahua! Jamajjeya oya cuana ba majjeya onaya mimimimi ajja jama ba'a: "Oja bacua cuana quea mimishi nee nee, shajjama' pe'a! poani".⁷ Jesosaja epeejji jaahuanajjiya ¡ojjaña ojaya epeejji cajaahuana cahua, caba'e meesahua cahua pe'a! Jamajjeya ¡quea pame nee caba'yahua, mimishi'ama! Jamajjeya onaaya oya eniñebajji pojjeama. ¡A'a jjashahuuba taiquijji! Jama ba'a: "Eya ca iña quea pame nee; pea cuana quea pame pojjeama". ¡A'a quenequene cuajiji! ¡A'a ishi'ishiji! ¡A'a pea nijje jjacuiaquijji! ¡A'a quea dejja tai pojji pe'a!⁸ E'e, Jesosaja epeejji jaahuanajjiya ¡pea cuana nijje cajjapeequiahua; ojaya equijo caba'e mee cahua joya oja cuiñajji yasijje poeyajo! ¡Ohuaya pea cuana quea jea nee ca'a cahua! ¡Oya quea ja'a nee cajjashahuabaquiahua quea pame nee eba'ejji! ¡Ohuaya emeshi meseja esohui jayojja jama ca'a cahua! ¡Eyacuiñajjiya esohui jayojja jama caba'yahua tii! ¡Cajjashahuuba titiuiquiahua mimishi'ama eba'ejji!⁹ E'e, ¡Jesosaja epeejji jaahuanajji cuana esejaya esohui jayojja jama caba'yahua tii! Jamajjeya ojaya epeejji cuana Jesosajo e'e jojo nei huohui majje Jesosa nijje jjapee neineiqui mee caje'yo. Onaya esohui e'e nei Jesosajo siajje poani. Oya cuanaa jjabahuejjaqui'yo majje siajje poani pajea caje'yo pea'ai. Jamaya eyaya, Pabohua huohuaña Jesosaja epeejji jaahuanajji cuanajo. ¡Jamaya caba'yahua oya cuana!

¡Shajjama' cuana siajje poani pajea mee'yocue!

¹⁰ E'e Tito, ¡Jesosaja epeejji jaahuanajji huoojeacue esohui e'e nei huohuiya! Quea huiso Jodio cuana Jesosa nijje jjapeequinaje. Jamatii oya cuana esohui huohuijji nisho poani. Oya cuana shajjama' poani, pea cuana dasia cani, siajje poani jama ba'a: —¡Ojjaña Jesosaja epeejji cuana Moisesija esohui etehue'yo jayojja jama caba'yahua! ¡Cuiishasha biso nei cajehuisejjajea cahua! Majoya aje oe Eyacuiñajjiya oya cuana ba caje emimishi cuijea'yo —jamaya onaaya pea cuana dasia ca'yani.

¹¹ Tito, miyaya Jesosaja epeejji jaahuanajji huoojea majje joya cuana ma esohui huohuijji nisho cuana huohui pajea mee'yocue! E'e, esohui huohuijji nisho cuaa beca Jesosaja epeejji cuana siajje po majje jjashahuabaqui quehua mee cani Jesosajo. Oya cuana siajje poani Jesosaja epeejji cuana nijje bejjo jjeshejji.

¹² E'e Tito, ojjaña Queta nasijo ba'eca cuana quea mimishi nee nee. Jamajjeya oe esohui huohuijjiya Queta nasijo ba'eya huohui canaje jama ba'a: —Ojjaña dejja cuana Queta meshijo ba'e siajjepoji nei nei poani. Quea mase ijjiacajji jayojja jama poani. Quea huea nee poani, jejje ajja nei nei poani pea'ai —jamaya acanaje Queta dejja.

¹³ Jamaya e'e jojo nei. Jamajjeya ¡Jesosaja epeejji cuana niñeshe'a neineicue! ¡Jjabahuejja meequivie esohui e'e neijo Jesosa Quitojo!¹⁴ Jamajjeya onaaya Jesosaja esohui e'e jojo nei jayojja jama acaje'yo. Jodio etiuiquiana cuanaja esohui e'e nei pojjeamajo jjashajjal'ajjaqui ajja, esohui huohuijji nishoja esohui pajea caje'yo pea'ai.¹⁵ Jesosaja epeejji cuana jjabahuejjaqui'yo majje, quea ja'a

jjashahuabaqui majje quea ja'a nee ba'yani. Beca cuana ca ca quea mimishi jjashahuabaquianijo Eyacuiñajjija esohui jayojja jama a'ajja. Jamajjeya oya cuana quea mimishi ba'yani tii. Jjashahuaba tiitiqiani mimishi epojji. Mimishi po majje quea yeno pojjeama, quea bicho pojjeama poani. ¹⁶Oya cuana, esohui huohuijji nisho cuana siajje poani jama ba'a: —Ecuana Eyacuiñajjija epeejji poani.

Chojja de. Siajje poani. Oya cuana Eyacuiñajjija esohui jayojja jama a'ajja. Eyacuiñajji ojaya ba jjima. Eyacuiñajjija mimishi boti'ama. Jamatii oya cuana quea mimishi ba'yani. Shajjama' poani. Mimishi cuana pajea'yo ajja.

¡Esohui e'e nei huohuicue ojjaña quea pame nee ba'e meeiji!

2 ¹Tito, ¡miyaya oe ojjaña quea pame nee eba'e mee'yojji huohuicue Eyacuiñajjija esohui e'e nei ojjaña cuana huasijke, quea pame nee nee ona ba'ejji! ²¡Edejja tii cuana huohuicue jama ba'a: —¡A'a jja oe huoojji! ¡Quea ja'a nee jjashahuabaquicue quea pame nee eba'ejji! ¡Eyacuiñajjija esohui jayojja jama ba'ecue! ¡Pea cuana quea jea nee acue! Jesosa nijje jjapeequianijo, pea cuua miya napa caje. Jamatii ja'a Jesosa nijje jjapeequi pajea'yojji! —acue!

³Epona tii cuana huohuicue jama ba'a: —¡Jesosaja epeejji quea pame nee jayojjaya ba'ecue! ¡A'a pea cuana niñebajji! ¡A'a ishi'ishijji! ¡Eyacuiñajjija esohui quea pame neejo pea cuana jjabahuejja meequivicue pea'ai quea pame nee eba'ejji!

⁴E'e, epona cuana niñeshe'acue jama ba'a: —¡Quea bei pocue! ¡Miqueahue, mique bacua cuana pea'ai quea jea nee acue! ⁵¡Quea ja'a nee jjashahuabaquicue! ¡A'a quea mimijjequijea jjashahuabaquijji! ¡Miquea equijo chacocue quea pame nee, huea'ama! ¡Pea cuana quea jea nee acue! ¡Miqueahueja esohui shajja'ajjacue pea'ai! Jamajjeya mi ba majje pea cuua huohui caje jama ba'a: “¡Bacue! Jesosaja epeejji cuana quea pame nee poani. Jamajjeya Jesosaja esohui e'e nei, quea pame nee”.

⁶Tito, ¡oya jayojjaya shacuima' nequi cuana huohuicue pea'ai! ¡Jama acue ba'a: —Shacuima' nequi cuana, ¡quea ja'a nee jjashahuabaquicue Jesosa nijje ejjapee neineiquijji mimishi'ama! —jamaya shacuima' nequi cuana niñeshe'a neineicue!

⁷Tito, ¡miya pea'ai ba'ecue quea ja'a nee nee! Jamajjeya miya onaaya ba majje jama acaje ba'a: —E'e, Tito ba'yani quea ja'a nee. Jamajjeya ¡o jayojjaya eba'e!

E'e Tito, jjabahuejjaqui majje jama acue ba'a: ¡Esohui e'e nei huohuicue! ¡Quea ja'a nee oe huohuicue! ⁸Jamajjeya pea cuaa miquea esohui shajja'ajja caje'yo. Miquea esohui e'e jojo nei poanijo, onajaya miya eniñebajji pojjeama. Jamajjeya pea cuana minijje mimijaji majje quea bicho poaje. E'e, miya onaaya ba caje quea pame nee poani; miquea eba'ejji, miquea esohui quea ja'a nee pea'ai.

⁹Tito, jechacojji cuana joya ojaya echaco meejjija yajjijo sosema' chachochacoani huohuicue jama ba'a: —¡Mi huoojeajji poani shajja'ajjacue!

¡Ojaya esohui jayojja jama chacocue! ¡A'a mimijajiji onijke! Jamajjeya oya minijje quea bei poaje. ¹⁰ ¡Ojaya aquiana a'a sii poquiaji! Chojja, ¡quea pame oe ba'ecue! Jamajjeya mi huoojeajji poani jjashahuabaquije miyaya ojaya aquiana jaahuanaje'yo quea pame nee. E'e echacojji cuana, miquianaya jamaya quea pame nee ba'yanojo pea cuaa Eyacuiñajji esohui shajja'ajja caje, esejaya Emeshi Mese neija. Jama acaje cuaa ba'a: "Jiquio echacojji Jesosaja epjeeji poani. Oya quea pame nee, mimishi'ama ba'yani. Jamajjeya Eyacuiñajji esohui quea pame nee. Jamaya cabayahua" acaje cuaa —jamaya echacojji cuana acue, Tito!

**Eyacuiñajjiya eseya ba mee canaje ojaya
ejjashahuabaquijji quea bei ojaaajo poani**

¹¹ E'e Tito, ojaaña Eyacuiñajji quea jea nee neejo ohuaya ojaaña ba mee cani jama ba'a: Ohuaya ojaaña cuana ba'e meesahua cani. Jesosaja epjeeji cuana mimishi cuijea'yo majje ba'e tiitii mee caje'yo eyajo onijke. ¹² Jamajojoya ohuaya eseya jama acani ba'a: —¡Ecuea esohui jayojja jama acue! Jamajjeya eya quea bei poaje miquiana nijke. ¡Ejjashahuabaquijji quea mimishi pajea'yocue! E'e, ¡jiquio meshijo ba'yanojo jjashahuabaquicue quea pame nee! ¡E jayojja poaniya pea cuana quea jea nee acue! ¡Ecuea esohui jayojja jama atiitiicue quea pame nee pealai! —jamaya Eyacuiñajji poani.

¹³ ¡Jamaya ejja'aqui Jesosaja epoe o'oyajji iishoañajo! Esejaya eba oya e'e jojo nei poeje o'oya. Quea ca'a nee nee, quea jeajahua nee nee poeje'yo. Oya, Jesosa Quito ese jaahuanajji, oe nei quea ja'a nee nee. Eyacuiñajji nei oya. ¹⁴ Yahuajo Jesosa esejo mano'yonaje. Onaaya oya iña canaje equecua'yojji. Jamatii Jesosa mimi jjima jama ba'a: —¡A'a eya quecua'yojji! —chojja, jamaya Jesosa mimi jjima.

Ohuaya esejaya mimishijo mano'yonajejo, Eyacuiñajjiya eseya ba cani emimishi cuijea'yo. Jamaya ohuaya eseya ma ojaya epjeejiime po mee ca'yonaje. Jamajoya ohuaya eseya ba'e mee cani ojaya ejjashahuabaquijji jayojjaya quea boejea'yo, mimishi'ama. Jamajjeya ¡quea pame nee nee eba'e tii tii!

¹⁵ E'e Tito, ¡jiquio esohui huohuicue! ¡Jesosaja epjeeji cuana ba'e meesahuacue quea ja'a nee! ¡Shajjama' cuana jjabahuejja meequivie! Jama acue ba'a: —Eyacuiñajjiya eya huoojea canaje oja esohui huohuiya. ¡Jamajjeya shajja'ajjacue mo!

Jesosaja epjeeji cuana quea pame nee cabayahua jama ba'a:

3 ¹Tito, Jesosaja epjeeji cuana huohui o'oyacue jama ba'a: —¡Miquea emeshi meseja esohui jayojja jama acue! ¡Mi huoojeajji poanija esohui jayojja jama acue pealai! E'e, ¡miquianaya Jesosaja epjeeji cuana poaniya quea pame nee atiitiicue huea'ama! ² ¡A'a pea cuana niñebajji! ¡A'a jjamimicuajea nobiajeaquijji pea cuana nijke! ¡Ojaaña nijke quea bihui pocue; ba'e meesahuacue quea bihui nee! ³ ¡Ojaaña nijke quea bei nee pocue! ¡A'a quenequene cuajiji! E'e, yahuajo Jesosa nijke jjapeequi jjimahuajo eseya quea mimishi poanaje pealai ona jayojjaya.

Jjeyá ca chojja. Yahuajo eseaya jjashahuuba taiquinaje. Shajjama' pea'ai poanaje. Esohui huohuijji nisho cuaa eseaya dasia ca'yonaje. Yahuajo eseaya mimishi pajea'yo sa poanaje. Jamatii pajea'yo jjima poanaje. Jamaya Jesosaja epeejji pojjeama jayojja jama poanaje, quea mimishi boti nei. E'e, yahuajo Jesosa nijje jjapeequi jjimahuajo eseaya jjashahuuba tiitiquinaje quea mimishi epojji. Quea dejja tai poanaje; onajaya aquiana jea banaje. Pea cuana boti'ama nei nei poanaje. Eseya onajaya boti'ama nei nei poanaje pea'ai. Jjasoseaquijji ponequinaje. Jamaya aje oe eseaya yahuajo ba'ya poa. ⁴E'e, yahuajo eseaya quea mimishi ponequinaje. Jamatii ese jaahuanajjiya, Eyacuiñajjiya eseaya ba mee canaje ojjaña ojaya quea boti nei nei. Jamajjeya ohuaya ojjaña quea jea nei acani. ⁵E'e, Eyacuiñajjiya eseaya mimishi cuijea ca'yajje eseaya ba'le tiitije'yo eyajo. Eseya quea pame poanijo pojjeama ohuaya eseaya mimishi cuijea ca'yonaje. Chojja, chama' joya quea pame nei mimishi'ama ba'yani. Jamatii Jesosa eseja mimishijo mano'yonajejo, Eyacuiñajjiya eseaya mimishi cuijea ca'yonaje. E'e, Eyacuiñajji quea quene tii tii pojjeama ese nijje poanaje; eseaya ojaya quea jea nei poanaje. Jamajjeya ohuaya eseaya mimishi cuijea'yo majje Edojoshahua Pame ese que dobiqui mee ca'yonaje eseaya queabihui nee epoji. Ohuaya eseaya ba'le meesahua cani Eyacuiñajjiya esohui jayojja, yahuajo jama pojjeama. ⁶E'e, Jesosa Quito eseaya mimishijo mano'yonaje ese ba'le tiitii mee'yojji. Majoya Eyacuiñajjiya Edojoshahua Pame huoojea ca'yonaje ese que dobiquiya, ese quea pame nei ba'le meesahuaa. ⁷Jamajjeya eseaya ojaya bacua cuana poanijo ohuaya eseaya ba'le tiitii mee caje'yo onijje eyajo. E'e, eseaya Eyacuiñajjiya quea jea nei acanaje; ohuaya huohui canaje jama ba'a: —Jesosaja epeejji cuana eyaya baña mimishi'ama, emimishi cuijea'yo.

⁸Tito, jiquio esohui ecue etehue'yo e'e nei. Jamajjeya ;jiquio esohui huohui neineicue ojjaña Jesosaja epeejji cuana huasijje! Shajja'ajja majje onaaya quea pame nei atitii caje'yo. E'e, jiquio esohui quea pame nei. Shajja'ajja neinei majje ojjaña cuana quea pame nei ba'eje'yo. ⁹Jamatii beca cuana ecue sohui jayojja jama ba'le ajja, quea pame ba'le ajja. Oya cuana aje oe jjamimicuajea nobiajeaquiani onajaya esohui quea quehuajo, Jodio etiiquiana cuanajo, Moisesija esohui etehue'yojo pea'ai. E'e, jamaya quea tai. ;A'a ona jayojja jama pojji, Tito! Jamaya po majje miquea pea cuana quea pame nei ejjapeequi meesahua jji pojjeama Jesosa nijje. ¹⁰Esohui huohuijji nisho Jesosaja epeejji cuana ojaya esohui jjashahuuba qui pajea mee sa poani. Peaja esohui shajja'ajja mee sa poani. ;Esohui huohuijji nisho huohuicue jama ba'a: —;Miquea esohui quea tai huohui pajea'yocue! —acue!

Oya cuana shajjama' poanijo, ;oya huohui o'oyacue ojaya esohui quea tai ehuohui pajea'yojji; beca huohui'yome acue! ;Majoya oya cuana shajjama' po tiitiiajo, oya cuana cajaa a'yocue! ;A'a onijje jjapeequi o'oyajji! ¹¹Mi shajja'ajja sa po'yo ajjajo miquea eba ma esohui huohuijji nisho cuana shajjama' nei nei. Oya cuana quea pame po sa po'yo ajja nei nei. Eyacuiñajjiya esohui jayojja jama a sa po'yo ajja. Jamajjeya quea mimishi poanijo, Eyacuiñajjiya oya cuana tecuea caje'yo. Quea nei nee po mee caje'yo pea'ai.

¡Poecue e que Nicoponi yasijje!

¹²Tito, quijje eyaya Jesosaja epreejji mi que, Queta nasi yasijje huoojeaje; Atema, Tiquico pojja'a huoojeaje. Mi que ba'eñaquiajo ¡poecue e que Nicoponi yasijje! Jomajo eyaya miya ishoaje. Majoya eseya eeno shejo Nicoponijo ba'eje.

¹³Emeshi meseja esohui bajji Sena bajjani, Jesosaja esohui huohuijji Apono bajjani pea'ai Queta meshijo nequi ajja. Jjeya nei pea meshi yasijje poquije. Jamajjeya joya cuana poqui meesahuacue! ¡Bobi cuana, eba'ejji cuana pea'ai quiacue!

¹⁴Tito, jamajjeya ¡Jesosaja epreejji cuana huohuicue jama ba'a: —¡Quea pame nee eba'e, huea'ama! ¡Jesosaja esohui huohuijji cuana, aema' cuana pea'ai ejjaquiaqui aquiana cuana; onaya ejjaba'e meesahuaqui! —jamaya acue Jesosaja epreejji cuana ona jaahuanajji epoji!

¹⁵Ojjaña Jesosaja epreejji cuana enijje nequiya eya huohui'ajja mee cani jama ba'a: —Tito, ¿achajja ami ani so'o ecuanajaya ebajji?

Ojjaña Jesosaja epreejji cuana Quetajo ba'e huohuicue jama ba'a: —Pabohua, ojjaña onijje nequiya pea'ai jama acani ba'a: “¿Achajja acuae quiana ani so'o?” ecuanajaya ebajji. Ecuanaya ojjañaja quea boti nee.

Miquianaya Eyacuiñajjija quea jea nee nee. ¡Ohuaya miquianaya cajaahuana cahua! Mahuiso eyaya, Pabohua mi que tehuenaje, Tito. Apoa.

PABOJA ETEHUE'YO PINEMO QUE FILEMÓN

Pabohua esohui tehue canaje Pinemo que

¹Ecuea epeejji Pinemo, eyaya Pabohua jiquio esohui mi que tehueaña. Eyaya Jesosa Quitoja esohui huohuañajo, dejja mase cuaa eya iña'yo majje jeanobia ca'yonaje. Esejaya epeejji Timoteo enijje nequi. Pinemo, ecuaaya miya quea jea nee aña. Miyaya eya chaco meesahuaña. ²Jamajjeya jiquio pea ecuaaya esohui etehue'yo huoojeaje Jesosaja epeejji cuana huasijje, ma miquea equi yasijje ojee dobiquiani Jesosa Quito bihuiaa. Esejaya epeejji epona Apia bajjani que tehueaña pea'ai. Oya esejaya jjo'i jayojjaya. Dejja Aquipo bajjani que tehueaña pea'ai, ma ese nijje chacochaconaje Jesosa Quitojo.

³Eyacuiñajji esejaya Chii ai poani. Jesosa Quito esejaya Emeshi Mese nei poani. ¡Ohuaya miquianaya cajaahuana cahua! Miquianaya ojaya epeejji cuana poanijo, ¡quea bei nee capo mee cahua pea'ai!

Pabo Pinemojo queabihui nee poani

⁴Pinemo, eya Eyacuiñajji nijje mimianijo oya bihuiaña miya quea pame poanijojo. ⁵E'e, pea dejja cuaa huohui cani jama ba'a: —Pinemohua ojjaña Jesosaja epeejji cuana quea jea nee acani, Jesosa Quitoja esohui jayojja jama po tiitiiani pea'ai.

⁶Jamajjeya eya Eyacuiñajji nijje mimiani mijo jama ba'a: —Eyacuiñajji, ¡Pinemo Jesosaja epeejji cuana nijje jjapeequi meesahuacue quea ja'a nee! Jamajjeya Jesosaja epeejji ojaya esohui jayojja jama poaje'yo Pinemo nijje. E'e Eyacuiñajji, ecuanaja echaco quea pame nee Jesosa Quitojo. Jamajjeya ¡imiyaya Pinemo ojjaña onijje jjachichaquiani pea'ai jjabahuejja meequisahuacue joya miya o asahuanajejo quea pame nee! —jamaya eya mimiani Eyacuiñajji nijje mijo, Pinemo.

⁷E'e Pinemo, miyaya ojjaña Jesosaja epeejji cuana quea jea nee aña. Miquea echacojji quea pame neejo pea epeejji cuana quea bihui nee poanaje. Jamajjeya eya quea bihui nee poani mijo.

Pabohua Onesimojo tehue canaje

⁸Jamajoya Pinemo, eya Jesosaja epeejji jaahuanijji etiiya jjejojo beshahua nei miya tehuename jama ba'a: "Onesimo miquea equi yasijje poqui'yajo ¡a'a oe cuiajjequi'yojji; ja'ajjequi o'oyacue!"

⁹Chojja, ecuea jama tehueme'yajji pojjeama mi que; eya miquea quea jea neejo ecuea etehue'yo jayojja jamaya miyaya aje'yo. E'e eya, Pabo etii. Eya Jesosa Quitoja huoojea'yo ojaya esohui huohuiya. Jjeya eya ejeanobia ani; dejja mase cuaa eya iñä'yo majje jeanobiajea ca'yonaje Jesosaja esohui huohui mee ajjaa jjejojo.

¹⁰Pinemo, eyaya mi que tehueña Onesimojo. Ecuea esohui shajja'ajja majje Onesimo Jesosa Quito nijje jjapeequi'yonaje. Jamajjeya oya ecuea ebacula ejja jayojja jama poanaje. Jamaya oya poanaje eya jiquiojo Shoma cuiñajjijo eme' jeyo'yo anijo. ¹¹Yahuajo minijje nequija Onesimohua quea tai aca poa. Jjeya ca quea tai pojjeama'yo. Quea pame nee ejo chaco ca'yani. Mijo chaco caje o'oya pea'ai; jjeya ca ca quea pame nee chaco caje'yo, Onesimohua.

¹²Ecuea Onesimo quea jea nee nee poani; jamatii eyaya oya huoojeaje o'oya mi que minijje eba'e o'oyajji. ¹³E'e pojja'a miyaya oya huoojeaje o'oya e que enijje eba'e'yojji. Jamajjeya eya quea bihui nee poaje'yo. Jamajjeya aje mo oe jama jjashahuubaquimeya poani. Eya jiquiojo nequi eme' jeyo'yo, Jesosa Quitoja esohui huohuiji poani jojoya. Miya e ba'e meesahua sa poanijo ¡Onesimo, miquea echacojji yacua huoojea'yocue e ba'e meesahuaa! ¹⁴Miquea echacojji ecuea enahuejji pojjeama. Chojja, miquea ejjashahuabaqui'yojji jayojja jama a sa ca ca iñä poani. Eya ca ca iñä mi huoojeajji pojjeama ca Onesimo enijje e'ani meeiji, e ba'e meesahujji. ¡Miquea ejjashahuabaqui'yojji jayojja jama miyaya quea bihui nee a'yocue ejo! ¹⁵Yahuajo oya minijje chacochaco maja sa po ajja jjejojo quehua poquia poa. Jjeya ca ca oya miyaya jaahuania tiitije'yo. ¹⁶Oya ca ca minijje chacochaco nequinaje sosema!. Jjeya ca ca oya Jesosaja epeejji poanijo miquea mique chahua jayojja jama po'yonaje pea'ai. E'e, oya eseja chahua jayojja jama poani Jesosa Quito nijje jjapeequianijo. Esejaya oya quea jea nee nee poani. E'e de, ecuea oya quea jea nee nee. Jjeya oya Jesosa Quitoja epeejji; miquea echacojji pea'ai. Jamajjeya ¡miyaya oya quea jea nee nee acue!

¹⁷Jamajjeya ¡ecuea etehue'yojo jjashahuubaquicue! Pinemo, ¡eya miquea epeejji poanijo, Onesimo ba'e mee o'oyacue minijje! ¡Bacue! Eya mi que poquiajo, miya quea bihui nee poaje'yo. ¡Jamaya oe pocue Onesimo mi que poqui'yajo! ¹⁸¿A'a yahuajo ohuaya miquea aquiana sii ca poa? ¿A'a ma aquiana quea sose huiso nee nee? ¡A'a Onesimo sosequia meeiji! ¡Eyaya oe casosequia'yahua! ¹⁹Jamajjeya eyaya esohui tehueña ecuea emeya jama ba'a: Pinemo, eyaya Pabohua miya sosequiaje'yo ma Onesimohua sii ca poa.

Jamatii jjashahuabaquicue! Miya Jesosa Quitoja epeejji poanaje eya huohuije shajja'ajja majje. ¿Ache sose huiso acuae ecuea esohui miyaya shajja'ajjanaje Jesosa Quitojo? ¿A'a quea huiso nee nee? ²⁰E'e Pinemo, miya ecue chahua jayojja jama poani. Jamajjeya eseya Jesosa Quito nijje jjapeequianijo, ¡che iña quea quijiji jaji nee po mee'yocue! ¡Onesimo mi que poqui'yajo, ja'ajjequi'yo majje jjequidobia'yocue!

²¹Jiquio eyaya esohui tehueña mi que; ecuea eba miya; ecuea esohui jayojja miyaya aje'yo e'e nei, quea pame nee nee aje'yo tii pea'ai.

²²¡Pea ecuea esohui jayojja jama a'yocue! ¡Equi equecuayiji cuiashabacue e aniñajjiya! Poejeya pojja'a mo mi que. Miquianaya Eyacuiñajji nijje mimi huicha'ahuicha'a ani jama ba'a: —¡Eyacuiñajji, miyaya dejja mase cuana Pabo pichojea mee'yocue oe, equi ejjajeanobiaquijjijo ani! —miquianaya poanaje.

Jamajjeya eya jjashahuabaquiani jiquio jama ba'a: —E'e, Eyacuiñajjiya eya poqui meesahua caje mi que. Joya ecua miya mimiani jamaya Eyacuiñajjiya acaje'yo —jamaya eya jjashahuabaquiani.

Pea esohui quea bihu nee epo meeiji

²³Dejja Epapasi bajjani Jesosa Quitoja esohui huohuijji poani jojoya, dejja maseya oya iña majje jeanobiajea ca'yonaje pea'ai. Ohuaya eya huohui'ajja mee cani jama ba'a: —Pinemo, ¡achajja acuae mi ani so'o, de?

²⁴Pea ecuea epeejji cuana enijjeya Jesosa Quitojo chacochacoani. Ohuaya eya huohui'ajja mee cani jama ba'a: —Pinemo, ¡achajja acuae mi ani so'o? —yohua cuana ba'a: Macoso, Anitaco, Demasi, Noca pea'ai. Mahuisohuaya mi huohui'ajja mee cani.

²⁵Esejaya Emeshi Mese oe nei, Jesosa Quitohua ¡miquianaya cajaahuana cahua quea pame nee! Mahuisoya Pinemo, apoa. Eyaya Pabohua esohui tehuejeyonaje.

ETEHUE'YO JESOSAJA EPEEJJI CUANA EMEOJA ESOHUIJO MIMIANI YASIJJE

HEBREOS

Eyacuiñajjiya oja Bacua Ejja huoojea canaje ona oja esohui ba meeya

1 ¹Ecuea epeejji cuana quea huiso meshijo ba'e, yahuajo nei nei
Eyacuiñajjiya ojaya epeejji nei cuana huoojea ca poa esejaya
etiiquiana que, Jodio etiiquiana que. Jama poa ba'a: “¡Huohuiquicue
Jodio cuana huasijje ecuea ejjashahuabaquijji ojjañaja ebajji! ¡Huohui
majamajacue oe!” Ma huoojea nequime aca poa; pea mano'yajo
huoojea'yo esohui huohujji aca nequia poa. Oe esohui huohujji quea
huiso huohui meesahua ca poa Eyacuiñajjiya ojaya ejjashahuabaquijji.
Pea esohui huohujji pea esohui huohui meesahua ca poa ojaya
ejjashahuabaquijji pea'ai. Jamatii huohui jjima poa ojjaña Eyacuiñajjiya
ejjashahuabaquijji. ²Jjeya ca ca Eyacuiñajjiya oja Bacua Ejja Jesosa
Quito bajjani huoojea canaje eseya ojjaña ojaya ejjashahuabaquijji ba
meeya. Ohuaya Jesosaa oja Chii nijjeya ojjaña pana ca'ya poa, ojjaña
aquiana meshijo e'anijji, eyatahuatahuajo enequijji pea'ai pana ca'ya
poa. Jamajjeya ojaya nei aquiana. Jesosa ojjaña huoojea'yojji poani tii
tii eyajo, meshi cuanajo pea'ai. ³Jesosa oja Chii jayojjaya poa. Quea
pame nee nee, quea ca'a nee nee. Jesosa oja Chii jayojjaya poani tii tii.
Oya quea sohui poja nee neeya jjejojo ojjaña nequi mee ca poa. Ma ecua
ohuaya yahuajo huohui ca poa jamaya acani ohuaya jjeya ojjaña eyajo
nequi, ojjaña meshijo nequi pea'ai nequi ca'a tiitii mee cani Jesosaa. Oya
ojjañaja mimishi cuijeal'yo majje, ma ojjaña ojaya epeejji epojjija mimishi
cuijeal'yo majje anioquenaje oja Chii pejjejo ebianeijje. Jomajo oya, Jesosa
ojjaña huoojea'yojji poani tii tii. E'e, Eyacuiñajji, Jesosa pea'ai quea ca'a
nee nee po tiitiani. Pea ca'a'ama.

**Jesosa Eyacuiñajjiya Bacua Ejja quea ja'a nee nee
esohuidojiji cuana quea ja'a pishana**

⁴Eyacuiñajjiya Jesosa nequi mee cani quea ja'a nee nee. Ojaya esohuidojiji cuana ca ca nequi mee cani quea ja'a pishana. Esohuidojiji cuana bajjani canaje quea bajjani pame pishana, Eyacuiñajjiya echacojji bajjani. Jesosa ca ca Eyacuiñajjiya Ebacua Ejja quea pame nee nee. ⁵“Eyaya miya ojjaña ba meeaña cuana, miya ca ca oe ecue Bacua Ejja. Eya ca ca iña mique Chii”. Jamaya Eyacuiñajjiya Jesosa acanaje. Eyacuiñajjiya ca ca esohuidojiji cuana jama huohuime ajjimaya. Eyacuiñajjiya Jesosa jama huohuime aca o'oyanaje ba'a: “¡Eya e'e jojo nee mique Chii caba cahua cuua! E'e, miya ecue Bacua Ejja oe nei”. Jama Jesosa huohuimeya acanaje. Jama huohuimeya esohuidojiji ajiima Eyacuiñajjiya.

⁶Eyacuiñajjiya oja Bacua Ejja oe nei meshi yasijje huoojea jeahua esohuidojiji jama huohuime aca poa ba'a: “¡Esohuidojiji cuana, ecue Bacua Ejja oe bihuiacue, ojjañaa!” Jamaya Eyacuiñajjiya aca poa Jesosajo.

⁷Esohuidojijijo jama aca poa ba'a:

“Eyaya ecuea esohuidojiji huoojeaña quea cuejipashi nee nee pojjeFFE jama, quea quemo nee nee beni jama”.

Jamaya Eyacuiñajji poa.

⁸Oja bacua ca ca Eyacuiñajjiya huohui ca poa jama ba'a:

“Miya ca ca oe ecue Bacua Ejja e'e jojo nei, e jayojjaya tii tiiya Eyacuiñajjiya ca mi coma. Miya ojjaña huoojeajji poani tii tii ojjaña meshi yasijje. Quea ja'a nee nee ojjaña huoojeaña tii tii. ⁹Ojjaña quea ja'a nee nee poani; ecuea ejjashahuabauquijji jayojja jama poani miquea quea boti nee nee poani. Mimishi cuana ca ca cajaa aña. Jamajjeya eyaya miya babaca'yá poa ojjañaja Emeshi Mese nei epoji. Ojjañaa miya shajja'ajja caje ojjaña meshijo ba'eca cuua. Pea emeshi mese shajja'ajja jjima acaje cuua. Jamajjeya miya quea jaji nee nee poani tii”.

Jamaya yahuajo nei Eyacuiñajjiya tehue mee ca poa Jesosa nijje.

¹⁰Eyacuiñajjiya pea esohui tehue mee ca poa oja Bacua Ejja nijje, Jesosa nijje jama ba'a:

“Emeshi Mese nei, miyaya ebionei meshi pana cooa poa ojjaña.

Eyatihuatahua pana cooa poa quea huesha nee nee, ojjaña eyajo enequijji pea'ai. ¹¹Ojjaña miquea epana'yo oe poaje, meshi cuana, eyatihuatahua pea'ai. Miya ca ca nequi tiitijke'yo. E'e, miya ca ca oe nequi tiitijke'yo. Meshi etii poaje, eyatihuatahua pea'ai. Jiquio ecua daqui eyacua daqui chii poani, daqui chii chii'yajo iñajjajja'yao majje jeajeaña jayojja jama eyaya meshi aje, eyatihuatahua pea'ai.

¹²E'e, daqui chii jeajeaña eyacua ehuoshojji jayojja jama meshi, eyatihuatahua pea'ai tii'yajo eyaya cajaa aje eyacua epana'yojji.

Miya ca ca jamatii nequi tiitijke'yo quea ja'a nee nee”.

Jamaya poanaje Eyacuiñajji oja Bacua Ejja nijje, Jesosa nijje.

¹³E'e, jamaya Eyacuiñajjiya oja Bacua huohui ca poa esejaya ebajji jama ba'a:

“¡Anioquecue ecuea ebianei mijijje enije ojjaña huoojea'yojji!

¡Epejjejo ishoa'ajjacue! Mi quecuajji nisho yani. Eyaya oya cuana ca'a'ama po mee majje mi shajja'ajjajji po meeje'yo”.

Jamaya Eyacuiñajjiya oja Bacua Ejja ca ca oe huohui ca poa. Esohuidojiji nijje ca ca jama mimimeya po jjima.

¹⁴E'e, esohuidojiji cuana Eyacuiñajjiya huoojea'yo ca ca oe. Oya cuana huoojea cani Jesosaja epeeiji cuana jaahuanaa, ma onijje eyajo eba'e tiitii'yojji cuana jaahuanajji.

¡Jesosa shajja'ajjacue ojaya epeeiji nei epojji!

2 ¹Ecuea epeeiji cuana, jamajjeya ¡shajja'ajja neineicue Jesosaja esohui ojaya epeeiji nei nei epojji! Yahua pishana maya shajja'ajjanaje eseyaya. Esohui pajea'yo majje ca se ca oe bishe jeyo jjima jayojja beniya dojojea cani jayojja jama poaje; poquiquehua chana se esohui pajea'yo majje. ²Yahua nei nei Eyacuiñajjiya esohuidojiji esejaya etiiquiana huasijje huoojea ca poa. Oja sohui e'e nei huohui huicha'a huicha'a mee ca poa: “¡Shajja'ajjacue ecuea esohuidojijiya esohui e'e nei!” jamaya Eyacuiñajjiya etiiquiana aca'ya poa.

Jamajjeya shajjama' cuana Eyacuiñajjiya quea nee po mee ca poa oja esohui ajjimajojo. Jjashajja'ajjaqui ajjajojo quea nee po mee ca'ya poa. ³Jjeya ca ca Eyacuiñajjiya eseya quea pame nee nee acani. Jesosa nijje jjapeequianijo, ohuaya eseya ba'e tiitii mee caje'yo eyajo. Jesosa nijje jjapeequi sa po'yo ajjajo cho, eba'e tiitii mee'yojji pojjeama. E'e, Jesosaa esejaya Emeshi Mese neiya huohui coo ca poa jama ba'a: —Enijke jjapeequiajjo, eyaya miquianaya ba'e tiitii meeje'yo enijke —Jesosa poanaje.

Majoya o shajja'ajjajji cuua eseya huohui canaje jama ba'a: —E'e jojo nei Jesosaa eseya ba'e tiitii mee caje'yo eyajo onijke jjapeequianijo.

⁴Eyacuiñajjiya pea'ai ba mee canaje ma esohui e'e jojo nei. E'e, Eyacuiñajjiya Jesosaja epeeiji cuana ma dejjaajjima acani ameesahua canaje. Ma dejjaajjima yahuajo ba jjima poa ba meesahua canaje pea'ai. Edojjoshahua Pame huoojea canaje pea'ai ojaya ejjashahuubaquijji jayojja jama ameesahua, Eyacuiñajjiya. Jamajjeya eseya ba mee canaje e'e jojo nei Jesosaa eseya ba'e tiitii mee caje'yo eyajo onijke jjapeequianijo.

Meshi eyacuajo ojjaña huoojea'yojji poaje Jesosa

⁵E'e, quijje Eyacuiñajjiya meshi pana caje'yo eyacua. Ma meshi eyacuajo ecuaaya miquianaya huohuaña jama poaje ba'a: Eyacuiñajji Jesosaja epeeiji cuana nijje jama poanaje ba'a: —E'e jojo nei meshi eyacuajo miquianaya ona huoojeajji poaje —Eyacuiñajji jamaya poanaje Jesosaja epeeiji cuana nijje. Jamaya mimi jjima esohuidojiji nijje, de. ⁶Chojja. Yahuajo nei nei Dabi tehue meesahua ca poa Eyacuiñajjiya jama ba'a:

“Eyacuiñaggi, miya jjashahuaba tiitiquiani meshijo eba'ejji cuanajo.

Dejja cuana ca'a'ama. Quea pame pishana. Jamatii oya cuana miyaya jaahuanaña. ⁷E'e Eyacuiñaggi, yahuajo miyaya ojjaña dejja cuana quea pame anaje; esohuidojiji quea pame nee jayojja beshahua nei anaje. Jamaya miyaya oya cuana nequi meenaje iye huiso daqui sheme. Miyaya oya cuana quea ja'a nee nee po meenaje.

⁸Quea ca'a nee nee po meenaje miyaya ojjaña huoojea'yojji epojji”.

Jamaya Eyacuiñajjiya yahuajo nei Dabi tehue mee ca poa. E'e, ma etehue'yojo jama poa ba'a: “Dejja ojjaña huoojea'yojji po mee canaje Eyacuiñajjiya”. E'e, ojjaña huoojea'yojji po mee ca poa, ojjaña aquiana cuana huoojeajji. Jamatii eseyaya baña jjeya dejja cuana ojjaña huoojeajji po jjima poani.

⁹Jesosa ca ca esejaya eba. Eyacuiñajjiya oya nequi mee ca poa beshahua nei esohuidojiji quea pame jayojja. Jamaya nequi mee ca poa oe pojji daqui sheme. Eseyaa Eyacuiñajjiya quea jea nee poanijo, Jesosa ese jayojja yamiji poa; emano'yojjiya poa. Jamajjeya Jesosa ojjaña nahuejji mano'yonaje. Eyacuiñajjiya oya shequi mee ca o'oyanaje quea bame nee nee enequi tiitii'yojji. Pea chama' o jayojja, de.

¹⁰Eyacuiñajjiya oja Bacua Ejja nijjeya, Jesosa nijjeya ojjaña pana majje nequi mee cani, ojjaña eyajo nequi, ojjaña meshijo ba'e pea'ai. Ojjaña yani de, Eyacuiñaggi quea bihui po meeji. Oya ojjañaja Emeshi Mese tii poani; ojjaña Jesosaja epeejji nequi tiitii mee sa poani onijke: —E'e, ecuea Ebacua Ejja quea nee nee po majje oya ojjaña jaahuanajji poaje —jamaya Eyacuiñaggi jjashahuabaquinaje—. Jamajjeya jamaya poaje. Ecuea Ebacua Ejja quea nee nee po meeje. Jamaya quea pame. Jamajjeya ohuaya, Jesosaa quea huiso ba'e tiitii mee caje'yo onijke eyajo —jamaya Eyacuiñaggi poanaje.

¹¹Jamajjeya Jesosaa ojjaña eseya quea boejea po mee ca'yani mimishi cuijea'yo majje. Jamaya ojjaña eseya Eyacuiñajjiya bacua po mee cani o jayojja pea'aiya. Jamajjeya oya, Jesosa ese nijje quea bihui nee jama poani ba'a: —Ecue Chii miquianajaya Chii pea'ai poani. Miquianaya ecuea ecue chahua mese cuana, ecue jjo'i cuana —Jesosa poani.

¹²E'e, Eyacuiñajjiya esohui yahuajo nei etehue'yojo Jesosa oja Chii nijje jama poa ba'a:

“Eyacuiñaggi, eya ecuea huapa pojjeama cuana nijje mimije mijo.

Ecaya miya bihuiaje ojjaña ecuea epeejji cuanaja eshajja'ajjajji jama ba'a: —Eyacuiñaggi, miya ca ca oe quea ca'a nee nee nequi —jamajjeya eya sohuicuayaje”.

¹³Jamaya pea esohui yahuajo nei etehue'yojo Jesosaa aca poa ba'a:

“Eyacuiñaggi, eya ca ca iña miyaya baña Eyacuiñaggi nei nei. Miyaya eya jaahuanaña e'e jojo nei”.

Jama pea'ai poa ba'a:

“Eyacuiñaggi, jeya bacue ecuea huapa pojjeama cuana nijje, ojjaña joya miyaya enijje jjapeequi meesahuanaje nijje!”

Jamaya yahuajo nei Eyacuiñajjiya Isaia tehue mee ca poa Jesosaja esohui.

¹⁴ Jesosaja epeejji cuana dejja cuana aje oe yamijji. Jamajjeya oya, Jesosa poeyanaje yamijji, ese jayojjaya mano'yonome epoiji. Mano'yonajeya jjejojo ohuaya Edosiquiana nei Satanasa bajjani jeabichajea ca'yonaje, ma ojjaña manomee'yojji poani jeabichajea ca'yonaje. E'e, eba'e tiitii'yojji jjejojo mete'ama eseya poaje emano'yojji. ¹⁵ Yahuajo ojjaña eseya quea mete jjashahuabaqui aninaje jama ba'a: —E'e de, eya manoje'yo. Jamaya quea tai. Quea mete ca iña emano'yojji —eseya poanaje.

Jesosaja epeejji nei ca ca jjashahuabaquiani jama ba'a: —E'e, eya manoje'yo. Jamatii Eyacuiñajjiya eya ba'e tiitii mee caje'yo onijje eyajo.

¹⁶ Jamajjeya Jesosa dejja jayojja yamijji poeyanaje. Poeyanaje esohuidojiji jayojja pojjeama, esohuidojiji jaahuanaa pojjeama. Chojja. Jesosa poeyanaje dejja jayojja yamijji ese jaahuanaa, Amajamaja osecua cuana jaahuanaa. ¹⁷ Jamajjeya oya, Jesosa ese jayojjaya poanaje ojjaña ojaya epeejji nei jaahuanajji jama ba'a: Eyacuiñajji nijje emimijji etii yahuajo ba'eya Eyacuiñajjiya esohui jayojja jama aca poa Eyacuiñajji Jodio cuana nijje quea bei epo meeji nisho. Jjeya ca ca Jesosaa Eyacuiñajjiya ejjashahuabaquijji jama e'e jojo nei acani quea ja'a nee. Eseja mimishi cuijea'yojji mano'yonaje. Jamaya Eyacuiñajji ese nijje e'e jojo nei quea bei po mee canaje tii tii. ¹⁸ Jiquio meshijo ba'e Jesosa quea nee nee poa. Cuanaya Edosiquiana neiya, Satanasaas Jesosa quea mimishi epo meeji nisho aca poa. Jamajjeya Satanasaas eseya quea mimishi po mee sa acanijo, Jesosaa eseya quea pame ba'e mee cani. Jamaya Jesosaa ameesahua cani ba'a: —Chojja, eya Jesosaja epeejji poani. Ohuaya eya jaahuanan canijo, quea mimishi po maja sa po ajja ca iña —jamaya Jesosaa eseya po meesahua cani.

Jesosa quea pame nee; Moisesi quea pame pishana poa

3 ¹Jamajjeya ecuea epeejji cuana, ¡Jesosajo oe jjashahuabaquicue! ²Eyacuiñajjiya eseya babaca canaje Jesosaja epeejji epoiji, onijje eyajo eba'e tiitii'yojji. E'e, ¡Jesosajo oe jjashahuaba tiitiiquicue! Eyacuiñajjiya oya huoojea canaje ese jaahuanaa: —Miya enijje ma mimi poquime poaje miquea epeejji cuanajo. Quea pame nee nee jamaya poaje'yo tii —jamaya Eyacuiñajji poanaje Jesosa nijje.

²E'e, Eyacuiñajjiya yahuajo Jesosa babaca ca poa ojaya epeejji cuana jaahuanajji epoiji. Ojaya epeejji cuanajo onijje emimijji quea pame nee nee po mee ca poa. Ma ecua Eyacuiñajjiya huohui canaje jamaya e'e jojo nei acanaje Jesosaa. Jesosaa jayojjaya etiiquiana Moisesiya Eyacuiñajjiya epeejji cuana jaahuaname aca poa yahuajo nei nei. ³Moisesi ca ca quea ja'a pishana poa. Jesosa ca ca quea ja'a nee nee poanaje. E'e, jiquio ecua se equi iya jjimajo jjashahuabaquiani, jamaya Jesosa jjashahuabaquinaje eseya Eyacuiñajjiya epeejji quea ja'a nee epo meeji. ¡Quea pame nee nee Jesosa! Moisesi ca ca echacosahuajji jayojja jama poa; Jodio cuana

beshahua nei Eyacuiñajji nijje jjapeequi meesahua ca poa. ⁴E'e, ojjaña equi cuana equi iyajji poaniya iya cani. Jiquio ecua equi iyajji poaniya equi iya cani jama panameya Eyacuiñajjiya aca poa. Ojjaña pana'yo majje quea ja'a nee jjeya nequi mee cani. Jama jayojjaya Jesosaa ojaya epeejji cuana yahuajo nei nei ba'ya poa quea ja'a nee onijje jjapeequi meesahua ca poa; ojaya epeejji jjeya nei ba'yani pealai jjapeequi meesahua cani onijje. ⁵Jamajjeya Moisesi Eyacuiñajjiya echacojji poa. Jiquio ecua echacojjiya equijo chaco neinei cani jama jayojja Moisesiya Eyacuiñajjiya esohui pea cuana ba mee ca poa; ma Eyacuiñajjiya quijje huohui caje Moisesiya huohui ca poa pealai. ⁶Jesosa Quito ca ca Eyacuiñajjiya Ebacua Ejja. Oya e'equi mese jayojjaya, equi chacojjii jayojja pojjeama. Eseyo ojaya equi jayojja poani. E'e, eseyo Eyacuiñajjiya equi jayojja poani ca jama jjashahuabauquianijo tii ba'a: —Eya Eyacuiñajjiya epeejji. Ohuaya eya ba'e tiiti mee caje'yo onijje eyajo.

Jamajjeya ¡jamaya huohui tiitiicue! ¡Jesosa nijje quea bihui nee jjapee tiitiiquicue! Ohuaya eseyo jaahuana cani quea ja'a nee nee.

Ojaya epeejji cuana jomishoca mee caje'yo Jesosaa

⁷Yahuajo nei nei Edojoshahua Pameya esejaya etiiquiana esohui tehue mee ca poa jama ba'a:

“Jjeya nei Eyacuiñajji minijje mimianijo, jojaya esohui shajja'ajja neineicue!
⁸¡A' shajjama' poiji! ¡Miquianajaya etiiquiana jayojja jja oe a'a poiji!
 Yahuajo nei Eyacuiñajjiya esohui shajja'ajja jjima poa meshi jabojo nequija. Meshi quimajo nequi etiiquiana cuana quea mimishi nee nee poa. Jamatii Eyacuiñajji quenequene cuajj ajja poa etiiquiana nijje. ⁹E'e, miquianajaya etiiquiaa yahuajo nei ba'ya poaa Eyacuiñajji ba'ajja ca poa. Jama poa ba'a: —Eya quea mimishi poanijo jamatii Eyacuiñajjiya eya etecueajji pojjeama —jama posoya jjabaquia poa cuana. Jamajjeya Eyacuiñajjiya jama aca poa ba'a: —Miquianaya ca jja ca oe quea mimishi nee nee.
 Quea hioso shequijame, 40 shequijame eya miquianajo ishoa'ajjaña poa miquianajaya mimishi cuana epajeal'yojji nisho. ¹⁰Jamajjeya mimishi pajea'yo ajjajo eya quea tecue miquiana nijje poa: Miquianajaya ejashahuabauquijji quea quehua, quea tai. Ecuea esohui jayojja jama a sa po'yo ajja. Jjabahuejjaqui'yo ajja —jamaya Eyacuiñajji poa—. ¹¹Jamajjeya quea quene po majje eyaya miquianaya tecueajeanaje jama ba'a: Shajjama' poanijo e'e jojo nei miquianaya ca mi ca oe edobiquijji pojjeama ecue meshi quea pame yasijje ejomishocajji, quea bei eba'e'yojji pealai”.

Jamaya Eyacuiñajjiya etiiquiana cuana Moisesi nijje nequi tecueajea ca poa. Jamaya yahuajo nei esohui etehue'yo poa.

¹²Ecuea epeejji cuana, jamajjeya oe ¡quea ja'a nee jjashahuabauquicue! ¡Eyacuiñajjiya sohui jama acue! ¡A' quea quehua jjashahuabauquijji! Shajjama' po majje Eyacuiñajji nijje miya jjapee pajeaqui chana! Tecuea ca chana' mi. Oya ca ca oe ba'e tiitiiani, de. ¹³Jesosaja pea epeejji cuana nijje ca ca mimi huicha'a huicha'acue jama ba'a: —¡Jjeya nei Jesosa nijje ejjapee neineiqui!

Jamaya poanijo miquianaya mimishi cuanaja edasiajji pojjeama; quea mimishi nee nee epoji pojjeama.

¹⁴E'e, Jesosa nijje jjapeequi jehuajo eseya jjashahuaba neinequinaje onijke eyajo eba'e tiitii'yoiji. ¡Jamaya ejjashahuabaqui poqui! Jamajjeya quijke eseya onijke ona huoojea'yoiji poaje'yo tii tii eyajo.

¹⁵E'e, jamaya yahuajo nei esohui etehue'yo poa ba'a:

“Jjeya nei Eyacuiñajji minijje mimianijo ¡ojaya esohui shajja'ajja neineicue! ¡A'a shajjama' pojji! ¡Miquianajaya etiiquiana jayojja jama a'a pojji!”

Jamaya yahuajo Dabiya tehue ca poa.

¹⁶¡Bacue! Moisesiya esejaya etiiquiana Ejito meshijo ba'e poqui meesahua ca'ya poa. Eyacuiñajji ona nijje mimi huicha'a huicha'a poa. Jamatii beshahua nei ojjaña shajjama' poa. ¹⁷Ona nijje Eyacuiñajji quea quene nee poa quea shequiaja huiso nee neejo, 40 shequiajame. Oya cuana ca ca quea mimishi nee nee poa. Jamajjeya mano ca'ya poa, oe mano popoqui'ya poa meshi jabojo, quimajo. ¹⁸Shajjama' tiitii poajojo Eyacuiñajjiya oya cuana tecuea ca poa jama ba'a: “E'e jojo nei miquianaya ecue meshi yasijke edobiquijji pojjeama quea bei nee ejomishocajji. ¡Quea mimishi nee nee mi coma!” Jamaya Eyacuiñajjiya etiiquiana yahuajo nei nei ba'ya poa tecuea ca poa.

¹⁹Jamajjeya e'e jojo nei oya cuana meshi quea pame nee yasijke dobiqui jjima poa ejomishocajji Eyacuiñajjiya esohui shajja'ajja sa po ajja jjejojo, ojaya epeejji nei pojjeama jjejojoya.

Etiiquiana jayojja jama eseya ejomishocajji yasijke dobiqui ajja po chana'

4 ¹Jamajjeya Eyacuiñajjiya yahuajo nei etiiquiana huohui ca poa jayojja jama ohuaya jjeya eseya huohui cani jama ba'a: —¡E que poe'yocue ejomishocajji, quea jjashahuabaqui bei nee nee epo'yoiji! —oya poani.

Jamajjeya ¡quea ja'a jjashahuabaquicue! ¡Pea cuana quea ja'a jjashahuabaqui meesahuacue! ¡Ojee Jesosaja epeejji nei pocue! Jamajjeya Eyacuiñajjiya eseya o jayojjaya jomishoca mee caje'yo, ojjaña. ²E'e, yahuajo nei Eyacuiñajjiya esejaya etiiquiana cuana huohui ca poa esohui quea pame nee nee. Jjeya eseyaya jiquio esohui quea pame nee shajja'ajjaña peal'ai, etiiquiaa jayojjaya. Etiiquiaa cuaa jiquio esohui shajja'ajja nisho ca poa. Shajjama' poaa jjejojo eshajja'ajjajeajji shajja'ajjajea ca'ya poa. Jamajjeya Eyacuiñajjiya oya cuana jomishoca mee jjima aca poa, etiiquiana cuana. ³Eseyaya jjeya Eyacuiñajjiya esohui quea pame nee e'e jojo nei shajja'ajjaña. Ojaya esohui jayojja jama añajo, onijke jomishoca mee caje'yo, eseya. E'e, etiiquiana aje jja oe shajjama' poajojo Eyacuiñajjiya tecuea ca poa jama ba'a:

“Jamajjeya quea quene po majje eyaya oya cuana tecueajeanaje jama ba'a: —Shajjama' poanijo e'e jojo nei miquianaya edobiquijji pojjeama ecue meshi quea pame yasijke quea jaji nee ejomishocajji”.

Jamaya Eyacuiñajjiya aca poa. Yahuajo ojjaña cuana panajeyo majje Eyacuiñajji jomishoca poa. Apoa ojjaña amajje Eyacuiñajji jomishoca poa. Jamatii etiiquiana shajjama' cuana tecuea ca poa jama ba'a:

“Oya cuana aje oe edobiquiji pojjeama ecuea meshi quea pame yasijje quea jaji nee ejomishocajji”.

Jamaya Eyacuiñajji poa.

⁴E'e jojo nei pea esohui yahuajo nei etehue'yo jama poa ba'a:

“Eyacuiñajjiya ojjaña panajeyo ca poa quea cahui huisojo, me oe�্জে oe, 6 cahuime. Majoya ojjaña apoa amajje oya jomisho ca poa cahui oe”. ⁵E'e, etiiquianajo aje oe jama tehueme ya pe'a'i poa ba'a: “Oya cuana aje oe dobiqui jjima poaje enijje jomishocaa”.

⁶Jamajjeya etiiquiana cuana yahuajo nei ba'e yasijje ebionei Eyacuiñajjiya oja esohui quea pame nee huohui ca poa. Shajjama' poa jjejojo dobiqui jjima poa Eyacuiñajjiya meshi quea pame yasijje onijje jomishocaa. Pea cuana ca ca Eyacuiñajji que dobiquije jomishocaa. ⁷Jamajjeya etiiquiana cuana Moisesi nijje nequi jjashajja'ajjaqui ajjajojo jomishoca mee jjima aca poa. Jamajjeya Eyacuiñajjiya quijje nei Dabi tehue mee ca poa jama ba'a etiiquianaja osecua cuana huasijje: “¡Jjeya nei jjashajja'ajjaquicue!” Jamaya Eyacuiñajji poanaje esejaya etiiquiana nijje, ma Dabi nijje nequi nijje.

Jamajjoya eyaya Dabija etehue'yo huohuije o'oya jama ba'a:

“Jjeya nei Eyacuiñajji minijje mimianijo jojaya esohui shajja'ajja neineicue! ¡A'a shajjama' pojji!”

Jamaya yahuajo nei Dabiya tehue ca poa etiiquianaja onijje ba'eja ebajji.

⁸E'e, Eyacuiñajjiya Josoe etiiquiana cuana ojaya meshi quea pame yasijje poqui meesahua ca poa. Jamatii jomishoca jjima poa; quea jjashahuabaqui ja'a po jjima. Jamajjeya esejaya eba Eyacuiñajji jjashahuabaquiani jama ba'a: —Quijje eyaya ojjaña ecuea epeejji nei cuana jomishoca meeje'yo —Eyacuiñajji poani.

⁹E'e, quijje Eyacuiñajjiya ojjaña ojaya epeejji cuana jomishoca tiitii mee caje'yo onijje. Yahuajo nei ohuaya me oe�্জে oe, 6 cahuime ojjaña panajeyo ca poa. Panajeyo majje jomisho ca poa oe cahuime. O jayojjaya Eyacuiñajjiya ojaya epeejji nei cuana jomishoca mee caje'yo. ¹⁰Jamajjeya Eyacuiñajjiya me oe�্জে oe cahuime chaco majje chaco pajea ca poa; o jomishoca poa jayojjaya eseaya Jesosa nijje jjapeequi majje quea bei jjashahuabaquiani. Quijje chacochaco pajaeje'yo, jomishoca tiitije'yo onijje eyajo. ¹¹Jamajjeya jjashajja'ajjaquicue oe! ¡Quea ja'a nei jjashahuabaquicue Jesosaja epeejji nei epojji, e'e jojo nei onijje ejomishoca tiitii'yojj! ¡A'a oe esejaya etiiquiana jama pojji! Shajjama' poani Eyacuiñajji nijje ejomishocajji pojjeama. Cajaa mi acaje'yo.

¹²E'e, Jesosa nijje jjapeequianijo oya ese nijje mimiani, o jayojja ameesahua cani. Ojaya esohui jayojja jama ohuaya eseaya e'e jojo nei ameesahua caje'yo. E'e, ojaya esohui baa se beca jama. Jiquio ecua baaa shejjishejjiya jehuija'ajea

majje esa' ba cani jama jayojjaya Eyacuiñajjiya esejaya ejashahuabaqui'yoji cuana ba cani. E'e, Eyacuiñajjiya esohui ba neinei majje eseya jjashahuabaquije esejaya eba'ejijo quea ja'a poja'a, quea mimishi poja'a poani. ¹³E'e jojo nei ojjaña Eyacuiñajjiya eba oja pana'yo. Chama! Eyacuiñajjiyo ejjanequi quehuaquijji, de. Jamajjeya quijje nei o cojja nei nequi majje eseyaya huohujie'yo quio eseya eshe nequiya anequinaje cuana.

Jesosa esejo Eyacuiñajji nijje mimianijo ;quea ja'a nee jjapeequicue!

¹⁴Jamajjeya ;Jesosa nijje jjapeequicue! Jesosa ca ca oe nei Eyacuiñajji nijje mimi neineiani; oya Eyacuiñajji nijje emimiji etii quea pame nee nee. Oya Eyacuiñajjiya Ebacua Ejja oe nei. Eyahuasijje poqui'yonaje. Oja Chii pejjejo nequi, Eyacuiñajji pejjejo. Onijje mimiani esejo. Jamajjeya ;Jesosa nijje e'e nei jjapeequicue! ¹⁵E'e, Jesosa Eyacuiñajji nijje mimi neineiani esejo. Oya ese jayojjaya quea nee poanaje. Jamajjeya: —Jesosa, eya quea nee, quea yeno nee ani —eseya poani.

Eseya Jesosa nijje jamaya mimiajo, ohuaya eseya saja'a cani jama ba'a: —E'e, ecuea eba. Eya quea nee nee, quea yeno nee nee pea'ai poanaje. Jamajjeya eyaya miya jaahuanaje —jamaya Jesosaa eseya acani.

Satanasaa Jesosa quea mimishi po mee sa aca poa. Jamatii jjadasia meequi ajja poa. Jesosa ca ca oe quea mimishi po ajja nei nei poa. Jamajjeya eseya quea mimishi poajo, ohuaya, Jesosaa eseya jaahuanana cani tecue'amaa jjejojo. ¹⁶Jamajjeya ;Jesosa nijje bicho'ama emimi! Ohuaya esejaya mimishi cuana cuijea caje'yo. Eseya ojaya quea jea nee poanijo quea pame nee jaahuanana caje'yo tii tii. Ca'a'ama poajo quea ca'a po mee caje'yo pea'ai.

5 ¹Bacue! Eyacuiñajjiya esohui jama jayojja esejaya etiiquianaa beca dejja onijje nequi babaca ca poa Eyacuiñajji nijje emimiji etii epoiji. Babaca majje huoojeara ca poa jama ba'a: —Eyacuiñajji nijje mimicue esejo! ;Aquinana cuana, ijjiacajji cuana ehuone' nequi pea'ai dahuacue ecuanaja yajji, Eyacuiñajji ecuanaja mimishijo quea bei epo meeji! —jamaya aca poa etiiquianaa.

²Ojjaña esejaya etiiquiana ca'a'ama, Eyacuiñajjiya esohui ba neinei po jjima cuana, quea mimishi poa. Ma Eyacuiñajji nijje emimiji etii ca'a'ama pea'aijo oya pea cuana nijje tecue'ama poa. Quea bei mimianinaje Eyacuiñajji nijje pea cuanajo. ³Jamatii oya ca'a'ama jjejojo quea mimishi poani pea'ai. Jamajjeya ijjiacajji ehuone' jaja majje onaja mimishijo dahuajea jehauajo Eyacuiñajji nijje mimia poa jama ba'a: —Eyacuiñajji, iecuea mimishi cuijea'yocue! —acaninaje ohuaya. Majoya jama poa ba'a: —Eyacuiñajji, ijquio e'aquiana meseja mimishi cuijea'yocue pea'ai! —huohuime acaninaje Eyacuiñajji nijje mimianijo.

⁴Quea pame nee Eyacuiñajji nijje emimiji etii epoiji. Dejja cuana mimi ajja Eyacuiñajji nijje jama ba'a: —Eya ca iña jamatii minijje emimiji etii poaje —jamaya mimime epoiji pojjeama. Chojja. Eyacuiñajjiya oeyaya iyaa majje onijje emimiji etii po mee ca poa. Jamaya yahuajo nei ohuaya ebionei onijje emimiji etii Anoni bajjani aca poa.

⁵ Jamajjeya jamaya pea'ai Jesosa Quito Eyacuiñajji nijje emimiji etii jamatii po jjima poa. Oya Eyacuiñajjiya ebabaca poa. Eyacuiñajjiya ca ca oe Jesosa onijje emimiji nei po mee ca poa yahuajo nei nei. Jama poa ba'a: "Eyaya miya ojjaña ba mee aña cuana miya ca ca oe ecue Bacua Ejja. Eya ca ca iña mique Chii" jamaya Eyacuiñajjiya Jesosa acanaje.

⁶ Majoya huohui ca poa jama pea'ai ba'a:

"Miya enijje emimiji poaje'yo tii tii Menequisine jama. Oya yahuajo nei nei enijje emimiji nei po tiitiia poa".

Jamaya yahuajo nei nei Eyacuiñajjiya tehue mee ca poa esohui Jesosajo.

⁷ E'e, yahuajo nei Jesosa ese nijje nequiahua oya Eyacuiñajji nijje mimi huicha'a huicha'anaje jama ba'a: —Ecue Chii, ¡nahuecue mo! Onaaya eya quecuajea ca chana' —jamaya Jesosa mimi neineinaje Eyacuiñajji nijje. Quea yeno nee nee jjejojo panaje. Oya Jesosa quea ca'a pojjeama jjabaquinaje. Oja Chii quea bihui po mee sa acanaje. Jamajjeya onijke mimiajo Eyacuiñajjiya shajja'ajja canaje. Eyacuiñajjiya Jesosa mano'yo jjima po mee sa ajjima jojjemo Jesosa mano'yo jjima poquiaye.

⁸ Jesosa Eyacuiñajjiya Bacua Ejja oe nei. Jamatii oya quea nee nee poa mimishi cuaa quecua ca'yajje. Eyacuiñajjiya ejjashahuabaqui'yojji jayojja jama ba'yanijo, quea nee nee po'ya poa onaa napa neinei cajje. E'e, ojaya eba ojjaña joya Eyacuiñajjiya esohui jayojja jama ba'e sa poani jjeya meshijo ba'e quea nee nee poaje onaa napa cajje. ⁹ Jamajjeya Eyacuiñajjiya Jesosa yahuajo nei jama aca poa ba'a: —Miya ca ca oe nei quea pame nee nee mimishi cuijea'yojji epoiji. Pea chama' mimishi cuijea'yojji —aca poa Eyacuiñajjiya.

Jamajjeya Jesosaa esejaya mimishi cuijea'yo majje ba'e tiitii mee caje'yo, joya o shajja'ajjajji poani nei.

¹⁰ E'e, yahuajo nei Eyacuiñajjiya oya huohui ca poa jama ba'a: "E'e jojo nei miya ojjaña jaahuanajji poaje. Miya enijje emimiji etii poaje'yo tii tii; Menequisine jama, ma yahuajo nei enijje emimiji nei poa jayojja jama miya poaje'yo".

¡Quea ja'a nee Jesosa nijje jjapeequicue!

¹¹ Ecuea esohui ma Eyacuiñajji nijje emimiji neijo, Menequisine bajjanijo apoa pojjeama. Maya jamatii quea camaja eba meeiji. Miquianaya ca ca oe jjashahuabaqui ajjaa jjejojo Eyacuiñajjiya esohui oe pojji baña. Jamajjeya jiquio esohui miquianajaya quea quehua poaje. ¹² E'e, miquianaya yahuajo nei Jesosaja epeejji poa. Jamajjeya miquianaaya aje oe epeejji eyacua esohui ehuohuinaje ese. Jamatii onaaya miquianaya casohuihuohui huicha'a huicha'a cahua epeejji eyacua jayojja jama, de. Jiquio ecua ebacua jjeya cuaya tojjojo ba'e, bobí ijija po jjima jayojja jamaya miquianaaya Eyacuiñajjiya esohui camaja'ama nei nei baña de, esohui ebionei camaja'ama ebajji jama. ¹³ E'e, ebacua jjeya cuaya tojjojo ba'e jayojja jama miquianaya Jesosaja epeejji eyacua jama; ojaya epeejji quea ja'a po jjima. Jamajjeya eba'ejji quea tai ma Eyacuiñajjiya botil'ama miquianajaya

ba jjima, eba'ejji quea pame ma Eyacuiñajjija quea boti nee miquianajaya ba jjima pealai.¹⁴ Jiquio ecua etiiya bobi ijija cani jayojja jama Jesosaja epeejji quea ja'a neeya ojjaña ojaya esohui ba cani. Eba'ejji quea mimishi amaja aija, ma Eyacuiñajjija botilama. Quea pame nee acani ohuaya. Jamaya Jesosaja epeejji quea ja'aa esohui huohui cani onajaya ebajji.

6 ¹Yahuajo Jesosa nijje jjapeequi jeahuua eseyaya shajja'ajjanaje Eyacuiñajjija esohui quehua'ama. ¡Jjeya ca ca ojjaña ojaya esohui Jesosaja bacue! ¡Quea ja'a nee pocue Jesosaja epeejji etii! E'e, yahuajo jjeya nei jjapeequi jeahuua Jesosaja esohui quehua'ama shajja'ajjanaje jama ba'a: —¡Miquea mimishi pajea'yocue! ¡Jesosaja epeejji nei pocue!² ¡Onaaya miya cabesa mee cahua Jesosa nijje epoji! Onaaya miquianajaya esapajo eme' huana caje Edojjoshahua Pame miquianaa que edobiquiji. Eyacuiñajjija emano'yo cuana shequi mee caje o'oya. Shajjama' cuana Eyacuiñajjija quea nee nee po mee caje'yo —jamaya yahuajo Jesosa nijje jjapeequi jeahuua eseyaya shajja'ajjanaje esohui quehua'ama.

³ ¡Jjeya ca oe Eyacuiñajjija esohuijo ojjaña ejjashajja'ajjaqui Jesosaja epeejji quea ja'a nee epoji! E'e, jamaya poaje Eyacuiñajji nijje mimianijo jama ba'a: —Eyacuiñajji, jecuana ba meesahuacue ojjaña miquea esohui!

⁴ E'e, beca cuana aje oe Eyacuiñajjija esohui shajja'ajja majje jama poani ba'a: —Eya ecue mimishijo quea yeno. Mimishi pajea neineije'yo Jesosa nijje ejjapeequijji —poani.

Jamatii quijje shajjama' nei poaje o'oya pojja'a. Jamaya po majje oya cuana mimishi pajea sa po'yo ajja, de. Jesosa, eseja mimishi cuijea'yojji pajea neinei ca'yani, de. Pea chama' mimishi cuijea'yojji. Jamajjeya chama' o mimishi cuijea'yojji. E'e, oya cuana aje oe yahuajo jama poa ba'a: Yahuajo Eyacuiñajjija esohui quea pame e'e nei shajja'ajja canaje. Eyacuiñajjija oya cuana quea pame nee acanaje. Ba mee canaje Jesosaa ba'e tiitii mee cani ojaya epeejji nei onijje eyajo. Ba mee canaje Edojjoshahua Pameya oya cuana jaahuana caje'yo pealai.⁵ Ba canaje pealai Eyacuiñajjija esohui quea pame nee nee jayojja jama ba'yanijo quea bei nee poaje'yo. Eyacuiñajjija acanaje jayojja ma dejaa ajjima acani ba canaje pealai. E'e, jamaya ojaya eba poanaje.⁶ Jamatii aje oe shajjama' po o'oyani, de. Jesosa cajaa amajje pea chama' mimishi cuijea'yojji. E'e, yahuajo dejja mimishiya Eyacuiñajjija Bacua acui ecueatalapeejo caca ca poa jayojja jama oya cuana Jesosa quecual'yojji jayojja poani. Jesosa cajaa ajji poani. Jesosa niñeba ca o'oyani ojjaña eshajja'ajjaji. Quea tai nee nee ca ca oma.

⁷ Que quea pamejo ena po majamajajo bobi tii cuajiani quea pame nee. Apoa poajo eque meseya bobo chicha cani. Jamaya Eyacuiñajjija quea pame nee nee po mee cani. ⁸ Que quea taijo ca ca bobi tii ajja. Jjono, acuisha, acui pojja'a pohuani. Jamajjeya eque meseya que cajaa acani jama ba'a: —Jiquio que jehua'yonaje, cajaa —acani.

Jiquio ecua eque meseya que cajaa acani jayojjaya jama acaje'yo Eyacuiñajjija. Quea nee nee po mee caje'yo cuaquijo jiquio Jesosa cajaa ajji nei nei poani cuana.

Jesosa cajaa a'ajja eseya ohuaya e'e jojo nei ba'e tiitii mee caje'yo onijje

9E'e Jesosaja epeejji cuana, jiquio eyaya esohui quea tecue tehueaña miquiana jjashajja'ajjaqui ajjajo. Jamatii miquianaya ecuea quea jea nee nee. Miquianajo jjashahuabaquiani jama ba'a: —Ecuea epeejji cuana, miquianaya Jesosa cajaa yajji pojjeama. Chojja. Ojaya epeejji poanijo, Jesosaa miquianaya ojaya esohui jama atiitii meesahua caje'yo —jamaya eya poani.

10E'e, yahuajo, jjeya pea'ai miquianaya Jesosaja epeejji cuana quea jea nee añajo pea cuana ba'e meesahuaña tii quea ja'a nee. Jamajjeya Jesosaja epeejji cuana quea jea añajo Jesosa quea jea nee aña pea'ai. Jamaya Eyacuiñajjiya eba. Jamajjeya ohuaya quea pame nee nee sosequia caje'yo quea pame nee miquiaaya añajo. E'e, ohuaya quea ja'a nee acani tii tii. **11**Cuanaya eyaya miquianaya huohuaña jama ba'a: ¡Jesosaja epoe o'oyajjijo ishoacue! ¡Jamaya atiitiicue! ¡Quea jaji nee ba'e tiitii poquicue ojjaña Jesosaja epeejji cuana nijje! Jamajjeya ecuea eba poaje e'e jojo nei miquianaya Jesosaja epeejji nei onijje ba'e tiitije'yo. **12**E'e, yahuajo Eyacuiñajjiya eseya jama acanaje ba'a: —Eyaya miquianaya ba'e tiitii meeje'yo enije —oya poanaje.

Jamajjeya ja'a quea huea pojji! Eyacuiñajjiya epeejji nei jama jjashahuabaquime pocue ba'a: Eyacuiñajjiya e'e jojo nei ojjaña ma ecua ohuaya huohui canaje jamaya ajeyojeyo caje'yo. ¡A'a jjashahuabaquijji ohuaya jama ajjima e'acaje poso!

Eyacuiñajjiya jiquio ecua ohuaya huohui canaje jamaya acani e'e jojo nei

13-14E'e, yahuajo nei nei Eyacuiñajji miminaje esejaya etiiquiana nijje, Amajama nijje jama ba'a:

“Eyaya miya quea pame nee aje. E'e jojo nei miquea ebacua cuayaje dejja sho'i. Miquea osecua quea huiso nee nee poaje'yo. Eya ca ca oe nei quea ca'a nee nee poanijo jamaya ameeje'yo. Chama' pea e huoojea'yojji poani”.

Jamaya Eyacuiñajjiya aca poa.

15Amajama shajja'ajja majje jjashahuabaquia poa jama ba'a: —E'e jojo nei ma ohuaya huohui canajeya jamaya acaje Eyacuiñajjiya. Jamajjeya ecuea ebacua cuayaje. Ecuea osecua cuana quea huiso nee nee poaje —jamaya Amajama jjashahuabaqui pajea ajja nei nei poa. Jamajjeya Eyacuiñajjiya jamaya acanaje. Quijje nei Amajamaja bacua cuaya poa dejja sho'i.

16Eseya ca ca jama poani ba'a: —E'e jojo nei jiquio ecua eyaya huohuaña jama neiya eyaya aje.

Jamaya po majje pea huasijke poquiani dejja etii yasijke jama huohuiya ba'a: —¡Ecuea esohui etehue'yojo miquea bajjani tehuecue ojjañaja ebajji e'e jojo nei eyaya ecuea esohui aje! E'e, Eyacuiñajjiya ba canijo eyaya ecuea esohui jayojja jama aje'yo —jamaya eseyaya aña.

Jamajjeya dejja etija bajjani etehue'yo ba majje onajaya eniñeba'yojji pojjeama jama ba'a: —Chojja, ojaya esohui jayojja jama e'a'yojji pojjeama ohuaya.

¹⁷Oya jayojja Eyacuiñajjiya ojaya epeejji cuana jama acani ba'a: —E'e jojo nei ma ecua eyaya miquianaya huohuinaje jamaya eyaya miquianaya e'e jojo nei ba'e tiitii meeje'yo enijje.

Jamaya amajje oya jamaya poanaje pea'ai ba'a: —Eya eshe tii tii nequi. Jamajjeya ecuea esohui epajea'yojji pojjeama; jamaya eyaya e'e jojo nei aje'yo —jamaya ohuaya aca poa ojjañaja ebajji.

¹⁸E'e, Eyacuiñajjiya ma ecua ohua huohui ca poa jayojjaya jama acaje'yo. Oya siajje po ajja nei nei. Oya eshe tii tii nequi quea ca'a nee nee. Jamajjeya ojaya esohui epajea'yojji pojjeama. Jamaya e'e jojo nei acaje'yo. Jamajjeya ¡Jesosa nijje ejjapeequi quea bilihui nee nee! Jiquio ecua bishe jaadobiquiajo, onaa jjono jea cajo seya iñacuajiaña ehui'l'yo poaniya jjejojo jayojja jama eseya Eyacuiñajji nijje mimiani ese jaahuanajji, ese ba'e tiitii mee'yojji onijje eyajo. ¹⁹E'e, acui ca'aca'ajo bishe ai jeyo cani cuaa edojojea ca poajejje, ehui'l'yo poajejje jayojja jama eseya Jesosa nijje jjapeequiani ese jaahuanajji, ese nahuejjii, eshahua nijje epoquiquehua poaje jjejojo. Quea ca'a nee Jesosa, de. E'e, jama poani ba'a: Jodioja Eyacuiñajji nijje emimiji etii cuana Eyacuiñajjiya equi yasijje dobiqui majje equi dojjojo pea equecuayiji sisi yasijje dobiqui majamajanaje daquia secue pene yasijje. Ma equecuayiji sisi yasijje Jodio cuana oe nei dobiquinaje Eyacuiñajji nijje mimiya ojjañaja mimishi cuijea'yojji. Jesosa ca ca eyahuasijje dobiqui'yonaje. Jjeya oya Eyacuiñajji pejjejo yani. Onijje mimiani esejo. ²⁰E'e, ese eyahuasijje poqui jjimahuajo, Jesosa eyahuasijje poqui'yonaje. Huohui canaje jama ba'a: —Ecuea epeejji cuana quijje eyahuasijje poeje'yo enijje eba'e tiitii'yojji —jamaya Jesosa poanaje ese jjabahuejja neineiquiji.

Jamajjeya Jesosa Eyacuiñajji nijje emimiji oe nei quea ca'a nee nee poani. Jamaya oya po tiitii'yani. Yahuajo nei nequi Eyacuiñajji nijje emimiji Menequisine bajjani jayojja jama poanaje Jesosa.

Menequisine Eyacuiñajji nijje emimiji nei poa (Genesis 14)

7 ¹E'e, jiquio Menequisine yahuajo nei nei nequia poa. Oya Sanemi cuiñajji meshi mese poa. Eyacuiñajji nijje emimiji nei peal'i poa. Eyacuiñajjiya quea ca'a nee neeya oya jamaya po mee ca poa. Jamajjeya yahuajo nei etiiquiana Amajama pea emeshi mese quea mimishi cuana quecuajyeo'yo majje poe'ya poa. Ma ba majje Menequisine jama poa ba'a: —Amajama, miya quea pame nee. ¡Eyacuiñajjiya miya quea ca'a nee capo mee cahua! —aca poa.

²Amajamaa aquiana cuana quea huiso nee nee ye ca'ya poa, ma emeshi mese mimishi cuanaja sii ye ca'ya poa. Ma aquiana iye huiso quia ca poa Menequisineja epoji; jama aca poa ba'a: Amajamaa aquiana ome mijji peal'i huisome, 10 huisome yanijo ohuaya oe quia ca poa Menequisineja epoji.

Peapea aquiana cuana ojjaña aquiana jamaya aca poa. Menequisineja bajjani Ese Ejaja esohuijo jama ba'a: Emeshi mese quea ja'a nee ba'yani bajjani. Emeshi mese quea bei ba'yani bajjani pe'a'i oya Sanemi cuiñajji meshi mese poanijo. ³Oya cuamejje pojja'a poa; ecuanaja ba jjima Menequisineja chii bajjani, ojaya enaese bajjani ba jjima pe'a'i, ojaya ebacua ecuanajaya bajjani ba jjima pe'a'i. Oya ache shono cuaya poa ba jjima, ache shono mano'ya poa ba jjima pe'a'i. Chama' etehue'yo poa. Eyacuiñajjiya ca pa ca oe Menequisine huohui ca poa jama ba'a: —Menequisine, ¡miya enijje emimijji nei pocue! ¡Jamaya po tiitiicue! —aca poa. Oya jayojja Eyacuiñajjiya oja Bacua Ejja huohui ca poa pe'a'i.

⁴Jamejjeja ijashahuabaquicue Menequisinejo! Dejja etii quea pame nee nee oya poa. Amajama ca ca dejja etii quea pame nee pe'a'i poa. E'e, esejaya etiiquiana Amajamaa oya aquiana quia ca poa ma aquiana emeshi mese mimishi cuanaja sii jjequi'yo majje iye huiso quia ca'ya poa Menequisineja epojji. ⁵Amajama mano'yajo, quijje nei Moisesiya Amajamaja osecua Nemi bajjani Eyacuiñajjiya esohui huohui ca poa, Anonija bacua ejja. Jama aca poa ba'a: "Nemi miya, miquea ebacua cuana pe'a'i Eyacuiñajji nijje emimijji poaje'yo Jodio cuanajo. Jamajjeya Jodio cuaa miya caquia cahua aquiana eba'ejjii, jama caquia cahua ba'a: Ojaya ome miji pe'a'i, 10 huisome aquiana yanijo oe caquia cahua. Ojjaña ojaya aquiana cuana jamaya ca'a cahua" jamaya Eyacuiñajjiya esohui etehue'yo poani.

Nemi, ojjaña Jodio cuana pea'ai Amajamaja osecua cuana. Jamatii Jodio cuanaja mahuisoya aquiana cuana jjeshe ca poquia poa Nemija bacua cuaa, oja huapa pojjeama cuanaja aquiana. ⁶Menequisine ca ca yahuajo nei nei ba'ya poa Nemi cuaya jjimahuajo, Nemi Jodio cuanaja Eyacuiñajji nijje emimijji po jjimahuajo. Jamajjeya Nemija bacua pojjeama Menequisine poa. Jamatii Amajamaa oya aquiana quia ca poa. E'e, yahuajo nei Eyacuiñajjiya Amajama huohui ca poa jama ba'a: "Amajama, jiquio meshi miquea poaje'yo. Miquea osecua cuanaja poaje'yo tii tii" aca poa Eyacuiñajjiya. "Miquea osecua cuana quea huiso nei nei poaje'yo" aca poa pe'a'i.

Jamatii Amajamaa aquiana quia cajje Menequisineya huohui ca poa: —Amajama, miya quea pame. ¡Miya quea ca'a capo mee cahua Eyacuiñajjiya! —aca poa.

⁷E'e, Eyacuiñajji nijje emimijji Menequisine bajjani Amajama nijje miminaje Eyacuiñajjiya oya quea ca'a epo meeiji. Jamaya esejaya eba Amajama beshahua nei quea pame nee, Menequisine ca ca quea pame nee nee. Jamajjeya quea pame nee neejo Amajama oya iye huiso aquiana cuana quia ca poa. ⁸Quijje Jodio cuaa aquiana cuana iye huiso quia ca poquia poa Amajamaja osecua Eyacuiñajji nijje emimijji cuana huasijje, Nemi, oja bacua ejja cuana huasijje. Jamatii ma Eyacuiñajji nijje mimiani cuana mano ca poqui'ya poa. Menequisinejo ca ca Eyacuiñajjiya esohui jama poani ba'a: —Menequisine, ¡miya enijje emimijji nei po tiitiicue! —poani.

⁹⁻¹⁰Menequisine yahuajo ba'ya poa Amajamaja osecua jea jjimahuajo. Amajamaa iye huiso aquiana Menequisine quia canaje. Jamajjeya Jodio

cuaa huohui cani jama ba'a: —Amajamaa aquiana quia ca poa; Nemiya pea'aiya aquiana quia canaje, oya Amajamaja osecuaja cuiisa' dojjojo nequiahuaa —jamaya Jodio poani Nemijo, oja osecua cuanajo pea'ai. Jamatii quijje nei Nemiya, oja osecua cuaa pea'ai Eyacuiñajji nijje emimijji poanijo Jodioja aquiana iye huiso jjeshe ca poquia poa ojaya epoji, ojaya osecua cuanaja epoji pea'ai.

¹¹Eyacuiñajjiya Nemi, oja bacua cuana pea'ai huoojea ca poa onijje emimijji epoji, ojaya esohui Jodio cuana ba meesahuajji, quea ja'a eba'e meesahuajji pea'ai. Jamatii oya cuana aje oe dejja cuana poa, Eyacuiñajjiya epeejji pishana poa. Jamajjeya Eyacuiñajjiya esohui jayojja jama ba'e tiitii jjima poa. Jamajoya Eyacuiñajjiya pea onijje emimijji nei huoojea canaje, Nemija osecua pojjeama, pea. E'e, ohuaya Jesosa Quito huoojea canaje. Jesosa Eyacuiñajji nijje emimijji nei poanaje, Anoni jama pojjeama. Oya Jesosa Eyacuiñajji nijje emimijji nei Menequisine jayojja jama poanaje. E'e, Jesosaa ca ca oeyaya eseya Eyacuiñajjiya esohui jayojja jama ameesahua cani. ¹²E'e, Moisesija esohui jayojja jama Anonija osecua cuana Eyacuiñajji nijje emimijji cuana poa. Jjeya ca ca Eyacuiñajjiya pea onijje emimijji po mee canaje, oja Bacua Ejja Jesosa, Anonija osecua pojjeama. Jamajjeya jjeya eseya yahuajo jama ba'e ajja. Moisesija esohui jayojja jama amaja ajja. Jjeya ca ca eseya ba'yani Emeshi Mese nei Jesosaja esohui jayojja jama, yahuajo jama pojjeama. Jamajjeya Eyacuiñajjiya eseya ba ca'yani mimishi'ama'yo. ¹³⁻¹⁴E'e, yahuajo Eyacuiñajjiya Jesosa jama aca poa ba'a: —Jamajjeya miya enije emimijji nei poaje'yo ecuea epeejji cuanajo —Eyacuiñajjiya aca poa.

Jamatii Jesosa Nemija osecua pojjeama poa. Pea oya de, etiiquiana Jodaja jeaja osecua. Joda ca ca Eyacuiñajji nijje emimijji nei pojjeama poa. Jamajjeya Jodaja jeaja osecua cuanaja aquiana cuana dhuua jjima poa mei e'lya sohuajo Eyacuiñajji quea bei mimishi cuana nijje epo meeiji. Chojja, jamaya pojjeama Moisesija esohui Jodaja osecua cuanajo. Jamatii Eyacuiñajjiya Jesosa jama aca poa ba'a: —Miya enije emimijji nei nei poaje'yo ecuea epeejji cuanajo.

¹⁵Jamajjeya ecuea esohui Eyacuiñajji nijje emimijjiyo jjeya miquianajaya quea ja'a poani jama ba'a: Eyacuiñajji nijje emimijji Jesosa Quito poanaje. Jamatii oya Eyacuiñajji nijje emimijji nei Menequisine jayojjaya, Nemija osecua pojjeama. ¹⁶Jamajjeya Jesosa ca ca oe Eyacuiñajji nijje emimijji nei poanaje, Eyacuiñajjiya huoojea'yo, dejjaja, Moisesija peal'ai huoojea pojjeama. Oya Jesosa quea ca'a nee nee, enequi tiitiil'yo pea'ai. Jamajjeya oya Eyacuiñajji nijje emimijji nei poanaje ojaya epeejji cuanajo. ¹⁷Yahuajo nei Dabiya Eyacuiñajjiya esohui tehue ca poa jama ba'a: "Miya enije emimijji nei poaje'yo ecuea epeejji cuanajo. Jamaya poaje'yo tii tii, enije emimijji nei Menequisine jayojja jama" jamaya Eyacuiñajji poanaje Jesosa Quito nijje.

¹⁸⁻¹⁹Etiiquiana Moisesija esohui ajji poani yahuajo quea pamje pojjeama ba'ya poa. Mimishi'ama po mee jjima poa. Jamajjeya etiiquiana Moisesija esohui jayojja jama jjeya apajea ca'yonaje. Jjeya ca ca eseya Jesosaja

epeejji poanijo ojaya esohui jayojja jama ba'yani, yahuajo jayojja jama pojjeama. E'e, Jesosa Eyacuiñajji nijje mimiani esejo. Eyacuiñajji bacua cuana eseya po mee cani. Jamajjeya ba'e tiitii mee caje'yo onijje eyajo.

²⁰⁻²¹ E'e, Eyacuiñajjiya Jesosa huohui ca poa jama ba'a:

“Eya Eyacuiñajji quea ca'a nee enequi tii tii quea ja'a nee. Ecuea esohui jayojja jama eyaya e'e jojo nei aje'yo. Eyaya jama huohuiaña ba'a: —Miya ecuea cuana epeejjiyo mimi tiitiije'yo enijje”.

Jamaya Eyacuiñajjiya aca poa. E'e, Eyacuiñajjiya Jesosa huohui neinei ca poa onijje emimiji, ese ba'e tiitii mee'yojjii. Yahuajo nei Nemija osecua cuana onijje emimiji poanijo Eyacuiñajji ojjaña nijje mimi jjima. Jjeya Jesosa Eyacuiñajji nijje mimianijo ca ca Eyacuiñajji ojjaña ese nijje mimiani.

²² Jamajjeya esejaya eba e'e jojo nei Eyacuiñajjiya esohui ma ecua ohuaya Jesosa huohui ca poa jamaya ohuaya e'e jojo nei acaje quea pame nee nee. Jamajjeya ohuaya ojjaña ojaya epeejji cuana onijje ba'e tiitii mee caje'yo. Ma ohua Moisesi huohui ca poa ca ca quea pame pishana: Ojaya esohui jayojja jama ba'e neineiajo ojaya ebabaca poaje'yo, Eyacuiñajjiya.

²³ Nemi nequi tiitii ajja poa Eyacuiñajji nijje pea cuanajo emimiji tii. Dejja tii majje mano'ya poa. Jamajjeya jamaya ojaya osecua quea huiso nee nee popoquia poa, Eyacuiñajji nijje emimiji etii cuana. E'e, oe mano'yo majje oja bacua Eyacuiñajji nijje emimiji etii poa. Jamaya popoquia poa quea huiso nee nee. ²⁴ Jesosa ca ca eshe, mano'yo ajja tii tii. Jamajjeya oya Eyacuiñajji nijje e'e jojo nei mimi tiitiiani esejo, oja epeejji cuanajo. ²⁵ E'e, Jesosa mano'yo ajja, eshe tii tii nequi'yo Eyacuiñajji nijje esejo emimiji. Jamajjeya Jesosaja epeejji nei poanijo Eyacuiñajjiya bacua cuana poani. Ohuaya eseya ba'e tiitii mee caje'yo onijje eyajo.

²⁶ Eseya aje oe quea mimishi jjejojo Eyacuiñajjiya esohui jayojjaya jama ba'e jjima poaje. Jesosaa ca ca esejaya mimishi cuijea'yo majje ba'e tiitii mee caje'yo onijje. E'e, Jesosa oe nei quea pame nee nee, mimishi'ama nei nei, quea boejea nee nee, dejja mimishi jayojja jama pojjeama tii tii. Oya eyajo oja Chii pejjejo nequi, ojjaña huoojea'yojjii poani tii tii.

²⁷ Nemija osecua Eyacuiñajji nijje emimiji cuana aje oe Jesosa jayojja jama pojjeama poa. Ohuaya ca ca oe quea mimishiya jjejojo ojjaña pojajo aquiana cuana dahuajea caninaje Eyacuiñajji quea bei po meeiji. Aquiana dahuajea jjimahuajo Eyacuiñajji nijje miminaje jama ba'a: —Eyacuiñajji, ¡ecuea mimishi cuijea'yocue! —jamaya Eyacuiñajji nijje emimiji etii Nemija osecuaa aca poquia poa.

Majoya oya cuana mimishijo aquiana dahuajea majje Eyacuiñajji nijje miminaje pea cuanajo jama ba'a: —Eyacuiñajji, ¡miquea epeejji cuanaja mimishi cuana cuijea'yocue! —aca poquia poa Eyacuiñajji nijje emimiji etiiya.

Jesosa ca ca jama pojjeama. Oya mano'yonaje ojjaña mimishi cuijea'yojjii sosejje. Oya apoa po'yonaje, emano beca'yojjii pojjeama tii.

²⁸ Jamajjeya etiiquiana Moisesija esohuijo dejja cuana Eyacuiñajji nijje

emimijji po mee ca cuaa poa, Nemija osecua cuana. Oya cuana aje oe Eyacuiñajji esohui jayojja jama ba'le'yo jjima poa. Jamajjeya Moisesi nijje mimi majje quijje nei Eyacuiñajjiya oja Bacua Ejja Jesosa jama aca poa ba'a: "Miya oe nei mimishi'ama nei nei. Jamajjeya miya oe nei enijke emimijji nei poaje'yo ecuea epeejji cuanajo" jamaya Eyacuiñajji poanaje.

Eyajo Jesosa Quito nequi tiitiiani esejo Eyacuiñajji nijje mimiani tii tii

8 ¹Jamajjeya jjashahuabaquicue Jesosa Quitojo! Oya Eyacuiñajji nei nei. Eyajo nequi tiitiiani esejo Eyacuiñajji nijje mimiani tii tii. Eyacuiñajji quea ca'a nee nee pejjejo nequi, ebianei mijijje; onijje ojjaña huoojeajji poani tii tii. ²Jama ba'a: Yahuajo nei Jodio Eyacuiñajji nijje emimijji etii daqui equi dojjo huasijje, equecuayijji biso nei yasijje dobiqui'ya poa Eyacuiñajji nijje mimiya, Jodio cuana nijje Eyacuiñajji quea bei epoji. Ma daqui equi Jodio cuanaja soco poa Eyacuiñajji esohui shajja'ajjajji. Jesosa ca ca dobiqui'yonaje Eyacuiñajji e'anioque ani yasijje tii, daqui equi dejjaja soco huasijje pojjeama. Jomajo oya Eyacuiñajji nijje mimiani esejo. ³Jiquio Jodio cuana Eyacuiñajji nijje emimijji etii cuana babaca majje jama poa ba'a: —¡Miyaya aquiana dahuacue ijjiacajji ehuone' pe'a'i; Eyacuiñajji ecuana nijje quea bei po meecue! —aca poa Jodio cuaa.

Jamaya ona jayojjaya esejaya Eyacuiñajji nijje emimijji neiya, Jesosaa Eyacuiñajji quea bei po mee canaje ese nijje. Esejaya mimishi cuana cuijea mee'yojji sosejje oya mano'yonaje. ⁴Jesosa meshijo enequi jojjemo oya Eyacuiñajji nijje emimijji etii pojjeama pome. E'e, Jodioja Eyacuiñajji nijje emimijji etii cuana meshijo yania poa, Nemija osecua cuana. Moisesija etehue'yo jayojja jama aquiana dahuacue ca poquianinaje Eyacuiñajji quea bei po meeji. ⁵⁻⁶Jamaya yahuajo poa ba'a: Moisesi eyiyo huasijje jaasohuaquiajo, Eyacuiñajjiya oya huohui ca poa daqui equijo. Jama aca poa ba'a: "¡Ecuea esohui jayojjaya nei nei daqui equi acue! ¡Quea bame nee nee oe acue!" ca poa Eyacuiñajjiya.

Jamatii daqui equi iya mee ca poa ona ba meeji ma ohua quijje Jesosaa acaje'yo eyajo. Jamajjeya Jodio cuanaja emimijji Eyacuiñajji nijje quea pame pishana poa. Jesosa ca ca quea pame nee nee. Jamaya pe'a'i Eyacuiñajjiya yahuajo nei ojaya esohui huohui ca poa Moisesija etehue'yojji. Ma esohui etehue'yo quea pame poa. Quijje ca ca Eyacuiñajjiya esohui eyacua Jesosa huohui mee ca poa. Maya esohui quea pame nee nee. E'e, esohui ma ohua jjeya huohui ca poa jayojja jama eseya añajo, Jesosaa eseya ba'le tiitii mee caje'yo onijje eyajo. Jamaya esejaya eba. Jamajjeya eseya quea jaji nee poani. Yahuajo Jodio cuana quea jaji pishana poa: Onajaya ba jjima poa Jesosaja esohui eba'le tiitii'yojji onijje eyajo.

⁷E'e, yahuajo nei Eyacuiñajjiya Jodio cuana Moisesi nijje nequi ba mee ca poa ojaya esohui. Matatii ma esohui jayojja ohuaya acani mimishi pajea'yo jjima poa cuanaja. Ma esohui jayojja jama ba'yanijo mimishi cuijea'yojji jojjemo Eyacuiñajjiya Jesosa huoojea jjima poquiaye esohui eyacua huohuiya. ⁸Jamajjeya Eyacuiñajjiya ojaya epeejji cuana tecuea ca poa. Jama tecueame aca poa ba'a:

“Quijje eyaya esohui eyacua huohujje ojjaña Jodio cuanaja
 eshajja'ajjajji, ma Isaenija osecua cuanaja, Jodaja osecua cuanaja
 pea'ai eshajja'ajjajji. ⁹Yahuajo nei eyaya miquianajaya etiiquiana Ejito
 meshijo ba'e pea meshi yasijje dojo meesahuanaje. Ecuea esohui quea
 pame nee huohui huicha'a huicha'a meenaje pea'ai. Jamatii etiiquiana
 cuana shajjama' poa. Ecuea esohui jayojja jama a sa po'yo ajja poa.
 Jamajjeya eyaya oya cuana jaahuana jjima a poa. Jamajoya eyaya
 pea esohui quea pame nee aje'yo miquiana nijje. Jiquio esohui eyacua
 poaje, yahuajo jama pojjeama poaje. Eyaya jamaya huohuaña”.

Jamaya Eyacuiñajji poanaje.

¹⁰“Quijje eyaya Isaenija osecua cuana esohui eyacua huohujje
 jama ba'a: Jamajjeya miquianaya jjashahuubaqui meesahuanaje ecuea
 ejjashahuubaquiji jayojja. Ecuea esohui jayojja jama eyaya miquianaya
 ameesahuanaje: —Eyacuiñajjiya ecuana jaahuana cani —miquianaaya aje.
 Eyaya miquianaya saja'aje'yo: —Miquianaya cuana ecuea epeejji nei
 e'e jojo nei —eyaya aje'yo. ¹¹Miquianaya enijje jjapeequije'yo ojjaña,
 edejja tii cuana, esho'lquiana pea'ai. Jamajjeya pea nijje jama epo majajji
 pojjeama ba'a: —¡Eyacuiñajji nijje oe jjapeequicue! —e'a majajji pojjeama
 cuana. Chojja, oya jja iña ojjañaja eba poaje'yo año.

¹² Jamajjeya eyaya ojjaña cuanaja mimishi cuijea neineije'yo. Majoya
 eya jjashahuaba majaqui ajja miquianaja mimishijo. Quea bei
 poaje. Jamaya eyaya Isaenija osecua cuana huohujje”.

Jamaya Eyacuiñajji yahuajo nei nei poa Isaeni nijje.

¹³E'e, jiquio ecua daqui chii chii'yajo eyacua jjeshe majje daqui echii
 seya jeajeaña jayojja jama esohui eyacua amajje Eyacuiñajjiya esohui
 yahuajo nei Moisesi oja tehue meejo jjashahuuba neinei meeque'yo jjima
 aca poa: —¡Ecuea esohui eyacua jayojja jama acue; esohui yahuajo jayojja
 jama pojjeama! —jamaya Eyacuiñajjiya eseaya huohui cani jjeya.

Jodio etiiquianaja daqui equi Eyacuiñajjiya esohui bajji

9 ¹Yahuajo nei Eyacuiñajjiya Moisesi huohui ca poa jama ba'a:
 —¡Jamaya oe enijje mimicue! ¡Jamaya eya bihuiacue pea'ai! —aca
 poa—. ¡Equi iyacue enijje emimijji! —aca poa pea'ai.

² Jamajjeya Jodio cuaa daqui equi soco majje iya ca poa Eyacuiñajjiya esohui
 shajja'ajjajji, ma Moisesi tehue mee ca poa jayojja jama e'ajji. Jamajjeya yahuajo nei
 iya ca poa jama ba'a: Ebionei equi equecuayiji ai'ai nequia ca poa. Ma equecuayiji
 ai'ajjoya cuaquijji nequijji nequia ca poa, baa huo'o. Majoya acui equecuashiyo,
 mesa, quecua ca poa. Mesa quecuajyeyo majje cuiasha ca poa baa huo'ohua.
 Majoya mesa biajje pahui ojjaña pojjo iya majamaja ca poa piatojo Eyacuiñajjiya
 ebajji. Ma equecuayiji ai'ai bajjani ca poa Eyacuiñajji Nijje Ejjaapeequijji bajjani.
³Majoya biso nei quecuayijjime aca poa daqui equi yibedojojo. Majoya daqui
 moohua secue pene ca poa. Daqui moo quea bame nee ba'lehuanca ca poa esecue

jjani queyajji. Ma equecuayiji biso nei bajjani ca poa Eyacuiñajji Ese Nijje Emimijji Quea Bame bajjani.⁴ Ma equecuayiji biso neijo nequia ca poa cuaqui cojjasha anijji baa huo'o, shiyeshiye dahuajji. Shiyeshiye dahuajea cajje huichacha quea shiye nee nee ba'lesohuaquia poa. Majoya cajohui huana ca poa pea'ai; baa huo'ohua cuia'asha ca poa. Maya bajjani ca poa Eyacuiñajji Esohui Etehue'yo Huanajji bajjani. Ma cajohujio baa huo'o tahuoo e'yanobia ania poa. Baa huo'o tahuoojo ebio ania poa pahui sisi, ma yahuajo nei nei Eyacuiñajjiya etiiquiana cuana Moisesi nijje ijija mee ca poa. Anonija tojje acui ejjaquecua ca'aquijji ma cajohui dojjo ehuananobia jaa poa, ma tojjejo yahuajo pohua poa acui iña. Beca mei beje pea'ai cajohui dojjo ania poa, ma mei bejejo yahuajo nei Moisesija tehue'yo Eyacuiñajjiya esohui mei beje biajje oja tehue'yo, 10 esohui etehue'yo jaa poa.⁵ Cajohui biajje ania poa cuichojji nisho esohuidojiji jayojja. Quea bame nee nee, baa huo'o pea'ai. Oja ecuichohua queya ca poa cajohui. Ma esohuidojiji nisho cajohui yasijje cojja nequia poa. Ma ba majje Jodio cuana jjashahuabaqui'ya poa Eyacuiñajji onijje yani, oja mimishi cuijea'yojji. Jamatii jjeya miya ecuea ehuohuijji pojjeama ojjaña joya daqui equijo nequi aquiana.

⁶Ojjaña equi apoa poajo, Jodioja Eyacuiñajji nijje emimijji etii dobiquia poa equecuayiji a'i yasijje. Ojjaña pojjaço dobiqui nequia poa Eyacuiñajjiya yajjijo chacohua.⁷ Jamatii equecuayiji biso nei yasijje oe nei dobiquianinaje Eyacuiñajji nijje emimijji etii. Pea eshequiaja cuanajo oe dobiaquime poaninaje. Ohuaya ijjiacajji ehuone na' dojodobiaqui caninaje. Majoya Eyacuiñajji nijje mimianinaje jama ba'a: —¡Eyacuiñajji, ecuea mimishi cuijea'yocue! E'e, jiquio ijjiacajji eyaya ehuone' cuia'yonaje ecue mimishi cuijea'yojji sosejje —poaninaje oya.

Majoya jama poaninaje pea'ai ba'a: —¡Ojjaña miquea epjeejjia mimishi cuijea'yocue pea'ai! E'e, jiquio ijjiacajji ehuone' eyaya cuia'yonaje ojjaña mimishi cuijea'yojji sosejje —poaninaje. Jamaya oya po majamaja anijo, ojjañaaa oja mimishi cuana pajea'yo jjima acaninaje cuaa.

⁸Jamatjjeya jjashahuabaquicue daqui equijo, Jodio cuanaja iyajo! Jamaya ma daqui equi enequijojoya jjeya Edojjoshahua Pameya eseaya ba meesahua cani jama ba'a: Ma daqui equi e'anijo tii ma equecuayiji biso nei yasijje oe nei Eyacuiñajji nijje emimijji etii dobiquianinaje Eyacuiñajji nijje mimiya, ojjaña cuana dobiqui jjima poanaje.⁹ E'e, Eyacuiñajji nijje mimiani etii oe nei nei dobiquianinaje Eyacuiñajji nijje mimiya. Ma shahuaba majjeya esejaya eba ojjaña cuana Eyacuiñajji nijje mimi meemee ajja poa. Jjeya ca ca eseaya Eyacuiñajji nijje mimije, ojjaña. Yahuajo nei quea huiso ijjiacajji ehuone' dahuajea caninaje Eyacuiñajji ona nijje quea bei epoji. Dahuajea majamaja caninaje. Jamatii oya cuana jjashahuabaquianinaje jama ba'a: —E'e pojja'a eya quea bojea pojjeama. E'e pojja'a ecuea mimishi cuijea'yo jjima —poaninaje cuana.

¹⁰Yahuajo nei bobijo tehue ca poa pea'ai Moisesija etehue'yojo jama ba'a: —¡Beca bobí a'a ijjiacajji! ¡Beca e'ishijji pea'ai a'a jja oe ishijji! —jamaya Moisesiya tehue ca poa Jodio cuanaja e'ajji.

Moisesija etehue'yo jayojja jama Jodio etiiquianaa piato, shajjaggi cuana pea'ai shacula caninaje pea'ai. Ma etehue'yo jayojja jama besa majamajaninaje pea'ai. Jamajjeya etehue'yo jayojja jama besa majje quea yami boejea poa, jamatii quea mimishi tii poa, quea jjashahuabaqui tai. Eyacuiñajjiya oya cuana Moisesija etehue jayojja jama amee caninaje Jesosa poe jjimahuajo. Jesosa ca ca oeya ojjaña mimishi cuijea'yojji poani.

Jesosaja ena' cuayaquia poa eseja mimishi cuijea'yojji

¹¹ Jamajjeya jjeya Eyacuiñajjiya huoojea'yo ese jaahuanajji Jesosa Quito bajjani poeyanaje ese que. Oya Eyacuiñajji nijje emimiji nei eyacua. Ohuaya eseya quea pame nee acanaje. Quijje ohuaya eseya ba'e tiitii mee caje'yo onijje, mimishi cuijea'yo majje.

Daqui equi eyiye equecuayiji biso nei yasijke dejja cuanaja iya huasijje dobiqui jjima Jesosa Eyacuiñajji nijje esejo mimiya. Cho. Oya eyahuasijje dobiquinaje Eyacuiñajji e'anioque ani yasijke, eyiye biso nei quea pame nee nee jayojja huasijje. Oya Jesosa Eyacuiñajji nijje mimiani esejo.

¹² Jesosaa chivo na', ana'ai na' dojodobiaqui jjima eyahuasijje, de. Cho. Oya acui ecueata'apeejo mano'yonaje esejaya mimishi cuijea'yojji sosejje. Jamajjeya ohuaya eseya ba'e tiitii mee caje'yo onijje.

¹³ E'e, yahuajo nei Moisesija etehue'yo jayojja jama acaninaje cuua. Jamajjeya Eyacuiñajji nijje emimiji cuua ana'ai na', chivo na' pea'ai tepe jayojja huasijje sho majje ojjaña Jodio cuana jeasijjea majamaja caninaje. Majoya ana'aija bacua dahuajea'yo majje oja yami equiyoyejo pohui ena tejjee nane majje ojjaña Jodio cuana jeasijjea majamaja caninaje. Jeasijjea cajo, pea Jodio cuua ona ba caninaje quea boejea jayojja. Jamatii eyami nei quea boejea jayojja poaninaje. Mimishi ca ca ecujea'yo pojjeama. ¹⁴ E'e, ana'ai na', chivo na' pea'ai jeasijjea cajo, eyami ca ca oe quea boejea jayojja poaninaje. Jesosa Quito ca ca quea pame nee nee ese mimishi cuijea'yojji, de. Edojjoshhua Pame enequi tii tii. Ohuaya Jesosa ameesahua canaje Eyacuiñajjiya ejjashahuabaqui'yojji jayojjaya. Oya Jesosa mimishi'ama nei nei, mimishi'ama tii tii poanaje. E'e, oya acui ecueata'apeejo mano'yo majje ojaya ena' cuayaquinaje. Jamajjeya ohuaya esejaya mimishi cuijea caje'yo onijje jjapeequiyajo: —Ecue Chii, ecue na' cuayaquinajeo eyaya ecuea epeejjiya mimishi cuana cuijea neineije'yo —Jesosaa aca poa.

Jamajjeya Jesosaja epeejji nei poajo, Eyacuiñajjiya eseya quea boejea nee nee po mee cani ojaya ejjashahuabaquijji jayojja jama eba'e'yojji, etiiquianaja esohui jayojja jama pojjeama. E'e, jamaya Eyacuiñajjiya acani ohuaya enequi tiitiya jjejojo.

¹⁵ Ojjaña joya etiiquianaja Moisesija esohui jayojja jama ajji nisho poaninaje quea mimishi nee nee poa. Jamatii Jesosa Quito mano'yonaje onajaya mimishi cuijea'yojji sosejje. Jamajjeya eseya Jesosaa huohui cani jama ba'a: —Eyacuiñajjiya miquianaya ojaya esohui huohui ca o'oyani esohui eyacua jama

ba'a: "Eyaya miquianaya quea pame nee nee aje'yo. Ojjaña ecue babaca'yo enijje ba'e tiitii meeje'yo eyajo" jamaya Eyacuiñajji poani —Jesosaa aca poa.

¹⁶⁻¹⁷ Jama poani ba'a: Mano'yo jjimahuajo dejja jiquiojo ba'eya ojaya huapa pojjeama acani jama ba'a: —E mano'yajo ecuea aquiana cuana miquea poaje'yo, cha —acani cuua.

Jamajjeya ma dejja mano'yo majje ojaya aquiana cuana oja huapa pojjeamaja poaje'yo. Eshe nequija ca mi ca equia'yojji pojjeama. O mano'yajo ca ca oe jjeshe ca'yojji. ¹⁸Oya jayojja yahuajo nei Eyacuiñajjiya oja sohui tehue mee majje Moisesi aquiana quecuamee ca poa. Moisesi jama aca poa ba'a: —¡Aquiana ehuone' quecuajea'yocue! Oja na' cuayaquijao eyaya baje miquianaaya e'e jojo nei ecuea esohui jayojja jama aña ecuea epjeeji nei epojji —Eyacuiñajjiya aca poa.

¹⁹ Jamajjeya Moisesiya ojjaña Eyacuiñajjiya esohui etehue'yo huohui caninaje ojjañaja eshajja'ajjajji. Majoya ijjiacajji ehuone', ana'ai, chivo pealai cuia caninaje. Aquiana na' tepejo sho caninaje ena tejjee. Majoya ñajjajja ña huo'o acui aa quea shiyejo cuiabebo caninaje. Majoya ena tejjee nane majje esohui etehue'yo jeasiji caninaje, ojjaña Jodio cuana jeasijije caninaje pealai aquiana naa. ²⁰Majoya Moisesiya oya cuana jama aca poa ba'a: —Eyacuiñajjiya eseya ba mee ca poa ojaya esohui e'e jojo nei. Ojaya esohui jayojja jama ohuaya acaje'yo tii. Jamajjeya eyaya miquianaya jeasijijeña ijjiacajji naa. ¡Eya ena' jeasijijeajje jama pocue ba'a: "E'e, eseyaya ojjaña Eyacuiñajjiya esohui jayojja jama aje'yo tii" acue! —Moisesiya aca poa.

²¹ Jamaya pealai Moisesiya daqui equi acaninaje, ojjaña daqui equijo nequi aquiana pealai jeasijije caninaje ijjiacajji naa, ojjaña. ²²Jamaya acaninaje ojjaña Jodio etiiquiaa beshahua nei ojjaña aquiana cuana, Eyacuiñajjiya quea boejea'yo jayojja ebajji. Aquiana na' shojea caninaje Eyacuiñajji oya cuana quea boejea'yo jayojja epo meeji pealai. Jamaya Moisesija sohui etehue'yo poa. E'e, Eyacuiñajjiya jama aca poa ba'a: —Ijjiacajji ehuone' quecuajeo oja na' cuayaquijajo, eyaya miquianajaya mimishi cuijeaje'yo —aca poa.

Jamajjeya ena' cuayaquí ajjajo aje oe mimishi ecuijea'yojji pojjeama.

Jesosa Quito mano'yonaje mimishi cuijea neinei ca'yonaje

²³ Jamajjeya ijjiacajji na' jeasijije cajje ojjaña daqui equijo nequi aquiana quea boejea'yo jayojja po mee ca poa Jodio etiiquiaa. Jamaya acajo Eyacuiñajjiya ma aquiana ba ca poa quea boejea'yo jayojja. Jamaya Eyacuiñajjiya eseya ba mee cani. Jesosa Quito mano'yajo oja na' cuayaquinaje; mimishi cuijea neinei ca'yonaje esejaya. Quea boejea'yo po mee canaje. Jamajjeya eseya Eyacuiñajji cojja neijo nequi mee caje'yo eyajo. E'e, aquiana naa jeasijije cajje pojjeama eseya, Jesosaja epjeeji cuana quea boejea nee poaje'yo. ²⁴Oya jayojjaya Jodioja Eyacuiñajji nijje emimiji etii equecuayiji sisi yasijje dobiquia poa Jodio cuanajo Eyacuiñajji nijje mimiya oya Jodio cuana nijje quea bei epojji. Jamaya Eyacuiñajjiya eseya ba mee cani Jesosa

Quito eyahuasijje dobiqui'yonaje Eyacuiñajji nijje esejo mimiya. Jesosa ca ca daqui equi yasijje pojjeama dobiqui'yonaje. Cho. Eyahuasijje dobiqui'yonaje. Jjeya nei oya, Jesosa Quito Eyacuiñajji cojja neijo nequi, onijje esejo mimiani de, Eyacuiñajji ese nijje quea bei epojji.²⁵ Yahuajo nei jamaya poa peal'ai ba'a: Jodio Eyacuiñajji nijje mimiani etii equecuayijji biso nei yasijje dobi majamaja quianinaje. Pea shequijajao dobiaqui poaninaje, pea shequijajao dobiqui poaninaje. Oe dobiquime poaninaje oe shequijajao. Pea ena' dojodobiaqui caninaje, aquiana ehuone na!. Aquiana na' jeasijije majje jama acaninaje ba'a: —Eyacuiñajji, ¡ecuanaja mimishi cuana cuijea'yocue! —poaninaje.

Jesosa Quito ca ca ojjaña shequijajao pojjeama mano'ya poa. Mano'yonaje oe nei mano'yome poa. Ojaya ena' cuayaquinaje esejaya mimishi cuijea'yojji sosejje.²⁶ Jesosaja ena' aquiana na' jayojja jama poa jojjemo oya mano majamaja quiaye. E'e, dejja pana'yo majje mano majamaja quiaye quea huiso nee nee, de. Jamatii Jesosa mano'yonaje oe mano'yome poanaje, quea huiso pojjeama. Jamajjeya jjeya nei ojjaña Eyacuiñajji esohui beshahua nei apoa poanijo, Jesosa mano'yonaje. Ojaya ena' cuayaquinaje mimishi cuijea'yojji.²⁷ Eseya aje oe manoje'yo peal'ai; oe nei mano'yome poaje'yo. Mano'yo majje Eyacuiñajji cojja neijo nequije'yo. Ohuaya huohui caje quio ese ba'ya poa sosejje. Eseyaya quea pame ba'yaninajejo ba'e tiitii mee caje'yo onijje eyajo. Quea mimishi ba'yaninajejo ca ca quea nee nee po tiitii mee caje'yo.²⁸ Jamajjeya Jesosa Quito mano'yonaje, oe mano'yome poanaje peal'ai. Oya mano'yonaje mimishi cuijea'yojji ojjañaja. E'e, yahuajo Jesosa Quito mano'ya poa. Quijje oya poeje o'oya mimishi cuijea'yohua pojjeama. Poeje'yo ojaya epeejji ba'e tiitii mee'yohua, ojjaña joya ojo jja'ishoal'ajjaquiani jjehua'yohua.

Ijjiacajji ehuone naa jeasijije cajo mimishi ecuijea'yo pojjeama

10 ¹ Jodio Eyacuiñajji nijje mimiani cuaa Moisesija etehue'yo jayojja jama amajamaja caninaje. Onajaya ba jjima pishana ma Eyacuiñajjiya quijje eseya quea pame nee nee acaje'yo. Onajaya quea ja'a pojjeama. Eyacuiñajji nijje mimiani cuaa quea huiso aquiana biajje ena' jeasijije cajje Eyacuiñajjiya ma aquiana cuana ba ca poa quea boejea jayojja. Ojjaña shequijajao ijjiacajji ehuone' quecua majamaja majje jama poaninaje ba'a: —Eyacuiñajji, ¡miquea epeejji cuanaja mimishi cuijea'yocue ojjaña! —acaninaje Jodio cuaa.

Jamatii Eyacuiñajjiya etiiquianaja mimishi cuijea neinei'yo jjima aquiana ehuone' cuia ca'yajo. ² Jamajjeya aquiana ehuone' cuia ca'yajo etiiquiana quea boejea nee nee epo mee jojjemo aquiana cuia majamaja jjima aca quiaye. E'e, oya cuana quea boejea nee nee epo mee jojjemo mimishijo yeno'ama poquiaye. ³ Jamatii ijjiacajji ehuone' ojjaña shequijajao cuia majamaja caninaje. Jama poaninaje ba'a: —Eyacuiñajji, ¡miquea epeejji cuanaja mimishi cuijea'yocue! —acaninaje.

Cuia majje jama po ajja poaninaje ba'a: —Jjeya ca ca ecuanajaya mimishi chama'yo poaje —ajjima acaninaje. Cho. Jama poaninaje ba'a: —Ecuana quea mimishi, de —Jodio etiiquiana cuana poaninaje.

⁴Chojja, ana'ai na!, chivo na' pea'ai jeasijjija majje mimishi cuana ecuijea'yojji pojjeama. ⁵Jamajjeya Jesosa Quito hua poe jehuua oja Chii jama aca poa ba'a:

“Ecue Chii, miquea epeejji cuana aquiana ehuone' nequi cuia mee sa po'yo ajja, miya. Aquiana ehuone' dahuajea mee sa po'yo ajja pea'ai miya. Cho. Miyaya eya dejja cuana huasijje huoojeaña yamijji. ⁶E'e, miquea epeejji cuaa aquiana ehuone' cuia cani mimishi cuijea'yojji nisho mi quea bihui nee po meeiji nisho. Ma ohua dahuajea cajoya miya quea bihui nee pojjeama poani. ⁷Jamajjeya eyaya miya jama anaje ba'a: —Ecue Chii, eya meshi yasijje poeyanaje. Miquea ejjashahuubaqui'yojji jayojjaya jama eyaya aje'yo. Jamaya yaya aje'yo mi quea bihui nee po meeiji”.

Jamaya yahuajo oja Chii Eyacuiñajji Jesosa Quito hua acanaje. ⁸E'e, Jesosaa oja Chii jama acanaje ba'a:

“Ecue Chii, miquea epeejji cuaa ijjiacajji ehuone' nequi cuia mee sa po'yo ajja, dahuajea mee sa po'yo ajja pea'ai miya. Ijjiacajji ehuone' cuia cani cuaa mimishi cuijea'yojji nisho aje oe miya quea bihui nee pojjeama poani. Maya dahuajea canijo pea'ai miya quea bihui nee pojjeama”.

Jamaya acanaje Jesosaa, jamatii yahuajo Moisesija esohui etehui'yo jayojja jama Jodio cuanaa aca poquianinaje, ehuone' cuia majamaja ca poquianinaje. ⁹Jamajjeya majoya Jesosaa jama acanaje ba'a: “Ecue Chii, eyaya miquea ejjashahuubaqui'yojji jayojja jama aje'yo mi quea bihui nee po meeiji”. Jamaya acanaje.

Jamajjeya Jesosa Quito poeyanajejo ca ca oe Eyacuiñajji eseya jama acani ba'a: —¡Jesosa Quito jayojja jama pocue, oe! ¡Ecuea ejjashahuubaqui'yojji jayojja jama oe atitiicue! Jjeya ohuaya eseya huohui maja ajja jama ba'a: —Jodio etiiquiana yahuajo nei nei ba'ya poa jayojja jama acue! ¡Ehuone' cuia'yo majje dahuajea'yo cue miquea mimishi cuijea mee'yojji! —Cho. Jamaya Eyacuiñajji eseya amaja ajja. ¹⁰Jamajjeya Jesosa Quito hua Eyacuiñajji ejjashahuubaqui'yojji jayojja jama acanaje. Mano'yonaje; oe mano'yome poanaje eseja mimishi cuijea'yojji. Jamajjeya Eyacuiñajji eseya mimishi cuijea'yo majje quea boeja po mee ca'yani Jesosaja epeejji nei cuana.

¹¹Yahuajo nei Jodio Eyacuiñajji nijje mimiani etii ojjaña pojja daqui equijo chachochaconaje. Ehuone' cuia majamaja caninaje mimishi cuijea mee'yojji nisho. Ecuijea'yojji cuijea ca'yaninaje de, mimishi cuijea'yo jjima poa.

¹²Jesosa Quito ca ca Eyacuiñajji nijje emimiji nei. Oya ca ca oe mano'yonaje; oe mano'yome poanaje. Aquiana ehuone' mano'yani jayojja jama pojjeama poanaje oya. Mano'yonaje mimishi cuijea'yojji. Apoa. Mano beca'yo ajja. Eyahuasijje sohuaqui'yonaje. Eyacuiñajji pejjejo anioque'yonaje, ebianei mijijje. Eyacuiñajji nijjeya ojjaña huoojea'yojji poani oya, Jesosa. ¹³Majoya jjeya

ohuaya ishoa ca ani Eyacuiñajjiya eshahua cuana, ojña ojaya epeejji pojjeama, shajjama' cuana peal' ai jeabichaje' yo majje quea nee po mee caje' yo tii tii.
¹⁴E'e, Jesosa acui ecueata'apeejo mano'yonaje; ojaya epeejji mimishi'ama po mee ca poa. Jamajjeya eseya Eyacuiñajjiya esohui jayojja jama ameesahua cani.

¹⁵Edojjoshahua Pameya peal' ai eseya ba meesahua cani Eyacuiñajjiya esohui ma ohua yahuajo tehue mee ca poa ojaya epeejjiya ebajji. Ebionei jama poa ba'a:

¹⁶"Quijje eyaya miquianaya esohui eyacua huohuje. Jamajjeya miquianaya jjashahuabaqui meesahuaje ecuea ejjashahuabaquijji jayojja. Ecuea esohui jayojja jama eyaya miquianaya ameesahuaje".

¹⁷Majoya ohuaya jiquio esohui tehue mee ca poa:

"Jamajjeya eyaya ojña cuanaja mimishi cuijea neineije' yo. Majoya eya jjashahuaba majamajaqui ajja miquianaja mimishijo. Quea bei poaje". Eyacuiñajjiya jama tehue meemeya aca poa. ¹⁸Jamajjeya Jesosa Quito esejaya mimishijo mano'yo majje mimishi cuijea ca'yonaje. Apoa poanaje. Jamajjeya oya mano beca'yo ajja. E'e, aquiana ehuone' quecuia maja ajja peal' ai, ¿ajeo equecua'yojji? Jesosa mimishi cuijea'yojji quea pame nee poanaje.

¡Jesosa chipi nei ejjapeequi!

¹⁹Yahuajo Jodio Eyacuiñajji nijje mimiani cuana quea mete dobiquia poa daqui equecuayiji biso nei yasijke. Dobiquia poa Eyacuiñajji nijje mimiya. E'e, Jesosa Quitohua mano'yonaje; ojaya ena' cuayaquinaje ese quea boejea po mee'yojji. Jamajjeya Jesosaja epeejji cuana, jjeya Eyacuiñajji nijje emimi metel'ama nei. ²⁰Yahuajo nei Eyacuiñajji nijje emimiji etii oe nei daqui esecueje equecuayiji biso nei yasijke dobiquianinaje Eyacuiñajji nijje mimiya. Jjeya eseya Eyacuiñajji nijje mimiani, ojña. Jesosa esejo mano'yonaje. Jjeya oya eshe, enequi tii tii. Jamajjeya eseya mimi majamajani Eyacuiñajji nijje. ²¹Oya, Jesosa Eyacuiñajji nijje emimiji nei esejo peal' ai. Eseya jaahuana tiitii cani, ojaya epeejji nei. ²²Jamajjeya eseya ojaya epeejji e'e jojo nei poanijo Eyacuiñajji nijje emimi. E'e jojo nei emimi tii tii onijke. ¡A'a jama pojji ba'a: —¡Dee! Eya quea mimishi Eyacuiñajji nijje emimiji —a'a jamaya pojji! Cho, esejaya mimishi cuana cuijea ca'yonajejo eseya quea boejea nee'yo.

²³Eyacuiñajjiya ojaya esohui jayojja jama acaje' yo. Siajje po ajja oya. E'e jojo nei eseya ba'e tiitii mee caje' yo onijke eyajo. Jamaya esejaya eba. Jamajjeya ¡ejjapeequi onijke nei! ²⁴¡Jesosaja epeejji cuana quea jea nee ejja'aqui! E'e, ¡ejjashahuabaqui pea epeejji cuanajo, o ba'e meesahuajji, Jesosajo echaco sahuajji pea' ai! ²⁵Beca epeejji cuana aje oe jjachicha pajaequinaje; ojee Eyacuiñajji bihuia ajja po'yonaje. ¡A'a oya cuana jayojja jama pojji! ¡Ojee ejjachichaqui! Jesosaja epeejji cuana nijje emimi jama ba'a: —¡Quea bihui pocue! ¡Jesosa nijje jjapeequicue ecuana nijje! —ejja'aqui.

E'e, Jesosa Quito esejaya Emeshi Mese nei poje' yo. Jamajjeya oe jamaya epo tiitii.

¡Jesosa Quito a'a cajaa ajji!

²⁶Beca cuana aje oe Eyacuiñajjiya esohui e'e nei ba majje jamatii quea mimishi po tiitii sa poani. Jamajjeya ojaya mimishi ecuijea'yojji pojjeama. E'e, Jesosa ca ca oe mimishi cuijea'yojji. Pea chama! ²⁷Jamajjeya Eyacuiñajjiya ojjaña shajjama' cuana jeajea caje'yo cuaqui yasijje onijje mi jjapeequi'yajo. Quea nee nee po tiitii mee caje'yo. ²⁸Yahuajo nei Jodio etiiquiaa Moisesija etehue'yo jayojja jama mi atitii cajo, cuiajea ca'yaninaje, dejja etii cuaa. Beca dejja cuaa oya jayojja huohuime acajoya jama ba'a: "Oya ca ca oma shajjama', Moisesija esohui jayojja jama a sa po ajja. ¡Cacuiajea ca'yahua cuaa ca oma!" jama huohuime acajoya cuiajea ca'yaninaje dejja etiiya. Chama'yo tii aca'yaninaje cuana. ²⁹Oya jayojjaya jjeya beca cuana Eyacuiñajjiya Bacua Ejjajo, Jesosajo mimipanajeapanajeani. Cajaa acani quea mimishi nee neeya jjejojo. Eyacuiñajjiya esohui quea pame nee ojjaña ba mee canaje jama ba'a: —Jesosa mano'yonaje miquianajaya mimishi cuijea'yojji —jamaya ba mee canaje.

Jamatii beca cuana siajje poani jama ba'a: —Jesosa dejja mimishi jayojja jama mano'yonaje, jamatii.

Edojoshahua Pameya ojjaña quea pame jaahuana sa acani. Jamatii beca cuana Edojoshahua Pame shajja'ajja sa po'yo ajja. Cajaa acani. Oya cuana quea tai nee nee poani. Jamajjeya oya cuana quea nee nee po mee caje'yo tii tii Eyacuiñajjiya. Yahuajo nei Moisesija etehue'yojo shajjama' poanijo ca ca quea tai pishana. Jamatii quecuajea ca'yaninaje cuaa. ³⁰E'e, esejaya eba Eyacuiñajjiya yahuajo tehue mee ca poa jama ba'a:

"Eyaya eyaye nei dejja mimishi quea nee nee po meeje'yo. Ojjaña joya pea cuana quea nee poani eyaya quea nee nee po meeje'yo". Jamaya Eyacuiñajji poa pea'ai ba'a: "Ecuea epeejji quea mimishi poajo, eyaya oya cuana ejjabahuejjaquijji quea nee po meeje". Jamaya Eyacuiñajji poa pea'ai.

³¹Jamajjeya ¡quea mete nee nee capoahua ojjaña joya Jesosa Quito cajaa ajji poani, de! Eyacuiñajjiya oya cuana quea nee nee po mee caje'yo. Oya ca ca oe nei eshe nequi tii tii, quea ca'a nee nee.

Jesosa nijje jjapeequi majje ¡quea ja'a nee po tiitiicue!

³²Ecuea epeejji cuana, ijhashahuabaquicue! Yahuajo Jesosa nijje jjapeequi jeahuajo miquianaya ojaya epeejji quea ja'a nee poanaje. E'e, Eyacuiñajjiya esohui shajja'ajja majje miquianaya onijje jjapeequinaje. Edojoshahua Pame miquiana que dobiquinaje pealai. Jamajjeya Jesosaja epeejji pojjeama cuaa miquianaya napa canaje quea huiso. Miquianaya quea nee poanaje. Jamatii Jesosa nijje jjapeequi pajea aja poanaje, jjapee neinequinaje. ³³E'e, Jesosaja epeejji pojjeama miquiana nijje mimijajinaje quea huiso ojjaña eshajja'ajjaji. Miquianaya napa canaje pealai. Quea nee po mee canaje. Jamatii miquianaya metel'ama poanaje. Onaa Jesosaja epeejji napa canijo, miquianaya onijje jjapeequinaje, Jesosaja epeejji cuana nijje.

³⁴Ejeanobia jaa huasijje pea'ai miquianaya poquinaje mete'ama Jesosaja epeejji cuana baa, ona bobiaa. Miquianaya ejeanobia jaajo aquiana sijjea ca'yonaje cuua. Jamatii miquianaya yeno'ama poanaje. Quea bihui miminaje jama ba'a: —Ecuanaya Jesosaja epeejji poanijo ohuaya ecuana quea pame nee nee acaje'yo quijje. Ecuanaya ba'e tiitii mee caje'yo onijje eyajo —poanaje miquianaya.

³⁵Jamatjeya ja'a jja oe Jesosa nijje jjapeepajeaqu'iyojj! Onijje jjapee neineiquianijo, ohuaya miya quea pame nee acaje'yo. Eyajo miya quea huiso sosequia caje'yo pea'ai. ³⁶E'e, jquea bihui nee atitiicue Eyacuiñajjiya esohui jama! ¡A'a hueahueajji! Jamaya miquiaaya atiitiyajo, ohuaya miquianaya quea pame nee nee acaje'yo. Ojaya esohui yahuajo ohua huohui ca poa jamaya ohuaya acaje'yo. Miquianaya ba'e tiitii mee caje'yo onijje eyajo. ³⁷E'e, Eyacuiñajjiya esohui yahuajo nei etehui'yo jama poa ba'a:

“Ishoa socue ojaya epoejji! Jjeya nei pojja'a oya poeje'yo, quijje nei pojjeama.

³⁸Ojjaña joya enijje jjapee tiitiiquiani eyaya baña mimishi'ama, quea bojea'yo. Enijje jjapeepajequiajo ca ca ecuea boti'ama; quea nee po meeje'yo”.

Jamaya esohui etehui'yo poa.

³⁹Ecuanaya ca ca jamaya pojjeama. Jesosa nijje jjapeepajeaqu'iyo ajja tii. Jamatjeya Eyacuiñajjiya ecuana quea nee nee epo mee'yojj pojjeama. Cho. Ecuana Jesosa nijje jjapee tiitiiquianijo ohuaya ba'e tiitii mee caje'yo onijje eyajo.

Beca etiiquiana Eyacuiñajjiya epeejji nei poa

11 ¹Ecuea epeejji cuana, esejaya eba nei nei jama ba'a: Jesosaja epeejji poanijo e'e jojo nei Eyacuiñajjiya ojaya esohui jayojja jama eseya acaje'yo. Jamatjeya eseya jama poani ba'a: —E'e jojo nei Jesosa quea huiso esohui huohui canaje; jjeya beca cuana esejaya quea quehua. Jamatii quijje eseyaya baje'yo.

²⁻³Jamatjeya Jesosaja epeejji poanijo eseyaya baña Eyacuiñajjiya ojjaña tii pana ca poa. E'e, oya jama poa ba'a: —Meshi cuana, ijapanaqueicue! —jamaya acajje meshi jjapanaqueia poa. E'e, yahuajo nei ojjaña chama' nei nei poa. Jamatii Eyacuiñajjiya ojjaña pana ca'ya poa.

E'e, etiiquiana pea'ai Eyacuiñajji nijje jjapeeqianijo, ojaya esohui jayojja jama acanijo pea'ai, Eyacuiñajji ona nijje jama poa ba'a: —Miquianaya ecuea epeejji poanijo eyaya miya baña quea pame nee poani —aca poa.

Etiiquiana Abeni bajjani Eyacuiñajjiya epeejji nei poa

⁴Abeni Eyacuiñajjiya epeejji poanajejo ojaya esohui jayojja jama aca poa quea pame nee. Jamatjeya ijjiacajji ehuone' dahuajea cajo Eyacuiñajji bihuiajji, Eyacuiñajji onijje miminaje jama ba'a: —Abeni, miya quea ja'a nee anaje. Jamaya ecuea quea boti nee. Jamatjeya eyaya miya baña mimishi'ama —Eyacuiñajji poa.

Abenija o'iya Cainiya Eyacuiñajji esohui jayojja jama pojjeama aca poa. Quea pame pojjeama aquiana quia ca poa Eyacuiñajji bihuiajji. Jamajjeya Cainija quia'yo Eyacuiñajji boti'ama poa. Jamajoya Caini jjashahuabaquinaje jama ba'a: —Eyacuiñajji Abeni quea jea nee poani. Ojaya eya boti'ama. Jamajjeya eyaya Abeni cuijeaje'yo —aca poa Cainiya. Jamatii ecuanaja eba Abeniya Eyacuiñajji esohui jayojja jama aca poajo ojaya epeejji nei poa. Abeniya quea pame aca poajo eseya jjashahuabaqui majje Eyacuiñajji nijje jjapeequije quea pame nee.

Etiiquiana Enoca bajjani Eyacuiñajji epeejji nei poa

⁵Enoca Eyacuiñajji epeejji nei nei poa pea'i. Jamajjeya oya mano'yo jjima. Eyacuiñajji oya jjequisohua ca'ya poa eyahuasijje eshe tii. Onijje nequi dejja cuaa oya sa'ajja ca'ya poa. Chama' ba ca'ya cuaa poa. Eyacuiñajji esohui yahuajo nei nei tehue ca poa Enocajo jama ba'a: "Eyacuiñajji esohui jayojja jama aca poajo Eyacuiñajji quea bihui nee poa Enocajo" jamaya tehue ca poa.

⁶E'e, Eyacuiñajji nijje jjapeequi ajjajo, ojaya esohui jayojja jama a'ajjajo, Eyacuiñajji ojjaña ese nijje quea bihui nee pojjeama poaje. Ojjaña joya Eyacuiñajji nijje jjapeequi sa poani cahuohui cahua jama ba'a: —Ecuea eba Eyacuiñajji enequi tii tii, eshe. Ojjaña joya oya sa poani ohuaya e'e jojo nei quea pame nee acani —cahuohui cahua.

Etiiquiana Noe bajjani Eyacuiñajji epeejji nei poa

⁷Noe Eyacuiñajji epeejji nei pea'ai poa. Jamajjeya Eyacuiñajji oya huohui ca poa jama ba'a: —Ojjaña meshijo ba'e cuana hui'ijeaje'yo ena jjayehuequiajo. Ohuajea caje ojjaña tii —Eyacuiñajji aca poa.

Noeja ba jjima poa ena quea quemó nee poaje. Jamatii ohuaya Eyacuiñajji esohui shajja'ajja ca poa. Bishe, nacha quea quemó nee nee iya ca poa ojaya, oja bacua cuanaja edobiquijji, hui'l'yo jjima epoiji. Jamajjeya Eyacuiñajji onijje mimia poa jama ba'a: —Noe, miya ecuea epeejji poani. Ecuea esohui jayojja jama aña. Jamajjeya eyaya miya baña mimishi'ama —aca poa.

Noeya Eyacuiñajji shajja'ajja ca poajo, eseyaya baña pea cuana aje oe shajjama' nei nei poa.

Etiiquiana Amajama bajjani Eyacuiñajji epeejji nei poa

⁸Amajama Eyacuiñajji epeejji nei poa. Jamajjeya Amajamaa shajja'ajja ca poa Eyacuiñajji onijje mimiajo. Jama poa ba'a: —Amajama, ¡miquea meshijo nequi cuayaqui'yocue! ¡Poquicue pea meshi yasijje, ma miquea ba jjima huasijje! Eyaya ma meshiya miya quiaje. Miquea eba'eiji poaje'yo, miquea osecua cuanaja pea'ai poaje'yo —Eyacuiñajji aca poa.

Jamajjeya Amajamaa Eyacuiñajji shajja'ajja ca poa. Poquia poa jamatii oja ba jjima meshi yasijje. ⁹Jamajjeya Eyacuiñajji esohui jayojja jama poanijo oya ba'equi'ya poa pea meshi yasijje, ma Eyacuiñajji o huohui ca poa huasijje. Ma

meshijo ba'e dejja pea poa. Jamajjeya Amajamaja equi iya jjima poa; daqui equijo ba'ya poa. Jamaya pealai poa oja bacua Isaaca, ojaya osecua Jacobo pealai.

—Jiquio meshi eyaya miya quiaje miquea eba'ejji —jamaya Eyacuiñajjiya huohui ca poa Amajama, oja bacua Isaaca, ojaya osecua Jacobo pealai.

¹⁰E'e, Amajama jjashahuabaquinaje pea cuiñajji, cuiñajji eyacuajo, ma Eyacuiñajjiya eyajo iya canijo. Amajama jama poa ba'a: —Quijje eya Eyacuiñajjiya cuiñajji eyacuajo ba'eje.

Etiiquiana epona Sana bajjani Eyacuiñajjiya epjeejji poa

¹¹Sana Eyacuiñajjiya epjeejji nei poa pea'ai. Jamajjeya Sana poná tii nojinoji majje jjamejoquia poa, jamatii esho'yahua jjamejoqui jjima poa. Eyacuiñajjiya oya jjamejoqui meesahua ca poa ojaya epjeejji nei poanijo. Sana jjashahuubaquia poa jama ba'a: —Eyacuiñajjiya huohui canaje Amajama ecuanaja ebacuajo e'e nei. Jamajjeya ma ecua ecuanaya ohuaya huohui canaje jamaya acaje'yo e'e jojo nei —Sana poanaje.

¹²Amajama Eyacuiñajji nijje jjapeequinaje pea'ai, oja sohuijo e'e nei jjabahuejjaquinaje. Jamajjeya dejja tii nojinoji majje, 100 shequiajame tii majje ebacua jea ca poa. Ehuanase etii nojinoji jjamejoquia poa, jamatii yahuajo nei bacuama' nei nei poa. Jamajjeya ojaya osecua quea huiso nee nee quijje jjapapaqui'ya poa. Majameta huisoajja poa, sico meemee ajja quea huiso nee nee. Meshijajijo ani mei sisi huisoajja poa.

Etiiquiana cuiñajji eyacuajo eyajo jjashahuabaquianinaje

¹³Jiquio etiiquiana Eyacuiñajji nijje jjapee tiitiiquianinaje. Dejja tii majje mano'ya poa Eyacuiñajjiya epjeejji tiiya. E'e, Eyacuiñajjiya oya cuana huohui ca poa jama ba'a: —Eyaya miya jiquio meshi quiaje'yo miquea epoji, miquea osecua cuanaja epoji pea'ai.

Jamatii maya meshi ojaya pojjeama, mesena jjima poa: —Eyacuiñajjiya esohui e'e nei, ohuaya meshi quea pame nee quijje quia caje'yo ecuanaja osecua cuanaja epoji —etiiquiana jjashahuabaquianinaje. Jamajjeya oya cuana quea bei nee po'ayequianinaje: —Ecuana jiquio meshijo anije so'o —poaninaje etiiquiana—. Meshijo ca jja ca oe ecuana eba'e tiitiiji pojjeama. Eyajo ca ca oe ecuana ba'e tiitiije'yo Eyacuiñajjiya cuiñajji eyacuajo —jamaya poaninaje Amajama, Isaaca, Jacobo cuana.

¹⁴E'e, oya jamaya poaninaje pea eba'ejji jjashahuabaquianijo. Eba'ejji e'e jojo neijo jjashahuabaquianinaje ojaya epoji tii tiijo. ¹⁵Oya cuana jjashahuaba majaqui ajja poa meshijo, ma yahuajo oja jiña'yojo. Jjashahuabaquianinaje jama ba'a: —Ma e ba'ya poa meshi yasijje ca iña poqui sa po'yo ajja. ¿Ajeo epoqui o'oyajji, de? —poanaje oya cuana.

¹⁶Chojja. Oya cuana pea eba'ejji jjashahuabaquianinaje, eba'ejji eyacua quea pame nee neejo eyajo Eyacuiñajji nijje. Jamajjeya Amajama jama poa ba'a: —Eyacuiñajji, eya miquea epjeejji.

Amajama jama poajo Eyacuiñajji etiiquiana nijje miminaje jama ba'a: "Miquianaya ecuea epeeiji nei; eya quea bei nee miquianajo" aca poa. Jamajjeya Eyacuiñajjiya oya cuana ojaya cuiñajji eyacua quea pame nee yasijje ba'e mee caje'yo, ma ohua yahuajo eyajo pana ca'ya poa huasijje.

¹⁷⁻¹⁸ E'e, Amajama Eyacuiñajjiya epeeiji nei poa. Yahuajo Eyacuiñajjiya oya huohui ca poa: "Amajama, miquea ebacua cuayaje" aca poa. Majoya Amajamaa ebacua cuayajo Isaaca bajjani aca poa. Majoya Eyacuiñajjiya Amajama jama aca poa ba'a: "Isaacaja bacua ca ca oe eyaya baña miquea osecua e'e nei, pea cuana ca chojja" aca poa. Jamatii quijje Eyacuiñajjiya Amajama jama aca poa ba'a: "Amajama, ¡miquea ebacua ejja oe nei Isaacaca bajjani mei biajje huana majje yacua'yocue, dahuajea'yocue!" Jamaya Eyacuiñajjiya Amajama huohuime aca poa a'a e'e jojo nei ohuaya shajja'ajja caje ebajji: "Eya e'e jojo nei Amajamaja quea jea neejo, ohuaya ecuea esohui shajja'ajja caje" poanaje.

¹⁹ Majoya Eyacuiñajjiya esohui shajja'ajja majje Amajamaa oja bacua ejja dojo ca poa eyacua'yoji nisho: —E'e, eyaya Eyacuiñajjiya esohui jayojja jama aje'yo; ecue bacua oe nei yacuajeje'yo —Amajama poanaje—. E'e, eya Isaacaca yacua'yajo, Eyacuiñajjiya oya emano'yojaa shequi mee caje o'oya —Amajama poanaje.

Jamajjeya Isaacaca yacua jjimahuajo Eyacuiñajjiya Amajama huohui canaje jama ba'a: "Amajama, ja'a miquea ebacua Isaacaca yacua'yoji!" aca poa.

Jamajjeya Amajamaa Isaacaca equi yasijje dojo ca o'oya poa, eshe. Beshahua nei Isaacaca yacua ca'yonaje. Jamajjeya eyacua'yojaa shequi o'oya jayojja Isaacaca poa.

Etiiquiana Isaacaca, Jacobo, Jose pea'ai Eyacuiñajjiya epeeiji poa

²⁰ Isaacaca Eyacuiñajjiya epeeiji nei pea'ai poa. Jamajjeya ojaya ebacua ejja Jacobo, Esao pea'ai huohui ca poa jama ba'a: —Jacobo, Esao pea'ai, ¡shajja'ajjacue mo! Ma ecua eya ohua huohui ca poa jayojja jama Eyacuiñajjiya acaje'yo miquiana nijje. Ohuaya miquiana nijje quea pame nee acaje'yo. E'e, jiquio meshi miquea osecua cuanaja poaje'yo —aca poa Isaacaa.

²¹ Jacobo pea'ai Eyacuiñajjiya epeeiji nei poa. Jacobohua dejja tii majje oja bacua ejja Jose bajjani bacua cuana huohui ca poa jama ba'a: —Ecuea osecua, Eyacuiñajjiya miquianaya quea pame nee ca'a cahua e'e jojo nei —Jacobohua aca poa ojaya osecua cuana, Joseja bacua ejja cuana.

Majoya Jacobohua Eyacuiñajji bihuia ca poa. Oya dejja tii nojinoji majje ojaya acui ejja quecua ca'aquijjiyo nequisohuanaje Eyacuiñajji bihuajji. Jama aca poa ba'a: —Eyacuiñajji, miya oe nei quea pame nee nee. Eyaya miya bihuiaña —aca poa Jacobohua.

²² Jose pea'ai Eyacuiñajjiya epeeiji nei poa. Jamajjeya tii nojinoji'yo majje mano'yo jjimahuaa Joseya oja bacua ejja huohui ca poa jama ba'a: —E'e jojo nei Eyacuiñajjiya eseya ojjaña Amajamaja pea osecua cuana nijje Ejito

meshijo nequi cuayaqui meesahua caje'yo pea meshi yasijje epoqui'yojji, eseja meshi yasijje. Jamajjeya je mano'yajo ecuea esa' cuana dojo'yocue ecue meshi yasijje! ¡Jjani ai yasijje huanadobiañaquij'yocue! —huohuime aca poa Joseya.

Etiiquiana Moisesi bajjani Eyacuiñajjija epeejji nei poa

²³Moisesija chii, ojaya enaese pea'ai Eyacuiñajjija epeejji nei nei poa. Jamajjeya Ejito meshi meseya Panao bajjaniya ojjaña Ejito meshijo ba'e cuana Jodio cuana jama aca poa ba'a: —Jodio cuana, miquea ebacua cuaya jeahuajo cuei yasijje jeaoqueajeacue! —aca poa.

Jamatii Moisesija chiiya, oja naeya pea'ai Panao shajja'ajja jjima aca poa. Mete'ama poa. Panaoja esohui jayojja jama ajjima aca poa; Moisesi jeaoqueajea jjima aca poa. Ba majje jama aca poa ba'a: —Jiquio ebacua quea pame nee, quea ja'a nee nee —aca poa ejeeijiya.

Jamajjeya equijo huanaquehua ca poa pea beca peejjima ba'lime onaa ejaja ca'yo poajeje. ²⁴Panaoja bacua pionaa Moisesi ba majje tii mee ca poa. Jamatii tii majje Moisesi Eyacuiñajjija epeejji nei poa. Jodio cuana nijje ba'e'yo sa poa, oja huapa pojjeama nijje. Moisesiya Ejito dejja jama aca poa ba'a: —A'a eya nequiaa jama ajji ba'a: "Miya Panaoja bacuaseja bacua" a'a eya ajji! —Moisesiya aca poa.

²⁵Ejito dejja aje oe Jodio cuana sosema' chaco mee ca poa, cuiasejjajea ca poa quea huiso nee, Eyacuiñajjija epeejji cuana. Quea nee poa. Jamatii Moisesi Jodio cuana nijje ba'e sa poa. Oya Ejito cuana nijje ba'e sa po aija neinei poa oya cuana quea mimishi poanijojo. Oya ca ca Eyacuiñajji nijje jjapeequi sa poa jamatii quea nee. ²⁶Jhashahuabaquia poa jama ba'a: —Eyacuiñajjija huoojea'yo ojjaña jaahuanajji quea tai nee acaje'yo mimishi cuaa. Eya quea nee capoahua pea'ai o jayojjaya. Jamatii, jamaya quea pame nee. Ejito dejjaja aquiana quea nahue ecuea yani. Jamatii cajaa eyaya ajeaje —Moisesi poa. Ojaya eba poa Eyacuiñajjiya oya quea pame acaje'yo quijke onije jjapeequianijo.

²⁷Moisesi Eyacuiñajjija epeejji nei nei poa. Panaohua ca ca Eyacuiñajjija epeejji Jodio cuana nahue sa aca poa ojaya echacojji sosema' epoiji; quea tai, quea mase oya poa. Jamatii Moisesi Panaojo mete'ama poa: —Eyaya ca iña Eyacuiñajjija epeejji Ejito meshijo ani cuayaqui meesahuaje'yo ecuanaja meshi yasijje epoqui'yojji —jamaya Moisesiya Panao aca poa mete'amaa nei. E'e, Eyacuiñajji Moisesija eba poa, jamatii Eyacuiñajji jjaba meequi ajjajojo ojaya ecojjaja ba jjima poa.

²⁸Moisesiya Eyacuiñajjija epeejji nei poaniya jjejojo Eyacuiñajjija esohui jayojja huohuime aca poa Jodio cuana jama ba'a: —¡Najjajja cuiacue! Majoya cuiay'yo majje ;jeasijijeacue oja naa miquea esecue jjanijo esohuidojjiya miquea ebacua ejja ecuiajeajji pojjeamajo, cojjasobó! Jamajjeya poeje shajjamaja bacua ejja cuiajeeaa —Moisesiya aca poa.

Jamajjeya Moisesiya esohuidojjiya Jodio cuanaja ebacua ejja cuiay'yo jjima amee ca poa. Majoya jamaya Jodio cuaa ojjaña shequiaja ojee ijja ca poa ebacua cuiay'yo jjima aca poa shejo, epajea'yojji pojjeama jojoya.

²⁹Jodio cuana Isaenija osecua cuana Eyacuiñajjiya epeejji poa yahuajo nei Moisesi Jodio cuana jaahuanas coojji poa. Jamajjeya Eyacuiñajjiya oya cuana bae huo'o ojje miji yasijje poqui mee ca poa ejiojji jabojje. Ba majje Ejito dejja jama poa ba'a: —¡Cua'a! ¡Poquicue ma ecua Jodio dejja poquia bacue! —poa. Jamatii Ejito dejja epoquijji nisho po'ajja poa. Hui'i jeyojeyo'ya poa ojjaña. Enaa oya cuana jepajea ca poa.

³⁰Isaenija osecua cuana Eyacuiñajjiya epeejji poa Josoe o huoojea'yojji poanijo pea'ai. Jamajjeya Eyacuiñajjiya esohui jayojja jama Jenico cuiñajji sahuajje jjajeacohuiqui nequi'ya poa. Quea huiso cahuime dobiqui jjima, me oeje pe a beca cahuime, 7 cahuime aca poa. Eyacuiñajjiya mei peeyi jaabichajea meequi ca poa meshi yasijje. Jamaya aca poa Isaeni dejja cuaa. Ojjaña mimishi cuana jomajo ba'e quecua jeyojeyo meesahua ca poa, Eyacuiñajjiya.

³¹Epona Shajami bajjani, ma pea cojjoji yahuajo poa Eyacuiñajjiya epeejji po'yonaje. Jamajjeya Josoeja huoojea beca dejja Jenico cuiñajji quehua baa dobiqui Shajamiya oja equi yasijje iyaaquehua ca poa onaa equecua ca poajje. Jamajjeya Josoeja sohuinano cuaa dejja mimishi quecuajea'yo majje Shajami quecua'yo jjima poa. Josoeya huohui ca poa jama ba'a: —¡A'la Shajamiya huapa pojjeama quecuajji! —aca poa.

Jodio etiiquiana quea huiso Eyacuiñajjiya epeejji poa

³²Pea etiiquiana quea huiso Eyacuiñajjiya epeejji nei poa. Beca cuana ma bajjani poa ba'a: Jjeneoni bajjani, Banaca bajjani, pea Sanisohui bajjani, pea Jepete bajjani, pea Dabi bajjani, pea Samoeni bajjani. Quea huiso Eyacuiñajjiya esohui huohuijji Jodio etiiquiana poa. Jjeya ca ca eyaya ojaya cuanaja eba'ejjijo ehuohui jeyojeyo'ji pojjeama quea huisojojo. ³³Oya cuana Eyacuiñajjiya epeejji nei poaninajeo oya cuana ameesahua canaje joya ecua peaa ajjima acani jama. Jamajjeya beca cuaa emeshi mese quea mimishi cuana jeabichajea ca poa. Pea cuana ona huoojeajji quea ja'a nee poa. Pea cuana quea ca'a poa, quea ja'a nee ba'e'ya poa. Ojaya esohui yahuajo jayojja ma ecua ohuaya yahuajo esohui huohui ca poa jamaya aca poa onajo, Eyacuiñajjiya. Pea cuana neonija, ibia naa ashaja ijija jjima poa Eyacuiñajjiya oya jjanaba cami meequi ca poa ojaya epeejji cuana e'ijija ca'yo poaje jjejojoya. ³⁴Pea cuana Eyacuiñajjiya jaahuanas canajeo quiyo'yo jjima poa. Cuaqui jiji neijo nequi quiyo'yo jjima poa. Pea cuana quehuajje poquicuaji meesahua ca poa dejja maseya equecua ca poaje jjejojoya. Pea epeejji cuana ca'a'ama. Jamatii Eyacuiñajjiya quea ca'a po mee ca poa; dejja mase quea huiso cuana jeabichajea ca poa, Eyacuiñajjiya epeejji pojjeama mete mee ca poa. ³⁵Epona cuana quea yeno nee nee ebacua mano'yajo poa. Jamatii Eyacuiñajjiya ebacua cuana emano'yojaa shequi mee ca o'oya poa. Quea bihui nee po mee ca poa. Pea cuana ca ca dejja mimishiya quea nee nee po mee ca'ya poa. Quea nee nee mano'yajo poa. Oya cuana huohui ca poa dejja mimishiya: —¡Eyacuiñajji nijje jjapeequi pajea'yocue! ¡Cajaa acue! Majoya miya quecua'yo jjima poaje —poanaje cuana.

—Chojja. Eya Eyacuiñajji epeejji nei. Oya caja a'lajja tii ecuea. Eya ca ca iña mete'ama emano'yoffi —saja'ame aca poa Eyacuiñajji epeejji cuaa.

Jamajjeya aje oe quecua cal'a cuaa poa. Ma epeejji nei jjashahuabaquianinaje jama ba'a: —Eyacuiñajji e'e jojo nei eya quea pame nee ba'e tiitii mee caje'yo onijje eyajo quijje —poa mano jjimahua.

³⁶Dejja mimishi cuana Eyacuiñajji epeejji cuanajo soa neineinaje ojjañaa ba canijo pea'ai. Napa canaje, cuiasejjajea canaje jjonohua, jeyo canaje cadenaa, jeanobiajea canaje. ³⁷Jajahuejjajea canaje meiya pea'ai. E'e, acui ijjiasejjameejji oya cuana ijjiasejjajea mee caninaje, esapa jajasejjajea ca poa baaa Eyacuiñajji a'a caja acaje'yo ebajji. Aema' poa; daquimajo ijjiacajji jee daqui huosho ca poa. Bobi yasijje po'ya poa. Quea naba taja nee nee pea'ai poa. E'e, ojjañaa ba canaje dejja mimishi cuaa oya cuana quea tai nee nee aca poa, caja aca poa. Jama aca poa: —¡Dee! Jiquio dejja cuana quea tai, caja. ¡Ejjacuiaque'yo! —aca cuaa poa.

³⁸Jamajjeya oya cuana dejja masejo quea mete jjejojo quehuajje poquinaje. Cuajicuaji poquinaje meshi quima huasijje, eyiyo huasijje, jjani yasijje pea'ai. Equi chamajo jjanijo ba'ya poa.

³⁹Jiquio Jodio etiiquiana Eyacuiñajji epeejji poa, quea pame nee. Eyacuiñajji jama poa ona nijje ba'a: —Miya ecuea epeejji nei quea pame nee nee, ecuea ehuohui jayojja jama aña.

Jamatii Eyacuiñajji ejjashahuubaquiji quea pame nee ajjima poa ona nijje jiquio meshijo ba'yanijo. ⁴⁰Jamajjeya Eyacuiñajji oya cuana ishoa mee ca poa. E'e, Eyacuiñajji jjashahuubaquinaje ojjaña cuana quea boejea'yo epo mee'yoffi; ojjaña yahuajo nei cuana ba'ya poa, eseya jjeya nei ba'e pea'ai quea boejea'yo epo mee'yoffi. Jamajjeya ojjaña eseya ojee ba'e tiitije'yo quea boejea Eyacuiñajji nijje eyajo, ojjaña tii.

**;Eyacuiñajji epeejji yahuajo ba'ya poa
jayojja ba'ecue Jesosaja epeejji nei!**

12 ¹Jamajjeya ojjaña Eyacuiñajji epeejji yahuajo ba'ya poaa jjeya nei ecuana huohui cani jama ba'a: —¡Bacue! Ecuana Eyacuiñajji epeejji nei poa. ¡Ecuana jayojja pocue! —poani.

Ecuana Jesosaja epeejji dejja cuajicuajiani jama. Mimishi ca ca aquiana quea biquie eba'o ba'e jayojja. Matii ecuaaya ca'a'amaa jjejojo mimishi acuajiaña. Jiquio ecua dejja aquiana abo po jjima cuajicuajiani jayojja jama eseyaya mimishi ejjapajea neineiqui'yo Jesosaja epeejji nei epo'yoffi. Oya, Jesosa esejaya ecuajicuaji meesahuajji jayojja. Jamajjeya ojaya ejjashahuubaquiji jayojja jama ejja'a tiitiiqui'yo. ²Jamajjeya ¡Jesosajo jjashahuabaquicue! Ohuaya yahuajo eseya onijje jjapeequi mee canaje. Jjeya ohuaya eseya onijje jjapeequi mee canaje. Jesosa jama jjashahuabaqui ajja ba'a: —Chojja de, eya acui ecueata'apeejo emano'yoffi pojjeama —jamaya po jjima poa.

Chojja. Jesosa jama poanaje ba'a: —E'e, ojjaña enijke quea mimishi nee nee poaje. Jamatii eya ecue Chiiya huohui ca poa jayojja jama mano'yome poaje acui ecueata'apeejo. Jamajjeya quijje eya ecue Chii nijje anioqueje quea bihui nee ejaya esohui jayojja jama amajje —jamaya Jesosa poanaje.

Jamajjeya Jesosa mano'yo majje Eyacuiñajji pejjejo anioquenaje ebianei mijijje ojjaña huoojea'yoji.

³E'e, ijjashahuabaquicue Jesosajo! Yahuajo nei mimishi cuaa onijke quea quene nee nee po majje quea nee nee po mee canaje. Jamajjeya Jesosajo jjashahuabaquianijo miquianaya quea yeno epoji pojjeama onaa napa cajje. Onijke jjapeequi pajea'yo ajja poaje. ⁴Yahuajo miquianaya ojee jjapeequianijo Jesosajo epeejji quea ja'a po'yonaje. Shajjama' po jjima. ¡Bacue! Jesosaa oja Chiiya ehuohui jayojja ohua huohui cajo, mimishi cuaa quecuca ca'y poa. Miquianaya ca ca mimishi cuaa cui'a'yo jjima Jesosa nijje jjapeequianijo.

⁵¡A'a pajea'yoji Ejacuiñajji esohui etehue'yo! Ejeajjiya oja bacua cuana tecuea cani ejjashajja'ajjaquijji jayojja jama Ejacuiñajji ese nijje miminaje:

⁶“Ecuea ebacua cuana, ¡eyaya miquianaya jjabahuejjaqui meeañajo shajja'ajjacue mo! Ejaya miquianaya miquea mimishijo tecueañajo ja'a quea yeno pojji! E'e, ojjaña joya ecuea quea jea nee nee eyaya jjabahuejjaqui meeaña. Ecuea ebacua cuana eyaya tecueaña mimishi'ama epoji”.

Jamaya Ejacuiñajjiya, eseja Chii aiya eseya aca poa.

⁷Jamajjeya Ejacuiñajjiya miquianaya jjabahuejjaqui mee canijo, ja'a quea yeno pojji! ¡Onijke mimicue jama ba'a: —Ejacuiñajji, miya ecue Chii ai. Miyaya eya quea nee po meeaña eya miquea esohuijo ejjabahuejjaqui meeiji —jamaya onijke mimicue!

E'e, jiquio ecua seya esejaya ebacua cuana tecueaña jamaya Ejacuiñajjiya eseya acani. Eseja bacua cuana eseyaya tecueaña ejjabahuejjaquijji. ⁸Ojjaña ejeajji cuaa oja bacua cuana niñeshe'a cani. Ejeajjiya oja bacua tecuea jjima acani shajjama' poanijo onaya mimije jama ba'a: —¡Dee! Oja bacua pojjeama pojja'a, jamajjeya mi jjabahuejjaqui mee cani. Jea jjima jama, de —acaje cuaa.

Oya jayojjaya Ejacuiñajjiya ojjaña ejaya ebacua cuana jjabahuejjaqui mee cani shajjama' epoji pojjeama. Ohuaya miquianaya jjabahuejjaqui mee jjima acani ca ca miquianaya oja bacua pojjeama, peaja bacua pojja'a.

⁹E'e, ejeajji cuaa eseya niñeshe'a cani esho'yahua ejjashajja'ajjaquijji. Jamajjeya oya jayojjaya esejaya Chii ai ejjashajja'ajja neineiqui; ohuaya eseya ba'e tiitii mee cani. ¹⁰Ejacuiñajjiya eseja Chii aiya ca ca eseya tecuea cani quea ja'a nee eba'lejji. Jjabahuejjaqui mee cani o jayojja quea pame nee nee, quea bojea'yo nee epo tiitii meeiji. Esejaya ejeajjiya ca ca ejjashahuabaquijji jayojja jama eseya tecuea ca poa esho'yahua. ¹¹Jjeya Ejacuiñajjiya quea nee po mee cani ejjabahuejjaqui meeiji eseya quea bihui pojjeama, quea yeno poani. Jamatii quijje jjabahuejja neineiqui majje eseya quea jjashahuabaqui ja'a nee poaje, quea bei nee nee poaje.

¹²Jamajjeya ja'a quea yeno pojji jamatii quea camaja poanijo! ¡Quea ja'a nee oe jjapeequicue Eyacuiñajji nijje! ¹³Jamajjeya ¡ejiojji epi jaji neijje poquiani jayojja jama pocue! ¡Quea ja'a nee jjapeequicue Jesosa nijje! ¡Pea cuana jjapee neineiqui meesahuacue pea'ai Jesosa jayojja epoji!

¡Jesosa nijje a'a jjapee pajeaquí'yojji!

¹⁴Ecuea epjeejji cuana, ¡quea bei ba'ecue ojjaña nijje! ¡Quea boejea'yo ba'ecue pea'ai! Quea boejea'yo ba'e'yo ajja aje oe Eyacuiñajji nijje eba'e tiitii'yojji pojjeama. ¹⁵¡Ba neineicue! ¡Ojjaña Eyacuiñajji nijje jjapee neineiqui meesahuacue onijje eba'e tiitii'yojji! A'a jja oe jama pojji ba'a: Acui iña quea cuaja nee nee pejjejo nequi majje mano'yo chana!. Oya jayojja dejja tecueya ojjaña o pejjejo ba'e quea tecue po mee cani. Quea tecue po tiitiian, quea huiso quea quene po mee cani. Quea huiso quea mimishi po mee cani pea'ai. Jamajjeya ja'a quea tecue po majajji! Quea tecue po majjeya Eyacuiñajji pajea'yo chana!. ¹⁶¡A'a pea cojjoji pojji pea'ai! ¡A'a etiiquiana Esao bajjani jayojja jama pojji pea'ai! Ojaya, Esaoja, yahuajo nei Eyacuiñajji esohui boti'ama poa. Ojaya ejjashahuabaquijji jayojja jama poa jama ba'a: Oya cojjasobo poa. Jamajjeya oja chii mano'yajo, ojjaña ojaya aquiana equijjojea cajo Esaoja poaje'yo, cojjasoboja. Jamatii oja chahua huohui ca poa jama ba'a: —Cha, ¡che mo bobi quiacue! Quea shoe mo coma. Miya bobiaje sosejje aje mi sosequiaje'yo; ma cacaa quiijojea cajo eyaya miya quiaje'yo; ecuea pojjeama poaje'yo, miquea poaje'yo —aca poa oja chahua Esaohua, jjashahuabaqui jjima jayojja poa.

¹⁷Cojjasobojo Jodioja ejeajji cuana jama poaninaje ba'a: —Eyacuiñajji, ¡ecuea ecue bacua cojjasobo jaahuanacue, quea aquiana huiso po meecue! —poaninaje Jodio etiiquiana.

Jamajjeya quijke Esao oja chii nijje miminaje jama ba'a: —Ecue chii, ¡Eyacuiñajji nijje mimicue e jaahuanajji! —poa—. ¡Jama acue ba'a: "Eyacuiñajji, ¡ecuea ebacua cojjasobo Esao bajjani jaahuanacue!" acue! —jamaya Esaohua oja chii aca poa.

—Chojja, Esao. Yahuajo eya jamaya miminaje Eyacuiñajji nijje mique chahuajo, mijo pojjeama. Apoa —oja chiiya jama saja'ameya aca poa.

Jamajjeya Esao cajaa aca poa cojjasobo jayojja jama epoji pojjeama.

Jamajjeya Esao pa neineinaje, quea yeno nee nee poanaje oya chiiya aquiana mesena'yo sajo. Jamatii oja chii ma ohua yahuajo esohui huohui ca poajo pajeapajea'yo ajja poa pea esohui ehuhuoi o'oyajji. Esejaya eba Esaoja esohui oja chahua nijje, oja chiiya aquiana quia ca poa bobi sosejje. Jamajjeya oja chiiya oya cojjasobo jayojja pojjeama aca'ya poa.

¹⁸Yahuajo nei nei pealai Eyacuiñajjiya eyiyo Sinai bajjanijo nequiya esohui huohui ca poa; Jodio etiiquiana Moisesi nijje nequi quea mete nee nee poa. E'e, yahuajo Jodio cuana eyiyo huasijje poe majje Sinai eyiyojo nequiñaquia poa. Eyiyo ba cañaquia poa jiji neineiqui. Quea bo moo eyiyo biajje nequia

poa. Quea huichacha moo, quea misi poa. Quea beni quemo pea'ai poa eyiyo biajje. PojjeFFE baa siyoo pea'ai po nequia poa. ¹⁹Taaa po neinei nequia poa, huaca she'ana quea quemo mia cani jayojja jama shajja'ajja ca poa Eyacuiñajji emimi. Ma shajja'ajja majje quea mete nee nee poa etiiquiana cuana Eyacuiñajji. Jama taaame aca poa ba'a: —¡Ecuana nijje a'a mimi o'oyajji! —taaa ca poa cuana quea ajjajja nee nee jjejojo.

²⁰“¡A'a eyiyo huasijje jaasohuajji!” Eyacuiñajji aca poa. “¡A'a aquiana ehuone' jaasohua meeiji pealai! ¡Jaasohuajo ca jajahuejjajeacue meiya!” Eyacuiñajji aca poa.

²¹Jamajjeya ojjaña tii quea mete nee nee poa. Ba majje etiiquiana Moisesi pea'ai quea ajjajja nee nee poa: —Eya quea mete nee nee jjejojo piopioani —Moisesi poa.

²²Jjeya ca ca yahuajo jama pojjeama. Miquianaya ca ca Eyacuiñajji oja sohui ba mee canijo ja'a quea mete pojji! Miquianaya Eyacuiñajji ba'e yasijje poeyanaje. Ma eba'ejji eyiyo Sioni bajjani jayojja, ma Jenosanena eyacuajo nequi jayojja. Maya Eyacuiñajji cuiñajji eyacua eyajo. Jomajo Eyacuiñajji ba'e tiitiiani, eshe. Ma cuiñajji Eyacuiñajji esohuidojoojji ejjanequichichaqui; quea bihui nee nee, quea huiso nee nee nequi, de. Sicosico meemee ajja, yajja sicome yajji quea huiso nee nee oya aña.

²³Jomajo Eyacuiñajji epeejji cuana quea bihui nee nee Eyacuiñajji pejjejo yani pea'ai ma yahuajo nei nei onijje jjapeequia poa. Eyacuiñajji oja bajjani cuana oja esohui etehue'yopo tehue ca poa eyajo. E'e, miquianaya Eyacuiñajji nijje jjapeequiani. Ohuaya ojjaña cuana meshijo ba'e sosequia caje ojjaña ma onaa acanaje sosejje. Jomajo, eyajo Eyacuiñajji epeejji emano'yo cuanaja edojjoshahua cuana yani, ma yahuajo mimishi cuijea ca'ya poa cuana. ²⁴E'e, miquianaya Jesosa nijje jjapeequiani. Ohuaya ca ca oe eseaya esohui eyacua huohui canaje eba'e tiitii mee'yoji. Esejo mano'yonaje pea'ai. Ojaya ena' cuayaquia poa esejaya mimishi cuijea'yoji sosejje. Oya Jesosa Adanaja bacua ejja Abeni bajjani jayojja jama pojjeama. Abenija ena' cuayaquia oja o'i Eyacuiñajji tecuea neinei ca poa echahua mese cuia ca'yajo.

²⁵¡Jamajjeya Eyacuiñajji esohui shajja'ajjacie! ¡A'a shajjama' pojji! Yahuajo eyiyo Sinai pejjejo Moisesiya Eyacuiñajji esohui huohui majamaja ca poa etiiquianaja eshajja'ajjaji nisho. Jamatii aje oe shajjama' poa. Jamajjeya Eyacuiñajji oya cuana quea nee po mee ca poa. Jjeya Eyacuiñajji eyajo nequiya eseaya huohui cani oja sohui eyacua, ma esejaya yahuajo shajja'ajja jjima. Shajjama' poajo e'e jojo nei ohuaya eseaya quea nee nee po mee caje'yo, de. ²⁶E'e, yahuajo nei Eyacuiñajji eyiyo Sinai biajje sohuihuohui ca poajo, meshi huehuahuehua mee ca poa janobajjima nei. Jjeya oya jama poanaje ba'a: “Eyaya e'e jojo nei meshi, eyatahuatahua pea'ai huehuahuehua meeje'yo janobajjima nei nei” jamaya Eyacuiñajji poanaje.

²⁷Jamajjeya Eyacuiñajji jama acajo ba'a: “Meshi, eyatahuatahua pea'ai huehuahuehua meeje'yo” acajo, esejaya eba ohuaya ojjaña oja pana

huehuahuehua mee'yo majje chama'yo tii poaje'yo ojjaña aquiana yahuajo oja pana'yo. Ojjaña aquiana eyacua ehuehuahuehua'yojji pojjeama anije'yo tii tii.

²⁸Eyacuiñajji ojjaña huoojea'yojji poani tii tii. Chama' o jeabichajea'yojji epoji. Ese huoojea'yojji poani tii tii oya. Jamajjeya Eyacuiñajji ejjabihuiquia jama ba'a: —Jamaya Eyacuiñajji, miya quea pame nee nee poani tii. Miya ecuana huoojea'yojji quea ca'a nee nee.

E'e, ¡Eyacuiñajji esohui jayojja jama eba'e tii tii! ¡Oya ejjashajja'ajja tiitiiqui! ¡Quea mete epo tii tii; shajjama' pojjeama epo! ²⁹¡Ojo ejjashahuabaqui! Jiquio ecua cuaquijo quiyo jeajea jeyojeyo yani jayojja jama Eyacuiñajji shajjama' cuana quea nee nee po mee caje'yo, de.

**¡Jesosaja epeeiji poanijo ba'ecue quea pame
Eyacuiñajji quea boti nee e'ajji!**

13 ¹Ecuea epeeiji cuana, ¡pea cuana Jesosaja epeeiji pea'ai poanijo quea jea nee nee atiitiicue huapa pojjeama jama! ²¡Pea cuana miquianajaya ba jjima quea jea acue! ¡Equi yasijje poeyajo quea pame nee acue pea'ai! ¡Miquianajaya equi yasijje iyaacue! Yahuajo beca cuana jama poanijo esohuidojiji jaahuana ca poa, jamatii oya ojaya cuana ba jjima esohuidojiji poa. Jjashahuabaquia poa jama ba'a: —E'e, jiquio dejja cuana ecuea ba jjima eyaya bobiaje —esohuidojiji pojjeama poso aca poa.

³¡Cuanaya baquicue Jesosaja epeeiji joya ejeanobiajea jaa cuana! ¡A'a oya cuana pajea'yojji! ¡Jjashahuabaquicue jama ba'a: —Eya ona jayojja jama ejeanobiajea jaa jjemo quea shoe, quea yeno pome. Jamajjeya eyaya oya cuana baquije, bobí quiaje, onijje jjapeequije —pocue!

¡A'a pajea'yojji Jesosaja epeeiji quea nee poani onaa napa cajo pea'ai! ¡Jjashahuabaquicue jama ba'a: —Onaa napa cajje eya quea nee pome, eya quea yeno pome. Jamajjeya eyaya oya cuana baquije quea bihui epoji. Ona nijje jjapeequije. Eyacuiñajji nijje mimije onajo pea'ai —pocue! ¡Jamajjeya oya cuana baquicue, ona nijje jjapeequicue!

⁴Jjashahuabaquicue jama ba'a: ¡A'a jjacojjoquiji! Yahueya, ¡miquea ehuanase oe nei jaahuanacue! ¡Onijje tii jaacue! Ojjañaja eba jamaya quea pame nee. Jamajjeya ¡a'a quea mimishi pojji! ¡A'a pea cojjojji pojji yahue, ehuanase pea'ai! Jama poajoya Eyacuiñajjiya e'e jojo nei miquianaya tecuea neinei majje quea nee nee po mee caje'yo.

⁵¡A'a quea aquiana jea pojji! Eyacuiñajjiya eseya jama acanaje ba'a: "Eyaya miya epajea'yojji pojjeama nei nei. Eyaya miya ejeana'yojji pojjeama" poanaje.

⁶Jamajjeya miquea aquiana eba'e meeiji yanijo ¡quea bei pocue! Esohui yahuajo etehue'yo jayojja jama mimicue jama ba'a:

"Eyacuiñajjiya, Emeshi Mese neiya eya jaahuanana cani tii tii. Jamajjeya eya mete'ama poani. Dejja mimishi cuua eya ejeabichajea'yojji pojjeama. Eyacuiñajjiya eya ejaahuanana pajea'yojji pojjeama".
¡Jamaya mimi majamajacue!"

¡Jjapee tiitiiquicue Jesosa nijje!

7 ¡A'a pajea'yojji Eyacuiñajji esohui huohuijji, yahuajo miquiana sohui huohuijji poa! ¡Jjashahuabaquicue oya cuana quea ja'a nee ba'enaje Jesosa nijje jjapeequianijo! Mano'ya poa Jesosaja epeejji nei. ¡O jayojjaya Jesosa nijje jjapee neineiquicue! 8 E'e, Jesosa Quito oja sohui jayojja jama poani, pajea'yo ajja tii tii. Ojaya ejjashahuabaquijji yahuajo nei jayojjaya nei acani tii. Quijje nei jamaya atiitii caje'yo pealai. 9 Jamajjeya ¡peapea ehuohui'yo Jesosaja esohui e'e nei jayojja jama pojjeama a'a shajja'ajjaji! Pea ehuohui'yo shajja'ajja majje o jayojja mimishi mi po'yo chana! Eyacuiñajji eseya quea jea nee acanijo esohui e'e nei ba meesahua cani Jesosaja epeejji quea ca'a nee epoji. Pea cuaa ca ca shajja'ajjacani esohui quea quehua bobijo jama ba'a: —Beca bobi a'a ijjiajji Jesosaja epeejji nei epoji! —acani Jodio etii cuaa.

Ma esohui shajja'ajja cani cuaa eshajja'ajjajeajji, de. Bobijo pojjeama Jesosaja epeejji nei poaje; ojaya esohui ba neinei majje.

10 Ecuea epeejji cuana, yahuajo nei nei Jodio etiiquianaja Eyacuiñajji nijje emimijji cuaa, ma Eyacuiñajji daqui equijo chacochacoaninajeya aquiana ehuone' dhuwa majje ijzia ca poa. Jamatii Eyacuiñajji esohui eyacua ba mee jjima poa. Eyacuiñajji esohui eyacua bobi jayojja. Ojaya epeejji poanijo, ohuaya eseya oja esohui jayojja jama po mee cani, ma esohui bobi e'ijjiajji jayojja ba meesahua cani.

11 Yahuajo nei Eyacuiñajji nijje emimijji etiiya aquiana na! dojodobiaqui caninaje Eyacuiñajji equi yasijje, equecuayijji biso nei yasijje. Ojjaña shequiajajo oe dojodobiaquime acaninaje ijjiacajji ehuone na!. Dojodobiaqui majje jeasijjea caninaje Eyacuiñajji ebajji. Jeasijjea caninaje Eyacuiñajji etiiquianaja mimishi ecujea'yojji sosejje. Ma aquiana etiiquianaja ijzia jjima poa. Chojja. Dojocuayaqui caninaje cuiñajji esecue yasijje edahuajea'yojji. 12 Oya jayojja Jesosa mano'yajo ojaya ena' cuayaquia poa esejaya mimishi cuijea'yojji sosejje, mimishi'ama nei nei epo mee'yojji. Dejja mimishi cuaa oya dojocuayaqui ca poa cuiñajji esecue yasijje equecua'yojji. 13 E'e, dejja mimishi cuaa oya quea tai aca poa. Jamatii Jesosa jjashahuabaqui jjima jama ba'a: —Chojja, eya acui ecueata'apeejo mano sa po'yo ajja —jama po jjimaya Jesosa. Jama poanaje ba'a: —Eya manojel'yo acui ecueata'apeejo mimishi sosequia'yojji —Jesosa poanaje.

Jamajjeya Jesosa jayojja jama epo tiitiji. Jesosa nijje jjapeequianijo, mimishi cuaa eseya quea tai acajje jamatii Jesosa nijje ejjapee tiitiiqui. 14 Esejaya eba qijquo meshijo eba'e tiitiji pojjeama. Meshi esejaya eba'e tiiji yajji pojjeama. Quijje ca ca eseya ba'e tiitije'yo eba'ejjji eyacuajo Jesosa nijje. Ma eba'ejjji eyacuajo eseya jjashahuabaquiani. 15 Jamajjeya Jesosaja epeejji poanijo ¡Eyacuiñajji ejjabihuia tiitiiqui! Jama ba'a: —Eyacuiñajji, miya quea pame nee nee. Pea chama' mi jayojja —ejja'a tiitiiqui.

Jesosa Eyacuiñajji nijje mimiani ese cuanajo. Jamajjeya eseyaya oya bihuiaña jama ba'a: —Jesosa, miya ecuanaja Emeshi Mese nei quea pame nee —oya bihuiaña.

¹⁶ ¡Pea cuana quea pame nee atiitiicue pea'ai! ¡Nishehui'ama pocue, dejja tai'ama pocue! ¡A'a pajea'yojji! Jamaya poanijo Eyacuiñajji quea bihui nee poaje miquiana nijje.

¹⁷ ¡Jesosaja epeejji jaahuanajji cuanaja esohui jayojja jama acue! ¡Shajja'ajjacue, miquianaaya! Quijje Eyacuiñajji cojja nei nequiya emeshi meseya, mi jaahuanajjiya huohui caje achajja miquianaya jaahuana canaje. Jamajjeya miquianaya jaahuana cani quea pame nee, Jesosa nijje ejjapee pajeaqui'yojji pojjeama. Miquiaa shajja'ajjajje ohuaya miya quea bihui nee ba'e meesahua caje'yo. Shajjama' poajo ca ca quea yeno nee poaje. Miquianaya quea yeno nee nee poaje pea'ai.

¹⁸ Epreejji cuana, ¡Eyacuiñajji nijje mimicue ecuanajo! Eyacuiñajji eba ecuana quea ja'a nee ba'e sa poani tii tii ojo. Ecuanaya jjabaquiani quea ja'a nee ba'yani ojaya esohui jama. ¹⁹ Jamajjeya ¡ecuanajo mimicue Eyacuiñajji nijje jama ba'a: —Eyacuiñajji, ¡Pabo poe meesahua o'oyacue ecuana baa! ¡Jjeya nei oe poe meesahuacue! —acue!

Esohui quijjeyejje nei tehue'yo

²⁰ Ecuea epreejji cuana, esejaya Emeshi Mese nei Jesosa oja epreejji cuana jaahuanajji poani, ñajjajja jaahuanajji nei nei jayojja oya poani. Mano'yajo, Eyacuiñajjiya Jesosa shequi mee ca o'oyanaje. Jamajjeya Jesosa shequi mee'yo majje Eyacuiñajji jama poanaje ba'a: —Ecuea Ebacua Ejja miquianajo mano'yonajejo, ojaya ena' cuayaquinajejo, jjeya ecuea esohui eyacua jayojja jama atiitiicue! Jamajjeya miquianaya ba'e tiitii meeje'yo enijke eyajo —Eyacuiñajji poanaje.

²¹ Miquianajo eya Eyacuiñajji nijje mimiani jama ba'a: —Eyacuiñajji, ¡miquea epreejji cuana ejaba'echejjequi ba'eca cuana quea bei ba'e meesahuacue! ¡Chaco meesahuacue mijo quea pame nee nee! ¡Miquea ejashahuabauquijji jayojja jama ameesahuacue pea'ai! Miquea Ebacua Ejja Jesosa Quito nijje jjapeequianijo, jjamaya ameesahuacue Jesosa quea bihui nee epoji! ¡Oya quea ca'a nee nee quea pame nee cabal'e tiitii'yahua! Jamaya Eyacuiñajji —eya poani.

²² Ecuea epreejji cuana, eyaya jiquio esohui tehueña miquiana quea bihui pojji. Eyaya oe pojji esohui tehueña. Jamajjeya ¡ecuea esohui shajja'ajja neineicue quea bihui nee! ²³ Esejaya epreejji Timoteo ejeanobia jaa poa. Cuayaqui mee ca'yonaje. Quijje pishana oya e que poe'yo majje enijke poquije miquiana baa.

²⁴ Jamajjeya epreejji cuana, miquianajaya esohui huohuijji cuana ojjaña Eyacuiñajji epeejji cuana miquiana nijje ba'e pea'ai ¡ecuanaja esohui huohuicue jama ba'a: —¡Achajja acuae nequiana ani so'o? —acue ecuanaja ebajji!

Ojjaña Eyacuiñajija epeejji cuana Itania meshijje poe miquianajo jjashahuabaquiani: —¿Achajja ami ani so'o? —huohui'ajjame acani ojaya ebajji.

25 ¡Eyacuiñajija, esejaya Chii aiya miquianaya cajaahuana cahua quea pame nee!

Mahuiso ecuea esohui. Eyaya Pabo bajjaniya esohui tehuejeyonaje. Apoa.

SATIACOJA ESOHUI ETEHUE'YO

1 SANTIAGO

Satiacohua esohui queabihui neetehue canaje Jesosaja epeejji cuana huasijje

1 ¹Epeejji cuana, eyaya jiquio esohui queabihui neetehueaña miquianajaya ebajji, ma ojjaña Jesosaja epeejji cuana ojjaña meshijo ba'eja ebajji. Eya Satiaco bajjani. Eyacuiñajjiya, esejaya Emeshi Mese nei Jesosa Quitohua pea'aiya eya huoojea canaje ojaya esohui huohuiya. Jamajjeya eyaya queabihui nee chacoaña onijke.

Eyacuiñajjiya Jesosaja epeejji cuana jjabahuejja meeque cani

²Ecuea epeejji cuana, jshajja'ajjacue mo! Miquianajaya eba'ejji queacamaja poanijo, jamatii ja'a queayeno pojji! Chojja, queabihui neepocue jama ba'a: —E'e, Eyacuiñajjiya queapame nee acani. Ohuaya eya jjashahuabaqui mee cani.

³E'e, miquianajaya eba jama ba'a: Eba'ejji queacamaja poanijo Eyacuiñajjiya eseaya jjashahuabaqui mee cani Jesosa Quito nijje queapame neejjapeequijji. Jamajjeya miquianaya yeno'ama Jesosa nijje jjapeetitiilquije'yo queaja'a nee nee. ⁴¡Jesosaja epeejji queaja'a nee po titicue! ¡E'e jojo nei pocue! Jamajjeya Jesosajo jjashahuaba titiilquianijo Eyacuiñajjiya miquianaya queaja'a nee ba'e mee caje mimishi'ama, apoa epo jayojja pealai.

⁵E'e pojja'a miquianajaya ba jjima Eyacuiñajjiyo eba'ejji. Jamajjeya ¡Eyacuiñajji nijje mimicue ojaya ejjashahuabaqui'yojji ebajji! Ojaya miya etecueajji pojjeama. Miya quea jjashahuabaqui ja'a po mee caje, o jayojjaya. Joya ecua miyaya huohui'ajjaña jama saja'ameya aje mi acaje'yo queabihui nee nee ojjaña cuana ojaya quea jea nee neejo. ⁶Jamatii Eyacuiñajji nijje mimianijo jjashahuabaquicue queapame nee! Jama ba'a: —Jiquio ecua eya onijke mimiani jamaya acaje'yo e'e jojo nei Eyacuiñajjiya.

A'a jjashahuaba taiquijji jama ba'a: —E'e pojja'a jiquio ecua eya onijke miminaje jamaya Eyacuiñajjiya e'ajji pojjeama.

¡Bacue! Joya quea jjashahuabaqui tai poani enashajo poani jama. Jiquio ecua beniya enashajo dojo cani oe miji yasijje, quijje pea miji yasijje dojo ca

o'oyani jamaya oya cuana Jesosajo quea ja'a jjashahuabaqui jjima. Peapea jjashahuabaquime oya cuana poani.⁷ Jamaya jjashahuabaquianijo quea tai; Eyacuiñajjiya oya cuana shajja'ajja jjima jayojja jama acaje. Jamajjeya jamaya jjashahuabaquianijo ja'a jama pojji ba'a: —Eyacuiñajjiya ma e onijje miminaje shajja'ajja cani. Eya ba'e meesahua caje pea'ai —a'a jamaya e'a caje poso jjabaquijji! Eyacuiñajjiya eshajja'ajjajji pojjeama miya.⁸ E'e, Jesosajo quea quehua jjashahuabaqui majje quea pame eba'ejji pojjeama tii tii.

Aema' cuana joya ecua quea aquiana huiso jama

⁹Jesosaja epeejji aema' cuana, dejja etii pojjeama pea'ai quea bihui nee capoahua Eyacuiñajjiya oja mimishi cuana cuijea ca'yonajejo. Oya ba cani epeejji quea aquiana huiso jayojja, oya jayojjaya ba cani.¹⁰ Jesosaja epeejji quea aquiana huiso quea bihui nee capoahua pea'ai, jamatii ojaya aquiana cuana chama' poajo. Joya quea aquiana huiso shasha jama. Nequi tiitii ajja. Chama'yo tii poaje'yo.¹¹ E'e, jiquio ecua eshequi jaasohuajo quea quiyo nee nee poajo sipone joca'yani, yaa'yo majje ojaya shasha jjahua'amaqui yani, majoya aje huojojojeani jama jayojjaya joya aquiana huisohuiso cuana poani. Aquiana cuana chicha majamaja cani tii oya cuana manoje'yo, chama'yo tii poaje'yo. Jamajjeya ojjaña Jesosaja epeejji cuana quea bihui nee capoahua Eyacuiñajjiya oya ba cani pea cuana jayojjaya. E'e, aema' cuana Eyacuiñajjiya ba cani pea cuana jayojjaya, joya quea aquiana huiso nee jayojjaya. Joya quea aquiana huiso ca ca ohuaya ba cani aema' jayojjaya.

Eba'ejji quea camaja

¹²Jesosaja epeejji quea pame nee eshahuua iyaa cajje jjashajja'ajjaqui ajja poaje; quea mimishi po sa po'yo ajja poaje. Ohuaya Eyacuiñajjiya esohui jayojja jama atiiti cani. Jamajjeya joya cuana quea bihui nee nee capoahua! E'e, Eyacuiñajjiya huohui ca poa jama ba'a: —Eya ojaya quea jea nee nee poanijo, ecuea epeejji cuana ecuea esohui pajea'yo ajjajo eyaya oya cuana ba'e tiitii meeje'yo enijke eyajo.

¹³Mimishi amajje, quea tai jjashahuabaqui majje pea'ai beca cuana siajje poani jama ba'a: —Eyacuiñajjiya eya quea mimishi po mee cani —jama ohua acani posoya jjabaquiani.

Chojja, de. Ma miyame tii ca mi ca quea mimishi. Eyacuiñajjiya ca ca mimishi a'ajja nei nei. Jamajjeya ohuaya eseaya quea mimishi epo meejeji pojjeama nei nei.¹⁴ Ojjaña aje oe quea mimishi po sa poanijo quea mimishi poani ojaya ejjashahuabaqui'yojjijo. Joya ecua oya jjashahuabaquianijo quea mimishi po meeya poani.¹⁵ Jamajjeya quea mimishi jjashahuabaqui majje mimishi acaje'yo. Mimishi amajje manoje'yo. Majoya Eyacuiñajjiya mimishi cuana quea nee nee po mee caje'yo tii tii quea mimishi poanaje jojoya.

¹⁶Ecuea epeejji cuana, ;shajja'ajjacue mo oe! ;A'a quea quehua jjashahuabaquijji Eyacuiñajjiyo! Ohuaya ca ca oe eseaya quea ja'a nee po

meesahua cani. ¹⁷Ohuaya, eseja Chii aiya yahuajo nei nei ojjaña aquiana eyajo nequi pana ca poa: eshequi, ba'i, majameta cuana pe'a'i pana ca poa. Oya cuana quijje quea misi poaje'yo. Eyacuiñajji ca ca oe, chojja. Jiquio ecua oya jjeya nei nequi jama tii tiiya nequi tiitii poquije. Ohuaya eseya quea pame nee acani. Jamajjeya ohuaya eseya ojjaña aquiana pame quia cani e'e jojo nei. ¹⁸E'e, Eyacuiñajjiya ojjaña eseya babaca canaje ojaya epeejji nei epoiji. Ohuaya esohui e'e nei huoojea canaje esejaya ebajji. Jamajjeya eseya Jesosa nijje jjapeequi meesahua cani. Eseya ca ca ojaya quea boti nee nee poani; pea aquiana cuana oja pana ojaya iye botiboti poani.

¡Eyacuiñajjiya esohui shajja'ajjacue e'e jojo nei!

¹⁹Ecuea epeejji cuana, ¡shajja'ajjacue mo oe! ¡Ojjaña pojabajo Eyacuiñajjiya esohui jashahija'ajjaquicue! ¡Mimi jjimahuajo quea ja'a nee jjashahuabaquicue pe'a'i! ¡A'a quea quene pojji; pea cuana nijje a'a quenequene cuajiji! ²⁰Quea quene poanijo Eyacuiñajjiya ejjashahuabaquijji quea ja'a nee jayojja jama yajji pojjeama. ²¹Jamajjeya ja'a quea quene pojji! ¡Ojjaña ejjashahuabaquijji quea tai epoiji, quea mimishi pajea'yocue! ¡A'a pea cuana jama ba'lejji! Eyacuiñajjiya eseya ojaya esohui ba meesahua cani. ¡Ojaya esohui shajja'ajjacue; jamaya ba'ecue quea bihui nee! Jamajjeya ohuaya eseya ba'e tiitii mee caje'yo onijje eyajo. ²²Eyacuiñajjiya esohui shajja'ajja majje jamaya po ajjajo miquianaya quea tai jjashahuabaquiani, quea quehua poani. ¡Eyacuiñajjiya esohui shajja'ajja majje ca oe shajja'ajja tiitiicueya!

²³E'e, beca cuana Eyacuiñajjiya esohui shajja'ajja majje jamatii jjashahija'ajjaqui ajja poani. Jiquio ecua se ecojjabajjiyo jjacojjabaquiani jama poani: ²⁴Eseya ecojja ba majje poquiani. Quijje pishana seja ecojja pajecauaji yaña: —¿Achajja shai ecuea ecojja poanaje? —se poani.

E'e, ecojja ba majje pajecauaji yaña jama jayojjaya beca cuana poani. Eyacuiñajjiya esohui quea pame nee shajja'ajja cani. Jamatii shajja'ajja majje pajecauaji ca'yani. Esohui jayojja jama ba'e ajja. ²⁵Pea cuana ca ca esohui shajja'ajja majje jjashahuaba neineiquiani. Pajeapajea'yo ajjajo ma esohui jayojja jama po tiitiiani. Eyacuiñajjiya oya cuana mimishi pajea meesahua ca'yani. Quea ja'a nee nee ba'e meesahua cani, quea bihui nee po mee cani pea'ai joya ojaya esohui jayojja jama ba'yanijo. ²⁶Beca cuana aje oe jjashahuabaquiani jama ba'a: —Eya Jesosa Quitoja epeejji poani —jama posoya jjabaquiani. Jamatii quea mimishi, quea mimijjequijea mimi tiitiianijo oya cuana Jesosa Quitoja epeejji pojjeama. Chojja, epeejji nisho poani.

²⁷Eyacuiñajji esejaya Chii ai jama poanaje ba'a: —¡Ecuea epeejji e'e nei cuaa e'e jojo nei enijje jjapeequianiya quea pame nee ca'a cahua! Jama ba'a: ¡Esho'i echii mano'yo catii mee cahua quea pame nee! ¡Epona e'ahuemano

quea yeno poani caba'e meesahua cahua quea pame nee pea'ai! ¡Eshahuaja epeejji quea mimishi jayojja jama a'a pojji! —acanaje eseja Chii aiya.

¡Ojjaña cuana quea boti nee acue!

2 ¹Ecuea epeejji cuana, ¡shajja'ajjacue mo oe! Esejaya Emeshi Mese nei Jesosa Quito quea pame nee nee poani, quea ca'a nee nee poani pea'ai. Miquianaya onijje jjapeequianijo, jamaya pocue ba'a: ¡Ojjaña Jesosaja epeejji cuana pea jayojjaya acue! Jamajjeya ¡quea pame jjashahuabaquicue ojjañajo, aquianajji, aquianama' cuanajo pea'ai! ²Jama ba'a: E'e pojja'a Jesosaja epeejji aquianajji Eyacuiñajji equi yasijje dobiquiani. Ojaya eme' bajji mei huo'o quea nahue, ojaya daqui quea nahue ehuosho ba'e pea'ai miquianaaya baña. Majoya pea epeejji aema', daqui chijji Eyacuiñajji equi yasijje dobiquiani. ³Miquianaya quea mimishi jjashahuabaquiani. Jamajjeya joya quea aquiana huiso nee quea boti aña jama ba'a: —Ma'aje, jiquio e'anioquejji quea pame nee. ¡Jiquiojo anioquecue! —aña.

Aema' nijje ca ca miquianaya jama poani ba'a: —Comajo tii ca miña nequicue! ¡Quea huesha anioquecue pojja'a! —jamaya miquiaa ajje aema' cuana quea bicho poani. Jamaya quea tai.

⁴Miquianaya peaja aquianajo jjashahuabaquiani; jjaniñebaquiani jama ba'a: —Joya quea aquiana huiso quea pame poani. Aema' ca ca quea tai, cajaa —jamaya miquianaya quea tai jjashahuabaquiani.

⁵Ecuea epeejji cuana, ¡shajja'ajjacue mo oe! Eyacuiñajjiya Jesosaja epeejji cuana aema' cuana babaca canaje Jesosaja epeejji nei cuana epoji. Ohuaya huohui canaje jama ba'a: —Ojjaña joya ecuea esohui jayojja jama acani enijje nequi meeje eya ojjaña huoojeajji poaje —jamaya Eyacuiñajjiya huohui ca poa ojjaña joya Jesosa quea boti nee aiji poani.

⁶Jamatii miquiaaya aje oe aema' cuana quea bicho po meeña. ¿Ache dejja cuaa shai sohuinano huoojea cani mi dojohua emeshi meseja etecueajji? ¿A'a aema' cuaa? Chojja. Bejjojiyya ca mi ca miquianaya napa mee cani. ⁷Ohuaya Jesosa Quito niñebea cani pea'ai. E'e, oya Jesosa Quito quea pame nee Eyacuiñajjiya huoojea canaje ese jaahuanaa. Jamatii mimishi cuaa oya niñebea cani.

⁸¡Miquianaaya Eyacuiñajjiya esohui jayojja jama acue! Yahuajo ohuaya huohui ca poa jama ba'a: —Miya quea bihui nee ba'e sa poani. Jamajjeya ¡pea cuana quea bihui nee ba'e meesahuacue quea pame nee pea'ai! Jamajjeya ¡ojjaña cuana quea boti nee acue!

Jamaya e'e jojo nei añajo miquianaya quea pame nee poani. ⁹Jamatii miquianaaya aje oe dejja quea aquiana huiso nee cuana quea jea aña. Aema' cuana ca ca quea bicho po meeña. Jamaya quea mimishi, Eyacuiñajjiya esohui jayojja jama pojjeama. Jamajjeya ohuaya miquianaya tecuea caje'yo ojaya esohui jayojja mi añajo, ma etiiquiana Moisesiya tehue ca poa jayojja jama miya mi ajo. ¹⁰Moisesija etehue'yo quea huiso nee poa. Ojaya esohui etehue'yo oe

nei ajjimajo miya shajjama' poani, ojjaña ojaya esohui etehue'yo ajjima amajje.
 11 E'e, Eyacuiñajjiya Moisesi tehue mee ca poa jama ba'a: "¡A'a pea cojjoji pojji!"
 Ohuaya tehue mee ca poa jama pe'a'i ba'a: "¡A'a pea quecu'a'yojji!" Jamajjeya
 joya pea quecu'a'yojji poani quea tai nee nee poani, jamatii pea cojjoji pojjeama
 poani. Eyacuiñajjiya esohui etehue'yo pajea ca'yani.

12 Jamatii Jesosaja esohui jayojja jama añajo ca ca eseya mimishi'ama
 poani. Ma esohui jayojja jama añajo Eyacuiñajjiya eseся etecueajji
 pojjeama. Jamajjeya ¡Jesosaja esohui jayojja jama atiitiicue quea pame
 nee! 13 Quijje Eyacuiñajjiya ojjaña cuana sosequia caje'yo ma ecua oya
 jiquiero meshijo ba'enaje jama sosequia'yomeya acaje'yo. Ojjaña joya pea
 cuana nijje quea bei poanaje Eyacuiñajji onijje quea bei poaje pe'a'i. Joya
 pea cuana nijje quea bei pojjeama poanaje ca ca Eyacuiñajjiya tecuea
 caje'yo. Jamatii Eyacuiñajji quea mase pojjeama. Ohuaya ojjaña mimishi
 cuana pajea mee'yo sa acani, quea nee ese po mee sa po'yo ajja.

¡Jesosaja epeejji cuana quea pame caba'e ca'yahua!

14 Ecuea epeejji cuana, ¡shajjal'ajjacue mo oe! Beca cuana jama poani ba'a: —Eya
 quea pame nee nee, eya Jesosaja esohui jayojja jama poani —poso jjabaquiani.

Jamatii oya cuana Jesosaja epeejji pojjeama jayojja jama ba'yani,
 quea pame pojjeama. Jamajjeya ¿a'a Eyacuiñajjiya ojaya mimishi cuijear
 caje'yo? ¿A'a onijje ba'e tiitii mee caje'yo eyajo? Chojja de, ¡quea pame
 ca'a cahua pea'ai! Quea pame pojjeama ba'yanijo ca se ca oe emimijeajji
 eseся mimijeani jama ba'a: —Eya Jesosaja epeejji poani.

15 Jamajjeya jama jjashahuabaquime pocue ba'a: Yani pojja'a Jesosaja
 epeejji cuana beshahua nei daquima', quea shoe pea'ai pojja'a. 16 Joya
 aema' cuana pojja'a miquianaaya huohuiaña jama ba'a: —¡Quea bihui
 nee pocue! ¡Huoe'ama, quea jejje pocue! —jamaya pojja'a miquianaaya
 oya aña. Jamatii quea dejja taiya jjejojo miyaya bobo, daqui pea'ai mi
 quiaña. Jamaya po aijjajo ehuohuiejaji miquianaaya aema' huohuiaña
 jama ba'a: —¡Quea bihui, quea jejje pocue; huoe'ama pocue pea'ai!

17 Oya jayojjaya beca cuana poani: —Eya Jesosaja epeejji poani.

Jamatii Jesosaja esohui jayojja jama mi acanijo oya Jesosaja epeejji nei
 pojjeama.

18 Onaya jjamimicuajea nobiaejaquiani jama ba'a: —Eya Jesosaja
 epeejji. Eyacuiñajjiya esohui ecuea eba.

Pea ca ca jama poani ba'a: —Eyaya Eyacuiñajjiya esohui jayojja jama atiitiiaña.

Eyaya ca ca huohuiaña jama ba'a: —Eyacuiñajjiya esohui jayojja jama
 a'ajjajo eyaya miquianaya baña Jesosaja epeejji pojjeama. Quea pame
 nee nee Eyacuiñajjiya esohui jayojja jama añajo ca ca ojjaña eba eseся
 Jesosaja epeejji nei poani —jamaya eyaya aña.

19 Miquianajaya eba Eyacuiñajji oe nei yani tii tii. Jamaya quea
 pame nee, e'e jojo nei poani. Jamaya eshahua cuanaja eba pea'ai, ma

Eyacuiñajji oe nei yani tii tii. Jamajjeya oya cuana quea mete tii tii poani, Eyacuiñajjiya oya cuana quea nee po mee caje'yo.

²⁰Miquianaya jjashahuabaquiani quea quehua jama ba'a: —Eya Jesosaja epjeeji poani.

Jamatii Jesosaja esohui quea pame jayojja jama a'ajja. Jamaya quea tai ba'yanijo miya Jesosaja epjeeji pojeama. Jamajjeya miquianajaya ejjashahuabaquijji eyaya jiquio esohui tehueaña esejaya etiiquiana Amajamajo. ²¹Yahuajo nei nei esejaya etiiquiana Amajamaa Eyacuiñajjiya esohui jayojja jama aca poa. Jamajjeya Eyacuiñajjiya oja mimishi cuana cuijea ca'ya poa. E'e, Amajamaa ojaya esohui a'la shajja'ajja caje ebajji Eyacuiñajjiya oya huohui ca poa jama ba'a: "Amajama, ¡miquea ebacua mei e'lya biajje jeyo majje yacuajeacue, eya quiacie!" Amajamaa Eyacuiñajji shajja'ajja ca poa. Oja bacua ejja oe nei mei biajje jeyo majje Eyacuiñajji yasijje quia ca poa. Beshahua nei yacua ca'ya poa. Jamaya ojaya esohui ma ecua Eyacuiñajjiya huohui canaje jayojjaya Amajamaa aca poajo, Eyacuiñajjiya oya jama aca poa ba'a: "Amajama, miyaya ecuea esohui shajja'ajjañajo ecuea eba miya ecuea epjeeji nei. Eyaya miquea mimishi cuana cuijeaje'yo". Jamaya Eyacuiñajjiya aca poa.

²²¿A'la miquianaya jjashahuabaquinaje Amajama Eyacuiñajjiya epjeeji e'e jojo nei? E'e. Ohuaya huohui ca poa jama ba'a: —Eya Eyacuiñajjiya epjeeji —aca poa.

Majoya ohuaya Eyacuiñajji shajja'ajja ca poa; Eyacuiñajjiya esohui jayojja jama aca poa. Jamajjeya oya e'e jojo nei Eyacuiñajjiya epjeeji quea pame nee poa. ²³Jamatii Eyacuiñajjiya esohui yahuajo nei jama poa ba'a: —Amajamaa huohui ca poa jama ba'a: "Eya Eyacuiñajjiya epjeeji" aca poa Amajamaa. Majoya ohuaya Eyacuiñajjiya esohui jayojja jama aca poa pea'ai. Jamajjeya Eyacuiñajji Amajama nijje jama poa ba'a: "Miya ecuea epjeeji e'e jojo nei. Jamajjeya eyaya miquea mimishi cuana cuijeaje'yo" —jamaya Eyacuiñajji poanaje.

²⁴Jamatii eseyá Eyacuiñajji nijje mimianijo, ojaya esohui jama añajo pea'ai, Eyacuiñajjiya esejaya mimishi cuana cuijea ca'yani. Jamaya eyaya miquianaya ba mee yaña.

²⁵Oya jayojjaya yahuajo nei nei Shajami poa, Amajama jayojjaya poa. E'e, yahuajo nei nei oe epona Shajami yaña poa. Shajami Jodio pojeama poa. Oya quea mimishi pea cojjojji nei nei poa. Jamatii ohuaya Eyacuiñajjiya epjeeji quea pame nee aca poa. Nahue ca poa sohuinano cuaa equecuaca'yo poanije. Jamajjeya Eyacuiñajjiya oja mimishi cuana cuijea ca'ya poa. E'e, Shajamiya Eyacuiñajjiya epjeeji becamejijji pea'ai quehuajje bobia ca poa, Jodio cuanaja esohui huohujji cuana. Majoya oya cuana quehuajje poqui meesahua ca poa pea ejiojjijje, onaa equecuca ca poaje jjejojoya. E'e, Shajamija ejjashahuabaquijji Eyacuiñajji quea pame nee poa.

²⁶Jamatii esejaya eba jama ba'a: Esejaya edojjoshahua poqui'yo majje esejaya eyami ihuije'yo, cajaa. Oya jayojjaya ojjaña joya

Eyacuiñajija esohui shajja'ajja majje jjashajja'ajjaqui ajja poani maya Jesosaja epeejji pojjeama, cajaa pea'ai. Ehuohuijeajjiya huohui cani jama ba'a: —Eya Jesosaja epeejji poani.

3 ¹Ecuea epeejji cuana, ¡shajja'ajjacie mo oe! Eseyea quea mimishi poajo, Eyacuiñajjiya tecuea caje'yo. Jamaya miquea eba. Eyacuiñajjiya esohui huohuijji cuana quea mimishi poajo ca ca Eyacuiñajjiya oya cuana tecuea neinei cañaje'yo janobajjima nei. Jamajjeya oe ja'a eseyea quea huiso Eyacuiñajjiya esohui huohuijji po sa pojji!

Beca cuanaja chama' esohui jjochijji

²Ojjaña pojajo eseyea quea mimishi pishana poani. Joya esohui quea mimishi mimi ajja tii tii, mimijequijjequij'yo ajja poani ca ca ojaya ejjashahuabaquijji quea ja'a nee poani tii. Jamajjeya oya quea pame tii ba'yani. ³Eseyaya baacui sisi mapichija enaba huasijje huananobiaña ehui jjequijjea poquiajji. Majoya eseyaya mapichi poqui meeña cua ese poqui sa poaje yasijje. Jamatii baacui enabajo che biso nei ba'yani.

⁴Oya jayojjaya bishe quea quemo quea cuejipashi nei poquiani. Jamatii ebishe meseya bishe quiijo aniya bishe dojo cani cua o poqui sa poaje yasijje, quii ca'a cani, jamatii equiica'ajji biso neiya.

⁵Jiquio ecua bishe quiica'ajjiya bishe ai huijea cani jama jamatii che biso neiya jayojja jama esejaya enaba quea biso, jamatii beca cuana quea huiso esohui quea tecue mimiani. Quea miminaa poani bicho'ama.

¡Jashahuabaquicue cuaquijo peal'ai! Cuaqui cojasha sisiya quiijo'yo jjimaa ebio quea jabo dahuajea cani, ebio quea quemo. ⁶Ma jayojjaya beca cuanaja e'ana quea mimishi mimimimianijo yana cuaqui jayojja jama poani. Jamajjeya jiquio ecua cuaquiajje ebio dahuajea cani, acui cuana quea tehue po mee cani jama jayojjaya esohui quea mimishi mimianijo ejjashahuabaquijji quea tai po mee cani. E'e, esho'iquiana quea tai mimiani; tii majje quea tai mimiani peal'ai, quea mimishi. E'e, eshahua cuaa eseyea quea tai nee nee mimi mee cani. Jamajjeya Eyacuiñajjiya ojjaña joya quea mimishi mimian quea nee nee po mee caje'yo. ⁷¡Bacue! Eseyaya ojjaña ijjiacajji cuanaja ebacua huoniaña. Ijjiacajji mase cuanaja bacua cuana, cuichojjija bacua cuana huoniaña; shaneija bacua cuanaya huoniaña, nahuuo jai besijji cuana peal'ai. Jjabahuonequi meeña. ⁸Jamatii esejaya esohui quea tai, quea tecue ca ca quea mimipanajea epoji chama' esohui jjochijji, ca pea nijje emimijaji pajea'yojjii. Jiquio ecua peyoja ese na jama quea nee nee poani jama esohui quea taijoya pea epeejji cuana quea yeno nee nee po mee cani. ⁹Eseyaya aje oe Eyacuiñajji, esejaya Chii ai bihuaña esejaya enabaa. Jamatii majoya eseyaa pea cuana nijje mimijajjani, ma Eyacuiñajjiya pana ca poa o jayojja epoji nijjeya eseyaa mimijajjani. Jamaya quea tai. ¹⁰E'e, esohui quea bei, quea pame mimi majje quijje pishana esohui quea tecue nee nee, quea mimishi nee mimiani peal'ai. Ecuea epeejji cuana, ja'a oe jamaya pojji! ¹¹¡Jashahuabaquicue! Ena teohuejja cajje ena ihui'ama cuayani, sese'ama. Ena

sese ena quea pame tejjee teohuejja cajje cuaya ajja. Jiquio ecua ena quea pame cuaya majje ena sese cuaya ajja jayojja jama pojjeama esejaya enaba. Esohui quea pame mimi majje esohui quea mimishi mimiani, ena sese jama cuayani esohui.¹² Epreejji cuana, miquea eba jememe acujo chama' esiye. Jememejo tii ajja esiye. Jjono cuanajo tii ajja acuujjajja, shihujjajja pe'a'i. Oya jayojja meshi eteohuejjaje ena quea pame cuayani; ena sese cuaya ajja. Jamajjeya esohui quea pame mimi majje ¿apiojji acuae nequiana esohui quea mimishi mimiani, pea cuana niñebaña pe'a'i? Jamaya se quea pame pojjeama nee nee.

Eyacuiñajjiya eseaya quea ja'a jjashahuubaqui mee cani

¹³ ¿A'a miquianaya quea ja'a jjashahuabaquian? ¿A'a jjabahuejjaquinaje quea pame nee eba'ejji? Jamajjeya ¡quea pame nee atiitiicue!
¡Tecue'ama pocue! Quea pame nee añajo pea cuaa ba caje miquianajaya ejjashahuabaquijji quea pame nee poani. ¹⁴ Pea cuanajo quea quene nee nee jjashahuabaquianijo, quea nishehui, quea dejja tai nee nee poanijo pea'a'i ¡quea yeno pocue miquianaja mimishijo! ¡A'a siajje pojji Eyacuiñajji nijje jama ba'a: —Eya quea pame nee ba'yani —a'a jama siajje pomeya pojji! Chojja.

¹⁵ Ojjaña joya quea tecue nee nee, quea nishehui pea'a'i poani Eyacuiñajji Edojjoshahua Pame jayojja jama jjashahuabaqui ajja. Chojja. Oya cuana eshahuaja ejjashahuabaquijji jayojja jama poani quea mimijequijea, quea mimishi. Mimishi cuana Eyacuiñajji esohui jayojja jama po ajja tii tii, Eyacuiñajji epeejji pojjeama. ¹⁶ Quea tecue po tiitianijo, quea nahue po tiitianijo pea'a'i ojjaña peapea mimishi cuana acani tii tii pea'a'i. Quea ja'a ba'e ajja. ¹⁷ Eyacuiñajji ejjashahuabaquijji quea pame nee nee. Ojaya ejjashahuabaquijji jayojja jama jjashahuabaquianijo eseaya mimishi'ama poaje: Quene'ama. Nishehui'ama, dejja tai'ama. Shajjama' pojjeama. Quea bei poaje. Quea pame nee poaje'yo tii tii pea'a'i. ¡A'a oe nei dejja quea jea ajji; ojjaña cuana oe quea jea acue! ¡Jesosaja epeejji e'e jojo nei pocue pea'a'i, epeejji nisho pojjeama! ¹⁸ Jamajjeya ¡quea bei nee ba'ecue! ¡Pea cuana quea bei ba'e meesahuacue pea'a'i! E'e, eseaya nei quea bei poanijo, quea pame nee poanijo pea'a'i, pea cuana quea pame nee poaje ese jayojjaya.

¡Jesosaja epeejji pojjeama jayojja jama a'a ba'ejji!

4 ¹ ¿Apiojji acuae quiana esohui quea tai nee nee mimiani so'o Jesosaja pea epeejji cuana nijje? ¿Apiojji acuae quiana jjamimicuiajea nobiajeaquiani pea'a'i? Ecuea eba. Miquianaya quea huiso aquiana jea bañajo quea tecue nee nee poani, quea dejja tai poani pea'a'i. ² Miquianaya ca ca oe quea aquiana huiso po sa poani. Jamatii ejjeshejji chamajojo ca ya ca oe mi jjesheaña. Jamajjeya ajeo ejjeshejji pojjeamajojo ca ya ca oe pea quecua sa aña e'aquiana mejo'yojji. Onajaya aquiana jea ba majje miquianaya jjamimicuiajea nobiajeaquiani; jjacuiaquiani pea'a'i. Jamatii miquianaya Eyacuiñajji nijje mimi ajja jama ba'a: —Eyacuiñajji,

¡che mo ma aquiana jjeshe meesahuacue! —jamaya Eyacuiñajji nijje mimi jjimajojo ca mi ca mi jjeshe meesahua cani aquiana cuana.

³Beca cuana aje oe Eyacuiñajji nijje mimilani aquiana sa poanijo. Jamati ma aquianajo quea nahue nee poanijo ojaya miquianaya ma aquiana equia meeji pojjeama. Aquiana miquea miqueya nei epojji quea tai jjashahuabaquiani. Eyacuiñajji ejjashahuabaquiji jayojja jama a'ajjajo ojaya miya eshajja'ajjajji pojjeama. ⁴¡Bacue! Jiquio ecua ehuanase ojaya yahue boti'ama amajje pea dejja nijje poani jama jayojjaya miquianaya Eyacuiñajji nijje jjapeepajeaqu'i'yani mimishi cuana nijje ejjapeequi'yoji. Jamajjeya miquianaya Jesosaja epeeji pojjeama cuana nijje jjapee neineiquianijo miquianaaya Eyacuiñajji boti'ama aña. Quea mimishi ba'e sa poanijo Eyacuiñajji quecu'a'yojji jayojja poani.

⁵Eyacuiñajji esohui yahuajo nei nei tehue ca poa cuaa jama ba'a:

“Eyacuiñajjiya ojaya Edojjoshahua Pame ojaya epeeji cuana huasijje huoojea ca'yonaje ojaya eyami yasijje dobiquiya. Edojjoshahua Pameya ojaya epeeji cuana nahue tiitii cani mimishi'ama epoji”.

Jamaya yahuajo nee tehue ca poa. ¿A'a Eyacuiñajjiya ma esohui etehuejeajji tehue mee ca poa posoya aña miquiaaya?

⁶Eyacuiñajjiya eseya jaahuana cani quea ja'a nee. Ohuaya eseya ba'e meesahua cani quea pame nee. E'e, ojaya esohui yahuajo nei tehue mee ca poa jama ba'a:

“Eyacuiñajjiya ojjaña joya mimishijo bicho'ama poani, quea quene poani pea'ai jeabichajea cani. Quea yeno nee nee po mee cani pea'ai. Ojjaña quea bei poani, quene'ama poani pea'ai ohuaya ba'e meesahua cani quea pame nee”.

Jamaya yahuajo nei tehue mee ca poa.

⁷Jamajjeya oe ¡Eyacuiñajji esohui jayojja jama pocue! ¡Edosiquiana nei nijje a'a jjapeequijji! ¡A'a oya shajja'ajjajji! ¡Oya huoojeacue! Jamajjeya miquianaya Jesosaja epeeji poanijo Edosiquiana miquiana huoojeajji pojjeama poani. Chojja, jjanequishiñaqui majje oya poquije quea huesha nee. ⁸¡Jesosa nijje jjapee neineiquicue! Jamajjeya ohuaya miquianaya jaahuana tiitii caje'yo. ¡Miquea mimishi cuana pajea nei'yocue! ¡Jesosaja epeeji nisho a'a pojji! ¡Ojaya epeeji nei nei oe pocue Eyacuiñajji esohui etehue'yo jayojja jama! ¡Quea bojea ba'e neinei'yocue! ⁹¡Miquea mimishijo quea yeno nee pocue! ¡Pa neineicue! ¡Mimishi cuanajo quea bihui jayojja a'a soajji! ¡Mimishi cuana amajje a'a quea bei jayojja pojji! Chojja. ¹⁰Quea tai po majje quea bicho nee nee mimicue Eyacuiñajji nijje jama ba'a: —Eyacuiñajji, ¡eya mimishi pajea meesahua'yocue! E'e, eya ca'a'ama. ¡Jaahuana neineicue mo oe, quea bei enijke pocue!

Jamaya onijke mimianijo Eyacuiñajjiya miquianaya shajja'ajja caje. Miquianajaya emimi onijke jayojja jama ohuaya acaje.

¡A'a pea cuanajo maimaijji!

¹¹ Ecuea epeejji cuana, miquianaya Jesosaja epeejji cuana poani. Jamajjeya ¡Jesosaja pea epeejji cuana a'a niñebajji! Jesosaja epeejji cuaa, beca cuaa pea epeejji niñeba cani jama ba'a: —Oya Jesosaja epeejji quea pame pojjeama —jamaya acani Eyacuiñajji esohui jayojja jama a sa po'yo ajja jjejojo.

Jamajjeya ohuaya Eyacuiñajji esohui niñeba cani jama ba'a:
—Eyacuiñajji esohui quea pame pojjeama poani.

Ohuaya Eyacuiñajji esohui jayojja jama a'ajja boti'ama jojoya.
Jamajjeya oya cuana Eyacuiñajji esohui niñebajji poani. ¹² ¡Bacue!
Eyacuiñajji oe nei ojjaña huoojeaggi poani quea pame nee. Oya oe nei
quea ja'a nee nee jjashahuabauquiani ojaya epeejji cuanajo. Ohuaya
ohuaye nei mimishi cuana cuijea ca'yani. Jamajjeya ohuaya ohuaye nei
mimishi cuana quea nee po mee caje'yo tii tii. Jamajjeya ja'a pea
epeejji cuana niñebajji! Miya ca ca Eyacuiñajji jayojja jama pojjeama.

¡Eyacuiñajji ejjashahuabauquijji jayojja jama acue!

¹³ Beca cuana mimiani jama ba'a: —Mecahuajje pojja'a eya poquije pea
cuiñajji yasijke. Jocuama eya nequije oe shequiajame. Chacochaco majje
ejjeshejji quea huiso jjesheje —poani.

¹⁴ ¡Eya shajja'ajjacue! ¿Ae shai poaje mecahuajje? Miquianajaya eba pojjeama.
¿Ache shono manoje'yo eseaya? Esejaya ba jjima. ¡Bacue! Eseya huoja jama. Jiquio
ecua eshequi jaasohua pishanajo huoja jjachamaqu'yan, poquiani jama jayojja
miquianaya jiquio meshijo enequi tiitijji pojjeama; ca'l'ama. ¹⁵ Jamajjeya jama
pocue ba'a: —Eyacuiñajji esuana ba'e meesahua canijo, esuana ba'eje quea
pame nee. Ohuaya esuana chaco sahua canijo, esuaya chacoje ma echacojji.

¹⁶ Jamatii miquianaya bicho'ama mimiani jama ba'a: —Eya jamatii
quea pame chacochacoani. Quea pame ba'yani jamatii.

Chojja. Miquianaya emimijeajji mimijeani. Jjashahuabauquiani quea
quehua nee nee.

¹⁷ Eyacuiñajji ojjaña quea pame nee ameesahua sa acani. Ma ba
majje jamatii beca cuana quea pame po sa po'yo ajja. Jamaya poani
jjejojoya quea mimishi nee nee poani.

Dejja quea aquiana huiso niñeshe'ajji

5 ¹Quea dejja tai jjejojo ona dasiajji poani, ¡shajja'ajjacue mo oe! Jjeya
miquianaya quea aquiana huiso poani. ¡Jamatii quea yeno nee nee pocue,
pa neineicue pea'ai! Quijje aje oe quea yeno nee nee poaje, quea camaja nee
poaje'yo. Quea nee nee poaje'yo miquianaya. ²Miquianajaya aquiana quea nahue
cuana shaashaaje quea huiso. Mojoea caje. Miquea daqui quea nahue cuana
huiñajeaje'yo, machichi aiya ijijiahuiñajea caje'yo quiiteteya pea'ai. ³Miquea
aquiana mei huo'o quea nahue cuana, mei oshe quea nahue cuana, bejjo cuana

pea'ai seejeaje'yo. Miquea aquiana cuana esee'yo, ehuiñajea'yo ba majje onaaya miya jama acaje ba'a: —Oya quea dejja tai; oya quea nishehui poanaje. Quea aquiana jeara jjejojo aquiana quea huiso nee nahue tiitii canaje.

Miquea ejeshejji chama'yo tii poaje'yo. Jiquio ecua cuaquijo quiyo'yo majje eseya quea nee nee poani jama jayojja miquea aquiana cuana chama'yo tii poajo miya quea yeno nee nee poaje'yo. Majoya Eyacuiñajjiya miya tecuea caje quea dejja tai poanaje jojoya, aquiana cuana quea huiso nee chicha majje nahuejje poanaje jojoya.⁴ E'e, echacojji cuana mique que cuanajo chacochaco'yonaje miquea sosequia'yo jjima. Ma echacojji cuana Eyacuiñajji nijje mimiani mijo; huohui cani, sosema' miya chaco mee canaje jjejojo. Onaaya mique que cuanajo bobo sosema' chicha ca'yonaje pea'ai. Majoya oya cuana taaani Eyacuiñajji yasijje mimi majje miquea sosequia'yo jjima jjejojo. Eyacuiñajji quea ca'a nee nee, ojjaña huoojea'yojji nei nei oya poani. Ohuaya echacojji cuana pa ani shajja'ajja canaje. Jamajjeya ohuaya miya tecuea cani quea dejja taijojo.⁵ E'e, miyaya aje oe aquiana quea huiso jiquio meshijo chichanaje; miquea yajijo quea huiso aquiana pame, quea nahue nee pea'ai chichanaje, siinaje pea'ai. Quea aquiana jea nee nee poanaje. Quea bobo huiso nee nee miya poanaje. Jamatii jejjie ajja tii tii poanaje. Quea dejja tai poanaje; quea nishehui poanaje epona. Jamajjeya Eyacuiñajjiya miquianaya quea nee nee po mee caje'yo.⁶ Miyaya aje oe aema' cuana, joya mimishi'ama quea pame nee poani pea'ai tecueanaje. Oya cuana quecuajeanaje pea'ai. Jamatii oya cuana minijje jjasoseaqui'yo ajja, jeabichajea sa po'yo ajja pea'ai. Eyacuiñajjiya ca ca oe miya quea nee nee po mee caje'yo tii tii ona miya mi sosequiajo. Jamaya eyaya miquianaya aña, edejja tai cuana. Mahuiso.

¡Eyacuiñajji nijje mimicue eba'e meesahuajji!

⁷ Jamajjeya ecuea epeejji cuana, ¡Jesosaja epoe o'oyajjijo jja'ishoa'ajjaqui nequicue quea bei! Onaaya miquianaya quea mimishi acanijo, ¡jamatii Jesosa nijje jjapee tiitiiquicue yeno'ama! Eseyaya shijje quecua majje ishoa'ajjaña shijje tii'yajo eso' yajji. Jiquio ecua seya ena ishoa'ajjaña shijje pohua'yojji jama ¡ishoa'ajjamaya acue Jesosaja epoe o'oyajjijo!⁸ E'e, quijje pishana esejaya Emeshi Mese nei Jesosa poeje o'oya. Jamajjeya oe ¡jjeya quea pame nee onijje jjapee neinei tiitiiquicue e'e jojo nei!

⁹ Ecuea epeejji cuana, ja'a Jesosaja pea epeejji cuana niñebajji Eyacuiñajjiya miquianaya etecueajji pojjeama! Poe majje Jesosaa huohui cañaje'yo joya quea pame poanaje; joya quea mimishi poanaje huohui cañaje'yo pea'ai. Jjeyahua nei esejaya Emeshi Mese nei Jesosa chipi nei nequi. Jjeyahua nei pojja'a oya poeje o'oya.

¹⁰ Epeejji cuana, ¡shahuabacue Eyacuiñajjiya esohui huohuijji cuana ma yahuajo nei nei ba'ya poa! Ohuaya esejaya Emeshi Mese neijo huohui ca poa. ¡O jayojjaya jama quea bei pocue! E'e, yahuajo onaaya oya cuana cuia ca poa pea'ai. Jamatii Eyacuiñajji nijje jjapee tiitiiqui nequia poa.

¹¹E'e, oya cuana napa ca poa cuaa quea huiso. Jamatii Eyacuiñajji nijje jjapeequi pajea'yo jjima poa. Jamajjeya eseya jama poani ba'a: —Oya cuana Eyacuiñajji epeejji quea bihui neeya poa, ma etiiquiana cuana.

E'e, jniñeba'yocue Eyacuiñajji epeejji yahuajo nei nei nequia poa etiiquiana! Jobi bojojea'ajja'ya poa; quea nee nee poa. Jamatii Eyacuiñajji nijje jjapeepajeaquei'yo jjima poa. Jamajjeya Eyacuiñajjiya oya quea pame nee aca poa. Jjajea meequi ca'ya poa. Jamaya miquea eba. Eyacuiñajji eseya quea jea nee poanijo quea pame nee acani, quea bei pealai.

¹²Jiquio ecuea pea esohui ba neineicue, epeejji cuana! ¡A'a oe siajje pojji! ¡A'a oe jama pojji ba'a: —Eyacuiñajjiya eya ba canijo, eyaya e'e nei huohuiaña. Ecuea esohui e'e nei pojjeama jojjemo eya Eyacuiñajjiya quea nee po mee ca'yome. Ojjaña eyajo ba'e cuaa eya ba cani, ojjaña meshijo ba'e cuaa eya ba cani pea'ai eyaya e'e nei huohuiaña. Ecuea esohui e'e nei pojjeama jojjemo Edosiquiaa eya quea mano po mee ca'yome —a'a jamaya pojji!

Chojja, ¡esohui e'e nei huohuicue jama tii tii! Jamajjeya ¡chaco sa poanijo jama acue ba'a: —E'e, eyaya chaco sa aña —acue! Chacochaco sa po ajjajo ¡huohuicue jama ba'a: —Chojja, eya chacochaco sa po'yo ajja —acue! ¡E'e jojo nei oe huohui poquiacue! ¡E'e jojo nei jayojja mimianijo Eyacuiñajjiya miya tecuea ca'yo chana!!

¡Eyacuiñajji nijje mimicue emanojaa oja ehuaquia mee'yojji!

¹³¿A'a beca cuana quea yeno nee yani? Quea yeno po majje ¡Eyacuiñajji nijje camimiahua! ¿A'a pea cuana quea bihui nee poani? Quea bihui nee po majje ¡Eyacuiñajji cabihuia cahua sohuicuanijo! ¹⁴¿A'a emanojaa yani? ¡Eyacuiñajji epeejji etii cuana ca'iyaa cahua! Oya cuana poe majje Eyacuiñajji nijje mimije emanojaa huaquia mee'yojji. Jamajjeya emanojaa bahua shicui caje acuujjaja seiya Jesosaja epeejji poanijo. Majoya Eyacuiñajji nijje mimije emanojaa huaquia'yojji, ejjaajaqui'yojji pealai. ¹⁵Eyacuiñajji nijje mimianijo cajjashahuabaquiahua jama ba'a: —Ecuana Eyacuiñajji nijje mimiani emanojaa oja ehuaquia mee'yojji. Ohuaya e'e jojo nei ecuana shajja'ajja caje; emanojaa huaquia mee caje'yo —jamaya capoahua.

Jamaya jjashahuabaquianijo, Eyacuiñajjiya eseya onijje mimiajo shajja'ajja caje; jamaya acaje'yo e'e jojo nei. Emanojaa quea mano poani oja mimishijo, Eyacuiñajjiya oja mimishi cuana cuijea caje'yo pealai. ¹⁶Jamajjeya mimishi amajje ¡quea yeno nee mimicue pea cuana nijje! ¡Miquea mimishi huohuicue! Jamajjeya Jesosaja pea epeejji cuaa miquiana mimishi apajea meesahua caje'yo. Majoya ¡mimicue Eyacuiñajji nijje pea cuanajo! Eyacuiñajjiya miquianaya huaquia mee caje'yo. E'e, Jesosaja epeejji mimishi'ama Eyacuiñajji nijje mimi neineiyajo Eyacuiñajjiya oya shajja'ajja caje; jamaya acaje ojo.

¹⁷Yahuajo nei nei esejaya etiiquiana Enia bajjani ba'ya poa. Oya ese jayojjaya poa. Jamatii oya miminequia poa Eyacuiñajji nijje ena chama' epo mee'yojji.

Jamajjeya ena chama' poa beshahua nei ebeca pea pea'ai shequijame.

¹⁸ Meshi quea jabo nee nee poajo, Enia Eyacuiñajji nijje mimi o'oya poa ena epo'yojji. Eyacuiñajjiya Enia onije mimiajo shajja'ajja ca poa; ena quea quemó po mee ca'ya poa. Eso' cuana equecua ani pohua mee ca'ya poa.

¹⁹ Ecuea epjeejji cuana, ¡bacue! Jesosaja epjeejjiya Eyacuiñajjiya esohui etehue'yo jayojja jama ba'e pajea'yajo, joya quea pame nee ba'e meesahua o'oyacue miquianaaya! Jamajjeya Eyacuiñajjiya esohui jayojja jama acaje o'oya ohuaya. ²⁰ Jamajjeya Jesosa nijje jjapeequi meesahua o'oyañajo, oya cuana cuaquí yasijje epoqui'yojji pojjeama. Eyacuiñajjiya ojaya mimishi quea huiso cuana cuijea caje'yo.

Mahuiso ecuea esohui. Eyaya, Satiacohua esohui tehuenaje. Apoa.

PENOJA ETEHUE'YO EBIONEI

1 PEDRO

Penohua tehue canaje Jesosaja epeejji yasijje ejjaba'echejjequi ba'eca huasijje

1 ¹Eya Peno bajjani. Jesosa Quitoqua eya huoojea canaje ojaya esohui huohuiya. Eyaya jiquio esohui tehueaña miquiana huasijje, ma Jesosaja epeejji nei cuana huasijje. Miquianaya yahuajo ba'enaje Jodio meshijo. Jesosaja epeejji poanijojo onaaya miquianaya napa canaje. Jamajjeya miquianaya poquinaje quea huiso cuiñajji cuana huasijje, pea meshi cuana huasijje. Ma meshi cuana bajjani yasijje ba'a: Ponito meshi yasijje, Janata meshi yasijje, Capanosia meshi yasijje, Asia meshi yasijje, Bitinia meshi yasijje pea'ai poquinaje miquianaya. ²Yahuajo nei Eyacuiñajjiya, esejaya Chii eyajyo aniya miquianaya babaca canaje ojaya epeejji nei epojji. E'e, yahuajo nei oya miquianajo jjashahuabaquinaje jama ba'a: —Miquianaya ecuea epeejji cuana poaje quijke. Edojoshahua Pameya miquianaya quea pame nee ba'e meesahua caje ecuea esohui jayojja. Jamajjeya miquianaya Jesosa Quitoja esohui shajja'ajjajji poaje. Jesosa Quito manoje'yo miquiana quea boejea epo mee'yojji —jamaya Eyacuiñajji jjashahuabaquia poa esejo.
¡Eyacuiñajjiya miquianaya caba'e mee cahua quea pame nee nee!
¡Ohuaya miquianaya quea bei capo mee cahua pea'ai!

Jesosa Quito jjeya eshe anijo ecuana quea bihui nee poani

³¡Eseyaya Eyacuiñajji ejjabihuia tiitiiqui! Oya Jesosa Quitoja Chii. Oya esejaya mimishi cuanajo jjashahuabaqui tiitii ajja. Eseyaa quea jea nee poanijo, Jesosa Quito mano'yajo, Eyacuiñajjiya oya shequi mee ca o'oyanaje. Jesosa Quito eshe o'oya poanijo, eseja Jesosa jayojjaya ba'e tiitii mee caje'yo Eyacuiñajjiya. Jamajje jjashahuabaquiani quea bihui nee Jesosa nijje eba'e tiiti'yojji. ⁴Aquiana jiquiojo quea pame pishana, ani tiitii'yo ajja; ihui'yo majje chama'yo tii poaje'yo. Quijje ca ca Eyacuiñajjiya eseja ba'e tiitii mee caje'yo quea pame nee eyajo. Jamaya ohuaya huohui canaje. Ohuaya eseja pajea'yo jjima acaje. ⁵Miquianaya jjashahuabaquiani jama ba'a: —Eyacuiñajjiya ojaya esohui etehue'yo jayojja jama acaje'yo.

Jamaya jjashahuubaquianijo, Eyacuiñajjiya miquianaya jaahuana caje. Oya quea ca'a nee nee. Jamajjeya Jesosa Quito poe o'oyajo, Eyacuiñajjiya miquianajo huohui caje jama ba'a: —Miquianaya Jesosaja epeejji cuana poanijo ba'e tiitii meeje'yo enije eyajo.

⁶Jamajjeya ¡quea bihui nee po tiitiicue Eyacuiñajjiya miquianaya ba'e tiitii mee caje'yo jjejojo! E'e pojja'a oe pojji cahui cuanajo quea nee poaje onaaya miquianaya napa cani Jesosa nijje jjapeequianijo. Jamatii. ⁷Quea nee poani Jesosaja epeejji poanijo, Eyacuiñajjiya ba caje miquianaya ojaya epeejji nei nei. Jama poani ba'a: Mei huo'o topo majje cuaquijo dahua cani cuaa mei shaa chama'yо epojji. Jamatii mei huo'o quea pame pishana; see'yo majje quea pame pojjeama poaje. Miquianaya ca ca Eyacuiñajjiya quea boti nee nee. Jiquio ecua mei huo'o cuaquijo dahua cani cuaa mei shaa chama'yо epojji jayojja jama onaa miquiana napa cajje Eyacuiñajjiya miquianajaya ejjashahuubaquiji tai chama'yо po mee caje'yo. Jesosaja epeejji e'le nei quea pame nee po mee caje'yo. Jamajjeya ojjañaa Eyacuiñajji bihuia caje jama ba'a: —E'e, Jesosa Quitoja epeejji cuana quea pame nee. Jamajjeya ¡Eyacuiñajji ejjabihuiaqui, oya ba'e tiitiiani quea ca'a nee nee jjejojo!

⁸Jesosa Quito miquianajaya eba pojjeama ecojjaja. Jamatii oya miquianajaya quea boti nee nee. E'e, ojaya miquianajaya ba jjima eyami. Jamatii ojaya esohui jayojja jama poani. Jamajjeya miquianaya quea bihui nee nee poani. Pea cuanaja ba jjima Jesosaja epeejji quea bihui nee nee poani. ⁹E'e, Jesosa nijje jjapeequi'yanijo, ohuaya miquianaja mimishi cuana cuijea ca'yonaje; ba'e tiitii mee caje'yo pea'ai, ohuaya.

¹⁰E'e, jjeya nei ohuaya miquianaya ba'e meesahua cani. Cuanaya ba'e tiitii mee caje'yo. Jamaya Eyacuiñajjiya esohui huohuijji yahuajo nei ba sa poa; jjashahuuba neineiquia poa pea'ai. Ohuaya yahuajo nei huohui ca poa jama ba'a: —Eyacuiñajjiya quijje dejja cuana ba'e tiitii mee caje'yo onijje eyajo —jamaya yahuajo nei aca poa.

¹¹Edojjoshahua Pameya yahuajo nei ma esohui huohuijji cuana jjashahuubaqui mee ca poa jama ba'a: —Quijje Eyacuiñajjiya huoojea'yo ojjaña jaahuanajji poeje. Oya quea ca'a nee nee poaje. Jamatii quea nee nee poaje'yo. Quea nee po majje ojjaña quea pame nee ba'e tiitii mee caje'yo eyajo onijje —jamaya Edojjoshahua Pameya oya cuana jjashahuuba meequei ca poa.

Jamajjeya oya cuana jama poa pea'ai ba'a: —¿Ache shono shai oya Eyacuiñajjiya huoojea'yo ojjaña jaahuanajji poeje so'o? ¿Achajja shai ohuaya poe majje acaje'yo? —jamaya poa cuana.

¹²Eyacuiñajjiya ma esohui huohuijji cuana jjashahuuba meequei ca poa jama pea'ai ba'a: —Miquianajaya esohui cuanajo ojjaña cuana quijje nei quea bihui nee poaje. Jamatii jjeya miquianajaya maya ba jjima —jamaya yahuajo nei nei poa.

Jjeya Eyacuiñajjiya Edojjoshahua Pame huoojea canaje esohui huohuijji cuana huasijje Jesosa Quitojo huohui meesahuaa miquiana huasijje. Oya

cuanaa esohui huohuijjija esohui, ma yahuajo ba'ya poaja jayojja jama huohui cani. Ma esohui quea pame nee Jesosa Quitojo Eyacuiñajjija esohuidojoji cuana eyajo nequi ba sa poani pea'ai.

¡Eyacuiñajjija esohui jama ba'ecue!

¹³Jamajjeya ijjeya ejjashahuabaquijji quea ja'a jama acue! ¡A'a quea quehua jjashahuabaquijji! Poe o'oya majje Jesosa Quitohua miquianaya ba'e tiitii mee caje'yo eyajo onijje. ¡Jamaya jjashahuaba neineiquicue!

¹⁴¡Eyacuiñajjija esohui cuana jayojja jama atitiicue! Jesosa Quito ba jjimahuajo miquianaya quea mimishi poanaje. ¡Jjeya miquianaya ejjashahuabaquijji quea mimishi yahuajo jama a'a poiji! ¹⁵¡Jjeya ca oe quea pame nee pocue! Eyacuiñajjiya miquianaya iyaa canaje onijje ejjapeequi'yoji. Oya quea pame nee nee. ¡Joya ecua ohuaya quea pame nee acani jamaya oe acue! ¹⁶E'e, Eyacuiñajjija esohui etehue'yo yahuajo nei jama poa ba'a:

“Eya quea pame nee nee poani; je jayojjaya jama quea pame nee nee, quea boejea pea'ai oe pocue!”

Jamaya tehue ca poa yahuajo nei.

¹⁷Eyacuiñajji nijje mimianijo miquianaya jama poani ba'a:
—Eyacuiñajji, miya ecuanaja Chii ai —poani.

¡Bacue oe! Eyacuiñajji oe dejjaja eba'ejjijo jjashahuabaquiani, oya jayojjaya jjashahuabaquiani pea cuanaja eba'ejjijo. E'e, ojjaña shajjama' cuana ohuaya huohui caje jama ba'a: —Miquianaya ca mi ca oe quea mimishi nee nee poanijo quea nee nee poaje'yo tii —acaje.

Quea pame poanijo ca ca eseja jama huohui caje'yo ba'a: —Jamaya quea pame nee, enijje ba'e tiitiije'yo eyajo —Eyacuiñajji poaje.

Jiquio meshijo eseja ba'e tiitii ajja. Jamajjeya jiquio meshijo ba'yanijo ojjaña pojjaeo Eyacuiñajjija esohui jayojja jama acue! ¡Oya shajja'ajjacue! ¹⁸Yahuajo miquianaya ba'e'yonaje etiiquiana cuanaja ehuohui jayojja jama quea mimishi. Oya cuana Moisesija esohui etehue'yo jayojja jama ba'e nishonaje. ¡A'a beijo sosejje mimishi cuana cuijea mee ca'yoji? Chojja. Ejjeshejji, esodojjo quea nahue, mei quea nahue pea'ai quijje pishana sosema' poaje. ¹⁹¡Bacue oe! Jesosa Quitohua miquianajaya mimishi cuana cuijea'yoji sosejje sosequia ca'yonaje. E'e, jiquio ecua ñajjajja esho'i quea pame, tai'ama quecua ca'yaninaje cuaa jayojja jama Jesosa Quito quea pame nee, mimishi'ama quecua ca'yonaje cuaa esejaya mimishi cuijea'yoji. Oja ena' cuayaquinajejo, Eyacuiñajjiya esejaya mimishi cuana cuijea caje'yo. ²⁰Yahuajo nei nei meshi pana jjimahuajo Eyacuiñajji jjashahuabaquinaje quijje nei Jesosa Quito huoojeaje mimishi cuanajo mano'yohua. E'e, Eyacuiñajjiya Jesosa babaca canaje ese jaahuanajji. Jjeya epojja cuana beshahua nei oe poanajejo Jesosa Quito poeyananaje esejaya mimishi cuijea'yohua, quea boejea ba'e mee'yohua pea'ai. ²¹Miquianaya quea boejea acanajejo, jaahuanana canajejo pea'ai Eyacuiñajji miquianajaya eba poaje. Cuanaya Eyacuiñajjiya Jesosa Quito shequi mee ca o'yananje. Ojjaña huoojea'yoji quea

ca'a nee nee po mee ca'yonaje pealai. Jamajjeya jjeya miquianaya Eyacuiñajji
esohui jayojja jama poani. Ohuaya miquianaya jjashahuabaqui mee cani jama
ba'a: —E'e, Eyacuiñajji ecuana ba'e tiitii mee caje'yo onijje eyajo.

²² Jjeya miquianaaya Eyacuiñajji esohui jayojja jama añajo, mimishi
cuana apajea mee ca'yonaje, Eyacuiñajjiya. Edojoshahua Pameya
miquianaya Jesosaja epeejji cuana quea jea nee ameesahua canaje.
Jamajjeya ojjaña Jesosaja epeejji cuana quea jea nee atiitiicue! ²³ Jesosa
Quito miquianajaya mimishi cuanajo mano'yonajejo, Eyacuiñajjiya
miquianaya pea ejjashahuabaquijjijo ba'e mee ca'yani. E'e, miquianaya
quea pame nee ba'e tiitiani pea ejjashahuabaquijjijo, dejjaja bacua
jayojja jama pojjeama. Oya cuana ca'a'ama, oe pojji shequajame ba'yani.
Eba'ejji eyajo ca ca eba'e tiitii'yozzi, oe po ajja. ²⁴ ¡Bacue oe! Eyacuiñajji
esohui etehue'yo yahuajo nei nei jama poa ba'a:

“Ojjaña dejja cuana sipone jama, ca'a'ama. Oe pojji cahuijo sipone
shasha cuana quea pame. Jjeya nei joca'yo majje chama'yo tii
poaje'yo.

²⁵ Esejaya Emeshi Mese neija esohui cuana ca ca quea pame yani tiitije'yo".
Yahuajo nei jamaya poa.

E'e, ma esohui quea pame nee Jesosaja esohui huohuijji cuaa miquiana
huasijje huohui canaje, Jesosaja esohui.

¡Jesosa Quito nijje quea pame nee ba'ecue miquianaya!

2 ¹ ¡Jjeyahua nei ojjaña mimishi cuana pajea neinei'yocue! ¡Onaja
aquiaria a'a jea bajji! ¡A'a jjadasiaquijji pojji, siipojji pealai a'a
pojji! ¡Siajjepojji a'a pojji! ¡A'a pea cuana nijje mimijajiji! ¡A'a epeejji
nisho pojji! ² ¡Eyacuiñajjiya esohui ba neineicue! ¡Jiquio ecua ebacua
esho'liya tojjo quea boti nee, ojjaña pojjajo tojjo ishi neinei cani jayojja
jama Eyacuiñajjiya esohuijjo pocue miquianaya! ¡Ojjaña pojjajo esohui
ba neineicue! ¡Ba majje Jesosa Quitoja epeejji quea ja'a nee pocue!
³ Eyacuiñajjiya esohui yahuajo nei jama poa ba'a: “Quito nijje jjapeequi
majje miquianaaya oya banaje quea pame nee nee poani”.

⁴ ¡Jjapeequicue Jesosa Quito nijje! Oya quea pame nee nee, quea ca'a
nee nee pealai. Beca cuana onijje jjapeequi sa po ajja poa. Oya cuana jama
poanaje ba'a: —Jesosa Quito cajaa. Ecuana onijje jjapeequi sa po ajja.

Eyeacuiñajji ca ca Jesosa Quito quea jea nee neejo jama mimime
poanaje ba'a: —Oya quea pame nee acui ca'a quea ja'a nee jama, equi
yamajjana quea ca'a jama. Ecuea oya quea jea nee nee.

⁵ Equijo acui ca'a eyamajjana cuana nequia cani cuaa. Oya jayojjaya
ojjaña Jesosaja epeejji cuana Eyeacuiñajjiya equi jayojja. ¡Equi yamajjana
quea pame nee jayojja jama pocue! ¡Quea ca'a nee nequicue Jesosa Quitojo!
Jamajjeya ¡Eyeacuiñajji nijje emimijji cuana pealai pocue, miquianaya!
¡Jiquio ecua Jodioja Eyeacuiñajji nijje emimijji cuaa chaco ca poa Eyeacuiñajji

bihuajji jamaya oe acue! ¡Eyacuiñajji chacocue quea pame nee! ¡Jamaya oe acue Jesosa Quito miquianajaya mimishi cuanajo mano'yonajejo!

6 Jamaya Eyacuiñajji esohui Jesosa Quitojo etehue'yo yahuajo poa ba'a:

“Bacue oe! Eyaya oya babacaje enequi tiitii mee'yojjii ecuea cuiñajji Sioni bajjanijo. Oya acui ca'a equi yamajjana quea pame nee, quea ca'a nee pea'ai jayojja jama. Ojjaña joya jjeya nei onijje jjapeequiani quijke yeno'ama poaje”.

Jamaya yahuajo nei poa.

7 E'e, jjeya ojjaña Jesosaja epeejji poanija oya quea jea nee. E'e, Jesosa quea pame nee nee ma equi yamajjana quea ca'a jayojja. Pea cuanaja Jesosa boti'ama, ma equi yamajjana quea ca'a jayojja boti'ama. Jamaya Eyacuiñajji esohui etehue'yo yahuajo nei Jesosa Quitojo poa ba'a:

“Ma equi yamajjana jayojja equi iyajji cuaa cajaa aca poa. Jamatii Eyacuiñajji ma equi yamajjana oe nei quea pame nequi tiitii mee cani, equi jaabicha ajja epoiji”.

8 Jamaya cuanaya pea esohui Jesosa Quitojo etehue'yo poa ba'a:

“Quea huiso cuaa oya ma equi yamajjana jayojja cajaa acaje'yo. E'e, jiquio ecua acuihuojjajo ejiojjije jjaquecuate'aqui majje jaabichajeaquiani jayojja jama poaje ojjaña joya o cajaa ajji poaje'yo”.

Jamaya poa yahuajo. Onaaya Eyacuiñajji esohui Jesosa Quitoja cajaa acani shajja'ajja sa po ajaa jjejojo. Yahuajo nei Eyacuiñajji eba poa jama ba'a:

“Oya cuana ecuea esohui shajja'ajja sa po ajja poaje. Jamaya capo'yahua” poa.

9 Miquianaya ca ca Eyacuiñajji ebabaca ojaya epeejji cuana epoiji, onijje emimiji ojjaña cuanajo. Eyacuiñajji epeejji cuana quea pame nee poanaje miquianaya. E'e, Eyacuiñajji ojjaña emeshi mese cuana huoojeajji poani. Miquianaya babaca ca poa ma ohua huohui ca poa ehuhuojjiji. Jamajjeya miquianaaya huohuiaña jama ba'a: —Eyacuiñajji eseya babaca canaje. Mimishi cuana cuijea ca'yajje eseya ba'e mee cani quea ja'a nee nee, de.

E'e, yahuajo miquianaya ba'ya poa quea mimishi. Jjeya ca chojja. **10** Yahuajo Eyacuiñajji epeejji pojjeama poa. Jjeya ca ca miquianaya ojaya epeejji cuana poanaje. Yahuajo mi jaahuanajji chama' poa Eyacuiñajji miquianajaya boti'amajojo. Jjeya ca ca Eyacuiñajji miquianaya jaahuanajaya cani quea pame nee. Onijje jjapeequianijo, miquianajaya Emeshi Mese nei oya poani.

Eyacuiñajji echacojji poanijo miquianaya jama ba'ecue ba'a:

11 Ecuea epeejji cuana, jshajja'ajjacue mo! Miquianaya ca ca pea, ojjaña quea mimishi ojjaña meshi cuanajo ba'e jayojja jama pojjeama. Miquianajaya meshi eyajo yani. Jiquio meshijo ani tiitii ajja. Jamajjeya ja'a quea mimishi ba'ejjji! Mimishi cuana amajje miquianaya quea tai nequi tiitii'yo chana'. **12** Jesosaja epeejji pojjeamaa miquianajaya eba'e pame ba neinei cani. Jamajjeya jquea pame nee atiitiicue! Oya cuana miquianajo siajje poani jama ba'a: —Jesosaja epeejji cuana quea mimishi.

Jamatii miquianajaya eba'eiji quea pame nee ba majje ma dejja cuanaa huohui caje Jesosa Quito poe o'oyajo jama ba'a: —Eyacuiñajjiya ojaya epeejji cuana quea pame ameesahua ca'yonaje —poaje ojjaña.

¡Miquianaja emeshi meseja esohui shajja'ajjacue!

¹³Epeejji cuana, ¡miquianaaya Jesosaja epeejji poanijo emeshi mese cuaa huohui cani jayojja jama acue! Jamajjeya miquiana ba majje Jesosa Quito niñeba ajja poaje. E'e, pea cuanaja emeshi mese ehuoojeajji pojjeama. Jamajjeya joya shajja'ajjacue! ¹⁴Emeshi meseya ojaya echacojji cuana huoojea cani ojjaña jaahuanaa. Jamajjeya oya cuana poeyani mimishi cuana napaa. Ojjaña quea pame poani nijje ca ca quea bihui nee poani. ¹⁵Miquianaaya quea pame nee añajoya, shajjama' cuana esohui e'e nei pojjeama huohui pajea caje'yo. Jamaya Eyacuiñajji sa poani.

¹⁶Yahuajo miquianaaya mimishi cuana a'yonaje,eme jeyo'yo jayojja jama poanaje. Jjeya ca ca Jesosa Quitohua ejeyo'yo jaa pichojea ca'yani jayojja jama amee cani. Jamatii, ja'a jama pojji ba'a: —Jesosaa eya epichojea'yo jayojja jama po mee ca'yani. Jamajjeya jeyaya jamatii mimishi ca'a majamaja'yahu! —a'a jamaya pojji! ¡Eyacuiñajjiya echacojji quea pame cuana pocue! ¹⁷¡Pea cuanajo a'a maimaijji! ¡Ojjaña Jesosaja epeejji cuana quea boti nee acue! ¡Eyacuiñajjiya esohui jama acue quea bihui nee! ¡Miquea emeshi meseya huohui canijo shajja'ajjacue pea'ai!

**Jesosa Quito quea nee nee poanaje jamatii oja Chiija esohui
jayojja jama poanaje ¡Jesosa jayojja jama pocue!**

¹⁸¡Bacue! ¡Mique emeshi meseja esohui shajja'ajjacue quea bihui nee! ¡Miquianajaya emeshi mese quea pameja esohui jayojja jama pocue! ¡Miquianajaya emeshi mese quea tecueja esohui jayojja jama acue peal'ai! ¹⁹Miquianaaya quea pame chacoajo, e'e pojja'a echacomeejji quea tecue miquiana nijje poani. Jamatii ¡Eyacuiñajjiya esohui ba majje quea bei pocue! Jamaya quea pame. ²⁰Quea pame nee chacochacoajo, miquianajaya emeshi meseya miquianaya quea yeno po mee caje'yo pojja'a. Jamatii Eyacuiñajjiya miquianajo huohui caje jama ba'a: —Miquianaya ecuea epeejji cuana quea pame.

Quea tai miquiaa chacome ajo ca ca miquianajaya emeshi meseya napa caje. Jamatii ¡catecuea cahua quea tai miquiaa chaconajejoya!

²¹Jesosa Quito esejaya mimishijo quea nee nee poanaje. Jamajjeya Eyacuiñajjiya eseaya huohui cani jama ba'a: —¡Jesosa Quito jayojja jama pocue! Oya quenequene cuaji ajja poa. Quea bei nee. ¡Jamaya pocue miquianaya!

²²Yahuajo nei esohui huohuijjiya esohui tehue ca poa Jesosajo jama ba'a: "Oya mimishi'ama. Oya siajjepoiji pojjeama peal'ai". ²³Pea cuana Jesosa Quito nijje mimijajiao, onijje mimijaji ajja Jesosa poa. Onaaya Jesosa Quito napa canaje. Jamatii oya tecueajea jjima. Chojja: —Ecue Chii, oya cuana ca enijje quea mase poanijo, ¡cajaa a'yocue! —jamaya ajjima Jesosaja.

Jama ca ca oe poanaje ba'a: —Ecue Chii, miya quea tame nee. Dejja cuana quea mimishi poani ba majje oya cuana quea nee po meeje'yo quijje, miyaya —Jesosa poanaje.

²⁴ ¡Jamaya capo'yahua! Jesosa Quito eseja mimishi cuanajo mano'yonaje acui ecueata'apeejo. Oya quea nee poanaje eseja mimishi cuijea'yojji. Jamajjeya eseya mimishi pajea mee ca'yani. Cuanaya ojo eseya Eyacuiñajjiya esohui jayojja jama po tiitii mee caje'yo quea tame nee. Jesosa Quito cuiasejjajea canaje cuaa ejee ejeapashajjajaa. Quecua ca'yonaje. Ma ecuiasejjajo, equecua'yojo pealai eseya quea boejea po mee canaje Jesosaa. ²⁵ Yahuajo miquianaya ñajajja oe nei ecuaquisho'yo jayojja jama poanaje. Jjeya Jesosa Quito ñajajja cuiñajji jayojja jamaa miquianaya sa'ajja'yo majje jjeshe ca'yonaje ejaaahuanajji.

¡Yahue, ehuanase cuana pea'ai, ba'ecue quea tame!

3 ¹Eyaya epona cuana jama aña ba'a: ¡Quea tame nee ba'ecue! Ehuanase cuana, ¡miquianajaya yahue cuana shajja'ajjacue! E'e pojja'a miquea yahue Jesosaja epeejji pojjeama. ¡Jamatii ohua huohui cani jayojja jama acue! Jamajjeya miya quea tame ba'yani ba majje miquea yahue Jesosaja epeejji poaje'yo jamatii, Jesosajo huohui majamaja jjima. ²E'e, miya quea tame poanijo, miyaya oya shajja'ajjañajo pealai, yahue Jesosaja epeejji poaje pojja'a. ³A'a jjashahuabiquiji jama ba'a: —Eya aquiana quea tame huoshoyo majje quea tame poaje. Eyijiji quea tame yiije. Daqui quea nahue huoshoe. Ecuea sao ao ijjiaca'a meeje quea tame. Jamajjeya eya quea tame nee poaje.

⁴ Chojja. Quea ja'a nee jjashahuabiquianijo, mimishi'ama poani pea'aijo miquianaya quea tame nee poaje. Jamaya Eyacuiñajjiya quea boti nee nee. Jamajjeya ¡quea bei, tecue'ama, quea tame nee pea'ai pocue! ⁵E'e, yahuajo nei epona cuana Eyacuiñajjiya epeejji poanijo ojaya esohui jayojja jama poa. Yahueja esohui shajja'ajja ca poa pea'ai. Jamajjeya ma epona cuana yahueja quea boti nee nee poa. ⁶Yahuajo nei epona Sana bajjani quea tame nee poa. Ojahueya Amajamaa huohui cani jayojjaya jama aca poa, Sanaa. Ojahue nijje jama poa ba'a: —Miya ecueahue, e huoojeajji.

Epona cuana, ¡miquianaya quea tame nee po sa poanijo Sana jayojja jama pocue quea tame nee! ¡Jesosa nijje jjapeequicue mete'ama nei pea'ai!

⁷ Yahue cuana, ¡shajja'ajjacue mo pea'ai! Epona cuana ca'a'ama pishanajo, jehuanase cuana jaahuanacue quea tame nee! Eyacuiñajjiya yahue cuana, ehuanase cuana pea'ai ba'e tiitii mee caje'yo eyajo. Jamajjeya ¡ehuanase cuana quea boti nee acue! Jamaya poanijo, Eyacuiñajjiya shajja'ajja caje miquiana onijje mimianijo.

Pea cuaa Jesosaja epeejji napa caje pojja'a

⁸ ¡Jjeya pea esohui shajja'ajjacue! ¡Ojjaña miquianaya Eyacuiñajjiya esohui jayojja jama pea nijje jjapeequicue! ¡Ojjaña Jesosaja epeejji cuana quea jea nee acue! ¡Huapa pojjeama jayojja acue! ¡Quea bei pocue ojjaña cuana nijje;

tecue'ama pocue! ⁹¡Pea cuana miquiana nijje quea mase poanijo, a'l onije quea mase po pea'ajji! ¡Minijje mimijajianijo, a'l ona nijje mimijajiji pea'ai! Chojja. ¡Quea pame nee pocue! Jamaya Eyacuiñajjiya miquianaya huoojea canaje. Miquianaya iyaa canaje quea bihui nee epoiji. Jamajjeya ¡pea cuana nijje quea pame nee pocue! ¹⁰Eyacuiñajjiya esohui etehue'yo yahuajo nei jama poa ba'a:

“Quea pame ba'e sa poanijo, quea bihui nee ba'e sa poanijo pea'ai
¡esohui quea mimishi epoiji a'l huohuijji! ¡A'a siajje pojji!

¹¹ ¡Mimishi pajea'yo majje quea pame nee oe atiiicue! ¡Pea cuana nijje quea bei po tii tiicue pea'ai! ¹²Eyacuiñajjiya esohui cuana jayojja jama quea pame añajo, ohuaya miquianaya jaahuanana cani quea pame nee. Cuanaya ohuaya miquianaya shajja'ajja caje'yo onije mimianijo. Ojjaña quea mimishi poani ca ca Eyacuiñajjiya tecuea caje'yo”.

Jamaya yahuajo nei tehue mee ca poa Eyacuiñajjiya.

¹³ ¿A'a miquianaya napa caje cuaa miquiaaya quea pame nee atiiiañajo?
¹⁴ E'e pojja'a. Jamatii Eyacuiñajjiya miquianaya quea bihui nee po mee caje. Jamajjeya ja'a quea mete pojji! ¡A'a quea yeno pojji pea'ai! Quea bei jjashahuabaquicue jama ba'a: ¹⁵—Jesosa Quito quea pame nee poanaje; eya ojaya ehuohui jayojja jama poaje. Oya oe nei ecuea Emeshi Mese nei yani.

E'e pojja'a miquianaya huohui'ajja caje cuaa jama ba'a: —¿Yajjajje acuae miya quea bihui nee jjashahuabaquiani so'o Eyacuiñajjiya miya ba'e tiitii mee caje'yo?

Jamaya acajje ¡huohuicue miquianajaya ejjashahuabaquiji quea pame nee Jesosa Quitojo! ¹⁶¡Quea bei nee oe huohuicue, tecue'ama! E'e, ¡Jesosaja epeeiji poanijo ba'ecue quea pame nee! Jamajjeya miquianaya bicho'ama poaje pea cuaa niñebe cajje. E'e, miquianaya quea pame nee ba'yanijo, oya cuana quea bicho poaje mi niñebe majje. ¹⁷Miquiaa quea pame añajo, pea cuaa pojja'a nequiana napa caje. ¡Jamatii quea pame pocue! E'e pojja'a jamaya Eyacuiñajji miquianajo jjashahuabaquiani. Quea mimishi poanijo, pea cuaa miya cuia caje. ¡Jamaya ca'a cahua cuaa ca mimishi cuana! Jamajjeya ja'a quea mimishi pojji!

Shequi'yo majje Jesosaa ma yahuajo mano'yo cuana nequica huasijje sohuihuohuiqui canaje

¹⁸ ¡Bacue! Jesosa Quito mimishi'ama nei nei. Jamatii oya mano'yonaje mimishi cuana cuijea mee'yojji. Apoa aje mimishi cuijea ca'yonaje. Ohuaya miquianaya Eyacuiñajjiya epeeiji cuana po mee ca'yonaje. Oya Jesosa mano'yajo Edojoshahua Pameya oya shequi mee ca'yonaje. ¹⁹E'e, Jesosa Quito jjani yasijje ejeanobia jaajo ojaya edojoshahua poquinaje ma yahuajo mano'yo cuana nequica huasijje esohui huohuiya jama ba'a: —E'e, iña mano'yonaje mimishi cuijea'yojji, apoa anaje —aca poa.

Ma yahuajo nei mano'yo cuana poqui mee jjima poa eyahuasijje; ejeanobia jaa jayojja poa. ²⁰Yahuajo nei mano'yo cuana Eyacuiñajji

shajja'ajja sa po ajja poa. Noeya bishe ai quecua canijo, Eyacuiñajjiya shajjama' cuana ishoa'ajja ca'ya poa quea huiso shequijameache shono ohua mimishi pajea caje'yo ebajji nisho. Jamatii oe pojji cuana, me oeijke pea beca peejjima huisome, 8 huisome bishe ai yasijje dobiqui majje hui'i'yo jjima poa johuijo. Johuiya oya cuana bishejo ba'e jeajjee ca'ya poa quea pame nee.

²¹ ¡Bacue! Johui yahuajo nei poa jjeya ca jiquio jama ba'a: Jjeya oe dejjaaa pea cuana Eyacuiñajjiyo besa mee cani enajo. E'e, jiquio ecua dejja bishe ai dojjojo ani cuana johuiya jeajjee ca poa jayojjaya jama jjeya oe dejjaaa pea cuana Eyacuiñajjiyo besa mee cani Edojoshahua Pame ona que dobiqui'yajo. Jamajjeya ba'e tiitii mee cani Jesosa Quito nijje. Ena huasijje iñajeanobia cajje jamatii meshi topo caje. Mimishi cuana ca ca etopojeajji pojjeama. Jamajjeya Eyacuiñajji nijje e'e jojo nei mimiajo, ohuaya esejaya mimishi cuana cuijea ca'yajje pea jjashahuabaquiime po mee ca'yani. Jamaya Eyacuiñajjiya acaje'yo Jesosa Quito ma emano'yojaa shequi mee ca o'oya poajojoya. ²²Jjeya nei Jesosa Quito eyajo Eyacuiñajjiya ebianeimijije e'anioque ani. Ohuaya ojjaña Eyacuiñajjiya esohuidojiji cuana, esohuidojiji huoojeajji poani pealai huoojea cani quea pame nee ameeya. Ojjaña eshahua cuana quea mete poani Jesosa Quitohua tecuea cajje.

¡Pea jjashahuabaqui'yome pocue!

4 ¹Jamajjeya Jesosa Quito jiquio meshijo nequi quea nee nee poanaje. Dejjaaa oya napa canaje Eyacuiñajjiya esohui huohuijijo. ¡Miquianaya Jesosa Quito jama pocue! Eyacuiñajjiya esohui huohuijijo. quea nee poaje pojja'a. Jamatii quea nee poanijo ¡Jesosaja epeejji quea ca'a pocue, mimishi'ama! ²Jamajjeya ¡Jesosaja epeejji quea ca'a nee poaniya ojjaña ejjashahuabaqui'yojji quea tai pajea'youc! ¡Eyacuiñajjiya ejjashahuabaquijji jayojja jama ba'e tiitiicue quea pame nee! ³Yahuajo nei quea huiso shequijajo miquianaya quea mimishi ba'e'yonaje. Eshahuaja epeejji cuana jayojja ojjaña mimishi atiiti'yonaje, miquianaaya. Ejjashahuabaquijji quea mimishi nee nee poanaje. Ehuoo jaa tiitiinaje pealai. Ojee quea shajjaquijjo ijija'ijjianaje quea mimishi jjejojo. Ojee ishi'ishi tiitiinaje pealai. Eyacuiñajji nisho pealai miquianaaya bihuia majamajanaje. Eshahua nijje miminaje pealai. Jamaya quea tai nee nee miquianaaya atiitiinaje yahuajo nei nei. ⁴Jjeya ca ca miquea epeejji quea mimishi nijje jjapeequi'yo ajja onije quea mimishi epojji. Jamajjeya oya cuana miquiana nijje quea tecue poani. Miquianaya niñeba cani pealai onije mi jjapeequiyo. ⁵Jamatii. Quijje ma dejja mimishi cuana Eyacuiñajjiya o cojja neijo nequi mee caje ojaya mimishijo huohui epojji. Majoya quea nee nee po mee caje'yo tii tii. Ojjaña etiiquiana mimishi yahuajo mano'yo cuana quea nee nee po mee caje'yo, ojjaña jjeya quea mimishi poani quea nee nee po mee caje'yo pealai, Eyacuiñajjiya. ⁶Jamajoya Eyacuiñajjiya esohui quea pame nee Jesosa Quitojo huohui mee ca'yonaje ojjaña yahuajo nei

ba'ya poa huasijje mano'yo jjimahua. Jamajjeya mano'yajo, oya cuana ba'e tiitii mee ca'yonaje quea pame nee eyajo onijje. Jamatii ojjaña ma etiiquiana cuana mano'yonaje dejja quea pame, dejja quea mimishi pea'ai.

Eyacuiñajjiya ojjaña quea pame nee asahua cani

⁷E'e, Jesosa Quitoja epoe o'oyajji beshahua nei apoa. Jamajjeya ijashahuabaquicue quea ja'a nee! ¡Ojaya esohui jama ba'ecue Eyacuiñajji nijje emimiji bicho'ama! ⁸¡Jiquio esohui shajja'ajja neineicue! ¡Ojjaña Jesosaja epeejji cuana quea jea nee nee acue! ¡Pea cuana quea jea nee poanijo onaja mimishi cuana pajea'yocue quene'ama! ⁹Jesosaja epeejji cuana poe'yajo, ijjequinobiacue quea bihui neeya miquea equi yasijje aniya! ¹⁰Eyacuiñajjiya ojjaña ojaya epeejji quea pame chaco meesahua cani ojo. Ojjaña ojaya epeejji pea jayojja jama chaco ajja. Peapea chacome ameesahua cani ojo ojjaña quea bihui nee eba'e meejjji. ¡Ohuaya miquiana chaco meesahua canijo, ojjaña cuana quea bihui nee ba'e meesahuacue! Jama acue ba'a: ¹¹Esohui huohui sa po majje ¡Eyacuiñajjiya esohui huohuicue! Pea cuana ba'e meesahua sa po majje ¡ba'e meesahuacue Eyacuiñajjiya miquiana ba'e meesahua canijo! Jamajjeya ojaya epeejji cuana quea pame nee poanijo ojjaña cuaa Eyacuiñajji bihuia caje: —E'e, Jesosa Quitohua esejaya mimishi cuana cuijea ca'yajo, quea pame nee onijje chacockacoani —jamaya oya cabihuia tiitii cahua. ¡Oya ojjaña Emeshi Mese quea ca'a nee capo tiitii'yahua pea'ai! ¡Jamaya capoahua!

Pea cuaa Jesosaja epeejji cuana napa caje

¹²Ecuea epeejji cuana, ¡shajja'ajjacue mo! ¡A'a quea yeno pojji pea cuaa miquianaya janobajjima napa canijo! A'a jjashahuabaquijji jama ba'a: —Eya ee nei quea nee poani Jesosa Quito nijje jjapeequianijo.

Chojja, pea cuaa napa cani quea huiso Jesosaja epeejji cuana. ¹³Jamajjeya onaa napa cajje ja'a quea yeno pojji! ¡Quea bihui nee pocue Jesosa Quito yahuajo nei onaa aca poa jayojjaya jamaya miquianaya acani jjeya! Onaa napa cajje Jesosa quea nee poanaje pea'ai. E'e, miquianaya jjeya quea nee o jayojjaya poanijo quijje quea bihui nee poaje Jesosa Quito quea pame nee nee, quea ca'a nee nee poe o'oyajo. ¹⁴Jesosaja epeejji poanijo, pea cuana minijje mimijaijajo ¡jamatii quea bihui pocue! E'e de, Edojoshahua Pame quea ca'a nee miquiana nijje nequi quea bihui nee miquiana po meejjji. ¹⁵¡A'a quea mimishi pojji; a'a pea quecuajji; a'a sijji; a'a pea niñebajji pea'ai! ¡A'a jamaya pojji! Jamatii jamaya quea mimishi poanijo aje mi oe dejja etii cuaa napa caje. Quea nee nee po mee caje. ¹⁶Jesosa Quitoja epeejji poanijo ca ca oe pea cuaa miquianaya napa cajje ¡jamatii a'a quea bicho pojji! ¡Eyacuiñajji bihuiaque jama ba'a: —Eyacuiñajji, eya quea bihui nee Jesosa Quitoja epeejji poanjeama jayojja jama ba'ejji quea mimishi! ¡Bacue oe! Jjeya apoa. Jesosa Quito poeje'yo ojjaña cuanaja eba'ejjijo

huohuiya. Ojjaña joya quea ja'a nee ba'yani quea pame nee acaje poe'yo majje. Ojjaña quea mimishi poani aje oe quea nee nee po mee caje'yo. Ebionei Jesosa Quitohua ojaya epeejji cuanaja eba'ejji cuanajo huohui caje. Majoya ojaya epeejji pojjeama quea mimishi nee tecuea caje. Ojaya epeejji quea mimishi tecuea cajo, jache sohui tecue nei neiya huohui caje ojaya epeejji pojjeama! Tecuea neinei caje'yo. ¹⁸E'e, Eyacuiñajjiya esohui etehue'yo jama poa ba'a:

“Quea camaja nee Quitoja epeejji neija mimishi cuijea'yojji,
eyahuasijje edobiqui mee'yojji pea'ai. Jamajjeya Quitoja epeejji
pojjeama, dejja quea mimishi pea'ai ¿yajja shai poaje? ¡Eyahuasijje
edobiqui mee'yojji pojjeama ca coma, del!”

¹⁹Jamajjeya dejja mimishiya eseya Jesosaja epeejji cuana napa cajo onijke jjapeequianijo ¡jamati Eyacuiñajjiya esohui a'a pajea'yojji! Jamaya Eyacuiñajjiya ejjashahuabaqui'yojji. Jamajjeya ¡quea pame nee nee atiitiicue! E'e, Eyacuiñajjiya eseya pana ca'yá poa. Ojaya esohui jayojja jama acaje'yo e'e jojo nei, epajea'yojji pojjeama Eyacuiñajjiya.

Penoja esohui etehue'yo Jesosaja epeejji jaahuanajji cuana huasijje

5 ¹Jjeya eyaya Jesosaja epeejji jaahuanajji cuana huohuaña. Eya ca iña Jesosaja epeejji cuana jaahuanajji pea'ai. Yahuajo pea cuaa Jesosa Quito cuia caqui eyaya oya ba poa. Jesosa Quito poe o'oyajo, eya o jayojja quea pame nee, quea ca'a nee nee poaje'yo. Jamajjeya eyaya tehueña jama ba'a: ²¡Miquianaaya Jesosa Quitoja epeejji cuana jaahuanajji poaniya oya cuana jaahuanacue quea pame nee! Eyacuiñajjiya miquianaya huoojea canaje ojaya epeejji cuana jaahuanajji. Jamajjeya ¡quea bihui nee oya cuana jaahuanacue, tecue'ama! Jesosa Quito miquianajaya quea jea nee neejo ¡ojo chacocue quea bihui nee, ejjeshejji quea huiso sa poanijo pojjeama! Eyacuiñajjiya miquianaya huoojea ca'yonaje ojaya epeejji jaahuanajji. ³Jamajjeya jo huoojea'yojji quea tecue jama jayojja a'a pojji! Jamajjeya Jesosaja epeejji cuaa miquiana ba majje quea pame atiitii caje pea'ai; miquiana jayojjaya poaje. ⁴E'e, Jesosa Quito ojaya epeejji cuana jaahuanajji huoojeajji poani. Jamajjeya poe o'oya majje ohuaya eseya o jayojja quea pame nee, quea ca'a nee po mee caje'yo.

⁵Cuanaya Jesosaja epeejji jjeya nei onijke jjapeequiani cuana eyaya huohuaña jama ba'a: ¡Jesosaja epeejji jaahuanajji cuana shajja'ajjacue! ¡Quea bei pocue! Yahuajo nei Eyacuiñajjiya esohui etehue'yo jama poa ba'a:

“Beca cuana quea ca'a poso jjabaquianijo Eyacuiñajjiya oya cuana ba cani quea mimishi. Jamajjeya ohuaya oya cuana jeabichajea caje'yo. Pea quea bei poani ca ca jaahuanajji quea caje'yo, Eyacuiñajjiya”.

Jamaya yahuajo nei poa. ⁶Jamajjeya ¡Eyacuiñajjiya ejjashahuabaquijji jayojja jama acue quea bei nee! Oya quea ca'a nee enequi tii tii.

Jamajjeya quijje ohua apoa acajje miquianaya ona jaahuanajji quea ja'a nee po mee caje'yo. ⁷Jjeya oya jjashahuabaquianijo miquiana jaahuanajji.

Jamajjeya mete'ama jjashahuabaquicue ojo jama ba'a: —E'e jojo nei
Eyacuiñajjiya eya jaahuana caje'yo.

⁸ ¡Quea jjashahuabaqui ja'a nee pocue! ¡Ojjaña ba neineicue!
Edosiquiana quea mase poqui tiitiiani ojjaña dasiaa. Jiquio ecua ibia
quea mase po ayequiani aquiana sa'ajja jayojja jama Edosiquiaa eseya
sa'ajja cani edasijji. ⁹E'e, miquianajaya eba Jesosaja epeejji cuana
ojjaña meshijo ba'e Edosiquiaa napa mee cajje quea nee poani miquiana
jama. Jamajjeya ¡Jesosaja epeejji quea ca'a nee pocue! ¡Ojaya esohui a'a
pajea'yojji! ¹⁰E'e, oe pojji cahuime miquianaya quea nee poaje Jesosa
Quito nijje jjapeequianijo. Jamatii miquianaya ojaya epeejji cuana quea
ja'a nee po mee caje'yo. Ohuaya miquianaya quea ca'a nee nee po mee
caje'yo. Ojaya esohui cuana jayojja jama ba'e tiitii meesahua caje pe'a'i.
E'e de, Eyacuiñajjiya, ese jaahuanajjiya miquianaya babaca ca'ya poa.
Miquianaya Jesosa Quito nijje jjapeequianijo, o jayojjaya quea ca'a nee,
quea pame nee nee po tiitii mee caje'yo.

¹¹ ¡Eyacuiñajji ojjaña huoojea'yojji oe nei quea ca'a nee nee po tiitiiani!
¡Jamaya capoahua!

Penohua quea bei tehue cani Jesosaja epeejji cuana huasijje

¹² Ecuea epeejji Simano bajjani enijje nequi. Ecuea eba oya Jesosa
nijje jjapeequiani quea pame nee. Ohuaya jiquio esohui etehue'yo biso
nei tehue meesahua cani. Ecuaaya miquiana que tehueaña quea ja'a nee,
quea bihui nee nee pe'a'i ejjapeequi meesahuajji. Ecuea eba e'e jojo nei
Eyacuiñajjiya miquianaya quea pame jaahuana cani. Jamajjeya ¡onijje
jjapee tiitiiquicue!

¹³ Jesosaja epeejji cuana jiquiojo, Babenonia cuiñajji jayojjajo ba'e
Eyacuiñajjiya babaca ca'yonaje ojaya epeejji nei epojji, miquiana
jayojjaya. Oya cuana, Macoso ma ecuea ebacua ejja jayojja pe'a'i
miquianajo jjashahuabaquian. —¿Achajja ami ani so'o? —ohuaya
huohui'ajja mee cani.

¹⁴ ¡Ojjaña Jesosaja epeejji cuana jomajo ba'e nijje quea bei nee mimi
tiitiicue! Onijje jjapeequianijo, ¡Jesosa Quitoqua miquianaya quea ja'a
nee cabae' meesahua cahua!

Eyaya, Peno bajjaniya jiquio esohui tehue'yonaje. Mahuiso. Apoa.

PENOJA ETEHUE'YO BECANEJJIIJJI PEA'AI

2 PEDRO

Penohua tehue ca o'oyanaje Jesosaja epeejji cuana huasijje

1 ¹Eyaya Simohui Peno bajjaniya miquiana huasijje tehueña. Eya Jesosa Quitoja esohui huohui ayequijji poani. Ohuaya eya huoojea ca'yonaje ojaya esohui huohuiya. Oya Jesosa Quito e'e jojo nei Eyacuiñajji, esejaya mimishi cuijea'yojji poani. Quea pame nee nee ojaya esohui. Ohuaya miquianaya ojaya esohui cuana jayojja jama ameesahua cani. Mimishi cuana cuijea ca'yajje ohuaya ecuanaya, miquianaya pealai quea boejea po mee ca'yonaje. ²E'e, Eyacuiñajji, esejaya Emeshi Mese nei Jesosa Quito pea'ai miquianajaya eba nei nei. Jamajjeya johuaya miquianaya cajaahuana cahua quea pame nee! ¡Quea bei nee capo mee cahua pea'ai!

Eyacuiñajjiya eseya babaca'yо majje iyaa canaje

³E'e, Jesosa quea ca'a nee ba majje ohuaya eseya ojaya esohui jayojja jama ba'e meesahua cani quea pame nee. Eseya iyaa ca'yonaje ojaya epeejji nei epo meeiji, o jayojja jama epojji. Quea ca'a nee, quea pame nee nee po mee cani pea'ai. ⁴Jamajjeya ohuaya eseya iyaa majje huohui canaje jama ba'a: —Miquianaya e jayojja quea pame nee poaje e jayojja quea ca'a nee epo'yojji —aca poa.

Jamajoya Eyacuiñajjiya ejashahuabaqui'yojji jayojja jama jjashahuubaqui'yome poaje'yo. Esejaya ejashahuabaqui'yojji quea mimishi, quea tai pea'ai pajea mee caje'yo. E'e, eseya pea quea mimishi jayojja pojjeama.

⁵Jamajjeya miquianaya Jesosa Quito nijje jjapeequianijo ¡quea pame ba'ecue! ¡Eyacuiñajjiya esohui cuana ba neineicue pea'ai! ⁶¡Quea ja'a nee jjashahuubaquicue! ¡Jesosa nijje jjapee titiiquicue! ¡A'a onaa napa cani jjabaquijji! ¡Eyacuiñajjiya ejashahuubaquijji jayojja jama jjashahuuba titiiquicue! ⁷¡Eyacuiñajjiya epeejji cuana jaahuanacue quea pame nee! ¡Ojjaña quea jea nee nee acue pea'ai! E'e, ¡quea boti nee acue! ⁸Jamajjeya miquiaaya jamaya atitiiañajo Emeshi Mese Jesosa

Quitoja echacojji quea ja'a nee nee poaje, oya miquea eba poanijo. ¡Jesosa Quitoja esohui jama acue peal'ai! ⁹Ojjaña jiquio esohui jama a'laja aje oe cojjama' jayojja de, quea cojja jama jayojja poani. Quea jjashahuabaquí ja'a pojjeama. Jamajjeya pajeja ca'yani ma Jesosa Quitoja yahuajo ojaya mimishi cuana cuijea ca'yonaje.

¹⁰Jamajjeya epeejji cuana, ¡quea ja'a nee po titiicue Jesosa Quitoja epeejji poanijo! Eyacuiñajjiya yahuajo miquianaya iyaa ca'ya poa quea ja'a nee eba'e'yoiji. Cuanaya oya yahuajo jjashahuabaquinaje jama ba'a: —Miquianaya ecuea epeejji nei poaje'yo.

Jamajjeya miquianaya Eyacuiñajjiyo quea pame nee atiitiañajo quea mimishi epo o'oyajji pojjeama. ¹¹Eyacuiñajjiya miquianaya dobiqui mee caje'yo ojaya cuiñajji eyacula huasijje quea bihui nee. Ma cuiñajjiyo Emeshi Mese Jesosa Quito ojjaña huoojea'yoiji oe nei poaje'yo tii. Ohuaya miquianaya onijje ba'e tiitii mee caje'yo.

Penohua esohui e'e nei huohui ca o'oyanaje

¹²Jiquio esohui e'e nei miquianajaya eba. Jamaya quea bihui nee atiitiañajo quea pame nee poani. Jamatii eyaya maya huohui majamajaña. Jamajjeya miquianaaya pajea'yo aija esohui e'e nei. ¹³Jiquio meshijo eshe nequiya jjeyea nei eyaya miquianaya jjashahuabaquí tiitii meeje'yo ma esohui cuanajo. Jamaya quea pame miquianajo. ¹⁴E'e, esejaya Emeshi Mese neiya, Jesosa Quitoja yahuajo pishana eya huohui canaje jama ba'a: —Peno, quijje pishana miya manoje'yo.

¹⁵Jamajjeya jjeyahua nei eyaya miquiana huasijje esohui e'e nei huohui majamajaña miquianajaya epajea'yoiji pojjeama e mano'yajo.

Jesosa Quito jiquio meshijo nequi Penohua ba ca poa

¹⁶Ecuaaya miquianaya huohuinaje Jesosa Quitoja epoe o'oyajjiyo. Oya quea ca'a nee nee poeje'yo, Emeshi Mese nei poani. Ecuaaya oya Eyacuiñajjiya Ebacua Ejja banaje ecojja. Jamajjeya ecuanajaya esohui e'e nei ojo, etiiquianaja esohui yahuajo jayojja jama pojjeama; ojaya yahuajo ba jjimajo ca ca esohui e'e nei pojjeama. ¹⁷E'e, eseja Chii ai Eyacuiñajji eyajo ani Jesosa Quito nijje miminaje quea pame nee nee. Jesosa Quito oe nei quea ca'a nee nee poanijo miminaje Eyacuiñajji. E'e, Jesosa Quito nijje nequiya eyaya Huani nijje, Jacobo nijje nequiya pea'ai shajja'ajjanaje Eyacuiñajji eyajo quea ja'a nee Jesosa nijje mimiani. Jama poanaje ba'a: —Jesosa ecuea Ebacua Ejja oe nei quea pame nee. Oya ecuea quea jea nee nee. Ohuaya ecuea ejjashahuabaquijji jayojja jama acani —Eyacuiñajji poanaje.

¹⁸Eyacuiñajjiya ma esohui cuana eyajo huohui canijo, ecuaaya shajja'ajjanaje Jesosa nijje eyiyo biajje nequiya. Eyiyojo Eyacuiñajji shajja'ajja majje ecuana jjashahuabaquinaje jama ba'a: —Eyacuiñajji eyiyojo miminaje e'e jojo nei. Jamaya quea pame.

¹⁹Jamajjeya ecuanaja esohui Jesosa Quitoja epoe o'oyajjiyo baña quea ja'a nee. Eyacuiñajjiya esohui huohuijji cuanaja esohui yahuajo e'e nei poa.

Jamajjeya ;shajja'ajjacue! Ma esohui yahuajo nei cuaquijiji jayojja jama poa. Jiquio ecua cuaquijijiya mecajje quea apo neejo jeaja'a cani jayojja jama jiquio esohui e'e neiya miquianaya Jesosa ba meesahua caje, jamatii esohui e'e nei pojjeama huohui cani cuaa quea huiso. Miquianaya Jesosaja poe o'oyajjijo quea ja'a nee baje ma esohui e'e nei ba neinei majje. Jamatii Jesosaja epoe o'oyajji ca ca jiquio ecua eshequi huiyelji jaasohua majje ja'a;aja'a pojebeani jama jjashahuabaqui meemeya se acaje Jesosas.

²⁰ ;Ba neineicue jiquio esohui! Eyacuiñajjiya esohui huohuijji yahuajo nei ba'eca poa esohui tehue mee ca poa. Ma esohui cuana onajaya ejjashahuabaquijji pojjeama, Eyacuiñajjiya ejjashahuabaquijji. ²¹E'e, yahuajo nei dejja cuanaja Eyacuiñajjiya esohui jamatii tehue jjima. Onajaya ejjashahuabaquijji huohui jjima pea'ai. Chojja. Edojjoshahua Pameya Eyacuiñajjiya epeejji quea pame nee cuana ojaya esohui huohui meesahua cal'ya poa.

Esohui huohuijji nisho cuana siajje poani Eyacuiñajjiya esohuijo

2 ¹Yahuajo nei Eyacuiñajjiya esohui huohuijji nisho cuana siajje poa pea cuana huasijje. Jjeyhua nei pea esohui huohuijji nisho cuana miquiana que siajje poaje Eyacuiñajjiya esohuijo. Ohua siajje acajje dejja cuana poquiquehua chana' cu aqui yasijje. Esejaya Emeshi Mese nei, Jesosa onaja mimishi cuanajo mano'yonaje. Jamatii oja sohui siajje acanijo esohui huohuijji nishohua Jesosa cajaa acani. Jamajjeya Eyacuiñajjiya oya cuana quea nee nee po mee caje'yo, ojjaña esohui huohuijji nisho. ²Ona siajje poanijo, quea huiso dejja cuana quea mimishi nee poaje o jayojjaya. Jamajoya esohui huohuijji nisho cuana siajje poani jojoya pea cuana Jesosaja esohui cuanajo mimijajje'yo. ³Cuanaya esohui huohuijji nishohua quea huiso ejjeshejji sa poanijo miquiana que ojaya ejjashahuabaqui'yojji e'e nei pojjeama huohui caje. Quea bejjo jeara jjejojo miquianaya dasia caje; dasia majje bejjo quea huiso chicha caje.

Yahuajo nei Eyacuiñajji jjashahuabaquia poa esohui huohuijji nisho napajji. Jama poa ba'a: —Esohui huohuijji nisho cuana eyaya baña. Eyaya oya cuana epajea'yojji pojjeama; quea nee nee po meeje'yo e'e jojo nei.

⁴;Bacue oe! Yahuajo nei nei esohuidojiji cuana eyajo quea mimishi poa. Jamajjeya Eyacuiñajjiya oya cuana quea huesha nee nee jea ca poa, quea misi nee nee yasijje jeajea cal'ya poa quea nee nee epojji. Jomajo oya cuana ecuaya meequei'yojji pojjeama. Ejeyo'yo jama ani, de. Quijje Jesosa Quito poe o'oyajo, Eyacuiñajjiya ma esohuidojiji quea mimishi cuana tecuea neinei majje jeajea caje'yo cu aqui yasijje quea nee nee epo'yojji tii tii.

⁵Yahuajo nei nei ojjaña quea mimishi nee poanijo, Eyacuiñajjiya ena quea quemó nee nee huoojea ca poa; ojjaña mimishi cuana hui'lí mee cal'ya poa. E'e, ojjaña meshi cuana ohuajea mee ca poa. Oe dejja Noe bajjaniya Eyacuiñajjiya esohui jayojja jama aca poa. Jamajjeya oya hui'líyo ajja poa. Ojaya bacua ejja, oja osecuajana quea pame cuana peal'ai hui'líyo jjima peal'ai poa. Me oeje beca, 7 huisome cuana Noe nijje ani Eyacuiñajjiya jaahuana ca poa.

⁶Majoya ojjaña cuana Sonoma cuiñajijo ba'e, Jomosha cuiñajijo ba'e pea'ai quea mimishi nee nee poa. Jamajjeya Eyacuiñajjiya ma cuiñajji cuana quiyo jeyojeyo mee ca'ya poa. Chama'yo tii aca'ya poa dejja, equi, aquiana cuana pea'ai. Jamaya Eyacuiñajjiya ojjaña ba mee cani e'e jojo nei ohuaya ojjaña quea mimishi poani quea nee nee po mee caje'yo. Jamajjeya ¡ojjaña quea mete mimishi epoji pocue! ⁷E'e, yahuajo nei Sonoma cuiñajji quiyo'yo jjimahuajo Eyacuiñajjiya ojaya epeejji Noti bajjani Sonomajo ba'e huoojeacuaya ca poa cuiñajji esecue yasijje quiyo'yo jjima epoji. Notiya Eyacuiñajjiya esohui jama atiitii ca poa. Jamajjeya oya quea yeno nee nee poa ojjaña jomajo quea mimishi ba'yanijo. ⁸Ma cuiñajijo ba'eya Notiya ba majamaja caninaje dejja cuana quea mimishi nee nee; quea shajjaquijjo tii tii poani shajja'ajja caninaje pea'ai. Ohuaya, Notiya ma Eyacuiñajjiya huohui ca poa jayojja jama aca poa. Jamajjeya quea yeno nee nee poa dejja cuana quea mimishi po tiitiianijo.

⁹Jamajoya jjeya ecuana ba mee cani jama ba'a: Eyacuiñajjiya ojjaña quea pame nee poani jaahuana cani. Jamajjeya dejja mimishi cuanaja ojaya epeejji cuana quea mimishi epo meejjii pojjeama. Ecuanaya ba mee cani jjeya nei pea'ai Eyacuiñajjiya ojjaña quea mimishi poani quea nee nee po mee caje'yo. Quijje Jesosa Quito poe o'oyajo, ojjaña mimishi cuana quea nee nee po tiitii mee caje'yo, Eyacuiñajjiya. ¹⁰Pea cuana quea mimishi, quea tai jjashahuaba tiitiiquiani. Jamaya oya cuana ba'e sa poani. Oya cuana emeshi mese cuanaja esohui shajja'ajja sa po ajja pea'ai. Jamajjeya Eyacuiñajjiya oya cuana quea nee nee po mee caje'yo.

Oya jayojjaya esohui huohuijji nisho cuana quea mase nee nee. Shajjama' pea'ai. Jesosa Quitoja esohuidojiji quea pame cuana niñebea cani mete'amaa jjejojo, bicho'amaa jjejojo pea'ai. ¹¹Jamatii mimishi cuana ca'a'ama ojjaña. Eyajo Eyacuiñajjiya esohuidojiji cuana ca ca quea ca'a nee nee poani. Ma dejjaja ba jjima acani pea'ai. Jamatii ohuaya esohui huohuijji nisho cuana jama niñebeambe ajjima acani ba'a: —Jesosa, ijiquio esohui huohuijji nisho cajaa acue, cuiajea'yocue! —jamaya po ajja esohuidojiji cuana.

¹²Esohui huohuijji nisho cuana ca ca quea mase nee nee. Quea ja'a nee jjashahuabaqui ajja pea'ai. Jamatii ijjiacajji jjabahuonequi jjima jama ba'yani. Ijiquio ecua ijjiacajji tiyayo ojjañaa sa'ajja cani equecua'yojji jayojja jama esohui huohuijji nisho quea nee nee po mee caje'yo Eyacuiñajjiya. E'e, oya cuana jjabahuejjaqui ajja nei nei. Eyacuiñajjiya esohuijjo niñebea cani quea quehuajojo.

¹³Esohui huohuijji nisho cuaa pea cuana quea yeno po mee cani. Jamajjeya Eyacuiñajjiya oya cuana quea yeno, quea nee nee po mee caje'yo. E'e de, quea bihui nee jayojja oya cuana mimishi cuana a sa poani ojjaña pojjajo. Jamatii quea mimishi poani tii miquiana nijje ojee ijjiia sa poani Jesosa Quitoja bobi. Miquiana quea mimishi po mee sa poani pea'ai oya cuana. ¹⁴E'e, esohui huohuijji nisho cuana epona mimishi cuana jea ba cani; onijke jaa sa poani. Ijiquio ecua jeje ajja

tti tii jayojja jama oya cuana quea mimishi po tiitiiani, jjashahuuba tiitiiquiani quea mimishi epoji. Jesosaja epeejji ca'l'ama quea mimishi po mee cani pea'ai. Quea dejja tai poanijo pea cuana dasia majje aquiana sii cani pea'ai. Jamajjeya Eyacuiñajji quea quene poani esohui huohujji nisho cuana nijje. Yahuajo jjashahuubaquinaje o huoojea'yojji cuaqi yasijje quea mimishi poanijo.¹⁵ Esohui huohujji nisho cuana Jesosaja ejiojjije poqui pajea'yo majje cuaquisho'yonaje eshahuaja ejiojji yasijje. Eyacuiñajji esohui huohujji yahuajo nei ba'ya poa Beonija bacua ejja Banaami bajjani quea mimishi poa. Ejjeshejji quea huiso sa poanijo Eyacuiñajji esohui jama a sa po ajja poa. Banaami jayojja jama esohui huohujji nisho cuana poani, quea mimishi nee nee, de.¹⁶ Eyacuiñajjiya Banaami tecuea ca'ya poa yahuajo nei, mimishijo. Mapichi sisi mimi mee ca poa Banaami nijje, Banaami jayojja mimimeya poa. Mapichi sisiva tecuea cajje Banaami ojaya ejjashahuubaquijji quea mimishi pajea ca'yonaje.

¹⁷ Jjeya ojjaña esohui huohujji nisho cuana ena etehuejja nama'yo, ejoca'yo jayojja jama poani, cajaa ya'yo jayojja. Cuanaya bo poeanijo beniya dojocuaji canijo, ena chama' poaje. Eso' equecua'yo epohua'yojji pojjeama quea jabojojo. Jiquio ecua bo dojocuaji cani jayojja ena chama' jayojja jama ojjaña esohui huohujji nishohua Jesosaja esohui quea ja'a huohuihuohui ajja. Jamajjeya Eyacuiñajjiya oya cuana cajaa acaje; quea nee nee po mee caje'yo; quea huesha nee nee, quea misi nee nee yasijje jeajea caje'yo.¹⁸ Esohui huohujji nisho cuanaja ejjashahuubaquijji quea quehua nee. Jamatii quea miminaa, bicho'ama poani. Oya cuana jjashahuubaquian quea mimishi. Pea cuana, ma yahuajo mimishi pajea'yojji poanaje quea mimishi po mee caje o'oya.¹⁹ Esohui huohujji nisho cuana mimishi pajea'yo ajja. Jamatii oya cuana siajje poani tii tii jama ba'a: —Ecuanajaya esohui cuana shajja'ajja majje jmiquianajaya ejjashahuubaquijji jayojja jama atiitiicue! —siajje poani.

Chojja, jamaya pojjeama. ¡Bacue! Ojjaña joya mimishi atiitijji poani Edosiquiana o huoojeajji poani. Quea pame nee poanijo ca ca Eyacuiñajji o huoojeajji poani.²⁰ Jamajjeya beca cuaa mimishi pajea ca'yonaje; quea mase popajea ca'yonaje esejaya Emeshi Mese nei Jesosa Quito nijje ejjapeequijji. Jamatii onijje jjapeequi majje aje oe quea mimishi po o'yanaje. Ojaya esohui shajja'ajja maja sa po'yo ajja poanaje. Yahuajo jama oya cuana ba'e o'yanaje, Jesosaja epeejji pojjeama jama quea mimishi. Yahuajo Jesosa nijje jjapeequi jjimahuajo oja mimishijo Eyacuiñajjiya oya cuana tecuea caje. Jesosa nijje jjapeequi pajea'yajo ca ca tecuea neinei caje'yo.²¹ Jamajjeya ojjaña joya Jesosaja esohui shajja'ajja majje pajea cani, quea mimishi po o'oyani Eyacuiñajjiya janobajjima nei tecueajea caje'yo. Quea nee nee po mee caje'yo. Pea cuanaja Jesosaja esohui shajja'ajja jjimahuajo quea mimishi poani Eyacuiñajjiya tecuea caje; quea nee pishana po mee caje'yo oja mimishi cuanajo. Esohui e'e nei Jesosajo shajja'ajja jjimajo mi tecuea neinei caje'yo.²² E'e, jamaya acani cuaa ba'a: "Inaehuaa bohui majje bohui ijja ca o'oyani. Cuanaya cuichi topo cajje cuichi quea boejea pepajo besaje o'oya". Jiquio ecua inaehua, cuichi pea'ai

jjopi yasijje poqui o'oyani jayojja jama beca dejja cuana poani; Jesosaja esohui shajja'ajja majje pajea ca'yani, poqui o'oyani mimishi yasijje.

**Jesosa Quito poeje o'oya; ma ecua ohuaya
huohui ca poa jamaya e'e jojo nei poaje**

3 ¹Epeejji cuana, eyaya becamejjiji pea'ai tehue'yome anaje ecuea esohui miquiana que. ¡Ecuea etehue'yo yahuajo, ecuea etehue'yo jjeya tehuejo pea'ai miquianaya jjashahuaba tiitiquicue quea ja'a nee Jesosa Quitojo! ²¡Eyacuiñajjiya esohui huohuijji quea pame cuanaja esohui yahuajo nei a'a pajea'yojji! Esejaya Emeshi Mese nei Jesosa ese ba'e tiitii mee'yojji. ¡Ojaya esohui pea'ai a'a pajea'yojji! Ohuaya ojaya epeejji cuana huoojea ca'yonaje ojaya esohui huohuiya miquiana huasijje.

³¡Bacue jiquio esohui! Jesosa poe o'oya jjimahuajo pishana quea huiso quea mimishi poeje. Ojaya ejjashahuabaquijji quea mimishi nee nee poaje. Miquianaya soadojo caje Jesosaja epoe o'oyajjijo miquiaa huohuiñaajo. ⁴Minijke mimijajije jama ba'a: —¡Dee! Yahuajo Jesosaa huohui canaje ojaya epoe o'oyajjijo. Jamatii poe'yo jjima. Jesosa siajje poani, de. Yahuajo nei nei ecuanaja etiiquiana ba'ya poa meshi pana ca jeahuajo. Oya jayojjaya jama poani ojjaña jjeya nei. Jama tii tii. Poe o'oya ajja Jesosa —siajje poaje dejja mimishi cuana.

⁵Oya cuana aje oe quea mimishi; Eyacuiñajjiya pana'yo cuana yahuajo nei pajea'yo sa poani. Yahuajo nei nei Eyacuiñajjiya ojjaña aquiana cuana eyajo pana ca'ya poa. Majameta cuana, ba'i, eshequi pea'ai pana ca'ya poa. Meshi cuana pana ca'ya poa. Aquiana cuana ojjaña meshijo pana ca'ya poa, dejja cuana pea'ai. Yahuajo nei nei chama' meshi poa. Ena nei ania poa. Jamajjeya Eyacuiñajjiya ena huosa mee ca poa. Meshi ani cooa poa. ⁶Yahuajo nei Eyacuiñajjiya ena jjayehuejjequi mee ca o'oya poa. Ojjaña mimishi cuana ojjaña meshijo ba'e hui'il'ya poa. ⁷Jjeya nei aquiana cuana eyajo nequi, aquiana meshi cuanajo yani pea'ai. Eyacuiñajjiya ojjaña aquiana nequi mee cani. Quijje ojjaña aquiana eyajo nequi, ojjaña cuana meshijo nequi pea'ai quiyojea mee caje'yo. Chama'yo tii po mee caje'yo ojjaña aquiana cuana. E'e, Jesosa poe o'oyajo, ojjaña mimishi cuana quea nee po mee caje'yo quea mimishi poanaje sosejje, Eyacuiñajjiya. E'e, ojjaña quea mimishi poani quiyo tiitii nequije'yo cuaquijo.

⁸Ecuea epeejji cuana, ¡pea esohui ecuea shajja'ajjacue! ¡A'a pajea'yojji! Eyacuiñajji ba'e tiitiani. Jamajjeya quea huiso nee nee, mil shequiajame oe cahuime jayojjaya poani ojo, oya jayojjaya. ⁹Esejaya Emeshi Mese nei Jesosaja epajea'yojji pojjeama ojaya esohui o poe o'oyajjijo. Jamaya acaje ohuaya e'e jojo nei. Pea cuana siajje poani jama ba'a: —Jesosaa ojaya esohui pajea ca'yonaje, de; poe'yo ajja.

Chojja. Jesosa quea mase pojjeamaa jjejojo ishoa cani tii tii ojjaña cuanaja mimishi epajea'yojji. E'e, ese jeajea sa po aja oya cuaqui yasijje. Quea boejea po

mee sa acani ojjaña. ¹⁰Quijje Emeshi Mese nei Jesosa poecuajije quea huiso ojo jjashahuabaqui ajja yanijo. Siipojji poecuajiani jayojja jama poecuajime Jesosa poaje. Oya poe o'oyajo, ojjaña aquiana eyajo chama'yo tii poaje; quiyojeyoje'yo quea shajjaquijjo. Ojjaña meshi cuana, ojjaña aquiana meshijo nequi pe'aai quiyo'yo majje chama'yo tii poaje'yo. ¹¹E'e, quijje ojjaña aquiana quiyojeyo caje'yo. Jamajjeya ¿ae shai poaje miquianaya jjeya nei? ¡A'a quea mimishi pojji! ¡Ba'ecue quea pame nee nee! ¡Eyacuiñajjiya esohui jayojja jama acue quea bihui nee! ¹²Jamaya pocue Jesosa ishoa'ajja poani! E'e, jojo chaco tiitiicue! Jamajjeya Jesosa poecuajije jjeya nei pojja'a. Ojo chaco ajjajo, oya jjeya nei poe'yo ajja pojja'a, quijje pojja'a poje'yo. Oya poe o'oyajo, ojjaña aquiana eyajo nequi quiyojeyo caje'yo. Ojjaña aquiana quiyo jeyojeyoje'yo. ¹³Yahuajo nei Eyacuiñajjiya huohui ca poa jama ba'a: —Quijje eyaya aquiana cuana eyajo panaje'yo eyacula. Meshi eyacula panaje'yo pe'aai eyaya. Jomajo ojjaña cuaa ecuea esohui jayojja jama atiitii caje'yo quea pame, mimishi'lama —jamaya Eyacuinajji poanaje.

Ecuaaya ishoaña meshi eyacula, eya eyacuajo pe'aai de, quea boejea'yo eba'e'yojji.

¹⁴Ecuea epeeiji cuana, ¡bacue! ¡Miquianaya Jesosaja epoe o'oyajji ishoañajo ba'ecue Eyacuiñajjiya esohui jayojja jama! Jamajjeya Eyacuiñajjiya ba caje miquianaya ojaya epeeiji quea pame nee. ¡Jesosa nijje jjapeequicue e'e jojo nei! Jamajjeya Eyacuiñajji miquiana nijje quea bei po tiitiije'yo. ¹⁵Jesosa quea tecue pocuaji ajja mimishi cuana nijje. Ishoa cani, jamajjeya mi poe'yani. Jamajjeya ijjeya onijje jjapeequi'yocue! Ohuaya eseaya ba'e tiitii mee caje'yo onijje eyajo. Jamaya ecuanaja epeeiji Pabohua tehue canaje pe'aai miquiana huasijke, ecuea etehue'yo jayojja. Jamaya Eyacuiñajjiya Pabo jjashahuabaqui meesahua ca'yonaje quea ja'a nee. ¹⁶E'e, ecuea etehue'yo Jesosajo jayojja jama Pabohua tehue canaje quea huiso nee. Beca esohui ojaya esohui etehue'yo quea camaja ebajji. Jamajjeya beca cuana jjashahuaba quehuaquianijo quea ja'a nee huohui ajja Paboja esohui etehue'yo. Oya cuana siajje poani esohuijo. Jamajjeya quijje Eyacuiñajjiya oya cuana quea nee po mee caje'yo.

¹⁷E'e epeeiji cuana, jamaya miquianajaya eba. Jamajjeya ja'a shajja'ajjajji siajjepoiji cuanaja esohui! Oya cuana shajja'ajja majje jjashahuaba quehuaqui chana!. E'e, esohui huohuijji nisho cuana Eyacuiñajjiya esohui jayojja jama a sa po ajja. ¡O jayojja jama a'a pojji! ¹⁸E'e, Jesosa Quitohua, esejaya Emeshi Mese neiya eseaya quea boejea po mee'yo majje ba'e tiitii mee caje'yo onijje eyajo. ¡Ojaya epeeiji quea ca'a nee nee po tiitiicue! Yahuajo miquianaya ojaya epeeiji eyacula quea ca'a pishana poanaje. Jamajjeya oe pojji miquianajaya eba poanaje. ¡Ojjaña esohui cuana Jesosa Quitojo ba neinei poquiaque! Mahuiso ecuea esohui.

¡Ojjaña cuaa Jesosa Quito cabihuia tiitii cahua: —Jesosa Quito, miya quea pame nee nee —jamaya ca'a cahua!

Eyaya, Penohua jiquio esohui e'e nei cuana tehuejeyonaje. Apoa.

HUANIJA ETEHUE'YO EBIONEI

1 JUAN

Huaniya tehue canaje eba'e tiitii'yojijio

1 ¹Epeeji cuana, eyaya, Huaniya miquiana que esohui tehueaña Jesosa Quitojo. Yahuajo nei nei meshi, aquiana cuana, dejja pea'ai pana coo jjimahuajo oya yaña tii tia poa. Jamajjeya Jesosa Quitohua eseya Eyacuiñajji ba mee cani, eseya ba'e tiitii mee cani pea'ai. E'l jojo nei eyaya oya shajja'ajjanaje ecue eshajjaa. Eyaya oya banaje ecue ecojaa. O ba neinei majje eya quea bihui nee poanaje. Oya ese jayojjaya poanaje, yamiji. Jamajjeya eya onijje jjapeequinaje. ²E'e, Jesosa ese jayojja poeyanaje yamiji, ese ba'e tiitii mee'yohua. Eyaya oya banaje e'l jojo nei. Jamajjeya eyaya miquianaya jama huohuime aña ba'a: Yahuajo nei nei Jesosa Quito yaña tiitii poa Eyacuiñajji nijje, oja Chii nijje. Eseja Chii neiya Eyacuiñajji oya meshi yasijje huoojea canaje ese jayojja epoji, yamiji. Esejaya mimishi cuijea'yo majje ohuaya eseya cuana ba'e titii mee caje'yo onijje eyajo. ³E'e, eyaya oya, Jesosa Quito banaje; ojaya esohui shajja'ajjanaje pea'ai. Jamajjeya aje jja mi oe eyaya miquianaya huohuiaña enijje ejjapeequi'yojji. Jamajjeya eseya Eyacuiñajji nijje, eseja Chii nei nijje jjapeequiani, oja Bacua Ejja Jesosa Quito nijje pea'ai jjapeequi poquiani.

⁴Jamajjeya jiquio esohui cuana eyaya tehueaña miquiana quea bihui nee nee po meeji. Jamajjeya Jesosaja epeeji poanijo quea bihui nee nee poaje'yo.

Eyacuiñajji quea ja'a nee nee enequi tii mimishi'ama

⁵Epeeji cuana, eyaya Jesosa Quitoja esohui shajja'ajjanaje. Maya eyaya miquianaya huohuiaña jama ba'a: Eyacuiñajji quea ja'a nee nee poani tii. Jiquio ecua cuaquijjiya mecasje jijinequianiya ojjaña jeaja'a cani jayojja jama ohuaya eseya cuana, dejja mimishi cuana quea ja'a nee jjashahuabaqui mee cani. Eyacuiñajji mimishi'ama tii tii, quea tai pojjeama; Eyacuiñajji quea apo pojjeama epojjajo jama tii tii oya ba'e. ⁶Jamajjeya joya mimishi po majje quea apo jayojja tii ba'yani mimiani jama ba'a: —Eya Eyacuiñajji nijje jjapeequiani —Eyacuiñajji nijje jjapeequiani poso oya jjabaquiani, siajje poani.

Chojja. Jjapee neineiquiani pojjeama mi coma, jjadasiaquiani jja mi coma. Jiquio ecua se mecajje quea misijo poquiquehuani jayojja jama oya poani. ⁷Eyacuiñajji ca ca quea ja'a nee nee poani tii, quea boeja nee nee. Jamajjeya Eyacuiñajji jayojja jama quea ja'a nee ba'yanijo eseja jjapeequianqui quea pame nee Jesosaja epeejji cuana nijje. Jesosa Quitoja ena' cuayaqui'yo majje oya esejo mano'yonaje. Jamajjeya onijje jjapeequianijo, eseja Chii Eyacuiñajjiya esejaya mimishi cuana cuijea ca poqui'yani.

⁸Ojjaña joya jama poani ba'a: —Iña ca ca mimishi'ama —jamaya quea quehua jjashahuabaquiani. Jamaya jjabaquianijo Jesosa ojaya ba jjima nei nei.

⁹Eyacuiñajji nijje mimiajo ca ca ohuaya esejaya mimishi cuana cuijea caje'yo. E'e, jama poajo ba'a: —Eyacuiñajji, eya quea mimishi poani. ¡Ecuea mimishi cuana cuijea'yo! —jamaya mimiajo ohuaya ojaya esohui jayojja jama acaje'yo e'e jojo nei.

E'e, Jesosa esejaya mimishi cuanajo mano'yonajejo ohuaya eseja mimishi cuana cuijea'yo majje mimishi pajea meesahua caje'yo. Eseya quea boeja po mee caje'yo. ¹⁰E'e, Eyacuiñajjiya jama aca poa ba'a: —Ojjaña cuana quea mimishi nee nee poani —ohuaya aca poa.

Jamajjeya ojjaña joya jama poani ba'a: —Chojja, iña ca ca mimishi'ama —jama poaniya siajjepoiji. Eyacuiñajji siajje poani posoya acani pea'ai. Jamajjeya ojjaña joya jama poani Eyacuiñajjiya esohui etehue'yo ba po jjima jayojja poani.

Jesosa Quito esejo mimiani Eyacuiñajji nijje

2 ¹E'e ecuea epeejji cuana, miquiana mimishi'ama po meesahua jji eyaya jiquio esohui tehueña. Jamatii eseja quea mimishi poajo, Jesosa Quito esejo mimiani Eyacuiñajji nijje, oja Chii nijje jama ba'a: —Ecue Chii, eya mano'yonaje ecuea epeejji cuanaja mimishi cuana cuijea'yo! sosejje. Jamajjeya ja'a quea quene pojji onijje! —jamaya Jesosa poani.

Jesosa Quito ca ca oe mimishi'ama, quea pame nee nee. Jamajjeya Eyacuiñajjiya Jesosa onijje mimiajo shajja'ajja cani, jamaya acani esejo.

²E'e, Jesosa acui ecueata'apeejo mano'ya poa eseja mimishi cuana cuijea'yo! sosejje. Ojjaña cuana ojjaña meshijo ba'eca cuanaja mimishi cuijea'yo! sosejje Jesosa mano'yonaje.

¡Eyacuiñajjiya esohui jayojja jama ba'ecue!

³E'e ecuea epeejji cuana, Jesosaja esohui cuana jayojja jama añajo eseja ojaya epeejji poani e'e jojo nei; onijje ba'e tiitije'yo eyajo. Jamaya esejaya eba. ⁴Beca cuana aje oe jama poani ba'a: —Eya ca iña Jesosaja epeejji poani —jama posoya jjabaquianqui cuana.

Jamatii oya cuana aje oe Jesosaja esohui jayojja jama ba'e ajja. Jamajjeya oya cuana siajje poani. Jesosa ojaya ba jjima. ⁵Ojjaña joya Eyacuiñajji quea jea nee nee aji poani ca ca ojaya esohui jayojja jama ba'yanji. Jamajjeya ¡Eyacuiñajjiya esohui jayojja jama ba'e tiitiicue Jesosa

Quitoja epeejji quea ja'a nee epojji! ⁶Jamajjeya ojjaña joya e'e jojo nei jama poani ba'a: —Eya Jesosa Quito nijje jjapeequiani —jamaya poanijo ¡quea pame nee caba'yahua, Jesosa Quitohua aca poa jayojja jama ca'a cahua! Jamaya ba'yanijo eseya e'e jojo nei ojaya epeejji jjabaquije.

¡Pea cuana quea jea nee acue!

⁷Epeejji cuana, yahuajo nei Eyacuiñajji esohui huohuijjiya esohui tehue ca poa miquianaja ebajji. Ma esohui miquianaaya shajja'ajjanaje Jesosa nijje jjapeequi jeahuaa. Ma esohui etehue'yo eyaya tehue o'oyaña miquiana jjashahuabaqui meejjii. ⁸Jamatii eyaya ma esohui tehue etii jayojjaya tehue o'oyaña miquiana huasijje jama ba'a: —¡Pea cuana quea jea nee nee acue!

Jiquio esohui jayojja jama aca poa Jesosaa; pea cuana quea jea nee nee aca poa. Yahuajo ojjañaja ejjashahuabaquiji cuana quea tai, quea quehua poa Eyacuiñajji esohui e'e nei shajja'ajja jjimahuajo. Jjeya ca ca miquianaaya Eyacuiñajji esohui jama pea cuana quea jea nee nee aña pe'a'i. Ma esohui e'e nei cuaquijji jayojja jamaa ojjaña quea ja'a jjashahuabaqui meesahua cani. ⁹Jamajjeya ojjaña joya jama poani ba'a: —Eya Jesosaja esohui jayojja jama ba'yani quea ja'a nee —jamaya poani aje oe siajje poani.

Jesosaja epeejji nijje quea quene nee poani tii tiijo quea mimishi nee ba'yani, Jesosaja esohui shajja'ajja nisho cani, Jesosaja epeejji e'e jojo nei pojjeama. ¹⁰Ojjañaa joya Jesosaja epeejji cuana quea jea nee nee acani ca ca quea ja'a nee nee ba'yani. Jesosa jayojja jama ba'yani. Jamajjeya ohuaya pea epeejji poquiquehua mee'yo jjima acani, quea mimishi po mee'yo jjima acani. ¹¹Ojjaña joya Jesosaja epeejji cuana nijje quea quene nee nee poani ca ca quea mimishi tii ba'yani. Jiquio ecua se ecojja bebo poqui taiyani jama, ejiojji ba jjima jayojja jama oya cuana poani quea mimishi ba'yani jjejojo.

¡Jesosaja epeejji cuana etii, esho'i pea'ai quea ja'a nee ba'ecue!

¹²Ecua epeejji cuana, miquianaya Jesosaja epeejji poanijo, Eyacuiñajjiya miquea mimishi cuana cuijea ca'yonaje. Jamajjeya eyaya jiquio esohui tehueaña miquianajaya ebajji. ¹³Yahuajo nei nei meshi pana jjimahuajo Jesosa eba'e tiitiia poa. Jesosa nijje jjapeequianijo eyaya miquiana huasijje esohui tehueaña edejja tii cuana huasijje. Shacuima' nequi cuana, miquianaya Edosiquiana jeabichajeal'yojji epo. Jamajjeya eyaya miquiana huasijje esohui tehueaña pe'a'i. Esho'i cuana, Eyacuiñajji eseja Chii nei miquianajaya eba. Jamajjeya eyaya miquiana huasijje tehueaña pe'a'i. ¹⁴E'e edejja tii cuana, Jesosa yahuajo nei nei eba'e tiitiia poa miquianajaya eba. Jamajjeya eyaya esohui tehueaña miquianajaya ebajji. E'e shacuima' nequi cuana, miquianaya quea ca'a poani, dejja tii'yo jjima. Eyacuiñajji esohui jayojja jama aña. Jamajjeya miquianaya Edosiquiana jeabichajeal'yojji epo pe'a'i. Jamajjeya eyaya miquiana huasijje tehueaña pe'a'i.

¡A'a yahuajo jama ba'e sa pojji Jesosaja epeejji pojjeama jama!

¹⁵Epeejji cuana, ¡a'a yahuajo jama ba'e sa pojji quea mimishi, Jesosaja epeejji pojjeama jama! Aquiana cuana jiquio meshijo ani ¡a'a quea jea nee ajji! ¡A'a aquianajo jjashahuuba tiitiuiquijji! E'e, Jesosaja epeejji pojjeama jama ba'e sa poanijo, aquiana cuanajo jjashahuuba tiitiuiquianijo pe'aai Eyacuiñajji, eseja Chii nei miquea quea boti pojjeama. ¹⁶E'e, Jesosaja epeejji pojjeama cuana Eyacuiñajji jojashahuubaqui ajja nei nei. Chojja, oya cuana jjashahuubaquiani jiquio meshijo eba'ejji jama ba'a: Quea mimishi nee nee ba'e sa poani; aquiana cuana ba majje jea ba neinei cani pe'aai; quea dejja tai poani, quea nishehui pe'aai poani. Dejja quea dejja tai jayojja jama ba'e sa poani quea aquiana huiso nee nee. Ona huoojeajji po sa poani pe'aai. Jamaya ba'e sa poani eshahuaja epeejji cuana. ¹⁷Jamatii joya aquiana ojjaña cuana sa neinei poani chama'yo tii poaje'yo. Ojjaña quea mimishi nee jjashahuubaquiani, Jesosaja epeejji pojjeama quea nee nee poaje'yo tii tii. Ojjaña joya Eyacuiñajji esohui jayojja jama ba'yani ca ca ba'e tiitije'yo onijje eyajo. Jamajjeya ¡yahua jama a'a ba'ejji, Jesosaja epeejji pojjeama jama!

Jesosa Quito cuiajji epoiji nisho poje, Emeshi Mese nei nisho poaje. Eseyá ca ca Jesosaja epeejji e'e jojo nei poani. ¹⁸Ecuea epeejji cuana, ¡shajja'ajjacue mo! Yahuajo eyaya miquianaya huohuinaje jama ba'a: —Quijje Jesosa poe jjimahuajo oe dejja poje. Oya pea, Edosiquiana neija epeejji; dejja jayojja nei neiya oya poje. Jesosa Quito cuiajji nisho poaje; ojjañaja Emeshi Mese nei nisho poaje —jamaya eyaya huohuinaje.

Jamatii jjeya nei Jesosa Quito cuiapanajji poani yani, emeshi mese nei nisho quea huiso yani pe'aai. Jamajjeya esejaya eba Jesosaja epoe o'oyajji beshahua nei apoa. ¹⁹Jiquio Jesosa Quito cuiapanajji poani cuana yahuajo pishana ese nijje nequinaje. Matatii oya cuana Jesosaja epeejji nei pojjeama poa. Jamajjeya ese nijje nequi tiitii ajja poa. E'e, oya cuana Jesosaja epeejji nei epo jjemo ese nijje nequi tiitii'yo quiaye. Oya cuana ca ca poqui'yonaje. Jamajjeya esejaya eba oya cuana Jesosaja epeejji nei pojjeama.

²⁰Miquiana que ca ca Jesosa Quito hua Edojoshahua Pame huoojea canaje. Ohuaya miquianaya ojjaña Jesosa Quito ja esohui e'e nei ba mee canaje.

²¹Jesosaja esohui e'e nei miquianajaya ebajojo eyaya jiquio esohui miquiana huasijje tehueaña. E'e, miquianajaya eba siajjepoiji cuana Jesosaja epeejji pojjeama. ²²Siajjepoiji cuua aje oe jama huohuime acani ba'a: —Jesosa ca ca oma Eyacuiñajji huoojea'yo ojjaña jaahuanajji pojjeama, Quito pojjeama.

Ojjaña joya jamaya Jesosajo poani aje oe Jesosa Quito Eyacuiñajji Bacua Ejja pojjeama poso acani. Jamajjeya ohuaya Eyacuiñajji, eseja Chii nei cajaa acani pe'aai. E'e, oya cuana aje oe Jesosa Quito cuiapanajji poani. ²³E'e, ojjaña joya Jesosa Quito Eyacuiñajji Bacua Ejja pojjeama poso aji poani Eyacuiñajji nijje jjapeequi ajja pe'aai. Joya Eyacuiñajji Bacua Ejja nijje jjapeequianji Jesosa nijje ca ca eseja Chii nei eyajo ani nijje pe'aai jjapeequianji.

²⁴Jamajjeya esohui quea pame nee Jesosajo, ma miquiaa shajja'ajja cooa poa ja'a pajea'yoji! ¡Jamaya atiiticue! E'e, ma esohui pajea'yo ajjajo miquianaya Eyacuiñajjiya Bacua Ejja nijje jjapee tiitiiquije'yo Jesosa nijje. Eyacuiñajji eseja Chii nei nijje jjapee tiitiiquije'yo pea'ai. ²⁵E'e, yahuajo nei ecuana nijje nequiahuaa Jesosa Quitohua huohui ca poa jama ba'a: —Eyaya miquianaya, ecuea epeejji cuana ba'e tiitii meeje'yo enijje eyajo —jamaya ecuana huohui ca poa Jesosaa.

²⁶Ecuea epeejji cuana, eyaya jiquio esohui e'e nei tehuename miquiana huasijke siajjepoiji cuanajo, ma Jesosa cuiapanajji epo cuanajo. Poquiquehua mee ca chana' mi. ²⁷Miquiana que ca ca Jesosa Quitohua Edojjoshahua Pame huoojea ca'yonaje. Oya, Edojjoshahua Pame miquiana nijje nequi tiitiiani. Ohuaya miquianaya Jesosaja esohui ba meesahua cani quea ja'a nee. Jamajjeya pea esohui huohujji chamajo jamatii Edojjoshahua Pameya miquianaya ojjaña Eyacuiñajjiya esohui e'e nei ba meesahua cani quea ja'a nee. Oya siajjepoiji pojjeama. Jamajjeya ¡ojaya esohui cuana jayojja jama ba'ecue Jesosa Quito nijje ejjapee tiitiiqui'yoji!

Jesosaja epeejji cuana

²⁸Jamajjeya ecuea epeejji cuana, ¡Jesosa Quito nijje jjapee tiitiiquicue bicho'ama epoiji! Jamajjeya Jesosa Quito poe o'oyajo ojo eseaya mete'ama poaje. Ohua cojja ba neinei cajje eseaya bicho'ama poaje'yo. ²⁹Miquianajaya eba Jesosa Quito mimishi'ama, quea pame nee nee. Jamajjeya ojjaña joya mimishi'ama, quea pame nee nee ba'yani Jesosaja epeejji cuana poani.

3 ¹¡Jashahuabaquicue! Eseja Chii nei Eyacuiñajjiya eseaya quea jea nee nee acani. Jamajjeya ohuaya jama acanaje ba'a: —Eyaya miquianaya ecue bacua cuana po meenaje —jamaya acanaje ohuaya.

E'e, ohuaya eseaya oja bacua cuana po mee ca'yonaje. Jamajjeya pea cuana Jesosa nijje jjapeequi sa po ajjajo ese nijje jjapeequi ajja pea'ai.

²Ecuea epeejji cuana, jjeya eseaya Eyacuiñajjiya bacua cuana. Jamatii quijje ¿ae jayojja eseaya poaje'yo? Maya esejaya ba jjima jjeya. Jamatii esejaya eba Jesosa Quito poe o'oyajo eseyaya oya baje ecojaa. Jamajjeya eseaya jjashahuabaquiani jama ba'a: —E'e jojo nei Jesosa Quito poe o'oyajo eseaya o jayojjaya nei nei poaje'yo.

³Quea pame nee nee Jesosa. Ojjaña joya jama jjashahuabaquime po'anii Jesosa Quitojo jja'ishoa'ajjaquiani. Mimishi cuana pajea neinei ca'yani pea'ai. Quea boejea ba'yani Jesosa Quito jayojja epo'yojjiya.

⁴Shajjama' cuaa ca ca mimishi acanijo Eyacuiñajjiya ejjashahuabaquijji quea pame nee jayojja jama po ajja. E'e, jamajjeya Eyacuiñajjiya esohuijo jjashajja'ajjaqui ajjajje quea mimishi poani. ⁵Esejaya eba Jesosa Quito mimishi'ama nei nei. Oya poeyanaje eseja mimishi cuana cuijea'yohua.

⁶Jamajjeya Jesosa Quito nijje jjapeequi'yо majje eseaya mimishi amaja sa po'yo ajja; pajea'yaña seya. Ojjaña joya mimishi atiitii sa poani ca ca Jesosa Quito nijje jjapeequi jjima, ojaya ba jjima, de.

⁷Ecuea epreejji cuana, ¡quea ja'a nee jjashahuabaquicue pea cuanaja miquianaya edasajji pojjeama! Jesosa Quito quea pame nee nee, mimishi'ama. Jamajjeya ojjaña joya Jesosa Quito jayojja mimishi'ama ba'yani oya cuana quea pame nee pea'ai poani. ⁸Joya mimishi ahuicha'la huicha'ajji poani ca ca eshahuaja epreejji poani. E'e, Edosiquiana nei yahuajo nei nei yaña poa meshijo. Ohuaya mimishi acoo ca poa. Eyacuiñajji Bacua Ejja Jesosa ca ca meshi yasijje poeyanaje ojjaña cuana mimishi pajea mee'yohua, eshahua cuana quea nee nee po meeya, eshahuaja epreejji cuana pea'ai.

⁹Eseya, Eyacuiñajji bacua cuana ca ca oe mimishi atitii sa po'yo ajja, Edojjoshahua Pameya ecuana huasijje edobiquinequiya eyacua po mee cani. E'e, ohuaya eseya Eyacuiñajji ejjashahuabaquijji jayojja jama jjashahuabaqui mee cani. Jamajjeya eseya Eyacuiñajji bacua po majje mimishi epo maja'yojji pojjeama. ¹⁰Jamajjeya eseyaya Eyacuiñajji bacua cuana baña jama ba'a: Ojjaña joya mimishi a sa po'yo ajja, Eyacuiñajji esohui jayojja jama ba'yani Eyacuiñajji bacua cuana. Ojjaña joya mimishi atitijji poani, pea cuana quea jea a'ajja pea'ai, Jesosaja epreejji cuana nijje jjapeequi ajja pea'ai ca eshahuaja epreejji cuana, Edosiquianaja bacua cuana.

¡Pea cuana oe quea jea nee ejja'aqui!

¹¹E'e ecuea epreejji cuana, ¡pea cuana oe quea jea nee ejja'aqui! Jamaya yahuajo onijke jjapeequi jeahuajo Jesosaa eseya huohui coo ca poa. ¹²Jamajjeya ja'a Adanaja bacua Caini jayojja jama pojji! Oya eshahuaja epreejji poa. Jamajjeya oja chahua sapa cuihuejjajea ca'ya poa. E'e, oja chahua quea pame poanajejojo Caini onijke quea quene nee poa; quea mimishiya jjejojoya oja chahua cuihuejjajea ca'ya poa. ¹³Jamajjeya oya jayojjaya Jesosaja epreejji pojjeamaja miquianaya boti'ama pea'ai acajje a'a jjashahuabaquijji jama ba'a: —¿Apiojji shai eya onajaya boti'ama?

Oya cuana eshahuaja epreejji cuana, Caini jayojja. Eseya ca ca Jesosaja epreejji, echahua mese jayojja. Jamajjeya ese nijje quea quene nee poani.

¹⁴Eseyaya Jesosaja epreejji cuana quea jea nee nee aña. Jamajjeya esejaya eba e'e jojo nei eseya pea jjashahuabaquime poani, yahuajo jama pojjeama. Jamajjeya eseya Eyacuiñajji nijje ba'e tiitijel'yo eyajo; cuaqui yasijje epoqui'yojji pojjeama. Joya pea cuana quea jea a'ajja ca ca quea nee nee poaje'yo, cuaqui yasijje poquije'yo tii tii pea jjashahuabaquime po'yo jjima jjejojo. ¹⁵Joya pea cuana nijje quea quene nee nee poani aje oe pea quecuajji poani. Eseyaya eba pea quecuajji cuana eshahua nijje jjapeequiani tii; oya cuana eba'e tiitil'yojji pojjeama eyajo.

¹⁶Jesosa Quito esejo mano'ya poa eseja mimishi cuijea'yojji. Jamaya esejaya eba e'e jojo nei eseya ojaya quea jea nee nee. Jamajjeya ¡Jesosaja epreejji cuana quea jea nee nee ejja'aquí pea'ai; oya cuana ejjaba'e meesahuaqui! ¹⁷Epeejji quea dejja taiya ca ca quea aquiana huisohua ojaya epreejji aema' nei nei ba majje aquiana quia jjima acani; quea mano jaa, quea shoe nee ba majje jjashahuabaquime

ajja, ba'e meesahua sa po'yo ajja ojaya quea jea pojjeama jojoya. Jamajjeya oya Eyacuiñajji jayojja jama po ajja Eyacuiñajji ojaya quea jea pojjeama jojoya. ¹⁸Ecuea epeejji cuana, ¡shajja'ajjacue mo! Pea cuana esejaya quea jea nee poanijo joya cuana quea pame nee nee ejjab'a'e meesahuaqui! Jamaya quea pame nee. Eseyea pea cuana quea pame ajjimajo ca ca jama siajje pome se poani ba'a: —Pea cuana ca ca ecuea quea jea nee poani —jama siajje pomeya se poani.

¡Pea cuana quea jea ejja'aqui Eyacuiñajji bicho'ama epoji!

¹⁹E'e, Jesosaja epeejji cuana quea jea nee eseya añajo Jesosaja esohui e'e nei jayojja jama ba'yani, Jesosa nijje jjapeequiani quea pame nee nee pea'ai. Jamajjeya Eyacuiñajji cojja nei nequi majje bicho'ama eseya poaje'yo. ²⁰E'e pojja'a eseya quea yeno jjashahuabaquiani jama ba'a: —Eseyea Eyacuiñajji eba nei nei. Ojaya eya eba quea mimishi poanaje —jamaya pojja'a poani.

¡Bacue! Eyacuiñajjiya eseya mimishi cuijea ca poqui yani. Jamajjeya ¡yeno'ama pocue! ²¹E'e epeejji cuana, eseya ejjashahuabaqui jama ba'a: —Eya Jesosa nijje jjapeequiani. Jamajjeya Eyacuiñajjiya ecuea mimishi cuijea ca'yonaje. Enijke quea bei poani.

Jamaya e'e jojo nei poanijo eseya bicho'ama poani Eyacuiñajji nijje emimiji. ²²E'e, Eyacuiñajjiya esohui jayojja jama eseya añajo, Jesosa nijje jjapeequianijo pea'ai Eyacuiñajji quea bihui nee ese nijje poaje. Jamajjeya onijke mimiäjo ohuaya eseya shajja'ajja caje. Ma ecua eseya onijke miminaje jamaya ohuaya acaje.

²³E'e, Eyacuiñajjiya eseya huohui ca poa jama ba'a: —¡Ecue Bacua Ejja Jesosa Quito nijje jjapeequicue! ¡Jesosaja epeejji cuana quea jea nee nee acue pea'ai! —jamaya ohuaya eseya huohui ca poa.

²⁴Ojjaña joya Eyacuiñajjiya esohui jayojja jama ajji poani Eyacuiñajji nijje jjapeequiani. Eyacuiñajji ona nijje jjapeequiani pea'ai. Eyacuiñajjiya Edojjoshahua Pame huoojea canaje ese que dobiquiya. Ohuaya eseya ba mee cani Eyacuiñajji ese nijje nequi.

Jesosaja epeejji nishohua mi dasia ca chana'

4 ¹Ecuea epeejji cuana, ¡ojjaña esohui huohuijji cuanaja esohui a'a shajja'ajjajji! Chojja, beca cuana Edojjoshahua Pameja huoojea'yo pojjeama, esohui huohuijji nisho. Jamajjeya ¡ojjaña cuana ba neineicue! Quea ja'a nee jjashahuubaquicue jama ba'a: —¿A'a oya cuana Eyacuiñajjiya esohui e'e nei jayojja jama huohui cani?

E'e, quea huiso siajjepoji cuana ojjaña huasijje poquiani. Siajje poani jama ba'a: —Eyacuiñajjiya eya huoojea canaje ojaya esohui huohuiya.

²Jamajjeya Eyacuiñajjiya esohui huohuijji e'e nei miquea eba poaje jama ba'a: Edojjoshahua Pameya oya cuana huohui meesahua caje jama ba'a: —Jesosa Quito ese jayojjaya yamiji poeyanaje.

Jamajjeya jamaya ohua huohui cajo miquea eba oya cuana Edojjoshahua Pameja huoojea'yo esohui huohuijji poani.

³Pea cuaa ca ca esohui huohuijji nishohua jamaya huohui ajja. Chojja, oya cuana siajje poani jama ba'a: —Jesosa Eyacuiñajjija huoojea'yo ojjaña jaahuanajji pojjeama. Eyacuiñajjija Bacua Ejja meshi yasijje poe jjima dejja jayojja yamijji —jamaya huohui canijo aje oe miquianajaya eba oya cuana esohui huohuijji nisho, Jesosa Quito quecuajji nisho epo. Eyacuiñajjija oya cuana huoojea jjima.

Yahuajo eyaya miquianaya huohuinaje oya cuana poeje. Jjeyahua nei oya yani quea huiso. Ojjaña huasijje poquinaje jjadasiaquiya.

⁴Ecuea epeejji cuana, miquianaya ca ca Eyacuiñajjija bacua cuana poanaje. Jamajjeya ohuaya miquianaya dasia mee jjima acani Jesosaja epeejji pojjeama cuana. Miquianaya ona jeabichajejji jayojja jama poani. E'e, Eyacuiñajjija Edojoshahua Pame miquianajo nequi ca ca oe quea ca'a nee nee. Eshahua cuana, Edosiquiana quea ca'a pishana. Eshahuuaa miquianaya quea mimishi po mee'ajja cani. ⁵Esohui huohuijji nisho cuana eshahua nijje jjapeequianiya jjejojo Eyacuiñajjija esohui jayojja jama huohui ajja. Eba'ejji quea mimishi onaaya quea boti nee nee acani. Dejja mimishiya jayojjaya huohui cani. Jamajjeya mimishi cuaa oya cuana shajja'ajja cani. ⁶Eseyaa ca ca Eyacuiñajjija bacua cuana poani. Jamajjeya Jesosaja epeejji cuana Eyacuiñajji nijje jjapeequiani pealaiya jjejojo esejaya esohui shajja'ajja cani. Pea cuana Jesosaja epeejji pojjeama ca ca Eyacuiñajji nijje jjapeequi sa po'yo ajja; ecuanajaya esohui shajja'ajja sa po'yo ajja. Jamajoya Jesosaja epeejji nei esejaya eba; ohuaya esejaya esohui shajja'ajja cani. Pea cuana, eshahuaja epeejji cuana esejaya eba pealai; oya cuana esejaya esohui shajja'ajja sa po'yo ajja.

Ojjaña Eyacuiñajjija quea boti nee poani

⁷Epeejji cuana, miquianaya ecuea quea jea nee poani. Ojjaña cuana Eyacuiñajjija quea jea nee nee poani. Jamajjeya pea cuana quea jea nee nee ejja'aqui tii tii. E'e, jamajjeya eseaya Eyacuiñajjija bacua poanijo o jayojja jama poani. Pea cuana quea jea nee nee ejja'aqui Jesosa nijje jjapeequianijo. ⁸Ojjaña joya pea cuana boti'ama poani ca ca Eyacuiñajji nijje jjapeequi ajja, Eyacuiñajji ba po jjima pealai. E'e, Eyacuiñajjiya ojjaña cuana quea jea nee acani tii tii. ⁹Eseyaa cuana ojaya quea jea nee nee. Jamajjeya ohuaya oja Bacua Ejja oe nei Jesosa huoojea ca poa ese que, jiquio meshi yasijje. Jama ohua acanajejoya, ojjaña eba eseaya Eyacuiñajjija quea jea nee nee acani. E'e, Jesosa ese que poeyanaje eseja mimishi cuana cuijeal'ohua. Jamajjeya eseaya onijje ba'e tiitii mee caje'yo eyajo quea pame nee nee. ¹⁰¡Bacue! Yahuajo nei esejaya Eyacuiñajji boti'ama poa. Jamatii ohuaya ca ca oe ebionei eseaya quea jea nee aca poa. Jamajjeya ohuaya ojaya Ebacua Ejja Jesosa Quito huoojea ca poa ese que, mano'yohua eseja mimishi cuijeal'oyiji sosejje. ¹¹Ecuea epeejji cuana, Eyacuiñajjiya eseaya quea jea nee nee acanaje; jamajjeya ¡pea cuana quea jea nee nee ejja'aqui! ¹²Yahuajo, jjeya nei pealai esejaya Eyacuiñajji ba jjima ecojjaja. Jamatii esejaya ojaya epeejji cuana quea jea poanijo tii Eyacuiñajji ese nijje nequiani. Ohuaya eseaya pea cuana quea jea nee nee po meesahua cani. Jamaya Eyacuiñajji sa poani.

¹³E'e, Eyacuiñajjiya Edojjoshahua Pame ese que dobiquia huoojea canaje. Jamajojoya Edojjoshahua Pameya eseya ba meesahua cani Eyacuiñajji ese nijje nequiani, eseya onijje jjapeequiani pe'a'i.

¹⁴Epeejji cuana, eyaya Jesosa banaje ecojja. Jamajjeya ojjaña huasijje jama huohuimeya aña. Eseja Chii nei eyajo aniya oja Bacua Ejja Jesosa huoojea canaje meshi yasijje mano'yohua, ojjaña cuana ojjaña meshijo ba'eca cuanaja mimishi cuana cuijea'yohua onijje eyajo eba'e tiitii mee'yojji. ¹⁵Jamajjeya eseyaya jama huohuime aña ba'a: —Jesosa Eyacuiñajjiya Bacua Ejja oe nei.

Ojjaña joya jama poaniya e'e jojo nei Eyacuiñajjiya bacua cuana poani. Eyacuiñajji onijje nequiani pe'a'i. ¹⁶Esejaya eba e'e jojo nei Eyacuiñajjiya eseya quea jea nee nee acani.

Eyacuiñajjiya ca ca oe ojjaña quea jea nee nee acani. Jamajjeya ojjaña joya pea cuana quea jea nee nee ajji poani pe'a'i ca ca oe Eyacuiñajji nijje jjapee neineiquiani. Eyacuiñajji ma dejja cuana nijjeya nequiani pe'a'i. ¹⁷Jamajjeya Eyacuiñajji esejaya quea jea nee nee poanijo pea cuana quea jea nee nee ejja'aqui Jesosa Quito jayojja jama epojji. Jamajjeya eseya bicho'ama poaje Eyacuiñajjiyo. Jesosa Quito poe o'oya majje ohuaya ojjaña eseya sosequia caje'yo ma eseya meshijo ba'eya anaje sosejje. Shajjama' cuana ca ca ohuaya quea nee nee po mee caje'yo. Ojaya epeejji quea pame nee cuana ca ca ohuaya ba'e tiitii mee caje'yo onijje eyajo. ¹⁸Esejaya eba Eyacuiñajji, pea cuana pe'a'i esejaya quea jea nee nee poanijo eseya mete'ama nei nei poaje. E'e, Eyacuiñajji esejaya quea jea neejojo eseya jjashahuabaquiani jama ba'a: —Eyacuiñajji enijje quea tecue epojji pojjeama.

Jamajjeya mete'ama poani. Ojjaña joya Eyacuiñajji quea jea a'ajja ca ca quea mete poani. Jjashahuabaquiani jama ba'a: —Eyacuiñajji enijje quea tecue nee nee poaje —jamaya jjashahuabaquianijo Jesosaja epeejji pojjeama poani. ¹⁹E'e, yahuajo nei nei Eyacuiñajjiya Jesosaja epeejji pojjeama cuana quea jea nee nee acanaje. Jamajjeya Eyacuiñajji quea jea nee nee ejja'aqui, pea cuana eseyaya quea jea nee nee ejja'aqui pe'a'i. ²⁰Beca cuana jama poani ba'a: —Ecuea Eyacuiñajji quea jea nee nee.

Jamatii oya cuana Jesosaja epeejji cuana quea jea nee a'ajja. Jamajjeya oya cuana siajje poani. Pea cuana cojja ba majje boti'ama acani. Jamajjeya ojaya Eyacuiñajji quea jea nee e'ajji pojjeama ca ba jjima ecojjaja.

²¹Eyacuiñajjiya eseya huohui ca poa jama ba'a: —Eya, Eyacuiñajji miquianajaya quea jea nee nee poanijo ;pea cuana quea jea nee acue pe'a'i!

Jesosaa eseya Edosiquiana jeabichajea mee cani

5 ¹Ojjaña Jesosaja epeejji cuana jjashahuabaquiani jama ba'a: —Jesosa Eyacuiñajjiya huoojea'yо ojjaña jaahuanajji.

Eseya jamaya jjashahuabaquianijo, Eyacuiñajjiya eseya oja bacua cuana po mee cani. Ojjaña joya Eyacuiñajji, esejaya Chii nei eyajo ani quea jea nee nee ajji

poani Eyacuiñajija Bacua Ejja Jesosa quea jea nee ajji poani pe'a'i. ²Oya jayojjaya Eyacuiñajji esejaya quea jea nee neejo, ojaya esohui jayojja jama poanijo pe'a'i esejaya eba jama ba'a: Ojjaña Jesosaja epeejji cuana, Eyacuiñajija bacua cuana esejaya quea jea nee poani. ³Eyacuiñajji e'le jojo nei esejaya quea jea nee poanijo jiquio ecua ojaya esohui etehue'yo cuana jayojja jama poani. Ohuaya eseya jamaya ameesahua canijo, ojaya esohui cuana camaja'ama. ⁴E'e, eseya Jesosa nijje jjapeequiani. Jamajjeya eshahuaja epeejji cuana mimicuiajeanobiajeaña. Eyacuiñajija bacua cuana poanijo eseyaya mimishi cuana mimicuiajeanobiajeaña. Mimishi'ama ba'e mee aña pe'a'i. ⁵E'e jojo nei Jesosa Eyacuiñajija Bacua Ejja oe nei. Jamaya jjashahuabaquianijo, onijje jjapeequianijo eseya mimishi'ama ba'eje. Eshahuaja epeejji cuana mimicuiajeanobiajeaña pe'a'i.

Ehuohui'yo Jesosa Quitojo

⁶Jesosa Quito meshi yasijje poeyajo, Huaniya oya enajo besa mee ca poa Eyacuiñajijo. Majoya ojaya ena' cuayaquiajo Jesosa mano'ya poa eseja mimishi cuijea'yojji sosejje. Jamaya Edojjoshahua Pameya huohui ca poa Jesosa Quitojo. Ojaya esohui Jesosajo e'le nei poani. E'e, Edojjoshahua Pame siajje po ajja nei nei. ⁷E'e, pea beca peejjimaa eyajo nequiya jamaya huohui cani Jesosa Quitojo. E'e, Echii neiya, Ebacua Ejja, Edojjoshahua Pameya pe'a'i, mahuisohuaya oya jayojjaya huohui cani Jesosa Eyacuiñajija Bacua Ejja. ⁸Jiquio meshijo pe'a'i pea beca peejjimaa Jesosa Quitojo huohui cani pe'a'i. E'e, Edojjoshahua Pameya jamaya huohui cani Jesosajo. Peaa Jesosa besa mee cajo Eyacuiñajjiya huohui ca poa jama ba'a: "Jesosa ecuea Ebacua Ejja quea jea nee nee" aca poa. Jesosa mano'yajo ojaya ena' cuayaqui'yonajejo pe'a'i ojjaña jama aca poa ba'a: "Oya Jesosa e'e jojo nei Eyacuiñajija Bacua Ejja nei" poa. Mahuisohuaya oya jayojjaya Jesosa Quitojo huohui cani. Jamajjeya esejaya eba e'e jojo nei Jesosa Eyacuiñajija Bacua Ejja. ⁹E'e, dejja cuanaja Jesosa ba neinei jjima. Jamatii onajaya esohui eseyaya shajja'ajjaña. Eyacuiñajija esohui Jesosajo ca ca e'e nei nei. ¡Maya oe ejjashajja'ajja neineiqui! Ohuaya yahuajo huohui ca poa jama ba'a: —Jesosa ecue Bacua Ejja.

¹⁰Jamajjeya ojjaña joya jama poani ba'a: —Jesosa Eyacuiñajija Bacua Ejja e'e jojo nei —jamaya poanijo Edojjoshahua Pame ese nijje nequi. Jamaya jjashahuabaqui sa po'yo ajjajo ca ca siajje poani jama ba'a: —Chojja, Jesosa Eyacuiñajija Bacua Ejja pojjeama. Eyacuiñajjiya ecuana siajje aca poa —jama siajje pomeya poani cuana.

¹¹E'e, Eyacuiñajjiya eseya huohui canaje jama ba'a: —Eyaya ecue Ebacua Ejja Jesosa huoojeanaje miquiana ba'e tiitii mee'yohua. Onijje jjapeequiajo miquianaya ba'e tiitii meeje'yo eyajo onijje —Eyacuiñajji jamaya poanaje.

¹²Jamajjeya oja Bacua Ejja Jesosa nijje jjapeequiajo, Eyacuiñajjiya eseya cuana ba'e tiitii mee caje'yo onijje eyajo. Onijje jjapeequi sa po'yo ajjajo ca se ca Eyacuiñajija Bacua Jesosa nijje eba'e mee'yoji pojjeama eyajo; quea nee nee poaje'yo tii tii.

Eba'ejji quea pame nee eyajo

¹³Ecuea epeejji cuana, miquianaya Eyacuiñajjija Bacua Ejja Jesosa nijje e'e jojo nei jjapeequiani. Jamajjeya eyaya jiquio esohui tehueña miquiana ba meeiji e'e jojo nei onijje eba'e tiitii'yojji eyajo. ¹⁴Esejaya eba e'e jojo nei jama ba'a: Eseyaya ojaya ejashahuabaquijji jayojja jama añajo, Eyacuiñajji eseja Chii nei nijje mimianijo ohuaya eseya shajja'ajja cani.

¹⁵E'e, o jayojjaya jjashahuabaquime poanijo e'e jojo nei Eyacuiñajjiya shajja'ajja caje esejaya emimi onijje. Jamajjeya esejaya emimi onijje jayojja jama ohuaya acaje'yo. Jamajjeya eseya bicho'ama onijje emimijji.

¡Esejaya epeejji quea mimishi poanijo mimicue Eyacuiñajji nijje!

¹⁶Epeejji cuana, Jesosaja epeejji quea mimishi poani ba majje jma epeejjijoya oe mimicue Eyacuiñajji nijje oja mimishi ecuijea'yojji, o ba'e tiitii mee'yojji! Jamajjeya Eyacuiñajjiya oja mimishi cuijea caje'yo. Pea epeejji cuanajo, coya quea mimishi nee nee po tiitiianijo ecuea miquianaya ehuohuijji pojjeama ojo emimijji Eyacuiñajji nijje jama ba'a: —Eyacuiñajji, ja'a ma epeejji quea nee po meeiji jamatii quea mimishi atiitii canijo! —choja, ja'a jamaya mimijji Eyacuiñajji nijje ma dejjajo! Eyacuiñajjiya joya quea mimishi nee nee ajji poani cuana quea nee nee po mee caje'yo. ¹⁷Eyacuiñajjija esohui jayojja jama a'ajjajo eseya quea mimishi poani. Jamatii mimishi amajje eseya Eyacuiñajji nijje mimi'yojji ohuaya esejaya mimishi cuijea caje'yo. Joya mimishi quea tai nee nee ajji tii tii poani ca ca Eyacuiñajjiya quea nee nee po mee caje'yo.

Esohui quijjeyeje nei tehue

¹⁸Ecuea epeejji cuana, esejaya eba Eyacuiñajjija bacua cuana, ma ohua quea pame nee po mee ca'yonaje quea mimishi tii tii po'yo ajja, pajea ca'yonaje. Eyacuiñajjija Bacua Ejja, Jesosa Quitohua ojaya epeejji cuana jaahuanca cani, nahue cani Edosiquianaja quea mimishi epo mee'yojji pojjeama. ¹⁹Esejaya eba pea'ai eseya Jesosaja epeejji poani, Eyacuiñajjija bacua cuana poani. Pea cuana ca ca eshahuaja epeejji poani. Edosiquiana aje oe ona huoojeajji poani. ²⁰Esejaya eba pea'ai Eyacuiñajjija Bacua Ejja, Jesosa meshi yasijje poeyanaje. Ohuaya eseya quea ja'a nee nee jjashahuabaqui meesahua cani. Jamajjeya ohuaya eseya Eyacuiñajji e'e nei ba meesahua cani. Jamajjeya eseya Eyacuiñajjija Bacua Ejja oe nei nijje, Jesosa Quito nijje jjapeequi majje eseya Eyacuiñajjija bacua cuana poani. Jesosaja Chii ca ca oe Eyacuiñajji e'e nei ese ba'e tiitii mee'yojji poani. ²¹Jamajjeya ecuea epeejji cuana, ja'a eshahuaja cuana nijje mimijji, eyacuiñajji nisho nijje pea'ai a'a mimijji! Jamaya capoahua.

Mahuiso ecuea esohui. Eyaya, Huani bajjaniya jiquio esohui tehuenejaje miquianajaya ebajji. Apoa.

HUANIJA ETEHUE'YO BECANEJJIJJI PEA'AI

2 JUAN

**Huaniya tehue canaje epona quea pame nee
que oja bacua cuana huasijje pea'ai**

¹Eya Huani, Jesosaja epeejji jaahuanajji etii. Ecuea epeejji Senia, eyaya mi que tehueña; miquea ebacua cuana huasijje pea'ai tehueña. Miya epona quea pame nee, Jesosaja epeejji nei. Jamajjeya miya e'e jojo nei ecuea quea jea nee. Ojjaña Jesosaja epeejji cuaa miya quea jea nee acani pea'ai. ²E'e, eseyaya Eyacuiñajji esohui quea jea nee aña. Ojaya esohui e'e nei. Jamajjeya eseya jjashahuabiquiani ma esohuijoya; pajea'yo ajja tii tii. Eyacuiñajji esohui jayojja se ba'yani pea'ai. Jamajjeya ojaya epeejji cuana quea jea nee aña, eseyaya.

³Eyacuiñajji esejaya Chii nei; ojaya Ebacua Ejja oe nei Jesosa Quito esejaya Emeshi Mese nei. ¡Ohuaya eseya caba'e meesahua cahua quea pame nee! ¡Esejo quea bei cajjashahuabiquiahua pea'ai! Ohuaya eseya quea bei po mee cani mimishi cuijea ca'yajje. Jamajjeya eseyaya ojjaña Jesosaja epeejji cuana quea jea nee aña e'e jojo nei.

Esohui e'e nei

⁴Senia, eyaya miquea ebacua beca cuana banaje. Oya cuana Eyacuiñajji esohui e'e jojo nei jama poani. Jamajjeya eya quea bihui nee nee poani. ⁵Jamajjeya ecuea epeejji, eyaya Eyacuiñajji esohui huohui o'oyaña mi que, ma eyaya yahuajo huohuinaje. Jiquio esohui eyacua pojjeama. E'e, yahuajo ojaya esohui jama poanaje ba'a: “¡Jesosaja epeejji cuaa ojjaña ojaya epeejji cuana quea jea nee ca'a cahua!” ⁶Eyacuiñajji esejaya quea jea nee poanijo ojaya esohui jama epo tiiti'il'yo. Ojaya esohui yahuajo jama poa ba'a: “¡Pea cuana miquiaaya quea jea nee nee atiitiicue!”

⁷Epeejji, quea hioso esohui huohujji nisho cuana poquiáni ojjaña meshi cuana huasijje. Dasia cani, de. Jiquio esohui huohujji nisho cuana jama siajje

pome poani ba'a: —Jesosa Eyacuiñajji e'e jojo nei pojjeama, Eyacuiñajji huoojea'yo dejja jaahuanajji Quito bajjani pojjeama. Quito dejja jayojjaya yamiji meshi yasijje poe'yo jjima —jama siajje pomeya poani cuana. Ma siajjepoji cuana Jesosaja epeejji pojjeama; o cuiapanajji poani. Quea huiso cuana dasia cani. ⁸ ¡Jashahuaba tiitiiquicue quea ja'a nee! Jamajjeya ojaya miquianaya edasia'yojji pojjeama. E'e, Jesosajo ba'yanijo, ojo chacoaña quea pame neejo pea'ai, quijje eseya quea huiso sosequia caje'yo Eyacuiñajjiya, eyajo. Ma siajjepoji cuaa miquianaya dasia ca chana'; onijje poquiquehuajo ca ca miquianaya aema' jayojja jama poaje'yo Jesosa poe o'oyajo.

⁹Joya Jesosaja esohui jama a sa po ajja aje oe Eyacuiñajji epeejji pojjeama. Eseya Jesosaja esohui jama poanijo ca ca Eyacuiñajji nijje jjapeequiani e'e jojo nei; oja Bacua nijje, Jesosa Quito nijje jjapeequiani e'e jojo nei pea'ai. ¹⁰Pea dejja cuana miquianajaya equi yasijje poeyanijo, oya cuana Jesosaja esohui e'e jojo nei huohui sa po ajjajo, ja'a jama ajji ba'a: —Epeejji, ¡ecuea equi yasijje dobicue! —a'a ajji! Chojja, oya Eyacuiñajji epeejji pojjeama. ¹¹Onijje jjapeequianijo oya miyaya quea mimishi po meesahuaña. Jamaya quea tai.

Pea esohui oe neiya huohui cani Huaniya

¹²Quea huiso esohui huohui sa eyaya aña miquiana que. Ma esohui cuana ecuea etehuejji pojjeama. Quijje eya miquiana que poqui sa poani. Miquiana nijje nequi majje eyaya quea huiso pea esohui huohuije. E'e, eseya ojee po'yo majje quea bihui nee nee poaje'yo.

¹³Mique shehueja bacua cuaa jama acanaje ba'a: —A'i, ¿achajja acuae mi ani so'o?

Mahuiso ecuea esohui. Eyaya, Huaniya, Jesosaja epeejji jaahuanajji etiiya jiquio esohui tehuenaje. Apoa.

HUANIJA PEA ETEHUE'YO PEA BECA PEEJJIMA

3 JUAN

Huanija pea etehue'yo, quijjeyejje nei oja tehue

¹Eya Huani, Jesosaja epeejji jaahuanajji etii. Ecuea epeejji Cayo, eyaya jiquio esohui tehueña miquea ebajji. Esejaya quea boti nee nee Jesosaja esohui e'e nei. Jamajjeya miya ecuea epeejji nei, ecuea quea boti nee nee.

²Ecuea epeejji, eya Eyacuiñajji nijje mimiani mijo jama ba'a: —Eyacuiñajji, jecuea epeejji Cayo jaahuanacue! Oya Jesosa nijje quea ja'a nee jjapeequiani. Jamajjeya ¡oya quea ja'a nee ba'e meesahuacue! —eya poani.

³Jesosaja pea epeejji cuana e que poeyanaje. Ohuaya eya huohui canaje jama ba'a: —Cayo quea pame nee nee ba'yani. Ohuaya Eyacuiñajji esohui jayojja jama atiitii cani —eya acanaje pea cuaa.

E'e, miya Eyacuiñajji nijje jjapeequiani quea pame nee. Jamajjeya eya quea bihui nee nee poani mijo. ⁴E'e, ojjaña Jesosaja epeejji cuana ecue bacua cuana jama. Jamajjeya Jesosaja esohui quea pame nee jama ba'yanijo, eya quea bihui nee nee poani shajja'ajja majje.

Huani quea bihui nee poani Cayojo

⁵Ecuea epeejji Cayo, miyaya Jesosaja epeejji yahuajo miquea eba pojjeama cuana jaahuanana quea pame nee, mi que poeyajo. ⁶Jamajjeya Jesosaja epeejji cuaa poe majje ecuana huohui canaje jama ba'a: —Cayohua Jesosaja epeejji cuana quea jea nee acani —jamaya onaaya eya acaña'yonaje.

¡Jesosaja epeejji cuana poqui meesahuacue! Jamaya quea pame nee. Eyacuiñajji chaco canijo, oya cuana ojaya quea boti nee. Jamajjeya ¡miyaya oya cuana jaahuanacue quea pame nee; a'a jaahuanan pajea'yojji! ⁷Oya cuana poquiani ojjaña meshi cuana huasijje Jesosaja esohui huohuiya. Poquije oya cuana Jesosaja epeejji pojjeama nijje mimi jjima poani jama ba'a: —¡Ba'e meesahuacue mo! —jama po ajjaya oya cuana. ⁸Jamajjeya

eseyaya Jesosaja epeejji poaniya ¡Jesosaja esohui huohuijji cuana poqui meesahuacue! Jamaya eseya o jayojjaya Jesosaja echacojjii poani.

Dejja Diotepe bajjani quea mimishi poanaje

⁹Eyaya esohui tehue'yonaje Jesosaja epeejji cuana jomajo tii ba'e yasijje. Jamatii Diotepeya ecuea etehue'yo jama a sa po'yo ajja. Jomajo tii oya Jesosaja epeejji cuana jaahuanajji oe nei nequi sa poani, Diotepe. Oya mimi sa po ajja jama ba'a: —E'e, Eyacuiñajjiya Huani huoojea ca'yonaje. Jamajjeya ¡Huanija esohui shajja'ajjacue!

¹⁰Miquiana que poe'yo majje eyaya huohuije'yo Diotepe ba'yani quea mimishijo. Oya ecuanajo maimaiani, niñeba cani quea tai. Siajje poani. Jesosaja pea esohui huohuijji cuana oque poquiao, Diotepe onijje jjapeequi'yo ajja. Oya o bobia ajja. Pea cuana bobia mee ajja pea'ai. Onaa bobia sa acanijo, oya quea tecue poani: —¡Pea esohui huohuijji bobia sa añajo miquianaya aje oe Jesosaja epeejji pojjeama! Jamajjeya ¡a'la ecuana nijje jjapeequijji! —jamaya acani Diotepeya.

¹¹Ecuea epeejji Cayo, ¡a' dejja quea mimishi jama pojji! Dejja cuana quea pame poani cuana Jesosaja epeejji poani. Quea mimishi poani ca ca Jesosaja epeejji pojjeama.

Dejja Demetio bajjani quea pame poani

¹²Ojjaña dejja cuana quea bihui nee mimiani Demetiojo jiquio jama ba'a: —Demetiohua quea pame nee acani —poani cuana. E'e, Edojjoshahua Pameya Demetiojo Jesosaja epeejji cuana mimi meesahua cani quea pame nee. Ecuea esohui ojo e'e nei poani. Jamaya miquea eba.

Esohui quea bihui nee epo meeiji

¹³Cayo, quea huiso esohui huohui sa poani eya mi que. Tehuetehue majamaja sa po ajja ca iña. ¹⁴Jamajjeya quijje pishana eya poqui sa poani mi ba o'oya. Mi ba majje mimije o'oya. ¹⁵¡Eyacuiñajjiya miya quea bei nee capo mee cahua! Ojjaña miquea epeejji cuana jiquiojo ba'eya jama acani ba'a: —¿Achajja acuae mi ani so'o, Cayo?

¡Ojjaña ecuanaja epeejji cuana nijje mimicue ejo jama ba'a: —¿Achajja acuae nequiana so'o? Huani poani —acue!

Mahuiso. Eyaya, Huaniya, Jesosaja epeejji cuana jaahuanajji etiiya jiquio esohui tehuenaaje. Apoa.

JODEJA ESOHUI

JUDAS

Jodeya esohui tehue canaje Jesosaja epeejji cuana huasijke

¹Eya Jode, Satiacoja chahua. Eya Jesosa Quitoja huoojea'yo. Ecuea epeejji cuana, eyaya miquiana que tehueaña jama ba'a: Esejaya Chii ai Eyacuiñajjiya miquianaya iyaa ca'yonaje onijje ejjapeequi meesahua'yojji. Miquianaya ojaya quea jea nee nee poani; Jesosa Quitohua miquianaya jaahuana cani pealai. ²¡Eyacuiñajjiya miquianaya quea jea nee ca'a cahua tii! ¡Miquianaya caba'e meesahua cahua quea ja'a nee! ¡Quea bei nee caba'e meesahua cahua pealai!

Esohui huohujji nisho cuana

³Ecuea epeejji cuana, yahuajo eya jjashahuuba neinequinaje miquiana que esohui etehuejji, Jesosa Quitohua esejaya mimishi cuana cuijea ca'yonajejo eba meeiji. Jjeya ca ca quea huiso jjashahuubaqui majje eyaya pea esohui tehueaña miquiana que jama ba'a: ¡Huohui neineicue Jesosa Quitoja esohui! Eyacuiñajjiya ma esohui e'e jojo nei huoojea canaje ese que, ma ojaya epeejji nei cuana que. ¡Ma esohui quea pame nee a'a huohui taijji!

⁴E'e, eyaya jamaya huohuiaña Eyacuiñajjiya esohui huohujji nisho cuanajo. Ma dejja quea mimishi cuana Jesosaja epeejji cuana nijje jjapee nishoquiani. Quea mimishi atiitii sa poanijo oya cuana jama siajje pome poani ba'a: —Eyacuiñajji quea pame nee poani; dejja cuana quea mimishi jamatii caba'yahua; cuaqui yasijje ehuoojea'yojji pojjeama Eyacuiñajjiya —jamaya poani esohui huohujji nisho.

Ma esohui huohujji nishohua Jesosa Quito, esejaya Emeshi Mese nei oe nei cajaa aca'yonaje. Yahuajo nei nei Eyacuiñajjiya esohui tehuejji cuaa esohui tehue ca poa ma dejja quea mimishijoya. Jama tehueme aca poa ba'a: "Quijje Eyacuiñajjiya esohui huohujji nisho cuana tecuea neinei caje'yo, de".

⁵¿Yajja acuae Eyacuiñajjiya aca poa yahuajo Isaeni etiiquiana shajjama' poajo? Miquianajaya eba; jamatii miquianaya eyaya huohuije o'oya. Yahuajo

Eyacuiñajjiya Ejito dejja quea mase cuana Isaeni cuana pichojea mee ca'ya poa; Ejito meshijo ba'e cuaya meesahuaqui ca'ya poa pea'ai. Jamatii quijje pishana Isaeni cuana ojaya esohui shajja'ajja sa po ajja poajo, quea huiso mano mee ca'ya poa. ⁶Cuanaya yahuajo Eyacuiñajjiya esohuidojiji beca cuana quea mimishi poa eyajo ba'e. Eyacuiñajjiya ehuohui jayojja jama chaco tiitii sa po ajja poa. Jamajjeya Eyacuiñajjiya oya cuana iña majje jeyo ca'ya poa; quea huesha nee nee jeanobiajea ca'ya poa, cuayaqui mee'yo jjima aca'ya poa. Quijje Jesosa Quitohua poe o'oya majje esohuidojiji tai janobajjima nei tecueajea caje'yo quea nee nee epo mee tiitii'yojji. ⁷Yahuajo nei Sonoma cuiñajji, Jomona cuiñajji pealai, pea cuiñajji sisi quea chipi nee yaña poa. Jomajo dejja quea huiso cuana quea mimishi nee nee poa. Pea dejja cuana see huejja cojjojji poa, de. Quea mimishi nee nee jjashahuuba tiitiiqui nequia poa. Esohuidojiji quea tai jayojja jama quea mimishi poa. Jamajjeya Eyacuiñajjiya oya cuana, ma dejja quea mimishi cuana pea'ai quiyo jeyo jeyojea mee ca'ya poa cuaquiya. Jamajoya ojjaña cuana jjeya ba'e ba mee caje Eyacuiñajji mimishijo quea quene nee nee poani; cuaquijo quea nee nee po mee caje'yo mimishi poani cuana. ⁸Maya jiquio esohui huohuijji nishoja eba, ma jjeya nei miquiana que poeyanija eba. Jamatii jjeya oya cuana quea mimishi nee nee poani; yahuajo nei nei ba'e cuana jayojjaya jama poani. Ojaya ejjashahuubaqu'yojji quea tai poani cuanaya. Eyacuiñajjiya ehuohui'yo cuana shajja'ajja sa po'yo ajja pea'ai. Eyacuiñajjiya esohuidojiji quea ca'a cuana niñeba cani pea'ai jama ba'a: —Ecuanaja ejjacahuibaquijji Eyacuiñajji e'e nei.

⁹Jamatii Eyacuiñajjiya esohuidojiji quea ca'a nee nee Miyeni bajjani pea esohuidojiji quea mimishi nijje mimijaji jjima poa. Yahuajo Moisesi mano'yajo, Miyeniya Moisesija eyami ohuajea sa aca poa; Edosiquiana ca ca Moisesija eyami ohuajea mee sa po ajja poa. Miyeniya Edosiquiana mimicuiajeanobiajea canaje, jamatii onijje mimijaji jjima poa. Jamaya miminaje ba'a: —;Eyacuiñajjiya oe miya categuea cahua, ca joya mimishishi! —aca poa.

¹⁰Miquiana nijje nequi esohui huohuijji nishohua ca ca aquiana joya ojaya ba jjimajo niñeba cani quea mimishiya jjejojo. Jjashahuuba bamebamequi ajja oya cuana. Ijjiacajji jayojja jjejojo jjashahuubaqu'ajja poani; quea ja'a po ajja. Jamajjeya quea mimishi tii poani jjejojo cuaquijo tii nequi tiitije'yo. ¹¹Eyacuiñajjiya oya cuana quea yeno capo mee tiitii cahua jjashajja'ajjaqui ajja jojoya. Esohui huohuijji nisho cuana dejja bajjani Cainija ejjashahuubaqu'yojji jayojja jama poani, quea mase nee, quea bejjo nahue jjejojo. E'e, esohui huohuijji quea pame cuana niñeba cani tii tii. Mimijaji neineiani. Quea mimishi tii tii poani, dejja Banaami bajjani jayojja jama poani, ma yahuajo nei quea bejjo nahue poaninaje. Jamajjeya ohuaya esohui huohui tai caninaje. Onaya cuana shajjama' poani, dejja Cone bajjani jayojja jama, ma yahuajo Eyacuiñajjiya esohui shajja'ajja sa po ajja poa. Jamajjeya Eyacuiñajjiya ma ecua dejja tai cuana yahuajo mano mee ca'ya poa jayojja jama jjeya esohui huohuijji nisho cuana acaje'yo.

¹²Jiquio esohui huohuijji nisho cuana quea mimishi nee nee. Miquianaya ojee Jesosa Quitoja bobi ijijañajo, quea bihui nee poanijo, oya cuana jama poani ba'a: —Ecuana miquea epeeiji poani.

Chojja. Miquianaya dasia cani. Miquiana nijje ijija'ljjianijo jeffe ajja, quea bobi nee, bicho'ama poani, de. Oya cuana jama poani ba'a: Bo ba majje eseya jjashahuabaquiani jama ba'a: —Ena poaje, de.

Jamatii beniya bo cuana dojo cuajicuaji canijo ena oque ajja que yasijje. Jamaya jiquio esohui huohuijji nisho cuana aje oe; esohui quea pame huohui ajja, de. Oya cuana acui jjaja ajja jama poani pea'ai. Acuijjajja shejo acui ba majje acuijjajja sa'ajja cani e'acuijjajja meseya. Ejajja chamajo acui jajajea ca'yani. Jamaya esohui huohuijji nishohua esohui quea pame huohui ajjajo, Eyacuiñajjiya oya cuana cajaa acaje'yo. ¹³Oya cuana enashajo jama poani: Bae ai'ajo enashajo po majje meshi jeapohui cani; ena quea jehue nee poani. Enashajo jayojja jamaya jiquio esohui huohuijji nisho quea tai poani. Miquianaya quea mimishi ba'e mee ca chana' pea'ai; poquiquehua mee ca chana' eshahuaja ejiojji yasijje. Jamajjeya oya cuana cuaquí quea misi nee yasijje dobi tiitii meequei caje'yo. Majameta oquequi majje jjinanani, chama'yoo tii ponanani, quea misi nee yasijje oquequiani. Jamaya esohui huohuijji nisho; esohui e'e jojo nei huohui ajjajo cajaa acaje'yo Eyacuiñajjiya; quea huesha nee nee, quea tai nee nee yasijje huoojea caje'yo quea nee nee epo'yojji tii tii.

¹⁴Ebionei nei dejja Adanaja osecuaja osecua tii majje, ojaya osecua cuana tii majje pea'ai etiiquiana Enoqui bajjani ba'ya poa. Yahuajo nei nei Enoqui miminaje jiquio esohui huohuijji nishojo pea'ai. Jama poa ba'a:

“¡Bacue oe! Esejaya Emeshi Mese nei poeje'yo ojjaña esohuidojiji
pame cuana nijje.

¹⁵Oya poeje'yo ojjaña mimishi cuana janobajjima nei tecueajea'yo yohua.

Ma dejja cuana quea mimishi poani; Eyacuiñajjiya esohui jayojja
jama a sa po ajja. Eyacuiñajji niñebajji poani. Jamajjeya tecueajea
neinei caje'yo Eyacuiñajjiya”.

Jamaya Enoqui yahuajo nei nei poa jiquio esohui huohuijji nisho cuanajo.

¹⁶E'e, jiquio esohui huohuijji nisho cuaa esohui huohuijji quea pame cuana niñeba cani tii tii. Mimijaji neineiani. Quea mimishi tii tii po sa poani. Onajaya ejjashahuabaquijji quea miminaa poani bicho'ama. Pea dejja cuana nijje mimi nishoani ejjadasiaquiji.

Pea esohui dejja mimishi cuanajo

¹⁷Ecuea epeeiji cuana, ja'a pajea'yojji esejaya Emeshi Mese nei Jesosa Quitoja huoojea'yo cuanaja esohui! Jamaya onaaya huohui canaje ba'a:

¹⁸—Jesosa Quito poe o'oya jjimahuajo, ojjaña cuana quea mimishi nee nee poaje. Miquianaya Jesosa nijje jjapee neineiquianijo, oya cuana mimijaji neineije miquiana nijje. Ojaya ejjashahuabaquijji quea mimishi nee jama atiitii caje'yo pea'ai —jamaya Jesosaja huoojea'yo cuaa acanaje.

¹⁹E'e, jiquio esohui huohuijji nisho cuana bicho'ama cuanaya, de; quea jjashahuabaqui tai nee nee. Oya cuana Edojjoshahua Pame nijje jjapeequi sa po ajja. Jamajjeya ojaya esohui quea quehuajo Jesosaja epeejji cuana ojee jjapeequi pajea mee ca'yani esohui e'e nei pojjeamajo.

²⁰Ecuea epeejji cuana, ¡miquianaaya ca ca oe Jesosa Quitoja esohui jayojja jama oe atiitiicue quea ja'a nee! ¡Ba neineicue ojaya esohui, ojjaña tii! ¡Pea epeejji cuana ba meesahuacue ma esohui e'e nei pea'ai! Edojjoshahua Pameya miquianaya mimi meesahua canijo, ¡mimi neineicue Eyacuiñajji nijje! ²¹Miquianaaya ishoaña esejaya Emeshi Mese nei Jesosa Quitoja epoe o'oyajijo. Ohuaya miquianajaya mimishi cuana cuijea ca'yonajejo, cuaqui yasijje epoqui'yojji pojjeama; eyajo ba'e tiitii mee caje'yo onijje. ¡Eyacuiñajjiya esohui jayojja oe ba'ecue! Jamajjeya ohuaya miquianaya jaahuana caje'yo quea bei; tecuea jjima acaje'yo.

²²Pea cuana jjashahuaba quehuauquianijo, ¡a'a onijje quea tecue nee nee pojji! ¡Esohui e'e jojo nei ba meesahua o'oyacue quea ja'a nee! ²³Jamajjeya oya cuana poqui ajja cuaqui yasijje mimishi ohua pajea ca'yajo. Jjashahuabaquicue jiquio jama ba'a: —¡Onajaya mimishi quea tai nee; mimishi cajaa!

Jamajjeya miquianaya quea mimishi po ajja, ma ecua onaya yahuajo quea mimishi nee nee poanaje jayojja jama po ajja.

¡Eyacuiñajji oe bihuiacue!

²⁴Eyacuiñajji quea ca'a neeya miquianaya quea ja'a nee ba'e meesahua caje'yo; mimishi'ama nei nei po mee caje'yo. Jamajjeya miquianaya quea boejea nee nee, quea bei nee nee pea'ai nequi mee caje'yo eyajo, o ani cojja nei eseaya nequije'yo. ²⁵Yani oe nei Eyacuiñajji e'e jojo nei. Jesosa Quito, esejaya Emeshi Mese nei esejo mano'yonajejo, Eyacuiñajjiya eseaya ba'e tiitii mee caje'yo onijje eyajo. E'e jojo nei Eyacuiñajji oe nei eyajo yani tii tii quea ca'a nee nee, quea ja'a nee nee. Oya ojjaña Emeshi Mese oe nei po tiitije'yo. Ohuaya ojjaña amee tiitii caje'yo pea'ai. E'e nei jamaya oya poanaje yahuajo, meshi pana jjimahuajo; jjeyahua nei jamaya oya poani; quijje jamaya oya po tiitije'yo.

Mahuiso. Eyaya, Jodeya, Jesosa Quitoja huoojea'yohua jiquio esohui tehuenaje. Apoa.

HUANIYA TEHUE CANAJE MA JESOSA QUITOHUA QUIJJE OHUA ACAÑAJE'YO

Eyacuiñajjiya jjaja'aqui mee canaje quijje ohua acaje'yo

1 ¹Eya Huani, Jesosaja epeejji jaahuanajji etii. Jesosa Quito Hua
eya tehue mee canaje jiquio esohui cuana ojjaña que jama ba'a:
Eyacuiñajjiya jama acanaje ba'a: —Eyaya ecuea Ebacua Ejja Jesosa Quito
ojaya ebajji jjaja'aqui meeje'yo ma eya quijje aje. Jamajjeya Jesosaa
ojjaña ojaya epeejji jaahuanajji cuana ba mee caje ma eya quijje pishana
aje —Eyacuiñajji poanaje.

Ba majje Jesosaa esohuidojiji huoojea canaje e que. Esohuidojijiya
ecuea ebajji jjanequipanaqui mee canaje quijje Eyacuiñajjiya acaje.

²Esohuidojijiya ba mee cajo, eyaya tehue'yonaje ojjaña ma ohua quijje
acaje. Jiquio esohui ecue tehue Eyacuiñajjiya huohui cajje. Jesosa
Quito Hua ecuea ebajji jjanequipanaqui mee canaje e'e jojo nei. ³Ojjaña
joya jiquio esohui etehue'yo e'e jojo nei bajji poani queabihui nee
poaje'yo. E'e, jiquio ejjanequipanaqui meeji ba majje, jiquio esohui
jayojja jama amajje pealai queabihui nee poaje'yo. Ojjaña jiquio
etehue'yo jayojja quijje pishana apoa poaje'yo. Beshahua nei apoa.

Esohui etehue'yo Jesosaja epeejji cuana huasijke Asia meshijo ba'e yasijke

⁴⁻⁵Eyaya Huaniya esohui tehueaña Jesosaja epeejji cuana huasijke me
oejje beca cuiñajjiyo ba'e yasijke Asia meshi yasijke pealai. Ecuea esohui
etehue'yo jama ba'a: Eyacuiñajji yahuajo nei nei nequi titiia poa. Jjeya nei
yani tii tii. Quijje oya ani titiije'yo pealai. E'e, oya poeje o'oya. Edojjoshahua
Pame nequiani Eyacuiñajji e'anioque ani cojja nei. Jesosa Quito jomajo
yani pealai. ¡Ohuaya miquianaya cajaahuana cahua quea pame nee; quea
bei capo mee cahua pealai! E'e, Jesosa Quito Hua e'e jojo nei huohui canaje
Eyacuiñajjiyo. Oya mano'yo majje ebionei shequi o'oyanaje eba'e titiijyozjji.
Oya ojjaña emeshi mese cuana huoojeajji poani pealai. Jesosa ecuana quea

jea nee poanijo mano'yonaje acui ecueata'apeejo. E'e, oya mano'yajo oja ena' cuayaquinaje esejaya mimishi cuana cuijea'yoiji. ⁶Oya ojjaña huoojeajji poanijo eseya ojjaña huoojeajji po mee cani onijje. Eseya huoojea cani esohui huohuiya oja Chijja, Eyacuiñajjiya. ¡E'e, oya oe nei ojjaña huoojea'yoiji quea ca'a capo'yahua tii tii! ¡Ojjañaa oya cabihuia cahua tii tii! Jamaya capoahua.

⁷¡Bacue! Oya poeje o'oya bo biajje. Ojjañaa oya ba caje. O quecu'a'yoiji epohua pea'aiya oya ba caje. Ojjaña dejja mimishi ojjaña meshijo ba'e o ba majje quea mete nee nee poaje'yo. Pa neineije'yo jama ba'a: —¡Coya aje oe Jesosa poeyani esejaya mimishijo ese napaa! —ojjaña poaje. E'e, jamaya capoahua.

⁸—Eya yahuajo anitiitii poa. Jjeya eya yani tii tii; quijje eya poeje o'oya pea'ai. Eyaya ojjaña jamaya aña —Eyacuiñajjiya jamaya acani. Oya ojjaña huoojea'yoiji quea ca'a nee nee poani.

Huaniya Jesosa ba ca'ya poa ejjanequipanaqui nequi

⁹Epeeji cuana, eya miquianajaya edoe mese jayojja jama poani eseya Jesosa nijje jjapeequianijo. Jesosaa eseya huoojea canijo ese nijje anije'yo. Onijje jjapeequianijo, pea cuaa eseya quea nee po mee cani. Eseya quea nee poanijo jamatii Jesosa nijje jjapeequi pajea'yo ajja. E'e, eya iña majje pea cuaa aje iña oe eya nasi Patamoso bajjani yasijje huoojeajea canaje Eyacuiñajjiya esohui huohuijijojo pea'ai. ¹⁰Edojjoshahua Pameya eya ba mee canaje Jesosaja epoe o'oyajji. Oya jama poanaje ba'a: E daasajje nequi eyaya shajja'ajjanaje Jesosaja esohui. ¹¹Eshe'ana janobajjima nei emiajji jayojja jama Jesosaa eya huohui canaje jama ba'a: —Huani, eyaya miya quea huiso ba meeje. ¡Maya oe tehuecue! ¡Tehue mee majje esohui huoojeacute ecuea epeeji cuana huasijje me oejjje beca cuiñajjijo ba'eca huasijje, Asia meshi yasijje! Ma cuiñajji huiso cuana huasijje ba'a: Epeso cuiñajji, Esemina cuiñajji, Penamo cuiñajji, Tiatina cuiñajji, Sanisi cuiñajji, Pinanepia cuiñajji, Naonisea cuiñajji pea'ai yasijje —Jesosa poanaje.

¹²Majoya ojaya esohui shajja'ajja majje eyaya bajeanaje ae enijje mimiani ebajji. Eyaya banaje cuaquijiji me oejjje beca huisome cuaquijiji nequijjijo nequi. ¹³Cuaquijiji yiyesamaneijo nequi eyaya banaje Jesosa, ojjañaja Edoe Mese. Oya ca ca oe quea pame nee nee nequi jama ba'a: Oja daqui quea ao nee nee ojaya ejiojji yasijje yee ba'e. Mei huo'o esipi quea nahuejo ejjayica'aqui dojjojanijijje. ¹⁴Ojaya ehuojja ña quea oshe nee nee bo oshe jayojja. Ojaya ecojja quea jeajahua nee nee cuaqui jijiani jayojja. ¹⁵Ojaya ejiojji ca ca quea siyo nee nee baa cuaquijo quea quiyo nee nee po majje quiyo huo'o huo'oani jayojja jama. Ojaya emimi'yo janobajjima nei ena quea cuejipashi nee mei pasaca biajje oquequiani jama. ¹⁶Majameta me oejjje beca huisome oja me jjotojo yani, ebianeí mejje. Oja enabajje cuayanaje esohui quea ja'a nee nee baa quea shejji jayojja; baa se beca jayojja. Ojaya ebose quea jeajahua nee nee eshequi quea jiji nee nee jayojja.

¹⁷O ba majje eya quea mete jjejojo jaabichaquinaje oja ejiojji pejjejo, emano'yo jayojja mo jaanaje. Jamajjeya ohuaya eya napa'ajja canaje ebianeい emejje. Jama poanaje ba'a: —¡A'a quea mete pojji! Eya yahuajo nei nei nequi tiitiia poa. Eya nequi tiitiiani pea'ai. ¹⁸Eya mano'yo majje shequi o'yanaje. Eya eshe tii tii yani. Eya emano'yo huoojea'yojji. Eyaya oya cuana eshe o'oya po meeje'yo, yamiji po meeje'yo. Ecue esohuijo ojjaña mimishi cuana poquije'yo cuaqui yasijje. Ojjaña quea pame ca ca eyahuasijje poquije'yo.

¹⁹Huani, eyaya miya ba meeña ojjaña ma ohua jjeya nei acani, quijje nei ohua acaje pea'ai. ¡Ba majje maya tehuecue! ²⁰Eyaya miya ba meeje majameta me oeje pea beca huisome ecue me jjotojo ani, cuaquijji nequijji me oeje beca pea'ai. Maya miquea quea quehua. Jama poani ba'a: Mei huo'o cuaquijji nequijji quea nahue jayojja oya cuana, ecuea epeeiji nei cuana ba'e ma me oeje beca cuiñajijo ba'eca. Majameta cuana esohui huohuijji cuana jayojja, ecuea epeeiji jaahuanajji jayojja pea'ai —Jesosa poanaje enijje.

Jesosaja esohui Huaniya tehue canaje Jesosaja epeeiji cuana Epesojo ba'eca huasijje

2 ¹Majoya Jesosaa huohui canaje jama ba'a: —Huani, ¡ecuea esohui tehuecue esohui huohuijji Epesojo ba'e yasijje! Oya ecuea epeeiji jaahuanajji. Jama tehueme acue ba'a: "Jamaya eyaya miya huohuaña ba'a: Eya Jesosa Quito. Eyaya esohui huohuijji cuana majameta me oeje beca huisome jayojja jaahuanajja ecuea eme jjotojo. Eyaya ecuea epeeiji ma cuaquijji nequijji jayojja jaahuanajja pealai. Jamaya eyaya miya huohuaña ba'a: ²Ecuea eba ojjaña miquianajaya eba'ejji. Miquianaaya enijje ojjaña pojxajo chaco neineiaña. Quea camaja. Jamatii enijje chaco pajea'yo ajja. Miquianaya jjapeequi ajja esohui huohuijji nisho cuana nijje. Oya cuana siajje poanaje jama ba'a: —Jesosaa ecuana huoojea canaje oja sohui huohuiya.

"Jamatii miquianaaya ona shajja'ajja nei nei majje huohuinaje jama ba'a: —Chojja, miquianaya siajje poani. Esuhui huohuijji nisho jja mi coma —miquiana poanaje. ³E'e, miquianaaya enijje chaco neineiaña, chacochaco pajea'yo ajja. Enijje chacochacoanijo, pea cuaa miquianaya napa canaje quea huiso. Jamatii enijje miquianaya chacochacoanijo tii. ⁴Jamatii eya miquianajo quea yeno poani. E'e, yahuajo eya miquianajaya quea jea nee nee poanaje. Jjeya ca ca chojja, quea jea pishana. Jamaya quea mimishi. ⁵Jamajjeya ¡jjashahuabaquicue! Yahuajo eya miquianajaya quea jea nee nee poanaje. ¡Eya quea jea nee nee a o'oyacue, ma ecua miquiaaya yahuajo anaje jamaya acue! ¡Bacue oe! Miquianaya e shajja'ajja sa po ajjajo eya poecuajije miquiana que. Jiquio ecua cuaquijji quijjo'yo majje quea misi po'yani jayojja jama eyaya miquianaya ecuea esohui huohui pajea meeje'yo, ca miquianaya ma ecua yahuajo miquiaaya eya quea jea nee nee anaje jama mi a o'oyajo. ⁶Jamatii pea miquianajaya ejjashahuabaquijji quea ja'a ecuea ejjashahuabaquijji jayojja jama poani

ba'a: Dejja Niconasi bajjanija epeeji cuana quea mimishi. Miquianajaya ojaya esohui boti'ama. Maya ecuea boti'ama pealai.

⁷"Jamajjeya ıshajja'ajjacue Edojoshahua Pameja esohui ojjaña ecuea epeeji cuana Asia meshijo ba'eca huasijje! ¿A'a miquianaya e shajja'ajjaji? ¿A'a shajja'ajja sa poani? Ojjaña joya enijje jjapee tiitiiquiani eshahua jeabichajeajji poani. Jamajoya eyaya oya cuana nequi tiitii meeje'yо Eyacuiñajji nijje eyajo. Eyaya oya cuana acuijjajja ijja meeje Eba'e tiitii mee'yoji, ma Eyacuiñajji acui yiyejo nequi".

—Jamaya eyaya, Jesosaa huoojeaña ecuea esohui etehue'yо ecuea epeeji cuana Epesojo ba'eca huasijje. ¡Jamaya tehuecue, Huani!
—Jesosaa eya acanaje.

Jesosaja esohui ojaya epeeji cuana Esemina cuiñajjijo ba'eca huasijje

⁸Majoya Jesosaa huohui ca o'oyanaje jama ba'a: —Huani, ¡ecuea esohui tehuecue esohui huohuijji Eseminajo ba'e yasijje! Oya ecuea epeeji nei jaahuanajji. Ejo jama tehuecue ba'a: "Eya Jesosa Quito. Jamaya eyaya miya huohuaña: Eya yahuajo nei nei nequi tiitiia poa. Eya nequi tiitiiani pealai. Mano'yо majje eya shequi o'oyanaje. ⁹Ecuea eba miquianaya enijje jjapeequianijo pea cuaa napa canaje. Jamajjeya miquianaya aema!. Jamatii ecuea epeeji poanijo miquiana quea aquiana huiso jayojja. Quea bei nee nee poani. Ecuea eba pea'ai beca cuaa miquianaya niñeba cani. Oya cuana siajje poani jama ba'a: —Ecuanaya Jodio cuana —poani.

"Chojja, Jodio cuana pojjeama oya, Eyacuiñajji epeeji pojjeama. Edosiquianaja epeeji cuana poani. ¹⁰¡Bacue! Quijje pishana miquianaya napa caje cuaa. Edosiquianaja epeeji cuaa miquianaya iña majje jeanobia caje enijje ejjapeequi pajea'yoji nisho. Oe pojji cahuime miquianaya quea nee po mee caje, 10 cahuime. Jamatii ja'a quea mete pojji! ¡A'a enijje jjapeequi pajea'yoji jamatii cuia cajje! E pajea'yо ajja tii tii eyaya miquianaya ba'e tiitii meeje'yо eyajo Eyacuiñajji nijje. ¹¹Jamajjeya ıshajja'ajjacue Edojoshahua Pameja esohui ojjaña ecuea epeeji cuana Asia meshijo ba'eca cuana huasijje! Ojjaña joya enijje jjapee tiitiiquiani cuaqui yasijje epoqui'yoji pojjeama".

—Jamaya eyaya, Jesosaa huoojeaña ecuea esohui etehue'yо ecuea epeeji cuana Eseminajo ba'eca huasijje. ¡Jamaya tehuecue, Huani!
—Jesosaa eya acanaje.

Jesosaja esohui ojaya epeeji cuana Penamo cuiñajjijo ba'eca huasijje

¹²Majoya Jesosaa eya huohui ca o'oyanaje jama ba'a: —Huani, ¡ecuea esohui tehuecue ecuea esohui huohuijji Penamo cuiñajjijo ba'e yasijje! E'e, esohui tehuecue jama ba'a: "Eya Jesosa Quito. Eyaya esohui huoojeaje mi que. Baa ose miji pealai isho jama quea shejji nee nee, quea ca'a nee nee jayojja ecuea esohui. ¹³Ecuea epeeji cuana, miquianaya ba'yani cuiñajji quea mimishijo. Beshahua nei ojjaña jomajo ba'e Edosiquiana nei nijje jjapeequianijo. Jamatii

miquianaaya ecuea esohui jayojja jama atiitiiña. Ecuea epeejji Anatipa bajjani miquiana nijje ba'e'yonaje. Ohuaya ecuea esohui huohui majamaja canaje quea pame nee. Jamajoya oya pea cuaa quecua ca'yonaje. Jamatii miquianaya enije jjapeequi pajea'yo ajja.¹⁴ Jamatii eya miquianajo quea yeno. Quea mimishi poani miquianaya; Banaamija esohui jama aje oe poani beca cuana Penamojo ba'eca. Ohuaya, Banaamiya emeshi mese Banaca bajjani yahuajo nei nei ba mee ca poa Isaeni cuana quea mimishi, quea tai epo mee'yojji. Miquianaya beca cuaa Isaeni cuana quea mimishi ba'ya poa jayojja jama poani. E'e, jjeya bobi, noe cuanaya eyacuiñajji nisho bihuiajji dahua majje dejja mimishi cuana nijje ojee ijja'iijjani pea'ai. Pea epona cuana nijje quea mimishi poani pea'ai.¹⁵ Cuanaya miquiana nijje jjapeequiani beca cuana quea mimishi. Dejja Niconasi bajjanija esohui quea tai pajea sa po'yo ajja. Quea mimishi nee nee. ¹⁶ Jamajjeya ¡miquianajaya mimishi cuana pajea'yocue! Pajea sa po'yo ajjajo eya poecuajije miquiana que. Poe majje eyaya ecuea epeejji quea mimishi poani tecuea neineije'yo. Baa ose miji pea'ai isho jama quea shejji nee nee quea ca'a nee nee jayojja ecuea esohui poaje. Quea yeno nee nee po meeje'yo.

¹⁷ “Jamajjeya ¡shajja'aJJacue Edojjoshahua Pameja esohui ojjaña ecuea epeejji cuana Asia meshijo ba'eca huasijje! Ojjaña joya enije jjapee tiitiiquiani Edosiquiana jeabichajeajji poani. Jamajoya eyaya oya cuana ba'e meesahuaje'yo tii tii. E'e, yahuajo Eyacuiñajjiya ojjaña Moisesi nijje nequi pahui sisi eyajje oque ijja mee ca poa. Jamaya eyaya aje o'oya miquianajaya. Maya ecuea epeejji pojjeamaja ba jjima. Ecuea epeejji cuana huasijje eyaya quiaje mei oshe sisi pea'ai. Mei oshe biajje bajjani eyacua etehue'yo yani, maya onajaya ba jjima. Emei oshe meseja eba ojaye nei”.

—Jamaya eyaya, Jesosaa huoojeaña ecuea esohui etehue'yo ecuea epeejji cuana Penamojo ba'eca huasijje. ¡Jamaya tehuecue, Huani! —eya Jesosaa acanaje.

Esohui Jesosaja epeejji cuana huasijje Tiatina cuiñajjijo ba'eca huasijje

¹⁸ Majoya Jesosaa pea esohui huohui canaje jama ba'a: —Huani, ¡ecuea esohui jiquio eya huohuaña tehuecue esohui huohuijji Tiatina cuiñajjijo ba'e yasijje! Jamaya tehuecue ejo ba'a: “Eyaya, Jesosaa, Eyacuiñajjiya Bacua Ejja miquiana que tehueaña. Ecuea ecojja cuaqui jijjani jayojja quea ja'a nee nee. Ecuea ejiojji cuana baa huo'o cuaqui quea quiyo nee neejo nequi jayojja quea jiji nee nee poani.¹⁹ Ecuea epeejji, ojjaña joya miquiaaya aña cuana ecuea eba. Miquianaaya eya quea jea nee nee aña. Enije jjapeequi pajea'yo ajja nei nei pea'ai. Quea camajajo jamatii enije chaco pajea'yo ajja. Jamaya miquianaaya quea pame nee nee aña jjeya, yahuajo jama pojjeama; yahuajo quea pame pishana poa.²⁰ Jamatii eya quea yeno miquianajo, de. E'e, miquianaya quea mimishi poani. Epona quea mimishi Jesameni bajjani shajja'ajja cani beca cuaa. Oya aje oe siajjepoji jama poani ba'a: —Eya ca iña Eyacuiñajjiya huoojea'yo oja sohui huohuiya —oya poani.

“Chojja, siajje poani oya. Ohuaya aje oe ecuea epeejji cuana dasia cani. Quea mimishi po mee cani. E'e, ojaya esohui quea mimishijo beca cuana bobi, noe cuanaya eyacuiñajji nisho bihuajji dahua majje ojee ijja mee cani mimishi cuana nijje. Pea epona cuana nijje quea mimishi poani ojaya esohui quea mimishijo. ²¹Ecuea maya epona napa jjima; ohuaya pojja'a mimishi pajea caje'yo. Jamatii oya quea mimishi ca'a; pajea sa po'yo ajja. ²²Jamatjeya eyaya oya quea nee po meeje'yo, ojjaña cuana joya o jayojjaya quea mimishi poani pea'ai quea nee po meeje'yo, ca mimishi cuana pajea sa po'yo ajjajo. ²³Ojjaña joya o shajja'ajjajji poani eyaya mano meeje'yo. Chama'yo tii poajje'yo. Jamajoya ma ba majjeya ojjaña ecuea epeejji cuana jjabahuejjaquije e'e jojo nei ecuea eba ojjaña cuanaja ejjashahuubaquijji. Quehuajje ejjashahuubaqui meeji pojjeama. E'e, ojjaña eba'ejji ba majje eyaya sosequiaje'yo. Quea mimishi poanijo quea nee po meeje'yo. Quea pame poanijo ca ca quea bihui nee po meeje'yo.

²⁴“Jamatii miquianaya Tiatinajo ba'e quea huiso nee ma esohui quea mimishi jayojja jama po ajja. Edosiquianaja esohui quea quehua, quea mimishi cuana jayojja jama po ajja pea'ai. Ba sa po ajja pea'ai. Jamatjeya eyaya miquianaya jamaya huohuiaña: ¡A'a ecuea esohui pajea'yojji! Mahuiso. ²⁵Miquianaya ecuea epeejji cuana poani. ¡Ishoacue ecuea epoe o'oyajji! ¡A'a enijke jjapeequi pajea'yojji! ²⁶⁻²⁷Ecue Chiiya eya ojjaña meshijo ojjaña huoojea'yojji po mee tiitii cani. Jamaya eyaya miquianaya ameeje'yo enijke jjapee tiitiiquianijo. E'e, miquianaaya eshahua jeabichajeaña. Ecuea esohui jayojja jama atiitiañajo, peaa miquianaya cuijajea caje'yo pojja'a. Jamatii eyaya miquianaya enijke ona huoojea'yojji nequi meeje'yo tii tii. Ojjaña huoojea'yojji quea ca'a nee nee poaje'yo, ojjaña cuana ojjaña meshijo ba'eca cuana huoojea'yojji nei nei quijje poaje'yo. Jiquio ecua meshimisi jajaajajea cani baaa jamaya shajjama' cuana ojjaña meshijo ba'eca jeabichajea'e'yo miquianaaya enijke ojjaña huoojea'yojji nequi'yo majje. ²⁸Eyaya miquianaya quiaje'yo pea'ai aquiana quea pame nee yohua jayojja ba'a: majameta ai, eshequi huiyejjji mecajjeahua nei jaasohuani jayojja jama.

²⁹“Jamatjeya ¡shajja'ajjacie Edojjosahua Pameja esohui ojjaña ecuea epeejji cuana Asia meshijo ba'eca huasijje; jjashahuubaquicue!”

—Jamaya eyaya, Jesosaa huoojeaña ecuea esohui etehue'yo ecuea epeejji cuana Tiatinajo ba'eca huasijje. ¡Jamaya tehuecue, Huani! —eya Jesosaa acanaje.

Jesosaja esohui ojaya epeejji cuana huasijje Sanisi cuiñajjijo ba'eca huasijje

3 ¹Majoya Jesosaa eya huohui canaje jama ba'a: —Huani, ¡ecuea esohui tehuecue esohui huohuijji Sanisi cuiñajjijo ba'e yasijje, ma ecuea epeejji nei cuana jaahuanajji yasijje! Tehuecue jama ba'a: “Eya Jesosa Quito.

Eyaya Edojjoshahua Pame miquiana huasijke huoojeaña. Eyaya miquianaya huohuiaña: Ecuea epeejji cuana, ojjaña miquianajaya eba'ejji cuana eyaya baña. Pea cuaa miquianajo huohui canaje jama ba'a: —Jesosaja epeejji cuana Sanisijo ba'ecaa Jesosaja esohui jayojja jama acani —poanaje.

“Jamatii eyaya miquianaya baña beshahua nei ecuea esohui jayojja jama ba'e ajja. ²Jamajjeya jecuea esohuijo jjashahuabaquicue quea ja'a nee! Quea mimishi poanijo miquianaya jjashahuabaquiani oe pojji. Beshahua nei jjashahuabaqui ja'a pajea'yonaje. Jamaya quea mimishi, de. Eyacuiñajjija esohui jayojja jama a'ajja miquianaaya. ³Ecuea esohui huohujjiya ecuea esohui huohui canaje miquiana huasijke. Jamajjeya jecuea esohui jama acue! ¡Mimishi cuana pajea'yocue! Ejo jjashahuabaqui ajjajo aje oe eya miquiana que quehuajje poecuajije quea nee nee po meeya, siipojji quehuajje poeyani jayojja. Eya ache pojjajo miquiana que poeje o'oya miquianajaya ebajji pojjeama.

⁴“Jamatii beca cuana Sanisijo ba'e quea boejea'y o ba'e, mimishi'ama nei. Oya cuana enijje ba'e meeje'yo. Quea pame nee ba'e eyaya oya cuana daqui quea oshe nee nee huosho meeje'yo enijje eba'e tiitii'yojji. ⁵E'e, ojjaña joya enijje jjapeequi pajea'y o ajja daqui quea oshe nee nee huosho meeje'yo. Ojaya ebajjani cuana eyaya tehue'yonaje eba'e tiitii mee'yojji. Maya ojaya ebajjani eyaya ecuijea'yoyji pojjeama. Oya cuanajo ca ca eyaya ecue Chii huohuaje jama ba'a: —E'e, oya cuana ecuea epeejji nei —jamaya eya poaje ojjaña esohuidojoji cojja neijo ani.

⁶“Jamajjeya jshajja'ajjacue Edojjoshahua Pameja esohui ojjaña ecuea epeejji cuana Asia meshijo ba'eca huasijke; jjashahuabaquicue!”

—Jamaya eyaya, Jesosaa huoojeaña ecuea esohui etehue'yo ecuea epeejji cuana Sanisijo ba'eca huasijke. ¡Jamaya tehuecue, Huani! —eya Jesosaa acanaje.

Jesosaja esohui ojaya epeejji cuana huasijke, Pinanepia cuiñajjijo ba'eca huasijke

⁷Majoya Jesosaa eya huohui canaje: —Huani, jecuea esohui ecuea esohui huohujji, ecuea epeejji jaahuanajji Pinanepia cuiñajjijo ba'e yasijke tehuecue pea'ai! Jama tehueme acue ba'a: “Ecuea epeejji cuana, eyaya, Jesosa Quitohua quea ja'a nee nee aña, mimishi'ama, e'e jojo nei Eyacuiñajji. Yahuajo nei etiiquiana Dabi Jodio cuanaja emeshi mese poanaje. Jjeya eya Eyacuiñajjija cuiñajji eyacua mese. Eyaya esecue ca'a majje pea edobiqui meeiji pojjeama. Ca'apejo majje pea dobiqui meeje.

⁸“Ecuea epeejji cuana, miquianajaya eba'ejji ecuea eba. Miquianaya oe pojji yani. Matatii ecuea esohui jayojja jama aña. Enijje jjapeequi pajea'y o jjima. Jamajjeya eyaya miquianaya esohui huohui meeje pea cuana huasijke. Eshahuaja epeejji cuaa miquianaya ehuohui pajea mee'yojji pojjeama. ⁹Oya cuana siajje poani jama ba'a: —Ecuanaya Jodio, e'e jojo nei Eyacuiñajjija epeejji —oya cuana poani.

“Jamajjeya eyaya eshahuaja epeejji cuana miquiana que poe meeje ecui'oshajjajo nequiya miquiana bihuiaa jama ba'a: —E'e, miquianaya Eyacuiñajjija epeejji e'e jojo nei, ojaya quea jea nee nee.

¹⁰“Pea cuua miquianaya napa cani. Jamatii miquianaya ecuea esohui jayojja jama enijje jjapee tiitiiquije'yo. Jamajjeya quijje eyaya bajeache cuana ecuea epeejji e'e jojo nei. Quijje eshahuaja epeejji ojjaña cuana quea nee nee po meeje'yo; eyaya miquianaya jaahuana neineije'yo. ¹¹Quijje pishana eya, Jesosa poeje o'oya miquiana que. Jamajjeya jecuea esohui jayojja jama po tiitiicue! Jamajjeya pea cuanaja miquianaya edasajji pojjeama. Majoya Eyacuiñajjija ejjashahuubaqu'yojjii miquianajo jama acaje ba'a: Miquianaya ba'e tiitii mee caje'yo onijje. ¹²¡Bacue! Ojjaña miquianaya enijje jjapeequi pajea'yo ajjajo eyaya eyajo nequi tiitii meeje'yo. Acui ca'a, equi yamajjana quea quemo, quea ca'a nequije'yo tii tii jayojja jama ecuea epeejji nei nequi titiije'yo eyajo. Eyaya ojjaña cuana ba meeje miquianaya ecuea epeejji e'e jojo nei, Eyacuiñajjija pea'ai. Jiquio ecua e'acui meseya acuijo oja bajjani quecuatehue cani jayojja jama eyaya aje'yo; ecuea epeejji nei cuana tehueje. Jamajjeya miquianaya, ojjaña ecuea epeejji pea'ai ojee enijje eyajo ani meeje'yo. Enijje poeje'yo; Eyacuiñajjija cuiñajji eyacua, Jenosanena eyacua bajjani jayojja jama poeje. Ecuea bajjani eyacua poaje eya quea ca'a nequianijo. Maya eyaya ojjaña miquianaya ba meeje'yo.

¹³“Jamajjeya ¡shajja'ajjacue Edojjoshahua Pameja esohui ojjaña ecuea epeejji cuana Asia meshijo ba'eca huasijke; jjashahuabaquicue!”

—Jamaya eyaya, Jesosaa huohuaña ecuea epeejji cuana Pinanepiajo ba'eca huasijke. ¡Jamaya tehuecue, Huani! —Jesosaa eya acanaje.

Jesosaja esohui ojaya epeejji cuana huasijke Naonisea cuiñajjijo ba'eca huasijke

¹⁴Majoya Jesosaa eya huohui ca o'oyanaje pea'ai jama ba'a: —Huani, jecuea esohui huohuijji Naonisea cuiñajjijo ba'e yasijke tehuecue ecuea esohui! Oya ecuea epeejji nei jaahuanajji. Jama oya tehuecue ba'a: “Ecuea epeejji cuana, eya Jesosa e'e jojo nei Eyacuiñajjija huoojea'yo. Eyaya huohuaña Eyacuiñajjija esohui e'e nei. Eyaya Eyacuiñajji nijjeya ojjaña pana cooa poa. Eyaya miquianaya huohuaña jama ba'a: ¹⁵⁻¹⁶Ojjaña miquianajaya ebalejji cuana ecuea eba. Eyaya baña miquianaya enijje jjapee neineiqui sa po ajja. Jamatii e cajaa sa po'yo ajja pea'ai. ¡A'a epeejji nisho pojji! ¡E cajaa a sa amajje jja ca iña oe huohuicue! E'ishijji quea quiyo pojjeama jayojja poani miquianaya. E'ishijji quea huoe pishana enabajo peajja, ena quea tai jama. Jiquio ecua seja chijjoco ena ishi'ajja majje ojjajea'yaña jayojja jama eyaya miquianaya cajaa achana', ca ecuea esohui miquianaaya mi shajja'ajjajo. ¹⁷Miquianaya aje oe jiquio jama jjashahuuba quehuaquiani ba'a: —Eya ca iña Eyacuiñajjija epeejji quea pame nee poani —miquianaya jamaya poani. Jamaya pea'ai poani ba'a: —Eya dejja quea aquiana huiso jayojja jama poani.

"Chojja. Miquianajaya eba pojjeama Eyacuiñajjiya miquianaya ba cani jama ba'a: Miquianaya aema' jayojja, daquima' jayojja, cojjama' jayojjaya. Miquianaya quea mimishi ba'yanijo Eyacuiñajji quea yeno nee nee poani miquianajo. ¹⁸ Jamajjeya eyaya miquianaya huohuiaña: ¡Eya sa neineicue! ¡Ecuea esohui shajja'ajja neineicue! Ecuea esohui mei huo'o quea nahue jayojja jama poanijo, miquianajaya eba'ejji quea ja'a nee poaje. Eya miquianajo mano'yonaje miquianajaya mimishi cuijea'yojji. ¡Jamaya jjashahuubaquicue! Maya ba majje miquianaya daqui oshe ehuoshoyo ba'e jayojja jama poaje, quea boejea nee. Jamajoya miquianaya bicho'ama poaje miquianajaya mimishijo. ¡Edojjoshahua Pame bacue! Oya ecojja shicuijji jayojja; ohuaya miquianaya ecuea esohui ba meesahua caje'yo, quea jjashahuubaquijja ja'a nee po mee caje'yo. ¹⁹ Ojjaña ecuea epeejji eyaya tanacuaña, tecueña pealai ejjabahuejjaqui meeiji ecuea quea jea nee neejo. Jamajjeya ca oe ¡ecuea esohui jayojja jama acue e'e jojo nei! ¡Ecuea epeejji nisho a'a po majajji! ²⁰ ¡Bacue! Esecuejo nequiya iyaa cani edobiquijji, miquiana nijje ejjapeequijji. Oya jayojjaya eya poani. Eyaya miquianaya iyaaña. E shajja'ajja majje jama pocue ba'a: —¡Jesosa, dobicue! —jamaya poajo eya miquiana que dobiquije miquiana jjashahuubaquijja meeiji. Miquianaya enijje jjapeequije pealai. Jiquio ecua epeejji cuana ojee ijjal'ijjiani jama poaje eseya. ²¹ E'e, ojjaña joya enijje jjapee tiitiquiani eshahua jeabichajeajji poani. Jamajjeya quijje eyajo eyaya huohuaje jama ba'a: —¡Enijje nequicue! ¡Enijje ojjaña huoojea'yojji pocue!

"E'e, miquianaya e jayojja jama poaje. Eyaya quea ca'aa jjejojo Edosiquiana jeabichajeanaje. Jamajjeya ecue Chii nijje eya anioqueani; ojjaña huoojeajji poani tii tii. ²² Jamajjeya ¡shajja'ajjacue Edojjoshahua Pameja esohui; ojjaña ecuea epeejji cuana Asia meshijo ba'eca cuana jjashahuubaquicue!"

—Jamaya eyaya, Jesosaa huoojeaña ecuea esohui etehue'yo ecuea epeejji cuana huasijje Naonisea cuiñajjijo ba'e yasijje. ¡Jamaya tehuecue, Huani! —eya Jesosaa acanaje.

Ojjaña eyajo ba'ecaa Jesosa bihuia cani

4 ¹Majoya esohuidojobjiya jjanequipana meequi canaje jama ba'a: Eya ba mee canaje esecue eca'apejo nequi jayojja eyajo. Jjanequipana cooqui mee canajejo Jesosa enijje miminaje. Ojaya esohui eshe'ana emiajji jayojja jama janobajjima nei huohui canaje yahuajo pishana. Jjeya ohuaya eya huohui ca o'yanaje jama ba'a: —Huani, ¡poecue eyahuasijje e que! Eyaya miya ba meeje jiquio eya quijje aje —Jesosa poanaje.

²Jjeyahua nei Edojjoshahua Pameya eya ba mee canaje jama ba'a: Emeshi Mese nei e'anioque ani ojjaña huoojea'yojji. ³ ¡Oya ache bame nee nee poanaje! Quea jeajahua nee nee mei ca'a quea siyo jayojja: mei quea nahue jasepe bajjani jayojja, codinania mei bajjani jayojja pealai. Ojaya e'anioquejjijo eshijje copocopo jayojja yaninaje quea bame nee nee mei tahuua esemenana mei bajjaniya jeasiyo cani jayojja jama. ⁴Quea huiso Jesosaja epeejji etii

cuana, 24 huisome onijje e'anioque ani. Eyacuiñajji ca ca eyiyesama neijo ani. Onajaya daqui quea oshe nee nee. Esapajo iya mei huo'o ejaahuojja quea nahue ani emeshi mese epojji. ⁵Eyacuiñajjiya ojaya e'anioquejjijo aniya pojjeje po mee cani, beni jjaqueyaqui mee cani, cueji taaa po mee cani pe'a'i. O cojja neijo cuaquijiji me oeje beca huisome nequi. Jiquio cuaquijiji cuana jama ba'a: Edojoshahua Pameya acani Jesosaja epeejji cuana nijje ma ecua me oeje beca cuiñajjiyo ba'e jama. ⁶Eyacuiñajji cojja nei eyaya banaje bae quea tahuá nee nee jayojja, quea coe nee nee, quea siyo nee nee jayojja.

Eyaya banaje pea'ai ebeca pee pea'ai aquiana eshe, quea cojja huiso nee nee Eyacuiñajji e'anioque ani pejjejo, cojja beca jayojja, ecojja quipa huejjajje jjabaquiani pea'ai. ⁷Oe aquiana eshe ibia jayojja. Pea ana'ai jayojja. Pea aquiana dejja jayojja cojjame, dejja cuichojji jayojja. Pea huipta cuabesaba'e jayojja jama. ⁸Ojjaña jiquio aquiana eshe cuichojji cuabesajji de, ojjaña 6 cuichome, me oeje oe cuichome. Ojjaña cuana quea cojja huiso nee nee; ojaya ecuicho quimejjeje pea'ai ecojja cuana yani. Ojjaña cuana sohuicuayani tii tii Eyacuiñajji bihuajji; sohuicuaya pajea aija nei nei mecajje ai quiana. Jamaya poani ba'a:

“Eyacuiñajji, miya ca ca oe quea pame, mimishi'ama, quea boejea nee nee. Miya ojjañaja Emeshi Mese nei quea ca'a nee nee. Miya yahuajo nei nei ani tiitiia poa, jjeya ani tiitiiani, quijke ani tiitije'yo pea'ai”. Jamaya oya cuana poani.

⁹E'e, ma aquiana eshe cuana sohuicuayani Eyacuiñajji bihuajji. Jama poani ba'a: “Eyacuiñajji, miya oe nei quea pame nee nee, oe nei nequi tiitiiani, ojjañaa miya cabihuia cahua!” oya cuana jama sohuicuayameya poani.

¹⁰Ma shajja'ajja majjeya Jesosaja epeejji etii cuaa, ma 24 huisomeya ecui'oshajjajo nequiya Eyacuiñajji bihuia cani. E'e, oya oe nei e'anioque ani tii tii bihuia cani. Onajaya mei huo'o ejaahuojja quea nahue nee cajjajea majje Eyacuiñajjiya ejiojji pejjejo iyaoquea cani. E'e, Eyacuiñajji oe nei quea ca'a nee nee. Jamajjeya oya bihuia cani cuaa jama ba'a:

¹¹“Eyacuiñajji, miya oe nei ecuanaja Emeshi Mese nei. Miya oe nei quea pame nee nee. Jamajjeya ecuaaya miya bihuiaña. Miya oe nei ani tiitije'yo, oe nei ojjaña huoojeajji. Miyaya ojjaña aquiana cuana pana cooa poa. E'e, ojjaña aquiana miyaya saña. Jamajjeya pana majje nequi tiiti meeña, miyaya”.

Jamaya Eyacuiñajji bihuia cani ma 24 epeejji etii cuaa eyajo aniya.

Ejeejo esohui etehue'yo eyaya banaje

5 ¹Majoya eyaya, Huaniya Eyacuiñajji e'anioquejjijo ani banaje. Ojaya eme' ebianeijje esohui ejeejo tehue e'iñabebo nequi eyaya banaje. Jiquio ejeejo quea huiso esohui etehue poanaje, omiji pea'ai tehueme'ya poanaje. Tehuejeyo majje me oeje beca, ⁷ ijjiabaji meeme'ya poanaje. ²Eyaya esohuidojiji quea ca'a nee nee banaje pea'ai. Ohuaya ojjaña

cuana janobajjima nei huohui'ajja canaje jama ba'a: —¡A'ya cuae quea pame nee nee esohui etehue'yo hui isajji esohui etehue'yo ebajji? ¡Joya quea pame nee Eyacuiñajji cojja nei nei nequicue esohui etehue'yo ecueabaji hui isajji! —esohuidojojji jama taaameya poanaje.

³Jamatii eyajo ba'e, meshijo ba'e pea'ai, yahuajo emano'yo pea'ai chama' poanaje oe quea pame nee nee esohui cuiabaji hui isajji, ejee jjequijeapiihuijji. Chojja, chama' nei nei poanaje oe quea pame nee nee ma esohui ba meeiji. ⁴Jamajjeya chama' nei ba majje eya quea yeno poanaje. Pa neineinaje. ⁵Majoya Jesosaja epeeiji etii, ma Eyacuiñajji bihuia caniya pea 24 huisome cuana nijjeya eya huohui canaje: —¡A'a oe pajji! ¡Bacue! Oe dejja Jesosa bajjani yani, ma Jodaja osecua, emeshi mese Dabija osecua poa. Oya ca ca oeya esohui cueabajiji hui isa majje ejee jjequijeapiihui caje'yo esohui ebajji. Oya quea ca'a nee nee, ibia naa asha jayojja jama ojjaña huoojea'yoji poani.

⁶Majoya eyaya banaje oe dejja Eyacuiñajji e'anioque ani pejjejo nequi. Oya ebeca pee pea'ai huisome aquiana eshe cuana yiyesama neijo nequi, Jesosaja epeeiji etii quea ca'a quea huisome cuana yiyesama neijo nequi pea'ai. Oya ca ca jiquio jama ba'a, ñajjajja esho'i equecua'yo jayojja ojjaña mimishi cuijea'yoji. Oya Emeshi Mese nei quea ca'ajo ñajjajja yahue she'anajji jayojja me oeje beca she'aname jayojja eyaya oya banaje. Ojjaña ojaya eba neineijo oya quea cojja huisome nee jayojja banaje eyaya, me oeje beca cojjame jayojja eyaya oya banaje, 7 cojjame. Ecojja cuana Edojjoshahua Pameya acani, ma Edojjoshahua Pameya Jesosaja epeeiji cuana ojjaña meshijo ba'leja yajjijo acani jayojja. ⁷Ma dejja ñajjajja equecua'yo jayojja Eyacuiñajji que jjanequichipiqui majje jjeshe canaje esohui etehue'yo oja ebianeい mejje iñanequia nequi. ⁸Jamajjeya aquiana eshe cuaa ebeca pee pea'ai huisomeya Jesosa bihuia canaje. Jesosaja epeeiji etii quea huisome pea'ayiya Jesosa, ma ñajjajja equecua'yo jayojja bihuia canaje ecui'oshajjajo nequiya. Oya cuanaja e'iñaqueyajji yaninaje. Mei huo'o caneco madeja pohui jayojja anijji yaninaje pea'ai. Madeja pohui jayojja huichachanaje. Huichacha quea shiye Eyacuiñajji epeeiji emimi onijje jayojja. ⁹Jesosaja epeeiji etii cuana esohui eyacua sohuicuayanaje Jesosa bihuiajji jama ba'a:

“Jesosa Quito, ¡miya quea pame nee neejo esohui etehue'yo jjeshe majje ecueabaji hui isacue! E'e, miya quecua canaje cuaa. Miquea ena' cuayaquiajo mano'yonaje ojjaña cuanaja mimishi cuijea'yoji. Ojjaña miquea ejjeshe'yo jayojja. Jamajjeya Eyacuiñajji nijje jjapeequi meeaña ojjaña cuana ojjaña meshijo ba'e, ojjaña cuiñajjijo ba'e, ojjaña pea esohuijo mimiani cuana pea'ai. ¹⁰Jesosa, miya ojjaña huoojea'yoji poani. Jamajjeya ecuana huoojeaje minijje ojjaña joya ojjaña meshijo ba'e huoojeaa, esejaya Chii aija esohui huohuiya pea'ai”.

Jama sohuicuayameya poanaje Jesosa bihuiajji.

¹¹Majoya eyajo eyaya banaje esohuidojojji quea huisome nee nee. Eyaya onajaya esohuicuayajji shajja'ajjanaje pea'ai. Oya cuana quea huisome nee

neejo sicosico ajja. ¡Ache huiso nei nei, de! Oya cuana ejjanequitoqui'yo nequinaje aquiana eshe cuana, Jesosaja epeejji etii cuana quea huiso pe'a'i ejjanequitoqui nequi'yonaje. Ojjaña yiyesama neijo Eyacuiñajji e'anioque ani. ¹²Onaya janobajjima nei sohuicuayanaje; Jesosa bihuia canaje jama ba'a:

“Jesosa, miya quea pame nee nee. Miya ojjaña mimishijo mano'yonaje, ñajjajja sho'i equecua'yo jayojja jama poanaje. Miya oe nei ojjaña huoojeajji. Ojjaña aquiana miquea, ojjaña tii. Ojjaña miquea eba. Miyaya quea ca'a poaniya jjejojo ojjaña aña. Ecuanaaya miya shajja'ajjaña; ecuanaaya miya bihuiaña. Ecuanaaya huohuiaña mijo jama ba'a: —Jamaya quea pame nee miyaya aña —poani”.

Jamaya esohuidojiji cuana poanaje eyajo.

¹³Majoya eyaya shajja'ajjanaje ojjaña Eyacuiñajji pana cuana, ojjaña eyajo ba'eca cuana, ojjaña meshijo ba'eca cuana, ojjaña yahuajo mano'yo cuana, ojjaña enajo ba'eca cuana pea'aiya sohuicuayani. Ojjaña cuanaa Eyacuiñajji e'anioquejjijo ani bihuia cani. Jesosa ma ñajjajja jayojja jama mano'yonaje pea'ai bihuia cani onaaya jama ba'a:

“Eyacuiñajji, miya ojjaña huoojeajji. Jesosa, miya ecuanajo mano'yonaje. Jamaya quea pame nee nee. Jamajjeya ojjaña ecuanaaya miya bihuiaña. Miya shajja'ajjaña pea'ai ecuanaaya. Quea ca'a nee neeya jjejojo miyaya ojjaña cuana aña. ¡Jamaya capoahua tii tii!”

Jamaya sohuicuayani ojjaña cuana.

¹⁴Majoya aquiana eshe cuana Eyacuiñajji pejjejo ani jama poanaje ba'a: —E'e, ijamaya ojjañaa miya cabihuia cahua tii tii!

Jesosaja epeejji etii cuaa, ma 24 huisomeya pea'ai Eyacuiñajji bihuia canaje ecui'oshajjajo nequiya. Oya ca ca oe enequi tii tii. E'e, Jesosa etehue'yo ecueabajiji me oeje beca ecueabajime'ya hui isajea mee caje, Eyacuiñajjiya.

Eshui etehue'yo oe ecueabajiji'ya isajea canaje Jesosaa

6 ¹Majoya eyaya, Huaniya banaje jama ba'a: Jesosa, ma ñajjajja sho'i equecua'yo jayojja yani. Ohuaya oe etehue'yo ecueabajiji'ya isajea canaje, ebionei. Majoya eyaya shajja'ajjanaje oe aquiana eshe eyajo mimiani. Ojaya esohui cueji taaaani jayojja. Joya mapichi aija edaasa biajje ani yasijje taaaanje jama ba'a: —¡Poecue!

²Jjeya nei eyaya banaje mapichi oshe poeyani. Ohuaya mapichija edaasa biajje aniya mai ecohuijji iña canaje. Oya emeshi meseja ejaaahuojja quea nahue nee quia canaje cuaa. Oya poquicuajinaje ojjaña jeabichajjeaa, emeshi mese quea ca'a nee nee jayojjaya.

³Majoya Jesosaa pea ecueabajiji'ya isa canaje. Eyaya pea aquiana eshe eyajo shajja'ajjanaje. Ohuaya jama iyaame acanaje ba'a: —¡Poecue!

⁴Jjeya nei eyaya banaje mapichi ai quea huo'o nei nei. Dejja mapichija edaasa biajje ani baa ai quia canaje cuaa. Oya jama huohuime acanaje cuaa ba'a:

—¡Poquicue miya! ¡Ojjaña jjaquecuaqui meecue pea cuana nijjeya! —jamaya poanijo ojjaña quea tecue nee po mee cani ojjaña pea cuana nijje.

⁵ Majoya Jesosaa pea ecueabajiji'ya isajea ca o'oyanaje. Pea aquiana esheya iyaa canaje jama ba'a: —¡Poecue!

Majoya mapichi ai tehue poeyani eyaya banaje. Ohuaya mapichija edaasa biajje aniya e'ipia'ajjjiji iña canaje, bobi ipia'ajjjiji, oe pojji bobi yani jojoya.

⁶ Majoya eyaya shajja'ajjanaje pea eyajo mimiani aquiana eshe yiyesamajje nequi. Jama poanaje joya mapichija edaasa biajje ani nijje ba'a: —¡Echacojji cuana oe pojjojo chacochaco majje oe pojji bobi quiacue chaco sosejje! ¡Anoso oe pojji, oe tepe iye quemo pojja'a quiacue; shijje iye huiso pea beca peejjima tepe pojja'a quiacue jjeyahua nei e'lijjiji! ¡A'a huana meeiji quiije e'lijjiji'yojji! ¡Acuijjajja sei, acuijjajja na e'ishiji a'a quea nahue ameeiji! —oya poanaje.

⁷ Majoya Jesosaa pea ecueabajiji'ya isajea cajo eyaya shajja'ajjanaje pea aquiana eshe eyajo. Ohuaya jama iyaame acanaje ba'a: —¡Poecue!

⁸ Jamajjeya jjeya nei eyaya banaje mapichi jahua poeyani. Ohuaya mapichija edaasa biajje aniya quea huiso nee nee mano mee caje'yo. Jamajjeya oya Jjamano meequiv'yojji bajjani. Mano mee ca'yajje ojjaña poqui mee caje'yo emano'yo sajaa huasijke. Oya huohui canaje cuaa jama ba'a: —¡Quea huiso nee nee mano mee'yocue ojjaña meshijo ba'eca! ¡Oe dejja mano mee'yocue; beca cuana a'a mano meeiji! ¡Jamaya amajamajacue ojjaña meshijo ba'e cuana! ¡Quea huiso mano mee'yocue jjaquecuaquianijo; bobi chamajo pea'ai, emanomeejjiyo pea'ai mano mee'yocue! ¡Ijjiacajji quea mase cuaa dejja quea huiso ijjia mee'yocue pea'ai!

⁹ Majoya Jesosaa, ma ñajjajja sho'i equecua'yo jayojjaa pea ecueabajiji'ya isajea cajo eyaya banaje quea huiso Jesosaja epeejji yahuajo mano'yo cuana eyajo nequi'yo. Pea cuaa oya cuana quecua ca'yonaje Eyacuiñajji esaohi jama ajji poanijojo, Jesosaja esaohi huohujjijojo pea'ai. E'e, oya cuana jiquio jama ba'a: Jodio cuaa ñajjajjaja ebacua cuana mei e'iya biajje cuia cajje na' cuayaquianinaje mimishi cuijeal'yojji jayojja jama dejja cuaa Jesosaja epeejji cuana quecua ca'yajje onajaya ena' cuayaqui'ya poa. ¹⁰ Jamajjeya oya cuana taaanaje jama ba'a: —Emeshi Mese nei, miya quea pame nee; ojjaña miyaya aña. Huohui majje jamaya poani. ¡Bacue oe, dejja mimishi cuaa ecuana quecua ca'yonaje! Jamajoya ¡ache shono shai ojjaña quea mimishi ojjaña meshi cuanajo ba'e quea nee nee po meeje'yo miyaya? —oya cuana poanaje.

¹¹ Eyacuiñajjiya oya cuana quia canaje daqui oshe quea ao nee nee. Ona nijje miminaje jama ba'a: —Pea cuaa miquianaya quecua ca'yonaje ecuea esaohi huohujji poanijojo. Miquea edoe mese cuana ecuea epeejji cuana enijke chacochacoani pea cuaa quecua caje'yo pea'ai. Jamajjeya ¡ishoa socue! Quecuajeyo cajo, eyaya dejja mimishi cuana quea nee nee po meeje'yo —Eyacuiñajjiya acanaje.

¹² Majoya Jesosaa pea ecueabajiji'ya isajea cajo eyaya banaje jama ba'a: Meshi huehuahuehuhanaje janobajjima nei. Eshequi quea apo nee

nee poanaje, daqui tehue nei jayojja poanaje. Ba'i quea huo'o nee, ena' jayojja poanaje.¹³ Majameta cuana jjacajjaqui majje jijijjioquenaje meshi yasijje, beni pajijiya acuijjajja etahua jeahuojojea cani jayojja poanaje. ¹⁴ Eyatahuatagua chama'yo tii poanaje. Jjahuejjajeaqui majje yoquise esipi ejjequijeapiihui nequi jjajjajjaqui'yani jayojja poanaje pea'ai. Eyiyo, nasi cuana pea'ai jjaajaajeaqui majje jjasheshojequinaje meshi huehuahuehuajo. ¹⁵ Jamaya emeshi mese cuana poanaje pea'ai; jeabichajea'yonaje ojjaña. E'e, jiquio jama poanaje ba'a: Emeshi mese cuana, dejja huoojeajji cuana, dejja quea aquiana huiso cuana, sohuinano mese cuana, dejja etii cuana, dejja ehooanjeajjima' cuana, dejja ehooanjeajjiji cuana pea'ai jja'aniquehuaqui canaje jjani cuana huasijje, eyiyo cuana huasijje pea'ai. ¹⁶ Ojjaña jiquio dejja mimishi cuana quea mete nee nee poanijo siasianaje jama ba'a: —Eyacuiñajji ojjaña huoojeajji oya yani. Jesosa ñajajja sho'i equecua'yo jayojja yani pea'ai. Eseyá quea mimishi poanijo, oya cuana quea quene nee poani ese nijje. ¡Jamajoya eyiyo cuana, mei ai cuana pea'ai ecuana biajje ca'loqueahua, Eyacuiñajjiya eseya eba ca cuahuajje, Jesosaa eseya quea nee nee epo mee ca cuahuajje! ¹⁷ E'e, oya cuana poeyani ojjaña quea mimishi napaa. Ojjaña eseya manoje'yo, de —jama siasiameya dejja mimishi cuana poaje.

Jesosaja epeejji bahua tehue canaje Jodio cuanaja ojjaña ebajji

7 ¹ Majoya eyaya banaje ebeca pee pea'ai esohuidojojji cuana. Eyacuiñajji onijke miminaje beni cuana ehooanjeajji pojjeamajo. Beni quea quemó dejja cuana napajji meshi cuana huasijje, bae ai cuana huasijje, acui cuana huasijje epoqui poaje jjejojoya iña cani esohuidojojji cuua. ² Majoya eyaya pea esohuidojojji banaje; eshequi poeje mijijje poeyanaje. Ohuaya aquiana etehuejji ye canaje Eyacuiñajjiya epeejji cuana bahua tehuejji ojjaña ebajji. Ma esohuidojojji ebeca pee pea'ai cuana huasijje taaaanaje meshi cuana, bae cuana pea'ai enapa ca poaje jjejojo. Jama poanaje ba'a: ³ —¡Ishoa socue! ¡Meshi, bae ai, acui cuana pea'ai a'a jinapajji so'o! ¡Eyaya Eyacuiñajjiya epeejji Jodio cuana Eyacuiñajjiya bajjani ojjaña ebajji cabahua tehuesahua! —ma esohuidojojji poanaje.

⁴ ¿Ache huiso tehue canaje ebahuajje Eyacuiñajjiya bajjani ojjaña ebajji? Eyaya shajja'ajjanaje jama ba'a: —Jodio cuana Eyacuiñajjiya bajjani quea huiso nee nee tehue canaje ebahuajje, 144.000 huisome. Jodio etiiquianaja Isaenija bacua ejja 12 cuana poa. Ojaya osecua cuana tehue canaje. ⁵ Jama tehueme acanaje ba'a:

Jodaja osecua cuana 12.000 huisome;
Shobenija osecua cuana 12.000 huisome;
Janeja oya jayojjaya 12.000 huisome;
⁶ Aseneja oya jayojjaya 12.000 huisome;
Netanija jamaya pea'ai 12.000 huisome;
Manaseja osecua cuana 12.000 huisome;

⁷ Simeonija osecua cuana 12.000 huisome;

Nemija osecua cuana 12.000 huisome;

Isacanija osecua cuana 12.000 huisome;

⁸ Sabononija oya jayojjaya 12.000 huisome;

Joseja oya jayojjaya 12.000 huisome;

Bejamija jamaya pea'ai 12.000 huisome.

Mahuisoya Eyacuiñajji bajjani tehue mee canaje Jodio cuanaja ebahuajje.

Quea huiso nee ojee nequi daqui oshe huosho'yo epo

⁹ Majoya eyaya banaje quea huiso nee nee pea cuana, Jodio pojjeama ojee echicha'yo nequi, daqui oshe nee nee huosho'yo epo. Quea huiso nee nee poanijojo esicojji pojjeama. Oya cuana ojjaña meshijo ba'e, ojjaña cuiñajji ba'e pea'ai poeyani. Dejja tehue cuana, Ese Ejja cuana, dejja nei cuana, ojjaña de, poeyani. Ojjaña pea esohuijo mimiani cuana poeyani pea'ai. Ojjaña oya cuana Eyacuiñajji cojja nei nequi. Cuanaya Jesosa ñajjajja equecua'yo jayojja cojja nei nequi yasijje poeyani ojjaña. Onajaya daqui ao quea oshe nee nee. Onaaya jjememe iña jeasohua cani Jesosa bihuajji. ¹⁰Ojjaña cuana taaanaje jama ba'a:

“Eyacuiñajji, miyaya ojjaña huoojeaña. Jesosa, miya mano'yonaje ñajjajja equecua'yo jayojja. E'e, miyaya ecuanaya ba'e tiitii meeaña”.

Jamaya acanaje cuaa.

¹¹ Majoya ojjaña esohuidojiji eyajo cuana Jesosaja epeejji etii pejjejo nequi, ebeca pee pea'ai aquiana eshe cuana pejjejo nequi pea'ai, Eyacuiñajji ma ojjaña yiyesama neijke ani yasijje jjanequichipiquinaje. Eyacuiñajji ojjaña huoojea'yojji poani bihuia canaje esohuidojiji cuanaa ecui'oshajjajo nequiya. Jama poanaje ba'a:

“Jamaya capo'yahua, Eyacuiñajji! Miya quea pame nee nee. Ojjaña miquea eba. Miya shajja'ajjaña tii tii ecuanaaya. Miya ojjaña huoojeajji enequi tii tii. Ojjaña ecuanaaya miya bihuia tiitii aña.

¹² Miya quea ca'a nee neejo ojjaña miyaya aña tii tii. ¡E'e, jamaya capo'yahua tii tii!”

Ojjaña esohuidojiji jamaya sohuicuayanaje.

¹³ Majoya Jesosaja epeejji etiiya eya huohui'ajja canaje jama ba'a: —Huani, ojjaña jiquio echicha'yo nequi daqui oshe nei huosho'yo epo ¿a'a miquea eba? ¿Achejje shai oya cuana poeyani so'o?

¹⁴ Jamajjeya eyaya oya jama anaje ba'a: —Chojja, ecuea ba jjima. Miyaya ca ya ca oe baña, de. ¡Che iña oe huohuicue!

Ohuaya eya saja'a canaje jama ba'a: —Onaya ba'e'yonaje meshijo. Jesosa nijje jjapeequianijo, dejja mimishi cuaa oya cuana napa huicha'ahuicha'a canaje. Jiquio ecua dejjaa daqui oshe tajja cajje quea boejea nee nee poani jayojja jama Jesosaa ojjaña mimishi cuijea ca'yajje quea boejea nee nee poani. E'e, Jesosa ñajjajja sho'i equecua'yo jayojja poanaje. Ojaya ena'

cuayaqui majje ojjañaja mimishi cuijea'yoiji poanaje. ¹⁵ Jamajjeya oya cuana nequi mee ca'yani Eyacuiñajji cojja neijo eyajo. Jomajo onaaya Eyacuiñajji nijje chaco tiitii cani quea bihui nee nee. Eyacuiñajji ojjaña huoojea'yoiji poani. Ohuaya ojaya epeejji cuana jaahuana tiitii cani. ¹⁶ Ojaya epeejji cuana quea shoe pojjeama poaje'yo. Quea nabataja po ajja pea'ai. Eshequijo quiyo'yo ajja, quea mano pol'yo ajja pea'ai. ¹⁷ E'e, Jesosa ñajjajja equecua'yo jayojja Eyacuiñajji pejjejo nequi. Jiquio ecua ñajjajja cuiñajjiya ñajjajja cuana jaahuana cani, ena eteo ishi mee cani jama jayojja Jesosaa ojaya epeejji cuana jaahuana cani. Ojaya e'ishijji ishi mee majje ba'e tiitii mee caje'yo onijje pea'ai eyajo. Eyacuiñajjiya jaahuana canijo, oya cuana quea yeno po ajja. Pa'yo ajja poaje'yo —jamaya Eyacuiñajjiya epeejji etii poanaje.

Pea ecueabajiji'ya isa canaje ma me oejje beca oe poanaje

8 ¹Majoya Jesosaa pea ecueabajiji'ya isa canaje. Jamajjeya oijaña ecueabajiji'ya me oejjie beca huisome'ya oeyejje nei isajea ca'ya poa. Jamajjeya oeyejje nei ecueabajiji'ya isa ca'yajo, oijaña cuana eyajo ani jeca neinei po'yonaje. ²Quijje pishana eyaya banaje me oejjie beca esohuidojojji Eyacuiñajji cojja nei nequi. Oya cuana huasijje eshe'anai jayojja me oejjie beca quia mee canaje Eyacuiñajjiya emiajji.

³Majoya eyaya banaje pea esohuidojiji. Ohuaya shiyeshiye dahuajji mei huo'o quea nahue iñanequia cani mei huo'o e'iya aquiana dahuajji pejjejo. Oya quia canaje cuaa madeja pohui jayojja quea shiye nee nee edahuajeajji Eyacuiñajji bihuiajji. Maya dahuajea canaje mei huo'o e'iya biajje, ma Eyacuiñajji anioqueani pejjejo. Jiquio ecua madeja pohui dahuajea cajje huichacha quea shiye ba'esohuaquiani jayojja jama Eyacuiñajjiya epeejji cuanaja emimi onijje eyahuasijje ba'esohuaquianijo Eyacuiñajjiya shajja'ajja cani. ⁴Jamajjeya madeja pohui jayojja quea shiye nee nee esohuidojijiya eme jjotojo ani quiyo nequinaje. Huichacha ba'esohuaquinaje Eyacuiñajji yasijje. Ma huichacha ba'esohuaquianijo, Eyacuiñajjiya shajja'ajja canaje Jesosaja epeejji cuanaja emimi onijje. ⁵Majoya ma esohuidojijiya cuaqui cojja sha mei e'iya biajje ani iya canaje shiyeshiye dahuajjiyo. Majoya eyajo nequiya ohuaya cuaqui cojja sha shiyeshiye dahuajjiyo ani jeaoqueajea canaje meshi yasijje. Majoya cueji cuana taaa poanaje janobajjima nei. Pojjeje baa siyoo cuana poanaje. Meshi huehuahuehuanaqe pea'ai. Quea shajjaquijjo pea'ai poanaje.

Emiajji cuana

⁶Majoya me oejee becaa, ⁷esohuidojojji cuaa emiajji cuana iña canaje emiajji. ⁷Ebionei esohuidojojjiya ojaya emiajji ana'ai she'ana jayojja mia canaje aquiana quea huiso meshijo edahuajeajji. Mia cajo, quea huiso mejia jjacaljaquinaje oquequinaje meshi yasijje. Pojjejjeya quea huiso meshi dahua canaje. Ena' oquequinaje meshi yasijje pea'i. Jamaijeya meshi

quea huiso quiyonaje. Oe meshi quiyonaje; beca quiyo jjima poanaje. Pea quiyonaje; beca quiyo jjima poanaje. Jamaya poanaje ojjaña meshijo. Acui cuana jamaya poanaje pea'ai. Oe acui quiyo'yonaje; beca acui quiyo jjima poanaje. Ojjaña huenihuensi quiyo'yonaje. Chama'yo tii poanaje.

⁸Me oeje oe pea esohuidojiji cuanaja mia jjima ojaya emiajji cuana. Jamajjeya majoya pea esohuidojijiya ojaya emiajji ana'ai she'ana jayojja mia canaje. Taaa'ylo majje ohuaya aquiana eyiyo quea quemo nee, quea jiji nee jayojja jeaoqueajea canaje bae ai cuana huasijje. Quea huiso bae ai quea huo'o poanaje ena' jayojja. Ena' jjejojo quea ihui poanaje. ⁹Jamajjeya quea huiso nahuoo mano'yonaje. Oe nahuoo mano'yonaje; beca mano'yo jjima poanaje. Jamaya poanaje ojjaña nahuoo cuana. Quea huiso bishe ai hui'il'yonaje. Oe bishe hui'il'yonaje; beca hui'il'yo jjima poanaje. Jamaya poanaje ojjaña bishe cuana.

¹⁰Me oeje huiso esohuidojiji cuanaja emiajji cuana mia jjima so'o. Jamajjeya majoya pea esohuidojijiya ojaya emiajji mia cajo oe majameta eyajo nequi quea jiji nei, cuaquijiji quea quemo jayojjaya oquequinaje quea huiso cuei yasijje. ¹¹Maya majameta ma bajjani ba'a: Quea Pase Nee Nee bajjani. Jamajjeya quea huiso cuei, ena eteo pea'ai quea tai poanaje. Oe cuei quea pase nee nee; beca cuei pase'ama poanaje. Jamaya poanaje ojjaña ena. Jamajjeya quea huiso dejja cuana mano'yonaje ena quea pasejo.

Ebeca pee pea'ai huisomeja esohuidojiji cuanaja emiajji mia jjima so'o. ¹²Jamajjeya majoya pea esohuidojijiya ojaya emiajji mia cajo eshequi jaasohua pishana majje jiji ajja, quea misi poanaje. Mecajje ba'i jamaya poanaje pea'ai. Jaasohua pishana majje quea misi poanaje. Majameta cuana quea misi poanaje pea'ai: Oe majameta jiji ajja; beca cuana jiji canaje. Jamaya poanaje ojjaña majameta.

¹³Majoya eyaya banaje huipa cuabesani. Oya taaanaje jama ba'a: —Quea yeno nee nee poaje ojjaña meshijo ba'eca cuana. E'e, pea beca pee jjimaa esohuidojiji cuaa emiajji eshe'ana jayojja mia caje. Mia cajo, quea nee nee poaje quea huiso dejja cuana —jama taaameya poanaje huipa. Jamaya poani eyaya banaje, Huaniya.

9 ¹Majoya pea esohuidojijiya ojaya emiajji mia canaje. Mia cajo pea majameta jayojja meshi yasijje oquequinaje eyaya banaje. Oya majameta jayojja huasijje quia mee canaje Eyacuiñajjiya esecue cojja quecuaca'apejo meeji, yave quia canaje jjani ai quea doe nee nee ca'apejoji. ²Jjani ai quea doe nee nee ca'apejo cajje eyaya banaje huichacha quea quemo ba'esohuaquinaje que quea quemo nee nee dahuaje cani jayojja, quea jiji nee nee poani jayojja. Eshequi quea misi poanaje huichacha quea quemojo. ³Huichacha quea quemojo ani satajje jayojja cuayaquinaje, satajje ejja pojja'a. Quea satajje moo nee nee poanaje. Meshi yasijje poeyanaje. Ma satajjea ehua'o cuana aji jayojja, quimajji. ⁴Satajje quimajji huohui canaje Eyacuiñajjiya jama ba'a: —¡A'a huenihuensi napajji! ¡Acui sisi, acui quea quemo pea'ai a'a napajji! ¡A'a napajji ecuea epjeeji ma ebahuajje ecuea bajjani ecue etehue'y! ¡Ecuea epjeeji pojeama ca

ca napacue, ma ebahuajje ecuea bajjani tehue jjima! ⁵ ¡Oya cuana a'a mano mee'yojj! ¡Quea nee nee oe po meecue me oejje ba'ime, 5 ba'ime! —poanaje.

Jamajjeya equimaa quecua majamaja cajje quea nee po mee canaje, ajiya quecua cani jayojja. ⁶ Jamajjeya dejja mimishi cuana mano'yo sa poaje ma me oejje ba'ime. Jamatii mano'yo jjima poaje.

⁷ Ma satajje ejja cuana jiquio jayojja jama ba'a: Yamiji mapichi ai ejjaquecuaquijji dojojjji jayojja. Dejja jayojja cojjame. Mapichi mei huo'o quea nahueja sapa huahuo iya jayojja. ⁸ Satajje ejja cuana saoiji de, epona jayojja. Ojaya ese' quea ao, ibia jayojjaya. ⁹ Ese'ojje baa daqui quea moo eba'e huana. Oya cuana cuichojji pea'ai. Ojaya ecuicho cuana quea shajjaquijjo, mapichi quea huiso nee nee cuajicuajibeansi jayojja jama poani, mapichiya pea ejjaquecuaquijji dojo cani pea cuana quecuaa. ¹⁰ Satajje ejja cuanaja ehua'o aji jayojja, quimajji. Dejja cuana quecua caje equimaa. Quea nee nee po mee caje'yo me oejje ba'ime. ¹¹ Satajje ejja cuanaja ehuoojeajji yani. Oya jjani ai cuiñajji, ma emano'yojaa nequi quea doe nee nee cuiñajji. Jodio cuanaja esohuijo ojaya bajjani Abodon bajjani; Jieno cuanaja esohuijo oya Aponiono bajjani; Ese Ejjaja esohuijo ojaya bajjani Ojjaña Quea Yeno Po Mee'yojjji bajjani.

¹² Jamajjeya ebionei epojja cuana quea nee nee poani apoa acanaje. Quijje pishana quea camaja nee nee poaje. E'e, beca esohuidojorji cuanaja emiajji mia jjima.

¹³ Majoya pea esohuidojorjiya ojaya emiajji mia canaje. Mia cajo eyaya pea shajja'ajjanaje. Oya mimiani ebeca pee pea'ai eshe'ana yiyesama neijo nequi. Ma eshe'ana cuana yani mei huo'o e'iya aa biajje, Eyacuiñajji cojja nei nequi. ¹⁴ Eyacuiñajji jama poanaje ba'a esohuidojorji nijje, ma jjeya nei mia canaje nijje ba'a: —Ebeca pee pea'ai esohuidojorji cuana yani cuei quea quemodo, Eopate cuei yobijo. ¡Maya esohuidojorji cuana jomajo ejeyo nequi pichojeaqui'yocue! —Eyacuiñajji poanaje—. ¹⁵ E'e, eyaya ma esohuidojorji cuana nequi meeaña jjeya nei ehuoojeajji jayojja. Jiquio shequiajajo, jiquio ba'ljo, jiquio pojajajo, jiquio eshequi nequi pojajajo pea'ai ehuoojeajji. Poquije mimishi cuana quea huiso nee nee quecuaa. Jama quecuame acaje ba'a: Oe dejja quecua caje, becanejjiji pea'ai quecua jjima acaje. Jamaya acaje'yo ojjaña dejja cuana ojjaña meshijo ba'eca cuana —jamaya Eyacuiñajji poanaje.

E'e, ma esohuidojorji cuana pichojea mee'yo majje huuoea caje jjaquecuaquiy. ¹⁶ Dejja mase mapichija edaasa biajje ani huuoea caje quea huiso nee nee. Peaa eya huohui canaje ache huiso dejja mase cuana mapichija edaasa biajje ani. Quea huiso nee nee, dosciento millone, 200.000.000 huisome poaje, de.

¹⁷ E'e, Jesosaa eya, Huani ecuea ebajji ba mee canaje mapichi cuana, dejja cuana mapichija edaasa biajje ani pea'ai. Eyaya oya cuana banaje jama ba'a: Ojaya ese'ojje baa daqui quea moo ba'ehuana canaje ona quecua ca'yoo poaje jjejojo. Baa daqui quea moo quea siyo, quea tahuwa nee, quea jahua nee

jayojja pea'ai. Mapichi cuanaja esapa cuana ibia naa asha jayojja. Enabajje cuayani cuaquí jiji jayojja, huichacha, beni quea ihui, quea pase, mei quea ihui jayojja pea'aiya. ¹⁸Oya cuaquijo, huichachajo, beni quea ihuiyo pea'ai quea huiso dejja mimishi cuana manoje'yo. Oe dejja mano mee caje'yo; becanejjiji pe'a'i mano'yo jjima poaje. Jamaya poaje ojaa dejja mimishi cuana ojaa meshijo ba'eca cuanaya. ¹⁹Oya mapichi ai cuaa quea huiso nee nee mano mee caje'yo; cuaquijjiya ojaya enabajje cuayaniya mano mee caje'yo. Ojaya ehua'ohua pea'aiya dejja cuana quea nee nee po mee caje. Mapichi cuanaja ehua'o cuana peyo jayojja, sapame ehua'o icuijo enequi ese'. Maaya dejja mimishi cuana ijija cajje quea nee nee poaje'yo.

²⁰E'e, Eyacuiñajjiya dejja mimishi cuana napa majamaja mee ca'yonaje. Jamatii, quea huiso ma pojajo mano'yo jjima poanaje cuana. Jamatii onaya mimishi cuana pajea sa po'yo ajja. Eshahua cuana bihuia pajea'yo ajja, eyacuiñajji nisho cuana bihuia pajea'yo ajja pea'ai. Eyacuiñajji nisho acanaje cuaa, mei huo'o quea nahue, mei oshe quea nahue, mei jahua quea nahue, mei nahue'ama, acui pea'ai eyacuiñajji nisho acanaje. Maya eyacuiñajji nisho cuana shajjama', jiojjima', cojjama' pea'ai. ²¹E'e, maya dejja cuana quea mimishi tii tii poanaje pea quecuajji cuana, jjadasiaquijji cuana, siipojji cuana, pea cuana cojjorji poani cuana. Mimishi cuana pajea'yo ajja; quea mimishi po tiitii'yonaje.

Pea esohuidojorji Huaniya ba canaje

10 ¹Majoya eyaya, Huaniya banaje eyajo pea esohuidojorji ba'eoqueani meshi yasijje. Oya bo oshe biajje nequi. Ojaya daqui bo oshe nei nei jayojja. Ojaya sapa biajje eshijje quea bame nee nee jayojja ejjanequitoqui'yo nequiani. Ojaya ecojja quea jiji nee nee eshequi jayojjaya poani. Ojaya equise jijiani, equi yamajjana acui ca'a jijiani jayojja jama poani. ²Ohuaya ejee etehue'yo iña cani emeya. Ecueabajiji'ya oeyejje nei isajea ca'yajo jjajeapichojjoqui'yonaje. Oya epii nequi. Ojaya ebianei jiojji bae ai biajje nequi; shani jiojji ca meshi yasijje nequi. ³Oya taaaanaje janobajjima nei ibia quea quemo nee nee mimiani jayojja. Ojaya esohui me oeje beca huiso cueji jayojja poanaje. ⁴Cueji cuana jayojja shajjajja majje eyaya ojaya esohui tehue'ajjanaje. Esohui tehue jjimahuajo pea eyajo nequi enijje miminaje jama ba'a: —Chojja. ¡Me oeje beca cuejija esohui a'a tehuejji! ¡A'a huohuijji ojaya esohui! —poanaje.

⁵Majoya ma esohuidojorjiya bae ai biajje nequiya, meshijo nequiya pea'aiya oja eme' ebianei eme' jeasohua canaje eyahuasijje. ⁶Majoya oya miminaje jama ba'a: —Eyacuiñajjiya ojaya esohui ma ecua ohuaya yahuajo huohui canaje jamaya e'e jojo nei jjeyahua nei acaje'yo. Oya quea ca'a nee nee poani. E'e, oya ba'e tiitiiani; eya cuana, ojaa aquiana eyajo nequi pea'ai pana ca'y poa; meshi cuana, ojaa aquiana cuana meshijo nequi pea'ai pana ca'y poa. Bae cuana, ojaa aquiana cuana bajio ani pea'ai pana ca'y poa,

Eyacuiñajjiya —jamaya esohuidojiji ma ebianei jiojjije enajo nequi, shani jiojjije meshijo nequi poanaje; ohuaya huohui canaje jama ba'a: —Jjeya apoa. Ma ecua ohuaya huohui canaje jamaya jjeyahua nei Eyacuiñajjiya acaje'yo. ⁷Yahuajo Eyacuiñajjiya ojaya esohui huohujji cuana huohui mee ca poa ma ohua quijje nei acaje. Quijje pishana pea esohuidojijiya quijjeyejje neiya ojaya emiajji mia caje. E'e, ojjaña ba mee caje Eyacuiñajjiya acaje cuana ma yahuajo oja dejja cuana ba mee jjima poa, ma ohua quijje acaje pea'ai, maya yahuajo nei onajaya quea quehua poanaje —jamaya ma esohuidojiji poanaje.

Me oeje oe esohuidojiji cuaa emiajji cuana mia canaje. ⁸Majoya oya eyajo nequi mimi o'oyanaje enijje jama ba'a: —Huani, ¡ejee etehue'yo jjeshecue! ¡Ma esohuidojiji meshijo, ena ojjojo pea'ai jiojji nequija emejo nequi ejee etehue'yo jjeshecue!

⁹Jamajoya eya poquinaje esohuidojiji yasijke. Eyaya oya huohuinaje jama ba'a: —¡Quiacue mo ejee etehue'yo!

Jamajjeya eya ohuaya huohui canaje jama ba'a: —E'e Huani, ma'aje. ¡Ejee etehue'yo ijjiacue! Miya ijjiachte quea biquia nee poaje huini jayojja. Jamatii miya ijjiachte quea pase nee see aijo poaje —ma esohuidojiji poanaje.

¹⁰Jamajoya eyaya ejee etehue'yo jjeshe majje ijjianaje. Quea biquia huini jayojja poanaje. Jamatii eya ijjiachte quea pase nee poanaje see aijo. Jamajjeya eyaya banaje ma esohui etehue'yo quea huiso cuana quea nee poaje'yo. ¹¹Majoya pea eyajo nequiya eya huohui ca o'oyanaje jama ba'a: —Huaniya, ¡quea huiso dejja cuana huasijke, ojjaña meshi cuana huasijke ojjaña pea mimime cuana huasijke, quea huiso emeshi mese yasijke pea'ai huohuiquicue ma Eyacuiñajjiya quijje acaje'yo! —jamaya poanaje eyajo nequi.

Beca esohui huohujjiya esohui huohui canaje

11 ¹Majoya Eyacuiñajjiya pea eyajo nequiya eya quia mee canaje acui e'ipia'ajjajji. Ohuaya eya huohui canaje jama ba'a: —Huani, ¡Eyacuiñajjiya equi ipia'ajjacue! ¡Mei e'iya aa aquiana dahuajji pea'ai ipia'ajjacue! ¡Dejja cuana jomajo nequi Eyacuiñajji bihuajji pea'ai sicocue! ²¡Jodio pojjeamaja e'anijji Eyacuiñajjiya equi pejjejo ani a'a ipia'ajjajji! Jodio pojjeama cuaa Eyacuiñajjiya epjeejji cuana napa caje beshahua nei ebeca pee pea'ai shequiajame, 42 ba'ime. Jodio ojaya epjeejji cuana Eyacuiñajjiya quea boti nee, ojaya Jenosanena cuiñajji quea boti nee jayojjaya. ³Eyaya ecuea becamejjiji pea'ai esohui huohujji huoojeaje dejja cuana huasijke ecuea esohui huohuiya. Eyaya oya cuana ecue sohui huohui meeje quea huiso cahuijo, 1.260 cahuime. Ohuaya pea daqui huosho caje, dejja emano'yo quea yeno nee poani jayojjaya. Jamajjeya ojjañaaa ba caje ojjaña meshijo ba'eca cuana quea nee poaje. ⁴Ma ecuea becamejjiji pea'ai esohui huohujji cuana beca onimo acui cuana jayojja. Oya cuana beca cuaquijiji nequijiji Eyacuiñajji cojja nei nequi jayojja pea'ai.

Jamajjeya ojjañaa ba caje Eyacuiñajjiya oya cuana jaahuana cani.⁵ E'e, onaa esohui huohuijji napa cajo cuaqui cuayani ojaya enabajje, o napajji poani quiyojeaje dejja mimishi cuana. Jamaya ojjaña manoje'yo, ma beca esohui huohuijji napajji poani.⁶ Eyacuiñajjiya jiquio esohui huohuijji quea ca'a po mee cani. Jamajjeya ohuaya jama acaje'yo ba'a: Eyacuiñajjiya esohui huohuijji poaniya ohuaya ena chama' po mee cani. Quea jabo po mee cani. Ohuaya sa majje ena' jayojja po mee cani cuei cuana, bae cuana pea'ai. Ohuaya sa majje ojjaña cuana napa cani pea'ai.

⁷Majoya jiquio beca esohui huohuijji cuaa huohui pajea majje, oe aquiana quea mase nee nee ma jjani ai quea doe neejo ba'e poeje ma esohui huohuijji cuana cuiajeara. Jeabichajea majje cuiajea caje'yo.⁸ Oya cuana mano'yo majje jamatii jaaje ejiojjijo, Jenosanena cuiñajjiyo. Ma cuiñajjiyo pea cuaa yahuajo Jesosa, ese jaahuanajji acui ecueatalapeejo ba'ehuanasohuajea canaje. Dejja cuana Jenosanena cuiñajjiyo ba'eca quea mimishi poaje, ojjaña Sonoma meshijo yahuajo nei ba'yá poa jayojja, Ejito meshijo ba'eca jayojjaya pea'ai quea mimishi poaje.⁹ Jamajjeya quea mimishi poaniya jjejojo Eyacuiñajjiya esohui huohuijji poani mano'yajo emojejiji pojjeama. Ejiojjijo tii oya jamatii jaajeaje pea beca peejjima cahuime. Ojjaña cuiñajjiyo ba'eca cuana, ojjaña pea esohuijo mimiani cuana ojjaña meshijo ba'e pea'ai poeje ma esohui huohuijji emanoyojaa baa.¹⁰ Ojjaña dejja mase cuana quea bihui nee nee poaje ma esohui huohuijji mano'yonajejo. Jamajjeya aquiana quia caje onajaya epeejji cuana huasijje sosema!. E'e, ma esohui huohuijjiya ojjaña quea mimishi poani napa canaje quea huiso cahuime. Jamajjeya o mano'yajo quea bihui nee poaje ojjaña mimishi cuana.

¹¹ Jamatii pea beca peejjima cahuime poajo Eyacuiñajjiya ma beca esohui huohuijji shequi mee caje o'oya. Nequisohua mee caje o'oya pea'ai. Jamajjeya ojjaña dejja mimishi cuana oya cuana eshe o'oya ba majje quea mete nee nee poaje.¹² Majoya ma esohui huohuijjiya shajja'ajja caje pea eyajo nequi mimi nequi onijje jama ba'a: —¡Yacua oe poe'yocue!

Jamajjeya oya cuana bo oshe biajje nequi sohuaquije'yo eyahuasijje. Sohuaquije'yo o quecuayojji epo cuaa ba caje.¹³ Majoya dejja mimishi cuaa ba caquijo tii, Eyacuiñajjiya meshi huehuahuehua mee caje'yo. Quea huiso equi jaabichajea meeque caje'yo. Dejja cuana Jenosanenajo ba'e manoje'yo quea huiso nee nee, 7.000 huisome. Pea cuana mano'yo jjima poaje. Oya cuana quea mete nee nee poaje'yo. Jama poaje ba'a: —E'e de, Eyacuiñajji eyajo ba'e quea pame nee nee, quea ca'a nee nee —jamaya quea huiso poaje.

¹⁴E'e, jamaya ma beca esohuidojoojjiya mia majje dejja mimishi napa caje'yo. Quijje pishana pea esohuidojoojjiya mia cajo dejja mimishi cuana ojjaña meshi cuanajo ba'eca cuana napa caje'yo pea'ai.

Pea esohuidojijiya mia canaje

¹⁵Majoya pea esohuidojijiya ojaya emiajji mia canaje. Mia cajo pea cuana eyajo ba'e janobajjima nei sohuicuayanaje jama ba'a:

“Eyacuiñajji, miya ojjaña huoojeajji poani, ojjaña meshijo ba'eca cuana huoojeajji poani. Miyaya huoojeanaje Quito, mique huoojea'yo ojjaña cuana jaahuanajji. ¡Jesosa Quito ojjaña huoojeajji po meecue! ¡Ohuaya ojjaña cuana cahuoojea cahua tii tii!”

Jamaya oya cuana poanaje.

¹⁶Majoya quea huiso Jesosaja epeejji etii cuanaa, 24, Eyacuiñajji cojja nei e'anioque aniya Eyacuiñajji bihuia canaje ecui'oshajjajo nequiya.

Jama poanaje ba'a:

¹⁷“Eyacuiñajji, miya oe nei quea ca'a nee nee po tiitiiani, ojjaña huoojeajji poani tii tii pe'a'i. Ecuaaya miya bihuiaña miya quea pame nee nee poanijo. E'e, miya yahuajo nei nei ani tiitiia poa. Jjeya miya ani tiitiiani pe'a'i. Ecuaaya miya bihuiaña miya ojjaña huoojeajjijojo. E'e, miya quea ca'a nee nee po tiitiianijo miya oe nei ojjaña huoojeajji poani tii tii. ¹⁸Ojjaña dejja mimishi cuaa miya jeabichajea sa acani. Jamatii miya ona nijje quea quene nee nee poaje jjeya nei; quea nee nee po meeje'yo. E'e, jjeya miyaya dejja mimishi cuana quea nee nee po meeje, oya ojjaña meshijo ba'e napajji poanajejojo. E'e, ojjaña yahuajo nei emanoy'yo jjeya miyaya huohuije miquea ejjashahuabaquijji onajaya eba'ejjijo. Dejja quea mimishi poa quea nee nee po meeje'yo. Miquea esohui huohuijji cuaa, Jesosaja epeejji cuaa miquea esohui jayojja jama acanijo ca ca miyaya quea bhuai nee po meeje'yo. Minijje ani tiitii meeje'yo pe'a'i ojjaña miquea epeejji, esho'i cuana, etii cuana pea'ai”.

Jamaya Jesosaja epeejji etii cuana poaje.

¹⁹Majoya eya ba mee canaje Eyacuiñajjiya equi eyajo ani. Eyiye dojjo ba mee canaje. Jomajo Eyacuiñajji yani. Jomajo yani acui equecua quea bame nee, Eyacuiñajjiya esohui etehue'yo huanajji. Ma esohui etehue'yo etiiquianaa Moisesi nijjeya tehue ca poa. Ma esohui etehue'yo eya bajo, pojjeje quea huiso jeaja'a canaje, baa siyoo taaa poanaje, cueji poanaje pea'ai, meshi huehuahuehuanaje, meja jjacajjajequinaje, quea huiso nee oquequinaje pea'ai. E'e, jamaya eyaya banaje.

Epona eshequi jayojja sa'o huo'o jayojja napa canaje

12 ¹Majoya eyaya banaje aquiana ai'ai eyajo, ma Eyacuiñajjiya quijje ohua acaje. Jiquio jama poaje ba'a: Eyaya banaje epona eyajo.

Ojaya daqui quea jiji nee eshequi jayojja. Oya nequinaje ba'i biajje. Ojaya esapa huahuo yani majameta cuana, jiojji miji beca, 12 majameta. ²Oya

siasianaje ebacua neejo. ³Majoya eyaya banaje aquiana ai'ai eyajo, sa'o ai jayojja quea huo'o, sa'o ai ejja pojja'a. Oya quea sapa huiso, me oejje beca, 7 sapame. Oya quea she'ana huiso pea'ai, ome miji pea'ai she'aname, 10 she'aname. Oja sapa cuanajo ejaahuojja jayojja yani pea'ai, me oejje beca ejaahuojja. ⁴Ohuaya iña canaje quea huiso majameta cuana ehua'ohua. Iña majje majameta cuana jeaoqueajea canaje meshi yasijje. Oe majameta iña canaje, beca iña jjima poanaje. Jamaya ojjaña majameta cuana acanaje ma aquiana sa'o ai jayojjaa. Oya sa'o ai jayojja epona pejjejo nequinaje oja bacua ijjiajji nisho, cuayajo. ⁵Jamajjeya ma eponaja ebacua cuayanaje dejja sho'i. Oya ojjaña huoojeajji quea ca'a nee nee poaje'yo. Ohuaya ojjaña shajja'ajja mee caje'yo ojaya esohui. Jamajjeya sa'o ai jayojjaja oya ijji jjimahua peaa ma ebacua dojo canaje eyahuasijje Eyacuiñajji e'anioque ani yasijje. ⁶Majoya ma epona poquicuajicuajinaje quea huesha, meshi quima huasijje. Jomajo Eyacuiñajjiya eponaja eba'e meejjii acanaje. Jomajo Eyacuiñajjiya oya jaahuana canaje quea cahui huiso, 1.260 cahuime.

⁷Majoya eyajo quea huiso nee nee jjaquecuaquinaje. Jama poanaje ba'a: Ma sa'o ai jayojjaa ojaya esohuidojiji quea mimishi, quea huiso nee nee cuana nijjeya jjaquecuaquinaje esohuidojiji pame cuana nijje, Miyeni ojaya esohuidojiji quea pame nee nee quea huiso nee nee nijje. ⁸Miyeni quea ca'a nee nee, sa'o ai jayojja quea ca'a pishana. Jamajjeya Miyeniya sa'o ai jeabichajea majje jeaoqueajea canaje meshi yasijje. E'e, sa'o ai, ojaya esohuidojiji cuana pea'ai nequi tiitii mee jjima acanaje eyajo.

⁹Miyeniya oya cuana jeaoqueajea canaje meshi yasijje. Ma sa'o aija pea bajjani cuana jama ba'a: Peyo nei yahuajo nequia poa bajjani, eshahua nei bajjani pea'ai, Edosiquiana nei bajjani pea'ai, Satanasa. Ohuaya beshahua nei ojjaña cuana ojjaña meshijo ba'eca cuana dasia cani, quea mimishi po mee cani. E'e, ma sa'o ai ojaya esohuidojiji cuana nijje jeaoqueajea canaje meshi yasijje Miyeniya, esohuidojiji quea pameya.

¹⁰Majoya pea eyajo nequi enije miminaje janobajjima nei. Jama poanaje ba'a: —Jjeya nei Eyacuiñajjiya ecuana ba'e tiitii mee cani. Ohuaya Edosiquiana nei jeabichajea ca'yonaje. Jamajjeya oya ojjañaja Emeshi Mese nei poani. Ohuaya, Quitohua ojjaña huoojea cani pea'ai. Oya Eyacuiñajjiya huoojea'yo ojjaña jaahuanajji. Ma sa'o ai jayojjaa, Edosiquiana neiya ojjaña Jesosaja epeejji cuana niñeba cani tii tii, ohuaya esohui siajje acani Eyacuiñajji yasijje. ¹¹Cuanaya Jesosa Quitohua, ma ñajjajja sho'i equecua'yo jayojjaa ojaya epeejji cuana quea boejea po mee cani oya na' cuayaquia poaa jjejojo, poquijeyonajeya jjejojo. Ohuaya ojaya epeejji cuana Edosiquiana nei jeabichajea meesahua cani. Ojaya epeejji cuaa Jesosaja esohui huohui canaje. Edosiquiana jeabichajea mee canaje pea'ai. Mimishi cuaa oya cuana quecua canaje Jesosaja esohui huohuijjii poanijojo. Jamatii ohuaya mete'ama, yeno'ama pea'ai esohui huohui tiitii canaje. ¹²Jamajjeya ojjaña eyajo nequi, ¡quea bihui nee pocue! Ojjaña meshi cuanajo ba'e, miquianaya quea nee nee

poaje'yo Edosiquiana miquiana que jeaoqueajea ca'yonaje jojoya. Oya quea mase nee nee poani. Ojaya eba jama poaje ba'a: Quijje pishana Eyacuiñajjiya oya jeajea caje'yo cuaquí yasijje. Jamajjeya oya oijaña meshijo ba'e nijje quea mase nee nee poaje —jamaya peaa eyajo ba'eya eya huohui canaje.

¹³ Ma sa'o ai jayojja meshi yasijje oquequi'yo majje quea quene nee nee poanaje. Jamajjeya ohuaya epona, ma bacuajji poanaje enaese ocuecuaji canaje eshajomano meejea'yojji nisho. ¹⁴ Eyacuiñajjiya ma epona quia canaje beca ecuicho, huipa jayojja cuichomeya ecuabesajji. Jamajjeya oya cuabesanaje quea huesha, meshi quima huasijje. Jomajo Eyacuiñajjiya oya jaahuana canaje ma sa'o ai jayojja enapa ca poaje jjejojo. Eyacuiñajjiya oya jaahuana canaje quea huiso nee nee cahuime, beshahua nei ebeca pee pea'ai shequiajame. ¹⁵ Majoya sa'o ai jayojja enabajje ena quea quemo ojjajea canaje cuei quea quemo jayojja epona hui'i mee'yojji nisho. ¹⁶ Jamatii Eyacuiñajjiya epona jaahuana canaje. E'e, meshi jjaajjejjequi mee majje ma ena quea quemo meshi yasijje shajadobiqui mee canaje. Oya epona jja'aniquehuaquiñaquinaje quea huesha. ¹⁷ Jamajoya aje oe sa'o ai jayojja quea quene nee nee po majje poquinaje ma eponaja pea ebacua cuana nijje jjaquecuaquiya. Oijaña joya Eyacuiñajjiya esohui jayojja jama ba'yani, Jesosaja esohui e'e jojo nei huohui tiitijji poani pea'ai quecua sa acanaje ma sa'o ai jayojja. Jamaya eyaya, Huaniya banaje.

Aquiana mase bae ai'aijo ani etaja huasijje nequisohuaquinaje

13 ¹ Majoya eya jjacahuibaquinaje bae ai'ai sahuajo nequi. Jomajo eyaya banaje sa'o ai jayojja ishoa cani pea aquiana mase shanei ai jayojja, shanei ejja pojja'a. Oya bae ai'aijo ani cojja cuaya majje nequisohuanaje etaja huasijje. Oya quea sapa huiso, me oeije beca, 7 sapame. Ojaya eshe'ana quea huiso yani pea'ai, ome miji pea'ai, 10 she'aname. Oijaña eshe'anajo yani ejaahuojja jayojja. Oijaña esapajo yani etehue'yo quea tai pea'ai, Eyacuiñajji niñebajji tehue'yo. ² Ma shanei ai ejja jiquio jama ba'a: Oya ibia ecojjopia'yo ai jayojja, ibia chehue ai jayojja jiojjime. Oya ibia naa asha se' quemoajja, quea se' quemo nee nee. E'e, oya quea mase nee. Edosiquiana neiya, Satanasa, sa'o ai jayojja pea'aiya ma shanei ai ejja quea mase o jayojjaya po mee canaje, Edosiquiana nei jayojjaya poanaje. Jamajjeya oya quea ca'a nee poani, quea huiso huoojeajji poani. ³ Oya equecua'ajja'yo jayojja sapame poanaje, ma shanei ai ejjaja esapa. Jamatii jjajeaqui mee ca'yonaje. Jamajoya quea huiso dejja cuaa meshi cuanajo ba'eya ma shanei ai ejjajo quea meteya jjejojo ojaya esohui jayojja jama acanaje. ⁴ E'e, sa'o ai jayojja shanei ai ejja oijaña huoojeajji po mee canaje. Jamajjeya oijaña sa'o ai jayojja bihuia ca'yonaje ecui'oshajjajo nequiya. Shanei ai ejja quea ca'a nee nee poso bihuia canaje cuaa pea'ai jama ba'a: —Pea o jayojja chama'. Chama' o jeabichajeal'yojji epo, de —acanaje cuaa.

⁵Shanei ai ejja ojjaña meshijo ba'e huoojeajji poaje quea huiso ba'ijo, 42 ba'ime. Quea mimi tai nee nee poanaje. Jamajjeya Eyacuiñajji onijke quea quene nee nee poanaje. ⁶Ohuaya Eyacuiñajji eyajo ani ojjaña huoojeajji poani niñeba canaje. Ojjaña Eyacuiñajji nijje nequi niñeba canaje pe'a'i, shanei ai ejja. ⁷Jamatii Eyacuiñajjiya oya jeabichajea jjima. Jamajjeya ohuaya Jesosaja epeejji cuana nijje jjapee nishoqui majje jeabichajea canaje. Jamajjeya ojjañaa ojaya esohui jayojja jama acanaje. ⁸E'e, ojjaña meshijo ba'ecaa oya bihuia canaje. Jesosaja epeejji cuanaja ca ca oya shanei ai jayojja bihuia jjima. E'e, meshi pana jjimahuajo tii Jesosaa, ma ñajjajja sho'i equecua'yо jayojja ojaya epeejjiya bajjani tehue canaje eba'e tiitii mee'yojji. Jamajjeya ohuaya shanei ai jayojja bihuia jjima acani.

⁹¡Shajja'ajjacue oe; jjashahuabaquicue oe! ¹⁰Joya jja'líñaquiani ejeanobiajji quijke onaa oya iña majje jeanobia caje'yo pe'a'i. Ojjaña joya jjajajaquiani manoje'yo; yacua pe'a'i caje'yo cuaa. Jamajjeya ojjaña Jesosaja epeejji cuana quea nee poanijo jamatii mete'ama cajjapee tiitiiquiahuia onijke.

¹¹Majoya eyaya, Huaniya banaje pea aquiana quea mase pe'a'i shaijjami ai quea mase nee jayojja, shaijjami ejja. Oya meshi quipajo ani cuayanaje. Ojaya eshe'ana becamejjiji pe'a'i ñajjajja yahue jayojja. Jamatii ojaya esohui sa'o ai jayojja quea ajjajja epo meejjii. ¹²Ebionei shanei ai ejja jiquio jjeya meshi quipajo ani cuayanaje shaijjami ai ejja o jayojja ojjaña huoojeajji po mee ca'yonaje. Jamajjeya pea shaijjami ejja ma meshi quipajo ani cuaya ojjaña huoojea canaje ma shanei ai ejja esapa jaja'ajja bihuiaa. ¹³Ohuaya, ma meshi quipajo ani cuaya ma dejja ajjima acani acanaje quea huiso nee. E'e, ojjaña dejjaja ebajji ohuaya cuaqui oque mee canaje meshi yasijje. ¹⁴Ohuaya jamaya acanaje ojjaña ma ebionei shanei ai bihuia meeiji. Ma dejja ajjima acani amajjeya ohuaya ojjaña cuana dasia canaje. E'e, ohuaya dejja cuana ebionei shanei ai nisho pana mee canaje epa'yo, ma shanei ai esapa jaja'ajja jjajeaquí'yonaje nisho pana mee canaje. ¹⁵Majoya ma meshi quipajje cuaya poa shaijjami ai ejja shanei ai nisho epa'yo eshe jayojja mimi meeme po mee canaje. Jamajjeya ohuaya jama acanaje ba'a: —¡Ojjaña joya e bihuia ajja iñacue, quecuajea'yocue, oe! —poanaje shanei ai nisho epa'yo.

¹⁶Majoya shanei aiya huohui canaje jama ba'a: —¡Ojjaña cuana, ojjaña tii tehuecue ebahuajje, ebianei emejje pojja'a ecuea bajjani! ¡Ojjaña esho'i, ojjaña etii pe'a'i, ojjaña echacojji cuana, ojjaña echacomeejji cuana, ojjaña quea aquiana huiso poani cuana, ojjaña aema' cuana pea'a'i jamaya tehuecue ecuea bajjani, ecuea ebajji! ¹⁷Ojjaña joya jjatehue meequi jjima aje oe ja'a aquiana cuana jjeshe meeiji! ¡A'a aquiana quia meeiji pea'a'i! —oya poanaje.

¹⁸Bacue oe! ¡Ojjaña quea jjashahuabaqui ja'a, shanei aija ebajjani etehue'yo bacue! Ojaya etehue'yo ojaya bajjani jama ba'a: 666.

**Quea huiso nee ojaya epereeji nei Jesosa nijje
jjaja'a meequei canaje, 144.000 huisome**

14

¹Majoya Eyacuiñajjiya eya eyahuasijje ba mee canaje Jesosa Sioni eyiyo biajje nequi. Eya ba mee canaje ojaya epereeji cuana quea huiso nee nee Jesosa nijje nequi, 144.000 huisome. Onaya ebahuajje etehue'ylo Jesosaja ebajji, Echii aija ebajji pealai ojaya jojoya. ²Majoya eyaya shajja'ajjanaje eyajo ojjaña ma epereeji cuana sohuicuayani, Jesosa bihuia poani. Eyaya oya cuana shajja'ajjanaje ena tii tii poani jayojja, cueji baa siyoo poani jayojja, quea huiso e'iñaqueyajji cuana iñaqueyela cani cuaa jayojja. ³Ojjaña Jesosaja epereeji cuana quea huiso nee nee sohuicuayanaje Eyacuiñajji cojja nei nequi, ebeca pee pealai aquiana eshe cojja nei nequi, Jesosaja epereeji etii 24 huisome cojja nei nequi pealai. Jomajo ojee nequi Jesosaja epereeji quea huiso nee nee cuana sohuicuayanaje, esohuicuayajji eyacua. Ma esohuicuayajji eyacua pea cuanaja eyajo ba'e cuanaja ebajji pojjeama. Ma esohui esohuicuayajji Jesosaja epereeji yahuajo meshijo ba'yahua mimishi cuijea'yo cuana ca ca oe sohuicuayani. ⁴⁻⁵Quea bojea'yo ba'enaje, epana'yo bihuia jjima poanaje onajaya. Siajje po ajja nei nei pealai, mimishi'ama nei nei pealai. Oya cuana Jesosa nijje jjapee neineiquinaje, ma ñajjajja sho'i equecua'yo jayojja nijje. Onijje tii poquiani. Jesosa acui ecueatalapeejo mano'yonaje onaja mimishi cuana sosequia'yojji. Jiquio ecua ebana coojji jjajjani quea pame nee jama jayojja oya cuana quea pame nee. E'e, jiquio ecua ebana coojji ebionei jjajjani quea pame nee poani Jodio cuaa Eyacuiñajji yasijje quia cani ojaya epoji jama jayojjaya oya cuana Eyacuiñajji nijje ba'e tiitije'yo Jesosa nijje pealai jiquio 144.000 Jodio cuana. Jamaya eya, Huani cahuibanaje.

Pea esohuidojodziya huohui canaje Jesosa poe o'oyajjijo

⁶Majoya eyaya banaje pea esohuidojodzi eyajo cuabesani. Eyacuiñajjiya oya huoojea canaje ojjaña cuana huasijje Jesosa ojjaña cuana ba'e tiitii mee canijo huohuiya. E'e, ohuaya Jesosajo huohui cani ojjaña cuana ojjaña esohuijo mimiani yasijje. ⁷Ohuaya jama acanaje ba'a: —¡Eyacuiñajji shajja'ajjacue! Oya jama acue ba'a: "Eyacuiñajji, miya quea pame nee nee". ¡Oya bihuiaque! Ohuaya ojjaña eyajo ba'e pana canaje; meshi, bae aii cuana, cuei cuana pealai pana canaje. E'e, jjamaya acue oya; jjeyahua nei ohuaya ojjaña mimishi cuana quea nee nee po mee caje! —esohuidojodziya ojjaña acanaje.

⁸Ma ebionei esohuidojodzi huohui cajo, pea esohuidojodzi poeyanaje. Huohui canaje jama ba'a: —Ojjaña ma cuiñajji quea quemodo ba'e quea mimishi poanijo quea nee nee po mee caje, Babinonia cuiñajji bajjanijo ba'e cuana. Jiquio ecua oe epona quea mimishiya quea huiso dejja cuana quea mimishi po mee cani jama jayojja dejja cuana jomajo ba'eya pea cuana pea cuiñajji cuanajo ba'e quea mimishi po mee ca'yonaje —jamaya ma esohuidojodzi poanaje.

⁹Majoya pea esohuidojiji poeyanaje. Huohui canaje jama ba'a: —Ojjaña joya shanei ai jayojja bihuijji poani shanei nisho'ya pea'ai bihuiajji poani, shanei aija bajjani jayojja ebahuajje, emejje pojja'a jjatehue meequei pea'ai quea nee nee po mee caje'yo Eyacuiñajjiya. ¹⁰E'e, jamaya acajo Eyacuiñajjiya ona nijje quea quene nee nee poaje'yo. Cuaquijo, huichacha quea ihui nee neejo quea nee nee po tiitije'yo. Ojjaña esohuidojiji quea pame neeya ba caje, Jesosaa ma ñajajaja equecua'yo jayojja pea'aiya oya cuana ba caje'yo cuaquijo nequi. ¹¹E'e, oya cuana quea nee nee poaje'yo tii tii; cuaqui huichacha ba'esohuaquije'yo tii tii. Ojjaña joya shanei ai jayojja bihuiajji poani, shanei nisho bihuiajji poani pea'ai, shaneija bajjani jayojja ebahuajje jjatehue meequei pea'ai quea nee nee poaje'yo tii tii, quea nee po pajea'yo ajja tii epojjajo, mecajje pea'ai —jamaya poanaje esohuidojiji.

¹²Jamajjeya ojjaña Jesosaja epeejji cuana dejja mimishiya napa cajo jamatii mete'ama cajjapee tiitiquiahua, ma Jesosa nijje jjapeequi pajea'yo ajja, ojjaña Eyacuiñajjiya esohui jayojja jama acani pea'ai.

¹³Majoya eyaya, Huaniya shajja'ajjanaje pea eyajo mimiani jama ba'a: —Huani, ¡jiquio ecuea esohui tehuecue! Eyacuiñajjiya jjeya nei, quijke pea'ai quea bihui nee nee po mee caje'yo ojjaña Jesosaja esohui huohuijji ma esohui huohuijjiyo dejja mimishiya quecua caje —poanaje.

Majoya Edojjoshahua Pameya jama acanaje ba'a: —E'e jojo nei Jesosaja epeejji cuana ojaya esohui huohuijjiyo mano'yajo ba'e tiitii mee caje'yo Eyacuiñajjiya, jomishoca mee caje'yo; oya cuana sosequia caje'yo esohui huohui canaje sosejje.

Jamaya eya, Huani Jesosaa cahui ba mee canaje.

Eyeacuiñajjiya dejja mimishi cuana napa neinei mee canaje

¹⁴Majoya eyaya, Huaniya eyahuasijje banaje pea jama ba'a: Oe Dejjaja Bacua Ejja jayojjaya bo oshe biajje anioqueani. Ejaahuojja mei huo'o quea nahue esapajo ani ye'oquea canaje, baa ai shehuihui baa quea shejji iña canaje ebianeい mejje. ¹⁵Majoya eyajo pea esohuidojiji Eyacuiñajjiya equijo ani cuayanaje. Cuaya majje taaaanaje joya bo oshe biajje ani yasijje. Jama poanaje ba'a: —Dejja mimishi cuana meshijo ani anoso ai yiye ejahua nee nee jayojja. Jamajjeya janoso ai jahuajo jajasejja ca'yani baa ai shehuihuiya echicha'yoji jayojja jama jjeya nei dejja mimishi cuana acue! ¡Oya cuana chichacue, oe! —jama taaaameya poanaje.

¹⁶Jamajjeya ohuaya bo oshe biajje aniya ojjaña mimishi cuana meshijo ba'eca jaja ca'yonaje; chicha canaje ojjaña. Apoa aca'yonaje.

¹⁷Majoya eyaya, Huaniya banaje pea esohuidojiji eyajo Eyacuiñajjiya equijo ani cuayanaje. Ojaya baa ai shehuihui yani pea'ai. ¹⁸Majoya pea esohuidojiji mei eliya pejjejo ani, ma cuaqui jijiani pejjejo ani poeyanaje. Oya taaaanaje esohuidojiji baa aijji ani yasijje. Jama poanaje ba'a: —Ojjaña mimishi cuana meshijo ba'e acui jjajja ejahua nee nee jayojja jama. ¡Jamajjeya ejjajja jahuajo

sejja cani jayojja jjeya nei dejja mimishi cuana acue! ¡Quea mimishi poanijo quea nee po meecue! —ma esohuidojojji poanaje.

¹⁹ Jamajjeya meshi yasijje poe majje ma esohuidojojjiya ojjaña mimishi cuana meshijo ba'eca cuana jaja majje chicha canaje quea nee nee epo mee'yoji. E'e, Eyacuiñajji quea quene poaje mimishi cuanajo. Eca ijija pashajji yasijje nequia cani jayojja jama acaje'yo dejja mimishi cuana.

²⁰ Jiquio ecua eca jajasejja majje cuiñajji pejjejo ijjiapasha mee caje eca na cuayaquiani jayojja jama ojjaña quea mimishi poani acaje'yo cuua. Eyacuiñajji ba sa po'yo ajjajo quea huiso nee nee mano'yonaje; jjaquecuaqui'yo majje ena' cuayaquinaje cuei quea quemó jayojja jama, de.

Esohuidojojji cuaa ye canaje me oeje beca mimishi cuana napajji

15 ¹Majoya Eyacuiñajjiya ecuea ebajji jjaja'aqui mee canaje ma quijjeyejje nei ohua acaje. Eyaya banaje pea aquiana ai'ai eyajo nequi. Ba majje quea ajjajja nee nee poanaje. Ma aquiana ai'ai jama ba'a: Me oeje beca esohuidojojji eyaya banaje, Eyacuiñajjiya huoojea cuana ojjaña meshijo ba'eca cuana quea nee nee po meejjii. Ojjaña napajji me oeje beca huisome eyaya banaje. Ona napa majje chama' pea enapajji poaje. E'e, Eyacuiñajjiya ejjashahuabaquijji ojjaña napajji apoa poaje'yo. ²Majoya eyaya banaje bae ai quea siyo tahuoo quea siyo jayojja cuaquijiji quea jeajahua tejjee. Ma bae ai sahuajo nequi ojjaña Jesosaja epeejji cuana. Maaya shanei ai ejja jeabichajea ca'yonaje, shanei ai nisho jeabichajea ca'yonaje pea'ai. Jesosaja epeejji cuaa shanei aija bajjani tehue mee jjima acanaje onajaya ebahuajje. Onijke jjapeequi'yo ajja pea'ai. Jamajjeya Eyacuiñajjiya Jesosaja epeejji cuana huasijje quia canaje el'iñaqueyajji cuana esohuicuayajji.

³Jamajoya Jesosaja epeejji cuana sohuicuayanaje Jesosa bihuiajji, Eyacuiñajji bihuiajji pea'ai. E'e, Moisesi, Eyacuiñajjiya esohui huohujji sohuicuaya poa jayojja jamaya sohuicuayame poanaje Jesosaja epeejji cuana, Jesosaa quea pame nee acanajejo. Jesosa bihuiia canaje jama ba'a:

“Eyacuiñajji, miya oe nei quea ca'a nee nee poani tii tii. Ecuana quea bojeja nee po mee'yonaje. Jamaya quea pame nee. E'e, miya quea pame nee nee poani, e'e jojo nei pea'ai. Miya ojjaña huoojeajji po tiitiiani.

⁴ Ecuanaja Emeshi Mese Jesosa, ojjañaaa miquea esohui cashajja'ajja tiiti cahua, camimi cahua jama ba'a: —Jesosa, miya quea ca'a nee nee po tiitiiani —capoahua. E'e, ojjañaaa miya bihuiia caje'yo. E'e Jesosa, miya oe nei quea pame nee nee poani tiitijo Eyacuiñajjiya miya quea boti nee. Eyacuiñajjiya ojjaña miquea eba'ejji quea pame ba mee canajejo, jojjaña meshijo ba'eca cuaa miya cabihuia cahua, mi pejjejo nequiya!”

Jamaya poanaje ojjaña Jesosaja epeejji cuana.

⁵Majoya eyaya eyajo banaje Eyacuiñajjiya equi. Eyacuiñajjiya equi equecuayijji biso nei esecue eca'apejo nequi banaje. Jomajo yani Eyacuiñajjiya

esohui etehue'yo. ⁶Eyaya banaje me oeje beca esohuidojiji Eyacuiñajija equijo nequi cuayanaje. Ojaya emejo yani dejja mimishi napajji, ojjaña meshijo ba'eca cuana napajji. Ojaya daqui quea oshe nee quea jeajahua nee.

Ese'ojje baa daqui ehuosho ba'e mei huo'o quea nahue nee. ⁷Majoya eyaya banaje eyajo ma ebeca pee pealai aquiana eshe cuana Eyacuiñajija pejjejo ani. Oe aquiana esheya caneco cuana quia canaje ma esohuidojiji cuana. Me oeje beca caneco cuana quia canaje. Ma caneco cuanajo yani aquiana dejja mimishi cuana quea nee epo meeji. Eyacuiñajiji enequi tii tii quea quene nee nee poani ojjaña quea mimishi poani nijje. ⁸Jamajjeya Eyacuiñajija equijo aminaje huichacha quea quemó nee nee; Eyacuiñajiji quea ca'a, quea jeajahua, quea jiji nee nee pealai jayojja jomajo nequinaje. Jamajjeya ojjaña cuana Eyacuiñajija equi yasijje dobiqui mee jjima poanaje. Quijje me oeje beca esohuidojijiya me oeje beca aquiana dejja mimishi cuana quea nee epo meeji apoa amajje pea cuana Eyacuiñajija equi yasijje eyajo dobiqui mee caje'yo.

Me oeje beca aquiana cuana dejja mimishi napajji

16 ¹Majoya eyaya Eyacuiñajiji shajja'ajjanaje ojaya equijo mimiani. Ohuaya me oeje beca esohuidojiji cuana huohui canaje jama ba'a: —¡Aquiana miquianajaya canecojo ani shojeacue ojjaña meshijo ba'e yasijje ojjaña quea nee nee po meeji!

E'e, Eyacuiñajija ona nijje quea quene neejo quea nee nee po mee caje'yo. ²Jamajjeya majoya ebionei esohuidojijiya ma aquiana ojaya canecojo ani shojea canaje ojjaña meshijo ba'e yasijje. Jamajjeya ojjaña cuana ma shanei aija bajjani jayojja ebahuajje tehue'yo chiji po mee canaje quea nee nee. Quea nee nee po mee ca'yonaje ohua shanei ai jayojja bihuia canajejo, shanei ai nisho epana'yo bihuia canajejo pea'ai.

Me oeje oe pea esohuidojijiya pea aquiana caneco cuanajo ani shojea jjima so'o. ³Majoya pea esohuidojijiya aquiana ojaya canecojo ani shojea canaje bae ai yasijje. Jamajjeya bae ena quea huo'o nee equecua'yo na' cuayaquiani jayojja po'yonaje, quea ihui po'yonaje ojjaña aquiana enajo nequica mano'yojji.

Me oeje esohuidojijiya aquiana caneco cuanajo ani; shojea jjima so'o. ⁴Majoya pea esohuidojijiya aquiana ojaya canecojo ani shojea canaje cuei quea quemó cuana huasijje, cuei sisi cuana huasijje pea'ai. Jamajjeya ojjaña ena quea huo'o, quea ihui po'yonaje nahuoo cuana mano'yojji.

⁵Majoya esohuidojijiya, ena jaahuanajji poaniya huohui canaje jama ba'a: —Jesosa, miquea ejjashahuabauquijji cuana, miquea esohui cuana ojjaña mimishi cuanajo quea pame nee, e'e jojo nei pea'ai. E'e, miya quea pame nee poani jojoya miya Eyacuiñajija quea jea nee nee. Miya yahuajo nei nei yania poa; jjeya nei miya yani tii tii pea'ai. Jamajjeya ojjaña mimishi cuanajo miquea esohui quea ja'a nee. ⁶E'e Jesosa, ojjaña dejja mimishi cuaa miquea epeejji cuana, miquea esohui huohuijji cuana pea'ai

quecu ca'yajje ena' cuayaquinaje, jjashojeajequinaje. Jamajjeya miyaya mimishi cuana ena', equecua'yo cuanaja ena' cuayaquiani jayojja ishi meeña quea ihui o manojea'yojji. ¡Jamaya capo'yahu! —poanaje.

⁷Majoya eyaya shajja'ajjanaje pea eyajo mei e'iya pejjejo nequi. Oya jama poanaje ba'a: —E'e Eyacuiñajji, miya quea ca'a nee, ojjaña huoojeaña. Miquea ejjashahuabauquijji cuana e'e jojo nei quea pame nee. ¡Pea quea mimishi poanijo napacue! ¡Jamaya capoahua!

⁸Ebeca pee pea'ai esohuidojiji aquiana ojaya canecojo ani shojea jjima so'o. Majoya pea esohuidojiji aquiana ojaya canecojo ani shojea canaje eshequi yasijke. Jamajjeya eshequi quea quiyo nee nee po'yonaje. Quea quiyo nee nee po majjeya ojjaña meshijo ba'e dahua canaje. ⁹Eyacuiñajji ojaya esohuidojiji cuana huoojea canaje dejja mimishi cuana quea nee nee po meeya. Jamajjeya eshequiya dahua cajje Eyacuiñajji niñebea canaje cuaa. Jamatii dejja mimishi cuaa ojaya mimishi pajea'yo ajja quea mimishi nee nee jjejojo. Eyacuiñajji bihuia'yo ajja pea'ai.

Pea beca peejjima esohuidojiji aquiana ojaya caneco cuanajo shojea jjima ani so'o. ¹⁰Jamajjeya majoya pea esohuidojiji aquiana ojaya canecojo ani shojea canaje shanei ai jayojja que, ma ojaya epeejji cuana meshijo ba'e huoojeajji poani que. Jamajjeya quea misi nee nee poanaje. Ojjaña quea nee nee poanaje. Quea nee nee jja'anai jjiaajjejeaquí canaje. ¹¹Quea nee poanijo, chiji poanijo pea'ai ojjaña cuaa Eyacuiñajji eyajo ba'e niñebea canaje. Jamatii ma shanei ai ejja, ojaya epeejji cuana pea aiya mimishi cuana pajea'yo ajja poanaje.

Beca esohuidojiji aquiana ojaya caneco cuanajo ani shojea jjima so'o. ¹²Jamajjeya majoya pea esohuidojiji aquiana ojaya canecojo ani shojea canaje cuei ai yasijke, Eopate cuei yasijke. Esohuidojiji ma cuei huosa mee ca'yonaje. Huosa'yajo emeshi mese cuana meshi eshequi poejji mijijje ba'eca poeje sohuinano quea huiso nee nee cuana nijje jjaquecuaquija.

¹³Majoya eyaya banaje pea beca peejjima eshahua cuana, shona hui jayojja. Oya cuana cuayanaje ma sa'o aija enabajje, shanei ai ejjaja enabajje, esohui huohujji nisho esiajje pojija enabajje pea'ai cuayanaje. ¹⁴Jiquio eshahua cuaa ma dejja ajjima acani quea huiso acanaje. Oya cuana poquije ojjaña meshi yasijke ojjaña emeshi mese chichaa Eyacuiñajji nijje ejjaquecuaquijji. Majoya Jesosa poeje'yo sa'o ai jayojja jeabichajeara.

¹⁵Majoya eyaya shajja'ajjanaje Jesosa mimiani jama ba'a: —¡Shajja'ajjacue mo! Beca cuana ejo ishoa ajja. Jamatii eya poecuajije siipojji poecuajicuajiani jayojja. Joya ejo ishoa'ishoa'ajja ani tii quea bihui nee nee poaje. E'e, eyaya oya cuana quea boejea po meeje'yo. Oya cuana daquijji jayojja jama poaje e poe o'oyajo. Jamajjeya oya cuana bicho'ama poaje e poe o'oyajo.

¹⁶Majoya ma eshahua cuaa ojjaña emeshi mese cuana jjachichaqui mee canaje oe meshi yasijke eyiyo Majeno bajjani yasijke, ma Jodioja esohuijo Amayeno meshi bajjani yasijke.

¹⁷Oe esohuidojiji aquiana ojaya canecojo ani shojea jjima so'o. Majoya ohuaya ma aquiana ojaya canecojo ani shojea canaje beni yasijje. Shojea cajo eyaya shajja'ajjanaje pea eyajo Eyacuiñajji equijo nequi janobajjima nei taaanaje jama ba'a: —Apoa. Eyacuiñajjiya dejja quea mimishi cuana quea nee po mee ca'yonaje.

¹⁸Majoya pojjeje baa siyoo po majamajanaje, taaanaje, cueji po majamajanaje pea'ai. Meshi huehuahuehuanaje janobajjima nei nei pea'ai; yahuajo nei meshi huehuahuehuanaje oe pojji. ¹⁹Jamajjeya Babinonia cuiñajji quea quemojo meshi jjamijisisi jeaquinaje, pea beca peejjima jjamijisisi jeaquime poanaje. Ojjaña pea cuiñajji cuana ojjaña meshijo jaabichajequinaje pea'ai. Eyacuiñajjiya Babinonia cuiñajji quea quemojo jjashahuabaqui majje ojjaña dejja jomajo ba'e quea nee nee po mee ca'yonaje. Ojjaña mimishijo quea quene nee nee poanaje Eyacuiñajji. ²⁰Huehuahuehua majje ojjaña nasi ai cuana chama'yo tii poanaje. Ojjaña eyiyo cuana chama'yo tii poanaje pea'ai. Jamajjeya dejja cuaa eyiyo ba'yo jjima acaje. ²¹Meja na ejjajjacajjaqui cuana quea quemo nee nee, 50 quinome biquieme oquenaje dejja cuana biajje. Jamajjeya dejja mimishi cuaa quea nee nee po majje Eyacuiñajji niñebe neinei canaje.

Epona quea mimishi

17 ¹Majoya oe esohuidojiji e que poeyanaje, ma aquiana canecojo ani shojea canaje. Oya enijke miminaje jama ba'a: —Cua'a! Eyaya miya ba meeje ache nee nee poaje ba'a ojjaña ma cuiñajji quea mimishijo ba'e. Ojjaña cuana epona pea cojjojji jayojja nei nei poani. Oya quea huiso bae biajje anioqueani jayojja jama quea huiso nee nee quea mimishi po mee cani. ²Ohuaya quea huiso emeshi mese cuana quea mimishi po mee cani onijke, beijo sosejje. Ojjaña meshijo ba'e cuana quea mimishi jjashahuabaqui mee cani, ojjaña cuana onijke quea mimishi po tiitii mee cani. E'e, oya cuana ehuoo nei jayojja jama poani. Jiquio ecua dejja huoo majje quea cachasa sei nee jayojja jama oya cuana quea mimishi tii tii po sa poani.

³Majoya ma esohuidojijiya eya dojo canaje meshi quima huasijje. Edojoshahua Pameya eya jjashahuabaqui mee canaje. Jamajjeya eyaya jomajo pea epona banaje. Oya shadaa ai huo'o jayojjaja edaasa biajje aninaje. Ma shadaa ai jayojjaja edaasajo yani bajjani cuana etehue'yo, Eyacuiñajjiya bajjani cuana jayojja. Jamaya Eyacuiñajjiya boti'ama, de. Ma shadaa ai jayojja, shadaa ai ejja pojja'a quea sapa huiso, me oeje beca sapame, 7 sapame. Oya she'anajji pea'ai, quea huiso she'aname ome miji peal'ai, 10 she'aname. ⁴Ma eponaja daqui quea huo'o nee nee. Ojaya eyijiji quea huiso nee nee, mei huo'o cuana, mei oshe quea nahue cuana, ojjaña mei nahue cuana pea'ai. Oja me cuanajo yani oe caneco quea nahue, mei huo'o caneco. Ma mei huo'o canecojo ani aquiana quea tai. Maya ojjaña ojaya ejjashahuabaquijji quea mimishi cuana

jayojja, quea huiso dejja cuana nijje quea tai poanaje pe'a'i jayojja. ⁵Ebahuajje ojaya bajjani etehue'yo poanaje ma ojjaña dejja cuanaja quea quehua. Ese ejjaja esohuijo jama bajjani ba'a: "Babinonia cuiñajji quea quemó ojjaña mimishi cuana ba'ejji" bajjani. Jama tehueme'yaya ojaya ebahuajo jaa. ⁶Majoya eyaya oya banaje quea mimishi nee nee. Ohuaya quea huiso Jesosaja epeejji cuana quecua ca'yonaje Jesosaja esohui huohuijijojo. Jamajjeya ma epona ehuoo jayojja quea bilihui nee poani Jesosaja epeejji quecua ca'yajo. Ma epona quea mimishi ba majje eya quea ajjajja nei poanaje. ⁷Majoya ma esohuidojorijiya eya huohui canaje jama ba'a: —Huani, ¿apiojji acuae miya quea ajjajja nei epona quea mimishijo? ¿Ae jayojja jama ma epona quea mimishi nee, ma shadaa ai jayojja pe'a'i? Eyaya miya huohuije: Jjeya miquea eba pojjeama ma shadaa ai quea sapa huiso, me oeje beca sapame, quea she'ana huiso pe'a'i, ome miji pe'a'i, 10 she'aname. ⁸¡Bacue! Oya shadaa ai jayojja yahuajo nei nei nequia poa meshijo. Jamatii jjeya oya chama' meshijo. Quijje oya quea huesha nee jaa poeje o'oya, jjani aijo ma mimishi cuana mano'yo majje poqui'yanijke jaa poeje o'oya. Majoya Eyacuiñajjiya oya quea nee nee po mee caje'yo. Jamajjeya Jesosaja epeejji pojjeama quea huiso meshijo ba'e, ma Eyacuiñajjiya yahuajo nei nei meshi pana coo jeahuajo onajaya bajjani cuana tehue jjima ojaya etehue'yo eba'e tiitii'yojjijo, maya cuana ma shadaa ai jayojja ba majje quea ajjajja nee nee poaje. E'e, ma shadaa ai jayojja yahuajo nei nei nequia poa; jjeya ca chama' meshijo; jamatii quijke quea huesha nee jaa poeje o'oya Jesosa jeabichajeaa nisho —esohuidojoriji poanaje.

⁹Majoya esohuidojorijiya eya huohui canaje jama ba'a: —¡Quea ja'a nee jjashahuabaquicue shadaa aija sapa quea huiso, epona quea mimishi pe'a'i ebajji! ¡Bacue! Shadaa aija me oeje beca sapa eyiyo cuana jayojja poani. Jiquio eyiyo cuana biajje anioqueani epona quea mimishi. Jiquio eyiyo cuana jayojjaya me oeje beca emeshi mese cuana poani. ¹⁰Me oeje emeshi mese cuana chama'yo tii poanaje. Oe emeshi mese jjeya nei enequi. Pea emeshi mese quijke pishana poeje. Poe majje oya nequije oe pojji cahuime. ¹¹Ma shadaa ai jayojja, shadaa ai ejja yahuajo nei nequia poa meshijo. Jjeya oya chama'. Quijje oya poeje o'oya; emeshi mese quijkeyejje nei nequi poaje me oeje beca emeshi mese cuana apoa poajo. Oya poe jjimahuajo me oeje beca emeshi mese cuana eyiyo cuana jayojja nequinaje. Ona nijje shadaa ai ejja jayojjaya emeshi mese nequinaje pe'a'i. Majoya Eyacuiñajjiya oya chama'yo tii po mee caje'yo. ¹²Huani —Esohuidojorijiya eya acanaje—, miyaya banaje ome miji pe'a'i huiso eshe'ana, shadaa ai ejjaja eshe'ana. Ma eshe'ana cuana ome miji pe'a'i emeshi mese cuana jayojja. Oya cuana quijke emeshi mese cuana poaje. Shadaa ai ejja nijjeya ojjaña cuana huoojea caje'yo oe pojji cahuime cuana. ¹³Ojjaña emeshi mese pea emeshi mese cuana jayojjaya jama jjashahuabaquije Jesosa jeabichajeajji. E'e, ojjaña emeshi mese quea mimishi cuaa shadaa ai ejja shajja'a'jja caje'yo. Deja mase cuana huoojea caje shadaa ai ejja nijjeya Jesosa nijje jjaquecuaquiya.

¹⁴E'e, ojjaña quea mimishi cuana ojee poquije Jesosa quecuua nisho. E'e, Jesosa quecuua sa acaje cuaa. Jamatii Jesosa quea ca'a nee nee. Ojjaña huoojea caje'yo. Ojjaña emeshi mese cuana huoojeajji oe nei Emeshi Mese nei poaje'yo Jesosa. Jamajjeya Jesosaa ojaya epeejji cuana nijjeya ojjaña quea mimishi poani quecuadehuejea caje'yo. E'e, Jesosa nijje ani ojjaña ojaya epeejji cuana. Jesosaa oya cuana babaca'yo majje iyaa canaje ojaya epeejji epojji —esohuidojijiya eya acanaje.

¹⁵Majoya ma esohuidojijiya eya huohui canaje jama ba'a: —Huani, miyaya banaje bae jayojja quea huiso, quea quemo cuana. Ma bae cuana biajje anioquenaje epona pea cojjoji nei nei. Ma bae jayojja cuana dejja quea huiso nee nee jayojja, ojjaña meshijo ba'eca cuana, ojjaña pea esohujio mimiani cuana pea'ai. Quea huiso nee nee, de —esohuidojiji poanaje—. ¹⁶Huani, miyaya banaje shadaa ai ejja quea she'ana huiso, ome miji pea'ai she'aname, 10 she'aname. Maya ome miji pea'ai, 10 emeshi mese jayojja, de. Maya onajaya ma epona pea cojjoji jayojja boti'ama nei nei poaje. Jamajjeya ma epona jeabichajea caje'yo. Jeabichajea majje jeajea caje'yo epona quea mimishi daquima' jayojja; dahuajea caje'yo. Jiquio ecua ijjiacajjiya aquiana iña majje ijji cani jayojja jama epona mimishi chama'yo tii acaje'yo ma emeshi mese cuaa. ¹⁷E'e, Eyacuiñajjiya ma emeshi mese cuana ojaya esohui jayojja jama amee caje'yo. Jjashahuabaqui mee caje'yo jama ba'a: "Ecuaaya ma shadaa ai ejja huasijke huoojeaje'yo ecuanaja dejja mase cuana quea huiso nee nee oya quea ca'a nee epo meeji". Jamajjeya ojjaña dejja mase cuana huoojea caje'yo cuaa shadaa ai ejja quea ca'a nee nee epoiji. Jamaya Eyacuiñajjiya huohui canaje ma ohua quijje nei acaje —esohuidojijiya eya jamaya acanaje—. ¹⁸Huani, miyaya banaje ma epona pea cojjoji jayojja. Ma epona cuiñajji quea quemo nee ojjaña quea mimishi ba'ejji jayojja. Maaya ojjaña pea emeshi mese cuana huoojea cani —jamaya esohuidojijiya eya acanaje.

Eyacuiñajjiya ojjaña Babinonia cuiñajjijo ba'e quea nee nee po mee caje'yo

18 ¹Majoya eyaya, Huaniya banaje pea esohuidojiji. Oya eyajo nequi nequioquenaje dejja cuana huasijke. Eyacuiñajjiya oya quea ca'a po mee canaje. Jamajjeya esohuidojijiya ojjaña huoojea canaje. Quea jeajahua nee nee poaniya jjejojo meshi cuana jeaja'jea canaje. ²Jama taaame poanaje ba'a: —Ojjaña quea mimishi Babinoniaijo ba'e Eyacuiñajjiya quea nee nee po mee caje'yo, chama'yo tii po mee caje'yo. Jamajjeya ma cuiñajjijo ba'equije'yo edosiquiana cuana, eshahua cuana pea'ai, ojjaña cuichojji quea tai ijji ca ajja pea'ai jomajo ba'equije'yo. ³Ojjaña cuana quea mimishi nee nee ma cuiñajjijo ba'e. Jamajjeya ojjaña dejja cuana pea cuiñajji cuanajo ba'e quea mimishi po mee ca'yonaje. E'e, dejja cuana quea mimishi ba'e ehuoo nei jayojja quea jjashahuabaqui tai poani. Jamaya dejja cuana ma

cuiñajji quea quemojo ba'eya pea cuana ehuoo nei jayojja jama po mee cani. Ojjaña pea emeshi mese cuana quea mimishi poani dejja cuana ma cuiñajji quea quemojo ba'e jayojjaya. Ma cuiñajji quea mimishi, quea quemojo yani quea huiso aquiana. Jamajjeya dejja quea aquiana huiso cuana peapea aquiana quea huiso nee jjeshe cani jomajo —jamaya ohuaya eya acanaje.

⁴Majoya eyaya, Huaniya shajja'ajjanaje pea eyajo aniya Jesosaja epeejji cuana iyaa cani jama ba'a: —Ecuea epeejji cuana, ¡a'a aniji ma cuiñajji quea mimishijo! Ona jayojja quea mimishi mi po chana!. ¡A'a jomajo ba'e majajji; miquianaya quea nee nee po chana!, onaya jayojjaya! E'e, Eyacuiñajjiya ojjaña cuana jomajo ba'e quea nee nee po mee caje'yo quea mimishi poanijo. ⁵Eyacuiñajjiya ba canaje onajaya mimishi cuana quea huiso nee nee. Jamajjeya oya jjashahuabaquiani ona napajji quea mimishi nee nee poanijo. ⁶Ojjañaaa jomajo ba'eya miquianaya napa canaje ecuea epeejji poanijo. Jama napa'yomeya Eyacuiñajjiya oya cuana acaje'yo. Onaaya miquianaya quea nee nee po mee canaje enijje jjapeequianijo. Jamajjeya Eyacuiñajjiya oya cuana quea nee nee po tiitii mee caje'yo. Oya cuana miquianaya quea yeno po mee canaje. Jamajoya Eyacuiñajjiya oya cuana quea yeno po tiitii mee caje'yo. ⁷Ojjañaaa ma cuiñajji quea mimishijo ba'eya jjeshe canaje aquiana cuana quea huiso nee nee. E'e, onajaya aquiana quea huiso nee nee. Ma aquiana oja jjeshe huiosojjaya Eyacuiñajjiya oya cuana quea nee nee po mee caje'yo, quea yeno po mee caje'yo pea'ai. E'e, ojjaña jomajo ba'eya huohui canaje jama ba'a: “Ecuana jaya cuiñajji quea pame emeshi meseja epona jayojja jama poani, quea huiso aquiana quea nahue yani. E'ahuemano jayojja jama pojjeama. Quea jaji nee nee. Ojjaña jiquiojo ba'eca quea yeno po aja tii tii” poanaje cuiñajji quea mimishijo ba'eca cuana —jamaya poanaje pea eyajo ani enijje. ⁸—Jamatii quijke Eyacuiñajjiya ojjaña ma cuiñajijo ba'eca quea nee nee po mee caje'yo. Quea yeno po mee caje'yo. Quea shoe po mee caje'yo pea'ai. Ojjaña quiyo jeyojeyo mee caje'yo pea'ai. E'e, Eyacuiñajji quea ca'a nee nee ma dejja quea mimishi cuanajo jjashahuabaquije quea nee nee epo meeji —poanaje pea eyajo ani.

⁹Emeshi mese cuana dejja mimishi cuana ma cuiñajijo ba'e nijje quea mimishi nee nee poanaje. Jamajjeya ma cuiñajji jijianijo huichacha ba majje emeshi mese cuana pajeyo jama ba'a: —Ecuana jaya epeejji cuana ma cuiñajijo ba'e quiyo'yoqui. Onajaya aquiana quea huiso ecuanajaya quea boti nee nee. Quiyo'yo majje aquiana quea nahue, quea pame chama'yo tii poaje, de —jamaya emeshi mese quea mimishi pajeyo yeno jjejojo.

¹⁰Cuiñajji quea quemo quiyo'yanijo emeshi mese cuana quea huesha nee nequije'yo quea mete jjejojo. Quea yeno poaje pea'ai. Quea yeno po majje janobajjima nei pajeyo jama ba'a: —¡Bacue oe! Babinonia cuiñajji etii quea quemo nee nee quiyo'yoqui. Ecuana jaya epeejji cuana jomajo ba'e quea nee nee po'yoqui. Jjeya nei ojjaña jomajo ba'e mano cuajil'yonaje. Chama'yo tii poaje'yo —emeshi mese mimishi pajeyo.

¹¹Ojjaña dejja quea aquiana huiso ojjaña meshijo ba'e quea yeno poaje Babinonia quiyo'yajo. Oya cuana paje jama ba'a: —Ojjaña Babinoniajo ba'e chama'yo poanaje. Yahuajo ecuanajaya ohuaya aquiana quea huiso nee jjeshe canaje. Jjeya ejjeshe maja'yojjii pojjeama. ¹²E'e, yahuajo aquiana jjeshe canaje jama ba'a: Mei huo'o quea nahue, mei oshe quea nahue, mei sisi quea nahue cuana, mei oshe sisi quea copo pena bajjani cuana jjeshe canaje, daqui quea huiso quea nahue, daqui huo'o quea bame, daqui beje nei quea nahue, daqui huo'ohuo'o quea nahue cuana jjeshe canaje; ojjaña acui equecuashiyo quea shiye cuana quea nahue, ojjaña aquiana bame pealai jjeshe canaje yahuajo; acui ejehui quea nahue cuana, ijjiacajji cuanaja ese' ai'ai, mei jahua edahua, baa edahua cuana, mei ejaja bame cuana pealai yahuajo jjeshe canaje ma cuiñajji etijo ba'eca cuaa. ¹³Bobi quea shiye, quea johua po meeiji cuana jjeshe canaje pealai ma bajjani ba'a: canela, eña quea shiye cuana, madeja jayojja pohui quea shiye cuana, pea shiyeshiye pohui, jjonojjajja na sese, acuijjajja sei, anoso pohui jayojja, bobi anoso jayojja pealai jjeshe canaje. Ana'ai quea huiso cuana, ñajjajja quea huiso cuana, mapichi quea huiso cuana, mapichija aquiana edojoji quea huiso cuana, echacojji sosema' cuana, ojjaña chaco tiitii mee cani pealai jjeshe canaje cuaa ma cuiñajji etijo ba'eyea —jama pa animeya ojjaña dejja cuana poaje Babinonia quiyoqui ba majje.

¹⁴Majoya esohuidojoojji eyajo nequi ojjaña Babinoniajo ba'e nijje miminajje jama ba'a: —Yahuajo miquianaya ojjaña aquiana cuana jomajo ani jjeshe sa poanaje. Jjeya chama!. Ojjaña miquianajaya aquiana chama'yo tii tii poanaje. Eba'ejji quea pame chaco jjima chama' poanaje. Miquianajaya aquiana quea huiso nee eejjeshe o'oyajji pojjeama —esohuidojoojji poanaje.

¹⁵Majoya eya ohuaya huohui canaje jama ba'a: —Huani, Babinonia dejja cuaa aquiana quea huiso nee nee yahuajo jjeshe canaje. Jamajjeya dejja aquiana quiajji cuaa quea huiso nee nee aquiana Babinonia dejja huasijke quia huicha'a huicha'a canaje quea huiso nee nee bejjo sosejje. Jjeya Babinonia dejja cuana quiyo'yonaje, quea nee nee po'yonaje. Jamajjeya aquiana quiajji cuana quea huesha nee nequije quea mete jjejojo. Quea yeno poaje pealai. ¹⁶Pa neineije jama ba'a: “¡Oya bacue oe! ¡Babinonia cuiñajji etii quiyo'yonaje! Ecuanaja epeejji cuana jomajo ba'e quiyo jeyojeyo'yonaje. Ojjaña jomajo ba'e daqui quea nahue, daqui huo'o quea nahue, emeshi meseja daqui huo'ohuo'o jayojja quea nahue pealai huosho canaje. Eyijji mei huo'o quea nahue, mei sisi quea siyo, quea nahue, mei oshe sisi quea copo pena bajjani pealai daquijo ba'ehuana canaje. ¹⁷Jjeya nei ojjaña jomajo ba'e manocuaji'yonaje. Chama'yo tii po'yonaje” dejja quea aquiana huiso pa ani, achacula ojaya aquiana equia'yojji pojjeamajojo. Cuanaya ojjaña bishe ai mese cuana, ojjaña bishe aijo poquiani pealai, ojjaña echacojji bishe aijo chaco cani, ojjaña jai jjequicuayajji poani cuana pealai quea huesha nee nequije. ¹⁸Onaaya huichacha quea quemba caje ma cuiñajji etii quiyo'yanijo. Huichacha ba

majje huohui caje jama ba'a: "Babinonia quea pame nee, de. Pea cuiñajji quea pame pishana. ¡Chama' pea cuiñajji Babinonia jayojja!" pa neineije.

¹⁹ Babinonia quiyo'yani ba majje dejja cuana quea yeno nee poaje. Jamajjeya oya cuana quea yeno jjejojo meshi pohuiya jjasapa natajeaquije. Janobajjima nei pa neineije'yo pea'ai jama ba'a: —¡Oya bacute oe! ¡Babinonia cuiñajji etii quiyo'ya! Ojjaña dejja cuana bishe ai cuanajo chacochacoani quea bejjo huiso poanaje; quea huiso nee nee aquiana cuana jjeshe canaje Babinonia dejja cuaa bejjo sosejje —jamaya ojjaña bishe ai cuanajo nequi pajé.

²⁰ Majoya esohuidojiji miminaje jama ba'a: —Ojjaña eyajo ani, ¡quea bihui nee nee pocue! E'e, Babinonia cuiñajji quea mimishi nee nee quiyo'yonaje. ¡Ojjaña Jesosaja epeejji cuana, o shajja'ajjajji cuana pea'ai, ojjaña Eyacuiñajji esohui huohujji cuana, Jesosaja huoojea'yo esohui huohuiya pea'ai quea bihui nee pocue! Eyacuiñajjiya Babinonia quiyojea mee ca'ya, ojjaña jomajo ba'e pea'ai quiyojea mee ca'yonaje, miquianaya ohua napa canaje sosejje.

²¹ Majoya esohuidojijiya quea ca'a nee neeya mei quea quemo nee nee, shijje cuiapojomeejji mei quea quemo jayojja jeaoqueajea canaje bae ai yasijje. Mei chama'yo tii poanaje. Mei jeaoqueajea majje huohui canaje jama ba'a: —Eyaya mei janobajjima nei jeaoqueajea'yonaje. Jamaya eyaya Babinonia chama'yo tii po meeje'yo; janobajjima nei napaje'yo. E'iya o'oyajji pojjeama tii tii poaje'yo. ²² Yahuajo quea huiso jomajo ba'eya e'iñaqueyajji cuana iñaqueya canaje esohui cuayajji, dehue mia canaje, emiajji eshe'anja jayojja mia canaje pea'ai. Jamaya oya cuana yahuajo poanaje. Quijje ca chojja, jamaya epo o'oyajji pojjeama. Chama'yo tii poaje'yo. Quea huiso jomajo ba'e yahuajo chacochaconaje. Jjeya chama'yo tii echacorjji cuana poaje'yo. Quea huiso anoso ai cuana cuiapasha canaje cuaa yahuajo, meiya. Jjeya anoso ai cuiapashajji chama'yo tii poaje'yo quiyo'yo majje. ²³ Jomajo cuaquijji ejiji o'oyajji pojjeama tii tii, quea misi po tiitijje'yo. Jomajo jjahueaqui ajja tiitii poaje'yo. Chama' poaje'yo yahue esho'i oja huanase esho'i nijje emimijji quea bihui nee. Chama'yo tii tii. Yahuajo ojjaña jomajo ba'e quea aquiana huiso nee nee poanaje; pea cuiñajji cuanajo quea aquiana huiso pishana poanaje. Yahuajo Babinonia dejja cuaa quea huiso pea cuana dasia ca'yonaje. ²⁴ Quea huiso Jesosaja esohui huohujji cuana quecua ca'yonaje cuaa pea'ai esohui huohujji jojoya. Quea huiso pea cuana jomajo ba'e quecua ca'yonaje pea'ai, Babinonia dejja cuaa quea maseya jjejojo, de —ma esohuidojiji quea ca'a nee jamaya poanaje.

Eyajo ojjaña Eyacuiñajji bihuia canaje

19

¹ Majoya eyaya shajja'ajjanaje quea huiso nee nee eyajo ba'e. Oya cuana janobajjima nei sohuicuayani jama ba'a:

"Eyacuiñajji quea pame nee nee poani. Ohuaya ojaya epeejji cuana ba'e tiitii mee cani eyajo. Oya oe nei ba'e tiitiiani. Oya oe nei quea

ca'a nee nee nequi tiitiiani. ²E'e, ojaya ejjashahuabaqu'i'yojji dejja mimishi cuanajo e'e nei poani. Ma epona pea cojjoji nei nei quea nee nee po mee ca'yonaje. Maaya quea huiso meshi cuanajo ba'e cuana quea mimishi nee po mee canaje. Jamajjeya Eyacuiñajjiya oya quea nee nee po mee ca'yonaje. Cuanaya ma epona tayi Jesosaja epjeeji cuana quea huiso quecua ca'yonajejo Eyacuiñajjiya oya quea nee nee po mee ca'yonaje".

³Majoya ojjaña eyajo ba'e janobajjima nei taaa o'oyanaje jama ba'a: —Eyacuiñajji quea pame nee nee poani. Ohuaya ojjaña quea mimishi ma cuiñajji aijo ba'eca quiyo tiitii mee caje'yo.

⁴Majoya eyajo Jesosaja epjeeji etiyya quea huiso cuaa, ma 24 huisomeya, aquiana eshe cuaa ma ebeka pee pea'ai huisomeya ecui'oshajjajo nequiya Eyacuiñajji bihuia ca'yonaje. Jama taaaame poanaje ba'a: —Eyacuiñajji, miya quea pame nee nee. ¡Ojjaña miya cabihuia cahua! ¡Jamaya capo'yahua! —jamaya onaaya Eyacuiñajji e'anioque ani bihuia canaje.

⁵Majoya pea eyajo Eyacuiñajji pejjejo nequi taaaanaje jama ba'a:

“Ojjaña Eyacuiñajjiya epjeeji cuanaa, ojjaña Eyacuiñajjiya esohui shajja'ajjajji poaniya, ojjaña etiyya, ojjaña esho'i cuaa pea'ai, ¡Eyacuiñajji bihuiacue!”

Jamaya pea eyajo nequi taaaanaje.

⁶Majoya eyaya shajja'ajjanaje pea cuana quea shajjaquijjo. Quea huiso cueji taaaani jayojja, cuei quea quemo, quea cuejipashi nee mei pasaca biajje oqueani jayojja. E'e, ojjaña Eyacuiñajji janobajjima nei bihuia canaje jama ba'a:

“Eyacuiñajji quea pame nee nee. Eyacuiñajji quea ca'a nee nee ani tiitiije'yo. Ohuaya ojjaña huoojea tiitii cani. ⁷¡Eseyo ojo quea bihui nee capo'yahua! ¡Eseyo ojo quea bihui nee camimi'yahua pea'ai! Jama ba'a: Eyacuiñajjiyo ecuana quea bihui nee nee. Oya oe nei quea ca'a nee po tiitiiani. Oya oe nei yani tii tii. Jesosa, ma ñajjajja equecua'yo jayojja quea pame nee. Jjeya oya quea pame nee nequi yahue ejjhuanaquijjiyo jayojja. Ojjaña ojaya epjeeji cuana epona ejjahueaquijjiyo apoa jayojja jama quea boejea nee. E'e, Jesosa poeje o'oya ojaya epjeeji cuana jaahuanaa. ⁸Ojjaña ojaya epjeeji cuana daqui oshe quea pame, quea boejea, quea jeajahua huosho majje enequi. Jiquio ecua eponaja daqui oshe quea boejea ejjahueaquijji jayojja jama Jesosaja epjeeji cuana quea pame quea boejea'yo pea'ai ba'e”.

Jamaya pea cuaa eyajo nequiya Eyacuiñajji bihuia canaje.

⁹Majoya esohuidojiji eyajo nequiya eya huohui canaje jama ba'a: —Huani, esohui tehuecue jama ba'a: “¡Jesosa ejjhuanaquijjiyo ojjaña ojaya epjeeji cuana ojee ca'ljjia'ijjia mee cahua onijje! ¡Ojjaña onijje ojee ijja'ijjia ani quea bihui nee capo'yahua!” E'e, jiquio ecua esohui e'e nei nei poani. Jamaya Eyacuiñajji poani —eya jamaya acanaje esohuidojijiya.

¹⁰Majoya ojaya esohui shajja'ajja majje eya esohuidojiji pejjejo ecui'oshajjajo nequinaje o bihuiajji. Jamatii oya enijje miminaje jama ba'a: —Chojja, Huani. ¡A'a eya bihuiajji! Eya Jesosaja echacojji poani mi jayojjaya, miquea epeejji cuana jayojjaya pea'ai. E'e, miquianaaya Jesosaja esohui jayojja jama aña pea'ai. Edojjoshahua Pameya ojjaña Jesosaja epeejji cuana Jesosaja esohui ba mee cani quea ja'a nee, Huani. Jamajjeya ¡Eyacuiñajji oe nei bihuiacue! —ohuaya eya acanaje.

Huaniya Jesosa ba canaje mapichi osheja edaasa biajje ani

¹¹Majoya eyaya, Huaniya ojjaña eyajo ba neinei'yonaje. E cojja neijo mapichi oshe nequi. Oya mapichija edaasa biajje ani quea pame nee nee. Ojaya esohui e'e nei. Ojaya esohui pea cuanaja eba'ejjijo e'e nei pea'ai. Ohuaya ojjaña quea mimishi poani quecua cani, oya cuana quea nee nee po mee cani quea mimishi poanijo. ¹²E'e, oya mapichija edaasa biajje ani quea cojja jiji nee, cuaquijji jayojja cojjame; ojaya ejahuojja yani pea'ai. Ohuaya quea huiso emeshi mese cuana huoojea cani. Quea huiso cuaa oya shajja'ajja cani. Ojaya bajjani etehue'yo yani. Jamatii pea cuanaja maya ebajjani quea quehua. Ojaya eba ojaye nei ojaya bajjani. ¹³Ojaya daqui ao quea huo'o nee nee, ena' jayojja jama enajo iyanobiajea jayojjaya. Oya ca ca oe Eyacuiñajji esohui bameejji. ¹⁴Quea huiso eyajo ba'e o quishishijji poquije jjaquecuaquiya. Ojjaña quea huiso nee nee cuana mapichi osheja edaasa biajje poquije. Ojjañaja daqui oshe quea pame nee, quea nahue, quea boejea nee, de. ¹⁵Ojaya enabajje yani esohui quea ja'a nee baa quea ca'a, quea shejji nee jayojjaya. Ma esohui huohui majje ojjaña dejja cuana ojjaña meshi cuanajo jeabichajea caje'yo. Quea ca'a nee nee poanijo ohuaya ojjaña dejja ojaya esohui jayojja jama amee caje'yo. Ojjaña shajja'ajja mee caje'yo pea'ai. E'e, Eyacuiñajji ojjaña dejja mimishi ojjaña meshijo ba'e nijje quea quene nee nee poanijo ohuaya, ma mapichi osheja edaasa biajje aniya quea tecue ojjaña huoojea caje'yo. Jiquio ecua acuijjaja quecuapasha cani cuaa jayojja jama Jesosa Quitohua ojjaña dejja cuana acaje'yo; mete mee majje shajja'ajja mee caje'yo. ¹⁶Ojaya daqui aojo, ojaya huachinequi quea quemojo pea'ai yani ebajjani tehue'yo jama ba'a:

“Ojjaña emeshi mese cuana huoojeajji; ojjaña cuana huoojea'yoji poani”.

¹⁷Majoya eyaya, Huaniya pea esohuidojiji banaje eshequijo nequi. Ohuaya janobajjima nei iyaa canaje ojjaña be'o cuabesa ba'e; jama acanaje ba'a: —¡Be'o cuana! ¡Miquianaya poecue! ¡Ojee ijjiá'ijjiahacue! Eyacuiñajjiya dejja mimishi quea huiso quecua mee caje'yo. ¹⁸E'e, ijjeyahua nei emeshi mese cuana ijjiahacue, dejja mase cuanaja mese cuana, dejja ca'a cuana, mapichi cuana, mapichija edaasa biajje ani cuana, dejja mimishi quea huiso, echacojji sosema' cuana, echacojji bejjo sosejje chaco cani cuana, esho'i cuana, etii cuana pea'ai ojjaña ijjiahacue! —ohuaya acanaje be'o cuana.

¹⁹Majoya eyaya banaje ma shanei ai ejja quea huiso emeshi mese nijje, quea huiso dejja mase nijje pea'ai ojee poquiani Jesosa quecuua nisho, ma mapichi osheja edaasa biajje ani quecuua nisho, quea huiso cuana Jesosa nijje nequi quecuua nisho pea'ai. Ojjaña poquinaje Jamayeno meshi yasijje jjaquecuaquija. ²⁰Majoya Jesosaa shanei ejja, esohui huohuijji nisho pea'ai iña canaje. E'e, ohuaya iña canaje esohui huohuijji nisho, ma shanei ejja nijje tiiya quea huiso ma dejja aijima acanaje ojjaña cuana dasia'yojji, shanei ejja bihuia mee'yojji, ma shanei ejja nisho oja a'yo bihuiajji dasia'yojji, ojjaña joya shanei ejjaja dasia'yo majje oja bahua tehue pea'ai iña canaje. Jamajjeya ma shanei ejja, ma esohui huohuijji nisho pea'ai iña'yo majje Jesosaa oya cuana jeajea ca'yonaje bae ai jjiani yasijje, bae quea ihui yasijje. Jomajo tii quea nee nee po tiitijje'yo. ²¹Majoya Jesosaa mapichi oshejo e'anioque aniya ojjaña ejjaquecuaquiji cuana quea mimishi quecua jeyojeyo ca'yonaje baa jayojja, oja esohui'ya. E'e, ojaya enabajo baa jayojja yani, ojaya esohui. Majoya ojjaña dejja mimishi cuana mano'yajo, be'o cuana poeyanaje quea huiso nee nee. Emano'yo cuana ijja neinei ca'yonaje. Quea jejje nee nee poanaje be'o cuana ojjaña equecua'yo cuana ijja'yo majje. Jamaya eya, Huani cahuiba mee canaje.

**Edosiquiana nei jeyo canaje quea shequiaja
huiso nee nee 1.000 shequiajame**

20 ¹Majoya eyaya banaje pea esohuidojiji. Oya eyajo nequi meshi yasijje poeyani. Ohuaya jjani ai ma emano'yo cuana nequi quea doe nee nee nequi cuana cojja yahuejeajji ye cani emejo, aquiana quea ca'a cadena quea quemoyojja pea'ai ye cani. ²Ohuaya iña cañaquinaje, jeabichajea canaje Edosiquiana nei, sa'o ai quea mase nee Satanasa bajjani, ma yahuajo nei nei pea'ai esejaya etiiquiana pana coo ca jehua dasiajjii poa. Iña majje ma esohuidojijiya Edosiquiana jeyo canaje cadena quea quemohua quea shequiaja huiso nee nee, 1.000 shequiajame ejeanobiajeajji. ³Jeyo majje oya jeajea canaje jjani ai yasijje, ma emano cuana nequi yasijje quea doe nee nee yasijje. Capa canaje. Capa majje ca'a canaje. Ca'a majje cojjaahuejea canaje. Enaba capajji'yajo tehue canaje jama ba'a: "Edosiquiana nei ecuayaqui'yojji pojjeama quea shequiaja huiso nee nee, 1.000 shequiajame nequije'yo ojjaña meshijo ba'eca cuana dasia'yo jjima ya'yojji". Jamaya tehue canaje esohuidojijiya. Jamatii quijje nei ma shequiaja huiso nee nee apoa po majjeya Edosiquiana nei ma emano cuana huasijje, jjani ai quea doe nee nee yasijje ejeyo nequi cacuayaqui'yahua beca ba'i cuanajo dejja mimishi cuana dasia o'oyajji.

Ebionei eshequi mee o'oyajji

⁴Majoya quijje pishana eyaya banaje ona huoojeajji cuana e'anioque ani. Eyacuiñajjiya oya cuana huoojea canaje ojaya epeejji cuana huoojeaa Jesosa nijjeya. Eyaya banaje pea'ai quea huiso nee nee Jesosaja esohui

huohuijji cuana ma onaa sapa jajasejjajea ca poa. Mano mee ca'ya poa dejja mimishi cuua Jesosaja esohui huohuijji poanijojo, Eyacuiñajjija esohui cuana huohuijji poanijojo pe'aai. Jesosaja epeejji cuua yahuajo pishana shanei ejja quea mase pishana bihuia jjima, shanei ejja quea mase pishana nisho, meshi epana'yo pe'aai bihuia jjima. Ojaya ebahuajje, emejje pe'aai etehue'yo chama' shanei ejjaja eba'yoji, ma 666 jayojja tehueme'ya chama'. Eyaya oya cuana banaje shequije o'oya. Shequi o'oya mee majje Eyacuiñajjija oya cuana Jesosa Quito nijje ojjaña huoojeajji po mee caje'yo quea huiso nee nee shequiajame. E'e, 1.000 shequiajame Jesosa Quito nijje anije'yo. ⁵Pea eman'o'yo cuana ma quea mimishi mano'yo cuana shequi o'oya jjima; 1.000 shequiajame apoa po jjimahuajo oya cuana shequi o'oya jjima. Joya shequi o'oyani 1.000 shequiajame po jjimahuajo bajjani ebionei eshequi mee'yoji. ⁶Joya ebionei shequi mee caje o'oya quea bihui nee nee, quea pame nee nee poani. Oya cuana nee'ama poaje'yo. Epoqui'yoji pojjeama cuaqui yasijje. Joya ecua pea cuana quea mimishi poani jayojja jama epo'yoji pojjeama Jesosaja epeejji cuana. Chojja, oya cuana Eyacuiñajji nijje emimijji poaje'yo. Oya cuana ojjaña huoojeajji poaje'yo Jesosa Quito nijje pe'aai quea shequiajame huiso nee nee, 1.000 shequiajame.

Edosiquiana nei jeajea caje'yo cuaqui yasijje

⁷Quijje nei ma 1.000 shequiajame po majje Eyacuiñajjija Edosiquiana nei pichojea mee caje'yo. Jamajjeya oya poquije'yo. ⁸E'e, Edosiquiana nei poquije'yo ojjaña meshijo ba'eca dasiaa. Ohuaya ojjaña Co meshijo ba'e, Maco meshijo ba'e pea'ai dasiaqui caje'yo. Ohuaya oya cuana ojee epojji iyaa caje Eyacuiñajji quecuajji nisho. Ojjaña oja dasia'yo cuana Edosiquiana nei nijje nequije'yo. Oya cuana quea huiso nee nee poaje ojjaña meshijaji sope huiosoajja. ⁹Jamajjeya oya cuana quea mase nee nee poaje. Poquije'yo ojjaña meshi cuana huasijje ojjaña jeabichajeeaa. Eyacuiñajjija epeejji queya caje'yo equecuajji. E'e, Jenosanena queya caje'yo Eyacuiñajjija epeejji cuana jomajo nequi quecuajji nisho. Jamatii Eyacuiñajjija eyajo aniya dejja mimishi cuana ba majje cuaqui jeaoqueajea caje ona biajje. Oya cuana Jesosaja epeejji queya'yo epo tii nequi manodehuejeaje'yo, ojjaña. Ojjaña quiyo jeyojeyo caje'yo. Chama'yo tii poaje'yo. ¹⁰Majoya Eyacuiñajjija Edosiquiana nei jeajea caje'yo bae quea jiji nee jayojja huasijje, bae quea ihui, quea pase yasijje. Ma oja dasia'yo cuana pea'ai jeajea caje'yo bae jijiani yasijje, Eyacuiñajjija. Pea shanei ejja nijje, pea Eyacuiñajjija esohui huohuijji nisho quea mimishi pea'ai nijje oya cuana quea nee nee po tiitijke'yo bae jijiani yasijje.

Ojjaña quea mimishi cuaqui yasijje jea caje'yo ecuayaqui'yoji pojjeama

¹¹Majoya eyaya banaje jama ba'a: Epojja oe poajo Eyacuiñajjija ojjaña huoojea caje'yo enapa'yoji. Oya Eyacuiñajji quea jeajahua nee, quea oshe nee

nee bo oshe quea jeajahua nee jayojja. Ojjañaja Emeshi Mese nei oya. Ojjaña meshijo nequi, ojjaña eyajo nequi pealai quea ajjajja nee poani oyo. Jamatii oya cuana quehuajje poqui meemee aija, achacua epoquijji. ¹²Majoya eyaya banaje ojjaña dejja cuana ma yahuajo mano'yo cuana, jjeya nei mano'yo pealai; ojjaña etiiquiana cuana, ojjaña esho'i cuana pealai. Ojjaña nequinaje Eyacuiñajji cojja nei. Eyacuiñajjiya esohui etehue'yo cuana she'a canaje. Pea esohui etehue'yo she'a canaje pealai. Maya o ba'e tiitii mee'yojji oja tehue. Ma esohui etehue'yo ba majje Eyacuiñajjiya huohui canaje ojaya ejjashahuabaqui'yojji ojjaña ba'ya poa cuanajo. E'e, ma esohui etehue'yo ba majje ojjaña huoojea caje'yo. Ojaya epeejji cuana, ojjaña joya quea boejea poani cuana queabihui nee nee po mee caje'yo. Ojjaña joya quea mimishi po nequia poa cuana ca ca quea nee nee po mee caje'yo. ¹³Ojjaña ma yahuajo bae ai'lajo hui'l'yo cuana shequije o'oya. Ojjaña ma yahuajo mojea ca poa cuana, ojjaña emano'yojaa cuana pealai shequije o'oya. Ojjaña joya quea boejea poa cuana queabihui nee po mee caje'yo Eyacuiñajjiya. Ojjaña joya quea mimishi poa cuana ca ca quea nee nee po mee ca'yoquije tii tii. ¹⁴Majoya apoa. Ojjaña mimishi cuana bae ai jayojja jijiani yasijje jeajea caje'yo ecuayaquijji'yojji tii tii pojjeama. Ma bae jijiani bajjani Emano Beca'yojji, quea nee nee nee epo nequi'yojji. ¹⁵E'e, ojjaña joya ebajjani tehue'yo pojjeama Eyacuiñajjiya etehue'yojo o ba'e tiitii mee'yojjiyo aje oe jeajea caje'yo cuaquijiji yasijje, bae ai jayojja queajiji nee nee yasijje, de.

**Eyacuiñajjiya Huani ba mee canaje meshi
cuana, eyatahuatahua pealai eyacua**

21 ¹Majoya Eyacuiñajjiya eya, Huani ba mee canaje eyatahuatahua, meshi cuana pealai eyacua. Eyatahuatahua, meshi cuana pealai yahuajo jama pojjeama. Bae ai'ai cuana chama'yo tii poanaje. ²Eyaya Jesosaja epeejji cuana quea pame nee nee, quea boejea nee banaje. E'e, Jenosanena cuiñajji eyacua jayojja poanaje. Oya cuana eyajo Eyacuiñajji nijje nequi ojee nequioquenaje. ¡Oya cuana ache bame nee nee! Epona ejjahueaquijji jayojja, daqui eyacua quea pame nee huosho cani jayojja, ojaya ejjahuojja quecuaca'aquijji jayojja. ¡Jamaya Eyacuiñajjiya cuiñajji eyacua, ache bame nee nee! ³Eyaya shajja'ajjanaje pea Eyacuiñajji pejejo nequi enijje janobajjima nei mimiani jama ba'a: —Huani, ¡bacue oe! Meshi eyacuajo Eyacuiñajji dejja cuana nijje ba'e tiitiiani. Oya cuana Eyacuiñajjiya jama acaje ba'a: "Jiquio dejja cuana ecuea epeejji cuana poani. Eya ona nijje ani tiitijje'yo". ⁴E'e. Jamajjeya Jesosaja epeejji cuana quea yeno po aija tii tii, mano beca'yo aija, pa aija, shoe'ama, nee'ama poaje'yo tii tii. Yahuajo jama pojjeama poaje'yo —poanaje pea eyajo nequi.

⁵Majoya Eyacuiñajjiya ojjaña huoojeajjiya eya huohui canaje jama ba'a: —Eyaya ojjaña eyacua ameeña. Ecuea esohui e'e jojo nei. Jamaya eyaya aje, Huani. Jamajjeya ¡ecuea esohui tehuecue! —poanaje.

⁶Majoya Eyacuiñajjiya eya jama acanje ba'a: —Eya yahuajo nei nei ani tiitiia poa. Quijje nei eya ani tiitijje'yo pealai. ¡Ojjaña joya quea naba

taja jayojja poani poecue e que! Eyaya e'ishijji ishi meeje sosema!. Enijke jjapeequi sa neinei poanijo quea naba taja jayojja jama poani. Jamajjeya eyaya oya ba'e tiitii meeje'yo. ⁷Ojjaña joya enijke jjapee tiitiquiani Edosiquiana nei jeabichajeajji poani. Jamajjeya eyaya oya cuana ecuea ebacua cuana po meeje'yo. E'e eya, Eyacuiñajji ona nijje ani tiitije'yo. ⁸Pea cuana, chojja. Ojjaña quea mete jjejojo enijke jjapee pajeaqui'yani, eshahuaja epjeejjii cuana, ojjaña quea mimishi ba'e cuana, pea quecuajji cuana, pea cojjojji cuana, eyamiquecua cuana, ojjañaa quea tai acani, eyacuiñajji nisho bihuiajji cuana, ojjaña siajjepojji cuana, edasiajji cuana pea'ai poquije'yo cuaqui yasijje, bae ai jayojja jijiani yasijje poquije'yo. Maya bajjani Emano Beca'yojji quea nee nee epo nequi'yojji —Eyacuiñajjiya eya jamaya acanaje.

Huaniya ba canaje Jenosanena cuiñajji eyacua

⁹Majoya oe esohuidojiji enijke mimiya poeyanaje. Yahuajo pishana oya me oejje oe esohuidojiji cuana nijjeya me oejje beca caneco iñajji poanaje. Maaya dejja cuana me oejje beca napame acanaje. E que poe majje ma esohuidojiji jama poanaje ba'a: —Huani, ¡poecue enijke! Ojjaña Jesosaja epjeejjii cuana epona ejjahueaquijjiyo jayojja eyaya miya ba meeje —ohuaya eya acanaje Jesosajo, ma ñajjajja sho'i equecua'yo jayojjajo.

¹⁰Majoya Edojjoshahua Pameya eya dojo canaje eyiyo ao'ao daasa huasijje. Ohuaya eya ba mee canaje cuiñajji eyacua ojaya quea jea nee Jenosanena eyacua bajjani. Ma cuiñajji eyajo ani Eyacuiñajji anijo anioqueani Jenosanena eyacua. ¹¹Eyacuiñajji ma cuiñajjiyo nequi quea jeaja'a nee nee poani. Jasipe mei bajjani jayojja poani quea jeaja'a nee, tahuuo oshe eshequiya jeaja'a cani jayojja. ¹²Ma cuiñajji peeyi quea ao nee nee, quea quemó nee nee. Yani quea huiso esecue cuana, oe ejiojji beca, 12 secueme. Esohuidojijiya oe ejiojji beca huisome esecue cuana cuiña cani. Esecue cuanajo Isaenija bacua ejja cuanaja bajjani etehue'yo yani, oe ejiojji beca, 12 bajjanime. ¹³Eshequi poeje mijijje pea beca peejjima esecue jaa; eeno poeje mijijje pea beca peejjima esecue cuana jaa; ena poeje mijijje pea beca peejjima esecue cuana jaa; eshequi dobiquije mijijje pea'ai pea beca peejjima esecue cuana jaa. ¹⁴Ma cuiñajji quibo iya 12 meija quibo iya. Ma mei biajje etehue'yo yani, Jesosaja huoojea'yoja, 12 huisome cuanaja bajjani.

Jenosanena eyacua ipia'ajja canaje esohuidojijiya

¹⁵Esohuidojijiya ma enijke miminajeya ma cuiñajji ipia'ajja canaje mei huo'o baacuuya. Esecue cuana ipia'ajja canaje pea'ai. Jiyo ipia'ajja canaje pea'ai. ¹⁶Jamaya poanaje ba'a: Ojjaña cuiñajjiya ejjapeequijji'ya oya quemajja pea'ai. Ipia'ajja majje ba canajeache quemó nee nee poanaje ba'a: Quea quemó nee nee 2.200 kilometro quemome. Oya aohuajja pea'ai, 2.200 kilometro aome. ¹⁷Ejjapeequijji'ya quea moo nee nee,

64 metro moome. Ohuaya ipia'ajja canaje esejaya e'ipia'ajjajji jayojja.

¹⁸Ejjapeequijji'ya jasipe mei quea ca'a, quea jeaja'a. Cuiñajji mei huo'o oopana quea nahue nee nee, quea ja'a, tahuoo quea ja'a jayojja. Quea bame nee nee. ¹⁹Ejjapeequijji'ya quibobo yani quea huiso mei e'iya quea bame nee nee epojji, peapea mei cuana quea nahue nee nee jama ba'a: Jasipe mei cuana, sapino mei quea tahua jiji, asata mei cuana, esemeana mei cuana quea tahua jiji, ²⁰onise cuana quea huo'o siii oshe, caneniani cuana quea huo'o jiji, quesonite cuana quea jahua siyo, benio cuana quea jeajahua, topasio cuana jahuajahua jijijiji, quisopasa cuana iye tahuatahua. Jasine mei cuana pea'ai, ameta mei cuana iye huo'ohuo'o pea'ai. Mahuiso mei cuana ejjapeequijji'ya quibobo e'iya ani. Quea pame nee nee, sho acui iñajo ani eshequiya jeaja'a cajje jahua, huo'o, tahua poani jayojjaya. ²¹Oe ejiojji beca, 12 esecue jjani cuana ejaa. Ma esecue jjani cuana mei copo oshe pena ai bajjani cuana jayojja, quea nahue nee nee. Ejiojji cuana cuiñajji jaa mei huo'o oopana quea nahue, tahuoo oshe quea ja'a jayojjaya.

Huaniya cuiñajji eyacua quea jeajahua nee ba canaje

²²Ma cuiñajji ecuea ba jjima equi Eyacuiñajji bihuiajji jayojja. E'e, Eyacuiñajji quea ca'a nee nee ma cuiñajji jo ba'yani, Jesosa ma ñajjajja equecua'yo jayojja jomajo ba'yani pea'ai. Jamajjeya jamatii oya cuana bihuia cani, ojjañaa. ²³Jomajo Eyacuiñajjiya ojjaña jeaja'a cani. Jesosaa ma ñajjajja equecua'yo jayojjaa ejijijiya jeajiji cani jayojjaya. Jamajjeya quea ja'a nee nee poanijo eshequi, ba'l pea'ai chama' poani. ²⁴Jesosaa ojaya epeejji cuana quea bame nee nee po mee canajejo oya cuana ba'e mee caje'yo quea ja'a nee. Emeshi mese cuana ojjaña meshijo ba'eca cuaa Eyacuiñajji bihuia caje'yo jama ba'a: —Ojjaña aquiana quea pame miquea poani.

²⁵Cuiñajji esecue cuana eca'apejo tii nequije'yo sine'yo ajja jojoya. ²⁶Ojjaña cuana cuiñajji eyacua huasijje dobiquije Eyacuiñajji bihuiaa jama ba'a: —Eyacuiñajji, miya quea pame nee nee.

²⁷Jomajo ca ca ojjaña cuana quea mimishi cuana, quea tai cuana pea'ai, jjadasiaquijji cuana pea'ai edobiquijji pojjeama nei nei. Joya ebajjani tehue'yo cuana ca ca oe dobiqui mee caje'yo, Eyacuiñajjiya. Jesosaa, ma ñajjajja equecua'yo jayojjaa tehue canaje ojjaña ojaya epeejji cuanaja bajjani eba'e tiitii'yojji oja tehue.

Ena oshe eba'e tiitii mee'yojji

22 ¹Majoya pea esohuidojojiya eya cuei quea tahua, quea pame nee eyajo ba mee canaje. Ma cuei Eyacuiñajji e'lanioque ani pejjejo yobi nequi. Jesosa nequi pejjejo cuei shaja cuayaqui pea'ai. Ojjaña joya ma ena ishi cani ba'e tiitii mee cani Jesosaa, Eyacuiñajjiya pea'ai. ²Eyacuiñajjiya cuiñajji eyacuajo ejaa ejiojji quea quemlo. Ma ejiojji tii ma cuei quea pame jaa. Cuei sahuajo, beca mijijje yani acui bajjani Eba'e tiitii'yojji. Ojjaña

ba'ijo jjajja huicha'a huicha'ani. Ma acui iña cuana ijija majje ojjaña jomajo ba'e quea ja'a nee ba'e tiitiije'yo. ³Yahuajo ojjaña quea mimishi poanijo Eyacuiñajjiya quea camaja po mee canaje ojjaña meshi cuanajo ba'eca. Eyajo eba'ejji camaja'ama poaje mimishi cuana chama'yo poanijo. Eyacuiñajji eyajo ma cuiñajji quea pamejo anioqueani. Jesosa, ma ñajjajja equecua'yо jayojja, jomajo yani pea'ai. Jomajo Jesosaja epeejji cuaa oya bihuia tiitii caje'yo. ⁴Jesosaja epeejji cuaa oya ba caje'yo ecojjaa. Ojaya etehue'yo ebahuajje tehue canaje ojjañaja ebajji ojjaña ojaya epeejji cuana. ⁵Cuanaya Eyacuiñajji quea cojja ja'a nee, quea jeajahua nee poanijo ma cuiñajji quea ja'a nee po tiitiije'yo, misi'ama tii tii. Jamajjeya jomajo chama' cuaquijiji. Chama' eshequi pea'ai. Ojjaña ojaya epeejji cuana onijje nequi tiitiije'yo emeshi mese jayojja quea pame nee, ojjaña huoojeajji jayojja.

⁶Majoya ma esohuidojojji enijje miminaje jama ba'a: —E'e, ecuea esohui e'e jojo nei. Jamajjeya ¡shajja'ajjacue! Emeshi Mese neiya Eyacuiñajjiya yahuajo Edojjoshahua Pame huoojea canaje ojaya esohui huohuijji huohui meesahuaa. Eyacuiñajjiya eya, ojaya esohuidojojji huoojea canaje mi que, ma ohua quijje pishana acaje'yo ejjanequipana meequi'yojji —jamaya eya acanaje esohuidojojjiya.

⁷Majoya Jesosa enijje miminaje jama ba'a: —Huani, eya, Jesosa Quito poeje o'oya quijje pishana. Ojjaña jiquio esohui etehue'yo ma eya quijje aje'yo eyaya miya ba meeña e'e nei. Ojjaña joya jiquio esohui e'e jojo nei jama ajji poani quea bihui nee nee capoahua —Jesosa Quitoqua eya acanaje.

⁸E'e, eya, Huani ma esohuidojojji shajja'ajja majje ecuea ebajji ohua jjanequipana meequi cajo pea'ai, eya o pejjejo ecui'oshajjajo nequinaje o bihuaijji. ⁹Jamatii ohuaya eya jama acanaje ba'a: —¡A'a eya bihuaijji! Chojja. Eya Jesosaja echacojji poani mi jayojjaya, miquea epeejji cuana ma Eyacuiñajjiya esohui huohuijji cuana jayojjaya, ojjaña ojaya epeejji cuana jayojjaya jama poani pea'ai, eya. E'e, oya cuana jiquio esohui etehue'yo jayojja jama acani e'e jojo nei. Jamajjeya ¡Eyacuiñajji oe bihuiaque e'e jojo nei! —ohuaya eya acanaje.

¹⁰Majoya ma esohuidojojji miminaje enijje jama ba'a: —Huani, quijje pishana ojjaña jiquio esohui jayojja jama acaje'yo Eyacuiñajjiya. Jamajjeya tehue majje ejeejo jesohui etehue'yo a'a jjajjajji! ¡A'a esohui cuiabajiji! ¡Ojjaña ba meecue Eyacuiñajjiya ma ohua quijje pishana acaje'yo! ¹¹Ojjaña joya quea mimishi poani Eyacuiñajjiya huohui caje jama ba'a: “Ojjaña quea mimishi poani jamatii quea mimishiya capo tiitiiquiahua. Ojjaña quea tai jjashahuabaquiani jamatii quea taiya cajjashahuabaqui nequiahua tii tii. Jesosaja epeejji cuana ca ca quea ja'a nee canequi tiitiil'yahua. Ojjaña Jesosaja epeejji quea pame nee canequi tiitiil'yahua quea pame nee” poani Eyacuiñajji —jamaya ma esohuidojojji poanaje.

Jesosaja esohui ecuanajaya eshajja'ajjajji

¹²Majoya Jesosa enijje mimi o'yanaje jama ba'a: —¡Bacue oe! Quijje pishana eya meshi yasijje poeje o'oya. Poe majje eyaya ojjaña sosequiae'yo, onajaya eba'ejji sosejje. Ojjaña quea mimishi poani aje oe quea nee po meeje'yo. Ojjaña quea pame ba'enaje ca ca queabihui nee nee po meeje'yo, eyaya. ¹³Yahuajo nei ojjaña pana jjimahuajo eya yania tii tiia poa. Quijje ojjaña meshijo chama'yо tii poajo eya ani tiitije'yo. ¹⁴Ojjaña ecuea epjeeji cuana quea boejea, daqui quea boejea jayojja quea bihui nee poaje. Oya cuana acuijjajja eba'e tiitii mee'yojji ijija meeje. Eyacuiñajji cuiñajji eyacua huasijje dobiqui meeje'yo esecuejje. ¹⁵Ojjaña joya quea mimishi poani epoquijji pojjeama eyahuasijje Eyacuiñajji ani yasijje. Oya cuana iñahuehua jayojja jama quea tai, quea mase; jjajiojji cuiquijji cuana, pea cojoojji cuana, jjaquecuaquijji cuana pea'ai, eshahuaja epjeeji cuana pea'ai, sijjepoiji cuana pea ai, sijje po majje quea bihui nee poani cuana pea'ai —Jesosa poanaje.

¹⁶—Eyaya, Jesosaa huoojeanaje ecuea esohuidojojji miquiana que ecuea esohui huohuiya. E'e, ohuaya miquiana nijjeya huohui caje ecuea esohui ecuea esohui huohuijji cuana huasijje Asia meshijo ba'eca huasijje. Jodio cuanaja etiiquiana Dabi yahuajo nei Jodio cuanaja emeshi mese poa. Eya ca ca iña Dabija osecua poani. E'e, eya, Jesosa oe nei quea ja'a nee nee nequi, eshequi huiyejji majameta jayojja —Jesosa poanaje.

¹⁷E'e, eya, Huani jama poani ba'a: —Edojjoshahua Pameya ojjaña iyaa cani Jesosa nijje jjapeequi'yojji. Jesosaja epjeeji cuana ojjaña nijje mimiani jama ba'a: “¡Poecue ojjaña, Jesosa nijje jjapeequicue!”

Jamajjeya shajja'ajja majje ojjaña huohuicue jama ba'a: “¡Ojjaña poecue, Jesosa nijje jjapeequicue!”


¡Ojjaña quea naba taja nee nee jayojja poecue Jesosa que! E'e, ba'e tii tii sa poanijo ¡poecue Jesosa que! ¡Ena eba'e tiitii'yojji ishihuacue sosema! Jesosaja esohui cuana ena eba'e tiitijji jayojjaya.

¹⁸Eyaya, Huaniya miquianaya esohui huohuaña jama ba'a: Jiquio Jesosaja esohui shajja'ajja majje jama acue ba'a: ¡Pea esohui e'e nei pojjeama a'a huohuijji! Pea esohui e'e nei pojjeama miya huohuijao Eyacuiñajji quea nee nee tii tii po mee caje'yo. E'e, esohuidojojji cuanaja aquiana quea nee nee epo meejiya miquianaya quea nee nee po mee caje'yo. ¹⁹Jiquio Jesosaja esohui jayojja jama huohui sa po ajja shajjama' poanijo Eyacuiñajji ma shajjama' cuana cajaa acaje'yo. Jamajoya shajjama' cuana eba'e tiitii mee'yojji pojjeama Jesosa nijje. E'e, ma acuijjajja eba'e tiitii mee'yojji ijija mee jjima acaje'yo. Eyacuiñajji cuiñajji quea pame nee yasijje dobi meequei jjima acaje'yo. Jiquio esohui esohuidojojjiya huohui cajo eyaya tehue'yonaje.


²⁰E'e, Jesosa Quitohua ojjaña jiquio esohui etehue'yo cuana huohui canaje. Ohuaya huohui cani jama ba'a: —¡E'e jojo nei eya quijje pishana poeje o'oya!

²¹E'e, ¡jamaya capoe'yahua! ¡Jesosaa ojjaña Eyacuiñajiji epeejji cuana cajaahuana cahua quea pame nee!


Mahuiso Jesosaa jjanequipana meequi canaje ecuea ebajji ojjaña ohua acaje quijje. Eya, Huani jiquio esohui tehuenaje. Apoa.



PRIMER VIAJE MISIONERO DE PABLO



SEGUNDO VIAJE MISIONERO DE PABLO




TERCER VIAJE MISIONERO DE PABLO




VIAJE DE PABLO A ROMA


El Templo en el tiempo de Jesucristo




Plano del Interior del Templo



1. La Mesa y los Panes de la Proposición
2. El Candelabro
3. El Altar del Incienso
4. El Velo
5. El Arca del Pacto
6. Los Querubines







Mapa para el estudio de Los Hechos y las Epístolas

1. El primer viaje misionero de San Pablo.
2. El segundo viaje misionero de San Pablo.
3. El tercer viaje misionero de San Pablo.
4. El viaje de San Pablo a Roma.